


Burum-Mindik Bible



The New Testament and portions of the Old Testament in the
Somba-Siawari language of Papua New Guinea, also called the
Burum Mindik language.

Burum-Mindik Bible
The New Testament and portions of the Old Testament in the Somba-Siawari
language of Papua New Guinea, also called the Burum Mindik language.
Sampela hap Buk Baibel long tokples Burum Mindik long Niugini

Copyright © 1992, 2002 The Bible Society of Papua New Guinea

Language: Burum-Mindik or Somba-Siawari (Somba-Siawari or Burum-Mindik)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-11-22

PDF generated using Haiola and XeLaTeX on 18 Apr 2025 from source files dated 31 Aug 2023
c0871260-68cc-5a50-953f-52200e105d1e

Contents

| | |
|-------------------------|-----|
| FRT | 1 |
| Jenesis | 3 |
| Rut | 102 |
| Jona | 109 |
| Matyu | 114 |
| Mak | 189 |
| Luk | 234 |
| Jon | 310 |
| Aposol | 368 |
| Rom | 444 |
| 1 Korint | 480 |
| 2 Korint | 513 |
| Galesia | 537 |
| Efesus | 550 |
| Filipai | 563 |
| Kolosi | 572 |
| 1 Tesalonaika | 581 |
| 2 Tesalonaika | 588 |
| 1 Timoti | 592 |
| 2 Timoti | 603 |
| Taitus | 611 |
| Filemon | 616 |
| Hibru | 618 |
| Jeims | 645 |
| 1 Pitö | 655 |
| 2 Pitö | 666 |
| 1 Jon | 673 |
| 2 Jon | 682 |
| 3 Jon | 684 |
| Juda | 686 |
| Indelindel | 690 |

Urumelengö Buṇa Kimbi Jöhöjöhö Dölökṇi

**The New Testament and portions of the Old Testament in
the Burum Mindik (Somba-Siawari) language of Papua New
Guinea**

**Sampela hap Buk Baibel long tokples Burum Mindik long
Niugini**

Urumelengö Buṇa Kimbi

Jöhöjöhö Dölökṇi

The New Testament and portions of the Old Testament in the Burum Mindik
(Somba-Siawari) language of Papua New Guinea
[bmu]

Translation by Wycliffe Bible Translators

© 1992, 2002, The Bible Society of Papua New Guinea

Print publisher: 1992, 2002 The Bible Society of Papua New Guinea

Web version
2013, Wycliffe Bible Translators, Inc.
www.Wycliffe.org

<http://pngscriptures.org>

www.ScriptureEarth.org

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share – to copy, distribute and transmit the text under the following conditions:

- **Attribution.** You must attribute the work to Wycliffe Inc. (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice – For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim

long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.** Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

Jöhöjöhö Dölökŋi

Jenesis (Letotletot) Anutunöŋ jiiga yuai pakpak letotket. Jim-asa-asari

Buk kianön kösohot kewöni jiza: Anutunöŋ suep, gölme, mietkö yuainjiri pakpak aka ambazip miwikŋaim enjiiga siŋgisöndoknöŋ et etkuiga lömböt sihimbölönambuk mi gölme dop nenŋö qaknine öngöyök. Mewö et nenŋuiga Anutunöŋ oyaenŋkoyaen aka malbingö köna denöwöni mi arenŋöba miwikŋaiyök. Letotletot (Jenesis) buk kianŋö uruŋe likepŋi yahöt kewö ahözahot:

1) Boŋ 1-11 Kösohot könakönahiŋi: Anutunöŋ suep aka gölme miwikŋaim etkiiga ambazip yenŋö malmalŋine mutuk mianŋören denöwö asuhuyök. Adam aka Iw, Kein aka Abel yenŋö kösohotŋini. Noagö nalöŋe göulu ketanjan asuhuba gölme turuyök. Babilon mianŋören miri köröpŋi kötökŋi meget.

2) Boŋ 12-50 Israel yenŋö bömön jalöurupŋini yenŋö kösohotŋini: Mutuk Abrahamnöŋ Anutu möt nariba keuŋi tem köla maliga keuŋi jim teköiga solaniyök. Yanŋö andöŋe nahönŋi Aisak, isiŋi Jeikob qetŋi alaŋi Israel aka yanŋö nahönurupŋi 12 mienŋö kösohotŋini könaŋi könaŋi. Azi 12 mi Israel könagesögö kambu 12 mienŋö bem bömönŋina aket. Bem bömön Josefkö kösohotŋi mi tandökŋi kun. Denöwö asuhuiga Josefnöŋ mutuk Ijpt aniga yanŋö andöŋe iwiŋi Jeikob aka darumunurupŋi pakpak yenŋön mewöyök saiwaurupŋini yembuk Ijpt kantrinöŋ anda kiana malget.

Buk kianön ambazip yenŋö malmalŋinanŋö kösohotŋi gwötpuk jizapmö, Anutunöŋ denöwö ak enŋiyöhi, mianön kösohot mienŋö likepŋi bohonŋi akza. Malmalgö kösohot pakpak mienŋö ahakmeme azi bohonŋi mi Anutu. Könakönahiŋe suep, gölme aka mietkö yuainjiri pakpak miwikŋaim enjiiga siŋgisöndoknöŋ et etkuiga pöndaŋ Iwiŋini ölni mala bölönamŋini kewöta keuŋini jim teköba likepŋini melen enŋii qakŋine öngöi malget. Tosatjan Anutugö keu bapŋe angeri, i ölöpŋanök köyan köla enŋuanŋiri malmalŋinan mianŋö dop uteköba asuhuyök. Noagö nalöŋe saiwaŋi 8 yenŋön qahöpmö, ambazip tosatŋi pakpak yenŋön kömuget. Könaŋep jöhöjöhö keuŋi mi Abraham aka gwölönarökurupŋi könaŋep asuhugeri, yenŋöra enŋiyök. Jöhöjöhö keu mienŋö dop Anutunöŋ könagesöurupŋan oyaenŋkoyaen akingöra galöm köl enŋiiga mala kota mal öngöme. Ambazipnöŋ mönöwök denöwö Anutu möt narim waŋgigeri, kösohot tömbuŋi mienŋön mönö nalö kewöŋe mewöyök mötnaripninan guliba köhöimapköra bauköm nenŋimakze.

Buk kianŋö bahönŋi bohonŋi 10 mi kewö:

- 1) Suep, gölme aka yuai pakpak miwikŋaiyök. 1.1-2.25
- 2) Siŋgisöndökö lömböt sihimbölönambuk könahiyök. 3.1-24
- 3) Adamgö nalöŋeyök könahiba Noagören kaŋgorök. 4.1-5.32
- 4) Noagö nalöŋe o göulu ketanjan asuhuyök. 6.1-10.32
- 5) Babilon miri köröpŋi kötökŋi meget. 11.1-9
- 6) Semgö nalöŋeyök könahiba Abramgören kaŋgorök. 11.10-32
- 7) Bömön jalö karöbut Abraham, Aisak aka Jeikob 12.1-35.29
- 8) Isogö gwölönarökurupŋi mi kewö: 36.1-43
- 9) Josef aka yanŋö darumunurupŋi 37.1-45.28
- 10) Israel könagesö yenŋön Ijpt malget. 46.1-50.26

Anutunöŋ jim kutuiga yuai pakpak letotket.

¹ Könakönahiŋe Anutunöŋ Suep aka gölme miwikŋaim etkiyök.

² Miwikñaim etkiiga gölme mi gwamönñi aka kizik-kazukñambuk ahöyök. Ahöiga o diginñambuk mi söñapnönñ turuiga tarök. Mewö tariga Anutugö Uña Töröñan o mienjö qakñine anda kaba malök.

³ *Mewö maliga Anutunönñ kewö jim kutuyök: “Asakñan mönö asuhum tinğitma.” Mewö jim kutuiga miri mönö asariyök.

⁴ Asarii ehi mianjön mönö ölöwahiga asakñi pandamanöhök menden etkiyök.

⁵ Asakñangö qetñi wehön asakñi aka pandamangö qetñi sunğem mewö etkoholök. Mewö etkoholiga wehön mutukñi teköiga miri söñaua gianjiyök.

⁶ Gianjiiga Anutunönñ kewö jim kutuyök: “Mönö o sutñine suepkö jabö köhöikñi asuhuba o mendenñiga euke aka emuke ahömahot.”

⁷ Mewö jim kutuba suepkö jabö köhöikñi miwikñaiba mianjön o mendenñiga tinğita jabö qakñe euke aka jabö bapñe emuke ahöyohot. Mewö asuhuiga

⁸ suepkö jabö köhöikñi eukeangö qetñi suep qerök. Mewö qeriga wehön yahötñi teköiga miri kunbuk söñaua gianjiyök.

⁹ Gianjiiga Anutunönñ kewö jim kutuyök: “O suep bapñe ahözei, mi mönö qezakögetka kambu mohot aiga gölme örönñi asuhuma.” Mewö jim kutuiga mönö mewö asuhuyök.

¹⁰ Mewö asuhuiga örönñangö qetñi gölme qeta o kambu tokogeri, mianjö qetñi köwet etkoholök. Etkohola etkehiga mianjön mönö ölöwahök.

¹¹ Ölöwahiga kewö jim kutuyök: “Gölme qakñe mönö yuai görökñi (töngönñi) pakpak kewö asuhuba wahötme: Gwözözak yuai kötninambuk mi mönö asuhuba wahöta kötnini kuñguba söhömakñe. Ip kösö tandökñini könañi könañi mönö gölmenönñ asuhuba ölni kötninambuk kuñguba söhömakñe.” Mewö jim kutuiga mönö kewö asuhuyök:

¹² Gölme qakñe yuai görökñi (töngönñi) pakpak asuhuba wahötket. Gwözözak yuai kötninambuk tandökñini könañi könañi mi asuhuget. Ip kösö tandökñini könañi könañi mi gölmenönñ asuhuba ölni kötninambuk kuñgum söhöget. Mewö asuhuiga Anutunönñ enğehiga mianjön mönö ölöwahök.

¹³ Wehön karöbutñi teköiga miri kunbuk söñaua gianjiyök.

¹⁴ Gianjiiga Anutunönñ kewö jim kutuyök: “Suepkö jabö köhöikñe mönö asakñi asakñi asuhuba wehön aka sunğem mi menden etkiba kinda (yara) yambu, kömunjañ kie nalö aka wehön nalö, gwani nalö aka silim mohot mohotkö aiwesökñina ahöme.

¹⁵ Mienjön mönö suepkö jabö köhöikñi mianğöreñ asakñi asakñi aka gölme mem asarime.” Mewö jim kutuiga mönö kewö asuhuget:

¹⁶ Anutunönñ asakñi ketani yahöt miwikñaim etkiyök: Asakñangö galömnji wehön jeñi kiniga mianjö eretñi köiñ mi sunğemgö galömña kinda ahöm öngömahot. Senğelau mi mewöñanök miwikñaim enğiyök.

¹⁷ Anutunönñ mi suepkö jabö köhöikñe mianğöreñ gölme mem asarimegöra al enğiyök.

¹⁸ Mi gölme mem asariba wehön aka sunğem galömñina kinda asakñi aka pandamanñi menden etkimegöra al enğiyök. Mewö asuhuiga Anutunönñ enğehiga mianjön mönö ölöwahök.

¹⁹ Wehön 4:ñi teköiga miri kunbuk söñaua gianjiyök.

²⁰ Gianjiiga Anutunönñ kewö jim kutuyök: “O köwet mienjö uruñine mönö yuai isikusukñinambuk asuhuba dop köla o qeba ölölañgöba lañ anda kaba malme. Mewöñanök neiñi neiñi gölme qakñe könakemba bölbölgöba kutuba anda kaba malme.”

* 1:3; 2 Kor 4.6; 2 Pitö 3.5

21 Mewö jiba köwetkö sömbupni ketani ketani aka yuai isikusukninambuk tandokni kōnani kōnani o qeba ölölanğöba qeqelanlan anda kamakzei, mi miwiknaim engiyök. Mewöyök nei tandokni kōnani kōnani ginginambuk mi miwiknaim engiyök. Miwiknaim engiba engehiga mianön mönō ölöwahök.

22 Ölöwahiga kötuetköm engiba keu kewö jiyök: “Inini mönō köt morōninambuk jul sehiba o köwet dop köla malme aiga nei inini mönō mewōnanök gölme qakne ahum sehime.”

23 Keu mewö jiiga wehön 5:ni tekōiga miri kunbuk söñauba gianjiyök.

24 Gianjiiga Anutunōn kewö jim kutuyök: “Gölme qakne mönō yuai pakpak malmalnambuk tandokni kōnani kōnani asuhume. Mirigö sömbupni, yuai bapninan köla ölölanğömakzei aka aröknanğö sömbupni tandokni kōnani kōnani, mi mönō asuhume.” Mewö jim kutuiga mönō kewö asuhuget:

25 Anutunōn aröknanğö sömbupni tandokni kōnani kōnani mi miwiknaim engiyök. Mirigö sömbupni tandokni kōnani kōnani mi miwiknaim engiyök aka yuai pakpak bapni gölmenōn köla ölölanğömakzei, tandokni kōnani kōnani mi miwiknaim engiyök. Miwiknaim engiba engehiga mianön mönō ölöwahök. Mewö.

Anutunōn azi aka ambi miwiknaim etkiyök.

26 *Mianğö andōne Anutunōn kewö jiyök: “Ayop, nini mönō azi nanine tandökō dop meinga kaisongolomni ewö aka yuai pakpak galöm köl engiba malma. Yuai pakpak mi köwetkö sörañi, suepkö neiñi aka mirigö sömbupni, gölme körek aka yuai pakpak bapni gölmenōn köla ölölanğömakzei, mönō miengö galomñina aka malma.”

27 *Mewö jiba nanñi kaisongolomnanğö dop azi miwiknaiyök. Anutugö kaisongolomni ewö malmapköra i miwiknaim wanjiyök. Azi aka ambi malma-hotköra i miwiknaim etkiyök.

28 Miwiknaim etkiba i kötuetköba kewö jim kutum etkiyök: “Iniri mönō ahum sehiba gwölōnarōkpuk malohotka gölme dop köla malme. Mewö mala gölme toni akne. Mewö aka köwetkö sörañi, könakembagö neiñi aka sömbup mokoleñ laigisip gölmenōn anda kamakzei, mönō mi pakpak galöm köl engiba malme.”

29 Mewö jiba keu kewö jiyök: “Mötket, nöñön yöha kōnani kōnani gölme pakpak dop köla asuhuba wahöta kötñini kuñgum söhömakzei aka ip kösö pakpak öl kötñinambuk kuñgum söhömakzei, mi numbu nenenini akñapkōra al engizal.

30 Aröknanğö sömbupni pakpak, könakembagö neiñi pakpak aka yuai pakpak gölmenōn anda kamakzei aka tosatni pakpak söngörö ösumñini örōmakzei, yengöra gwözözak görökni (tōngōnñi) kōnani kōnani mi nenenamñini akñapkōra al engizal. “Keu mewö jiiga mönō mewö asuhuyök.

31 Asuhuiga Anutunōn yuai pakpak miwiknaiyōhi, mi ehiga mönō ölöp kötökni aiga urusösōngai mörök. Wehön 6:ni tekōiga miri kunbuk söñauba gianjiyök. Mewö.

2

Anutunōn kendon tarök.

1 Gianjiiga suepkö jakeni jakeni, gölme aka mietkö yuainiri akōdamunñirambuk pakpak mi lök miwiknaim engim tekōyök.

2 *Anutunōn nupni mi mei tekōiga wehön 7 mianğöreñ kendon tarök. Nupni pakpak meyōhanğöra wehön 7 mianğöreñ luhut meyök.

* 1:26: 1 Kor 11.7; Mat 19.4; Mak 10.6 * 1:27: Jen 5.1-2 * 2:2: Hib 4.4, 10; Eks 20.11

³ Miwimiwiknai nupni pakpak meyohangöra aka wehön miangören luhut meyök. Miangöra wehön 7:ni mi kendon jiba kötuetköba jim kömbuhyök. Mewö.

Oyaenkoyaen miri qetni Eden

⁴ Anutunöŋ suep gölme miwiknaim etkiiga asuhuyohoraŋgö kösohotni mi mewö. Kembu Anutunöŋ suep aka gölme miwiknaim etkiyöhi, nalö miangören

⁵⁻⁶ Kembu Anutugö jitsihitköra gölme qakne kie qahö yöhöiga nup kölkömötköra azi kun kude malökmö, gölme uruŋeyök bedunöŋ miyök kota gölme qakni dop köla mem samuruyök. Miangöra aröknaŋgö ip kösö kun me sombengö gwözözak yuai kun mi gölmenöŋ qahö asuhum tingita ahöyök.

⁷ *Nalö miangören Kembu Anutunöŋ gölme sömsöm memba mianön azi mem yaköba malmalgö numbu ösumni söŋgöŋe ui geiga öröba guliba malmalgö unañambuk ahök. Mewö.

⁸ Mewö aiga Kembu Anutunöŋ wehön kotkotne göröken miri qetni Eden miangören oyaenkoyaen nup kömöta azi miwiknaiyöhi, i miangören al waŋgiyök.

⁹ Al waŋgiba jiiga gölmenöhök ip tandökni kōnaŋi kōnaŋi asuhuba wahötket. Ip mi eksihimninambuk aiga ölni nenenji mi nahömninambuk. Oyaenkoyaen nup bibine malmal köhöiknaŋgö ipni aka mötkutukutugö ipni mi mohotne jim kutuiga asuhuyohot. Mötkutukutugö ipnaŋgö kōnaŋi kewö: Ölni namba mianön ölöŋni aka bölöŋni mietkö kōnaŋiri mi möt kutubahotpuk.

¹⁰ Ip mewö wahötketka o töwatni kun mi Edenök kōnahiba oyaenkoyaen miri mem kelita miangörenök eta jula o böröŋi töwatni 4 aka anget.

¹¹ O töwatni mutuknaŋgö qetni Pison, mi Hawila gölme körek liliköba ahöba anja. Gölme miangören goul ahöza. *

¹² Gölme miangö goulji mi ölöŋni kötökni akza. Sileqösösök umköhöwaknambuk qetni bedelion aka köt ölnambuk qetni oniks mi mewöyök miangören ahözahot.

¹³ O böröŋi töwatni jaŋgö 2 miangö qetni Gihon. Mi (Mesopotemiagö) gölme qetni Kus mi körek liliköba ahöba anja.

¹⁴ O böröŋi töwatni karöbutni qetni Taigris. Mi Asiria gölme wösöŋe wehön kotkotne göröken geba anja. O böröŋi töwatni jaŋgö 4 miangö qetni mi Yufreitis.

¹⁵ Mewö aiga Kembu Anutunöŋ azi waŋgita oyaenkoyaen miri Eden köl kömöta ek galöm aknapköra jiba al waŋgiyök.

¹⁶ Al waŋgiba kewö jiba jim kutum waŋgiyök: “Oyaenkoyaen nup uruŋe ip pakpak kin anjei, miengö ölni mi ölöŋ amgeba mem namba malman.

¹⁷ Mimö, mötkutukutugö ipkö ölni mi mönö kude neman. Mi namba ölöŋnaŋgö kōnaŋi aka bölöŋnaŋgö kōnaŋi möt kutuman ewö, gi mönö wehön miangörenök kömum köhöiman. Miangöra mi mönö kude neman.”

¹⁸ Mewö jiba Kembu Anutunöŋ jiyök: “Azinöŋ nannök maliga ölöŋ qahö akza. Miangöra nöŋön mönö nanni tandöknaŋgö dop alabaukni miwiknaimam.”

¹⁹ Mewö jiba aröknaŋgö sömbupni pakpak aka kōnakembagö neiŋi pakpak mi gölmenöŋ miwiknaim enŋgiba azigö kösutne enŋuaŋgita azinöŋ qetnini denöwö qetmawi, mi eka mötmapköra yaŋgören al enŋgiyök. Al enŋgiiga azinöŋ yuai malmalnambuk pakpak miengö qetnini mohok mohok qeriga Anutunöŋ mewö mia ahömapköra jim köhöiyök.

* 2:7: 1 Kor 15.45; Ind 2.7; 22.2, 14; Mat 19.5; Mak 10.7-8; 1 Kor 6.16; Ef 5.31

* 2:11: Hawila mi

Babilonia gölmegö jabö kösutne ahöza.

20 Mewö aiga azinöŋ mirigö sömbupŋi pakpak, könakembagö neiŋi pakpak aka arökŋaŋgö sömbupŋi pakpak mi qetŋini enŋim teköyök. Enŋim teköyökmö, nanŋi tandökŋaŋgö dop alabaukŋi malmapköra kun qahö miwikŋaiyök.

21 Qahö miwikŋaiiga Kembu Anutunöŋ mi eka azi mem lömböriiga gaun lömbötŋi ahöyök. Ahöiga maröm sihitŋi kun öröba dumdumŋi busuŋan mem gwözöŋnök.

22 Gwözöŋda azinöhök maröm sihitŋi meyöhi, mianŋön ambi meyök. I memba azigöreŋ waŋgita kayök.

23 Waŋgita kaiga azinöŋ i eka kewö jiyök:

“Yei! Ki nani tandöha. Yaŋgö sihit busuŋi mi nani sihit busunöhök asuhuza. Anutunöŋ i azigö sile kitipŋeyök mei letota azi tandök ewö maljawaŋgöra qetŋi mönö ambi (azigö alaŋi) qetme.†”

24 Mewö jiiga Anutunöŋ kewö jim kutum etkiyök: “Mewö aiga azinöŋ mönö iwinamŋi etkömosöta anömŋaŋgöreŋ qekötahöba silemohot aka malmahot.”

25 Azi mianŋön anömŋambuk opo sörorŋiri qahö aukŋe malohotmö, töndup nanŋiraŋgö gamuŋiri qahö möta malohot. Mewö.

3

Adam aka Iw Anutugö keuŋi qetala et etkuyök.

1 *Kembu Anutunöŋ gölmegö sömbup malmalŋinambuk pakpak miwikŋaim enŋiyöhi, miengö sutŋine mokoleŋnöŋ isimkakalek mötmötnöŋ sömbup pakpak mi enŋoŋgita öŋgöyök. Mewö öŋgöba ambigöra kewö jiyök: “Oyaenŋkoyaen mire ip pakpak kin anjei, miengö öŋŋini kun kude nemahotköra Anutunöŋ öŋŋa jim kutum etkiyök me qahö?”

2 Mewö jiiga ambinöŋ melenŋa mokoleŋgöra kewö jiyök: “Oyaenŋkoyaen mire ip tosatŋi kin anjei, miengö öŋŋini mi ölop nembitköra jiyök.

3 Mimö, miri bibiŋe ip kun kinjawi, mianŋgö öŋŋi mi memba kömumbitpuköra mönö kewö jiyök: ‘Mi mönö kude nemahot. Mia kude misirimahot.’ Mewö jim kutum netkii maljit.”

4 Mewö melenŋa jiiga mokoleŋnöŋ ambigöra kewö jiyök: “Mi saumbaŋ! Inŋiri kude kömumahot.

5 Mimö, ip mianŋgö öŋŋi mi neyohotka wehön mianŋgöreŋök mönö jeŋiran tohoiga Anutu ewö aka ölopŋaŋgö könaŋi aka bölöŋaŋgö könaŋi möt tekömahot. Anutunöŋ keu mi möta mewö asuhubapuköra keuŋi mewö jiyök.”

6 Mewö jiiga ambinöŋ ip mi uba ehiiga öŋŋi ölopŋi neneŋaŋgö dop ahök. “Mi eksihimŋambuk kiniga mötkutukutu ketanŋi awamŋanök niŋgima,” mewö mötmöriba öŋŋi kun meköba neyök. Memba apŋi yambuk malöhi, i tok waŋgiiga neyök.

7 Neiga jeŋiran mönö mianŋgöreŋök tohoiga silenŋiri aukŋe malohori, mi aŋgek kutuyohot. Mewö aŋgek kutuba kinda fig ipkö sinŋi mumburatiba opo sörorŋiri uba lata malohot.

8 Malohotka wehön jeŋi geiga miri löwöriiga Kembu Anutunöŋ oyaenŋkoyaen mire tiba kaiga köna ötoŋi mörohot. Mi möta awanöm yetkön Kembu Anutugö jemesoholŋeyök mömölaköba oyaenŋkoyaen mirigö ip uruŋine anda asambörohot.

9 Asambörohotmö, Kembu Anutunöŋ azigö qeta kewö jiyök, “Gi mönö denike maljane?”

† 2:23: Inŋlis keu eknöŋ: man aka woman keu yahöt mi öröröŋ tandök akzahot.

* 3:1: Ind 12.9;

20.2; 2 Kor 11.3; 1 Tim 2.14

10 Mewö qeta jiiga kewö melenök: “Gi oyaenkoyaen miri uruñe tiba kanönga köna ötöngi möta sileni aukñe maljalangöra kenötni mötzal. Miangöra mömölaköba asamböta maljal.”

11 Mewö meleniga kewö jiyök: “Gi sile aukñe maljani, mi mönö danön jii mötzan? Nöñön ip kungö kötni nembanbukö sonjo al gihiali, göñön miangöreñök kun nezan me?”

12 Mewö jiiga azinöñ kewö jiyök: “Ambi nömbuk malmapköra ninjinöñi, yanöñ mönö ip miangö kötni ninjiiga nezal.”

13 Mewö jiiga Kembu Anutunöñ ambi kewö qesim wanjiyök: “Göñön wuanöngöra mewö akzane?” Qesim wanjiiga kewö melenök: “Mokolenöñ mönö tilipköm ninjiiga nezal.”

Anutunöñ likepñi melenja lömböt engimapkö jiyök.

14 Mewö meleniga Kembu Anutunöñ mokolenjöra kewö jim wanjiyök: “Mewö akzananjöra aka gi mönö mirigö sömbupñi pakpak aka arökñangö sömbupñi pakpak yengö sutñine kewö jim qesuahöm gihibiga malman: Göñön mönö gölmenöñ malmanangö dop bakpan köla anda kaba sömsöm uruñe mala nesak yuai nemakñan.

15 *Mewö nempa ambibuk sutñire kerök al etkibiga mi möta malman. Kerök mi göhö gwölönarökurupki aka yangö gwölönarökurupñi yengö sutñine toroqeba ahöm öngöi kewö asuhuma: Yengöreñök azi kunöñ mönö göhö nöropki tölölahöiga göñön yangö köna gwakötñi yöhösulmakñan.”

16 Toroqeba ambi kewö jim wanjiyök: “Göñön gölömgabuk aka malnönga sihimbölonji ketanji al gihibiga masö ahum gihiiga möta morö mem engimakñan. Mi töndup sihimgan mönö apkahöra ahöm gihiiga yanön galömgöi aka malma.”

17 Toroqeba azi kewö jim wanjiyök: “Nöñön ip kungö ölnji nembanbuköra ‘Mia kude neman,’ jiba sonjo al gihialmö, göñön mi töndup anömgahö keunji wuatangöba nezan. Miangöra nöñön gölme mi göhöra aka saiköbiga ahöma. Mewö ahöiga göñön gölmenöñ malmanangö dop mönö sileqeçe aka nup gwötpuk memba sihimbölo möta nenegi miwikñaiba malman.

18 Nup memba malnönga göhö nene nupnöñ nungakal, koururuk (köwörörök) yuai mi asuhuiga arökñangö yöha yuai mi nempa malman.

19 Mewö mala mesoholge nöngöp ariba nup memba tup yakagi mewö nempa mala gölmenöñ mem gihiali, gölme miangöreñ mönö kunbuk lilingöba geman. Silegi gwakömnöñ mem gihibiga mala öngöbagun mönö kunbuk gwaköm akñan. “Mewö jim wanjiyök.

20 Azinöñ anömñi yuai pakpak malmalñinambuk maljei, miengö namñini aiga azinöñ qetñi Iw (Ewa) qerök. *

21 Kembu Anutunöñ sömbup silenjan opo söro memba Adam anömñet lat etkiiga malohot.

Anutunöñ Adam aka Iw Eden miangöreñök közöl etkiyök.

22 *Mewö malohotka Kembu Anutunöñ kewö jiyök: “Yei! Ambazip mi nengöreñök kungö dop aka ölopñi bölonji mietkö könanjiri lök menden etkibitkö mötzahot. Mewö aiga malmal köhöikñangö ip kötni kude nemahotköra sonjo alalmö, yetköñ nalö kewöñe toroqeba böronjiri börañda mi mewöyök mem nempa mewö mianön qahö kömumba teteköñi qahö köhöikñanök mal öngöbahotpuk.”

* 3:15: Ind 12.17; Hib 6.8 * 3:20: Iw keu miangö könanji mi ‘Malmal maljei, miengö namñini.’

* 3:22: Ind 22.14

²³ Mewö jiba miangöra oyaenköyaen nup Eden miangörenök közöl etkiba gölmenöhök mem etkiyöhi, mönö gölme miangörenök kölkömöt nup mema-hotköra melaim etkiiga yaigep geba anohot.

²⁴ Ambazip mewö közöl etkiba oyaenköyaen miri Edengö likepne wehön kotkotne göröken zerubim garata tosatni al enjiiga malmal köhöiknangö ip miangö kónaŋi utuba galöm kölget. Yeŋgö böröŋine bingö souŋi ketani aliga mianön könöp bölam ewö gilikbiliknambuk jeba andöŋe wösöŋe liliköba biliksikö dop aiga kinda galöm köla malget. Mewö.

4

Keinöŋ Abel qei kömuyök.

¹ Azi Adamnöŋ anömŋambuk mala amiyohotka Iwnöŋ (Ewa) gölöm ala Kein (Kain) meyök. Memba Kein qetköra kewö jiyök: “Anutunöŋ bauköm niŋgiiga nahöni mezal.”

² Iwnöŋ kónaŋgep Adamgö nahönŋi Abel, Keingö munŋi meyök. Abelnöŋ mala qariba lama galömŋina aiga Keinöŋ kölkömöt azia aka malök.

³ Mewö malohotka nalö kunöŋ Keinöŋ nupkö nene tosatni memba kaba Kembangöra jöwöwöl ohom waŋgiyök.

⁴* Abelnöŋ mewöyök lama kambuŋangö mutuk asuasuhunŋi tosatni meköba enŋuba kitipŋi kelökŋinambuk memba kaba Kembangö jöwöwöl ohoyök. Ohoiga Kembangöŋ Abel nanŋi aka jöwöwölŋi etkeka möri ölöwahök.

⁵ Ölöwahökmö, Kembangöŋ Kein aka yaŋgö jöwöwölŋi mi ek tököyök. Mewö aiga Keingö irimŋi seholiiga kömbuhiba jemesoholŋan bosoliyök.

⁶ Bosoliiga Kembangöŋ Keingöra kewö jii mörök: “Irimgi mönö wuanöŋgöra seholiiga jemesoholŋan bosoliza?”

⁷ Gi yuai ölöŋŋi aknöŋga möt anŋön köl gihibiga ölöŋ jemesoholgi öhal (hak) akŋan me qahö? Yuai ölöŋŋi qahö aknöŋga siŋgisöndokö Toŋan mönö urugahö naŋŋuŋe kinda göhöra ak gihiba mönömakza. Mewö mönömakzapmö, göŋön mönö miangö soŋgo ala galöm memba luhut alman.”

⁸ Kembangöŋ Keingöra mewö jii mörökmö, Keinöŋ töndup munŋi Abalgöra kewö jiyök: “Mönö nanirök nupnöŋ anbit. “Mewö jiiga nupnöŋ anda mala Keinöŋ luhuba munŋi Abel qelanjiba memba qeba qei kömuyök.*

⁹ Kömuiga Kembangöŋ Kein kewö qesim waŋgiyök: “Mungi Abel mi denike malja?” Qesim waŋgiiga kewö melenök: “Ni qahö mötzal. Ni munangö jegalöma qahö akzal.”

¹⁰ Mewö melenŋiga Kembangöŋ jiyök: “Gi wani yuaia akzan? Mötnöŋ, mungahö sepŋan mönö gölmenöhök qeriga mötzal.*

¹¹ Gölme kiangö numbuŋan aŋaŋiba mungahö sep börögeyök mezawi, nöŋön mönö kiangörenök közöl gihibi anman. Joramörahö mi mönö göhö qake albi öŋgöza.

¹² Közöl gihibiga kölkömöt nup menöŋga gölmenöŋ möriamŋangö ölni anŋön köl gihiiga gölme dop mömölaköba kekelolo aka ölöŋ köla laŋ anda kaba malman.”

¹³ Mewö jiiga Keinöŋ Kembangöra kewö jiyök, “Keunaŋgö likepŋi melenöŋga qakne öŋgözawi, mianön mönö ösumni onŋiri lömböriiga bisimangö osimam.

¹⁴ Mötnöŋ, gi merak ni nupqeŋe gölmenöhök nuatangönöŋga jemesohol-geyök mömölaköba gölme dop kekelolo aka ölöŋ köla laŋ anda kaba malmam. Miangöra kunŋan ni neka ölöŋ nuŋgui kömumbilenbuk.”

* 4:4: Hib 11.4 * 4:8: Mat 23.35; Luk 11.51; 1 Jon 3.12 * 4:10: Hib 12.24

¹⁵ Mewö jiyökmö, Kembunöŋ kewö jii mörök: “Mewö qahö. Kunŋan Kein qei kömuma ewö, miangö likepŋi mönö yaŋgö qakŋe öngöiga ambemŋi 7 akŋa. “Mewö jiba kunŋan Kein miwikŋaiba i qei kömumbapuköra silenŋe aiwesök kulem kun alök.

¹⁶ Mi aliga Kembangö jemesoholŋi mosöta anda anda gölme qetŋi Lanŋan lilikqilik (Nod) miangörenŋ aŋgota malök. Gölme mi Edenök wehön kotkotŋe göröken ahöza. Mewö.

Keingö gwölönarökurupŋi

¹⁷ Keinöŋ anömŋambuk mala amiyohotka gölöm ala Henok meyök. Keinöŋ taon kun memba nahönŋangö qetŋi Henok qet waŋgiyök.

¹⁸ Henokö nahönŋi qetŋi Irad. Iradkö nahönŋi Mehujael. Mehujaelgö nahönŋi Metusael. Metusaelgö nahönŋi Lamek. Mewö asuhuget.

¹⁹ Lameknöŋ ambi yahöt etkömeyök: Kun qetŋi Ada, kun qetŋi Zila.

²⁰ Adanöŋ gölöm ala Jabal meyök. Yaŋön ambazip opo seri koumŋine ahöba mala bau bulmakau galöm köl engiba maljei, yeŋgö bömönŋini ahök.

²¹ Jabalgö munŋangö qetŋi mi Jubal. Yaŋön ambazip gita kulele qeba awölop uba maljei, yeŋgö bömönŋini ahök.

²² Zilanöŋ mewöyök nahönŋi qetŋi Tubal-Kein meyök. Yaŋön qariba börögö tulsŋi aka bimqeqegö yuainŋi könaŋi könaŋi mi bras aka ainöŋ ohoi kolkolgöi qekötahöba mezapma. Tubal-Keingö nenŋi qetŋi Nama.

²³ Lameknöŋ nalö kunöŋ anömyahötŋi mi kewö jii mörohot, “Ada aka Zila anömyahötŋi, iŋiri mönö kezap ala keuni ki mötmahot: Kunŋan nuŋgum kuziriga uzinaŋgö kitipŋangöra mönö azi kun qebi kömuma. Kunŋan nuŋgum miziriga gurusep (gulibambam) löpötnangö kitipŋangöra mönö azi gwabö kun qebi kömuma.

²⁴ *Kunŋan Kein qeiga likepŋi yaŋgö qakŋe öngöiga ambemŋi 7 akŋapmö, kunŋan Lamek ni nuŋguiga miangö likepŋi mönö yaŋgö qakŋe öngöiga ambemŋi 77 akŋa. “Mewö.

Set aka Enos

²⁵ Azi mutukŋi Adam yaŋön kunbuk anömŋambuk mala amiyohotka nahönŋiri kun memba kewö jiyök: “Keinöŋ Abel qei kömuyöhangöra Anu-tunöŋ Abelgö salupŋe nahöni kun niŋgiza. “Miangöra qetŋi Set (Niŋgiza) qerök.

²⁶ Setkö nahönŋi mewöyök asuhuiga qetŋi Enos qerök. Mewö.

Nalö miangörenŋ ambazip yeŋön könahiba Kembangö qetŋi köuluköba malget. Mewö.

5

Adamgö gwölönarökurup yeŋgö qet areŋini

1 Hist 1.1-4

¹ *Adamgö isimorö aka amböisikurupŋi yeŋgö qet areŋ papianŋi ki. Anu-tunöŋ azi miwikŋaiyöhi, yaŋön mi nanŋi kaisoŋgolomŋangö dop meyök.

² Mewö memba azi ambi malmahotköra miwikŋaim etkiba nalö miangörenŋ qetŋiri ambazip * qeta kötuetköm etkiyök.*

³ Adamnöŋ mala yambuŋi 130 aiga nahönŋi kun asuhuyök. Mi Adam nanŋi kaisoŋgolomŋi aka tandökŋangö dop maliga qetŋi Set qerök.

⁴ Set asuhuiga nalö miangörenŋök Adamnöŋ toroqeba yambu 800 mala mala maliga nalö sutŋe miangörenŋ nahönböratŋi tosatŋi asuhiba öngöget.

⁵ Adamnöŋ mewö mala öngöba yambuŋi mindiriba 930 meköba kömuyök.

⁶ Kömuiga nahönŋi Set yaŋön yambuŋi 105 aiga nahönŋi Enos asuhuyök.

* 4:24: Mat 18.22 * 5:1: Jen 1.27-28 * 5:2: Ambazip mi Hibru keunöŋ adam. * 5:2: Mat 19.4; Mak 10.6

⁷ Enos asuhuiga nalö mianğöreñök Setnön toroqeba yambu 807 mala mala maliga nalö sutje mianğöreñ nahönböratñi tosatñi asuha öngöget.

⁸ Öngögetka Setnön mala mala öngöba yambuñi mindiriba 912 meköba kömuyök.

⁹ Kömuiga nahönñi Enos yañön yambuñi 90 aiga nahönñi Kenan asuhuyök.

¹⁰ Kenanön asuhuiga nalö mianğöreñök Enosnön toroqeba yambu 815 mala mala mal öngöiga nalö sutje mianğöreñ nahönböratñi tosatñi asuha öngöget.

¹¹ Öngögetka Enosnön mala mala öngöba yambuñi mindiriba 905 meköba kömuyök.

¹² Kömuiga nahönñi Kenan yañön yambuñi 70 aiga nahönñi Mahalalel asuhuyök.

¹³ Mahalalel asuhuiga nalö mianğöreñök Kenanön toroqeba yambu 840 mala mala mal öngöiga nalö sutje mianğöreñ nahönböratñi tosatñi asuha öngöget.

¹⁴ Öngögetka Kenanön mala mala öngöba yambuñi mindiriba 910 meköba kömuyök.

¹⁵ Kömuiga nahönñi Mahalalel yañön yambuñi 65 aiga nahönñi Jared asuhuyök.

¹⁶ Jared asuhuiga nalö mianğöreñök Mahalalelnön toroqeba yambu 830 mala mala mal öngöiga nalö sutje mianğöreñ nahönböratñi tosatñi asuha öngöget.

¹⁷ Öngögetka Mahalalelnön mala mal öngöba yambuñi mindiriba 895 meköba kömuyök.

¹⁸ Kömuiga nahönñi Jared yañön yambuñi 162 aiga nahönñi Enok asuhuyök.

¹⁹ Enok asuhuiga nalö mianğöreñök Jarednön toroqeba yambu 800 mala mala mal öngöiga nalö sutje mianğöreñ nahönböratñi tosatñi asuha öngöget.

²⁰ Öngögetka Jarednön mala mala mal öngöba yambuñi mindiriba 962 meköba kömuyök.

²¹ Kömuiga nahönñi Enok yañön yambuñi 65 aiga nahönñi Metusela asuhuyök.

²² Metusela asuhuiga nalö mianğöreñök Enoknön yambu 300:gö dop uruñi Anutubuk jöhöba anda kaba maliga nalö sutje mianğöreñ nahönböratñi tosatñi asuha öngöget.

²³ Öngögetka Enoknön mala mal öngöba yambuñi mindiriba 365 meköyök.

²⁴ Meköba uruñi Anutubuk jöhöba anda kaba maliga Anutunön öne wañiriga at atop (jiataton) kölok.*

²⁵ At atop köliga nahönñi Metusela yañön yambuñi 187 aiga nahönñi Lamek asuhuyök.

²⁶ Asuhuiga nalö mianğöreñök Metuselanön toroqeba yambu 782 mala mal öngöiga nalö sutje mianğöreñ nahönböratñi tosatñi asuha öngöget.

²⁷ Öngögetka Metuselanön mala mala mal öngöba yambuñi mindiriba 969 meköba kömuyök.

²⁸ Kömuiga nahönñi Lameknön yambuñi 182 aiga nahönñi kun asuhuyök.

²⁹ Asuhuiga qetñi Noa (kölalep) qeta kewö jiyök: “Anutunön gölme saiköiga nini börönan nup köl kömöta sileqeçe aka sihimböle möta malinga morö kianön mönö ölop urukölalep neñgimakña.”

* 5:24: Hib 11.5; Jud 14

³⁰ Noa asuhuiga nalö miangörenök Lameknöh toroqeba yambuñi 595 aiga nalö sutne miangören nahönböratñi tosatñi asuhiba öngöget.

³¹ Öngögetka Lameknöh mala mala mal öngöba yambuñi mindiriba 777 meköba kömuyök.

³² Lameknöh kömuiga nahönñi Noa yañön yambuñi 500 aiga nahönurupñi karöbut qetñini Sem, Ham aka Jafet asuhuget. Mewö.

6

Gölme ambazipnöh böliba anğöjörakñinambuk aket.

¹* Ambazip gölme qakne malgetka qötöñinan könahiba qariiga bōraturupñini mi mewöyök asuhuget.

² Asuhugetka nalö miangören Anutugö nahönurupñi yeñön ambazip yeñgö bōraturupñini enğeketka eksihimñinambuk aketka enğek sorigeranğö dop mi pakpak enğömegetka anömurupñini aket.

³ Mewö aketka nalö miangören Kembunöh keu kewö jiyök: “Gölme ambazipnöh silebuk nalö teteköñi qahö mal öngömemö, yeñön mönö kömume. Areni mi mewö al enğizal. Nalö kewöneyök könahiba malmalñini mönö yambu 120 janğö mi qahö onğita mal öngöme.”

⁴ Anutugö nahönurupñi yeñön gölme ambazip yeñgö bōraturupñini enğömegetka morö mem enğigetka nalö miangören aka könanğep mewöyök azi weliwelipñinambuk mönö asuhiba qariba gölmenöh malget. Möpñanğö möpñeyök bemurup qetbuñanñinambuk malgeri, yeñön mönö mia aket.*

⁵ Gölme ambazip yeñgö bölönamñini mi keta bölökñi aiga uruñinanğö mötmöt areni mi pakpak mi nalö dop qösösök (qörörök) bölönanök pakpak aka malgeri, mi Kembunöh ehök.

⁶ Mi eka ambazip miwikñaim enğiiga gölmenöh malgeri, miangöra Anutunöh möt bölüm anğuiğa wösöbiriknöh uruñi kokolak qeiga sihimbölä möta malök.

⁷ Mewö möta mala keu kewö jiyök: “Ambazip miwikñaim enğiali, nöñön mönö mi gölmenöhök qeteköm enğimam. Ambazip, mirigö sömbupñi, yuai bapñinan köla ölölöngömakzei aka könakembagö neiñi mi miwikñaim enğialanğöra möt bölüm anğuba mi mönö qeköm enğimam.”

⁸ Mewö jiyökmö, azi Noa yañön Kembugö jeñe ak-kömükömu miwikñaiyök.*

⁹⁻¹⁰ Noagö gwölönarökurupñi miengö kösohotñini mi kewö: Nahönurupñi karöbut qetñini Sem, Ham aka Jafet mi asuhuget. Noanöh ambazip sutñine azi solanñi köpösihitkö keuñi qahö mala uruñi Anutubuk jöhöba anda kaba malök.*

¹¹ Noanöh mewö malökmö, ambazip tosatñi pakpak yeñön Anutugö jeñe gonğiba bölüm tekögetka ambazip ayuhum enğienği mi gölme körek dop köla ahöyök.

¹² Ambazip pakpak gölmenöh anda kaba malmalñini mem bölüm tekögetka miri gölme pakpak yeñgö ahakmemenñini mi gonğiba anğöjörakñinambuk aiga Anutunöh gölme uba tandökñini mi mewö ehök.

Wanğe memegö areni

¹³ Mewö eka Anutunöh Noagöra keu kewö jii mörök: “Ambazip yeñgöra aka ayuhum enğienği mi gölme körek dop köla ahöza. Miangöra nöñön ambazip pakpak mem kömum teköm enğimangöra mönö keuni jöhöyal. Mötnöh, nöñön mönö onöh gölme melenbi geiga yuai pakpak isikusukñinambuk mi kömum teköme.

* **6:1:** Job 1.6; 2.1 * **6:4:** Jan 13.33 * **6:8:** Mat 24.37; Luk 17.26, 1 Pitö 3.2 * **6:9-10:** 2 Pitö 2.5

14 Mianğöra gōñon mōnō suman ip kōla mianñon nangahōra wañge kun meman. Mianğō uruñi kutunōñga uruñi morōmorō asuhume. Wañgegō uruñi aka silenji mi qandōñnōñ me gisak marasinōñ kōsiba ohom tekōman.

15 Wañge mi kewō meman: kōrōpñamñi 133 mita (450 fit), andipñi 22 mita (75 fit) aka kōñgepñi 13 mita (45 fit) mewō meman.

16 Boñi muhungōba sel aka bo sutñire lilikōba jeñgenañ tiñi 44 sentimita (18 ins) mi mosōta kōtohoman. Wañgegō uruñi mōsōñnōñga uruñi qakñi, kembañi aka dutñi karōbut asuhume. Wañge nanğunji mi namñe alman.

17 Mōtman! Nōñon mōnō jibiga gōulu ketañan kota gōlme jōmukñi kōl tu-ruiga ambazip aka yuai malmalgō osumñinambuk pakpak suep bapñe maljei, mienñon mōnō o nemba nemulahōba kōmume. Mewō kōmumba gōlmegō yuai pakpak mi mōnō qahōwak tekōme.

18 Mewō asuhumapmō, nōñon gōbuk jōhōjōhō areñ kewō akzal: Gi mōnō wañgenōñ òñgōman. Gi, anōmgi aka nahōniranurupki eñon mōnō mohotñe wañgenōñ òñgōme.

19 Òñgōba mala yuai malmalñinambuk pakpak mi qahōwak tekōbepukōra yeñgōreñok yahōt yahōt aziñi aka ambiñi mi dopñine eñğuañgitnōñga gōbuk mohotñe wañgenōñ òñgōme.

20 Nei tandōkñini kōnañi kōnañi, mirigō sōmbupñi tandōkñini kōnañi kōnañi aka gōlmegō mokoleñ, lolohom yuai tandōkñini kōnañi kōnañi kōrek yeñgōreñok yahōt yahōt mi mōnō kōmumbepukōra eñğuañgitnōñga gōhōreñ kañgotketka òñgōme.

21 Mewōyōk nanñini aka nei, sōmbup yuai pakpak yeñon nemeañgō dop mōnō numbu nene kōnañi kōnañi miwikñaiaba otoñ qezakōba wañgenōñ alnōñga kahaimōk ahōma.”

22* Anutunōñ Noa mewō akñapkō jim kutum wañgiiga mianğō dowōk mōnō tem kōla mi pakpak ahōk. Mewō mia aka mem tekōyōk.

7

Ambazip aka sōmbup pakpak mi wañgenōñ òñgōget.

1 Noanōñ wañge mem tekōiga Kembunōñ keu kewō jii mōrōk: “Gi ambazip kambu kienğō sutñine solañi aka maljan. Nōñon gōhō kōnañamgi mewō miwikñaijal. Mianğöra gi aka saiwaurupki pakpak iñini mōnō wañgenōñ òñgōme.

2 Sōmbup neneñi, dōñqizizinnini qahō mi pakpak yeñgōreñok sewen sewen, aziñi 7 aka ambiñi 7 dopdop eñğōmenōñga gōhōreñ kañgotme. Mewōyōk sōmbup dōñqizizinninambuk pakpak yeñgōreñok yahōt yahōt aziñi aka ambiñi mewō eñğōmenōñga gōhōreñ kañgotme.

3 Toroqeba nei kōnañi kōnañi pakpak yeñgōreñok mewōyōk sewen sewen, aziñi 7 aka ambiñi 7 mi eñğuañgitnōñga gōbuk wañgenōñ òñgōme. Mewō aknōñga sōmbup aka nei tandōkñini kōnañi kōnañi pakpak mi kude qahōwakñemō, toroqeba gōlmenōñ ahumsehip aka malme.

4 Òñgōgetka wehōn 7 tekōiga jim kutubiga kie rōmbum ketañan mōnō gōlmenōñ eta yōhōiga sunğem silim 40:gō dop toroqeba yōhōm tekōma. Mewō yōhōiga yuai isikusukñinambuk pakpak miwikñaim eñgiali, mi mōnō mohotñe jim tekōbiga gōlmenōhōk qahōwakñe.”

5 Kembunōñ Noa mewō akñapkō jim kutum wañgiiga mianğō dowōk mōnō tem kōla mi pakpak ak tekōyōk.

6 Mewō mia aka meiga yambuñi 600 aiga gōulu ketañan gōlme qakñe kañgorōk.

* 6:22: Hib 11.7

7 *Kaṅgotmapkö aiga Noa anömṅet aka nahöniranurupṅiri yeṅön mohotṅe göulunöṅ kömumbepuköra ölöṅ köla waṅṅenöṅ öṅgöget.

8 Mewöyök sömbup neneṅi, dönqizizini qahö aka sömbup dönqizizininambuk aka nei aka yuai pakpak bapṅinan köla ölöṅgömakzei,

9 mi yahöt yahöt pakpak aziṅi aka ambiṅi mi dopdopṅine waṅṅenöṅ öṅgöba Noagöreṅ kaget. Anutunöṅ Noa jim kutum waṅṅiyöhi, mi mönö miangö dop asuhuyök. Mewö.

Göulunöṅ ambazip turum enṅii kömuget.

10 Mewö asuhuiga wehön 7:göra jiyöhi, mi teköiga göulu ketanṅan gölme qakṅe kaṅgorök.

11 *Noanöṅ yambuṅi 600 aiga yambu miangö köiṅi 2 miangö wehönṅi jaṅgö 17 silim miangöreṅ o jeṅi pakpak, o diginṅinambuk miengö namṅini pakpak mi emuyök qariba qariba kotket. Mewöyök euyangöreṅ könakembagö onṅi onṅi miengö numbuṅini mi aṅaṅiget.

12 Kie römbum ketanṅi mi gölmenöṅ eta yöhöba yöhöba suṅgem silim 40:gö dop ahöyök.

13 Kienöṅ könahimapköra aiga wehön miangöreṅ Noa aka nahönurupṅi Sem, Ham aka Jafet, Noagö anömṅet aka iranurupṅiri karöbut yeṅön mohotṅe waṅṅenöṅ öṅgöm teköget.

14 Toroqeba arökṅaṅgö sömbupṅi aka mirigö sömbupṅi pakpak, yuai pakpak bapṅinan köla ölöṅgömakzei, nei pakpak aka yuai ginginṅinambuk pakpak mi ambazip yembuk mohotṅe waṅṅenöṅ öṅgöm teköget.

15 Anutunöṅ yuai pakpak malmalgö ösumṅinambuk miwikṅaim enṅiyöhi, miengöreṅök yahöt yahöt (2-2) mi Noagöreṅ kaṅgota waṅṅenöṅ öṅgöm teköget.

16 Anutunöṅ Noa jim kutum waṅṅiyöhaṅgö dop yuai isikusukṅinambuk pakpak waṅṅenöṅ öṅgöm tekögeri, mi aziṅi aka ambiṅi ahot. Körekṅan öṅgöm tekögetka Kembunöṅ nanṅak Noagö andöṅe waṅṅegö nanṅuṅi kölöc.

17 Nanṅuṅi köliga miangöreṅök göulu ketanṅan könahiba suṅgem asak 40:gö dop toroqeba gölmenöṅ kaṅgoriga o yeṅön qariba qariba gölme köl turuba öṅgöba waṅṅe gölmenöhök koaṅgetka wahöta öṅgöyök.

18 Öṅgöiga o yeṅön gölme qakṅe qariba qariba öṅgögetka waṅṅenöṅ o qakṅe nanṅök öne laṅ anda kaba ahöyök.

19 Mewö aiga onöṅ gölme qakṅe kunbuk qariba öṅgöyök. Mewö kundunṅi köröpṅi köröpṅi suepkö bapṅe kin anjei, mi pakpak mönö musulungöm enṅiyök.

20 Musulungöm enṅiba öṅgöba öṅgöba kundunṅi bohönṅi bohönṅi mi köl turuba 8 mita (25 fit) miangö dop enṅonṅita ahöyök.

21 Mewö ahöiga yuai isikusukṅinambuk pakpak gölme qakṅe anda kaba malgeri, mienön o nempa nemulahöba kömum teköget. Yuai pakpak mi nei me mirigö sömbupṅi me arökṅaṅgö sömbupṅi me mokoleṅ, gisip aka yuai pakpak kambuṅini köla gölmenöṅ qeqelanṅan anda kamakzei aka ambazip pakpak mi mohotṅe qahöwak teköget.

22 Yuai pakpak gölme örönṅe mala malmalgö ösumṅi söṅgöörönṅine öröba malgeri, mi körekṅanök kömum teköget.

23 Yuai malmalṅinambuk pakpak gölmenöṅ malgeri, mi Anutunöṅ enṅum teköyök. Yuai pakpak mi ambazip, sömbup me yuai bapṅinan köla ölöṅgömakzei me könakembagö neiṅi neiṅi mi mönö Anutunöṅ enṅum teköyök. Noa aka saiwaurupṅi waṅṅe uruṅe malgeri, miyök mönö enṅehoriba aṅgön köla gou köl enṅiyök.

* 7:7: Mat 24.38-39; Luk 17.27 * 7:11: 2 Pitö 3.6

²⁴ O göulu mianön gölme köl turuba qahö öröba geyökmö, wehön 150:gö dop ahöyök.

8

Göulunöy öröba eriga gölmenöy öröniyök.

¹ Wehön 150 mi teköiga miangörey Anutunöy Noagö aka arökñangö mirigö sömbupñi aka yuai pakpak yambuk wanğenöy malgeri, mi mötmörim enğiba luhut ketanji röja aliga gölme qakñe qeiga onöy könahiba öröba erök.

² Anutunöy emune o diginñinambuk yengö jeñini aka euyangörey könakembagö onji onji mienğö numbuñini mi qaliba sonğo aliga kienöy tingita tömböriba suepnöhök kunbuk qahö erök.

³ Qahö eriga o ketanjan könahiba gölme qakñe ahöahöneyök lilingöba öröba eta geyök. Wehön 150:gö dop o mienön öröba eta geba ahöget.

⁴ Mewö ahögetka wanğenöy köiñ 7 mianğö silimñi 17 mianğörey kundunji qetñi Ararat mianğö bohonñi kunöy mekötahöba köhöiba tarök.

⁵ Mianğörey tariga o mianön toroqeba öröba eta eta anök. Anda köiñ 10 mianğö silimñi mutukñi mianğörey kundunji mienğö bohonñini mi aukñe asuhum tingitket.

⁶ Tingitketka wehön 40 teköiga Noanöy wanğegö jeñgenanji mutuk memenji mi metalök.

⁷ Metala koekoe nei kun melaiiga könakemba lan bölbölgöba anda kaba qahö lilingöba maliga gölmegö onji mianön jöpköyök.

⁸ Mianğö andöye Noanöy kembö kun melaiiga anök. Gölme qakñe onöy öröba geyök me qahö, mianğö könanji mötmamğöra mi melaiiga anök.

⁹ Kembönöy anda kaba onöy toroqeba gölme körekñanök turuba ahöyöhanğöra luhut memenangö tatatñi qahö miwikñaiba wanğegörey lilingöiga Noanöy böröñi böranda wange uruñe wanjiriga öngöyök.

¹⁰ Öngöiga wehön 7:gö dop toroqeba mamböt mala mianğörey kembö mi kunbuk wanğenöhök melaiiga anök.

¹¹ Anda mare mianğörey lilingöba oil ipkö sinñi gwölögwölö kun mi meteköba numbuñan yöhösañda Noagörey kayök. Mewö kaiga Noanöy mi eka kewö möt asariyök: Onöy mönö öröba eriga gölmenöy asuhum teköza.

¹² Mi möt asariba kunbuk wehön 7:gö dop mamböta kinda kembö mi kunbuk melaiiga bölbölgöba anök. Anökmö, nalö mianğörey mi yanğörey kunbuk qahö lilingöba kayök.

¹³ Noagö malmal yambuñi 601 mianğö köiñ mutukñangö silimñi mutukñi mianğörey onöy gölme qakñe jöpköba öröniba ahöyök. Mewö aiga Noanöy wanğegö bonji mei aniga kewö uba ehök: Gölme qakñan mönö öröniba ahöyök.

¹⁴ Mi ehi kunbuk öröniba köiñ yahötñangö silimñi 27 mianğörey örönim teköba ahöyök.

¹⁵ Anutunöy Noagöra keu kewö jiba jii mörök:

¹⁶ “Gi, anömgi aka nahöniranurupki inini mönö wange mosöta etket.

¹⁷ Eta sömbup yuai malmalñinambuk pakpak göbuk wanğenöy maljei, mi neiñi neiñi, mirigö sömbupñi aka mokoleñ yuai pakpak bapñini gölmenöy köla ölölöngömakzei, mi mönö körek enğuanğita etket. Mewö aknönğa ölöp gölmenöy ahum sehiba gwölönarökpuk aka denğa gölme dop köla malme.”

¹⁸ Mewö jii möta Noa anömñet aka nahöniranurupñi yeñön mohotñe wange mosöta etket.

¹⁹ Etketka arökñangö sömbupñi pakpak, mokoleñ yuai pakpak, nei pakpak aka yuai pakpak gölmenöy anda kamakzei, mienön mönö mewöñanök isikñinangö dop wange mosöta awatangöba et teköget. Mewö.

Noanöŋ Anutugöra jöwöwöl ohoba saiwap jiyök.

²⁰ Et tekögetka Noanöŋ Kembugöra jöwöwöl alta kun memba mirigö sömbupŋi dönqizizinŋini qahö mi pakpak aka nei dönqizizinŋini qahö mi pakpak yengöreŋök tosatŋi engömemba alta qakŋe ala mianŋön Anutugöra jöwöwöl ohoyök.

²¹ Ohoiga Kembunöŋ wöron umköhöwakŋi nahömŋambuk mi möri dop köliga uruŋan keu kewö jiyök: “Ambazip yengö uruŋinaŋgö mötmöt areŋinan mönö moröŋineyök könahiba bölöŋi akzemö, töndup gölme mi nalö kunöŋ ambazipköra aka kunbuk kude qesuahömam. Yuai pakpak malmalŋinambuk maljei, nöŋön mi lök qahöwak teköm engialmö, mianŋö dop nalö kunöŋ kunbuk qahö jim teköba ak engimam.

²² Gölmenöŋ ahöm öngömawaŋgö dop mönö gölmenöŋ köl kömötketka öŋi asuhui megetka mianŋön mönö kude qahöwak teköma. Miri amöriiga sanŋenni mörakŋe aka könöpŋambuk aiga könöwiba mörakŋe. Kömunjaŋ kie nalö aka wehön nalö, sunŋem aka asakŋi mi nalöŋi nalöŋi lilikqilik aka awataŋ ahöba anmahot. Mi pakpak teteköŋi qahö ahöm öngöiga malme. Mewöŋan mönö mewö toroqeba ahöma. “Mewö”.

9

Anutunöŋ Noabuk jöhöjöhö areŋ alök.

¹* Mewö jiba Anutunöŋ Noa aka nahönurupŋi kewö jiba kötuetköm engiyök: “Inini mönö ahum sehiba gwölönarökpuk mala gölme dop köla malme.

² Mewö aketka gölmegö sömbupŋi pakpak, könakembagö neiŋi pakpak, yuai pakpak bapŋinan gölme köla ölöŋgömakzei aka köwetkö söraŋi pakpak mi mönö engö böröŋine al engibi eŋön mi galöm köl engiba malgetka yeŋön engöra keŋgöt mötmöt aketka jönömŋini unduiga malme.

³ Yuai pakpak isikusukŋinambuk anda kaba maljei, mi engö neneya aka ahöma. Mutuk yöha yuai görökŋi (töŋgönŋi) neneŋina al engiala merak yuai pakpak ki mewöyök al engizal.

⁴ Mohok-kun mi mönö kude neme. Mi sömbup sepŋambuk. Sep mi malmalgö söpsöpŋi akzawaŋgöra aka soŋgo ki al engizal.*

⁵ Nanŋini sepŋini mi kunŋan kun kude mokoma. Kunŋan mi mokomawi, mianŋö likepŋan mönö nanŋi qakŋe öngöma. Sömbup kunŋan me ambazip kunŋan ambazip kun qeiga malmalŋaŋgö söpsöpŋi mokomawi, mianŋö likepŋan mönö nanŋi qakŋe öngöiga kömuma.

⁶ Anutunöŋ ambazip nanŋi kaisoŋgolomŋi tandök meyöhaŋgöra aka kun daŋön ambazip kun qei kömumawi, kunŋan mönö i mewöŋaŋök qei kömuma.*

⁷ Inini mönö ahum sehiba gwölönarökpuk aka malme. Mewö gölme qakŋe ahum sehigetka qötöŋinan qarim öngöma.”*

⁸ Anutunöŋ toroqeba Noa aka nahönurupŋi yambuk malgeri, yeŋgöra keu kewö jiyök:

⁹ “Nöŋön merak inini aka engö gwölönarökurupŋini könanŋep asuhumei, embuk jöhöjöhö areŋ akzal.

¹⁰ Mewöŋanök yuai malmalŋinambuk pakpak, mi mirigö me arökŋaŋgö nei sömbupŋi pakpak göbuk mala waŋgenöhök etkeri, mönö gölmegö öröyuai malmalŋinambuk pakpak yembuk jöhöjöhö areŋ kewö akzal:

¹¹ Nöŋön jöhöjöhö areŋni mi embuk kewö al köhöizal: Nöŋön o gölunöŋ öröyuai isikusukŋinambuk pakpak mi kunbuk kude engubi qahöwakŋe. O gölu mi gölme ayuhumapköra kunbuk qahö albi kama.”

* **9:1:** Jen 1.28 * **9:4:** Jen 17.10-14; Lew 19.26; Dut 12.16, 23; 15.23 * **9:6:** Jen 1.26; Eks 20.13

* **9:7:** Jen 1.28

12 Anutunöŋ toroqeba keu kewö jiyök: “Nöŋön mönö jöhöjöhö aren ki mi nani aka inini aka öröyuai malmalŋinambuk pakpak embuk maljei, neŋgö sutnine albiga teteköŋi qahö köhöiba ahöm öŋgöma. Jöhöjöhö aren miangö aiwesökŋi mi kewö:

13 Nöŋön nani marilonŋonni mi kousunöŋ albiga ahöma. Nöŋön nani aka gölmenöŋ maljei, neŋgö sutnine jöhöjöhö aren akzali, marilonŋon mianön mönö miangö aiwesökŋi aka ahöma.

14 Nöŋön nalö kunöŋ kousuŋi kousuŋi gölme qakŋe öröm enŋibi eta tokogetka marilonŋon kousunöŋ asuhumawi,

15 nalö miangöreŋ nöŋön jöhöjöhö arenni mi mötmörimam. Mi nani aka inini aka öröyuai malmalŋinambuk pakpak tandökŋini könaŋi könaŋi neŋgö sutnine ahali, mönö mia mötmörimam. Miangöra o mienön kunbuk mewö kude qariba yuai isikusukŋinambuk pakpak ayuhumegöra göulu ketanŋi qahö akŋa.

16 Nalö kunöŋ marilonŋon kousunöŋ asuhumawi, nöŋön mi eka miangöreŋök jöhöjöhö arenni mi mötmörimam. Mi teteköŋi qahö nani aka öröyuai malmalŋinambuk pakpak tandökŋini könaŋi könaŋi gölme qakŋe maljei, neŋgö sutnine al köhöibi ahöza.”

17 Anutunöŋ Noagöra mewö jiba toroqeba kewö jiyök: “Nöŋön jöhöjöhö aren ki mi nani aka gölmegö öröyuai malmalŋinambuk pakpak neŋgö sutnine al köhöizal. Jöhöjöhö aren miangö aiwesökŋi mi mewö.”

Noagö nahönurupŋi

18 Noagö nahönurupŋi waŋgenöhök etkeri, yeŋgö qetŋini mi Sem, Ham aka Jafet. * Ham mi Keinangö iwiŋa.

19 Yeŋön Noagö nahönurupŋi karöbut aket. Ambazip pakpak denqenda gölme dop köla maljini, nini yeŋgöreŋök asuhuin.

20 Noanöŋ kölkömöt azia aka wain kösö nup mutukŋi kömörök.

21 Mi kömörökmö, nalö kunöŋ wain o tosatŋi memba neiga uruŋi enjololon aiga nanŋi opo seri koum uruŋe oponŋi qeköba sile aukŋe ahöyök.

22 Keinangö iwiŋi Ham yaŋön iwiŋan sile aukŋe ahöyöhi, mi eka yaigep geba darumunyahötŋi jii mörohotka iwiŋi mewö gamu qem waŋgiyök.

23 Sem aka Jafet yetkön mi mörohotmö, maluku kun memba awötŋire ala andöandö öŋgöba iwiŋiran sile aukŋe ahöyöhi, mi esuhuyohot. Jeniri kungen uyohoraŋgöra aka iwiŋiran aukŋe ahöyöhi, mi qahö ehot.

24 Noanöŋ enjololon aiga imbiŋi törörök möta wahöta nahönŋi moröŋan silik ak waŋgiyöhi, mi mörök.

25 Mi möta uruŋi öngöiga Hamgöra kewö jiyök: “Keinan mi jim suehöm waŋgizal. Yaŋön mönö darumunyahötŋi yetkö welenqeŋeurupŋiri yeŋgö welenqeŋeŋini omanŋi aka malma.”

26 Toroqeba kewö jiyök:

“Anutu, Sengö Kembuŋi, ia mönö möpöseizal.

Keinanöŋ mönö Sengö welenqeŋeŋi omanŋi aka malma.

27 Anutunöŋ mönö Jafetkö gölmeŋi mem qariiga Sengö opo seri koumŋine malme.

Keinan yeŋön mönö Sem yeŋgö welenqeŋeurupŋini omanŋi aka malme.”

28 Göulu ketanŋan teköiga Noanöŋ toroqeba (yara) yambu 350:gö dop mal öŋgöyök.

29 Malmalŋangö yambuŋi mi mindiriba 950 miangö dop mala kota kömuyök. Mewö.

* 9:18: Jafet sehiza

10

Noagö nahönurup yengö gwölönarökurup arenjini

1 Hist 1.5-23

¹ Noagö nahönurupni Sem, Ham aka Jafet yengö gwölönarökurupnini göulu teköiga asuhugeri, yengö qet arenjini kewö:

Jafetkö gwölönarökurupni

² Jafetkö nahönurupni yengö qetnini mi Gomer, Magog, Madai, Jawan, Tubal, Mesek aka Tiras.

³ Gomergö nahönurupni yengö qetnini mi Askenas, Rifat aka Togarma.

⁴ Jawangö nahönurupni yengö qetnini mi Elisa, Tarsis aka Saiprus könagesö aka Dodan könagesö.

⁵ Yengö isimoröurupnini mi jula denqenja Sutjire Köwetkö jitne aka miangö gölme johanni johanni miangören nanjini gölmenjine anda malje. Yeñon isiknini dop, kambunini dop aka keunini dop nanjini gölmenjine anda malje. Jafetkö könagesöni mewö.

Hamgö gwölönarökurupni

⁶ Hamgö nahönurup yengö qetnini mi Kus, * Ijpt, Libia aka Keinan.

⁷ Kugö nahönurupni yengö qetnini mi Seba, Hawila, Sabta, Rama aka Sabteka. Ramagö nahönyahötñi yetkö qetjiri mi Seba aka Dedan.

⁸ Kugö nahönñi kun qetñi Nimrod asuhuyök. Yanön qariba wahöta bimqeqegö suahö azi köhöikñi kötökñi aka gölmenöñ malök.

⁹ Yanön Kembugö jemesoholne böröjan azi köhöikñi malöhanjöra aka keu saini kewö jimakze: "Kunöñ Nimrod ewö Kembugö jemesoholne böröjan azi köhöikñi akza."

¹⁰ Nimrodkö bemtohoñi mi gölme kewöñe miangören könahiget: Babel, Ere, Akad aka Kalne. Taon 4 mi Babilonia (Sinar) gölmenöñ ahöze.

¹¹ Nimrodnöñ Babilonia gölme mosöta Asiria anda miri ketani ketani qetnini Niniwe, Rehobotir aka Kala mi mem wahörök.

¹² Mewöyök Resen mi Niniwe aka siti ketani qetñi Kala yetkö sutjire mem wahörök.

¹³ Ijptkö gwölönarökurupni yeñon Libia könagesö, Anam könagesö, Lehab könagesö aka Naftu könagesö akze.

¹⁴ Mewöyök Patrus, Kaslu aka Krit. Krit mi Filistia könagesö yengö bömönñini ahök.

¹⁵ Keinangö nahönñi mutukñi mi Saidon. Yangö andöñe Keinanöñ könagesö kewöñi yengö bömönñini ahök: Hit könagesö,

¹⁶ Jebus könagesö, Amor könagesö, Girgas könagesö,

¹⁷ Hiwi könagesö, Arka könagesö, Sini könagesö,

¹⁸ Arwad könagesö, Zemar könagesö aka Hamat könagesö. Keinanöñ körek pakpak yengö iwi bömönñini aiga yeñon könangep jula denqenget.

¹⁹ Mewö denqengetka Keinan könagesö yengören gölme görañi mi miri qetñi Saidon miangörenök könahiba anda Gerar mire anda Gaza miangören teköza. Mewöyök Sodom göröken anda Gomora anda Adma aka Zeboim anda Lasa miangören teköza.

²⁰ Hamgö nahönurupni mi isiknini dop, keunini dop, gölmenjini dop aka könagesö kambunini dop mewö malje.

Semgö gwölönarökurupni

²¹ Jafetkö datñi Sem yangö nahönurupni mewöñanök asuhuget. Semnöñ mewö Ebergö nahönurup pakpak yengö bömönñini ahök.

* **10:6:** Kus mi Sudan kantrigö qetñi.

²² Sengö nahönurupni yengö qetjini mi Elam, Asur, Arfaksad, Lidia (Lud) aka Aram.

²³ Aramgö nahönurupni yengö qetjini mi Uz, Hul, Geter aka Mas. Mewö malget.

²⁴ Arfaksadkö nahönni Sela asuhuiga yangö nahönni Eber asuhuyök.

²⁵ Ebergö nahönyahötñi yahöt asuhuyohot. Kunöñ asuhuba mala koröhi, nalö miangören gölme ambazipnön jula denqenget. Miangöra yangö qetñi Peleg (Denqen) qetket. Munñangö qetñi mi Joktan.

²⁶ Joktangö nahönurupni kewö asuhuget: Almodad, Selef, Hazarmawet, Jera,

²⁷ Hadoram, Uzal, Dikla,

²⁸ Obal, Abimael, Seba,

²⁹ Ofir, Hawila aka Jobab. Azi pakpak mi Joktangö nahönurupña.

³⁰ Yengö tatat malmal gölmenini mi miri qetñi Mesa miangörenök könahiba miri qetñi Sefar miangören göröken anda wehön kotkotñangö gölme kundunambuk miangören teköza.

³¹ Sengö nahönurupni mi isikñini dop, keuñini dop, gölmenini dop aka könagesö kambuñini dop mewö malje.

³² Noagö isimoröurupni mi isikurup areñini, könagesöñini aka gölmenini dop mewö aket. Yeñön jul sehiba denqennda könagesö kambuñi kambuñi aketka göulu ketañan teköiga anda gölme dop köla malget. Mewö.

11

Anutunöñ ambazip yengö keuñini mendenök.

¹ Mutuk miangören gölmenji gölmenji pakpak yeñön keu mohot jigetka miangön mindirim enñii malget.

² Mewö mala mosöta wehön kotkotñe göröken anda Babilon uruñe gölme köröñi ketañi kun miwikñaiba miangören miriñini memba tatket.

³ Miangören tata nanninök kewö eraum-mötket: “Mönö kaget. Nini mönö birik mem mözözömgöba könöpnön ohoinga köhöikñi akñe. “Mewö jiba miri selñi membingöra köt jamönñiñ qahöpmö, birik ala sutñine gölme sapösapö qandön ewö algetka miangön birik mi mekötahöm enñiyök.

⁴ Nup mewö memba kunbuk kewö jiget: “Mönö kaget. Nini mönö naniñangöra siti kun memba miangören miri köröpñi kötökñi (taua) meinga boñan suep oseima. Mewö oseiiiga qahö denqennda gölme pakpak dop köla lañ anda malbinbuköra mönö nanini qetbuñaninambuk akin.”

⁵ Mewö jiba nup megetmö, Kembunöñ ambazip siti aka miri köröpñi megeri, mi ekñamgöra erök.

⁶ Eta mi eka kewö jiyök: “Yeñön simbisembel qahöpmö, urumohot könagesö aka keuñini mohot jiba kinda yuai ki könahiba meze ewö, könangep i me wai membingö areñini albeak, mi mönö miangöra qahö osiba qaköme.

⁷ Ayop, nini mönö gölmenöñ geba keuñini mem sohoinga kambu kun yeñön kambu tosatñi yengö keuñini qahö möt asariba malme.”

⁸ Kembunöñ mewö jiba ambazip miangören mendenqenden enñiiga gölme körek dop köla anda kaba siti memegö nupñi jöhöba mosötket.

⁹ Kembunöñ ambazip pakpak yengö keuñini mem sohoyöhi, miangöra miri miangö qetñi Babel (enjololon siksauk) ahök. Miangörenök Kembunöñ i mendenqenden enñiiga dennda gölme pakpak dop köla anget. Mewö.

Qet areñ Sengörenök könahiba Abramgören anja.

1 Hist 1.24-27

¹⁰ Semgö gwölönarökurup yengö qet areñini ki. Göulu andöñe yambu yahöt teköiga Semnön yambuñi 100 aiga nalö miangören nahönñi Arfaksad asuhuyök.

¹¹ Arfaksadnön asuhuiga miangö andöñe Semnön toroqeba yambu 500 maliga nalö sutñe miangören nahönböraturupñi tosatñi asuhuget.

¹² Arfaksadnön yambuñi 35 aiga nahönñi Sela asuhuyök.

¹³ Selanön asuhuiga miangö andöñe Arfaksadnön toroqeba yambu 403 maliga nalö sutñe miangören nahönböraturupñi tosatñi asuhuget.

¹⁴ Selanön yambuñi 30 aiga nahönñi Eber asuhuyök.

¹⁵ Ebernön asuhuiga miangö andöñe Selanön toroqeba yambu 403 maliga nalö sutñe miangören nahönböraturupñi tosatñi asuhuget.

¹⁶ Ebernön yambuñi 34 aiga nahönñi Peleg asuhuyök.

¹⁷ Pelegnön asuhuiga miangö andöñe Ebernön toroqeba yambu 430 maliga nalö sutñe miangören nahönböraturupñi tosatñi asuhuget.

¹⁸ Pelegnön yambuñi 30 aiga nahönñi Reu asuhuyök.

¹⁹ Reunön asuhuiga miangö andöñe Pelegnön toroqeba yambu 209 maliga nalö sutñe miangören nahönböraturupñi tosatñi asuhuget.

²⁰ Reunön yambuñi 32 aiga nahönñi Serug asuhuyök.

²¹ Serugnön asuhuiga miangö andöñe Reunön toroqeba yambu 207 maliga nalö sutñe miangören nahönböraturupñi tosatñi asuhuget.

²² Serugnön yambuñi 30 aiga nahönñi Nahor asuhuyök.

²³ Nahornön asuhuiga miangö andöñe Serugnön toroqeba yambu 200 maliga nalö sutñe miangören nahönböraturupñi tosatñi asuhuget.

²⁴ Nahornön yambuñi 29 aiga nahönñi Tera asuhuyök.

²⁵ Teranön asuhuiga miangö andöñe Nahornön toroqeba yambu 119 maliga nalö sutñe miangören nahönböraturupñi tosatñi asuhuget.

²⁶ Teranön yambuñi 70 aiga nahönñi Abram, Nahor aka Haran asuhuget.

Teragö gwölönarökurupñi.

²⁷ Teragö gwölönarökurup yengö qet areñini ki. Teragö nahönurupñi Abram, Nahor aka Haran asuhuget. Harangö nahönñi Lot asuhuyök.

²⁸ Haranön Kaldia yengö gölmenön mala nanñi ahuañi mirinñi qetñi Ur miangören kömüiga Harangö iwinñi Teranön toroqeba malök.

²⁹ Abram aka Nahor yetköñ örörön ambi meyohot. Abramgö anömñi qetñi Sarai aiga Nahorgö anömñi qetñi Milka. Milkanön Harangö börtatña ahök. Haranön Milka aka Iska yetkö iwinñi ahök.

³⁰ Sarainön ambi köpina morönñi qahöpmö, öne malök.

³¹ Teranön nahönñi Abram, isinñi Lot Harangö nahönñi aka iranñi Sarai, nahönñi Abramgö anömñi mi enqungiriga mohotñe Kaldia gölmegö miri qetñi Ur mosöta Keinan gölmenön anbingöra anget. Mewö angetmö, Haran miri gölmenön kaba kinda miangören mirinñini memba tatket.

³² Tatketka Teranön yambuñi 205 aiga Haran miri miangören tata kömuyök. Mewö.

12

Anutunön Abram oholök.

¹ *Kembunön Abramgöra kewö jiyök: “Gi gölmegi, könagesögi aka iwigahö miri yuainñi mosöta gölme kondel gihimami, mönö miangören anman.

* 12:1: Apo 7.2-3; Hib 11.8

² Nöñön ahumsehip gihibiga gwölönarökurupkan könagesö ketani akña. Nöñön kötuetköba nanğöm gihibiga qetbuñagan qariba ketani akña. Mewö aiga Anutunöñ göhöra aka könagesö tosatni kötuetköm enğiba malma.

³ Denike yeñön gi kötuetköm gihimeı, nöñön mönö i kötuetköm enğiba malmam.

Denike yeñön gi jim suehöm gihimeı, nöñön mönö i mewöyök jim suehöm enğiba malmam.

Göhöra aka nöngö kötümötuetnan mönö gölmegö könagesö kambuñi pakpak yeñgö qakñine öñgöiga oyaenğkoyaen akña.*

⁴ Mewö jiiga Abramnöñ Kembunöñ jiyöhanğö dop Haran miri mosöta aniga Lotnöñ yambuk anohot. Abramnöñ yambuñi 75 aiga miangöreñ Haran miri mosöta anök.

⁵ Anmam jiba anömñi Sarai, behötñi Lot, sukinapñi pakpak qezakögetka sehiyöhi aka welenqeçe ambazip Haran mirinöñ mala enğömeğeri, mi memba enğuanğita mosöta Keinan gölmenöñ anbingöra anda mala miangöreñ anğotket.

⁶ Abramnöñ gölme miangöreñ anda mala mala miri qetñi Sekem miangöreñ kangota in ip ketani qetñi More miangö kösutñe koumñi qeba tarök. Nalö miangöreñ Keinan ambazip yeñön lök gölme miangöreñ malget.

⁷ Mewö malgetka Kembunöñ Abramgöreñ asuhuba kewö jiyök: “Gölme ki mi mönö göhö gwölönarökurupki yeñgö buñaya qem enğimam. “Mewö jiiga Abramnöñ Kambu yañgöreñ asuhuyöhi, yañgöra jöwöwöl ohohogö altani kun miangöreñ meyök.*

⁸ Miangöreñök mosöta toroqeba Betel mirigö wehön kotkotñe göröken gölme kundunambuk miangöreñ anda opo seri koumñi mörörengöba kunğui kinök. Mewö kiniga Betel miri miangön wehön gegene göröken tariga Ai taonöñ wehön kotkotñe göröken tarök. Mewö tarohotka sutñire kinda Kembugö jöwöwöl altani kun miangöreñ memba Kembugö qetñi qeta köuluköm wañgiyök.

⁹ Miangö andöñe gölme mi mosöta toroqeba Saut göröken anda distrik qetñi Negew miangöreñ tata malget. Mewö.

Abramnöñ Ijpt kantrinöñ anda malök.

¹⁰ Nalö miangöreñ Keinan gölmenöñ bödi (buörö) asuhuiga miangön köhöiba lömbötñi aiga Abramnöñ Ijpt kantrinöñ kusukñanök malbingöra anget.

¹¹ Könanöñ anda Ijpt dopdowigetka Abramnöñ miangöreñ anömñi Saraigöra keu kewö jiyök: “Mötnöñ, göñön ambi eksihingabuk akzani, mi mötzal.

¹² Mewögöra Ijpt azi yeñön gi geka kewö jime: ‘Ki yañgö anömña.’ Mewö jiba ni nunğuet kömumam-mö, gi gehorigetka malman.

¹³ *Miangöra göñön mönö kewö jiman: ‘Ni yañgö nenna.’ Mewö jinöñga göhöra aka ölöpñanök ak niñgiba nöngö malmalni gou kölgetka malmam.”

¹⁴ Abramnöñ Ijpt kaiga Ijptkö ambazipñi yeñön Sarai eketka ambi eksihimñambuk qetpuk ahök.

¹⁵ Miangöreñök Farao kiñ kembugö pom jembonurupñi yeñön i ekeranğöra Farao kiñgöreñ anda Saraigö silenji möpöseigetka mörök. Mi möta jiiga Sarai wañgita kiñ kembugö jakömbuak miri uruñe öñgöget.

¹⁶ Öñgögetka Farao kiñnöñ Saraigöra aka Abram ölöpñanök ak wañgiyök. Mewö ak wañgiiga yuai kewöñi mi Abramgö buñaya ahök: lama, bulmakau,

* **12:3:** Gal 3.8 * **12:7:** Apo 7.5; Gal 3.16 * **12:13:** Jen 20.2; 26.7

donki azinji aka ambinji, welenqege azi aka ambi aka kamel jesöngöni mi Abram wanjiiga buña qem angyuyök.

¹⁷ Mi buña qem angyuyökmö, Kembunöñ Abramgö anömni Sarainöñ Farao kingö mire malöhangöra aka jiiga kawöl bölöñi kötökñan Farao kin aka ambazip yangö jakömbuak mire malgeri, yengö qakñine öngöyök.

¹⁸ Mi öngöiga Farao kinñöñ Abram köl öröi kaiga kewö qesim wanjiyök: “Göñön mönö wani kimbiala ak niñginöñ? Wuanöngöra ‘Mi anömna,’ mewö qahö jinöñga möral?”

¹⁹ Wuanöngöra ‘I mi nena,’ jinöñ? Mewö jinöñga nöñön i anömna akñapköra wanjiral? Anömgi ki. Mönö i wanjita anohot.”

²⁰ Mewö jiba aziurupni jim kutum enjiiga Abram wanjita könanöñ anda al engigetka anömni aka öroyuaini pakpak ahöm wanjiyöhi, mi memba enjguanjiita anget. Mewö.

13

Lot aka Abram yetkön dennohot.

¹ Abramnöñ Ijpt gölme mosöta anömni aka bau inap yuaini pakpak memba enjguanjiita Lotpuk mohotne lilingöba anda Keinan gölmegö Saut likepni qetni Negew miangören kanjotket.

² Abramgören lama bulmakau aka goul silwö mi lömbötpuk ahöm wanjiiga azi kindinbirik malök.

³ Mewö mala Negew distrik uruñe tata mosöta kusukñanök rowonqeqeñine ahöba wahöta anda mala Betel mire kanjotket. Opo seri kounni mutuk Betel aka Ai miri mietkö sutñire kunñi kinöhi, mönö miangören kanjotket.

⁴ Mutuk jöwöwöl alta meyöhi, mönö miangören kanjota Kembugö qetni qeta köuluköyök.

⁵ Lotnöñ Abrambuk tata mosöta malöhi, yanön mewöñanök lama bulmakau kambunji kambunji aka opo seri kounni kounni mi gwötpuk memba malök.

⁶ Mewö mala sömbup sukinap yuainiri gwötpuk ketani ahöm etkiiga gölmenöñ qahö dop kölok. Mi öröröñ gumohom enjiengigö dop qahö ahöiga mohotne tata malmalgö lömböriba osiyohot.

⁷ Osiba Abram aka Lot yetkören sömbup galömurupñiri yengö sutñine gölmegö anjururuk asuhuyök. Nalö miangören Keinan könagesö aka Periz könagesö yanön gölme miangö tonji aketka yembuk mohotne malget.

⁸ Mewö mala Abramnöñ Lotköra kewö jii mörök: “Niri mönö iwi moröya maljit. Miangöra ni aka gi sutñire me sömbup galömurupñiri yengö sutñine anjururuk kude ahöma.

⁹ Miangöra ölop denbit. Gölme pakpak mönö göhö jemesoholge aukne ahöm anjawi, mi ölop ekzan. Mewö aiga göñön qaninire göröken anmam jiman ewö, nöñön ölop ölnire göröken anmam. Me göñön ölnire göröken anmam jiman ewö, nöñön ölop qaninire göröken anmam.”

¹⁰ *Mewö jiiga Lotnöñ uba wahöta Jordangö gölme köröñi ketani pakpak ehiga Anutunöñ mi ölop mem kelöriaga Kembugören oyaenkoyañ arö kelökñambuk ewö ahök. Mi Ijpt yengö gölme ewö ahöba Zoar miri göröken anök. Mutuk Kembunöñ Sodom aka Gomora qahö ayuhum etkiiga nalö miangören gölme mi mewö ahöyök.

¹¹ Mewö ahöiga Lotnöñ mi ek kewöta Jordangö gölme köröñi ketani pakpak mi möwölöhöba wehön kotkotne göröken anök. Mewö aka dennohot.

¹² Denja Abramnöñ Keinan gölmenöñ anda malökmö, Lotnöñ gölme köröñi ketanjängö taonni taonni yengö sutñine anda kaba malök. Mewö mala opo seri

* 13:10: Jen 2.10

koumñi meköba memba kunguba anda kinda teteköñe Sodom kösutñe angota malök.

¹³ Miangören malökmö, Sodom könagesö yeñon könagesö tandök bölöñi aka Kembu qetala sinjisöndok keta bölökñi aka memba malget.

Abramnöñ Hebron gölmenöñ anda tata malök.

¹⁴ Lotnöñ Abram umbula aniga nalö miangören Kembunöñ Abramgöra keu kewö jiyök: “Mönö jegi ötok ala mesoholge uba wahöta elennda andöge uba mewöyök wehön kotkotñe aka wehön gegene göröken unöñ.

¹⁵ *Gölme pakpak ki ekzani, mi mönö gi aka göhö gwölönarökurupki engö buñaya qebi nalö teteköñi qahö buñajina ahöm öñgöma.

¹⁶ Nöñon gwölönarökurupki ahumsehip gwötpuk engibiga qötöñinan qariba gölmegö sakösakñi (sakösiñi) ewö akña. Kun danön sakösiñ köñi miengö jangöñini oyonbawak, yanön ölop gwölönarökurupki yeñgö jangöñini mema.

¹⁷ Nöñon gölme ki mönö göhö buñaya qem gihizal. Miangöra ölop wahöta anda kaba gölme pakpak ki bahöbahö euke emuke ek kutuba malman.”

¹⁸ Mewö jiiga Abramnöñ wahöta opo seri koumñi qeköba memba kunguba anda Hebron gölmenöñ kaba Mamre mire in ip ketanñi kin angeri, miengö kösutñine tarök. Miangören tata Kembangöra jöwöwöl alta kun meyök. Mewö.

14

Abramnöñ Lot mi kerök yeñgö böröñineyök meköyök.

¹ Nalö miangören Babilongö (Sinargö) kinñi qetñi Amrafel, Elasargö kinñi qetñi Ariok, Elangö kinñi qetñi Kedorlaomer aka Goimgö kinñi qetñi Tidal malget.

² Yeñon kinñi kewö miembuk könahiba bim auget: Sodom taongö kinñi qetñi Bera, Gomora taongö kinñi qetñi Birsa, Adma taongö kinñi qetñi Sinab, Seboim taongö kinñi qetñi Semeber aka Bela (qetñi alanñi Zoar) taon miangö kinñi.

³ Kinñi pakpak kienön örue (ruerue) qetñi Sidim miangören tokoba kukösumñini mindiriba jöhöjöhö aket. Sidim örüenöñ nalö kewöñe Sihi Köwet Köhömuñi mi ahöza.

⁴ Yeñon yambu 12:gö dop Kedorlaomergö jimkutukutu bapñe mala kota yambu 13 miangören yanö keu bapñe anbingö qetala karim aka yarö gilget.

⁵ Mewö aketka yambu 14 miangören Kedorlaomer aka kinñi tosatñi yambuk jöhöjöhö aka malgeri, mienön kaba könagesö kewöñi yembuk bim qeba luhut alget: Refa könagesö mi Asterot Karnaim mire enguba luhut alget. Zuzi könagesö mi Ham mire aka Eme könagesö mi Kiriataim miri miangören enguba luhut alget.

⁶ Hor könagesö mi Seir gölme kundunambuk miangören enguba enguatangöba anda anda El Paran miri miangören angota luhut al engiget. El Paran mi gölme qararanökölñangö görane ahöza.

⁷ Luhut al engiba miangörenök lilingöba En Mispal (qetñi alanñi Kades) miangören kaba Amalek könagesö luhut al engiba gölmenñi pakpak angön kölget. Amor könagesö Hazon Tamar gölmenöñ malgeri, mi mewöñanök enguba luhut al engiget.

⁸ Mewö asuhuiga Sodomgö kinñi, Gomoragö kinñi, Admagö kinñi, Zeboimgö kinñi aka Bela (qetñi alanñi Zoar) miangö kinñi yeñon wahöta asasaitiba Sidim örüenöñ angota kinñi kewö miembuk bim qebingö jaböñi ala aröñda kinget:

⁹ Elangö kinñi Kedorlaomer, Goimgö kinñi Tidal, Babilongö (Sinargö) kinñi Amrafel aka Elasargö kinñi Ariok. Kinñi 4 mienön kinñi 5 yembuk aröñget.

* 13:15: Apo 7.5

10 Mewö aröngetmö, Sidim gölme öruë miangörej löm dodoho sapösapönjambuk mianön kokolak qeba tarök. Mewö tariga Sodom aka Gomora taon mietkö kinjiran yarö aziurupñiri yembuk unjurata angaitketka azi tosatñan löm miangörej tötohoba geba enguyök. Mewö enjuiga alaurupñini tosatñi pakpak yeñön ölöñ köla unjurata gölme kundunambuk miangörej öngöget.

11 Öngögetka kin 4 mienön Sodom aka Gomora anda sukinapñini aka numbu neneñini pakpak mi kiom köla memba tököba anget.

12 Abramgö behötñi Lot yanön Sodom malöhangöra aka i mewöñanök sukinapñambuk wanğita anget.

13 Mewö angetka azi kunñan ölöñ köla misingöba kaba miangö buzup keuñi mi Hibru (kian) azi Abramgöra jii mörök. Nalö miangörej Abramnön Amor azi qetñi Mamre yanğoreñ in ip ketanji ketanji mienğö kösutñine malök. Mamrenön munyahötñi qetñiri Eskol aka Aner yetpuk mohotñe Abrambuk jöhöjöhö aka malget.

14 Abramnön behötñi Lot wanğita angeri, miangö keuñi möta aziurupñi 318 nanñi mire asuhaba mötmöt möta bimqeçe köl guliba malgeri, mi engohol tokoba kerök kambu enğuatangöba Not göröken anda mala Dan mire anğotket.

15 Abramnön aziurupñi mendeñ enjuiga yeñön sunğem miangörej közöla kerök kambu qeraköm engimemba luhut al enğiget. Luhut al enğiba enğuatangöba anda mala Damaskusgö Not likepñe miri qetñi Hoba miangörej anğotket.

16 Miangörej anğota sukinap pakpak kiom qeba memba angeri, mi miwikñaiget. Behötñi Lot aka yanğö öroyuainji mi memba wanğita lilingöba kayök. Sodom aka Gomora yanğö ambimoröurupñini aka ambazip tosatñi mi tok lökñanök enğuanğita kaget.

Melkizedeknön Abram kötueköm wanğiyök.

17 Abramnön mewö Kedorlaomer aka kin tosatñi yambuk jöhöjöhö aka malgeri, mi enğuba luhut al enğiba lilingöba kaiga Sodomgö kin yanön Sawe öruë (qetñi alanji Kingö öruë) miangörej miwikñaiaba ekñangöra anök.

18 *Nalö miangörej Melkizedek Salemgö kin mianön bered aka wain o memba kayök. Yanön Anutu öngöngöñanğö jike nup galömñi ahök.

19 Mewö aka Abram kötueköm wanğiba keu kewö jiyök: “Anutu öngöngöñan sup gölme miwikñaim etkiyöhi, yanön mönö Abram gi kötueköm gihii malman.

20 Anutu öngöngöñan kerökurupki göhö böröge al enğiyöhi, mönö i möpöseizin. “Mewö juiga Abramnön öroyuainji pakpak mendeñniga kambu ten asuhuiga miengörejök mohot mohot (10%) memba naluha wanğiyök.

21 Mi wanğiiga Sodomgö kin Abramgöra kewö jiyök: “Ambazipurupni mia niñgimanmö, sukinap mia mönö nangi bunaya akña.”

22 Mewö jiyökmö, Abramnön Sodomgö kinangöra kewö jiyök: “Keuni köhöimapköra nöñön böröni Kembu Anutu öngöngöñi Sup gölme miwikñaim etkiyöhi, yanğoreñ göröken memba wahöta jöjöpñ keu kewö jizal:

23 Nöñön göhörej yuai kun mi qahö kötökñi memam. Möt kösögahö kitipñi me köna esugahö kösöñi mi mewöñanök qahö memam. Mewö akiga göñön könanğep kewö jibanbuk: ‘Nöñön Abram yuai wanğibiga yanön azi pomñi qetbunambuk aka malja.’ Göñön mönö mewö jimamgö osiba malman.

24 Nöñön yuai kun qahö toroqeba memam-mö, aziurupnan wani yuaia negeri, mi lök neñgigetka dop köl teköza. Mewöyök azi alaurupni Aner, Eskol aka Mamre nömbuk kageri, yeñön mönö töwa jijiñinangö dop meme. “Mewö.

* 14:18: Hib 7.1-10

15

Anutunöŋ Abrambuk jöhöjöhö areŋ ahök.

¹ Mewö asuhuiga Abramgö jeŋi melenŋiga imut ehiga Kembunöŋ keu kewö jii kaiga mörök, “Abram, gi kenŋötŋi kude mötman. Nöŋön göhö sumanga akzal. Göhö töwagi mönö keta bölökŋi aka ahöma.”

² Keu mewö kayökmö, Abramnöŋ kewö jiyök, “O Kembu ketaŋamni, ni nahönböratni qahö malbiga töwa niŋginöŋga mianöŋ mönö denöwö bauköm niŋgibawak? Nöŋön kömumbiga Damaskus azi Eliezer yaŋön nöŋgö sukinapnaŋgö toŋi akŋa.”

³ Mewö jiba toroqeba kewö jiyök, “Göŋön gwölönarökni kun qahö niŋginöŋgaŋgöra nup azini bohonŋan nöŋgö mire maljawi, yaŋön mönö nöŋgö öröyuaini pakpak buŋa qem aŋguma.”

⁴ Mewö jiiga Kembugöreŋ keu jit kun mi yaŋgöreŋ kewö kaiga mörök, “Azi mianöŋ sukinapkahö toŋi qahö akŋapmö, nangi silegeyök morö nahön kun asuhumawi, yaŋön mönö göhö öröyuaiŋi pakpak buŋa qem aŋguma.”

⁵ *Keu mewö kaiga Anutunöŋ Abram waŋgita gumnöŋ geba keu kewö jii mörök, “Möno suepnöŋ unöŋ öŋgöiga senŋelau oyöŋ engimanöŋgö dop akŋa ewö, mi mönö ölöŋ oyöŋ engiman. “Mewö jiba kewö toroqeba jiyök, “Göhö gwölönarökurupŋi yeŋgö qötöŋinan mönö mianöŋgö dop akŋa.”

⁶ Mewö jiiga Abramnöŋ Kembu möt narim waŋgiiga mötnariŋi ehi dop köliga keuŋi jim teköiga solaniyök.*

⁷ Kembunöŋ toroqeba keu kewö jii mörök, “Nöŋön Kembu akzal. Gi Kaldia gölmegö miri qetŋi Ur mianöŋgöreŋ malnöŋga goaŋgita ki kait. Gölmö ki gihibi buŋa qem aŋgumangöra aka gi goaŋgita ki kait.”

⁸ Mewö jiyökmö, Abramnöŋ kewö jiyök, “O Kembu ketaŋamni, gölmö kianöŋ nöŋgö buŋaya akŋawi, mi mönö wani aiwesöha eka möt kutumam?”

⁹ Mewö jiiga Kembunöŋ yaŋgöra kewö jiyök, “Gi mönö anda bulmakau ambi seramŋi yambuŋi karöbut, meme (noniŋ) ambiŋi yambuŋi karöbut aka lama aziŋi yambuŋi karöbut aka kembö kun aka kembö supsup dölökunŋi kun mi memba nöŋgöreŋ kaman.”

¹⁰ Mewö jiiga Abramnöŋ anda mi pakpak körek memba kaba sömbup mi bibiŋine qesiŋ engiba likeŋi likeŋi mi areŋgöiga köna likeŋ likeŋ aröŋnöŋ ahöget. * Mewö ahökmö, nei mi qahö qesiŋnök.

¹¹ Qahö qesiŋda qamötŋini likeŋ likeŋ areŋgöm engiiga nei kalŋi yeŋön kaba qamöt yeŋgö qakŋine eta kölgetmö, Abramnöŋ mi közöl engiiga anget.

¹² Wehön jeŋi teköba gemangö aiga nalö mianöŋgöreŋ Abramnöŋ jeŋi eta meiga gaun lömbötŋi ahöyök. Mewö ahöiga pandaman göjiwinöŋgö kanjamŋi mianöŋ kaba turum waŋgiyök.*

¹³ Turum waŋgiiga Kembunöŋ kewö jii mörök, “Keu ki mönö ölna mötman: Göhö gwölönarökurupkan mönö nanŋini gölmeŋini mosöta kantri kunöŋ anda kiana mala mal öŋgöme. Mewö mala yeŋgö welenŋeŋeŋurupŋini omaŋi aketka i yambu 400:gö dop tulungöm engiba malme.*

¹⁴ Mewö malmemö, nöŋön kantri welenŋeŋeŋurupŋini omaŋi aka malmei, yeŋgö keuŋini mewöyök jim teköba likeŋi melenŋbiga qakŋine öŋgöma. Mewö mi öŋgöiga pösat engigetka kantri mi mosöta sukinapŋini gwötŋuk memba liliŋöba kame.*

* **15:5:** Rom 4.18; Hib 11.12 * **15:6:** Rom 4.3; Gal 3.6; Jei 2.23 * **15:10:** Nalö mianöŋgöreŋ jöhöjöhö areŋ aka mi silik mewöŋi mianöŋ mem köhöizema. Azinöŋ sömbup likeŋi yahöt mietkö sutŋire kinda mindirim etkiba jöhöjöhö mi tönguba galöm köljapma. * **15:12:** Job 4.13, 14 * **15:13:** Eks 1.1-14; Apo 7.6 * **15:14:** Eks 12.40-41; Apo 7.7

15-16 Nöñön Amor könagesö mi gölme kianğoreñ zilañ qahö enğuatañgömam. Mutuk siñgisöndokñi siñgisöndokñi aka bölimqölim tekögetka likepñi törörök melen enğimamañgö nalöñan akñawi, nalö mianğoreñ mönö i enğuatañgömam. Mianğöra göhö isiurupki yeñgö isiurupñinan asuhaba malmei, † nalö mianğoreñ göhö gwölönarökurupkan mönö lilingöba ki kame. (15) Yeñön mewö kamemö, nangak mutuk yambugahö nalöñi ölöm kömuiga luainöñ iwiasaurupki yeñgoreñ anöñga löm köi gihime.”

17 Kembunöñ mewö jiiga wehön jeñan teköba geiga pandaman meiga yuai kewö asuhaba ehök: Kimbut kungö uruñe könöp bölamñan kököbilikbilikñambuk jeba asariiga köwak köndumñambuk pukpuköyök. Yuai mianñon asuhaba sömbup qamöt qesiñqesiñi miengö sutñine kinda anda kayök.

18 Kembunöñ mewö sömbup likepñi likepñi miengö sutñire anda kaba sömañ mianğoreñ Abrambuk jöjöhö areñ aka (kaisöpsöpñan mi mem köhöiba) keu kewö jii mörök, “Nöñön gölme ki mi göhö gwölönarökurupki yeñgö buñaya qem engimam. Mianğö jaböñi mi Ijptkö o töwatñi (Nail) mianğoreñök könahiba kaba ki oñgita anda o töwatñi ketañi qetñi Yufreitis mianğoreñ teköma.*

19 Nalö kewöñe mi könagesö kewö yeñgö gölmeñina ahöza: Kin könagesö, Kenas könagesö, Kadmon könagesö,

20 Hit könagesö, Periz könagesö aka Refaim könagesö,

21 Amor könagesö, Keinan könagesö, Girgas könagesö aka Jebus könagesö. Yeñgoreñ gölme pakpak mi mönö körekñanök memba dop köla anme. “Mewö.

16

Hagar aka Ismael

1 Abramgö anömñi Sarainöñ köpin mala morö qahö meyökmö, Saraigö welen ambi qetñi Hagar malök. Mi Ijpt ambia.

2 Yanñon malöhanğöra Sarainöñ Abramgöra kewö jiyök: “Kembunöñ songo jöhöm niñgiiga morö qahö mealanğöra gi mönö welen ambini menöñga gölöm ala morö kun meiga nöñgö buñaya asuhubawak. “Mewö jiiga Abramñon Saraigoreñ keugöra urumohot ahök.

3 Abramñon Keinan gölmenöñ yambu 10 mal teköiga nalö mianğoreñ Sarai Abramgö anömñan Ijptkö welen ambini Hagar memba apñanğö anömñi akñapköra wañgiyök.

4 Mewö wañgiiga memba maliga gölöm alök. Gölöm ala mi möta galöm ambini Sarai könahiba jijiwilit ak wañgiyök.

5 Mewö ak wañgiiga Sarainöñ Abramgöra kewö jiyök: “Urunan böliiga sihimbölö mörakzali, mianğö keuñan mönö göhö qake öñgöba ahöma. Nöñön welen ambini göhö böröge albiga gölöm ala mi möta mianğoreñök könahiba jijiwilit ak niñgiba malja. Mianğöra Kembunöñ mönö ni aka gi netkö sutñire keu kewöta jim teköma.”

6 Mewö jiiga Abramñon kewö jiyök: “Welen ambigi mianñon nange böröge maljawañgöra wania mötnöñga dop köljawi, mönö mianğö dop i ak wañgiman. “Mewö jiiga Sarainöñ Hagar lañ örömureim ak wañgiiga mosöta tököba ölöñ köla anök.

† 15:15-16: Yambu 430 nalö mi kewö oyonget: Liwainöñ malmal yambuñi 137 mianğoreñök yambu 80 mi Ijpt malök. Yangö andöñe azi kewöñan yambuñini kewö Ijpt malget: Kehat 133, Amram 137, Moses 80. (Mianğö andöñe Mosesñon Ijpt mosöta toroqeba yambu 40 malök.) Mi mindiriba yambu 430 ahök.
Ex 6.16, 18, 29 Dut 34.7 * 15:18: Apo 7.5

⁷ Aniga Kembangören garata kunöñ gölme qararañkölkölñe o jeñi kungö kösutñe miwikñaim wañgiyök. O jeñi mi Sur mire anangö köna jitñe miangören ahöza.

⁸ Miangören miwikñaim wañgiba kewö jiyök: “Hagar, Saraigö welen ambiñi, gi mönö denikeyök kazana denike anman?” Mewö jiiga kewö melenök: “Ni galöm ambini Saraigörenök asamböta ölöñ köla kazal.”

⁹ Mewö jiiga Kembangören garatanöñ Hagar kewö jim kutum wañgiyök: “Gi mönö kunbuk Saraigören anda welenñi qeba yañgö keu bapñe malman.”

¹⁰ Keu mi toroqeba kewö jii mörök: “Hagar, nöñön mönö göhö gwölönarökurupki ahum sehim enjigiba qötöñini oyoñoyongö dop qahö aiga malme.”

¹¹ Kembangören garatanöñ kunbuk toroqeba Hagargöra kewö jiyök: “Gi moröbuk akzana nahöñgi meman. Dölki tapötkokorok möta sahötnöñga mi mönö Kembangö kezapñe geiga mötza. Miangöra morögö qetñi Ismael qetman. (Ismael Anutunöñ kezapñan mötza.)

¹² Yañön azi doñki bau kömböt ewö aka (nanñi imbi-imbi qakñe lañ anda kaba) malma. Yañön böröñan ambazip pakpak qetal enjiiga ambazip pakpak yeñön i qetal wañgiba malme. Yañön munurupñi pakpak yembuk kerök-kerök aka nanñök kekelolo malma.”

¹³ Mewö jiiga Hagarnöñ kewö jiyök: “Nöñön mönö dölki kunöñ ni nehakzawi, i ekzal. “Miangöra Kembangö yañgöra keu jiyöhi, yañgö qetñi kewö qet wañgiyök: “Gi Kembangö ni nehakzawañön akzan. “Qetñi mewö qerök.

¹⁴ Könañi miangöra aka o löm miangö qetñi mi Ber Lahai Roi (Malmalñambuk mala nehakzawañgö o lömñi) qetketka ahöza. O löm mi toroqeba miri yahöt qetñiri Kades aka Bered mietkö sutñire ahöza.

¹⁵ *Hagarnöñ Abramgö morö nahöññi meyök. Abramnöñ nanñi moröñi Hagar meyöhi, yañgö qetñi Ismael qerök.

¹⁶ Abramnöñ yambuñi 86 aiga Hagarnöñ Ismael morö mi Abramgöra meyök. Mewö.

17

Jöhöjöhö areñgö aiwesökñi mi sile yandiyandi.

¹ Abramnöñ yambuñi 99 aiga Kembangöñ asuhum wañgiba keu kewö jiyök: “Nöñön Anutu kukösum pakpakö Toñi akzal. Miangöra gi mönö nöñgö keuni tem köla pöndañ ahakmeme diñdini wuatangöba malman.

² Nöñön jöhöjöhö areñ mi gi aka ni netkö sutñire ahali, mi mem köhöiba ahumsehip gihibi gwölönarökurupki yeñgö jañgöñinan mönö keta bölökñi akña.”

³ Mewö jiiga Abramnöñ simin köla bamgöiga Anutunöñ yañgöra keu kewö jiyök:

⁴ “Mötman, nöñön jöhöjöhö areñni göbuk kewö akzal: Göñön könagesö gwötpuk yeñgö iwi bömöññina akñan. Keu mewö jim jöhöbi ahöma.

⁵ *Göhö qetki Abram mi qahö toroqeba qetketka ahömapmö, göñön könagesö gwötpuk yeñgö iwi bömöññina akñangöra kuñgum gihizali, miangöra qetki mönö Abraham qetketka ahöma. *

⁶ Nöñön ahumsehip gihibiga gwölönarökurupki mi önöñi qahö asuhume. Yeñön jula deñda könagesö kambuñi kambuñi gwötpuk akñe. Göhö gwölönarökurupki yeñgörenök tosatñan kiñ kambuñi kambuñi akñe.

* **16:15:** Gal 4.22 * **17:5:** Rom 4.17 * **17:5:** Abram mi iwi öñgöñgöñi. Abraham mi könagesö gwötpuk yeñgö iwi bömöññini.

⁷ Nöñön mönö jöhöjöhö areñni mi nani aka gi, göhö gwölönarökurupki göhö andöge toroqeba asuhum öngömei, neñgö sutnine al köhöibiga teköteköñi qahö ahöm öngöba ahöma. Nöñön göhö Anutuği aka gwölönarökurupki göhö andöge asuhum öngömei, mönö yeñgö Anutuğina aka malmam.*

⁸ Gi Keinan gölmenöñ kiana maljani, nöñön gölme mi jömukñanök gi aka göhö gwölönarökurupki eñgö buñaya qem eñgibiga buñañini teteköñi qahö ahöm öngöba ahöma. Mewö ahöiga nöñön mönö yeñgö Anutuğina aka malmam.”*

⁹ Anutunöñ Abrahamgöra mewö jiba toroqeba keu kewö jiyök: “Mewö malmam-mö, göñön mönö nöñgö jöhöjöhö areñnanğö keuñi mi tem köla wuatangöba malman. Göhö gwölönarökurupki göhö andöge toroqeba asuhum öngömei, yeñön mönö mewöñanök mi tem köla wuatangöba mala mal öngöme.

¹⁰ Gi aka göhö gwölönarökurupki embuk jöhöjöhö areñni aka mi wuatangömegöra jizali, miangö aiwesökñi mi kewö: Eñgö sutnine azi pakpak yeñgö silenine mönö nöñgö aiwesökni yandime.*

¹¹ Nöñgö aiwesökni mönö silenine yandime. Mianğön jöhöjöhö areñ ni aka eñgö sutnine albi ahözawi, miangö aiwesökña ahöm öngöma.

¹² Nalö kewöñeyök könahiba azi pakpak eñgö sutnine toroqeba asuhum öngömei, yeñgö silenine mönö sömañini 8 aiga miangören nöñgö aiwesökni yandiba malme. Nanñine miri uruñe nanñini aka welenqegeurupñini yeñgören morönahönurupñini asuhumei, mi mönö öröröñ ak eñgiba malme. Welenqege tosatñi mi kian yeñgörenök moneñnöñ bohonñini megetka yeñgö morö nahönñini asuhume. Yeñön nanñini gwölönarökurupñini qahö akzemö, mi töndup nöñgö aiwesökni mi mönö yeñgö silenine mewöñanök yandiba malme.

¹³ Welenqege tosatñan nanñine miri uruñe asuhugetka welenqege tosatñi mi moneñnöñ bohonñini megetka yeñgö morö nahönñini asuhume. Nöñgö aiwesökni mi mönö yeñgö silenine mewöñanök yandiba malme. Nöñgö jöhöjöhö areñnanğö aiwesökñi silenine yandimei, mi mönö jöhöjöhö areñ teteköñi qahö ahöm öngömapköra jim köhöizal.

¹⁴ Azi kun danğön nöñgö aiwesökni silene qahö yandigetka öne malmawi, yañön mönö nöñgö jöhöjöhö areñni onğita qetalakza. Mianğöra azi mewöñi mi mönö nanñi ambazip kambu eñgö sutñineyök yakörim wañgigetka yaigep eta malma.”

¹⁵ Anutunöñ toroqeba Abrahamgöra kewö jiyök: “Gi anömgahö qetñi Sarai mi kude toroqeba qeta malmanmö, yañgö qetñi mönö Sara (jembon ambi) qeta malman. †

¹⁶ Nöñön Sara kötuatköm wañgibiga yañön göhöra morö nahön kun mema. Nöñön kötuatköm wañgibiga yañön ambazip kambuñi kambuñi gwötpuk yeñgö nam bömönñina akña. Yañgö gwölönarökurupñi yeñgörenök tosatñan könagesö kambu yeñgören azi kembuñi kembuñi akñe.”

¹⁷ Kembunöñ mewö jiiga Abrahamnöñ mi möta simin köla bamgöba uruñan kewö mötmörriba miangöra gön kölök, “Azi yambuni 100 akiga morö nahönan mönö denöwö asuhubawak? Mewöyök Saranöñ yambuñi 90 aiga mönö denöwö morö membawak?”

¹⁸ Abrahamnöñ mewö mötmörriba welipköba Anutu kewö qesim wañgiyök: “Göñön ölop Ismael kuñgum wañginöñga qetki bisiiga nöñgö gwölönarökurupni mi yañgörenök asuhume.”

¹⁹ Mewö qesiiga Anutunöñ kewö melenök, “Anömgı Saranöñ mönö göhö morö nahöngi mema. Mi meiga qetñi Aisak (gön kölja) qetman.

* 17:7: Luk 1.55 * 17:8: Apo 7.5 * 17:10: Apo 7.8; Rom 4.11 † 17:15: Qetñi kewögöra uteköyök: Yañön ambazip kambuñi kambuñi gwötpuk aka kin kembu tosatñi yeñgö nam bömönñina akña.

Nöñön Aisakpuk aka yangö gwölönarökurupni yembuk jöhöjöhö areñni mi al köhöibiga teteköni qahö ahöm öngöma.

²⁰ Ismael kötuatköm wangimamgö qesim ningizani, mi mewöyök ölop möt gihiba kötuatköm wangimam. Yanön azi kembu 12 miengö iwi bömönñini akña. Nöñön ahumsehip wangibiga gwölönarökurupni yengö jangöñinan mönö keta bölökñi akña. Yenön sehiba könagesö kambu ketani akña.

²¹ Mewö akñemö, Saranöñ nahöngi Aisak mi yambu euneangö nalö kewöñe memawi, nöñön mönö nani jöhöjöhö areñni mi yambuk al köhöimam.”

²² Anutunöñ Abrahambuk keu jiyohori, mi teköiga i mosöta wahöta öngöyök.

²³ Wehön miangöreñök Abrahamnöñ Anutugöreñ keu tem köla nanñi nahönñi Ismaelgö silene Anutugö aiwesökñi yandiyök. Mewöyöhök welenqeqeurupni nanñi miri uruñe asuhugetka tosatñi moneñnöñ bohonñini meiga malgeri, azi pakpak mi yangö miri uruñe tatkeri, i mönö körek mewöñanök ak enñiyök.

²⁴ Abrahamnöñ yambuñi 99 aiga silene aiwesök mi yandiget.

²⁵ Nahönñi Ismael mi yambuñi 13 aiga silene mi yandiget.

²⁶ Abraham aka nahönñi Ismael yetkö silenire aiwesök mi sömañ mohot miangöreñök yandiget.

²⁷ Azi pakpak Abrahamgö miri uruñe tatkeri, tosatñan nanñi miri uruñe asuhugetka tosatñi mi kian yengöreñök bohonñini meiga malgeri, körek yengö silenine aiwesök mi mewöñanök yandiget. Mewö.

18

Saranöñ azi morö memawangö keuñi Anutunöñ jiyök.

¹ Abrahamnöñ Mamre mire in ip ketani ketani miengö sutñine maliga Kembunöñ asuhum wangiyök. Silim miangöreñ wehön jitñi sihitñi köhöikñi qeiga Abrahamnöñ opo seri kounñangö numbuñe tarök.

² *Tata uba wahöta ehiga azi karöbutñan wösöñe kinget. Kingetka engeka opo seri koun numbuñeyök wölañ wahöta jömjölöñini jiba enñuanñitmamgöra kinñingöba anök. Anda waikñini memba simin köla gölmenöñ bamgöba geyök.

³ Geba kewö jiyök: “O Kembu-urupni, nöñön engö welenqeqeñini aka engö jeñine kalem möriam miwikñaiba maljal ewö, inñini mönö ni kude nonñita anme.

⁴ Ni engö welenqeqeñini aka ölop o moröñi kun memba kaba enñibiga könañini sanñonña ip kiangö aumñe tata luhut meme.

⁵ Nöñön ölop nene moröñi kun memba kaba enñibiga neme. Mianñon mem köhöim enñiiga ölop köna kunbuk toroqeba anme. Nöñön kewöröpni malbiga inñini ni göda qem ningiba kazeangöra ölop welen qem enñimam. “Mewö jüiga melenña kewö jiget: “Saiwap, jizanañgö dop mewö ölop akin.”

⁶ Mewö jigetka Abrahamnöñ ösumñan kinñingöba seri koun uruñe anda öngöba Saragöra kewö jiyök: “Möñö ösumok plaua ölop kötokñi amae (dis) karöbutkö dop memba melenña yengöra bered ohoman.”

⁷ Mewö jiba ösumñan bulmakau kambunöñ anda bulmakau dömñi busuñi löwötñi möwölöhöba welenqeqeñi kun wangüiga könahiba ösumok qeba möhamgöba ohoyök.

⁸ Mi möhamgöba ohom teköiga mi, kelök kosökñi aka juju o tosatñi memba anda azi tatkerangö bapñine alök. Bapñine aliga memba tatketka nanñi nalö miangöreñ kösutñine ip könañe galöñina kinök.

* 18:2: Hib 13.2

⁹ Kiniga kewö qesim wanğiget: “Anömgi Sara mi denike?” Qesim wanğigetka jiyök: “I opo seri koum uruñe endu tatza.”

¹⁰ Mewö jiiga azi yengörenök kunñan kewö jiyök: “Yambu mohotkö dop teköiga nöñön ölña lilingöba ki kabiga anömgi Saranöñ mönö morö nahönñambuk aka malma. “Mewö jiyökmö, Saranöñ opo seri koumgö num-buñe apñanğö andöñe kinda keu mi kezapñe geiga mörök.*

¹¹ Abraham aka Sara yetkön lök ambazip namñi ahotka yambuñiran gwötpuk ketanji aiga malohot. Saranöñ köñğö anğeka malöhi, miangö nalöñan lök onğit teköyök.

¹² Miangöra Saranöñ mi möta uruñan kewö mötmörriba gön kölök: “Nöñön lök ambi namñi sohosoholiñi akiga apni azi kembunan mewöñanök azi namñi aiga yambuk ahöahögö sihimnan kunbuk asuhubawak me qahöpto?”*

¹³ Mewö mötmörüiga Kembunöñ Abraham qesim wanğiba kewö jiyök: “Saranöñ wanigöra gön köla kewö mötmöriza: ‘Nöñön ambi namñi kötökñi aka ölña morö membileñak me?’

¹⁴ Kembunöñ mönö yuai kungöra qahö kötökñi qakömakza. Miangöra jizali, ‘Yambu mohotkö dop teköiga nöñön ölña lilingöba ki kabiga Saranöñ mönö morö nahönñambuk aka malma.’ ”*

¹⁵ Saranöñ kenğötñi möta mi köyatiba kewö jiyök: “Ni gön qahö köljäl. “Mewö jiyökmö, Kembunöñ kewö jiyök: “Qahö, gi gön ölña köljan. “Mewö.

Abrahamnöñ Sodom taongöra köuluköyök.

¹⁶ Mewö jiiga azi karöbut yeñön wahöta etkömosöta Sodom taonöñ göröken eleñda anbingö aket. Abrahamnöñ mewöñanök i enğubulmamğöra yembuk mohotñe anget.

¹⁷ Kembunöñ nanñanğöra kewö jiyök: “Ni yuai akñamğö mötzali, mi alani Abrahamğöra ölop qahö asambötmmam.

¹⁸ Kewögöra mi asambötmmamğö osizal: Abrahamnöñ nöñğö alani qainñi kun aka ahumsehip aiga könagesö ketanji kukösumñinambuk aka malme. Nöñğö kötümötuetnan mönö yanğöra aka gölmegö könagesö kambuñi pakpak yengö qakñine öñğöiga oyaenkyoayen akñe.

¹⁹ Nöñön i kewögöra möwölöhöm wanğial: Yanñön nahönböraturupñi aka gwölönarökurupñi yanğö andöñe asuhuba mal öñğömei, yengöra Kembugören köna kondela ahakmeme diñdiñi dop kölakzawi, mi wuatangömegöra jim kutum enğiba malma. Mewö maliga tem köla wuatangöba malme ewö, Kembu nöñön Abrahamğöra yuai asuhumapkö jim jöhöyali, miangön mönö ölñambuk pakpak ahakña.”

²⁰ Kembunöñ nanñök mewö jiba toroqeba Abrahamğöra kewö jiyök: “Sodom aka Gomora yeñön singisöndok lömbötñi lömbötñi aka malgetka kahasililiñ öñğöñğöñi ketanji asuhuiga gwötpukñan miangöra qeta sahörakze. Miangöra yengö singisöndokñinanğö keuñan mönö qariba qariba keta bölökñi akza.

²¹ Miangöra nöñön mönö yengören geba könañamñini ekñam. Kahasililiñ akeranğöra aka gwötpukñan nöñğö jene qeta sahöta malgeri, mi pakpak ölña aket me qahö, mi nöñön kewöta mötmamğö mötzal.”

²² Mewö jiiga azi yahötñan eleñda Sodom göröken anohotmö, Abrahamnöñ toroqeba Kembugö jemesoholñe kinök.

²³ Kinda Kembugö kösutñe anda kewö qesim wanğiyök: “Gi ambazip solanñi aka ambazip anğöjörakñinambuk mi mohotñe ayuhum enğimamğöra jizan me?

* 18:10: Rom 9.9 * 18:12: 1 Pitö 3.6 * 18:14: Luk 1.37

²⁴ Taon miangöreñ ambazip solanñi 50 malje ewö, göñön i ölna ayuhum engimangö jizan me? Taon mi yeñgöra aka engehoribanak me qahö?

²⁵ Göñön mewö akñangö osibanak. Mi yapmakek! (qahöpmahöp!) Göñön ambazip solanñi mi ambazip anğöjörakñinambuk yembuk mohotñe mindiriba enğunöñga qahö dop kölbaşuk. Mewö öröröñ kömumbepuk. Göñön gölme ambazip pakpak yeñgö keuñini jim tekömakzani, miangöra mönö nanñi könagi diñdiñi wuatangönöñga dop kölma.”

²⁶ Abrahamnöñ mewö jiiga Kembunöñ melenđa kewö jiyök: “Nöñön Sodom taonöñ ambazip solanñi 50 miwikñaim engimam ewö, yeñgöra aka taon pakpak mi ölop engehorimam.”

²⁷ Mewö jiiga Abrahamnöñ kunbuk kewö jiyök: “Kembu, ni nesak sömsöm omanñi ewö akzalmö, töndup keu köhöikñi Kembunangöra kuñguba jizal. Mi kude dop kölbaşmö, mi töndup ölop ni möt niñgiman.

²⁸ Taon miangöreñ ambazip solanñi 50 qahöpmö, 45 miyök malbeak ewö, göñön ambazip 5 yeñgöra aka taon pakpak mi töndup ayuhum engiman me qahö?” Mewö jiiga Kembunöñ kewö jiyök: “Nöñön ambazip solanñi 45 miangöreñ miwikñaim engimam ewö, taon mi mönö qahö ayuhumam.”

²⁹ Abrahamnöñ dumñe kunbuk keu kewö jiyök: “Ambazip solanñi 40 miyök miangöreñ miwikñaim engiman ewö, mönö denöwö akanak?” Mewö jiiga kewö melennök: “Ambazip 40 yeñgöra aka taon mi qahö ayuhumam.”

³⁰ Mewö jiiga jiyök: “O Kembu, urugi öngöbapukmö, ni kunbuk keu jimangö mötzal. Ambazip solanñi 30 miyök miangöreñ miwikñaim engiman ewö, mönö denöwö akanak?” Mewö jiiga kewö melennök: “Ambazip solanñi 30 miangöreñ miwikñaim engimam ewö, nöñön mönö taon mi qahö ayuhumam.”

³¹ Abrahamnöñ toroqeba kewö jiyök: “Kembu, ni keu köhöikñi Kembunangöra kuñguba jizal. Mi kude dop kölbaşmö, mi töndup ölop möt niñgiman. Ambazip solanñi 20 miyök miangöreñ miwikñaim engiman ewö, mönö denöwö akanak?” Mewö jiiga kewö melennök, “Ambazip 20 yeñgöra aka taon mi qahö ayuhumam.”

³² Mewö jiiga Abrahamnöñ kunbuk kewö qesiyök: “O Kembu urugi öngöbapukmö, ni kunbuk sömanñi mohot-töp ki keu jimangö mötzal. Ambazip solanñi 10 miyök miangöreñ miwikñaim engiman ewö, mönö denöwö akanak?” Mewö jiiga kewö melennök, “Ambazip 10 yeñgöra aka taon mi qahö ayuhumam.”

³³ Mewö eraum-mörohot teköiga Kembunöñ Abraham mosöta aniga yanñon kunbuk liliñgöba miriñe kayök. Mewö.

19

Sodom aka Gomora yeñgö anğöjörak malmalñini

¹ Suep garata yahöt mi Abraham mosöta anda mare aiga Sodom anğorohot. Anğorohotka Lot azi mianñon taon mianğö kiripo nanğune tarök. Tata etkeka wahöta jömjölöñiri jiba enğuanğitmamğöra anda gölmenöñ simin köla bamğöba geyök.

² Geba kewö jiyök: “O kembuyahötñi, iñiri ölop welenqeqeñiri nöngö mire kaba könanñiri sanğonda mohotñe sunğem ahöbin. Ahöba wahöta ölop söñanök köna toroqeba anmahot. “Mewö jiyökmö, yetkön kewö jiyohot: “Qahö, niri ölop qenjarök sombem kunöñ anda ahöbit.”

³ Mewö jiyohotmö, Lotnöñ kapan köhöikñi köla jiba etkuangita nanñi miriñe anda öñgöget. Öñgöba welenqeqeurupñi jim kutum enğiiga bered yistñi qahö ohoget. Mewöyök numbu nene nahömñambuk möhamğöba ohoba etkigetka neyohot.

⁴ Mi nemba gaun ahöbitkö ahotka miangörenjök Sodom ambazipnönj kaba miri mi liliköget. Sodom taongö bahöni pakpak miangörenjök ambazip namni aka sepgwölö mi totnönj totnönj lömbötñambuk öröba kanjotket.

⁵ Kanjuta Lotköra kewö qetket: “Azi yahöt mare göhörenj kazahori, mi denike? Azi nini yetpuk sero akingöra mötzin. Miangöra mönö i etkuangita nenjörenj etme.”*

⁶ Mewö qetketka Lotnönj nanju metala yengörenj geba andöñe nanju kölok.

⁷ Nanju köla kewö jiyök: “Alaurupni, mewö qahö. Silik bölöni mi kude akñe.

⁸ Mötket. Nöngö bōratni yahöt seram mala nalö kunönj azibuk qahö ahöyohot. I ölop engöra etkuangita etpiga wanat yuaia akingö mötzei, mi ölop sihimñini meköme. Mewömö, nöngö miri boñan azi yahöt etkualönjda sel jöhöm etkizawi, ia mönö yuai bölöni kun qahöpmahöp ak etkime.”

⁹ Mewö jiyökmö, yenön kewö melenjda terinjda qetket: “Mönö kesalnönj. Göñön ki kaba kiana mala nangahöra ninia jiba mötnönj öngöiga ninia pōndañ jim kutum nenjimangö mötzan? Yetkōn qahö kamahot ewö, mönö nangak nenjörenj kanönjga mönö kahasililinj keta bölökñi nangi ak gihibin. “Mewö jiba Lot utalgetka kököndöt aniga öngöba miri nanjuñi qesinjingö aka kinget.

¹⁰ Mewö aka kingetmö, azi yahöt mietkōn bōrōñiri bōrañda Lot öröm gilo-hotka miri uruñe öngöiga nanju kölohot.

¹¹ Nanju köla kinda azi ketanji morōñi miri nanjuñe yaigep kingeri, mi jiyohotka keu jitñiran enjgualönjiga jenini gömöliiga jipjap kota nanju mi-wikñaibingö mezañqezan aka jaruba osiget. Mewö.*

Lotnönj Sodom gölme mosörök.

¹² Azi yahöt yetkōn Lotköra kewö jiyohot: “Gi nahönurupki, qingibōraturupki aka tinilosomurupki tosatñi pakpak taon kianjörenj maljei, i mönö enjgualitnönjga taon ki mosöta anme.

¹³ Nini taon ki ayuhuba köndenjmōndenñbin. Könagesö kienjgö kahasililinjöra gwōtpukñan Kembugö jeñe önōñi qahö qeta sahöta malget. Miangöra yanön melaim netkiiga gölme ki ayuhuba köndenjmōndenñbitköra ki kazit.”

¹⁴ Mewö jiyohotka möta Lotnönj anda qingji buña yahöt bōratyahötñi etkömembitkö jiiga malohori, yetköra kewö jiyök: “Injiri mönö ösumok wahōrohotka miri ki mosöta anbin. Kembunönj taon ki ayuhuba köndenjmōndenñmangö akza. “Mewö jiiga yetkōn keu mi mörohotka göngōnahit tandök ahök.

¹⁵ Miri wanjaran suruiga Suep garata yahöt yetkōn Lot öröm kunjum wanjiba kewö jiyohot: “Anutunönj Sodom yengö sinjisōndokñinanjō likepñi melenjda taonñini köndenjmōndenñma. Göñön yembuk mohotñe ayuhubanbuköra mönö zilañ wahöta anōmgi aka bōratyahötñi göbuk tatzahori, mi enjgualgita taon ki mosötket.”

¹⁶ *Mewö jiyohotka Lotnönj toroqeba eksekpeksek aiga azi yahöt yetkōn Lotkö bōrōñi melanjiba memba anōmñi aka bōratyahötñi yengö bōrōñini mewōñanök melanjiba memba enjgualgita taon silenje anget. Kembunönj mewö ak kömum enjgiyök.

¹⁷ Taon silenje angetka azi yahöt yetkörenjök kunönj keu kewö jiyök: “Mal-malñini anjōn kölmegöra mönö ösumok misinjōba angaitme. Andōñine kude lilingöba uba anda gölme körōñe endu angota miangörenj mewöyök dörok kude alme. Ayuhubepuköra mönö kundunje eu öngöba misinjōba angaitme.”

¹⁸ Mewö jiyökmö, Lotnönj kewö jii mörohot: “O Kembuni, göñön mewö akingöra kude jiman.

* 19:5: Kemb 19.22-24 * 19:11: 2 Kinj 6.18 * 19:16: 2 Pitö 2.7

19 Göñön malmalnangö bohonji jöhöba ak-kömukömu ketanji kondelnönga göhö jege ölna kalem möriam miwikñaiba welenqeqegi akzalmö, mötnöñ, nöñön kundunje eu misingöba angaitmamgö osimam. Köndenmönden kianjón nöngö qakne öngöiga kömumbilenbuköra kenjötni mötzal.

20 Mötnöñ, taon moröni kun endu ahöi ekzani, mianjón köröpñi qahöpmö, ölop anbinangö dop akza. Miangöra ölop jinönga miangöreñ misingöba angaita ölöwaka malbin. Miri morörökñi mi eknönga dowe ahöiga miangöreñ ölop anda malmalninanangö bohonji jöhöbin.”

21 Mewö jii mörohotka kunöñ kewö melenjök: “Mi ölop! Keu jizani, miangöra mewöyök ölop imbi köl gihimam. Taon moröñangöra jizani, mi qahö ayuhumam.

22 Mi qahö ayuhumam-mö, injini mönö ösumok miangöreñ misingöba angaitme. Miangöreñ qahö anjotketka nalö sutñi kewöñe nöñön yuai kun akñangö osimam. Injini mutuk miangöreñ anjotketka miangö andöñe ölop jim kutubiga köndenmönden asuhuma. “Lotnöñ taangöra ‘morodökñi’ jiyöhangöra aka taon miangö qetñi mi Zoar (morodökñi) qetketka ahöza.

Kembunöñ Sodom aka Gomora köndenmöndenök.

23 Wehönöñ lök koriga Lotnöñ Zoar taonöñ kanjorök.

24 *Kanjoriga Kembunöñ jiiga suepnöhök Kembangö mireyök salfa köt köñöpñambuknöñ mi kie ewö Sodom aka Gomora yengö qakñine eta turum enjyök.

25 Turum enjiba mianjón taon yahöt mi aka gölme köröñi pakpak kösutñire ahözawi, ambazip körek miangöreñ malgeri aka ip kösö yuai görökñi (töngönñi) gölme miangöreñ ahögeri, mi ayuhum enjim teköyök.

26 Lotkö anömñan apñi wuatangöba anda kunbuk elenja andöñe uba miangöreñök letota sihi köt aka tandö ewö kinök.*

27 Abrahamnöñ söñanök wahöta mutuk Kembangö jemesoholñe kinda keu eraum-mörohoru, miangöreñ anök.

28 Miangöreñ anda kinda Sodom, Gomora aka gölme köröñi ketanji pakpak miangöreñ göröken ui aniga gölme miangöreñ köwak injanji ketanjan tokoba koriga ehök. Mi köñöp ketanji ohogetka köwak ketanji wahörakzawi, miangö dop ahök.

29 Anutunöñ gölme köröñi miangö taonñi taonñi ayuhuba köndenmöndenja nalö miangöreñ Abraham mötmörim wanjyök. Behötñi Lotnöñ taon miangöreñ maliga mienjón melenji gebingö aketka Anutunöñ nalö miangöreñök jim kutuiga Lot köndenmönden miangö uruneyök wangita kaget. Mewö.

Moab aka Amon könagesö yengö köñanji

30 Lotnöñ Zoar taonöñ malmamgö kenjötni mörök. Miangöra böratyahötñi etkuangita Zoar mosöta gölme kundunambuk miangöreñ anda tatket. Böratyahötñi yahöt yetpuk banjet urunje ahöm wahöt aka malget.

31 Miangöreñ mala böratñi ketanjan nalö kunöñ munñangöra kewö jiyök: “Naniri iwiniran lök azi namñi akza. Ambazipnöñ gölme dop miangöreñ amimba nahönbörat miwikñaim enjimakzemö, gölme kiangöreñ azi kun netkömemapköra qahö malja.

32 Miangöra ölop kaba iwiniri wain o wangizi nemba urunji enjololon aiga yambuk ahöba gölöm ala gwölönarök miwikñaiziga könagesöñinan toroqeba malme.”

* 19:24: Mat 10.15; 11.23-24; Luk 10.12; 17.29; 2 Pitö 2.6; Jud 7 * 19:26: Luk 17.32

³³ Mewö jiba sun gem miangörenök iwinjiri wain o wangiyohotka neyök. Nemba urunji enjololon aiga datnan anda yambuk ahöyök. Wani nalönön qöhöröne kayök aka wani nalönön wahöröhi, mi iwinjan qahö mörök.

³⁴ Ahöba wahöta börtatni ketanan munjangöra kewö jiyök: “Nönön uran sun gem iwinambuk ahöyal. Ölop merak sun gem mewöyök wain o kunbuk wangizi nemba urunji enjololon aiga gönön mönö anda yambuk ahömahot. Mewö ahöba iwinirangörenök gölöm ala gwölönarök miwiknaiziga könagesönanan toroqeba malme.”

³⁵ Mewö jiba sun gem miangören mewöyök iwinjiri wain o wangiyohotka neyök. Nemba urunji enjololon aiga munjan anda yambuk ahöyök. Wani nalönön qöhöröne kayök aka wani nalönön wahöröhi, mi iwinjan qahö mörök.

³⁶ Mewö ahotka miangöra mohotjamjire iwinirangörenök gölöm alohot.

³⁷ Börtatni ketanan morö azia memba qetnji Moab (iwinangörenök) qerök. Moab yangö gwölönarökurupjan ahumsehip aka kotketka nalö kewöne mewöyök qetjni Moab könagesö qerakzin.

³⁸ Börtatni morönan mewönanök morö azia memba qetnji Ben Ami (könagesönan gö nahönni) qerök. Azi miangö gwölönarökurupjan ahumsehip aka kotketka nalö kewöne mewöyök qetjni Amon könagesö qerakzin. Mewö.

20

Abraham aka Abimelek.

¹ Abrahamnön Mamre miri mosöta toroqeba Saut göröken distrik qetnji Negew miangören anda miri qetnji Kades aka Sur mietkö sutnjire malök. Miangö andöne toroqeba taon qetnji Gerar miangören anda kusuknanök malök.

² *Miangören mala ambazip miengöra kewö jii mötket: “Sara mi nena. “Mewö jiiga Gerargö kinji Abimelek yanön keu ali aniga Sara wangita jakömbuak mirinje kaget.

³ Mewö aketmö, Anutunön sun gem kunön Abimelekören kaba gaunön kewö jiyök: “Ambi buja qem anguzani, mi azi kungö anömna. Miangöra gi mönö yangöra aka kömupkö bujaya aknan.”

⁴ Mewö jiyökmö, kinji Abimeleknön Sara qahö meyöhangöra aka kewö jiyök: “Kembu, ni singisöndokö keuni qahö. Miangöra gönön ni aka könagesöurupni nini öne töhön ayuhum nenjibanbuk.

⁵ Abrahamnön mönö nanjak nöngöra kewö jiyök: ‘Ambi mi nena.’ Ambinön mewöyök kewö jiyök: ‘Abraham mi nena.’ Miangöra urune genmon qahö ahöiga ambi mi jibi kaiga börönan yuai tölokni kun qahö ahal.”

⁶ Mewö jiiga Anutunön gaunön likepni kewö jii mörök: “Keu jizani, mi ölna. Göhö uruge genmon kun qahö ahöiga göhören kayöhi, mi mötzal. Miangöra gönön ambi mi misiriba nöngö jene singisöndok akanbuköra sel jöhöm gihiba malal.

⁷ Mewögöra ambi mi mönö kunbuk melen da apnangören wangiman. Azi mi kezapqetok azia aka ölop göhöra köuluköiga qahö kömuman. I kunbuk qahö wangiman ewö, keu ki mönö ölna mötman: Gi aka tinitosolomurupki injini mönö körek kömume.”

⁸ Keu mi jii kinön möta sönanök wahöta pom jembonurupni pakpak engohol tokom engiba Kembunön keu pakpak jiyöhi, mi jii möta töwöratiba kenjötjni gwötpuk mötket.

⁹ Mewö mötketka kinji Abimeleknön Abrahamgöra keu ali öngöiga kewö jiba qesim wangiyök: “Gi mönö wani kimbiala ak nenjinön? Nönön wani bölöni

* 20:2; Jen 12.13; 26.7

kun ak ghibiga göñön kondotnönnga singisöndokö keu lömbötñan mönö ni aka könagesöni nöngö sel tohon uruñe maljei, neñgö qaknine öñgömamgö akza? Göñön yuai qahö ahakñangö dop mia sonjo walönnda ak niñginön.

¹⁰ Göñön mönö könañi wuanönögöra silik mi aknöñe?" Kiñ Abimeleknön Abraham mewö qesim wañgiiga

¹¹ kewö melenök: "Nöñön keu mi kewö mötmöriba jial: 'Gölme kiangö könagesö eñön Anutugö jitñi ongitpinbuköra kengetñini qahö mötpeak. Miangöra ni anömnañgöra aka nuñguget kömumbilenbuk.'

¹² Yañön ölña neni, iwinangö böratñi akza. Namnañgö böratñi qahö akza-wañgöra i anömna meal.

¹³ Anutunön Iwinangö miriñi mosöta kungen anmangö jiyöhi, nöñön nalö miangöreñ Saragöra kewö jial: 'Niri denike denike anbiri, miangöreñ nöngöra nena jiman. Mewö aka mianñön ni urukalem kondel niñgiba malman.' "

¹⁴ Mewö jii möta Abimeleknön Abrahamgö anömñi Sara melennda wañgiyök. Mewöñanök lama bulmakau aka welenqege azi aka ambi mi mohotñe i wañgiyök.

¹⁵ Wañgiba keu kewö jiyök: "Mötnön. Nöngöreñ gölme ki wösöge ahözawi, miangöreñ mönö nangi sihingahö dop malman."

¹⁶ Mewö jiba Saragöra kewö jiyök: "Mötnön. Nöñön moneñ silwö köt 1000:gö dop nengi wañgibiga mianñön töwagi akza. Töwa mianñön könañamgi kondeliga ambazip körek göbuk maljei, yeñön mi eka kewö jiba möt yaköme, 'Singisöndokö keuñi mi Saragöreñ qahö ahöza.' " Mewö jiyök.

¹⁷⁻¹⁸ Abrahamgö anömñi Saragöra aka Kembunön ambi pakpak kiñ Abimelekö miri uruñe malgeri, yeñgö morö memegö könañi jöhöyök. Miangöra Abrahamnön Anutu köuluköiga Abimelek mem ölöwahök. Mewöyök anömñi aka welenqege ambiurupñi mem ölöwak enñgiiga kunbuk moröñinambuk aket. Mewö.

21

Aisak asuhuyök.

¹ Kembunön Sara kalem möriam wañgimamgö keuñi jim jöhöi ahöyöhi, miangö dop i ek galöm ak wañgii malök. Keu jiyöhi, miangö dop i kewö ak wañgiyök:

² Saranön gölöm aliga Abrahamnön azi namñi aiga töndup yañgö morö nahönñi meyök. Anutunön morö nahön asuhumapkö keuñi qeljine jim jöhöyöhañgö dop mi mönö nalö miangöreñök asuhuyök.*

³ Saranön Abrahamgö morö nahönñi meiga qetñi Aisak (gön kölja) qerök.

⁴ Qeriga Aisaknön wehönñi 8 aiga nalö miangöreñ Anutugö aiwesökñi silene yandiyök. Anutunön keu jim kutui ahöyöhañgö dop mi yandiyök.*

⁵ Abrahamnön yambuñi 100 aiga nahönñi Aisak asuhuyök.

⁶ Asuhuiga Saranön keu kewö jiyök: "Anutunön gönkölköl miwikñaim niñgiyök. Miangöra denike yeñön nöngö kösohotni mötmei, yeñön mönö nömbuk gön kölme."

⁷ Mewö jiba toroqeba kewö jiyök: "Saranön morö galömkölkölña akñawi, dañön keu mi qeljine möta Abrahamgöra jibawak? Mewö qahöpmö, nalö kewöñe yañön azi namñi aiga nöñön töndup yañgö nahönñi meal. "Mewö.

⁸ Aisaknön qariba juzu mosoriga wehön miangöreñök Abrahamnön nene lömbuan ketañi alök.

Saranön Hagar aka Ismael közöl etkiyök.

* **21:2:** Hib 11.11 * **21:4:** Jen 17.12; Apo 7.8

⁹ Ijpt ambi Hagarnöŋ Abrahamgö morö nahönŋi Ismael meyöhi, yaŋön nalö kunöŋ munŋi Aisak ilita mepaiköba gönawöt ak waŋgiiga Saranöŋ mi ehök.

¹⁰ Mewö eka Abrahamgöra kewö jiyök: “Welen ambigö nahönŋan mönö nöŋgö nahöni Aisakpuk göhöreŋ öröyuai mi qahö mendenŋa buŋa qem aŋgumahot. Welen ambi mi aka nahönŋi mi mönö közölnöŋga anmahot.”*

¹¹ Saranöŋ keu mi jiyöhi, mianöŋ Abrahamgö uruŋi qeiga Ismael mi nahönŋi ahöhaŋgöra aka urueret möriga uruŋi mötökömbuk ahök.

¹² Mewö ahiga Anutunöŋ yaŋgöra keu kewö jiyök: “Nahöŋgi aka welen ambigi Hagar yetköra mönö urugoro ketanŋi kude mötman. Aisakö gwölönarökurupŋi yeŋönök mönö göhö qetbuŋagi bisiba malme. Miangöra Saranöŋ keu göhöra jizawi, mi pakpak mönö möta tem kölman.”*

¹³ Welen ambigahö nahönŋan göhö gwölönaröki akzawaŋgöra nöŋön i mewöŋanök ahumsehip waŋgibiga gwölönarökurupŋan könagesö ketanŋi akŋe.”

¹⁴ Mewö jii möta Abrahamnöŋ ahöba söŋan kötökŋe wahöta nene tosatŋi memba o uu (ou huhu) lama silenŋan memenŋi mianöŋ o uba kaba Hagargö qamböŋe ala mindiŋgöba nahönŋambuk melaim etkiiga mosöta anohot. Anda Berseba gölme qararaŋkölkölŋe aŋgota liliköba malohot.

¹⁵ Malohotka lama silenŋe o memba anöhi, mianöŋ qahöwahiga nahönŋi mi böŋbaŋ ip köhösoŋi kungö bapŋe ali ahöyök.

¹⁶ Ali ahöiga kinda kewö mötmöriyök: “Nahönan jeni qakŋe kömumawi, mi ekŋangö osiba jemörön akzal. “Mewö mötmöriba pokom mulget anakzawaŋgö dop tikep anda tata silata sahöt gigilahöyök.

¹⁷ Morö sahöröhi, mi Anutunöŋ möriga garataŋan suepnöhök Hagargö qeta kewö jiyök: “Hagar, gi wani lömbötkö uruŋe maljan? Keŋgötki kude mötnöŋ. Morönöŋ endu ahöba sahötzawi, Anutunöŋ sahötŋi mi lök mötza.

¹⁸ Mönö wahöta morö nahöŋgi gölmenöhök kököbihinöŋ wahöriŋa böröŋe memba mökökölim waŋgiman. Nöŋön i könaŋgep ahumsehip waŋgibiga gwölönarökurupŋan sehiba könagesö ketanŋi qetbuŋaŋinambuk akŋe.”

¹⁹ Suep garatanöŋ mewö jiiga Anutunöŋ jeŋi metohoiga uba o lömŋi kun ehök. Mi eka lama silenŋi memba anda mianöŋ o uba kaba nahönŋi waŋgiiga neyök.

²⁰ Anutunöŋ Ismaelbuk kiniga qariba gölme qararaŋkölkölŋe mala erim nemi azia ahök.

²¹ Gölme qararaŋkölkölŋi qetŋi Paran miangöreŋ maliga namŋan Ijpt kantrinöhök ambi kun memba anömŋa waŋgiyök. Mewö.

Abraham aka Abimelek yetköŋ urujöhöjöhö ahot.

²² *Nalö miangöreŋ Abimelek aka yaŋgö yarö kambuŋaŋgö suahe galöŋŋi qetŋi Fikol yetköŋ Abrahamgöra kewö jiyohot: “Göŋön öröyuai pakpak aka memakzani, Anutunöŋ mönö miangöreŋ göbuk kinakza.

²³ Miangöra göŋön mönö merak kiangöreŋ Anutugö jeŋe jöjöpäŋ keu kewö jiba jim köhöiman: ‘Nöŋön gi, moröurupki aka gwölönarökurupki embuk isimkakalek kun kude aka malmam.’ Mewö jim köhöiba nöŋön ak kömum gihiba malali, miangö dop göŋön mönö mewöŋanök gölme ki aka ni ak kömum netkiba malman. Gi gölme kiangöreŋ kiana aka maljan.”

²⁴ Mewö jiyohotka Abrahamnöŋ kewö jiyök: “Nöŋön jöjöpäŋ keu mi ölöp jiba jim köhöimam.”

²⁵ Mewö jiyökmö, Abimelekö welenqeŋeurupŋan o löm kun nanŋinaŋgöra aŋgön kölgeri, Abrahamnöŋ miangöra Abimelek jim waŋgiyök.

* **21:10:** Gal 4.29-30 * **21:12:** Rom 9.7; Hib 11.18 * **21:22:** Jen 26.26

²⁶ Jim wanġiyökmö, Abimeleknöŋ kewö melenġa jiyök: “Daŋön silik mi ahöhi, mi nöŋön qahö mötzal. Nangak mianġö keuŋi kun mutuk qahö jinöŋ möta mala merak-kun keu mi mötzal.”

²⁷ Mewö melenġa jiiga Abrahamnöŋ anda lama aka bulmakau memba kaba Abimelek wanġiiga nalö mianġörenġök sutŋire jöhöjöhö aka alohot.

²⁸ Mi ala Abrahamnöŋ lama kambuŋineyöhök lama ambiŋi moröŋi 7 meköm enġiba al enġii nanŋinök kinġet.

²⁹ Mewö kinġetka Abimeleknöŋ Abraham kewö qesim wanġiyök: “Lama ambiŋi moröŋi 7 kewöta endu al enġinöŋga nanŋinök kinġei, mi könani wuanöŋgöra?”

³⁰ Qesim wanġiiga kewö melenġnök: “Nöŋön o lömŋi ki esiali, keu mi jibiga mi möt narizan ewö, lama moröŋi 7 ki mönö nöŋgö böröneyök buŋa qem anġunöŋga nöŋgö keunanġö dangununġi akŋa.”

³¹ Mewö melenġa azi yahöt mi gölme mianġörenġ kinda jöjöpän keuŋiri jiba jim jöhöm anġuyohot. Mianġöra miri mianġö qetŋi Berseba qerakze. *

³² Berseba mire jöhöjöhö mewö ahot teköiga Abimelek aka yanġö yarö kambuŋanġö suahö galöŋŋi Fikol yetköŋ wahöta lilingöba Filistin yenġö gölmenöŋ anohot.

³³ Anohotka Abrahamnöŋ berem ip kun Berseba miri mianġörenġ kömöta Kembu Anutu bem koŋkoŋ yanġö qetŋi qeta köuluköyök.

³⁴ Köuluköba kinda Filistin yenġö gölmenöŋ nalö köröpŋi kiana aka malök. Mewö.

22

Anutunöŋ Abraham esapköm wanġiyök.

¹ Yuai mi asuhuiga nalö tosatŋi teköiga Anutunöŋ Abraham esapköm wanġiyök. Qetŋi “Abraham!” qeriga yanöŋ “Ni ki kinjal,” jiba melenġnök.*

² Mewö melenġniga kewö jiyök: “Aisak nahöŋgi nanŋi mohotsirik urugan jöpaköm wanġimakzani, i mönö wanġita Moria gölmenöŋ anda kundunġi kun kondel gihimami, mianġörenġ öŋgöba i nöŋgö jöwöwöla ohoman.”*

³ Mewö jiiga Abrahamnöŋ ahöba söŋan kötökŋe wahöta doŋki qakŋe dum tatatŋi möhamgöba welenqeqeŋi yahöt aka nahönŋi Aisak enġuanġirök. Jöwöwölgö könöpŋi dopŋe köl teköba börangöba ala enġuanġita Anutunöŋ gölme jiyöhi, mianġörenġ anök.

⁴ Anda mala wehön karöbutŋi mianġörenġ jeŋan uba wahöta gölme mi ehiga köröwen ahöyök.

⁵ Mi eka welenqeqe yahötŋi yetköra kewö jiyök: “Inġiri doŋkibuk ki tarohotka ni aka morö nahön netköŋ endu anda Anutu waikŋi memba möpöseiba kunbuk lilingöba etkörenġ kabit.”

⁶ Abrahamnöŋ mewö jiba jöwöwöl ohohogö könöp böranŋi memba nahönŋi Aisakö qamböŋe ali öŋgöiga nanŋak könöp jit aka sou meyök. Mewö meiga mohotŋamŋire anohot.

⁷ Mewö anda Aisaknöŋ an ala iwiŋi Abrahamgöra kewö jiyök: “Iwini!” Mewö jiiga kewö melenġnök: “Nahöni, wania?” Mewö melenġniga kewö qesiyök: “Könöp jitŋi aka könöp mia ki memba kazitmö, jöwöwöl ohohogö lamaanġi mi denike?”

⁸ Mewö qesiiga iwiŋan kewö melenġnök: “Nahöni, Anutu nanŋak mönö jöwöwöl ohohogö lamaanġi kun miwikŋaiba netkima. “Mewö melenġniga toroqeba mohotŋamŋire anohot.

* **21:31:** Berseba keu mianġö könani yahöt: sewengö o lömŋi aka jöjöpän keugö o lömŋi. * **22:1:** Hib 11.17-19 * **22:2:** 2 Kor 3.1

⁹ Anda Anutunöŋ gölme jiyöhanğoreŋ anğota kinda jöwöwöl ohohogö altanġi kun memba könöp mianğö qakŋe ala areŋğöyök. Areŋğöba nahönŋi Aisak jöhöba altanöŋ könöp qakŋe al waŋgiyök.*

¹⁰ Al waŋgiba nahönŋi umamğöra böröŋi boraŋda sou memba atöŋnök.

¹¹ Atöŋniga mianğoreŋök Kembangöŋ garatanöŋ Suepnöhök Abrahamğöra kewö qerök: “Abraham, Abraham!” Mewö qeriga “Ni ki kinjal,” jiba melenğök.

¹² Mewö melenğiga kewö jiyök: “Börögan mönö morögö qakŋe kude alman. Yaŋğö qakŋe yuai kun kude akŋan. Göŋön nahöŋgi mohotsirik mi nöŋğöra qahö anğön köljananğöra könaŋamgi merak kewö möt yaközal: Gi Anutugö keu jitŋi onğitpanbuköra kenğötŋi mörakzan.”

¹³ Mewö jiiga mianğoreŋök uba wahöta ehiga lama azinġi kun ilitŋan böŋbaŋ ip köhösonöŋ gili geiga kinök. Mi eka anda memba kaba nahönŋanğö salupŋe lama mianğön jöwöwöl ohoyök.

¹⁴ Mianğöra Abrahamnöŋ gölme mianğö qetŋi mi ‘Kembunöŋ miwikŋaiba netkima,’ jiba qerök. Nalö kewöŋe mewöŋanök keu kewö jimakze: “Kembunöŋ mi kundupŋe miwikŋaiba netkima.”

¹⁵ Kembangö garatanan Abrahamğöra Suepnöhök kunbuk kewö qeriga yahöt ahök:

¹⁶ “Kembu nöŋön kewö jizal: Nanak nani qetni qeta jöjopaŋ keu kewö jiba jim köhöizal: Göŋön silik ki aka nahöŋgi mohotsirik mia nöŋğöra qahö anğön kölġani,

¹⁷ mianğöra nöŋön ölŋa gi kötuetsköba ahumsehip gihibiga gwölönarökurupki yeŋön önöŋi qahö sehime. Sehigetka qötöŋinan mönö suep könakembagö senğelaunġi ewö akŋa aka köwet jitŋe sakösin ahöm anjei, mianğö dop akŋa. Göhö gwölönarökurupki yeŋön mönö köhöiba kerökurupŋini enğuba luhut ala siti gölmeŋini enğuanğita anğön köla malme.* *

¹⁸ Göŋön nöŋğö keuni tem kölġani, mianğöra göhö gwölönarökurupki yeŋğoreŋök kungöra aka nöŋğö kötümötuetnan mönö gölmegö könagesö kambunġi pakpak yeŋğö qakŋine öŋğöiga oyaenğoyaen akŋe.”*

¹⁹ Kembangö garatanan mewö jiiga Abrahamnöŋ moröŋambuk liliŋğöba welenğeqeyahötŋi yetköreŋ anda aitonğöba mohotŋe Berseba mire anget. Abrahamnöŋ Berseba miri mianğoreŋ opo seri kounġi möröreŋğöba malök. Mewö.

Nahorgö gwölönarökurupŋi

²⁰ Nalö tosatŋi teköiga buzup keu kun kewö jigetka Abrahamğoreŋ kayök: “Milkanöŋ mewöŋanök nama akza. Yaŋön mungi Nahorgö nahönurupŋi tosatŋi enğömeyök.”

²¹ Moröŋi mutukŋanğö qetŋi mi Uz, yaŋğö munġi Buz aiga yaŋğö könaŋe Kemuel, Aramğö iwiŋi.

²² Kemuelğö könaŋe Kesed, Hazo, Pildas, Jidlaf aka Betuel.

²³ Betuelnöŋ Rebekagö iwiŋa ahök. Milkanöŋ Abrahamğö munġi Nahorgö nahönurupŋi 8 mi enğömeyök.

²⁴ Nahorgö anömŋi bohonġi qahö memeni qetŋi Reuma yaŋön mewöŋanök nahönurupŋi tosatŋi enğömeyök. Yeŋğö qetŋini mi Teba, Gaham, Tahas aka Maka. Mewö.

23

Saranöŋ kömuyök.

* 22:9: Jei 2.21 * 22:17: Hib 6.13-14 * 22:17: Hib 11.12 * 22:18: Apo 3.25

¹ Saranöŋ mala mal öŋgöiga yambuŋi 127 ahök. Saranöŋ miangö dop malök.

² Mala Keinan gölmenöŋ miri qetŋi Kiriya Arba, qetŋi alaŋi Hebron qerakzei, miangöreŋ kömuyök. Kömuiga Abrahamnöŋ miangöreŋök anömŋaŋgöra jŋgen köla sahötmamgöra anök.

³ Anda sahöt teköba wahöta anömŋaŋgö qamötŋi mosöta anda kinda Hit ambazip yeŋgöra keu kewö jiyök:

⁴*“Ni eŋgö sutŋine kiana kaba qandak (kusuk) maljal. Miangöra iŋini mönö gölmeŋinaŋgö bahöŋi kun kiangöreŋ niŋgigetka bohonŋi membiga qaksirini aiga alaurupni yeŋgö qamötŋini miangöreŋ ala löm köl eŋgimakŋam.”

⁵ Keu mewö jiiga Hit yeŋön melenŋa kewö jiget:

⁶“O azi kembu, gi ölop neŋgöreŋ keu ki mötnöŋ. Gi neŋgö sutŋine Anutugö azi jembonŋi maljanaŋgöra aka qaksirigi sihimgan denike ek soroköba memangö mötzani, miangöreŋ mönö ölop qamötŋi löm kölman. Göŋön qamötŋi esim kölman jinöŋga neŋgöreŋök kunŋan mi qahö aŋgön köl gihima.”

⁷ Mewö jigetka Abrahamnöŋ wahöta gölme tourupŋi Hit ambazip yeŋgö wösöŋine geba sipköm eŋgiyök.

⁸ Sipköm eŋgiba kinda yeŋgöra keu kewö jiyök: “Nöŋön qamötŋi esim kölman ölop jime ewö, mönö nöŋgöreŋ keu ki möta Zohargö nahönŋi Efron yaŋgöreŋ anda keu jitni ki toroqeba jiba kuŋgum waŋgime.

⁹ Kuŋgum waŋgigetka möta baŋet qetŋi Makpela yaŋgö buŋaya aka nupŋaŋgö imbiŋe göröken ahözawi, mönö mia jim teköiga söŋgöroŋi memam. Mönö qesigetka bohonŋi jömuk jim teköiga söŋgöroŋi membiga nöŋgö qaksirini eŋgö sutŋine ahöma.”

¹⁰ Mewö jiiga Efronöŋ alapurupŋi Hit könagesö pakpak taonŋinaŋgö kiriponaŋuŋe kaba sombemnöŋ tokogeri, yeŋgö sutŋine tariga keu kezap ala mötketka Efronöŋ Abrahamgöra kewö melenŋa waŋgiyök:

¹¹“O azi kembuni, mewö qahöpmö, mönö nöŋgöra kezap alnöŋ. Nöŋön gölme köröŋi mi aka baŋet miangöreŋ kinjawi, mi kalema gihizal. Nani könagesöurupni yeŋgö jeŋine kinda mi gihibiga ekze. Qamötŋi mi ölop miangöreŋ esim löm kölman.”

¹² Mewö jiiga Abrahamnöŋ gölme tourupŋi yeŋgö wösöŋine kunbuk geba sipköm eŋgiyök.

¹³ Sipköm eŋgiba kinda yeŋgö jeŋine Efrongöra kewö jiiga mötket: “Nöŋgöreŋ keu ki mönö kezap ala mötnöŋ. Göŋön ölop mewö akanakmö, nöŋön mönö gölme köröŋi miangö bohonŋi mi gihimam. Mi ölop jiba töwa menöŋga nöŋön qamötŋi miangöreŋ esim löm kölman.”

¹⁴ Mewö jiiga mötketka Efronöŋ Abrahamgöra kewö melenŋa waŋgiyök:

¹⁵“O azi kembuni, nöŋgöreŋ keu ki mönö kezap ala mötnöŋ. Gölme miangö bohonŋi mi 400 silwö kötŋi (50 kilogram). Ala-ala akzirangöra aka miangö mönö netkö sutŋire yuai omani akza. Miangöra qamötŋi ölop esim löm kölman.”

¹⁶ Mewö melenŋa waŋgiiga möta Abrahamnöŋ gölme bohonŋaŋgö jaŋgöŋi Efronöŋ Hit könagesö yeŋgö jeŋine jiiga mötkeri, miangö urumohot ahök. Jaŋgöŋi silwö kötŋi 400 mi kölköl-örörö ambazipnöŋ nalö miangöreŋ bohonŋaŋgö dopŋi jiget ahöyöhi, miangö dop monenŋ mi kewöta waŋgiyök.

¹⁷ Mewö waŋgiiga Efrongöreŋ gölme köröŋi Mamre kösutŋe Makpela miangöreŋ ahöyöhi, baŋet miangöreŋ kinöhi aka ip pakpak gölme miangö jabö uruŋe kingeri, miangö keuŋi teköyök.

* 23:4: Hib 11.9, 13; Apo 7.16

¹⁸Keuñi teköiga Abrahamgö buñaya ahök. Hit könagesö pakpak taonñinangö kiripo nanğunje kaba sombemnöñ tokogeri, yeñön töwañi mi eketka buñaji ahök.

¹⁹Miangö andöñje Abrahamnöñ anömñi Saragö qamötñi mi Keinan gölmegö bañetñe esim löm kölok. Bañet mi Mamre qetñi alañi Hebron miangö kösutñe gölme köröñi qetñi Makpela miangöreñ ahöza.

²⁰Mewö asuhuiga gölme köröñi aka bañet miangöreñ kinjawi, mi Hit könagesö yeñön Abrahamgö buñaya qem wañgigetka qaksiriñi ahök. Mewö.

24

Aisakö anömñi Rebeka mi wañgita kaget.

¹Abrahamnöñ azi namñi ahiga Anutunöñ yuai pakpak aka meyöhi, miangöreñ i kötuatköm wañgii mala korök.

²Mewö ahiga nalö kunöñ miriñangö welenqeçe jembonñi bohonñi, miriñi uruñe öröyuañ ahöm wañgiyöhi, miangö galömñi yangöra keu kewö jiyök, “Gi mönö keugi jim köhöimangöra börögi nöngö tambuni bapñe alman.

³Mewö ala Kembu, Suep aka gölme mietkö Anutuñirangö qetñe jöjopañ keu kewö jiman: Nöñön Keinan könagesö yeñgö sutñine ki maljalmö, göñön mönö nahöñangö anömñi mi yeñgö nen böratñina kun kude memba wañgiman.

⁴Mewö qahöpmö, gi mönö nane kantrinöñ anda tinitosolomurupni yeñgöreñök nahöni Aisakö anömña wañgita kaman.”

⁵Mewö jiiga welenqeçe jembonöñ kewö qesim wañgiyök: “Anda jibiga ambi mianön nömbuk gölme kiangöreñ kamangö tököma ewö, nöñön mönö denöwö akñam? Nahöngi wañgita kantri kanöñangöreñ kunbuk lilingöba anbit me qahö?”

⁶Mewö qesim wañgiiga Abrahamnöñ kewö melenök: “Qahöpmahöp! Gi nöngö nahöni wañgita miangöreñ kunbuk kude anmahot.

⁷Suepkö Kembuñi Anutunöñ ni iwinangö miri aka ahuahü kantrineyök keu kewö jii mötpiga jöjopañ keunöñ jöhöba noañgiri kayal: ‘Nöñön gölme ki mönö göhö gwölönarökurupki yeñgö buñaya qem enñimam.’ Miangöra yañön mönö Suep garatañi melaiiga mutuk aniga göñön ölop nahöñangö anömñi mi miangöreñök wañgita kaman.

⁸Anda jinönga ambi mianön göbuk kamangö tököma ewö, jöjopañ keugi kianön mönö qahö toroqeba jöhöm gihima. Nöngö nahöni mi mönö qahö kötökñi wañgita miangöreñ lilingöba anmahot.”

⁹Mewö jiiga welenqeçe jembonñan keu mi jim jöhöm wañgiba jöjopañ keunöñ jim köhöimangöra böröñi ketañamñi Abrahamgö tambuñi bapñe alök.

¹⁰Mewö jim köhöiba kinda ketañamñangöreñ kamel 10 aka yangö köweñeyök yuai aködammunñinambuk könañi könañi mohotñe meyök. Mi memba mosöta Not Mesopotemia (Aram Naharaim) * kantrinöñ anda Nahornöñ taon malöhangöreñ angorök.

¹¹Angota taon yaigepñe o lömñi kinöhangö kösutñe kamelurupñi al enñiiga siminñini mösököba geba luhut meget. Wehön jeñi gemangö aiga taongö ambiñi yeñön o ubingö o lömñe kaka nalöñini mi ahök.

¹²Miangöreñ kinda kewö köuluköyök: “O Kembu, ketañamni Abrahamgö Anutuñi, gi mönö merak töhötmöriam niñgiba ketañamni Abrahamgöra keu jim jöhönöñi, miangö ölni asuhuma.

¹³Mötnöñ, ni o löm kösutñe kiangöreñ kinbiga taongö ambi seramurupñini yeñön o ubingö kame.

* **24:10:** Aram qet mi nalö kewöñe Siria qerakze. Naharaim o töwatñi yahöt (Yufreitisi aka Taigrisi) mietkö sutñire.

14 Kagetka kewö asuhumapköra köuluközal: Nöñön ambi seram kungöra kewö jimam: ‘Gi ölop köurañengi möñgoninöñga (mondokönöñga) o nembilenjak.’ Mewö jibiga yañön kewö melenja jima: ‘Ölop nenöñga kamelurupki mewöyök o gumohom enjimam.’ Mewö jimawi, ambi seram ia göñön welenqeçe azigi Aisakö buñaya qenöñi, yañön mönö mia akña. Mewö asuhuiga göñön ketañamnañgöra keu jim jöhönöñi, mianñön öñjambuk akza, mewö mötmam.”

15 Köuluk mi qahö köuluköm teköiga mianñöñgöreñök ambi kun qetñi Rebeka yañön köurañen qamböñe añguba mianñöñgöreñ kanğorök. Yañön Abrahamgö munñi Nahor aka anömñi Milka, yetkö nahönñiri qetñi Betuel yañgö böratña ahök.

16 Ambi mianñgö kaisöñgolomñi mi eksihimñambuk kötökñi aiga ambi seram jömukñi azinöñ qahö memenja malök. Yañön eta o lömnöñ geba o uba korök.

17 Koriga mianñöñgöreñök welenqeçe jembonöñ ösumñan yañgö kösutñe anda kewö jiyök: “Gi ölop köurañengeyök o kun niñginöñga nembilenjak.”

18 Mewö jiiga kewö melenñök: “O kembuni, ölop neman. “Mewö jiba ösumok köurañenñi böröñan memba eta moñgöñgoniiga (mondoköiga) o neyök.

19 Mi neiga kewö jiyök: “Nöñön kamelurupki yeñgöra mewöyök o uba enğibi memba anda bikñini enğuiga mosötme.”

20 Mewö jiba ösumok köurañenñi mokoi o körek joutnöñ geiga kunbuk diñdiñgöba o lömnöñ o umamgöra geba kamelurupñi pakpak yeñgöra o dopñine uyök.

21 Mewö ahiga welenqeçe jembonöñ göröñ kinda i törörök eka kewö möta mötmöriyök: “Öñja, Kembunöñ köna köröpñi ki kayalangö möriamñi mi mönö kewö kondori asuhuza me denöwö?”

22 Mewö mötmöriba kiniga kamel yeñön o nem tekögetka welenqeçe jembonöñ pinjim (möpöñ) goulñöñ memenji kun lömbötñi 5 gram mi memba ambi seramgö söñgöröñe ala böröñenñen goulñöñ memenji yahöt lömbötñiri 110 gram mi böröñe mei öñgöyök.

23 Mei öñgöiga kewö qesim wañgiyök: “Gi dagö böratña? Iwigahö miri uruñe neñön sunğem ahöbinakö tiñi kun ahöza me qahö, mi ölop jinöñ mötpilenjak.”

24 Mewö qesim wañgiiga kewö melen wañgiyök: “Ni Betuelgö böratña. Abu asani qetñiri Milka aka Nahor.”

25 Mewö jiba toroqeba kewö jiyök: “Neñgöreñ luplup aip aka kamel yeñgö gwözözak nenenji mi gwötpuk ahöza aka sunğem gaun ahömegö tiñi mi mewöyök ölop kinja.”

26 Mewö jiiga welenqeçe jembonöñ gölmenöñ geba bangöba Kembugö waikñi memba möpöseiyök.

27 Möpöseiba kewö jiyök: “O Anutu, ketañamni Abrahamgö Kembunji, nöñön gi möpöseim gihizal. Göñön ketañamnañgöra kalem möriamgö keugi jim jöhönöñi, mi törörök wuatañgönöñga qahö sörauyök. Mianñgö dop Kembu göñön noañgitnöñga köna köröpñi ki kaba mala ketañamnañgö tinitosolomurupñi yeñgö mire kanğotzal.”

28 Mewö asuhuiga ambi seramnöñ ösumñan kinñingöba anda mianñgö kösohotñi mi namñañgö saiwaurupñi miriñe malgeri, yeñgöra jiiga mötket.

29 Rebekagö nenni qetñi Laban malök. Yañön mi möta Abrahamgö welenqeçe jembonñi ekñamgöra ösumñan yaigep o lömñe kinñingöba anök.

30 Nenniñgö böröñe goul böröñenñen aka söñgöröñe goul pinjim tari ehiga nenni Rebekanöñ welenqeçe jembonöñ keu jiiga möröhi, mianñgö kösohotñi jii möta yañgöreñ anök. Anda o lömñe añgota azi mi ehiga mianñgöreñ kamelurupñi yeñgö qöhöröñine kinök.

³¹ Kiniga kewö jiyök: “Kembunöŋ kötuetköm gihii maljani, gi mönö kanöŋga mirinöŋ anbit. Yaigep kiangöreŋ kude kinman. Nöŋön nanŋini ahömeaŋgö mirinŋi aka kamelurupki yeŋgö dumŋini tok möwölöhözal.”

³² Mewö jiiga welenqeŋe jembonöŋ mire kaiga kamel qakŋine sukinap taröhi, mi Labanöŋ musula mei eri jiiga kamel yeŋgöra luplup aip aka gwözözak nene memba kaba enŋiget. Welenqeŋe jembon aka yeŋgö aziurupŋan könaŋini saŋgoŋmeaŋgö onŋi mi tok mohotŋe uba kaba enŋiget.

³³ Mianŋö andöŋe nene welenqeŋe jembongö wösöŋe kölgetmö, yaŋön kewö jiyök: “Mutuk keu memba kazali, mi jibi mötketkun mönö nene ki nemam. “Mewö jiiga Labanöŋ kewö jiyök: “Mi ölop jinöŋ mötpin.”

³⁴ Mewö jiiga kewö jiyök: “Nöŋön Abrahamgö welenqeŋe azia akzal.

³⁵ Kembunöŋ ketaŋamni önöŋi qahö kötuetköm waŋgiiga azi öŋgöŋöŋi sukinapuk aka malja. Kembunöŋ lama aka bulmakau, silwö aka goul, welenqeŋe azi aka ambi aka kamel, donŋi mi gwötpuk waŋgiiga malja.

³⁶ Ketaŋamnaŋgö anömŋi Sara yaŋön ambi namŋi kötökŋi aka nalö mianŋöreŋ ketaŋamnaŋgöra nahönŋi kun meyök. Iwinan sukinapŋi pakpak mi nahönŋaŋgöra buŋa qem waŋgii malja.

³⁷ “Ketaŋamnan nöŋön jöjopaŋ keu kewö jimamgö jim kutum niŋgiyök: ‘Nöŋön Keinan yeŋgö gölmenöŋ ki maljalmö, göŋön mönö nahönaŋgö anömŋi mi Keinan yeŋgö nen böratŋina kun kude memba waŋgiman.

³⁸ Mewö qahöpmö, gi mönö iwinanŋö mire nani tinitosolomurupni yeŋgöreŋ anda nahönaŋgö anömŋi mi mianŋöreŋök waŋgita kaman.’

³⁹ “Mewö jiiga ketaŋamni mi kewö qesim waŋgial, ‘Nöŋön anda jibiga ambi mianŋön nömbuk qahö kama ewö, nöŋön mönö denöwö akŋam?’

⁴⁰ Mewö qesim waŋgibiga kewö melenök: ‘Nöŋön Kembugö jeŋe anda kaba aka memba malali, yaŋön mönö Suet garataŋi melaiiga göbuk aniga köna anmani, mianŋön töhötmöriamŋambuk akŋa. Mewö nani iwinanŋö mire anda tinitosolomurupni yeŋgöreŋök nahönaŋgö anömŋi mi memba kaman.

⁴¹ Nöŋgö tinitosolomurupni yeŋgöreŋ anda jöjopaŋ keu nöŋgöra jinöŋi, mianŋön mönö mianŋö andöŋe qahö toroqeba jöhöm gihima. Ambi kun qahö gihime ewö, göŋön töndup jöjopaŋ keu mianŋö kösönöhök lolohoman.’

⁴² “Mewö jiiga merak o lömŋe kaŋgota kinda kewö köuluközal: ‘O Anutu, ketaŋamni Abrahamgö Kembuŋi, ni köna kööröŋi kazali, mi mönö jitsihitkahö dop mötnöŋga töhötmöriamŋambuk akŋa.

⁴³ Eknöŋ, nöŋön o löm kiangö kösutŋe kinjal. Kewö kinbiga ambi seram kunŋan o umamgö kaiga nöŋön yaŋgöra kewö jimam: “Gi ölop köuraŋengeyök o moröŋi kun niŋginöŋga nembilenak?”

⁴⁴ Mewö jibiga yaŋön kewö melenŋa jima: “Ölop nenöŋga kamelurupki yeŋgö o mewöŋanök uba enŋimam. “Mewö melenŋa jima ewö, nöŋön mianŋöra kewö mötmam: Kembu göŋön i ketaŋamnaŋgö nahönŋaŋgö anömŋa akŋapköra möwölöhözan.’

⁴⁵ Uruneyök köuluk mi qahö köuluköm teköbiga mianŋöreŋök Rebeke yaŋön köuraŋen qamböŋe aŋguba mianŋöreŋ kaŋgotza. Kaŋgota o lömŋe geba o uiga nöŋön yaŋgöra kewö jizal: ‘Ölop o kun niŋginöŋga nembilenak.’

⁴⁶ “Mewö jibiga yaŋön zilap köuraŋenŋi qamböŋeyök mei eriga kewö jiza: ‘Ölop nenöŋga kamelurupki yeŋgö o mewöŋanök enŋibiga neme.’ Mewö jii nembiga kamelurupni mi mewöyök o gumohom enŋiza.

⁴⁷ Gumohom enŋiiga kewö qesim waŋgizal, ‘Gi dagö böratŋa?’ Qesim waŋgibiga kewö melenŋa: ‘Ni Betuelgö böratŋa. Abu asani qetŋiri Milka aka Nahor.’ Mewö melenŋiga nöŋön pinjim söŋöröŋe möndöba böroŋenŋen böroŋe membi öŋgöza.

48 Nalö miangöreñök gölmenöñ geba bangöba Kembangö waikñi memba möpöseizal. Anutu ketanamni Abrahamgö Kembangö mönö köna diñdini noangiri ketanamnanö munñangö mire kaba isini nahönñangö anömña akñapköra miwikñaizal. Miangöra Kembangö möpöseim wangizal.

49 “Mewö kaba ki kinjal. Miangöra inini ketanamni ek soriba sepkitip akzeangö keuñi pöndañ wuatangöba ak kömum wangize ewö, mi mönö kondela jigetka mötmam. Mewö qahö akñe ewö, keu mi tok jigetka mötmam. Mi möta kungen elenda anmamgö mötmörimam.”

50 Mewö jim teköiga Laban aka Betuel yetkön kewö melenña jiyohot, “Keu ki Kembangöreñök kaza. Miangöra netkön keu mewö me mewö jibirangö dop qahö.

51 Mötnöñ, Rebekanöñ ki kinja. Kembangöñ jimqindiñ akzawangö dop ölop i wangita anda ketanamgahö nahönñi wanginöñga anömñi akña.”

52 Mewö jiyohotka keuñiri möta Abrahamgö welenqeçe jembonñan eta Kembangö jeñe gölmenöñ geba bangöyök.

53 Bangöm teköiga wahöta gösöñeyök goul aka silwö aködamunñi ek-sihimñinambuk aka opo maluku kulemñinambuk ujeta Rebeka wangiyök. Mewöñanök kalem yuai tosatñi söñgöroñini ketanji mi nam nenni etkiyök.

54 Etkiba i aka aziurupñi yambuk kageri, yeñön nene kulun nempa tata mala sunjem aiga ahöget. Ahöba söñan wahötketka kewö jiyök: “Ölop melaim niñgigetka ketanamnanöreñ anmam.”

55 Mewö jiyökmö, nam nenni yetkön kewö melenñohot, “Ölop nenböratniri mosötnöñga toroqeba nalö tosatñi silim ten mewö nembuk malma. Miangö andöñe ölop i wangita anme.”

56 Mewö melenñohotmö, welenqeçe jembonöñ kewö melenña jii mötket, “Welen könani kazali, mi Kembangöñ kötuatköiga töhötmöriamñambuk akza. Miangöra nalöni mönö kude qekörime. Mönö melaim niñgigetka ölop könani lilingöba anda ketanamnanöreñ angotmam.”

57 Mewö jii möta kewö jiyohot, “Ölop ambi seram mi qetzi kaiga nanñangöra qesim wangibin.”

58 Mewö jiba Rebeka qerohot kaiga kewö qesim wangiyohot, “Gi azi ki-ambuk anmamgö mötzan me qahö?” Qesim wangiyohotka “Ölop anmam,” jiyök.

59 Mewö jiiga kinda nenböratñiri mi welen ambiñambuk melaim etkigetka Abrahamgö welenqeçe jembon aka yanö aziurupñi yeñön i etkuangita anbingö aket.

60 Anbingö aketka miangöreñ iwinam nenmunurupñan Rebeka kötuatköm wangiba kewö jiget,

“O nen böratnini, Kembangöñ ölop ahumsehip gihiiga göñön gwölönarökurupki milyönñi milyönñi yeñö bömön jalöñina akñan.

Yeñön mönö köhöiba kerökurupñini enquba luhut ala siti gölmenini enqungita anöñ köla malme.”

61 Mewö jiget teköiga Rebekanöñ welenqeçeambiurupñi yembuk wahöta kamel qakñine öngöba tata welenqeçe jembonñi wuatangöba anget. Jembon yanöñ Rebeka wangiriga mosöta köna lilingöba anget.

62 Anda kaba mala mala Keinan gölmenöñ kanötket. Aisakñöñ gölme miangö Saut likepñe distrik qetñi Negew miangöreñ mala nalö miangöreñök o löm qetñi Ber Lahai Roi † mi mosöta gölme qararanökölnö kaba malök.

† 24:62: Malmalñambuk mala nehakzawangö o lömñi

⁶³ Kaba mala miri söñaumangö aiga miangören kounji mosöta gölme köröñi ketanji miangören anda liliköba keu mötmöriba uba wahöta ehiga tosatñan kamel qakñine tata yangö kösutñe kabingö kaget.

⁶⁴ Mewö kagetka Rebekanöñ uba wahöta Aisak eka kamel qakñe taröhi, miangörenök ösumok luhuba gölmenöñ erök.

⁶⁵ Eta welenqeçe jembongöra qesiba kewö jiyök, “Azi gölme köröñe endu kinda mesohol köl neñgiba kazawi, mi dañön?” Mewö jiiga kewö melenñök, “Yañön mönö ketanjanangö nahönñi akza. “Mewö melenñiga möta nöröp kawösenji (kawasen) öröba jemesoholñi esuhuyök.

⁶⁶ Esuhuiga aitongögetka welenqeçe jembonöñ yuai pakpak aka memba malöhi, miangö kösohotñi mi Aisaköra jii mörök.

⁶⁷ Möri teköiga Aisaknöñ Rebeka wanjiriga namñi Saragö opo seri kounje öngöba maliga könanjep mei anömñi aiga uruñan jöpaköm wanjiba malök. Aisakö namñan kömuiga wösöbirik uruñe malöhanjöra aka urukölalepñi mewö miwikñaiyök. Mewö.

25

Abrahamgö isiamböurup tosatñi

1 Hist 1.32-33

¹ Aisaknöñ ambi meiga iwiñi Abrahamnöñ anömñi kun qetñi Ketura meyök.

² Meiga Keturanöñ Abrahamgö moröurupñi kewö engömeyök: Zimran, Joksan, Medan, Midian, Isbak aka Sua.

³ Joksanöñ nahönyahötñi qetñiri Seba aka Dedan yetkö iwiñira ahök. Dedan yañön Asur könagesö, Letus könagesö aka Leum könagesö yengö bömönñini ahök.

⁴ Midiangö nahönurupñi mi Efa, Efer, Hanok, Abida aka Elda. Mi pakpak Keturagö isiurupñi aka malget. Mewö.

⁵ Abrahamnöñ sukinapñi pakpak mi nahönñi Aisak buña qem wanjiyök.

⁶ Mi wanjiyökmö, anömurupñi bohonñini qahö memenji yengö nahönurupñini yengöra kalem yuai toto qeba mendenja engiyök. Mendenj engiba jebuk mala melaim engiiga datñini Aisak mosöta gölme wehön kotkotñe göröken miangören anget. Mewö.

Abrahamnöñ kömuiga löm kölget.

⁷ Abrahamnöñ mala koriga yambuñi mindiriba 175 aiga kömuyök.

⁸ Malmal yambuñangö qötöñan öngöñgöñi aka dop köliga öliba azi namñi aka söngörö ösum kondikñi öröba nöñ qeba kömuiga Anutunöñ wanjiri tinitosolomurupñan kömugeri, yengören anda toroqeyök.

⁹ Kömuiga nahönyahötñi Aisak aka Ismael yetkön iwiñirangö qamötñi memba anda Makpela banjetnöñ löm kölohot. Banjet mi Hit azi Efron Zohargö nahönñi yangö gölme köröñe Mamre miri gölmenöhök wehön kotkotñe göröken ahöza.

¹⁰* Abrahamnöñ gölme köröñi mi Hit könagesö yengörenök bohonñi meyöhi, miangören i aka anömñi Sara mi löm köl etkiget.

¹¹ Abrahamnöñ kömuiga Anutunöñ nahönñi Aisak kötuetköm wanjiba malök. Yañön Negew gölmenöñ o löm qetñi Ber Lahai Roi (Malmalñambuk mala nehakzawangö o lömñi) miangö kösutñe tata malök. Mewö.

Ismaelgö könagesöurupñi

1 Hist 1.28-31

* 25:10: Jen 23.3-16

¹² Ijpt ambi Hagar yanön Saragö welen ambia maliga Abrahamnön meiga gölöm ala nahönni Ismael meyök. Ismaelgö nahönurupni yengö qet arenini kewö:

¹³ Ismaelgö nahönurupni yengö qetjini aka asuhugerangö arenini mi kewö: Nahönni mutukni qetji Nebaiot. Yangö könaje Kedar, Adbel, Mibsam,

¹⁴ toroqeba Misma, Duma aka Masa,

¹⁵ Hadad, Tema, Jetur, Nafis aka Kedema.

¹⁶ Ismaelgö nahönurupnan mewö asuhuba kambuninangö dop pomnini 12 aka mala kotket. Pomnini qetkeri, miangö dop opo koum tambönini aka jike mirinini mewöyök qeta memba mala kotket.

¹⁷ Ismaelnön mala koriga yambuñi mindiriba 137 aiga kömuyök. Mewö azi namni aka söngörö ösum kondikni öröba nön qeba kömuiga Anutunön wangiri tinitosolomurupnan kömugeri, yengören anda toroqeyök.

¹⁸ Ismaelgö gwölönarökurupni yanön köröpken köröpken denja anda mala gölme qetjiri Hawila aka Sur mietkö sutjire gölme memba malget. Gölmenini mi Ijpt kantrigö jaböneyök könahiba wehön kotkotje Asiria göröken angeri, köna miangö kösutje miangören ahöza. Ismaelgö gwölönarökurupni yanön Abrahamgö gwölönarökurupni tosadni pakpak mi kerök-kerök ak engiba malget. Mewö.

Iso aka Jeikob yetkön asuhuyohot.

¹⁹ Abrahamgö nahönni Aisak yangö gwölönarökurupni yengö qet arenini mi kewö: Abrahamgö nahönni Aisak.

²⁰ Aisaknön yambuñi 40 aiga Mesopotemia (Padan Aram) kantrigö Aram azi qetji Betuel yangö börtatni Rebeka anömña meyök. Rebekagö nenni mi Aram azi qetji Laban.

²¹ Aisaknön anömnan köpin maliga yangöra aka Kembu köuluköm wangiyök. Köuluköm wangiga köulukni möriga Rebekanön gölöm alök.

²² Gölöm aliga moröyahöt yetkön namniranangö körö uruje utal anguyohot. Mi möta kewö jiyök: “Yuai kewöni mi mönö wuanöngöra asuhum ningiza?” Mewö jiba anda miangöra Kembangö qesim wangiyök.

²³ *Qesim wangiga kewö jii mörök:

“Göhö körö uruge kambu yahöt mietkö bömönjiri ahözahot.

Yetkörenök könagesö yahöt asuhuba denja malme.

Ambazip kambu kunön kambu alanj engongita ösum köhöikni akrje.

Datnan munni welen qem wangiba malma.”

²⁴ Morö meme nalönan kam kunguiga köröni uruje morö nahön siwisiwi yahöt ahöyohot.

²⁵ Mutuk köröneyök asuhuyöhi, yangö silenjan pisikpisik aiga sile jupnan silenji körek dop köla ahöyök. Miangöra qetji Iso (jupnambuk) qetket.

²⁶ Miangö könaje munnan Isogö köna gwakötje börönan memba asuhuyök. Miangöra yangö qetji Jeikob qetket. (Jeikob keu miangö könani yahöt: gwaköt aka tilipköza.) Aisaknön yambuñi 60 aiga nalö miangören Rebekanön moröyahötjini yahöt mi etkömeyök. Mewö.

Isonön börösamot memapkö qet keunji mi qeapköyök.

²⁷ Morö nahön yahöt mietkön asuhuba qariba ketani ahotka Isonön böröjan nupkö könani törörök möt yaköba pöndan jölömnön malmangö mörökmö, munnan azi bönjöni aka kapan köla mire malök.

* 25:23: Rom 9.12

²⁸ Aisaknön arökñangö sömbupñi nemangö möta malök. Miangöra uruñan Iso gwötpuk jöpaköm wañgiba malökmö, Rebekanön urukönömñan Jeikob gwötpuk jöpaköm wañgiba malök.

²⁹ Nalö kunön Jeikobnön kozin memba nanñangöra nene kuluñ ohoi tariga datñan jölömnöhök kaba silenji lömbörii wösöñi gwötpuk alök.

³⁰ Mewö aiga Jeikobköra kewö jii mörök: “Sileni lömbörii wösöni gwötpuk aljawangöra mönö zilañ kozin kuluñi pisikpisik mi ninñinöñga nemi. “Miangöra qetñi Edom (pisikpisik) qetket.

³¹ Mewö jii möta Jeikobnön jiyök: “Datni, gi mutuk asuhunöñga miangö qetbuñagi mi mönö mutuk tököm ninñinöñga nene kuluñ mi ölop gihibi neman.”*

³² Mewö jiiga keu kewö melen wañgiyök: “Muni mötnön, ni mönö kömumangö akzal. Miangöra mutuk asuhuyalangö qetbuñanan mönö denöwö bauköm ninñibawak?”

³³ *Mewö melen wañgiiga kewö jiyök: “Miangö keuñi mi mönö mutuk jöjopañ keunön jim köhöinöñga mötpi. “Mewö jiiga mi jöjopañ keunön jim köhöim wañgiba mutuk asuhuyöhangö qetbuñani mi Jeikob tököm wañgiiga nenenön bohonñi meyök.

³⁴ Bohonñi memba bered aka kozin kuluñi Iso wañgiiga memba wahöta kindi mosöta anök. Isonön mutuk asuhuyöhangö qetbuñani mi miangö dop möriga eretñi ahök. Mewö.

26

Aisaknön Gerar taonön malök.

¹ Mutuk Abrahamgö nalöñe bödi asuhuyök. Mewöyök Aisakö nalöñe mi kunbuk asuha gölme dop köla ahöyök. Mi asuhuiiga Aisaknön mosöta Filistin yengö kiñ kembu qetñi Abimelek yangö mirinñi qetñi Gerar miangören anök.

² Anda maliga Kembunön asuhum wañgiba kewö jiyök: “Gi Ijipt gölmenön kude anman. Gölmö ki buñagi akñapkö jim kutuyali, mönö kiangören tata malman.

³ Nönön iwigi Abrahamgöra jöhöjöhö keu wañgiba mi jöjopañ keunön jim köhöiyali, mi mönö galöm kölbiga ölnambuk akña. Nönön gölme pakpak ki mi gi aka göhö gwölönarökurupki yengö buñaya qem engimam. Miangöra ölop gölme kiangören tata kian malnöñga nönön göbuk mala kötuetköm gihibiga malman.*

⁴ Nönön gwölönarökurupki ahumsehip engibiga qötöñinan suepnön könakembagö senjelau tat anjei, mönö miengö dop akña. Mewö aketka gölme pakpak ki mi yengö buñaya qem engimam. Göhö gwölönarökurupki yengörenök kungöra aka nönögö kötumötuetnan mönö gölmegö könagesö kambuñi pakpak yengö qakñine öngöiga oyaenköyaen akñe.

⁵ Nönön kewögöra mewö akñam: Abrahamnön nönögö keuni tem köla malök. Jöjopañ keuni, jimkutukutu keuni aka köna keuni wañgiali, yanön mi pakpak wuatangöba malök.”

⁶ Anutunön mewö jiiga Aisaknön toroqeba Gerar taonön tata malök.

⁷ Maliga gölme miangö aziñi yanön anömñangö qesim wañgigetka kewö jiyök, “I mi nena. “Mewö jiba uruñan kewö mötmöriyök: “Rebekagö kaisongolomñan eksihimñambuk akzawangöra azi mienön mönö yangöra aka

* **25:31:** Mutuk asuhuyöhi, yanön munurupñi yengö sutñine bohonñini aiga göda qeba qetbuñan wañgiba kalemñi kalemñi wañgiba malget. Iwinamñinan kömuyohotka buñanñi mendengeri, nalö miangören mutuk asuhuyöhangö börösamotñi mi sömañi yahöt toroqeba wañgiget. * **25:33:** Hib

12.16 * **26:3:** Jen 22.16-18

ni nunjuget kömumbilenbuk. “Mewö mötmöriba “I anömna,” mewö jimamgö kenjötni möta malök.*

⁸ Aisaknöñ miangörej nalö köröñni mala kota nalö kunöñ anömñambuk susuhuba anjum angyohotka Filistin yeñgö kiñini Abimelek yañön jengenañöhök yaigep ui geiga i etkehök.

⁹ Etkeka Aisak oholi kaiga kewö jii mörök: “Mötnöñ, yañön mönö göhö anömgi akza. Mönö wuanöñgöra ‘I mi nena,’ jinöñ?” Mewö möta kewö melen wañgiyök: “Ni yañgöra aka nunjuget kömumbilenbuköra mötmöriba mewö jial.”

¹⁰ Melen wañgiiga kiñ Abimeleknöñ kewö jiyök: “Göñön mönö wani kimbiala ak neñginöñe? Nöñgö aziurupni yeñgöreñök kunñan mönö anqeba göhö anömga buk ahöbawak. Mewö asuhuiga göñön kondotnöñga siñgisöndokö keu lömbötñan mönö neñgö qaknine öñgöbawak.”

¹¹ Mewö jiba könagesö kambuñi pakpak yeñgöra jimkutukutu kewö al enjiyök: “Kunñan kun azi ki me yañgö anömñi mem bölim etkimawi, i mönö kömupkö buñaya jim teköinga kömuma. “Mewö.

¹² Aisaknöñ gölme miangörej nene nup köl kömöri Kambunöñ kötuetköm wañgiiga yambu miangörej kötni kömöri, mi 100:kö dop sehiba asuhuyök.

¹³ Mewö asuhuiga töhötmöriam ketañi ketañi miwikñaiba maliga sukinañan toroqeba qariba öñgöiga kindiñbirik azi qetbuñambuk ahök.

¹⁴ Yañgöreñ lama, meme (noniñ) aka bulmakau kambuñi kambuñi mi asuhuba sehiget. Mewöñanök welenqequeurupni gwötpuk enjömeiga malget. Miangöra Filistin yeñön mi eka könahiba körogisigisi aka andöqeke keu jiget.

¹⁵ Andöqeke keu jiba iwiñi Abrahamgö welenqequeurupñan o löm yañgö nalöñe esigeri, mi pakpak gölmenöñ qem turum teköget.

¹⁶ Mewö asuhuiga kiñ Abimeleknöñ Aisaköra kewö jiyök: “Gi kukösumgabuk aka gwötpuk neñgöñgizanañgöra mönö kölolohoba neñgömosöta kungen anman.”

¹⁷ Mewö jii möta gölme mi mosöta Gerar öruenöñ (rueruenöñ) anda geba opo seri kouni möröreñgöba kuñguba miangörej tata malget.

¹⁸ Tata mala o löm iwiñi Abrahamgö nalöñe esigetmö, Abraham kömuiga Filistin yeñön qem turugeri, mi Aisaknöñ jüiga kunbuk esim luluñda möhamgöget. Möhamgögetka iwiñan o löm qetñini qeröhi, Aisaknöñ mi mewö kunbuk qerök.

¹⁹ Mewö qeriga welenqequeurupñan öruenöñ o löm esiba mala o löm kun onji sarakñi soksoyöhi, mi miwikñaiget.

²⁰ Mi miwikñaigetmö, Gerar yeñgö lama bulmakau galömñinan Aisakö lama bulmakau galömurupni yembuk könahiba anjururuk aka keu kewö jiget, “O mi neñgöreñ!” Nannambuk anjururuk keu mewö jigerañgöra aka Aisaknöñ o löm miangö qetñi Esek (Anjururuk) qerök.

²¹ Miangö andöñe o löm kun kunbuk esigetka miangöra mewöyök anjururuk aket. Mewö akerañgöra aka o löm miangö qetñi Sitna (Kerök-kerök) qerök.

²² Mewö qeta gölme mi mosöta anda o löm kun kunbuk jii esiget. O löm miangöra anjururuk keu qahö asuhuiga miangöra qetñi Rehobot (Tiñi ölöñi) qeta keu kewö jiyök: “Merak Kambunöñ tiñi ölöñi neñgiiga ölöp gölme kiangörej mala ahumsehip akin.”

²³ Mewö jiba miangörej mala mosöta Berseba mire anök.

²⁴ Berseba aniga sunjem miangörej Kambunöñ asuhum wañgiba kewö jiyök: “Nöñön iwiñi Abrahamgö Anutuñi akzal. Nöñön göbuk mala kötuetköm

* 26:7; Jen 12.13; 20.2

gihiba malmam. Mianğöra kenğötke kude mötman. Nöñön nup azini Abrahamğöra aka göhö gwölönarökurupki ahumsehip enğibiga qötöñinan öngöñgöñi akña.”

²⁵ Mewö jiiga Aisaknön jöwöwöl alta kun mianğörej memba Kembangö qetñi qeta köuluköyök. Köuluköba opo koumñi mörörengöba kuñguba tata malget. Mala jiiga welen aziurupñan o löm kun mianğörej esiget. Mewö.

Aisak aka Abimelek yetkön sutñire jöhöjöhö ahot.

²⁶ *Aisaknön Berseba maliga nalö kunön kiñ Abimelek yañön Gerar taon mosöta yañgörej kayök. Gorojiji alañi Ahuzat aka yarö kambuñangö suahö galömñi Fikol yetkön yambuk mohotñe kaget.

²⁷ Kagetka Aisaknön kewö qesim enğiyök: “Iñini kerök möt niñgiba gölmeñineyök közöl niñgigetka töndup mönö wuanöngöra nöngörej ki kaze?”

²⁸ Qesim enğiiga kewö melenget: “Kembunön göbuk kinjawi, nini mi aukñe ek kutuba mötzin. Mianğöra kewö mötmörizin: ‘Neñön göbuk jöhöjöhö akingö sihimnini mötzin. Ölop gi aka neñgö sutnine jöhöjöhö aka mi jöjöpañ keunön jim köhöininga kewö ahöma:

²⁹ Nini kahasililiñ kun qahö ak gihiinmö, nalö dop ölöpñi ak gihiba gömosöringa luainön mirigi mosöta anda kaba malnön. Mianğö dop göñön mewöñanök nini yuai bölöñi kun kude ak neñgiba malman.’ Nalö kewöñe Kembunön kötuetköm gihiiga maljan.”

³⁰ Mewö jigetka Aisaknön közölömbuañ mözözömgöba ohoba aliga nene kuluj nembra tatket.

³¹ Tata ahöba söñan ömandiñe wahöta jöhöjöhöñini jöhöm anğuba mi jöjöpañ keunön jim köhöiget. Jim köhöigetka Aisaknön i melaim enğiiga luai qakñe mosöta anget.

³² Angetka wehön mianğörejök Aisakö welen azi yeñön kaba o löm kun esigeri, mianğö kösohotñi i jigetka kewö mörök:

³³ “Nini o miwikñeiz. “Mewö jigetka möta o löm mianğö qetñi Siba qerök.

* Mianğöra taon mianğö qetñi mi nalö kewöñe mewöyök toroqeba Berseba qerakzin. Mewö.

Isonön kian ambi yahöt etkömeyök.

³⁴ Isonön yambuñi 40 aiga Hit ambi yahöt anömyahötña etkömeyök. Qetñiri Judit, iwiñi qetñi Beri aka Basemat, iwiñi qetñi Elon.

³⁵ Ambi mietkön Aisak aka Rebeka urukömbuk aka wösöbirik keta bölökñi miwikñaim etkiba malohot. Mewö.

27

Aisaknön Jeikob kötuetköm wañgiyök.

¹ Aisaknön mala kota azi namñi aiga jeñi ömun köliga yuai kunbuk ek kutumangö osiyök. Mewö osiba nahönñi mutukñi Iso köl öröm wañgii kaiga kewö jii mörök: “Nahöni mötnön. “Mi möta kewö melen wañgiyök: “Iwini, ni ki kinjal.”

² Melen wañgiiga kewö jii mörök: “Mötnön, ni azi namñi aka wani nalönön kömumami, mi qahö mötzal.

³ Mianğöra göñön ölop timbi liñgipki aka kesarek gösögi memba jölömnön anda sömbupkö böröjañ memba qeba nöngörej kaman.

* **26:26:** Jen 21.22 * **26:33:** Siba keu mianğö köñañi yahöt: jöjöpañ keu aka sewen. Jen 21:31

4 Kaba nene nahömḡambuk sihimnaḡö dop ohoba mözözömgöba memba kaba niḡinöḡga nemam. Mi memba kinda kötümötuet gihimam. Mi mutuk gihibi teköiga nöḡön mianḡö andöḡe ölop kömumam.”

5 Aisaknöḡ nahönḡi Isogöra keuḡi mewö jiiga Rebekanöḡ mi kezap ala mörök. Möriḡa Isonöḡ mosöta sömbup böröḡaḡ memba qeba iwiḡi waḡimamḡöra jölömnöḡ anök.

6 Aniga Rebekanöḡ nahönḡi Jeikobköra keu kewö jii mörök: “Nahöni mötnöḡ, Iwigan datki Isogöra keu kewö jiiga mötzal:

7 ‘Gi mönö sömbup memba kaba niḡiba nene nahömḡambuk ohoba mözözömgöba niḡinöḡga nemam. Nembagun Kembugö jemesoholḡe kötümötuet gihimam. Mi mutuk gihibi teköiga mianḡö andöḡe ölop kömumam.’

8 Mianḡöra nahöni, kezap ölopḡanök ala mötnöḡ. Keu döлки jim kutum gihimami, gi mönö mianḡö dop akḡan.

9 Mönö meme kambunöḡ anda mianḡöreḡök meme (noniḡ) döḡḡi kelökḡambuk yahöt memba kaba niḡinöḡga nöḡön mianḡön iwigahö sihimnaḡö dop numbu nene nahömḡambuk ohoba mözözömgömam.

10 Ohoba mözözömgöbiga memba anda iwiḡi waḡinöḡga memba kötümötuet gihibawak. Mianḡö andöḡe ölop kömuma.”

11 Mewö jii möta namḡi Rebekagöra kewö jiyök: “Namni mötnöḡ, datni Isonöḡ sile juḡḡambuk akzapmö, nöḡö silenana solanḡi akza.

12 Iwinan ni nömisiriba mötpawak ewö, ni yanḡö jemesoholḡe tilipqilip azi tandök asuḡubiga möt niḡibapuk. Mewö möt niḡiiga kötümötuet qahöpmö, jimqesusak öröbi nani qakne öḡḡöbapuk.”

13 Mewö jiiga namḡan kewö jii mörök: “Nahöni, jimqesusak ghibawahi, mianḡön mönö ölop nöḡö qakne öḡḡöma. Göḡön mönö töndup keu jizali, mi möt tem köla anda yuai mi memba kanöḡ.”

14 Mewö jiiga anda meme (noniḡ) yahöt memba kaba namḡi waḡiyök. Waḡiiga nene nahömḡambuk iwiḡan sihimḡi möröhi, mianḡö dop ohoba mözözömgöyök.

15 Ohoba nahönḡi mutukḡi Isogö opo malukḡi ölop kötökḡi opo köweḡe galöm kölöhi, mi memba nahönḡi könaḡepḡi Jeikob waḡiiga löḡḡörök.

16 Löḡḡoriga meme (noniḡ) silenḡi mi memba böröḡi köpeiba jölḡi solanḡi esuhuyök.

17 Esuḡuba nene nahömḡambuk aka bered ohoyöhi, mi memba Jeikobkö böröḡe alök.

18 Aliga memba iwiḡaḡöreḡ anda “Iwini!” jiyök. Jiiga kewö melenḡök: “O nahöni, gi danḡön?”

19 Mewö melenḡniga iwiḡaḡöra kewö jii mörök: “Ni nahönḡi mutukḡi Iso. Jim kutum niḡinöḡi, ni mönö mianḡö dop ak teközal. Ölop wahöta tata sömbupni memba kazali, mi memba kötuatköm niḡiman.”

20 Mewö jii möta nahönḡi kewö qesim waḡiyök: “Nahöni, mi mönö denöwö könöḡuk miwikḡaizan?” Qesim waḡiiga kewö melenḡök: “Anutu, göhö Kembugan mönö bauköm niḡiiga mi zilaḡ miwikḡaizal.”

21 Mewö melenḡniga Jeikobköra kewö jiyök: “Nahöni, gi ölna nahöni Iso akzan me qahö, mi mötmamḡöra mönö ölop kösutne ki kanöḡga gömisirimam.”

22 Mewö jiiga iwiḡi Aisakö kösutḡe aniga misirim möta kewö jiyök: “Imbi jölḡan Jeikobkö imbia akzapmö, böröḡan Isogö böröḡi ewö.”

23 Böröḡi juḡḡambuk datḡi Isogö börö tandök ewö ahöḡaḡöra Aisaknöḡ i qahö möt kutum waḡiba kötuatköm waḡimamḡöra ahök.

24 Töndup kunbuk kewö qesim waḡiyök: “Gi ölna nahöni Isoya me qahö?” Qesim waḡiiga kewö melenḡök: “Ni mönö Isoya.”

²⁵ Mewö melenjiga kewö jiyök: “Nahöni, ölop sömbupki tosatni ninjinönga namba kötümötuetni gihimam. “Mewö jiiga mi wanji neyök. Neiga wain o tosatni mohotje mokoba wanji neyök.

²⁶ Namba kinda nahönjängöra kewö jii mörök: “Gi ölop kösutne kaba numbuni yöhötüm neman.”

²⁷ Mewö jii möta kösutje anda numbuji yöhötüm neyök. Neiga opo malukuñangö wörönji möta kötuetköm wanjiba kewö jiyök: “Aha nahöni, Kembunöj urukisigö jölömni kötuetköi ahözawi, nöngö nahönangö sile qösösökni ölopnan mönö mi ewö aiga mötzal.*

²⁸ Anutunöj mönö suepkö umjijilji aka gölmegö töhötmörämni tököm gihiiga yaka yöhagi, sehoj padigi aka wain o yuaigi mi önöji qahö asuhum sehime.

²⁹ Kantriñi kantriñi yejön mönö welen qem gihiba malme. Könagesö kambuñi kambuñi yejön mönö simin köl gihiba malme. Göjön mönö nani nahönurupni mi kembu ak enjiba malman. Namgahö nahönurupnan mönö simin köl gihiba malme. Kunjan qesuahöm gihimawi, qesuaknöj mönö yanjö qakje öngöma. Kunjan kötuetköm gihimawi, kötümötuetnöj mönö yanjö qakje öngöma. “Mewö.*

Isonöj iwiñan kötuetköm wanjimapköra ulerök.

³⁰ Aisaknöj Jeikob kötuetköm wanjim teköiga iwiñangö miri uruñi mosöta yaigep aniga wölan miangörenök datni Isonöj böröjan mali teköiga mire kayök.

³¹ Kaba yanjön mewöyök nene nahömñambuk ohoba mözözömgöba memba kaba iwiñi wanjiba kewö jiyök: “Iwini, ölop wahöta tata sömbupni tosatni namba kötümötuetki ninjiman.”

³² Mewö jiiga iwiñi Aisaknöj kewö qesim wanjiyök: “Gi danön?” Qesim wanjiiga kewö melenja jiyök: “Ni nahöngi mutukni Iso.”

³³ Mewö jiyöhangöra Aisaknöj töwöratiba sile jönömni gwötpuk unduiga kewö jiyök: “Gi qahö kanönga miangören böröjan azi kunöj sömbup memba kaba ninjiyöhi, mi mönö danön? Yanjön mi ninjiiga namba kötümötuetni lök wanjim teközal. Mi wanjim teközalanjöra mianjön mönö ölna yanjö qakje ahöm öngöma.”

³⁴ Isonöj iwiñangö keu jitni mi möta urukömbuk aka ambureren memba silata sahöta iwiñangöra kewö ulerök: “Iwini, nia mönö mewöyök kötuetköm ninjinöj.”

³⁵ Mewö ulerökmö, iwiñan melenja jiyök: “Mungan mönö tilipqilip qakje kaba göhö kötümötuetki taköba memba anja.”

³⁶ Mewö jiiga Isonöj kewö jiyök: “Munan mönö indimni yahöt tilipköm ninjiiga maljal: Yanjön mutuk asuhuyalangö qetbuñani mi mutuk noangit teköyök aka merak nöngö kötümötuetni mi mewöyök taköba noangita meza. Miangöra qetni Jeikob (tilipqilip azi) qerakzini, mi mönö dopje akza. Kötümötuet kun mönö nöngöra ahöm gihiza me qahö?”*

³⁷ Mewö jiiga iwiñan Isogöra kewö melenjök: “Mötnöj, nöjön mungi göhö azi kembugi malmapköra kungum wanjizal. Tinitosolomurupni pakpak yejön i welen qem wanjiba malmegöra jim kutum enjizal. Yaka yöha, sehoj padi aka wain o yuai mi lök jim teközalawa Anutunöj mi wanjiba malma. O nahöni, wanat kötümötuetna kun toroqeba ahöm ninjizawa mia gihibileñak? Mi mönö osizal.”

* 27:27: Hib 11.20 * 27:29: Jen 12.3 * 27:36: Jen 25.29-34

³⁸ Mewö melenğa iwiñangöra kewö jiyök: “O iwini, kötümötuet mohok-kun miyök mönö ahöm gihiza me denöwö? O iwini, mönö nia kun kötuetköm niñginöñ. “Mewö jiba könahiba silata sahörök.*

³⁹ Sahöriga iwiñan kewö melenğa jiyök: “Mötnöñ, göñön mönö gölme töhötmöriamñambuk mosöta köröwen anda malman.
Miangören sumpkö umjijilñi mi könakembayök qahö erakña.

⁴⁰ Gi bingö sou ketanñi miñön ambazip lañ enguba malmalgi anğön köla mungahö welenqeqeñi eretñi aka malman.

Mewö malmanmö, kekelolo aka qetal wañgiba nalö miangören karim aka yañgö galöm kölkölñi qeköba yaköriba nangi kinkin malman.”**

⁴¹ Iwiñan Jeikob kötümötuetñi wañgiyöhi, Isonöñ miangöra aka könahiba munñi uruönön möt wañgiba malök. Nanñi uruñan mewö möta alañi kungöra kewö jiyök: “Iwinirañgö kömupñangö nalöñan töriza. Yañön kömuiga sahöt jingey nalöñe miangören ölop muni Jeikob qebi kömuma.”

⁴² Isogö mötmötñe mewö ahuiga kunöñ miangö buzupñi möta Rebekagören anda jii möta nahönñi könangepñi Jeikobköra keu ali anda wañgita kaiga kewö jiyök: “Mötnöñ, datki Isonöñ mönö likepñi melenñi qake öngöiga guhui kömumangö mötmöriza.

⁴³ Mewögöra nahöni, nöñön keu jimami, mi mönö tem kölman. Mönö döлки wahöta ölöñ köla Haran mire neni Labangören anman.

⁴⁴ Anda yambuk nalö tosatñi toroqeba malnöñga datkahö urupikñan amörima.

⁴⁵ Uruönönñi amöriba eriga yuai ak wañginöñi, mi ölum qeigun nöñön miangö andöñe göhöra keu albi kaiga goañgita kame. Yañön guhui kömunöñga kunñan i qei kömumbapuk. Mönö wanigöra nalö mohok miangörenök öröröñ qahöwahotka etkömosötpileñbuk. “Mewö.

Aisaknöñ Jeikob melaiğa Labangören anök.

⁴⁶ Rebekanöñ apñi Aisakören anda kewö jiyök: “Nöñön iranyahötni Hit ambi yetköra aka toroqeba malmangö ölan nöhöi sihimbölo mörakzal. Jeikobnöñ mewöyök Hit yengö böratuñpñini yengörenök kun iranyahötniri ewö anömña membapuk. Gölme kiangören asuhugeri, yengö silikñinan mönö mewöyök ahöza. Mewöñi kun memba kabapuk ewö, nöñön mönö malmalni wuanöñgöra toroqeba malbilenak? Sihimbölonan mönö toroqeba önöñi qahö akapuk. “Rebekanöñ mewö jiyök.

28

¹ Mewö jiiga Aisaknöñ Jeikob köli öroi kaiga kötuetköba kewö jim kutum wañgiyök: “Nahöni, gi Keinan yengö nenböratñini yengörenök kun anömgi kude meman.

² Mewö qahöpmö, mönö wahöta Mesopotemia (Padan Aram) gölmenöñ anda namgahö iwiñi Betuel yañgö mire anğota ehongi Labangö böratuñpñi yengörenök kun anömga meman.

³ Anömgi menöñga Anutu, kukösum pakpakö Toñan mönö gi kötuetköba ahum sehip gihiğa gwölönarökurupki yengö qötöñinan sehiğa könagesö kambu gwötpuk miengö iwi bömönñina akñan.

⁴ *Anutunöñ mönö gi aka gwölönarökurupki iñini Abrahamgö kötümötuetñi mi toroqeba engima. Mewöyök gölme asagi Abraham wañgiğa göñön miangören kian aka maljani, mi buña qem anğume.”

* 27:38: Hib 12.17 * 27:40: Hib 11.20 * 27:40: Jen 36.8; 2 Kin 8.20 * 28:4: Jen 17.4-8

⁵ Mewö jiba Jeikob melaiiga mosöta Mesopotemia (Padan Aram) gölmenöñ Labangöreñ anmamgöra anök. Laban mi Aram azi Betuelgö nahönña aka Jeikob aka Iso yetkö namñiri Rebeka yangö nenña malök. Mewö.

Isonöñ kakasun ambi kun meyök.

⁶ Aisaknöñ Jeikob kötuetköba anömñi memamgöra Mesopotemia gölmenöñ melaiyöhi, mi Isonöñ mörök. Kötuetköm wangiba kewö jim kutum wangiyök: “Gi Keinan yangö nenböratñini yangöreñök kun anömgi kude meman.”

⁷ Mewö jim kutuiga iwinamñi yetkö keu jit tem köla mosöta Mesopotemia (Padan Aram) gölmenöñ anöhi, Isonöñ mi mewöyök mörök.

⁸ Mi möta iwiñi Aisaknöñ Keinan ambi tököba möt bölim anguba malöhi, Isonöñ mi eka möt kutuyök.

⁹ Mi möt kutuba iwiñangö jeñe dop kölmapköra asañi Abrahamgö nahönñi Ismaelnöñ kömuiga yangö mire anda börtatñi Malahat, Nebaiotkö nenñi mi meiga anömurupñi karöbut aket. Mewö.

Jeikobnöñ Suepkö döñi gaunöñ ehök.

¹⁰ Jeikobnöñ mewö Berseba miri mosöta Haran mire anmamgö anök.

¹¹ Anda mala gölme kunöñ angota wehön jeñi geyöhangöra aka miangöreñ köt tatkeri, miengöreñök kun memba nörop qömböñi qeba sungem gaun ahöyök.

¹² Gaun ahöba miangöreñ imut kun kewö ehök: Döp kungö kitipñi gölmenöñ algetka qak kitipñi mi Suepnöñ öngöba kunguba kiniga Anutugö garataurupñi yeñön miangöreñ tiba öngöm et aket.*

¹³ Mewö aketka Kembunöñ yangö kösutñe kinda keu kewö jii mörök: “Nöñön Kambu, asagi Abrahamgö Anutuñi aka iwiñi Aisakö Anutuñi akzal. Gölme ki ahözani, nöñön mi gi aka göhö gwölönarökurupki engö buñaya qem enjgimam.*

¹⁴ Göhö gwölönarökurupki yeñön ahumsehip aketka jañgöninan gölmegö sömsöm ewö akña. Mewö aiga jula denña gölme wehön kotkotñe aka gegene, Saut likep aka Not likep, eu aka emu miangöreñ göröken dop köla anda malme. Göhöra aka göhö gwölönarökurupki yangöreñök kungöra aka nöngö kötümötuetnan mönö gölmegö könagesö kambuñi pakpak yangö qakñine öngöiga oayenköyaen akñe.*

¹⁵ Mötnöñ, nöñön göbuk mala denike denike anda kaba malmani, miangö dop mönö sel jöhöm gihiba mal öngöba goangitpiga gölme kiangöreñ kunbuk lilingöba kaman. Nöñön gi qahö gömosöta keu jim jöhöm gihiali, miangö dop akiga ölni asuhum teköma.”

¹⁶ Mewö jiiga Jeikobnöñ gaun uruñeyök imbiñi möta wahöta kewö jiyök: “Kembunöñ mönö ölna gölme kiangöreñ maljapmö, nöñön mi mutuk qahö mötzal.”

¹⁷ Mewö jiiga jönömñi unduiga keu kewö jiyök: “Gölme ki mönö kömbukñi aka kenjötmötmötñambuk akza. Kianñön mönö ölna Anutugöreñ tatat dundumñi aka Suepkö nanñuñi akza.”

¹⁸ Mewö jiba miri gianjiiga söñanök wahöta köt qömböñi qeba ahöyöhi, mi memba wahöta jabö mötök ewö kunguba qakñe kelök o mokoba miriyök.

¹⁹ Miriba gölme miangö qetñi Betel (Anutugö miriñi) qerök. Mutuk taon miangö qetñi mi Luz qeta malget.

²⁰ Jeikobnöñ gölme miangö qetñi dölökñi Betel qeta keu kewö jim jöhöba jöjöpñ keunöñ jim köhöiyök: “O Anutu, göñön nömbuk mala köna ki anda

* 28:12: Jon 1.51 * 28:13: Jen 13.14-15 * 28:14: Jen 12.3; 22.18

malmami, mianğoreñ nek galöm ak niñgiba numbu nenenamni aka silenangö esuñi miwikñaim niñginöñga

²¹ ölop luai qakñe iwinangö mire kunbuk lilingöba kamam ewö, nöñön mönö göhö jitsihitki tem köla malbiga göñön nöñgö Kembu Anutuni aka malman.

²² Köt ki memba wahöta jabö ewö mötök kuñguzali, mianñön mönö göhö tatat dundumgi ahöiga yuai pakpak tököm niñgiba malmani, nöñön mi ölna mendenbiga kambu 10 aketka miengörenjök mohok mohok memba kalema gihibamalmam. “Mewö.

29

Jeikobnöñ Labangö mire anğorök.

¹ Jeikobnöñ mewö jiba mosöta könañi toroqeba anda wehön kotkotñangö könağesö yeñgö gölmenöñ anğorök.

² Mianğoreñ anğota gölme köröñe o löm kun ehök. Miri toni yeñön lama kambuñini enğuañgita mianğoreñ o enğiba malget. Nalö mianğoreñ o löm mianğö kösutñe lama kambu karöbut ahögetka o löm numbuñangö kötni ketañi mi qahö metalget.

³ Lama galöm yeñön mutuk lama kambuñini pakpak mianğoreñ tokom enğiba köt mi o löm numbuñeyök gwililöñgöba lamaurupñini o enğiget negetka köt mi kunbuk dundumñe köla malget.

⁴ Jeikobnöñ lama galöm mi kewö qesim enğiyök: “Azi alaurupni, inñini denikeğöra?” Qesim enğiiga “Nini Harangöra,” mewö melen wañgiget.

⁵ Melen wañgigetka kewö qesim enğiyök: “Inñini Nahorgö isiñi Laban möt wañgize me qahö?” Qesim enğiiga “Ölop möt wañgizin,” jiget.

⁶ Jigetka kewö qesim enğiba jiyök: “I ölop malja me qahö?” Mewö jiiga kewö jiget: “I ölop malja. Eknöñ, yañgö böratñi Reizölnöñ mönö endu lama enğuañgita kaza.”

⁷ Mewö jigetka Jeikobnöñ jiyök: “Eket, wehön ketañi ahöiga lama mi sunğemğöra tokom enğibingö nalöñan qahö töriza. Mianğöra ölop lamanñini o enğiget negetka kunbuk enğuañgita malmalñine anda al enğigetka nenenamñini neme.”

⁸ Mewö jiiga kewö melenget: “Mewö ölop qahö akin. Mutuk lama kambu pakpak tokom enğiba köt mi o löm numbuñeyök gwililöñgöbagun mönö lamaurupñini o enğiinga neme.”

⁹ Jeikobnöñ yembuk keu mewö eraum-möta kingetka mianğoreñök Reizölnöñ iwiñangörenñe lama kambuñi enğuañgita kayök. Reizöl yañön lama galöm nup memba malök.

¹⁰ Kaiga Jeikobnöñ ehonñangö böratñi Reizöl aka ehonñangö lama kambuñi enğeka o löm numbuñe anda köt mi metala ehonñi Labangö lamaurupñi o enğiyök.

¹¹ Enğim teköba Reizöl numbu yöhötüm namba könahiba köhöikñi qeta sahörök.

¹² Sahöta Reizölgöra jiyök: “Ni göhö iwigahö tinitosolomñi akzal. Ni Rebekagö nahönña. “Mewö jiiga Reizölnöñ möta ösumñan kiñkiñgöba iwiñangörenñe anda buzup mi jii mörök.

¹³ Labanöñ nennangö nahönñi Jeikobkö buzupñi möta i ösumok miwikñaimamğöra anök. Anda miwikñaiaba eka anğöm wañgiba numbuñi yöhötüm namba wañgita miriñe öñgöyohot. Öñgöba yuai pakpak asuhuyöhi, Jeikobnöñ mianğö kösohotñi jii mörök.

¹⁴ Mi möta kewö jiyök: “Ölöp, göñön nani sepkitipni akzan. “Mewö jiiga köin mohotkö dop yambuk tata malök. Mewö.

Jeikobnön Lea aka Reizöl anömyahötña etkömeyök.

¹⁵ Mewö maliga Labanön Jeikob kewö jii mörök: “Gi tinitosolomni maljanangöra töwagi qahö öne welen qem ningibanbuk. Mi qahö dop kölma. Miangöra töwagi dawik memangö mötzani, mi ölöp jinönga mötmam.”

¹⁶ Labangö böratyahötñi yahöt malohot. Ketañangö qetñi Lea. Munñangö qetñi Reizöl.

¹⁷ Leagö jeñan eksihimñambuk ahökmö, Reizölgö silenangö kaisongolomñi aka jemesoholñi mi körek eksihimñambuk kötökñi ahök.

¹⁸ Jeikobkö urusihimñi mi Reizölgöreñ ahöyöhangöra aka keu kewö jiyök: “Nöñön böratki könañgepñi Reizöl memangöra ölöp yambu 7 welen qem gihiba malmam.”

¹⁹ Mewö jiiga kewö jiyök: “I azi murutñi kun wañgibiga qahö dop kölbapukmö, gi gihibiga dop kölma. Miangöra ölöp nömbuk ki malman.”

²⁰ Mewö jiiga Reizöl memangöra yambu 7 welen qem wañgiba malök. Urusihimñan Reizölgöra ahöhangöra aka yambu miengö möriga wehön awamñi tandök ahök. Mewö.

²¹ Yambu 7 teköiga Jeikobnön ehonñi Laban kewö jii mörök: “Nöngö nup meme nalönan lök teközawañgöra ölöp anömni Reizöl ninginönga yambuk ahöba malmam.”

²² Labanön keu mi möta miri tonji pakpak öröm tokom engiba lömbuañ aliga nem söngaip aket.

²³ Mi aket teköiga miri söñauiga Labanön böratñi Lea wañgita anda Jeikob wañgiiga miri uruñe öngöba mohotñe ahöyohot.

²⁴ Labanön welen ambiñi qetñi Zilpa mi böratñi Leagö welenqeqeña malmapköra wañgiyök.

²⁵ Mohotñe ahöyohotka miri gianjiiga Jeikobnön anömñi eka möri Reizöl qahöpmö, i Lea aiga yöwöñangöreñ anda kewö jim wañgiyök: “Gi mönö wani kimbua ak ningizane? Ni Reizöl memangöra welen qem gihiba malalmö, gi mönö wuanöñgöra tilipköm ningizan?”

²⁶ Mi möta melennda kewö jiyök: “Gölme kiangöreñ datñi öne maliga munñan azi memapkö ahakmemenji mi neñgöreñ qahö ahöza.

²⁷ Miangöra ölöp maren sösongai mi Leabuk sonda mohotkö dop mal söngainöñ teköiga munñi mewöyök gihimam. I memangöra mönö mewöyök yambu 7 toroqeba welen qem ningiba malman.”

²⁸ Mewö jiiga urumohot aka Leabuk maren sösongai nalö mi sonda mohotkö dop mali teköiga Labanön böratñi Reizöl mewöyök anömñi akñapköra wañgiyök.

²⁹ Labanön welen ambiñi qetñi Bilha mi böratñi Reizölgö welenqeqeña malmapköra wañgiyök.

³⁰ Jeikobnön Reizöl i mewöyök anömña meyök. Urusihimñan Reizölgöra ahöyöhangöra aka Reizöl mi Lea ongita jöpaköm wañgiba malök. Miangöra yambu 7 toroqeba Laban welenni qem wañgiba malök. Mewö.

Jeikobkö moröurupñi asuhuget.

³¹ Jeikobkö uruñan Leagö gwötpuk qahö ahöiga boromdökñi tököiga Kem-bunön ehi qahö dop köliga Lea gölöm almapköra bauköm wañgiyökmö, munñi Reizölnön köpinña malök.

³² Leanöŋ köröbuk aka mala morö azia memba keu kewö jiyök, “Kembunöŋ tapötkokorokni ehiga apnan ölop könahiba jöpaköm niŋgiba malma. “Mewö jiba qetŋi miangö dop Ruben qerök. (Ruben Tapötkokorokni ehök.)

³³ Könaŋgep kunbuk körö ala morö azi kun memba keu kewö jiyök: “Apnan boromdökŋi jöpaköm niŋgiiga Kembunöŋ mi möta morö ki mewöyök niŋgiza. “Mewö jiba qetŋi miangö dop Simeon qerök. (Simeon Kezapŋan mörök.)

³⁴ Miangö andöŋe kunbuk körö ala morö azi kun memba keu kewö jiyök: “Ni nahönurupŋi karöbut apnaŋgöra mealangöra yaŋön mönö könahiba uruŋi nömbuk jöhöma. “Mewö jiba qetŋi miangö dop Liwai qerök. (Liwai Uruŋi jöhöma.)

³⁵ Miangö andöŋe dumŋe kunbuk körö ala morö azi kun memba keu kewö jiyök: “Nöŋön nalö kewöŋe Kembu möpöseizal. “Miangöra qetŋi miangö dop Juda (möpöseip) qerök. Miangö andöŋe morö kunbuk qahö meyök. Mewö.

30

¹ Reizölnöŋ köpinŋi mala Jeikobköra nahönbörat kun qahö memba nanŋi könaŋi mewö eka datŋi Lea andö qeba uruŋan mututqutut möta Jeikobköra keu kewö jiyök: “Gi mönö morö qiwikŋainöŋ. Mi qahö qiwikŋainöŋga nöŋön mönö malmangö osiba kömumam.”

² Mewö jiiga Jeikobnöŋ irimŋi seholiiga uruönön möt waŋgiba kewö jiyök: “Ni mönö morö denöwö qiwikŋaibilenak? Anutunöŋ gi morö memangö jöhöm gihiba malökmö, nöŋön Anutuya qahö.”

³ Mewö jiiga Reizölnöŋ kewö jiyök: “Nöŋgö welen ambini Bilha mi ki. Ölop yambuk ahönöŋga nöŋgöra morö mema. Yaŋön nam köliga nöŋön mewöyök yaŋgöreŋök nahönbörat miwikŋaim enŋgiba namŋini aka malmam.”

⁴ Mewö jiba welen ambini Bilha waŋgiiga anömŋa memba yambuk ahöyök.

⁵ Ahöiga Bilhanöŋ gölöm ala Jeikobkö nahönŋi meyök.

⁶ Nahönŋi meiga Reizölnöŋ kewö jiyök: “Anutunöŋ kewöt niŋgii dop kölbiga köuluk keuni möta morö azia niŋgiza. “Miangöra qetŋi Dan qerök. (Dan Kewöt niŋgii dop köljäl.)

⁷ Reizölgö welen ambini Bilha yaŋön kunbuk gölöm ala Jeikobkö nahönŋi kun meiga yahöt ahök.

⁸ Mewö meiga Reizölnöŋ kewö jiyök: “Datnambuk gwötpuk aum-möriba luhut aljal. “Mewö jiba miangö dop morö qetŋi Naftali (Aum-mörial) qerök.

⁹ Leanöŋ kunbuk gölöm qahö ala mi eka miangöra nanŋi welen ambini qetŋi Zilpa memba Jeikob waŋgii anömŋa ahök.

¹⁰ Anömŋa aka Jeikobkö morö azia meyök.

¹¹ Meiga Leanöŋ “Simbawoŋ!” jiba qetŋi Gad (simbawoŋ) qerök.

¹² Zilpa, Leagö welen ambini mianön Jeikobkö nahönŋi kun kunbuk meiga yahöt ahök.

¹³ Mewö aiga Leanöŋ keu kewö jiyök: “Nöŋön uruölöwak ketani mötzal. Ambi yeŋön mönö nöŋgöra oyaenköyaen qeta malme. “Mewö jiba miangö dop morö qetŋi Aser qerök. (Aser Oyaenköyaen qetme.)

¹⁴ Witnöŋ öliiga yandiyandi nalöŋe sömaŋi kunöŋ Rubenöŋ yaigep anda gölme köröŋe asagwalim amöt * miwikŋaiyök. Amöt mi miwikŋaiba memba kaba namŋi Lea waŋgiyök. Waŋgiiga Reizölnöŋ datŋangöra kewö jiyök: “Göhö nahöŋgan amöt memba kazawi, miangö tosatŋi mönö niŋginöŋga nembu.”

¹⁵ Mewö jiiga Leanöŋ kewö jiyök: “Göŋön apni noaŋgitnöŋga dop kölmapkö mötmörialmö, gi mönö nahönaŋgöreŋ asagwalim amöt ki mewöŋanök

* **30:14:** Ambi yeŋön asagwalim amöt namba amqeba gölöm albingö akeri, mewö möt nariget.

noangitmamgö mötzan. Mi qahö dop kölja. “Mewö jiiga Reizölnöy kewö jiyök: “Ölöp! Nahöngahöreñ amöt mi niñgiman ewö, mönö ölöp Jeikobpuk sunjem ki ahömahot.”

¹⁶ Mewö jiiga Jeikobnöy mare mianğöreñ nup mosöta kaiga Leanöy anda miwikñaim wañgiba kewö jiyök: “Nöñön nahönañğöreñ asagwalim amöt mianğön lök göhö söñğörögi mezal. Mianğöra mönö nömbuk ahöbit. “Mewö jiiga Jeikobnöy sunjemñi mianğöreñ yambuk ahöyohot.

¹⁷ Yambuk ahöyohotka Anutunöy Leagöreñ keu köulukñi möriga gölöm ala Jeikobkö nahönñi 5:ñi meyök.

¹⁸ Mi memba keu kewö jiyök: “Nöñön welen ambini mi apni wañgialağöra Anutunöy mianğö töwañi ki niñgiza. “Mewö jiba mianğö dop qetñi Isakar (töwa) qerök.

¹⁹ Mianğö andöñe Leanöy kunbuk gölöm ala Jeikobkö nahönñi 6:ñi meyök.

²⁰ Mi memba keu kewö jiyök: “Anutunöy kalem qetpuk niñgiza. Apni Jeikobkö nahönurupñi 6 mealanğöra yañön mönö pöndañ nömbuk mala qetbuña niñgiba malma. “Mewö jiba mianğö dop morö qetñi Zebulun qerök. (Zebulun qetbuña)

²¹ Nalö tosatñi teköiga Leanöy morö börat memba qetñi Daina qerök.

²² Anutunöy dumñe Reizöl mewöyök mötmörim wañgiba keu köulukñi möta gölöm almamgö bauköm wañgiyök.

²³ Bauköm wañgiiga gölöm ala morö nahön kun memba keu kewö jiyök: “Anutunöy gamuni meköza.”

²⁴ Mewö jiba toroqeba kewö jiyök: “Kembunöy mönö nahöni kun toroqeba niñgima. “Mewö jiba mianğö dop morö qetñi Josef (Toroqeba niñgima.) qerök. Mewö.

Jeikobkö lama kambuñan sehiyök.

²⁵ Reizölnöy nahönñi Josef meiga mianğö andöñe Jeikobnöy Labanğöra kewö jiyök: “Ni nani miri gölmene anmamgö mötzal. Mianğöra ölöp melaim niñginöñga lilingöba anmam.

²⁶ Anöm moröurupni kiengöra aka göhö welengi qeba malali, mönö i niñginöñga mohotñe köna anbin. Nöñön nup gwötpuk ketañi memba malali, mi nangak ölöp mötzan.”

²⁷ Mewö jiiga Labanöy kewö jiyök: “Gi möt ölöwak niñgizan ewö, mönö ölöp ki malman. Kembunöy göhöra aka ni kötuetköm niñgiba malöhi, nöñön unju qebiga keu mewö asuhui mötzal.”

²⁸ Mewö jiba toroqeba kewö jiyök: “Möno nupkahö töwañanğö jañğöñi jinöñga söñğöröñi mi ölöp gihimam.”

²⁹ Mewö jiiga Jeikobnöy kewö jiyök: “Nöñön göhö welengi denöwö qeba mala göhö mirigö sömbup kambuñi kambuñi galöm köl eñgibiga qarigeri, mi nangak ölöp mötzan.

³⁰ Mutuk ni ki qahö kabiga mianğöreñ sömbup yuaigi gwötpuk qahö ahöm gihiyökmö, mianğön mönö ni kabiga nalö mianğöreñ sehiba jesöñgö akze. Ni denike denike anda kayali, mianğöreñ Kembunöy kötuetköm gihiiga malnöy. Mewö malnöymö, ni mönö wani nalönöy ölöp nani könagesöurupni nañgöm eñgimamğöra aka nup yuai könahiba membilenjak?”

³¹ Mewö jiiga Labanöy kewö qesiyök: “Ni mönö wania gihibilenjak?” Mewö qesiiga Jeikobnöy melañda kewö jiyök: “Yuai kun kude niñgimanmö, yuai mohot ki nöñğöra akñan ewö, ni ölöp toroqeba göhöreñ lama kambuñi kambuñi mi köyan köla jegalöm ak eñgiba malmam.

³² Ni ölöp göhöreñ lama aka meme kambugi pakpak mi merak eñgek kewötmam. Mi kewöta lama moröñi baröm pakpak aka meme (noniñ) dömnñi

tiktokñinambuk aka kulemñini diriwen, soño me korombonji mi pakpak mendenða nannini tokom engiman. Mienñon ölop nup memba malalañgö töwani akñe.

³³ Könañgep nupnañgö töwani, lama aka meme mi engek kewötmangöra kabanak, nalö mianğoreñ uruni diñđiñgö könañi mi amqeba kewö miwikñaiman: Meme (noniñ) tiktokñini qahö aka diriwen, soño me korombonji qahö mi pakpak aka lama baröm qahö pakpak nöñgö kambunöñ kinmei, mi nöñon yonğoro meal, mewö möt kutuman.”

³⁴ Mewö jüiga Labanöñ kewö melenñök: “Ni ölop urumohot akzal. Keu jizan ewö köna mi ahöma.”

³⁵ Mewö melenða silim mianğoreñök Labanöñ meme (noniñ) aziñi kulemñini jinjalalañ aka diriwen soño me korombonji aka meme ambiñi pakpak kulemñini tiktokñinambuk aka diriwen soño me korombonji me sile jupñine yuai tuatñi taröhi, mi pakpak aka lama moröñi baröm pakpak mi kewöta meköm engiba nannı nahönurupñi yenğö böröñine al engiyök.

³⁶ Labanöñ mi al engiba yembuk Jeikobköreñ lama aka meme kambu mi enğuanğita silim karöbut anangö dop anda mianğoreñ malget. Köröwen mewö malgetka Jeikobnöñ toroqeba Labangöreñ lama aka meme kambuñi kambuñi mi galöm köñ engiba malök.

³⁷ Mewö mala sau, kömin aka kuñgam ip mienğö böröñini gwölögwölö kutuba memba silenini jölanjölan (jöranjöran) köndölatiiga sutñe sutñe tuariiga jinjalalañ ahök. †

³⁸ Mewö aiga ip böröñini köndököndölatiñi mi memba sömbup yenğö o joutñini pakpak mianğoreñ aliga o nemingöra kagetka wösöñineyök ahöyök. Mewö ahöiga lama aka meme kambu yenñon aziñan enğualöñmegö sihim köñöpñi möta o nemingöra kaba miwikñaiba eket.

³⁹ Mewö eka meme aziñi yenñon ip böröñi mienğö kösutñine ambiñi enğualöñget. Mewö enğualöñgetka gölöm ala malgerañgöra moröurupñini jinjalalañ, tiktokñinambuk aka diriwen, soño me korombonji mi enğömemba malget.

⁴⁰ Mewö malgetka Jeikobnöñ lama aka meme (noniñ) moröñi mewöñi mi kewöta mendenğ engiba nannök nannök kambu köñ engiyökmö, sömbup ketañi mi arengöm enğiiga jeñini Labangöreñ sömbup baröm aka kimbiñini tiktokñinambuk yenğoreñ göröken uba kinget. Mewö aka nannañgöra lama aka meme (noniñ) kambuñi kambuñi meköba miwikñaim engiyök. Mi miwikñaiba jöhöm enğiiga Labangö lama kambunöñ qahö anda toroqem engiget.

⁴¹ Sömbup ambiñi köhöikñi yenñon aziñan enğualöñmegö sihim köñöpñi mötketka Jeikobnöñ nalö dop mianğoreñ ip böröñi mi o joutnöñ alök. Mianğöra sömbup aziñi yenñon kaba mi wösöñine miwikñaiba eka kösutñe mianğoreñ ambiñi mi enğualöñda malget.

⁴² Mewö malgetmö, sömbup ambiñan ösumñini eretñi aket ewö, yanñon ip böröñi mi yenğö wösöñine qahö ala malök. Mewö aka maliga sömbup ösumñini eretñi mienñon Labangöreñ kambunöñ toroqetgetka ösumñini köhöikñi yenñon Jeikobkö kambunöñ anda toroqetget.

⁴³ Jeikobnöñ mewö aka kindiñbirik azi qetbuñañambuk aka töhötmöriam miwikñaiyök. Lama aka meme kambu gwötpuk buña qem anğuba welenqeçe ambazip enğuanğiriga kamel aka donki kambuñi kambuñi asuhum sehigetka tonjini ahök. Mewö.

† **30:37:** Ip böröñi mi selğöra qahö alök. Mewöyök tiripqözölqözöl me jinañ akñamğöra qahö. Anutnöñ yauen aka suna jinañ akingöra qahö jiyökmö, Jeikobkö uruñan diñğiiga tem köla malöhañğöra töhötmöriam könañi mewö kusum wañgiyök.

31

Jeikobnöh Laban mosöta ölöñ köla anök.

¹ Labangö nahönurupñan keu kewö jigetka Jeikobkö kezapñe geiga mörök: “Iwininan yuai buña qeba malöhi, Jeikobnöh mi pakpak kalöpköba köñjörata anğön kölöc. Iwininañgö sukinapñi galöm köla miangörenök inapñi pakpak mi nanñangöra miwikñaiba kindinbirik akza.”

² Keu mi mörök aka yöwöñangö jemesoholñi eka kewö möt asariyök: “Labanöh mutuk ala ölöpnji ak niñgiba mala korökmö, mewö qahö toroqeba aka malja.”

³ Mewö möt asariiga Kembunöh Jeikob kewö jii mörök: “Göñön mönö lilingöba iwiasaurupki yengö gölmenöh anda tinitosolomurupki yembuk malman. Anda malnonga nöñön göbuk kinda malmam.”

⁴ Jeikobnöh keu mi möta Reizöl aka Lea yetköra keu ali aniga gölme köröñe lama kambuñi kambuñi galöm köl engiyöhi, miangören kayohot.

⁵ Kayohotka kewö jii mörohot: “Nöñön iwinirañgö jemesoholñi eka kewö möt asarizal: Yañön mutuk ala ölöpnji ak niñgiba mala korökmö, mewö kunbuk qahö aka malja. Iwinangö Anutuñan mönö töndup nömbuk kinda mala korök.”

⁶ Ni ösumni pakpak qezaköba miangö dop iwinjiri welen qem wañgiba mala korali, injiri mi ölöp mötzahot.

⁷ “Mewö malalmö, yañön isimkakalek qakñe ak niñgiba mala nupnangö töwanji mi sömañi 10:gö dop utekutek ala malök. Mewö ak niñgiba malökmö, Kembunöh anğön köl wañgiiga geñmororoh kun qahö ak niñgiiga malal.”

⁸ Nalö kunöh kewö jiyök, ‘Lama aka meme (nonin) tiktokñinambuk asuhumei, mi mönö göhö nup töwagi akñe.’ Mewö jiiga sömbup kambu jömukñi yehön moröhini tiktokñinambuk engömeget. Nalö kunöh kewö jiyök, ‘Lama aka meme (nonin) jinjalalan asuhumei, mi mönö göhö nup töwagi akñe.’ Mewö jiiga sömbup kambu jömukñi yehön moröhini jinjalalan engömeget.

⁹ Anutunöh mewö aiga asuhuiga iwinirañgö kambuñeyök sömbup köñjörata enğuanğita niñgiiga sehiyök.

¹⁰ “Sömbup aziñan ambiñi enğualöhnda malgeri, nalö kun miangören gaun kunöh jeni uba wahöta ekiga meme (nonin) aziñan ambiñi enğualöhnda kingeri, yengö silenini mi jinjalalan, tiktokñinambuk aka diriwen, soño me korombongi pakpak aket.”

¹¹ Nöñön gaun ekiga miangören Anutugö garata kunñan nöñgöra ‘Jeikob!’ qerök. Mewö qeriga ‘Ki kinjal,’ jiba melenjal.

¹² Melenniga kewö toroqeba jiyök: ‘Labanöh yuai pakpak ak gihimakzawi, nöñön mi eka mötzal. Miangöra ölöp jegi uba wahöta eknöh: Meme (nonin) aziñi pakpak ambiñi enğualöhnda kinjei, yengö sileninan jinjalalan, tiktokñinambuk aka diriwen, soño me korombongi akza.’

¹³ *Nöñön Betel miangören asuhum gihibiga köt dangunu kun kunguba miriba nöñgöra keu jöhöba jöjopañ keunöh jim köhöinöh. Nöñön Anutu mi aka göhöra keu kewö jizal: Gi mönö döki wahöta kantri ki mosöta nangi ahuahu gölmege kunbuk lilingöba anman.’ ”

¹⁴ Jeikobnöh keuñi mewö jiiga Reizöl aka Lea yetköñ kewö melen wañgiba jiyohot: “Iwinirañgö mire börösamotkö bahöhni kun mi neñgören qahö toroqeba tatza.”

¹⁵ Yañön azi netkiiga söñgöroniran kaiga mi nanñangörök memba gil teköyök. Miangöra niri mönö kian tandök ak netkiiga mala korit.

* 31:13: Jen 28.18-22

16 Mianğöra Anutunöŋ iwiniraŋgö kambuŋeyök sukinap öröyuai könjörata waŋgiri sehiyöhi, mi pakpak mönö ölŋa nanine aka nahönböraturupnini neŋgö buŋaya akza. Mianğöra Anutunöŋ jim kutum gihiyöhi, göŋön mönö mi pakpak tem köla wuatanağöman.”

17 Mewö jiyohotka wahöta mem mözözöm aka anöm-moröurupŋi kököbihim enğiiga kamel qakŋine öŋgöget.

18 Mirigö sömbup kambuŋi pakpak közöl enğiiga mutuk anget. Sukinap yuaini (merömbuŋi) pakpak Mesopotemia (Padan Aram) gölmenöŋ mala mi-wikŋaim sehiyöhi, mi körekbörek kölolohoba iwiŋi Aisaköreŋ anbingöra Keinan gölmenöŋ göröken anget.

19 Nalö mianğöreŋ Labanöŋ lama juŋŋini mitimamgö aniga Reizölnöŋ iwiŋaŋgöreŋ miri domlopion morörökŋi yonğorö meyök.

20 Yonğorö meiga Jeikobnöŋ toroqeba yöwöŋi Aram azi Laban i kewö tilipköm waŋgiyök: Anbingö keuŋi mi qahö jii mörökmö, mönö ölöŋ mosöta anget.

21 Mewö ölöŋ angetka kamel yeŋön öröyuaini pakpak mem bisiget. Anda Yufreitis o kutuba Gilead gölme kundunaŋbuk mianğöreŋ göröken anget. Mewö.

Labanöŋ Jeikob wuatanağöba anök.

22 Angetmö, silim karöbut aiga mianğöreŋ keu kewö jigetka Labanöŋ mörök, “Jeikobnöŋ mönö tököba ölöŋ köla anök.”

23 Mi möta wahöta tinitosolom aziurupŋi enğömemba wehön 7:gö dop enğuatanağöba anda mala Gilead gölme kundunaŋbuk mianğöreŋ miwikŋaiba enğömeget.

24 Enğömemba sunğem mianğöreŋök Anutunöŋ Aram azi Labangöra gaunöŋ asuha keu kewö jii mörök: “Göŋön Jeikobköra kötümötuet me qesuk keu kun jibanbuköra mönö möt kutuba galöm mem anğuman.”

25 Enğömegetka Jeikobnöŋ opo seri koumŋi Gilead gölme kundunaŋbuknöŋ möröreŋgöba kuŋguiga Laban aka aziurupŋi yeŋön mewöyök opo seri koumŋini mianğöreŋ kuŋguba ahöget.

26 Ahöba wahöta qinğiŋi Jeikobköreŋ anda kewö jii mörök: “Gi mönö wani kimbial ak niŋginöŋe? Gi tilipköm niŋgizan. Kerök yeŋön yarö gila ambi yonğorö örömakzei, mönö mianğö tandök nöŋgö börtayahötni ölöŋ etkuangita kanöŋ.

27 Gi wuanöŋgöra isimkakalek ak niŋgiba ösumok ölöŋ köla nömosöta kanöŋ? Gi mönö wuanöŋgöra keu kun qahö jinöŋ mötpi laŋ kanöŋ? Mi mötpileŋak ewö, nöŋön ölop liŋet gwawet albi kömam köla gita kulele qegetka sösongai qakŋe gumbulbi könanöŋ kabeak.

28 “Mi mötpileŋak ewö, mönö ölop isiurupni aka börtayahötni numbuŋini yöhötim namba yaizökzökŋini jibileŋak. Gi mönö uruqahö kimbial aknöŋ.

29 Nöŋön kukösumnambuk kaba ölop ayuhum gihibileŋakmö, sunğem ahöbiga iwigahö Anutunaŋ keu kewö jii mötzal: ‘Göŋön Jeikobköra kötümötuet me qesuk keu kun jibanbuköra mönö möt kutuba galöm mem anğuman.’

30 Mianğöra muat, nangi iwigahö miri gölmeŋe lilingömamgö urusihimgi ketanŋi möta malagun lök mosöta könanöŋ kaba maljan. Mianğöra ölop anmanmö, nöŋgö domlopionurupni mi mönö wuanöŋgöra yonğorö memba kanöŋ?”

31 Labanöŋ mewö jiiga Jeikobnöŋ kewö melen waŋgiyök: “Göŋön börtayahötki yarö ösum qakŋe noaŋgitpanbukö mötmöröba keŋgötni möta ölöŋ köla kain.

³² Kainmö, kunñan domlopionurupki meiga miwikñaimani, i ölop qenönga kömuma. Öroyuai pakpak memba maljali, mi ölop tinitosolomurupniri yeñgö jeñine ek kewöta kinda göhöreñ yuaigi kun miwikñaiba eka mi ölop meman. “Jeikobnöñ mewö jiyökmö, anömñi Reizölnöñ domlopion mi yongorö meyöhi, apñan mi qahö möröhañgöra mi tönpin jiyök.

³³ Mewö jiiga qinñi Jeikobkö opo seri kounñe öngöba qezanña jaruba Leagö opo seri kounñe öngöba toroqeba welen ambiyahöt mietkö opo seri kounñire öngöba qezanña jaruba yuai kun qahö miwikñaiyök. Leagö kounñi mosöta miangö andöñe Reizölgö kounnöñ öngöyök.

³⁴ Öngöyökmö, Reizölnöñ domlopionurup mi memba gösönöñ löngöta kamel qakñe tatatkö dum uruñe ala qakñe öngöba qelanjim enñiba tarök. Mewö tariga iwiñan opo kounñangö uruñi körek qezanñökmö, mi qahö miwikñaiyök.

³⁵ Reizölnöñ iwiñi kewö jii mörök: “Ketanamni, ni köinöñ nehiga tatzalangöra aka göhö jemesoholge ölop qahö wahötman. Miangöra uruönön kude möt niñgiman. “Mewö jiiga mirinangö domlopionurupñi miengöra jaruyökmö, mi qahö miwikñaiyök.

³⁶ Qahö miwikñaiiga kinda Jeikobnöñ irimñi sehologiiga tembula Laban kewö jim wangiba qesim wangiyök: “Nöñön wani könaya ak siñgial? Mönö wani silik bölöñi ak gihialangöra kahasililinöñ böröjan suhum niñgizan?

³⁷ Nöñgö sukinapni pakpak qezan teköbagun mönö wanat yuaia kun miwikñainönga nangi mirigahö buñaya akawak? Mi ölop memba yuhu kaba tinitosolomurupniri yeñgö jeñine alnöñ eketka sutnire keu lömböt ahöiga mi kewöta jim teköba mindinñöm netkime.

³⁸ “Nöñön göbuk lök yambu 20 mala koral. Nalö miangö uruñe nupki membiga göhöreñ lama aka meme (nonin) yeñön morö membingö pömsöm qahö qegetmö, ölopñanök ahumsehip aka malget. Mewöyök lama aziñi kun göhö sömbup kambunöhök qahö qem neal.

³⁹ Nalö tosatñe sömbup kalñan lama qeba yöhöqöhötüyöhi, mi qahö memba kaba gihiba malalmö, miangö kitipñi mi nani kambunöhök memba salupñe ala malal. Lamagi sunñemñe me asakñe yongorö memba malbeahi, mi töndup miangö salupñi almangö jimkutukutu alnöñga mi wuatangöba malal.

⁴⁰ “Silimnöñ miri könöññan nohotiriiga sunñemñöñ amötñan nuñguiga sanñenñi möta malal. Nalö gwötpuk gaun guli mem niñgiiga malal.

⁴¹ Yambu 20:gö dop mewö göhö mire mala kotpi teköza. Yambu 14 mi böratyahötki etkömemangöra welen qem gihiba malal. Miangö andöñe yambu 6 mi lama bulmakau miwikñaimangöra göhöreñ nup memba malal. Mewö malalmö, göñön nup memegö töwani mi sömañi 10:gö dop utekutek ala malnöñ.

⁴² “Asani Abrahamgö Anutuñi iwini Aisaknöñ waikñi memba möpöseimakzawi, yanñön andöñe awörök qahö aka kötöngöm niñgibawak ewö, göñön mönö böröbörak melaim niñginöñga köna anbilanñak. Mewö ak niñgibanakmö, Anutuñöñ nöñgöreñ sihimbölo kahasililin möriiga nup börönan sileqege aka memba malali, mi eka merak sunñem nöñgö keuni kewöta jim teköiga mötzan. “Mewö.

Jeikob aka Laban yetköñ jöhöjöhö ahot.

⁴³ Jeikobnöñ mewö jiiga Labanöñ kewö melen wangiyök: “Ambi yahöt ki mönö nöñgö böratyahötña. Yetkö nahönböratuñi mi nöñgöreña. Lama bulmakau kambuñi kambuñi ki mi nöñgöreña. Yuai pakpak ki ekzani, mi körek nöñgö buñayök akza. Mewömö, muat nöñön merak böratyahötñi

ki aka nahönböraturupñiri engömeyohori, yeñön anmegö keuñini jigetka mi qeapkömangö lömbörizal.

⁴⁴ Mianğöra ölop kaba gou köl anğuba sutnire jöhöjöhö akit. Mi qen-denbitpuköra mötmörim netkiba dangunu ewö sutnire ahöma.”

⁴⁵ Mewö jiiga Jeikobnöñ köt kun memba kuñguiga timbetuat ewö dangunu jaböñjiri aka kinök.

⁴⁶ Mianñön kiniga Jeikobnöñ tinitosolomurupñi yeñğöra köt memba tokomeğöra jiyök. Mewö jiiga köt memba qaknöñ qaknöñ ala tokoget öngöiga mianğö kösutñe nene lömbuan ohoba neget.

⁴⁷ Labanöñ köt kambu mianğö qetñi Jegar Sahaduta qeri Jeikobnöñ qetñi Galed qerök. *

⁴⁸ Mewö qerohotka yöwöñan qingñi Jeikob kewö jii mörök: “Köt kambu ki mönö merak netkö sutnire dangununira ahöma. “Mianğöra Jeikobnöñ mianğö qetñi Galed qerök.

⁴⁹ Labanöñ keu toroqeba kewö jiyök: “Kembunöñ mönö denđa malbiri, nalö mianğoreñ sutnire jeñan netkek tiba galöm mem netkiba malma. “Mianğö dop gölme mianğö qetñi kun Mizpa qerök. (Mizpa Galöm meme miri köröpñi.)

⁵⁰ Labanöñ keu mi toroqeba kewö jiyök: “Göñön börtayahötñi öröm ureim ak etkiman me toroqeba kakasun ambi tosatñi engömeman ewö, mönö keu ki möta malman: Gölme azi kunñan kösutnire qahö mala netkehiga Anutunöñ mönö töndup ölop netkeka sutnire jöhöjöhö ahözawañğö keuñi mi nanğöba jiba malma.”

⁵¹ Mewö jiba kunbuk toroqeba kewö jiyök: “Qingñi mötnöñ, köt kambu ki aka mötök ki kuñguzali, mietkön mönö netkö sutnire dangunu ewö tat öngömahot.

⁵² Köt kambu ki mönö dangununira aka tat öngöma aka mötök ki mi mewöyök dangununira aka tat öngöma. Mietkön jöhöjöhönirawğöra kewö mötmörim netkiba tat öngömahot: Nöñön mem bölim gihimangö möta köt kambu ki qahö onğita göhöreñ kamam. Göñön mewöñanök mem bölim ningimangöra möta köt kambu aka mötök ki qahö etkonğita nöngöreñ kaman.

⁵³ Abraham, Nahor aka yetkö iwiñjiri yeñğö bemñini Anutu yañön mönö keu sutnire asuhuiga mi kewöta jim teköm netkima. “Labanöñ mewö jiiga Jeikobnöñ keu mi jöhöba Anutugö qetñe jöjopañ keunöñ jim köhöiyök. Iwiñi Aisaknöñ Anutu mianğö waikñi memba möpöseiba malök.

⁵⁴ Jeikobnöñ mewö aka gölme kundunje sömbup qeba mianñön jöwöwöl ohoba tinitosolomurupñi öröm enğiiga lömbuanñöñ kaget. Kaba nene memba sunğem liñet unduba kundunje mianğoreñ ahöget.

⁵⁵ Ahögetka miri asariiga Labanöñ söñanök wahöta isiurupñi aka börtayahötñi numbuñini yöhötim memba kötuatköm enğiba yaizökzökñini jiyök. Mi jiba engömosöta lilingöba mirine anök. Mewö.

32

Jeikobnöñ Isobuk aitongöbitkö jörömqöröm ahök.

¹ Yöwöñan aniga Jeikobnöñ mewöyök könanöñ aniga Anutugö garataurupñi tosatñan miwikñaim wañgiget.

² Miwikñaim wañgigetka enğeka kewö jiyök: “I Anutugöreñ yarö kambuya akze. “Mianğö dop gölme mianğö qetñi Mahanaim (yarö kambu yahöt) qerök.

³ Jeikobnöñ könanöñ anda mala kolek aziurupñi tosatñi mutuk melaim enğii Edom kantrigö gölme qetñi Seir mianğöreñ datñi Iso ekingöra anget.

* **31:47:** Dangunu köt kambu mi Hibru keunöñ Galed aka Arameik keunöñ Jegar Sahaduta.

⁴ Melaim engiba kewö jim kutum engiyök: “Inini mönö anda dat kembuni Iso kewö jigetka mötma: ‘Ketanamni mötnöñ, ni welen azigi Jeikob. Ni ehoniri Labanbuk mala kota mal teköba nalö kewöñe i mosöta kazal.

⁵ Miangörej mala bulmakau, donki, lama, meme (noniñ) kambuñi kambuñi aka welenqeçe ambazip miwikñaiba engömembra könanöñ kazal. O azi kembuni, nöñön göhö jege ak-kömükömu miwikñaimamgöra möta keu buzupni ki mutuk albi göhörej kaza.’ ”

⁶ Mewö jim kutum engiiga anda lilingöba kaba kewö jigetka mörök: “Nini datki Isogörej anin. Yañön mönö aziurupñi 400 engömembra könanöñ kaba göbuk aitonngöbingö jöjöröba malje.”

⁷ Mewö jigetka möta awöwöliba köñjiliñ ketani mörök. Mewö möta kinda könagesöurupñi yambuk kageri, mi aka lama meme kambuñi kambuñi, bulmakau kambuñi kambuñi aka kamelurupñi mi menden engiiga kambu yahöt aket.

⁸ Kewö mötmöriba mewö ahök: “Isonöñ kaba yarö gila kambu kun engum ayuhuma ewö, kambu kun yeñön mönö ölop ölon köla anbeak.”

⁹ Mewö mötmöriba kewö jiba köuluköyök: “O Anutu, asani Abrahamgö aka iwini Aisakö bemñiri, göñön ölop möt niñgiman. Kembu, gi nangok keu kewö jinöñ möral: ‘Gi mönö wahöta nangi gölmenöñ lilingöba nangi tinitosolomurupki yeñgörej anman. Endu anöñga nöñön töhötmöriam gihibiga malman.’ Mewö jinöñ möral.

¹⁰ Mönöwök nani öröpnanök memba Jordan o töwatñi ki kutuba analmö, ölop ahum sehiba merak lilingöba kambu yahöt aka ki kazal. Ni welen azigi etqeçeni aka malalmö, göñön töndup keugi pöndan wuatangöba ak-kömükömugi pakpak kondel niñgiba malnöñ. Ni eretñi aka urukalemgi mi buña qem angumamanö dop qahö aka malal.

¹¹ “Datni Isonöñ könanöñ kaba nani, nam aka moröurupnini nini neñguba ayuhum neñgibapuköra nöñön keñgötñi mötzal. Miangöra göñön mönö bauköm neñgiba yangö böröñeyök meköm neñgiman.

¹² *Gi nangok keu kewö jinöñga möral: ‘Nöñön töhötmöriam gihiba gwölönarökurupki ahumsehip engibiga qötöñinan qariba köwetkö sakösiñi ahözawangö dop akña. Mi gwötpuk ketani ahömawangöra aka oyoñoyoñgö dop qahö. Keu mi ölna.’ ”

¹³ Mewö köuluköba sungemñi mi gölme miangörej ahöyök. Ahöbagun sömbup kambuñi kambuñi miengörejök datñi Iso kalem wangimamgöra sömbup kewö kewöt menden engiba nanñinök al engiyök:

¹⁴ Meme (noniñ) ambiñi 200, aziñi 20, lama ambiñi 200, aziñi 20,

¹⁵ kamel 30 moröurupñini juzunöñ, bulmakau ambiñi 40, aziñi 10, donki ambiñi 20, aziñi 10.

¹⁶ Kambu mewö mewö kewöt menden da kambu nanñök nanñök mi welenqeçeurupñi yeñgö böröñine al engiba kewö jii mötket: “Inini ölop mutuk anda sömbup kambuñi kambuñi kienngö sutñine tirin kutuba enguanngita awatan anme.”

¹⁷ Mewö jiba kambu mutukñi anmeanngö galömñi kewö jim kutum wangiyök: “Könanöñ angetka datni Isonöñ miwikñaim engiba kewö qesim gihima: ‘Gi dagö welenqeçe azia akzan? Gi denike anmam jiba kazan? Sömbup wösöge anjei, mi dagöreña?’

¹⁸ Mewö qesim ghiiga kewö jiman: ‘Mi welen azigi Jeikobköreña. Mi ketanamñi Iso kalem wangimamgöra al engii kaze. Nanñak mönö andöñine könanöñ kaza.’ ”

* 32:12: Jen 22.17

19 Mewö jim kutum waŋgiba sömbup kambu 2:ŋi, kambu 3:ŋi aka sömbup kambu tosatŋi pakpak yeŋgö galömjini andöŋine kageri, i mewöyök jim kutum enŋiiga kewö mötket: “Injini datni Iso miwikŋajimei, mönö keu tandökŋi miyök jigetka mötma.”

20 Mewö jim kutum enŋiba kewö mötmöriyök: “Nöŋön esapköba uruŋi memba eta ala kalem waŋgimangöra sömbup kambuŋi kambuŋi melaim enŋibi mutuk anme. Datnan mi enŋeka uruŋi bönjöŋ köliga amöribawak. Uruŋi amöriiga ölop nanak yaŋgö jemesoholŋe ösöŋ aŋgotpi siŋgisöndokni mosöta ala ak niŋgibawak. “Mewö mötmöriba toroqeba kewö jiget mötmapkö jiyök: “Göhö welen azigi Jeikobnöŋ mönö andöŋine ösöŋ kaza.”

21 Mewö jiba kalemŋi al enŋii mutuk könanöŋ angetmö, nanŋak sunŋem mi opo koumnöŋ tatmam jiba miangöreŋ tarök. Mewö.

Jeikobnöŋ Suep garatabuk aum-möriyohot.

22 Sunŋem miangöreŋ Jeikobnöŋ wahöta anömyahötŋi, welen ambiyahötŋi aka morönahönurupŋi 11 mi enŋuaŋgiriga anda Jabok o sakŋi qöleqöleleŋi kutubingö aket.

23 Enŋuaŋgiri o kutuba anda sukinap yuaini pakpak buŋaŋi ahöyöhi, mi mewöyök memba an teköget.

24 An tekögetmö, Jeikobnöŋ nanŋök o likepŋe miangöreŋ kunbuk tarök. Nanŋök tariga azi kunŋan kaiga yambuk sunŋem aum-möriba malohotka miri gianjiyök.*

25 Azi mianöŋ luhut al waŋgimangö osiba eka miangöra Jeikob mi ikinŋe qeyök. Qeiga mohotŋe aum-möriba malohotka miangöreŋ Jeikobkö ikin sihitŋan sulök.

26 Sihitŋan suliga azi mianöŋ kewö jiyök: “Miri gianjimangö akzawaŋgöra mönö ölop nömosötnöŋga anmam. “Mewö jiyökmö, Jeikobnöŋ kewö melen waŋgiyök: “Ni qahö kötuetköm niŋgiman ewö, nöŋön mönö gi qahö gömosötpi anman.”

27 Mewö melen waŋgiiga “Gi qetki niŋi?” jiba qesim waŋgiiga “Jeikob,” jiyök.

28 Mewö jiiga keu kewö jiyök: “Gi Anutu aka ambazip yembuk aum-möriba mala luhut al enŋinöŋ. Miangöra göhö qetki mönö kunbuk Jeikob qahöpmö, Israel qetme. “(Israel Anutubuk aum-möriyök).”*

29 Mewö jiiga kewö jiyök: “Gi ölop qetki qetnöŋga mötmam. “Mewö jiyökmö, garatanöŋ mianöŋ kewö melen waŋgiyök: “Gi denöwögöra nöŋgö qetnaŋgöra qesizan?” Mewö melen waŋgiba miangöreŋ kinda kötuetköm waŋgiyök.*

30 Kötuetköm waŋgiiga Jeikobnöŋ kewö jiyök: “Ni Anutubuk mesohol köl aŋguba jeŋi törörök ekzalmö, töndup nehoriiga jebuk maljal. “Mewö jiba miangöra gölme miangö qetŋi Penuel qerök. (Penuel Anutugö jemesoholŋi)

31 Wehön jeŋan lök koriga Jeikobnöŋ Penuel gölme mi mosöta onŋita kaba ikinŋi sulöhaŋgöra aka timkorik anök.

32 Azi mianöŋ Jeikobkö ikin sihit toroqeqeŋgö ginimuramŋe (bidororo) qeyohaŋgöra aka Israel könagesö yeŋön nalö kewöŋe mewöyök sömbup namba miangöreŋ ikin sihit toroqeqeŋgö ginimuramŋi mi tököba qahö nemakze. Mewö.

33

Jeikobnöŋ Isobuk aitonŋöyohot.

* 32:24: Hos 12.3-4 * 32:28: Jen 35.10 * 32:29: Kemb 13.17-18

¹ Jeikobnöh jeñi uba wahöta Isonöh aziurupñi 400 yembuk mohotñe könanöh kageri, mi engehök. Miangöra nahönböraturupñi menden engebiba Lea, Reizöl aka welen ambiyahötñi yeñgö böröñine al engiyök.

² Mewö al engebiba kewö arengöm engiyök: Welen ambiyahötñi yetkôn nahönböraturupñiri enguanğita mutuk anget. Yeñgö andöñine Leanöh nahönböraturupñi yembuk angetka Reizöl aka nahönñi Josef yetkôn qöndökñi anohot.

³ Saiwanñi mewö arengöm engebiba nanñak yeñgö wösöñine mutuk anda simin köla gölmenöh bamgöba wahöriga indimñi 7 aiga anda datñangö jemesoholñe anğorök.

⁴ Anğorökmö, Isonöh munñi ekñamgöra ösumñan kiñkingöba kaba suhumgöm wanğiba böröñan imbiñe gili geiga numbuñi yöhötüm neiga urusahöt auyohot.

⁵ Isonöh jeñi uba wahöta Jeikobkö anöm-moröurupñi engeka munñi qesim wanğiyök: “Ki denike yeñön göbuk kaze?” Qesim wanğiiga kewö melenñök: “Anutunöh kalem möriamñi qakñe nahönbörat ki welen azigi ni niñgiyök.”

⁶ Mewö melenñiga welen ambiyahötñi yetkôn nahönböraturupñiri yembuk dowe kanğota simin köla gölmenöh bamgöget.

⁷ Miangö andöñe Lea aka nahönböraturupñi yeñön mewöñanök dowe kanğota simin köla gölmenöh bamgöget. Teteköñe Josef aka Reizöl yetkôn dowe kanğota simin köla gölmenöh bamgöyohot.

⁸ Mewö aketka Isonöh kewö qesim wanğiyök: “Azi aka sömbup kambu pakpak könanöh miwikñaim enğizali, mi könanñi denöwögöra melaim enğinöñga kaze?” Mewö qesim wanğiiga kewö jiyök: “O azi kembuni, nöñön mi göhö jege ak-kömükömu miwikñaimangöra aka melaim enğial.”

⁹ Mewö jiyökmö, Isonöh keu kewö jiyök: “O muni, mi nöñgöreñ gwötpuk lök dopne ahöze. Miangöra mi ölöp toroqeba nangi buñaya aka ahöma.”

¹⁰ Mewö jiiga Jeikobnöh kewö jiyök: “Mewö qahö. Göñön neksihim aka ala ölöpñi ak niñginöñga göhö jemesoholgi ekiga Anutugö jemesoholñi ewö akza. Miangöra nöñön göhö jege ak-kömükömu miwikñaiçal ewö, mönö kalemni ki ölöp buña qem anğuman.

¹¹ Anutunöh kalem möriam kondel niñgiiga mala kotpiga yuai pakpak osimakzali, mi pakpak ölöp ahöm niñgiza. Mewögöra uruölöwak kalemni memba kageri, mi ölöp meman. “Mewö jiba kapan köla malöhanğöra Isonöh uruölöwak kalemñi mi buña qem anğuyök.

¹² Buña qem anğuba kewö jiyök: “Mönö ölöp mosöta köna anbin. Nöñön köiputñini akiga enjön ölöp nömbuk kagetka anbin.”

¹³ Mewö jiyökmö, Jeikobnöh kewö jiyök: “Azi kembuni, mötnöh. Nahönböraturupni yeñön ösumñini eretñi akze aka lama namñi aka bulmakau namñi moröñini juzu enğimakzei, nöñön mi köyan köl enğimakzal. Mewö aiga i köna anmegöra wehön mohotkö dop könöpuk enğuatangöbinak ewö, yeñön mönö ösumñini eriga kambu körek pakpak kömumbeak.

¹⁴ Mewögöra azi kembuni, gi ölöp mutuk anöñga welen azigi nöñön ösöñösöñ andöge guatangöba kamam. Sömbup enğuatangöbi wösöne mutuk anmei aka nahönböraturupni ösumñinañgö dop ösöñösöñ kaba mala mala bian Seir mire ketanñami göhöreñ kanğotpin.”

¹⁵ Mewö jiiga Isonöh kewö jiyök: “Mewö aiga nöñön ölöp aziurupni tosatñi enğomosötpiga göbuk ösöñ kame. “Mewö jiiga Jeikobnöh kewö qesiyök: “Gi mönö wuanöñgöra mewö akanak? O azi kembuni, ni göhö jege ak-kömükömu miwikñaiçiga lök dop köl niñgim teköza.”

16 Mewö jiiga Isonöŋ wehön mianğöreŋök lilingöba anda Seir miriŋe aŋgorök.

17 Jeikobnöŋ Sukot mire anda mianğöreŋ nanŋi miriŋi esiba sömbupurupŋi yeŋğora kounŋi kounŋi qeyök. Mewögöra miri gölme mianğö qetŋi Sukot (Koumkoum) qerakze. Mewö.

18 Jeikobnöŋ mewö Mesopotemia (Padan Aram) gölme mosörök. Mosöta kaba Keinan gölmegö taon qetŋi Sekem mianğöreŋ ölopŋanök ölüp kaŋgorök. Kaŋgota opo seri kounŋi taon kösutŋe gölme köröŋe möröreŋğöba kuŋguba tatket.

19 *Opo seri kounŋi gölme köröŋe kuŋguyöhi, yaŋön gölme kitipŋi mi Sekemgö iwiŋi Hamor yaŋğö nahönurupŋi yeŋğöreŋök silwö kötŋi 100 mianğön bohonŋi meyök.

20 Bohonŋi memba mianğöreŋ jöwöwöl alta kun memba qetŋi “El, Israelgö bem Anutuŋi,” mewö qerök. (El bem)

34

Sekem yeŋön Daina mem bölim waŋgiŋet.

1 Leanöŋ Jeikobkö böratŋi Daina meyöhi, yaŋön nalö kunöŋ Keinan ambi seram eŋgekŋamgöra anök.

2 Aniga gölme mianğö azi kembuŋi Hamor yaŋön Hiwi könagesögö azia malök. Yaŋğö nahönŋi Sekem yaŋön Daina eka mianğöreŋök eksihim möta öröba mem bölim waŋgiyök.

3 Sekemnöŋ wölbötŋi Jeikobkö böratŋi Dainagöra pöröraköiga jöhöba urukalemŋan jöpaköm waŋgiba kelök keuŋan jiba tutuhum waŋgiba malök.

4 Tutuhum waŋgiba mala iwiŋi Hamor kewö jii mörök: “Iwini, gi ölop ambi seram ki nöŋgö anöмна akŋapköra keu nup meman.”

5 Nalö mianğöreŋ Jeikobkö nahönurupŋi yeŋön gölme köröŋe anda mirigö sömbupurupŋini galöm köl eŋgiba malgetka Sekemnöŋ Daina mem böliiga iwiŋi Jeikobnöŋ böratŋaŋğö keu buzupŋi mi mewö mörök. Mi mörökmö, mi mösamböta nahönurupŋan mire kaŋgotmegöra keu bök mamböta tarök.

6 Mamböta tariga Sekemgö iwiŋi Hamor yaŋön keu nup memamgöra Jeikobköreŋ kayök.

7 Kaba tariga Jeikobkö nahönurupŋan gölme köröŋeyök kaŋgotket. Kaŋgota mianğöreŋök yuai asuhuyöhaŋğö kösohotŋi mi kewö mötket: Sekemnöŋ Jeikobkö böratŋi mem böliba Israel könagesö sutŋine silik gamuŋambuk ahök. Silik mi kude ahakŋaŋğö dop ahök. Mi möta uruŋinan kömbuhiiga wösöbirik möta urupik aket.

8 Urupik aketmö, Hamornöŋ kewö jii mötket: “Nahöni Sekemgö uruwölbötŋaŋğö sihimŋi mi eŋğö nenböratŋinaŋğöreŋ mösölatiba tatza. Mianğöra ölop jim tekögetka Dainanöŋ yaŋğö anömŋi akawak.

9 Ölop nembuk nenböratuŋuŋini utekutek aka aŋguin anda kaiga malbin. Mewö ölop qenaqena aka malbin.

10 Mewö aka ölop neŋğö sutnine tata malme. Nini gölmenini ki mi qahö aŋğön kölbinmö, iŋini ölop mianğöreŋ laŋ anda kaba sihimŋinaŋğö dop gölme kitipŋi kitipŋi buŋa qem aŋguba miriŋini memba nembuk aŋgumnep-qanğumnep aka malbin.”

11 Mewö jiiga Sekemnöŋ Dainagö iwinenurupŋi yeŋğora kewö jiyök: “Nöŋön eŋğö jeŋine ak-kömükömu miwikŋaimangö möta qesim eŋgizal. Mianğöra i me waigö qesim niŋgimei, nöŋön mi ölop eŋgimam.

* 33:19; Jos 24.32; Jon 4.5

¹² Ambi bohonji aka kalem memba kaba engimami, miangö qötöji mi ölop sihimñinañgö dop memba öngöme. I me waigö qesim niñgimei, nöñön mi ölop engimam. Keuni kötnji ki: Eñön mönö jim teköba nenböratñini niñgigetka nöngö anömna akña.”

¹³ Sekemnöñ nennini Daina mem böliyöhanğöra aka Jeikobkö nahönurupñi yeñön isimkakalek çakñe Sekem aka iwiñi Hamor melej etkiba

¹⁴ keu kewö jigetka mötket: “Azi kungö silenje Anutugö aiwesökñi qahö yandigeri, nini nenböratñini azi mewöñi ölop qahö wañgibin. Mewö ahinga gamumamusumnöñ çaknine öngöbapuk. Miangöra nini i wañgibingö osizin.

¹⁵ Inñini silik mohok-kun kewö aketka neñön urumohot akin: Mutuk Anutugö aiwesökñi mi aziurupñini pakpak engö silenine yandiget teköiga nini maljin ewö akñe ewö, mönö nenböratñini ölop engibin.

¹⁶ Mewö aketka ölop embuk nenböraturupñini utekutek aka anğuin anda kaiga malbin. Mewö ölop engö sutñine tata könagesö kambu mohok aka malbin.

¹⁷ Mewö malbinmö, Anutugö aiwesökñi silenine yandibingö urumohot qahö akñe ewö, nini mönö nenböratñini wañgita kungen anbin.”

¹⁸ Keu mewö jigetka Hamor aka nahönñi Sekem yetköñ keu mewöñi miangöra mörohotka dop kölöç.

¹⁹ Mewö mörohotka azi gwabö Sekemnöñ iwiñangö saiwaurupñi yeñgö sutñine tosatñi engonçita çetbuña ketani memba malök. Yañgö urusi-himñan Jeikobkö börtanğöra gwötpuk ahöyöhanğöra aka keu jigeri, mi wuatangömamgö eksekpeksek qahö aka nalö qahö çem körii öngöyök.

²⁰ Mewö aiga Hamor aka nahönñi Sekem yetköñ Sekem taongö azi alaurupñi yembuk keu jibingöra taongö nançu kösutñe totoko sombemñine anda kewö jiyohot:

²¹ “Azi kienñön nembuk ala ölopñi ak anğumakze. Miangöra nini ölop jim teköinga yeñön neñgö gölmenöñ tata lañ anda kaba miriñini memba nembuk anğumnep-qañgumnep aka malbin. Yeñön gölme kitipñi memegöra tiñi gwötpuk ahöza. Nini ölop yembuk nenböraturupñini utekutek aka anğuin anda kaiga malbin.

²² Nini silik mohok-kun kewö ahinga azi mienñön nembuk malbingö urumohot akñe: Anutugö aiwesökñi mi azi miengö silenine yandiget ahözawi, miangö dop mi mutuk körek neñgö silenine mewöyök yandiin teköiga nini ölop yembuk könagesö kambu mohot aka malbin.

²³ “Mewö ahinga yeñgöreñ mirigö sömbup kambuñini aka sukinap yuainini pakpak mi mönö nanini buñaya akñe. Miangöra keu jigeri, mi ölop möta imbi kölinga yeñön neñgö sutnine tatat dundumñini miwikñaiba malme.”

²⁴ Mewö jiyohotka taongö kiripo nançuñe kaba tokogeri, yeñön körek Hamor aka nahönñi Sekem yetkö keugöra urumohot aka jigetka Anutugö aiwesökñi mi Sekem taongö azi pakpak yeñgö silenine yandim teköget.

²⁵ Yandim tekögetka wehön 3:ñi aiga miangöreñ uziñinañgö sihimbölöñi mi tok toroçeba möta tatketka Jeikobkö nahönñi yahöt Simeon aka Liwai, Dainagö nenyahötñi yetköñ bingö souñiri ketani memba taon miangöreñ sañgabañga anda tihitñini qahö möta tatketka wölañ bim çeba azi pakpak çaurapañ enguyohotka kömum teköget.

²⁶ Hamor aka nahönñi Sekem mi mewöñanök bingö sou ketanañ etkuyohotka kömuyohot. Kömuyohotka Sekemgö mireyök nenniri Daina mi öröba eta wañgita anohot.

²⁷ Mewö ahotka Jeikobkö nahönurupñan Sekemnöñ nennini mem bölim wañgiyöhanğöra aka taonöñ kiñkiñgöba anda azi çamötniñi ençeka taongö sukinap yuaini kiom çeba yonçorö meget.

²⁸ Lama, meme, bulmakau aka donji kambuñi kambuñi aka öroyuainini pakpak taon uruñe aka gölme köröñe ahögeri, mi pakpak kalöpköba mem teköget.

²⁹ Sukinap yuainini pakpak otonda ambimoröurupñini körek enġuanġita miriñine yuainini tosatñi ahöyöhi, mi mönö köllohoba kiom qeba yonġorö memba tököba anget.

³⁰ Mewö aketka Jeikobnönñ Simeon aka Liwai kewö jii mörohot: “Injiri mewö ahotka kahasililin ketanġanġö keuñan mönö nönġö qakne öñġöiga malmam. Gölme kianġö tonji Keinan könagesö aka Periz könagesö yeñön mönö kazik möt niñgiba malme. Nönġö könagesöni nini awamdökñi maljin. Miangöra yeñön yarö aziurupñini tokom enġiba qetala bim yarö gil niñgime ewö, yeñön mönö ölop qaurapan nuñguba ni aka könagesöni ayuhum neñgime.”

³¹ Jeikobnönñ mewö jii mörohotmö, yetköñ keu kewö jiyohot: “Kunönñ neñġö nenini köna ketanji ambi tandök ak wañġiyöhi, nini mönö miangö likepñi melen enġiinga dop kölja. “Mewö.

35

Jeikobnönñ Betel ani Anutunönñ kötuatköm wañġiyök.

¹ Anutunönñ Jeikob keu kewö jii mörök: “Gi mönö wahöta Betel mire anda tatat dundumgi miwikñaiba miangörenñ Anutugöra jöwöwöl alta kun meman. Datki Isogöra ölonñ köla anönġa Anutunönñ nalö miangörenñ asuhum gihiyöhi, mönö yanġöra alta mi meman.”*

² Mewö jii möta Jeikobnönñ saiwanji aka ambazip pakpak yambuk malgeri, i kewö jim kutum enġiyök: “Lopionñ bem yuai tömbuñi sutñine ahözei, mi mönö qeköba gilget geiga köl köñjörat mem anġuba silenini sanġonnda opo malukuñini uteköme.

³ Ni köñjilin uruñe mala Anutu köuluköbiga melen niñġiyök aka denike denike anda kaba malali, yanön miangörenñ nömbuk mala korök. Miangöra inini mönö kagetka Betel mire anbin. Nönön miangörenñ Anutugöra jöwöwöl alta kun memam.”

⁴ Mewö jim kutum enġiiga böröñine lopionñ yuai tömbuñi pakpak ahögeri aka kezapñine jenjen möndögeri, mi qeköba köllohoba Jeikob wañġiget. Wañġigetka anda in ip kun Sekem mire kinöhi, miangö könañe gölmenönñ esim löm kölök.

⁵ Mewö aka wahöta angetka taonñi taonñi liliköba tatkeri, Anutunönñ könagesönñini miangö uruñini kuñguiga waekanjam möta elemñini eri Jeikob aka nahönurupñi mi qahö enġuatġöget.

⁶ Mewö anda mala Jeikobnönñ könagesönñi pakpak yambuk malgeri, mi enġuanġita Luz mire anġotket. Luz qetñi alañi Betel mi Keinan gölmenönñ ahöza.

⁷ Miangörenñ anġota Jeikobnönñ jöwöwöl alta kun meyök. Datñanġöra ölonñ köla anöhi, nalö miangörenñ Anutunönñ gölme miangörenñ asuhum wañġiyök. Miangöra Jeikobnönñ miri gölme miangö qetñi El-Betel qerök. (El-Betel Betelgö Bemji.)

⁸ Betel miangörenñ malgetka Rebekagö welen ambiñi Debora yanön kömuyök. Kömuiga Betel miri bapñe qerema ip kungö könañe löm kölget. Jingen qeta sahötkeranġöra aka qerema ip miangö qetñi Jingen sahötkö qeremañi mewö qetket.

⁹ Jeikobnönñ Mesopotemia (Padan Aram) gölmenöhök liliñgöba kaiga Anutunönñ kunbuk asuhum wañgiba kötuatköm wañġiyök.

* 35:1: Jen 28.11-17

¹⁰ Kötuetköm wangiba kewö jii mörök: “Göhö qetki Jeikob (tilipqilip azi) qerakzemö, mewö toroqeba kude qeta malme. Merak könahiba öngöba qetki mi Israel ahöma. “Kembunöy mewö jiba qetnji Israel qerök. (Israel Anutubuk aum-möriyohot.)”*

¹¹ Qetnji mewö qeta toroqeba Jeikob kewö jii mörök: “Nöñön Anutu kukösum pakpakö Tonji akzal. Gi ölop ahumsehip aknönnga gwölönarökurupki yenjö qötöñinan mönö qarim öngöma. Göhörenök könagesö gwötpuk aka könagesö kambunji kambunji asuhume. Gi kinji kinji yenjö bömön jalönjina akjan.

¹² Nöñön gölme Abraham aka Aisak buña qem etkiali, mi mönö göhö buñaya qemam aka göhö andöge gwölönarökurupki yenjö buñaya mewöyök akñapköra mi qemam.”*

¹³ Anutunöy keu mewö jii möriga Jeikob mosöta miri miangörenök öngöyök.

¹⁴ Anutunöy keunji jii möröhi, Jeikobnöy gölme miangören mötök köt kun memba wahöta kuñguba mi wain o nalukñan miriba miangö qakñe oil ipkö kelökñi mokoi geyök.

¹⁵ Anutunöy yambuk keu jiyöhi, Jeikobnöy miri gölme miangö qetnji Betel (Anutugö mirinji) qerök. Mewö.*

Reizölnöy kömuyök.

¹⁶ Miangö andöge Jeikobnöy saiwaurupñi enğuanğita Betel miri mosöta anda mala Efrata miri dopdowigetka Reizölgö morö meme nalöñan kam kuñguiga masö keta bölökñi qeyök.

¹⁷ Masö qönsihimñambuk ketanjan qeyöhi, nalö miangören anjö meme ambinöy keu kewö jii mörök: “O Reizöl, keñgötki kude mötnöy. Gi mönö nalö kewöñe mewöyök morö azia kun kunbuk meman.”

¹⁸ Mewö jiiga morö memba kömumangö aka timotñi mem kuñgui ahöba qetnji miangöra Benoni qerök. (Benoni sihimbölonangö nahöni) Mewö qerökmö, iwinjan qetnji Benjamin qerök. (Benjamin Simbawon nahöni)

¹⁹ Reizölnöy mewö kömuiga Efrata köna töwokñe Betlehem miangören löm kölget.

²⁰ Löm kölgetka Jeikobnöy mötök köt kun memba Reizölgö qaksirinöy kuñguyök. Reizölgören mötök köt mi nalö kewöñe mewöyök toroqeba kinja.

²¹ Mewö asuhuiga Israelnöy miri mi mosöta toroqeba anda mala Eder miri * köröpñangö likepñe anğota opo seri koumñi miangören mörörenğöba kuñguyök. Mewö.

²² *Jeikobkö saiwaurupñi yenön gölme miangören tata mala nahönñi mutukñi Ruben yanön iwinangö anömñi bohonñi qahö memeni Bilha yanğören anda mohotñe ahöyohotka iwinji Israelnöy miangö buzupñi mörök.

Jeikobkö nahönurupñi

1 Hist 2.1-2

²³ Jeikobkö nahönurupñi 12 mi kewö: Leagö nahönurupñi Ruben mi Jeikobkö nahönñi mutukñi. Yanğö andöge Simeon, Liwai, Juda, Isakar aka Sebulun.

²⁴ Reizölgö nahönyahötñi qetñiri Josef aka Benjamin.

²⁵ Bilha Reizölgö welen ambigö nahönyahötñi mi Dan aka Naftali.

²⁶ Zilpa Leagö welen ambigö nahönyahötñi mi Gad aka Aser. Jeikobkö nahönurupñi mewö mi Mesopotemia (Padan Aram) gölmenöy asuhuget. Mewö.

Aisaknöy kömuyök.

* **35:10:** Jen 32.28 * **35:12:** Jen 17.4-8 * **35:15:** Jen 28.18-19 * **35:21:** der lama kambugö jegalöm meme miri köröpñi * **35:22:** Jen 49.4

27 *Jeikobnönj anda mala Kiriya Arba (qetnji alañi Hebron) miangö kösutnje Mamre mire iwiñi Aisakörenj angorök. Asañi Abraham aka iwiñi Aisak yetkön mutuk gölme miangörenj kian aka malohot.

28 Iwiñi Aisakö malmal nalöñi mi yambu 180 aiga kömuyök.

29 Azi namñi aiga yambuñan öliiga nöñ qeba kömumba ambösakonurupñi yengörenj toroqeyök. Nahönyahötñi Iso (Esau) aka Jeikob yetkön qamötñi mi löm kölohot. Mewö.

36

Isogö gwölönarökurupñi

1 Hist 1.34-36

1 Iso qetnji alañi Edom yangö gwölönarökurupñi yengö qet areñini kewö:

2 Isonönj Keinan ambi karöbut engimeyöhi, miengö qetñini kewö: Ada mi Hit azi Elon yangö böratña, Oholibama mi Hiwi azi Zibeongö nahönñi Ana yangö böratña.*

3 Basemat mi Ismaelgö böratñi Nebaiotkö nenñi.*

4 Adanönj Isogö nahönñi Elifaz meiga Basematnönj yangö nahönñi Reuel meyök.

5 Oholibamanönj Jeus, Jalam aka Kora engömeyök. Isogö nahönurupñi mewö mi Keinan gölmenönj asuhuget.

6-7 Jeikob aka Iso yetkörenj mirigö sömbup kambuñi kambuñi gwötpuk ahögerañgöra gölme kiana malohori, miangön qahö dop kölök. Sukinapñiran keta bölökñi aiga mohotnje tata malbingö osiget. (6) Miangöra Isonönj anömurupñi, nahönböraturupñi aka könagesöurupñi pakpak yangö mire malgeri, mi enguanjirök. Mi enguanjita lama bulmakau kambuñi kambuñi, donki kamelurupñi aka sukinap yuaini pakpak Keinan gölmenönj mala miwikñaiyöhi, mi memba munñi Jeikob mosöta gölme kunönj anök.

8 Iso qetnji alañi Edom yangön mewö aka Seir gölme kundunambuk miangörenj anda malget.

9 Isonönj Seir gölme kundunambuk miangörenj mala Edom könagesö yengö bömön jalönjini ahöhi, yangö gwölönarökurupñi yengö qet areñini kewö:

10 Isogö nahönurupñi yengö qetñini kewö: Anömñi Ada yangö nahönñi qetnji Elifaz. Anömñi Basemat yangö nahönñi qetnji Reuel.

11 Elifazkö nahönurupñi 5 mi Teman, Omar, Zefo, Gatam aka Kenaz.

12 Isogö nahönñi Elifaz yangö anömñi bohonñi qahö memenji qetnji Timna yangön Elifazkö nahönñi Amalek meyök. Isogö anömñi Ada yangö isi aziurupñi mi mewö.

13 Reuelgö nahönurupñi 4 mi Nahat, Zera, Sama aka Miza. Isogö anömñi Basematkö isi aziurupñi mi mewö.

14 Isogö anömñi Oholibama yangön Isogö nahönurupñi karöbut engömeiga qetñini Jeus, Jalam aka Kora qetket. Oholibama mi Zibeongö nahönñi Ana yangö böratñi ahök.

15 Isogö gwölönarökurup kambuñi kambuñi yengö azi kembuñini mi kewö: Isogö nahönñi mutukñi Elifaz yangö nahönurupñi mi azi kembu qetñini Teman, Omar, Zefo, Kenaz,

16 Kora, Gatam aka Amalek. Elifazkö gwölönarökurupñi azi kembu Edom gölmenönj asuhuger, mi mewö. Mi Isogö anömñi Ada yangö isiurupñi aket.

17 Isogö nahönñi Reuel yangö nahönurupñi mi azi kembu qetñini kewö: Nahat, Zera, Sama aka Miza. Reuelgö gwölönarökurupñi azi kembu Edom

* 35:27: Jen 13.18 * 36:2: Jen 26.34 * 36:3: Jen 28.9

gölmenöŋ asuhugeri, mi mewö. Mi Isogö anömŋi Basemat yangö isiurupŋi aket.

¹⁸ Isogö anömŋi Oholibama yangö nahönurupŋi mi azi kembu qetŋini kewö: Jeus, Jalam aka Kora. Azi kembu mi Isogö anömŋi Oholibama, Anagö börtatŋi yangö nahönurupŋi aket.

¹⁹ Iso (Esau) qetŋi alaŋi Edom yangö nahönurupŋi mewö aka yengö könagesöurup mienjö azi kembuŋini mi mewö.

Seir könagesögö qet arenji

1 Hist 1.38-42

²⁰ Hor könagesögö azi Seir yangö nahönurupŋi mutuk Edom gölmenöŋ malgeri, yengö qetŋini kewö: Lotan, Sobal, Zibeon, Ana,

²¹ Dison, Ezer aka Disan. Seirgö nahönurupŋi mi mutuk Edom gölmenöŋ Hor könagesö yengö azi kembuŋina malgetka Isonöŋ könaŋgep kayök.

²² Lotangö nahönyahötŋi yahöt mi qetŋiri Hori aka Heman. Lotangö nenŋi qetŋi Timna.

²³ Sobalgö nahönurupŋi qetŋini kewö: Alwan, Manahat, Ebal, Sefo aka Onam.

²⁴ Zibeon yangö nahönyahötŋi yahöt qetŋiri Aia aka Ana. Anagö kösohotŋi kewö: Yanön iwiŋi Zibeongö donkiŋi gölme qararanökölölne galöm köl enŋii nene jaruba negetka miangöreŋ o jeŋi jeŋi könöpŋinambuk miwikŋaiyök.

²⁵ Anagö nahönbörtatyahötŋi yahöt mi nahönŋi Dison aka börtatŋi Oholibama.

²⁶ Disongö nahönurupŋi qetŋini kewö: Hemdan, Esban, Itran aka Keran.

²⁷ Ezergö nahönurupŋi qetŋini kewö: Bilhan, Zawan aka Akan.

²⁸ Disangö nahönyahötŋi yahöt qetŋiri Uz aka Aran.

²⁹ Hor könagesöŋi könagesöŋi yengö azi kembu-urupŋini yengö qetŋini mi Lotan, Sobal, Zibeon, Ana,

³⁰ Dison, Ezer aka Disan. Hor könagesöŋi könagesöŋi yengö azi kembu-urupŋini mi arenjanangö dop Seir gölmenöŋ mewö malget. Mewö.

Edom yengöreŋ kiŋ kembu arenji

1 Hist 1.43-54

³¹ Israel könagesö yengöreŋ kiŋ kembu kun qahö galöm köl enŋiiga qeljiŋe nalö miangöreŋ kiŋ kembu kewöŋan lök Edom gölme miangöreŋ galöm köl enŋiba malget:

³² Beorgö nahönŋi Bela yanön Edom yengö kiŋ kembuŋini ahök. Yangö sitiŋangö qetŋi Dinhaba.

³³ Belanöŋ kömuiga Bozra mirigö azi qetŋi Jobab, Zeragö nahönŋi yanön Belagö salupŋe kiŋ aka malök.

³⁴ Jobabnöŋ kömuiga Teman gölmegö azi qetŋi Husam yanön salupŋe kiŋ aka malök.

³⁵ Husamnöŋ kömuiga Hadad, Bedadkö nahönŋi yanön salupŋe kiŋ aka malök. Hadadnöŋ Moab gölmenöŋ anda Midian azi yembuk yarö gila enŋuba luhut alök. Yangö sitiŋangö qetŋi mi Awit.

³⁶ Hadadnöŋ kömuiga Masreka mirigö azi qetŋi Samla yanön salupŋe kiŋ aka malök.

³⁷ Samlanöŋ kömuiga Saul yanön salupŋe kiŋ aka malök. Yangö miriŋi Rehobot mi Yufreitis o töwatŋangö kösutŋe ahöyök.

³⁸ Saulnöŋ kömuiga Balhanan, Akborgö nahönŋi yanön Saulgö salupŋe kiŋ aka malök.

³⁹ Akborgö nahönŋi Balhanan kömuiga Hadarnöŋ salupŋe kiŋ aka malök. Yangö sitiŋangö qetŋi mi Pau. Anömŋangö qetŋi Mehetabel. I Matredgö börtatŋi aka Mezahabgö isiŋi malök.

⁴⁰ Isogö gwölönarökurupñi yengö azi kembu qet areni mi isikñinañgö dop aka miri gölmeninañgö dop kewö ahök: Timna, Alwa, Jetet,

⁴¹ Oholibama, Ela, Pinon,

⁴² Kenaz, Teman, Mibzar,

⁴³ Magdiel aka Iram. Azi mi Edom könagesögö azi kembu-urupñina malgetka qetñinañgö dop miri gölmeninañgö qetñini qetket. Edom qetñi alañi Iso yañön mutuk gölme memba tata mala Edom könagesögö bömön jalöñi ahök. Mewö.

37

Josef aka darumunurupñi

¹ Aisakñöñ Keinan gölmenöñ kian aka maliga nahönñi Jeikobñöñ miangören toroqeba malök.

² Jeikobkö gwölönarökurupñi mienögö kösohotñini kewö: Josefnöñ azi gwabö yambuñi 17 aiga darumunurupñi, iwiñangö anömyahötñi bohonñiri qahö memenji Bilha aka Zilpa yetkö nahönurupñi yembuk lama aka meme (nonin) kambuñi kambuñi galöm köl enggiba malget. Mewö mala darumunurupñan silik akeri, miangö kösohotñi bölöñi bölöñi mi iwiñangö jii möta malök.

³ Jeikobñöñ azi namñi aiga nahönñi Josefnöñ asuhuyöhi, miangöra iwiñan i nahönurupñi tosatñi pakpak engonggita uruñan jöpaköm wanggiba malök. Nalö kunöñ maluku köröpñi ekjeritñambuk böröñi köröpñi mi memba Josef wangiyök.

⁴ Iwiñan i darumunurupñi pakpak engonggita uruñan jöpaköm wanggiba malöhi, yangö darumunurupñan mi eka könahiba kazik ak wanggiba yambuk ala-alagö keuñi kun qahö eraum-möta malget.

⁵ Sunjem kunöñ Josefnöñ gaun kun eka miangö kösohotñi mi darumunurupñi jiiga mötket. Mi mötketka uruñinan öngöiga kazik gwötpuk ak wanggiba malget.

⁶ Kösohotñi mi kewö jiiga mötket: “Mötket, ni gaun kun ekzali, mi kewö:

⁷ Nini nupnöñ mala wit padi böranini jöhöbingö tandök akzin. Mewö ahinga nöngörenj wit padi börani miangön wahöta köngep kiniga engörenj böran mienön mönö nöngörenj böran liliköba sökoba kinje.”

⁸ Mewö jiiga möta darumunurupñan Josefköra kewö jiget: “Gi nengörenj kin kembuya akanak me? Gi ölna galöm köl nengimangöra mötzan me?” Josefnöñ gaunñi eka miangö kösohotñi jiyöhi, miangöra yengö uruñinan kunbuk toroqeba öngöiga kazik keta bölökñi möt wanggiba malget.

⁹ Miangö andöñe gaun kun kunbuk eka miangö kösohotñi darumunurupñi kewö jiiga mötket: “Nöñön gaun kun ekiga miangörenj wehön, köiñ aka sengelau 11 mienön nöngöra sipköget.”

¹⁰ Kösohotñi mi iwiñi aka darumunurupñi jii mötketka iwiñan tembula kewö jim wangiyök: “Gi gaun tandökñi mewöñi mi denöwögöra ekzane? Ni, namgi aka darumunurupki neñön mönö denöwö aka göhörenj kaba jemesoholge simin köla gölmenöñ bamgöbinak?”

¹¹ *Mewö asuhuiga darumunurupñan uruñinan mututqutut (jelös) möt wanggiba malgetmö, iwiñan keu mi uru könömñe ali ahöiga mötmöriba malök. Mewö.

Josef bohonñi memba wanggita Ijpt gölmenöñ anget.

¹² Nalö kunöñ Josefkö darumunurupñi yenön iwiñinañgörenj lama kambu-urupñi galöm köl enggibingöra Sekem miri kösutñe anda malget.

* 37:11: Apo 7.9

¹³ Mianğöreñ malgetka Israelnöñ Josef kewö jii mörök: “Nahöni, göhö darumunurupkan Sekem kösutñe lama kambunini galöm köl engiba maljei, mi mötzan. Ölöp kanöñga melaim gihibi yengöreñ anman. “Mewö jiiga möta “Ölöp anmam,” jiyök.

¹⁴ Jiiga kewö jii mörök: “Gi mönö anda darumunurupki aka lama kambunini engeka denöwö maljei, mianğö keu kösohotñi mi memba lilingöba kaba jinöñga mötmam. “Mewö jii möri Hebron örueñeyök (ruerueñeyök) melaim wañgiiga anda mala Sekem gölmenöñ anğorök.

¹⁵ Sekem gölmenöñ anğota gölme köröñe köna jaruba lañ anda maliga azi kunñan miwikñaiba eka kewö qesim wañgiyök: “Gi wani yuaia jaruba maljan?”

¹⁶ Qesim wañgiiga kewö meleşnök: “Ni darumunurupni yengöra jaruzal. Yeñön denikeangöreñ mala lamaurupñini galöm köl engizei, mi ölöp jinöñga mötmam.”

¹⁷ Mewö meleşniga kewö jiyök: “Yeñön lök gölme ki mosöta anget. Dotan mire anbingöra jigetka möral. “Mewö jiiga möta darumunurupñi yengö könañine enğuatangöba mala Dotan miri kösutñe anda miwikñaim engiyök.

¹⁸ Miwikñaim engiba kösutñine qahö anğorökmö, tikep endu kaiga darumunñan i eka tokoba Josef qebingö anğönañ alget.

¹⁹ Anğönañ ala nanñinök kewö eraum-mötket: “Eket, gaun ehek azi mianñön mönö endu kaza.

²⁰ Ayop, mönö kagetka anda qein kömuiga qamötñi o lömñi kunöñ gilin geiga kewö jibin: ‘Sömbup kalñan mönö i qei kömuyök.’ Gaunñangö ölnan denöwö asuhumawi, mi mönö mianğö andöñe ekin.”

²¹ Mewö eraum-mötketka Rubenöñ mi möta Josef böröñineyök meköba malmalñi jöhömangöra möta kewö jiyök: “I mönö kude qeinga kömuma.”

²² Toroqeba kewö jii mötket: “Sepñi mönö kude mokome. Gölme qararañkölkölñe o löm ki kinjawi, i ölöp mianğöreñ gilgetka gemapmö, böröñinan mönö yañgö sileñe kude misiriba qeme. “Rubenöñ Josef böröñineyök meköba anğön köla wañgita iwiñangöreñ lilingöba anbitköra möta keu mewö jiyök.

²³ Mewö jii möta kingetka Josefnöñ darumunurupñi yengöreñ kañgorök. Kañgoriga malukuñi köröpñi ekjeritñambuk böröñi köröpñi wöta kayöhi, mi lañ öröba munjurata qeköget.

²⁴ Mi qeköba munñini qeraköba memba anda o lömnöñ gilgetka geyök. O löm mi oñi qahöpmö, gwamönña kinök.

²⁵ Mewö aka nene nemingö eta tatket. Eta tata jeñini uget aniga Ismael könagesögö kölköl-örörö azi tosatñan Gilead miri mosöta kamelñini totnöñ totnöñ al engiba awatañ kagetka engeket. Yeñön kamel qakñine gipmi bakötök, sile mirimirigö kelökñi aka marasin ip tokuñi qetñi mör gipit mi algetka bisiba Ijipt kantrinöñ anbingöra kaget.

²⁶ Mewö engeka Judanöñ darumunurupñi kewö jii mötket: “Nini munini qein kömuiga sepñangö keuñi köyatiba asambötpin ewö, mianñön mönö denöwö bauköm neñgibawak?”

²⁷ Yañön nanini munini aka nanini sepkitipnini akzawañgöra mönö böröñinan sileñe kude misiriba qebinmö, ölöp kagetka anda Ismael azi mienñön i söñgöröñi memegöra engibin. “Mewö jiiga darumunurupñan mi möta urumohot aka imbi kölget.

²⁸ *Mewö aketka Midian gölmegö Ismael könagesögö kölköl-örörö azi mienñön kaba kañgota enğonğitpingö aket. Mewö aketka munñini Josef mi o

* 37:28: Apo 7.9

lömnöhök öröget koriga silwö kötni 20:nöñ söngöröñi memegöra al wañgiget. Al wañgigetka Ismael azi mienön i bohonñi memba wañgita Ijipt kantrinön anget.

²⁹ Angetka Rubenön kungenök lilingöba o lömnön kaiga Josefnön miangören kunbuk qahö kiniga eka wösöñi juliga wösöbirikñi kondela malukuñi munjurarök.

³⁰ Malukuñi munjurata munurupñi yengören lilingöba kaba kewö jiyök: “Morö gwabönön mönö denike ayapköba sohoza? Yei! Miangö keuñan nöngö qakne öngöiga mönö denöwö akilenak?”

³¹ Mewö jiiga meme (nonin) aziñi kun memba qeget kömuiga Josefkören malukuñi memba meme miangö sepnan kundungöba membiliget.

³² Membiliba malukuñi köröpñi ekjeritñambuk böröñi köröpñi mi memba mire anda iwiñi kondela kewö jiget: “Nini ki miwikñaizin. Mi nahöngi Josefköreña me qahö, mi ölop ek kewötman.”

³³ Mewö jigetka ek kewöta kewö jiyök: “Ki mi nahönañgören malukuya. Sömbup kalñi kunñan mönö yaijapalelen qei kömuiga gwahörök. Ölna, Josef mi yöhöqöhötiiga boromborom ahök.”

³⁴ Mewö jiba amburereñ aka wösöbirikñi kondela malukuñi munjurata sileñi gölmenön membiliba nahönañgö nalö köröpñi jinñen köla sahöta malök.

³⁵ Mewö maliga nahönböraturupñi pakpak yeñon kaba urukölalep mem wañgibingö aketmö, yañon mi qetala tököba urukondumök möta kewö jiyök: “Qahö! Nöñon mönö jinñen köla sahöta mala kömumba uñem mire nahönañgören gemam. “Mewö jiba Josefköra sahöta malök.

³⁶ Mewö maliga nalö miangören Midian gölmegö kölköl-örörö azi yeñon Josef wañgita Ijipt kantrinön angota bohonñi memegöra algetka Farao kingö jembonñi kun qetñi Potifar, kingö malmalñangö sikiriti yengö suahö galömñina malöhi, yañon i söngöröñi meiga welenqeqeñi omanñi ahök. Mewö.

38

Juda aka Tamar

¹ Nalö miangören Judanön darumunurupñi engömosöta yagömanñe Adulam mire geba azi kun qetñi Hira yambuk tata malök.

² Miangören mala Judanön Keinan azi kun qetñi Sua yañgö böratñi eka anömña meiga mohotñe ahöyohot.

³ Mohotñe ahöyohotka anömñan gölöm ala morö nahön memba qetñi Er qerök.

⁴ Mewö qeta kunbuk gölöm ala morö nahön kun memba qetñi Onan qerök.

⁵ Miangö bapñe dumñe kunbuk morö nahön kun memba yañgö qetñi Sela qerök. Morö nahön mi Kezib mire mala miangören meyök.

⁶ Mewö malgetka Judanön nahönñi mutukñi Er yañgöra ambi kun qetñi Tamar wañgiiga anömña ahök.

⁷ Anömña ahökmö, Judagö nahönñi mutukñi Er yañon Kembugö jeñe bölöñi aka memba malöhi, miangöra Kembunön jim teköm wañgiiga kömuyök.

⁸ Kömuiga Judanön nahönñi Onangöra kewö jiyök: “Gi ölop datkahö malöñi memba qambötñi akzanañgö köna keuñi wuatangöba yambuk ahöba datkahöra gwölönarök qiwikñaiman.”

⁹ Mewö jiyökmö, Onanön gwölönarök mi yañgö buñaya qahö akñawi, mewö möta silik kewö aka malök: Datñangöra gwölönarök qiwikñaibapüköra yañgö anöm malöñambuk ahöba malöhi, nalö miangören nalö dop morö qiwiqi-wikñaigö sile onñi mi öne gölmenön qokoba malök.

¹⁰ Silik mewö aka malöhi, mi Kembangö jeñe bölöñi ahök. Mianğöra Kem-bunöñ i mewöyök jim teköm wañgiiga kömuyök.

¹¹ Kömuiga Judanöñ iranñi Tamargöra kewö jiyök: “Gi mönö iwigahö mire lilingöba anda malöya mala malnöñga nahöni Selanöñ qariba ketanji akagun gi gömima. “Keñgötñi kewö mötmöriba mewö jiyök: Selagö datyahötñan kömuyohotka yañön mianğö dop mala mewöyök kömumbapuk. Mewö mötmöriba Tamargöra jiiga iwiñanğö mire lilingöba anda mianğöreñ tata malök.

¹² Mianğöreñ tata maliga nalö köröpñi teköiga Suagö böratñi, Judagö anömñi yañön kömuyök. Kömuiga jingey köla sahöta mali teköiga Judanöñ miri gölme qetñi Timna mianğöreñ azi tosatñan nanñi lamaaurupñi yeñgö jupñini mitigeri, i engekñamgöra öñgöyök. Adulam mirigö azi alañi Hira yambuk mohotñe mianğöreñ öñgöyohot.

¹³ Öñgöyohotka Tamargöra buzup kewö jigetka mörök: “Mötnöñ, göhö azi irangan mönö lamaaurupñi yeñgö jupñini mitimamgöra aka Timna miri gölmenöñ anja.”

¹⁴ Mewö jigetka mörök. Judagö nahönñi Selanöñ lök qariba ketanji aiga töndup i anömñi akñapköra qahö wañgiyök. Mianğöra Tamarnöñ malö malmamgö malukuñi qeköba nörop kawöseññöñ nörop jeñi esuhuba turum añguyök. Mewö aka Timna anangö könanöñ anda taon qetñi Enaim mianğöreñ añgota kiripo nanğu kösutñe tarök.

¹⁵ Tariga Judanöñ kaba eka jemesoholñi esuhuyöhanğöra i qahö ek kutuba mi köna ketanji ambia mewö mötmöriyök.

¹⁶ Iranña taröhi, mi qahö möt kutuyöhanğöra aka köna jitñe yañgöreñ anda kewö jiyök: “Ölop kanöñga nöñön göbuk ahöbit. “Mewö jiiga möta kewö qesiyök: “Nömbuk ahömananğö töwanji mönö wani yuaia niñgiman?”

¹⁷ Mewö qesiiga kewö jiyök: “Ni nani kambunöhök meme moröñi gwaböñi kun albi göhöreñ kama. “Mewö jiiga kewö qesiyök: “Mi mutuk qahö kaba kañgoriga keugahö ölni akñawanğö yuai kun mi niñgiman me qahö?”

¹⁸ Mewö qesiiga kewö jiyök: “Nöñgö keunanğö ölni akñawanğö yuai kun mi mönö wani yuaia gihibileñak?” Mewö jiiga kewö melenñök: “Köpep supapkan qetki mekötahömakzani, mi, mianğö kösö wötñi aka öropki böroğan memba kinjani, mönö mia niñgiman. “Mewö melenñiga yuai mi wañgiba yambuk ahöiga gölöm alök.

¹⁹ Yambuk ahöba wahöta miriñe anda nörop kawöseñi lulunđa qeköba malö malmamgö malukuñi mi kunbuk löñgöta malök.

²⁰ Mewö maliga Judanöñ nalö kunöñ Adulam mirigö azi alañi Hira melaiba kewö jiyök: “Gi mönö meme (noniñ) moröñi gwaböñi memba anda ambi mi wañginöñga nöñgö keunanğö ölni akñawanğö yuaiñi mi melen gihiga memba kaman. “Nup mewö memapköra Hira melaiiga anökmö, Hiranöñ ambi mi qahö miwikñaiyök.

²¹ Qahö miwikñaiiba Enaim azi tosatñi kewö qesim enğiba jiyök: “Jöwöwöl jikegö köna ketanji ambinöñ Enaim kianğöreñ köna görañe taröhi, mi denike?” Mewö jiiga kewö melenđa jiget: “Ambi mewöñi kun mi kianğöreñ qahö malök.”

²² Mewö jigetka Hiranöñ öne lilingöba Judagöreñ kaba jiyök: “Nöñön anda ambi mi qahö ehal. Miri mianğö tonji yeñön mewöyök keu kewö jigetka möral: ‘Jöwöwöl jikegö köna ketanji ambiñi kun mi kianğöreñ qahö malök.’ ”

²³ Mewö jiiga Judanöñ kewö jiyök: “O alani, muat! Yañön yuai mi ölop memba malma. Yuai kun akirak, mönö gön köl netkigetka gamunöñ turum

netkibapuk. Nöñön meme moröñi gwaböñi ki mi ölop albiga anökmö, göñön ambi mi qahö miwikñainöñ.”

²⁴ Mewö jiiga köiñ karöbutkö dop teköiga tosatñan Judagöra buzup keu kewö jigetka mörök: “Göhö irangi Tamarnöñ mönö serowilin aka gölöm ala malja. “Mewö jigetka Judanöñ mi möta Mosesgö köna keugö dop jimkutukutu kewö alök: “I mönö wañgita örörahöba könöpnöñ gilgetka geba jema.”

²⁵ I wañgita örörahöba angetka iranñan Judagöra keu kewö aliga anök: “O irani, yuai kiengö toñan mönö nömeiga gölöm ala maljal. Miangöra köpöp supap ki, miangö kösö wötñi aka öröp ki mönö ek kewöta toni miwikñaiman.”

²⁶ Keu mewö ali aniga möta nanñi yuaiñi mi ek kewöta kewö jiyök: “Yañön keu mi ölña jiza. Nöñön i nahöni Selagö anömñi akñapköra qahö wañgial. Miangöra yañön mönö ni nonñgita ambi diñdiñi aka keu mi jiza. “Mewö jiba ambi miambuk kunbuk qahö ahöyök.

²⁷ Könañgep morö memangö nalöñan kam kuñguiga morö gösöñangö uruñe siwisiwi azi moröñi yahöt tarohot.

²⁸ Tarohotka morö memangö aiga kunöñ böröñi suluiga erök. Eriga anjö meme ambinöñ mi eka möt kösö pisikñi pötpöt memba böröñe jöhöba kewö jiyök: “Yañön mutuk asuhuza.”

²⁹ Mewö jiyökmö, morö mianjön böröñi kunbuk öroi öngöiga alañan mutuk asuhuyök. Yañön asuhuiga anjö meme ambinöñ kewö jiyök: “O mönö mewö aka könagi munjurata asuhuzan. “Mewö jiiga qetñi Perez qetket. (Perez Könañi munjuratza.)

³⁰ Miangö andöñe alañangö böröñe möt kösö pisikñi pötpöt ahöyöhi, yañön asuhuiga qetñi Zera qetket. (Zera pisikñi pötpöt) Mewö.

39

Josef aka Potifargö anömñi

¹ Nalö sutñe miangören Ismael könagesögö kölköl-örörö azi yeñön Josef wañgita Ijpt kantrinöñ añgota bohonñi memegöra alget. Algetka Ijpt azi kun qetñi Potifar, Farao kiñgö jembonñi kun aka malmalñangö sikiriti yeñgö suahö galömñina malöhi, yañön i söñgöröñi meiga welenqeqeñi omani ahök.

² Mewö aka maliga Kembunöñ Josefpuk kiniga yuai pakpak aka memba malöhi, miangören mönö töhötmöriam miwikñaiyök. Yañön toni Ijpt azi yangö mire malök.*

³ Mewö maliga Kembunöñ Josefpuk kinda kondot wañgiiga yuai pakpak böröñan memba malöhi, mianjön mönö töhötmöriamñambuk ahök. Mewö aiga toñan mi ehök.

⁴ Toñan mi ehi ölop dop köliga yangö jeñe eksihim miwikñaiiga jiiga nanñi malmalñangö galömñi ahök. Potifarnöñ Josef kuñgum wañgiiga miriñangö yuai pakpak galöm köliga sukinap buñani pakpak yangö böröñe aliga köyan köla malök.

⁵ Miriñangö yuaiñi aka sukinap buñani mi pakpak Josefnöñ galöm kölmaköra böröñe ala malöhi, Kembunöñ nalö miangörenök könahiba Ijpt azi miangö miri yuaiñi mi Josefköra aka kötuetköba malök. Potifargö miriñe aka nupñe öroyuaiñi pakpak ahöyöhi, mi mönö kötümötuet qakñe ahöyök.

⁶ Mewö ahöiga Potifarnöñ öroyuaiñi ahöm wañgiyöhi, mi pakpak Josefkö böröñe al teköba kinda nanñak i me wai miangö waimanjatñi kun qahö mörök. Yañön nene nemangöra mohot mötkurumkurum aka malök. Josefkö silenji öndölböndöl qariiga kaisongolomñan eksihimñambuk ahöiga malök.

* 39:2: Apo 7.9

⁷ Mewö maliga nalö tosatñi teköiga Potifargö anömñan Josef eka eksihimñi möta kewö jiyök: “Gi mönö kanönga nömbuk ahöbit.”

⁸ Mewö jiyökmö, yañön mi tököba toñañgö anömñi kewö jii mörök: “Qahö! Mötnöñ, toni nannak miriñe öröyuai ahözawañgö waimanjatñi qahö ahakzapmö, sukinap buñañi pakpak mi mönö nöñön galöm köla malmamgöra nöñgö böröne al teköiga ahöza.

⁹ Mewö ahöiga miri kianañgö uruñe i aka ni netkö kukösumniran mönö öröröñ ahöza. Göñön anömñi akzanañgöra gi añañön köl niñgiyökmö, yuai tosatñi kun mi nöñgöra qahö añañön kölök. Mianañgöra nöñön denöwögöra aka ahakmeme bölöñi kötökñi mewöñi mi aka mianañön Anutu qetala siñgisöndok akileñak?”

¹⁰ Mewö jii möta keu mewöñi mi wehön dop Josefköra jiba malökmö, yañön töndup mi qetala mala yañgö ahöahö dumnöñ anda yambuk ahöbitkö imbi qahö kölök. Mewö yambuk mohotñe malbitkö mewöyök tököyök.

¹¹ Mewö tököba maliga wehön kunöñ mirigö welenqequeurupñi yeñgöreñök kunñan miri uruñe qahö maliga Josefnöñ nupñi jijiñi memamgöra miri uruñe öngöyök.

¹² Öngöiga ambi mianañön Josefkö malukuñe qelanjiba memba kewö jiyök: “Gi mönö kanönga nömbuk ahöbit. “Mewö jiyökmö, Josefnöñ malukuñi mi yañgö böröñe mosöta ölöñ köla diñdingöba sombemnöñ silene erök.

¹³ Malukuñi yañgö böröñe mosöta ölöñ köla sombemnöñ eröhi, ambi mianañön mi ehök.

¹⁴ Mi eka mirigö welenqequeurupñi engehöli kagetka yeñgöra kewö jiyök: “Mötket, apnan Hibru azi mi wañgita mirinine kayöhi, yañön mönö göngönahit ak neñgiba malja. Yañön nömbuk ahöbitköra nöñgöreñ kotzapmö, nöñön qet gigilahözal.

¹⁵ Qet gigilahöbiga möta malukuñi nöñgö wösöne mosöta ölöñ köla diñdingöba silene geza.”

¹⁶ Mewö jiba Josefkö malukuñi kösutñe ali ahöi Josefkö toñan lilingöba kamapkö mamböta tari kayök.

¹⁷ Kaiga kösohotñi mewöyöhök jii möriga kewö jiyök: “Hibru welenqege azi mi wañgitnönga neñgöreñ kayöhi, yañön mönö nömbuk göngönahit akñamgöra nöñgöreñ kotza.

¹⁸ Kotzapmö, nöñön qet gigilahöbiga möta malukuñi nöñgö wösöne mosöta ölöñ köla diñdingöba silene geza.”

¹⁹ Mewö jiiga Josefkö toñan anömñan kösohot mewö jii möriga kewö jiyök: “Göhö welenqegegan mönö mewö ak niñgiza. “Mewö jii möta irimñi sehöliiga uruñi könöp jeyök.

²⁰ Uruñi könöp jeiga jiiga Josef memba Farao kiñgö kösö mirinöñ azi galöm köl enñgiba malgeri, mönö kösö miri mianañgöreñ alget geba ahöba malök.

²¹ Josefnöñ kösö miri mianañgöreñ malökmö, Kembunöñ Josefpuk kinda kötuatköba ak kömum wañgiba mali kösö mirigö galöm bohonñan mi eka yañgöra eksihim mörök.*

²² Eksihim mörohangañgöra azi pakpak kösö mire tatkeri, mi Josefnöñ galöm köl enñgimapköra yañgö böröñe al enñgiyök. Yuai pakpak mianañgöreñ aka memba malgeri, mi Josefnöñ jim kutum enñgiyöhangö dop aka memba malget.

²³ Kembunöñ Josefpuk kinda kötuatköm wañgiba kondoriga yuai pakpak aka memba malöhi, mi töhötmöriamñambuk asuhaba ahöyök. Mianañgöra kösö mirigö galöm bohonñan Josefnöñ yuai pakpak denöwö galöm köla jim kutum enñgiba malöhi, mianañgö waimanjatñi kun qahöpmahöp möta malök. Mewö.

* 39:21: Apo 7.9

40

Josefnöḡ azi yahöt yetkö gaunḡiraḡḡö könaḡi jiyök.

¹ Nalö tosatḡi teköiga Ijptkö kiḡ kembuḡaḡḡö wain o qambigö galöḡḡi aka bered ohohogö galöḡḡi yetköḡ ketanḡamḡiri Ijptkö kiḡi qetala köna siḡḡiyohot.

² Mewö ahotka Farao kiḡḡnöh jembonḡi yahöt, wain o qambigö galöḡḡi bohonḡi aka bered ohohogö galöḡḡi bohonḡi yetköra aka irimḡi sehohiyök.

³ Irimḡi sehohiiga jiiga etkuḡaḡḡita kiḡḡö malmalḡaḡḡö sikiriti yeḡḡö suahö galöḡḡinaḡḡö kösö mire yaḡḡö böröḡe al etkigetka geyohot. Josefnöḡ kösö miri miḡḡöḡeḡḡök malök.

⁴ Sikiriti yeḡḡö suahö galöḡḡinan Josef jim kutum waḡḡiiga i welen qem etkiba malök. Mewö maliga nalö tosatḡi toroqeba kösö mire malget.

⁵ Mewö mala malgetka Ijpt kiḡḡö wain o qambigö galöḡḡi aka bered ohohogö galöḡḡi yetköḡ suḡḡem mohot miḡḡöḡeḡḡök gaunḡiri inannök inannök ehot. Gaunḡiraḡḡö könaḡi mi inannök inannök.

⁶ Mi ehotka Josefnöḡ söḡanöhök yetköreḡ öḡḡöba etkehi urueret aka bosoliba tarohot.

⁷ Mewö tarohotka Farao kiḡḡö jembon yahötḡi yetköḡ Josefkö ketanḡaḡḡaḡḡö kösö mire yambuk mohotḡe tarohori, i kewö qesim etkiyök: “Inḡiri merak denöwögöra jemesoholḡiri wösöbirikjeje uba tatzahot?”

⁸ Qesim etkiiga kewö melenḡa jiyohot: “Niri nannök nannök gauniri ekzitmö, mietkö könaḡiri mi daḡḡön jii mötḡpirak?” Mewö jiyohotka Josefnöḡ kewö jiyök: “Anutunöh mönö gaunḡö könaḡini jiji Tonḡi akzapmö, ölöḡ töndup gaunḡiri jiyohotka mötmam.”

⁹ Mewö jiiga wain o qambigö galöḡ bohonḡan gaunḡi ehöhi, miḡḡö kösohotḡi mi Josef kewö jii mörök: “Nöhön gauni uruḡe wain ip kun mi nöḡḡö wösöne kiniga ekzal.

¹⁰ Wain ipkö böröhḡi karöbut kingetka könahiba söḡḡi jula kota kuḡḡuzawi, nalö miḡḡöḡeḡḡök juranḡi kota tuliga kaḡḡeḡi kaḡḡeḡi asuhuba öligetka ölnḡaḡḡö köḡḡi pisihize.

¹¹ Pisihigetka ni Farao kiḡḡö qambinḡi mi böröḡan memba kinda ölnḡaḡḡö köḡḡi memba mözöhölbiga onḡi Farao kiḡḡö qambinöhḡ geiga kiḡḡö böröḡe aljal.”

¹² Mewö jii möta Josefnöḡ kewö jii mörök: “Gaunḡahö könaḡi mi kewö: Ip böröhḡi karöbut mi wehön karöbutkö söḡsöpḡḡi akza.

¹³ Wehön karöbut teköiga Farao kiḡḡnöh göhö nöropki mem wahöta pösat gihiba kunbuk nupke al gihima. Gi mutuk yaḡḡö wain o qambigö galöḡḡa mala qambi Farao kiḡḡö böröḡe ala malnöḡi, miḡḡö dop mönö kunbuk aka malman.

¹⁴ Mewö malmanmö, sösoḡḡai qakḡe malmani, nalö miḡḡöḡeḡ mönö ni mötmöriba ak kömum niḡḡiba nöḡḡö kösohotni Farao kiḡḡöra jinöhḡa mötma. Mewö aka bauköm niḡḡinöhḡa kösö miri ki mosöta etḡpilenḡak.

¹⁵ Mötnöh, ni Hibru könagesögö gölmenöhök ösum-mumu qakḡe yoḡḡorö noanḡitketka kaba kiḡḡöḡeḡ mewöyök yuai bölöḡi kun kösö miri kiḡḡö dutḡe al niḡḡigeranḡö dop mi qahö ahal.”

¹⁶ Josefnöḡ mewö jii möriḡa bered ohohogö galöḡ bohonḡan alaḡaḡḡö gaunḡaḡḡö könaḡi ölöḡḡi jim asariyöhi, mi eka kewö jii mörök: “Nöhön mewöyök gauni ekiga miḡḡöḡeḡ bered könde karöbut nöḡḡö nöropne kunduta kazal.

¹⁷ Kaba könde qakḡe eu tatzawi, miḡḡöḡeḡ bered yuai nahöḡḡinambuk könaḡi könaḡi Farao kiḡḡöra ahözapmö, neiḡi neiḡi yeḡḡön kaḡḡota könde kunduta kazali, miḡḡöḡeḡḡök mi nem teköze.”

¹⁸ Mewö jii möta Josefnöy kewö melenja jiyök: “Gaungahö könañi mi kewö: Könde karöbut mi wehön karöbutkö söpsöpñi akza.

¹⁹ Wehön karöbut teköiga Farao kiñnöy jiiga liñgipnöy geriba qetohom gihiba nöropki aka qamötki mem wahöta ipnöy möndögetka neiñi neiñi yeñön kañgota busugi nem teköme.”

²⁰ Mewö melenja jiiga wehön karöbut teköiga Farao kiñgö ahuahü nalöñan kam kuñguiga jembonurupñi pakpak i nene lömbuan ohoba engiyök. Mi ohoba engiba wain o qambigö galöm bohonñi aka bered ohohogö galöm bohonñi yetkö nöropñiri mi jembonurupñi yeñgö jeñine memba wahörök.

²¹ Wain o qambigö galömñan mutuk nupñi memba malöhi, mi toroqeba memapköra kuñgum wañgiiga dumñe kunbuk qambi mi Farao kiñgö böröñe ala malök.

²² Mewö malökmö, kiñnöy bered ohohogö galöm bohonñangö keuñi jim teköiga Josefnöy gaunñirangö könañi jii mörohorangö dop i liñgipnöy eriba qetohoba nöropñi aka qamötki mi mem wahöta möndöget.

²³ Miangö andöñe wain o qambigö galöm bohonñan Josef qahö mötmörim wañgiyökmö, i ölum qeiga lañ malök. Mewö.

41

Kiñnöy gaunñi ehiga Josefnöy könañiri jim asariyök.

¹ Yambu yahöt teköiga Farao kiñnöy gaun kun kewö ehök: Yañön Nail o töwatñangö görañe kiniga

² bulmakau dömnji 7 ölop sorokñi kelök busuñinambuk mi o töwatñi miangöreñök kota jejepözan sutñine kinda tembam keuqañ neget.

³ Miengö andöñine bulmakau tosatñi 7 sihitqarambuñinanök kaisongolomñini piromñi mi o töwatñi miangöreñök kota bulmakau mutukñi miengö kösutñine anda o töwatñangö görañe kinget.

⁴ Bulmakau piromñi sihitqarambuñinanök mienön bulmakau dömnji ölop sorokñi kelök busuñinambuk 7 mi gwahöt engiget. Farao kiñnöy gaun mi eka miangöreñök imbiñi möta wahörök.

⁵ Wahöta gaunñangö kunbuk möta gem anda ahöba gaun kun kewö ehök: Wit padi ip mohotkö kembangan ölnji kötnji ketañi ketañi kañgeñinambuk 7 ölop kötökñi mi loñkam gili eta kinget.

⁶ Miengö andöñine ölnji kañgeñinambuk 7 mi kunbuk loñkam gili eta kingetka gölme qararañkölkölñangö luhut könöpñan mi engohotiriiga soholiba gilipitñi (ambetakñi) aket.

⁷ Ölnji morömorö kañgeñinambuk mi ölnji kañgeñinambuk kötnini ketañi ketañi kuñgukuñguñi mi gwahöt engiget. Farao kiñnöy miangöreñök imbiñi möta wahöriga ölnji qahöpmö, mi gauna ahök.

⁸ *Miri asariiga Farao kiñnöy gaunñangö mötkurumkurum möta Ijpt kantrigö tiripqözölqözöl aka mötkutukutu azi pakpak öröm engii yañgö jeme-soholñe kañgotket. Kañgotketka gaun ehöhañgö kösohotñi mi jii mötketmö, körek yeñön gaunñangö könañiri mi Farao kiñgöra jim asaribingö osiget.

⁹ Osigetka wain o qambigö galöm bohonñan kinda Farao kiñ kewö jii mörök: “O kiñ, nöñön köna siñgiali, miangö keuñan dölnki urune kañgoriga mötmörizal.

¹⁰ Nalö kunöy Farao kiñnöy jembonurupñi neñgöra aka irimñi seholidiga nömemba malmalñangö sikiriti yeñgö suahö galömñangö kösö mire al niñgiyök. Ni aka bered ohohogö galöm bohonñi mi nömbuk nanñi kösö miriñe al netkiiga tarit.

* 41:8: Dan 2.2

11 “Miangörenj tata mala netkôn sungem mohot miangörenjök gauniri inanjök inanjök ehit. Gauniranjö könanji mi inanjök inanjök.

12 Gauniri ekziga Hibru azi gwabö kunöj miangörenj netpuk malök. Yanön sikiriti yengö suahö galömnanjögö welenqeqenji maliga niri gauniri yangöra jizi mörök. Yanön gauniranjö könanjiri mi inanjök inanjök jim asarim netkiyök.

13 Könanjiri jii möriranjögö dop öljji mönö törörök kewö asuhuyök: Nönjön nupni mutuk memba malali, Farao kinjöh ni nup miangörenj kunbuk al ningiyökmö, alani bered ohohogö galömnanjögö keunji jim teköiga lingipnöj eriba qetohoba nöropnji aka qamötki mi mem wahöta möndöget.”

14 Mewö jiiga Farao kinjöh möta Josefnöh jemesoholne kanjotmapköra jim kutuba tosatnji melaim engiiga anda kösö mirigö dutneyök zilañ wanjita kaget. Kagetka jiiga nörop jupnji mitigetka opo malukuñi uteköba Farao kingö jemesoholne kanjorök.

15 Kanjoriga Farao kinjöh Josefköra kewö jiyök: “Nönjön gaun kun ekiga körekñan miangö könanji jibingö osizemö, kunöj göhö könagi kewö jiiga mötzal: ‘Kunñan göhöra gaunji jii möta göjön miangö könanji ölop jim asari-makzan.’”

16 Mewö jiiga Josefnöh Farao kingöra kewö melenj wanjiyök: “O Farao kin, nöjön qahöpmö, Anutunöh mönö gaungahö könanji jim asariba keu ölopñi ghiiga urugan ölowakña.”

17 Mewö melenj wanjiiga Farao kinjöh kewö jiyök: “Nönjön gauni ekzali, miangö urunje nanak Nail o töwatnanjögö göranje kinjal.

18 Miangörenj kinbiga bulmakau dömjji 7 ölop sorokñi busunini kelökñinambuk mi o töwatñi miangörenjök kota jöjöpözanj sutñine kinda tembam keuqañ neze.

19 Mienjö andöjine bulmakau tosatñi 7 sihitqarambuñinanök kaisongolomñini piromñi kötökñi mi o töwatñi miangörenjök kotze. Nönjön bulmakau bölöñi kötökñi mewöñi mi nalö kunöj Ijpt gölme pakpak kiangörenj qahö enjehal.

20 Bulmakau sihitqarambuñinanök kaisongolomñini piromñi mienjön bulmakau dömjji busunini kelökñinambuk 7 mutuk kotzei, mi gwahöt engize.

21 “Mi gwahöt engizemö, mi töndup kaisongolomñinan gwahöt engizeanjögö dop utekutek qahö aiga enjgezalmö, mutuk kaisongolomñinan piromñi kötökñi kota kinjei, yenön mewöñanök tok kinje. Ni gaun mewö eka imbini möta wahötzal.

22 Wahöta kunbuk ahöba gaun kun kewö ekzal: Wit padi ip mohotkö kembane öljji kötnji ketanji ketanji kanjeninambuk 7 ölop kötökñi mi lonkam gili eta kinje.

23 “Mienjö andöjine öljji kanjeninambuk tosatñi 7 mi sötnji jula kota lonkam gili eta kingetka gölme qararanjökölñanjögö luhut könöpñan mi enjgohotiriiga soholiba moröñi aka gilipitñi (ambetakñi) akze.

24 Öljji morömorö gilipitñi kanjeninambuk mi öljji kanjeninambuk ölop sorokñi mi gwahöt engize. Nönjön gaun yahöt mi eka tiripqözölqözöl aziurupni jibi mötzemö, yenön körek mietkö könanjiri jim asarim ningibingö osize.”

25 Farao kinjöh mewö jiiga Josefnöh keu kewö jiyök: “O Farao kin, göhö gaunyahötki mietkö könanjiri mi mohok akza. Anutunöh yuai könanjep akñanjögö mötzawi, yanön mi Farao kin göhöra indelja.

26 Bulmakau dömjji 7 ölop sorokñi mi yambu 7:gö söpsöpñi akze. Wit padi öljji kanjeninambuk ölop kötökñi 7 mi mewöyöhök yambu 7:gö söpsöpñi akze. Könanjiri mi öröröh aka mohok akzahot.

27 “Bulmakau sihitqarambuñinanök kaisongolomñini piromñi 7 kõnañgep kotzei, mi yambu 7:gö söpsöpñi akze. Wit padi ölñi kañgeñinambuk 7 gölme qararañkölkölñañgö luhut kõnöpñan enghotiriiga soholiba gilipitñi (ambe-takñi) akzei, mi bödi (buörö) malmalgö yambu 7 miangö söpsöpñi akze.

28 Anutunöñ yuai kõnañgep akñañgö mötzawi, yañön mi göhöra indela kondelja. Farao kiñgöra keu döлки mewö jizali, mi mönö mewögöra aka jizal.

29 O kiñ, yambu 7:gö dop nene möriam keta bölökñi asuhuba Ijpt gölme pakpak dop köla ahöma.

30 “Mi ahömamö, yambu 7 miengö andöñine bödigö yambu 7 asuhuba ayuayuhu ketañi kondoriga Ijpt kantrinöñ bölima. Mianñon asuhuiga nene möriam mutuk Ijpt gölmenöñ ahöyöhi, mi gölme dop yeñön ölum enghum teköma.

31 Bödi mi köhöikñi kötökñi ahömawañgöra aka gölme dop ambazip yeñön nene möriamgö yambuñi 7 mutuk Ijpt gölmenöñ ahöyöhi, miangö keuñi mi kunbuk qahö möta malme.

32 Anutunöñ gaun kõnañi mohot mi indimñi yahöt gihii ekzani, mi kõnañi kewögöra: Anutunöñ keu mi lök jöhöba jim köhöiba alök. Mi jim köhöiba alöhi, miangöra mianñon mönö zilañ asuhuma.

33 “Miangöra Farao kiñ göñön ölöp mötkutukutu azi kun keu törörök kewörakzawi, mi möwölöhöba kuñgunöñga Ijpt kantri ki galöm köla malma.

34 Mewöñanök kiap bohonñi bohonñi kuñgum enghinöñga gölme dop köla galömñina malme. Yeñön nene möriamgö yambuñi 7 miengö uruñine nene ölñinambuk Ijpt gölmenöñ asuhumei, miangöra jiiga mendengetka bahöñini 5 asuhugetka miengöreñök mohot mohot memba gawmangö köwenöñ tokoba malme.

35 “Yeñön mönö kinda jimkutukutu algetka yambu ölöpñi 7 asuhumei, miengö uruñine nene ölñini körek pakpak tokoba kewöta malme. Mewö aka wit padi mi Farao kiñgö köwe miriñi miriñi miangöreñ qezaköba malme. Mi taon dop gawmangö köwe miriñi miriñi miangöreñ qezaköba galöm köla malgetka kõnañgepkö neneña ahöma.

36 Nene mewö tokoba malmei, mi mönö gawmangö köwe miri dop galöm kölgetka kahaimök ahöiga kõnañgep bödigö yambu 7 Ijpt gölme dop asuhumawi, nalö miangöreñ mi ölöp memba mendenja nembra malme. Mewö aketka kantrigö kõnagesö neñön bödi miangö nalöñe nenegö qahö kömumba gororöñgöbin. “Mewö.

Farao kiñnöñ Josef Ijptkö azi kembuya kuñguyök.

37 Josefnöñ keu mewö jiiga Farao kiñ aka jembonurupñi pakpak yeñön areñ miangöra mötket dop köliga sihimñi mötket.

38 Mewö mötketka Farao kiñnöñ jembonurupñi kewö jii mötket: “Azi kiangö uruñe bem yeñgö uñañan kini maljawi, nini i ewö azi kun ölöp qahö mi-wikñaibin.”

39 Mewö jii mötketka Josefköra kewö jiyök: “Anutunöñ keu areñ pakpak ki indel gihizawi, miangöra gi ewö mötkutukutu azi keu törörök kewötpawak, mi kun qahö malja.

40 Miangöra göñön mönö jakömbuak mirinañgö galömñi bohonñi aka malman. Göñön nöngö kõnagesöurupñi pakpak jim kutum enghinöñga yeñön mönö göhöreñ keu tem köla keugi bapñe malme. Nöñön jakömbuak dum tatatnöñ tarakzali, miyök mötmöriaba miangöra aka gi goñgita ketañamgi aka malmam.”*

* 41:40: Apo 7.10

⁴¹ Mewö jiba toroqeba kewö jiyök: “Mötnöñ, nöñön gi Ijpt kantri pakpak kiangö azi kembuya malmangöra kuñgum gihizal.”

⁴² Mewö jiba börö kesötñangö jenjeni mianñön supap köpöp ewö qetñi mekötahöba malöhi, mi qeköba Josefkö börö kesötñe löñgörök. Opo maluku ek-sihimñambuk opo tuatñan memenji mi löñgöt wangiba sorom goulñöñ memenji kun mi memba Josefkö imbiñe kölok.*

⁴³ Mewö aka hos kare qetpuk sorokñi nanñi kareñangö qorembiñi mi yangöra jim teköiga mianñöreñ öñgöiga hosnöñ örögetka anda kaba malök. Mewö anda maliga kiñgö sikiriti yarö azi kunöñ mutuk anda göda qem wangibingöra kewö qeri qetketka malök: “Kezap! Mönö kesalget!” Mewö ak wangiba Ijpt kantri pakpakö azi kembuya kuñgum wangiyök.

⁴⁴ Farao kiññöñ Josefköra kewö jiyök: “Nöñön Farao kiñ akzalmö, Ijpt kantri pakpak kiangöreñ kunñan kun mönö göhö jitki qetala böröñi me könanji mi kude mem wahötma.”

⁴⁵ Mewö jiba Josefkö qetñi dölokñi (Ijpt keunöñ) Zafenat-Panea qerök. Mewö qeta Heliopolis taongö jike nup galöm qetñi Potifera yangö böratñi Asenat mi anömña akñapaköra wangiyök. Mewö kantrigö azi kembuya aka Ijpt kantri ekñamgöra anda liliköyök.

⁴⁶ Josefñöñ yambuñi 30 aiga mianñöreñ Farao Ijptkö kiñi yangö jakömbuak nupñi könahiba meyök. Mi memba Farao kiñgö sitiñi mosöta Ijpt uruñe dop köla liliköba malök.

⁴⁷ Nene möriamgö yambuñi 7 mianñö nalöñe gölmeñine nene önöñi qahö asuhum enñiyök.

⁴⁸ Nene möriamgö yambuñi 7 kam kuñgugeri, mianñö nalöñe Josefñöñ jiiga nene könanji könanji Ijpt gölme asuhugeri, mi tokoba taonñine dop anda gawmangöra alget. Gölme köröñi taon dop liliköba tat angeri, mianñöreñ nene öñi asuhugetka mi memba taonñine dop anda qenjarök köwe miriñine alget.

⁴⁹ Josefñöñ jiiga wit padiñi padiñi mi qenjarök köwe miriñine önöñi qahö tokoba alget. Mi sakösinq köwet jitñe ahözawangö dop öñgöba kinök. Nene möriam sesegilgil asuhuba toroqeba ahöyöhangöra nene toruñini mi toroqeba oyoñ bibihigetka lömböriiga osiba mosötket.

⁵⁰ Bödi nalöñan qahö kam kuñguiga qeljiñe mianñöreñ anömñi Asenatnöñ Josefkö nahönyahötñi yahöt etkömeyök. Asenat mi Heliopolis taongö jike nup galöm qetñi Potifera yangö böratña.

⁵¹ Nahöññi mutukñi asuhuiga Josefñöñ keu kewö jiyök: “Anutunöñ bauköm niñgiiga kahasililiñ waimanjatni pakpak aka iwinangö mirigö yuainji pakpak mi lök ölum nuñgui maljali, mianñöra. “Mewö jiba nahöññangö qetñi Manase (Ölum nuñguza.) qerök.

⁵² Nahöññi könanñepñi asuhuiga Josefñöñ keu kewö jiyök: “Ni sihimbölöñangö gölmeñe malbiga Anutunöñ ahumsehip niñgizawi, mianñöra. “Mewö jiba qetñi Efraim qerök. (Efraim Ahumsehip niñgiza.)

⁵³ Nene möriam ketanñangö yambuñi 7 Ijpt gölme dop köla kam kuñgugeri, mi ahöm kota teköget.

⁵⁴ Yambu mi tekögetka Josefñöñ keu jiyöhangö dop bödigö yambuñi 7 mi könahiba kam kuñguget. Bödi mi gölme tosatñi pakpak dop köla asuhuba ahöyökmö, Ijpt gölmenöñ nene mi miri dop köweñine ahöyök.*

⁵⁵ Ijpt könagesö körek pakpak yeñön könahiba bödi möta Farao kiñgö qeta nene enñimapköra uletket. Uletketka möta Farao kiññöñ körek yeñgöra kewö jiyök: “Inini mönö Josefköreñ angetka yuai mi me mi akñegö jim kutum enñimawi, mi mönö tem köla ahakñe.”*

* 41:42: Dan 5.29 * 41:54: Apo 7.11 * 41:55: Jon 2.5

⁵⁶ Bödinöŋ kantri jömukŋi dop köla ahöba Ijptkö miriŋi miriŋi pakpak miengöreŋ toroqeba gwötpuk lömböriyök. Mewö asuhuiga Josefnöŋ jüiga qenjarök köwe miriŋi miriŋi miengö nanŋuŋini öröba nene mi Ijpt yeŋön söngöröŋi memegöra alget.

⁵⁷ Bödi mi gölme pakpak dop köla lömböriba ahöyöhaŋgöra ambazipnöŋ gölme dop miangöreŋök Ijpt kaba Josefköreŋ kaŋgota nene söngöröŋi memba malget. Mewö.

42

Josefkö daturupŋan Ijpt gölmenöŋ anget.

¹ Ijpt miangöreŋ nene ahöyöhi, keu mi Keinan gölme miangöreŋ jigetka Jeikobnöŋ möta nahönurupŋi kewö jii mötket: “Iŋini mönö wuanöŋgöra silek-malek aka kuruk je angeka malje?”

² Ijpt miangöreŋ wit padi ahözawi, nöŋön keu mewö möral. Nini qahö kömumba malmal toroqeba malbingöra iŋini mönö wahöta Ijpt geba miangöreŋ nene tosatŋi bohonŋi memba kagetka nembra malbin.”*

³ Mewö jii möta Josefkö daturupŋi 10 yeŋön miriŋini mosöta nene bohonŋi mbingöra Ijpt gölmenöŋ anbingö aket.

⁴ Iwiŋini Jeikobnöŋ Josefkö munŋi Benjamingö qakŋe ayuayuhu kun öŋgöbapuköra keŋgötŋi möröhaŋgöra i daturupŋi yembuk qahö melaim waŋgiiga anget.

⁵ Keinan gölmenöŋ bödi mi mewöŋanök ahöyöhaŋgöra Israelgö nahönurupŋi yeŋön Keinan azi tosatŋan angeri, yeŋgö sutŋine wit padi bohonŋi mbingöra mohotŋe anget.

⁶ Angetmö, Josefnöŋ Ijpt kantrigö azi kembuŋini tata malök. Yaŋön wit padi mi könagesöŋi pakpak yeŋön bohonŋi memegöra aliga yaŋgöreŋ kaŋgota malget. Miangöra daturupŋan kageri, yeŋön kaŋgota miangöreŋök yaŋgö wösöŋe simin köla gölmenöŋ bamgöget.

⁷ Mewö bamgögetka Josefnöŋ daturupŋi eŋgeka möt kutum eŋgiyökmö, könaŋamŋi köyatim eŋgiba kian azigö tandök ak eŋgiba örömureim keu könöŋambuk jiba kewö qesim eŋgiyök: “Iŋini mönö denikepköra kazeye?” Qesim eŋgiiga kewö melenget: “Nini Keinan gölmenöhök nene söngöröŋi mbingöra kazin.”

⁸ Mewö melengetka Josefnöŋ daturupŋi möt kutum eŋgiyökmö, yeŋön i qahö möt kutum waŋgiget.

⁹ Qahö möt kutum waŋgigetka Josefnöŋ mönöwök gaunŋi yeŋgöra ehöhi, mi mötmötŋe kaŋgoriga mötmöriba jihip je suŋini mitiba kewö jii mötket: “Ye! Iŋini mönö kegwek azia akze. Nini kantrinini denikeaŋgöreŋ göröken awörök aka yarö gilbingö lömbörizini, iŋini mi ek kewöta mötpingöra ki kaze.”*

¹⁰ Mi möta kewö melen waŋgiget: “Azi kembunini, mewö qahö. Welenqe-geurupki nini mönö nene söngöröŋi mbingöra kazin.

¹¹ Nini körekŋanök azi mohotkö nahönurupŋi akzin. Nini azi diŋdiŋi mala munen qahö jimakzin. Göhö welenqegeurupki neŋön mönö gölme ek-kewötkö yarö azia qahö aka maljin.”

¹² Melen waŋgigetka “Qahö!” töhöreŋ qeta kewö toroqeyök: “Nini kantrinini denikeaŋgöreŋ göröken awörök aka yarö gilbingö lömbörizini, iŋini mi ek kewöta mötpingöra ki kaze.”

¹³ Mi möta kewö melen waŋgiget: “Welenqegeurupki nini Keinan gölmegö aziŋi mohotkö nahönurupŋa, darumun 12 akzin. Munini qöndökŋan nalö kewöŋe iwininambuk mire tariga kunŋan qahö toroqeba malja.”

* 42:2: Apo 7.12 * 42:9: Jen 37.5-10

14 Mewö melen wangigetka kewö jim engyök: “Mewö aiga injini ölña gölme ek-kewötkö yarö azia akzei, mi lök jibi mötze.

15 Mewö maljeangöra nöñön kewö esapköm engimam: Farao kiññöñ jebuk maljawi, nöñön keu öl töhöññi miangö dop jöjöpañ keu kewö jim köhöizal: Munñini qöndökñan ki qahö kama ewö, injini mönö gölme ki qahö mosöta anme.

16 Injini keu ölñi jize me qahö, nöñön mi esapkömmangöra kewö jizal: Injini mönö sutñineyök kun melaigetka anda munñini qöndökñi wangita ki kama-hot. Tosatñi injini mönö ki mamböta kösö mire tata malme. Mewö qahö akñe ewö, injini mönö ölña gölme ek-kewötkö yarö azia akze. Farao kiññöñ jebuk malja ewö, nöñön keu öl töhöññi miangö dop jöjöpañ keu mi jim köhöizal.”

17 Mewö jim engiba jiiga kösö miriñe al engigetka wehön karöbutkö dop tatket.

18 Wehön karöbut aiga Josefnöñ kaba keu kewö jii mötket: “Jeñinambuk toroqeba malbingö mötze ewö, injini mönö yuai jimami, mi aketka nöñön ölop mal-malñini jöhöman. Nöñön mewöyök injini ewö Anutugö jitñi ongitpileñbuköra kenjötni mörakzal. Miangöra injini mönö kewö akñe:

19 Injini azi diñdiñi muneñini qahö malje ewö, darumun engöreñök mönö kunñan kösö miri kiangöreñ toroqeba tariga tosati injini ölop wit padi memba miriñine lilingöba anme. Miangöreñ anda miriñine könagesöurupñinan bödi aka maljei, mi nene engime.

20 Injini mönö mewö anda munñini qöndökñi wangita nöñgöreñ kame. Kagetka keunjanangö ölñan mewö asuhuiga eka möt kutuba qahö engubi kömume. “Keuñi mewö jiiga mönö miangö dop aket.

21 Yeñön nanñini Hibru keunöñ sutñine keu kewö eraum-mötket: “Nini munini silik ak wangini, miangö likepñi bölöñan mönö ölña qaknine öngöza. Yañön malmalñi jöhöba ak kömum wangibingöra uleta kungum neñgiiga kahasililij ketañi ehinmö, yangö keuñi möta mi qahö wuatangöin. Miangöra kahasililij lömbötñambuk kianñön neñgö qaknine öngöza.”

22 Mewö eraum-mötketka Rubenöñ kewö jiyök: “Nöñön kewö jibi mötket: ‘Injini azi gwabö mi silik bölöñi kude ak wangime.’ Mewö jialmö, injini nöñgö keuni mi möta silekmalek aket. Mötket, nalö kewöñe yangö sepnangö keugö likepñan mönö qaknine öngöiga kahasililij mötzin.”*

23 Mewö eraum-mötketka Josefnöñ yembuk Ijipt keunöñ keu jiiga kunöñ mi melenök. Miangöra yeñön keunini jigetka ölop möt asariyöhi, mi daturupñan qahö möt kutuget.

24 Josefnöñ keunini möt asariba lilingöba sahörök. Sahöta kunbuk lilingöba engeka yembuk keu jiyök. Yembuk keu jiba Simeon sutñineyök memba jiiga yeñgö jeñine jöhöget. Mewö.

Josefkö daturupñan Keinan gölmenöñ lilingöget.

25 Josefnöñ jimkutukutu kewö alök: “Welenqege injini mönö azi miengö toru gösöñine wit padi löngötketka numbuñe kotketka mohot mohot yeñgö moneñ esuñini mi totonine inannik inannik toruñine alme aka köna anangö nene semöñni mi tok engime. “Mewö jim kutum engiiga miangö dop ak engiget.

26 Mewö ak engigetka wit padi toruñini mi donki qakñine ala mosöta anget.

27 Anda mala gaun ahöbingöra miri kunöñ angota darumun yeñgöreñök kunñan donkiñi gumohomangöra aka toru kösöñi pösata moneñ esuñi mi toru numbuñe nene qakñe kiniga ehök.

* 42:22: Jen 37.21-22

28 Mi eka darumunji kewö jii mötket: “Eket, nongören monej mi mönö melenja torune utketka kinja. “Mewö möta wösöjini juliga aurum tililingöba anjeka kewö jiget: “Anutunöj mönö wani yuaia ki ak neنجizawe?”

29 Anda mala Keinan gölmenöj iwinini Jeikobkören anjota yuai asuhum enجiyöhi, mianjö kösohotji mi körek kewö jigetka mörök:

30 “Kantri mianjö azi kembunji yanön örömureim keu könöpuk jiba gölme ek-kewötkö yarö azia akinak, mianjö tandök ewö ak neنجiyök.

31 “Mewö ak neنجiyökmö, nini yanjöra kewö jii: ‘Nini azi dijdinji munenini qahö mala gölme ek kewötpingöra aka qahö kazin. Qahöpmahöp!

32 Nini azi mohotkö nahönurupja, darumun 12 aka maljin. Kunjan qahö toroqeba maliga munini qöndökjan nalö kewöje Keinan gölmenöj iwininambuk mire tatza.’

33 “Mewö jinga gölme mianjö azi kembujan neنجöra keu kewö jiyök: ‘Inini azi dijdinji me munenji maljei, mi kewö kewöt enجiba mötmam: Enجörenöhök darumunjinini kun i mönö mosötketka nömbuk ki tariga tosatji inini ölop wit padi memba lilingöba anme. Anda mirinine könagesourupjanan bödi aka maljei, mi nene enجime.

34 Inini gölme ek-kewötkö yarö azia qahöpmö, azi dijdinji munenini qahö maljei, mi kewö kewöt enجiba mötmam: Inini mönö anda munjinini qöndökji mi wanjita nongören kame. Mewö kagetka darumunjinini melen enجibiga ölop gölme kianjören anجumnep-qanجumnep aka malme.’ ”

35 Mewö jiba toru gösöjineyök nene köwenine mokogetka monej esunini monejinambuk mi torujine mohot mohot totojine kini miwiknjaiget. Monej esunini miwiknjaiba eka i aka iwinini mohotje auruba kenجötkotkot mötket.

36 Mewö mötketka iwinini Jeikobnöj kewö jii mötket: “Inini nahönurupni körek pakpak noanjitpingö mötze: Josefnöj qahö malja. Simeon nembuk qahö malja. Benjamin mi mewöjanök noanjita wanjita anbingö jize. Sihimbölö pakpak mianön mönö nongö qakne öngöza.”

37 Mewö jii möta Rubenöj iwinanjöra keu kewö jiyök: “Ni Benjamin qahö wanjita lilingöba kaba gihimam ewö, gi ölop nani nahönyahötmi yahöt mi etkunönga kömumahot. Benjamin mi ölop nongö böröne alnönga i mönö galöm köla anda mala wanjita lilingöba kaba gihimam.”

38 Mewö jiyökmö, Jeikobnöj melenja jiyök: “Nahönyahötmi qöndökji yahöt yetkörenök datjan kömuiga munjan mohot malja. Inini könanöj anbingö mötzei, mianjören ayuayuhu kunjan yanjö qakje öngöma ewö, inini mönö kondotketka wösöbirik öngöngöjan nongö qakne öngöiga kömumba nörop jupni yanjonambuknöj unem mire gemam. Mianjöra nongö nahönan mönö nömosöta embuk qahö anma. “Mewö.

43

Josefkö darumunurupjan lilingöba Ijpt anget.

1 Keinan gölmenöj bödi lömbötjambuk mi toroqeba ahöyök.

2 Jeikobkö könagesourupjan wit padi Ijpt kantrinöhök memba kageri, mi körek nem tekögetka qahöwahiga iwininan nahönurupji mi kewö jii mötket: “Inini mönö kunbuk lilingöba anda nenenamnini tosatji söngöröjji meme.”

3 Mewö jii mötketka Judanöj kewö jiyök: “Azi mianön mönö kapan köla neنجöra galöm meme keu köhöikji kewö jiyök: ‘Munjinan embuk qahö kama ewö, inini mönö nongö jemesoholne kunbuk kanجotpingö osime.’

4 Mianjöra göjön munini melainönga nembuk kama ewö, neنجön ölop gömosöta nenenamnini söngöröjji membingöra anbin.

⁵ Azi mianjon keu kewö jii mörin: ‘Munjinan embuk qahö kama ewö, injini mönö nöngö jemesoholne kunbuk kangotpingö osime.’ Miangöra gönjön Benjamin anjon kölman ewö, nini qahö anbin.”

⁶ Mewö jiiga Israelnöj kewö jiyök: “Injini mönö wanigöra munjini kun maljawi, keu mi azi mianjö jiget mörohanjöra ni urulömböt ketanji ningize?”

⁷ Mewö jiiga kewö melenja jiget: “Azi mianjon nini aka könagesöurupnini engöra törörök qeqesi könaji könaji nengiba kewö jiyök, ‘Iwinjanan jebuk malja me qahö? Darumunjini kun malja me qahö?’ Mewö jiyöhanjöra qeqesini mi nejon öljanök jiba melenjin. Yanjon könanjep munini wanjita kamegöra jibawak, mi mönö qeljine nalö mianjören denöwö mötpinak?”

⁸ Mewö jigetka Judanöj iwinji Israelgöra kewö jiyök: “Miangöra azi gwabö mi nöngö böröne ala melainönga mohotje anbin. Mewö aknönga amqeba zilan gömosöta könanöj aninga nini, gi aka anöm-moröurupnini nejon qahö kömum gororonjöbin.

⁹ Benjamingö malmaljanjö sohopni mianjö keujan mönö nöngö böröne ahöiga lilingöba kaba gihimangö jim köhöizal. Nöjon i qahö wanjita lilingöba ki kaba göhö jemesoholge qahö almam ewö, mianjö keu lömbötjan mönö nöngö qakne öngöiga göhö jege bisiba malbiga gölmenöj malmalnan teköma.

¹⁰ Nalö köröpnji eksekpeksek aka qahö mambötpinak ewö, nejon lök endu anda lilingöba ki kainga ambemni yahöt akawak.”

¹¹ Mewö jiiga iwinjini Israelnöj kewö jii mötket: “Mewö akza ewö, injini mönö kewö akje: Göhme kianjö töhötmöriamni ölop kötökni tosatni kewöni mi memba toru gösöjine löngöta anda azi mi kalema wanjime: Sile mirimirigö kelökni tosatni, moron onji tosatni, gipmi bakötök, marasin ip tokunji qetni mör gipit, kömin, kungam aka saugö alanji almond miengö öljini.

¹² Silwö monej walji toru gösöjinanjö numbuine algetka memba kageri, mi aka mianjö dop qakje toroqeba ala mindirigetka janjönan qariba 2:kö dop aiga mi memba lilingöba anda wanjime. Tosatjan köpösihira aka mi gösöjine alget me denöwö?

¹³ Munjini mewöyök wanjita zilan wahöta azi mianjören kunbuk lilingöba anget.

¹⁴ Anutu kukösum pakpakö Tonan mönö azi mianjö jeje ak-kömukömunji engiiga yanjon darumunjini kun aka Benjamin mi embuk mire lilingöba kamegöra imbi kölma. Nöngö moröurupnan tönbirin akje ewö, nöjon mönö öne töhön malmam.”

¹⁵ Mewö jiiga kalem yuai mi memba silwö monej memba kageri, mianjö dop qakje toroqeba ala mindirigetka janjönan qariba 2:kö dop ahök. Mi memba Benjamin mohotje wanjita wahöta ösumjinan Ijpt anda Josefkö jeje angotket.

¹⁶ Angotketka Josefnöj Benjamin mi yengö sutjine eka mianjörenök mirinanjö galömni kewö jim kutum wanjiyök: “Gi mönö azi ki enjuanjita nani mire anda al enginönga tatme. Tatketka anda sömbup kun qeba ohoba silimgö nenenji mözözmöngönönga yenjon ölop nömbuk mohotje nene nemin.”

¹⁷ Josefkö mirinanjö galömnan jim kutum wanjiyöhanjö dop azi mi enjuangiriga Josefkö mire anget.

¹⁸ Enjuangiriga Josefkö mire anda jönömjini unduiga kenjötnini möta kewö mötmöriba sutjine jiget: “Mutuk kainga monejnini melenja toru gösöjine algetka memba anini, mianjöra yenjon mönö enjuanjita kaba ki al nenjigetka tatzin. Yenjon mönö qeraköba nenjum ureiba luhut al nenjiba nenjömegetka welenqeurupni omanji ahinga donkiurupnini kalöpköba anjon köl enjibepuk.”

19 Mewö jiba kinda Josefkö mirigö galömnji yangören öngöba angetka miri nanğunje kiniga yangöra keu kewö jiget:

20 “O ketañamnini, nini nalö mutukña nene bohonñi memingöra ki kain.

21 Kaba nene bohonñi memba kunbuk lilingöba anda könanöñ miri kunöñ anda ahöbingöra tata toru gösöningö kösöñi pösata moneñnini totonine mi körekñanök gösöñini nanñök nanñök numbuñine nene qakñe ahöiga ehin. Mianğöra moneñ mia merak kunbuk melenđa memba kazin.

22 Silwö moneñ mi danñon toru gösöñine melenđa kunbuk alöhi, mi neñon qahö mötzin. Neñon mi aka silwö moneñ tosatñi mi qakñe juhuköba nene söngöröñi kunbuk memingöra gösöñine ala memba kazin.”

23 Mewö jigetka miri galömnjan kewö jiyök: “Waimanjat kude mötme. Nanñini aka iwiñinağö Anutuñan mönö kungö uruñi kuñguiga silwö moneñ mi toru gösöñine aliga miwikñaiget. Nöñon engören silwö moneñ mi lök meal. Mianğöra kenğotñini kude möta urubönjñ tatme. “Mewö jiba Simeon wañgita yenğoren kayohot.

24 Kayohotka mohotñe enguañgita Josefkö mire öngögetka könanini sanğonmegöra o engiyök aka doñkinini gwözözak neneñini mianñon gumohom engiyök.

25 Yenñon silingö neneñi Josefkö mire mohotñe nemeañgö keuñi mötket. Mianğöra Josefnöñ silimnöñ miriñe kanğotmapköra mamböta kalem yuainini mi aukñe areñgöba tatket.

26 Tatketka Josefnöñ mire kaiga kalem yuainini memba kaba miriñe öngögeri, mi wañgiba wösöñe simin köla gölmenöñ bamğöget.

27 Bamğöba wahötketka jölöñini jiba denöwö maljei, qesim engiba kewö jiyök: “Iwiñini azi namñangö jigeri, yanñon denöwö malja? Toroqeba jebuk malja me qahö?”

28 Mewö jiiga kewö melenğet: “Göhö welenqegegi, neñgö iwininan mönö ölop malja. Mönö toroqeba jebuk malja. “Mewö melenđa göda qem wañgiba simin köla gölmenöñ bamğöget.

29 Mewö aketka jeñan ui anda kaiga munñi Benjamin, nanñi namñangö nahönñi mi eka kewö qesim engiyök: “Munñini qöndökñangö jigetka mörali, yanñon mönö ki akza me denöwö?” Qesim engiba toroqeba kewö jiyök: “Nahöni, Anutunöñ mönö ak kömum gihiiga malman.”

30 Mewö jiba munñi eka wösöñi pöröraköiga jeñi asöliiga sahötmangö möta mianğorenök wölañ lilingöba engömosöta ösumñan miri uruñi ölöñi kunöñ öngöba nanñök mala sahörök.

31 Sahöt teköba je imbilñi sanğonda miri uruñi ölöñi mi mosöta kaba törörök mökösonđa kinda nanñi galöm köl anguba numbu nene kölmegöra jiyök.

32 Ijpt yenñon Hibru ambazip yembuk mohotñe nene nemingö mötketka imbilonloñambuk akzawağöra mi osimakze. Mianğöra Josefkö neneñi mi inanñök köl wañgigetka tari darumunurupñi yenğö mi inanñök köl engiget tatketka Ijpt ambazip yambuk nene nemingö kaba tatkeri, yenğö neneñini mi inanñök kölgetka tatket.

33 Josefnöñ jiiga darumunurupñi mi ahugerangö dop arengöm engigetka mutukñan qakñe tariga bezupñinan qöndökñe tariga Josefnöñ mesohol köl engiba tarök. Mewö tata nanñini anğek kutuba welipköba tatket.

34 Mewö tatketka Josefnöñ jiiga nanñi teibolnöhök nene tosatñi mendenđa memba kaba köl engigetka munñi Benjamingöra ambemñi 5:gö dop toroqeba kölgetka neyök. Mewö memba Josefpuk közölömbuañ ala awamñanök o köhöikñi memba sösongai qakñe tatket. Mewö.

44

Josefnöy darumunurupñi qambigö esapköm enjgiyök.

¹ Mianğö andöñe Josefnöy mirinğö galömñi jim kutum wañgiba kewö jiyök: “Gi mönö azi miengö toru gösöñine wit padi mi sirimeangö dop löngötnöñga numbuñine kotme. Mewöñanök mohot mohot yengö moneñ esuñini mi nannök nannök toto qeba toru gösöñinangö numbuñine alman.

² Munñini qöndökñi yañgö toru gösöñangö numbuñe mianğöreñ nane qambi silwönöñ memeni mi wit padigö moneñi memba kayöhi, miambuk almam. “Mewö jim kutum wañgiiga mianğö dop ahök.

³ Miri asariiga söñanök azi mi melaim enjgigetka donkinini enğuanğita könanöñ anget.

⁴ Anda siti mosöta köröwen qahö angetka Josefnöy mirinğö galömñi kewö jim kutum wañgiyök: “Gi mönö zilañ wahöta azi mi enğuatangöba anda miwikñaim enğiba enğeka kewö qesim enğiman: ‘Azi kembunöñ ölöpnji ak enğiiga inñini mönö wuanöñgöra mianğö kitipñi bölöñi meleş wañgiba kaze?’

⁵ Nöñgö ketañamnan qambineyök kulun nemakzawi aka qambini mianön unji aka keu asa-asambötñangö könanji miwikñaimakzawi, inñini qambi mi mönö wuanöñgöra yonğorö memba kaze? Inñini mönö silik mi bölöñi kötökña akze.’”

⁶ Josefnöy mirinğö galömñi mewö jim kutum wañgiiga anda miwikñaim enğiba keunji mi jiyöhangö dop jii mötket.

⁷ Jii mötketka kewö meleş wañgiget: “Ketañamninan keu tandökñi mewöñi mi mönö wuanöñgöra jiza? Göhö welenqeçeurupki neñön silik bölöñi mewöñi mi qahöpmañakzin. Mi yapmakek!

⁸ Mötnöñ, nini toru gösöñinangö numbuñine silwö moneñ esu miwikñainini, mi mewöyök Keinan gölmenöhök memba kaba gihiin. Nini mönö wuanöñgöra silwö me goul mi ketañamgahö mireyök yonğorö membinak?

⁹ Welenqeçeurupki neñgöreñök kungö toru gösöñe silwö qambi mi miwikñaiman ewö, yañön mönö kömupkö buñaya aiga tosatñi neñön ketañamnini, göhö welenqeçe omanji aka malbin.”

¹⁰ Mewö meleş wañgigetka kewö jiyök: “Mewö mianön ölöpn. Jizeangö dop mi ölöpn akin. Kungö toru gösöñöhök silwö qambi mi miwikñaimami, yañön mönö nöñgö welenqeçeni omanji akñapmö, tosatñi enğö silenine keu qahö ahöiga ölöpn nanninök mirinine anme.”

¹¹ Mewö jii möta körekñan gösöñini nannök nannök ösumok qeköba memba eta gölmenöñ ala numbuñinangö kösöñi pösatket.

¹² Pösatketka Josefkö mirinğö galömñam datñini mutukñangö toru gösöñeyök könahiba qezanña jaruba anda anda munñini qöndökñi Benjamingö toru gösöñe teteköñe eka qambi mi mianğöreñ miwikñaiyök.

¹³ Mi miwikñaiiga yeñön urunini kot gwözöñniga wösöbirikñini kondela malukunini munjukunjuratket. Mewö aka sukinapñini donki qakñine ala kunbuk lilingöba sitinöñ anget.

¹⁴ Juda aka darumunurupñi yeñön lilingöba Josefkö mire angetka yañön tok mirineyök tarök. Tariga wösöñe anğota simin köla gölmenöñ bamğöget.

¹⁵ Bamğögetka Josefnöy kewö jiyök: “Inñini mönö wani siliha mi akze? Azi ni ewöñan mönö ölöpn unju memba yuai yonğorö megetka mi miwikñaimakzali, inñini mi qahö mötze me?”

¹⁶ Mewö jiiga Judanöñ kewö meleşnök: “O ketañamni, nini mönö wani keuya göhöra jibinak? Nini keugö jaruzin. Neñön yuai bölöñi qahö ahini, mi kondel gihibinangö dop qahö. Anutunöñ mönö welenqeçeurupki, neñgö pinjitkö keunji indeli aukñe ahöza. Mianğöra kungö toru gösöñeyök qambi mi

miwikñaizawi aka tosatñi neñön mewöyök mönö azi kembunangö welenqeurupñi omanñi aka malbin.”

¹⁷ Mewö melenñökmö, Josefnöñ kewö jiyök: “Nöñön yuai mewöñi mi qahö ak enjimam. Mi saumbañ! Azi dagö toru gösöñe qambi mi miwikñaizawi, yañönök mönö nöñgö welenqeqeni aka malmappmö, tosatñi inñini ölöp luai qakñe lilingöba iwiñinanğoren mire anme.”

Judanöñ Benjamingöra Josefulet wañgiyök.

¹⁸ Mewö jiiga Judanöñ Josefkö wösöñe anda keu kewö jiyök: “O azi kembuni, ölöp imbi kölnöñga welenqeqegi nöñön keu tosatñi azi kembuni göhöra jibilenak. Göñön Farao kiñ nanñambuk öröröñ akzanmö, töndup welenqeqegi nömbuk kazik kude ak niñgiman.

¹⁹ Azi kembuni göñön welenqeurupki nini mutuk kainga kewö qesim neñginöñ: ‘Engö iwiñini aka darumunñini kun maljahot me qahö?’

²⁰ “Mewö qesim neñginöñga neñön azi kembuni göhöra kewö melenñin: ‘Neñgö iwinini azi namñi aka munini azi gwaböya kun mire tatzahot. Munini miañön iwininan lök azi namñi aiga nalö miañgören asuhuyök. Namñan azi morö yahöt etkimeiga datñan kömuiga nanñök töhön malja. Yañön mönö iwiñangö wölböt (jojopañ) nahönñi akza.’

²¹ Mewö melenñinga göñön welenqeurupki neñgöra keu kewö jinöñ, ‘Inñini mönö munñini mi wañgita nöñgören ki kagetka i ölöp nani jenan uba ekñam.’

²² “Mewö jinöñga neñön azi kembunini göhöra kewö melenñin: ‘Azi gwabö mi iwiñi mosötmanğö osima. Iwiñi mosötpawak ewö, iwiñan mönö kömumbawak.’

²³ Mewö melenñinmö, göñön welenqeurupki neñgöra keu kewö jim kutunöñ: ‘Munñini qöndökñan embuk ki qahö kama ewö, inñini mönö nöñgö jemesoholne kunbuk kude asuhume.’

²⁴ “Mewö jim kutunöñga mirinine lilingöba anda nöñgö iwini, göhö welenqeqegi yañgöra azi kembuni göhö keugi mi jiinga mörök.

²⁵ Mi jiinga möta iwininan könañgep kewö jiyök: ‘Inñini mönö kunbuk anda neñgöra nene tosatñi söñgöröñi memba kame.’

²⁶ “Mewö jiyökmö, nini kewö jiin, ‘Neñön naninök anbingö osibin. Munini qöndökñan nembuk mohotñe anmapkö jiman ewö, mönö ölöp anbin. Munini bezupñi qahö wañgita anbin ewö, neñön mönö azi miañgö jemesoholne asuhubingö osibin.’

²⁷ “Mewö jiinga nöñgö iwini göhö welenqeqegi yañön kewö jiyök: ‘Anömnü Reizölnöñ nahönyahötñi yahöt etkimeyök. Mi nanñini ölöp mötze.

²⁸ Datñan nömosöta anda sohoiga kewö jial, “Sömbup kalñan mönö yöhöqöhöi kömumbawak me denöwö?” Nalö miañgörenök könahiba i qahö ehal.

²⁹ Merak munñi ki mewöyök noañgita angetka könanöñ ayuayuhu kunñan yañgö qakñe öñgöma ewö, inñini mönö kondotketka wösöbirik öñgöñgöñan nöñgö qakñe öñgöiga köñjiliñ möta kömumba nörop jupni yañgonambuknöñ unjem mire gemam.’ ”

³⁰ Judanöñ toroqeba keu kewö jiyök: “O azi kembuni, nöñön munini azi gwabö mi qahö wañgita anda iwini, göhö welenqeqegi yañgö mire añgotpileñak ewö, iwininan mönö ayuhubapuk. Yañön mönö uruñi pakpak nahönñi bezupñi yañgören jöhöiga malmalñiri mohot maljahot.

³¹ Miañgöra azi gwabö mi qahö wañgita aninga iwininan mi eka mönö kömup miwikñaibapuk. Göhö welenqeurupki neñgören mewö asuhuiga nini mönö kondoringa wösöbirik öñgöñgöñan iwinini göhö welenqeqegi yañgö qakñe öñgöiga kömumba nörop jupni yañgonambuknöñ unjem mire gema.

³² Göhö welenqegegi nöñön azi gwabönöñ qahö ayuhumapkö keuñi mi iwinangöra jim jöhöba kewö jial: ‘I qahö wanğita göhöreñ lilingöba kamam ewö, mianğö keu lömbötñan mönö göhö jege nöñgö qakne öñgöba ahöiga gölmenöñ malmalni mewö mal öñgöm tekömam.’

³³ Mianğöra göñön ölop jim tekönöñga nöñön azi gwabö yanğö salupñe azi kembuni göhö welenqegegi omanñi aka ki malbiga yanñon daturupñi yembuk lilingöba mirinñine anme.

³⁴ “Azi gwabö mianñon nömbuk qahö kama ewö, nöñön mönö denöwö aka iwinangöreñ anbilanğak? Wösöbirik öñgöñgöñan iwinangö qakñe öñgöbawak, nöñön mönö mi ekñangö tököm köhöizal. Mianğöra i mönö kude jöhöman.”

45

Josefnöñ nanñi könañi indelök.

¹ Judanöñ mewö jiiga ambazip liliköm enğiba kinda enğekeri, Josefnöñ körek yeñgö jeñine toroqeba könañi köyatiba nanñi galöm köl anğumangö lömböriba osiyök. Mianğöra Josefnöñ kewö silata qerök: “Enñon mönö körekñanök nömosöta denğet. “Mewö jiiga denğetka Ijpt azi kunñan kösutñine qahö kiniga Josefnöñ nanñi könañi mi darumunurupñi yeñgöra kewö indelök:”*

² Yanñon amburereñ aka ötömbepuk qei sahöriğa Ijpt ambazip gumnöñ malgeri, yeñon mi möta Farao kinğö jakömbuak mire anda buzup keuñi mi jigetka mötket.

³ Josefnöñ sahöta kinda darumunurupñi mi kewö jii mötket: “Ni Josef! Iwinan tok jebuk malja me qahö?” Mewö jii mötketmö, darumunñan urunñan kot gwözöñniga aurum tililingöba jeñe öne kinda keu kun qahö mötmöriba melenñ wanğibingö osiget.

⁴ Osiba kingetka Josefnöñ yeñgöra kewö jiyök: “Enñon mönö nöñgö kösutne ki kaget. “Mewö jii kagetka kewö jiyök: “Ni Josef, darumunñini bohoni memegöra algetka Ijpt kayali, mönö mia.

⁵ “Mönö uruköñjiliñ kude mötme. Anutunöñ enñon kömumbepuköra ni mutuk melaim niñgiiga qeljiñe ki kabiga inñi kaze. Ni bohoni memegöra al niñgigetka ki kayali, mianğöra mönö nanñinangöra irimsesewöl kude möt anğume.

⁶ Bödi kianñon lök yambu yahötkö dop gölme dop köla ahöza. Mi toroqeba kunbuk yambu 5:gö dop ahöiga nalö mianğö uruñe gölme qem kömöt qahö aka nene ölni qahö miwikñaiba tokoba malbin.

⁷ “Anutunöñ mönö köna wewelipköñambuk wuatangöba enğö malmalñinangö bohonñi jöhöiga toroqeba jebuk mala gwölönarök miwikñaim enğiba gölme qakñe malmegöra mötza. Mianğöra aka ni mutuk melaim niñgiiga qeljiñe ki kabiga inñi kaze.

⁸ Mianğöra enñon qahö melaim niñgiget tandök akzapmö, Anutunöñ mönö ölna melaim niñgiiga ki kayal. Yanñon kuñgum niñgiiga Farao kinğö jembonñi mutukñi aka jakömbuak miriñe wanat nup memakzei, körek yeñgö ketanñamñina akzal. Mewö akiga Anutunöñ Ijpt kantri jömukñanök mi nöñgö böröne aliga azi kembuñina akzal.

⁹ “Inñi mönö döлки wahöta ösumñinan iwinangöreñ lilingöba anda keu kewö jigetka mötma: ‘Göhö nahöngi Josef yanñon keu kewö jiza: Anutunöñ ni kuñgum niñgiba Ijpt kantri jömukñanök nöñgö böröne aliga azi kembuñina akzal. Mianğöra göñön mönö nalö kude qem körimanmö, zilañ nöñgöreñ kaman.

* 45:1: Apo 7.13

¹⁰ Ki kaba ölop tatat dumdunggi Gosen gölmenöŋ möhamgöba nane kösutne malman. Gi aka isimoröurupki, göhöreŋ lama bulmakau kambuŋi kambuŋi aka öröyuai pakpak buŋagi ahözawi, mi mönö memba köllohoba kame.

¹¹ “Bödi kianön mönö kunbuk toroqeba yambu 5:gö dop ahöm öngöma. Nalö miangö uruŋe gi, mirigahö saiwaurupki me tinitosolomurupki tosatŋi yengöreŋök kunŋan bödi mala nenegö mözöqözöröm aka kömum gororongöbapuk. Miangöra mönö Gosen gölmenöŋ kaba mala wani yuaigöra osimei, nöŋön mi engiba malmam.’ Iwininangöra keu mi mönö mewö jigetka mötma.*

¹² “Ni nanak ölŋa ki kinda engöra keu jizali, mi ölop nanŋini jeŋinan nek kutuze aka muni Benjaminöŋ mewöyök ni nek kutuza.

¹³ Miangöra iŋini mönö iwinangöreŋ anda Ijpt kantrinöŋ qetbuŋa ketanŋi pakpak niŋigetka maljali aka yuai pakpak ekeri, miangö kösohotŋi mi iwini jigetka mötma. Mi möriga mönö ösumok waŋgita eta ki kame.”

¹⁴ Mewö jiba böröŋi munŋi Benjamingö imbiŋe gili geiga sahöriga Benjaminöŋ mewöŋanök anögöm waŋgiba sahörök.

¹⁵ Toroqeba böröŋi daturupŋi körek yengö imbiŋine gili geiga sahöta numbuŋini yöhötim neyök. Miangö andöŋe darumunurupŋan yambuk keu eraum-mötket.

¹⁶ Josefkö darumunurupŋan kageri, miangö buzupŋan Farao kiŋgö jakömbuak mire aniga Farao kiŋ aka jembonurupŋi pakpak yengön mi möta uruölöwak mötket.

¹⁷ Mewö möta Farao kiŋnöŋ Josefköra kewö jiyök: “Darumunurupki mönö jinöŋga kewö akŋe: ‘Sukinapŋini mönö doŋki qakŋine ala kunbuk lilingöba miriŋine Keinan gölme anme.

¹⁸ Anda iwiŋini aka saiwaurupŋini enguaŋgita lilingöba nöngöreŋ kame. Ki kagetka nöŋön gölme ölop kötokŋi Ijpt kantri uruŋeyök möwölöhöba engibiga ölop miangö kelökŋi miwikŋaiba nem söŋgaip aka malme.’

¹⁹ “Mewöyök kewö jim kutum enginöŋga akŋe: ‘Ijpt kiangöreŋök mönö hosgö karenŋi tosatŋi memba anda anöm-moröurupŋini miangöreŋ al engiba iwiŋini waŋgita mohotŋe ki kame.

²⁰ Miriŋinangö yuaiŋi tosatŋi Keinan gölmenöŋ mosötmei, miangö waimanjatŋi kude akŋe. Nöŋön miangö salupŋe Ijpt kantri jömuk kiangö yuaiŋi ölop kötokŋi mi engibiga buŋaŋini akŋa.’ ”

²¹ Farao kiŋnöŋ mewö jüiga Israelgö nahönurupŋan miangö dop aket. Josefnöŋ Farao kiŋgö jimkutukutu keuŋi wuatangöba hosgö karenŋi tosatŋi engiyök. Mewöyök köna anangö nene semön tosatŋi engiyök.

²² Mi engibagun daturupŋi mohot mohot yengö opo malukuŋini dölökŋi totonine engiyökmö, munŋi Benjamingöra opo maluku dölökŋi börö kun waŋgiba monen silwö köt 300 waŋgiyök.

²³ Iwinangöra Ijpt kantrigö yuai ölop sorokŋi jesöŋgö memba doŋki ten miengö qakŋine aliga anget. Mewöŋanök doŋki ambiŋi ten miengö qakŋine wit padi, bered aka nene tosatŋi iwiŋangö köna semöna aliga bisiba anget.

²⁴ Angetka Josefnöŋ darumunurupŋi melaim engii anbingö aketka keu kewö jii mötket: “Iŋini könanöŋ anda angururuk kude akŋe.”

²⁵ Mewö jüiga Ijpt mosöta anda Keinan gölmenöŋ iwiŋini Jeikobkören angotket.

²⁶ Angota iwiŋinangöra keu kösohot kewö jiget: “Josefnöŋ mönö toroqeba jebuk malja. Ijpt kantri jömukŋanök mi yangö böröŋe ahöiga azi kembuŋina aka malja. “Mewö jigetka keu mi qahö möt nariyöhanögöra uruŋi toroqeba amöriiga tarök.

* 45:11: Apo 7.14

²⁷ Mewö tarökmö, Josefnöŋ keu pakpak jiyöhi, mi jiget mörök aka hosgö karenŋi tosatŋi i waŋgita Ijpt anmapköra ali kayöhi, iwiŋini Jeikobnöŋ mi eka kinda uru silenjan köleŋni könöpkönöp ahök.

²⁸ Könöpkönöp aka kewö jiyök: “O mi alakŋa! Mi möt köhöizal. Nahöni Josefnöŋ mönö toroqeba jebuk malja. Nöŋön mönö anda i ekagun könaŋgep ölöp kömumam. “Mewö.

46

Jeikobnöŋ könagesöurupŋi yembuk Ijpt anget.

¹ Israelnöŋ sukinap yuainŋi pakpak kölolohoba memba wahöta köna anök. Anda Berseba mire aŋgota kinda miangöreŋ iwiŋi Aisakö Anutuŋaŋgöra umjowöwöl ohoyök.

² Mi ohoba sungem ahöiga jeŋi meleŋniga imut eka miangöreŋ Anutunöŋ Israelgöra keu jiba qetŋi “Jeikob, Jeikob!” qeriga “Ni ki,” jiba meleŋnök.

³ Meleŋniga kewö jiyök: “Ni Anutu, göhö iwigahö bemŋi. Gi Ijpt gemangö keŋgötŋi kude mötman. Nöŋön miangöreŋ kötuetköm gihibiga könagesö kambu ketanŋi akŋe.

⁴ Nöŋön mönö göbuk Ijpt gemam aka mewöyök gwölönarökurupŋi miangöreŋök enŋuaŋgitpiga kunbuk liliŋgöba kame. Göŋön kömunöŋga Josef nanŋi böröŋan mönö göhö je jupki kusui etma.”

⁵ Miangö andöŋe Jeikobnöŋ Berseba miri mosötpin jiiga Israelgö nahönurupŋan iwiŋini aka anöm-moröurupŋini mi közözhom enŋigetka hosgö karenöŋ öŋgöget. Farao kiŋnöŋ hosgö kare mianöŋ enŋömemba kamegöra jiba ali memba anget.

⁶ Sukinapŋini aka miri sömbupŋini pakpak Keinan gölmenöŋ mala buŋa qeba memba malgeri, mi tok mohotŋe memba anget. Jeikob aka gwölönarökurupŋi pakpak mieŋön mewö Ijpt anget.*

⁷ Gwölönarökurupŋi pakpak, isimoröurupŋi azi aka ambi mi körek enŋuaŋgita Ijpt anget.

⁸ Israel qetŋi alaŋi Jeikob aka yaŋgö gwölönarökurupŋi Ijpt angeri, yeŋgö qetŋini kewö: Jeikobkö nahönŋi mutukŋi Ruben.

⁹ Rubengö nahönurupŋi qetŋini Hanok, Palu, Hezron aka Karmi.

¹⁰ Simeongö nahönurupŋi qetŋini Jemuel, Jamin, Ohad, Jakin, Zohar aka Saul. Saulgö namŋi mi Keinan ambi kun.

¹¹ Liwaigö nahönurupŋi qetŋini Gerson, Kohat aka Merari.

¹² Judagö nahönurupŋi qetŋini Er, Onan, Sela, Perez aka Zera. (Er aka Onan yetköŋ lök Keinan gölmenöŋ kömuyohot.) Perezkö nahönyahötŋi mi Hezron aka Hamul.

¹³ Isakargö nahönurupŋi qetŋini Tola, Puwa, Jasub aka Simron.

¹⁴ Zebulungö nahönurupŋi qetŋini Sered, Elon aka Jalel.

¹⁵ Jeikobkö nahönurupŋi anömŋi Leanöŋ Mesopotemia (Padan Aram) gölmenöŋ enŋömeyöhi, yeŋgö qetŋini mewö. Böratŋiri Daina mi mewöyök meyök. Jeikob aka Lea yetkö isimoröurupŋiri mi mewö oyoŋda mindirigetka 33 ahök.

¹⁶ Gadkö nahönurupŋi qetŋini Zefon, Hagi, Suni, Ezbon, Eri, Arodi aka Areli.

¹⁷ Asergö nahönurupŋi qetŋini Imna, Iswa, Iswi aka Beria. Nennjanöŋ qetŋi Sera. Beriagö nahönyahötŋi qetŋiri Heber aka Malkiel.

¹⁸ Labanöŋ ambi qetŋi Zilpa böratŋi Leagö welen ambia malmapköra waŋgiyöhi, yaŋön Jeikobkö nahönurupŋi mewö enŋömeyök. Jeikob aka Zilpa yetkö isimoröurupŋiri mi mewö oyoŋda mindirigetka 16 ahök.

* 46:6: Apo 7.15

¹⁹ Jeikobkö anömni Reizölgö nahönyahötñi mi Josef aka Benjamin.

²⁰ Josefkö nahönyahötñi Ijpt kantrinöñ asuhuyohori, mi qetñiri Manase aka Efraim. Namñiri qetñi Asenat mi Heliopolis (On) taongö jike nup galöm qetñi Potifera yangö bōratña.*

²¹ Benjamingö nahönurupñi qetñini Bela, Beker, Asbel, Gera, Naman, Ehi, Ros, Mupim, Hupim aka Ard.

²² Jeikobkö nahönyahötñi Reizölnöñ etkömeyöhi, yetkö qetñiri mewö. Jeikob aka Reizöl yetkö isimoröurupñiri mewö oyoñda mindirigetka körekmakörek 14 ahök.

²³ Dangö nahönñi qetñi Husim.

²⁴ Naftaligö nahönurupñi qetñini Jaziel, Guni, Jezer aka Silem.

²⁵ Labanöñ ambi qetñi Bilha bōratñi Reizölgö welen ambia malmapköra wañgiyöhi, yañön Jeikobkö nahönurupñi mewö engömeyök. Jeikob aka Bilha yetkö isimoröurupñiri mi mewö oyoñda mindirigetka körekmakörek 7 ahök.

²⁶ Jeikobkö isimoröurupñi diñdini töhön yambuk Ijpt angeri, miengö jañgöñini oyoñda mindirigetka körekanök könagesö 66 aket. Nahönurupñi yengö anömñini mi jañgö miangöreñ qahö toroqet.

²⁷ Josefkö nahönyahötñi Ijpt kantrinöñ asuhuyohori, mi yahöt. Jeikobkö könagesöurupñi Ijpt angeri, miengö jañgöñini mi mewö oyoñda mindirigetka 70 ahök. Mewö.*

Jeikob könagesöurupñi yembuk Ijpt angotket.

²⁸ Könanöñ anda mala Jeikobnöñ Juda mutuk melaiba kewö jiyök: “Gi mönö Josefköreñ anda Gosen gölmenöñ anangö könañangöra qesim wañgiman. “Mewö jii möta anda kaiga Gosen prowinsnöñ angotket.

²⁹ Josefnöñ angotkerangö buzupñi möta jiiga hos karenöñ jöhöba mözözömgögetka qakñe öngöba iwinji Israelbuk aitoñgöbitkö Gosen gölmenöñ anök. Anda eka yangö jeñe angota bōröñi imbiñe gili geiga anjum wañgiba nalö köröñi titipepeni memba urusahöt qeyök.

³⁰ Israelnöñ Josef kewö jii mörök: “Göñön toroqeba jebuk maljani, mi nanak gekzala nalö kewöñe ölop jöjöröba kömumam.”

³¹ Mewö jiiga Josefnöñ darumunurupñi aka iwinangö könagesöñi kewö jii mötket: “Nöñön mönö Faraö kingöreñ öngöba keu kewö jibi mötma: ‘Darumunurupni aka iwinangö könagesöñi Keinan gölmenöñ malgeri, yeñön lök nöngöreñ kaze.

³² Darumunurupni mienöñ lama bulmakau galömñini aka mi galöm köl enjiba maljeangöra kabingö aka lama kambuñini, bulmakau kambuñini aka sukinap öroyuainini pakpak mi enjuañgita kaze.’

³³ Miangöra Faraö kiñnöñ engoholi jemesoholñe angotketka kewö qesim enjima: ‘Inini wani nuwa memakze?’

³⁴ “Mewö qesim enjiiga inini kewö melen wañgime: ‘Welenqequeurupki neñön mönö abu asaurupnini mutuk memba malgerangö dop moröröpnineyök lama bulmakau galöm kölköl nupñi memba mala maljin.’ Mewö melen wañgigetka yañön ölop Gosen prowinsnöñ tatat dumdumñini möhamgömegöra oñ jiiga malme. Ijpt ambazip yeñön lama bulmakau galöm kölköl ambazip pakpak yeñgöra mötketka imbilonlonjambuk ahakze. “Josefnöñ keuñi mewö jii mötket.

47

Josefnöñ kingö jeñe korök.

* 46:20: Jen 41.50-52 * 46:27: Apo 7.14

¹ Josefnöŋ anda Farao kiŋgöra kewö jiyök: “Nöŋgö iwi darumunurupni yeŋön lama bulmakau kambuŋini aka sukinap öröyuaiŋini pakpak memba Keinan gölme mosöta kaba mala döлки Gosen gölmenöŋ kaŋgota malje.”

² Yaŋön darumunurupŋi yeŋgöreŋök azi 5 enġuaŋgita Farao kiŋgö jeŋe öŋgöba kiŋgetka enġehök.

³ Enġeka kewö qesim enġiyök: “Iŋini wani nuwa memakze?” Mewö qesim enġiiga kewö melenġ waŋgiget: “Welenġeġeurupki neŋön iwiurupninan mutuk malġeraŋgö dop lama bulmakau galöm kölköl nupŋi memba mala maljin.”

⁴ Mewö jiba toroġeba kewö jiget: “Keinan gölmenöŋ bödi lömbötŋambuk ahözawaŋgöra welenġeġeurupki neŋön lama bulmakau kambunini yeŋgöra nene qahö miwikŋainin. Mianġöra neŋön gölme kianġöreŋ kusuk malbingöra kain. Mewö aiga welenġeġeurupki ölop oŋ jiba jim teköm neŋginöŋga nini Gosen prowins mianġöreŋ tatat dumdumnini möhamgöbin.”

⁵ Mewö jigetka Farao kiŋnöŋ Josef kewö jii mörök: “Iwi darumunurupkan göhöreŋ kaget.

⁶ Ijpt kantri ki aukŋe göhö jege ahözawaŋgöra ölop iwi darumunurupki gölme bahöŋi kelökŋi ölopŋi mianġöreŋ al enġinöŋga malme. Ölop Gosen prowinsnöŋ malme. Sutŋine nup qetpuk meme azi tosatŋi maljei, mi möt enġiman ewö, ölop nöŋgö mirigö sömbup kambuni mi yeŋgö böröŋine al enġinöŋga galöm köl enġiba malme.”

⁷ Mewö jii möta Josefnöŋ iwiŋi Jeikob Farao kiŋgö jeŋe waŋgita kaiga ehi Farao kiŋ mi kötuetköm waŋgiyök.

⁸ Kötuetköm waŋgiiga kewö qesim waŋgiyök: “Göhö yambugi dawik akza?”

⁹ Qesim waŋgiiga kewö melenök: “Nöŋön yambu 130:gö dop gölmenöŋ liliköba mala kota maljal. Nöŋgö malmalnaŋgö yambuŋi pakpak mi awamdökŋi aka osikosinambuk aket. Iwiurupnan yambu sehisehiŋi gölmenöŋ liliköba malġeri, nöŋgö yambu qötönan yeŋgöreŋambuk dop mohot qahö akza.”

¹⁰ Mewö jiba Farao kiŋ mi kunbuk kötuetköm waŋgiba jemesoholŋeyök eta anök.

¹¹ Josefnöŋ iwi darumunŋi mi Farao kiŋnöŋ jim kutuyöhaŋgö dop Ijpt kantrinöŋ al enġiba Ijptkö gölme bahöŋi kelökŋi ölopŋi kun mi Rameses prowins (Gosen) mianġöreŋ enġiyök.

¹² Josefnöŋ mewöyök iwi darumunurupŋi aka iwiŋaŋgö könagesöurupŋi pakpak mi neneŋini anöm-moröurupŋini malġeri, qötö mianġö dop dopŋine enġiba malök.

Bödi nalöŋi lömbötŋambuk.

¹³ Bödi ketanŋi mi lömbötŋambuk ahöiga nenenöŋ gölme dop qahöwahiga Ijpt aka Keinan kantri mietkö könagesöŋiran mönö nenegö kömum soholip aka malget.

¹⁴ Mewö mala Josefköreŋ kaba wit padi söŋgöröŋi megetka yaŋön monenġ pakpak Ijpt aka Keinan kantri uruŋe ahöyöhi, mi tokoba memba Farao kiŋgö jakömbuak mirigö köweŋe alök.

¹⁵ Ijpt könagesö aka Keinan könagesö yeŋgöreŋ monenġ qahöwak teköiga Ijpt körek yeŋön Josefköreŋ kaba kewö jiget: “Moneŋninan qahöwak teközawaŋgöra göŋön mönö nene neŋgiman. Nene qahö neŋgiman ewö, neŋön mönö göhö jemesoholge kömumbin.”

¹⁶ Mewö jigetka Josefnöŋ kewö jiyök: “Moneŋinan qahöwakzawaŋgöra enġöreŋ lama aka bulmakau ahözei, mönö mi memba kaba niŋgigetka nöŋön nene enġimam.”

17 Mewö jiiga anda lama bulmakaunini enjuangita kaba Josef wangiget. Yenön hosnini, lamaanini, memenini, bulmakaunini aka donkinini mi enjuangita kaba nenegö söngöröña Josef wangiba nene memba malget. Lama bulmakaunini pakpak mi Josef wangigetka yanön nene engiba mewö mianön yambu mohotkö uruñe malmalñini nanögiga qahö kömuget.

18 Qahö kömugetka yambu mianön teköyök. Teköiga yambu dölökñe dumñe kunbuk yangören kaba kewö jiget: “Azi kembunini, moneñnini qahöwaczawañgöra könañamnini ölni mi göhö jege ölop qahö köyatibin. Nengören lama bulmakaunini mi mewöyök gihiinga göhö buñaya ak teköza. Nini mi pakpak azi kembunini gi gihim teköinañgöra nanini aka gölmenini miyök ahöm neñgiza. Miangöra mönö wania kun gihibinak?”

19 Nini mönö könañi wuanöñgöra göhö jege töndup kömumbinak? Nanini kömuinga gölmeninan mönö wuanöñgöra öne ahöba apopam köla bölibawak? Miangöra mönö nanini aka gölmenini bohonini memba mianön numbu nene neñginöñga nini ölop Farao kingö welenqeçe omanñi ahinga gölmeninan mewöyök yangö buñaya akña. Neñön toroqeba jebuk mala kömumbinbuköra mönö nene kötni neñgiman. Neñginöñga gölme nup wanginga öne qahö ahöba gönjañ akña.”

20 Bödi köhöikñi kötökñi mianön Ijpt könagesö yembuk ahöyöhanñgöra yenön körek mohot mohot nup gölmenini köröñi mi bohonñinañgöra algetka Josefnöñ Ijpt gölme pakpak mi söngöröñi meiga Farao kingö buñaya ak teköyök.

21 Josefnöñ Ijpt könagesö miri dop kantrigö jabö teteköñi uruñe malgeri, mi pakpak engömeiga gawmangö welenqeçe omanñi aka malget.

22 Farao kiñnöñ jike nup galöm yengö fotnait töwanini enñiiga memba mianön malmalñini nanögiba malget. Mewö aiga neneninañgöra qahö lömböriiga gölmenini Josefnöñ söngöröñi memapköra qahö alget. Miangöra jike nup galöm yengören gölme mienön mohot kiñ Faraogö buñani qahö aket.

23 Josefnöñ könagesö yengöra kewö jiyök: “Mötket, nöñön nanñini aka gölmenini söngöröñini mem teköbiga Farao kingö buñaya akze. Miangöra nöñön nene kötni engibiga mi ölop memba gölmenöñ kömötme.

24 Kömötketka ölni asuhuiga mi mönö kewötketka kambu 5 asuhugetka miengörenök mohot mohot mi Farao kingöra ala wangiba malmemö, kambu 4 mi kunbuk gölmenöñ kömötmeañgöra aka neneninañgöra ahöma. Mi nanñini, anöm-morourupñini aka tosatñi miriñine maljei, mönö engö nenenina ahöma.”

25 Mewö jiiga kewö jiget: “Göñön nengö malmalnini bödinöhök meköñöñ. Miangöra azi kembuninañgö jeñe ak-kömükömu miwikñaibin ewö, neñön ölop Farao kingö welenqeçe omanñi aka malbin.”

26 Josefnöñ Ijpt yengö gölmegöra jimkutukutu ali ahöba kota ki ohozali, nalö kewöñe mewöyök toroqeba ahöza. Jimkutukutu mi kewö: Nene nupkö ölni mi mönö mendengetka kambu 5 aiga miengörenök mohot mohot mi Farao kingö buñaya akñapköra ala malme. Jike nup galöm yengören gölme mienön mohot Farao kingö buñani qahö aket.

Jeikobnöñ qamötñangöra Josef qesiiga oñ jiyök.

27 Israel yenön Ijpt gölmegö prowins qetñi Gosen miangören tatat dundumñini memba gölme angön köla malget. Miangören mala ahumsehip aketka qötöñinan gwötpuk qariyök.

28 Jeikobnöñ malmalñi yambu 17 mi Ijpt gölmenöñ malök. Malmalñi jömukñañgö yambuñi mi mindiriba 147 ahök.

29 *Israelgö kömup nalöñan dopdowiiga nahöññi Josef jii kaiga kewö jii mörök: “Nöñön göhö jege ak-kömükömu miwikñaizal ewö, göñön mönö döliki

* 47:29: Jen 49.29-32; 50.6

urukalem kondela keu kewö pöndaŋ wuatangöba mem yakömamgö jiba börögi nöngö tambuni bapŋe ala kewö jim jöhöman: Nöŋön kömumbiga qamötŋi mi mönö Ijpt gölme kiangöreŋ kude löm kölman.

³⁰ Nöŋön kömumba iwi asani yembuk luhut memba ahömami, nalö miangöreŋ nöngö qamötŋi mi mönö Ijpt kantrinöhök memba anda iwi asani löm köl engigeri, yeŋgö qaksiriŋine nesim kölman. “Mewö jiiga kewö jiyök: “Jizanaŋgö dop mi ölop akŋam.”

³¹ Mewö jiiga iwiŋan kewö jiyök: “Keu mi mönö jöjöpäŋ keunöŋ jim köhöim niŋgiman. “Mewö jiiga Josefŋöŋ mi jöjöpäŋ keunöŋ jim köhöiiga Jeikobnöŋ mi möta bilipköba nöropŋi memba geba öröpŋaŋgö kitipŋe ala nariba Anutugö waikŋi memba möpöseiyök. Mewö.

48

Jeikobnöŋ Manase aka Efraim kötuetköm etkiyök.

¹ Nalö tosatŋi teköiga Jeikobnöŋ kawöl miwikŋaiiga keu mi Josefköra jigetka mörök. Mi möta nahönyahötŋi yahöt Manase aka Efraim mi etkuangita iwiŋaŋgöreŋ anök.

² Aniga tosatŋan Jeikobköra kewö jigetka mörök, “Nahöŋgi Josefŋöŋ mönö gi gekŋamgöra kaza. “Israelnöŋ keu mi möta ösumŋi ahöyöhi, mi qezaköba ahöahö dumŋeyök wahöta tarök.

³ Wahöta tata Josefköra kewö jiyök: “Anutu kukösum pakpakö Toŋi yaŋön Keinan gölmeŋö Luz miri miangöreŋ nöngöreŋ asuhuba kötuetköm niŋgiba

⁴ kewö jiyök: ‘Nöŋön ahumsehip gihibiga gwölönarökurupki yeŋgö qötöŋinan mönö qariba qariba öngöiga göŋön könagesö kambuŋi kambuŋi gwötŋuk yeŋgö bömön jalöŋina akŋan. Gwölönarökurupki könage asuhum öngömei, nöŋön gölme ki mi i buŋa qem engibiga yeŋgö buŋaŋina teteköŋi qahö ahöm öngöma.’*

⁵ Anutunöŋ mewö jiyök. Mutuk nöŋön Ijpt gölmenöŋ göhöreŋ qahö kay-alangöreŋ anömŋan nahönyahötŋi yahöt Ijpt kiangöreŋ etkömeyöhi, yetköŋ mönö nöngö buŋaya akŋahot. Manase aka Efraim yetköŋ mönö Ruben aka Simeon ewö nöngö buŋaya akŋahot.

⁶ Mewö ahotka könangep gölme mesinŋa yetköra distrik yahöt etkime. Efraim aka Manase yetkö bapŋire nahönböraturupki tosatŋi asuhugeru, mienöŋ mönö nange buŋaya akŋe. Yeŋön gölme bahöŋini buŋa qem angumei, mi mönö Efraim aka Manase yetkö distrik yahötŋiri mietkö uruŋe ahögetka bohon toŋiri ahotka datyahötŋiri yetkö nembö bapŋire malme.

⁷ Nöŋön Mesopotemia (Padan Aram) mosöta lilingöba Keinan gölmenöŋ kaba Efrata taon dopdowibiga anömni Reizölnöŋ kömuiga wösöbirik ketanŋi ahum niŋgiyök. Kömuiga qamötŋi mi Efrat anangö köna töwokŋe löm kölal. Efrat mirigö qetŋi alaŋi mi Betlehem.”*

⁸ Israelnöŋ mewö jiba Josefkö nahönyahötŋi etkeka kewö qesim waŋgiyök: “Azi moröŋi yahöt ki daŋön daŋön?”

⁹ Qesim waŋgiiga Josefŋöŋ iwiŋaŋgöra kewö jiyök: “Nöngö nahönyahötŋi Anutunöŋ Ijpt kiangöreŋ niŋgiyöhi, i mönö mia. “Mewö jiiga Israelnöŋ jiyök: “Nöŋön kötuetköm etkimamaŋgöra i ölop etkuangitnöŋga nöngö kösutne kamahot.”

¹⁰ Mewö jiiga Josefŋöŋ nahönyahötŋi etkuangita kösutŋe kagetka böröŋi giliga imbiŋire geiga numbuŋiri yöhötim neyök. Israelnöŋ azi namŋi aiga jeŋi ömuŋ köluga yuai kun ek kutumamgö töŋpin aka osiyök.

* 48:4: Jen 28.13-14 * 48:7: Jen 35.16-19

11 Numbuniri yöhötüm namba Josefköra kewö jiyök: “Nöhön mutuk göhö jemesoholgi kunbuk geknangöra qahö al mamböta malalmö, Anutunöy köna mesariga dölki nangi aka nahönyahötöki mewöyök engekzal.”

12 Mewö jiiga Josefnöy nahönyahötöji iwiñangö tambuneyök etkömemba simin köla bamgöba geyök.

13 Bamgöba geba wahöta nahönyahötöji böröñire memba etkuangiriga nannji iwiñangö wösöñe kayohot. Efraim mi böröñi ölñan memba Israelgö böröñi qaniñe ala Manase mi böröñi qaniñan memba Israelgö böröñi ölñe alök.

14 Mewö al etkiyökmö, Efraim munñi aiga asañan töndup böröñi ölñan böranda yangö nöropñe alök. Manasenöy Josefkö nahönñi mutukñi ahökmö, asañan töndup böröñi qaniñan yangö nöropñe alök. Mewö aka böröñi maripom ewö al kutuba nöropñire alök.

15 Mewö ala tata Josef kötuetköm wangiba kewö jiyök: “Asani Abraham aka iwini Aisak yetkön Anutugö jeñe anda kaba aka memba malohot. Nöhön asuhuba mala korali, Anutunöy mönö naliñgöreñ pöndañ köyan köñ ningiba mala korök.

16 Suetp garatanöy ni bölöñi pakpak miangöreñök meköba angön köñ ningiba malöhi, yangön mönö azi gwabö yahöt ki kötuetköm etkiba malma.

Ambazipnöy yetkö qetñiri qetketka miangön mönö ni aka iwi asani Aisak aka Abraham neñgö qetbuñanini bisiba malmahot.

Yetkö könagesöñiran mönö gölme qakñe önöñi qahö sehiba malme.”

17 Mewö jiyökmö, Josefnöy iwiñan böröñi ölñan Efraimgö nöropñe ali mi ehi dop qahö köliga miangöra möt böliba iwiñangö böröñi ölñe memba Efraimgö nöropñeyök meköba Manasegö nöropñe almamgö ahök.

18 Mewö aka iwiñangöra kewö jiyök: “Iwini, mewö kude aknöy. Morö kianön nahöni mutukñi akza. Miangöra börögi ölñan mönö yangö nöropñe alnöy.”

19 Mewö jiyökmö, iwiñan mi akñamgö qetala Josef kewö jii mörök: “Nahöni, mi ölop mötzal. Nöhön mi mötzal. Manasenöy mewöyök qetbuñanambuk aiga yangö gwölönarökurupñan mewöyök ahumsehip aka könagesö ketañi akñemö, Efraimgö qetbuñan mönö Manasegöreñ qetbuña ongita ahöma. Yangö gwölönarökurupñan mönö ahumsehip ketañi aka könagesö kambunji kambunji gwötpuk aka malme.”

20 Mewö jii möriga silim miangöreñök kötuetköm etkiba kewö jiyök: “Israel yeñön mönö etkö qetñiri qeta könagesöñini kötuetköm engiba kewö jime: Anutunöy mönö oyaenköyaen ak enjiiga enön Efraim aka Manase ewö akñe. “Mewö jiba Manase mi Efraimgö nembö bapñe alök.*

21 Israelnöy kötuetköm enji teköiga Josefköra keu kewö jiyök: “Mötnöy, nöñön kömumamgö akzalmö, Anutunöy embuk mal öngöma. Yangön mönö enkuangiriga iwi asaurupñini yengö gölmenöy lilingöba anme.

22 Miangöreñ anda sutñine gölme mesingetka nöñön göhö gölmeji toroqeba Sekem gölme kelökñambuk mi gihizal. Nöhön kukundu gölme mi Amor könagesö yembuk bim qeba nani timbi aka bimgö sou ketañi miangön yengöreñök meal. Josef gi darumunurupki yengö bohönñini akzanangöra mi darumunurupki yengöra qahöpmö, göhö buñaya jim teköbi ahöma. “Mewö.

49

Jeikobnöy nahönurupñi kötuetköm enjiyök.

* 48:20: Hib 11.21

¹ Mianğö andöñe Jeikobnön nahönurupñi enğoholi kagetka keu kewö jiyök: “Inini mönö öröm tokogetka nöñön malmalñine könanğep denöwö asuhumawi, mianğö kezapqetok keuñi indela jibi mötme.

² Jeikobkö nahönurupñi, inini mönö kaba tokoba iwiñini Israelğoren keu kezap ala mötket.

³ O Ruben, göñön nani nahöni mutukñi akzan.

Göñön nöñgö ösum-mumuni aka ambi membiga ösumnañgö ölni mutukñi asuhunöñ.

Qetbuñagahö aködamunñi aka kukösumñi mianñön mönö munurupki yeñğoren enğonğitza.

⁴ Luhutnön köwet siri kunduriga kalöpmalöp anda kamakzawi, göhö urugan mönö mianğö dop wahöri kalöpköba lañ anda kamakzan.

Göñön iwiği nöñgö ahöahö dumne öñgöba qömböñne qeba anömnambuk ahönöñga dum mianñön mönö anğöjörakñambuk aka tölohoyök.

Mianğöra göhö qetbuñagahö aködamunñan mönö munurupki qahö toroqeba enğonğita ahöma.

⁵ Simeon aka Liwai yetkön darumuna akzahot.

Yetkö timbi liñgip nupñiran mönö kegwek kahasililiñ kondorakza.

⁶ Yetkön irimsesewöl qakñe azi enğuyohot kömugetka öne töhön sihimnañğöra bulmakau azini miengö köna börö yuainini lañ enğum yandiyohotka porin aket.

Mianğöra yetkön keu goro jöhömakzahori, nöñön miambuk urumohot qahö ahakzal.

Totoko almahori, nöñön mianğoren yetpuk qahö toroqeba tatmam.

⁷ Urukazikñiran könöpnambuk akzawañğöra i jim qesuahöm etkizal.

Urusingokñiran kanjamñambuk akzawañğöra i jim jörahöm etkizal.

Nöñön könagesöñiri könden enğibiga yeñön Jeikobkö gölme dop köla anme.

Nöñön menden enğibiga yeñön Israel sutñine lañ lalöpköba malme.

⁸ O Juda, göhö darumunurupkan gi möpöseim gihiba malme.

Göhö börögan mönö kerökurupki yeñgö imbi jölñine tatma.

Iwigahö nahönurupñi yeñön mönö göhöra geba simin köla malme.

⁹* O Juda, göñön laion gwaböñi ewö maljan.

O nahöni, gi böröjan suhuba sömbup qem nemala mianğorenök lilingöba kazan.

Yañön laion ewö silenji al kötöteiba laion ambiñi ewö eta köla ahömakza.

Körekan i suahö aka utuba möndöbingö keñgötñini mörakze.

¹⁰ Kukösumgö aiwesökñi mi kunñan Juda yeñgö böröñineyök qahö enğuanğitma.

Azi kembangö öröpnan könanji sutñire kiniga kunñan mi qahö qeköma.

Nannji aka gwölönarökurupñan jakömbuak dumñe tata mal öñgögetka könanğep kunöñ asuhuiga könagesö kambuñi kambuñi yeñön yañgö jitñi tem köla malme.

¹¹ Yañön donñi wain ip kembangö jöhöi kinma.

Donñi moröñi mi wain kösö sutñire gwaröhöiga ahöma.

Yañön oponji mi wain onjan sanğonma.

Malukuñi mi wain kötñanğö sepñe kusahöla közöhölma.

¹² Wain o neiga jeñan wain onji ewö pisihiba injan kölma.

Juzu onji neiga jitñan juzu onji ewö tuarima.

¹³ Zebulun könagesö yeñön köwet jitñe malme.

Yeñgö gölmenöñ wañgenji wañgenji surumakñe.

Gölmeninañgö jaböñi mianñön mönö Saidon taonöñ göröken anda ahöma.

* 49:9: Jan 24.9; Ind 5.5

- ¹⁴ Isakar mi donki sihitni kotkotni miangö dop akza.
Donki qakne dum tatatkö gösöni yahöt mietkö sutnjire al kötöteiba lokoliba sölonnda ahömakza.
- ¹⁵ Lokoliba sölonnda luhut memba ahöiga dum mirinji mi ölop dop köliga gölmenjan sihim kötökni akna.
- Mi eka andöni yuai lömbötñi anqumamgöra sipköba geiga tosatñan welenqeçe nup memapköra kuñguba jöhöm wanqime.
- ¹⁶ Tosatñan Dangö könagesöurupñi mulungöm engigetka Dan yanñon mönö awörök aka keu diñdiñangöra bim qeba malma.
- Dan kambu yeñon Israelgö kambu tosatñi i ewö aka malme.
- ¹⁷ Dan yanñon qatö mokoleñ ewö könanöñ ahöba hosgö gwakötñe yöhöiga töwöratiba giliga qakne tatmawanñon mönö tala andöandö gölmenöñ gema.
- ¹⁸ O Kembu, göñon ni kösö gwarönöhök meköba anqon köl niñgimangöra uba mambörakzal.
- ¹⁹ Kegwek kahasililin kambu yeñon Gad könagesö engum ohoba malmemö,
Gad yeñon mönö melennda könanine enquatanqöba nanñini engum ohoba malme.
- ²⁰ Asergö gölmenöñ nene möriam gwötpuk asuhumakna.
Kiñ yeñon nene nahömñinambuk nemakzei,
yanñon mönö nene mewöñi mi gölmeñe kömöt sehiba mianñon tosatñi bauköm engiba malma.
- ²¹ Teunöñ sihimñangö dop ösumñan lañ lalöpkömakzawi,
Naftalinöñ mönö miangö dop aka moröurupñi engeksihimñinambuk enqömemba malma.
- ²² Wain ip o jeñangö kösutñe kömötketka kötñi gwötpuk kuñguba böröñi giliga anda sel qösököba yaigep anakzawi,
Josefnöñ mönö miangö dop akza.
- ²³ Yangö kerökurupñan timbi jaugemñini memba urukönöp qakne Josefkö kambu mi enquatanqöba engeriba engum ohoba malme.
- ²⁴ Mewö malmemö, Jeikobkö bemñi Anutu kukösumñambuk yangö böröñan mönö mem köhöim wanqiiga
yanñon timbi töhötñi qahö mosöta börö sihitni kakñi qahö qeiga malma.
Anutu yanñon mönö urugö lama galömñi aka Israelgö anqönkölköl Toñi akza.
- ²⁵ Iwigahö Anutuñan mönö bauköm gihiba malma.
Bem kukösum pakpakö Toñan mönö kewö kötuetköm gihiiga malman:
Kiegö kötümötuetñan mönö könakembayök göhöreñ eriga gölme dutñi emuyangö onan göhöreñ koriga nahönbörat aka sömbup gwötpuk miwikñaim engiba malman.
- ²⁶ Kunduñi kunduñi mienqö kötümötuetñinan nalöñi nalöñi ambazip dop köl enqii mala kotket.
Kunduñangö sörokñe yambu dop nene nupñini memba malgetka nene möriam asuhui mala kotketmö,
göhö iwigahö kötümötuetñan mönö mi pakpak onqitza.
Kötümötuet mienñon mönö Josefkö nörop qakne onqöme.
Darumun sutñine pom jembon tök-kutukutuñi akzawangö malmalñe mi pakpak mönö ahöm onqöme.
- ²⁷ Benjamin mi kiam kalñi ewö akza.
Söñan dop böröjan suhuba sömbup enquba nem gwahöt enqimakza.
Silimnöñ yuai kiom qemakzawi, mi sunqem dop mendenmakza. “Mewö.

²⁸ Israelgö kambu pakpak jaŋgöŋini 12 mi mewö. Iwiŋinan kötuetköm eŋgiba keu mewö mewö jiiga mötket. Kötümötuetŋini murutŋi murutŋi mi nanŋök nanŋök mendenŋa körek kötuetköm eŋgiyök. Mewö.

Jeikobnöŋ kömuyök.

²⁹ Kötuetköm eŋgiba kindu keu kewö jim kutum eŋgiyök: “Anutunöŋ mönö noaŋgiri nöŋön isik alaurupnan kömugeri, yembuk toroqemangö akzal. Nöŋgö qamötŋi mi mönö iwiurupni yeŋgö qöhöröŋine baŋet Hit azi Efrongö gölme köröŋe ahözawi, miaŋgöreŋ löm köl niŋgime.

³⁰ Baŋet mi Keinan gölmenöŋ Makpela gölme köröŋe Mamre kösutŋe ahöza. Abrahamnöŋ gölme köröŋi baŋetŋambuk mi isikninaŋgö qaksiriŋi ahömapköra Hit azi qetŋi Efron yaŋgöreŋök söŋgöröŋi meyök.*

³¹ Abraham aka anömŋi Sara mi baŋet miaŋgöreŋ löm köl etkiget. Mewöyök Aisak aka anömŋi Rebeka mi miaŋgöreŋ löm köl etkiget. Nöŋön toroqeba Lea miaŋgöreŋ löm köl waŋgial.*

³² Abrahamnöŋ gölme köröŋi baŋetŋambuk mi mutuk Hit yeŋgöreŋök bohonŋi meiga ahöza.”

³³ Jeikobnöŋ nahönurupŋi keu mewö jim kutum eŋgim teköba könayahötŋi öroi ahöahö dumnöŋ öŋgöiga nöŋ qeba kömuiga Anutunöŋ waŋgiri isik alaurupŋi yeŋgöreŋ toroqeyök. Mewö.*

50

Jeikob löm kölget.

¹ Jeikobnöŋ kömuiga Josefnöŋ luhuba iwiŋi kepölaköm waŋgiba lipköba anda imbiŋi gili geiga numbuŋi yöhötüm neyök.

² Miaŋgö andöŋe Josefnöŋ doktaurupŋi jimkutukutuŋaŋgö bapŋe malgeri, mi iwiŋaŋgö qamötŋi sile mem köhököhöi kelöknöŋ mirimegöra jim kutum eŋgiyök. Jim kutum eŋgiiga yeŋön Israelgö qamötŋi mewö ak waŋgiget.

³ Nup mi memba malgetka wehön 40 jömuk teköyök. Qamötŋi kelöknöŋ mirizema, miaŋgö nupŋi mi nalö köröpŋi mewö memba maljema. Ijpt könaŋesö yeŋön Jeikobköra wehön 70:gö dop jiŋgeŋ köla sahöta malget.

⁴ Sahöta jiŋgeŋ köla wösöbirik malgeraŋgö nalöŋi miaŋön teköiga Josefnöŋ Farao kiŋgö jakömbuak mire nup memba malgeri, yeŋgöra keu kewö jiyök: “Nöŋön eŋgö jeŋine ak-kömukömu miwikŋaial ewö, iŋini mönö nöŋgö jütne memba Farao kiŋgöra keu kewö jigetka mötma:

⁵ *Iwinan jebuk mala keu kewö jöhöba jöjöpap keunöŋ jim köhöimangöra jim kutum niŋgiyök: ‘Nöŋön kömumangö akzal. Ni nanaŋgöra köt köteŋ Keinan gölmenöŋ esibi kinjawi, nöŋgö qamötŋi mi mönö miaŋgöreŋ anda löm kölman.’ Miaŋgöra ölop merak jinöŋga nöŋön miaŋgöreŋ anda iwiŋaŋgö qamötŋi löm kölangun kunbuk liliŋgöba kamam.”

⁶ Mewö jii jigetka Farao kiŋnöŋ mi möta kewö jiyök, “Gi iwigahöra keu jöhöba jöjöpap keunöŋ jim köhöinöŋi, miaŋgö dop ölop anda iwigahö qamötŋi löm kölman.”

⁷ Mewö jiiga Josefnöŋ iwiŋaŋgö qamötŋi löm kölmamgöra öŋgöyök. Farao kiŋgö jembonurupŋi qetbuŋaŋinambuk pakpak, jakömbuak miriŋaŋgö aka Ijpt kantrigö jütŋe memeurupŋi qetbuŋaŋinambuk mi körek yambuk mohotŋe anget.

* 49:30: Jen 23.3-20 * 49:31: Jen 25.9-10 * 49:33: Apo 7.15 * 50:5: Jen 47.29-31

8 Josefko mirigö saiwaurupni körek pakpak, yangö darumunurupni aka iwiñangö könagesourupni yeñon mewöyök mohotne anget. Anöm-morourupnini, lama, meme aka bulmakau kambuñi kambuñi miyök mönö engömosötketka Gosen gölmenöñ tatket.

9 Hosgö karenji karenji aka azi hos qakñine tatkeri, mi mewöyök anget. Mewö mindiriba kambu keta bölökñi anget.

10 Anda mala Jordan o kutuba likepne toroqeba anda Atad mire wit padigö ölni aka kamböñi mendennda kewotkeri, miri gölme miangören angota köhöikñanök jingen köla silata sahöt böliba malget. Josefnöñ iwiñangöra wehön 7:gö dop jingen köla sahöta malök.

11 Atad mire jingen köla sahötketka gölme tonji Keinan könagesö yeñon mi eka möta kewö jiget, “Ijpt yeñon jingen sahötkö arenji öngöñgöñi alje. “Mewö jigetka miri gölme miangö qetnji mi könahiba Abel Mizraim * qetket. Mi Jordan ogö wehön kotkotne ahöza.

12 Jeikobnöñ nahönurupni jim kutum engiyöhi, yeñon miangö dop mewö ak wangiget.

13 *Yeñon qamötñi anguba Keinan gölmenöñ anda Mamre kösutne Makpela gölme köröñe banet ahözawi, miangören anda löm kölget. Abrahamnöñ mutuhök gölme köröñi banetñambuk mi qaksiriñini ahömapköra Hit azi Efron yangörenök söñgöñi meyök.

14 Josefnöñ iwiñangö qamötñi löm köli teköiga nannji, darumunurupni aka tosattji pakpak yambuk iwiñangö qamötñi löm kölbingö angeri, mienön kunbuk Ijpt gölmenöñ lilingöba kaget. Mewö.

Josefnöñ likepni qahö melenmamgö kunbuk jiyök.

15 Josefko darumunurupñan iwiñinan kömuiga mi eka tata kewö mötmöröba jiget: “Josefköra silik bölöñi pakpak ak wangiiini, yeñon miangöra urukondum möt nenñgiba nalö kewöñe könahiba likepni melen nenñgibapuk.”

16 Mewö jiba Josefköra keu jit kewö algetka anök, “Iwigan kömumamgö aka nenñgöra keu kewö jim kutuyök:

17 “Inini mönö Josefköra keu kewö jigetka mötma: Darumunurupkan silik bölöñi aka ayuhum gihibingö akeri, göñon mönö yeñgö singisöndokñini aka kahasililiñini mi mosötman. Miangöra göñon ölop iwigahö Anutunangö welenqequeurupni nenñgö singisöndoknini mosötman. “Yeñon keu jit mi algetka Josefkören kaiga möta mönö qeta sahörök.

18 Miangö andöñe Josefkö darumunurupñan nanninak kaba gölmenöñ tala wösöñe sipköba eta kewö jiget: “Mötnöñ, nini göhö welenqequeurupki omani akzin.”

19 Mewö jigetmö, Josefnöñ melennda kewö jiyök: “Mönö kenñgötñini kude mötme. Nöñon Anutugö salupne qahö kinjal.

20 Ölña, enñon silik bölöñan ayuhum nenñgibingöra kapan köla aketmö, Anutunöñ mi möñaiiga salupne yuai ölopñi asuhumapköra kapan köla ahök. Mewö aka kondota kuñgum nenñgiiga könagesö gwötpuk engö malmalñini jöhöbiga miangö ölñan nalö kewöñe aukne asuhuiga ek kutuzin.

21 Miangöra mönö kenñgötñini kude mötket. Nöñon mönö nannini aka anöm-morourupnini engö malmalñini körek nanñgöm enñgiba malmam. “Mewö jiba bölöñamñinangö likepni qahö melenmamgö kunbuk jim köhöiba guñböñjñöñ ak enñgiyök. Mewö.

Josefnöñ kömuyök.

* 50:11: Abel jingen sahötkö arenji. Mizraim Ijpt. Hibru keu mewö. * 50:13: Apo 7.16

²² Josefnöŋ iwiŋangö könagesöurupŋi yembuk toroqeba Ijpt gölmenöŋ malget. Josefnöŋ mal öngöiga yambuŋi 110 aiga kömuyök.

²³ Josefnöŋ isi amböurupŋi Efraimgöreŋök asuhugetka mi engehök. Mewöyök Manasegö nahönŋi Makir yangö nahönböraturupŋi asuhugetka Josefkö tambuŋe al engigetka dohongöm engyök.

²⁴ Miangö andöŋe Josefnöŋ darumunurupŋi yengöra keu kewö jii mötket, “Nöŋön kömumangö akzalmö, Anutunöŋ mönö köyan köl engiiga malme. Yanön inini gölme kiangöreŋök enguanŋita gölme Abraham, Aisak aka Jeikob yengö buŋaŋina akŋapköra jim teköba jöjöpaŋ keunöŋ jim köhöiyöhi, mönö miangöreŋ anda malme.”

²⁵ *Mewö jii mötketka Israelgö nahönurupŋan keu jim jöhöba jöjöpaŋ keunöŋ kewö jim köhöimegöra jim kutum engyök: “Anutunöŋ köyan köl enyii malgetka nöŋön kömumbiga nöŋgö sihitni mi mönö gölme kiangöreŋök aŋguba Keinan gölmenöŋ anme.”

²⁶ Mewö jiba yambuŋi 110 aiga kömuyök. Kömuiga Ijpt miangöreŋ qamötŋi mi sile mem köhököhöigö kelökŋan miriba qamöt bokisnöŋ algetka ahöyök. Mewö.

* 50:25: Eks 13.19; Jos 24.32; Hib 11.22

RUT

Rutkö sundutņi, Jöjöhö Walakņangö Buk jaņgö 8

Zöm-asa-asari

Aiwi kembu yeņgö nalöņe Israel yeņgö malmalņini mihi öņgöwa hetañanguk. Uruņini melengetka oyaenķoyaen malgetnöņ, miangö andöņe silekmalek malgetka heta heta sohoiga lömböt uruņe simbisembel malget. Mala miangö andöņe uruņini melenget. Mewö mewö hala malget. Rutnöņ nalö miangöreņ luaikö kōnaņi kundelök. Moab anbi yaņgön Israel aiwia meyök. Aiwi miangön komuiga Rutnöņ irañi Israel anbi yaņguk pōndaņ öröröņ jöhöwa Israelkö Anutuņi törörök qekötahöwa malök. Mewö mala kantriņi Moab mosota Israel uruņe kamba teteköņe apņi mutukņangö tinosolomurupņi yeņgö sutņineyök aiwi dölökņi kun miwikņaiwa meyök. Yetkö gulinarökņiri kunöņ kiņ Deiwidkö amböņi halök. Deiwid yaņgön Israel yeņgö kiņini qetbujaņi öņgöņgöņi malök. Deiwidkö gulinarökņi kun mihi Jisös. Rutnöņ yambu 1110-1100 bifo Kraist malök.

Aiwi kembu buk miangö sundutņi mienöņ malmalkö kōnaņi miewö kundelget: Anbazipnöņ Anutu andö qegetka nalö miangöreņ kahasililiņ kōndenmōdenē ketañan qakņine öņgöget. Rutkö sundutņan kōna miewö kundelja: Kian anbi yaņgön uruņi Israelkö Anutuköreņ melenđa mötnarip kōnagesönöņ toroqeiga kōtumötuetnöņ qakņe öņgöiga oyaenķoyaen halök.

Buk muyaņgö bahöņi bohonņi 3 miņgi miewö:

- 1) Naominöņ Rutkuk Betlehem lilingöyöwöt. 1.1-22
- 2) Rutnöņ Boazkuk aitöņgöyöwöt. 2.1-3.18
- 3) Boaznöņ Rut mihi anömnja meyök. 4.1-22

Elimelek hala saiwaurupņi yeņgön Moab anget.

¹ Walahok Israel uruņe kiņ kun qahö maliga aiwi kembu yeņgön kōnagesö galim köl engiwa malget. Nalö miangöreņ bödi hikņaiwa balöņ patpat söp köla ahöyök. Bödi nalö miangöreņ Juda aiwi kunöņ anömnji hala nahönweitņi engañgita taonņini Betlehem mosota kantri qetņi Moab miangöreņ anda dum tatatņini möhamgöwa kiana malget.

² Aiwi qetņi Elimelek, anömnji qetņi Naomi hala nahönweitņiri qetņiri Malon hala Kilion. Balöņini qetņi Efrata. Yeņgön taonņini Betlehem mosota Moab balöņnöņ anda miangöreņ malget. *

³ Miangöreņ malgetka Naomikö apņi Elimeleknöņ komuyök. Komuiga Naominöņ anbi malöya hala nahönweitņe malget. ⁴Nahönweitņi yetkōn mala qariwa Moabkö anbi weit qetņiri Orpa hala Rut †

⁴ miewö malget: Tamar, Rahab, Rut hala Batseba. Mat 1,3-6 etkömeyöwöt. Etkömeyöwötka toroqemba Moab balöņnöņ yambu 10:gö söp mala kutket.

⁵ Mala kuta nahönweitņi weit Malon ‡ hala Kilion yetkōn mewöyök komuyöwöt. Komuyöwötka namönņiri Naomi yaņgön apmeröņi qahö nanņök malök. Mewö.

Naomi hala Rut yetkōn Betlehem lilingöyöwöt.

⁶ Naominöņ nanņök Moab kantrinöņ mala nalö kunöņ buzup keu miewö zöget mörök: 'Kembunöņ kōnagesöņi baukōm engiwa Israel miangöreņ numbu

* **1:2:** Efrata mihi balöņ Betlehem liliköwa ahözawi, miangö qetņi. Rut 4:11; Jen 35:19; 1 Sml 16:18; Mai 5:2 † **1:3:** Rut keu miangö kōnaņi mihi 'ala-ala'. Jisöskö ambösakonurupņi yeņgö sutņine anbi ‡ **1:5:** Malon keu miangö kōnaņi mihi 'osumeret aiwi'

nene ölip miwikñaim engimamja.' Mewö möta Moab mosota Israel balöje lilingöwa anmamgöra mem mözözöm hali iranweitñi yetkuk wahötket.

⁷ Wahöta köhöm balöñ malöhi, mihi mosota Juda balöñnöñ lilingöwa anmamgöra haliga iranweitñi yetkuk mohotñe könanöñ anget.

⁸ Könanöñ andaga Naominöñ iranweitñi muewö etkezöyök: "Anbiweit, etkön mönö lilingöwa namönweitñiri yetkö köhömnöñ anda malmawöt. Etkön nöngö apmeröni komugeri hala ni nengöra ölipñanök ala hal nengiwa malöwötka Kembunöñ mönö miangö söp likepñi melenða ölipñanök hal komum etkiiga malme.

⁹ Kembunöñ ölip köna meiga inñiri aiwi kunduk etkömimba malmal tatatñiri yetkö köhömnöñ miwikñaiwa urusösöñgai qakñe malmawöt." Mewö zömba numbuñiri etköhötüm neyöknöñ, yetkön amburereñ hala silata sahöröwöt.

¹⁰ Sahöta muewö zöyöwöt: "Qahöwi! Niri mönö gowuk lilingöwa göhö könağesö kiripki yengöreñ anbin."

¹¹ Mewö zöyöwötka melenða muewö etkezöyök: "O iranweitni, mönö nöpaköra nonğuk kambitkö halzawöt? Nöngön kunduk merö nahönweit membiga qariyöwötka etkömembawörak me? Mewö römöngöwawörak ewö, miangön qahö söpköza. Qahöpmañ! Mönö dölmuhu lilingöwa anmawöt.

¹² Ni anbi namönñi halzalañgöra aiwi kunñan qahö nömima. O iranweitni, etkön mönö lilingöwa köhömnire anöwöt. Ni kunduk aiwi mamangö römöngöwa erap sunğem aiwi kunguk ahöwa köriğuk hala nahönweitni etkömembilenjak ewö, tondup mihi lömböriza.

¹³ Merö mietkön qariyöwötka apweitñira etkimangö mamböta malmawörak me qahöpto? Yetköra hala aiwi memekö könañiri jöhöm anğua nalö köriññi sutñi mihi mönö in malmawötkuk. Miñgi qahö söpköza. O iranweitni, mewö qahö. Kembunöñ birinñi börañda qeköm niñgiiga apnan komuiga miangöra malmalninan lömbörüiga nöngön etköra wösöjiniññi mötzal."

¹⁴ Mewö zöiga dumñe kunduk silata sahöröwöt. Sahöröwöt teköiga Orpanöñ iranñangö yaizözökñi zömba numbuñi yöhötüm namba elenða köhömnje anök. Orpanöñ anöknöñ, Rutnöñ kapañ köla sele köpañe mösölatiyök.

¹⁵ Mewö mösölatiiga Naominöñ muewö ezöyök: "Mötnöñ, kasungan anja. Yangön nanñi bemñi hala nanñi anbazip kiripñi yengöreñ anja. Gi mönö mewöñanök elenða köhömenge anöñ."

¹⁶ *Mewö zöyöknöñ, Rutnöñ tondup muewö melenñök: "Ni gi gomosotmamgö de kapañ köla zöman. Ölip zönöñga gowuk anbit. Gi denike denike anmani, nöngön mönö mewöyök gowuk miangöreñ anmam. Gi denike denike malmani, nöngön mönö mewöyök miangöreñ malmam. Göhö anbazip kiripki miñgi mönö nöngö anbazip kiripna halgetka göhöreñ Anutu mihi mönö nöngöreñ Anutuya hali malmam.

¹⁷ Gi denikeangöreñ komumani, nöngön mönö mewöyök miangöreñ mohok komumbi löm köl niñgimeköra mötzal. Keu mihi muewö zöm köhöimam: Komup mohotnöñ mönö mendeñ netkima. Iwai mörötñi kunöñ mendeñ netkima ewö, Kembunöñ ölip miangö likepñi melenñiga nöngö qakne öngöma."

¹⁸ Mewö zömba yanguk anmamgö köhöikñanök kapañ köliga ekta möt qitiwa miangö keuñi kunduk qahö zöyöknöñ,

¹⁹ mohotñamñire anda mala Betlehem taonöñ kauröwöt. Kauröwötka taongö anbazip patpat yengön i etkekta sösoñgai ketanñi möta tokoget. Anbi

* 1:16: Rut 2.11-12; 2 Kin 2.2-6

yengön qeta Naomikö yaizözökñi miewö zöget: “Hei! I halakña Naomiya me denöwö? Oe oe oe!”

²⁰ Mewö zögetka Naominöñ miewö zöyök: “Nöngö qetni Naomi miñgi in de qetme. Ni urusösöñgai anbia qahö. Anutu kukosum Touñan mönö kondot niñgiiga urukombuk möta malzal. Mianğöra nöngö qetni Mara qetketka söpköma. §

²¹ Nöngören iwai kombunji ahöiga mutuk taon muhu mosota analnöñ, erap Kembunöñ nanğiriga biribörak lilingöwa omanje kazal. Kembu kukosum Touñan keuni kewöta mem kirehöm niñgiiga köñjilin qakñe malzal. Mianğöra qetni Naomi mihi in de qetme.” Mewö.

²² Naomi hala iranñi Rut, Moab anbi mianğön Moab mosota Betlehem taonöñ kayöwöri, nalö mianğören anbazipnöñ könahiwa padikö alanji bali miñgi nupñine koholget.

2

Rutnöñ Boazkö nupnöñ bali qendañök.

¹ Naomikö apñi Elimelekö isik uruñe tinitosolomñi aiwi qetbunañanjuk kun qetñi Boaz malök.

^{2*} Nalö kunöñ Moab anbi Rut yanğön iranñi Naomikö miewö ezöyök: “Ölip zöm tekönöñga nöngön nup kunöñ anda anbazip bali ipñi kohola iriremönñi mosoramjei, mihi qendañda tokomam. Ni ölip aiwi kungö jeñe eksihim miwikñaiwiga ‘Oñ!’ zöiga ölip yanğö andöñe anda mihi tokomam.” Mewö zöiga Naominöñ zöyök: “O bōratni, ölip anman.”

³ Mewö zöiga mosota nup kun dahören nuwa, mihi qahö mötaga tondup lañ anda kinda bali koholgetka yengö andöñine anda ipñi mohok mohok qeqelanlañ heta ahögeri, mihi qendañda qendañda anök. Nup köriñe anöhi, mihi Boaz, iranñi Elimelekö isiknöhök kun yanğören nuwa ahöyök.

⁴ Yanğön dölmuhu Betlehemök kauta nup anbazipñi engeikta yaizözökñini miewö zöyök: “Böñjön! Kembunöñ enguk malma.” Mewö zöiga melenja miewö qetket: “Kembunöñ mönö kötuetköm gihima.”

⁵ Mewö qetketka Boaznöñ nup galimñi miewö qesiyök: “Anbi mihi dahön?”

⁶ Mewö qesiiga miewö melenjök: “Anbi mihi köriwengöra. I Naomiguk Moab kantrinöhök kayöwöt.

⁷ Yanğön söñan hömandiñe kamba qesim niñgiiga ölip zömbiga nup anbazip yengö könañine engohorata bali ipñi qendañda tokoza. Nup pöndañ memba malzawa döldimuhu koumnöñ endu anda luhut memba tatza.”

⁸ Mewö melenjiga Boaznöñ Rutköra miewö zöyök: “Bōratni mötnöñ, nöngön keu goroya kun gihimam: Gi nup muhu de mosota tosatñi yengö nupñine qahö anda bali memba tokoman. Mönö nöngö welenqeçe anbiurupni yenguk mohotñe muyanğören qendañda malman.

⁹ Ni nup aiwiurupnan gömisiriwekuköra songo halzal. Nup denike denike anda padi koholmei, gi mönö mianğö jegalim hala yengö andöñine anda anbi yenguk malman. Ouganğö mötman ewö, welenqeçe yengön ou köwöranğenöñ huzei, ölip mianğören anda ou neman.”

¹⁰ Mewö zöiga Rutnöñ mihi möta balöñnöñ gewa bamğöwa Boazköra miewö zöyök: “Ni denöwököra kian mala tondup göhö jege halkomukomu miwikñaiwiga mewö köyan köl niñgizan?”

§ **1:20:** Qet weit mihi Hibru keu könañiranjuk. Naomi urusösöñgai. Mara urukombuk. * **2:2:** Lew 19.9-10; Dut 24.19

¹¹ Mewö zöiga miewö melenök: “Nöngön göhö ambamemegangö sundutji mihi körek zögetka mötzal. Göhön apkan komuiga irangi ölip galim köla mala kutnöñ. Göhön namönmamgi hala hikñaihikñai kantrigi mihi mosota anbazip walak qahö möt nenginöñi, nengö sutñine kamba malzan.

¹² Göhön saiwaurupki ölipñi hal enginöñga Anutu Israel nengö Kembuninan mönö miangö töwañi gihima. Kuruknöñ ginginñan meröurupñi kölközizip hal engimamjawi, miangö söp göhön Anutukö aumñe malmamgöra muhu kanöñ.”

¹³ Mewö zöiga Rutnöñ miewö melenök: “Ketañamni, ni göhö nup meme anbiurupki yengö söp qahöpnöñ, göhön tondup ölipñi hal ningizan. Göhön keu nungunöñga seleni pösatza.” Mewö melenök.

¹⁴ Numbu nene nalöñan kaiga Boaznöñ Rutköra miewö zöyök: “Ölip muhu kamba bered munju memba kasaknöñ kundungöwa neman.” Mewö haliga nup anbazip yenguk tariga Boaznöñ bali ohomqitiqitiñi mihi wañgiyök. Mihi wañgiiga neiga tomenji juliga nene tosatñi mosota tarök.

¹⁵ Tata wahöta anda toroqemba bali ipñi qendañniga Boaznöñ nup aiwaurupñi miewö zöm qitim engiyök: “Yañgön bali ipñi mihi böran miengö sutñine miangöreñ mewöyök qendañda tokoma ewö, injini mönö keu töhöreñ de zöm wañgime.

¹⁶ Mewö qahöpnöñ, bali ipñi tosatñi mihi börañineyök mewöyök höröwa halget heriga kamba nanñangöra mem tokoma. Injini i de zöm wañgime.”

¹⁷ Mewö zöm qitim engiiga Rutnöñ bali ipñi qendañda tokoi öngöiga hölñi hala kamböñi mendeñ etkimangö sapak kerinanguknöñ humba qörörengöwa gösiiga hölñi gösö karömbötkö söp (36 lita) haliga köhöm sinñingöwa kayök.

¹⁸ Mewö haliga bali hölñi mihi memba taonöñ lilingöwa kamba dawik qendañda malöhi, mihi iranñi kundel wañgiyök. Miangö andöñe nene söpñe memba tosatñi mosoröhi, mihi mewöyök ujeta wañgiyök.

¹⁹ Mihi wañgiiga miewö qesim wañgiyök: “Gi erap denike anda bali qendañda memba malzan? Dahö nup uruñe nup memba malzan? Aiwi galim köl gihizawi, Anutunöñ mönö i kötuatköm wañgima.” Mewö zöiga dahö nupnöñ nup memba malöhi, yañgö sundutji Naomiköra zömba miewö zöyök: “Ni erap aiwi kunguk nup memba malzali, yañgö qetñi mihi Boaz.”

²⁰ *Mewö zöiga Naomikö elemñi heriga miewö zöi mörök: “Kembunöñ mönö Boaz kötuatköm wañgima. Kembunöñ hal komum nengimangö keu jöhöyöhi, miangö söp mönö pöndañ apmeröurupnan komugeri hala nini erap muhu malzini, nengöra halkomukomuñi qahö jöhöwa malza.” Toroqemba keu miewö zöyök: “Aiwi mihi nanini tinitosolomnina hala isikninañgö sohopñi meme aiwia. Miangöra yañgön mönö ölip galim köl nengima.”

²¹ Mewö zöi möta Moab anbi Rutnöñ miewö zöyök: “Keu kun toroqeba miewö zöi mötzal: ‘Gi mönö nöngö nup meme anbazip yenguk nömtik malnöñga nöngöreñ bali patpat mihi kohol teköme.’ ”

²² Mewö zöiga Naominöñ miewö zöyök: “O böratni, mihi ölip. Gi tosatñi yengö nup köriñine anöñga silik kirekñi hal ghihiwekuk. Miangöra gi ölip Boazkö nup meme anbi yenguk anda nup memba malman.”

²³ Mewö zöiga Rutnöñ Boazkö nup meme anbi yengö kösutñine nömtik mala hölñi qendañda tokowa maliga bali hala wit mietkö koholkohol nalöñiran teköyök. Teköiga toroqemba iranñi Naomiguk malöwöt. Mewö.

3

Rut hala Boaz yetkön bali nupnöñ aitonöyöwöt.

* 2:20: Lew 25.25

¹ Nalö tosatni teköiga Naominöŋ iranŋi Rutkö miewö zöyök: “O bōratni, ni ölip aiwi kun batökōwa miwikŋaiwiga galim köl gihiiga yaŋguk sösōŋgai qakŋe köhömgı nangöhök tatman.

² Gi nup meme anbi yenguk mösölatiwa malnöŋi, yengö galimŋini Boaznöŋ mönō nanini tinitosolomnina halza. Mötnöŋ, yaŋgōn erap suŋgem baliqeŋe sombemnöŋ gewa bali hölŋi hala kamböŋi menden etkimamgōra sapak kerıŋaŋguknöŋ humba qöröreŋgōwa kewötma.

³ Mıaŋgōra gi mönō dölmuhu ou ariwa selegi kelök umköhöwakŋaŋguknöŋ miriwa opo sirigi löŋgōta baliqeŋe sombemnöŋ geman. Emu gemanöŋ, mutuk tikep malnöŋga numbu nenenı hala ougisipŋi nem dariga mıaŋgō andöŋe ölip yaŋgō jeŋe hikŋainöŋga geikma.

⁴ Gawöngö möta heta denike höl köla ahömawi, mönō mıŋgi ekta mıaŋgōren anman. Kölközizip gihimapkōra qesimani, mıaŋgō kaisöpsöpŋi mönō miewö halman: Gi yaŋgō qöhöröŋe anda könaŋe göröken esu kitipŋi menöŋ wahōriga gewa ahōman. Mewö ahönöŋga miwikŋaim gihiwa denöwö halmani, mihi gezōiga mötman.”

⁵ Iranŋan mewö zōiga Rutnöŋ miewö meleŋnök: “Keu patpat zözani, nöŋgōn mihi ölip hal datmam.”

⁶ Mewö meleŋda baliqeŋe sombemnöŋ gewa iranŋan zöm qitim waŋgiyöhaŋgö söwök miewö hal teköyök:

⁷ Boaznöŋ suŋgem numbu nenenı hala ougisipŋi nem dari kip seleŋi mem kolihıga wahōta bali kirip kungö gōraŋe gewa gawōn ahöyök. Mıaŋgōren ahōiga Rutnöŋ ölöŋ zaŋ qemba anda könaŋe göröken esu kitipŋi mei wahōriga mıaŋgōren gewa ahöyök.

⁸ Ahōiga suŋgem hömbiwiŋe iwai kungōra outupŋe tiiga imbiŋi möta eleŋda anbi kun könaŋe ahöyöhi, mihi miwikŋaiwa ekta hauruyök.

⁹ Hauruwa qesim waŋgiyök: “Gi dahön?” Qesim waŋgiiga miewö meleŋnök: “O ketaŋamni, ni Rut, göhö welenqeŋe anbia. Göhön nangi isikaŋgö sohopŋi meme aiwia halzan. Mıaŋgōra Juda engö ambamemenıni wuatangōwa ni ölip galim köl niŋgiwa esugan turum niŋgiman.”

¹⁰ Mewö meleŋnıga miewö zöyök: “O bōratni, Kembunöŋ mönō kötuetsköm gihima. Gi ölip aiwi wanapŋi me pomŋi sukinapŋinaŋguk yengö andöŋine anbanaknöŋ, mewö qahö halzan. Gi walahok isikurupni ölip naŋgöm enŋiwa malnöŋa erap mihi onŋita silik ölip sorokŋi halzan.

¹¹ O bōratni, gi mönō torok de hala bönjöŋ malman. Gi anbi ölip sorokŋi halzani, mıŋgi taongö anbazip körekŋan ölip mötze. Mıaŋgōra gi ikö me waikö qesim niŋgimani, nöŋgōn mihi ölip hal teköm gihimam.

¹²* Ni göhö tinitosolomgi hala galim köl gihimamaŋgö söp halzal. Keu mıŋgi hölŋapnöŋ, aiwi kunöŋ nöŋgö isiknaŋgö sohopŋi meme aiwi bohonŋi halza. Nöŋgōn yaŋgö qerembenı miyök malzal.

¹³ Mewökōra ölip suŋgem muhu miewö ahōman. Sohop meme aiwi bohonŋan uran bohongi memaŋgö zömbawak ewö, mihi ölipnöŋ, bohongi memaŋgö qahö mötma ewö, nöŋgōn ölip bohongi memam. Keu mihi jöhōwa Kembukö qetŋe jöjöpaŋ keunöŋ zöm köhöizal. Mıaŋgōra ölip bönjöŋ ahönöŋga söŋan halma.”

¹⁴ Boaznöŋ mewö zömba anbi kunöŋ baliqeŋe sombemnöŋ yaŋgōren heröhi, kunŋan mihi mötpakukōra mörök. Mıaŋgōra Rutnöŋ Boazkö könaŋe heta ahöyöknöŋ, waŋgeraŋ suluıga nalö mıaŋgōrenok kunŋan i qahö ek qitiıga ölöŋ anmapkōra wahörök.

* 3:12: Rut 2.20

¹⁵ Wahöriga Boaznön miewö zöyök: “Mönö malukugi selegeyök meköwa mererenöwa memba kinön.” Mewö zöiga meköwa memba kiniga bali kötni 25 kilogramgö söp kewöta mokoi geyök. Geiga memba köbibihiwa Rutkö hawötne haliga hanöwa lilingöwa taonön anök.

¹⁶ Rutnön mewö taonön anda irannangören angoriga miewö qesiyök: “O bōratni, denöwö mala kazan?” Mewö qesiiga Boaznön yangö iwai patpat halöhi, miangö sundutni zöi mörök.

¹⁷ Möriga miewö toroqemba zöyök: “‘Gi irannangören biribōrak de anman,’ zōmba bali muᅇgu niᅇgiza.”

¹⁸ Mewö zöiga Naominön miewö zöyök: “O bōratni, aiwi mianön erap in luhut qahö memapnön, keugi galim köla maliga mihi mindiᅇgöget teköiga miangö andöne ölip tata luhut mema. Miangöra gi mönö ösön mamböta tata keugi denöwö zögetka hikᅇaimawi, mihi mötman.” Mewö.

4

Boaznön Rut anömᅇa meyök.

¹ Boaznön taongö kiripo nanᅇne anda qenjarök sombemnön heta tarök. Tariga isikᅇangö sohop meme aiwiköra keu zöyöhi, yangön kamba onᅇitmamgö haliga yangöra miewö qerök: “O alani, gi ölip muhu kamba heta tatman.” Mewö qeriga kamba miangören heta tarök.

² Tariga Boaznön taonöhok jötne meme aiwi 10 engömiiga kagetka tatmeköra zöiga mohotne heta tatket.

³ Tatketka Boaznön isikᅇangö sohop meme aiwiköra miewö zöyök: “Nalö miewöne Naominön Moab kantri mosota lilingöwa kayöhi, yangön datnini Elimelekören balön kitipni mihi bohönᅇi memeköra halza.

⁴ Miangöra nöᅇgön miewö römöngözal: Göhön keu mihi mötmangöra göhöra zözal. Göhön isikᅇniranᅇo sohop meme aiwia halnöᅇga nöᅇgön göhö qerembengi halzal. Sohop meme aiwi mörötᅇni kun qahö malja. Miangöra göhön mihi bohönᅇi memangöra kuᅇᅇum gihizal. Göhön miᅇᅇi bohönᅇi memangö sihimᅇi mötman ewö, mihi ölip bohönᅇi memanön, mihi tököman ewö, ölip mihi mewöyök zönöᅇga mötmam. Mihi ölip aiwi muhu tatzei, yengö jeᅇine zöman. Mihi könagesö kiripnanᅇo jötne meme muᅇgu yengö jeᅇine zöman.” Boaznön mewö zöiga aiwi alanan miewö zöyök: “Nöᅇgön mihi ölip bohönᅇi memam.”

⁵ Mewö zöiga Boaznön zöyök: “Göhön Naomikören balön köriᅇi miᅇᅇi söᅇgörorᅇi memani, nalö miangören mönö Moab anbi Rut, aiwi komuyöhanᅇo malöᅇi miᅇᅇi mohok bohönᅇi meman. Mewö hala aiwi komuyöhanᅇo qetᅇan mönö birisamot balön miangören ahömapköra mihi galim köla malman.”

⁶ Mewö zöiga sohop meme aiwi bohönᅇan miewö melenök: “Mewö haliga nöᅇgön mihi bohönᅇi memangö osizal. Rutnön nani nahönbōratni yenguk mohotne birisamotni mendenᅇetka mohot mohot yengön balön kitipni merömerö miyök buᅇa qem anᅇuwekuk. Nöᅇgön mewö halmamgö osizal. Miangöra göhön ölip mihi söᅇgörorᅇi menöᅇga nangi buᅇaya halma.” Mewö melenök.

⁷ *Walahok Israel uruᅇe kunᅇan balön iwai bohönᅇi meiga buᅇaᅇi haliga mianᅇo keuᅇan köhöimapköra yengön silik miewö hala malget: Keu zöm teköwa jöjöhö halget teköiga yetkörenök kunön köna esuᅇi qeköwa alaᅇi waᅇᅇizapma. Israel yengön iwai bohönᅇi memekö keuᅇan teköyöhi, mihi silik mewö mianön kundelzema.

* 4:7: Dut 25.9

⁸ Miangöra aiwi mianjön Boazköra miewö zöyök: “Göhön mihi ölip söngöröñi menöñga bunagi halma.” Mewö zömba köna esunji qeköwa Boaz wanjiyök.

⁹ Mihi wanjiiga Boaznöñ jötñe meme aiwi hala könagösö patpat yengöra miewö engezöyök: “Nöñgön Elimelek, Kilion hala Malon yengöreñ iwai patpat miñgi Naomiköreñök söngöröñi mezal. Inini mihi erap jeqawa suluwa ölip nanğöwa zömeañgö söp halze.

¹⁰ *Nöñgön Moab anbi Rut, Malongöreñ malöya i miewöñanök bohonñi membi nöñgö anömna halma. Mewö hala aiwi komuyöhangö qetñan birisamot balöñ miangöreñ ahömapköra mihi galim köla malmam. Qetñan mewö qahö ayapkömapnöñ, gulinarökurupñan Elimelekö qetñi ölüm enguwakököra mihi ölip taon ofiskö bukñöñ ahöm öñgöma. Inini mihi erap jeqawa suluwa ölip nanğöwa zömeañgö söp halze.”

¹¹ *Boaznöñ mewö zöiga jötñe meme aiwi hala könagesö taongö kiripo nanğunje sombemnöñ tatkeri, yengön körek miewö zöget: “Nini mihi jeqawa suluwa nanğöwin. Kembunöñ ölip anömgi göhö köhömgge kamawi, i kötuatköm wanjiiga yanğön Reizöl hala Lea yetkö söp halma. Yetköñ Jeikobkö nahönbörorupñi kombunji engömeyöwötka Israel könagesöñinan hikñaiyök. Göhön ölip Efrata balöñnöñ jötñe meme aiwi pomñi hala Betlehem taonöñ qetbunaganjuk malman.

¹² *Kembunöñ anbi malö ramikñi miangöreñök gulinarök gihimawi, göhöreñ könagesö yengön mönö Juda hala Tamar yetkö nahönñiri Perez yanğö saiwakö söp hala malme.” Mewö.

Boazkö gulinarökurupñi yanğö qet areñ

¹³ Mewö hala Boaznöñ Rut wanğita köhömgge anda anömña meiga Kembunöñ kötuatköm wanjiiga köri hala nahönña meyök.

¹⁴ Nahönña meiga anbi yengön Naomiköra miewö zöget: “Nini Kembu möpöseizin. Yanğön erap isikanğö sohop meme aiwia gihizawa yanğön ölip galim köl gihiwa malma. Merö mianjön mönö Israel urunje qetbunaganjuk halma.

¹⁵ Göhö irangan jöpaköm gihimamja. Göhö nahönurupki 7 malweak ewö, yanğön mönö i patpat engonğita bauköm gihiwa malök. Yanğön erap isiga gihiiga yanğön mönö malmalgi kölöñaiwa uruöliwam qem gihiwa malma. Könanğep anbi namönñi halnöñga yanğön ölip galim köl gihiiga malman.”

¹⁶ Mewö zögetka Naominöñ merö mihi memba dohongöwa galim köl wanğiwa malök.

¹⁷ Anbi kösutñe malgeri, yengön miewö zöget: “Naomiköreñök isi nahönña hikñaiza.” Mewö zömba qetñi Obed qetket. Obedkö nahönñi Jesi, isiñi kiñ Deiwid.

¹⁸ Qet areñ muhu mei Perezköreñök könahiwa kinda Deiwidköreñ öñgöza: Perezkö nahönñi Hezron,

¹⁹ Hezrongö nahönñi Ram. Ramgö nahönñi Aminadab.

²⁰ Aminadabkö nahönñi Nason. Nasongö nahönñi Salmon.

²¹ Salmongö nahönñi Boaz. Boazkö nahönñi Obed.

²² Obedkö nahönñi Jesi. Jesikö nahönñi kiñ Deiwid. Mewö.

Jona

Jonagörenj kezapqetok keu Jim-asa-asahi

Buk kianön kezapqetok keu murutñi akzap. Mi Jonagörap denöwe asuhuyöhi, mianğöt kösohotñi akzap. Anutunöñ keu kewö jim kutum wañgiyök: Gi mönö Asiria kantrigöt siti bohonñi qetñi Niniwe mianğörenj anda urukunğukunğu nup meman. Asiria yeñon kahasililiñini ketauñi ahöiga Israel yeñon kerök mienğörap kömumbepukörap kenğötñini möta malget. Anutunöñ Jona mewö jim kutum wañgiyökmö, yañon mi esapköba qetala Anutugöt koleknöñ mianğörenj anmamgöt tököyök. Mi kewögörap tököyök: Anutunöñ siti mi ayuhumamgöt galöm meme keu jiyökmö, yañon mianğöt dop ölña akñapkö qahöp möt köhöiyök.

Jonanöñ tököba qetaliga lömböt öngöñgöñi qakñe öngögetka mianğöt andöñe nanñi imbi-imbiñi memba et ala tem köla anök. Anda urukunğukunğu nup meiga Niniwe sehisehiñi yeñon uruñini ölñap melenget. Mianğörap Anutugöt uruñan amöriiga qahöp ayuhum engiyök. Mianğörap Jonagöt uruñan böliba kömbuhiba nanñak kömumamgöt mörök. Kiñ kunöñ yambu 782-753 bifo Kraist galömnina maliga Jonanöñ nalö mianğörenj nupñi meyök. Miriñi Gat Hefer mi Nazaret kösutñe, 5 kilomita anangö dop. Niniwe mi köröwen, 500-600 kilomita anangö dop.

Könañep Israel yeñon nanñinak kezapqetok ambazip yeñgörenj keu möta kude tem kölgetka Anutunöñ jiiga Asiria yeñon kaba enguba enguanğötketka mewö nanñini kinkinñini mi mosötket. Buk kianön Anutugöt könañi yahöt kewö kondeljap: Körek neñon Anutugöt jitsihitñi törörök tem kölbinanğöt dop akzin. Mewö qahöp akzin ewö, lömbötnöñ mönö ölñap qaknine öngömap. Könañi bohonñi kun mi ak-kömukömu aka urujöpak. Yañon nanñi kerök kambuñi Asiria yeñgöt siñgisöndokñini mewöyök mosöta ayuayuhunöhök meköm engimapköt kapañ kölakzap. Likepñi bölöñi qakñine öngöbapuköt möt köhöiba urunini melenbingöt kunğum neñgimakzap.

Buk kianğöt bahöñi bohonñi 4 mi kewö:

- 1) Anutunöñ Jona oholiga yañgiseñ ahök. *1.1-17*
- 2) Jonanöñ uruñi melenđa söranöhök lolohoyök. *2.1-10*
- 3) Jonanöñ Niniwe könagesö uruñini kunğuyök. *3.1-10*
- 4) Uruñini melengetka Anutunöñ ak kömum engiyök. *4.1-11*

Jonanöñ Kembu qetala mömölaköyök.

¹*Israel mianğörenj Kembangörenj keu mi Amitaigöt nahönñi Jona yañgörenj kewö asuhuyök:

²“Asiria kantrigöt siti ketauñi Niniwe mi wehön kotkotñe ahöza. Yeñon bau jegömöl aka bölöñamñini memba malakze. Mianğöt keu mi nöngöt jemesoholne öngöiga mötzal. Mianğörap göñon möp wahöta eu anda nöngöt buña keuni jiba mianğon uruñini kunğuman.”

³Mewö jiyökmö, Jonanöñ möp Kembangöt jemesoholñeyök ölön köla wehön gegene göröken anmamgörap wahörök. Wahöta miri qetñi Jopa (Jaffa) mianğörenj geba wañge kun miwikñaiba “Ölöp yembuk Tarsis mire Spein kantrinöñ anmam,” jiba köna söngöröñi memba wañgenöñ öngöyök. Mewö öngöba Kembangöt jemesoholñeyök mömölaköba anök.

* 1:1: 2 Kiñ 1 4.25

⁴ Mewö anökmö, Kembunöŋ möp luhut köhöikŋi melaii köwetnöŋ anda qeiga siridimbom ketauŋi asuhuiga waŋgenöŋ mianğörap jömgömangöt ahök.

⁵ Mewö aiga waŋge börö azi yeŋön keŋgötŋini möta nanŋini bemurupŋinaŋgöt dop nanŋök nanŋök köuluköm enğiget. Mewö aka waŋgenöŋ amğomapkōrap mianğöt inap yuaini mi körek gilgetka köwetnöŋ gem teköyökmö, Jonanöŋ waŋge dutŋaŋgöt uruŋe geba mianğöreŋ öl köla gaun lömbötŋi ahöyök.

⁶ Mianğöreŋ ahöiga waŋge galömŋan yaŋgöreŋ kaba kewö jiyök: “Gi möp wuanöŋgōrap ki gaun ahözane? Möp wahöta nangi bemgi qeta köulukönöŋga yaŋön mötmörim neŋgiiga kude ayuhubinak.” Mewö jiyök.

⁷ Mewö jiiga sutŋine kewö jiget: “Ayop möp kaget! Nini möp unju qeba azi dagöt siŋgisöndokōrap ayuayuhu ki neŋgöt qaknine öŋgözawi, mianğöt könaŋi mewö miwikŋaibin.” Mewö jiba unju qegetka Jonanöŋ asuhuyök.

⁸ Asuhuiga jiget kaiga kewö qesim waŋgiget: “Ayuayuhu ki mi dagöt siŋgisöndokōrap aka neŋgöt qaknine öŋgözawi, gi möp mianğöt könaŋi jinöŋga mörin. Gi wanat nuwa memakzan? Gi waniŋeyök kazan? Göhöreŋ kantri mi waniŋe aiga göhöreŋ könagesōurupki mi waniŋe malje?”

⁹ Mewö qesim waŋgigetka kewö melenök: “Ni Israelgöt Hibrü azia akzal. Ni Kembu, Suepkö Anutuŋi waikŋi memba möpöseimakzal. Yaŋön köwet aka gölme örönŋi miwikŋaim etkiyök.

¹⁰ Yaŋön börö osikosibuk niŋgiiga nöŋön mi tököba Kembangöt jemeso-holŋeyök ölöŋ köla kazal.”

Mewö meleniiga azi yeŋön mi möt yaköba gwötpuk awöwöliba kewö jiba jim waŋgiget: “Yei! Gi möp wuanöŋgōrap mewö akzane?”

¹¹ Köwet mi toroqeba bölim köhöiba ahöyök. Mianğörap yeŋön kewö qesim waŋgiget: “Nini möp denöwewö ak gihiinga köwetnöŋ giŋ qebawak?”

¹² Mewö qesim waŋgigetka yeŋgōrap kewö melenök: “Siridimbom ketauŋi kianön möp nöŋgōrap aka enğöt qakŋine öŋgöba qezawi, nöŋön mi ölop mötzal. Mianğörap iŋini möp nömimba köwetnöŋ gilgetka gemam. Gilget gebiga köwetnöŋ ölop giŋ qemap. Mewö jizal.”

¹³ Mewö jiiga börö azi yeŋön töndup waŋge kunbuk gölme oronŋe aŋgotmapkōrap lökuatnöŋ naŋgöbingöt qeba qegetmö, köwetnöŋ bölim teköyöhaŋgōrap aka mi osiget.

¹⁴ Osiba Israelgöt Kembuŋi yaŋgöt qeta köuluköba kewö jiget: “O Kembu, gi nangkak keu jitkahöt dop mi wuatangöba yuai ki akzan. Mewögōrap Kembu, azi kianön kömumapkōrap aiga mianğörap nini kude ayuhum neŋgiman. Sepŋaŋgöt keuŋi mi neŋgöt qaknine kude alnöŋga öŋgömap. Keu mi ölŋap.”

¹⁵ Mewö köuluköba anda Jona memba gilgetka köwetnöŋ geyök. Geiga köwetkö kukŋan ösumok bököiga giŋ qeyök.

¹⁶ Giŋ qeiga azi yeŋön Kembangōrap euam awöwöliba naluk ketauŋi ala Kembu jöwöwöl ohom waŋgiba keuŋini kewö jöhöget: “Nini möp Kembangöt keuŋi tem köla kude qetalbin.”

¹⁷ *Jonanöŋ köwetnöŋ geiga Kembunöŋ söra ketauŋi kun melaiiga anda Jona gwahörök. Gwahöriga söra mianğöt uruŋe suŋgem silim karöbut ahöba malök. Mewö.

2

Jonanöŋ gajugaju kömgokŋe ahöba köuluköyök.

¹ Jonanöŋ söra uruŋe ahöba Kembu Anutuŋi köuluköm waŋgiba kewö jiyök:

* 1:17: Mat 1 2.40

2 “Nöñön wahöjalin uruñe Kembu köuluköm gihibiga göñön ölop keuni mötzan.

Ni unem senjom kömgokñe ahöba uleralga göñön ölop uletni mötzan.

3 Göñön köwet rëndum ketauñe tötal niñginöñga gezal.

Göñön köwet söñsöñaunangöt dutñe tuapkönöñ eralga göulu ketauñan esuhum niñgizap.

Göhöreñ qölqöl-söutsöt pakpak mi musulungöm niñgizap.

Göhöreñ siri pakpak mi qeba turuba nem ulahöm niñgizap.

4 Mia möta kewö mötmörizal: Göñön ni göhöt jemesoholgeyök közöl niñginöñga maljal. Mi töndup nöñön möp kunbuk göhöreñ jöwöwöl jike kömbukñe göröken jenan ubi anma. Mi kunbuk kude ekileñahak kun.

5 O aka omanjaret mi nöñgöt qakne öñgöba turum niñgim teközap.

Röndumnöhök möp liliköm niñgim teközap.

Köwetköt kumburereñi mianñön möp nörop jupni köpeiba esuhuzap.

6 Ni kundunangöt rönđañ könañangöt dop yuhuyangöreñ eral. Rönđangöt botñi mianñön möp nöñgöt qakne jöhöm qözöñda jöhöm qözöñ köhöizap.

Yuhu maljalmö, o Kembu Anutuni, göñön möp neka rönđañ dutñeyök kunbuk öröm niñginöñga malmalnöñ kotmam.

7 Nöñgöt malmalnan qahöwakñangöt aiga nöñön nalö mianğöreñ Kembu, gi mötmörim gihibiga köuluknan öñgöba göhöt Suep jike kömbukñe euyangöreñ öñgöba göhöreñ angotmap.

8 Ambazip kopa-bemlopion omani göda qem engimakzei, yeñön mewö aka kalem möriam Tonji gi andö guhumakze.

9 Andö mewö guhumakzemö, nöñön möp möpömöpösei löñet omsa köla naluk ala jöwöwöl ohom gihimangöt mötzal.

Nöñön yuaigöt keuñi jim jöhözali, mianğöt dop möp ak sorokömakñam.

O Kembu, gi mohotnöñ nöñgöt malmalnangöt bohoni jöhömangöt köhöizan. Keu mi öñap.”

10 Mewö köuluköm teköiga Kembunöñ möp söra mi jim kutum wanjiiga kaba kota Jona loñniga gölme oronñe erök. Mewö.

3

Jonanöñ Anutugöt nup mi Niniwe uruñe meyök.

1 Gölme oronñe eriga Kembugöreñ keu ki mi kunbuk Jonagöreñ asuhuyök:

2 “Göñön möp wahöta siti ketauñi Niniwe mianğöreñ anda buña keu gihi-mami, mi jiba uruñini kuñguman.”

3 Keu mewö asuhuiga Jonanöñ wahöta Kembugöt keu jit tem köla Niniwe anök. Niniwegöt dopñi mi kewö: Gi göraneyök könahiba anda malnöñga wehön karöbut teköiga likepñe endu angotman.

4 *Jonanöñ könahiba siti uruñe anda maliga wehön mohot teköiga buña keu qeta kewö jiyök:

“Wehön 40 kun ahözap. Mi teköiga Niniwe siti kianñön möp melenñi gemap.”

5 Keu mewö qeta jiiga Niniwe könagesö yeñön Anutugöreñ keu möt nariba uruñini melenñda nene siñgi malbingöt nalö ala jim köhöiget. Mi jim köhöiba ambazip ketauñi moröñi yeñön lökñanök imbi melengöt samot meget silenine öñgöiga kau ariget.

6 Mewö aketka mianğöt buzup keuñi mi Niniwegöt kiñ (praim minista) yangöreñ angörök. Angoriga möta jakömbuak dum tatatñeyök eta malukuñi köteköba samot memba at-turuba kau utuba ariba tarök.

* 3:4: Mat 1 2.41; Luk 1 1.32

⁷ Tata jim kutukutu kewö aliga Niniwe siti dop köl teköba anök: “Injini möp kinj aka jembonurupni yengören jim kutukutu ki mötme: Kunjan kun möp nene kulun kude nemap. Ambazip me bau kuruk-lama bulmakau-injini nene kulun kun nemegöt kude möt engime.

⁸ Nene singi mewö mala samot mem teköba Anutu köhöiknanök sahöt köuluköm wanjiba nanjök nanjök könanamjini bölöni aka ambazip ayuayuhu böröjini töwötpuk meget ahözawi, mi möp andö qem teköba mosötme.

⁹ Mewö ahinga Anutugöt urunan kunbuk eriga wösöni möt nenjiba kuknanjöt könöjini qeraköba singisöndoknini mosötpawak. Mi mosörija kude ayuhubinak. Mewö jizin.”

¹⁰ Mi möt asahiba könanamjini bölöni andö qeba urunini melengetka Anutunöj ahakmemejini mi eka wösöni möt enjiba mötmötjini lilingöiga singisöndokninanjöt likepni melenj engimapkö ahöhi, mi mosörök. Urunan mewö eriga kude mem bölim enjyök. Mewö.

4

Jonanöj tembula irimji seholyök.

¹ Mewö asuhuyökmö, Jonanöj mianjöröp urubölö ketaunji möta irimji seholyök.

² *Irimji seholyiga Kembu ulet wanjiba kewö jiyök: “Aek Kembu, gi ak-kömukömugöt bemni mala ölop nenjehorimakzan. Göhörenj kuki mi önsöj aiga kalem möriamgi mi önöni qahöp ahöza. Mewö urugi zölanj amöröiga wösögi möta könagesö kun mem bölöm enjigamgöt kude mörakzan. Mia nane gölmenöj mala lök möt yaköba jiali, mia ölum guhuza me qahöp? Könanj mewögöröp aka nalö mianjörenj Tarsis anmam jiba ösumok mömölaköba anda malal.

³ *Merak malmalgöt tököba kömupköt möralga ölöwakzap. Mianjöröp Kembu, göjön möp malmalni döлки noanjötnöj. Keu mi öljap.”

⁴ Mewö ulerökmö, Kembunöj kewö melenj wanjyök: “Jona, gi ak-kömukömugöröp irimsesewöl mötzani, mi dop köljap me qahöp?”

⁵ Mewö jiiga Jonanöj siti mosöta eta wehön kotkotje göröken anda köna töwokje endu koum qeba mianjöt aumje tarök. Tata sitigöröp mewö me mewö asuhumawi, mi ekjamgöröp uba tarök.

⁶ Mewö tarökmö, Kembu Anutunöj Jona uruölöwak ak wanjigamgöröp jiiga ölünlun kun asuha köriba kota Jonagöt nöropni aum köl wanjyök. Aum köl wanjiiga ölünlungöröp uruölöwak ketaunji möta tarök.

⁷ Tata sunjem kun ahöiga miri gianjiiga mianjörenj Anutunöj taröj kun melaija kaba ölünlun mi yöhörongöiga sinji soholyök.

⁸ Wehönöj korija Anutunöj jiiga luhut könöpjambuk kötköni mi miri jeni kotkotneyök qeiga wehön jenan nöropje qei qei urunji öngöba duhuiga kömumangöt möt teköba köuluköba kewö jiyök: “Nöjön malmalgöt tököba kömupköt möralga ölöwakzap. Keu mi ölja.”

⁹ Mewö jiyökmö, Anutunöj Jonagöröp kewö jiyök: “Gi ölünlungöröp irimji seholyawi, mi dop köljap me qahöp?” Mewö jiiga kewö melenj wanjyök: “Irimni seholyawi, mi möp dop köljawa. Nöngöt irimsesewölmi mi ketaunji aiga urunan kude amörimap. Mianjöröp ölop kömumam. Keu mi öljap.”

¹⁰ Jonanöj mewö jiiga Kembunöj kewö jiyök: “Gi ölünlungöt böröjini kun kude memba mi kunde galöm kölnönga köriyök. Mi sunjem mohotkö uruje

* 4:2: Eks 34.6 * 4:3: 1 Kinj 1 9.4

asuhuyök aka sungem mohotkö uruŋe soholiba kömuyök. Töndup göŋön nangak yuai omaŋi mewöŋi miaŋgörap sahöta waimanjat mötzan.

¹¹ Mewö aiga nöŋön möp denöwögörap siti ketauŋi kiaŋgöt könagesöŋi yeŋgörap waimanjat kude mötpileŋak? Miaŋgöt uruŋe morö namande 1 20.000 (handöt twenti tausen) jaŋgö mi oŋgöta maljei, mi ölöŋaŋgöt aka bölöŋaŋgöt könaŋiri kude möt kewöt etkimakzei aka bau kuruk yuai mi tok gwötpuk malje. Mi ambazip ketauŋi yembuk mohok mem bölim eŋgibileŋbukörap nöŋön möp sihimnan Niniwe eŋgehorizal.” Mewö.

Matyu

Ölöwak Buña Matyunöŋ ohoyök.

Jim-asa-asari

Matyu qet miangö könaŋi mi Kembangöŋ kalem. Qetŋi alaŋi Liwai. Rom gawmangö takis meme azia malök. Nup mi memba maliga Jisösnöŋ kaba oholiga uruŋi melenŋa gwarek 12 yeŋgö sutŋine malök.

Ölöwak Buña ki Jisösgö könaŋi nanŋe Juda könaŋesö yeŋgöra jim asarim engimangöra aka ohoyök. Keu köŋi bohönŋi kewö, “Jisös Kraistnöŋ Amötqeqe Tonini aka Kiŋnini akza.” Juda ambazip yeŋgöra keu mi qahö dop köli uruŋinan bölii qaköget. Miangöra Matyunöŋ Jisös nupŋangö könaŋi mi aukŋe jim asariba törörök kusum engiyök. Jöhöjöhö Walŋe amötqeqegö jöhöjöhö keu (promis) ahözawi, mi pakpak mönö Jisösgöra aka aukŋe ahum kuwuleiba öŋambuk ahök. Amötqeqe Tonŋi mi Hibru keunöŋ Mesaia aka Grik keunöŋ Kraist.

Jisösnöŋ urugö nup bahönŋi karöbut memba malök: Yaŋön Ölöwak Buña ambazip kusum engiba uruŋini miangön kuŋguba kawölŋini mem ölöwaka malök. Mewö memba aniga aŋgöletot asuhugetka mala maripom ipnöŋ öŋgöba kömuiga löm kölgetka kunbuk wahörök. Mewö miangön Anutu bemtohoŋangö könaŋi kondel neŋgiyök. Mewö aiga nini letota Anutugö nahönböraturupŋi akingö könaŋi asuhuyök. Jisösgö lesön bohönŋi 5 mi kewö: 1) Boŋ 5-7, 2) Boŋ 10, 3) Boŋ 13, 4) Boŋ 18 aka 5) Boŋ 24-25

Buk kiangö bahönŋi bohönŋi 7 mi kewö:

Jisösgö ambösakonurupŋi aka ahuahuŋi 1.1-2.23

Jon O-melun azinöŋ urugö nup meyök 3.1-12

Jisös o melun meiga Satanöŋ esapköyök 3.13-4.11

Jisösnöŋ Galili uruŋe qenjarök nup meyök 4.12-18.35

Jisösnöŋ Galili mosöta Jerusalem anök 19.1-20.34

Sonda qöndökŋi Jerusalem mala kömuyök 21.1-27.66

Kömupnöhök wahöta mala Suepnöŋ öŋgöyök 28.1-20

Jisös Kraistkö ambösakon yeŋgö qet areŋ

Luk 3.23-38

¹ Jisös Kraistkö ambösakon yeŋgö qet areŋini kewö: Abrahamgö gwölönarökŋi kun Deiwid. Deiwidkö gwölönarökŋi kun Jisös.

² Abrahamgö nahönŋi Aisak. Aisakö nahönŋi Jeikob. Jeikobkö nahönurupŋi Juda aka yaŋgö darumunurupŋi.

³ Judagö nahönyahötŋi Perez aka Zera, namŋiri Tamar. Perezgö nahönŋi Hezron. Hezrongö nahönŋi Ram.

⁴ Ramgö nahönŋi Aminadab. Aminadabkö nahönŋi Nason. Nasongö nahönŋi Salmon.

⁵ Salmongö nahönŋi Boaz, namŋi kantri kungö ambiŋi Rahab. Boazgö nahönŋi Obed, namŋi kantri kungö ambiŋi Rut. Obedkö nahönŋi Jesi.

⁶ Jesigö nahönŋi kiŋ Deiwid. Deiwidkö nahönŋi Solomon, namŋi mutuk Uriagö anömŋa malök. Juda kiŋ pakpak mi Deiwidkö gwölönarökurupŋi aka malget.

⁷ Solomongö nahönŋi Rehoboam. Rehoboamgö nahönŋi Abiya. Abiyagö nahönŋi Asa.

8 Asagö nahönñi Jehosafat. Jehosafatkö nahönñi Jehoram. Jehoramgö nahönñi Usia.

9 Usiagö nahönñi Jotam. Jotamgö nahönñi Ahaz. Ahazgö nahönñi Hezekia.

10 Hezekiagö nahönñi Manase. Manasegö nahönñi Amon. Amongö nahönñi Josia.

11 *Josiagö nahönurupñi Jekonia aka yaŋgö darumunurupñi. Nalö miangöreñ Babilon yeñön Israel könagesö enġuanġitketka Babilon anda kösö mire malmal ewö tandök welenqeçenina malget.

12 Babilon kösö mire malmal ewö tandök mala miangöreñ Jekoniagö nahönñi Sealtiel asuhuyök. Sealtielgö nahönñi Jerubabel.

13 Jerubabelgö nahönñi Abiud. Abiudkö nahönñi Eliakim. Eliakingö nahönñi Azor.

14 Azorgö nahönñi Jadok. Jadokö nahönñi Akim. Akimgö nahönñi Eliud.

15 Eliudkö nahönñi Eleazar. Eleazargö nahönñi Matan. Matangö nahönñi Jeikob.

16 Jeikobkö nahönñi Josef, Mariagö apñi. Marianöñ Jisös meiga qetñi Kraist Amötqeçe Toñi qerakzin.

17 Nalö Abrahamgöreñök könahiba mala kotketka Deiwid asuhuyöhi, isik miengö jaŋgö areñi mi 14. Kunbuk kiñ Deiwidköreñök könahiba mala kotketka Israel könagesö enġuanġitketka Babilon anda kösö mire malmal ewö tandök malgeri, isik miengö jaŋgö areñi mi mewöyök 14. Babilon kösö mire malmal ewö tandök malgeri, nalö miangöreñök könahiba mala kotketka Kraist asuhuyöhi, isik miengö jaŋgö areñi mi mewöyök 14.

Jisös Kraist mi kewö asuhuyök:

Luk 2.1-7

18 *Jisös Kraist asuhuyöhaŋgö kösohotñi kewö: Yaŋgö namñi Maria mi Josefbuk buña buña mala mindimindiri qahö aka malohotka nalö miangöreñ Uña Töröñan mem letot waŋgiiga köröbuk mali könañi mewö miwikñaiget.

19 Mewö miwikñaigetka azi buñañi Josef yañön malmal diñdiñi malöhaŋgöra Mariagö könañi aukne asuhui gamuñambuk akapuköra tököyök. Mewö tököba uruñan i ölöñ mosötmamgö mötmöt areñi alök.

20 Mewö mötmörriba ahöiga Kembangö garata kunñan gaunöñ asuhum waŋgiba kewö jiyök, “Josef Deiwidkö gwölöñarökñi, Uña Töröñan mönö Maria letot waŋgiiga köröñambuk malja. Miangöra gi mönö i örönöñ mirige kaba anömgi akñaipkö keŋgötke kude mötman.

21 *Marianöñ mönö morö nahön mema. Azi mianöñ könagesöñi siŋgisöndokñineyök amöt qem enġiiga solanime. Miangöra göñön qetñi Jisös qetman.” Mewö jiyök.

22 Kembunöñ kezapqetok azi kun sölölohöiga keu kun jiyöhi, mianöñ öñambuk akñaipköra yuai pakpak mi asuhuyök. Kezapqetok keu mi kewö,

23 * “Ambi seram jömukñi kunöñ gölömñambuk aka morö azia meiga qetñi Imanuel qetme.” Qet miangö könañi kewö, “Anutunöñ nembuk malja.”

24 Josefnöñ imbiñi möta wahöta Kembangö garatanöñ jim kutum waŋgiyöhi, mönö miangö dop aka Maria anömñi akñaipköra waŋgita miriñe anök.

25 *Anda malohotmö, nalö sutje miangöreñ mohotje qahö ahöyohot anda nahönñi meiga Josefnöñ qetñi Jisös qerök. Morö meiga miangö andöñe awanöm malohot. Mewö.

* 1:11: 2 Kirj 24.14-15; 2 Hist 36.10; Jer 27.20 * 1:18: Luk 1.27 * 1:21: Luk 1.31 * 1:23: Ais 7.14

* 1:25: Luk 2.21

2

Mötkutukutu azi wehön kotkotneyök kaget.

¹ Jisösnöñ kin kembu Herodkö nalöñe Judia prowinsgö taon qetñi Betlehem asuhuyök. Asuhuyöhi, nalö miangörej seŋgelaugö mötmöt azi wehön kotkotneyök Jerusalem sitinöñ kaget.

² Kaba kewö qesiget, “Juda engörej kin kembu akñawi, morö mi asuha denike ahöza? Nini wehön kotkotñe mala yangörej undi asuhui eka könañi mewö möta waikñi memba möpöseibingöra kazin.”

³ Mewö qesigetka kin kembu Herod aka Jerusalem könagesö yambuk malgeri, yeñön körek pakpak keu mi möta aurugot.

⁴ Aurugotka kin Herodnöñ keu ala könagesögö jike nup galöm bohonñi aka Köna keugö böhi pakpak köl öröm engii kaget. Kaba tokogetka kewö qesim engiyök, “Amötqeqe Tonji Kraistnöñ mönö denike asuhumapköra jigetka ahöza?”

⁵ Qesim engiiga kewö melenj wangiget, “Yañön mönö Judia prowinsgö taon qetñi Betlehem miangörej asuhuma. Miangö keuñi mi kezapqetok azi Maikanöñ kewö ohoi ahöza,

⁶ *‘O Betlehem könagesö Judia gölmenöñ maljei, engö sutñineyök kembu ketanji asuha nani Israel könagesö mindingöba köyan köl neŋgima. Miangöra inñi Judia gölmegö jitñememe yeñgö sutñine malgetka qetbuñaninan eretñi qahöpmahöp akza.’”

⁷ Mewö melenj wangigetka mötkutukutu azi mi ölöñ engoholi kagetka kewö qesim engiyök, “Undiñ mönö wani nalönöñ asuhui könahiba eket?” Miangö könañi törörök mötmangö möta mewö qesim engiyök.

⁸ Miangö keuñi möta melaiba kewö jim kutum engiyök, “Inñi mönö Betlehem anda morö mi törörök qesiba miwikñaiba miangörejök buzup keu algetka nongörej kama. Nöñön mi möta mewöñanök anda i waikñi memba möpöseim wangimam.”

⁹ Kinöñ mewö muneñ jiba jim kutum engiiga möta könanöñ anget. Anda undi wehön kotkotñe mala ekeri, miangön nöropñine mutukmutuk ani mötötei-get Betlehem anda miri morö nahön ahöyöhi, mönö miangörej kinök.

¹⁰ Undi mi kini eka sösongai keta bölökñi aket.

¹¹ Sösongai aka miri uruñe öngöba morö aka namñi Maria etkeket. I etkeka simin köla sipköba waikñi memba möpöseim wangiget. Möpöseim wangiba bayangösöñini qeanda miangörejök goul, jiniñ paura aka sanda qetñi mör mi uzeta kalem wangiget.

¹² Sunjem kun ahöget-ka Anutunöñ gaun kondela kin Herodkörej kunbuk anbepukö qetal engiyök. Miangöra köna kungenök nanñini miri gölmenjine lilingöba anget. Mewö.

Herodköra asamböta Josef anöm-moröñi Ijipt anget.

¹³ Mötkutukutu azi mienöñ angetka Josefnöñ gaun ehiga Kembangörej garata kunñan asuhum wangiba kewö jii mörök, “Herodnöñ morö qei kömumapkö jarum wangima. Miangöra mönö wahöta morö aka namñi etkuangita ölöñ köla Ijipt kantrinöñ anme. Miangörej anda malgetka biananak kamegö nalö jimami, miangörej mönö lilingöba kame.”

¹⁴ Mewö jii möta wahöta sunjem miangörejök morö nahön aka namñi etkuangita Ijipt anget.

¹⁵ *Ijipt anda malgetka kin Herodnöñ kömuiga nalö miangörejök lilingöba kaget. Mutuk Kembunöñ kezapqetok azi Hosea sölölohöiga keu kewö jii

* 2:6: Mai 5.2 * 2:15: Hos 11.1

ahöza, “Nöñön nahöni oholbiga Ijpt gölme mosöta kayök.” Kezapqetok keu mianjön mönö mewö asuhuiga ölnambuk ahök. Mewö.

Morö azi Betlehem gölmenöñ enjuget kömuget.

¹⁶ Mötkutukutu azi mienjön Juda gölme ölöñ mosöta angetka Herodnöñ mianjögö könañi eka “Tilipköm ningiget,” jiba irimñi gwötpuk seholiiga jimkutukutu kewö alök, “Yarö azi, injini Betlehem aka gölme pakpak mi liliköba ahözawi, mönö mianjören anda azi morö (yara) yambuñini yahöt aka mianjögö bapne akzei, mi körek enjuget kömume.” Mötkutukutu azi undi asuhuyöhanjögö nalögöra törörök qesim enjiiga jiget möröhi, mianjögö dop morö azi yambuñinanjögöra jimkutukutu mi alök.

¹⁷ Kezapqetok azi Jeremaianöñ keu kun jii ahözawi, mianjön mönö mewö asuhuiga ölnambuk ahök. Keu mi kewö,

¹⁸ * “Silat mi Betlehem kösutñeyök miri qetñi Rama mianjörenjök mötketka sahöt gigilahöze. Reizöl ambigö gwölönarökurup yeñön moröurupñini qahöwaketka urureñ meze. Mianjögöra sahötketka urukölalep mem enjibingö aketka urukondumök mörakze.” Mewö.

Ijpt mosöta Josef anöm-moröñi Nazaret lilingöget.

¹⁹ Josefnöñ Ijpt maliga kin Herodnöñ kömuiga mianjörenjök Kembangören garata kunjan gaunöñ asuhum wanjiba

²⁰ kewö jiyök, “Morö qeget kömumapkö mönögeri, yeñön lök kömuget. Mianjögöra mönö wahöta morö aka namñi etkuangita lilingöba Israel gölmenöñ anme.”

²¹ Mewö jiiga Josefnöñ wahöta morö aka namñi etkuangita lilingöba Israel gölmenöñ anget.

²² Könanöñ anda keu kewö mörök, “Herodkö nahönñi Arkelausnöñ iwinanjögö salupne Judia prowins galöm köla malja.” Mewö möta mianjören anmangö kenjötñi mörök. Möta mali Anutunöñ gaunöñ Galili prowinsnöñ anmegö jim kutum wanjiiga wahöta mianjören anget.

²³ * Galili prowinsnöñ angota taon qetñi Nazaret mianjören malget. Mewö malgetka kezapqetok azi yeñön Amötqeqe Toñanjögöra keu jigeri, mianjön ölnambuk ahök. Keu mi kewö, “Yanjögö qetñi mi Nazaret azi qeta malme.” Mewö.

3

Jon O-melun azinöñ Jisösgö köna mesarök.

Mak 1.1-8; Luk 3.1-18; Jon 1.19-28

¹ Yambu tosotñi teköiga Jon O-melun azinöñ kaba Judia prowinsgö gölme qararanjökölñe liliköba ambazip uruñini Buña keunöñ kuñguba kewö jiba malök,

² * “Suep Toñan bemtohoñi almawanjögö nalöñan lök kam kuñguza. Mianjögöra mönö uruñini melenja mianjören anjotket.”

³ * Jongöra kezapqetok azi Aisaianöñ keu kun kewö jiba ohoyök, “Kolek garata kunöñ gölme qararanjökölñe qeta maliga anda jölñi kewö mötme, ‘Kembunöñ kamawo! Mianjögöra mönö jöjöröba könañi mesatket. Mönö uruñini mindinjögöba könañi köl diñgiba qölöleiget.’ ”

⁴ * Jongören maluku mi kamel jupñan memenji aiga kembangan örigit sömbup silenjan memenji mi jöhöba malök. Neneñamñi mi gawöt jinam aka arökñanjögö moron onji. Mi pakpak kezapqetok azi Elaija (Elia) yangö dowä.

* **2:18:** Jer 31.15 * **2:23:** Mak 1.24; Luk 2.39; Jon 1.45 * **3:2:** Mat 4.17; Mak 1.15 * **3:3:** Ais 40.3

* **3:4:** 2 Kin 1.8

⁵ Jonöŋ nupŋi meiga ambazip kambulelembe yeŋön Jerusalem siti aka Judia prowinsgö miri tosatŋi pakpak mienögöreŋök yangöreŋ öröba kaget. Mewöŋanök Jordan o likeplikep miri pakpak tat angeri, mienögöreŋök kaget.

⁶ Kaba kaŋgota siŋgisöndokŋini jim miwikŋaigetka Jonöŋ i Jordan o töwatŋe o melun mem enġiyök.

⁷* Mem enġiyökmö, Farisi (Köna keugö kapaŋkölköl) aka Sadyusi (Jike nupkö kapaŋkölköl) ambazip gwötpukŋan o melun mem enġimapköra kagetka enġeka yeŋgöra kewö jiyök, “O qatö moröŋi, iŋini uruŋini qahö melenġetka Anutugö irimŋan seholiiga likepŋi melenġ enġimangö akza. Mi ölöŋ kölbingsö goro keuŋi mi mönö daŋön jii möta sömbuŋini möta ki kaze?”

⁸ Mianögöra mönö ölnanök uruŋini melenġme. Bölönamŋineyök liliŋgögetka ölni asuhui mi mönö ahakmemeŋinan aukŋe kondela malme.

⁹* “Uruŋine möndömöndö keu kewö jibingsö kude mötmörime, ‘Neŋön mönö Abrahamgö gwölönarökŋa malinga Anutunöŋ qahö ayuhum neŋgima.’ Mewö jiba töptöpŋine qemakzemö, ölni mi qahö ahakze. Nöŋön mianögöra kewö jibi mötket, Anutunöŋ köt ki ölop jim kutum enġiiga letota Abrahamgö gwölönarökurupŋi aka Anutu möpöseimakŋemö, iŋini denöwö?”

¹⁰* “Uruŋini qahö melenġme ewö, Anutunöŋ mönö iŋini ip ewö teŋgöri etpingö akze. Ip pakpak kötni ölopŋi qahö kuŋgumakzei, mi mönö köli etket könöpnöŋ gili geme. Ip mewöŋi kölmangö kesinŋi lök jitŋi saŋe ala ip könaŋe ali jöjöröba ahöza. Anutunöŋ mönö bölönamŋinaŋgö likepŋi melenġ enġima.

¹¹ “Nöŋön iŋini uruŋini melenġmeanögöra o töhönöŋ melun mem enġizalmö, nöŋgö andöne azi kukösumŋi köhöikŋi kun kama. Yangö kukösumŋi öŋgöŋgöŋan mönö nöŋgöreŋ onġitma. Yanön azi öŋgöŋgöŋi akŋawaŋgöra nöŋön yangö köna esuŋi bauköba gösönöŋ löngöta teŋgömangö qötötanögömam. Yanön mönö Uŋa Töröŋi uruŋine ali könöp bölamŋan köl könjörat enġiiga mewö mianön melun mem enġima.

¹² “Yanön ölni aka kamböŋi mendenġ etkimangö sapaŋi memba kaŋgota uba qöröreŋgöba kewötma. Kewöta wit kötni tokoba köweŋe almapmö, kamböŋi aka gwaugulapŋi mi mönö usuŋniga könöpnöŋ geba teteköŋi qahö jema.” Mewö.

Jonöŋ Jisös o melun mem waŋgiyök.

Mak 1.9-11; Luk 3.21-22

¹³ Nalö mianögöreŋ Jisösnöŋ Galili prowins mosöta Jordan o töwatŋe Jongöreŋ kaba o melun mem waŋgimapköra qesiyök.

¹⁴ Qesiyökmö, Jonöŋ qetal waŋgiba kewö jiyök, “Göŋön ölop ni o melun mem niŋgibanakmö, göŋön siŋgisöndok qahö aka mönö denöwögöra nöŋgöreŋ kazan?”

¹⁵ Mewö jiiga Jisösnöŋ kewö melenġnök, “Nalö kewöŋe mi ölop akŋan. Mewö akziga mianön Anutunöŋ ahakmeme diŋdiŋi wuatangöbingö keu jiyöhi, mianögö ölni asuhuiga dop kölma.” Mewö jiiga Jonöŋ möri dop köliga urumohot ahök.

¹⁶ Urumohot aka o melun mem waŋgii teköiga mianögöreŋök onöhök koriga kewö asuhuyök: Suepnöŋ aŋaŋiiga Jisösnöŋ uba ehiga Anutugö Uŋa Töröŋan melenġda kembö nei ewö aka Jisösgö qakŋe eta meyök.

¹⁷* Eta meiga Suepnöhök qet kun kewö asuhuyök, “Yanön mönö nani wölböt nahöna aiga köröni ölöwahiga eknahöm ak waŋgizal.” Mewö.

* **3:7:** Mat 12.34; 23.33 * **3:9:** Jon 8.33 * **3:10:** Mat 7.19 * **3:17:** Jen 22.2; Sum 2.7; Ais 42.1; Mat 12.18; 17.5; Mak 1.11; Luk 9.35

4

Satanöŋ Jisös esapköba malök.

Mak 1.12-13; Luk 4.1-13

¹ *Miangö andöŋe Uŋa Töröŋan Jisös kuŋgum waŋgiiga gölme qararaŋkölkölŋe Bölöŋaŋgö Toŋan esapköm waŋgimapköra aka anök.

² Miangöreŋ anda suŋgem asak 40 Anutugöra nene ŋiŋi mala nenegö kömuyök.

³ Nenegö kömuiga öme bohonŋini qetŋi esapesap Toŋi yaŋön asuhuba kewö jiyök, “Gi Anutu Nahönŋa akzan ewö, mi mönö kondela köt ki jim kutunöŋga letota beret aketka neman.”

⁴ *Mewö jiyökmö, Jisösnöŋ keu kewö melenök, “Qahö! Buŋa Kimbinöŋ keu kun kewö ohoget ahöza, ‘Nenenöhök ambazip malmal qahö neŋgimakzapmö, Anutugö jitŋeyök keu kamakzawi, mi pakpak tem kölinga mianön mönö gumohom neŋgiiga köhöiba maljin’.”

⁵ Mewö jiiga Bölöŋaŋgö Toŋan Jisös waŋgita Jerusalem siti töröŋe anda jöwöwöl jikegö boŋe euyangöreŋ öŋgöba ali kinök.

⁶ *Mewö kiniga kewö jii mörök, “Gi Anutugö Nahönŋa akzan ewö, mönö kiangöreŋök luhuba emu geman. Buŋa Kimbinöŋ keu kun kewö ohoget ahöza, ‘Anutunöŋ göhöra aka garataurupŋi jim kutum eŋgiiga ölop kököbihigetka geba kötnöŋ könage qahö guhum qizit akŋa.’ Miangöra geba kude ayuhuman.”

⁷ *Mewö jiiga kewö melenök, “Qahö! Buŋa Kimbinöŋ keu kun mewöyök kewö ahöza, ‘Gi mönö Kembugi Anutu kude esapköm waŋgiman.’ ”

⁸ Mewö jiiga Bölöŋaŋgö Toŋan kunbuk waŋgita kundunŋi köröp tinŋiŋi kunöŋ öŋgöba gölme pakpak yeŋgö kantri tohoŋi tohoŋi aka miengö inap yuainŋi aködamunŋinambuk pakpak kondel waŋgiyök.

⁹ Kondel waŋgiba kewö jiyök, “Göŋön simin köl niŋgiba waikni memba möpöseim niŋgiman ewö, nöŋön öroyuai pakpak ki mönö tököm gihibi buŋa qem aŋguba galöm köl eŋgiman.”

¹⁰ *Mewö jiiga Jisösnöŋ kewö jii mörök, “Qahö! Satan gi mönö kesalnöŋ. Buŋa Kimbinöŋ keu kun kewö ohoget ahöza, ‘Gi mönö Kembugi Anutu, ia mohot simin köl waŋgiba waikŋi memba möpöseiman’.”

¹¹ Mewö jiiga Bölöŋaŋgö Toŋan miangöreŋök Jisös mosöta kesalök. Mewö aiga garata yeŋön kaba Jisös bauköm waŋgiget. Mewö.

Jisösnöŋ könahiba Galili uruŋe urugö nup meyök.

Mak 1.14-15; Luk 4.14-15

¹² *Miangö andöŋe Jon O-melun azi kösö mire * alget tari Jisösnöŋ mi möta Judia prowins mosöta Galili anök.

¹³ *Anda prowins miangöreŋ miriŋi Nazaret mosöta Kaperneam anda malök. Kaperneam siti mi Zebulun aka Naftali gölmenöŋ Galili o aŋgö qöhöröŋe ahöza.

¹⁴ Miangöreŋ mala nupŋi meiga Anutunöŋ keu kun kezapqetok azi Aisaia sölölohöiga jiyöhi, mianön ölnambuk ahök. Keu mi kewö,

¹⁵ * “Ambazip Zebulun gölmenöŋ aka Naftali gölmenöŋ Jordan likepŋe malgetka sutŋine köna namŋi köwetnöŋ göröken anda kinjawi aka Juda qahöpmö, kambu tosatŋan Galili prowinsnöŋ maljei,

* 4:1: Hib 2.18; 4.15 * 4:4: Dut 8.3 * 4:6: Sum 91.11-12 * 4:7: Dut 6.16 * 4:10: Dut 6.13

* 4:12: Mat 14.3; Mak 6.17; Luk 3.19-20 * 4:12: Kiŋ Herodnöŋ ambi kun ölöŋ meiga Jon O-melun azinöŋ i miangöra jim waŋgiiga irimŋi sehonii jiiga opotöröp yeŋön Jon jöhöba kösö mire alget tarök.

* 4:13: Jon 2.12 * 4:15: Ais 9.1-2

16 könagesö mienjön söñaupnönj mala asakñi ketanji ekñe. Kömupnönj ambazip aum köl enjiiga pandaman gölmenönj maljei, yengöra mönö miri wanjaran suruma.”

17 *Jisösnönj Kaperneam mala nalö mianjörejök könahiba Buña keunji jim asariba ambazip urunini kunjuba kewö jiba malök, “Suep Tonjan bemtohoñi almawanjö nalöñan mönö kam kunjuga. Mianjöra mönö sinjisöndok malmalñini mosöta urunini melenget.” Mewö.

Jisösnönj gwarekurupñi mutukñi engholök.

Mak 1.16-20; Luk 5.1-11

18 Mewö jiba liliköba mala Galili o anjögö görañe mötöteiba anda darumun yahöt Saimon qetñi alanji Pitö aka munñi Andru etkehök. Yetkөн söra örörö azia mala mösakñiri o anjönönj söra öröbitköra gila malohot.

19 Jisösnönj etkeka kewö jiyök, “Aziyahöt, injiri mönö ni nuatanjöba kayohotka kusum etkibi ambazip söra ewö öröm enjimakñahot.”

20 Mewö jiiga mianjörejök mösakñiri mosöta könahiba Jisös wuatanjöba anohot.

21 Jisösnönj yetpuk borom kun toroqeba anda kunbuk darumun yahöt Zebedigö nahönyahötñi Jeims aka Jon etkehök. Yetkөн iwinjiri Zebedibuk wanjenönj tata mösakñini möhamjöba jöhöba malgetka engeka etkoholök.

22 Mewö engeka etkoholiga mianjörejök wahöta wange aka iwinjiri mosöta könahiba Jisös wuatanjöba andöñe anohot. Mewö.

Jisösnönj ambazip kusum enjiba mem ölöwak enjijök.

Luk 6.17-19

23 *Jisösnönj anda Galili prowins urunje lökñanök liliköba köuluk mirinje öngöba bemtohoñgö Ölöwak Buñanji jim asariba urunini kunjuba kusum enjiba malök. Mewö aka sutñine ambazip kawöl aka jepajerepe könani könani enghöñi malgeri, mi mem ölöwak enjiba malök.

24 Mewö memba maliga Jisösgö qetbuñanjan sehiba Siria kantri dop köl teköba anök. Mewö ani mi möta kawöl ambazip pakpak enjuangita yangjörej kaget. Tosatñan uzi kawöl aka jepajerepe könani könani enghöñi malget. Tosatñan ömewörömenönj urunine geiga töñöt me kölköljinjinbuk malget. Tosatñan tala eta enjiiga bözok mitiba semben auba malget. Tosatñan silenjanjö likepñi kömukömunji malget. Mewö mewöñi mienjön Jisösgörej kagetka mem ölöwak enjijök.

25 Mewö ak enjiiga ekeranjöra ambazip könagesö ketanji yeñön Jisösgö andöñe wuatanjöba kaget. Kambu ketanji ketanji mi Galili prowins aka Ten Taon distriknöhök kaget. Kambu tosatñan Jerusalem siti aka Judia prowinsgö miri tosatñeyök kaget. Kambu tosatñan Jordan o likepñeyök kaget. Mewö.

5

Jisösnönj kundunje kinda kusum enjijök.

1 Jisösnönj ambazip kambu ketanji engeka kundunje öngöba tariga gwarekurupñan kanjota liliköm wanjiget.

2 Liliköm wanjigetka könahiba ambazip kambunji kambunji kusum enjiba kewö jiyök.

Denike yeñön simbawon akze?

3 “Denike yeñön Anutugö jeñe etqeqeñi tandök mötzei, yeñön Suepkö bemtohoñi buña qem anjumeanjöra mönö simbawon akze.

4 *Denike yeñön jinjen köla sahötzei, Anutunönj i urukölalep enjimapköra

* 4:17: Mat 3.2 * 4:23: Mat 9.35; Mak 1.39 * 5:4: Ais 61.2

mönö simbawoŋ akze.

⁵ *Denike yeŋön guŋböŋjönjön malakzei, Anutunöŋ gölme ki mi yeŋgöra enġii buŋaŋina akŋapköra yeŋön mönö simbawoŋ akze.

⁶ *Denike yeŋön Anutugö jeŋe solanibingöra kapaŋ köla mi nene aka ogö ewö kömumba qemjeŋ qeba maljei, Anutunöŋ mönö sihimŋini mi gumohom enġima. Mianġöra yeŋön mönö simbawoŋ akze.

⁷ Denike yeŋön tosatŋi ak kömum enġimakzei, Anutunöŋ i ak kömum enġimapköra yeŋön mönö simbawoŋ akze.

⁸ *Denike yeŋgö uruŋinan sarakŋi akzawi, yeŋön ölop Anutu ekŋe. Mianġöra yeŋön mönö simbawoŋ akze.

⁹ Denike yeŋön luai qemakzei, yeŋgö qetŋini mi Anutugö nahönböraturupŋi qetme. Mianġöra yeŋön mönö simbawoŋ akze.

¹⁰ *Anutunöŋ keuŋini jim teköi solanizeaŋgöra sesewerowero ak enġimakzei, yeŋön Suepkö bemtohoŋi buŋa qem aŋgume. Mianġöra yeŋön mönö simbawoŋ akze.

¹¹ *Ambazipnöŋ iŋini nöŋgöra aka uruqeqe keu töhöreŋ jim enġiba sesewerowero aka keu bölöŋi könaŋi könaŋi silenine ala muneŋmuneŋ ji-makzei, enön mönö simbawoŋ akze.

¹² *Mötket, Anutunöŋ töwaŋini öŋgöŋgöŋi Suep mire ali ahözawaŋgöra mönö gönköiraŋ ala sösoŋgai aka malme. Mi kewögöra: Kezapqetok ambazip mutuk malgeri, mi sesewerowero tandökŋi mewöŋanök ak enġigetka enön yeŋgö andöŋine asuhuba yembuk öröröŋ malje.” Mewö.

Iŋini gölmeġö sihi aka kiwa ewö akze.

Mak 9.50; Luk 14.34-35

¹³ Jisösnöŋ jiyök, “Iŋini gölme ambazip yeŋgö howe tandök akzemö, howe nahömŋan piahima ewö, mi mönö denöwö möhamgöinga kunbuk nahömŋambuk akawak? Mianġö könaŋi kun qahö. Toroqeba yuai kungöra qahö dop kölmapmö, mi nesak ewö gilget geiga ambazipnöŋ mi könaŋinan tiahöme.

¹⁴ *“Iŋini gölmeŋi gölmeŋi yeŋgö kiwa tandök ewö aka malje. Siti kun kunduje öŋgöba meget tatzawi, mianön tölapŋe tatmamgö osimakza.

¹⁵ *Kunŋan kiwa ohotiriba kumbut bapŋe qahö almapmö, kiwagö dum tatatŋe ali tatma. Mewö tata asariiga ambazip miri uruŋe maljei, mönö körek yeŋgö jeŋini kuŋguiga asakŋi ehakŋe.

¹⁶ *“Mewöŋanök mönö enġö asakŋini kondelgetka ambazip sutŋine asariiga ehakŋe. Amba-zipnöŋ ahakmemenini ölopŋi eka mianġöra Iwiŋini Suep mire maljawi, mönö i möpöseiba malme.” Mewö.

Jisösnöŋ Köna keugö könaŋi kusum enġiyök.

¹⁷ “Nöŋön Mosesgöreŋ Köna Keu aka kezapqetok ambazip yeŋgö Buzup Kimbiŋini mi qeapkömamgöra aka qahö kaba maljal. Mewö laŋ kude mötmörime. Nöŋön qeapkömamgöra qahöpmö, keu mi tem köl teköbi miengö ölninan pöndaŋ asuhumapköra aka kaba maljal.

¹⁸ *Nöŋön keu ölni kun kewö jibi mötket, Mosesgö Köna keunöhök kulem moröŋi morö közömŋi kun me kirifi ohohogö jönbölanŋi mohok-kun mi qahö kötökŋi ayapkömapmö, keu pakpak mi mutuk ölninambuk asuhugetka Suep gölme yetköŋ göröŋ qemahot.

* 5:5: Sum 37.11 * 5:6: Ais 55.1-2 * 5:8: Sum 24.3-4 * 5:10: 1 Pitö 3.14 * 5:11: 1 Pitö 4.14
* 5:12: 2 Hist 36.16; Apo 7.52 * 5:14: Jon 8.12; 9.5 * 5:15: Mak 4.21; Luk 8.16; 11.33 * 5:16: 1 Pitö 2.12 * 5:18: Luk 16.17

19 “Miangöra kunñan Köna keugö jimkutukutu morörökñi miengörenök keu kun koyonñiba ambazip mewö kusum enjimakzawi, yañön Suepkö bemtohoñe angoriga qetñi morörökñi bezup qetme. Mewö qetmemö, kunñan mi tem köla wuatangöba ambazip mewö kusum enjimakzawi, yañön Suepkö bemtohoñ uruñe angoriga qetñi ketañamnini qetme.

20 “Nöñön miangö dop kewö jibi mötket: Enjö ahakmemenini solanñi miangön mönö Köna keugö böhi aka Farisi (Köna keugö kapankölköl) yengö silikñini tandök ewö örörön akapuk. Silikñinan yengö silikñini gwötpuk qahö ongitma ewö, enjön mönö Suepkö bemtohoñ uruñe qahö angotme.” Mewö.

Yom kazik aka enjuget kömukömuğö könañi.

21 *Jisösnöñ toroqeba jiyök, “Enjön möpñeyök keu kun kewö jiget mötzema, ‘Ambazip kun kude qeget kömuma aka kunñan kazikñi qei kömumawi, i mönö distrikö keu jakeñe algetka keuñi jim teköme.’

22 “Mewö jiget mötketmö, nöñön keu mi kewö jim tuaribi mötme: Kunñan alañambuk anjururuk aka irimñan sehooli yom kazik akzawi, i mönö mewöyök distrikö keu jakeñe al wañgiget keuñi jim tekömeangö dop akza. Mewöñanök kunñan alañi jijiwilit keunöñ jim böliba ‘Gi uruqahö akzan,’ jizawi, i mönö kantrigö jike kaunsöl yengö jeñine al wañgiget keuñi jim tekömeangö dop akza. Kunñan alañi lösö keunöñ jim böliba ‘Gi anğöjörakabuk akzan,’ jizawi, yañön mönö könöp sianöñ gemawangö dop akawak.

23 “Miangöra göñön kalem naluki memba kaba altanöñ almangö aknöñga miangören keu kewöñan mötmötke kañgotpawak: Alagahö uruñe keu ahöi yañön kazik ak gihimangö mötza. Keu mewöñi mötmöriman ewö,

24 kalemgi mi mönö alta wösöñe ala mutuk alagahören anda yambuk keuñiri jim solaniba urumohot aka miangö andöñe kunbuk kaba kalem naluki Anutugöra alman.

25 “Kerökan silege ala keu jakeñe öröm gihimangö aiga komitigören anda köna namñe miangören mönö kapan köla imbi mohot aka keuñiri jim solanimahot. Mewö qahö akñahot ewö, kerökan ölop örörahöm gihiiiga (jas, majistreit) jimtekötekö tonangö jeñe angotnöñga möta jii opotöröpkö böröñe genöñga kösö mire al ghibapuk.

26 Nöñön keu öñi kewö jibi mötnöñ, Gi miangören töwagi pakpak almanangö dop qaköba tatman. Toiyagi kondikñi mewöyök al teköbagun mönö töwagi memba etman.” Mewö.

Sero yonğorögö könañi

27 * “Keu kun kewö jiget mötzema, ‘Sero yonğorö kude akñan.’

28 Mewö jiget mötketmö, nöñön keu mi kewö jim tuaribi mötme: Kunñan serogö sihim kömbönañi qakñe ambi uba ekzawi, yañön lök uruñan yambuk sero yonğorö akza.

29 * “Jegi öñan siñgisöndok akñangö kölgorom ak gihima ewö, mi mönö qözöla gilnöñ anma. Sile kitipki kunñan ayuhui mewö Suepnöñ öngönöñga dop kölmapmö, silegi jömukñi malnöñga gil gihigetka könöp sianöñ geba ayuhubanbuk.

30 * Bөрögi öñan siñgisöndok akñangö kölgorom ak gihima ewö, mi mönö yandiba gilnöñ anma. Sile kitipki kunñan ayuhui Suepnöñ öngönöñga dop kölmapmö, silegi jömukñi mala könöp sianöñ geba ayuhubanbuk.” Mewö.

Awanöm anğömosötmosötkö könañi

* 5:21: Eks 20.13; Dut 5.17 * 5:27: Eks 20.14; Dut 5.18 * 5:29: Mat 18.9; Mak 9.47 * 5:30: Mat 18.8; Mak 9.43

31 **“Keu kun kewö jiget ahöza, ‘Kunñan anömñi mosöt-mawi, yañön mönö anğömosötmosöt papia ohoba anömñi wañgima.’*

32 **“Mewö jiget ahözapmō, nōñön kewö jibi mötme: Kunñan anömñi qesabulum aiga mosötpawakmō, kōnañi kungōra anömñi mosöt-mawi, mewö mianñön mönö anömñan qesabulum akñapkō kondota siñgisöndokō keuñambuk akña. Mewö aiga azi kunbuk meiga azi dölökñi mianñön mönö mewöyök qesabulum akña.” Mewö.*

Keuñini jöjōpañ keunöñ kude jim köhöime.

33 **“Keu kun mi mewöyök möpñeyök kewö jiget mötzema, ‘Keuñini jöjōpañ keunöñ jim köhöigeri, mi mönö kude oñgitme. Kembugōra yuai akingō keuñini jöjōpañ keunöñ jim jöhögeri, mi mönö wuatañgögetka ölnambuk akña.’*

34 **“Mewö jiget mötketmō, nōñön keu mi kewö jim tuaribi mötme: Keuñini mönö jöjōpañ keunöñ qahöpmañöp jim köhöime. Suep mi Anutugō jakömbuak dumñi akzawañgōra aka keu kewö kude jime, ‘Keu ölni qahö jimam ewö, Suep Toñan ölop likepñi melenñi qakne öngöma.’*

35 **“Gölme mi Anutugō kōnañangō döpnñi akzawañgōra aka keu kewö kude jime, ‘Keu ölni qahö jimam ewö, gölmenöñ ölop tiñgita turum niñgima.’ Jerusalem mi Kiñ Tök-kutukutunañgō sitiñi akzawañgōra aka keu kewöñi mi mewöyök kude jime, ‘Keu ölni qahö jimam ewö, Kiñ Ketañi yañön ölop qemasolokepnañgō likepñi melenñi qakne öngöma.’*

36 *Gi nöröp jupki injañi menöñ tuatñi akñapkō osiman aka nöröp jupki tuatñi menöñ injañi akñapkō osiman. Mianğōra keu kewö kude jiman, ‘Keu ölni qahö jimam ewö, Anutunöñ ölop nöröpñi qeiga jupñañgō mundañan uteköma.’*

37 *Jöjōpañ keu kude jimemō, oñ-keugōra mönö ‘Oñ!’ jime aka qahö-keugōra ‘Qahö!’ jime. Keu diñdiñi mianğöreñ keu yuai toroqemei, mi mönö Bölöñañgō Toñan sölölohöm enğii asuhuma.” Mewö.*

Jinöñ jibi akñöñ aki mi kude akñe.

Luk 6.29-30

38 **“Keu kun kewö jiget mötzema, ‘Kunñan jegi qösökömawi, gi mönö kitipñi melenña yañgō jeñi qösököman. Kunñan jitki kumburatimawi, gi mönö kitipñi melenña yañgō jitñi kumburatiman.’*

39 *“Mewö jiget mötketmō, nōñön keu mi kewö jim tuaribi mötme: Kunñan bölöñi ak enğimawi, i mönö kude qetala tuarenjoñ ak wañgime. Mewö qahöpñmō, nuñgulungi ölni qekötahöma ewö, mönö nuñgulungi likepñi mewöyök qekötahömapkōra melenñan.*

40 *Kunñan ‘Sileötañgi memam,’ jiba keunöñ al gihimangō mötza ewö, mönö mosöta malukugi qakñi mewöyök wañginöñga buña qem anğuma.*

41 *“Mewöyök kunñan gösöñi kilomita (mail) mohotkö dop siriba anmangō kuñgum gihima ewö, mönö ölop tem köla kilomita (mail) yahötkö dop siriba yambuk anman.*

42 *Kunñan göhöreñ yuai kungōra qesim gihimawi, mi mönö wañgiman. Kunñan ‘Yuai niñginöñga kitipñi bian melenñam,’ jiba qesim gihimawi, i mönö andö kude qeman.” Mewö.*

Kazikurupki mönö urugan jöpaköm enğiman.

Luk 6.27-28, 32-36

43 **“Keu kun kewö jiget mötzema, ‘Ambazip kösutñine mala alaurupñini*

* 5:31: Dut 24.1-4; Mat 19.7; Mak 10.4 * 5:32: Mat 19.9; Mak 10.11-12; Luk 16.18; 1 Kor 7.10-11

* 5:33: Lew 19.12; Jan 30.2; Dut 23.21 * 5:34: Jei 5.12; Ais 66.1; Mat 23.22 * 5:35: Ais 66.1; Sum

48.2 * 5:38: Eks 21.24; Lew 24.20; Dut 19.21 * 5:43: Lew 19.18

akzei, mi jöpaköm engimaknemö, kazikurupnini mönö melenđa kazik ak engiba malme.'

⁴⁴ "Mewö jiget mötketmö, nöñön keu mi kewö jim tuaribi mötme: Inini mönö kazikurupnini jöpaköm engiba kinda sesewerowero ak engimakzei, yengöra mönö köuluköba malme.

⁴⁵ Mewö ahakne ewö, mewö mianjön Iwiñinan Suep mire maljawi, mönö yangö könañi kondela nahönböraturupñi aka malme. Yangö könañi kewö: Yanjön wehönñi qahö anjön köliga kota ambazip ölopñi aka bölöñi mewöyök mem asarim engiba kie aliga ambazip diñdiñi aka gonjonji yengö nupñini mewöyök mem kelörakza.

⁴⁶ "Enjön mönö niñginöñ gihibigö tandökñi onjita Anutugö könañi kondela ahakne. Takis tilipqilipñinambuk megetka sisitñini memakzei, yenjön alaurupñinan jöpaköm engigetka i melenđa jöpaköm engimakze. Mi urumelenğö silikñi qahö. Inini yengö silik miyök wuatangöba ahakne ewö, Anutugörenj tosa kun qahö ahuiga yanjön mönö silikñinanğö likepñi qahö enjiiga töwa kun qahö buña qem anjume. Mianğöra mönö ambazip körek pakpak jöpaköm engiba malme.

⁴⁷ "Urumelenğö kopa ambazipnöñ mewöyök sutñine jölöñini jim anjuba maljemö, mi urumelenğö aiwesökñi qahö. Inini yengö dop alaurupñini enğö sutñineyök jölöñini jim anjumatne ewö, mewö mönö kopa ambazip ewö akze. Kopa ambazip yengö silikñini mönö onjita qetpuk sorokñi aka malme?

⁴⁸ *Enğö Suep Iwiñinan aködamun sorokñi akzawi, enjön mönö mianğö dop aködamun sorokñinambuk aka malme." Mewö.

6

Mözöqözöröñ ambazip mi kalem engimakne.

¹ *Jisösnöñ kewö kusum enjiyök, "Mönö kewögöra galöm mem anjuba malme: Ahakmemenini solanñi diñdiñi mi ambazipnöñ eka enğöra mötket onğömapköra aka kude ahakne. Mewö ahakne ewö, enğö Iwiñini Suepnöñ maljawanjön mönö silikñinanğö likepñi qahö enjiiga töwa qahö buña qem anjume.

² "Mianğöra 'Mözöqözöröñ ambazip kalem engimam,' jiba mi qenjaröknöñ kömam tömunbuk uba kolek almegöra kude akñan. Urumelenğö silesile ambazip yenjön ambazipnöñ miwidimğöm (mem biwim) enjimeğöra möta köuluk mire aka köna namne anda ambazip engeka mewö ahakze. Nöñön keu öl töhönñi kun kewö jibi mötme, Yenjön mönö silikñinanğö töwanji pakpak lök buña qem anjugetka Suep Tonjan mi qahö toroqema.

³ "Gönjön mewö kude akñanmö, 'Mözöqözöröñ ambazip kalem engimam,' jiba börögi ölñan denöwö akzawi, börögi qaniñan mi kude mötma. *

⁴ Kalemgi mianjön tölapne ahöiga Iwigan ahakmeme tölapñi ehakzawi, yanjön mönö töwa gihima." Mewö.

Köuluk nupkö könañi kewö:

Luk 11.2-4

⁵ *"Mianğöra Anutugö köulukömei, mi mönö urumelenğö silesile ambazip yengö dop kude akne. Yenjön ambazipnöñ engekneğöra möta sihimñinan köuluk mire aka köna soñanöñ kinda köulukömakze. Nöñön keu öl töhönñi

* **5:48:** Lew 19.2; Dut 18.13 * **6:1:** Mat 23.5 * **6:3:** Börögi qaniñan mi kude mötma, keu mianğö könañi kewö: Mi mönö tölapne aknönga wölböt alagan mewöyök mi kude mötma. Anutunöñ sölölohöm gihiga nup ölopñi amqeba memakzani, mi mönö nangak ölum guhumakza. * **6:5:** Luk 18.10-14

kun kewö jibi mötme, Yeñön mönö silikñinanğö töwanji pakpak lök buña qem anğugetka Suep Toñan mi qahö toroqema.

⁶ “Göñön mewö kude akñanmö, ‘Anutugö köulukömam,’ jiba mönö nangi miri urunji moröñe öngöba nanğu köla Iwigi tölapñe maljawı, i köuluköm wanğiman. Mewö aknönğa Iwigan ahakmeme tölapñi ehakzawi, yañön mönö töwa gihima.

⁷ “Köulukömei, miangören mönö urumelengö kopa ambazip yeñgö tandök ewö † keu oyoñdewetdewet mi kude jiba malme. Yeñön keu jit sehisehıñi jıgetka Anutunöñ miangöra aka kezap ala möt engimapkö mötmörimakze.

⁸ Mönö kewögöra yeñgö dop kude aka malme: İñini wani yuaigöra osiba mözöqözöröñ akzei, İwiñinan mi qahö köulukögetka qeljiñe lök mötza.

⁹ Mönö kewö köulukömakñe:

“Neñgö İwinini, gi Suepnöñ maljan. Göhö qetki mönö töröñi ahöma.

¹⁰ Mönö galöm köl neñginönğa bemtohonğahö ölnji asuhuma.

Göhö jitsihitki Suepnöñ tem kölakzei, mewöñanök mönö gölmenöñ asuhuma.

¹¹ Merakö neneñi mönö dopnine neñgiman.

¹² Tosatñi yeñgören tosa neñgören ahözawi, nini mi mosöt engizin ewö, gi mönö miangö dop neñgö tosanini sanğonman.

¹³ Esapesapnöñ et neñgubapuköra mönö anğön köl neñgiba Bölöñi Toñanğö böröñeyök ‡ meköm neñgiman. (Gi nangkak bemtohon Toñi, kukösum Toñi aka asakmararañ Toñi mi nalöñi nalöñi mala kota malnöñ aka teteköñi qahö mal öngöman. Mi ölna.)

¹⁴ *İñini ambazip yeñgö siñgisöndokñini mosötme ewö, engö Suep İwiñinan mönö mewöyök engö siñgisöndokñini mosötma.

¹⁵ Mosötmapmö, ambazip yeñgö siñgisöndokñini qahö mosötme ewö, engö İwiñinan mönö mewöyök engö siñgisöndokñini qahö mosötma.” Mewö.

Neñgö siñgi malmal mi kewö ahakñe:

¹⁶ “Neñgö siñgi malmei, miangören mönö urumelengö silesile ambazip ewö kukbosole kude aka malme. Yeñön Anutugöra nene siñgi malakzei, ambazipnöñ mi ekñegöra aka zolon örögetka jemesoholñinan mölmölimakza. Nöñön keu öl töhönñi kun kewö jibi mötme, Yeñön mönö silikñinanğö töwanji pakpak lök buña qem anğugetka Suep Toñan mi qahö toroqema.

¹⁷ “Göñön mewö kude akñanmö, Anutugöra nenegö siñgi mala miangören mönö sinim jupuknöñ me saipenöñ jemesoholgi sanğonda nörop jupki qeba malman.

¹⁸ Mewö aka nenegö siñgi malnönğa ambazipnöñ qahöpmö, İwigi tölapñe maljawañön mi ekña. Mewö aknönğa Iwigan ahakmeme tölapñi ehakzawi, yañön mönö töwa gihima.” Mewö.

Söngöröñi ketanji yuai mi mönö Suepnöñ tokome.

Luk 12.33-34

¹⁹ * “Moneñ inap yuai mi mönö gölmenöñ ahöm engimapköra kude tokome. Mewö tokogetka miangören jıjılukut kezaplonlonñöñ mi yöhötiğetka kahawet töromnöñ (ros, ufeñ) mem bölıiga kegwek-kahasılilıñ yeñön miri qesınđa öngöba yoñgorö memakze.

²⁰ “Gölmenöñ qahöpmö, Anutugö jitsihitñi tem kölgetka qetbuñanjanan qarimapköra mönö kapan kölme. Mewö aketka guli dötnamñini qainñi kun mi Suep mire ahöiga gurem jıjılukutnöñ mi qahö yöhötiğetka kahawet töromnöñ

† **6:7:** Kian kantri yeñön Anutu qahö möt wanğiba bemñini murutñi murutñi köuluköba keu omanji oyoñdewetdewet mi lan jiba malje. ‡ **6:13:** “Bölöñi Toñanğö böröñeyök meköm neñgiman,” tosatñan keu mi kewö melenje: bölöñeyök meköm neñgiman. * **6:14:** Mak 11.25-26 * **6:19:** Jei 5.2-3

(ros, ufen) mi qahö mem bölime. Kegwek-kahasililin yenön eu qahö öngöba miri qesinda qahö yongorö meme.

²¹ Yuaigöra aködamunji memba mötnöñ öngözawi, mianjön miri kungen ahöiga göñön mönö urugi mewöyök mianjörenj qekötahöba malman.” Mewö.

Silegö asakñi mi kewö:

Luk 11.34-36

²² “Göhö jegi mi uru silegahö kiwanji akza. Mianjöra kawöl kunöñ jegi qahö mem böliza ewö, mianjön mönö unöñ asarim teköi Anutugö asakñan ölop uruge mem asariiga malmalgi pakpak asakñe malman.

²³ “Asakñe malmanmö, sihim kömbönañi bölöñan me yuai kunñan jegi mem böliba asakñi közambötza ewö, mianjön silegö malmalgi pakpak mewöyök mem söñauiga pandaman uruñe jipjap malman. Mewö aiga söñaupnöñ urugahö asakñi közamböri söñauza ewö, nangi pandamanöñ mönö Yei! keta bölöñi wewelipñambuk akza.” Mewö.

Anutu me moneñ möt nariman?

Luk 16.13; 12.22-31

²⁴ “Kunñan kembu yahöt welen qem etkimangö osimakza. Kunñan mewö akñangö mötzawi, yanön mönö kun kazik ak wangiba kun uruñan jöpaköma. Kungörenj qekötahöba kun jijiwilit ak wangima. Mianjöra enön Anutu aka moneñ inap mi mindiriba welen qem etkibingö osime.” Mewö.

Anutu möt nariba waimanjat kude akñe.

²⁵ “Mewö aiga nöñön kewö jibi mötket: Inini gölmenöñ malmeangö waimanjatñi mi kewö jiba kude akñe, ‘Mönö wani yuainöñ gumohom angubinak aka wanatnöñ sileninañgö löngötpinak?’ Jeninambuk maljei, mianjön bohonñi aiga nenenöñ mönö mianjö nemböñe akza. Sileninañbuk maljei, mianjön bohonñi aiga opo söronöñ mönö mianjö nemböñe ahöza. Mönö mi mötmörime.

²⁶ “Könakemba neiñi neiñi mönö engekñe. Mienjön nene kötni qahö qesin gilakze. Padi ölni qahö yandiba köwe miriñine qahö tokomakze. Mi qahöpmahöp aiga engö Suep Iwiñinan mönö töndup i gumohom engimakza. Inini nei yengö dop qahöpmö, engö söngöröñinan mönö nei söngöröñini engongita öngöngöñi akza me qahö? Mönö mi mötmöriget anök.

²⁷ “Engörenjök kunñan waimanjat aka mewö mianjön gölmenöñ mawangö nalöñi mi sömañi mohotkö dop mem toroqema me qahö? Mi qahöpmahöp! §

²⁸ Opo söroninañgöra mönö denöwögöra waimanjat akze? Mi qahö dop kölja. Sombengö jariñ juranji qarimakzei, mönö mi uba engekñe. Mienjön opo söroninañgöra möt qahö lonjalakze aka nup tosatñi qahö memakze.

²⁹ * “Mi töndup nöñön kewö jibi mötme, Kiñ Solomonöñ goul silwöñi qeraköba asonbilikñambuk malökmö, yanjö malukuñi mi kiteñ soranjñ me jura kungö dop eksihimñambuk qahö ahöyök.

³⁰ Sombengö jariñ juranji töhön merak kösutnine ahöi uran kölgetka eri qezaköba gila ohoget jemapmö, mi töndup Anutunöñ mi ölopñanök menölömakza. Mianjöra yanön inini mewöyök ölop esuhum engima. Inini jariñ juranjanjö dop qahö. Anutunöñ köyan köl engimangö möta mianjöra sihimñi öngöngöñi mörakza. O ambazip, mötnaripñinan mönö wuanöngöra öne töhön morörökñi akza?

§ 6:27: Tosatñan jabö 27 mi kewö meñda jize: Engörenjök kunñan waimanjat aka mewö mianjön silenjan wan fitgö dop toroqeba mem körimangö osima. * 6:29: 1 Kiñ 10.4-7; 2 Hist 9.3-6

31 “Mewö aiga inini mönö malmalñinangö waimanjat aka mötkurumkurum kude ahakñe. Mi aka lömböröba kewö jibepuk, ‘Nini mönö wani nene aka wani oya nembinak?’ aka ‘Wani yuainöñ silenini esuhubinak?’

32 “Mi kewögöra: Urumelengö kopa yeñön yuai pakpak mi buña qem angingö kapan köla urukönöp ahakze. Inini yuai pakpaköra mözöröngöba osimakzei, engö Suep Iwiñinan mönö mi möt teköza.

33 Miangö urukönöp kude akñemö, mutuk mönö Anutugö bemtohoññöñ angota yangö jeñe solanibingö kapan kölmö. Uruñini miangöreñ alget ahöiga yanñön mönö galöm kölmö engiba yuai mewöñji pakpak mi mewöññanök engima.

34 “Mewö aiga inini mönö uran malmeangö waimanjatñji kude ahakñe. Urangö waimanjatñji mi urangöra. Silim mohot mohotkö waimanjatñini mönö nanñök nanñök bisiinga dopñine akña.” Mewö.

7

Jimtekötekö tonji ewö kude akñe.

Luk 6.37-38, 41-42

1 Jisösnöñ toroqeba kewö jiyök, “Anutunöñ keuñini kewöta jim teköi et-pepuköra mönö tosatñi yeñgö keuñini kude kewöta jim teköme.

2 *Miangö könañi kewö: Inini tosatñi yeñgö keuñini kewöta jim tekömei, Anutunöñ mönö dop mohot mianñönök nanñini keuñini kewöta jim teköma. Inini tosatñi yeñgöra jimkutukutu ala memba öngöba eta kewöt engimakzei, Anutunöñ mönö miangö dop nanñini ak engii öngöba erakñe.

3 “Gi alagahö jeñe gödöwöröt morörökñi ekzanmö, nangi jege ip sahötñi ketanji ahözawi, mia mönö wuanöngöra kude ek kutuzan?

4 Me denöwögöra aka amqeba alagahöra kewö jizan, ‘Alani mötnöñ, ni ölop jegeyök gödöwöröt itaköbi etma?’ Mewö amqeba jizanmö, ip sahötñi ketanji mi nange jege ahöza.

5 “O gi urumelengö silesile azia, gi mönö mutuk nange jegeyök ip sahötñi (tametñi) ketanji memba gilman. Mi mem gilagun törörök ek kutuba alagahö jeñeyök gödöwöröt morörökñi mi ölop itakönöñga etma.

6 Yuaigöra mötketka tök-kutukutuñi qainñi kun akzawi, mi mönö kiam kude engime. Guli damandan qeçenji mi mönö bau wösöñine kude gilget anma. Mewö akñe ewö, yeñön mönö mi könañinan tiahöm engiba dumñe melenja nanñini engöhöba yöhöqöhötüm engibepuk.” Mewö.

Mönö qesiba jaruba Anutugö nanñuñe qeba malme.

Luk 11.9-13

7 “Mönö Anutu köuluköme. Köulukögetka kewöta engima. Urugö yuaigö Anutugöreñ böröjan memba jarume. Mi jarugetka kondeliga miwikñaime. Kinda nanñunöñ qeme. Qegetka nanñuñi öröm engima.

8 Kunñan Anutu köulukömakzawi, yanñön mönö likepñi buña qem anñuma. Yuaigö jarumakzawanñön mönö mi miwikñaima. Nanñunöñ qemakzawanñöra mönö nanñu öröm wanñima.

9 “Mötket, ambazip engöreñök danñön kewö akawak: Nahönñan bisketköra qesiiga köt wanñima?

10 Me nahönñan söragöra qesiiga qatö wanñima?

11 “Mewö aiga inini ambazip bölöñi aka töndup kalem ölopñi ölopñi nahönböraturupñini engibingö dop akze ewö, engö Iwiñini Suep mire mal-jawanñön mönö kalemñi denöwö anñön kölbawak? Yangö uruñangö ahak-memenji mi neñgoñgita tandökñi kun akza. Miangöra inini yuai ölopñangöra köuluköba qesim wanñime ewö, yanñön mönö sihimñan mi engima.

* 7:2: Mak 4.24

12 **“Miangöra ambazipnön yuai pakpak nanñinanğö ak engimegö mörakzei, miangö dop mönö nanñini mewöyök i ak engimakne. Mewö aketka Mosesgö Köna Keu aka kezapqetok ambazip Buzup Kimbi keunini mianğön mönö ölñinambuk aketka mindimindiri könañan aukne asuhuma.”* Mewö.

Mönö kiripo nanğu giwikñi kutuba anme.

Luk 13.24

13 *“Könöp sianön gebingö könañi mi amqeqeni aka numbuñanğö nanğunı mi ketanı. Ambazip sehisehiñan nanğu mi kutuba köna mi mötöteiba anme. Miangöra inini mönö kiripo nanğu giwikñi kutuba miangö uruñe anme.*

14 *“Malmal köhöikne anğotpingö könañi mi pökpökñi (pipitñi) osukosubuk aiga numbuñanğö nanğunı mi giwikñi. Ambazip awamdökñan nanğu mi miwikñaime.”* Mewö.

Ipkö könañi mi ölñi eka möt kutume.

Luk 6.43-44

15 *“Kezapqetok ambazip takapulakani yeñön lamagö sile ewö esunini löngöta engören kamakzemö, uruñinan ubibi kiam kalñi ewö akze. Miangöra inini mönö yeñgöra aka tihitñini möta galöm mem anğuba malme.*

16 *Nupñinanğö ölñi eketka könañini kondeli ölöp möt kutume. Nejoñ kötni mi jömnön asuhumakza me qahö? Warun kötni mi koururukñöñ (köwörörök) asuhui tokomakzin me qahö? Qahö.*

17 *“Miangö dop ip ölöpñi pakpak miñön ölñi ölöpñi kuñgumakzemö, ip bölöñan mönö kötni bölöñi kuñgumakza.*

18 *Ip ölöpñan ölñi bölöñi kuñgumangö osiza aiga ip bölöñan kötni ölöpñi kuñgumangö osiza.*

19 **“Ip pakpak ölñi ölöpñi qahö kuñgumakzei, mi mönö galömñan kutuba memba köñöpnön giliğa geme.*

20 **“Miangö dop ambazip miñgö nupñinanğö ölñi eketka könañini kondeli ölöp möt kutume.”* Mewö.

Gwarek ölñanğö könañi

Luk 13.25-27

21 *“Nöngö Suep Iwinanğö jitsihitñi tem kölakzawañön mönö yanğö bemtohoñnön anğotma. Gwötpuk yeñön nöngöra ‘Kembuni, Kembuni!’ qeta jimakzemö, körek yeñön Suepkö bemtohoñnön qahö anğotme.*

22 *“Jimtekötekögö nalö ketanı miangören gwötpuk yeñön kaba nöngöra kewö jime, ‘O Kambu Kambu, neñön mönö göhö qetke yuai asuhumapkö kezapqetok keu qeljiñe jiba malin. Neñön mönö göhö qetkahö ösumnön ömewöröme enğuatangöba malin. Göhö qetkan mönö nam köl neñgiğa anğöletot ösummuñinambuk gwötpuk memba malin. Mi ölum guhuza me?’*

23 **“Mewö jigetka nalö miangören könañini aukne kewö jibi mötme, ‘Nöñön inini nalö kunön qahö möt enğial. Iwilele ahak ambazip, inini mönö nömosöta kesalget.’ ”* Mewö.

Miri memegö mötkutukutu ölöpñi aka piromñi

Luk 6.47-49

24 *“Mewö aiga denike yeñön keu jitni jizali, mi möta miangö dop tem köla memakzei, nöñön körek yeñgö könañamñini kondela mötkutukutu azigö dop ala kewö jimam, Yanğön miriñi jamönjiñ köt qakne meyök.*

* 7:12: Luk 6.31 * 7:19: Mat 3.10; Luk 3.9 * 7:20: Mat 12.33 * 7:23: Sum 6.8

²⁵ Mewö meiga kie uru nalöŋe kie römbum yöhöba eriga göulu luhuiga luhut ketanji qeiga o göulu köhöikŋi gila miri selŋe kuŋguyökmö, miri mi jamönjinj köt qakŋe mei kinöhanğöra aka qahö kusuyök.

²⁶ “Denike yeŋön keu jitni jizali, mi möta mianğö dop qahö tem köla memakzei, nöŋön körek yeŋö könaŋamŋini kondela azi mötkutukutuŋi piromŋanğö dop ala kewö jimam, Yaŋön miriŋi sak kösahet qakŋe meyök.

²⁷ Mewö meiga kie uru nalöŋe kie römbum yöhöba eriga o luhuiga luhut ketanji qeiga o göulu köhöikŋi gila miri selŋe kuŋgui kusuiga goromororonğöba erök.” Mewö.

Ambazipnöŋ Jisösgö kukösumŋanğöra welipköget.

²⁸ *Jisösnöŋ keu mi jim teköiga ambazip kambuŋi kambuŋi yeŋön mötketka kusum enğiyöhi, tandök mianğöra auruba welipköget.

²⁹ Yaŋön yeŋö Köna keugö böhiurupŋinanğö tandök qahö kusum enğiyökmö, kukösum Toŋi akzawaŋö dop ambazip kusum enğiiga möta tandök mianğöra welipkögetka nembönjini teköyök. Mewö.

8

Jisösnöŋ uzikuku azi kun mem solaniyök.

Mak 1.40-45; Luk 5.12-16

¹ Jisösnöŋ kundunji mi mosöta eri könagesö kambulelembe ketanjan andöŋe wuatangöget.

² Mewö kagetka mianğoreŋ uzikuku azi kunöŋ kaba simin köla Jisösgö wösöŋe geba kewö jiyök, “O Kambu, göŋön sihimgan mem ölöwak niŋgimamğö mötzan ewö, mönö ni ölop mem solanim niŋgiman.”

³ Mewö jiiga böröŋi böranda silenji misiriba jiyök, “Nöŋön mi akŋamğö mötzal. Gi mönö solaniman.” Mewö jiiga uzikukuŋi mi mianğoreŋök solanii ölöwahök.

⁴ *Solaniiga kewö jim kutum waŋgiyök, “Mötnöŋ, kianğö buzup keuŋi mi kun kude jinöŋ mötme. Qahöpmö, mönö jike nup galömgöreŋ anda silegi kondel waŋgiman aka Mosesgöreŋ jimkutukutuŋi wuatangöba solanizanangö saiwap nalukŋi ala jöwöwöl ohoman. Mi ohonöŋ ehiga ambazipnöŋ könaŋangi möt kutume.” Mewö.

Jisösnöŋ suahö galöm kungö nup aziŋi mem ölöwahök.

Luk 7.1-10

⁵ Jisösnöŋ Kaperneam taonöŋ kaŋgoriga Rom suahö galöm kunjan yanğoreŋ kaba köuluköba kewö jiyök,

⁶ “O Kambu, nöŋö nup azinanğö silenji likepŋan kömukömuŋi aiga sihimbölö kanjamŋambuk möta mire ahöza.”

⁷ Mewö jiiga kewö jii mörök, “Nöŋön mönö anda i mem ölöwakŋam.”

⁸ Mi möta kewö melenđa jiyök, “O Kambu, ni mewöröpŋan malbiga nöŋö miri boŋan goalöŋmapkö gamuni mötzal. Mianğöra keu jitkanök jinöŋga welen azinan ölöwakŋa.

⁹ “Mi kewögöra: Ni nanak mewöyök galömnangö kukösum bapŋe al niŋgigetka maljal. Nöŋö bapŋe yarö azi malgetka mi jim kutum enğimakzal. Yeŋgöreŋök kungöra ‘Anman,’ jim kutubi yaŋön anma. Kungöra ‘Kanöŋ,’ jim kutubi yaŋön kama aka welen azini kungöra ‘Nup ki meman,’ jibiga yaŋön mi mema.”

¹⁰ Jisösnöŋ keu mi möta welipköba ambazip wuatangöba kageri, yeŋgöreŋ lilingöba kewö jiyök, “Nöŋön keu ölnji kun kewö jibi mötme: Israel könagesö sutŋine mewöyök mötnariŋ ketanji mewöŋi mi kungö uruŋe qahö miwikŋaial.

* 7:28: Mak 1.22; Luk 4.32 * 8:4: Lew 14.1-32

11*“Nöñön keu kewö jibi mötme: Ambazip kambulembenöñ mönö wehön kotkotñeyök aka wehön gegeneyök kaba Suepkö bemtohoñ uruñe kañgota Abraham, Aisak aka Jeikob yembuk nene sösoñgai aka malme.

12 *Yeñön mewö malmemö, bemtohoñgö nahönböraturup mi mönö engömosöta aköm engigetka pandamanöñ yaigep geme. Miangöreñ malmei, yeñön mönö sahöt gigilahöba irimñini yöhözömgögetka qetñi qeri malme.”

13 Mewö jiba suahö galömgöra kewö jiyök, “Gi mönö mirige anman. Mötnaripkahö dop mönö asuhum gihima.” Mewö jiiga welen aziñan mönö aua miangöreñök ölöwahök. Mewö.

Jisösnöñ kawöl ambazip gwötpuk meiga ölöwaket.

Mak 1.29-34; Luk 4.38-41

14 Jisösnöñ Pitögö mire anda Pitögö suhunñan silekönöp kawöl yöhöi ahöiga ehök.

15 I eka böröñe misiriiga silekönöpñan mosöri wahöta könahiba Jisös nene ohoba gumohom wañgiyök.

16 Mewö malgetka miri söñauiga miangöreñ ambazipnöñ alaurupñini ömeñinambuk mi gwötpuk enguanñita yañgöreñ kaget. Kagetka ömewöröme mi keunñan jiba közöl enñiiga kota anget aka kawöl ambazip pakpak mi mem ölöwak enñiyök.

17 *Mewö mianñön Anutunöñ keunñi kezapqetok azi Aisaiagö uruñe ali jii ahözawi, mianñön ölnambuk ahök. Keu mi kewö, “Yañön mönö neñgö uzi kawölnini meiga qakñe öñgöiga bisiyök.” Mewö.

Jisös wuatangöbingö möndö möndö keunñi

Luk 9.57-62

18 Jisösnöñ ambazip kambu ketanñi liliköm wañgiget enñeka nalö miangöreñ gwarekurupñi yembuk o anñgö kutuba likep anñgotpingö jim kutuyök.

19 Köna keugö böhi kunñan Jisösgöreñ kaba kewö jii mörök, “Böhi, gi denike denike anmani, nöñön mönö miangöreñ gi guatangöba kamam.”

20 Mi möta Jisösnöñ kewö jii mörök, “Arökñangö kiam yeñön köteñine ahögetka könakemba nei yeñön öñgot jajöñini memba malakzemö, Suep gölmegö azi ölnan mönö denike anda nöropñi wani qömböñnöñ nariba luhut membawak?”

21 Mewö jii gwarek yeñgöreñök kunöñ kewö jii mörök, “Mi ölöpmö, iwinan kömumangö aiga mutuk jinöñga anda galöm kölbö kömui löm kölbögun.”

22 Mewö jiyökmö, Jisösnöñ melenñda jiyök, “Mosötnöñ, köhömunñi yeñön qamötñini köhömunñi mi ölöp löm kölmemö, göñön mönö kaba ni nuatangöman.” Mewö.

Jisösnöñ jiiga raidimbom göröñ qeyök.

Mak 4.35-41; Luk 8.22-25

23 Jisösnöñ anda wañge uruñe öñgöiga gwarekurupñan wuatangöba yambuk mohotñe anget.

24 Angetka raidimbom ketanñan ömtöröp (töröpñanök) o anñgönöñ asuhuba gilök. Giliga sirinöñ wañge uruñe geiga numbuñe qemangö ahökmö, Jisösnöñ gaun ahöyök.

25 Gaun ahöiga gwarekurupñan anda möndöba jiget, “Hei Kambu, mönö bauköm neñginöñ. Nini anñgönöñ ayuhubingö akzin.”

26 Mewö jigetka melenñda kewö jim enñiyök, “O inñini mötnaripñini morörökñi, mönö wuanöñgöra keñgöt mötmöt azia akze?” Mewö jiba wahöta luhut aka siri jim qetal etkiiga sirinöñ nöñ qeba ahöyök.

²⁷ Mewö aiga awöwöliba qesiba jiget, “Yei! Azi kia mönö denöwöñan malja. Yanön mönö luhut aka köwet jim kutum etkiiga jitñi tem köl wanğizahot.” Mewö.

Ömenöñ bau uruñine gegetka azinöñ ölöwahot.

Mak 5.1-20; Luk 8.26-39

²⁸ Mewö asuhuiga o anğö kutuba likepñe Gadara yeñgö gölmenöñ anğorök. Mianğoreñ anğota azi ömenirambuk yahöt yetkön qaksirinöhök kaba Jisös miwikñaiyohot. Yetkön irimsesewöl azi urukönöpñirambuk ahotka kunñan köna mianğoreñ anmamgö osiyök.

²⁹ Yetkön Jisös miwikñaiya silata kewö qet gigilahöyohot, “Aek! Gi Anutugö Nahönñi akzan. Gi mönö denöwö ak neñgimamgöra kazan? Sihimbölö mötmöt nalöñan qahö kam kuñguiga qeljiñe mi könöpñambuk ak neñgimamgö ki kazan me?”

³⁰ Mianğoreñök köröwen qahöpmö, kösutñine mianğoreñ bau kambu ketañi kun gwözözak uruñe kulunđa malget.

³¹ Mianğöra ömenöñ kewö jiba Jisös ulet wanğiget, “Göñön nini közöl neñgiman ewö, mönö melaim neñginöñga ölop bau kambu mienğö uruñine gebin.”

³² Ulet wanğigetka Jisösnöñ “Mönö anda geget,” jiba jim kutuyök. Mewö jim kutuiga mianğoreñök azi uruñireyök kota anda bau uruñine geget. Gegetka bau kambu körek yeñön mönö luhuba nembönembönöñ anda jororongöba o anğönöñ geba nemulahöba kömuget.

³³ Kömugetka bau galöm yeñön ölöñ unjurata taonöñ anda keu buzupñini pakpak jiget. Azi ömenirambuk yetkoreñ yuai asuhuyöhi, mianğö buzupñi mewöyök jiget mötket.

³⁴ Jiget möta taon ambazip pakpak yeñön mosöta Jisös miwikñaiya ekingö kaget. Kaba eka Jisösnöñ yeñgö mindimindiri sel gölme mosöta anmapkö ulet wanğiget. Mewö.

9

Jisösnöñ azi sile likepñi kömukömuñi möhamgöyök.

Mak 2.1-12; Luk 5.17-26

¹ Jisösnöñ wanğe uruñe öñgöba kunbuk o anğö kutuba likepñe anğota nanñe taonöñ kayök.

² Nalö mianğoreñ azi tosatñan alañini sile likepñi kömukömuñi tumbulahöpnöñ ahöyöhi, mi kululunöñ ala anğuba kaget. Mewö kaba Anutu möt narim wanğigeri, Jisösnöñ yeñgö tandökñini mi ehi dop köliga kawöl azigöra kewö jiyök, “Nahöni, nöñön siñgisöndoki mosötzal. Mönö köhöiba ewebibigabuk saitiñgit malman.”

³ Mewö jiiga Köna keugö böhi tosatñan kinda uruñinan kewö mötmöriget, “Azi kianön mönö Anutu ilita mepaqepaik akza.”

⁴ Mewö mötmörigetmö, Jisösnöñ mötmötñini mi möt kutuba kewö jiyök, “Inini mönö wuanöñgöra keu bölöñi uruñinan mötmörize?”

⁵ Nöñön ‘Siñgisöndoki mosötzal,’ jizali, keu mianñön mönö awamñanök jijiña. Kunñan mewö jiiga tosatñan keu mianğö ölni qahö ekñe. Mianğöra mi keu awamñanğö dop. Nöñön keu kun kewö jimamgö mötzal, ‘Mönö wahöta anöñ.’ Keu mi mönö lömbötñambuk jijiña akza. Mewö jibiga ölni ahuma me qahöwi, mianñön mönö aukñe asuhui ekñe.

⁶ “Mötket, gölmenöñ siñgisöndok mosötmosötkö kukösumñi mi Suep gölmegö azi ölnañgoreñ ahözawi, inini mianğö könananğöra janjuñ malbepuk. Mianğöra keu lömbötñi mi azi kianğöra jibi ölni eket.” Mewö jiba azi sile likepñi

kömukömuñangö jeñe eka jiyök, “Gi mönö wahöta tumbulahöpki memba mirige anöñ. Keu lömbötñi mi ölnjambuk akña ewö, keu awamñi mi mönö mewöyök denöwögöra omañi akawak?”

⁷ Mewö jiiga miangöreñök wahöta miriñe anök.

⁸ Mewö asuhuiga ambazip kambu yeñon mi eka welipköba Anutu möpöseim wañgiget. Gölme azigöra kukösum mewöñi wañgiyöhañgöra Anutu möpöseiget. Mewö.

Jisösnöñ Matyu (Liwai) oholök.

Mak 2.13-17; Luk 5.27-32

⁹ Jisösnöñ miangöreñök anda takis ofis ongitmamgö aiga miangöreñ azi qetñi Matyu tariga eka jii mörök, “Gi mönö nöñgö andöñe kanöñ.” Mewö jii möta wahöta takis nup mosöta Jisösgö andöñe anök.

¹⁰ *Anda Matyugö mire anda nene nemba tatkeri, nalö miangöreñ takis meme azi tilipqilipñinambuk aka siñgisöndok azi gwötpukñan kaba Jisös aka yangö gwarekurupñi yembuk tata nene mohotñe neget.

¹¹ Mewö negetka Farisi (Köna keugö kapañkölköl) yeñon mi eka Jisösgö gwarekurupñi kewö jim enñiget, “Aek! Enñö böhiñinan mönö wuanöñgöra takis meme tilipqilipñinambuk aka siñgisöndok ambazip yembuk tata nene neza? Mi qahö dop kölja.”

¹² Mewö jim enñigetka Jisösnöñ likepñi kewö jii mötket, “Sile unditundit ambazipnöñ doktagöra qahö ak enñimakzapmö, kawöl ambazipnöñ mönö doktagöreñ anakze.

¹³ *Nöñon siñgisöndok ambazip enñoholmamgöra kaba maljalmö, ambazip nanñinanöñ mötketka solañni akzei, i qahö. Miangöra keu kianöñ könañi mönö anda kusum anñuba mötme, ‘Nöñon jöwöwöl ohobingö qahöpmö, ak kömum anñubingö sihimñi mötzal.’ ” Mewö.

Nene siñgi malmalgö keuñi

Mak 2.18-22; Luk 5.33-39

¹⁴ Nalö miangöreñ Jon O-melun azigö gwarekurupñi yeñon Jisösgöreñ kaba kewö qesiget, “Neñon aka Farisi (Köna keugö kapañkölköl) yeñon Anutugöra nene siñgi gwötpuk malahakzin. Nangi gwarekurupkan mönö wuanöñgöra nene siñgi qahö malje?”

¹⁵ Mewö qesigetka kewö melenñök, “Ölña, nini wani nalönöñ nene siñgi malakzin? Ambi meme nalöñe azigö andöurupñan könöpñi algetka ambigö sepkitipurupñan yuai mi tökömakze me qahö? Nöñon nani gwarekurupñi yeñgö azi bunaya aka yeñgö sutñine köisirik tatzal. Tatpiga yeñon miangöra aijölöñ söñgaiba tata siñgi malbingö osimakze. Osimakzemö, Anutunöñ noañgiri kömumbiga yeñon mönö nalö miangöreñ ölop siñgi malakñe.

¹⁶ (“Inini malmal walñi aka sösongai Buña dölokñi mi mindirim etkibingö osime. Miangö keu pasetñi mi kewö jibi mötket:) Löñgölöñgöt walñi jurariga kunöñ opo dölokñi qahö sanñonñan mitiba miangön opo su johañni qahö ala umgöreñgömakza. Opo su johañni dölokñi mewöñan mönö waziba löñgölöñgöt walñi öröiga kunbuk tinñiriga kinimñan qariba böliqölibapuk.

¹⁷ “Mewöñanök kunöñ wain o dölokñi mi jobö me toru walñi lama silenjan memenñi miangöreñ qahö kusuiga gemakza. Mewö akawak ewö, wain o dölokñan mönö qariba toru qesiñniga jula mokoiga gölmenöñ eta sohoiga toruñan böliqölibepuk. Miangöra wain o dölokñi mi toru dölokñeyök mokoin geiga dop kölma. Möwö ahinga mietkön ölöwakñahot. (Mewöñanök o ölopñi mi gina gisagisahöñe qahö umakzin. Mewö ubinak ewö, miangön mönö jula

* 9:10: Luk 15.1-2 * 9:13: Mat 12.7; Hos 6.6

kisipisirik eriga namba kawöl nengöhöbapuk. Mewö akapuköra o ölopni mi gina ölopne umakzin. Inini mewöyök malmal walni aka Ölöwak Buña dölökni mi mindirim etkibingö osime.) Mewö.”

Jairusnön bōratnangōra Jisōs köulukōyök.

Mak 5.21-43; Luk 8.40-56

¹⁸ Jisōsnön keu mi jii mötketka keu galöm kunñan kaŋgota Jisōsgö wösöŋe geba simin köla kewö köuluköm waŋgiyök, “Nöŋgö bōratnan mönō dölki kömuzapmō, mönō kaba bōrōgan silenē misirinōŋga guliba toroqeba malma.”

¹⁹ Köuluköm waŋgiiga wahōta gwarekurupni yembuk i wuatangōba anget.

Kawöl ambi kunön Jisōsgö malukuŋi misiriyök.

²⁰ Angetka miangōren sutñine ambi kun malök. Yañön (yara) yambu 12 miangö dop köiñnön ehiga nalö dop kawöl yöhōiga malök. Ambi miangön Jisōsgö andōne kaba malukuŋangö kitip suŋi misiriyök.

²¹ Mi misiriba nanñangōra kewö jiyök, “Nöñön i oseimangö möt lömbōriba malukuŋeyök borom kun misiribileŋak ewö, mönō ölop ölöwakñam.”

²² Mewö jiba misiriiga Jisōsnön miangōrenök liliŋgōba i eka kewö jii mörök, “Bōratni, mötnaripkan mönō mem ölöwak gihiza. Mönō köhöiba ewebibigabuk saitñgit malman.” Mewö jii möta aua miangōrenök ölöwahök.

Jisōsnön Jairusgö bōratni mem guliyök.

²³ Toroqeba angetka Jisōsnön keu galömñangö mire öngōba ambazip jingen köla awölop ugeri aka ambazip kambu göju gilgeri, mi engeka kewö jim kutum engiyök,

²⁴ “Mönō yaigep anget. Ambi morōñan qahö kömuzapmō, gaunök ahōza.” Mewö jim kutum engiiga mötketka gönahit ewö aiga gön köl waŋgiget.

²⁵ Gön köl waŋgigetmō, ambazip kambu ketani mi jiiga yaigep angetka ambi morōñangö ahōahö miri uruŋe öngōba bōrōne meiga wahörök.

²⁶ Wahōriga miangö buzup keuñan sehiba mindimindiri sel mi körek dop köla anök. Mewö.

Jisōsnön jegömöl azi yahöt mem ölöwak etkiyök.

²⁷ Jisōsnön miri gölme mi mosōta anmangö ani jegömöl azi yahötñan wuatangōba andōne kaba kewö qerohot, “Deiwickö gwölōnarökni, gi mönō ak kömum netkiman.”

²⁸ Mewö qerohotka miri kungö uruŋe öngōiga jegömöl azi yetkōn Jisōsgōren kayohotka kewö qesim etkiyök, “Jeñiri mem tohomangö kukōsumni nöŋgōren ahōzawi, mi möt narizahot me qahö?” Qesim etkiiga kewö melen waŋgiyohot, “Kembuniri, mi ölop möt narizit.”

²⁹ Mewö melen waŋgiyohotka je dapötñire misiriba jiyök, “Mötnaripñirangö dop mönō asuhuma.”

³⁰ Mewö jiiga jeñiran tohoyök. Mewö asuhuiga galöm meme keu köhöikni al etkiba kewö jiyök, “Mörohot, kiangö buzupni mi kun kude jiyohot mötme.”

³¹ Mewö jiyökmō, yetkōn mosōta anda miangö buzupni jim sehiyohotka mindimindiri sel mi körek dop kölök. Mewö.

Jisōsnön mötök azi kungö keuñi möhamgōyök.

³² Jeñiri tohoi anohotka töñöt azi keu jijiñi qahö mi waŋgita Jisōsgōren kaget.

³³ Kagetka Jisōsnön ömeñi közōli mötök azinön keu jiiga ambazip kambu yeñön mi eka welipköba jiget, “Tandök kewōñi mi Israel uruŋe mönōwök nalö kungen qahö ehin. Qahö. Dölki je murutña ekzin.”

34 *Mewö jigetmö, Farisi (Köna keugö kapañkölköl) yeñön jiget, “Yañön mönö öme yeñgö kembuñinañgö ösumnöñ ömewöröme enğuatañgömakza.” Mewö.

Jisösnöñ könagesö yeñgö wösöñi mörök.

35 *Jisösnöñ anda miri aka taon dop liliköba ambazip köuluk miriñine kusum enğiba bemtohoñgö Ölöwak Buña jim asariba mianñön uruñini kuñguba uzi kawöl aka jepajerepe könañi könañi mem ölöwak enğiba malök.

36 *Mewö mala ambazip kambuñi kambuñi engehiga lama galömnini qahö tandök simbisembel aka ilingösöñ qeñgalanğa malgetka yeñgöra wösöñi mörök.

37 *Mewö engeka gwarekurupñi kewö jii mötket, “Anutugö nupnöñ nene ölni gwötpuk öliba ahözapmö, mi tokobingö nup meme ambazipnöñ mönö awamdökñi malje.

38 Mianğöra nene öliöliñangö Kembuñan nup meme ambazip melaim enğimapköra mönö köuluköba malme. Köuluköm wañgigetka nup ambazip asuhuba ölni mi mem tokome.” Mewö.

10

Aposol 12 yeñgö qetñini

Mak 3.13-19; Luk 6.12-16

1 Jisösnöñ gwarekurupñi 12 enğoholi yañgöreñ kagetka ömewöröme közöl enğimegö kukösumñi al enğiyök. Mewöyök uzi kawöl qemjem-mamjen könañi könañi mem ölöwakñegö kukösumñi al enğiyök.

2 Melaimelai azi aposol 12 miengö qetñini kewö: mutukñi yañön Saimon, qetñi kun Pitö qetket aka yañgö munñi Andru. Mianğö andöñe Jeims aka munñi Jon, iwiñiri qetñi Zebedi.

3 Filip aka Bartolomyu, Tomas aka Matyu takis meme azi, Jeims Alfiusgö nahönñi aka Lebeus qetñi kun Tadius,

4 Saimon Zelot-politik azia * aka Judas Iskariot. Kariot azi mianñön könañgen Jisös mamalolo mem wañgiyök.

Jisösnöñ gwarekurupñi 12 melaim enğiyök.

Mak 6.7-13; Luk 9.1-6

5 Jisösnöñ azi 12 mi melaim enğiba kewö jim kutum enğiba jiyök, “Inini kian kantrigö ambazip yeñgöreñ kude anme. Mewöyök Samaria prowins yeñgö taonñini kunöñ kude anme.

6 Mianğöreñ kude anmemö, Israel könagesögö lama sohogeri, mönö yeñgöreñ anme. Mi nup mutukñi.

7 *Denike denike anmei, mianğöreñ mönö Buña keu kewö jiba jim asarime, ‘Suepkö bemtohoñan mönö dowe kazawa mianğö uruñe añgotme.’

8 “Ambazip kawölñinambuk mönö mem ölöwak enğiba kömükömuñi mi mem gulim enğiba malme. Uzikuku ambazip mönö mem solanim enğigetka öme wöröme közöl enğiba malme. Anutunöñ yuai kalema enğiyöhi, mi mönö toroqeba kalema enğiba malme.

9 “Köna anmeañgöra soujenji goul me silwö me ain kopönöñ memenji mi mönö irimuñganine kude jöhöme.

* 9:34: Mat 10.25; 12.24; Mak 3.22; Luk 11.15 * 9:35: Mat 4.23; Mak 1.39; Luk 4.44 * 9:36: Jan 27.17; 1 Kir 22.17; 2 Hist 18.16; Eze 34.5; Mak 6.34 * 9:37: Luk 10.2 * 10:4: Nesönöl pati Zelot yeñön Rom gawman tuarenjoñ aka nanñine kinkin membingöra tuaköpek memba malget. * 10:7: Luk 10.4-12

10 *Ambazipnön nup meme ambazip malmalñini nanğömeanğö dop akze. Mianğöra köna anmeanğö yuaini ki mi kude memba anme: gösö qahö, maluku semönñi qahöpmö, mohot meme, köna esu qahö, öröp qahö.

11 “Anda taon me miri denike denike anğotmei, mianğöreñ mönö danön azi ipñi qetbuñañambuk akzawi, mianğöra qesigetka miri enğime, mönö mianğöreñök mala nup memba taon mi mosöta köna anme.

12 Miri kunön öngöba luainön yembuk ahömapkö jime.

13 Mi jigetka luainini anğön kölmeanğö dop akze ewö, luaininan mönö yenğö qakñine öngömawmö, mi anğön kölmeanğö dop qahö akze ewö, luaininan mönö lilingöba nanñine kama.

14 *“Anda mala miri kunön anğotketka qahö köl öröm enğiba keunini qahö mötketka nesampurekñini mönö kewö jiba kondel enğime, ‘Nini enğö gölmenön kainga sölbuham köna tambönine mekötahözawi, mi mönö tim tönjöraringa nanñine lilingöba gema.’ Mewö jiba ölop miri me taon mi mosöta toroqeba anme.

15 *Nönön keu ölni kun kewö jibi mötme: Anutunön nalö ketaje qemasolokepñinanğö likepñi meleni taon mianğö qakñe öngömawi, dop mianön mönö Sodom aka Gomora gölme yenğö dop onğita toroqem enğima.” (Sodom Gomora yenön bölöñi kanjamñambuk memba urunini qahö melengetka Anutunön könöpnön könder enğiyök.) Mewö.

Anda nup megetka sesewerowero asuhuma.

Mak 13.9-13; Luk 21.12-17

16 *Mötket, lama yenön arökñanğö kiam kalñi yenğö sutñine gegetka luhuba enğöhöbepuk, nönön inini mianğö tandök ewö melaim enğibi anme. Mianğöra mönö mokoleñ † ewö mötkutukutu qakñe galöm mem anğuba mala kembö ewö ambazip böñjönji köpösihitkö keunini qahö malme.

17 *Ambazipnön inini öröba keu jakeñine al enğiba köuluk miriñine keu nupñini memba ihilek wahiñambuknön taoköm enğime. Mianğöra ambazip mewöñi yenğöra mönö galöm mem anğuba malme.

18 “Tosatñan nönğöra aka enğuanğitketka kantriñi kantriñi yenğö kiñ kembu aka premiö yenğö jemesoholñine kinme. Mewö kinda nönğö könañamni nanğöba jigetka azi ipñi mi aka kian kantri könagesö yenön mi mötme.

19 Mi mötmemö, keu jakeñe al enğigetka kinmei, nalö mianğöreñ wani keuya denöwö jibinak, mianğö waimanjatñi kude mötme. Keu jime, mi Uña Töröñan aua mianğöreñök enğima.

20 Nanñine urunineyök keu kude jimemö, Iwiñinanğö Uña Töröñan mönö urunini sölölohöiga keu jime.

21 *Urumelenğö kopa kunön darumunñan urunini melenö-hanğöra aka i mamalolo meiga keu jakeñe algetka qeget kömuma. Mewöyök iwi kunön nahönböratñi mamalolo meiga kömuma aka nahönbörat yenön iwinamurupñini qetal enğiba jigetka enğuget kömume.

22 *Nönğö qetnanğöra aka kantriñi kantriñi yenön körek kazik al enğigetka malmemö, kunñan kapan köla nalö tekömawanğö dop köhöiba böñ qeba kinmawi, yanön mönö oyaenköyaen buña qem anğuma.

* **10:10:** 1 Kor 9.14; 1 Tim 5.18 * **10:14:** Apo 13.51 * **10:15:** Mat 11.24; Jen 19.24-28 * **10:16:** Luk 10.3 † **10:16:** Mokoleñ aka raskol yenön aukñe bim qegetka zilañ miwikñaiba jöhöm enğibeak. Mianğö dop lömböröbapuköra gwarek neñön maslim, komyunist aka tosatñi yenğö sutñine qetnini misinari mi aukñe qahö jimakzin. Mötkutukutu mi ölopñi. * **10:17:** Mak 13.9-11; Luk 12.11-12; 21.12-15 * **10:21:** Mak 13.12; Luk 21.16 * **10:22:** Mat 24.9, 13; Mak 13.13; Luk 21.17

23 “Taon kunöŋ sesewerowero ak enŋime, mi mönö kök ala taon kunŋan anme. Nöŋön keu ölni kun kewö jibi mötme: Inini Israel taonŋi taonŋi qahö liliköm tekögetka Suep gölmegö azi ölnan mönö lilingöba kama.

24 *Gwarek kunŋan böhiŋi onŋita mötmötŋambuk qahö akza aka welenqeŋe kunŋan ketaŋamŋi onŋita nupkö mötmöt qahö memba malja.

25 * “Gwareknöŋ böhiŋi ewö mötmötŋambuk aiga dop kölma aka welenqeŋenöŋ ketaŋamŋi ewö nupkö mötmöt memba maliga dop kölma. Miri uruŋi kungö saiwa galömŋi jim böliba qetŋi Katakömulat † qetket ewö, yanŋö saiwauruŋi yenŋö qetŋini mönö amqeba awamŋanök mewö qerakŋe.” Mewö.

Dagöra keŋgötŋini mötketka dop kölma?

Luk 12.2-7

26 * “Ambazipnöŋ yuai önun meget ahözawi, mi pakpak mönö lulungetka aukŋe ahuma. Mewöŋanök keu asambötket ahözawi, mi pakpak mönö indelgetka möt kutume. Mianŋöra ambazip yanŋöra keŋgötŋini kude möta malme.

27 Nöŋön keu söŋaupnöŋ ölöŋ jimami, mi mönö asakŋe jime. Keu saŋep algetka kezapŋine gei mötmei, mi mönö sombemnöŋ aukŋe jime. Mianŋöra mönö keuŋinanŋö galöm memba malme.”

Dagöra keŋgötnini möringa dop kölma.

28 “Tosatŋan sileŋini qem kömumbeakmö, uŋaŋini qem kömumbingö osimei, yanŋöra keŋgötŋini kude möta malme. Mi qahöpmö, yuai mutukŋi ki: Kunŋan kukösum memba uŋa aka sile mohot ayuhum etkiiga könöp sianöŋ gemahori, yanŋöra mönö keŋgötŋini möta malme.

29 Tosatŋan bekösöm (jöröm, ulisit) yahöt monen köŋi mohot-töpönöŋ söŋörönŋi memegöra alakzemö, etkerigetka Iwiŋinan onŋ qahö jiiga yetkörenöŋ mohotnöŋ gölmenöŋ qahö etma.

30 “Anutunöŋ köyan köl enŋiba nörop juŋŋini pakpak mewöyök oyonŋ teköba janŋöŋini mötza.

31 Ambazip enŋö söŋörönŋini mi bekösöm ulisit gwötpuk enŋonŋita öŋgöŋgöŋi akza. Mianŋöra keŋgötŋini mönö kude möta malme.” Mewö.

Kraist jim miwikŋaime me qaŋ kölme?

Luk 12.8-9

32 “Mewö aiga kunŋan ni ambazip jeŋine jim miwikŋaim niŋimawi, nöŋön mönö mewöŋanök i Iwini Suep mire maljanŋö jeŋe jim miwikŋaimam.

33 *Mewömö, kunŋan ni ambazip jeŋine qaŋ köl niŋimawi, nöŋön mönö mewöŋanök Iwini Suep mire maljanŋö jeŋe qaŋ kölman.” Mewö.

Jisösgöra luai qahöpmö, kazik asuhuma.

Luk 12.51-53; Luk 14.26-27

34 Jisösnöŋ toroqeba kewö jiyök, “Kewö kude mötmörime: Jisösnöŋ luai qemangöra aka gölmenöŋ erök. Nöŋön luai qemangöra qahöpmö, nöŋöra aka jula dengetka bingö sou ketaŋan aume.

35 * “Mi kewögöra jizal: Nöŋö Buŋa keunan ambazip uruŋini kuŋgui melenŋeraŋgöra kewö asuhuma, ‘Iwi morö yetköŋ jula kerök-kerök ahotka nam morö yetköŋ tötal anŋuyohotka iranŋan iranŋi qetala julmahot.

36 Ambazip nanŋini saiwauruŋinan mönö kerökuruŋini akŋe.’

* 10:24: Luk 6.40; Jon 13.16; 15.20 * 10:25: Mat 9.34; 12.24; Mak 3.22; Luk 11.15 † 10:25: Juda yanŋören Katakömulat qetŋi Belzebul. Mi ömewöröme yanŋö ketaŋamŋini. Matyu 9.34 mianŋören Jisösgöra qet bölöŋi mi qetket. Mianŋö dop Jisösgö alauruŋi nenŋöra qet bölöŋi könanŋi könanŋi qerakŋe.

* 10:26: Mak 4.22; Luk 8.17 * 10:33: 2 Tim 2.12 * 10:35: Mai 7.6

37 “Kunñan ni görögöra al niñgiba iwiñi me namñi jegep ala jöpakömawi, yañön mönö nöngörej qahö dop kölma. Kunñan ni görögöra al niñgiba nahönñi me böratñi jegepñe ala jöpakömawi, yañön mönö nöngörej qahö dop kölma.

38 *Sisitñini megetka kunñan ni nuatangöba sihimbölö möta maripomnöñ kömumangö qahö jöjörömawi, yañön mönö nöngörej qahö dop kölma.

39 * “Kunñan nanñi malmal siyoñsayoñi qahö mi miwikñaimawi, yañgö mal-malñan mönö sohoma. Kunñan nöngöra aka malmalñi köleñniga sohomawi, yañön mönö oyaenköyaen malmal miwikñaima.” Mewö.

Anutunöñ nupñinanğö töwañi enğima.

Mak 9.41

40 *Jisösnöñ jiyök, “Kunñan inñi miriñe köl öröba köyan köl enğimawi, yañön mönö ni köl öröm niñgima. Kunñan ni köl öröm niñgimawi, yañön melaim niñgiyöhi, mönö i miriñe köl öröm wañgima.

41 Kunñan kezapqetok ambazip kun kezapqetok nupñanğöra aka miriñe köl öröba köyan kölmawi, yañön mönö kezapqetok ambazipkö töwañi buña qem añguma. Kunñan ambazip solanñi kun solanñi akzawañgöra aka miriñe köl öröba köyan kölmawi, yañön mönö ambazip solanñanğö töwañi buña qem añguma.

42 “Kunñan morö kienğoreñök kungöra nöngö gwarekni akzawañgöra aka o amötñi qambiñambuk nemapköra wañgimawi, Anutunöñ mönö mianğö töwañi melenđa wañgima. Nöñön keu ölñi kun kewö jibi mötme: Nanğöm enğime, mienñön mönö töwa meme.” Mewö.

11

Jongö gwarekyahötñi Jisösgöreñ kayohot.

Luk 7.18-35

1 Jisösnöñ gwarekurupñi 12 keu mewö kusum enğii teköiga miri mi mosöta toroqeba Galili prowinsğö taon tosatñe anda Buña keu kusum enğiba mianñön uruñini kuñguba malök.

2 Nalö mianğöreñ Jon O-melun azinöñ kösö mire tata Kraistnöñ nup mewö meyöhi, mi möta gwarekyahötñi melaim etkii Jisösgöreñ anohot.

3 Kewö qesim wañgimahotköra melaim etkii anda jiyohot, “Mem ölöwak azi kamapköra mambörakzini, göñön mia akzan me azi kun bian kamapköra mambötpin?”

4 Mewö qesim wañgiyohotka kewö melenñök, “Yuai eka mötzahori, mianğö kösohotñi mönö anda Jon kewö jiyohot mötma:

5 *Jegömöl yeñön jeñini uba eketka lokon yeñön köna anda kagetka uzikuku yeñön solanigetka kezapduhup yeñön keu mötketka kömuget yeñön guliba wahötketka etqeçeni yeñgöra Ölöwak Buña jim asaribiga mörakze.

6 Mewö asuhui eketka kungö uruñan qahö bölüi andö nuñgumawi, yañön mönö simbawoñ akza.”

7 Mewö jiiga Jongö gwarek yetkön anohotka Jisösnöñ könahiba Jongö könañi ambazip kambu yeñgöra kewö jim asariyök, “Inñi gölme qararanğölkölñe mianğöreñ wania ekingöra anget? Luhutnöñ jehot uwutapköba metali anjanbanjan ahakzawi, inñi azi mewöñi ekingöra anget me?

8 Me wanat yuaia ekingöra anget? Azi malukuñi aködamunñambuk löngöta malöhi, mi ekingöra me? Mötket, ambazip malukuñini eksihimñinambuk

* 10:38: Mat 16.24; Mak 8.34; Luk 9.23 * 10:39: Mat 16.25; Mak 8.35; Luk 9.24; 17.33; Jon 12.25

* 10:40: Mak 9.37; Luk 9.48; 10.16; Jon 13.20 * 11:5: Ais 35.5-6; 61.1

löngrakzei, mienön mönö kin yengö jakömbuak mirinine malje. Mi gölme qararankölkölne qahö.

⁹“Me wanat yuaia ekingöra anget? Kezapqetok azi kun ekingöra me? Ölna, nöñön kewö jibi mötket: Azi ekeri, yanön mönö kezapqetok ambazip pakpak engongita tandökni kun akza.

¹⁰*Yanögö könani mi mönöwök kewö ohoget ahöza, ‘Mötnön, nöñön kolekni garata kun melaibiga qeljine anda ambazip urunini mindingöba göhö könagi mesariga göñön mönö yanögö andöñe gölmenön emu geman.’

¹¹“Keu mewö ahözapmö, nöñön keu ölni kun kewö jibi mötket: Ambinöhök morö pakpak asuhugeri, yengö sutñine Jonön mönö körek engongita qetbunajambuk kinja. Kinjapmö, Suepkö bemtohon urune angota Anutugö qetbunaji miwikñaimakzei, yengö sutñine eretñi kondikñi yanön mönö Jon ongitza.

¹²*“Jon O-melun azinön Buña keu jiiga nalö miangörenök könahiba Suepkö bemtohoñi könöpñambuk tuarenjon aka yarö gilakzemö, töndup ösumñan anda qarimakza. Könöpñinambuk yarö gilakzeanön mönö bemtohon mi nanñinanögöra öröba buña qem angumakze.

¹³Bemtohongö könani mi Mosesgören Köna keunön aka kezapqetok ambazip körek yengö Buzup Kimbinine ohogetka oyonda mala koringa Jonön asuhuba ölni aukñe indelök.

¹⁴*Keu ki möt angön kölbängö mötze ewö, Elaija (Elia) asuhumawangö dop ahöhi, Jonön mönö mia akza.

¹⁵Kunñan urukezapñambuk maljawi, yanön mönö keu mi kezap ala möt kutuma.

¹⁶“Ambazip merak gölmenön maljei, mi mönö wanatpuk dop al engibileñak? Yenön namande ewö akze. Mienön maket sombemñön tata keu gön gila lan qeta kewö jimakze,

¹⁷‘Nini awölop uinga injini linjet gwawet qahö unduget. Nini jinñen kölinga injini qahö toroqeba sahötket.’

¹⁸“Miangö könani kewö: Jon O-melun azinön kaba nene sinji mala wain o qahö neiga yanögöra jimakze, ‘Öme kunön urune geiga malja.’

¹⁹“Suep gölmegö azi ölnan kaba nene nem söñgaip aiga yanögöra kewö jimakze, ‘Mötket, yanön bau numbu tandök közöjeriba wain o gwötpuk nemba takis tilipqilipñinambuk aka bölöñi meme yengö alañina malja!’ Anutugö mötkutukutu köl gulimakzei, yengö ahakmemenñanögö ölnan mönö mötkutukutu-ñinan dop köljawi, mi kondelakza.” Mewö.

Jisösnön taon 3 yengöra Yei wösöbirik! jiyök.

Luk 10.12-15

²⁰Miangö andöñe Jisösnön könahiba taon tosatñi tembul engiyök. Taon tosatñi miengören angöletotñi kukösumñinambuk sehisehñi meiga asuhugetmö, töndup urunini qahö melenget. Miangöra i tembula kewö jim engiyök,

²¹*“O Korazin tonji, nöñön engöra Yei! jiba sahötzal aka Betsaida tonji, engöra mewöyök Yei! jiba sahötzal. Nöñön yengören anbiga keuni jibi sösonihii angöletotni kukösumñinambuk asuhugetmö, urunini töndup qahö melenget. Angöletot mi kian gölmenön Taiö aka Saidon sitinön asuhubeak ewö, yanön mönö nalö köröpñi urunini melenbingö kaisöpsöpñi kondela dodohonön angömiriba kau ariba sahötpeak.

* **11:10:** Mal 3.1 * **11:12:** Luk 16.16 * **11:14:** Mal 4.5; Mat 17.10-13; Mak 9.11-13 * **11:21:** Ais 23.1-18; Eze 26.1-28.26; Joel 3.4-8; Amos 1.9-10; Zek 9.2-4

22 “Sahötpeakmö, nöñön kewö jibi mötme: Anutunöñ könañgep Korazin aka Betsaida yengö keuñini jim teköba likepñi melenñi sihimbölo mötmei, nalö ketañi mianğoreñ mi mönö Taiö aka Saidon yengö sihimbölo dopñi oñgita mötme.

23 **“Aka Kaperneam tonji, Anutunöñ injini ölop mem wahöt engii Suep mire öngöbeak me qahöpto? Qahöpmahöp! Injini mönö kömupkö senjom mire kölölohoba geme. Nöñön yengöreñ anbiga keuni jibi sösonii angöletotni kukösumñinambuk asuhugetmö, uruñini töndup qahö melenget. Angöletot mi Sodom taonöñ asuhubeak ewö, taon mianğön mönö nalö kewöñe mewöyök toroqeba kinbawak.*

24 **“Kinbawakmö, nöñön kewö jibi mötme: Anutunöñ könañgep Kaperneam engö keuñini jim teköba likepñi melenñi sihimbölo mötmei, nalö ketañi mianğoreñ mi mönö Sodom gölme yengö sihimbölo dopñi oñgita mötme.” Mewö.*

Lömbötñinambuk enñön mönö nöñgöreñ kaba luhut meget.

Luk 10.21-22

25 Nalö mianğoreñ Jisösnöñ keu kewö jiyök, “O Iwini, göñön Buña keugi mötkutukutu ambazip mötmöt ketañi megeri, yengöreñ asambötnöñmö, ambazip nahönbörat ewö nanñinağöra mötketka gukmaulem akzei, mi mönö yengöreñ indelnöñga möt asarize. Mianğöra nöñön Suep gölmegö Kembuñi gi möpöseim gihizal.

26 O Iwini, gi nangak mewö asuhumapköra mötnöñ dop köli ölöwahök.

27 **“Iwinan mönö yuai pakpak jim kutuiga nöñgö buñaya ahök. Iwinan Nahönñangö könañi nanñök möt yaköiga kunöñ mi qahö mötza. Mewöyök Nahönñan Iwinangö könañi möt yaköiga kunñan mi qahö mötza. Mewöyök kunñan Iwinangö könañi qahö möt yaköiga Nahönñanök mi mötza aka ambazip möwölöhöm engiba yengöra mi indelmawi, yengön mönö Iwi möt wanğime.*

28 “Nup memba urulömbötñinambuk maljei, injini mönö körek nöñgöreñ kagetka uruawam engibi luhut meme.

29 **Nöñgö temni mönö awötñine ala angugetka Buñani kusum engibi mi möt soroköba malme. Nöñön uruni memba et ala guñböñjönjön azia akzalağöra ölop uruawam engibi luhut miwikñajime.*

30 *Nöñgö temni meget anguinga dopñine akza aiga lömböt engibi bisime, mianğön mönö awamñi akza.” Mewö.*

12

Jisösnöñ Sabat kendongö Kembuñi akza.

Mak 2.23-28; Luk 6.1-5

1 **Mianğö andöñe Sabat kendon kunöñ Jisösnöñ wit padi nup köröñi ketañi kutuba anök. Aniga gwarekrupñan wösöñini enğuga wit ölnji mohot mohot könahiba böroñinan misiba neget.*

2 *Negetmö, Farisi (Köna keugö kapañkölköl) tosatñan mi eka Jisös kewö jiget mörök, “Mötnöñ, göhö gwarekurupkan mönö Sabat kendongö nup meme soñgoñi oñgitze?”*

3 **Mewö jigetka kewö melenñök, “Kin Deiwidnöñ yarö aziurupñi yembuk liliköba wösöñini enğuga yuai akeri, mi lök oyongget me qahö?*

* 11:23: Ais 14.13-15; Jen 19.24-28 * 11:24: Mat 10.15; Luk 10.12 * 11:27: Jon 3.35; 1.18; 10.15
* 11:29: Jer 6.16 * 12:1: Dut 23.25 * 12:3: 1 Sml 21.1-6

4 *Yañön mönö Anutugö opo seri jikenöŋ öngöba beret kömbukŋi Anutugö jemesoholŋe altanöŋ alget tariga ösumŋan walöŋniga qekögeri, mi mönö meiga neget. Beret kömbukŋi mosötmosötŋi mi jike nup galöm yeŋönök nezema. Yañön aka yaŋgö sunŋurumurupŋan mi nembepuköra soŋgo ahöyökmö, mi töndup neget.

5 *Mewöŋanök jike nup galöm yeŋön Sabat kendonöŋ jöwöwöl jikenöŋ kinda nup memba nup memegö soŋgoŋi oŋgita töndup keuninambuk qahö ahakze. Keu mi Köna keunöŋ oyonŋet me qahö?

6 “Mi oyonŋet, mewö mötzalmö, nöŋön kewö jibi mötme: Ki kinjawi, yañön mönö jöwöwöl jike oŋgita öngöŋgöŋi akza.

7 *Buŋa Kimbigö keu kun kewö ahöza, ‘Nöŋön jöwöwöl ohomegöra qahöpmö, sutŋine ak kömum aŋgumegöra mötzal.’ Inini keu mianŋgö könaŋi mötpeak ewö, ambazip pinjitkö keunini qahö neŋgö keunini mönö laŋ qahö jim teköbeak.

8 “Mi kewögöra jizal: Suep gölmegö azi ölnan mönö Sabat kendongö Kem-buŋi akza.” Mewö.

Jisösnöŋ azi böröŋi sösröŋgöŋi mem ölöwahök.

Mak 3.1-6; Luk 6.6-11

9 Jisösnöŋ miri mi mosöta köuluk miriŋine öngöyök.

10 Mianŋgöreŋ azi böröŋi sosoholiŋi kun tarök. Ambazipnöŋ Jisös keu jakeŋe al waŋgibingöra kewö qesim waŋgiget, “Azi Sabat kendonöŋ möhamgöba Köna keu oŋgitpin me qahö?”

11 *Qesim waŋgigetka kewö melenök, “Enŋöreŋök daŋön kewö akza: Azi kungö lamaanŋi mohok-kunŋan Sabat kendonöŋ lömnöŋ gema ewö, yañön mi qahö memba öröiga kotma?

12 Azigö bohonŋan mönö lamagö bohonŋi gwötpuk oŋgitzawi, mönö mi mötmörime. Mianŋgöra Sabat kendonöŋ nup ölöŋŋi memba mewö Köna keu qahö oŋgitpin.”

13 Mewö melenŋa azi mianŋgö jiyök, “Gi mönö börögi qötöteinöŋ.” Mewö jiiga qötöteiiga mutuk ahöhi, mianŋgö dop ölöwaka böröŋi alaŋaŋgö dop ahök.

14 Mewö asuhuiga Farisi (Köna keugö kapaŋkölköl) yeŋön yaigep anda totoko ala Jisös denöwö aka qein kömumapkö keu jim jaruget. Mewö.

Anutugö nup meme azi tök-kutukutuŋi kewö:

15 Jisösnöŋ keunini mi ek kutuba mianŋgöreŋök miri mi mosöta kungen anök. Aniga gwötpukŋan yaŋgö andöŋe wuatangöba angetka yeŋgö sutŋine kawöl ambazip pakpak mem ölöwak enŋiyök.

16 Mi mem ölöwak enŋiba könaŋi aukŋe jibepuköra köhöikŋanök qetal enŋiyök.

17 Mewö aiga Anutunöŋ kezapqetok azi Aisaia sölölohöiga keu kun jiyöhi, mianŋön mönö mewö ölnambuk ahök. Keu mi kewö jii ahöza,

18 * “Eket, ki mönö nöŋgö nup azini aiga i möwölöhöm waŋgial. Nöŋön wölböt alani yaŋgöra mötŋi ölöwahiga urunan yaŋgöra söŋgaimakzal. Nöŋön Uŋani Töröŋi yaŋgö uruŋi dop kölmakpöra melaibi geiga yañön keu diŋdiŋanök jim tekömakzalaŋgö Buŋaŋi indela jim sehiiga kantriŋi kantriŋi yeŋgöreŋ anma.

19 Yañön aŋgururuk qahö aka keu töhöreŋ qahö qerakŋa. Ambazip kunŋan yaŋgö qet kourukŋi mi rowoŋqeqe könanöŋ qahö mötma.

20 Jehot qölökögeri, yañön mi qahö qesiŋma. * Lambegö wikŋan jem

* 12:4: Lew 24.9 * 12:5: Jan 28.9-10 * 12:7: Mat 9.13; Hos 6.6 * 12:11: Luk 14.5 * 12:18: Ais 42.1-4 * 12:20: Jehot aka lambegö wikŋi mi ambazipköra jiza. Ambazipnöŋ kun qeba jaŋgauranga ak waŋgigetka mötnariŋan pömsöm qemapkö akzawi, Jisösnöŋ i mem ölöwakŋa.

kutuba sanjöp aiga bölamñan jem bökbök ahakzawi, yañön mönö mi qahö qömbököma. Mewö nupñi memba ambazipnöh keu diñdini wu-
atanögömögöra bim qeba maliga keu mianjön luhut aliga köiranj alme.

21 Kantriñi kantriñi yeñön mönö yañön bauköm engimapkörä mamböta jörömqörömñini yañgö qetne ala malme.” Mewö.

Jisösnöh öme yeñgö ösumñini ongita qei etza.

Mak 3.20-30; Luk 11.14-23

22 Ömenöh azi kun töñöt aka numbuñi jöhöiga jeñan gömölii mötök malöhi, mi wañgita Jisösgöreñ kaget. Jisösnöh i mem ölöwahiga ömeñan kota mosöri nesilamñan lolohoiga kunbuk keu jiba uba ehök.

23 Uba ehiga ambazip kambu pakpak yeñön mi eka auruba Jisösgöra jiget, “Azi kianjön mönö Deiwidkö gwölönarökñi akza me?”

24 *Mewö jigetmö, Farisi (Köna keugö kapañkölköl) yeñön mi möta kewö jiget, “Azi kianjön kungö ösumnöh qahöpmö, öme yeñgö Kumbuñini Katakömulat yañgö ösumnöh ömewöröme enguatanögömakza.”

25 Mewö jigetmö, Jisösnöh urumötmötñini möt teköba kewö jii mötket, “Kantri denike yeñgö galömurupñinan sutñine angururuk aka julmei, yeñön mönö ayuhum angugetka kantriñinan böliba sahopñanök aka qeqelanlan ahöma. Mewöyök siti me miri kungö könagesö yeñön sutñine angururuk aka julmei, yeñön mönö galömkölköl nupñini memba kinbingö osime.

26 “Mötket, Satanöh mönö alañi Satan kun wuatanögöbawak ewö, yeñön mönö sutñine angururuk aka julbeak. Mewö aiga gawman nupñini membingö osigetka ömetohoñinan mönö denöwö kinbawak?

27 “Mötket, nöñön Katakömulatkö ösumnöh ömewöröme közöl engibileñak ewö, engö alaurupñinan mönö dagö ösumnöh mi közöl engibeak? Mianögöra yeñön mönö keuñini öñji me qahö, mi kewöta jim teköme. †

28 Mi jim tekömemö, Anutugö ösumñan nöñgö börö kesötñi sölölohöi öme enguatanögömakzal ewö, Anutugö bem-tohoñan mönö engöreñ kam kuñguza.

29 Kunñan azi köhöikñañgö köna böröñi mutuk qahö jöhöma ewö, yañön mönö denöwö miriñe öñgöba qezañda sukinapñi membawak? Mutuk i jöhöi tarigun mönö ölop miriñeyök öröyuaiñi pakpak wañgita memba anma. (Miangö dop nöñön mewöyök Satan jöhöba andöñe ömeñi enguatanögömakzal.)

30 * “Kunñan nömbuk qahö maljawi, yañön mönö qetal niñgimakza. Kunñan ambazip nöñgö qetne tokomegöra qahö öröm engimakzawi, yañön mönö mendenñ engimakza.

31 Mianögöra nöñön keu kun kewö jibi mötme: Ambazip siñgisöndok aka mepaqepaik pakpak ahakzei, mi Anutunöh ölop mosörakzäpmö, kunñan Uña Töröñi ilita mepaikömawi, miangö siñgisöndokñi Anutunöh mönö nalö kunöh qahö mosötma. Saumbañ!

32 * “Kunñan Suep gölmegö azi öñji qetala keu jima ewö, Anutunöh mi ölop mosötmapmö, kunñan Uña Töröñi qetala keu yuai jimawi, yañgö siñgisöndokñi mi Anutunöh gölmenöh malmawañgö dop me kömup andöñe miangöreñ qahö mosötma.”

Ipkö könañi mi öñji eka kewöta möt kutume.

Luk 6.43-45

* 12:24: Mat 9.34; 10.25 † 12:27: Nannini silegalömurupñinan Anutugö qetñi öme mi Katakömulatkö kukösumnöh közöl engigetka nöñön mi Anutugö ösumnöh közöl engimakzal. Öroröh qahö kinjinañgöra dañön keu muneñi wuatanögömakza? Yeñön me nöñön? * 12:30: Mak 9.40 * 12:32: Luk 12.10

33 **“Ipkö könaŋi mi ölni eka kewöta mötzin. Mianğöra mönö ip galöm kölgetka ölöwaka ölni ölöpnji kuŋgumakŋa me ip mem böligetka ölni bölöŋi kuŋgumakŋa.*

34 **Azi uruŋan yuai kokolak qei ahözawi, mia mönö numbuŋan aukŋe jimakza. Mianğöra qatögö moröŋi inini, nanŋinak bölöŋi aka mönö denöwö keu ölöpnji jibeak?*

35 *Azi ölöpnjanğö uru köweŋe ölöpnjanğö möriamŋi ahözawi, yaŋön mönö ölöpnji mi aukŋeyök jimakza. Azi bölöŋjanğö uru köweŋe bölöŋjanğö möriamŋi ahözawi, yaŋön mönö bölöŋi mi aukŋe jimakza.*

36 *“Mewö jimakzapmö, nöŋön keu ölni kun kewö jibi mötme: Ambazipnöŋ soŋgo walöŋda keu jüt omanji omanji jimei, yeŋön mönö keu pakpak mianğö könaŋi mi jimtekötekögö nalö ketanŋe Anutugöra jim asarigetka kewötma.*

37 *Mianğö könaŋi kewö: Anutunöŋ mönö keu jitki kewöta mianğö dopkeugi jim teköi solaniman me keugabuk aka lömböt miwikŋaiman.” Mewö.*

Böhi tosatŋan anğöletoköra kapaŋ köla uletket.

Mak 8.11-12; Luk 11.29-32

38 **Nalö mianğöreŋ Farisi (Köna keugö kapaŋkölköl) aka Köna keugö böhi tosatŋan Jisösgöra kewö jiget, “Böhi, gi ölop anğöletot kun menöŋga mi ekingö mötzin.”*

39 **Mewö jigetka kewö melenŋ enğiyök, “Ambazip merak gölmenöŋ maljei, mi kambu bölöŋi aka serowilin ahakze. Yeŋön Anutugö aiwesökŋanğöra kapaŋ kölakzemö, aiwesök kun kezapqetok azi Jonagöra lök asuhuyök. Anutunöŋ aiwesök murutŋi kun qahö al enğima.*

40 **Jonanöŋ suŋgem silimŋi karöbut köwet sömbupkö (gajugaju) gölömŋe malöhi, mianğö dop Suep gölmegö azi ölnan mewöyök suŋgem asak karöbutkö dop gölme uruŋe ahöma.*

41 **“Jonanöŋ Niniwe ambazip sutŋine anda Anutugö keunöŋ uruŋini kuŋgui möta mianğöreŋök uruŋini melengetmö, mötket, nöŋön sutŋine asuhaba kinda Jonagö ahakmemenji oŋgita ahakzal. Mewö ahakzalmö, inini töndup nesampurek ak niŋgimakze. Mianğöra Niniwe ambazipnöŋ jimtekötekögö nalö ketanŋe ambazip kambu ki kinjei, embuk öröröŋ kömupnöhök wahöta enğö qöhöröŋine mohotŋe kinme. Mohotŋe kinda Niniwe yeŋön keu kewö enğö silenŋine alme, ‘Inini Suep gölmegö azi ölni nesampurek ak waŋgigetka Anutunöŋ likepŋi melenŋ enğii sihimbölö öŋgöŋgöŋi mötme.’ Niniwe yeŋön mewö jigetka ahakmemenjanan nanŋini könaŋamŋini indelgetka gamuŋini mötme.*

42 **“Könaŋamŋinanğö kaisöpsöpŋi kun kewö: Anutunöŋ mönöwök mötkutukutu öŋgöŋgöŋi ketanji mi kin Solomon waŋgiiga Saut görökenök kantri kungö qin ambinöŋ Solomongö mötkutukutuŋi mötmangö sihimŋi mörök. Sihimŋi möta gölme göraŋeyök wahöta köna köröp tiŋtiŋi kaba mala Solomongö mötmötŋi mörök.*

“Mi mörökmö, mötket, nalö kewöŋe nöŋön sutŋine asuhaba kinda Anutugöreŋ mötkutukutu öŋgöŋgöŋi memba kazali, mi Solomongö mötkutukutuŋi oŋgitzta. Oŋgitzapmö, inini töndup nesampurek ak niŋgiba tönpin kingetka qahö dop kölja. Mianğöra Anutunöŋ könaŋep ambazip körek pakpak öröm enğii keuŋini jim tekömapköra jeŋe angotmei, nalö mianğöreŋ Saut kantrigö qin ambi mianğön mönö mewöyök angotma. Yaŋön ambazip kambu ki kinjei, embuk öröröŋ kömupnöhök wahöta enğö qöhöröŋine mohotŋe kinma. Mohotŋe kinda keu kewö enğö silenŋine alme, ‘Inini Jisös nesampurek ak waŋgigetka

* **12:33:** Mat 7.20; Luk 6.44 * **12:34:** Mat 3.7; 23.33; 15.18; Luk 3.7; 6.45 * **12:38:** Mat 16.1; Mak 8.11; Luk 11.16 * **12:39:** Mat 16.4; Mak 8.12 * **12:40:** Jon 1.17 * **12:41:** Jon 3.5 * **12:42:** 1 Kinj 10.1-10; 2 Hist 9.1-12

Anutunöŋ likepni melen engii sihimbölö öngöngöŋi mötme.' Yanön mewö jiiga silikni kewöta nanŋinanğora gamuŋini mötme." Mewö.

Öme yeŋön azi uruŋe lilingöbingö kapan kölje.

Luk 11.24-26

⁴³ "Ömenöŋ azi uruŋeyök kota gölme qararaŋkölkölŋe anda laŋ liliköba mala luhut memangö miri jaruba kun qahö miwikŋaima.

⁴⁴ Mi qahö miwikŋaiba osiba kewö jima, 'Mirini mosöta kazali, miangören mönö kunbuk lilingömam.' Mewö jiba lilingöba miriŋi usuŋda meŋölöi ahöyöhi, mi gwamönŋi ahöi miwikŋaima.

⁴⁵ "Mewö miwikŋaiba anda öme tosatŋi 7 enğuaŋgitma. Öme 7 mi nanŋi onğita bölöŋi kötökŋi akze. Yanön mi enğuaŋgiriga kaba miri mi öngöba miangö uruŋe malme. Mewö aiga azi miangö könaŋi mutuk kilenkilen ahökmö, könaŋep bölöqölim teköma. Ambazip kambu bölöŋi ki merak gölmenöŋ maljei, enğoreŋ mewöyök mewö asuhuma." Mewö.

Jisösgö nam-munurupŋi

Mak 3.31-35; Luk 8.19-21

⁴⁶ Jisösnöŋ toroqeba ambazip kambu yeŋğora keu jiba maliga nam-munŋan kaba yaigep kinda yambuk keu jibingö mötket.

⁴⁷ Mötketka kunŋan kewö jii mörök, "Mötnöŋ, göhö nam-mungan mönö yaigep kinda göbuk keu jibingö mötze."

⁴⁸ Keu mi jii mörökmö, yaŋğora melenğda kewö jiyök, "Nöŋgö namni daŋön? Nöŋgö munurupni mi daŋön?"

⁴⁹ Mewö jiba böröŋi gwarekurupŋi yeŋğoreŋ göröken böraŋda jiyök, "Eket, nöŋgö namni aka munurupni öŋi mönö ki."

⁵⁰ Denike yeŋön nöŋgö Suet Iwinanğö jitsihitŋi tem kölakzei, körek mienön mönö nöŋgö namni aka nenmunurupni akze." Mewö.

13

Qesiŋqesiŋ azigö dopkeu.

Mak 4.1-9; Luk 8.4-8

¹ Nalö miangörenök Jisösnöŋ miri mi mosöta o anğö jitŋe geba tarök.

² *Tariga ambazip kambulelemenöŋ yaŋğoreŋ anda tokogetka waŋgenöŋ öngöba tarök. Tariga ambazip kambu pakpak yeŋön anğö goraŋe saknöŋ tokoget.

³ Mewö tokogetka dopkeu gwötpuk jii mötketka kewö jiyök, "Mötket! Azi kunŋan nene kötŋi qesiŋ gilmanğora nupnöŋ anök.

⁴ Anda qesiŋ giliga kötŋi tosatŋan köna jitŋe geba kölget. Geba kölgetka (warawen) neiŋi neiŋi kaŋgota mi nem teköget.

⁵ "Kötŋi tosatŋan köt jamönjiŋnöŋ geba kölget. Geba köla miangören gölme gwötpuk qahö miwikŋaiget. Gölme dutŋi qahö ahöyöhaŋğora korapŋi zilaŋ kotket.

⁶ Kotketmö, wehönöŋ kota enğuba jem kutum enğiiga jalöŋini qahöpköra soholiba gororöŋget.

⁷ "Kötŋi tosatŋan siriuret wahinambuknöŋ geba kölget. Geba kölgetka mienön kota qem turuba böbölohot mem enğiget.

⁸ Mewö pömsöm qeyökmö, kötŋi tosatŋan gölme ölöpŋe geba kölget. Geba köla tosatŋi mienğö kötŋini 100 asuhuget. Tosatŋan kötŋini 60, tosatŋan 30 miangö dop ahum sehiget.

* 13:2: Luk 5.1-3

⁹ Kunñan urukezapñambuk malja ewö, yanñon mönö dopkeu ki kezap ala möt kutuma.” Mewö.

*Jisösnöñ wanigöra dopkeu jiyök.
Mak 4.10-12; Luk 8.9-10*

¹⁰ Mewö jiiga gwarekurupñan kaba Jisös kewö qesim wanğiget, “Gi mönö wuanöngöra ambazip yengö ‘Keu jimam,’ jiba dopkeunöñ ala jimakzan?”

¹¹ Qesim wanğigetka kewö melenğda jiyök, “Mi kewögöra: Suepkö bemtohone anğota malbingö keu tölapñi mi engöra aukñe jibi möt kutuzemö, yengöra mi mewö qahö.

¹² **“Miangö könañi kewö: Kunñan mötkutukutuñambuk maljawi, Anutunöñ mönö mi toroqem wanğiiga köl guliba möriamñambuk malmapmö, kunñan mötkutukutuñi qahö maljawi, Anutunöñ mönö mötmötñi moröñi ahözawi, mi mewöyök qeköba wanğitma.*

¹³ “Ambazip yengö keu jimam jiba kewögöra dopkeunöñ ala jimakzal: Yenñon nanñini jeñinan yuai ekagun könañi töndup qahö ek kutume. Nanñini kezapñinan keu törörök mötagun könañi töndup qahö möt asarime.

¹⁴ **Kezapqetok azi Aisaianöñ qeljiñe keu kun jiba ohoyöhi, mianñon ambazip mewöñi yengöreñ ölnambuk ahakza. Keu mi kewö, ‘Keu möt bibihibagun könañi töndup kude möt asarime. Yuai ek bibihibagun könañi töndup kude ek kutume.*

¹⁵ Ambazip kambu kiengö uruñinan mönö köhöikñi gwözönğda ahöza. Kezapñinan keu möt bibihiba jeñini kömaziliköba (kömazilihiwa) malje. Mewö qahö akeak ewö, mönö jeñinan yuai ek kutuba kezapñinan keu möta uruñinan könañi möt asariba uruñini melenğetka nöñon i ölpö mem ölöwak engibileñak.’

¹⁶ **“Keu mewö ahözapmö, engö jeñinan yuai ek kutuzawangöra mönö simbawon akze. Kezapñinan keu möt kutuzawangöra mönö simbawon akze.*

¹⁷ Nöñon keu öl töhöññi kun kewö jibi mötket: Kezapqetok ambazip aka Anutugöreñ ambazip solanñi gwötpukñan inñini yuai ki ekzei, mi ekingö awöweñğöba malgetmö, qahö eket. Inñini keu ki mötzei, yenñon mi mötpingö awöweñğöba malgetmö, qahö mötket.” Mewö.

*Jisösnöñ dopkeugö könañi jiyök.
Mak 4.13-20; Luk 8.11-15*

¹⁸ “Qesiñ gilgil azigö dopkeu jizali, miangö könañi mi kezap ala mötme.

¹⁹ Nene kötni qesiñ giliga köna jitñe geba kölöhi, mi kewö: Kunñan bemtohongö Buña keuñi möta könañi qahö möt asariiga Bölöñangö Tonñan kaba uruñe kötni kömötkeri, mi qeköma.

²⁰ Nene kötni qesiñniga köt jamönjiñnöñ geba kölöhi, mi ambazip söpsöpñi kun. Yenñon Buña keu möta mi miangöreñök sösoñğai qakñe möt anğon kölakze.

²¹ “Mewö ahakzemö, uruñine jalöñi qahö ahöm engimapmö, nalö töröptökñi miyök kin köhöiba malme. Buña keugöra aka kahasililiñ me sesewerowero asuhuiga nalö miangöreñök mönö tala enguma.

²² Nene kötni qesiñniga siriuret wahiñinambukñöñ geba kölgeri, mi kewö: Yenñon Buña keu mötketka uruñine gezapmö, gölmenöñ malmalgö waiman-jatñi aka moneñ inap memegö urukönöpñi ahuba lömbörim engimakza. Qetbuñanambuk akingöra köpösöñğögetka sihim kömbönañi bölöñi tosatñan mewöyök uruñine dumğöba Buña keu böbölohot mem wanğize. Mewö aiga ölni qahö gilipitñi (ambetakñi) akñe.

* **13:12:** Mat 25.29; Mak 4.25; Luk 8.18; 19.26 * **13:14:** Ais 6.9-10 * **13:16:** Luk 10.23-24

23 “Nene kötni gölme ölopne qesiniga geba kölgeri, mi ambazip kewöni: Yeñon Buña keu kezap ala möta möt asariba pöndañ kinda ölni mi-wikñaimakze. Tosatñan keu jit mohotnöhök kötni 30 miwikñaimakze. Tosatñan ölni 60, tosatñan keu köt mohot mohot miengö ölni 100 mem sehiba miwikñaimakze.” Mewö.

Dorowetkö söpsöp keu

24 Jisösnöñ söpsöp keu kun kewö jii mötket, “Suepkö bemtohoñgö könañi mi azi kewöñgö dop ala jimam. Yanñon nupne anda nene kötni ölopni qesin gilök.

25 Qesin gilökmö, sun gem ahögetka miangören kerök azinan kaba wit padi sutñine miangören dorowetkö kötni qesin gila mosöta anök.

26 Wit padi kötnan jula wahöta öngöba ölni asuhuyöhi, nalö miangören dorowetnöñ mewöyök aukne asuhuyök.

27 “Mianñon aukne asuhuiga welenqeueurupñan mi eka nup toñangören kaba kewö jigetka mörök, ‘Ketanamnini, nupke nene köt ölopni qesin gilnön me qahö? Dorowetkö kötni mi mönö denikeyök miangören geba asuhuza?’

28 “Mewö jigetka möta kewö jii mötket, ‘Kerök azinön mi qesin gilök.’ Mewö jii möta welenqege yeñon kewö jiget, ‘Nini ölop anda dorowet mi qözöla tokobingö mötzan me qahö?’

29 Mewö jigetmö, kewö jii mötket, ‘Qahö! Inini dorowet qözöla tokoba miangören padi tosati mi mewöyök qözölbepuk.

30 “Mönö mosötetka mohotne qariba wahörohotkun ölni meme nalöñan kam kuñguiga nalö miangören nöñon padi misimisi ambazip yengöra kewö jibi mötme: Mönö mutuk dorowet memba tokoba ohomegöra börangöba kösönön jöhöme. Mi jöhöbagun mönö wit padi ölni mi tokoba memba kaba nöñgö köwe mire alme.’ ” Mewö.

Nejoñ kötnangö dopkeu

Mak 4.30-32; Luk 13.18-19

31 Jisösnöñ dopkeu kun kewö toroqeba jii mötket, “Suepkö bemtohoñi mi kewö: Azi kunnñan nejoñ (nemuya) kötni memba nanne nup gölmeñe anda alök.

32 Kötni mi morö közözömñi. Mi nene köt pakpak miengö eretñini akzappmö, jula wahöta yöha pakpak engongita qariba ip akña. Mewö aka kiniga könakemba neiñi neiñi kangota aipñini ip miangö böröñe alakze.” Mewö.

Yistkö dopkeu

Luk 13.20-21

33 Jisösnöñ dumne kunbuk söpsöpkeu kun kewö jii mötket: “Suepkö bemtohoñi mi yist me flaua mem qariqarigö dop kewö akza: Ambi kunön ‘Beret ohomam,’ jiba yist memba flaua amae (dis) karöbut miangören mindiriba melenqeleñ aka anda anda tari körekñanök qariyök.” Mewö.

Jisösnöñ denöwögöra söpsöpkeuñi keuñi jiyök?

Mak 4.33-34

34 Jisösnöñ keu pakpak mi könagesö yengöra söpsöp keunön jiyök. Söpsöpkeu qahö mewö keu kun qahö jii mötket.

35 *Mewö aiga Anutunön kezapqetok azi kun sölölohöiga keu kun jiyöhi, mianñon ölnambuk ahök. Yanñon keu mi kewö jii ahöza, “Nöngö numbunan mönö amqeiga söpsöp keuñi keuñi jimam. Anutunön gölme miwikñaiiga asuhuyöhi, nalö miangörenök keu tölapne ahöi mala korini, nöñon mönö keu mi aukne jim indelmam.” Mewö.

* 13:35: Sum 78.2

Dorowetkō söpsöpkeugō kōnaŋi

³⁶ Jisösnöŋ söpsöp keu mi jim teköba ambazip kambu ketanŋi enġömosöta miri uruŋe öngöyök. Öngöiga gwarekurupŋan yaŋgöreŋ kaba kewö qesiba jiget, “Dorowet nene nupnöŋ asuhuyöhi, gi mönö söpsöp keu mianġö kōnaŋi jim asarim nenġiman.”

³⁷ Mewö jigetka kewö melenġa jiyök, “Suep gölmegö azi ölnan mönö nene kötni ölöpnŋi ölöpnŋi qesiŋ gilakza.

³⁸ Nene nup mi gölmegö kantri pakpak. Nene kötni ölöpnŋi mi bemtohonġö nahönbörat enġöra jizal aka dorowet mi azi bölönaŋgö nahönbörat yenġöra jizal.

³⁹ Keröknöŋ mi qesiŋ gilöhi, mi Bölönaŋgö Toŋaŋgöra jizal. Padi misimisi nalöŋi mi gölmegö nalöŋan tekömawaŋgö nalö ketanŋi mi. Padi misimisi ambazip mi Suep garata yenġöra jizal.

⁴⁰ “Dorowet tokoba könöpnöŋ ohoget jemawi, mianġö dop mönö gölmegö nalöŋan tekömawaŋgö nalö ketanŋe asuhuma.

⁴¹ Suep gölmegö azi ölnan mönö garataurupŋi melaim enġiiga kaba keu areŋ bölöŋi pakpak Kraistkö bemtohonŋ uruŋe siŋgisöndok akingö kondorakzawi, mi qeapköba mindiŋgöme aka bölöŋi meme ambazip pakpak mi qözöla qezaköm enġime. *

⁴² “Mewö mindiŋqindiŋ aka ambazip mi gil enġigetka owen imarurubuk jeba ahözawi, mianġöreŋ geme. Mianġöreŋ gemeaŋön mönö sahöt gigilahöba irimŋini yöhözömgögetka qetŋi qeri malme.

⁴³ Nalö mianġöreŋ ambazip solanŋi mienġön mönö wehön tandök aka Iwiŋinaŋgö bemtohonŋ uruŋe asariba mal öngöme. Kunŋan urukezapŋambuk maljawi, yaŋön mönö keu mi kezap ala möt kutuma.” Mewö.

Guli dötnam mesamesambötŋaŋgö söpsöpkeu

⁴⁴ “Suepkö bemtohonŋi mi guli damandanŋ söŋgöröŋi öngöŋgöŋi mianġö dop kewö akza: Mi nupnöŋ mesambötket ahöiga azi kunŋan mi miwikŋaiba aŋön köla kunbuk gölmenöŋ mesambörök. Mesamböta mianġöra söŋgaiba anda sukinapŋi pakpak bohonŋi memegöra ali moneŋ kaiga mianġön nup gölme mi bohonŋi meyök.” Mewö.

Sorom kötnaŋgö dopkeu

⁴⁵ “Suepkö bemtohonŋi mi stua azigö dop ala söpsöp keu kun kewö jimam: Yaŋön sorom kötni ekjeritŋambuk jaruba malök.

⁴⁶ Jaruba mala sorom kötni mohot söŋgöröŋi ketanŋi miwikŋaiba anda sukinapŋi pakpak bohonŋi memegöra ali moneŋ kaiga mianġön sorom kötni mi bohonŋi meyök.” Mewö.

Mösak örörögö söpsöpkeu

⁴⁷ “Suepkö bemtohonŋi mi mösakö dop ala söpsöpkeu kun kewö jimam: Mi o aŋgönöŋ gilget geiga söra tandökŋini kōnaŋi kōnaŋi gegetka enġömem tokoyök.

⁴⁸ Tokoi kokolak qeiga ambazipnöŋ mi örögetka körökŋe koriga eta tata söra ölöpnŋi kewöta sakapnöŋ tokogetmö, bölöŋi mi gilgetka anök.

⁴⁹ Keu mianġö dop mönö gölmegö nalöŋan tekömawaŋgö nalö ketanŋe asuhuma. Suep garata yenġön kaba ambazip bölöŋi mi solanŋi mienġöreŋök kewöt enġime.

* **13:41:** Keu areŋ (ideology) bölöŋi yauen mötmöt, komyunist, maslim aka mötmöt areŋ tosatŋi mi ambazip jöhöm enġiget qakögetka malmalŋinan böliba sohomakzawi, garata yenġön mönö mi pakpak qeapköba mindiŋgöme.

⁵⁰ Kewöt enjiba ambazip bölöni mi gil enjigetka owen imarurubuk jeba ahözawi, miangören game. Miangören gemeanön mönö sahöt gigilahöba irimnini yöhözömgögetka qetnji qeri malme.” Mewö.

Keu kötji walji aka dölökji

⁵¹ Jisösnöj söpsöp keu mi jim teköba kewö qesim enjyök, “Keu pakpak jizali, mi möt asarize me qahö?” Qesim enjiiga melenäda “On!” jiget.

⁵² “On!” jigetka kewö jii mötket, “Miri toñan mirinangö köweñeyök inap yuai walji aka dölökji uzeta alakza. Miangö dop Köna keugö böhi pakpak Suep bemtohongö gwarekurupnji akeri, yeñön mönö mewöyök uruñinangö köweñeyök keu aködamunñinambuk dölökji aka keu ölop soroknji walji uzeta jimakze.” Mewö.

Nazaret yeñön Jisös andö qeget.

Mak 6.1-6; Luk 4.16-30

⁵³ Jisösnöj dopkeu mi jim teköba miri gölme mi mosöta anök.

⁵⁴ Anda malqarip taonñe angota köuluk mirinine öngöba Buña keu kusum enjyök. Kusum enjiiga auruba welipköba kewö jiget, “Yei! Kezapjupjup! Yanön mötkutukutu ki aka angöletot kukösumñinambuk mi mönö denikeyök meza?”

⁵⁵ Azi ki mönö miri kiangö mitimqeçe azigö nahönña. Namñangö qetnji Maria aka munurupnji Jeims, Josef, Saimon aka Juda. Mi ölop mötzin.

⁵⁶ Nenurupñan mönö körek sutnine ki malje. Miangöra yuai pakpak ki mönö denikeyök memba kaba akza?”

⁵⁷ *Nazaret yeñön mewö jigetka uruñinan bölüiga miangören qaköget. Qakögetmö, Jisösnöj kewö jii mötket, “Kezapqetok azi mi nanñi taonöj aka nanñi mire jijiwilit ak wañgimakzemö, miri tosatñe mewö qahö.”

⁵⁸ Mewö jiiga mötnariñinan qahö asuhuiga yangiseñinangöra aka angöletot kukösumñinambuk mi miangören gwötpuk qahö meyök. Mewö.

14

Jongö jölñi kutugetka kömuyök.

Mak 6.14-29; Luk 9.7-9

¹ Nalö miangören gölme bahöñangö (Galili prowinsgö) kiñ Herod yanön Jisösgö qetbuñaji mörök.

² Mi möta welen-qeçeurupnji yeñgöra kewö jiyök, “Mi mönö Jon O-melun azia. Yanön mönö kömupnöhök wahöta nupñi meiga angöletot kukösumñinambuk asuhumakze.” Waimanjat möta mewö jiyök.

³ *Mi kewögöra jiyök: Herodnöj munñi Filipkö anömñi Herodias ölöj meiga Jon O-melun azinöj kiñ jim wañgiiga opotöröp melaim enjiiga anda Jon memba jöhöba kösö mire al wañgiget.

⁴ *Jonöj Herodköra keu kewö jiyök, “Gi qambötki memba mala Köna keu ongitzan.”

⁵ Mewö jiiga Herodnöj Jon qeget kömumapkö mörökmö, könagesö yeñön Jongöra mötketka kezapqetok azia malöhi, miangöra könagesö yeñgöra kenjötni mörök.

⁶ Kenjötni mörökmö, Herodkö ahuahu nalöñan kaiga ketaurupñan tokoba tatketka Herodiasgö böratñan yeñgö jeñine danis aliga Herodnöj miangö eksihimñi gwötpuk mörök.

⁷ Miangöra ambi seram mianön wani yuaigöra qesibawak, kiñnöj mi tököm wañgimangö keu jöhöba keu mi jöjöpañ keunöj jim köhöiyök.

* 13:57: Jon 4.44 * 14:3: Luk 3.19-20 * 14:4: Lew 18.16; 20.21

⁸ Mewö jim köhöiiga namñan ambi seram mi kuñgum wañgiiga kewö jiyök, “Mönö qesinönga Jon O-melun azigö jölñi yandigetka nöropñi memba ki kaba köndenöñ niñgima.”

⁹ Mewö jiiga kiñgö uruñan kömbuhiiga wösöbirik mörökmö, jöjöpañ keuñan jöhöi ketaurupñan mi mötketka yeñgö jemesoholñine etpapuköra möta nöropñi wañgimegöra jim kutuyök.

¹⁰ Mewö jim kutuba opotöröpñi kun melaiba jiyök, “Gi mönö kösö mire anda Jongö jölñi yandiba nöropñi memba kaman.”

¹¹ Mewö jiiga Jongö nöropñi köndenöñ ala memba kaba ambi seram mi wañgiiga memba anda namñi wañgiyök.

¹² Jongö gwarekurupñan miangö buzupñi möta anda qamötñi memba qaksirigö köt köteñnöñ ala löm kölget. Löm köla anda keu mi Jisös jiget mörök. Mewö.

Jisösnöñ azi 5000 nene gumohom enñiyök.

Mak 6.30-44; Luk 9.10-17; Jon 6.1-14

¹³ Jisösnöñ Jongö kösohotñi möta miri mi mosöta wañgenöñ öngöba gölme kötikñi kunöñ nanñinök malbingöra anget. Ambazip kambu yeñön miangö buzupñi möta taon aka miriñini mosöta Jisösgö andöñe wuatangöba gölme köna anget.

¹⁴ Angetka Jisösnöñ wañgenöhök eta ambazip kambulelembe engeka yeñgöra wösöñi mörök. Wösöñi möta sutñine kawöl engehöi malgeri, mi mem ölöwak enñiyök.

¹⁵ Mewö aka mali mare aiga gwarekurupñan Jisösgöreñ kaba kewö jiget, “Böhi, nini gölme kötikñi kiangöreñ malinga wehön jeñan teköba gemangö akza. Miangöra gi ölop ambazip kambu ki melaim enñinönga miriñi miriñi miangöreñ anda numbu nenenini söngöröñi memba neme.”

¹⁶ Mewö jigetmö, Jisösnöñ kewö jii mötket, “Yeñön ölop kiangöreñ tatme. Enñön mönö nanñinak i nene gumohom enñime.”

¹⁷ Mewö jii möta jiget, “Nini beret 5 aka söra yahöt miyök memba maljin.”

¹⁸ Mewö jigetka jiyök, “Mönö mi memba kaba niñgime.”

¹⁹ Mewö jiba ambazip kambu mi kegwan luplupnöñ eta tatmegöra jim kutum enñiiga tatket. Tatketka beret 5 aka söra yahöt mi memba Suenöñ ui öngöiga kötuatköba beret mindipköba gwarekurupñi enñiiga ambazip kirip dop mendenña enñiget.

²⁰ Mendenña enñigetka ambazip körekmakörek nemba nem timbireñ aket. Nem timbireñ aka nene kitipñi kitipñi mosötkeri, mi gwarek yeñön qezakögetka sakap 12 miangöreñ geba kokolak qeyök.

²¹ Azi beret negeri, yeñgö jañgöñini mi 5000. Ambi nahönbörat yeñgö jañgöñini mi qahö meget. Mewö.

Jisösnöñ o anğö qakñe tiba tiba anök.

Mak 6.45-52; Jon 6.15-21

²² Neget teköiga Jisösnöñ miangöreñök gwarekurupñi jim kutum enñiba kewö jiyök, “Inini mönö wañgenöñ öngöba qeljiñe o anğö kutuba likepñe anme. Nöñön ölop nalö sutñe ambazip kambu ki melaim enñibagun kamam.”

²³ Ambazip melaiba enñubula kundunje öngöba nanñök mala köuluköyök. Köuluköba mali mare aiga kundunje nanñik kötikñi tarök.

²⁴ Tariga wañgeninan lök o anğö bibiñe köröwen aniga luhutnöñ angerangöreñök gila kaiga sirinöñ wañgenöñ giliga kekwilik anda kayök.

²⁵ Mewö ahiga miri awörañgöiga (3-6 kilok) miangöreñ Jisösnöñ o anğö qakñe tiba tiba gwarekurupñi yeñgöreñ kayök.

²⁶ Kaba o aṅgö qakṅe tiba tiba kaiga gwarekurupṅan mi eka keṅgötporiṅ aka “Köwet Soṅgoriṅnön kaza,” jiba sömbuṅini möta qeta silatket.

²⁷ Qeta silatketmö, Jisösnön mianṅörenjök keukeu jiba kewö jii mötket, “Alaurupni, mönö ewebibiṅinambuk saitingit malme. Nanak kazal. Keṅgötṅini kude mötme.”

²⁸ Mewö jii möta Pitönön melenḁa kewö jii mörök, “Göṅön Kembuya akzan ewö, mönö ölop jinönḁa nönön o qakṅe tiba tiba göhörenḁa kamam.”

²⁹ Jisösnön mi möta “Ölop kanön,” jiyök. Mewö jiiga Pitönön waṅge mosöta o aṅgö qakṅe tiba tiba könahiba Jisösgörenḁa anök.

³⁰ Könahiba anökmö, luhutnön gwötpuk gili mi eka keṅgötporiṅ aka könahiba o uruṅe geba kewö qerök, “Kembu, bauköm niṅginön.”

³¹ Qeriga Jisösnön mianṅörenjök börönḁa börönḁa Pitögö börönḁa memba kewö jiyök, “Mötnariṅki morörökṅi. Mönö wuanönḁöra uruyahöt akzan?”

³² Mewö jiba bauköm waṅgi waṅgenön öṅgöyohotka luhutnön nön qeba görönḁa alök.

³³ Görönḁa aliga azi waṅgenön tatkeri, yeṅön waikṅi memba möpöseim waṅgiba kewö jiget, “Alakṅa, gi Anutugö nahönṅa.” Mewö.

Jisösnön Genesaret mala mem ölowak nup meyök.

Mak 6.53-56

³⁴ O aṅgö kutuba likepṅe Genesaret mire aṅgota waṅge mosöta saknön geget.

³⁵ Saknön gegetka miri mianṅö ambazipnön Jisös möt kutum waṅgiget. Möt kutum waṅgiba keu algetka miri pakpak kösutṅe tatkeri, mianṅörenḁa aniga buzupṅi möta kawöl ambazip körek eṅguanḁita Jisösgörenḁa kaget.

³⁶ Kagetka kinda Jisös malukuṅaṅgö suṅe misiribingö ulet waṅgiba malget. Misirigeri, körek yeṅön mönö ölowak teköget. Mewö.

15

Ambösakon yeṅön keu kusum sohoget.

Mak 7.1-13

¹ Mianṅö andönḁe Farisi (Köna keugö kapaṅkölköl) aka Köna keugö böhi tosatṅan Jerusalem sitiyoḁ Jisösgörenḁa kaba kewö qesim waṅgiget,

² “Göhö gwarekurupkan wuanönḁöra köna walönḁa ambösakoninaṅgö silikṅini qeze? Yeṅön mönö börönḁini saṅonḁa dom-amöt qahö qeba tönḁup könahiba nene neze?”

³ Mewö qesim waṅgigetka kewö jii mötket, “Nanṅinak mönö wuanönḁöra ambösakoninaṅgö silikṅini wuatṅöbingöra köna walönḁa Anutugörenḁa jöjöpaṅ keu qeze?”

⁴ *Mianṅö keuṅi kun kewö: Anutunönḁa kewö jim kutuyök, ‘Iwinamgi mönö göda qem etkimakṅan,’ aiga ‘Kunṅan iwiṅi me namṅi qesuahömawi, i mönö qegetka kömuma.’

⁵ “Mewö jim kutuyökmö, iṅini keu mi oṅgita kewö jimakze, ‘Kunṅan iwiṅaṅgöra me namṅaṅgöra kewö jima: Wösöni mötzal. Nönḁö naṅgönaṅgö yuaini buṅa qem aṅgubanak, mi lök Anutugö saiwap naluköra kewöta albi ahöza. Kunṅan mewö jiba iwiṅi me namṅi göda qem waṅgimawaṅgö dop qahö akza.’

⁶ “Mewö jiba silikṅini walṅaṅgöra aka Anutugö jöjöpaṅ keuṅi utalgetka omaṅi aka pömsöm qemakza. Mi qahö dop kölja.

⁷ O urumelenḁö silesile ambazip, kezapqetok azi Aisaianön mönö eṅgö könaṅamṅini törörök qeljiṅe indela kewö jii ahöza,

* 15:4: Eks 20.12; 21.17; Dut 5.16; Lew 20.9

8 *‘Ambazip kambu kianön mönö numbu jitņinan ölöņnanök göda qem niņgimakzemö, uruņinan nönöņgan ak niņgiba kungen algetka köröwen ahöza.

9 Mewö ahöiga nöņgö waikni öne töhön memba möpöseim niņgimakze. Köna keu kusum enģibin, jiba salupņe ambazip yeņgö jimkutukutuņini mi numbu o alakze.’” Mewö melenģyök.

Azi uru mi denöwö tölohoba lantiza?

Mak 7.14-23

10 Jisösnöņ ambazip kambu kunbuk enģoholi kagetka kewö jii mötket, “Injini mönö keu ki kezap ala möt asarime.

11 Yuai azigö numbuņeyök uruņe gemakzawi, mianön qahö tölohom waņgimakzapmö, nanņi numbuņeyök keu erakzawi, mianön mönö tölohom waņgimakza.”

12 Mewö jii mötketka gwarekurupņan kaba kewö qesiget, “Farisi (Köna keugö kapaņkölköl) yeņön keu mi mötket enģui uruņinan bölizawi, mi mötzan me qahö?”

13 Qesigetka kewö melenģnök, “Nöņön warök pakpak nöņgö Suep Iwinan qahö kömöröhi, mi mönö jalöņinambuk qözölmam.

14 *Muat, i mönö enģömosötme. Yeņön ‘Jegömöl ambazip enģuangitpin, jimakzemö, nanņini jeņinan mönö gömöliza. Jegömöl kunņan jegömöl alaņi kun böröņe memba waņgitma ewö, yetkön mönö mohotņe lömnöņ geba etkuma.”

15 Mewö melenģniga Pitönöņ jiyök, “Dopkeu mianģö könaņi mönö jim asarinöņ mörin.”

16 Mewö jiiga Jisösnöņ jiyök, “O alaurupni, iņini mewöyök toroqeba mötmötņini ölöņņi qahö akze me?

17 Yuai pakpak azi numbuņeyök uruņe gemakzawi, mi kömgokņe geba yaigep erakza. Mi möt kutuze me qahö?

18 *‘‘Mi erakzapmö, keu uru könömjeyök kota numbuņeyök erakzawi, mianön mönö tölohom waņgimakza.

19 Ambazip uru könömjineyök yuai kewöņi asuhuba korakza: Keu bölöņi mötmöröiba suņa jinaņ memba ambazip enģuget kömumegö mörakze. Qesabulum aka serowilin akingö mörakze. Yoņgorö membingö mörakze. Jitnöņ alal keu munenņi jibingö mörakze. Andöqeqe keu yöhösaņ jiba Anutu mepaiköbingö mörakze.

20 Yuai mewöņan mönö ambazip tölohom enģimakzapmö, böröņini qahö saņģonģa nene nemakzei, mianön azi kun qahö tölohomakza.” Mewö.

Kenan ambi kunņan kapaņ köla köuluköyök.

Mak 7.24-30

21 Jisösnöņ Genesaret gölme mosöta siti qetņiri Taiö aka Saidon mietkö distrik qetņi Fonisia mianģö uruņe anök.

22 Aniga Kenan ambi, gölme mianģö toņi kunņan kaba Jisös uleta kewö qeta jiyök, “Kembu, Deiwidkö gwölönarökņi, mönö ak kömum niņgiman! Ömenöņ böratni kölköljinjij ak waņģiiga sihimbölä ketanņi mörakza.”

23 Qeta jiyökmö, Jisösnöņ keu kun qahö melenģnök. Mewö aiga gwarekurupņan kaba kewö kuņģum waņģiba jiget, “Ambi mi sahöta qeta könanine kazawaņģöra mönö bauköm waņģinöņga anma.”

24 Mewö jigetka melenģnök, “Iwinan Israel könagesögö lama sohosohonņi miyöhök amöt qem enģimamģöra aka melaim niņģiiga kazal.”

* 15:8: Ais 29.13 * 15:14: Luk 6.39 * 15:18: Mat 12.34

²⁵ Mewö melenjiga ambi mianjön kösutje kaba simin köl wanjiba jiyök, “Kembu, mönö bauköm niñginöj!”

²⁶ Mewö jiyökmö, Jisösnöj kewö melenj wanjiyök, “Qahö, morö yeñgö mirinjineyök beret memba kiam engiinga qahö dop kölbapuk. Juda nini kianurup engö qetjini kiam qerakzin. Nöñön mutuk Juda ambazip bauköm engjibiga kantri tosatji enjön mönö kiamgö dop mamböta malme.”

²⁷ Melenj wanjiyökmö, ambinöj jiyök, “Kembu, mi ölop mötzalmö, kiam moröñi yeñön mönö mewöyök tonjanjögö tebolnöhök nene boromñi eriga nemakze.”

²⁸ Mewö jiiga Jisösnöj kewö jii mörök, “O ambi, göhö mötnaripki mi ketani. Mianjögöra ulet niñgizananjögö öljö mönö asuhuma.” Mewö jii möta böratjan aua mianjögöreñök ölöwahök. Mewö.

Jisösnöj kawöl ambazip sehisehiñi meiga ölöwaket.

²⁹ Jisösnöj gölme mi mosöta kaba Galili o anjögö jitje kanjota kunduje öñgöba eta tarök.

³⁰ Tariga ambazip kambulelemenöj yanjögöreñ kaba ambazip kewöñi enjuañgiket: Simalokon aka jegömöl ambazip, tosatji köna böröñini heramheramgöñi, tosatji keuñini mötökñi aka kawöl tosatji gwötpuk enjögöhi malgeri, mi enjuañgita Jisösgö köna kösutje al enjigetka mem ölöwak enjiyök.

³¹ Mem ölöwak enjiiga ambazip keuñini mötökñi yeñön keu jigetka köna böröñini heramheramgöñi yeñön ölöwaka diñgigetka simalokon yeñön köna tiba anda kagetka jeñini döndöñgöñi yeñön je uba eketka ambazip kambu yeñön mi eka welipköba Israel neñgö Anutunini möpöseiget. Mewö.

Jisösnöj azi 4000 nene gumohom enjiyök.

Mak 8.1-10

³² Jisösnöj gwarekurupñi enjoholi yanjögöreñ kagetka kewö jii mötket, “Nöñön ambazip kambu kianjögöra wösöni mötzal. Yeñön nöñgöreñ kaba wehön karöbut lök mala kotketka neneñini qahöwahiga ekzal. Könanöj anda mala kambañe jeñini gili tirinbirin akepüköra i öne melaim enjimamgö töközal. Mianjögöra i nene gumohom enjimamgö mötzal.”

³³ Mewö jii gwarekurupñan melenjda kewö jiget mörök, “Gölme qararanjökölñe kianjögöreñ neñön mönö denikeyöhök numbu nene gwötpuk miwikñaiba ambazip kambuleleme ki gumohom enjibinak?”

³⁴ Mi möta Jisösnöj kewö qesim enjiyök, “Enjögöreñ beret dawik ahöza?” Qesim enjiiga “Beret 7 aka söra moröñi tosatji ahöza,” jiget.

³⁵ Jigetka Jisösnöj ambazip kambu mi gölmenöj geba tatmegöra jim kutum enjiiga geba tatket.

³⁶ Geba tatketka beret 7 aka söra mi memba Anutugö saiwap jiba mindipköba gwarekurupñi enjiiga yeñön mi ambazip kambu dop toto qem enjiget.

³⁷ Toto qem enjigetka namba nem timbireñ-göget. Nem timbireñgöba nene kitipñi mosötket geyöhi, mi sakap 7 mianjögöreñ qezakögetka numbuñe qeyök.

³⁸ Azi nene negeri, yeñgö janjögöñini mi 4000. Ambi nahönbörat yeñgö janjögöñini mi qahö meget.

³⁹ Jisösnöj ambazip kambu melaim enjiiga angetka nanñi wanjenöj öñgöba Magadan gölmenöj anök. Mewö.

16

Böhi tosatjan anjögöletot ekingöra kapanjölget.

Mak 8.11-13; Luk 12.54-56

1 *Farisi (Köna keugö kapañkölköl) aka Sadyusi (Jike nupkö kapañkölköl) tosatñan Jisösgöreñ kaba keugö bötaknöñ örömap-köra esapköm wañgiba kewö qesiget, “Mönö jinöñga Suepnöhök añañletot kun asuhuiga ekin.”

2 Mewö jigetka kewö melenök, “Wehön gemangö ahiga miangöreñ kewö jimakze, ‘Suepnöñ pisihiizawangöra uran wehön ölopñi akña.’

3 “Mewöyök söñanök kewö jimakze, ‘Suepnöñ pisihiiga kousunöñ töwizawangöra mönö kie luhut gilma.’ Mewö mewö jiba suepkö tandökñi eka kie wehögö könañi ölop kewörakzemö, nalö maljini, miangö aiwesökñi kewötpingö qahö mötze. Mi qahö dop kölja.

4 *Ambazip kambu bölöñi gölmenöñ mala qesabulum ahakzei, yeñön Anutugö aiwesökñi asuhumapköra kapañ kölakzemö, Anutunöñ kezapqetok azi Jonagö aiwesökñi lök enjiiga aiwesök tosatñi qahö toroqeba kondel enjima.” Mewö jiba enjömosöta kungen anök. Mewö.

Farisi aka Sadyusi yeñön wösökömbuk ewö akze.

Mak 8.14-21

5 Jisösnöñ gwarekurupñi yembuk o añañ kutuba likepñe añañgota semön membingö ölüm enjuyöhi, mi eket.

6 *Mi eketka Jisösnöñ kewö jii mötket, “Injini Farisi aka Sadyusi pati yahöt yeñgö wösökömbukñini aka gipñi kakñi mietköra mönö galömñini meme. Mi ölopñanök qahö kewöta andö qegetka mietköñ mönö yist ewö qariba mem bölim enjimahot.”

7 Jiiga keu pasetñi mi qahö möt asariba sutñine kewö eraum mötket, “Nini beret qahö memba kazin. Miangöra jiza me denöwö?”

8 Mi eraum mötket kezapñe geiga kewö jii mötket, “O injini mötnaripñini morörökñi, wuanöñgöra ‘Beret qahö mezin,’ jiba nannjini eraum mötze?”

9 *Nöñgö könañamni mi wuanöñgöra qahö möt kutuze? Nöñön beret 5 mi 5000 yeñgöra mindipköbiga miangö kitipñi qezakögetka könde dawiknöñ geba numbuñe qeyök? Mi ölüm enjuza me qahö?”

10 * “Mewöyök beret 7 mi 4000 yeñgöra mindipköbiga miangö kitipñi qezakögetka sakap dawiknöñ geba kokolak qeyök? Mi ölüm enjuza me qahö?”

11 Ni beretköra keu qahö jizali, mi denöwö aka qahö möt kutuze? Nöñön beretköra qahöpmö, Farisi aka Sadyusi pati yeñgö wösökömbukñini aka gipñi kakñi kewöta andö qemegöra jizal.”

12 Mewö jiiga miangöreñök keuñangö könañi kewö möt asariget, “Aha! Plaua mem qariqari yistkö galöm mem añañgubingöra qahö jiyökmö, Farisi pati aka Sadyusi pati yeñgöreñ keu lolonqalonji andö qebingöra jiyök.” Mewö.

Pitönöñ Jisösgö könañi jim miwikñaiyök.

Mak 8.27-30; Luk 9.18-21

13 Jisösnöñ Sisaria Filipai taongö kösutñe anda miangöreñ gwarekurupñi kewö qesim enjiyök, “Ambazipnöñ Suep gölmegö azi ölni nöñgöra denöwö jimakze? Ni niñia akzal?”

14 *Jiiga melenja kewö jiget, “Tosatñan ‘Gi Jon O-melun azia akzan,’ jimakzemö, tosatñan ‘Gi Elaija akzan,’ jimakze aka tosatñan toroqeba kewö jimakze, ‘Gi Jeremaia me kezapqetok azi walñi yeñgöreñök kun akzan.’ ”

15 Mewö jigetka kewö qesim enjiyök, “Aka nanninak nöñgöra denöwö jize? Ni niñia akzal?”

* 16:1: Mat 12.38; Luk 11.16 * 16:4: Mat 12.39; Luk 11.29 * 16:6: Luk 12.1 * 16:9: Mat 14.17-21

* 16:10: Mat 15.34-38 * 16:14: Mat 14.1-2; Mak 6.14-15; Luk 9.7-8

16 *Qesim engiiga Saimon Pitönöŋ melenḁa jii mörök, “Gi Amötqeqe Tonji Kraist aka malmal Tonji Anutugö Nahönŋi akzan.”

17 Mewö jiiga Jisösnöŋ melenḁa kewö jii mörök, “O Saimon Jonagö nahönŋi, gölme azi sep busuŋambuk kunŋan qahöpmö, nöŋgö Iwini Suep mire maljawi, yaŋön mönö keu mi göhöreŋ indelök. Mianḁöra göŋön mönö simbawoŋ akzan.

18 Nöŋön kewö jibi mötman: Gi Pitö (nanine keunöŋ jamönjiŋ) aknöŋga nöŋön jamönjiŋ mianḁö qakŋe urumelen könagesönaŋgö tandöŋi albi naŋgöm enḁinöŋga uruŋini möhamgöba köhöiba kinme. Göŋön i galöm köl enḁinöŋga kömup Toŋan i senjom mirigö kiripo naŋguŋe öröm enḁimamgö osima. Ömewöröme tosatŋi yeŋgö kukösumŋinan mewöyök i köndenḁa luhut al enḁibingö osime.

19 *Nöŋön Suep bemtohoŋaŋgö ki moröŋi yahöt gihimam. Gi gölmenöŋ siŋgisöndok jöhönöŋga mianḁön mönö Suep mire mewöyök jöhöjöhöŋi ahöma. Gi gölmenöŋ siŋgisöndok mosöta pösatnöŋga mianḁön mönö Suep mire mewöyök pösatpösatŋi ahöma.”

20 Mewö jiba Amötqeqe Tonji Kraist ahöhi, mi aukŋe jiget kunŋan mötpepuköra gwarekurupŋi yeŋgöra soŋgo köhöikŋi al enḁiyök. Mewö.

Jisösnöŋ kömumamgö keuŋi jiyök.

Mak 8.31-9.1; Luk 9.22-27

21 Nalö mianḁöreŋök Jisösnöŋ könahiba gwarekurupŋi yeŋgöra keu kewö indelök, “Nöŋön Jerusalem anda sihimbölo gwötpuk mötmam. Kantrigö jitŋememe, jike nup galöm aka Köna keugö böhi yeŋön nuŋgugetka kömumam. Kömumbiga wehön karöbut aiga kömupnöhök wahötmam.”

22 Jisösnöŋ mewö jiiga Pitönöŋ öröm waŋgiba göraŋe anda könahiba qetala kewö jim waŋgiyök, “O Kembu, mi nalö kunöŋ asuhum ghibapuköra Anutunöŋ mönö sel jöhöm gihima.”

23 Qetal waŋgiiga lilingöba Pitö kewö jim waŋgiyök, “Gi keu mötmörizani, mi Anutugöreŋ keuya qahöpmö, gölme ambazip aka Satangö sihima. Gi nöŋgö köna utumamgö mötnöŋga urunan böliza. Mianḁöra Satan, gi mönö dölkö nöŋgö jemesoholneyök kesalnöŋ!” Mewö.

Kraist wuatangöbingö söŋgöroŋi

24 *Nalö mianḁöreŋ Jisösnöŋ gwarekurupŋi keu kewö jii mötket, “Kunŋan nöŋgö andöne kamamgö mötzawi, yaŋön mönö nanŋi urusilenḁaŋgö sihim kömbönaŋi bölöŋi andö qeiga sisitŋi megetka sihimbölo mi bisimakŋa. Mi maripomnöŋ kömumawaŋgö dop mökösoŋda ni nuatangaŋgöba kama.

25 *Kunŋan malmalŋi nanŋaŋgöra aŋgön köla nanŋi imbi-imbi maljawi, yaŋön mönö malmalŋi ölni jöhöi sohoma. Sohomapmö, kunŋan gölmegö malmalŋi nöŋgöra aka kölenḁa tököm niŋgimawi, yaŋön mönö malmal ölnaŋgö könaŋi miwikŋaiba köhöiba malma.

26 “Kunŋan gölmenŋi gölmenŋi mienḁö öroyuaiŋi pakpak köl öroiga buŋaŋi an teköiga uruŋaŋgö malmalŋi mem sohoba silebile mala kömuiga Anutunöŋ keuŋi jim teköiga uŋaŋan ayuhuiŋa qahö dop kölma. Sukinaŋŋi mianḁön mönö urusösöŋgai qahö ak waŋgima. Qahöpmahöp. Körek neŋön mönö bohoniŋi jöhöm aŋgubingö osibin.

27 *Suep gölmegö azi ölnaŋ könaŋep Suep garata töroŋi yembuk ki etketka Iwiŋaŋgö asakmararaŋi eka aurume. Nalö mianḁöreŋ mohot mohot neŋgö ahakmemenini kewöta likepŋi mianḁö dop neŋgima.

* 16:16: Jon 6.68-69 * 16:19: Mat 18.18; Jon 20.23 * 16:24: Mat 10.38; Luk 14.27 * 16:25: Mat 10.39; Luk 17.33; Jon 12.25 * 16:27: Mat 25.31; Sum 62.12; Rom 2.6

28 Nöñön keu ölni kun kewö jibi mötme: Kiangören kinjei, engö sutñineyök tosatñan Suep gölmegö azi ölnan kin aka asuhumawi, mi ek kutume. Jebuk mala kömupkö sihimbölöni qahö mötketka asuhum tingiriga mi ekñe.” Mewö.

17

*Jisösgö sileñe letotqetot ahök.
Mak 9.2-13; Luk 9.28-36*

1 *Wehön 6 teköiga Jisösnöñ Pitö, Jeims aka Jeimsgö munñi Jon enñuanñita nanñinök kundunñi köröpñi kunöñ öngöba kötikñe malget.

2 Malgetka jemesoholñine kiniga Jisösgö sile tandökñan letota murutñi ahök. Jemesoholñan wehön jeni ewö kölköl-bilikbilikñambuk asariiga malukuñan tuat lalamñi aka asakñambuk ahök.

3 Mewö aiga eketka Moses aka Elaija yetköñ asuhum enñiba Jisösbuk keukeu jiget.

4 Jigetka Pitönöñ könahiba keu jiba Jisösgöra kewö jiyök, “Kembu, neñön kiangören uruölöwak mötzin. Mianğöra sihimgan mötzan ewö, nöñön ölop kum karöbut qemam. Göhö kun, Mosesgö kun aka Elaijagö kun.”

5 *Mewö jiba kiniga ununñunñ tuat lalamñi asakmararañambuk kunöñ eta aumñan esuhum enñiiga mianğö uruñeyök qet kun kewö eriga mötket, “Azi ki mi nani wölböt nahöna. Nöngö urusihimni ketanñan mönö yanğören ahöza. Mönö yanğö keuñi möta malme.”

6 Gwarek yeñön keu mi möta jönömñini undui sipköba gölmenöñ eta keñgötñini gwötpuk mötket.

7 Mewö mötketka Jisösnöñ yanğören kaba sileñini oseiba kewö jii mötket, “Mönö wahötket. Keñgötñini kude mötme!”

8 Keu mi möta uba wahöta tosatñi qahö enñeketmö, Jisösnöñ nanñök kiniga eket. Mewö.

Jon O-melun-azi mi Elaijagö salupñi akza.

9 Kunduñeyök etketka Jisösnöñ sörokñi mianğören kewö jim kutum enñiyök, “Inñi yuai ekzei, mianğö buzupñi mi ambazip kun kude jiget mötme. Suep gölmegö azi ölnan kömupnöñök wahöriiga mianğö andöñe mi ölop jim asariba malme.”

10 *Mewö jim kutum enñiiga gwarekurupñi karöbut yeñön Jisös kewö qesim wanğiget, “Köna keugö böhi yeñön keu kewö mi wuanöngöra jimakze, ‘Keza-pqetok azi Elaijanöñ mönö mutuk Suepnöhök eriga Amötqeqe Tonñan mianğö andöñe asuhuma?’ ”

11 Qesim wanğigetka melenđa kewö jiyök, “Elaijanöñ mutuk eta asuhuba malmal pakpak möhamgöma. Keu mi ölnapmö,

12 *nöñön kewö jibi mötme: Elaijanöñ lök eta asuhuyökmö, i eka könañi qahö möt kutugetmö, ambazipnöñ i nanñini sihimñini wuatangöba lan ak wanğiget. Mewönanök Suep gölmegö azi ölni mewöyök lan ak wanğigetka Juda yanğö böröñine geba sihimbölö mötma.”

13 Elaijagöra mewö jiba ölna Jon O-melun azigöra keu jii mötkeri, gwarek yeñön mi mewö möt asariget. Mewö.

*Jisösnöñ öme wuatangöi morönöñ ölöwahök.
Mak 9.14-29; Luk 9.37-43*

* 17:1: 2 Pitö 1.17-18 * 17:5: Jen 22.2; Dut 18.15; Sum 2.7; Ais 42.1; Mat 3.17; 12.18; Mak 1.11; Luk 3.22 * 17:10: Mal 4.5 * 17:12: Mat 11.14

14 Jisös aka gwarek karöbut yeñon kunduneyök eta ambazip kambu yengören kagetka azi kunöñ Jisösgö kösutne kaba simin köl wañgiba kewö jii mörök,

15 “Kembu, göñon mönö nahöni ak kömum wañgiman. Kawölnöñ yöhöiga tala eta qeiga bözok mitiba semben auba sihimbölo gwötpuk mörakza. Nalö gwötpuk tala könöpnöñ me onöñ gemakza.

16 Nöñon i wañgita gwarekurupki yengören kazalmö, yeñon i mem ölöwak wañgingö osize.”

17 Mewö jiiga melen wañgiba jiyök, “Yei, gölmegö yañgisen aka misimkaulup ambazip, mönö nalö dawik embuk mala qatön engubiga Anutu qahö möt narigetka sihimbölo mötmam? I mönö wañgita nöngören ki kaget.”

18 Wañgita kagetka Jisösnöñ öme mi jim wañgii mosöta ani morönöñ nalö miangörenök ölöwahök.

19 Ölöwahiga gwarekurupñan mi eka nanñinök Jisösgören kaba tata kewö qesim wañgiget, “Neñon mönö wuanöngöra mi naninök wuatangöbingö osizin?”

20 *Qesim wañgigetka kewö jii mötket, “Mötnaripñinan morörökñi akza-wağöra mi wuatangöbingö osize. Nöñon keu ölni kun kewö jibi mötme: Mötnaripñinağö ölni mi nejon kötnağö dop ahöbawak ewö, eñon ölop kundunji kianağö Tonangöra kewö jim kutubeak, ‘Gi mönö kundunji mi meköba wahöta anda likepne endu alman.’ Mewö jiba möt narigetka miangö dop aiga endu anma. Anutu möt narigetka inahöm enjiiga yuai kungöra qahö qaköbeak.”

21 (Öme tandökñi mewöñi mi mönö köuluköba nene sinji mala wuatangöbin. Yuai murutñi kun ahinga qahö kota anma. Mewö.)

Jisösnöñ kömumamğö Buñañi jiiga yahöt ahök.

Mak 9.30-32; Luk 9.43b-45

22 Jisösnöñ gwarekurupñi yembuk mohotne Galili prowins uruñe liliköba könanöñ angetka Jisösnöñ keu kötni kewö jii mötket, “Anutunöñ Suep gölmegö azi ölni mi gölme ambazip yengö böröñine al wañgii gema.

23 Geiga i qegetka kömuma. Kömuiga wehön karöbut aiga mönö kömupnöhök wahötma.” Gwarekurupñan mi möta uruñinan lömböriiga wösöbirik mötket. Mewö.

Jisösnöñ jöwöwöl jikeğö takisñi alök.

24 *Jisösnöñ gwarekurupñi yembuk Kaperneam taonöñ kañgotketka jöwöwöl jikeğö takis meme azi yeñon Pitögören kaba kewö qesim wañgiget, “Enğö böhinñinan jöwöwöl jikeğö takisñi alma me qahö?”

25 Qesim wañgigetka “On!” jiyök. Miangö andöñe Pitönöñ miri uruñe öngöiga Jisösnöñ keu mutukñi kewö qesim wañgiyök, “Saimon, gi denöwö mötmörizan? Denike yeñon kölköl-örörögö töwañi aka takis tosatñi mi gölmegö kiñ azi kembu yengöra alakze? Kantri tonji neñon me kian yeñon mi algetka tokomakze?”

26 Mewö qesim wañgiiga melen da “Kian yeñon,” jiyök. Mewö jiiga Jisösnöñ kewö jii mörök, “Mewö aiga kantri tonji neñon mi albinangö dop qahö akzin.

27 Mewö akzinmö, takis qahö alinga azi miengö uruñinan bölibapuköra mönö anda kösö kawiki o angönöñ gilman. Gila söra mutukñi öröba memani, mönö miangö numbuñi mesaköba monen kötni miangören miwikñaiman. Monen kötni mi azi yahöt netkö takisnirağö dop. Mönö mi memba enğiba miangön nöngö aka nangi takisniri alman.” Mewö.

* 17:20: Mat 21.21; Mak 11.23; 1 Kor 13.2 * 17:24: Eks 30.13; 38.26

18

Gwarek sutjine danjon mutukni akza?

Mak 9.33-37; Luk 9.46-48

¹ *Nalö miangören gwarek yejon Jisösgören kaba kewö jiget, “Suepkö bemtohon uruñe danjon öngöngöni akza?”

² Mewö jigetka namande moröni kun qeri kaiga sutjine ali kinök.

³ *Kiniga kewö jiyök, “Nöñon keu ölni kun kewö jibi mötme: Uruñini qahö melennda nahönbörat ewö qahö akñe ewö, injini mönö nalö kunon Suepkö bemtohonon qahö angotme.

⁴ Miangöra kunñan nanñi memba et ala morö kiangö dop akñawi, yanjon mönö Suepkö bemtohon uruñe öngöngöni akza.

⁵ Kunñan namande kewöni kun nöngö qetne köl öröba köyan kölmawi, yanjon mönö ni köl öröm niñgima.” Mewö.

Singisöndökö kölgorom mönö qetal engime.

Mak 9.42-48; Luk 17.1-2

⁶ Jisösnön toroqeba kewö jiyök, “Morö kewöni möt narim niñgizei, kunñan yengörenök kun kölgorom ak wañgiiga singisöndök akñawi, azi mianjon mönö lömböt öngöngöni miwikñaima. Anutunon lömböt miangö likepni denöwö wañgiiga dopñe akawak? Kemun jamonjin jölñe jöhöba köwet röndumnön gilget mulungöi gebawak, mianjon mönö awamni ahum wañgi tandök akawak.

⁷ “Singisöndökö supatitikan mönö awamñanök asuhumakza. Miangöra gölme ambazip engöra Yei wösöbirik! mötzal. Kunñan supatitik anjon kölmangö osimakzapmö, kun danjon tosatni kölgorom ak engiiga singisöndök akñei, yanğöra mönö Yei! jiba sahötzal. Sihimbölö öngöngönan mönö yangö qakñe öngöma.

⁸ *“Börögan me könagan singisöndök akñangö kölgorom ak gihima ewö, mönö yandim gilman. Yandim gilagun börötak me könatohot mala malmal köhöikni miwikñaiba oyaenköyaen akñanmö, köna börö yahötpuk malnonga könanğep könöp sianon gil gihigetka gebanbuk. Sia könöpni mi teteköni qahö jema.

⁹ *“Mewöñanök jegan singisöndök akñangö kölgorom ak gihima ewö, mönö qözöla gilman. Qözöla gilagun je-ilik mala malmal köhöikñe anğota oyaenköyaen akñanmö, je yahötpuk malnonga könöp siagö könöpnön gil gihigetka gebanbuk.” Mewö.

Lamanon sohoyöhi, miangö dopkeu

Luk 15.3-7

¹⁰ “Ambazip moröni kienğorenök kun memba et al wañgibe-puköra mönö galömnini meme. Nöñon keu kewö jizal: Yengö kölközizip garataurupñinan mönö Suep miri miangören nöngö Suep Iwinangö kösutñe mala jemesoholni sundan ehakze. Miangöra jijiwilit kude ak engime.

¹¹ (Suep gölmegö azi ölnan mönö ambazip sohosoñi mem letot engii oyaenköyaen akñegöra erök.)

¹² “Keu kiangöra denöwö mötmörize? Azi kungö lamaurupni 100 malgetka miengörenök kunñan sohoba janjun aniga toñan denöwö akña? Yanjon mönö 99 mi kundun engömosöta anda mohot janjun anöhi, miangö jaruba anma.

¹³ Jaruba anda mala miwikñaima ewö, nöñon keu ölni kun kewö jibi mötme: Yanjon 99 janjun qahö angeri, miengöra nalö miangören gwötpuk qahö söngaimapmö, mohot miangöra önöni qahö söngaiaba malma.

14 Mianğö dop engö Iwiñini Suep mire maljawanön mönö ambazip moröñi kienğöreñök kunnjan sohoba könöp sianöñ gebapüköra mörakza.” Mewö.

Alagan siñgisöndok ak gihiga kewö akñan:

15 * “Urumelen alagan siñgisöndok ak gihima ewö, gi mönö yangöreñ anda mesohol köl wangiba köna siñgiyöhi, mi kondel wangiman. Mewö aknöñga keugi möta bapñe anma ewö, göñön mönö alagi luhut al wanginöñga kunbuk urumohot aka malmahot.

16 * “Mewö aknöñga keugi möta mianğö bapñe qahö anma ewö, göñön mönö toroqeba ala mohot me yahöt etkuangita yangöreñ anme. Mewö Buña Kimbigö keu kianğö dop akñan, ‘Keu pakpak mi ambazip yahöt karöbutñan nangöba jigetka köhöima.’

17 “Mewö aketka keuñini möta mianğö bapñe qahö anma ewö, göñön mönö urumelen könagesögö jitñememe yeñgöra jinöñga yambuk eraum mötme. Eraum mötmemö, yeñgö keu bapñe mewöyök qahö anma ewö, mi mönö aukñe jigetka jabö ahui urumelenğö kopa ewö ak wangiba malman. Takis tilipqilip-ñinambuk megetka sisitñini memakzei, mianğö tandök ewö i mönö mosötnöñga yaigep malma.”

Siñgisöndokö jöhöjöhöñi aka pösatpösatñi

18 * “Nöñön keu öl töhönñi kun kewö jibi mötme: Enñön siñgisöndok gölmenöñ jöhömei, mi pakpak mönö Suep mire mewöyök jöhöjöhöñi ahöma aka siñgisöndok gölmenöñ mosöta pösatmei, mi pakpak mönö Anutunöñ mosöri Suep mire mewöyök pösatpösatñi ahöma.

19 “Toroqeba keu kewö jibi mötme: Gölmenöñ engöreñök yahötñan keu mi me mi mianğöra urumohok aka köuluköbitkö keu jöhömahori, mi nöñgö Iwini Suep mire maljawanön mönö etkiiga buña qem angumahot.

20 Mi kewögöra: Ambazip yahöt me karöbutñan nöñgö qetne igen me waigen tokomei, nöñön mönö mianğöreñ yeñgö sutñine malmam.” Mewö.

Welenqeçe ak-kömukömuñi qahöpkö söpsöp keu

21 * Nalö mianğöreñ Pitönöñ Jisösgöreñ kaba keu kewö jii mörök, “Kembu, alanan siñgisöndok ak niñgimakzawi, nöñön mi indimñi dawikö dop mosötpiga dop kölma? Indimñi 7 mi gwötpuk. Mianğö dop mosötpiga dop kölma me qahö?”

22 Jisösnöñ mi möta kewö melen wangiyök, “Indimñi 7 qahöpmö, 70 taims 7 * mi mosötnöñga dop kölma. Nöñön göhöra mewö jizal.

23 Mianğö könañi mi kewö jim tuarimam. Suepkö bemtohoñi mi kiñ azi kembugö dop albi kewö akza: Kiñnöñ welenqeçeaurupñi engohola monenini galöm kölgeri, mianğö aren papiañi kondelget mindiñgömapköra kapan kölök.

24 “Mewö könahiba monenangö kösohotñi kewöta mindiñgögetka mianğöreñ azi kun wangita kagetka yangö jeñe kinök. Tosañi 10 milyön kina mi yangöreñ ahöyök.

25 Mi ahöyökmö, tosañi mi mekömamgöra monenini qahö dop köli osiyöhanğöra aka ketañamñan kinda kewö jim kutuyök, ‘Sukinañi ahözawi, mi pakpak mönö söñgöroni memegöra alme. I aka anöm-moröñi i mewöyök mönö söñgöronini memegöra algetka monen kaiga mianñön tosañi mi meköme.

26 “Mewö jim kutuiga welenqeçeñan wösöñe eta simin köla sipköba kewö ulet wangiyök, ‘Gi mönö urukönöp kude aka mökösoñda mamböt niñginöñga göhöreñ tosañi pakpak mi ölop meköm gihimam.’

* 18:15: Luk 17.3 * 18:16: Dut 19.15 * 18:18: Mat 16.19; Jon 20.23 * 18:21: Luk 17.3-4

* 18:22: 70 taims 7 = 490. Mianğö dop alagahö siñgisöndokñi mi mönö qösösök mosötman.

²⁷ Mewö ulet wanjiiga ketanjanan welenqeçenangöra wösö mötmöt aka tosanj mi kutuba mosöta pösari erök.

²⁸ Erökmö, yaigep anda miangören welenqeçe alanj kun miwiknaiba ehök. Yangö tosanj mi silim 100:kö töwanj (Kina500,-) miangö dop yangören ahöyök. I eka memba jölñi köhöiknanök mözöhöla kewö jiyök, 'Nöngören tosa göhören ahözawi, mi mönö meköm niñgiman me?'

²⁹ "Mewö jiiga welenqeçe alanjan wösöne eta simin köla sipköba kewö ulet wanjiyök, 'Gi mönö urukönöp kude aka mökösonda mamböt niñginönga göhören tosa mi ölop meköm gihimam.'

³⁰ "Mewö jiyökmö, yanön mi tököba anda jii memba jöhöba kösö mire alget tari tosanj mekögetka etma.

³¹ Yuai mi asuhuiga welenqeçe alaurupnan tandök mi eka uruninan kömbuhiiga wösöbirik möta anda miangö kösohotñi mi körek ketanjananangöra jigetka mörök.

³² "Mi möta ketanjaninan welenqeçe mutukñi mi qeri jeje kanoriga kewö jii mörök, 'Gi nup meme azi bölönj! Gi tosa kutuba mosötmangö qesim niñginönga nöñön mi pakpak mosöt gihizal.

³³ Nöñön gehoriba ak kömum gihibiga göñön mewöyök miangö dop welenqeçe alagi ak kömum wanjinönga dop kölbawak.'

³⁴ "Ketanjanan mewö jiiga irimñi seholiiga welenqeçe miangö keunji jim teköba kösö mirigö galöm yeñgö böröñine al wanjiiga sihimbölo gwötpuk möta tatma. Miangören tata tosanj kinören ahöyöhi, mi pakpak meköm teköiga etma.

³⁵ Söpsöp keu kiangö ölnj kewö: Injini mohot mohot alanjanangö siñgisöndokñi uruninan qahö mosötme ewö, nöngö Suep Iwinan mönö mewöyök keu miangö dop ak engima." Mewö.

19

Awanöm anğömosötmösötkö keunji

Mak 10.1-12

¹ Jisösnöñ keu mi jim teköbagun Galili prowins mosöta Jordan o kutuba likepne anda mötöteiba eta kunbuk o mi kutuba Judia prowinsnöñ kayök.

² Kaiga ambazip kambulelembenöñ wuatangöba kagetka miangören mem ölowak engiyök.

³ Mem ölowak enjiiga Farisi (Köna keugö kapankölköl) tosatnan yangören kaba keugö bötaknöñ örömapkö esapköm wanjiba kewö qesim wanjiget, "Azinöñ könanj i me waigöra anömñi mosötmawi, mi Köna keu ongitma me qahö?"

⁴ *Qesim wanjigetka melenđa kewö jiyök, "Miwimiwiknai Tonjan lök könakönahineyök i 'azi aka ambi malmegöra miwiknajim engiyök.' Buña keu mi oyonget me qahö?"

⁵ *Miwiknaiba kewö jiyök, 'Miangöra azinöñ mönö iwinamñi etkömosöta anömnanğören anda qekötahöiga yetkön sile mohot aka malmahot.' Keu mi oyonget me qahö?"

⁶ Mewö aka toroqeba yahöt qahö akzahotmö, sile mohot aka malmahot. Anutunöñ azi aka ambi mindirim etkiyöhi, ambazip kunöñ mönö i kude menden etkima."

⁷ *Mewö jii möta kewö jiget, "Azinöñ anğömosötmösöt papia ohoba anömñi ölop mosötma. Mosesnöñ mönö wuanöngöra keu mewö jim kutum nenji ahöza?"

* 19:4: Jen 1.27; 5.2 * 19:5: Jen 2.24 * 19:7: Dut 24.1-4; Mat 5.31

⁸ Mewö jigetka kewö jim engiyök, “Mosesnöñ mönö uruköhöikñinañgöra aka anömñi mosötmapkö keu mewö jim kutuyökmö, könakonahineyök mewö qahö ahöyök.

⁹ *Nöñön kewö jibi mötme: Anömñan qesabulum qahö ahiga töndup wuatangöba ambi kun memawi, yañön mönö sero yonçorö akña. Kunñan ambi mosötmosötñi memawi, yañön mönö sero yonçorö akña.”

¹⁰ Jisösnöñ mewö jiiga gwarek yeñön jiget, “Awanöm sutñire añgömosötptitkö sonço mewö ahöza ewö, mönö awanöm qahö ahinga dop kölma.”

¹¹ Mewö jigetmö, Jisösnöñ kewö meleñnök, “Miangö keuñi kusum engizali, ambazip körekñan mi nanñinañgöra añgön köla miangö dop ölop qahö akñemö, Anutunöñ keu mi ambazip tosatñi yeñgöra engiyöhi, yeñönök mönö miangö dop akñe.

¹² Miangö könañi kewö: Tosatñan nam körö uruñe ahuba miangöreñök könahiba awanöm akingö qahö mötze. Tosatñan ambazipnöñ silenini yandiba * kondot engigetka awanöm akingö dop qahö akze. Tosatñan Suep bemtohoñgöra aka awanöm qahö akingö keuñi jim jöhöba keuñini mi wuatangömakze. Kunñan keu mia me mia möt añgön köla wuatangömangö dop akzawi, yañön mönö miangö dop akña.” Mewö.

Jisösnöñ nahönbörat kötuetköm engiyök.

Mak 10.13-16; Luk 18.15-17

¹³ Nalö miangöreñ tosatñan nahönbörat morömorö ençuançita Jisösnöñ böröñi nöropñine ala köulukömapköra yañgöreñ kagetmö, gwarek yeñön ambazip mi jim qetal ak engiget.

¹⁴ Mewö aketka Jisösnöñ kewö jiyök, “Nahönbörat moröñi mi ölop engömosötketka nöngöreñ kame. Suepkö Toñan ambazip mewö mia bemtohoñi buña qem engima. Miangöra i kude jöhöm engime.”

¹⁵ Mewö jiba böröñi nöropñine ala engömosöta kungen anök. Mewö.

Jisösnöñ azi pomñi kungö qambañ keu jiyök.

Mak 10.17-31; Luk 18.18-30

¹⁶ Nalö kungen azi kunöñ Jisösgöreñ kaba kewö qesim wañgiyök, “Böhi, nöñön ahakmeme ölopñi denöwö aka malmal köhöikñangö buña qem añgubilençak?”

¹⁷ Qesim wañgiiga kewö jii mörök, “Ahakmeme ölopñi denöwö, wuanöñgöra mewö qesim niñgizan? Mohot-kunñan mönö ölopñi akza. Malmal köhöikñe añgotmamgö mötman ewö, mönö jöjöpañ keu tem köla malman.”

¹⁸ *Mi möta kewö jii mörök, “Wani jöjöpañ keugöra jizan?” Jisösnöñ mi möta jiyök, “Möno ki, ‘Ambazip kun kude qenöñ kömuma, Sero yonçorö kude akñan, Yonçorö kude memañ, Jitnöñ alal keu kude jiman,

¹⁹ *Iwinangi mönö göda qem etkimakñan,’ aka ‘Nangi jöpaköm añgumakzani, miangö dop mönö ambazip pakpak jöpaköm engimakñan.’ ”

²⁰ Mewö jiiga azi gwabönöñ kewö jiyök, “Mi pakpak mönö tem köla mala kotzal. Wanigöra kunbuk osizal?”

²¹ Mewö jiiga Jisösnöñ jiyök, “Gi aködamungabuk malmamgö mötman ewö, mönö anda sukinapki söñgöroñi memegöra alnöñ monerñ kaiga ambazip wanapñi engiman. Mewö aknöñga sukinapki ketani (guli masapu, milyön Kina ewö) mi Suep mire ahöm gihima. Mewö aka ni nuatangöba kaman.”

²² Mewö jiyökmö, gwabönöñ keu mi möta sukinapñi gwötçuk ahöyöhañgöra aka wösöbirik möta jeñi asöliiga öne mosöta anök. Mewö.

* **19:9:** Mat 5.32; 1 Kor 7.10-11 * **19:12:** Azi kötñi kölkölgöra jiza. * **19:18:** Eks 20.13-16; Dut 5.17-20 * **19:19:** Eks 20.12; Dut 5.16; Lew 19.18

²³ Mosöta aniga Jisösnöñ gwarekurupñi kewö jii mötket, “Nöñön keu öñji kun kewö jibi mötme: Yei! Ambazip pomñi yeñön mönö Suepkö bemtohoññöñ angotpingö lömböriba kupuk-kapak akñe.

²⁴ Mi kewö jim tuarimam: Sömbup ketañi kamel mi kondi kinimñe ölop qahö angotma. Miangö dop ambazip pomñi yeñön Anutugö bemtohoñ uruñe angotpingö lömböriba qaköme.”

²⁵ Mewö jii möta gwarek yeñön aurum tililingöba kewö jiget, “Opopon! Ambazip danñön mönö Suepkö buñaya akawak?”

²⁶ Mewö jigetka Jisösnöñ uba engeka kewö jiyök, “Ambazipnöñ mi esapköba osiba qakömakzemö, Anutunöñ mönö yuai pakpak ölop ahakza. Yanñön yuai kun aka memangö qahö osiba qakömakza.” Mewö.

Jisösgö nup memegö töwañi

²⁷ Pitönöñ keu mi möta melenđa kewö jiyök, “Mötnöñ, neñön mönö yuai pakpak mosöta gi guatangöba kain. Miangö likepñi mönö wani yuaia membin?”

²⁸ *Mewö jiiga Jisösnöñ kewö jii mötket, “Nöñön keu öñji kun kewö jibi mötme: Yuai pakpak kölonaiiga Suep gölmegö azi öññan jakömbuak dumñe tari asakmararañan asarimawi, nalö qainñi kun miangöreñ ni nuatangöba kageri, eñön mönö mewöyök jakömbuak dum 12 miangöreñ tata Israel kambu 12 yeñgö keuñini kewöta jim teköme.

²⁹ “Kunñan nöngö qetnangöra aka yuai kun mosöröhi, - mi jike mirinñi, darumunñi, nenbehötñi, iwinamñi, nahönböratñi me nup kisinñi - mi engegömosöriga Anutunöñ mönö miangö likepñi ongita melen wangiiga sehima. Mewö sehiiga malmal köhöikñi teteköñi qahö buña qem anjuma.

³⁰ *Mewö asuhumapmö, mutukñi engegöreñök gwötpukñan dagibezupñi aketka dagibezupñi yeñgöreñök gwötpukñan mutukñi akñe.” Mewö.

20

Wain nup meme ambazip yeñgö dopkeu

¹ Jisösnöñ jiyök, “Suepkö bemtohoñi mi kewö: Gölmö tonñi kunöñ söñanök wahöta yaigep anda azi tosatñi engeka wain nupñe monen nup memegöra qesim engiyök.

² Qesim engiiga ‘Ölop,’ jigetka silim mohotkö töwañini (Kina 5) enгимapkö urumohot aketka melaim engiiga wain nupñe anget.

³ “Angetka 9 kilok miangö dop aiga kunbuk toroqeba anda azi tosatñi maket sombemñe önewat kingetka engehök.

⁴ Engeka kewö jii mötket, ‘Inñini mönö mewöyök nöngö wain nupne anda nup megetka töwañini dopñeyök enгимam.’

⁵ “Mewö jiiga wain nupñe anget. Angetka 12 kilok aiga kunbuk anök aka mare 3 kilok miangö dop dumñe kunbuk yaigep anda mewöñanök ahök.

⁶ Mewö aka mare 5 kilok miangö dop yaigep aniga azi tosatñi dumñe kunbuk öne lan kingetka engehök. Engeka kewö qesim engiyök, ‘Inñini mönö wuanöngöra silim köröp ki öne malje?’

⁷ “Mewö qesim engiiga kewö melenget, ‘Kunñan monen nup membingöra qahö qesim nenñiza. Miangöra öne ki kinjin.’ Melengetka kewö jii mötket, ‘Inñini mönö mewöyök nöngö wain nupne anda nup meget.’

⁸ *Nup megetka mare aiga wain nup tonñan nup galömñi öröba kewö jii mörök, ‘Gi mönö nup meme azi engegohola töwañini enгимan. Mare qöndökñi kazei, yeñgöreñök könahiba enñiba anda söñanök kazei, yeñgöreñ teköman.’

* **19:28:** Mat 25.31; Luk 22.30 * **19:30:** Mat 20.16; Luk 13.30 * **20:8:** Lew 19.13; Dut 24.15

9 “Mewö jiiga mare 5 kilok nupnön kageri, yeñön kañgotketka silim mohotkö töwañi (Kina 5) mi mohot mohot enjiiga meget.

10 Mutuk nupnön kageri, yeñön kañgota töwañini onğita memegöra mötmörigetmö, i mohot mohot mewöyök silim mohotkö töwañi (Kina 5) enjiiga meget.

11 Töwa mohot miyök memba könahiba gölme toñangöra uruñinan ihururuk möta jimongot ak wañgiba kewö jiget,

12 ‘Nini wehögöra nöngöp ariba nupkö lömbötñi bisizinmö, azi mi dölök-kun nup memegöra qesim enğizan. Yeñön aua mohot-kungö dop nup mezemö, göñön töndup yeñgöra mötmörinönga nembuk öröröñ akze. Mi qahö dop kölja.’

13 “Mewö jigetmö, yeñgöreñök kungöra kewö melenđa jiyök, ‘Alani, ni göbuk keu jiba silim mohotkö töwa (Kina 5) gihimangö urumohot akzit. Mianğö dop töwa miyöhök gihibiga dop kölja. Mönö mi mötmöriman.

14 Urugi mianğöra bölipapukmö, mönö nangi töwagi memba anman. Azi dölök-kun nup memegöra qesim enğizali, yeñgöra mewöyök töwa gihizali, mönö miyök enğimangö mötzal.

15 “Nani moneñnön nani sihimnağö dop akiga dop kölja me qahö? Nöñön ekbonep qahö akiga urugan auiga jegi bosoleiza me?”

16 *Jisösnön keu mi jim teköba kewö jiyök, “Mianğö dop qöndökñi yeñön mutukñi aketka mutukñi yeñön qöndökñi akñe.” Mewö.

Jisösnön kömumangö keuñi jiiga karöbut ahök.

Mak 10.32-34; Luk 18.31-34

17 Jisösnön Jerusalem sitinön öngöbingöra gölme köna angetka gwarekurupñi 12 mi öröm enğiba gorañe anda kewö jii mötket,

18 “Mötket, nini Jerusalem öngöbin. Mianğöreñ kunñan Suep gölmegö azi ölñi mamalolo mem wañgiiga jike nup galöm aka Köna keugö böhi yeñgö böröñine gema. Yeñön kömumapkö keuñi jim teköba

19 kian gawman yeñgö böröñine al wañgime. Al wañgigetka mepaiköba ihilek wahinambuknön taüköm wañgime. Taüköm wañgiba maripomnön qegetka kömuma. Kömumba wehön karöbut aiga kömupnöhök wahötma.” Mewö.

Jeims Jon namñiran yuaigöra ulerök.

Mak 10.35-45

20 Nalö mianğöreñ Zebedigö nahönyahöt yetkö namñiran nahönyahötñi yetpuk Jisösgöreñ kaba simin köl wañgiba yuai qainñi kungöra uletmamğö jiyök.

21 Mewö jiiga qesim wañgiyök, “Gi wani yuai akñamğö mötzan?” Qesim wañgiiga kewö jiyök, “Göñön ölöp jim kutunönga nöngö nahönyahötñi kietkön mönö göhö bemtohoñnön eu öngöba kunön börögi ölñe aka kunñan börögi qaniñe tata yuai pakpak galöm kölbeak.”

22 Mewö jiyökmö, Jisösnön melenđa kewö jiyök, “Inini mianğö könañi qahö möt yaköba uletze. Nöñön qambi kakñambuk nemami, iniri mi ölöp namba sihimbölä mötmahot me qahö?” Mi möta “Ölöp nembit,” jiyohot.

23 Jiyohotka kewö jii mörohot, “Mi ölña! Nöñön qambi kakñambuk nemami, iniri mi mewöñanök nemahotmö, nöngö böröni ölñe me qaniñe dañön tatmahori, nöñön keu mi jim kutumamangö dop qahö. Nöngö Iwinan dum yahöt mi denike yetköra mözözömgöyöhi, mi mönö yetköra etkiiga nömbuk tata galöm kölmahot.” Mewö.

Galöm ölñan mönö welenqeçeya akza.

* 20:16: Mat 19.30; Mak 10.31; Luk 13.30

²⁴ Darumun yahöt yetkôn mewö ulerohotka alaurupñi 10 yenön mi möta urubölö aket.

²⁵ *Mewö aketmö, Jisösnöñ engoholi kagetka kewö jii mötket, “Gölmegö kantrinji kantrinji miengö jembonñinan mönö azi kembu tandök ak engimakze. Yengö ketañamñinan mönö keu jim kutuba mindingöm engiba kukösumñini kondelakze. Inini könañini mi ölop mötze.

²⁶ *Engö sutñine silik mewö ahöbapukmö, kunñan engö sutñine ketañamñini akñangö mötzawi, yañön mönö welen qem engiba malma.

²⁷ “Mewöyök kunñan engö sutñine mutukñi malmangö mötzawi, yañön mönö engö nembö bapñine mala welenqeqeñini omani akña.

²⁸ Suet gölmegö azi ölnan mönö mewöyök silik mewöñi kondela nanñi welen qem wangimegöra aka qahö kayök. Qahöpmö, mönö welen qem engiba ambazip sehisehñi yengö sohopñini memangöra aka eta malmalñi kölenja mosötma.” Mewö.

Jisösnöñ jegömöl azi yahöt mem ölöwak etkiyök.

Mak 10.46-52; Luk 18.35-43

²⁹ Jisösnöñ gwarekurupñi yembuk Jeriko siti mosötpingö aketka ambazip kambulembenöñ enguatangöba andöñine kaget.

³⁰ Mewö kagetka jegömöl azi yahöt köna jitñe tarohot. Tarohotka “Jisösnöñ nenqonqitmangö akza,” jiget möta kewö qerohot, “Kembu Deiwidkö gwölönarökñi, mönö ak kömum netkinöñ!”

³¹ Mewö qerohotka ambazip kambu yenön keu bök tatmahotköra qetal etkigetmö, yetkôn mönö kapañ köla kewö qerohot, “Kembu Deiwidkö gwölönarökñi, mönö ak kömum netkinöñ!”

³² Mewö qerohotka Jisösnöñ dörök ala yangöreñ kamahotköra qeri kayohotka kewö qesim etkiyök, “Alayahötñi, nöñön wani yuai ak etkimangöra mötzahot?”

³³ Mewö qesim etkiiga kewö jiyohot, “Kembu, niri jeniri kunbuk ubitköra mötzit.”

³⁴ Mewö jiyohotka Jisösnöñ yetköra wösöñi möta jeniri misirii miangöreñök tohoiga uba Jisös wuatangöba andöñe anohot. Mewö.

21

Jisösgöra köirañ kölgetka Jerusalem öngöyök.

Mak 11.1-11; Luk 19.28-40; Jon 12.12-19

¹ Jisösnöñ gwarekurupñi yembuk Jerusalem siti dopdowiba Oil ip kundunje Betfage mirinöñ kaget. Kaba gwarekyahötñi yahöt melaim etkimangöra aka

² kewö jii mörohot, “Miri wösöñire tatzawi, mönö miangöreñ anmahot. Anda miangöreñ angota donki ambiñi kösönöñ jöhöget kinjawi aka donki moröñi mi miangöreñök miwikñaim etkimahot. Mi mönö pösat etkiba memba nöngöreñ kamahot.

³ “Pösarohotka kunñan keu kun jiiga kewö jimahot, ‘Kembu-niran mönö miangöra osiza.’ Mewö jiyohotka donki mi zilañ al etkiiga ki kamahot.

⁴ Anutunöñ keu kun kezapqetok azi kungö uruñe ali jiyöhi, mianñön ölnambuk akñapköra mewö asuhuyök. Keu mi kewö,

⁵ * “O Jerusalem ambazip Zaion kundunji liliköba maljei, yengöra mönö kewö jigetka mötme, ‘Mötket, engö kin kembuñinan mönö engöreñ asuhuma. Yañön guñböñjönjön aka donki qakñe tata kama. Donki lömböt bisi-makzawangö moröñi miangö qakñe tata kama.’ ”

⁶ Jisösnöñ gwarekyahötñi melaim etkiiga anda keu jiyöhanö dop ahot.

* **20:25:** Luk 22.25-26 * **20:26:** Mat 23.11; Mak 9.35; Luk 22.26 * **21:5:** Zek 9.9

7 Yetkôn donki ambinji morõnjambuk etkõmemba kayohot. Kayohotka malukuñini qekõba donki qakñire algetka Jisõsnõnj morõnjangõ qakñe õngõba tarõk.

8 Mewõ tata aniga ambazip kambulelembenjan göda qeba malukuñini qekõba kõna namñe tumbulgetka tosatñan ip uruñe anda börõnji qezuñgata kõna namñe tumbulget.

9 *Tumbulgetka ambazip kambu jene köl örõba angeri aka andõñe wu-atangõba kageri, yeñõn kewõ jiba qetket, “Hosana! Anutu möpõseizin. Dei-widkõ gwõlõnarõkñi owe owe! Kembugõ qetñe kamawi, Anutunõnj mönõ i kötuetkõma. Hosana! Qetbuñagi möpõseininga euyangõrenj õngõza! Owe owe!”

10 Mewõ qetketka Jerusalem sitinõnj õngõba sitigõ ambazip kõrekñan auruba göjupmajup aka kewõ qesiget, “Azi ki mönõ niñia?”

11 Qesigetka ambazip kambulelembe yeñõn kewõ melenget, “Yañõn mönõ kezapqetok azi Jisõs, Galili prowinsgõ Nazaret mirigõra.” Mewõ.

Jisõsnõnj jõwõwõl jike jim kõmbuhiyõk.

Mak 11.15-19; Luk 19.45-48; Jon 2.13-22

12 Jisõsnõnj jõwõwõl jikegõ tohonj uruñe anõk. Miangõrenj ambazip engehiga inap bohonñi memegõra algetka sõngõrõnji megeri, yañõn mi pakpak kõzõl enjiiga etket. Moneñ utekutek ambazip yeñgõ jakenini metali anget. Mewõyõk kembõ bohonñini memegõra algeri, miengõ dum tatatñini mi tok tõtaliga anget.

13 *Mewõ aka kewõ jii mötket, “Aisaianõnj keu kun kewõ ohoi ahõza, ‘Nõngõ jikenan mönõ kõulukõ miriñina akñapkõ qetme.’ Keu mi ahõzapmõ, inini mi utekõgetka kegwek-kahasililinj yeñgõ banjet ewõ akza.”

14 Mewõ aiga jegõmõl aka simalokon ambazip jõwõwõl jikenõnj yangõrenj kagetka mem õlõwak enjiyõk.

15 Mewõ asuhuyõkmõ, jike nup galõm aka Kõna keugõ böhi yeñõn angõletot meyõhi, mi eket aka nahõnbõrat jõwõwõl jikenõnj qeta “Hosana! Deiwidkõ gwõlõnarõkñi owe owe!” jigeri, mi engeka urubõlõ aket.

16 *Urubõlõ aka kewõ jim wanjiget, “Morõ mi keu qetzei, mi mötzan me qahõ?” Jim wanjigetka kewõ melenj enjiyõk, “Õlõp mötzal. Inini nalõ kungen Buña keu ki oyõnget me qahõ, ‘Gõñõn mönõ nahõnbõrat aka morõsepsep juzu nemakzei, mi kusum enjinõnga nangi tõrõrõk möpõseim gihimakze.’ ”

17 Mewõ jiba engõmosõta siti mosõta mare aiga Betani anda ahõyõk. Mewõ.

Jisõsnõnj fig ip kun qesuahõiga ululuñgõyõk.

Mak 11.12-14, 20-24

18 Ahõba sõñanõk wahõta kunbuk sitinõnj anda nenegõ kõmuyõk.

19 Nenegõ kõmumba kõna jitñe fig ip * kun eka miangõ kõnañe anõk. Anõkmõ, õlñi qahõ miwikñaiiga sinñanõk kiniga ehõk. Mewõ eka ip mi kewõ jim wanjiyõk, “Gõñõn mönõ nalõ kunõnj õlgi kunbuk kude kuñguman.” Mewõ jim wanjiiga fig ip mianñõn mönõ miangõrenjõk ululuñgõyõk.

20 Ululuñgõiga gwarekurupñan mi eka auruba kewõ jiget, “Fig ipnõnj mönõ denõwõ õsumok ululuñgõza?”

21 *Jigetka Jisõsnõnj kewõ melenjõk, “Nõñõn keu õlñi kun kewõ jibi mötme: Mötnarip tõp memba uruyahõt qahõ akeak ewõ, fig ipkõra yuai asuhuzawi, inini miyõk qahõ akeakmõ, ki mewõyõk õlõp akeak: Kunduñi kiangõ toñangõra kewõ jim kutubeak, ‘Mõnõ kundunji ki qekõba wahõta anda

* 21:9: Sum 118.25, 26 * 21:13: Ais 56.7; Jer 7.11 * 21:16: Sum 8.2 * 21:19: Fig mi sambu ipkõ alañi kun. Mi nupñine kõmõtketka kõtñi nahõmñinambuk asuhugetka gwõtupuk nemakze. * 21:21: Mat 17.20; 1 Kor 13.2

köwetnön alman.' Mewö jim kutuba Anutu möt nariiga mönö miangö dop ahuma.

²² Wani yuaigöra qesiba köulukömei, mi pakpak buña qem angubingö möt narigetka mönö buñañini akña." Mewö.

Jitnememe yeñön Jisösgö kukösumñangö qesiget.

Mak 11.27-33; Luk 20.1-8

²³ Jisösnön jöwöwöl jikegö tohon uruñe anda ambazip kusum engiiga jike nup galöm aka kantrigö jitnememe tosatñi yeñön yangören kangotket. Kangota kewö qesim wangiget, "Gi kiangören yuai akzani, mi mönö dañön jim kutum gihiiga ahakzan? Miangö kukösumñi mi dañön gihiyök?"

²⁴ Qesim wangigetka kewö melen engiyök, "Nöñön mewöyök keu kun qesim engimam. Mi melen niñgime ewö, nöñön mewöyök dañön kukösum niñgiiga yuai ki ahakzali, mi jibi mötme.

²⁵ Jonön ambazip o-melun mem engiba malöhi, yañön miangö kukösumñi mi denikeyök meyök? Suet Tonjan wangiyök me gölme tonjan wangiget?" Mewö qesim engiiga sutñine eraum möta kewö jiget, "Kukösumñan Suepnöhök asuhuyök, mewö jibin ewö, yañön mönö kewö jima, 'Inini mönö wuanöñgöra Jon qahö möt narim wangiget?' Mi qahö dop kölja.

²⁶ "Me 'Gölme ambazipnöhök asuhuyök, jibin ewö, neñön mönö ambazip kambu yeñgöra keñötnini möta osibin. Könagesö pakpak yeñön mönö Jongöra 'Kezapqetok azia akza, jiba malje."

²⁷ Keu mewö kewöta Jisösgöra kewö melenget, "Mi qahö mötzin." Mewö melengetka Jisösnön kewö jii mötket, "Mewö aiga nöñön mewöyök yuai ki ahakzalanö kukösumñi dañön niñgiyök, mi qahö jibi mötme." Mewö.

Kungö nahönyahöt yetkö söpsöpkeu

²⁸ Jisösnön söpsöpkeu kun kewö jiyök, "Inini keu kiangöra denöwö mötmörize? Azi kun nahönyahötñi yahöt malget. Nalö kunön iwiñiran nahönñi kungören anda kewö jiyök, 'Nahöni, gi ölop merak nöñgö wain kösö nupne anda nup meman.'

²⁹ "Mewö jiiga kewö melenök, 'Ni töközal! Mewö jiyökmö, könangep keuñi miangö möt böliba elenda anda nup meyök.

³⁰ Miangö andöñe iwiñiran nahönñi kungören anda nahönñi mutukñangö jiyöhi, keu miyök jii mörök. Mi möta keu kewö jiba melenök, 'On! Ketañamni, ölop anmam.' Mewö jiyökmö, töndup qahö anök."

³¹ Jisösnön mewö jiba qesim engiyök, "Yahöt yetkörenök dañön mönö iwiñiranö jitiñi tem kölok?" Mewö qesim engiiga kewö melenget, "Nahönñi mutukñi yañön." Mewö melengetka kewö jii mörök, "Nöñön keu öl töhönñi kun kewö jibi mötme: Takis meme ambazip tilipqilipñinambuk aka köna ketani ambi yeñön mönö inini engoñgita mutuk Anutugö bemtohon uruñe öñgöme.

³² *"Keu miangö könañi kewö: Jon O-melun azinön engören kaba Anutugö jeñe solanibingö könañi kondeliga inini yangö keuñi mi qahö möt narigetmö, takis meme ambazip tilipqilipñinambuk aka köna ketani ambi yeñön mönö i möt narim wangiget. Yeñön i möt narim wangigeri, inini mi eka töndup könangep mewöyök nanñini qahö möt bölim anguba elenda i qahö möt narim wangiget." Mewö.

Wain kösö nup galöm bölöñi miengö dopkeu

Mak 12.1-12; Luk 20.9-19

³³ *Jisösnön jiyök, "Dopkeu kun kewö mötme: Gölme tonji kunön wain kösö nup kun köla kömörök. Köla kömöta selñi memba liliköyök. Mem liliköba

* 21:32: Luk 3.12; 7.29-30 * 21:33: Ais 5.1-2

kötnön wain jout ketani kötnön meyök. Miangören waingö ölni ala könanön tözöhölget onan lalanön geyök. Wain jout ketani mi kötnön memba wain yongorö membepuköra galöm meme jake köröpni köweñambuk meyök. Yuai pakpak mem teköba wain nup galöm tosatni miwikñaim engiba kewö jiyök, 'Mönö nup memba ölnangö bahöni nanñini memba bahöni toni ni ningime.' Mewö jiba nup mi böröñine ala engömosöta kantri kunön anda malök.

³⁴ "Mala mali ölni öliyöhangö nalöni (yambu 5) töriiga miangören welenqe-geurupni kun melaim engiiga galöm yengören anda wain nup ölnangö bahöni wangimegöra jiget.

³⁵ Jigetmö, galöm yeñön i engömembra jöhöba tosatni kömbinön sepgwörörök enguba tosatni enguget kömugetka tosatni kötnön gila enguget kömuget.

³⁶ Miangö andöñe welenazi tosatni toroqeba melaim engiiga gwötpuk aketmö, i mewöñanök öröm ureim mem engiget.

³⁷ "Mewö aketka wain nup toñan keu jaruba jiyök, 'Nani nahöni mönö göda qem wangime me denöwö?' Mewö jiba qöndökni mi nahönña melaiiga yengören anök.

³⁸ Anökmö, wain nup galöm yeñön nahönñi eka sutñine kewö eraum möta jiget, 'Yañön mönö börösamotñangö toni akña. Ayop, mönö memba qein kömuiga wain kösö nupñan mönö nanine buñanina akña.'

³⁹ "Mewö jiba memba jöhöba gilgetka nup yaigepñe geiga qeget kömuyök.

⁴⁰ Wain nup toñan mi möta kaba nup galöm mi mönö denöwö ak engima?"

⁴¹ Jisösnön mewö qesiiga kewö jiget mörök, "Galöm bölöni mi mönö köndenña yayiapaleñ mem engima aka nup galöm dölökni miwikñaim engiba wain kösö nupni yengö böröñine alma. Yeñön ölni ölimawangö nalöñe bahöni törörök wangimakñe."

⁴² *Jisösnön mi möta kewö jii mötket, "Buña Kimbigö keu ki nalö kungen oyonget me qahö, 'Miri meme yeñön köt tandö kun andö qeba öne mosötket taröhi, mianön mönö tandö kömböñani aiga miwikñaiget. Mianön tinçiriga mirinön gororongöba eta kölma. Kembunön tandö mi kuñguiga jeninan ehinga qetbuñabuk aiga welipkömakzin?"

⁴³ "Miangöra kewö jibi mötme, Anutunön mönö bemtohoñi enguangita ambazip kambu kun engiiga yeñön miangö ölni ölop kuñgumakñe.

⁴⁴ Kunñan tandö bohönñi miangören töttöngata eta qemawi, mi mönö silenji kutumutumapmö, ain tandö mianön jöla tala kungö qakñe eta kölma, mi mönö körek qözömözö-zamgöma."

⁴⁵ Jisösnön mewö jiiga jike nup galöm aka Farisi (Köna keugö kapankölköl) yeñön dopkeuñi mi möta könani möt asariba kewö jiget, "Mi mönö neñgöra jiza."

⁴⁶ Miangöra i memba jöhöbingö mötketmö, ambazip kambu yengöra keñgötñini möta osiget. Ambazip kambu yeñön Jisösgöra mötketka kezapqetok azia ahök. Mewö.

22

Maren lömbuanğö söpsöp keu

Luk 14.15-24

¹ Jisösnön kunbuk könahiba söpsöp keunön keu kewö jiyök,

² "Suepkö bemtohoñi mi kiangö dop akza: Kiñ azi kembunön nahönñangöra maren lömbuanğ arengöba mözözömgöyök.

³ Mözözömgöba welenqegeurupni melaim engiba kewö jiyök, 'Nöñön ambazip tosatni maren lömbuanğnön kamegö mötzal. Inini mönö yengören kolek

* 21:42: Sum 118.22-23

anda kamegö jiget mötme.' Mewö jii anda jigetmö, ambazip mienön mi möta kabingö tököba tanqañ aket.

⁴ “Miangö andöñe welenqeçeurup tosatñi kunbuk melaim engiba kewö jiyök, ‘Ambazip kamegöra jiali, mönö yengören anda kewö jime: Mötket, nöñön lömbuanğö neneñamni lök mözözömgöbiga tatza. Nöñgö bulmakau azinji aka bulmakau tosatñi gumohom enjiinga kelökñinambuk akeri, mi enguba ohom qeraköinga yuai pakpak lök jöjöröba ahöza. İnini mönö maren lömbuanğöñ kaget.’

⁵ “Mewö jii angetka ambazip mienön keu miangö kezap qahö algetmö, nöñöñgan aka lañ anget. Tosatñan nene nupñine angetka tosatñan kölköl-örörö nupñine anget.

⁶ Tosatñan kiñgö welen-qeçeurupñi qelanjiba engömembra öröm ureim ak engiba enguget kömuget.

⁷ Kömugetka kiñgö irimñi seholiiga yarö kambuñi melaim enjiiga anda kinda enguget kömükömu azi mi köñdenj engiba taon mirinji mi ohogetka jeyök.

⁸ “Miangö andöñe kiñnön welenqeçeurupñi yengöra kewö jiyök, ‘Maren lömbuanğö mözözömgöinga jöjöröba tatzapmö, ambazip kamegöra jiali, yeñön mönö söñöñgainön kakagö dop ölöñji qahö akze.

⁹ Miangöra inini mönö köna soñanön aka miri sombemñi sombemñi miangören anda ambazip mi me mi miwikñaim enjime, i mönö maren lömbuanğöñ kamegöra jiba kapan köla kuñgum enjime.’

¹⁰ “Mewö jiiga welenqeçeurupñan mosöta könañi könañi miangören anda ambazip mi me mi miwikñaim enjigeri, mi körek pakpak öröm tokom enjiget. Ambazip ölöñji aka bölöñji mewöyök mi mewö kagetka maren lömbuanğö mirinön kokolak qeiga tebol liliköba tatket.

¹¹ Tebol liliköba tatketmö, kiñnön i engekñamgöra kaba miangören azi kun maren lömbuanğö maluku tuatñi qahö köli geiga ehök.

¹² Azi mi eka kewö jii mörök, ‘Alani, gi maren lömbuanğö malukuñi qahö löngöta töndup denöwögöra miri kiangö uruñe kazan?’ Mewö jiiga azi mianön keuñi bököğa ölöñ tarök.

¹³*“Mewö tariga kiñnön welenqeçeurupñi kewö jim kutum enjiyök, ‘Mönö azi mi memba köna böröñi jöhöba yaigep gilgetka pandamanön gema.’ Miangören malmeanön mönö sahöt gigilahöba irimñini yöhözömgögetka qetñi qeri malme.

¹⁴ Keu miangö dop Anutunön ambazip sehisehiñan kamegöra jiyökmö, awamdökñi yeñön keu mi möt anğön köla kaba Anutunön kambu möwölöhöm enjiyöhi, mönö yengö sutñine kanğotme.” Mewö.

Takis alalgö Jisös esapköm wanğiget.

Mak 12.13-17; Luk 20.20-26

¹⁵ Miangö andöñe Farisi (Köna keugö kapankölköl) yeñön anda eraum möta Jisös qesiba keugö bötaknön öroi gwaröhöm wanğibingö areñi alget.

¹⁶ Mewö areñ ala gwarekurupñi aka premiö Herodkö pati-alaurupñi tosatñi melaim enjigetka Jisösgören kaba kewö qesiba jiget, “Böhi, göñön azi ölnji akzani, nini mi mötzin. Göñön ambazip tosatñi qahö engek soriba tosatñi qahö qepureim enjimakzanmö, dop mohotnön kewöt neñgimakzan. Miangöra kuñgum gihigetka qahö gongiba ketanji qahö esuhum enjimakzanmö, Anutugören köna mi keu ölnanğö dop kusum neñgimakzan. Göñön Anutugören keu diñdiñi mianön öngöngöñi eretñi mohot pakpak jim qindiñ ak neñgimakzan.

* **22:13:** Mat 8.12; 25.30; Luk 13.28

17 Mianğöra keu kianğöra denöwö mötmörizan, mi jinöñ mötpin. Nini sisa-kingöra takis ala mianön Mosesgö Köna keu siñgibin me qahö?”

18 Mewö qesigetka areñini muneñi möt kutuba kewö jii mötket, “O urumelenğö silesile azi, inini mönö wuanöngöra keugö bötaknöñ al niñgibingö esapköm niñgize?”

19 Ölöp takis alalgö moneñi kun kondel niñgigetka eki.” Mewö jiiga silwö moneñ (Kina 5) kun memba kaget.

20 Kagetka kewö qesim enğiyök, “Dagöreñ imut aka qet mi ki ohoget ahöza?”

21 “O mi sisa-kingöreñ,” mewö melenđa jiget. Jigetka kewö jii mötket, “Mewö aiga yuai sisa-kingö imutñambuk buñañi akzawi, mi mönö yangöra al wañgime. Yuai kun Anutugö buñaya akzawi, mi mönö Anutugö buña qeme.”

22 Mewö jii möta yangöra gwötpuk welipköba mosöta yaigep anget. Mewö.

Kömupnöhök wahötwahötkö Jisös esapköm wañgiget.

Mak 12.18-27; Luk 20.27-40

23 *Sadyusi (Jike nupkö kapankölköl) yeñön ‘Kömugeri, yeñön kude wahötmé,’ jiba malget. Nalö mianğöreñ yeñğöreñök tosatñan Jisösgöreñ kaba kewö qesim wañgiba jiget,

24 *‘Böhi, Mosesnöñ kewö jim kutum neñgüyök ahöza, ‘Azi kun ambi meiga nahönbörat qahö ahui kömuiga munñan ölöp malöñi memba mala gwölönarök qiwikñaim wañgiiga datñangö qet bisiba malma.’

25 Mötnöñ, nalö kunöñ darumun 7 malget. Datñini mutukñan ambi memba mala gwölönarökñi qahö öne mala kömuyök. Kömuiga munñan malöñi mi meyök.

26 “Memba mala kömuiga munñi kunñan malöñi mi meyök. Meiga mianğö andöñe munñi kunöñ ambi miyök meyök. Mewöña mewö darumun 7 pakpak yeñön ambi mohok miyök memba gwölönarök qahö mala kömum teköget.

27 Kömum tekögetka qöndökñi malöñini mi mewöyök kömuyök.

28 Göñön ‘Kömugeri, yeñön guliba wahötmé,’ jizanmö, nini mi qahö möt narizin. Mötnöñ, azi 7 pakpak mi öröröñ wahötpeak ewö, ambi mohok mi anömñina meget malöhañğöra aka mönö dagö anömña akawak?”

29 Mewö qesigetka Jisösnöñ melenđa kewö jii mötket, “Inini keu jim sohoze. Urumelenğö Buña Kimbiñi aka Anutugö kukösumñi qahö möt kutuzeañğöra mönö janjuñ ahakze.

30 Ölna, kömupnöhök wahöta nalö mianğöreñ awanöm qahö akñemö, garata yeñön Suep mire maljeañğö tandök aka malme.

31 “Mötket! Kömugeri, yeñön guliba wahötmegö keuñi Anutunöñ enğöra jiyöhi, inini mi lök oyonget me qahö? Keu mi kewö,

32 *‘Nöñön Anutu Abrahamgö Kembu, Aisakö Kembu aka Jeikobkö Kembu mala kota maljal.’ Anutunöñ kömukömuñi yeñğö Kembuñini qahöpmö, malmal köhöikñi maljei, mönö yeñğö Kembuñina malja.”

33 Jisösnöñ mewö ambazip kambu kusum enğii möta welipköget. Mewö.

Jöjöpañ keu bohonñi yahöt mi denöwö?

Mak 12.28-34; Luk 10.25-28

34 Sadyusi (Jike nupkö kapankölköl) yeñön Jisös qesim wañgigetka melenđa jim soroköiga keu bök akeri, mi Farisi (Köna keugö kapankölköl) yeñön möta kaba tokoget.

35 *Yeñğöreñök böhi kun Köna keu törörök möt kutuyöhi, yeñön kaba Jisös bötak ala kewö qesim wañgüyök,

36 “Böhi, Mosesgö Köna keu uruñe wani jöjöpañ keu mi bohonñi ketañi akza?”

37 *Qesim wañgiiga melenñök, “Bohonñi ketañi mi kewö, ‘Gi urugi jömukñi, uñagi jömukñi aka mötmötiki jömukñi mianñön mönö Kembu Anutugi jöpaköba malman.’

38 Mianñön jöjöpañ keu bohonñi aka mutukñi akza.

39 *Jöjöpañ keu mianñö alañi kewö, ‘Nangi jöpaköm anğumakzani, mewöñanök mönö ambazip pakpak jöpaköm enğiba malman.’

40 Jöjöpañ keu yahöt mi mönö Mosesgö Köna keu aka kezapqetok ambazip yenğö Buzup Kimbi pakpak mienğö bohonñina akza.” Mewö.

Kraist mi kiñ Deiwidkö Kembuñi aka gwölönarökñi.

Mak 12.35-37; Luk 20.41-44

41 Farisi (Köna keugö kapañkölköl) yenñön kaba tokogetka Jisösnöñ kewö qesim enğiyök,

42 “Inñi Kraistköra denöwö mötze? Yañön mönö dagö nahönña akza?” Mewö jiiga melenđa jiget, “Mönö kiñ Deiwidkö gwölönarökña akza.”

43 Jigetka jiyök, “Mewö akzapmö, denöwö aka Uña Töröñan Deiwid sölölohöm wañgiiga yangöra ‘Nani Kembuni,’ qeta kewö jiyök,

44 *Anutunöñ kinda nöngö Kembuni kewö jii mörök, Göñön mönö kaba nöngö böröni ölñe tatnönğa nöñön nalö sutñe kerökurupki tim tötala luhut al enğiba göhö köna tambö gwaröñe al enğimam. Nalö mi kam kuñğumawañgö dop mönö asak-mararaññöñ ki tatman.’

45 Deiwidnöñ nanñak mewö jiba qetñi ‘Nöngö Kembuni’ jiza. Kembuni jiba mönö denöwö aka yangö gwölönarökñi mohot akawak?”

46 Mewö jiiga mianñö kitipñi kunöñ kun melenmamgö osiba keu böc kinget. Sömañi mianğöreñök körek yenñön Jisös kunbuk keu kungö qesim wañgibingö kölköldömdöm aka mosötket. Mewö.

23

Urumelenğö silesile malmalgö galöm meme keu

Mak 12.38-39; Luk 11.43, 46; 20.45-46

1 Nalö mianğöreñ Jisösnöñ ambazip kambuleleme aka gwarekurupñi yenğöra kewö jii mötket,

2 “Köna keugö böhi aka Farisi (Köna keugö kapañkölköl) yenñön Mosesgö jakömbuaknöñ tata Köna keugö könañi kukösum qakñe kusum enğimakze.

3 Mianğöra keu pakpak jim kutum enğimakzei, mi mönö tem kölmemö, ahakmemenini mi kude wuatangöme. Yenñön keu jitñinan jim asarimakzemö, nanñinak mi qahö wuatangömakze. Mianğöra mönö i ewö kude ahakñe.

4 “Yenñön keuñi keuñi jim kutuba mianğö könjöñ lömbötñi ambazip awötñine alagun algetka mi tem kölbingö lömböriiga jarañbarañ ahakzemö, nanñinak i kesötñini moröñi kunöñ bauköm enğibingö wösömötmötñini kun qahö ahöza.

5 * “Yenñön ahakmemenini pakpak ambazipnöñ enğekñegöra aka memakze. Baiböl keu köt (memori wös) irimuñga bokisñini mem qariba aukñe konde la Buña mötmötñinañgöra aiweliköm anğumakze. Malukuñinañgö suñe aködamungö biretñi ketañi ketañi memba möndömakze. *

6 Yenñön közölömbuaññöñ dum tatat mutukñe jegep tatpingö mörakze aka köuluk mire qaikñe eu tatpingö sihimñi mörakze.

* 22:37: Dut 6.5 * 22:39: Lew 19.18 * 22:44: Sum 110.1 * 23:5: Mat 6.1; Jan 15.38; Dut 6.8

* 23:5: Baiböl memori wös irimuñgañi mi (Dut 6.8) koropeñ me jenjen ewö jöhömalget. Malukuñinañgö suñe aködamungö biretñi mötnöñ memba möndömalgeri, mi Anutugö ambazip öl töhöñni akerangö aiwesökñi ahök.

7 Maketnöŋ me könanöŋ ambazip engeketa jölöŋini jimegö möta ‘O ketanamnini,’ qetŋini mewö qetmegöra sihimŋini mörakze.

8 “Yeŋön mewö ahakzemö, mohok-kun yaŋön enögö Böhiŋini aiga iŋini körekŋan yaŋgö urumelen alaurupŋi akze. Miangöra enögö qetŋini böhinini qetmegöra kude mötme.

9 Mohok-kun yaŋön Iwiŋini akza. Yaŋön Suep mire maljawangöra gölme azi kungöra neŋgö iwinini qet mewö kude qetme.

10 Kraist mohok-kun nöŋön enögö ketanamnini akzal. Miangöra enögö qetŋini ketanamnini qetmegöra kude mötme.

11 **“Mewö qahöpmö, enögö sutŋine bohonŋi akzawaŋön mönö welen qem engebama malma.*

12 **“Mewö malmappmö, kunŋan nanŋi uruŋi memba öngömawi, Anutunöŋ mönö i memba et al wangima. Kunŋan nanŋi uruŋi memba etmawi, Anutunöŋ mönö i memba öngöba al wangima.”*

Jisösnöŋ Farisi yengöra wöziköba Yei! jiyök.

Mak 12.40; Luk 11.39-42, 44, 52; 20.47

13 “O Köna keugö böhi aka miangö kapaŋkölköl ambazip! Iŋini urumelenögö silesile ambazip aketka lömböt qakŋine öngözawangöra mönö wöziköba Yei! jizal. Ambazip Suepkö bemtohoŋ uruŋe aŋgotpepukö nanŋuŋi köla jöhömakze. Nanŋinak miangö uruŋe qahö aŋgotze aka tosatŋan miangö uruŋe aŋgotpingö akzei, iŋini i jöhöba aŋgön köl enгимakze.

14 O Köna keugö böhi aka miangö kapaŋkölköl ambazip! Iŋini urumelenögö silesile ambazip aketka lömböt qakŋine öngözawangöra mönö wöziköba Yei! jizal. Iŋini malö yengöreŋ miri yuai bidaŋda gagabe köla enguanŋirakze aka qetbuŋaŋini asuhumapköra aka köuluk köröpŋi köuluköba töptöpŋine qemakze. Miangöra Anutunöŋ keuŋini jim teköba likepŋi öngöngöŋi melenŋi enögö qakŋine öngöma.

15 “O Köna keugö böhi aka miangö kapaŋkölköl ambazip! Iŋini urumelenögö silesile ambazip aketka lömböt qakŋine öngöza-wangöra mönö wöziköba Yei! jizal. Iŋini kunöŋ Juda ambazip kun akŋapaköra kapaŋ köla köwetŋi köwetŋi kutuba gölmeŋi gölmeŋi lilikömakze. Mewö aketka kunŋan Juda neŋgö ahakmemenöŋ qekötahömawi, i mönö kusum sohom wangigetka könöp siagö buŋaya kun akŋa. Nanŋini ewö qahöpmö, indimŋi yahöt nanŋini engonŋita böliqölima.

16 “Jeŋinan gömöliiga ambazip böröŋine memba enguanŋ-girakzei, lömböt enögö qakŋine öngözawangöra mönö wöziköba Yei! jizal. Iŋini keu kewö jimakze, ‘Kunŋan jöwöwöl jikegö qetŋe keuŋi jöjöpaŋ keunöŋ jim köhöima ewö, mianön qahö köhöimappmö, kunŋan jöwöwöl jikegö yuai goulnöŋ memeni miangö qetŋe jöjöpaŋ keuŋi jima ewö, jöjöpaŋ keu mianön mönö jöhöm wangima.’

17 “O jegömöl ambazip mötkutukutuŋini piromŋi! Yuai goulnöŋ memeni aka jöwöwöl jike yahöt mietköreŋök wani yuainöŋ öngöngöŋi akza? Goulnöŋ nanŋak kömbukŋi qahö akzappmö, jöwöwöl jikenöŋ algetka mianön mönö mi mem kömbuhiza.

18 “Keu kun kewö jimakze, ‘Kunŋan altagö qetŋi qeta keuŋi jöjöpaŋ keunöŋ jim köhöima ewö, mianön qahö köhöimappmö, kunŋan naluk kötin altanöŋ ahözawi, miangö qetŋi qeta jöjöpaŋ keuŋi jima ewö, jöjöpaŋ keu mianön mönö jöhöm wangima.’

* 23:11: Mat 20.26-27; Mak 9.35; 10.43-44; Luk 22.26 * 23:12: Luk 14.11; 18.14

19 “O jegömöl ambazip! Naluk kötin aka alta mietkörenök wani yuainöŋ öngöŋgöŋi akza? Naluknöŋ nannak eretŋi akzapmö, altanöŋ algetka mianön mönö naluk mem kömbuhiza.

20 Miangöra kunŋan altagö qetŋe keuŋi jöjöpaŋ keunöŋ jim köhöimawi, yaŋön alta aka yuai pakpak altanöŋ ahözawi, mönö miangö qetŋe keuŋi jim köhöima.

21 “Kunŋan jöwöwöl jikegö qetŋe keuŋi jöjöpaŋ keunöŋ jim köhöimawi, yaŋön mönö jike miangö aka miangöreŋ mal köhöizawaŋgö qetŋe keuŋi jim köhöima.

22 *Mewöyök kunŋan Suepkö qetŋe keuŋi jöjöpaŋ keunöŋ jim köhöimawi, yaŋön Anutugö jakömbuak dum aka miangöreŋ tatzawaŋgö qetŋe keuŋi jim köhöima.

23 * “O Köna keugö böhi aka miangö kapaŋkölköl ambazip! Inini urumelenğö silesile ambazip aketka lömböt qakŋine öngözawaŋgöra mönö wölköba Yei! jizal. Inini nene pakpak mendenđa bahöŋi 10 miangöreŋök mohot Anutugö buŋaya qemakze. Gipŋi, raki aka kiap kösö köt mi mewöyök mendenđa tenöhök mohot mi Anutugö buŋa qemakze. Naluk mi törörök alakzemö, Köna keugö kötŋi bohonŋi ki mönö oŋgita mosörakze: Gi ambazip sutŋine ahakmeme diŋdiŋi wuatangöba ak kömum aŋguba keu pöndaŋ wuatangöba malman. Keu bohonŋi mi mönö kapaŋ köla wuatangöba malme aka keu morömorö mi mewöyök kude oŋgita mosötme.

24 Jeŋinan gömöliiga ambazip böröŋine memba eŋguaŋgirakzei, inini söp obuk nembepuköra oŋini saiyanöŋ kewörakzemö, sömbup ketanŋi kamel mi laŋ gwahörakze.

25 O Köna keugö böhi aka miangö kapaŋkölköl ambazip! Inini urumelenğö silesile ambazip aketka lömböt qakŋine öngözawaŋgöra mönö wölköba Yei! jizal. Inini amöt qem aŋgubingöra qambi aka al nenegö silenŋi saŋgoŋ yakömakzemö, dogo jimamoŋini qahö galöm köla yuai laŋ göröngöba memba-gun megetka nepaqepalok mianön uruŋini kokolak qei malje.

26 “O jegömöl azi Köna keugöra kapaŋ kölakzani, gi mönö mutuk qambigö uruŋi saŋgoŋnöŋga silenŋan mewöyök sarakŋi akŋa.

27 *O Köna keugö böhi aka miangö kapaŋkölköl ambazip! Inini urumelenğö silesile ambazip aketka lömböt qakŋine öngöza-waŋgöra mönö wölköba Yei! jizal. Inini qaksirigö maripomŋi saŋgoŋgetka tuatŋi akeak, mönö miangö dop akze. Silenŋinan eksihimŋinambuk tandök akzemö, qaksirigö uruŋe qamöt sihit aka yuai imbilonŋambuk mianön kokolak qei ahöza.

28 “Miangö dop eŋön mewöyök ambazip jeŋine ölŋa diŋdiŋi tandök asuhumakzemö, urumelenğö silesile tandök aka qewölonöŋ mönö uruŋini kokolak qei malje.”

Bölöŋi memenangö likepŋi

Luk 11.47-51

29 “O Köna keugö böhi aka miangö kapaŋkölköl ambazip! Inini urumelenğö silesile ambazip aketka lömböt qakŋine öngöza-waŋgöra mönö wölköba Yei! jizal. Inini kezapqetok ambazip yeŋgö qaksirinöŋ simen kolum memakze aka ambazip solanŋi yeŋgö köt köteŋini meŋölömakze.

30 Mewö aka kewö jimakze, ‘Neŋön ambösakonini yeŋgö nalönöŋ malbinak ewö, mönö yembuk qahö toroqeinga kezapqetok ambazip yeŋgö sepŋinan mönö neŋgö qakŋine qahö öngöbawak.’

31 “Mewö jiba mianön nanŋinak kezapqetok ambazip eŋgugeri, yeŋgö isiu-rupŋina akzei, mönö keu mi nanğöba jiba dangunu ewö kinje.

* 23:22: Ais 66.1; Mat 5.34 * 23:23: Lew 27.30 * 23:27: Apo 23.3

³² Mianğöra ambösakonņinan singisöndok könahiba akeri, mianğö dop injini mönö toroqeba körek ak teköme.

³³ *“O soramen, injini mönö qatö moröñi ewö akze. Anutunöñ keuñini jim teköi könöp sianöñ gebepuköra mönö denöwö unjuratpeak? Mi mönö osime.

³⁴ Mianğöra mötket, nöñön kezapqetok aka mötkutukutu ambazip aka Kōna keugö böhi melaim enğibi enğöreñ kame. Kagetka yengöreñök tosatñi i enğugət kömume aka tosatñi maripom qakñe al enğime. Tosatñi köuluk miriñine örörahöm enğiba keuñini jim teköba ihileknöñ taukōm enğiba közöl enğigetka taonñi taonñi mianğöreñ anakñe.

³⁵ *“Azi solanñi Abelğö sepñan eriga mianğöreñök könahiba enğuba kota mala Zekaraia jöwöwöl jike kömbukñi aka jöwöwöl alta mietkö sutñire qeget sepñi eri mianğöreñ teköyök. Ambazip solanñi yengö sepñini gölmenöñ mokomalgeri, sep pakpak mianğö kitipñan mönö enğö qakñine öngöma.

³⁶ Nöñön keu öñi kun kewö jibi mötme: Sepñinanğö kitipñi pakpak mi mönö ambazip merak maljei, enğö qakñine öngöi Anutunöñ likepñi melen enğii mötme.”

Jisösnöñ Jerusalem könagesö jöpakōm enğiyök.

Luk 13.34-35

³⁷ Jisösnöñ jiyök, “O Jerusalem Jerusalem, injini kezapqetok ambazip enğugət kömugetka Anutunöñ ambazip melaim enğii enğöreñ kamakzei, mi kötnöñ kumbukōm enğimakze. Poi namñan moröurupñi ginginñi bapñe ala köjöhohom enğimakzawi, nöñön mönö mianğö dop nalöñi nalöñi göhö könagesöurupki kötala tokom enğimangö möta malalmö, injini mi tököba mala kotket.

³⁸ *Mötket, Anutunöñ mönö jike miriñini andö qeiga sahopñanök ahöma.

³⁹ *“Mewö ahömapmö, nöñön kewö jibi mötket, injini ni kunbuk qahö nekñe. Könangep nalö kun kam kuñgui mianğöreñ neka kewö jime, ‘Kembugö qetne kam nenğizawi, Anutunöñ mönö i kötuetkōm wanğima.’ Mewö.”

24

Jöwöwöl jikenöñ köndenmōnden asuhuma.

Mak 13.1-2; Luk 21.5-6

¹ Jisösnöñ jöwöwöl jike mosöta eriga gwarekurupñan yangöreñ kaba jöwöwöl jikegö tohoñ uruñe miri tatkeri, mi Jisös kondel wanğiget.

² Kondel wanğigetka melenđa kewö jii mötket, “Miri pakpak mi ölop enğekzemö, nöñön keu öñi kewö jibi mötket: Mi mönö köndengetka mirigö köt kun mi köt kungö qakñe qahö ahömapmö, qeqelanñan aka sahopñanök ahöma.” Mewö.

Kahasililiñ aka sesewerowero asuhuma.

Mak 13.3-13; Luk 21.7-19

³ Jisösnöñ Oil ip kundunje anda tariga gwarekurupñan nanñinöhök yangöreñ kaba kewö qesim wanğiget, “Böhi, keu jizani, mianğö öñi mönö wanat nalönöñ asuhum tiñgitma aka göñön kanöñga gölmegö nalöñan tekōmamgö akñawi, mianğö aiwesökñan mönö denöwö asuhum? Mia ölop jinöñ mörin!”

⁴ Mewö qesim wanğigetka melenđa kewö jiyök: “Kunñan isimkakalek aiga janjun anbepuköra mönö galömnini memba malme.

⁵ ‘Ambazip gwötpukñan asuhuba nöñgö qetne kewö jime, ‘Nöñön Amötqeqe Toñi Kraist akzal’. Mewö jiba ambazip gwötpuk tilipkōm enğime.

⁶ Injini yarö miengö buzupñini aka ötonñini asuhugetka mörakñe. Mi möta jönömnini undubapuköra mönö galömnini meme. Yuai mewöñi mi mutuhök

* **23:33:** Mat 3.7; 12.34; Luk 3.7 * **23:35:** Jen 4.8; 2 Hist 24.20-21 * **23:38:** Jer 22.5 * **23:39:** Sum 118.26

asuhumapkö jijina. Mi asuhumapmö, gölmegö nalöjan mönö miangörenök zilaŋ qahö teköma.

7 “Kantri kunŋan kantri kun engubingöra wahötme. Ambazip kambu kunŋan kambu kun yembuk aröŋ angubingöra wahötme. Gölmeŋi gölmeŋi miangören bödiŋi bödiŋi (buöröŋi buöröŋi) asuhume aka kenöŋ ketani ketani mi qözöla memba gölme meleni gemakŋa.

8 Yuai pakpak mi ambi köröbuknöŋ masi könahiba engumakzawaŋgö dop. Gölmegö nalöjan mönö miangö dop könahiba tekömangö akŋa.

9 **“Mewö akŋapmö, nalö miangören tosatŋan iŋini uruŋini melengeraŋgöra aka gawman yeŋgö böröŋine al engigetka sihimbölö ak engiba enguget kömume. Kantri pakpak yeŋön nöŋgöra aka kazik ak engimakŋe.*

10 Nalö miangören gwötpukŋan mötnariŋini mosöta angönaŋ memba kazik ak angume.

11 Kezapqetok ambazip takapulakani gwötpukŋan asuhuba ambazip gwötpuk kilik-kaluk ak engigetka janjuŋ anakŋe.

12 “Iwilele Toŋan sehiba ambazip galöm köl engimawaŋgöra aka urumelen ambazip sehisehiŋi yeŋgö uruŋinan amöriiga urukalemŋinan söörauma.

13 **Kunŋan kapaŋ köla köhöiba böŋ qeba kinda maliga gölmegö nalöjan tekömawi, yaŋön mönö oyaenköyaen buŋa qem anguma.*

14 Anutugö bemtohoŋgö Ölöwak Buŋa ki mönö mutuk gölmegö kantriŋi kantriŋi pakpak miangören jim sehigetka könagesö dop nanönaŋgö keuŋi mötketkun gölmegö nalöjan miangö andöŋe teköma.” Mewö

Jerusalem sitigö köndenmönden uru-önönŋambuk

Mak 13.14-23; Luk 21.20-24

15 **“Kezapqetok azi Danielnöŋ köndenmönden uru-önön-ŋambukö keuŋi jii ahöza. Keu miangö dop tosatŋan kaba köndenmönden aka yuai angöjörakŋambuk mi jöwöwöl jike töröŋe alget kiniga ekŋei, - keu ki oyoŋmawaŋön mönö ölöp kezap ala möt kutuma-*

16 *nalö miangören Judia prowinsnöŋ malmei, eŋön mönö misiŋgöba öröba kunduje anme.*

17 **Miri kösutŋe sombemnöŋ malmawaŋön mönö eta gösö yuaiŋi memangöra miri uruŋe kude öŋgöma.*

18 *Nupnöŋ anda malmawaŋön mönö mewöyök malukuŋi memangöra lilingöba mirinöŋ kude anma.*

19 *“Yei! Ambi gölömbuk aka morö juzunöŋ yeŋön nalö miangören denöwö ösumŋinan anbeak?*

20 *Miangöra yuai mi kie uru me Sabat kendongö nalöŋe kude asuhumapköra köuluköme.*

21 **“Mi kewögöra: Nalö miangören kahasililiŋ keta bölöŋi asuhuma. Kahasililiŋ dopŋi mewöŋi mi mönöwök nalö kungen kude asuhuba ahöyök. Anutunöŋ yuai pakpak miwikŋaiyöhi, nalö miangörenök könahiba nalö kiangören mala kota nalö sutŋe kun kude asuhuyök. Mönöwök qahö asuhuyök aka könaŋgep nalö kunöŋ kunbuk qahö ahuma. Miangöra mönö köuluköba malme.*

22 *Kembunöŋ wahöjalin nalö mi qahö mem töribawak ewö, ambazip körekŋan mönö ayuhum teköbeakmö, ambazip nanŋaŋgöra möwölöhöm engiyöhi, yeŋgöra aka wehön miengö qötöŋini mem törima.*

* 24:9: Mat 10.22 * 24:13: Mat 10.22 * 24:15: Dan 9.27; 11.31; 12.11 * 24:17: Luk 17.31

* 24:21: Dan 12.1; Ind 7.14

23 “Nalö mianğoreŋ kewö jime, ‘Mötket! Kraistnöŋ ki malja,’ me ‘Eket! Amötqeŋe Tonjan endu kinja.’ Kunŋan mewö jima ewö, mi mönö kude möt narime.

24 Mi kewögöra: Amötqeŋe toni munenŋi aka kezapqetok ambazip takapulakanŋi asuhiba aŋğöletot aka aiwesök ketanŋi ketanŋi megetka letotme. Mewö letotketka Anutunöŋ ambazip nanŋanğöra möwölöhöm enğiyöhi, i mewöyök enğololoŋ mem enğimegö esapköba kapanŋi kölgetka janjuŋ akepuk. Enğon ölopŋanök galömnŋini memba malgetka mi osibeak.

25 Mötket! Nönğon yuai pakpak mi qahö asuhuiga qeljine lök jibi mötze.”

Suep gölmegö azi ölnan mönö asuhum tinğitma.

Mak 13.24-27; Luk 21.25-28

26 * “Mianğöra ‘Amötqeŋe Tonjan mönö gölme apopamkölkölŋe malja,’ mewö jiget mötme ewö, mianğoreŋ mönö kude anme. Me ‘Mötket! Kraistnöŋ mönö miri mianğö uruŋe asuhiba tatzawi,’ mewö jiget möta mi kude möt narime.

27 Mi kewögöra: Suep gölmegö azi ölnan kunbuk kamawi, nalö mi mönö wölbilikö dop kewö akŋa: Mi wehön kotkotŋeyök zilaŋ biliksik ala likepŋe wehön gegeŋe dop köla asariba ani ekzini, yanğon mönö mianğö dop asuhuma.

28 * “Sömbup gisakŋan kungen ahöiga, manu köraraknöŋ mianğoreŋ öröba tokomakzei, mianğö dop asuhuma.” Mewö

Suep gölmegö azi ölnan asuhuma.

Mak 13.24-27; Luk 21.25-28

29 * “Wahöjalŋi nalö mianğon teköiga mianğoreŋök wehön jeŋan injaŋ köliga köiŋnöŋ ömuŋ kölma. Senğelau yeŋon suepnöhök teköba etme aka suepnöŋ uturuköiga mianğö öröyuaiŋi mi tatatŋini mosöta enğololoŋ aketka sohoma.

30 * Nalö mianğoreŋ Suep gölme azi ölnanğö aiwesökŋan suepnöŋ asuhuiga ekŋe. Nalö mianğoreŋ gölmegö könagesö pakpak yeŋon jŋeŋ köla sahötme. Sahöta Suep gölmegö azi ölni yanğon suepkö kousu qakŋe kaŋgori ekŋe. Kukösumŋi ketanŋan saköl-diŋdiŋambuk aukŋe asuhuiga asakmararaŋi ekŋe.

31 Kaŋgori eketka tömunŋi qainŋi kun ugetka ötoŋi köhöikŋi mötketka Suep garataurupŋi melaim enğiiga yeŋon ambazip Anutunöŋ nanŋanğöra möwölöhöm enğiyöhi, i gölme goraŋi likeplikep euke emuke mianğoreŋök kölolohoba enğuaŋitme.” Mewö

Geröp ipkö dopkeu

Mak 13.28-31; Luk 21.29-33

32 “Inŋini geröp ip eka tandökŋi mötmöriba dopkeu ki mötme. Böröŋan lök oŋambuk aiga sinŋini yoŋgoigetka mi eka möta kewö jimakze, ‘Wehön nalöŋan mönö dopdowiza.’

33 Enğon mewöŋanök aiwesök mianğö dop asuhuiga eka möt asariba könaŋi kewö jime, ‘Jisösnöŋ mönö nanğunöŋ dopdowiza.’

34 “Nönğon keu ölni kun kewö jibi mötket: Ambazip ki merak gölmenöŋ maljei, yeŋon qahö kömugetka yuai pakpak jizali, mi mönö yeŋö malmal nalöŋine asuhuma.

35 Suep gölmenöŋ ayapkömahotmö, nönğö Buŋa keunan mönö nalö kunöŋ qahö ayapköma.” Mewö.

Jisös kamawaŋğö nalöŋi mi kunŋan qahö mötza.

Mak 13.32-37; Luk 17.26-30, 34-36

* 24:26: Luk 17.23-24 * 24:28: Luk 17.37 * 24:29: Ais 13.10; 34.4; Eze 32.7; Joel 2.10, 31; 3.15; Ind 6.12-13 * 24:30: Dan 7.13; Zek 12.10-14; Ind 1.7

36 “Suep gölmegö azi ölñan kamapmō, dawinōñ kam kuñgumawi, miangō wehōññi me aua nalōñi mi kunñan kun kude mōtza. Suep garatanōñ mi qahō mōtze. Anutugō Nahōññan mewōyōk mi qahō mōtza. Iwinōñ nanñōk mi mōtza.

37 *Mōnōwōk Noagō nalōñe ambazipnōñ malmalñini qemasolokep qakñe mala ayuhugeri, miangō dop mōnō Suep gölmegö azi ölñan kunbuk kamawanğō nalōñe asuhuma.

38 “O göulu ketañan qahō kaiga qeljiñe miangōreñ ambazip nene lömbuan ala o köhöikñi nemba ambi kenam bohōññangō alget anda kaiga aᅅgōmeget. Ahakmeme mewō aka memba qemasolokep malgetka Noanōñ wañge uruñe öñgōyōhi, silim miangōreñ tekōyōk.

39 *Tekōiga wanat yuai asuhumawi, mi qahō mōtketka o göulu ketañan kaba jinonñi qahō ayuhum eñgiyōk. Köñañgep Suep gölmegö azi ölñan kunbuk kamawi, nalō miangōreñ ambazipnōñ mewōñanōk qemasolokep aka mala ayuhume.

40 Nalō miangōreñ azi yahōt nupnōñ malohotka yetköreñōk kun wañgita kun mosōtme.

41 Mewōñanōk ambi yahōt taweñ urasiba (bunahōba) tatmahori, yetköreñōk kun wañgita kun mosōtme.

42 “Kembunōñ kamawanğō nalōñi me auañi qahō mōtzeañgōra mōnō uruguliguli aka malme.

43 *Gwölō malbingō keu ki mōnō mōt kutume: Sunğem aiga kegwek-kahasiliñ azinōñ wani nalōñe me auanōñ kamawi, miri toñan mi mōtpawak ewō, yañōn mōnō gwölō mala miriñi ölöpñanōk galōm meiga qesinđa öñgōmamgō osima.

44 Inini ‘Suep gölmegö azi ölñan nalō kianğoreñ qahō kañgotma,’ jiba mōtmōrigetka yañōn mōnō nalō miangōreñōk kañgotma.” Mewō.

Nup azinōñ silekmalek mala ayuhuyōk.

Luk 12.41-48

45 “Mewō aiga nup meme ambazip sutñine dañōn tiñ kutuba tosatñi eñgōñgitza? Tosatñan sōrōrauba nup mosōtketka kunñan mōtkutukutu ölöpñangō qakñe kapan köla pōndañ memakzawi, yañōn mōnō simbawōñ akza. Miri toñan ahakmemeñi kewōta eka kungen anda miriñangō öryuaini mi börōñe ali galōm akña. Galōm aka welenqeçeurupñi jiyōhanğō dop köyan köla nalō diñdiñe gumohom eñgimakña.

46 Mewō köyan köl eñgiba maliga toñan liliñgōba kaba mewō eka mōnō simbawōñ jima.

47 “Nōñōn keu öñi kun kewō jibi mōtket: Toñan simbawōñ jiba sukinapñi pakpakō galōmñi kuñgum wañgima.

48 Kuñgum wañgimapmō, nup meme okonñi yañōn uruñan mōtmōriba kewō jima ewō, ‘Kembunangō kaka nalōñan mōnō körōpñi ahōza.’

49 Mewō jiba köñahiba nup meme ambazipurupñi eñgum ureiba közölömbuan ala sōñgaiba o köhöikñi nemba uruñi sohoiga eñololōñ silekmalek aka malma.

50 “Mewō mala nalō kunōñ kembuñi kañgotmapkōra qahō mambōtmawi, mōnō miangōreñ kañgotma. Nalōgōra ikmaok inululuñ mali mōnō aua miangōreñ kañgota

51 qeba yaijapaleleñ mem wañgiba jim kutuiga urumelenğō silesile ambazip ewō könōp sianōñ geba sihimbölō mōtma. Mewō mōta sahōt gigilahōba irimñini yōhözōmğōgetka qetñi qeri malme.” Mewō.

* 24:37: Jen 6.5-8 * 24:39: Jen 7.6-24 * 24:43: Luk 12.39-40

25

Ambi seram tengö söpsöp keu

1 *Jisösnöñ jiyök, “Kunbuk kamami, nalö mianğoreñ Suepkö bemtohoñan kewö akña: Maren lömbuañ nalöñe ambi seram jömukñi tenñan ‘Azi buñabuk aitoñgöbin,’ jiba kiwañini memba könanöñ anget.

2 Yengöreñök 5 mi mötkutukutuñinambuk aketmö, tosatñi 5 yengö mötkutukutuñini mi piromñi.

3 Mötkutukutuñini piromñi yeñön kiwañini megetmö, könöp (kuwiñ) kelökñi * qahö memba anget.

4 Mötkutukutuñinambuk yeñön kiwañini aka kuwiñ kelök kirinñini mewöyök memba anget.

5 Angetka azi buñanöñ zilañ qahö kaiga mambötketka nalö köriyöhañgöra körek yengö jeñini böñböñ meiga nöropñini eri sipköba gaun ahöget.

6 “Gaun ahögetmö, sunğem bibiñe kunöñ tömun qeri qet kewö mötket, ‘Mötket, azi buña kazawo! Mönö yañgöreñ anda aitoñgöme.’

7 Qet mi möta ambi seram ten mi körekñan wahöta kiwañini memba möhamgöba ohotiriget.

8 Ohotirigetka mötkutu-kutuñini piromñi yeñön mötmöt ambi yengöreñ kaba kewö jiget, ‘Neñgö kiwaninan böközawañgöra eñön mönö kuwiñ kelökñi tosatñi neñgime.’

9 “Mewö jigetka mötkutukutuñinambuk yeñön melenđa kewö jiget, ‘Qahö. Mi inñini aka nini dopnine qahö. Mianğöra mönö stuanöñ anda nanñini kuwiñ kelökñini söngöröñi meme.’

10 “Mewö jigetmö, kuwiñ kelökñi bohonñi membingöra anda könanöñ malgetka azi buñanöñ mönö mianğöreñök kañgorök. Ambi seram jöjöröba kingeri, yeñön anda yambuk aitoñgöba maren lömbuañ miri uruñe öñgögetka nanğunñi kölget.

11 *Ambi seram stuanöñ angeri, yeñön mewöyök könañgep kañgota nanğun qeba kewö qetket, ‘Kembu Kembu, mönö nanğun metal neñginöñ!’

12 “Mewö qetketmö, kewö melenđa jiyök, ‘Qahö. Ni inñini qahö möt eñgizal. Keu ölña mi jizal.’ ”

13 Jisösnöñ söpsöp keu mewö jiba gwarekurupñi yengöra keu kewö jii mötket, “Inñini ni kamamañgö nalöñi me auañi kude mötzeañgöra mönö uruguliguli aka malme.” Mewö.

*Moneñ esu galöm kölgerañgö söpsöpkeu.**Luk 19.11-27*

14 * “Mönö dopkeu kianğö dop asuhuma: Azi kun miriñi mosöta köröwen kantri kunñan anmamgö möta welenqeçeurupñi eñgoholi kagetka moneñ sukinapñi galöm kölmeğöra jim kutum eñgiba böröñine alök.

15 Nup memeniñi kewöta ölñi dawik asuhumawañgö dop möta nup meme azi kungöra moneñ esu 5 (Kina 5000,-) wañgiba kun moneñ esu yahöt (Kina 2000,-) wañgiba kun mohok-kun (Kina 1000,-) wañgiyök. Mewö galöm kölmeğöra menden eñgiba eñgömosöta anök.

16 “Azi Kina 5000,- meyöhañön mianğöreñök anda kölköl-örörö nup meiga moneñ sehiiga esu 5 kunbuk meyök.

17 Mewöñanök Kina 2000,- meyöhañön anda kölköl örörö nup meiga moneñ sehiiga esu yahöt kunbuk meyök.

* 25:1: Luk 12.35 * 25:3: Könöp (kuwiñ, qiwiñ) kelökñi mi Oil ipkö kötni mözözamgögetka kelökñi mi asuhuyök. Miri söñauiga ip sunğe opo köpeiba kelök mianğöreñ kundumgöba kiwa ohotiriba könanöñ angetka 15 minitkö dop jeyök. * 25:11: Luk 13.25 * 25:14: Luk 19.11-27

18 “Mewö meyohotmö, azi monej esu mohok-kun (Kina 1000,-) meyohañon mönö mosöta anda gölme esiba azi kembuñangö moneji löm köla asambörök.

19 Nalö köröpñi teköiga welenqege yeñgö azi kembuñinan lilingöba kaba ‘Nup megerañgö kösohotñini möta kewötмам,’ jiba köl öröm enjiiga kaget.

20 “Mewö kagetka azi Kina 5000,- meyohañon jeñe kañgota esu 5 kunbuk toroqeba memba kaba kewö jiyök, ‘Ketañamni mötnöñ, göñön monej esu 5 niñginöñi, nöñön miangö kölköl öröröñi membi sehiiga esu 5 kunbuk asuhuiga memba kazal.’

21 “Mewö jiiga azi kembuñan kewö melenj wañgiyök, ‘Mi ölop. Gi nup meme azi ölopñi memburik-qemburiki qahö. Gi yuai awamñi memba mi kapañkapañ aka galöm köla malnöñga sehiyök. Miangöra nöñön yuai gwötpuk göhö böröge albi miangö galömña malman. Ölop kaba azi kembugi nöñgö miri uruñe kañgota mohotñe sösoñgai aka malbin.’

22 Azi Kina 2000,- meyohañon mewöñanök kañgota kewö jiyök, ‘Ketañamni mötnöñ, göñön monej esu yahöt niñginöñi, nöñön miangö kölköl-öröröñi membi sehiiga esu yahöt kunbuk asuhuiga memba kazal.’

23 “Mewö jiiga azi kembuñan kewö melenj wañgiyök, ‘Mi ölop. Gi nup meme azi ölopñi memburik-qemburiki qahö. Gi yuai awamdökñi memba mi kapañkapañ aka galöm köla malnöñga sehiyök. Miangöra nöñön yuai gwötpuk göhö böröge albi miangö galömña malman. Ölop kaba azi kembugi nöñgö miri uruñe kañgota mohotñe sösoñgai aka malbin.’

24 “Miangö andöñe azi monej esu mohok-kun (Kina 1000,-) meyohañon kañgota kewö jiyök, ‘Ketañamni mötnöñ, nöñön könañamgi kewö möt yaköyal: Azi kembunan mönö azi köhöikñi könöpñambuk akza. Nangak nene kötni qahö qesij gilnöñga miangören mönö töndup ölni sounöñ yandiba memangö mörakzan. Padi kötni qahö esinöñ geiga miangören mönö töndup ölni qezakömangö mörakzan.

25 “Mewö möt yaköba keñgötñi möta anda göhö monej esugi mi gölmenöñ asambötpiga ahöyök. Eknöñ, monej esu niñginöñi, miyöhök mönö törörök ki.’

26 Mewö jiba mi wañgiyökmö, azi kembuñan melenja kewö jim wañgiyök, ‘Gi injarere aka welenqege bölöñi akzan! Gi könañamni möt yakönöñ: Nanak nene kötni qahö qesij gilbiga miangören mönö töndup ölni sounöñ yandiba memangö mörakzal. Nanak padi kötni qahö esibi geiga miangören töndup ölni qezakömangö mörakzal. Nöñgö tandökni mewö möt yaköbagun mönö wuanöñgöra ak sohoba malnöñ?

27 “Gi nöñgö moneñni benknöñ alnöñga dop kölbawak. Benknöñ alnöñga qariiga lilingöba kayali, nalö kiangören mi ölop suñambuk membilenjak.’

28 Toroqeba tosatñi yeñgöra jiyök, ‘Inini mönö qölzöm injarere azi miangö monej esuñi mi wañgita kun esu 10 miwikñaiyöhi, mönö i wañgime.’

29 * “Dopkeu kiangö könañi kewö: Denike yeñgören yuai ahözawi, körek yeñgöra mönö toroqeba enjiget sehiiga kelenmalelen ahöm enjima. Mewö sehimapmö, kungören yuai kun qahö ahözawi, yangören yuai mi mönö mewöyök wañgitketka öne töhöntöhön malma.

30 * Ayop, welenqege azi omañi nupñangö ölni qahö i mönö yaigepñe gilgetka söñaupnöñ gema. Miangören geba sahöt gigilahöba göboñini yöhözömgögetka qetñi qeri malme.” Mewö.

Jimtekötekögö nalö ketañe kewö asuhuma:

* 25:29: Mat 13.12; Mak 4.25; Luk 8.18 * 25:30: Mat 8.12; 22.13; Luk 13.28

31 *³¹“Suep gölmegö azi ölnan kinda Suep garata pakpak enguangita mohotje kamei, nalö mianğoreñ Suepkö asakmararanan asuhuiga yanğon Kiñ Kembugö jakömbuak dumnöñ tatma.

³² Tata jiiga gölmegö ambazip kambu pakpak qezaköm engigetka yanğö jeñe asuhume. Asuhugetka lama galömnan lamaurupni meme (nonin) yengöreñök menden engizawi, mianğö dop i mendegenden ak engima.

³³ Mi ak engiba jiiga lama mi böröñi ölnje aka meme (nonin) mi qaniñe al engime.

³⁴ “Mewö al engigetka Kiñ Kembunöñ böröñi ölnje kinmei, yengöra kewö jima, ‘Nöñgö Iwinan kötuatköm engii malgeri, inini mönö kaget. Iwi Anutuninan gölme pakpak miwikñaim engiyöhi, nalö mianğoreñök lök engöra bemtohon mözözömgöba mei jöjöröba ahöba kotzawi, inini mönö kaba mi bunja qem anğuba malme.

³⁵ ‘Mi kewögöra jizal: Nöñön yakananğö kömumba malbiga inini nene ningiba malget. Nöñön ogöra qemjen qeba malbiga inini o ningiba malget. Nöñön kian aka malbiga inini köl öröm ningigetka mirinje öngöba malal.

³⁶ Nöñön sile esunanğöra osiba malbiga inini opo kereñ ningiba malget. Nöñön kawöl nöhöi ahöbiga inini galöm köl ningiba malget. Nöñön kösö mire malbiga inini ni nekingöra mianğoreñ kaba malget.’

³⁷ “Mewö jiiga ambazip solanñi yengon kewö melen wanğiba jime, ‘Kembu, gi mönö wani nalönöñ yakagahö kömunöñ geke gumohom gihiba malin? Mönö wani nalönöñ ogöra qemjen qeba malnönğa geke o gihiba malin?’

³⁸ Mönö wani nalönöñ kiana kanönğa geke köl öröm ghiinga mirinine öngönönğa malin? Mönö wani nalönöñ sile esugahöra osiba malnönğa geke opo kereñ gihiba malin?’

³⁹ ‘Mönö wani nalönöñ kawöl göhöi ahönönğa geke me kösö mire malnönğa möta gi gekingöra göhöreñ kaba malin?’

⁴⁰ Mewö jigetka Kiñ Kembunöñ melenđa kewö jii mötme, ‘Nöñön keu ölni kun kewö jibi mötme: Inini nani urumelen alaurupni etqeqeni kiengöreñök kungöra yuai kun akeri, mi pakpak mönö ni ak ningiba malget.’

⁴¹ “Mewö jiba mianğö andönje böröñi qaniñe kinmei, yengöreñ melenđa kewö jima, ‘Iwinan qesuahöm engii malgeri, inini mönö nömosöta kesalget. Könöp sia teteköñi qahö jem öngömawi, mönö mianğoreñ anda geme. Anutunöñ mi Bölönanğö Tonji aka yanğö garataurupni yengöra mözözömgöba meköiga jöjöröba ahöza.

⁴² Mi kewögöra jizal: Nöñön yakananğö kömumba malbiga inini nene qahö ningiba malget. Nöñön ogöra qemjen qeba malbiga inini o qahö ningiba malget.

⁴³ ‘Nöñön kian aka kabiga inini qahö köl öröm ningigetka mirinje qahö öngöba malal. Nöñön sile esunanğöra osiba malbiga inini opo kereñ qahö ningiba malget. Nöñön kawöl nöhöi ahöyal aka kösö mire malalmö, inini ni nekingöra mianğoreñ qahö kaba malget.’

⁴⁴ “Mewö jiiga yengon mewöyök melen wanğiba kewö jime, ‘Kembu, gi mönö wani nalönöñ yakagahö kömunöñ me ogöra qemjen qeba malnön me kiana malnön me sile esugahöra osiba malnön me kawöl göhöi ahönön me kösö mire malnönğa nini gi qahö welen qem gihiba malin?’

⁴⁵ “Mewö jigetka melenđa kewö jii mötme, ‘Nöñön keu ölni kewö jibi mötme: Inini urumelen alaurup etqeqeni kiengöreñök kungöra yuai kun qahö akeri, mi pakpak mönö ni qahö ak ningiba malget akza.’

* 25:31: Mat 16.27; 19.28

46 **“Mewö jii mötketka likepni melen engii qakɲine öngöiga aköm engii anda sihimbölö nalö teteköni qahö möta mal öngöme. Mewö mal öngömemö, solanji yeñön oyaenƙoyaen malmal mi nalö teteköni qahö mal öngöba malme.”* Mewö.

26

Jisös qein kömumapkö anğönañ alget.

Mak 14.1-2; Luk 22.1-2; Jon 11.45-53

1 Jisösnöñ keu pakpak mi jim teköba gwarekurupni kewö jii mötket,

2 **“Silim yahöt teköigun Pasowa kendonni kam kuŋguma. * Inini mi ölöp mötze. Kam kuŋguiga Suep gölmegö azi ölni mi kian gawman yeñgö böröñine algetka maripomnöñ qegetka kömuma.”*

3 Nalö mianğoreñ jike nup galöm aka kantrigö jitnememe yeñön tokoba jike nup galöm bohonni qetni Kaiafas yañgö jakömbuak miriñe tatket.

4 Mianğoreñ tata denöwö möndöñninga Jisös ölöñ memba qeget kömumbawak, mianğö könañi jaruba kewötket.

5 Jaruba kewöta kewö jiget, “Ambazip irimniñi seholiiga karimni karimni asuhubepuköra mi sösöñgai kendon nalöñe akingö osibin.” Mewö.

Ambi kunöñ Jisös o umköhöwakñambuknöñ miriyök.

Mak 14.3-9; Jon 12.1-8

6 Jisösnöñ Betani mirinöñ mala Saimon kun uzikukunji mem solaniyöhi, yañgö mire öngöba tarök.

7 **Mianğoreñ nene memba tariga ambi kunöñ köt-kirin kun memba yañgoreñ kayök. Kirin mi nöluk tuat-tuat qetni alabastö mianjön memena. Mia o umköhöwakñambuk mianjön kokolak qeçena. Yañön mi bohonni ketanjan memba kaba onji Jisösgö nöropne mimbiliba miriyök.*

8 Miriiga gwarekurupnan mi eka urubölö aka kewö jiget, “Mi mönö wuanöñgöra mewö ayuhuzawi?”

9 O kelökñambuk mi bohonni memegöra ali monen öngöñgöñan asuhuiga mi ambazip wanapni engiiga dop kölbawak.”

10 Jisösnöñ urumötmötñini mi ek kutuba kewö jii mötket, “Ambi kianğö urunji mi wuanöñgöra mem böliize? Yañön silik ölöpni ak soroköm niñgiiga dop kölja.

11 **Ambazip wanapni mi nalöñi nalöñi sutñine malmemö, nöñön engö sutñine nalö dop qahö malmam.*

12 *“Nöñön kömumbi löm köl niñgimeañgöra aka kelök mianjön sileni nömiriza.*

13 *Nöñön keu ölni kun kewö jibi mötket: Ölöwak Buña ki kantri igen waigen jim sehigetka anmawi, mianğoreñ ambi kianjön yuai ak niñgizawi, mianğö buñañi mohok jiget sehiiga yañgöra mötmöriba malme.”* Mewö.

Judasnöñ Jisös mamalolo mem wañgimamgö urumohot ahök.

Mak 14.10-11; Luk 22.3-6

14 Nalö mianğoreñ gwarekurupni 12 yeñgöreñök kun qetni Judas Iskariot yañön jike nup galöm yeñgöreñ anda

15 **kewö qesim engiyök, “Nöñön Jisös mamalolo mem wañgiba böröñine albige eñön töwa wania niñgibeak?”* Qesim engiiga silwö monen kötni 30 oyoñda böröñe alget.

* **25:46:** Dan 12.2 * **26:2:** Eks 12.1-27 * **26:2:** Pasowa mi nanine keunöñ Ak-kömukömu kendon. Keu mianğö könañi: neñgehoriiba neñgonğirök. Eksodus 12.15 * **26:7:** Luk 7.37-38 * **26:11:** Dut 15.11 * **26:15:** Zek 11.12

16 Aua mianğöreñök könahiba Jisös nalö kungen mamalolo mem wañgimangö köna möt jaruba köinbingöba malök. Mewö.

Jisösnöñ gwarek yembuk Pasowa lama neget.

Mak 14.12-21; Luk 22.7-13, 21-23; Jon 13.21-30

17 Beret yistñi qahö mianğö kendon silim mutukñe (Seqononöñ) gwarek yetköñ Jisösgöreñ kaba kewö qesim wañgiyohot, “Böhi! Nini miri denikeañgöreñ anda pasowa lama mözözömgöm gihiziga neman? Sihimgi denöwö ahöza?”

18 Qesim wañgiyohotka kewö melenñök, “Injiri Jerusalem sitinöñ öngöba azi kun mötzali, i miwikñaiba kewö jiyohotka mötma, ‘Böhinöñ jiza: Nöngö nalönan mönö † dopdowiza. Nöñön göhö mire kaba gwarekurupni yembuk Pasowa lama membin.’ ”

19 Gwarek yetköñ Jisösnöñ jim kutum etkiyöhi, mianğö dop aka Pasowa lama mözözömgöyohot.

20 Mare aiga miri söñauiga Jisösnöñ gwarekurupni 12 yembuk miri mianğöreñ kañgota öngöba dum kösutñe tata nene mendenja neget.

21 Nene negerañgöreñ Jisösnöñ kewö jii mötket, “Nöñön keu ölni kun kewö jibi mötket: Engöreñök kunñan mönö mamalolo mem niñgima.”

22 Mewö jii möta mianğöreñök uruñinan wösöbirik ketañi aiga könahiba nanñök nanñök qesim wañgiba jiget, “Kembu, mönö nöngöra jibanbuk?”

23 *Qesim wañgigetka kewö melenñök, “Nömbuk beret kuluñnöñ kundungözawi, mönö yañön.

24 Suep gölmegö azi ölnan mönö yañgöra keu ohoget ahözawañgö dop ölna gölme mosöta anmapmö, kunñan i mamalolo mem wañgimawi, yañgöra mönö Yei! jiba sahötzal. Mianğö likepni kanjamñambuknöñ mönö yañgö qakñe öngöma. Azi mi nam körö uruñeyök qahö asuhubawak, mianñön mönö amqem wañgibawak.” Mewö.

25 Mewö jiiga Judas mamalolo mem wañgimawañön kewö melenja jiyök, “Böhi, mi mönö nöngöra jibanbuk?” Jisösnöñ kewö jii mörök, “Jizani, mönö mewö!” Mewö.

Kembubuk semön qöndökñi neget.

Mak 14.22-26; Luk 22.14-20; 1 Kor 11.23-25

26 Nene nempa tata Jisösnöñ beret memba kötuatköba mindipköba engiba kewö jiyök, “Ki nani busuni. Ki memba neget.”

27 Mewö jiba wain qambi memba saiwap jiba engiba kewö jiyök, “Injini körek qambi kianğöreñök neget.

28 *Ki nani sepi. Mi Anutunöñ ambazip yembuk jöhöjöhö areñ aiga köhöimapköra sepi mokoget geiga ambazip gwötpuk yeñgö siñgisöndokñini mosötma.

29 Nöñön keu kun kewö jibi mötket: Nöñön wain kösögö ölni ki kianğöreñ kunbuk toroqeba qahö nemam. Könañgep Iwinangö bemtohon uruñe eu taringa közölömbuan almawi, wehön mianğöreñ mönö wain o qainni kun mia nemam.”

30 Mewö jiiga sösongai liñet köla mosöta anda Oil ip kundunje öngöget.

Pitönöñ Jisös qañ kölmapkö jii mörök.

Mak 14.27-31; Luk 22.31-34; Jon 13.36-38

31 *Öngöba Jisösnöñ kewö jii mötket, “Kezapqetok azi kunöñ keu kun kewö ohoi ahöza, ‘Nöñön galömnini qebiga lama kambuñan denme.’

† 26:18: Anutunöñ Jisös kömumawañgö nalöni alöhi, mianğöra jiza. Eks 24.8; Jer 31.31-34

* 26:23: Sum 41.9

* 26:28:

* 26:31: Zek 13.7

Miangö dop enön körek sun gem kiangören urunini nöngöra aka böliiga nömosöta buratime.

³² *Buratigetka nun gumemö, nöñön mönö kömupnöhök wahöta mutuk Galili prowinsnöñ anda miangören asuhum engimam.”

³³ Mewö jiiga Pitönön melenä kewö jii mörök, “Yeñön körek urunini göhöra aka böliiga gömosöta buratime ewö, nöñön mönö töndup nalö kunön qahö gömosötman.”

³⁴ Jiiga Jisösnön jii mörök, “Nöñön keu ölni kun kewö jibi mötnön: Kuruknöñ qahö qeriga göñön merak sun gem qañ köl niñginöñga indimni karöbut akña.”

³⁵ Mewö jiyökmö, Pitönön kewö jii mörök, “Böhi! Mewö qahöpmö, ni nun gugetka göbuk mohotne kömumbirak, mi töndup nöñön gi qahö qañ köl gihimam.” Gwarek tosantji pakpak mewöyök keu miyöhök jiget. Mewö.

Jisösnön Gezemane arönön köuluköyök.

Mak 14.32-42; Luk 22.39-46

³⁶ Mewö eraum möta anda yembuk arö kun qetnji Gezemane miangören angotket. Angota Jisösnön gwarekurupni kewö jii mötket, “Nöñön endu anda köuluköbiga inini ölop nalö sutne ki nanñinök tatme.”

³⁷ Mewö jiba Pitö aka Zebedigö nahönyahötñi yahöt etkuangita angetka Jisösnön könahiba wösöbirik möriga köñjiliñan köna böröñi qeköyök.

³⁸ Nalö miangören kewö jii mötket, “Nöñgö urunan mönö kondum köla kotzawangöra aka wösöbirik mötpiga kömukömuñi ak niñgiza. Inini ölop kiangören tata nömbuk guli malbin.”

³⁹ Mewö jiba nanñök borom kun toroqeba anda simin köla sipköba kewö köuluköba jiyök, “Iwini, gi yuai kun qahö mölölömbizan. Miangöra sihimgi ahöza ewö, sihimbölogö qambini kianön mönö nöñgö qakne öñgöbapuköra noangitman. Noangitman me qahö, mi mönö nangi jit keugahö dop asuhuma. Mi nöñgö sihimgö dop qahö.”

⁴⁰ Mewö jiba lilingöiga gwarekurupni karöbut yeñön gaun ahöget engeka Pitögö kewö jii mörök, “Inini aua mohot-töp nömbuk guli malbingö kude köhöize me?”

⁴¹ Uruninan guli malbingö sihimni mörakzinmö, sileninan lölöwöröñi akza. Miangöra esapesapnöñ et engubapuköra mönö köuluköba guliguli malme.”

⁴² Mewö jii möriga kunbuk engömosöta anda indimni yahöt aiga kewö köuluköba jiyök, “Iwini, sihimbölogö qambi kianön qahö noñgitma ewö, mi ölop nemam-mö, mi mönö nangi jitkahö dop asuhuma.”

⁴³ Köuluköba lilingöiga jenini böñböñ meyöhangöra kunbuk gaunök ahöget engehök.

⁴⁴ Kunbuk engömosöta likep anda keu miyöhök kunbuk jiba köuluköiga indimni karöbut ahök.

⁴⁵ Gwarek yeñgören lilingöba kaba kewö jii mötket, “Inini toroqeba luhut memba gaunök ahöbingö mötze me? Mötket! Kunön Suep gölmegö azi ölni mamalolo mem wanñiiga bölöñi meme yeñgö böröñine öñgöma. Miangö aua nalöñan lök kam kunñuza.

⁴⁶ Mönö wahötketka anin! Mamalolo mem niñgimawi, yanön mönö dowe ki kaza.” Mewö.

Jisös qeraköba memba jöhöget.

Mak 14.43-50; Luk 22.47-53; Jon 18.3-12

⁴⁷ Jisösnön mewö jiba kiniga miangören gwarekurupni 12 yeñgörenök kun qetnji Judas yanön kambu ketani kun jitne mem enñiiga kanñotket. Jike nup

* 26:32: Mat 28.16

galöm aka kantrigö jitnememe yeñön i melaim engigetka bimgö sou ketanji aka lingipñini memba kaget.

⁴⁸ Mamalolo memangö ahöhi, yañön mutuk yembuk aiwesök keu kewö jöhöba jii mötket, “Nöñön azi numbuñi yöhötüm nemami, yañön mönö mia akza. Mönö i memba jöhöme.”

⁴⁹ Mewö jiba kaba miangöreñök Jisösgöreñ angota “Böhi, böñjöh!” jiba numbuñi yöhötüm neyök.

⁵⁰ Yöhötüm neiga Jisösnöh kewö jii mörök, “Alani, gi wuanöngöra kazani, mi mönö zilañ akñan.” Mewö jiiga azi kambu yeñön Jisösgöreñ kangota qelanjiba memba jöhöget.

⁵¹ Jöhögetka Jisösbuk malgeri, yeñgöreñök kunñan böröñan bimgö sou ketanji öröba jike nup galöm bohonñangö welenqeçenji qeba kezapñi köteköi erök.

⁵² Jisösnöh mi eka kewö jii mörök, “Mönö mosötnöh! Bimgö sou ketanji körök memei, i mönö körek bimgö sou ketanjan engui kömume. Miangöra mönö sougi kupinñe qenöh geyök!

⁵³ Nöñön Iwini köuluköbiga ölop bauköm niñgimawi, mi mötzan me qahö? Köuluköm wañgibileñahi, yañön mönö miangöreñök garata yarö kambu † 12 ongita melaim enñi kaba bauköm niñgibeak.

⁵⁴ Bauköm niñgibeak ewö, Buña Kimbigö keuñan mönö denöwö ölnambuk akawak? Buña Kimbi keugö dop yuai kianñön mönö asuhumapkö dop jijinja akza.”

⁵⁵ *Nalö miangñöreñök Jisösnöh yarö kambu yeñgöra kewö jii mötket, “Ni kegwek-kahasililinj azia qahöpmö, töndup nöngöra mewö möta bimgö sou ketanji aka lingip memba nömemba jöhöbingöra kanğotze. Nöñön wehön dop jöwöwöl jikenöh embuk tata kinda Buña keu kusum enñiba malbiga qahö nömiget.

⁵⁶ Mewömö, yuai pakpak ki mönö kezapqetok ambazipnöh keu ohogeri, mienñön ölninambuk akñapköra asuhuza.” Jisös jöhögetka gwarek yeñön körek Jisös mosöta buratiba unjurata anget. Mewö.

Jikegö jitnememe yeñön Jisösgö keu nup meget.

Mak 14.53-65; Luk 22.54-55, 63-71; Jon 18.13-14, 19-24

⁵⁷ Yarö azi Jisös memba jöhögeri, yeñön i wañgita jike nup galöm bohonñi qetñi Kaiafas yañgö mire anget. Angetka Köna keugö böhi aka kantrigö jitnememe yeñön miangöreñ kaba tokoget.

⁵⁸ Angetka Pitönöh sikepsikep enñuatangöba miangöreñ angota jakömbuak mirigö kiripo uruñe öngöyök. Öngöba teteköñe denöwö asuhumawi, mi ekñangöra welenqeçe azi yeñgö sutñine tarök.

⁵⁹ Mewö tarökmö, jike nup galöm aka jike kaunsöl kambu yeñön Jisösgö silenöh alal keu denöwö möndöba nañgöinga qeget kömumapkö jim jaruget.

⁶⁰ Jaruba kinda gwötpukñan wahöta kinda keu muneñi Jisösgö silene ala nañgöba jigetmö, töndup könañi kun qahö miwikñaget. Qahö miwikñagetmö, teteköñe azi yahöt kanğota

⁶¹ *kewö jiyöhöt, “Azi kianñön kewö jiiga mörit, ‘Ni ölop Anutugö jöwöwöl jikenji köndenbiga gölmenöh eriga wehön karöbutkö uruñe mi kunbuk mem wahöta kuñgumam.’ ”

⁶² Mewö jiyohotka jike nup galöm bohonñan wahöta Jisös qesim wañgiba kewö jiyök, “Yeñön göhö silege keu ala nañgözei, miangö likepñi kun jiman me qahö?”

† **26:53:** Rom yeñgöreñ lijön me yarö kambu kun mi yarö azi 6000 miangö dop aka maljema. Miangöra yarö kambu 12 miengö jañgöñini mi Suep garata 72.000 miangö dop. * **26:55:** Luk 19.47; 21.37

* **26:61:** Jon 2.19

⁶³ Qesim wanğiiga Jisösnöñ yuai bölöñi kun qahö ahökmö, töndup keuñi bök kinök. Keuñi bök kiniga jike nup galöm bohonñan kewö jii mörök, “Nöñön Anutu malmal Toñangö qetñe kewö qesiba kuñgum gihizal: Gi Anutugö Nahönñi Kraist akzan me qahö, mi törörök jiba jöjöpañ keunöñ jim köhöinöñga mötpin.”

⁶⁴ *Mewö jiiga kewö jiyök, “Jizani, mönö mia. Miamö, nöñön körek engöra kewö jibi mötket: Nalö kewöñeyök könahiba Suep gölmegö azi ölñan mönö Kukösum Toñangö böröñi ölñe tata suepkö kousu qakñe eri ekñe.”

⁶⁵ *Keu mi jiiga jike nup galöm bohonñan malukuñi munjurata kewö jiyök, “Yei, iwinangö jitñi! Mönö Anutu mepaiköza. Tosatñan keuñi nangömegöra kunbuk qahö qesim engibin. Anutu mepaiközawi, mi dölki nanñinak möt teköze.”

⁶⁶ Miangöra denöwö mötmörize?” Mewö qesim enğiiga kewö jim teköget, “Yañön mönö kömupkö buñaya akña.”

⁶⁷ *Mewö jim teköba jeñe söutkölap söutköm miriba böröñinan misiba mesoholñe qekötahöget. Tosatñan nuñgulumñe qekötahöba

⁶⁸ kewö jiget, “Gi kezapqetok azi Kraist akzanangöra dañön guhuzawi, mönö yangö qetñi qetnöñ mörin.” Mewö.

Pitönöñ Jisös qañ kölok.

Mak 14.66-72; Luk 22.56-62; Jon 18.15-18, 25-27

⁶⁹ Mewö asuhiiga Pitönöñ yaigep kiripo uruñe sombemnöñ tarök. Tari welenqeçe ambi kunñan yangören kaba kewö jiyök, “Gi mewöyök Galili azi Jisösbuk mohotñe malnöñ.”

⁷⁰ Mewö jiyökmö, körek yeñgö jeñine qañ köla kewö jiyök, “Keu jizani, mi köndatzal.”

⁷¹ Mewö jiba kiripo nangune geiga welenqeçe ambi kunñan i eka azi kösutñe kingeri, mi kewö jii mötket, “Azi kianñön mönö mewöyök Nazaret azi Jisösbuk malök.”

⁷² Mewö jiiga kunbuk qañ köla jöjöpañ keunöñ jim köhöiba kewö jiyök, “Nöñön azi mi qahö möt wanğizal.”

⁷³ Nalö borom kun teköiga azi kösutñe kingeri, yeñön Pitögören kota kewö jiget mörök, “Alakña! Göñön mewöyök yeñgörenök kun akzan! Galili keu jöl jizani, mianñön mönö mewöyök mi kondeliga mötzin.”

⁷⁴ Mi möta könahiba nanñi qesuahöm anguba jöjöpañ keunöñ jim köhöiba jiyök, “Ni azi mi qahö möt wanğizal! Munen jibileñak ewö, Anutunöñ mönö likepñi melen niñgima.” Mewö jiiga miangörenök kuruk qerök.

⁷⁵ Kuruk qeri möta Jisösnöñ keu kewö jii möröhi, mi mötmöriyök, “Göñön mutuk indimñi karöbut qañ köl niñginöñga kuruknöñ qetma.” Keu mi mötmöriba wösöñi julmamgö aiga yaigep geba sahöt böliyök. Mewö.

27

Jisös wanğita Pailötkö böröñe alget.

Mak 15.1; Luk 23.1-2; Jon 18.28-32

¹ Miri gianğiiga amandine jike nup galöm pakpak aka kantrigö jitñe meme (70) yeñön tokoba Jisös qeget kömumapkö keuñi eraum mötket.

² Eraum mötket teköiga Jisös jöhöba wanğita Rom premiö Pailötkö böröñe alget. Mewö.

Judasnöñ imbi auyök.

Apo 1.18-19

* 26:64: Dan 7.13 * 26:65: Lew 24.16 * 26:67: Ais 50.6

3 *Jisös qeget kômumawangö keunji jim tekögetka Judas mamalolo wangiyöhanön mi möta möt bölim anguba silwö monej köt 30 wangigeri, mi memba jike nup galöm aka kantrigö jitnememe yengören anda melenja engiba kewö jiyök,

4 “Nöñön singisöndok aka azi köpösihitni qahö mi mamalolo mem wangibiga qeget kômuma.” Mewö jiyökmö, yeñon jiget, “Mi nengören yuaia qahö! Mi mönö nangi manjara!”

5 Mewö jiget möta silwö monej köt mi memba gil tipköiga jöwöwöl jike uruñe anök. Aniga nanji mosöta anda imbi auyök.

6 Jike nup galöm bohonji yeñon monej köt mi memba kewö jiget, “Monej ki mönö azi sepnangö bohonja. Miangöra mi jöwöwöl jikegö monej köwenöj albingö dopni qahö. Mewö aka Mosesgö Köna keu ongitpinbuk.”

7 Mewö jiba eraum möta monej mianön gwakömnöj kimbut meme azi kungören gölme köröñi kun bohonji megetka kian ambazip yengö qaksirinina ahök.

8 Miangöra aka gölme köröñi miangö qetni mi nalö kewöñe mewöyök toroqeba ‘Gölme köröñi sepnambuk,’ qerakze.

9 *Kezapqetok azi Jeremaianöj keu qeljine jiyöhi, mianön mönö ölnambuk ahök. Keu mi kewö, “Yeñon Israel könagesögö jitnemememini aka azi mi söngöröñi memegöra kewöta algetka silwö monej köt 30 ahöhi, mi meget. Mi azigö bohonja.

10 Yeñon mi memba mianön gwakömnöj kimbut meme azi kungören gölme köröñi kun bohonji meget. Mi mönö Kembunöj jim kutum ningiyöhangö dop mewö meget.” Mewö.

Pailötnöj Jisös qesim wangiyök.

Mak 15.2-5; Luk 23.3-5; Jon 18.33-38

11 Nalö miangören Jisösnöj Pailötkö jene kiniga kewö qesim wangiyök, “Ölna, gi Juda yengö kiña akzan me qahö?” Qesim wangiiga Jisösnöj melenja jii mörök, “Möno nangak jizani, mewö.”

12 Jike nup galöm aka kantrigö jitnememe (70) yeñon keu gwötpuk Jisösgö sileje ala jigetmö, töndup keu kitipni kun qahö melenök.

13 Keu bök kiniga Pailötnöj Jisös kunbuk qesim wangiba jiyök, “Mötnöj! Yeñon keu gwötpuk göhö silege ala nangöba jizei, mi mötzan me qahö?”

14 Mewö jiyökmö, Jisösnöj bölöñi kun qahö ahökmö, töndup keu miengö likepni kun qahö melenök. Keu bök kiniga premiönöj gwötpuk welipköyök. Mewö.

Pailötnöj Jisös kômumapkö jim teköyök.

Mak 15.6-15; Luk 23.13-25; Jon 18.39-19.16

15 Rom premiönöj yambu (yara) dop pasowa sösongai nalöñe kösö mireyök azi mohok sihimñinangö dop qetni qeta qesigeri, mi pösat engizapma.

16 Nalö miangören azi kun qetni Barabas qetkeri, yeñon kösö mire tarök. I bölönamñangöra miwidimgögetka malök.

17 Mewö aiga tokogetka kewö qesim engiyök, “Barabas me Jisös, qetni Kraist qerakzei, yetkörenök ninja pösat engibi etmapköra mötze?”

18 Galöm yeñon Jisösgöra körögisigisi mötkerangöra aka i premiögö böröñe al wangiget. Mi möta sihimñinangö mewö qesim engiyök.

19 Mi mörökmö, jimtekötekögö jakömbuak dum tatatje tariga anömñan buzup keu kun kewö ali kayök, “Ni merak sunjem gaun kun eka miangören

azi mianğöra aka sihimbölä gwötpuk mötzal. Mianğöra azi solanji mi mönö lömböt kude wanğiman.”

²⁰ Keu mewö kayökmö, jike nup galöm aka kantrigö jitnememe yeñön ambazip kambu uruesiesi mem enğiba kewö jiget, “Mönö Barabas pösata Jisös maripomnöñ qemegöra jiman. Mewö qesim wanğime.”

²¹ Mewö jigetka premiönöñ melenđa qesim enğiyök, “Azi yahöt mietkörenök mönö ninja pösat enğibi etmapköra mötze?” Mewö qesim enğiiga “Barabas!” jiget.

²² Mewö jigetka Pailötnöñ kewö qesim enğiyök, “Mewö jizeanğöra Jisös, qetñi Kraist qerakzei, nöñön i mönö denöwö ak wanğibileñak?” Mewö qesim enğiiga yeñön körek qetket, “Mönö maripomnöñ qeget jiman!”

²³ Mewö qetketka premiönöñ jiyök, “Mi wuanöñğöra? Yanön mönö wani bölöña ahök?” Mewö jiyökmö, yeñön mi möta kapan köla toroqeba qet gigilahöba kewö qetket, “Mönö maripomnöñ qeget jiman!”

²⁴ *Mewö qetketka kezap-ölök aketka göjupmajupnöñ kunbuk qariiga Pailötnöñ mi eka möta bim karim asuhubapüköra o memba böröñi ambazip kambu jeñine sanğonda kewö jiyök, “Azi kianğö sepñi mokoget gemawi, mianjön mönö nöñgö qakne qahöpmö, mönö nanñini qakñine öñgöma.”

²⁵ Mewö jiiga ambazip kambu körek pakpak yeñön kewö melenget, “Sepñanğö likepñan mönö nini aka nahönböratnini neñgö qaknine öñgöma!”

²⁶ Mewö melengetka Pailötnöñ Barabas pösat enği erökmö, Jisösyä jiiga ihilek wahiñambuknöñ qeyöyaköba qeget. Mewö qegetka maripomnöñ qemegöra Rom yarö azi yeñgö böröñine alök. Mewö.

Jisös kukulömbuan ak wanğiget.

Mak 15.16-20; Jon 19.2-3

²⁷ Böröñine aliga Rom premiögö yarö azi yeñön Jisös wanğita premiögö jakömbuak mirigö kiripo uruñe anğotket. Anğota yarö kambu lökñanök öröm enğigetka kaba tokoba Jisös liliköm wanğiget.

²⁸ Liliköm wanğiba nanñi sile esuñi köteköba maluku pisikñi gugakgugak kun löngöt wanğiget.

²⁹ Löngöt wanğiba sötman kösö limbinđa ila ewö nöropñe kölget geyök. Geiga jehot kun böröñi ölñe ala simin köl wanğiba göngönahit ak wanğiba kewö jiget, “Owe owe, Juda yeñgöreñ kiñ, owe!”

³⁰ Titipepe mewö aka söutkölap qeba jehot öröpñi wanğita mianjön nöropñe qeget.

³¹ Mepaqepaik mewö ak wanğim teköba maluku pisikñi gugakgugak mi qeköba nanñe sile esu kunbuk löngöt wanğiba maripomnöñ qebingöra wanğita anget. Mewö.

Jisös maripomnöñ qeget.

Mak 15.21-32; Luk 23.26-43; Jon 19.17-27

³² Anda köna namñe azi kun qetñi Saimon miwikñaget. Yanön Afrika siti qetñi Sairini mianğö azinã. Miwikñaiiba kunğum wanğigetka Jisösgö maripomñi memba anğuyök.

³³ Jisös mewö wanğita gölme kun qetñi Golgota mi nanine keunöñ Nöröpsihit, mianğöreñ anda anğotket.

³⁴ *Anğota wain o aka marasin qetñi mör mi mindiriba lolonqalon memba nemapköra wanğigetmö, Jisösnöñ mi esapköba memba möta tököyök.

³⁵ *Tököiga kinda maripomnöñ qeget. Qeget kiniga kiawen meget qötöñi ahuiga mianğö dop Jisösgö sile esuñi sutñine mendenđa meget.

* 27:24: Dut 21.6-9 * 27:34: Sum 69.21 * 27:35: Sum 22.18

36 Mi memba tata Jisös jegalöm ak wanğiget.

37 Nöröpñe eu qegeranğö könani kewö ohoba qeget, 'Juda yenğö kiñ kem-bunına ki.'

38 Kegwek-kahasililiñ azi yahöt mi yambuk maripomnöñ etkuget. Kun böröñi ölñe, kun qaniñe likeplikep mewö etkuget.

39* Ambazip onğita anda kaba kukulömbuanı aka jelikit aka nöröp köla kewö jiget,

40* "Yei! Gi mönö jöwöwöl jike ölöp köndenönğa gölmenön eriga wehön karöbutkö uruñe kunbuk mem wahöt kuñğumamğö jinön. O, gi azi qet-puk! Gi Anutugö Nahönña akzan ewö, mönö ölöp nangi bauköm anğuba maripomnöñök etman."

41 Jike nup galöm, Köna keugö böhi aka kantrigö jitlememe yenön mewöyök mepaqepaik ak wanğiba kewö jiget,

42 "Tosatña bauköm enğiba malökmö, nanñi bauköm anğumamğö osiza. Yanön Israełgö kiñ akza ewö, mönö dölki maripomnöñök eri eka mi möt naribinak.

43* Yanön Anutu möt narim wanğiba ewebibiñambuk mala nanñanğöra 'Anutugö Nahönñi akzal' jiiga mörin. Ayop, Anutunön i nalö kewöñe meköm wanğimamğö mötza me qahöwi, mi ölöp ekin." Mewö jiget.

44 Kegwek-kahasililiñ azi yambuk maripomnöñ etkugeri, yetkön mewöñanök uruqeqe keu töhöreñ jim wanğiyohot. Mewö.

Jisösnön kömuyök.

Mak 15.33-41; Luk 23.44-49; Jon 19.28-30

45 Silim bibiñi 12 kilok aiga miangöreñök söñaupnöñ eta gölme pakpak dop köla ahöiga anda aua karöbutkö dop ahök.

46* Jisösnön 3 kilok miangöreñ nanñe keunön kewö qet ketani qerök, "Eloi, eloi, lama sabaktani?" Mi nanine keunön: Anutuni, Anutuni, mönö wuanönğöra andö nuñguzan?

47 Mewö qeriga azi kösutñe kingeri, yenğöreñök tosatñan mi möta jiget, "Mönö Elaijagöra qetza."

48* Mianğöreñök yenğöreñök kunñan ösumñan anda mömöndö kun kahali tandök mi memba wain o asölñambuknöñ kundumğöba ip göröm kitipñe jöhöba suruba Jisös numbuñe eu ali neyök.

49 Neyökmö, tosatñan jiget, "Mönö mosötkeka nanñök kinök. Elaijanön kaba meköi etma me qahöpto, mönö mi ekin."

50 Mewö aketka Jisösnön kunbuk qet ketani qeta söñğörö ösum kondikñi öröba kömuyök.

51* Kömuiga miangöreñök jöwöwöl jikegö uruñe opo* kinöhi, mianön euyök bibiñe jurata eta yahöt ahök. Mewö eriga gölmenön kenön ketanjan meiga köt ketani ketani mesiñnök.

52 Qaksirigö köt köteñi mienğö numbuñinan nanñök anañigetka ambazipñi sarakñi kömugeri, yenğöreñök gwötpukñan guliba wahötke.

53 Wahöta qaksirigö köt köteñini mosöta Jisösnön kömupnöñök wahöröhi, mianğö andöñe Jerusalem siti töröñi mianğöreñ kaba ambazip gwötpuk asuhum enğigetka enğeget.

54 Suahö galöm aka yarö azi yambuk Jisösgö jegalöm memba malgeri, yenön kenön meiga yuai tosatñi pakpak asuhuyöhi, mi eka auruba jönömñini

* 27:39: Sum 22.7; 109.25 * 27:40: Mat 26.61; Jon 2.19 * 27:43: Sum 22.8 * 27:46: Sum 22.1

* 27:48: Sum 69.21 * 27:51: Eks 26.31-33 * 27:51: Opo mi jöwöwöl jikegö oleni kömbukñi aka oleni töröñi kötökñi mietkö sutñire kinök.

gwötpuk unduiga kengötporinj aka kewö jiget, “Yañön mönö ölña Anutugö Nahönña akza.”

⁵⁵ *Ambi gwötpukñan sikep kinda yuai mi mewöyök eket. Yeñön Jisös wuatangöba Galiliyök kaba welen qem wangiba malget.

⁵⁶ Yeñgö sutñine Magdalagö Maria aka Maria Jeims aka Joses yetkö namñiri aka Zebedigö nahönyahöt yetkö namñiri. Mewö.

Jisösgö qamötñi löm kölget.

Mak 15.42-47; Luk 23.50-56; Jon 19.38-42

⁵⁷ Mare aiga Arimatia azi pomñi kun qetñi Josef kayök. Yañön mewöyök Jisösgö gwarekñi kun ahök.

⁵⁸ Yañön Pailötgöreñ anda Jisösgö qamötñi memangö qesiyök. Qesiiga suahö azinöñ mi Josef wangimegö jim kutum enjiyök.

⁵⁹ Jim kutum enjiiga Josefnöñ anda Jisösgö qamötñi memba eta opo tuatñan esuhuyök.

⁶⁰ Esuhuba memba qaksirinöñ anda nanñi köteñ dölökñi kötnöñ uroro-hogetka kinöhi, qamötñi mi mianğöreñ alök. Mewö ala köt ketañi kun metaliga köteñ numbuñi közipköiga mosöta anök.

⁶¹ Magdalagö Maria aka Maria alañi kun yetköñ mianğöreñ köt köteñ mesohol köla tarohot.

Yarö azi qaksiri galöm meget.

⁶² Sabat kendon tatatköra yuai mözözömgöba ahöba wahöta mianğöreñ jike nup galöm aka Farisi (Köna keugö kapañkölköl) yeñön Pailötköreñ anda tokoba kewö jiget,

⁶³ *“Ketanamnini, enjololonğö urukungukungu azi mianjön jebuk malöhi, nalö mianğöreñ kewö jii mörin, ‘Nöñön wehön karöbut teköiga kunbuk guliba wahötmam.’ Neñön keu mi mötmörizin.

⁶⁴ Mianğöra göñön ölop yarö aziurupki jinöñ möta qaksirinöñ anda mi törörök jegalöm memba malgetka wehön karöbut teköiga mosötme. Mewö qahö galöm membeak ewö, gwarekurupñan mönö anda qamötñi ölöñ memba asamböta ambazip kewö jiget mötpeak, ‘Jisösnöñ mönö kömupnöhök wahörök.’ Mewö jigetka tilipqilip enjololon keu kondikñi kianön mönö enjololon keu mutukñi onğiriga böliqölibapuk.”

⁶⁵ Mewö jigetka kewö jii mötket, “Yarö azi ki mönö ölop enğuanğita anda al enjigetka qaksiri köteñ numbuñi mi törörök galöm köl soroköme.”

⁶⁶ Mewö jii möta qaksirinöñ anda köt köteñangö numbuñe köt ketañi algetka közipköba kinöhi, mi supañi ala yarö azi al enjigetka jegalöm köhöikñi meget.

28

Jisösnöñ kömupnöhök wahörök.

Mak 16.1-10; Luk 24.1-12; Jon 20.1-10

¹ Sabat kendon tatket teköiga Sonda söñanök wahöta miri gianjiiga Magdalagö Maria aka alañi Maria kun yetköñ qaksirigö köt köteñ ekitkö anohot.

² Anohotka mianğöreñök kenöñ ketañi kewögöra meyök: Kembugö garata kunöñ Suepnöhök eta qaksirinöñ kaba numbuñe köt ketañi qetali ani qakñe tarök.

³ Garatagö kaisongolomñi mi wöl ewö aiga malukuñi mi kousu ewö tuat lalamñi ahök.

* **27:55:** Luk 8.2-3 * **27:63:** Mat 16.21; 17.23; 20.19; Mak 8.31; 9.31; 10.33-34; Luk 9.22; 18.31-33

⁴ Mewö asuhuiga yarö azi qaksiri galöm megeri, yeñön yangöra awöwöliba jönömñini undui kömum töriget.

⁵ Mewö aketka garatanöñ ambi yahöt yetköra keu kewö jiyök, “Jisös maripomnöñ qegeri, inñiri yangöra jaruzahot, mi mötzal. Mianğöra mönö keñgötñiri kude mötmahot.

⁶ Nanñak jiyöhañgö dop mönö kömupnöñök wahötza. Mianğöra ki qahö ahöza. Mönö kaba dum ahöyöhi, salupñi mi ekñahot.

⁷ “Mi eka ösumok gwarekurupñi yeñgöreñ anda buzup keu ki jiyohot mötme, Jisösnöñ kömupnöñök wahötza. Mötket, yeñön mönö qeljine mutuk Galili prowinsnöñ anma. Inñini ölop mianğöreñ anda i ekñe. Mötket, nöñön mi lök jibi mötze.”

⁸ Mewö jiiga zilañök qaksiri mosöta keñgötñiri möta töndup önöñi qahö söñgaiba buzup mi memba gwarekurupñi jiyohot mötmegöra ösumñiran anohot.

⁹ Ösumñiran anohotka Jisösnöñ i könanöñ asuhum etkiba “Söñanñiri!” jiyök. Mewö jiiga kösutñe anda sipköba könañe meraköba waikñi memba möpöseim wañgiyohot.

¹⁰ Möpöseim wañgiyohotka kewö jii mörohot, “Keñgötñiri kude mötmahot. Mönö anda munurupnan Galili anmegö keu jiyohotka mianğöreñ anda ni nekñe.” Mewö.

Qaksiri galöm meme yeñön kösohotñini jiget.

¹¹ Ambiyahöt yetköñ köna anohotka qaksirigö köt köteñ galöm meme yarö azi tosatñan sitinöñ kaba jike nup galöm engeka yuai pakpak asuhuyöhi, mianğö kösohotñi jiget mötket.

¹² Yeñön mi möta Juda yeñgö jitñememeurupñini öröm enğigetka mohotñe totoko ala Jisös wahötwahötkö keu asambötpingö keu areñ miwikñjaiba moneñ keta bölökñi mi yarö azi enğiget.

¹³ Mi enğiba kewö jim kutum enğiget, “Inñini mönö keu kewö jime: Nini sunğem gaun ahöinga gwarekurupñan ölöñ kaba qamötñi yonğorö memba anget.

¹⁴ Keu mewö jigetka keu mianğön premiögö kezapñe gei mötma ewö, lömböt enğö qakñine öngöbapuköra neñön mönö uruñi mölöwöriba memba eta alinga waimanjat qahö malme.”

¹⁵ Mewö jim kutum enğigetka mianğö dop aka moneñ memba anda nup keuñini wuatangöget. Mewö aketka Juda yeñön keu mi sutñine jim sehigetka möta malgetka anda nalö kewöñe mewöyök mi toroqeba jiget mörakzin. Mewö.

Misin nup membingö jimkutukutuñi

Mak 16.14-18; Luk 24.36-49; Jon 20.19-23; Apo 1.6-8

¹⁶ *Gwarekurup 11 yeñön Jerusalem mosöta Galili prowinsnöñ anda Jisösnöñ kundune anmegöra jiyöhi, mianğöreñ öngöget.

¹⁷ Mianğöreñ öngöba Jisös eka waikñi memba möpöseim wañgigetmö, tosatñan yangöra uruyahöt aket.

¹⁸ Möpöseim wañgigetka yeñgöreñ kaba kewö jiiga mötket, “Suepkö aka gölmegö kukösum pakpak mi Anutunöñ ningiiga nöngöreñ ahöza.

¹⁹ *“Mianğöra inñini mönö gölme dop anda ambazip kambu pakpak kewö enğomegetka nöngö gwarekurupni akñe: I mönö Iwi, Nahön aka Uña Töröñi neñgö qetnine o melun mem enğime

* **28:16:** Mat 26.32; Mak 14.28 * **28:19:** Apo 1.8

²⁰ aka nöñön keu wuatängömegöra jim kutum engiali, mi pakpak tem kölmegöra mönö kusum engiba malme. Mötket, nöñön mönö nalöñi nalöñi embuk mala anda malbiga gölmegö nalöñan teköma." Mewö.

Mak Ölöwak Buña Maknöŋ ohoyök. Jim-asa-asari

Mak namŋi qetŋi Maria, iwiŋi qetŋi qahö mötzin. Jerusalem siti tonji malget. (Aposol 12.12) Nanŋi kösohotŋi kun qetŋi qahö qeta boŋ 14.51-52 mianğöreŋ ohoi ahöza. Pitönöŋ bauköm waŋgiiga uruŋi melenŋiga Buña kusum waŋgiyök. Waŋgiiga numbutŋi Barnabas aka Pol yetpuk liliköba misin nup memba anda Pol mosöta deŋnohot. Deŋnohotka toroqeba nup memba mala Buña kösohot mohok mohok qezaköba mindiriba kian kantri yeŋgöra Grik keunöŋ ohoyök. Jisösgö keuŋi mi Arameik. Mi “Eli eli lama lama sabaktani,” mianğö dop.

Jisösnöŋ urugö nupŋi denöwö memba Anutugö Nahönŋi aka ambazip bauköm eŋgiba malöhi, Maknöŋ keu mi jim asariba ohoyök. Jisösgö nupŋi bohönŋi karöbut: Buña kusum eŋgiyök, ömewöröme közöl eŋgiyök aka siŋgisöndok mosöta kawölŋi kawölŋi mem ölöwahök.

Buk kianğö bahönŋi bohönŋi 6 mi kewö:

Keu mutukŋi: Jon aka Jisös 1.1-13

Qenjarök nup Galili uruŋe meyök 1.14-9.50

Galili mosöta Jerusalem anök 10.1-52

Jerusalem Sonda mohot mala kömuyök 11.1-15.47

Jisösnöŋ kömupnöhök wahörök 16.1-8

Wahöta asuhuba Suepnöŋ öŋgöyök 16.9-20

¹ Amötqeqe Tonji Jisös Kraist mi Anutugö Nahönŋi akza. Nöŋön yangö Ölöwak Buñaŋi könahiba ohozal.

Jonöŋ Jisösgö köna mesarök.

Mat 3.1-12; Luk 3.1-18; Jon 1.19-28

² *Anutunöŋ Suep uruŋe Nahönŋaŋgöra keu kun jiiga kezapqetok azi Aisaianöŋ mi ohoiga yangö Buzup Kimbinöŋ kewö ahöza, “Mötnöŋ. Nöŋön kolek garatani kun melaibiga qeljiŋe anda ambazip uruŋini mindiŋgöba göhö könaŋi mesariga göŋön yangö andöŋe gölmenöŋ ge-man.”

³ *“Kolek garata kunöŋ gölme qararaŋkölkölŋe qeta maliga anda qetŋi kewö mötme, ‘Kembunöŋ kamawo! Mianğöra mönö jöjöröba könaŋi mesatket. Mönö uruŋini mindiŋgöba könaŋi qölöleiget’.”

⁴ Keu mianğö dop azi kun qetŋi Jon asuhuyök. Qetŋi alaŋi O-melun azi. Asuhuba gölme qararaŋkölkölŋe mala kinda Buña keuŋi kewö jiba malök, “Iŋini mönö uruŋini melengetka nöŋön o melun mem eŋgimam. Mewö aketka Anutunöŋ siŋgisöndokŋini saŋgoŋda mosötma.”

⁵ Mewö jiba maliga Judia prowinsgö miriŋi pakpak aka Jerusalem siti yeŋön kambuŋi kambuŋi köla öröba Jongöreŋ kaget. Kaba kaŋgota siŋgisöndokŋini jim miwikŋaigetka Jonöŋ i Jordan o töwatŋe o-melun mem eŋgiyök.

⁶ *Jongöreŋ silepöke mi kamel jupŋan memenji aiga kembaŋe örigit sömbup sileŋan memenji mi jöhöba malök. Neneŋamŋi mi gawöt jinam aka arökŋaŋgö moroŋ onji, mia namba malök. Mi pakpak kezapqetok azi Elaija (Elia) yangö dowä.

* 1:2: Mal 3.1 * 1:3: Ais 40.3 * 1:6: 2 Kiŋ 1.8

⁷ Jonöŋ keu kewö jim asariba malök, “Nöŋgö andöne azi kukösumŋi köhöikŋi kun kama. Yanğö kukösumŋi öŋgöŋgöŋan mönö nöŋgöreŋ onğitma. Yanön azi öŋgöŋgöŋi akŋawanğöra nöŋön yanğö köna esunjanğö kösöŋi bauköba pösatmanğö qötötanğömam.

⁸ Nöŋön o töhöŋöŋ melun mem enğizalmö, yanön mönö Uŋa Töröŋan melun mem enğima.” Mewö.

Jonöŋ Jisös o melun mem wanğiyök.

Mat 3.13-17; Luk 3.21-22; 4.1-13

⁹ Nalö miangöreŋ Jisösnöŋ Galili prowinsgö miri Nazaret miangöreŋök Jongöreŋ kaiga Jordan o töwatŋe o-melun mem wanğiyök.

¹⁰ Mem wanğiiga onöhök koriga miangöreŋök Suepnöŋ aŋaŋiiga Jisösnöŋ uba ehiga Uŋa Töröŋi melenğda kembö nei ewö aka Jisösgö qakŋe eta meöyk.

¹¹ *Mi ehiga Suep mireyök keu kun kewö asuhuyök, “Göŋön mönö nani wölböt nahöni aknöŋga köröni ölöwahiga geknahöm ak gihizal.” Mewö.

Satanöŋ Jisös esapköba malök.

Mat 4.1-11; Luk 4.1-13

¹² O melun mem wanğiiga miangöreŋök Uŋa Töröŋan Jisös kuŋgum wanğiiga gölme qararanğölkölŋe anök.

¹³ Anda wehön 40 miangö dop miangöreŋ maliga öme bohonŋini Satan yanön esapköm wanğiba malök. Sömbup kalŋi miengö sutŋine maliga Suep garata yeŋön bauköm wanğiba malget. Mewö.

Jisösnöŋ gwarekurupŋi mutukŋi enğoholök.

Mat 4.12-22; Luk 4.14-15; 5.1-11

¹⁴ Könaŋgep Jon kösö mire alget tariga Jisösnöŋ nalö miangöreŋ Galili prowinsnöŋ liliŋgöba anök. Anda Anutugö Ölöwak Buŋaŋi jim asariba malök.

¹⁵ *Jim asariba kewö jiyök, “Anutunöŋ bemtohoŋi almawanğö nalöŋan mönö dopdowiza. Anutunöŋ nalö aliga mala malgetka dölkö akza miangöra mönö uruŋini melenğda Ölöwak Buŋa möt nariget.”

¹⁶ Jisösnöŋ mewö jiba liliköba mala Galili o anğögö göraŋe mötöteiba anda söra örörö azi yahöt ekehök. Qetŋiri Saimon, munŋi qetŋi Andru. Yekŋön mösakŋiri o anğönöŋ söra öröbitköra gila malohot.

¹⁷ Jisösnöŋ etkeka kewö jiyök, “Aziyahöt, iŋiri mönö ni uatanağöba kayöhotka kusum etkibi ambazip söra ewö öröm enğimakŋahot.”

¹⁸ Mewö jiiga miangöreŋök mösakŋiri mosöta könahiba Jisös wuatanağöba anöhot.

¹⁹ Jisösnöŋ yetpuk borom kun toroqeba anda Zebedigö nahönŋi Jeims aka munŋi Jon ekehök. Yetköŋ mewöŋanök wanğenöŋ tata mösakŋiri möhamgöba jöhöba malohot.

²⁰ Malohot ekeka miangöreŋök etkoholök. Etkoholiga iwiŋiri Zebedi aka moneŋ nup aziurupŋi wanğenöŋ enğömosöta könahiba Jisös wuatanağöba andöŋe anohot. Mewö.

Jisösnöŋ öme kun wuatanağöyök.

Luk 4.31-37

²¹ Mewö mohotŋe anda Kaperneam sitinöŋ anğotketka Sabat kendon aiga Jisösnöŋ miangöreŋök köuluk miriŋine öŋgöba Buŋa kusum enğiyök.

²² *Köna keugö böhi ewö qahöpmö, kukösum ahöm wanğiyöhanğö dop kusum enğiba ahakmemeŋanğö dop akŋegöra jiyök. Miangöra könagesö yeŋön mi eka auruba welipköget.

* **1:11:** Jen 22.2; Sum 2.7; Ais 42.1; Mat 3.17; 12.18; Mak 9.7; Luk 3.22 * **1:15:** Mat 3.2 * **1:22:** Mat 7.28-29

²³ Köuluk miriñine miangören nalö miangörenök azi kun ömenambuk tariga öme mianön qetñi kewö qerök,

²⁴ “O Jisös, Nazaret azia! Gi wania ak neñgimamgö akzane? Mönö ayuhum neñgimamgöra kazan me? Ni könañamgi möt kutuzal. Gi Anutugören azi Tök-kutukutuñi mi akzan.”

²⁵ Mewö qeriga Jisösnöñ tembula kewö jim wañgiyök, “Gi mönö keugi bököiga azi ki mosöta kesalnöñ.”

²⁶ Mewö jim wañgiiga ömenöñ azi mi utuköba urepköm wañgiba qet bölöbölö qeta kota mosöta anök.

²⁷ Aniga körekñan nemböñini teköiga welipköba qesim añguba kewö jiget, “Yei! Ki mönö wani yuaia? Ki mötmöt dölökñi kukösumñambuk. Yañön ömewöröme mewöyök jim kutum eñgiiga jitñi tem kölje.”

²⁸ Mewö asuhuiga Jisösgö qetbuñan köñöpuk sehiba miri kösutñe tat angeri, miangören anda anda Galili prowins pakpak dop kölök. Mewö.

Jisösnöñ kawöl ambazip gwötpuk meiga ölöwaket.

Mat 8.14-17; Luk 4.38-41

²⁹ Jisösnöñ Kaperneam yeñgören köuluk miri mosöta miangörenök Jeims Jon yetpuk Saimon aka Andru yetkö mire öñgöget.

³⁰ Miangören öñgögetka Saimongö suhunñan silekönöp kawöl yöhöi ahöyök. Ahöiga buzupñi mi ösumok Jisös jiget mörök.

³¹ Jiget möta yañgören anda böröñe memba kököbiiga wahörök. Wahöri ga silekönöpñan mosöri ga nene ohoba gumohom eñgiyök.

³² Gumohom eñgiiga mare aiga wehön jeñi geiga miangören Kaperneam toñi yeñön kinda ambazipñi ambazipñi kawöl ömeninambuk mi körek eñguanñgita Jisösgören kaget.

³³ Kaperneam taonöhök kambulelennenöñ kaba Saimongö miri nangñe tokoget.

³⁴ Tokogetka kinda ambazip kawöl könañi könañi eñgöhöyöhi, mi gwötpuk mem ölöwak eñgiyök. Mewöyök ömewöröme yeñön Jisösgö könañi mötkeañgöra Jisösnöñ numbuñini muhungöba gwötpuk eñguatañgöyök. Mewö.

Amöt böröñi Galili körek dop kölök.

Luk 4.42-44

³⁵ Jisösnöñ gaun ahöiga miri wañgaran suruiga wahöta miri yaigepñe geba görane anda nanñök tiñ kutuba miangören köuluköyök.

³⁶ Köuluköiga Saimon aka alaurupñi yambuk malgeri, yeñön zilañ könañe anget.

³⁷ Anda miwikñaiba kewö jiget mörök, “Ambazip körekñan mönö göhöra jaruze.”

³⁸ Mewö jigetka möta kewö jiyök, “Miri tosatñi tosatñi liliköba tat anjei, ekze. Nöñön Buña keu miri dop jim sehimamgöra eta maljal. Miangöra mönö miri liliköba anbin.”

³⁹ *Mewö jiba anda Galili prowins körek liliköba köuluk miriñine Buña keu jiba ömeñi ömeñi mi eñguatañgöba malök. Mewö.

Jisösnöñ uzikuku azi kun mem solaniyök.

Mat 8.1-4; Luk 5.12-16

⁴⁰ Jisösnöñ taon kunöñ maliga uzikuku azi kunñan kaba simin köla Jisösgö wösöñe geba kewö köuluköm wañgiyök, “Göñön sihimgan mem ölöwak niñgimamgö mötzan ewö, mönö ni ölop mem solanim niñgiman.”

* 1:39: Mat 4.23; 9.35

⁴¹ Mewö jiiga yangöra wösöñi möta böröñi böranda silenji misiriba jiyök, “Nöñön mi akñamgö mötzal. Gi mönö solaniman.”

⁴² Mewö jiiga uzikukuñi mi mianğöreñök solanii ölöwahök.

⁴³ Solaniiga galöm meme keu köhöikñi wañgiba mianğöreñök “Ölöp anman,” jiyök.

⁴⁴ *Goro mi kewö jiiga mörök, “Mötnöñ. Kianğö buzup keuñi mi kun kude jinöñ mötme. Qahöpmö, mönö jike nup galömgöreñ anda silegi kondel wañgiman aka Mosesğöreñ jimkutukutu wuatangöba solanizanangö saiwap nalukñi ala jöwöwöl ohoman. Mi ohonöñ ehiga ambazipnöñ könañamgi möt kutume.”

⁴⁵ Jisösnöñ mewö jiyökmö, yañön anda töndup könahiba keu buzupñi mi gwötpuk jiba maliga sehiyök. Sehiiga Jisösnöñ taonñi taonñi mianğöreñ aukñe kunbuk anmamgö osiyök. Osiba taon andöñine miri gwamönñi mianğöreñök malök. Mianğöreñ maliga miri dop mianğöreñök ambazipñi ambazipñi mi yangöreñ kaget. Mewö.

2

Jisösnöñ azi sile likepñi kömukömuñi möhamğöyök.

Mat 9.1-8; Luk 5.17-26

¹ Mewö liliköiga nalö tosatñi teköiga Jisösnöñ lilingöba kunbuk miriñe Kaperneam kayök. Kaiga “Mire malja,” jiget mötket.

² Ambazip gwötpukñan mi möta tokoba yangö miri nangü söndakñe gwözöñda sombemñe kokolak qeget. Kokolak qegetka Jisösnöñ kinda Buña keu jiiga mötket.

³ Mötketka mianğöreñ azi kun sile likepñi kömukömuñi, mi wañgita yangöreñ kaget. Azi 4:ñan i kululunöñ ala anguba kaget.

⁴ Kagetka gwözöñda kingerangöra aka Jisösgö kösutñe anda albingö osiget. Osiba miri qakñe öngöba Jisösgö bohonñeyök bo esim lulunget. Lulungetka kinimñi ahuiga mianğöreñ kawöl azi mi kululunambuk kösönöñ jöhöba algetka geiyök.

⁵ Mewö geiga Anutu möt narim wañgigeri, Jisösnöñ yengö tandökñini mi ehi dop köliga kawöl azigöra kewö jiyök, “Nahöni! Nöñön siñgisöndoki mosötzal.”

⁶ Mewö jiiga Köna keugö böhi tosatñan sutñine tata uruñinan kewö mötmöriget,

⁷ “Azi kianön denöwögöra mewö jiza. Mönö Anutu ilita mepaqepaik akza. Anutu mohotñan siñgisöndoknini mosörakzapmö, azi kunñan mi qahö.”

⁸ Uruñinan mewö mötmörigetka Jisösnöñ mianğöreñök uruñan mi möt kutuba kewö jii mötket, “Inini mönö wuanöngöra keu mewöñi uruñinan mötmörize?”

⁹ Nöñön ‘Siñgisöndoki mosötzal,’ kawöl azigö mewö jizali, keu mianön mönö awamñanök jijina. Kunñan mewö jiiga tosatñan keu mianğö ölni qahö ekñe. Mianğöra mi keu awamñangö dop. Nöñön keu kun kewö jimamgö mötzal, ‘Mönö wahöta tumbulahöpki memba anöñ.’ Keu mi mönö lömbötñambuk jijina akza. Mewö jibiga ölni ahuma me qahöwi, mianön mönö aukñe asuhui ekñe.

¹⁰ Mötket, gölmenöñ siñgisöndok mosötmosötkö kukösumñi mi Suep gölmegö azi ölnangöreñ ahözawi, inini mianğö könañangöra janjuñ malbepuk. Mianğöra keu lömbötñi mi azi kianğöra jibi ölni eket,” Mewö jiba azi sile likepñi kömukömuñangö jeñe eka jiyök, “Nöñön göhöra jizal: Gi mönö wahöta tumbulahöpki memba mirige anöñ. Keu lömbötñi mi ölnambuk akña ewö, keu awamñi mi mönö mewöyök denöwögöra omanji akawak?”

* 1:44: Lew 14.1-32

11 Mewö jiba azi sile likepni kömukömuñi kewö jii mörök, “Nöñön göhöra jizal: Gi mönö wahöta tumbulahöpki memba mirige anöñ.”

12 Jiiga mönö wahöta miangörenök tumbulahöpni memba ambazip pak-pak yengö jeñine yaigepne anök. Mewö aniga körekñan welipköba Anutu möpöseiba kewö jiget, “Yei! Tandök kewöñi mi mönöwök nalö kungen qahö ehin. Qahö. Dölki je murutña ekzin.” Mewö.

Jisösnöñ Matyu (Liwai) oholök.

Mat 9.9-13; Luk 5.27-32

13 Jisösnöñ kunbuk Kaperneam mosöta anöñöñ geba sak qöhöröñe anda malök. Maliga ambazip kambulelembenöñ yangören kagetka Buña keu kusum engiyök.

14 Anda takis ofis ongitmamgö aiga miangören azi qetñi Liwai Alfiusgö nahöñni tariga eka jii mörök, “Gi mönö nöngö andöne kanöñ.” Mewö jiiga möta wahöta takis nup mosöta Jisösgö andöne anök.

15 Anda Liwaigö mire anda nene memba tatkeri, nalö miangören takis meme azi tilipqilipñinambuk aka siñgisöndok azi gwötpukñan kaba Jisös aka yangö gwarekurupni yembuk tata nene mohokñe neget. Gwötpukñan mönö Jisös wuatangöba malget.

16 Jisösnöñ takis meme tilipqilipñinambuk aka siñgisöndok ambazip tosatñi yembuk tata nene negeri, mi Farisi (Köna keugö kapañkölköl) aka yengören böhi tosatñan eka Jisösgö gwarekurupni kewö jim engiget, “Aek! Yanön mönö wuanöngöra takis meme tilipqilipñinambuk aka siñgisöndok ambazip yembuk tata nene neza? Mi qahö dop kölja.”

17 Mewö jim engigetka Jisösnöñ likepni kewö jii mötket, “Sile unditundit ambazipnöñ doktagöra qahö ak engimakzapmö, kawöl ambazipnöñ doktagören anakze. Nöñön siñgisöndok ambazip engoholmamgöra kaba maljalmö, ambazip nanñinanöñ mötketka solanñi akzei, i qahö.” Mewö.

Nene siñgi malmalgö keuñi

Mat 9.14-17; Luk 5.33-39

18 Nalö miangören Jongören gwarekurupni aka Farisi (Köna keugö kapañkölköl) yeñön nene siñgi malgetka tosatñan Jisösgören kaba kewö qesiget, “Jon O-melun azigö gwarekurupni neñön Anutugöra nene siñgi malahakzin. Farisi (Köna keugö kapañkölköl) yengö gwarekurupñinan mewöñanök aka malje. Nangi gwarekurupkan mönö wuanöngöra Anutugöra siñgi qahö malje?”

19 Mewö qesigetka kewö melenök, “Ölña! Nini wani nalönöñ nene siñgi malakzin? Ambi meme nalöñe azigö andöurupñan könöpni algetka ambigö seplitipurupñan yuai mi tökömakze me qahö? Nöñön nani gwarekurupni yengö azi buñaya aka yengö sutñine köisirik tatzal. Tatpiga yeñön miangöra aijölöñ söngaiba tata siñgi malbingö osimakze.

20 Osimakzemö, Anutunöñ noañgiri kömumbiga yeñön mönö nalö miangören ölop siñgi malakñe.

21 (Inini malmal walñi aka sösongai Buña dölökñi mi mindirim etkibingö osime. Miangö keu pasetñi mi kewö jibi mötket:) Löngölöngöt walñi jurariga kunñan opo dölökñi qahö sanjonsanjonñi mitiba mianön opo su johannñi qahö uhum memba umgörenömakza. Mewö akawak ewö, opo su johannñi dölökñan mönö waziba löngölöngöt walñi öröiga kunbuk tiñgiriga kinimñan qariba böliqölibapuk.

22 Mewöñanök kunñan wain o dölökñi mi jobö me toru walñi lama silenñan memenñi miangören qahö kusuiğa gemakza. Mewö akawak ewö,

wain o dölökñan mönö qariba toru qesiñniga jula mokoiga gölmenöñ eta sohoiga toruñan böliqölibepuk. Mianğöra wain o dölökñi mi toru dölökñeyök mokoïn geiga dop kölma. (Mewöñanök o ölopñi mi gina gisagisahöñe qahö umakzin. Mewö ubinak ewö, mianğön mönö jula kisipisirik eriga namba kawöl neñğöhöbapuk. Mewö akapuköra o ölopñi mi gina ölopñe umakzin. Inini mewöyök malmal walñi aka Ölöwak Buña dölökñi mi mindirim etkibingö osime.) Mewö.”

Jisösnöñ Sabat kendongö Kembuñi akza.

Mat 12.1-8; Luk 6.1-5

²³*Mianğö andöñe Sabat kendon kunöñ Jisösnöñ wit padi nup köröñi ketañi kutuba anök. Aniga gwarekurupñan wösöñini enğuiga wit ölni mohot mohot könahiba böröñinan misiba neget.

²⁴Mewö negerañğöra Farisi (Köna keugö kapañkolköl) tosatñan Jisös kewö jiget mörök, “Mötnöñ, yeñön mönö wuanöñğöra Sabat kendongö nup meme songoñi oñgitze?”

²⁵*Mewö jigetka kewö meleşnök, “Kiñ Deiwidnöñ yarö aziurupñi yembuk liliköba wösöñini enğuiga nenegöra osiba yuia akeri, mi lök nalö kunöñ oyonget me qahö?”

²⁶*Yañön mönö Anutugö opo seri jikenöñ öngöba beret kömbukñi Anutugö jemesoholñe altanöñ alget tariga ösumñan walöñniga qekögeri, mi mönö memba neyök. Beret kömbukñi mosötmosötñi mi jike nup galöm yeñönök nezema. Tosatñan mi nembepuköra songo ahöiga töndup neyök. Namba aziurupñi tok enğuiga mohotñe neget. Nalö mianğöreñ azi qetñi Abiatar yañön jike nup galöm bohonñangö nup memba malök.”

²⁷Mewö jiba kewö jii mötket, “Anutunöñ Sabat kendon mi ambazip ölöwakñegöra ali ahöza. Mia ambazipnöñ lañ jim kutumegöra aka qahö.

²⁸Mewö aiga Suep gölmegö azi ölnan mönö Sabat kendongö Kembuñi mewöyök akza.”

3

Jisösnöñ azi böröñi sösöröngöñi mem ölöwahök.

Mat 12.9-14; Luk 6.6-11

¹Jisösnöñ kunbuk köuluk mire öngöiga mianğöreñ azi böröñi sosoholiñi kun tarök.

²Mianğöreñ azi böröñi sosoholiñi kun tarök. Ambazipnöñ Jisös keu jakeñe al wañgibingöra “Azi mi Sabat kendonöñ möhamgöma me qahö?” jiba Jisös je galöm memba tatket.

³Megetka Jisösnöñ azi böröñi sosoholiñi mi kewö jii mörök, “Mönö wahöta jenine kinöñ.”

⁴Mewö jiba kewö jii mötket, “Köna keu wuatangöba Sabat kendonöñ yuai ölopñi me bölöñi akin? Ölop kungö bohonñi jöhöbin me mosöringa kömuma? Wanat kun meinga dop kölma?” Mewö jii möta göröñ alget.

⁵Keuñini göröñ tatketka lilingöm purik engehi uruñinan köhöikñi gwözöñnöhanğöra wösöbirik aka kukjejenöñ engehök. Mewö engeka azi mianğö jiyök, “Gi mönö börögi qötöteinöñ.” Mewö jiiga böröñi qötöteiba kunbuk ölöwahök.

⁶Ölöwahiga Farisi (Köna keugö kapañkolköl) yeñön yaigep anda mianğöreñök premiö Herodkö pati alaurup yembuk totoko ala “Jisös denöwö qein kömuma?” jiba keu nup meget. Mewö.

* 2:23: Dut 23.25 * 2:25: 1 Sml 21.1-6 * 2:26: Lew 24.9

Jisösnöñ kawöl ambazip mem ölöwak engiyök.

⁷ Mewö megetka Jisösnöñ gwarekurupñi enġuanġita o anġö jitne anget. Angetka Not prowins qetñi Galili miangörenöñ ambazip kambulelembe yeñön könañe wuatangöba anget. Judia prowins miangörenöñ mewöyök yangören kaget.

⁸ Siti bohonñi qetñi Jerusalem, Saut prowins qetñi Aidumia aka Jordan o likepñeyök Wehön Kotkotñe yeñön aka Wehön Gegene görökenök taon qetñiri Taiö aka Saidon liliköba maljei, yeñön mohok kambulelemenöñ öröba kaget. Jisösnöñ anġöletot ketañi ketañi memba malöhi, miangö buzupñi möta mindiqindiriba kañgotket.

⁹ *Mewö kañgota utal wañgibepuköra Jisösnöñ gwarekurupñi kewö jii mötket, “Ölököm niñgibepuköra inini mönö wañge kun miwikñaiba nöñgöra dowe alget tarök.”

¹⁰ Mewö jii möta ambazip sehisehiñi mem ölöwak enġiba malök. Miangöra qemjem-mamjeñ aka sile lölömböröñinambuk pakpak yeñön silenje misirib-ingöra liliköba gwötpuk aum metala utal wañgiget.

¹¹ Ömeñi ömeñi yeñön Jisös eka jemesoholñe gölmenöñ geba kewö qetket, “Gi Anutugö Nahönñi akzan!”

¹² Mewö qetketka Jisösnöñ qetal enġiba köñöñamñan aukñe asuhubapuköra soñgo köhöikñi al enġiyök. Mewö.

Jisösnöñ gwarekurupñi möwölöhöm enġiyök.

Mat 10.1-4; Luk 6.12-16

¹³ Könañep Jisösnöñ kundunje öñgöba miangören nanñi sihimñanġö dop azi enġoholiga yangören kaget.

¹⁴ Kagetka azi 12 mi yambuk malmegöra al enġiba Buña keunji jim sehimegöra melaim enġiyök.

¹⁵ Melaim enġiba ömewöröme közöl enġimegö kukösumñi enġiyök.

¹⁶ Mewö aka azi 12 ki kewö al enġiyök: Pitö, Jisösnöñ qet mi Saimon wañgiyök.

¹⁷ Jeims aka munñi Jon, iwiñiri qetñi Zebedi. Jisösnöñ yetkö qetñiri kun Boanerges qerök. Mi nanine keunöñ Pöndandañgö Nahönyahötñi.

¹⁸ Andru, Filip, Bartolomyu, Matyu, Tomas, Jeims Alfiusgö nahönñi, Tadius, Saimon Zelot-politik azia*

¹⁹ aka Judas Iskariot. Kariot azi mianñön könañgen Jisös mamalolo mem wañgiyök. Mewö.

Jisösnöñ öme yeñgö kukösumñini onġita qei etza.

Mat 12.22-32; Luk 11.14-23; 12.10

²⁰ Jisösnöñ mi al enġiba kunduneyök eta nanñi miriñe kayök. Mire kaiga ambazip kambu ketañi kunbuk kañgota tokogetka mönö miangöra tosolumñi yembuk nene nemingö osiget.

²¹ Osigetka sepkitipurupñan mi möta “Urunji lök sohoza!” jiget. Jiba geba wañgitpingöra anget.

²² *Angetka Köna keugö böhi Jerusalemök kageri, yeñön jiget, “Satangö Katakömulatnöñ mönö urunje geiga malja. Yanñön öme yeñgö kembuñinañgö ösumnöñ ömewöröme enġuatañgömakza.”

²³ Mewö jigerangöra Jisösnöñ enġoholi kagetka dopkeunöñ kewö jii mötket, “Satanöñ mönö denöwö alañi Satan kun wuatangöbawak?”

* **3:9:** Mak 4.1; Luk 5.1-3 * **3:18:** Nasönöl pati zelot yeñön Rom gawman tuarenjon aka nanñine kinkin membingöra tuaköpek memba malget. * **3:22:** Mat 9.34; 10.25

²⁴ Kantri kungö galömurupñinan sutñine aᅅgururuk aka julme ewö yeñön mönö galömkölköl nupñini memba kinbingö osime.

²⁵ Mewöyök miri kungö könagesö yeñön sutñine aᅅgururuk aka julme ewö, mönö galömkölköl nupñini memba kinbingö osime.

²⁶ Mewöyök Satangö könagesö yeñön sutñine aᅅgururuk aka tuarenjon ak aᅅgubeak ewö, galömkölkölninaᅅgö ösumñan eriga bemtohoñinan mönö qahöwakñamgö akza.

²⁷ Kunñan azi köhöikñanᅅgö köna böröñi mutuk qahö jöhöma ewö, yañön mönö miriᅅ öᅅgöba qezaᅅda sukinapñi memangö osima. Mutuk i jöhöi tari-gun mönö ölop miriᅅyök öryuaini pakpak waᅅgita memba anma. (Miaᅅgö dop nöñön mewöyök Satan jöhöba andöᅅe ömeñi eᅅguataᅅgömakzal.) Mewö.

Singisöndok mosötmosötñi qahö

²⁸ Nöñön keu ölni kun kewö jibi mötme, “Ambazip ketani moröñi singisöndok ahakzei, mi Anutunöñ mosörakza. Lömbötñambuk me awamñi mepaqepaik akeak mönö mi Anutunöñ saᅅgoñ eᅅgima.

²⁹ *Saᅅgoñ eᅅgimapmö, Kunñan Uña Töröñi ilita mepaikömawi, miaᅅgö singisöndokñi Anutunöñ mönö nalö kunöñ qahö mosötma. Saumban! Singisöndok miaᅅñön mönö qakñe öᅅgöiga nalö teteköñi qahö Anutugö jeñe keuñambuk malma.” Mewö jiyök.

³⁰ “Ömenöñ uruᅅe geyöhawa malja,” Jigeranᅅöra aka mewö kusum eᅅgiyök. Mewö.

Jisösgö nam-munurupñi.

Mat 12.46-50; Luk 8.19-21

³¹ Mewö eraum mötketka nam-munñan kaba yaigep kinda yeᅅgöreñ etmapkö keu alget yaᅅgöreñ anök.

³² Aniga ambazip kambu yeñön liliköm waᅅgiba tata kewö jiget mörök, “Mötnöñ! Göhö nam-mungan mönö yaigep kinda göhöra qesize.”

³³ Jigetka melaᅅda kewö jii mötket, “Nöᅅgö namni mi dañön aka munurupni dañön?”

³⁴ Jisösnöñ mewö jiba ambazip liliköm waᅅgiba tatkeri, i uba eᅅgeka kewö jiyök, “Eket nöᅅgö namni aka munurupni mönö ki.

³⁵ Anutugöreñ jitsihitñi tem kölahakzei, mienñön mönö nöᅅgö namni aka nen-munurupni akze.” Mewö.

4

Qesiñ gilgil azigö dopkeu

Mat 13.1-9; Luk 8.4-8

¹ *Jisösnöñ kunbuk o aᅅgö jitñe geba könahiba kusum eᅅgiyök. Kusum eᅅgiiga ambazip kambulelebenöñ yaᅅgöreñ anda tokogetka waᅅgenöñ öᅅgöba o aᅅgö qakñe anda tarök. Tariga ambazip pakpak yeñön aᅅgö görañe saknöñ tokoget.

² Mewö tokogetka dopkeu gwötpuk jiba kusum eᅅgiyök. Kusum eᅅgiba kewö jiyök.

³ “Mötket! Azi kunñan nene kötni qesiñ gilmamᅅöra nupñöñ anök.

⁴ Anda qesiñ giliga kötni tosatñan köna jitñe geba kölget. Geba kölgetka (warawen) neiñi neiñi kaᅅgota mi nem teköget.

⁵ Kötni tosatñan köt jamönjiññöñ geba kölget. Geba köla miaᅅgöreñ gölme gwötpuk qahö miwikñaiget. Gölme dutñi qahö ahöyöhaᅅgöra korapñi zilañ kotket.

* **3:29:** Luk 12.10 * **4:1:** Luk 5.1-3

⁶ Kotketmö, wehönöŋ kota enguba jem kutum enjiiga jalöŋini qahöpköra soholiba gororonŋöget.

⁷ Kötni tosatŋan siriuret wahiŋinambuknöŋ mianŋörenŋ geba kölget. Geba kölgetka mienön kota qem turugetka böbölohot mem enŋiget. Mewö aka ölni qahö kuŋguget.

⁸ Kötni tosatŋan gölme ölöpnje geba kölget. Geba köla korapŋini jula wahöta ipŋinaŋö ölni ölöpnje asuhuget. Tosatŋan kötni 30, Tosatŋan kötni 60, tosatŋan 100 mianŋö dop ahum sehiget.”

⁹ Mewö jiba jim teköyök, “Kunŋan urukezapŋambuk malja ewö, yaŋön mönö dopkeu ki kezap ala möt kutuma.” Mewö.

Jisösnöŋ wanigöra dopkeu jiyök.

Mat 13.10-17; Luk 8.9-10

¹⁰ Kambu ketani yeŋön deŋda angetka Jisösnöŋ nanŋök tarök. Nanŋök tariga gwarekurupŋi 12 aka tosatŋi liliköm wanŋigeri, mi mohotŋe dopkeu kienŋö könaŋinaŋöra qesim wanŋiget.

¹¹ Qesim wanŋigetka kewö melenŋa jiyök, “Anutugö bemtohoŋe anŋota malbingö keu tölapŋi mi enŋöra aukŋe jibi möt kutuzemö, yaigep maljei, yeŋöra mi pakpak mönö dopkeunöhök asuhumakza.

^{12*} Mewö asuhuiga

‘Nanŋini jeŋinan yuai ekagun könaŋi töndup qahö möt kutume.

Nanŋini Kezapŋinan keu törörök mötagun könaŋi töndup qahö möt asarime.

Mi möt asaribeak ewö, mönö ölop uruŋini melenŋetka Anutunöŋ siŋgisöndokŋini mosötpawak.’ ”

Jisösnöŋ dopkeugö könaŋi jiyök.

Mat 13.18-23; Luk 8.11-15

¹³ Jisösnöŋ toroqeba kewö jii mötket, “Dopkeu mianŋö könaŋi kewö. Mi kude möt asarize ewö, dopkeu tosatŋi pakpak jimami, mi mönö denöwö möt asaribeak?

¹⁴ Dop Keu mianŋö könaŋi kewö: Qesiŋgilgil azinöŋ Buŋa keu qesiŋda gilja.

¹⁵ Nene kötni könaŋi jite geba kölgeri, mi kewö: Buŋa keu qesiŋ gilgetka ambazip uruŋine gezapmö, mi mötketka Satanöŋ mianŋörenŋök kaba keu uruŋine qesiŋget geyöhi, mi qeköba enŋuanŋirakza.

¹⁶ Nene Kötni qesiŋniga köt jamönjiŋnöŋ geba kölgeri, mi mewöyök ambazip söpsöpŋi kun. Yeŋön Buŋa keu möta mianŋörenŋök sösoŋgai qakŋe möt anŋön kölakze.

¹⁷ Mewö ahakzemö, uruŋine jalöŋi qahö ahöm enŋimapmö, nalö töröptökŋi miyök kin köhöiba malme. Buŋa keugöra aka kahasililiŋ me sesewerowero asuhuiga nalö mianŋörenŋök mönö tala enŋuma.

¹⁸ Nene kötni qesiŋniga siriuret wahiŋinambuknöŋ geba kölgeri, mi kewö: Yeŋön Buŋa keu mötketka uruŋine geza.

¹⁹ Gezapmö, gölmenöŋ malmalgö waimanŋatŋi aka monenŋ inap memegö urukönöpŋi ahuba lömbörim enŋimakzal. Qetbuŋaŋinambuk akingö köpösönŋögetka sihim kömbönaŋi bölöŋi tosatŋan mewöyök uruŋine dumgöba Buŋa keu böbölohot mem wanŋize. Mewö aiga ölni qahö gilipitŋi (ambetakŋi) akŋe.

²⁰ Nene kötni gölme ölöpnje qesiŋniga geba kölgeri, mi ambazip kewöŋi: Yeŋön Buŋa keu kezap ala möta möt anŋön köla pöndaŋ kinda ölni mi-wikŋaimakze. Tosatŋan keu jit mohoknöhök kötni 30 miwikŋaimakze. Tosatŋan ölni 60, tosatŋan keu köt mohot mohot mienŋö ölni 100 mem sehiba miwikŋaimakze.” Mewö.

* 4:12: Ais 6.9-10

Lampe mi asakñi neŋgimapkōra ahōza.

Luk 8.16-18

²¹*Jisōsnōñ keu kun kewō jiyök, “Kunñan lambe me kiwa memba ohotiriba kimbut me dum bapñe alma me qahō? Mi waniñe alma? Mi mönō miangō dum tatatnōñ aukñe alma.

²²*Mewōñanök yuai kun asambötket ahözawi, mi mönō aukñe asuhum tiñgitmapkōra ahōza. Yuai kun köl turuget ahözawi, mi mönō lulunget kötulmapkōra aka ahōza.

²³Kunñan urukezapñambuk malja ewō, yaññon mönō dopkeu ki kezap ala möt kutuma.” Mewō.

Denōwō diwelopmen ahuza?

²⁴*Jisōsnōñ keu kewō jii mötket, “Keu mötzei, mi mönō möt aňñon köla urukōnimñine ala köl guliba malme! (Mewō malgetka uruñini diñgiiga mötmötñinan qariiga möt kömume.) Inini tosatñi yeñgō keuñini kewōta jim tekōmei, Anutunōñ mönō jimkutukutuñini mohot miangō dop nannñini keuñini kewōta jim tekōma. Dop mi mönō oñgita likepñi melenj engima.

²⁵*Miangō kōnañi kewō: Kunñan mötkutukutuñambuk maljawi, Anutunōñ mönō mi toroqem wañgiiga malmappmō, kunñan mötkutukutuñi qahō maljawi, Anutunōñ mönō mötmötñi morōñi ahözawi, mi mewōyök qekōba wañgitma. Mewō.

Buñ keu kötñi mi korapñambuk.

²⁶Jisōsnōñ dopkeu kun kewō jiyök, “Anutugōreñ bemtohoñi mi kiangō dop: Azi kunñan nuwe anda nene kötñi qesiñda gilma.

²⁷Qesiñda gila anda suñgem silim ahōba wahōta ahōba wahōriga nene kötñañgō korapñi jula korakze. Denōwō jula korakzei, mi nannñak qahō möt kutuza.

²⁸Gölmenōñ nannñök nam köli ölni asuhumakza: Mutuk ipñi, kōnañgep ölni aka miangō andōñe ölnañgō kötñi mi körek asuhuba qarim tekōme.

²⁹*Ölni qarim tekōba öliiga ölni memegō nalōñi aiga welenqeçeupurpñi melaim eñgiiga souñini kapenkapenñgōñi jitñinambuk memba ölni membingōra nupñe anme.” Mewō.

Nejoñ kötñañgō dopkeu

Mat 13.31-32, 34; Luk 13.18-19

³⁰Jisōsnōñ dopkeu kun kewō jiyök, “Anutugō bemtohoñi mi wanatpuk dop albinak me wanat söpsöp keu jiba jim asaribinak?

³¹Mi nejoñ kötñañgō dop kewō akza: Kötñi mi morō közözömñi. Mi gölmegō nene köt pakpak miengō eretñini akza. Mewō aiga nup gölmenōñ esize.

³²Esizemō, jula wahōta yöha pakpak eñgongita qariba börōñi ketañi gili anje. Mewō gili angetka kōnakembagō neiñi neiñi mienñon aipñini miangō aumñe alakze.” Mewō.

Jisōsnōñ dopkeu gwōtpuk jiyök.

³³Jisōsnōñ dopkeu mewōñi mewōñi mi gwōtpuk jiba mala Buñ keu jiiga mötket. Möt kutugerañgō dop mi jiiga möta malget.

³⁴Nalō dopkeuñi pakpak mi dopkeunōñ jiba malök. Keuñi kun öne kude jiyökmō, gwarekurupñi yembuk nannñinök malgetka keu pakpak miengō kōnañini mi jim asarim eñgiba malök. Mewō.

* 4:21: Mat 5.15; Luk 11.33 * 4:22: Mat 10.26; Luk 12.2 * 4:24: Mat 7.2; Luk 6.38 * 4:25: Mat 13.12; 25.29; Luk 19.26 * 4:29: Joel 3.13

Jisösnöñ jiiga raidimbom göröñ qeyök.

Mat 8.23-27; Luk 8.22-25

³⁵ Wehön miangören mare aiga Jisösnöñ gwarekurupñi kewö jii mötket, “Mönö mosöta anğö kutuba likepñe anğotpin.”

³⁶ Mewö jiiga ambazip kambu enğömosöta Jisös wañgigetka wañgenöñ tari anget. Wañge tosatñi mi mewöyök yembuk awatan anget.

³⁷ Angetka raidimbom ketanjan ömtöröp (töröpñanök) giliga sirinöñ wañge uruñe gegetka wañge numbuñe qemangö ahök.

³⁸ Mewö aiga Jisösnöñ wañge teteköñe tata qömböñnöñ nariba gaun ahöyök. Gaun ahöiga gwarekurupñan anda möndöba jiget, “Hei böhi! Nini anğönöñ ayuhubingöra akzin. Miangö waimanjatñi kun mötzan me qahö?”

³⁹ Mewö jigetka imbiñi möta luhut aka siri kewö jim qetal etkiyök, “Mönö bököba öne ahönöñ!” Mewö jiiga luhutnöñ döngöiga sirinöñ nöñ qeba ahöyök.

⁴⁰ Mewö aka kewö jim enğiyök, “Inini mönö wuanöngöra kenğöt mötmöt azia akze? Denöwögöra aka Anutu qahö möt narize? Sömbuñini mönö öne mötze.”

⁴¹ Jiiga awöwöliba qem sömbuñini möta eraum mötket, “Yei, azi kia mönö denöwöñjan malja? Yañön mönö luhut aka köwet jim kutum etkiiga jitñi tem köljahot?” Mewö.

5

Ömenöñ bau uruñine gegetka azinöñ ölöwahot.

Mat 8.28-34; Luk 8.26-39

¹ Mewö asuhuiga anğö kutuba likepñe Gerasin yengö gölmenöñ anğotket.

² Anğota körökñe öngögetka Jisösnöñ wañge mosöriğa miangörenök azi ömenambuk kun mi qaksirinöhök kaba kinda Jisös miwikñaiyök.

³ Azi mi qaksirinöñ mala qamöt köteñi esiba urorohoget ahögeranğören ahöm malök. Azi körekñön könaböröñi tapep (muñgamuñga) kösönöñ jöhöbingö osiba malget.

⁴ Indimñi gwötpuk könañi tapep kösönöñ jöhöba börötakñi qeba malgetmö, börö takñi kusula köna kösöñi titikutuba maliga körekñan i galöm köl osiget.

⁵ Osiba sunğem asak dop sundan qaksirigö köt köteñnöñ me kundunje lanlan ahöba malök. Mewö mala silata qeta silenji kötnöñ qem kutumutuba malök.

⁶ Jisösnöñ tikep kaiga eka ösumñan kaba gölmenöñ kösutñe geba simin kölök.

⁷⁻⁸ Simin kölīga Jisösnöñ ömeñi mi kewö jim wañgimangöra ahök, “Öme bölöñi! Gi mönö azi ki mosöta anöñ!” Mewö jimangöra aiga qet bölöbölö ketanji qeta jiyök, “Aek! Gi Jisös, Anutu öngöñgöñanğö Nahönñi akzan. Gi denöwö ak niñgimangöra kazan? Nöñön Anutugö jemesoholñe ulet gihizal: Gi keu jöhöba jöjöpaj keunöñ jim köhöiba mönö sihimbölö könöpñambuk kude ak niñginöñ.”

⁹ Mewö jiiga kewö qesiyök, “Gi qetki niñi?” Qesiiga jiget, “Nini gwötpuk maljinangöra qetnini Lijön jizin.” Mi nanine keunöñ Kerök kambu ketanji.

¹⁰ Mewö jiba kapañ köla kewö ulet wañgiget, “Gi neñguatanğöbanak, mewö mönö gölme kianğörenök kude melaim neñgiman.”

¹¹ Kösutñine kundunji marömñe miangören bau kambu ketanji kun gwözözak uruñe kulunđa malget.

¹² Miangöra ömenöñ kewö jiba Jisös ulet wañgiget, “Göñön melaim neñginöñga nini ölöp bau miengö uruñine gebin.”

¹³ Jigetka “Mönö anda geget,” jiba jim kutum enğiğa azi uruñeyök kota anda bau uruñine geget. Gegetka miangörenök bau kambu 2000 miangö dop mi mönö luhuba nembönembönöñ anda jororonğöba o anğönöñ geba nemulahöba kömuget.

14 Kömugetka bau galöm yeñön ölöñ unjurata taon aka miri morömorö miangörenj anda keu buzupñi jiget. Jiget mötketka ambazip sesegilgil yeñön yuai asuhuyöhi, mi ekingöra kaget.

15 Kaba Jisösgörej kanğota eketka azi öme kambunambuknönj malöhañön mönö opo sileötañi törörök jöhöba tata uruñi amöriiga imbi mötmötñi pakpak asuhuiga eka awöwöliget.

16 Kingetka bau mi denöwö geba kömugeri aka azi ömeñambuk yangörej yuai asuhuyöhi, mi ekerañön kösohot yahöt mi jiget mötket.

17 Möta kinda Jisösnönj mindimindiri sel gölmeñini mosöta anmapkö ulet wañgiget.

18 Ulet wañgigetka mosöta wañgenönj öngömamgöra ahiga azi ömeñambuk malöhañön kaba Jisösbuk mohotñe anda malmamgöra qesiyök.”

19 Qesiyökmö, Jisösnönj qetal wañgiba kewö jii mörök, “Gi mönö mirige anda tinitosolomurupki enğeka Kembunönj angöletot ketañi aka ak-kömum gihiyöhi, miangö kösohotñi jinönğa mötme.”

20 Mewö jiiga mosöta anda Jisösnönj angöletot ketañi ketañi ak wañgiyöhi, miangö keuñi könahiba Ten-taon distrik uruñe jim sehiiga körekñan welipköget. Mewö.

Jairusnönj böratñangöra Jisös köuluköyök.

Mat 9.18-26; Luk 8.40-56

21 Jisösnönj wañgenönj öngöba lilingöba angö kutuba likepñe kaiga ambazip kambu gwötpukñan yangörej kaba tokogetka angö jitñe kinget.

22 Kingetka köuluk mirigö keu galöm kun qetñi Jairus yañön kaba Jisös eka wösöñe geba simin köl wañgiyök.

23 Simin köl wañgiba kapan köl köuluköba kewö jiyök, “Böratni moröñan mönö kömumangö akza. Mönö kaba börögi qakñe alnönğa ölöwaka toroqeba malma.”

24 Mewö jiba Jisös wañgiriga mohotñe anohotka ambazip kambulelembe yeñön andönjire anda ölöqölököba liliköm etkiba anget. Mewö.

Kawöl ambi kunönj Jisösgö malukuñi misiriyök.

25 Angetka miangörej sutñine ambi kun malök. Yañön (yara) yambu 12:gö dop köiñnönj ehiga nalö dop kawöl yöhöiga malök.

26 Mewö mala sihimbölö gwötpuk möriiga sile galöm gwötpukñan yangö nup megetka baukbauk kun kude miwikñaiiba malök. Yañön sile galöm ambazip yeñgö töwañinañgöra monen inapñi körek gila malökmö, kawölñi miañön mönö mem bölim wañgiiga malök.

27-28 Mewö mala Jisösgö buzupñi möta kewö jiyök, “Nönön i oseimangö möt lömböriba malukuñeyök borom kun misiribileñak ewö, mönö ölöp ölöwakñam.” Mewö jiba ambazip kambu sutñine Jisösgö andöñe anda malukuñe misiriyök.

29 Misiriiga sepñi miangörejök jöpköiga qemjem-mamjenan qahöwahiga sileñan ölöwahiga mörök.

30 Ölöwahiga Jisösnönj miangöreök ösumñi kun kutuba anöhi mi möta ambazip kambu sutñine lilingöba jiyök, “Dañön malukuni misiriza?”

31 Mewö jiiga gwarekurupñan kewö jiget mörök, “Ambazip kambunönj ölököba liliköm gihiba goseize. Mi eka denöwö ‘Dañön nömisiriza?’ jizan?”

32 Mewö jigetmö, Jisösnönj kunbuk “Dañön mi akza?” jiba mi miwikñaimamgöra lilingöba uba enğehök.

33 Enğehiga ambi silene angöletot asuhuyöhi, yañön mi möta miangöra kenğötñi möta jönömñi unduiga kaba Jisösgö wösöñe geba simin köl könañi pakpak jiiga mörök.

³⁴ Jisösnöñ mi möta kewö jii mörök, “Böratni, mötnaripkan mönö mem ölöwak gihiza. Qemjem-mamjenğan mönö qahöwahiga ölop urubönjöñnön anman.” Mewö.

Jisösnöñ Jairusgö böratni mem guliyök.

³⁵ Keu mewö jiba kiniga köuluk mirigö keu galömñangö mireyök kunñan welen kaba Jairusgöra jiyök, “Böratki kömuza! Mianğöra böhigö qakñe lömböt toroqeba kude alman.”

³⁶ Jiiga Jisösnöñ keu mianğö nönöñgan aka köuluk mirigö keu galömñi kewö jii mörök, “Keñgötki kude mötnöñ! Mönö ni möt narim niñginöñ.”

³⁷ Mewö jiba ambazip tosatñi enğömosöta Pitö, Jeims aka Jeimsgö munñi Jon miyök enğuanğiri i wuatangöba anget.

³⁸ Anda köuluk mirigö keu galömñangö mire anğotketka ambazip kambu göju megetka engehök. Gwötpukñan jinğen köla köhöikñanök sahöta amburereñ meget.

³⁹ Engeka mire öngöba kewö jii mötket, “Inini mönö wuanöngöra göju memba sahötze? Morö mianön qahö kömuzapmö, gaunök ahöza.”

⁴⁰ Mewö jii mötket gönahit ewö aiga gön köl wanğigetmö, yanön i körek enğuatangöba morögö iwinamñi aka tosatñi yambuk malgeri, miyök enğuanğiriga morönöñ ahöyöhangöreñ öngöget.

⁴¹ Öngögetka börat mi böröñe memba yanğöra jiyök, “Talita kum.” Mi nanine keunöñ Ambi moröñi, ni göhöra jizal: Mönö wahötnöñ!

⁴² Mewö jiiga ambi (yara) yambuñi 12 mianön mönö mianğöreñök wahöta kinda anda kayök. Mewö aiga eka kesötñini yöhözömgöba welipköget.

⁴³ Welipkögetka mianğö buzupñi kun jiget mötpepukö jiba sonğo köhöikñi al enğiyök. Al enğiba ambi moröñi numbu nene wanğiget nemapkö jiyök. Mewö.

6

Nazaret yeñön Jisös andö qeget.

Mat 13.53-58; Luk 4.16-30

¹ Mi asuhuiga Jisösnöñ Jairusgö miri gölme mosöriga gwarekurupñan wuatangöba yambuk anda jisösgö malqarip taonön anğotket.

² Sabat kendonöñ kaiga köuluk mire öngöba Buña keu könahiba kusum enğiyök. Kusum enğiiga möta ambazip gwötpukñan auruba welipköba kewö jiget, “Yei, kezapjupjup! Yuai pakpak ki mönö denikeyök möta jiza? Mötkutukutuñi mi mönö dañön kusum wanğiiga jiza? Aka anğöletot kukösumñinambuk mewöñi mi mönö dañön inahöi böröñan meiga asuhide?”

³ Azi ki mönö miri kianğö mitimqeçe azia. Mariagö nahönñi aka Jeims, Josef, Juda aka Saimon yeñgö datñina. Nenurupñan mönö sutnine ki malje.” Nazaret yeñön mewö jigetka uruñinan böliiga mianğöreñ qaköget.

⁴ *Qakögetka Jisösnöñ kewö jii mötket, “Kezapqetok azigö sepkitip aka tinitosolomurupñan mönö nanñi taonöñ jijiwilit ak wanğimakzemö, miri tosatñi mianğöreñ mewö qahö.

⁵ Mewö akerangöra Jisösnöñ kawöl ambazip mohot mohot böröñi qakñine ala mem ölöwak enğiyökmö, anğöletot kukösumñinambuk tosatñi memangö osiyök.

⁶ Mewö ahiga mötnaripñinan qahö asuhuiga yanğisenñanğöra aka auruyök. Auruba Nazaret mosöta kösutñe miriñi miriñi liliköba Buña keu kusum enğiba malök. Mewö.

Jisösnöñ gwarekurupñi 12 melaim enğiyök.

Mat 10.5-15; Luk 9.1-6

* 6:4: Jon 4.44

⁷ Jisösnöñ gwarekurupñi 12 mi engoholi kagetka könahiba yahöt yahöt pak-pak melaim engiyök. Melaim engiba ömewöröme közöl engimegö kukösumñi engiyök.

⁸ *Mi engiba kewö jim kutum engiyök, “Köna anmeangöra öröñjini memba anme. Yuai tosatñi kun kude meme. Köna nalem qahö, gösö qahö me soujeni mi irimunganine kude jöhöme.

⁹ Köna esu ölop könanine jöhöba maluku semönñi qahöpmö, mohot meme.”

¹⁰ Mewö jiba kewö jii mötket, “Anda miri denike denike angotmei, mönö miangöreñök mala nup memba taon mi mosöta köna anme.

¹¹ *Anda mala miri kunöñ angotketka qahö köl öröm engiba keunji qahö mötketka nesampurekñini mönö kewö jiba kondel engime, ‘Nini engö gölmenöñ kainga sölbuham köna tambönine mekötahözawi, mi mönö tim tönjöraringa nanñine lilingöba gema.’ Mewö jigetka könanamñini solanñi möt kutugetka ölop miri me taon mi mosöta toroqeba anme.”

¹² Mewö jiiga mosöta anda ambazip uruñi melenmegö Buña keunji jim sehiba malget.

¹³ *Mala öme gwötpuk enguatangöba kawöl ambazip gwötpuk kelöknöñ engömiriba mem ölöwak engiget. Mewö.

Kiñ Herodnöñ kenjötni mörök.

Mat 14.1-12; Luk 9.7-9

¹⁴ *Jisösgö qetbuñan sehiba kiñ Herodkö kezapñe gei mörök. Ambazipnöñ kewö jiget, “Jon o melun azinöñ mönö kömupnöhök wahöta nupñi meiga angöletot kukösumñinambuk asuhumakze.”

¹⁵ Mewö jigetmö, tosatñan kewö jiget, “Mi mönö Elaija (Elia)” Tosatñan toroqeba jiget, “Mi kezapqetok azi walñi yengöreñök kun.”

¹⁶ Mewö jigetmö, kiñ Herodnöñ mi möta kewö jiyök, “Jon o melun azi nöñön jibi jölñi kutugeri, yanön mönö kömupnöhök wahöta malja.” Waimanjat möta Mewö jiyök.

Jongö jölñi kutugetka kömuyök.

¹⁷ *Mi kewögöra jiyök: Herodnöñ munñi Filipkö anömñi Herodias ölöñ meiga Jon o melun azinöñ kiñ jim wanjiiga opotöröp melaim engiiga anda Jon memba jöhöba kösö mire al wanjiget.

¹⁸ Jonöñ Herodköra keu kewö jiyök: Gi qamböt ki memba mala Köna keu ongitzan.”

¹⁹ Mewö jiiga Herodiasnöñ Jon kazik ak wanjiba qeget kömumapkö mörökmö, miangö könanj kun qahö miwikñaiyök.

²⁰ Qahö miwikñaija Jonöñ azi solanñi aka sarakñi töröñi ahöhi, mi möta sel jöhöba kölközizip ak wanjiba Jongöra kenjötni möta malök. Mewö mala Jongö jitneyök keu möröhi, mi uruñi kungugetka keu gwötpüköra uruyahöt ahök. Mi töndup töndup Jongö keunji mötmangö sihim mörök.

²¹ Mewö aiga Herodiasnöñ Jon qemangö könanj qahö miwikñaija maliga miangö nalöñi ölopñi kewö kam kunguyök: Kiñgö ahuahu nalöñan kaiga közölömbuan ala jembon aka suahö galömurupñi aka Galili prowinsgö jitnememe bohonñi mi köl öröm, engiiga kaba tatket.

²² Kaba tatketka Herodiasgö boratñan miri miangö uruñe kangota danis aliga Herod aka yambuk tebol liliköba tatkeri, yeñön miangö eksihimñi gwötpuk mötket. Mewö mötketka kiñnöñ ambi serangöra kewö jiyök, “Boratni! Wani yuaigöra sihimgi mötzani, mi ölop qesinöñga tököm gihimam.”

* 6:8: Luk 10.4-11 * 6:11: Apo 13.51 * 6:13: Kemb 5.14 * 6:14: Mat 16.14; Mak 8.28; Luk 9.19

* 6:17: Luk 3.19-20

23 Mewö jiba keu mi jöjöpañ keunöñ jim köhöiba kewö jii mörök, “Wani yuaigöra qesim ningimani, mi mönö ölop gihimam. Yuai mi me mi me prowins galöm kölakzali, mi tok ölop endenda likepñi kun gihibiga galömñi akñan.”

24 Mewö jii möta yaigep anda namñi kewö qesim wañgiyök, “Namni, ni mönö Kiñnön wani yuaiya ningimapköra qesimam?”

Mewö qesim wañgiiga kewö melenök, “Mönö jinönnga Jon O-melun azigö jölñi yandigetka nöropñi memba kaba ningiman.”

25 Mewö melenniga miangörenök miri uruñe kiñkiñgöba kiñgöreñ öngöba kewö qesiba jiyök, “Kewöni! Nönön sihimnan kewö mötzal: Göñön mönö jimkutunönnga Jon O-melun azigö jölñi yandiba nöropñi memba kaba köndenön algetka mia döldöpki ningiman.”

26 Mewö jiiga kiñgö uruñan kömbuhiiga wösöbirik mörökmö, jöjöpañ keuñan jöhöi ketaurupñan mi mötketka yeñgö jemesoholñine etpapuköra qeqesini andö qemangö möt lömböriba tököyök.

27 Tököba miangörenök opotöröpñi kun melaiba jiyök, “Gi mönö anda Jongö jölñi yandiba nöropñi memba kaman.”

28 Mewö jiba melaiiga kösö miri gwaröñe anda jölñi yandiba nöropñi memba kaba köndenön ala ambi seram mi wañgiiga namñi wañgiyök.

29 Jongö gwarekurupñan miangö buzupñi möta anda qamötñi memba qaksirigö köt köteñnön ala löm kölget. Mewö asuhuyöhangöra kiñ Herodnön könañgep Jisösgöra jiyök, “Jonön mönö kömupnöhök guliba wahöta malja.” Mewö.

Jisösnön azi 5000 nene gumohom engiyök.

Mat 14.13-21; Luk 9.10-17; Jon 6.1-14

30 Melai melai azi Aposol yeñön Jisösgöreñ kaba tokoba yuai memba ambazip kusum engigeri, miangö kösohotñi pakpak jiget mörök.

31 Jiget möriga ambazip totnön totnön qösösök kaba anda aketka silenini köñgañiiga nene nembangö nalö qahö ahöyök. Miangöra Jisösnön gwarekurupñi kewö jii mötket, “Inini mönö kaba gölme kötikñe naninök malbingöra anda borom kun luhut meme.”

32 Mewö jiiga engömosöta wañgenön öngöba gölme kötikñi kungen nanñinök malbingöra anget.

33 Angetka ambazipnön mi eka gwötpukñan miangö buzupñi möta taon aka miri dop miengörenök gölme köna kiñkiñgöba mutuk anda miangören angotket.

34 *Angotketka Jisösnön wañgenöhök eta ambazip kambu ketani engehiga lama galömñini qahö tandök ilingösön lan malgetka yeñgöra wösöñi mörök. Wösöñi möta könahiba Buña keu könañi könañi kusum engiyök. Mewö.

Jisösnön azi 5000 nene gumohom engiyök.

35 Mewö aka maliga miri jeñan teköba gemangö ahiga gwarekurupñan Jisösgöreñ kaba kewö jiget, “Böhi! Nini gölme kötikñi kiangöreñ malinga miri lök söñaumangö akza.

36 Miangöra gi ölop ambazip ki melaim enginönnga miri aka kouw dowe dowe tat anjei, miangöreñ anda numbu nenenini söngöröñi memba neget.

37 Mewö jigetmö, kewö melennda jii mötket, “Enön mönö nanñinak i nene gumohom engime.” Mewö jiiga jiget, “Neñön mönö denöwö akinto? Nup meme nalö 200:kö töwañi (Kina 1000,-) ahöza. Moneñ mia memba anda nene beret söngöröñi memba gumohom engibingöra jizan me?”

* 6:34: Jan 27.17; 1 Kiñ 22.17; 2 Hist 18.16; Eze 34.5; Mat 9.36

³⁸ Mewö qesim wanjigetka jiyök, “Nanñine nene beret dawik ahöza? Mi anda eket.” Mewö jiiga gösöñini qeanda jiget, “Beret 5 aka söra yahöt mia memba maljin.”

³⁹ Mewö jigetka Jisösnöñ ambazip kambu kewö jim kutum engiyök, “Ambazip pakpak, inini mönö denä nene nemingö kambu morömorö tokoba luplup görökñe geba tatket.”

⁴⁰ Mewö jim kutum engiiga kambuñi kambuñi dowe dowe denä tatket. Kirip tosatñi 100 aka tosatñi 50 mewö mewö tokoba tat anget.

⁴¹ Tat angetka beret 5 aka söra yahöt mi memba Suepnöñ ui öngöiga kötuatköba beret mindipköba gwarekurupñi engiiga ambazip kirip dop mendenä sutñine alget. Söra yahöt mi mewöyöhök kambu pakpak yengöra mendenök.

⁴² Mendenä niga ambazip körekmakörek nemba nem timbiren aket.

⁴³ Nem timbiren aka nene kitipñi kitipñi mosötkeri, mi gwarek yenön qezakögetka sakap 12 miangören geba kokolak qeyök. Mewöyök söra kitipñi mi mem kiripköget. Mewö.

⁴⁴ Azi beret negeri, yengö janğöñini mi 5000.

Jisösnöñ o angö qakñe tiba tiba anök.

Mat 14.22-33; Jon 6.15-21

⁴⁵ Neget teköiga Jisösnöñ miangörenök gwarekurupñi jim kutum engiba kewö jiyök, “Inini mönö wanğenöñ öngöba qeljine o angö kutuba likepñe Betsaida mire anme. Nöñön ölop nalö sutñe ambazip kambu ki melaim engibagun kamam.”

⁴⁶ Mewö jiba yaizökzök jim engiba engubula kundune öngöba köuluköyök.

⁴⁷ Köuluköba mali mare ahiga nannik kötikñi kundune maliga wanğeninan angö bibine anök.

⁴⁸ Ani lökuatnöñ qeba qem bibihiba nanğöget aniga luhutnöñ angerangörenök gila kai lömböriiga bömbömgöget. Miri awöranğöiga (3-6 kilok) miangören Jisösnöñ mewö engeka o angö qakñe tiba tiba gwarekurupñi yengören Kaba enğonğitmangö ahök.

⁴⁹ O angö qakñe tiba tiba kaiga eka “Köwet Songoriñnöñ kaza!” jiba könahiba qeta silatket.

⁵⁰ Qeta silata körek i eka kenğötporiñ aketmö, Jisösnöñ miangörenök keukeu jiba kewö jii mötket,

“Alaurupni! Mönö ewebibiñinambuk saitingit malme. Nanak kazal. Kenğötñini kude mötme.”

⁵¹ Mewö jiba yengören wanğenöñ öngöiga luhutnöñ nöñ qeba göröñ alök. Göröñ aliga jönömñini undui önöñi qahö auruget.

⁵² Mutuk beret mem sehiba gumohom engiyöhi, miangö könani qahö möt asarigetmö, uruñinan gwözöñniga tok auruba tatket. Mewö.

Jisösnöñ Genesaret mala mem ölöwöwöw nup meyök.

Mat 14.34-36

⁵³ O angö kutuba likepñe Genesaret mire angota wange mosöta saknöñ geget.

⁵⁴ Wange mosöta Saknöñ gegetka ambazipnöñ Jisös miangörenök möt kutum wanjiget.

⁵⁵ Möt kutum wanğiba keu algetka kiñkiñgöba mindimindiri sel gölmenine miri dop liliköget. Lilikögetka möta könahiba kawöl ambazip kululunöñ anğum engiba Jisösnöñ miri denike malöhangö dop enğuangita kaget.

⁵⁶ Miri dop, taon, miri me koum kungö uruñe anöhangö dop kawöl ambazip enğuangita sombemñine al engiget. Al engiba silenje me Jisös malukuñangö

sunje misiribingö ulet wangiba malget. Misirigeri, körek yeñon mönö ölöwak teköget. Mewö.

7

Ambösakon yeñon keu kusum sohoget.

Mat 15.1-9

¹ Köna keugö kapañkölköl aka miangö böhi tosatni Jerusalem sitinöhök kageri, yeñon Jisösgöreñ kaba tokoget.

² Nalö miangöreñ Jisösgö gwarekurup tosatnan böröñini kude sanğonda dom amöt qahö qeba nene negetka engeka uruñini böliyök.

³ Farisi (Köna keugö kapañkölköl) aka Juda ambazip tosatni pakpak yeñon ambösakon yeñgö silikñini wuatangöba malget. Miangöra böröñini mutuk sanğon soroköbagun nene nemalget.

⁴ Mewöyök nupnöhök me maketnöhök kamei, mutuk o utuba arim tönjoratagun nene misirimalget. Mewöyök kiwi qambi, közökimbut aka jout pakpak mi sanğonda amöt qemalget. Silik mewöñi mewöñi mi gwötpuk wuatangöba malget.

⁵ Miangöra Köna keugö kapañkölköl aka miangö böhi yeñon Jisös kewö qesim wangiget, “Göhö gwarekurupkan wuanöngöra ambösakoninañgö silikñini qahö wuatangöba böröñini domamöt qahö qeba töndup nene neze.”

⁶ *Mewö qesim wangigetka kewö jii mötket, “O urumelengö silesile ambazip, kezapqetok azi Aisaianöñ mönö engö könañamñini törörök indela Buzup Kimbi kun kewö ohoi ahöza,

‘Ambazip kambu kianñon mönö numbu jitñinan ölopñanök göda qem niñgimakzemö, uruñinan nönöngan ak niñgiba kungen algetka köröwen ahöza.

⁷ Mewö ahöiga nöngö waikni öne töhön memba möpöseim niñgimakze.

Köna keu kusum engibin, jiba salupñe ambazip yeñgö jimkutukutuñini mi numbu o alakze.’

⁸ Aisaianöñ mewö ohoyök. Inini mönö miangö dop Anutugöreñ jöjöpañ keu andö qeba ambösakonñinañgö silikñi wuatangömakze. Mi qahö dop kölja.”

⁹ Mewö jiba kewö jiyök, “Nanñini silikñini walñi wuatangöbingöra mönö ölopñanök Anutugöreñ jöjöpañ keu qeapkömakze.

¹⁰ *Miangö keuñi kun kewö: Mosesnöñ kewö jim kutuyök, ‘Iwinamgi mönö göda qem etkimakñan,’ aiga ‘Kunñan iwiñi me namñi qesuahömawi, i mönö qegetka kömuma.’

¹¹ Mewö jim kutuyökmö, inini keu mi onğita kewö jimakze, ‘Kunñan iwinamñi yetköra kewö jima. Wösöni mötzal. Nöngö nangönañgö yuaini bunja qem anğubahorak, mi lök Anutugö danğe tahaya albi ahöza. Mi saiwap naluköra kewöta albi ahöza.

¹² Kunñan mewö jiiga dop kölma.’ Mewö jiba jöhöm wangigetka iwinamñi yetköra baukbauk kun qahö toroqeba etkimakña. Mi qahö dop kölja.

¹³ Yei! Mewö aka nanñini ahakmemeninañgö silikñini jim kutuba mianñon Anutugöreñ jöjöpañ keu utala omañi aka pömsöm qemakza. Inini yuai mewöñi gwötpuk ahakze.” Mewö melenğ engiyök. Mewö.

Azi uru mi denöwö tölohoba lantiza?

Mat 15.10-20

¹⁴ Jisösnöñ ambazip kambu kunbuk engoholi kagetka kewö jii mötket, “Inini mönö körek keu ki kezap ala möt asarime.

* **7:6:** Ais 29.13 * **7:10:** Eks 20.12; 21.17; Lew 20.9; Dut 5.16

15 Azi yaigepneyök yuai uruñe gemakzawi, mianjon mönö tölohom wanjimangö osimakzawimö, nanñi urukönömneyök keu kota erakzawi, mianjon mönö tölohom wanjimakza.

16 Kunñan kezapñambuk malja ewö, yanjon mönö keu ki kezap ala möt kutuma." Mewö.

17 Jisösnöñ mewö jiba ambazip kambu engömosöta anda miri kunöñ öngöyök. Öngöba tariga gwarekurupñan dopkeu mianjö könañangöra qesiget.

18 Qesigetka kewö jii mötket, "O alaurupni, inini mewöyök mötmötñini ölopñi qahö akze me? Nene yuai azi yaigepneyök uruñe gemakzawi, mi tölohom wanjimangö osimakza. Mi möt kutuze me qahö?"

19 Mi urukönömñe qahö gemakzawimö, kömgokñe geba yaigep erakza." Jisösnöñ keu mewö jiba mianjon "Numbu nene pakpak mem sarahim teköyök."

20 Jisösnöñ toroqeba kewö jiyök, "Azi urukönömneyök keu kota erakzawi, mianjon mönö tölohom wanjimakza.

21 Ambazip uru könömñineyök yuai kewöñi asuhaba korakza: Keu bölöñi mötmöriba serowilin akingö mörakze. Yongorö memba suna jinañ memba ambazip enguget kömumegö mörakze.

22 Qesabulum akingö mörakze. Membagu membingö nepaqepalok köpösöngömakze. Bidanña gatmisimisi, jiliwitinñ aka isimkakalek akingö mörakze. Lösö jiba urupik akingö mörakze. Kezapjupjup aka körogisigisi akingö mörakze. Söngöröqök mala andöqeqe keu yöhösañ jiba Anutu me-paiköbingö mörakze. Jakbak-öranbörañ aka uruqahö ahakze.

23 Yuai bölöñi pakpak mianjon mönö ambazip uru könömñineyök kota ambazip tölohom engimakza." Mewö.

Kenan ambi kunñan kapan köla köuluköyök.

Mat 15.21-28

24 Jisösnöñ wahöta Genesaret gölme mosöta siti qetñiri Taiö aka Saidon mietkö distrik qetñi Fonisia mianjö uruñe anök. Anda miri kunöñ öngöba buzupñi kunñan mötpapuköra numbuñini muhungöyökmö, töndup tölapñe malmangö osiyök.

25 Osiiga mianjöreñök ambi kun böratñi moröñan ömenambuk maliga Jisösgö buzupñi möta yangöreñ kaba könañe geba simin kölök.

26 Ambi mi Judaya qahöpmö, Grik keu jiba malök. Iwinamñan Siria prowinsgö Fonisiagöra. Yanjon böratñangö uruñeyök öme közölmapköra ulet wangiyök.

27 Ulet wanjiiga kewö jii mörök, "Juda nini mutuk nanine nahönböraturni gumohom engiinga bikñi enguma. Mianjöra morö yengö miriñineyök beret memba kiam engiinga qahö dop kölbapuk. Juda nini kianurup engö qetñini kiam qerakzin. Nöñon mutuk Juda ambazip bauköm engibiga kantri tosatñi enjon mönö kiamgö dop mamböta malme."

28 Mewö jii möta kewö melenök, "Kembu, mi ölop mötzalmö, kiam moröñi yenjon mönö mewöyök morö yengöreñ nene boromñi tebol bapñe eriga nemakze."

29 Mewö melenniga Jisösnöñ kewö jii mörök, "Keu mewö jizanañgöra ölop möt gihizal. Öme mianjon mönö döлки böratki mosöta anja. Mianjöra ölop anman."

30 Mewö jii möta miriñe ani ömenöñ böratñi mosöriiga dumñe ahöiga ehök. Mewö.

Jisösnöñ azi kun möhamgöyök.

³¹ Jisösnöñ kunbuk Taiö siti gölme mosöta Saidon sitinöñ anda ongita mösököba Ten-taon gölmegö bibinji ongita Galiligö o angö kösutñe kayök.

³² Kaiga kezapduhup azi kun keunji qahöwaktapaköra ahöhi, mi wangita Jisösgöreñ kaget. Kaba böröñi nöropñe almapköra qesim wangiget.

³³ Qesim wangigetka azi mi wangita ambazip kambu mosöta kungen anohot. Anda Jisösnöñ börö suapñi kezapñe ala kinda kunbuk nanñi börö suapñe söutköba nesilamñe misiriyök.

³⁴ Misiriba suepnöñ ui öngöiga osongombuk köuluköba nanñe keunöñ “Efata,” nanine keunöñ Tohonöñ! mewö jiyök.

³⁵ Mewö jiiga kezapyahötñan tohoyohotka nesilamñan lolohoiga keunji ölopñanök jiyök.

³⁶ Jiiga Jisösnöñ miangö buzupñi ambazip jiget mötpepuköra qetal engiyök. Qetal engiba kapan köliga yeñon mi kapan köla jim sehiba malget.

³⁷ Jim sehiba malgetka ambazipnöñ kamböñda welipköba kewö jiget, “Yuai pakpak ölopñanök ahakza. Kezapduhup kezapñini metohoiga mötketka ambazip mötökñi yeñgö nesilamñini pösariga keu jimakze.” Mewö.

8

Jisösnöñ ambazip 4000 nene gumohom engiyök.

Mat 15.32-39

¹ Nalö miangöreñ ambazip kambu ketanjan dumñe kunbuk tokoget. Nenenjini qahö malgerangöra Jisösnöñ gwarekurupñi engoholi yangöreñ kagetka kewö jii mötket,

² “Nöñon ambazip kambu kienjöra wösöni mötzal. Yeñon nöngöreñ kaba wehön karöbut lök mala kotketka nenenjini qahöwahiga ekzal.

³ Yeñgöreñök tosatñan köröwenök kaba malgetka nöñon ‘Ölop mirinje anme,’ jibi nene qahö negetka öne melaim engibiga könanöñ anda mala kemañe jeñini gili tirinbirin akepuk.”

⁴ Mewö jiiga gwarekurupñan melenja kewö jiget mörök. “Gölme qararankölkölñe kianjöreñ kunñan mönö denikeyöhök numbu nene mewöñi mi mönö miwikñaiba kambu ki gumohom engibawak?”

⁵ Mewö möta kewö qesim engiyök, “Engöreñ beret dawik ahöza?” Qesim engiiga “Beret 7 ahöza,” jiget.

⁶ Jigetka Jisösnöñ ambazip kambu mi gölmenöñ geba tatmegöra jim kutum engiiga geba tatket. Geba tatketka beret 7 mi memba Anutugö saiwap jiba mindipköba gwarekurupñi engiba ambazip kambu dop sutñine almegöra jiyök. Mewö jiiga miangö dop alget.

⁷ Yeñgöreñ söra morömorö tosatñi mewöyök ahöyök. Mi tok memba kötuatköba ambazip kambu dop sutñine toto qem engimegöra jim kutuyök.

⁸ Jim kutuiga engiget nempa nem timbirengöget. Nem timbirengöba nene kitipñi mosötket geyöhi, mi sakap 7 miangöreñ qezakögetka numbuñe qeyök.

⁹ Azi nene negeri, yeñgö jañgöñi mi 4000. Negetka melaim engiiga mirinje anget. Mewö.

Böhi tosatñan angöletot ekingöra kapan kölget.

Mat 16.1-4

¹⁰ Angetka miangöreñök gwarekurupñi yembuk wangenöñ öngöba distrik qetñi Dalmanuta miangöreñ anget.

¹¹ *Farisi (Köna keugö kapankölköl) tosatñan miangöreñ kaba Jisösbuk könahiba jitnakölik aket. Keu bötaknöñ örömapköra esapköm wangiba kewö kapan köla qesiget, “Mönö jinönga Suepnöhök angöletot kun asuhuiga ekin.”

* 8:11: Mat 12.38; Luk 11.16

12 *Mewö jigetka uruñan lömböriiga osongombuk qeiga jiyök, “O ambazip nalö kewöñe gölmenöñ maljei, inini mönö wuanöngöra Anutugö aiwesök asuhumapköra kapan kölakze? Nöñön keu ölni kun kewö jibi mötme: Anu-tunöñ aiwesök mewöñi mi qahö memba kondel engima. Ombañ saumbañ!”

13 Mewö jiba engömosöta kunbuk gwarekurupñi yembuk wañgenöñ öngöba añgö kutuba likepñe añgotket. Mewö.

Farisi aka Herod yeñön wösökömbuk ewö akze.

Mat 16.5-12

14 Miangöreñ añgota semön memingö ölüm enjuiga beret mohot-töp mia wañgenöñ memba tatket.

15 *Tatketka Jisösnöñ kewö jim kutum enjiyök, “Inini Köna keugö kapankölköl (Farisi) yeñgö wösökömbukñini aka Herodkö gipmi kakñi mietköra mönö galömnini meme. Mi ölöpnäñök qahö kewöta andö qegetka mietköñ mönö yist ewö qariba mem bölim enjimahot.”

16 Jiiga keu pasetñi mi qahö möt asariba sutñine kewö eraum mötket. “Beretnini qahöpköra jiza me denöwö?”

17 Mi eraum mötket kezapñe geiga kewö jii mötket, “Wuanöngöra beretnini qahö jiba eraum mötze? Nöñgö könañamni mi wuanöngöra qahö möt kutuze? Mi tok qahö möt asarize me? Urukezapñinan gwözöñda tatza me?”

18 *Jeñini ahözapmö, töndup qahö ek kutuze me? Kezapñini ahözapmö, töndup qahö möt asarize me? Yuai asuhuyöhi, mi ölüm enjuza me qahö?

19 Nöñön beret 5 mi 5000 yeñgöra mindipköbiga miangö kitipñi qezakögetka könde dawiknöñ geba numbuñine qeyök?” Qesim enjiiga “Könde 12,” jiget.

20 Jigetka toroqeyök, “Nöñön beret 7 mi 4000 yeñgöra mindipköbiga miangö kitipñi qezakögetka sakap dawiknöñ geba kokolak qeyök?” Qesim enjiiga sakap 7 jiget.”

21 Jigetka jii mötket, “Miangöra könañamni mi mönö tok qahö möt asarize me?” Mewö

Jegömöl azi kun jeñi metohoyök.

22 Jisösnöñ gwarekurupñi yembuk Betsaida taonöñ kaget. Miangöreñ kaba jegömöl azi kun wañgita Jisösgöreñ kañgota böröñan misirimapkö köuluköm wañgiget.

23 Köuluköm wañgigetka jegömöl azi mi böröñe memba wañgita miri yaigepñe anohot. Anda söutnezit jeñe ala böröñi nöropñe ala qesim wañgiyök, “Yuai kun ekzan me qahö?”

24 Qesim wañgiiga jeñi ui öngöiga jiyök, “Ambazip engekzalmö, mi ip tandöktandök aketka imutimutñanök engekiga anda kaba kinje.”

25 Mewö jiiga kunbuk böröñan jeyahötñi misiriiga tohoyohotka törörök uiga asarim sölölöngöiga yuai pakpak ölöpnäñök ek teköyök.

26 Ek teköiga melaim wañgiba kewö jii mörök, “Gi miri kungen kude an-manmö, diñdiñanök nangi mirige anman.” Mewö.

Pitönöñ Jisösgö könañi jim miwikñaiyök.

Mat 16.13-20; Luk 9.18-21

27 Jisösnöñ Betsaida mosöta gwarekurupñi yembuk Sisarea Filipai taongö kösutñe anget. Könanöñ anda gwarekurupñi kewö qesim enjiyök, “Ambazipnöñ nöngöra denöwö jimakze? Ni niñia akzal?”

* 8:12: Mat 12.39; Luk 11.29 * 8:15: Luk 12.1 * 8:18: Jer 5.21; Eze 12.2; Mak 4.12

28 *Jiiga melenja kewö jiget, “Tosatñan ‘Gi Jon O-melun azia akzan,’ jimakzemö, tosatñan ‘Gi Elaija akzan,’ jimakze aka tosatñan toroqeba kewö jimakze, ‘Gi kezapqetok azi walñi yenjörenjök kun akzan.’”

29 *Mewö jigetka kewö qesim enjiyök, “Aka nanñinak nönjöra denöwö jize? Ni ninia akzal?” Qesim enjiiga Pitönönj kewö melejnök, “Gi Anutugörenj Amötqeqe Tonji Kraist akzan.”

30 Mewö jiiga könani aukñe jiget kunñan mötpapuköra songo köhöikñi al enjiyök.

Jisösnönj kömumamgö keunji jiyök.

Mat 16.21-28; Luk 9.22-27

31 Jisösnönj gwarekurupñi könahiba kewö kusum enjiyök, “Suep gölmegö azi ölnan mönö sihimbölö gwötpuk mötma. Kantrigö jitñememe, jike nup galöm aka Köna keugö böhi yenjön mönö andö qeba qegetka kömuma. Kömui wehön karöbut teköiga kömupnöhök wahötma.”

32 Jisösnönj keu mi qahö köyatiba aukñe jiiga Pitönönj mianjörenjök öröm wanjiba görane anda könahiba qetal wanjiyök.

33 Qetal wanjiiga lilingöba gwarekurupñi uba engeka Pitö qetala kewö jim wanjiyök, “Gi keu mötmörizani, mi Anutugörenj keuya qahöpmö, gölme ambazip aka Satangö sihima. Mianjöra Satan, gi mönö döлки nönjö jemeso-holneyök kesalnönj.” Mewö.

Kraist wuatangöbingö söngörönji.

34 *Jisösnönj ambazip kambu aka gwarekurupñi engoholi kagetka keu kewö jii mötket, “Kunñan nönjö andöne kamamgö mötzawi, yanjön mönö nanñi urusilenangö sihim kömbönanji bölonji andö qeiga sisitñi megetka sihimbölö mi bisimakña. Mi maripomnönj kömumawangö dop mökösonda ni nuatangöba kama.

35 *Kunñan malmalñi nanñangöra anjön köla nanñi imbi-imbi maljawi, yanjön mönö malmalñi ölni jöhöi sohoma. Sohomapmö, kunönj gölmegö malmalñi mi ni aka nönjö Ölöwak Bunanangöra aka kölenja tököm ninjimawi, yanjön mönö malmal ölnangö könani miwikñaiba köhöiba malma.

36 Kunñan gölmenji gölmenji miengö öröyuainji pakpak köl öröi bunani an teköiga urunangö malmalñi mem sohoba silebile mala kömuiga Anutunönj keunji jim teköiga unañan ayuhuiga qahö dop kölma. Sukinapñi mianjön mönö urusösöngai qahö ak wanjima. Qahöpmahöp!

37 Körek nejön mönö bohonini jöhöbingö osibin.

38 Ambazip kambunji kambunji nalö kewöne gölmenönj qesabulum aka singisöndok tosatñi aka malakze. Kunñan yenjö sutñine nönjö qetni aka Buña keuni memba et aljawi, mi Suep gölmegö azi ölnan mewöyök ehörönj kölma. Yanjön könanjep Suep garata törönji yembuk ki etketka Iwinangö asakmararanji eka aurugetka yanjön azi me ambi mewönji mönö ehörönj köl wanjima.” Mewö.

9

1 Mewö jiba kewö jii mötket, “Nönjön keu ölni kun kewö jibi mötme: Kiangörenj kinjei, engö sutñineyök tosatñan Anutunönj bemtohonji kunjuiga kukösumñan asuhumawi, mi ek kutume. Jebuk mala kömupkö sihimbölonji qahö mötketka asuhum tinjiriga ekñe.” Mewö.

* 8:28: Mak 6.14-15; Luk 9.7-8 * 8:29: Jon 6.68-69 * 8:34: Mat 10.38; Luk 14.27 * 8:35: Mat 10.39; Luk 17.33; Jon 12.25

*Jisösgö sileŋe letotqetot ahök.**Mat 17.1-13; Luk 9.28-36*

² *Wehön 6 teköiga Jisösnöŋ Pitö, Jeims aka Jon enġuanġita ambazip enġömosöta nanninök kundunġi köröpŋi kunöŋ öŋgöba kötikŋe malget. Mianġöreŋ malgetka jemesoholŋine kiniga Jisösgö sile tandökŋan letota murutŋi ahök.

³ Malukuŋan tuat lalamŋi asakmararaŋambuk ahök. Gölmeneŋ opo tuatŋi saipeneŋ (omo bliz) saŋgoŋmakzei, mönö mi onġita tuariyök.

⁴ Mewö aiga Elaija aka Moses yetköŋ asuhum enġiba Jisösbuk keukeu jiget.

⁵ Jigetka Pitönöŋ könahiba keu jiba Jisösgöra kewö jiyök, “Ketaŋamnini! Neŋön kianġöreŋ uruölöwak mötzin. Mianġöra neŋön ölop koum karöbut qebin: Göhö kun, Mosesgö kun aka Elaijagö kun.”

⁶ Gwarek yeŋön jönömŋini gwötpuk unduiga Pitönöŋ “Denöwö jimam,” jiba keu jaruyök.

⁷ *Keu jaruba kiniga unuŋunuŋ tuat lalamŋi asakmararaŋambuk kunöŋ eta aumŋan esuhum enġiiga mianġö uruŋeyök qet kun kewö eriga mötket, “Azi ki nani wölböt nahöna akza. Mönö yaŋgö keuŋi möta malme.”

⁸ Keu mi möta könöbuk lilingöm purik um jaruba tosatŋi kunbuk qahö etkeketka Jisösnöŋ nannök yembuk kinök. Mewö.

Jon O-melun azi mi Elaijagö salupŋi akza.

⁹ Kunduŋeyök etketka Jisösnöŋ sörokŋi mianġöreŋ kewö jim kutum enġiyök, “Inġini yuai ekzei, mianġö buzupŋi mi mönö ambazip kun kude jiget mötme. Suep gölmegö azi ölnan kömupnöhök wahöriga mianġö andöŋe mi ölop jim asariba malme.”

¹⁰ Mewö jim kutum enġiiga gwarekurupŋi karöbut yeŋön keu mi uruŋine anġön köla “kömupnöhök wahötwahötkö” könaŋi mi nannini qesim anġuba eraum mötket.

¹¹ *Eraum möta Jisös kewö qesim waŋgiget, “Köna keugö böhi yeŋön mönö keu kewö jimakze, ‘Kezapqetok azi Elaijanöŋ mönö Suepnöhök mutuk eta asuhuma.”

¹² Qesim waŋgigetka melenġa kewö jiyök, “Elaijanöŋ mutuk eta asuhuba malmal pakpak möhangöma. Keu mi ölna akzapmö, keu kun ki mönö wuanöŋgöra ohoget ahöza: Suep gölmegö azi ölnan mönö sihimbölo gwötpuk möriga jijiwilit ak waŋgime.”

¹³ Keu yahöt mi ahözahotmö, nöŋön kewö jibi mötme: Elaijanöŋ lök eta asuhuyökmö, yaŋgöra Buŋa keu ohoget ahözawaŋgö dop ambazipnöŋ i nannini sihimŋini wuatanaŋgöba lan ak waŋgiget.” Mewö.

*Jisösnöŋ öme wuatanaŋgöi morönöŋ ölöwahök.**Mat 17.14-21; Luk 9.37-43*

¹⁴ Jisös aka gwarek karöbut yeŋön kundunġeyök eta gwarekurupŋi tosatŋi yeŋgöreŋ kaba yuai kewö eket: Köna keugö böhi tosatŋan kinda yembuk jitnakölik aka goranora keu jigetka ambazip jesöŋgöŋan liliköba enġeka kinget.

¹⁵ Mewö kinda ambazip kambu pakpak yeŋön Jisös eka mianġöreŋök auruba kinġingöba kösutŋe anda jölöŋi jiget.

¹⁶ Jölöŋi jigetka kewö qesim enġiyök, “Inġini wanatköra yembuk jitnakölik aka goranora keu jize?”

¹⁷ Qesim enġiiga kambuŋineyök azi kunöŋ melenġa kewö jii mörök, “Böhi! Nöŋgö nahöni ömenöŋ numbuŋi muhungöba töŋöt mem waŋgiiga waŋgita göhöreŋ kazal.

* 9:2: 2 Pitö 1.17-18 * 9:7: Mat 3.17; Mak 1.11; Luk 3.22 * 9:11: Mal 4.5; Mat 11.14

¹⁸ Mi miangörej me miangörej memba mendawöla öröm giliga eta qeba numbuñeyök qölgöl söutsöt eriga irimñi yöhözömgöba silenjan sölöpkömakza. Mewö ahiga kaba göhö gwarekurupki ulet engiba öme mi wuatangömegö jizalmö, yenjon osize.”

¹⁹ Mewö jiiga melen wangiba jiyök, “Gölmegö yangisen ambazip yei! Mönö nalö dawik embuk mala qatön engubiga Anutu qahö möt narigetka sihimbölö mötmam. I mönö wangita nongörej kaget.

²⁰ Mewö jiiga wangita yangörej kaget. Kagetka ömenön Jisös eka miangörejök morö utuköba urepköm wangiiiga wölöhariba tala gölmenön qeba pöranpöran mitiba semben auba ahöiga numbuñeyök qölgöl söutsöt kota erök.

²¹ Jisösnön mi eka iwinji kewö qesim wangiyök, “Nalö dawikö dop yuai ki lök asuhum wangiiiga kotza?” Qesim wangiiiga jiyök, “Mi lök morörökñeyök asuhum wangiyök.

²² Mi mem bölim wangimangöra nalö tosatñe könöpnön, nalö tosatñe onön metal wangiiiga nalö gwötpuk geba qebayök kinahakza. Mewömö, miangö kukösumñi kun göhörej ahöza ewö, mönö ak kömumba bauköm netkiman.”

²³ Mewö jiiga jiyök, “‘Kukösumñi göhörej ahöza ewö,’ jizan. Anutugö kukösumñan mönö yuai kungöra qahö qakömakza. Anutu möt narizawanön mönö yuai pakpak ölop ahakña.”

²⁴ Mewö jiiga iwinjan miangörejök qeta jiyök, “Anutu möt narizalmö, mötnaripnan lölöwörönji akza. Mötnaripni mönö mem köhöiman.”

²⁵ Jiiga ambazip jesöngöñan ösumñinan kaba kingetka eka miangöra öme mi kewö jim wangiyök, “Gi tönöt aka kezapduhupkö ömenji, nönön jim kutum gihizal: Gi mönö azi ki mosöta kota anda kunbuk kude lilingöba kaman.”

²⁶ Jim wangiiiga qeta silata morö mi utuköba könöpköm urepköm wangii wölöhariiga utala kota anök. Kota aniga qeba qamöt tandök aka ahöiga gwötpukñan mi eka “Wösönji alja!” jiget.

²⁷ Mewö jigetmö, Jisösnön böröñe memba köbibiiga wahöta kinök.

²⁸ Mewö kiniga Jisösnön miri uruñe öngöiga gwarekurupñan nanñinök tata kewö qesim wangiget, “Neñön mönö wuanöngöra mi naninök wuatangöbingö osizin?”

²⁹ Qesim wangigetka kewö jii mötket, “Öme tandökñi mewönji mi mönö köuluköba nene sinji mala wuatangöbin. Yuai murutñi kun ahinga qahö kota anma.” Mewö.

Jisösnön kömumangö Buñaji jiiga yahöt ahök.

Mat 17.22-23; Luk 9.43b-45

³⁰ Jisösnön gwarekurupñi yembuk miri gölme mi mosöta anda Galili prowins uruñe liliköba denike malgeri, mi kunñan mötmapkö tököyök.

³¹ Mia tököba gwarekurupñi kusum engimangöra ölöñ anget. Könanön anda keu kötnji kewö jii mötket, “Anutunön Suep gölmegö azi ölnji mi gölme ambazip yengö böröñine al wangii gema. Geiga i qegetka kömuma. I qeget kömui wehön karöbut teköiga miangörej mönö kömupnöhök wahötma.”

³² Keu kötnji mewö jii mötketmö, mi qahö möt kutuget aka könanji denöwö, mi qesibingö kölköldömdöm aket. Mewö.

Gwarek sutñine danön mutukñi akza?

Mat 18.1-5; Luk 9.46-48

³³ Mewö anda Kaperneam taonön kangotket. Miangörej kangota nanñi miri uruñe öngöba gwarekurupñi kewö qesim engiyök, “Inji Könanön kaba wani keuya eraum mötze?”

34 *Yenön könanöŋ kaba ‘Daŋön öngöngöŋi akza’ mia nanŋinök eraum möta kaget. Miangöra qesim enŋiiga keu bök tatket.

35 *Keu bök tatketka Jisösnöŋ geba tata gwarekurupŋi 12 enŋoholi kagetka kewö jii mötket, “Kunŋan mutukŋi malmamgö mötza ewö, yaŋön mönö körek enŋö nembö bapŋine eta qöndökŋi aka tosatŋi pakpak welen qem enŋimakŋa.”

36 Mewö jiba namande moröŋi kun memba sutŋine ali kinök. Kiniga böröŋan memba tambuŋe ala kewö jii mötket,

37 **“Kunŋan namande kewöŋi kun nöŋgö qetne miriŋe köl öröba köyan kölmawi, yaŋön mönö ni köl öröm niŋgima. Kunŋan mewö ak niŋgizawi, yaŋön niyök qahöpö, daŋön melaim niŋgiyöhi, mönö i mewöyök köl öröm waŋgima.”* Mewö.

Jisösnöŋ gwarekurupŋi mindiŋgöm enŋiyök.

Luk 9.49-50

38 Jonöŋ Jisös kewö jii mörök, “Böhi! Nini azi kun neŋgö andönine qahö kayöhi, yaŋön göhö qetnöŋ ömewöröme közöl enŋiiga ehin. Yaŋön nembuk qahö liliköba maljawanŋöra nini i qetal waŋgiin.”

39 Mewö jiiga Jisösnöŋ jiyök, “I kude qetal waŋgime. Kunŋan nöŋgö qetni qeta anŋöletot mezawi, yaŋön mönö mianŋö andöŋe nöŋgö andöqeŋe keu awamŋanök jimamgö osima.

40 *Kunŋan qahö qetal neŋgimakzawi, yaŋön mönö neŋgö areŋnöŋ malja. (Miangöra nöŋgö alaurupni tosatŋi mi kude qetala anŋösirip meme.)

41 *I mönö nanŋöm enŋigetka Anutunöŋ töwaŋini enŋima. Kunŋan Kraistkö qetŋe yaŋgö buŋaŋi akzeanŋöra aka o qambi nemegö enŋimawi, Anutunöŋ mönö mianŋö töwaŋi melenŋa waŋgima. Nöŋön keu ölni kun kewö jibi mötme: Nanŋöm enŋime, mienŋön mönö töwa meme.” Mewö.

Siŋgisöndökö kölgrom mönö qetal enŋime.

Mat 18.6-9; Luk 17.1-2

42 Jisösnöŋ keu kewö jiyök, “Morö kewöŋi möt narim niŋgizei, kunŋan yenŋöreŋök kun kölgrom ak waŋgiiga siŋgisöndök akŋawi, azi mianŋön mönö lömböt öngöngöŋi miwikŋaiba. Anutunöŋ lömböt mianŋö likepŋi denöwö waŋgiiga dopŋe akawak? Kemuŋ jamönŋiŋ jölŋe jöhöba köwet röndumnöŋ gilget mulungöi gebawak, mianŋön mönö awamŋi ahum waŋgii tandök akawak.

43 *Miangöra böröŋan siŋgisöndök akŋangö kölgrom ak gihima ewö, mönö yandim gilman. Yandim gilagun börötak mala malmal köhöikŋi miwikŋaiba oyaenŋoyaen akŋanmö, börö yahötpuk mala könanŋep könöp sianöŋ gebanbuk. Sia könöpŋi mi nalö kunöŋ qahö bököma.

44 Miangöreŋ ‘Döhöŋini enŋöhöm pilikuta mala qahö kömume aiga könöpŋinan nalö kunöŋ kude bököma.’

45 Mewöyök könanan siŋgisöndök akŋangö kölgrom ak gihima ewö, mönö yandim gilman. Yandim gilagun könatohot mala malmal köhöikŋi miwikŋaiba oyaenŋoyaen akŋanmö, köna yahötpuk malnöŋga könöp sianöŋ gil gihigetka gebanbuk.

46 Miangöreŋ ‘Döhöŋini enŋöhöm pilikuta mala qahö kömume aiga könöpŋinan nalö kunöŋ kude bököma.’

47 *Mewöŋanök jegan siŋgisöndök akŋangö kölgrom ak gihima ewö, mönö qözöla gilman. Qözöla gilagun je-ilik mala Anutugö bemtohoŋnöŋ anŋota

* 9:34: Luk 22.24 * 9:35: Mat 20.26-27; 23.11; Mak 10.43-44; Luk 22.26 * 9:37: Mat 10.40; Luk 10.16; Jon 13.20 * 9:40: Mat 12.30; Luk 11.23 * 9:41: Mat 10.42 * 9:43: Mat 5.30 * 9:47: Mat 5.29

oyaen koyaen aknanmö, je yahötpuk malnonga könöp sianöŋ gil gihigetka gebanbuk.

48 *Miangöŋ 'Döhöŋini enghöhöm pilikuta mala qahö kömume aiga könöpŋinan nalö kunöŋ kude bököma.'

49 Könöp sia miangöŋ ambazip körek mi howe sihi kölköl ewö könöpŋöŋ enghogetka sihimbölöŋi mötme.

50 *Howe mi ölöŋi akzapmö, howegö sihimŋi mosötma ewö, mi mönö denöwö möhamgögetka nahöŋi kunbuk ahubawak? Inini mewöŋanök urumohot malmalgö nahöŋi mosötpepek. Miangöra Suep howeŋi mosötpepeköra mönö galöŋiŋi memba sutŋine luai qem anŋuba malme." Mewö.

10

Awanöm anghömosötmosötkö keuŋi

Mat 19.1-12; Luk 16.18

1 Jisösnöŋ wahöta Kaperneam miri mosöta Jordan o kutuba likepŋe anda mötöteiba eta kunbuk o mi kutuba Judia prowinsnöŋ kayök. Kaiga ambazip kambulembenöŋ kunbuk yanöŋ tokogetka akmalöhi, miangö dop kunbuk kusum enghiyök.

2 Kusum enghiyöga Farisi (Köna keugö kapaŋkölköl) tosatŋan yanöŋ kaba keugö bötaknöŋ örömapkö esapköm waŋgiba kewö qesim waŋgiget, "Azinöŋ anöŋi mosötmawi, mewö miangöŋ Köna keu enghitma me qahö?"

3 Qesim waŋgigetka melenŋa kewö jii mötket, "Mosesnöŋ miangö keuŋi denöwö jim kutum enghiyöga ahöza?"

4 *Mewö jii möta kewö jiget, "Azinöŋ anghömosötmosöt papia ohoba anöŋi ölöp mosötma. Mosesnöŋ mewö jim kutui ahöza."

5 Mewö jigetka kewö jim enghiyök, "Yanöŋ mönö uruköhöikŋinaŋöra aka jimkutukutu mewö ohom enghiyök.

6 *Ohom enghiyökmö, Anutunöŋ könakönahine yuai pakpak miwikŋaiyöhi, nalö miangöŋök 'Azi aka ambi malmegöra miwikŋaim enghiyök.'

7 *Miangöra azinöŋ mönö iwinamŋi etkömosöta anöŋanöŋ yanöŋ anda qekötahöiga

8 yetköŋ sile mohot aka malmahot. Mewö aka toroqeba yahöt qahö akzahotmö, sile mohot aka malmahot.

9 Anutunöŋ azi aka ambi mindirim etkiyöhi, ambazip kunŋan mönö i kude menden etkima."

10 Jisösnöŋ mewö jiba miri uruŋe öngöiga gwarekurupŋan keu miangöra kunbuk qesim waŋgiget.

11 *Qesim waŋgigetka kewö jii mötket, "Azi kunöŋ anöŋi wuatangöba ambi kun memawi, yanöŋ mönö qesabulum sero yonöŋ akŋa.

12 Mewöyök ambi kunöŋ apŋi wuatangöba azi kun memawi, yanöŋ mönö qesabulum sero yonöŋ akŋa." Mewö.

Jisösnöŋ nahönböŋat kötuatköm enghiyök.

Mat 19.13-15; Luk 18.15-17

13 Ambazip tosatŋan nahönböŋat morömorö enghiyöga Jisösnöŋ enghömisirimapköra yanöŋ kagetmö, gwarek yeŋön ambazip mi jim qetal enghiget.

* 9:48: Ais 66.24 * 9:50: Mat 5.13; Luk 14.34-35 * 10:4: Dut 24.1-4; Mat 5.31 * 10:6: Jen 1.27; 5.2 * 10:7: Jen 2.24 * 10:11: Mat 5.32; 1 Kor 7.10-11

¹⁴ Mewö aketmö, Jisösnöñ mi eka uruñi böliiga kewö jii mötket, “Nahönbörat moröñi mönö engömosötkeka nöñgöreñ kame. Anutunöñ ambazip mewö mia bemtohoñi buña qem engima. Mianğöra i kude jöhöm engime.

¹⁵ *Nöñön keu ölni kun kewö jibi mötme, “Kunñan Anutugö bemtohoñi mi nahönbörat ewö buña qahö qem anğumawi, yañön mönö mianğö uruñe anğotmamgö osima.

¹⁶ Mewö jiba tambuñe ala dohongöm engiba böroñi nöroñine ala kötuetköm engiyök. Mewö.

Jisösnöñ azi pomñi kungö qambañ keu jiyök.

Mat 19.16-30; Luk 18.18-30

¹⁷ Jisösnöñ könahiba köna anmamgö ahiga azi kunöñ ösumñan yañgöreñ kayök. Kaba wösöñe geba simin köla kewö qesim wañgiyök, “Böhi ölöpñi, nöñön mönö denöwö aka malmal köhöikñañgö buña qem anğubilenjak?”

¹⁸ Qesim wañgiiga kewö jii mörök, “Nöñgöra ‘Böhi ölöpñi,’ mi wuanöñgöra jizan? Anutu mohotñan ölöpñi akza. Azi kunñan i ewö ölöpñi qahö akza.

¹⁹ *Gi jöjöpañ keu ki möt teközan, ‘Ambazip kun kude qenöñ kömuma. Sero yoñgorö kude akñan. Yoñgorö kude meman. Jitnöñ alal keu kude jiman. Kalöpköba yoñgorö kude meman. Iwinamgi mönö göda qem etkimakñan.’ ”

²⁰ Mewö jii möta kewö jiyök, “Böhi, mi pakpak mönö gwaböneyök tem köla mala kotzal.”

²¹ Mewö jiiga Jisösnöñ uba eka urukönömñan jöpaköm wañgiba kewö jii mörök, “Mohot kungöra kewö osizan: Gi mönö anda sukinapki pakpak söñgöroñi memegöra alnöñ monen kaiga ambazip wanapñi engiman. Mewö aknöñga sukinapki ketani (guli masapugi milyön kinagi ewö) ketani mi Suep mire ahöm gihima. Mewö aka ni nuatañgöba kaman.”

²² Jisösnöñ mewö jiyökmö, sukinapñi gwötpuk ahöyöhañgöra aka keu mi möta uruñi bosoleiiga wösöbirik aka jeñi asöliiga öne mosöta anök.

²³ Mosöta aniga Jisösnöñ ui anda kaiga gwarekurupñi kewö jii mötket, “Yei! Ambazip monen inapñinambuk yeñön mönö Anutugö bemtohoñnöñ anğotpingö lömböriba kupuk-kapak akñe.”

²⁴ Mewö jiiga gwarek yeñön mi möta welipkögetmö, Jisösnöñ toroqeba kewö jii mötket, “Gupanurupni, ambazip denike yeñön monen inapñini möt narimakzei, yeñön mönö Anutugö bemtohoñ uruñe anğotpingö lömböriba kupuk-kapak akñe.

²⁵ Mi kewö jim tuarimam: Sömbup ketani kamel mi kondi kinimñe ölop qahö anğotma. Mianğö dop ambazip pomñi yeñön Anutugö bemtohoñ uruñe anğotpingö lömböriba qaköme.”

²⁶ Mewö jii möta aurum tililingöba nanñinañgöra kewö jiget, “Opopon! Ambazip dañön mönö Suepkö buñaya akawak?”

²⁷ Mewö jigetka Jisösnöñ uba engeka kewö jiyök, “Ambazipnöñ mi esapköba osiba qakömakzemö, Anutunöñ mewö qahö ahakza. Anutunöñ mönö yuai pakpak ölop ahakza. Yañön yuai kun aka memamgö qahö osiba qakömakza.” Mewö.

Jisösgö nup memegö töwañi

²⁸ Pitönöñ keu mi möta melenđa Jisös kewö jii mörök, “Mötnöñ, neñön mönö yuai pakpak mosöta gi guatañgöba kain.”

²⁹ Mi möta Jisösnöñ kewö jiyök, “Nöñön keu ölni kun kewö jibi mötme: Kunñan nöñgö aka Ölöwak Buñagöra aka yuai kun mosörohü, - mi jike

mirinji, darumunji, nenbehötji, iwinamji, nahönböratji me nup kisinji - mi engömosöriga Anutunöj mönö mianjö likepni ongita melenj wanjiiga sehima.

³⁰ Kunjan yuai mi mosöröhi, Anutunöj mönö salupne mi 100:kö dop toroqeba wanjiiga nanji bunaya akña. Gölmegö malmalnöj sesewerowero urunje malmapmö, jike miri, darumun, nenbehöt, iwinam, nahönbörat aka nup kisi mi mönö salupne ahum wanjima aka nalö könangepne malmal köhöikni teteköji qahö buña qem anjuma.

³¹ *Mewö asuhumapmö, mutukni engörenök gwötpukjan dagibezupni aketka dagibezupni yengörenök gwötpukjan mutukni akne.” Mewö.

Kömumangö keunji jiiga karöbut ahök.

Mat 20.17-19; Luk 18.31-34

³² Jisösnöj gwarekurupni yembuk Jerusalem sitinöj öngöbingöra gölme köna anget. Jisösnöj mutuk aniga gwarekurupjan andöne anda welipköget aiga ambazip andöjine kageri yenön mönö kenjötnini mötket. Mewö aketka Jisösnöj gwarekurupni 12 mi kunbuk öröm engiba könahiba kusum engiyök. Yangören yuai asuhumawi, keu mi jim asariba kewö jiyök,

³³ “Mötket, nini Jerusalem öngöbin. Mianjörej kunjan Suep gölmegö azi ölnji mamalolo mem wanjiiga jike nup galöm aka Köna keugö böhi yengö böröjine gema. Yenön kömumapkö keunji jim teköba kian gawman yengö böröjine al wanjime.

³⁴ Al wanjigetka mepaiköba söutkölap qeba ihilek wahnambuknöj tauköm wanjime. Tauköm wanjiba qegetka kömuma. Kömumba wehön karöbut teköiga kömupnöhök wahötma.” Mewö.

Jeims Jon yetkön yuaigöra ulerohot.

Mat 20.20-28

³⁵ Jisösnöj mewö jiiga Jebedigö nahönyahötji Jeims aka Jon yetkön yangören anda kewö jiyohot, “Böhi, niri yuai kungöra ulet gihiziri mi ak netkimangö mötzit.”

³⁶ Jiyohotka qesim etkiyök, “Injiri wani yuai ak etkimangöra mötzahot?”

³⁷ Qesim etkiiga kewö jiyohot, “Göñön ölop jim kutunönga niri göhö asakmararanöj eu öngöba kunöj börögi ölje aka kunjan börögi qanije tata yuai pakpak galöm kölbina.”

³⁸ *Mewö Jiyohotmö, Jisösnöj kewö jii mörohot, “Injiri mianjö könani qahö möt yaköba uletzahot. Nöñön qambi asölnambuk nemami, injiri mi ölop namba sihimbölö mötmahot me qahö? Jöm nöngwambuknöj melun mem ninjime, injiri mi memahot me qahö?”

³⁹ Jii möta jiyohot, “Mi ölop membit.”

Jiyohotka kewö jii mörohot, “Mi ölna! Nöñön qambi asölnambuk nemami, injiri mi mewöñanök memahot aiga jöm nöngwambuknöj melun mem ninjime, mianön mönö injiri mewöyök melun mem etkime.

⁴⁰ Mem etkimemö, nöngö böröni ölje me qanije danön tatmahori, nöñön keu mi jim kutumamangö dop qahö. Anutunöj dum yahöt mi denike yetköra mözözömgöyöhi, mi mönö yetköra etkiiga nömbuk tata galöm kölmahot.” Mewö.

Galöm ölnan mönö welenqeqeya akza.

⁴¹ Jeims Jon yetkön mewö ulerohotka alaurupni 12 yenön mi möta könahiba urubölö aket.

⁴² *Mewö aketmö, Jisösnöj engoholi kagetka kewö jii mötket, “Gölmegö kantrinji kantrinji miengö jembonjan galöm köln engibingö jizei, yenön mönö

* **10:31:** Mat 20.16; Luk 13.30 * **10:38:** Luk 12.50 * **10:42:** Luk 22.25, 26

azi kembu tandök ak engimakze. Yengö ketañamñinan mönö keu jim kutuba mindingöm engiba kukösumñini kondelakze. Injini könañini mi ölop mötze.

⁴³ *Engö sutñine silik mewö ahöbapukmö, kunñan engö sutñine ketañamñini akñangö mötzawi, yañön mönö welen qem engiba malma.

⁴⁴ Mewöyök kunñan engö sutñine mutukñi malmangö mötzawi, yañön mönö körek engö nembö bapñine mala welenqeqeñini omanñi akña.

⁴⁵ Suep gölmegö azi ölnan mönö mewöyök silik mewöñi kondela nanñi welen qem wañgimegöra aka qahö kayök. Qahöpmö, welen qem engiba ambazip sehisehñi yengö sohopñini memangöra aka eta malmalñi kölenda mosötma.

Bartimeus jeni gömöliiga mem ölöwahök.

Mat 20.29-34; Luk 18.35-43

⁴⁶ Jisösnöñ gwarekurupñi yembuk Jeriko sitinöñ kaget. Kaba siti mi mosötpingö aketka ambazip kambulembenöñ enguatangöba andöñine kaget. Mewö kagetka jegömöl azi qetñi Bartimeus, Timeusgö nahöñni yañön moneñ aka nene wañgimegö ulet engiba köna jitñe tarök.

⁴⁷ Tariga “Nazaret-azi Jisösnöñ kaza!” jiget möta könahiba kewö qerök, “Jisös Deiwidkö gwölönarökñi, mönö ak-kömum ningiman!”

⁴⁸ Mewö qeriga gwötpukñan bök tatmapköra qetal wañgigetmö, yañön mönö kapan köla qerök. “Deiwidkö gwölönarökñi, mönö ak-kömum ninginöñ!”

⁴⁹ Qeriga Jisösnöñ dörök ala kewö jiyök, “Ölop qetketka ki kama.” Mewö jiga jegömöl azi mi qeta kewö jiget mörök, “Göhöra qeza. Mönö mötkurumkurum mosöta wahöta kaman.”

⁵⁰ Mi möta malukuñi qeköba gila pöran wahöta kinda Jisösgöreñ anök.

⁵¹ Aniga kewö qesim wañgiyök, “Alani, nöñön wani yuai ak gihimangöra mötzan?” Mewö qesim wañgiiga jegömöl azinöñ jiyök, “Ketañamni, ni jeni kunbuk umangöra mötzal.”

⁵² Mewö jiiga Jisösnöñ kewö jii mörök, “Mötnaripkan mönö mem ölöwak gihiza. Mönö ölop anman.” Mewö jii möta jeñan miangöreñök tohoiga uba andöñine Jisös wuatangöba anök. Mewö.

11

Jisösgöra köirañ kölgetka Jerusalem öngöyök.

Mat 21.1-11; Luk 19.28-40; Jon 12.12-19

¹ Jisösnöñ gwarekurupñi yembuk Jerusalem siti dopdowiba Betfage aka Betani miri yahöt kösutñire kaba Oil ip kundunje öngöba gwarekyahöñni yahöt melaim etkimangöra aka

² kewö jii mörohot, “Miri wösöñire tatzawi, mönö miangöreñ anohot. Anda miangöreñ angota donki moröñi kösönöñ jöhöget kinjawi, mi miangreñök miwikñaimahot. Donki mi dölökña, azi kunñan qakñe qahö tatatña. Mi mönö pösata memba ki kamahot.

³ Pösarohotka kunñan ‘Wuanöngöra mewö akzahot?’ jiba qesim etkiiga kewö jimahot, ‘Kembuniran mönö miangöra osiba jiiga kazira zilañ melenñiga kunbuk ki kama.’

⁴ Mewö jiba melaim etkiiga anda donki moröñi miri towokñe miri kungö nanñunje kösönöñ jöhöget kiniga miwikñaiba pösarohot.

⁵ Pösarohotka azi tosatñi miangöreñ kingeri yeñön kewö qesim etkiget, “Hei, wania akitköra donki moröñi pösatzahot?”

⁶ Mewö qesim etkigetka Jisösnöñ jiyöhangö dop jiyohot möta “Ölop memba anmahot,” jiget.

* **10:43:** Mat 23.11; Mak 9.35; Luk 22.26

⁷ Jigetka memba Jisösgören kayohotka malukuḅini qeköba donki moröḅangö qakḅe algetka öḅgöba tarök.

⁸ Mewö tata aniga ambazip jesöḅgöḅan göda qeba malukuḅini qeköba köna namḅe tumbulgetka tosatḅan gölme köröḅe anda ip sinḅi mitiba tumbulget.

⁹ *Tumbulgetka ambazip jeḅe köl öröba angeri aka andöḅe wuatangöba kageri, yeḅön kewö jiba qetket, “Hosana, owe owe! Anutu möpöseizin. Kembugö qetḅe kamawi, Anutunöḅ mönö i kötuetköm waḅgima.

¹⁰ Kinj Deiwidnöḅ kantri tohoḅ kuḅguba galöm köl enḅiyöhi, nalö mewöḅan mönö kunbuk kam neḅgiza. O Anutu mönö kantri tohoḅnini kötuetköman. Hosana! Qetbuḅagi möpöseininga euyangöreḅ öḅgöza. Owe Owe!”

¹¹ Mewö qetketka Jerusalem sitinöḅ öḅgöba jöwöwöl jikegö tohoḅ uruḅe anök. Mianḅgöreḅ liliköba yuai pakpak ehi mare ahiga eta gwarekurupḅi 12 yembuk jike mosöta Betani mire anda ahöget. Mewö.

Jisösnöḅ fig ip kun qesuahöiga ululuḅgöyök.

Mat 21.18-19

¹² Ahöba söḅanök wahöta gwarekurupḅi yembuk Betani miri mosöta angetka Jisösnöḅ nenegö kömuyök.

¹³ Nenegö kömumba ui aniga fig ip kun * sinḅambuk kini ehök. Eka “Sinḅangö uruḅe ölnḅi tari miwikḅaiba nembilenak,” jiba fig ipkö könaḅe anök. Anökmö, ölnḅangö nalöḅan qahö töriyöḅangöra sinḅanök kini ehök.

¹⁴ Mewö eka ip mi kewö jim waḅgiyök, “Kunḅan ölgḅi kunbuk kude nema.”

Mewö jim waḅgiiga keu mi gwarekurupḅan mötket. Mewö.

Jisösnöḅ jöwöwöl jike jim kömbuhiyök.

Mat 21.12-17; Luk 19.45-48; Jon 2.13-22

¹⁵ Anda mala Jerusalem sitinöḅ öḅgögetka Jisösnöḅ jöwöwöl jikegö tohoḅ uruḅe anök. Mianḅgöreḅ ambazip enḅehiga inap bohonḅi memegöra algetka söḅgöröḅi megeri, mi könahiba közöl enḅiiga etket. Moneḅ utekutek ambazip yeḅgö jakeḅini metali anget. Mewöyök kembö bohonḅini memegöra algeri, miḅgö dum tatatḅini mi tok tötaliga anget.

¹⁶ Sombem kömbukḅi kutuba yuai siriba aḅgotkaḅgotkö könaḅi jöhöyök.

¹⁷ *Mewö aka kusum enḅiba kewö jii mötket, “Aisaianöḅ keu kun kewö ohoi ahöza, ‘Nöḅgö jikenan mönö gölmeḅi gölmeḅi pakpak yeḅgö köulukö miriḅina akḅapkö qetme.’ Keu mi ahözapmö, inḅi mi utekögetka kegwek-kahasililin yeḅgö baḅet ewö akza.”

¹⁸ Mewö jii möta ambazip kambu pakpak yeḅön mianḅgöra nemböḅini teköiga welipköget. Mianḅgöra jike nup galöm aka Köna keugö böhi yeḅön mi möta Jisösgöra keḅgötḅini möta eraum möta kewö jiget, “Mönö denöwö jiinga qegetka kömumbawak?”

¹⁹ Mare ahiga Jisösnöḅ gwarekurupḅi yembuk siti mosöta yaigep anda ahöget. Mewö.

Fig ipnöḅ ululuḅgöiga eket.

Mat 21.20-22

²⁰ Ahöba söḅanök wahöta könanöḅ anda fig ip mi onḅitpingö aketka jalöḅambuk uluḅgöba kini eket.

²¹ Kiniga Pitönöḅ Jisösgöreḅ keu mötmöriba kewö jii mörök, “Ketaḅamni eknöḅ, fig ip qesuahönöḅi, mi mönö ululuḅgöba kinja.”

²² Jii möta Jisösnöḅ kewö melenök, “Anutugö mötnarip mönö töp memba malme.”

* **11:9:** Sum 118.25-26 * **11:13:** Fig mi sambḅi ipkö alaḅi kun. Mi nupḅine kömötketka köḅḅi nahöḅinambuk asuhugetka gwötpuk nemakzema. * **11:17:** Ais 56.7; Jer 7.11

23* Nöñön keu ölni kun kewö jibi mötme, “Kunñan keuñangö ölni ahumapkö uruyahöt qahö aka kundunji kiangö tonangöra kewö jim kutubawak, ‘Mönö kundunji ki qeköba wahöta anda köwetnön alman.’ Mewö jim kutuba Anutu möt nariiga ölni mönö miangö dop ahuma.

24 Miangöra nöñön kewö jibi mötme: Wani yuaigöra qesiba köulukömei, mi pakpak lök buña qem anguzin, mewö möt narigetka mönö buñanini akña.

25* Injini kinda Anutu köulukögetka kunñan alañangö pinjtköra urubölö akña ewö, pinjit mi mönö mosötme. Mewö akñe ewö, engö Iwiñini Suep mire maljawanön mönö mewöñanök engörenj singisöndok mosötma.

26 (Injini tosatñi yengörenj singisöndok qahö mosötme ewö, engö Iwiñini Suep mire maljawanön mönö mewöñanök engörenj singisöndok qahö mosötma.)” Mewö.

Jitnememe yeñön Jisösgö kukösumñangö qesiget.

Mat 21.23-27; Luk 20.1-8

27 Jisösnön gwarekurupñi yembuk kunbuk Jerusalem sitinön öngöget. Öngöba jöwöwöl jikegö tohon uruñe anda kaiga jike nup galöm, Köna keugö böhi aka kantrigö jitnememe tosatñi yeñön yangörenj kangotket.

28 Kangota kewö qesim wanjiget, “Gi kiangörenj yuai akzani, mi mönö danön jim kutum gihiiga ahakzan? Mi memangö kukösumñi mi danön gihiyök?”

29 Qesim wanjigetka kewö melenj engiyök, “Nöñön mewöyök keu kun qesim engimam. Mi melenj ningigetka nöñön mewöyök danön kukösum ningiiga yuai ki ahakzali, mi jibi mötme.

30 Jonön ambazip o-melun mem engiba malöhi, yanön miangö kukösumñi mi denikeyök meyök? Suep Tonjan wanjiyök me gölme tonjan wanjiget? Mi jiget mötmam.”

31 Mewö melenj engiiga sutñine eraum möta kewö jiget, “‘Kukösumñan Suepnöhök asuhuyök,’ mewö jibin ewö, yanön mönö kewö jima: Injini mönö wuanöngöra Jon qahö möt narim wanjiget? Mi qahö dop kölja.

32 Me ‘Gölme ambazipnöhök asuhuyök,’ jibinak? Mi qahö dop kölja.” Ambazip körekñan Jongöra ‘Ölna kezapqetok azia akza,’ jigerangöra aka ambazip kambu yengöra kenjötnini möta mi jibingö osiget.

33 Miangöra “Mi qahö mötzin,” melenjet. Mewö melenjetka Jisösnön kewö jii mötket, “Mewö aiga nöñön mewöyök yuai ki ahakzalanö kukösumñi danön ningiyök, mi qahö jibi mötme.” Mewö.

12

Wain kösö nup galöm bölöñi miengö dopkeu

Mat 21.33-46; Luk 20.9-19

1* Jisösnön könahiba ambazip dopkeunön kewö jii mötket, “Azi kunön wain kösö nup kun köla kömörök. Köla kömöta selñi memba liliköyök. Mem liliköba wain jout ketanji kötnön meyök. Miangörenj waingö ölni ala könanön tözöhölget onjan lalanön geyök. Wain jout ketanji mi memba wain yongorö membepuköra galöm meme jake köröpñi köwenambuk meyök. Yuai pakpak mem teköba wain nup galöm tosatñi miwikñaim engiba kewö jiyök, “Mönö nup memba ölnangö bahöñi nanñini memba bahöñi tonji ni ningime.” Mewö jiba nup mi böröñine ala engömosöta kantri kunön anda malök.

2 Mala mali ölni öliyöhangö nalöñi (yambu 5) töriiga miangörenj welenqeqeni kun melaim wanjiiga galöm yengörenj anda wain nup ölnangö bahöñi wanjimegöra jiyök.

* 11:23: Mat 17.20; 1 Kor 13.2 * 11:25: Mat 6.14-15 * 12:1: Ais 5.1-2

³ Jiyökmö, galöm yejön i memba jöhöba kömbinöñ qeba wuatangögetka böröñi börak lilingöyök.

⁴ Miangö andöñe welen azi kun melaii yeñgöreñ aniga nöropñi qesinda gamu qem wangiget.

⁵ Miangö andöñe welen azi kun kunbuk melaiiga ani qeget kömuyök. Mewöñanök azi tosatñi gwötpuk melaim engiiga tosatñi kömbinöñ sepgwörörök enguba tosatñi enguget kömuget.

⁶ Mewö aketka wain nup toñan keu jaruba jiyök, ‘Nani wölböt nahöni mohok mi tok malja. I mönö göda qem wangime me denöwö?’ Mewö jiba qöndökñi mi nahönña melaiiga yeñgöreñ anök.

⁷ Anökmö, kaiga eka sutñine kewö jiget, ‘Yañön mönö börösamotñangö tonji akña. Ayop, mönö memba qein kömuiga wain kösö nup kianön mönö nanine buñanina akña.’

⁸ Mewö jiba memba jöhöba qeget kömuiga qamötñi nup yaigepñe gilget geyök.

⁹ Wain nup toñan mi möta mönö denöwö akña? Yañön mönö nanñak kaba nup galöm mi köndeñ engima aka nup galöm döläkñi miwikñaim engiba wain kösö nupñi yeñgö böröñine alma.

¹⁰ *Buña Kimbigö keu ki lök oyoñget me qahö? ‘Miri meme yejön köt tandö kun andö qeba öne mosötket taröhi, mianjön mönö tandö kömböñani ahiga miwikñaiget. Mianjön tinjiriga mirinöñ mönö gororöñgöba eta kölma.

¹¹ Kembunöñ tandö mi kuñguiga jeninan ehinga qetbuñabuk ahiga welipkömakzin.’ ”

¹² Jisösnöñ mewö jiiga galöm yejön keu miangö köñani möt asariba kewö jiget. “Dopkeu mi mönö neñgöra jiza.” Miangöra i memba jöhöbingö mötketmö, ambazip kambu yeñgöra keñgötñini möta osiba mosöta anget. Mewö.

Takis alalgö Jisös esapköm wangiget.

Mat 22.15-22; Luk 20.20-26

¹³ Juda jitñememe yejön Farisi aka premiö Herodkö pati alaurup tosatñi melaim engiba kewö jiget, “Injini mönö Jisösgöreñ anda qesiba keugö bötaknöñ öröi gwaröhöm wangime.” Mewö jigetka Jisösgöreñ kaget.

¹⁴ Jisösgöreñ kaba kewö jigetka mörök, “Böhi, göñön azi ölni akzani, nini mi mötzin. Göñön ambazip tosatñi qahö engek soriba tosatñi qahö qepureim enjimakzanmö, dop mohotnöñ kewöt neñjimakzan. Miangöra kuñgum gi-higetka qahö gongiba ketani qahö esuhum enjimakzanmö, Anutugöreñ köna mi keu ölnangö dop kusum neñjimakzan. Göñön Anutugöreñ keu diñdini mianjön öngöngöñi eretñi mohot pakpak jim qindiñ ak neñjimakzan. Miangöra nini sisa-kiñgöra takis ala mianjön Mosesgö Köna keu siñgibin me qahö? Mi alinga dop kölja me qahö?”

¹⁵ Mewö jiget möta areñini muneni mi möt kutuba kewö jii mötket, “Injini wuanöngöra keugö bötaknöñ al niñgibingö esapköm niñgize? Ölöp silwö monen (Kina 5) kun memba kaget eki.”

¹⁶ Mewö jiiga mi memba kagetka kewö qesim engiyök. “Dagöreñ imut aka qet mi ki ohoget ahöza?” “Mi sisa kiñgöreñ!” Mewö melenäda jiget.

¹⁷ Jigetka kewö jii mötket, “Mewö ahiga yuai sisa-kiñgö imutñambuk buñani ahözawi, mi mönö yañgöra al wangime. Yuai kun Anutugö buñaya ahözawi, mi mönö Anutugö buña qeme.” Mewö jii möta yañgöra gwötpuk welipköget. Mewö.

* **12:10:** Sum 118.22-23

Kömupnöhök wahötwahötkö esapköm wanğiget.

Mat 22.23-33; Luk 20.27-40

18 *Sadyusi (Jike nupkö kapañkölköl) yeñon “Kömugeri yeñon kude wahötme,” jiba malget. Yeñgöreñök tosatñan Jisösgöreñ kaba kewö qesim wanğiget,

19 **“Böhi, Mosesnöñ kewö jim kutum neñgiyök ahöza, ‘Azi kun ambi meiga nahönbörat qahö ahui kömumba malöñi öne mosöriğa munñan ölop malöñi memba gwölönarök qiwikñaim wanğiğa datñanğö qet bisiba malma.’*

20 Mötnöñ! Nalö kunöñ darumun 7 malget. Datñini mutukñan ambi memba mala gwölönarökñi qahö öne mala kömuyök.

21 Kömuğa munñan malöñi mi memba mala mewöyök gwölönarökñi qahö öne kömuyök. Kömuğa munñi kun yanğö bapñe mianñon ambi miyöhök memba mala öne kömuyök.

22 Mewöña mewö darumun 7 pakpak yeñon ambi mohot miyöhök memba gwölönarök qahö mala kömum teköget. Körek kömugetka qöndökñi malöñini mi mewöyöhök kömuyök.

23 Göñon Kömugeri yeñon guliba wahötme, jizanmö, nini mi qahö möt narizin. Mötnöñ! Azi 7 pakpak mi öröröñ wahötpeak ewö, ambi möhot mi anömñina meget malöhanğöra aka mönö dagö anömña akawak?”

24 Mewö qesigetka Jisösnöñ melenđa kewö jii mötket, “Inini keu jim sohoze. Urumelenğö Buña Kimbiñi aka Anutugö kukösumñi qahö möt kutuzeanğöra mönö janjuñ ahakze.

25 Ölña, kömupnöhök wahöta nalö mianğöreñ awanöm qahö akñemö, garata yeñon Suep mire maljeanğö tandök aka malme.

26 *Mötket! Kömugeri, yeñon guliba wahötmegö keuñi mi Mosesgö Buknöñ kewö ahöza: Sötman köhösnöñ könöp bölam ahuba qahö jem kutuyöhi, inini kösohot mi oyonget me? Anutunöñ mianğöreñ Moses kewö jii mörök, ‘Nöñon Anutu Abrahamgö Kembu, Aisakö Kembu aka Jeikobkö Kembuya mala kota maljal.’

27 Isik bömön karöbut yeñon Anutubuk mala mal köhöiba öngöme. Anutunöñ köhömuñi yeñö Kembuñini qahöpmö, malmal köhöikñi maljei, mönö yeñö Kembuñina akza. O Sadyusi (Jike nupkö kapañkölköl pati) inini mönö keu gwötpuk möt sohomakze.” Mewö melenñök.

Jjöpañ keu bohonñi yahöt mi denöwö?

Mat 22.34-40; Luk 10.25-28

28 *Jisösnöñ Sadyusi (Jike nupkö kapañkölköl) yembuk eraum möta jim soroköba melenñ enğiyöhi, mi Köna keugö böhi azi kunöñ mörök. Mewö möta jeñe kañgota kewö qesim wanğiyök, “Jjöpañ keu pakpak mienğöreñök bohonñi ketanñi mi denöwö?”

29 *Qesim wanğiğa melenñök, “Bohonñi ketanñi mi kewö, ‘Israel könagesö mötket! Anutu mi Kembunini. Yanñon Kembu mohot ahiga bem alanñi kun qahö.

30 Mianğöra urugi jömukñi, unğagi jömukñi, mötmötki jömukñi aka kuki jömukñi, mianñon mönö Kembu Anutugi jöpaköba malman.”

31 *Jjöpañ keu mianğö alanñi kewö, ‘Nangi jöpaköm anğumakzani, mewöñanök mönö ambazip pakpak jöpaköm enğiba malman.’

* 12:18: Apo 23.8 * 12:19: Dut 25.5 * 12:26: Eks 3.6 * 12:28: Luk 10.25-28 * 12:29: Dut 6.4-5 * 12:31: Lew 19.18

Jöjöpaŋ keu kunŋan mönö keu yahöt mi qahö etkonŋitza.”

³² *Köna keugö böhigöra mewö melenŋiga jiyök, “Böhi! Gi törörök keu ölnaŋgö dop jizan. Anutunöŋ mohot akza. Bem alaŋi kun qahö.

³³ *Gi urugi jömukŋi, mötkutukutugi jömukŋi aka kuki jömukŋi, mianön Anutu jöpaköba malman. Aka nangi jöpaköm aŋgumakzani, mewöŋanök mönö ambazip pakpak jöpaköm eŋgiba malman. Jöjöpaŋ keu yahöt mi bohonŋi ketanŋi akzahot. Mi tem kölmani, mianön mönö jöwöwöl pakpak aka naluk kötin tosatŋi eŋgoŋgitza.”

³⁴ Mewö jiiga Jisösnöŋ urumötmötŋi möri dop kölīga kewö jii mörök, “Gi Anutugö bemtohoŋnöŋ aŋgotmangö dopdowizan.” Mewö eraum möröhotka körek yeŋön Jisös toroqeba qesim waŋgibingö kölköldömdöm aka mosötket. Mewö.

Kraist mi kiŋ Deiwidkö kembuni aka gwölönarökŋi.

Mat 22.41-46; Luk 20.41-44

³⁵ Jisösnöŋ jöwöwöl jikenöŋ kinda Buŋa keu kusum eŋgiba kewö qesim eŋgiyök, “Kraistnöŋ kiŋ Deiwidkö gwölönarökŋi akzawi, Köna keugö böhi yeŋön keu mi denöwögöra jimakze?

³⁶ *Deiwidnöŋ nanŋak Uŋa Töröŋan sölölohöm waŋgiiga kewö jiyök, ‘Anutunöŋ kinda nöŋgö Kembuni kewö jii mörök: Göŋön mönö kaba nöŋgö böröni ölnö tatnöŋga nöŋön nalö sutŋe kerökurupki tim tötöla luhut alaŋgiba göhö köna tambö gwaröŋe al eŋgimam. Nalö mi kam kuŋgumawaŋgö dop mönö asakmararaŋnöŋ ki tatman.’

³⁷ Deiwidnöŋ nanŋak mewö jiba qetŋi ‘nöŋgö Kembuni’ jiza.’ Kembuni jiba mönö denöwö aka yaŋgö gwölönarökŋi mohot akawak?” Mewö jiiga ambazip kambu ketanŋi yeŋön Jisösgö keuŋaŋgö sihimŋi möta kezap alget. Mewö.

Urumeleŋgö silesile malmalgö galöm meme keu.

Mat 23.1-36; Luk 20.45-47

³⁸ Jisösnöŋ kusum eŋgiba toroqeba kewö jiyök, “Inŋini mönö Köna keugö böhi yeŋgöra galöm memba malme. Yeŋön maluku köröpŋi löŋgöta anda kaba kondel aŋgubingö mörakze aka maketnöŋ me könanöŋ ambazip eŋgigetka jölöŋini jimegö mörakze.

³⁹ Köuluk mire qaikŋe eu tatpingö sihimŋi mörakze, aka közölömbuaŋnöŋ dum tatat mutukŋe jegep tatpingö mörakze.

⁴⁰ Yeŋön malö yeŋgöreŋ miri yuai bidaŋda gagabe köla eŋguaŋgirakze, aka qetbuŋaŋini asuhumapköra köuluk köröpŋi köuluköba töptöpŋine qemakze. Miangöra Anutunöŋ keuŋini jim teköba likepŋi öŋgöŋgöŋi melenŋi qakŋine öŋgöma.” Mewö.

Ambi malö kunöŋ naluk kötin ölni alök.

Luk 21.1-4

⁴¹ Jisösnöŋ jöwöwöl jikenöŋ naluk dundum andöŋe tariga ambazipnöŋ monen miangöreŋ alget geiga uba eŋgehök. Ambazip pomŋi sukinapŋinambuk gwötpuk yeŋön kaŋgota kina monen lömbötŋambuk alget geyök.

⁴² Alget geiga malö wanapŋi kunöŋ kaŋgota souje kötŋi yahöt, mi toiya tosatŋi miangö dop ali geyök.

⁴³ Jisösnöŋ mi eka gwarekurupŋi köl öröm eŋgiba kewö jii mötket, “Nöŋön keu ölni kun kewö jibi mötme: Malö wanapŋi kianön naluk aljawi, mi mönö tosatŋi pakpak yeŋön yuai dundumnöŋ alget gezawi, miangö dopŋi oŋgita alja.

⁴⁴ Körek yeñon moneñ gwötpuk ahöm engiiga kitipñanöhök aljemö, ambi kianñon mönö köruebörue maljawangö dop yuaini pakpak al teköba öne töhön malma.” Mewö.

13

Jöwöwöl jikenöñ könderñmönderñ asuhuma.

Mat 24.1-2; Luk 21.5-6

¹ Jisösnöñ jöwöwöl jike mosöta eriga gwarekurupñi yeñgöreñök kunñan kewö jii mörök, “Böhi eknöñ! Jikegö tohon uruñe miriñi miriñi mi mönö wewelipñambuk. Mi kötnöñ memba meñölögetka ölöpbölöpñi kinja.”

² Jisösnöñ mi möta keu kewö melenök, “Jikegö tohon uruñe miri ketanji ki engekzanmö, mi mönö köndengetka mirigö köt kun mi köt kungö qakñe qahö ahömapmö, qeqelanlan aka sahopñanök ahöma.”

Kahasililiñ aka sesewerowero asuhuma.

Mat 24.3-14; Luk 21.7-19

³ Mewö jiiga Oil ip kundunje öngöba likepñe endu jöwöwöl jikenöñ kinöhi, mi eka tatket. Miangöreñ tata Pitö, Jeims, Jon aka Andru yeñon Jisös nanñök öröba kewö qesim wangiget,

⁴ “Böhi! Keu jizani, miangö ölni mönö wanat nalönöñ asuhum tinjitma aka yuai pakpak mi könahiba asuhum tekömawi, miangö aiwesökñan mönö denöwö asuhuma? Mia ölop jinöñ mörin.”

⁵ Mewö qesim wangigetka könahiba kewö jii mötket, “Kunñan isimkakalek aiga janjun anbepeköra mönö galömñini memba malme.

⁶ “Ambazip gwötpukñan asuhuba nöngö qetne kewö jime, ‘Nöñon Kraist akzal.’ Mewö jiba ambazip gwötpuk tilipköm enjime.

⁷ Inini yarö miengö buzupñini aka ötöñini asuhugetka mörakñe. Mi möta jönömñini kude undumakña. Yuai mewöñi mi mutuhök asuhumapkö jijiña. Mi asuhumapmö, gölmegö nalöñan mönö miangöreñök zilan qahö teköma.

⁸ Kantri kunöñ kantri kun enjimbingöra wahötme. Ambazip kambu kunöñ kambu kun yembuk aröñ anjimbingöra wahötme. Gölmene gölmene miangöreñ kenöñ ketanji ketanji qözöla memba gölme meleni gemakña. Mewöyök bödiñi bödiñi (buöröñi buöröñi) asuhuba öngöba ahöma. Yuai mewöñi mi ambi köröbuknöñ masi könahiba enjumatkawangö dop. Gölmegö nalöñan mönö miangö dop könahiba tekömangö akña.

⁹ *Mewö akñapmö, inini ölop galömñini mem anjuba malme. Ambazipnöñ inini öröba keu jakeñe al enjiba köuluk mireñini keu nupñini memba kömbinöñ enjime. Tosatñan nöngöra aka enjuañgitketka kantriñi kantriñi yeñgö kin kembu aka premiö yeñgö jemesoholñine kinme. Mewö kinda nöngö könañamni nanñöba jigetka mötme.

¹⁰ Ölöwak Buña ki mönö mutuk gölmegö kantriñi kantriñi pakpak yeñgöra jim sehim tekögetkun gölmegö nalöñan miangö andöñe teköma.

¹¹ Öroba enjuañgita keu jakeñe al enjigetka kinmei, nalö miangöreñ keu denöwö jibinak, miangö waimanjatñi qeljiñe kude mötme. Uña Töröñan aua miangöreñök keu enjimawi, mönö mia jime. Nanñine uruñinangöra keu qahö jimemö, Uña Töröñan mönö uruñini sölölohöiga keu jime.

¹² Urumelenö kopa kunöñ darumunñan uruñi melenñöhangöra aka i mamalolo meiga keu jakeñe algetka qeget kömuma. Mewöyök iwi kunöñ nahönböratñi mamalolo meiga kömuma aka nahönbörat yeñon iwinamurupñini qetal enjiba jigetka enjuget kömume.

* 13:9: Mat 10.17-20; Luk 12.11-12

13 *Kantri pakpak yenön nongö qetnağöra aka kazik ak engigetka malmemö, kunjan kapan köla köhöiba böñ qeba kinda maliga gölmegö nalöñan tekömawi, yañön mönö oyaenköyaen buña qem aņguma. Mewö.

Jerusalem sitigö köndermönder uru-önönambuk

Mat 24.15-28; Luk 21.20-24

14 *Könaņgep tosatrjan kaba köndermönder aka yuai aņgöjörakñambuk jikenöñ qahö alalgö dop mi altanöñ ala kiniga ekñei, - keu ki oyoñmawañön mönö ölop kezap ala möt kutuma - nalö mianğoreñ Judia prowinsnöñ malmei, eñön mönö misinğöba öröba kundunje anme.

15 *Miri kösutñe sombemnöñ malmawañön mönö eta yuaini memamğöra miri urunje kude öñgöma.

16 Nupnöñ anda malmawañön mönö mewöyök malukuñi memamğöra lilingöba mirinöñ kude anma.

17 Yei! Ambi gölömbuk aka morö juzunöñ yenön nalö mianğoreñ denöwö ösumñinan anbeak.

18 Mianğöra yuai mi kie luhut nalöñe kude asuhumapköra köuluköme.

19 *Nalö mianğoreñ kahasililin keta bölökñi asuhuma. Kahasililin dopñi mewöñi mi mönöwök nalö kungen kude asuhuba ahöyök. Anutunöñ yuai pakpak miwikñaiyöhi, nalö mianğoreñök könahiba nalö kianğoreñ mala kota nalö sutñe kun qahö asuhuyök. Mönöwök qahö asuhuyök aka könaņgep nalö kunöñ qahö ahuma. Mianğöra mönö köuluköba malme.

20 Kembunöñ wahöjalin nalö mi qahö mem töribawak ewö, ambazip körekñan mönö ayuhum teköbeakmö, ambazip nanñangöra möwölöhöm engiyöhi, yeñgöra aka wehön mienğö qötöñini mi mem törima.

21 Nalö mianğoreñ kewö jime, 'Mötket! Kraistnöñ ki malja.' aka 'Eket! Amötqeçe Tonjan endu kinja.' Kunjan mewö jima ewö, mi mönö kude möt narime.

22 Mi kewögöra: Amötqeçe toni munenji aka kezapqetok ambazip takapulanani asuhuba aņgöletot aka aiwesök jemurutñi megetka letotme. Mewö letotketka Anutunöñ ambazip nanñangöra möwölöhöm engiyöhi, i mewöyök enjololon mem engimegö esapköba kapan kölgetka janjun akepuk. Eñön ölopñanök galömnini memba malgetka mi osibeak.

23 Nöñön yuai pakpak mi kude asuhuiga qeljine lökñanök jibi mötze. Mi mutuk jizalağöra mi mönö urunje ala galömnini mem aņguba malme. Mewö.

Suep gölmegö azi ölnan mönö asuhum tinğitma.

Mat 24.29-31; Luk 21.25-28

24 *Wahöjalin mi teköiga nalö mianğoreñök wehön jeñan injan köliga köinöñ ömun kölma.

25 *Senğelau yenön suepnöhök teköba etme aka suepnöñ uturuköiga mianğö öröyuaini mi tatatñini mosöta enjololon aketka sohoma.

26 *Nalö mianğoreñ Suep gölmegö azi ölni yañön kousu qakñe kañgori ekñe. Kukösumñi ketañan saköl-diñdiñambuk aukñe asuhuiga asakmararañi ekñe.

27 Kañgota Suep garataaurupñi melaim enğiiga yenön ambazip Anutunöñ nanñangöra möwölöhöm engiyöhi, i gölme gorañi likeplikap, euke emuke mianğoreñök kölolohoba enğuanğitme. Mewö.

* 13:13: Mat 10.22 * 13:14: Dan 9.27; 11.31; 12.11 * 13:15: Luk 17.31 * 13:19: Dan 12.1; Ind 7.14 * 13:24: Ais 13.10; Eze 32.7; Joel 2.10, 31; 3.15; Ind 6.12 * 13:25: Ais 34.4; Joel 2.10; Ind 6.13 * 13:26: Dan 7.13; Ind 1.7

*Geröp ipkö dopkeu**Mat 24.32-35; Luk 21.29-33*

²⁸ Injini geröp ip eka tandökni mötmöriba dopkeu ki mötme. Böröñan lök oñambuk aiga sinnan yongoigetka mi eka möta kewö jimakze, 'Wehön nalöñan mönö dopdowiza.'

²⁹ Enön mewöñanök aiwesök miangö dop asuhuiga eka möt asariba könañi kewö jime, 'Jisösnöñ mönö nanñunöñ dopdowiza.'

³⁰ Nöñön keu ölni kun kewö jibi mötket: Ambazip ki merak gölmenöñ maljei, yeñön qahö kömugetka yuai pakpak jizali, mi mönö yeñgö malmal nalöñine asuhuma

³¹ Suep gölmenöñ göröñ qemahotmö, nöñgö Buña keunan mönö qahö ayapköma.' Mewö.

*Jisös kamawañgö nalöñi mi kunñan qahö mötza.**Mat 24.36-44*

³² *Suep gölmegö azi ölnan dawinöñ kamawi, miangö wehönñi me aua nalöñi mi kunñan kun qahö mötza. Suepnöñ garata yeñön mi qahö mötze. Anutugö Nahönñan mewöñanök mi qahö mötza. Iwinöñ nanñök mi mötza.

³³ Nalö dawinöñ asuhumawi, mi qahö mötzeañgöra enön mönö alöm memba uruguliguli malme.

³⁴ *Mi dopkeu kiangö dop ahöza: Azi kunöñ mirinji mosöta kantri kungen anök. Anmamgöra aka galömurupñi yuai pakpakñangöra jim kutum engiba nanñu kinji böröñine ala kukñi engiyök. Kukñi engiba welenqequeurupñi mohok mohok nup keu engiyök. Engiba mala nanñu galömñi mewöyök uruguliguli malmapköra jim kutum wañgiyök.

³⁵ Miri toñan dawinöñ lilingöba kamawi, mi qahö mötze. Mare me sunñem ömbibine kama me? Wañgarañ suruiga kama me? Wehön gianñiga kama me? Miangö dop injini mi qahö mötzeañgöra mönö uruguliguli malme.

³⁶ Könöpuk wölañ kaiga enön gaun ahögetka mewö miwikñaim engibapuk.

³⁷ Injini mönö uruguliguli malme. Keu mi gwarekurupñi engöra jizali, mi mewöyök alaurupni körek pakpak engögöra jizal: Injini mönö urugwölögwölö malme." Mewö.

14*Jisös qein kömumapkö añgöñañ alget.**Mat 26.1-5; Luk 22.1-2; Jon 11.45-53*

¹ *Pasowa kendon * aka beret yistñi qahö miangö kendonñi töriyohot. Wehön yahöt teköiga miangöreñ könahitkö ahotka jike nup galöm aka Köna keugö böhi yeñön tokoget. Tokoba denöwö möndöñninga Jisös ölöñ memba qeget kömumbawak, miangö könañi jaruba kewötket.

² Jaruba kewöta kewö jiget, "Ambazip irimñini seholiiga karimñi karimñi asuhubepuköra mi sösoñgai kendon nalöñe akingö osibin." Mewö jiget.

*Ambi kunñan Jisös o umköhökwañambuknöñ miriyök.**Mat 26.6-13; Jon 12.1-8*

³ *Jisösnöñ Betani mirinöñ mala Saimon kun uzikukunji mem solaniyöhi, yangö mire öngöba tarök. Miangöreñ nene memba tariga ambi kunñan köt kirin kun memba yangöreñ kayök. Kirin mi nöluk tuat-tuat qetñi alabastö miangön memenja. Mia o um-köhökwañambuk ölni qetñi nad miangön kokolak

* **13:32:** Mat 24.36 * **13:34:** Luk 12.36-38 * **14:1:** Eks 12.1-27 * **14:1:** Kantri qetñi Ijipt miangöreñ Kembangö garatanöñ engehoriiba enñonñgirök, kendon miangö qetñi Nei keunöñ Pasowa. Eksodus 12.15 * **14:3:** Luk 7.37-38

qeba tarök. Yanön mi bohonji ketanjan memba kaba nöluk jölñi kutuba onj Jisösgö nöropñe mimbiliba miriyök.

⁴ Miriiga azi tatkeri, yeñgöreñök tosatñan urubölö aka nanñinök kewö eraum mötket, “Nad o mi mönö wuanöngöra mewö ayuhuzawi?”

⁵ Nad o kelökñambuk mi bohonji memegöra albawak ewö, ölop silim 300:kö töwanji (Kina 1500,-) ongita yöhötibawak. Mi ambazip wanapñi engiiga dop kölbawak.” Mewö jiba ambi mi jim wanjiget.

⁶ Jim wanjigetka Jisösnöñ kewö jii mötket, “Ambi ki kude jim wanjime. Wuanöngöra urunji mem bölice? Yanön silik ölopñi ak soroköm niñgiiga dop kölja.

⁷ *Ambazip wanapñi mi nalöñi nalöñi sutñine malgetka ölopñi ak engibingö möta mi ölop nalö dop akñemö, nöñön engö sutñine nalö dop qahö malmam.

⁸ Yanön mi nanñi akakmemenanjö dop ak niñgiza. Nöñön kömumbi löm köl niñgimeanjöra ölop qeljine sileni kelökñöñ nömiriza.

⁹ Nöñön keu ölni kun kewö jibi mötket: Ölöwak Buña ki kantri igen waigen jim sehigetka anmawi, miangöreñ ambi kianön yuai ak niñgizawi, miangö buñanji mohok jiget sehiiga yanjöra mötmöriba malme.” Mewö.

Judasnöñ Jisös mamalolo mem wanjimangö urumohok ahök.

Mat 26.14-16; Luk 22.3-6

¹⁰ Gwarekurupñi 12 yeñgöreñök kun qetñi Judas Iskariot yanön Jisös mamalolo mem wanjimangöra aka jike nup galöm yeñgöreñ anök.

¹¹ Yeñgöreñ anda keunji jiiga mi möta urunjanan ölöwahiga söñgöronji moneñ wanjibingöra keu jöhöget. Keu jöhögetka Jisös nalö kungen mamalolo mem wanjimangö köna möt jaruba köñbingöba malök. Mewö.

Jisösnöñ gwarek yembuk Pasowa lama neget.

Mat 26.17-25; Luk 22.7-14, 21-23; Jon 13.21-30

¹² Beret yistñi qahö miangö kendon silim mutukñe (Seqononöñ) pasowa lama kun qeba ohozema. Miangöra Jisösgö gwarekurupñan jiget, “Böhi, nini miri denikeanjöreñ anda pasowa lama mözözömgöm gihiba nembin? Sihimgi denöwö ahöza?”

¹³ Mewö jigetka gwarekyahötñi yahöt kewö jiba melaim etkiyök, “Injiri Jerusalem sitinöñ öñgöyohotka azi kun o kumbut kunduta kaiga miwikñaimahot. Miwikñaiiba i ölop wuatangöba anmahot.

¹⁴ Anohotka mire öñgöiga miangö tonji kewö jiyohot mötma, ‘Böhinöñ kewö jiza: Ölop miri urunji kun niñginöñga miangöreñ öñgöba gwarekurupñi yembuk pasowa lama nembin.’

¹⁵ Mewö jiyohotka toñan möta miri qakñe eu öñgöba urunji ketanji kun kondel etkima. Miangöreñ dum tatat yuai mözözömgöget ahöza. Mi kondel etkiiga miangöreñ lama qeba ohomahot.”

¹⁶ Mewö jiiga gwarekyahötñan mosöta sitinöñ öñgöba Jisösnöñ keu jiyöhi, miangö dop miwikñaiiba kinda lama qeba ohom mözözömgöyohot.

¹⁷ Miri söñauiga Jisösnöñ gwarekurupñi 12 yembuk miri miangöreñ kanjotket.

¹⁸ *Kanjota öñgöba dumnöñ tata nene negetka Jisösnöñ kewö jii mötket, “Nöñön keu ölni kun kewö jibi mötket: Engöreñök kun nömbuk nene namba tatzawanön mönö mamalolo mem niñgima.”

¹⁹ Mewö jiiga urunjanan wösöbirik aiga könahiba nanñök nanñök qesim wanjiba jiget, “Nöngöra jibanbuk?”

* 14:7: Dut 15.11 * 14:18: Sum 41.9

²⁰ Qesim waŋgetka kewö jii mötket, “12 eŋgöreŋök kun nömbuk beret kuluŋnön kundunğözawi, yaŋön.

²¹ Suep gölmegö azi ölnan mönö yaŋöra keu ohoget ahözawaŋgö dop gölme mosöta anma. Anmapmö, mamalolo mem waŋgimawi, yaŋöra Yei wösöbirik! jizal. Anutunön mönö likepni öngöngöni meleş waŋgima. Azi mi nam köröuruŋeyök qahö ahubawak, mianön mönö amqem waŋgibawak.” Mewö.

Kembubuk semön qöndökni neget.

Mat 26.26-30; Luk 22.14-20; 1 Kor 11.23-25

²² Nene nempa tata Jisösnön beret memba kötuatköba mindipköba eŋgiba kewö jiyök, “Ki nani busuni. Ki memba neget.”

²³ Mewö jiba wain qambi memba saiwap jiba eŋgiiga köreknan qambi kiangöreŋök neget.

²⁴ *Negetka kewö jii mötket, “Ki nani sepni. Ki Anutunön ambazip yembuk jöhöjöhö areŋ aiga köhöimapköra sepni mokoget geiga ambazip gwötpuk amöt qem eŋgima.

²⁵ Nönön keu ölni kun kewö jibi mötket: Nönön wain kösögö ölni kiangöreŋ kunbuk toroqeba qahö nemam. Könaŋep Anutugö bemtohon uruŋe eu taringa közölömbuan almawi, wehön mianğöreŋ mönö wain o qainni kun mia nemam.”

²⁶ Mewö jiiga sösongai liŋet köla mosöta anda Oil ip kundunğe öngöget. Mewö.

Pitönön Jisös qaŋ kölmapkö jii mörök.

Mat 26.31-35; Luk 22.31-34; Jon 13.36-38

²⁷ *Öngöba Jisösnön kewö jii mötket, “Kezapqetok azi kunön keu kun kewö ohoi ahöza, ‘Nönön galömnini qebiga lama kambunan deŋme.’ Mianğö dop eŋön körek uruŋini böliiga nömosöta buratime.

²⁸ *Buratigetka nuŋgumemö, nönön mönö kömupnöhök wahöta mutuk Galili prowinsnön anda mianğöreŋ asuhum eŋgimam.”

²⁹ Mewö jiiga Pitönön kewö jii mörök, “Yeŋön körek uruŋini böliiga gömosöta buratime ewö, nönön mönö töndup mewö qahö akŋam.”

³⁰ Jiiga Jisösnön jii mörök, “Nönön keu ölni kun kewö jibi mötnön: Kuruknön indimni yahöt qahö qeriga göŋön merak sunğem qaŋ köl niŋginöŋga indimni karöbut akŋa.”

³¹ Mewö jiyökmö, Pitönön kapaŋ köla köhöiköhöi ahök, “Böhi! Mewö qahöpmö, ni nuŋgugetka göbuk mohotŋe kömumbirak, mi töndup nönön gi qahö qaŋ köl gihimam.” Gwarek tosatŋi pakpak mewöyök keu miyöhök jiget. Mewö.

Jisösnön Gezemanerönön köuluköyök.

Mat 26.36-46; Luk 22.39-46

³² Mewö eraum möta anda arö kun qetŋi Gezemanerönön anğotket. Anğota gwarekurupŋi kewö jii mötket, “Nönön endu anda köuluköbiga inini ölop nalö sutŋe ki tatme.”

³³ Mewö jiba Pitö, Jeims aka Jon eŋguaŋgita anget. Angetka Jisösnön könahiba köŋjiliŋ kanjamambuk möriğa köna böroni qeköyök.

³⁴ Mewö aka kewö jii mötket, “Nöngö urunan mönö kondum köla kotza-waŋgöra aka wösöbirik mötpiga kömukömuŋi ak niŋgiza. Inini ölop kiangöreŋ tata nömbuk guli malbin.”

³⁵ Mewö jiba nanğök boromkun toroqeba anda simin köla sipköba si-himbölä nalöni mi Iwiŋaŋgö jitŋaŋgö dop oŋgitmapköra köuluköyök.

* 14:24: Eks 24.8; Jer 31.31-34 * 14:27: Zek 13.7 * 14:28: Mat 28.16

³⁶ Köuluköba jiyök, “Aba Iwini, gi yuai kun qahö mölölömbizan. Miangöra sihimbölogö qambiñi ki mönö noangitman. Noangitpanak, mi nöngö sihimgö dop qahöpmö, mönö nangi jitkahö dop asuhuma.”

³⁷ Mewö jiba lilingöiga gwarekurupñi karöbut yeñön gaun ahöget engeka Pitögö kewö jii mörök, “Saimon, gi gaun ahözan me? Gi aua mohot-töp guli malmamgö kude köhöizan me?”

³⁸ Uruninan guli malbingö sihimñi mörakzinmö, sileninan lölöwöröñi akza. Miangöra esapesapnöñ et engubapuköra mönö köuluköba guliguli malme.”

³⁹ Mewö jii möriga kunbuk engömosöta anda keu miyöhök kunbuk jiba köuluköyök.

⁴⁰ Köuluköba lilingöiga jeñini böñböñ meyöhangöra kunbuk gaunök ahöget engehök. Gaunöhök wahöta keu melenbingö janjun aket.

⁴¹ Jisösnöñ ani indimñi karöbut aiga lilingöba kaba kewö jii mötket, “Inini toroqeba luhut memba gaunök ahöbingö mötze me? Mötket! Kunöñ Suep gölmegö azi ölni mamalolo mem wanjiiga bölöñi meme yeñgö böröñine öngöma. Miangö aua nalöñan lök kam kunjuza. Engö gaun ahöahö nalöñinan mönö teköza.

⁴² Mönö wahötketka anin. Mötket! Mamalolo mem ningimawi, yañön mönö dowe ki kaza.” Mewö.

Jisös qeraköba memba jöhöget.

Mat 26.47-56; Luk 22.47-53; Jon 18.3-12

⁴³ Jisösnöñ mewö jiba kiniga miangöreñök gwarekurupñi 12 yeñgöreñök kun qetñi Judas yañön kambu kun jitñe mem enjiiga kangetket. Jike nup galöm, Köna keugö böhi aka kantrigö jitñememe yeñön i melaim enjigetka bingö sou ketañi aka lingipñini memba kaget.

⁴⁴ Mamalolo memamgö ahöhi, yañön mutuk yembuk aiwesök keu kewö jöhöba jii mötket, “Nöñön azi numbuñi yöhötim nemami, i eka ‘Mönö mi!’ jiba memba jöhöba törörök galöm köla anme.”

⁴⁵ Mewö jiba kaba miangöreñök Jisösgöreñ angota “O Böhini!” jiba numbuñi yöhötim neyök.

⁴⁶ Yöhötim neiga eka Jisös qelanjiba memba jöhöget.

⁴⁷ Jöhögetka kösutñe kingeri, yeñgöreñök kunñan bingö sou ketañi öröba jike nup galöm bohonñangö welenqeqeñi qeba kezapñi köteköi erök.

⁴⁸ Jisös jöhögetka keu kewö jii mötket, “Ni kegwek-kahasililin azia qahöpmö, töndup nöngöra mewö möta bingö sou ketañi aka lingip memba nömemba jöhöbingöra kangetze.

⁴⁹ *Nöñön wehön dop jöwöwöl jikenöñ embuk kinda Buña keu kusum enjiba malbiga qahö nömigetmö, yuai ki mönö Buña Kimbigö keujan ölnambuk akñapköra asuhuza.

⁵⁰ Jisös jöhögetka gwarek yeñön körek Jisös mosöta buratiba unjurata anget. Mewö.

Sepguli kunöñ unjurata anök.

⁵¹ Azi gwabö kunöñ bindoñi tuatñanök köpeiba Jisösgö andöñe wuatangöba anök. Oponi tosatñi qahö löngöta aniga i esapköba meget.

⁵² Membingö osiba bindoñi qekögetka aukñamñe unjurata anök. Mewö.

Jikegö jitñememe yeñön Jisösgö keu nup meget.

Mat 26.57-68; Luk 22.54-55, 63-71; Jon 18.13-14, 19-24

* 14:49: Luk 19.47; 21.37

⁵³ Jisös jöhöba wanğita jike nup galöm bohonņangö mire anget. Angetka jike nup galöm pakpak, kantrigö jitņememe aka Kōna keugö böhi yeņön mianğoreņ anda tokoget.

⁵⁴ Angetka Pitönöņ sikepsikep enğuatangöba jike nup galöm bohonņangö mire anğota jakömbuak mirigö kiripo uruņe öņgöyök. Öņgöba welenqeçe azi yeņgö sutņine tata könöp kōsutņe jömörök.

⁵⁵ Mewö tarökmö, jike nup galöm aka jike kaunsöl kambu yeņön Jisösgö silenöņ alal keu denöwö nanğōinga qeget kōmumapkö jim jarugetmö, kōnaņi kun qahö miwikņaiget.

⁵⁶ Jaruba kinda gwötpukņan keu muneņi silene ala nanğöba jigetmö, keuņinan kōnaņi mohok qahö ahök.

⁵⁷ Mewö aiga tosatņan wahöta kinda keu muneņi silene ala nanğöba kewö jiget,

⁵⁸ **“Yaņön kewö jiiga mörin, ‘Nöņön jöwöwöl jike börönöņ memeni ki kōdenņbiga gölmenöņ eriga wehön karöbutkö uruņe jike qainņi kun börönöņ memeni qahö mi mem wahöta kuņguman.’ ”*

⁵⁹ Mewö jigetmö, töndup keuņinan kōnaņi mohok qahö ahök.

⁶⁰ Mewö aiga jike nup galöm bohonņan wahöta mesohol köl enğiba kinda Jisös qesim wanğiba kewö jiyök, “Yeņön göhö silege keu ala nanğözei, mianğö likeņņi kun jiman me qahö?”

⁶¹ Qesim wanğiiga yuai bölöņi kun qahö ahökmö, töndup likeņņi kun qahö melenđa keuņi bök kinök. Keuņi bök kiniga jike nup galöm bohonņan kunbuk kewö qesim wanğiyök, “Anutu möpöseim wanğimakzini, gi yanğö Nahönņi Kraist akzan me qahö?”

⁶² **Qesim wanğiiga “Oņ!” jiba kewö jii mötket, “Suep gölmegö azi ölnan mönö kukösum Tonğangö böröņi ölnje tata suepkö kousu qakņe eri ekņe.”*

⁶³ Keu mi jiiga jike nup galöm bohonņan malukuņi munjurata kewö jiyök, “Yei, iwinangö jitņi! Tosatņan keuņi nanğömegöra kunbuk qahö qesim enğibin.

⁶⁴ **Anutu mepaiközawi, mi mönö nanņinak möt teköze. Mianğöra denöwö mötmörize?” Mewö qesim enğiiga yeņön körek Jisös kōmupkö buņaya akņapköra jim teköget.*

⁶⁵ Mewö jim teköba tosatņan kōnahiba söutkölap miriba jemesoholņi es-uhuba böröņinan misiba qeba kewö jiget mörök, “Daņön guhuzawi, mi ölöp jinöņ mörin.” Jikegö kiripo galöm (sikiriti) yeņön mewöyök Jisös memba nungulumņe qekötahöget. Mewö.

Pitönöņ Jisös qaņ kölök.

Mat 26.69-75; Luk 22.56-62; Jon 18.15-18, 25-27

⁶⁶ Nalö mianğoreņ Pitönöņ kiripo uruņe sombemnöņ malök. Emu maliga jike nup galöm bohonņangö welenqeçe ambiņi kunņan mianğoreņ kaņgorök.

⁶⁷ Kaņgota Pitönöņ könöp kōsutņe jömöri ehiba kewö jiyök, “Gi mewöyök Nazaret azi Jisös miambuk malnöņ.”

⁶⁸ Mewö jiyökmö, Pitönöņ qaņ kölök kewö jiyök, “Keu jizani, mi qahö möta kōndatzal.” Mewö jiba kiripo nanğuņe geiga kinda kuruk qerök.

⁶⁹ Nanğunöņ geiga welenqeçe ambi kunņan i mianğoreņ kunbuk eka azi kōsutņe kingeri, i kōnahiba kewö jii mötket, “Azi kianğön mönö yeņgöreņök kun akza.”

⁷⁰ Mewö jii mötketmö, yaņön kunbuk qaņ kölök. Qaņ kölīga nalö borom kun teköiga azi kōsutņe kingeri, yeņön kunbuk Pitögöra kewö jiget, “Göņön Galili azia kun akzananğöra mönö alakņa, yeņgöreņöhök kun akzan.”

* 14:58: Jon 2.19 * 14:62: Dan 7.13 * 14:64: Lew 24.16

⁷¹ Mi möta könahiba nanji qesuahöm anguba jöjöpañ keunöñ jim köhöiba jiyök, “Azi keunji jizei, mi qahö möt wangizal. Munen jibilenak ewö, Anutunöñ mönö likepñi melenj ningima.”

⁷² Mewö jiba kiniga miangörenök kuruk qeri yahöt ahök. Kuruk qeriga Jisösgö keu kewñö jii möröhi, Pitönöñ mi mötmöriyök, “Göñön indimñi karöbut qañ köl ninginöñga kuruknöñ qeri indimñi yahöt akña.” Keu mi mötmöriba wösöñi julmangö aiga sahöt böliyök. Mewö.

15

Jisösnöñ premiö Pailötkö jeñe kinök.

Mat 27.1-2, 11-14; Luk 23.1-5; Jon 18.28-38

¹ Miri gianjiiga amandinje jike nup galöm, kantrigö jitñememe (70), aka Köna keugö böhi aka jike kaunsöl pakpak yeñön kot öngöngöñi miangö totoko ala Jisösgö keu jim teköget. Jim tekögetka Jisös jöhöba wangita premiö Pailötkö böröñe alget.

² Rom premiö yeñön Jisös kewö qesim wangiyök, “Ölña, gi Juda yeñgö kinja akzan me qahö?” Qesim wangjiiga Jisösnöñ melenja jii mörök, “Mönö nangak jizani, mewö.”

³ Jike nup galöm yeñön keu gwötpuk Jisösgö silenje ala jiget.

⁴ Jigetka Pailötnöñ Jisös kunbuk qesim wangiba jiyök, “Mötnöñ! Yeñön keu gwötpuk göhö silege ala jizei, göñön miangö likepñi kun jiman me qahö?”

⁵ Mewö jiyökmö, Jisösnöñ bölöñi kun qahö ahökmö, töndup keu kitipñi kunbuk qahö melenñök. Keu bök kiniga premiönöñ welipköyök. Mewö.

Pailötnöñ Jisös kömumapkö jim teköyök.

Mat 27.15-26; Luk 23.13-25; Jon 18.39-19.16

⁶ Yambu (yara) dop pasowa sösongai nalöñe premiönöñ kösö mireyök azi kun qetñi qeta qesigeri, mi pösat engizapma.

⁷ Nalö miangörenj azi kun qetñi Barabas qetkeri, yeñön kösö mire tarök. Yeñön kegwek-kahasililinj azi tosatñi yembuk karim gila azi kun qeget kömuyöhi, miangöra kösö mire al engiget.

⁸ Mewö aiga könagesö yeñön premiögö miri sombemñe eu öngöba kinda könahiba akñalöhangö dop akñapkö qesim wangiget.

⁹ Qesim wangigetka melenja kewö jii mötket, “Nöñön Juda engörenj kinj pösatpi etmapkö mötze me?”

¹⁰ Jike nup galöm yeñön Jisösgöra körögisigisi mötkerangöra aka i premiögö böröñe al wangiget. Mi möta sihimñinangö mewö qesim engiyök.

¹¹ Qesim engjiiga jike nup galöm yeñön ambazip kambu uruesiesi mem engiba kewö jiget, “Mönö Jisös mosöta Barabas pösatman! Mewö qesim wangime.”

¹² Mewö jigetka kunbuk melenja qesim engiyök, “Mewö jizeangöra Juda engörenj kinj qetñi mewö qerakzei, nöñön mönö i denöwö ak wangibilenak?”

¹³ Mewö qesim engjiiga kunbuk qetket, “Mönö maripomnöñ qeget jiman!”

¹⁴ Mewö qetketka Pailötnöñ kewö jii mötket, “Mi wuanöngöra? Yeñön mönö wani bölöña ahök?” Mewö jiyökmö, yeñön mi möta kapañ köla toroqeba qet gigilahöba kewö qetket, “Mönö maripomnöñ qeget jiman!”

¹⁵ Mewö qetketka Pailötnöñ ambazip kambu sihimñinangö dop akñamgö möta Barabas pösat engji erökmö, Jisösyia jiiga ihilek wahinambuknöñ qeyöyaköba qeget. Mewö qegetka maripomnöñ qemegöra Rom yarö azi yeñgö böröñine alök. Mewö.

Jisös kukulömbuan ak wanjiget.

Mat 27.27-31; Jon 19.2-3

16 Yarö azi yeñön Jisös wanjita premiögö jakömbuak mirigö kiripo urune angotket. Angota yarö kambu lökñanök öröm engigetka miangören kaget.

17 Kaba maluku pisikñi gugakgugak mi Jisösgö sileñe löngöt wanjiba sötman kösö limbiñda ila ewö nöropñe kölget geyök.

18 Mewö geiga könahiba waikñi memba jölöñi jiget, “Owe owe, Juda yeñgören kiñ, owe!”

19 Titipepe mewö aka jigetka jehotnön nöropñe qeba söutkölap qeba simin köl wanjiba sipköba möpöqöpösei munenji mem wanjiget.

20 Mepaqepaik mewö ak wanjim teköba maluku pisikñi gugakgugak mi qeköba nanñe sile esu löngöt wanjiba maripomnön qebingöra wanjita anget. Mewö.

Jisös maripomnön qeget.

Mat 27.32-44; Luk 23.26-43; Jon 19.17-27

21 *Anda köna namñe azi kun qetñi Saimon miwikñajiget. Yanön Afrika siti qetñi Sairini miangö aziña aka Aleksander aka Rufus yetkö iwiñira. Yanön nupñöhök kanjoriga kunjum wanjigetka Jisösgö maripomñi memba angyök.

22 Jisös mewö wanjita gölme kun qetñi Golgota mi nanine keunön nörop sihit, miangören anda angotket.

23 Angota wain o aka marasin qetñi mör mi mindiriba lolonqalon memba wanjigetmö, Jisösnön mi tököyök.

24 *Tököiga kinda maripomnön qeget. Qeget kiniga kiawen meget qötönji ahuiga Jisösgö sile esunji mohok mohok sutñine miangö dop mendenja meget.

25 Söñan 9 kilok miangören maripomnön qeget.

26 Maripomnön qeba nöropñe eu qegerangö könañi kewö ohoba qeget, “Juda yeñgö kiñ kembunina ki.”

27 Kegwek-kahasililij azi yahöt mewöyök yambuk maripomnön etkuget. Kun böröñi ölñe kun qaniñe likeplikep mewö etkuget.

28 *(Anutugören Buña Kimbinön keu kewö ohoget ahöza, “I kewöta kegwek-kahasililij azi ewö mötmörriba yeñgö sutñine alget.” Keu mianön mewö ölñambuk ahök.)

29 *Ambazip onjita anda kaba kukulömbuan aka jelikit aka nörop köla kewö jiget, “Yei! Gi mönö jöwöwöl jike ölöp köndenönnga gölmenön eriga wehön karöbutkö urune kunbuk mem wahöt kunjumangö jinön. O, gi azi qetpuk!

30 Mönö nangi bauköm anjuba maripomñöhök etman.”

31 Jike nup galöm aka Köna keugö böhi yeñön mewöyök sutñine mepaqepaik ak wanjiba jiget, “Tosatña bauköm enjiba malökmö, nanñi bauköm anjumanangö osiza.

32 Yanön Amötqeqe Toñi Kraist aka Israelgö kiñ akza ewö, mönö döлки maripomñöhök eri eka mi möt naribinak.” Mewö jiget.

Azi yambuk maripomnön etkugeri, yetköñ mewöyök uruqeqe keu töhören jim wanjiyohot. Mewö.

Jisösnön kömuyök.

Mat 27.45-56; Luk 23.44-49; Jon 19.28-30

33 Silim bibiñi 12 kilok aiga miangören söñaupnön eta gölme pakpak dop köla ahöiga anda aua karöbutkö dop ahök.

* 15:21: Rom 16.13 * 15:24: Sum 22.18 * 15:28: Ais 53.12 * 15:29: Sum 22.7; 109.25; Mak 14.58; Jon 2.19

³⁴ *Jisösnöñ 3 kilok miangörej nanje keunöñ kewö qet ketanji qerök, “Eloi, eloi, lama sabaktani?” Mi nanine keunöñ: Anutuni, Anutuni mönö wuanöñgöra andö nuñguzan?

³⁵ Mewö qeriga azi kösutje kingeri, yengörejök tosatñan mi möta jiget, “Mötket! Mönö Elaijagöra qetza.”

³⁶ *Yengörejök kunöñ ösumñan anda mömündö kun kahali tandök mi memba wain o asölñambuknöñ kundumgöba ip göröm kitipje jöhöba suruba Jisös numbu susuje eu ali neiga jiyök, “Mönö mosötketka nanjök kinök. Elaijanöñ kaba meköi etma me qahöpto, mönö mi ekin.”

³⁷ Mewö aketka Jisösnöñ qet ketanji qeta wösöñi nöñ qeiga kömuyök.

³⁸ *Kömuiga miangörejök jöwöwöl jikegö uruje opo kinöhi, mianöñ mönö euyök bibiñe jurata eta yahöt ahök.

³⁹ Suahö galömnöñ maripom mesohol köla kinda Jisösnöñ wösöñi nöñ qeiga kömuyöhi, mi eka kewö jiyök, “Azi kianöñ mönö ölña Anutugö nahöñña akza.”

⁴⁰ *Ambi tosatñan mewöyök sikep kinda yuai mi eket. Yengö sutñine Magdalagö Maria aka Maria Jeims dubatñi aka Joses yetkö namñiri aka Salome yeñön mohotje kinget.

⁴¹ Yeñön Jisösnöñ Galili prowinsnöñ maliga miangörej i wuatangöba welen qem wangiba malget. Mewöyök ambi tosatñi gwötpuk Jisösbuk Jerusalem sitinöñ öñgöba kageri, yeñön mewöñanök kösutje kinget. Mewö.

Jisösgö qamötñi löm kölget.

Mat 27.57-61; Luk 23.50-56; Jon 19.38-42

⁴² Sabat kendon tatatköra yuai mözözmöngögetka Sabat kendonöñ könahimangöra dopdowiiga mare aka kayök.

⁴³ Neñgogie miangörej Arimatia tonji, azi qetbuñañambuk qetñi Josef yañön kayök. Yañön mewöyök Anutu bemtohoñangö ölñi asuhumapköra mamböta malök. Yañön Juda yeñgö jike kaunsöl kambugö jitñememe kun aka Sabat kendonöñ könahimangö ahörañgöra aka keñgötñi yaköriba Pailötköreñ anda Jisösgö qamötñi memangö qesiyök.

⁴⁴ Qesiiga “Ölña kömuza me qahöpto?” jiba mötmöriba suahö galömnji jii kaiga “Jisösnöñ nalö köröpñi me töröpñi kömuza,” jiba qesim wangiyök.

⁴⁵ Qesim wangiiiga buzup keunji möta Jisösgö qamötñi Josef jim teköm wangiyök.

⁴⁶ Jim teköm wangiiiga opo tuatñi söñgööröñi memba anda qamötñi maripomnöñök qeköba memba eta oponöñ esuhuyök. Esuhuba memba qaksirinöñ anda kötnöñ köteñ urorohogetka dum ahöyöhi, miangörej alök. Ala köt kötanji kun metaliga köteñ numbuñi közipköyök.

⁴⁷ Denike alöhi, mi Magdalagö Maria aka Maria Josesgö namñi yetköñ kinda ehot. Mewö.

16

Jisösnöñ kömupnöñök wahörök.

Mat 28.1-8; Luk 24.1-12; Jon 20.1-10

¹ Sabat kendon tatket teköiga miangörej Magdalagö Maria, Maria Jeimsgö namñi aka Salome yeñön “Jisösgö qamötñi anda miribin.” jiba jiniñ jimoroñ umköhöwaktambuk söñgööröñi meget.

² Memba ahöba Sonda söñanök wahöta miri gianji wehön jilinjölañ kori qaksirinöñ anget.

³ Anda eraum möta jiget, “Qaksirigö numbuñe köt ketanji tatzawi, mi mönö danön qetalma?”

⁴ Mewö jiba ugetka ani kewö eket: Köt keta bölökñi mi lök qetalget anda ahöyök.

⁵ Qaksirigö köt kötenj numbuñi mewö añañiba kiniga uruñe öngöget. Öngögetka ölnine göröken azi gwabö kun malukuñi köröpñi tuatñi tariga eket. Mewö eka gwötpuk awöwöliget.

⁶ Awöwöligetmö, kewö jii mötket, “Mönö kenğötñini kude mötme. Injini Nazaret azi Jisösgöra jaruze. I maripomnöñ qegetmö, mönö guliba wahörök. Mianğöra ki kude ahöza. Eket! Dumñi ki, mianğöreñ suluget ahöyök.

⁷ *Mianğöra mönö anda Pitö aka gwarekurupñi pakpak buzup kewö jiget mötme, ‘Yañön mönö qeljine mutuk Galili prowinsnöñ anma. Injini mewöyök mianğöreñ anda keuñi jiyöhañgö dop i ekñe.’ ”

⁸ Mewö jiiga auruba jönömñini unduiga köt kötenjök eta ösumñinan anget. Sömbuñini mötkerañgöra keu kun kude jigetmö, keuñini bököyök. Mewö.

Jisösnöñ Magdalagö Mariagöreñ asuhuyök.

Mat 28.9-10; Jon 20.11-18

⁹ Jisösnöñ Magdalagö Maria yangö uruñeyök öme 7 enğuatangöiga malök. Jisösnöñ kömupnöñök wahöta Sonda söñan amandijnöñ mutuk Maria mi asuhum wañgiyök.

¹⁰ Asuhum wañgiiga alaurupñan Jisösbuk mala kota nalö mianğöreñ jinğen köla sahötkeri, Marianöñ mönö yeñgöreñ anda buzupñi jii mötket.

¹¹ Mötketmö, Jisösnöñ guliba mali Marianöñ ehöhi, mi qahö möt nariget. Mewö.

Jisösnöñ alayahötñi yetköreñ asuhuyök.

Luk 24.13-35

¹² Mianğö andöñe alayahötñan Jerusalem siti mosöta miri kunöñ anbitköra könanöñ anohotka Jisösnöñ kaisongolomñan meleşniga asuhum etkiyök.

¹³ Yetköñ mewöyök anda buzupñi mi alaurupñi jiyohot mötketmö, yeñön mi mewöyök qahö möt nariget. Mewö.

Jisösnöñ gwarekurupñi asuhum enğiyök.

Mat 28.16-20; Luk 24.36-49; Jon 20.19-23; Apo 1.6-8

¹⁴ Könañgep gwarekurupñi 11 mienjön tokoba nene nemba tatketka yeñgöra mewöyök asuhuyök. Asuhuba uruköhöikñinañgöra tembula kömupnöñök wahöriga ekerañön buzupñi jiget möta mi qahö möt narigeri, mianğöra i jim enğiyök.

¹⁵ *Jisösnöñ kewö jii mötket, “Injini mönö kantri dop anda gölmeñi gölmeñi liliköba ambazip mal anjeañgö dop Ölöwak Buñani jim asarigetka mötme.

¹⁶ Kunñan Anutu möt nariiga o melun mem wañgigetka uruñi meleşmawi, yañön mönö letota Suepkö buñaya akña. Kunñan qahö möt nariba yangiseñ malmawi, Anutunöñ mönö yangö keuñi jim teköiga könöp siagö buñaya akña.

¹⁷ Möt narim niñgiba malmei, mi aiwesök mem enğibiga könañamñini kewö asuhuma: Yeñön nöñgö qetne ömewöröme enğuatangöme. Kantri tosatñi yeñgö keuñi jime.

¹⁸ Mokoleñ böröñinan memba wahötme. Möröm warabe o yuai negetka mianjön mönö qahö mem bölim enğima. Böröñini kawöl ambazip qakñine algetka ölöwakñe.” Mewö.

* 16:7: Mat 26.32; Mak 14.28 * 16:15: Apo 1.8

Jisösnöŋ Suep mire öŋgöyök.

Luk 24.50-53; Apo 1.9-11

¹⁹ *Kembu Jisösnöŋ keuŋi mewö jii mötketka Anutunöŋ waŋgiriga Suepnöŋ öŋgöba Anutugö böröŋi ölŋe tata malja.

²⁰ Eu maljapmö, gwarekurupŋan mosöta miri gölme dop anda Buŋa keuŋi jim sehiba malget. Mewö malgetka Kembunöŋ yembuk nup memba inahöm enjiiga aŋgöletot asuhugetka keuŋinan köhöiyök. Mewö.

* **16:19:** Apo 1.9-11

Luk Ölöwak Buṇa Luknōṅ ohoyök. Jim-asa-asari

Urumelen yeṇön miti dölökṅi qahö memba kazei, dokta Luknōṅ mi azi öngöngöṅi Tiofilusgöra kondelmamgöra aka Ölöwak Buṇa ki ohoyök. Luk yaṇön Jisösgö gwarekṅi 12 yeṅgöreṅök kun qahöpmö, Grik azia aka kawöl ambazip mem ölöwak nupnōṅ malök. Luknōṅ Jisösgö könaṅi yahöt kewö kondel neṅgiza: 1) Anutunōṅ Amötqeṅe Tonji melaimamgö keu jöhöiga Israel yeṅgöra asuhuyök, 2) Yaṇön mönō kantriṅi kantriṅi mem ölöwak neṅgimamgöra kayök. Kembangö Uṇaṅan Jisös oholiga “ambazip etqeṅeṅi yeṅgöra Ölöwak Buṇa” jim asariyök. Ambazip yuai könaṅi könaṅi miangöra osigeri, Jisösnōṅ yeṅgöra waimanjat möta baukōm eṅgiba malök. Luknōṅ kösohot mewōṅi sehisehiṅi areṅgöba ohom teköyök. Luknōṅ sösöṅgaigö kösohotṅi gwötpuk ohoyök. Jisösnōṅ mutuk gölmenōṅ erök aka tetekōṅe miangöreṅ gölme mosöta Suepnōṅ öngöyök. Miangöra sösöṅgai sehisehiṅi mi boṅ 1-2 aka boṅ 24 miangöreṅ ahöza. Jisösnōṅ Suepnōṅ öngöiga Buṇa nup mem sehigetka mötnarip kambunōṅ qariba qariba anök. Luknōṅ miangö kösohotṅi mi buk qetṅi “Aposol nup meme” miangöreṅ ahöi ahöza.

Luknōṅ Ölöwak Buṇa ohoyöhi, miangö keu bohōṅi mi kewö dop köla ali ahöza: Köuluk nup megetka ölni asuhuyök, Uṇa Töröṅan ambazip sölölohöm eṅgii malget, Ambi yeṇön Jisösbuk nup gwötpuk naṅgöba meget, Anutunōṅ siṅgisöndokṅini mosöta malök.

Buk kiangö bahōṅi bohōṅi 8 mi kewö:

Buk kiangö könaṅi Luknōṅ ohoyök boṅ 1.1-4

Jon O-melun azi aka Jisös asuhaba qariyohot 1.5-2.52

Jon O-melun azinōṅ Anutugö nup meyök 3.11-20

Jisös o melun mem waṅgiiga esapesap miwikṅaiyök 3.21-4.13

Jisösnōṅ qenjarök nupṅi Galili prowinsnōṅ meyök 4.14-9.50

Galili mosöta köna anda Jerusalem aṅgorök 9.51-19.27

Jerusalem aṅgota sonda qöndökṅi malök 19.28-23.56

Wahöta asuhum eṅgiba Suepnōṅ öngöyök 24.1-53

Matyu Mak Jon yeṇön kösohot tosatṅi qahö ohogeri, mi Luknōṅ nanṅök ohoi bahōṅi 2 aka 6 miangöreṅ ahöza. Kösohot tosatṅi mi kewö: Garata yeṇön linet kölget, Lama galöm yeṇön Jisös asuhuiga kaba eket, Jisösnōṅ morörörpṅe jöwöwöl jikenōṅ öngöyök, Samaria azinōṅ gurusep azi ak kömum waṅgiyök aka nanṅi imbi-imbi azinōṅ siṅgisöndoknōṅ geba sohoyöhi, miangö dopkeu.

Luknōṅ kimbi Tiofilusgö ohoyök.

¹ Kezapqetok ambazipnōṅ Amötqeṅe Tonji ahumapkö keu jigetka miangö ölni sutnine asuhuyöhi, ambazip gwötpukṅan miangö kösohotṅi könahiba ohoget.

² Yuai ölni mi sutnine asuhuiga tosatṅan mi könakönahineyök könahiba kota nanṅine jeṅinan eka möt yakögeri, yeṇön miangö dop miangö buzupṅi toroqeba jim sehigetka kezapnine geba nanine buṇaya ahök. Ambazip mewōṅi yeṇön Buṇa mi könahiba papianōṅ ohoba areṅgöget ahöza.

³ Nōṅön mewöyök yuai pakpak asuhaba koröhi, mi törörök qesim eṅgibi könaṅeyök könahiba jigetka möt kutuzal. O Tiofilus nōṅön göhöra mötpi

öngöngöñi akzan. Nöñön göbuk keu eraum mötpitkö mötpi ölöwahiga Jisösgö kösohotñi mi körekñanök arengöba ohozal.

⁴ Buña keu ölni kusum gihigetka mötzani, göñön miangö könani oyoñda körekñanök möt kömuman. Mewö.

Jon asuhumapkö keuji Geibrielnöñ jiyök.

⁵ *Judia prowinsgö kin qetñi Herod yangö nalöñe azi kun qetñi Zekaraia malök. Yanön jike nup galöm mala Abaiagö nup areñnön kinök. Anömñi qetñi Elisabet yanön mewöyök jike nup galöm Arongö gwölönarökñi kun ahök.

⁶ Yekñön Anutugö jeñe malmal diñdiñi mala Kembangö jöjopañ keu aka jimkutukutunji pakpak törörök wuatangöba köpösihitkö keujiri qahö malohot.

⁷ Malohotmö, Elisabetnön köpingöra gwölönarökñiri qahö mala ambazip namñi ahot.

⁸ Nalö kunön Abaiagö nup areñ nalöñan kaiga Zekaraianön jike nup galöm nup memapköra Anutugö jemesoholñe kañgorök.

⁹ Kañgoriga jike nup galöm yeñön aiakanini wuatangöba sutñine nup mendenña Zekaraia mekögetka Kembangö altanön öngöba jinij wöronñambuk ohoyök.

¹⁰ Jinij wanafu ohoho nalöñan kam kuñguiga yanön yuai wöronñambuk mi ohoiga ambazip kambu pakpak yeñön jöwöwöl jike yaigepñe mamböta Anutu köuluköba malget.

¹¹ Jinij ohoiga wöronñan pukpuköba miri urunji dop köliga miangören Kembangö garata kunön altanön eu asuhum wangiba böröñi öñje göröken kinök.

¹² Kiniga Zekaraianön eka auruba kengetñi mörök.

¹³ Kengetñi mörökmö, garatanön kewö jii mörök, “Zekaraia, gi kengetki kude mötnön. Anutunön köuluki lök mötza. Miangöra anömngan gölöm ala morö nahöna mema. Mi meiga göñön qetñi Jon qetman.

¹⁴ Nahönñi asuhuiga urugan yangöra ölöwahiga söngainöñga ambazip gwötpukñan sösoñgai akñe.

¹⁵ *I nam körö uruñe tariga Uña Töröñan miangörenök könahiba urunji kokolak qeiga qariba wain me o köhöikñi mi qahö nempa Kembangö qöhöröñe azi öngöngöñi aka malma.

¹⁶ Mewö mala Israel ambazip gwötpuk urumelen enjiiga Kembunini Anutugören lilingöme.

¹⁷ *Anutugö Uñañan kezapqetok azi Elaija inahöiga kukösum qakñe nup meyöhi, yanön mönö miangö dop mutuk qeljine aniga Kembunön andöñe kama. Yanön anda könagesö uru kuñgum enjiiga Kembunön kamapköra jöjöröba kinme. Iwi aka nahönbörat jula dengetka uru kuñgum enjiiga kunbuk mindirim anjume aka qegetal ambazip mi diñdiñi yengö mötmöt areñnön anjotme.”

¹⁸ Sup garatanön mewö jiiga Zekaraianön jiyök, “Anömni netkön ambazip namñi akzirangöra keugan mönö dewöwö öññambuk akawak?”

¹⁹ *Mewö jiiga melenök, “Ni Geibriel. Nöñön Anutugö mesoholñe kinbi melaim ningii buzup ölöpnji ki memba kaba jibi mötzan.

²⁰ Nöngören keu jit öññambuk asuhumawi, göñön mi jibi qahö möt narizanangöra keugan mönö qahöwahiga mötök malman. Mewö malnöñga buzup keu kiangö ölni asuhumapkö nalöñan kam kuñguiga miangören nesilamngan lolohoi keu kunbuk jiman.”

21 Nalö sutne miangören ambazipnön mamböt mala Zekaraianön jöwöwöl jikenön nalö köröp tıntıni kinöhanğöra mötkurumkurum aket.

22 Mewö aka tatketka yaigep eta keu jimangö osiiga möt asariba kewö jiget, “Yañön jöwöwöl jikenön kinda jeni meleşni Suepnöhök imut kun ekza.” Mewö jigetka börönanök kaisöpsöp al engiba mötök aka malök.

23 Mewö mala jike nup meme nalönan teköiga lilingöba mirine anök.

24 Wehön tosatni teköiga Elisabetnön gölöm ala köiñ 5 miangö dop mire asamböta kewö jiba tata malök,

25 “Moröni qahöpköra ambazipnön memba eta al niñigetka Kembunön mesohol köl niñgiba miangö lömbötñi memba gila ak kömum niñgiza.” Mewö.

Jisös asuhumapkö keunji Geibrielnön jiyök.

26 Elisabetnön gölöm alöhanğö köiñi 6 aiga Anutunön garatanji qetñi Geibriel melaiiga Galili prowinsgö miriñi kun qetñi Nazaret miangören erök.

27 *Eta ambi seram jömukñi qetñi Maria yañgören anök. Yañön azi qetñi Josef yangö ambi buñaya malök. Josefnön kiñ Deiwidkö gwölönarökñi kun ahök.

28 Garatanön Mariagören anda kewö jiyök, “O Maria, silimgi ölöpnji. Kembunön kalem möriam gihiba göbuk kinma.”

29 Mewö jiyökmö, Marianön jölön miangöra gwötpuk auruba könanji jaruba mötkurumkurum ahök.

30 Mötkurumkurum aiga kewö jii mörök, “Maria, Anutunön kalem möriam ghiiga yangö jeñe dop köljan. Miangöra kenğotki kude mötnön.

31 *Mötnön, göñön gölöm ala morö nahöna meman. Memba qetñi Jisös qetman.

32 *Jisös yañön qariba azi qetbuñambuk aiga qetñi ‘Öngöngöñi ketanangö Nahönñi,’ qetketka malma. Mewö mali Kembu Anutunön amböñi kiñ Deiwidkö jakömbuak dum wañgiiga salupñe ambazip galöm köl engiba malma.

33 Jeikobkö könagesö yeñgö kiña aka teteköñi qahö galöm köl engiba malma. Bemtohoñi miñön mönö nalö kunön kude qahöwakña.”

34 Garatanön mewö jiiga Marianön jii mörök, “Yei! Ni azigö könanji qahö mötzal. Miangöra keu jizani, miangö ölnji mönö denöwö asuhuma?”

35 Mewö jii möta meleşnök, “Uña Törönan mönö aum köl ghiiga Anutu öngöngöñi ketanangö ösumñan dop köla turum gihima. Miangöra morö memani, yañön töröñi aiga ambazipnön qetñi ‘Anutugö Nahönñi,’ jiba qerakñe.

36 Mötnön. Tinigi Elisabet yañön mewöyök ‘Köpin mala morö memangö osiza,’ jigetmö, tøndup ambi namñi aka nalö kewöñe morö nahöngö gölömnambuk aiga köiñi 6 akza.

37 *Anutunön yuai kun akñangö jiba mi qahö qaköba osimakza.”

38 Mewö jiiga Marianön jiyök, “Mötnön, nönön Kembangö welenqege ambia akzal. Miangöra keu jizani, miangö dop ölöp ahum niñgima.” Mewö jiiga Suep garatanön mosöta anök. Mewö.

Marianön Elisabetkören kusuk anda ehök.

39 Marianön mi möri nalö köröpnji qahö aiga wahöta zilañ jöjöröba gölme kundune öngöba Judia prowinsgö taon kunön anök.

40 Anda Zekaraiağö mire öngöba anömñi Elisabet eka söñgaiba jölöñi jiyök.

41 Jölöñi jiiga miangörenök möri morö nahönön körö uruñe luhuba öngöba eri Uña Törönan Elisabetkö uruñi kokolak qeyök.

⁴² Kokolak qeiga qet ketani qeta kewö jiyök, “O alani, Anutunöŋ kötümötuetŋi öngöngöŋi al gihiiga ambi sutnine malman aka morö memani, i mewöŋanök kötuetköm waŋgima.

⁴³ Denöwögöra Kembunangö namŋan kaba neiga mewö asuhum niŋgiza?

⁴⁴ Mötnöŋ, gi jölöŋni jinöŋga keu jölgi kezapne gei morönöŋ urune mewöyök sösongai qakŋe luhuba öngöba etza.

⁴⁵ Kembunöŋ buzup keuŋi jiiga möta miangö ölni asuhumawi, mi möt narizanangöra göhö mötŋi simbawon akzan.” Mewö.

Marianöŋ sösongai liŋet kölö.

⁴⁶ *Marianöŋ keu mi möta kewö jiyök,
“I-ia! Nöngö urukönömnan mönö önöŋi qahö Kembu möpöseiza.

⁴⁷ Nöngö uŋanan Anutu, Amötqege Toni yangöra söŋgaiba köiraŋ kölja.

⁴⁸ *Nöŋön welenqege ambi etqeŋeŋi maljalmö, Anutunöŋ töndup meso-hol köla ak kömum niŋgiza.

Mötnöŋ, ambazip kambuŋi kambuŋi merak könahiba asuhumei, yeŋön mönö nöngöra ‘Simbawon!’ jiba möpöseim niŋgiba malme.

⁴⁹ Kukösum Toŋan mönö angöletot öngöngöŋi mem niŋgii maljal.

Yangö qetŋi mi Töröŋi.

⁵⁰ Ambazip merak gölmenöŋ maljei aka könaŋgep ahum sehimei, yeŋö sutŋine gwöt isik denike yeŋön Anutugö jitŋi ongitpinbukö keŋgötŋini mötmei, yangö ak-kömukömuŋan mönö yembuk pöndaŋ ahöma.

⁵¹ Anutunöŋ böröŋan angöletot memba miangön kukŋi kondel neŋgiiga ehin.

Ambazip nanŋini miwidimgöba söŋgöroqök malgeri, yaŋön mönö i könden eŋgiiga simbisembel aka malget.

⁵² *Kiŋ kambuŋi kambuŋi jakömbuak dumŋine tata ambazip galöm köl eŋgiba malgeri, yaŋön i miangöreŋök qeköba utal eŋgiiga etket. Etketmö, etqeŋeŋi ia mönö mem wahöta al eŋgiyök.

⁵³ Ambazip yuaigö jaŋkötataŋ malgeri, miengö uruŋini mönö yuai ölöŋni ölöŋni miangön kokolak qeyökmö, ambazip pomŋi mi melaim eŋgiiga böröŋini börak öne anget.

⁵⁴⁻⁵⁵ *Yaŋön ambösakonurupnini meköba eŋgömeiga Israel aketka nini toroqeba Anutugö welenqegeurupŋi maljin.

Anutunöŋ mönöwök jöjöpaŋ keuŋi kewö jim jöhöm neŋgiyök, ‘Nöŋön Abraham aka yangö gwölönarökurupŋi teteköŋi qahö mal öngöba malmei, i ak kömum eŋgiba malmam.’

Mewö jiba keuŋi mi qahö ölum qei mala korök.

Qahöpmö, yaŋön mönö keu jitŋi mi wuatangöba mala merak bauköm neŋgimangöra kaza.”

Marianöŋ mewö jiyök.

⁵⁶ Marianöŋ köiŋ karöbut miangö dop Elisabetpuk mala kunbuk miriŋe liliŋgöyök. Mewö.

Jon O-melun azinöŋ asuhuyök.

⁵⁷ Elisabetkö morö meme nalöŋan kam kuŋguiga morö nahöna meyök.

⁵⁸ Morö nahöna meiga miri kösutŋe malgeri aka tinitosolomurupŋi yeŋön Kembunöŋ ak-kömukömu öngöngöŋi kondel waŋgiyöhi, mi möt asariba yambuk mohotŋe sösongai aket.

59 *Sösöngai aka wehön 7 teköiga wahöta anda Anutugö aiwesökni morö silene yandimegöra tokoget. Tokoba iwiñangö qetni Zekaraia mi wakan mem wangibingöra jiget.

60 Jigetmö, namñan jiyök, “Mi qahöpmahöpmö, qetni mönö Jon qetpin.”

61 Jiiga kewö jiget mörök, “Jon qetzanmö, göhö tinitosolomgi yengörenök kunñangö qetni mi qahö ahöza.”

62 Mewö jiget möri kinda iwiñan yangö qetni qetmapkö qesiba böröñinan kaisöpsöp alget.

63 Kaisöpsöp algetka tafegöra qesii wangigetka miangören kulem kewö ohoyök, “Qetni mi Jon.” Mewö ohoiga miangöra körek aurum tililingöget.

64 Aurum tililingögetka miangörenök numbuñi amgöiga nesilamni lolohoiga keu jiba Anutu möpöseiyök.

65 Möpöseiiga miri alaurupñini pakpak yeñön qemsömbuñini gwötpuk mötket. Mötketka yuai asuhuyöhi, miangö buzupni eraum mötketka sehiba Judia kundunji gölme pakpak dop kölök.

66 Buzupni eraum mötketka körekñan mi möta urukönömñine ala anñön kölget. Kembunöñ kukösumñi morösepsep qakñe mokoi malöhi, miangö könani möt asariba kewö jiget, “Morö kianñön qariba mönö wani yuaia kun denöwö akña?” Mewö.

Zekaraianöñ kezapqetok keu jiyök.

67 Mewö jigetka Uña Töröñan iwiñi Zekaraiağö urunji kokolak qeiga kezapqetok keu kewö jiyök,

68 “Nini Israel nenğöreñ Kembu Anutu möpöseibin. I-ia!

Yañön mönö könagesöurupñi mesohol köl nenğiba sohpnini memangöra jöjöröba kama.

69 Anutunöñ welen azinji kinj Deiwidkö könagesö nenğö sutnineyök azi kukösumñambuk kunğui wahöta Amötqeqe Tonina akña.

70 Möpñangö möpñeyök kezapqetok ambazipurupñi tök-kutukutunji i sölöhöm enğii keu jüt kewö jiba malget,

71 ‘Nöñön mönö kerökurupñini yeñgö ösumñini qebi eriga bohonñini jöhömam.

Denike yeñön kazik ak enğime, nöñön mönö körek yeñgö böröñineyök meköba sel jöhöm enğimam.’

72 Keu mewö jiba bömönurupñini ak kömum enğiba yembuk jöhöjöhö areñ qainñi kun jöhöyöhi, mi mötmöröba wuatangöiga amötqeqegö ölni asuhuma.

73 Jöhöjöhö keu mi bömönini Abrahamğöra jiba jöjöpaj keunöñ jim köhöii ahöza.

74 Jöhöjöhö keu miangö ölni kewö:

Yañön nini kerökurupñini yeñgö böröñineyök meköm nenğiiga yeñgöra kenğötnini qahö möta welenni qem wangiba malbin.

75 Yañön keunini jim teköi solaniba yangö jeñe sarakñi aka malmalnini ölülp mewö mala kömumbin.

76 *O gömokni Jon, göñön qariba mala qeljine mala ambazip urunñini mindingöba mewö miangöñ Kembugö könani mesatnöñga kama.

Miangöra qetki ‘Anutu öngöngöñi ketañangö kezapqetok azia,’ mewö qetketka malman.

77 Mewö mala amötqeqegö könani mi Anutugö könagesöurupñi kusum enğinöñga mi möt kutuba urunñini melengetka Anutunöñ sinğisöndokñini sanğonnda mosötma.

⁷⁸ Anutuninan uruñan jöpaköba ak kömum neñgimakza. Mewö aka mesohol köl neñgiba undiñi euyangörenök ali gilikbilik akza. Mewögöra neñön mönö wanğarañ surui aukñe asaribingö akzin.

⁷⁹ *Nini pandamanöñ jipjap taringa kömupkö kondotkondot Toñan aum köl neñgimakzapmö, wehön jilinjölañ kota qaknine kuñguba mem asarim neñgima.

Mem asarim neñgiiga luaigö könañi aukñe asuhui eka miangören anğota tiba kinbin.” Zekaraianöñ mewö jiyök.

⁸⁰ Morö Jon yañön qariba wahoriga Uña Töröñan inahöm wanğiiga Anutugö kolek azi köhöikñi ahök. Mewö aka gölme qararañkölkölñe mala mali nalöñan kam kuñguiga Israel könagesö yeñgö jeñine aukñe asuhuba qenjarök nupñi könahiba meyök. Mewö.

2

Jisös Betlehem taonöñ ahuyök.

Mat 1.18-25

¹ Jon O-melun azinöñ ahuiga nalö miangören sisa kiñ Ogastus yañön Rom sitinöñ gölmeñi gölmeñi galöm köl enğiyök. Galöm köl enğiba takis könahiba memegöra gawmangö jimkutukutu aliga gölmeñi gölmeñi pakpak yeñön tokogetka kuskus (sensus azi) yeñön qetñini papianöñ ohoba areñgöget.

² Areñ nup mi nalö mutukña meget. Megeri, nalö miangören azi qetñi Qirinius yañön Siria prowinsgö premiö mala galöm köl enğiyök.

³ Ogastusnöñ jimkutukutu aliga ambazip körek pakpak yeñön öröba anda qetñini areñnöñ ohomegöra nanñini ahuahu miri bohonñini dop anget.

⁴ Galili prowinsgö taon qetñi Nazaret miangören azi qetñi Josef malök. Yangö amböñi mi kiñ Deiwid. Kiñ Deiwidkö taonñi qetñi Betlehem mi Judia prowinsnöñ ahöyök. Miangöra Josefñöñ Nazaret mosöta öngöba geba Betlehem anök.

⁵ Anmam jiiga nalö miangören ambi buñañi qetñi Marianöñ gölömnambuk malök. Maliga i auangita qetñiri ohomegöra mohotñe anohot.

⁶ Anda Betlehem anğorohotka Mariagö morö meme nalöñan kam kuñguyök.

⁷ Kam kuñguiga qenjarök ahöahö mire anğota miangö uruñe tiñi qahö miwikñaiyohot. Miangöra bau bulmakau miriñe öngöba tarohot. Tata miangören nahönñi mutukñi memba oponöñ esuhuba bulmakau joutñe ali geba ahöyök. Mewö.

Lama galöm yeñön Suep garata enğeket.

⁸ Betlehem taon gölme miangören azi tosatñan sunğem dop gölme köröñi miangören anda lama kambuñini galöm köl enğiba malget.

⁹ Mewö malgetka sunğem miangören Kembugö garata kunñan kösutñine asuhum enğiyök. Asuhum enğiiga Kembugö asakmararañan liliköm enğiba asariiga qem sömbuñini möta jönömñini unduyök.

¹⁰ Jönömñini unduyökmö, Suep garatanöñ jii mötket, “Mönö kezap alget. Nöñön sösongai Buña ketañi ambazip körek pakpak yeñgöra memba kazal, mi indel enğimam. Miangöra jönömñini kude unduma.

¹¹ Buña mi kewö: Enğö Amötqeçe Toñinan dölki ahuza. Yañön kiñ Deiwidkö taonöñ asuhuba Kembu qetñi Kraist akza.

¹² Keu miangö aiwesökñi kewö: Inini anda morö sepsep oponöñ esuhuba bulmakau joutñe alget ahözawi, mi miwikñaime.”

¹³ Garatanöñ mewö jiiga miangörenök garata kambu ketañan Suepnöhök kangota yambuk aitongöba Anutugö möpömöpösei linjet köla kewö jiget,

* 1:79: Ais 9.2

14 “Anutugö qetbuñani möpöseininga Suepnöñ euyangören öngöza. Yanön ambazip nanñangöra meköm engiyöhi, yeñgöra körö ölöwak möta gölmenöñ luai al engiza.” Mewö.

Lama galöm yeñön anda Jisös eket.

15 Garata yeñön engömosöta Suepnöñ lilingöba öngögetka lama galöm yeñön naninak kewö jiget, “Ayop, Betlehem miangören yuai ahuiga Kembunöñ miangö keunji jii mötzini, nini mönö mia anda ekin.”

16 Mewö jiba ösumñinan anda Maria Josef aka morösesepse bulmakau joutnje ahöyöhi, miwikñaiba eket.

17 Eka kinda garatanöñ morögöra keu jii möta kageri, mi indela jim asariget.

18 Jim asarigetka mötkeri, yeñön körek pakpak auruba welipköget.

19 Welipkögetmö, Marianöñ keu pakpak mi uru könömñe ala dungöba jöhöba könañi mötmöriba malök.

20 Welipkögetmö, yuai pakpak Suep garatanöñ jiyöhangö dop asuhuyöhi, mi lama galöm yeñön eka möta miangöra Anutugö sösöngai liñet köla möpöseiget. Möpöseiba mosöta lilingöba anget. Mewö.

Morö qetñi Jisös qetket.

21 *Jisös ahui Sonda mohot miangö dop teköiga Anutugö aiwesökñi silene yandibingö nalöñi kaiga qetñi Jisös qetket. Suep garatanöñ qet mi mutuk qeta wañgiigun nalö miangörenök namñangö gölöm uruñe ahuyök. Mewö.

Jisös wañgita Anutugö buñaya alget.

22 *Mosesgö Köna keunöñ keu kewö ahöza, “Ambinöñ morö nahönñi mutukñi memba silim 40 kounñe mali teköiga söro gulunji köl könjörat wañgiba inñini mönö jöwöwöl jikenöñ öngöba morö mi Anutugö jeñe algetka yangö buñaya akña.” Miangöra nalö mi kam kunñuiga Josef Maria yetköñ keu mi tem köla Jisös wañgita Kembugö buñaya akñapaköra Jerusalem öngöyohot.

23 *Kembugö Köna keunöñ keu kewö ohoget ahöza, “Morö nahön pakpak sep mutuk mokozei, mi mönö Kembugö buñaya akñapaköra qem teköba mem sarahime.” Yetköñ keu mi wuatangöyohot.

24 Mewöyök Kembugö Köna keunöñ jimkutukutu keu ahözawangö dop kembö me kembö supsup nei yahöt mi jöwöwöl ohomahotköra Jerusalem sitinöñ öngöba anohot.

25 Nalö miangören azi kun qetñi Simeon Jerusalem malök. Yanön uruñi jömuk Anutugören qekötahöba urumelengö kölguliguli aiga Uña Töröñan yambuk kiniga Amötqeqe Tonjan Israel uruñe asuhumapaköra mamböta malök.

26 Mamböta maliga Uña Töröñan keu kewö indeli mörök, “Gi Kembugö Amötqeqe Tonji Kraist ahui mutuk ekagun kömupkö sihimbölöñi mötman.”

27 Iwinamñan Mosesgö Köna keu wuatangöba Jisös wañgita jöwöwöl jikenöñ öngöyohot. Öngöyohotka Uña Töröñan Simeon sölölohöi nalö miangörenök mewöyök jikenöñ öngöyök.

28 Öngöba morö mi eka memba dohongöba Anutu möpöseiba kewö jiyök,

Simeongö sösöngai liñet

29 “O Kambu, merak welen azigan ölop anda uruluainöñ mala kömuma.

30 Göhö keugahö dop Amötqeqe Tonji melainöñ asuhuiga i nani jenan eka simbawon mötzal.

Miangöra ölop anda kömumam.

* 2:21: Lew 12.3; Luk 1.31 * 2:22: Lew 12.6-8 * 2:23: Eks 13.2, 12

³¹ Göñön amötqeqegö könañi mözözömgöba kantri pakpak yengöra indel enjinönga mi eka möt kutume.

³² *Göñön Amötqeqe Toñangö asakñi indelnönga kian kantri yengö uruñini kuñguiga asarime aka qetbuñagan nangi könañesögi Israel nenjö sutnine mewöyök qarima.”

Simeongö kezapqetok keu

³³ Simeonöñ morögöra keu mewö jiiga iwinamñan möta köñkuñ aka welipköyohot.

³⁴ Welipköyohotka kötuetköm enñiba namñi Maria kewö jii mörök, “Mötnöñ, Anutunöñ morö ki kuñguba ali Israel ambazip sehisehiñan i andö qeba eta enñugetka gwötpukñan uruñini melenña ölöwakñe. Anutunöñ nanñak i ali aiwesök aiga gwötpukñan i tuaköpek jim wañgime.

³⁵ Tuaköpek jim wañgigetka urumötmöñini asa-asamböññan mewö aukñe asuhuma. Nangi urugan mewöyök wösöbirik aiga mianñon sou zuluk alalñi ewö urugi kuñguba qesinma.” Mewö.

Ana ambigö kezapqetok keu

³⁶ Jerusalem mianñoreñ kezapqetok ambi namñi kun qetñi Ana malök. Yañgö isikñi qetñi Aser, iwiñi qetñi Fanuel. Ambi mianñon seramñe azi memba mali yambu (yara) 7 mohotñe malohot.

³⁷ Malohotka apñi kömui malö aka mala kori nalö mianñoreñ yambuñi 84 ahök. Yañon nalö dop jöwöwöl jikenöñ öngöba mi silim kun qahö mosörökmö, sunñem asak Anutugöra nene sinji mala köuluköba waikñi memba möpöseiba malök.

³⁸ Yañon nalö mianñoreñök kañgota morö mi eka Anutu möpöseiyök. Anutunöñ Jerusalem ambazip sohopñini memapköra mamböta malgeri, körek yengöra morö mianñö könañi jim asarii mötket. Mewö.

Jisösbuk Nazaret lilingöget.

³⁹ *Josef Maria yetköñ Kembunöñ areñi jim kutuiga Köna keunöñ ahözawi, mi körek ahot teköiga Galili prowinsnöñ lilingöba taonñiri Nazaret mianñoreñ anohot.

⁴⁰ Morönöñ qariba wahöta köhöiba mötkutukutuñi ahuba kokolak qeiga Anutugö kalem möriamñan qakñe öngöi kinök.

Jisös yarañi 12 aiga jöwöwöl jikenöñ öngöget.

⁴¹ *Jisös iwinamñan yambu (yara) dop ak-kömukömu* kendon nalöñe Jerusalem siti öngöba anjahotma.

⁴² Mewö mala Jisös yambu (yara)ñi 12 aiga silikñini ahakzeangö dop nalöñi kam kuñguiga mewöyök öngöba anget.

⁴³ Anda mala kendon nalö mianñon teköiga lilingöba mirinñire anohot. Anohotmö, morö gwabö Jisösnöñ Jerusalem tari iwinamñan mi qahö möt kutuyohot.

⁴⁴ “Yañon ambazip kambu yembuk anja,” jiba silim mohotkö dop köna anda sepkitip aka alaurupñiri yengö uruñine qeta jaruyohot.

⁴⁵ Qeta jaruyohotmö, qahö miwikñaiba kunbuk lilingöba Jerusalem anda jaruyohot.

* **2:32:** Ais 42.6; 49.6; 52.10 * **2:39:** Mat 2.23 * **2:41:** Eks 12.1-27; Dut 16.1-8 * **2:41:** Anutunöñ Ijijt mianñoreñ Israel ambazip enñehoriba enñongiröhi, ak-kömukömu kendon mianñö qetñi kun Pasowa.

⁴⁶ Jaruba malohotka silim karöbut teköiga jöwöwöl jikenöŋ öngöba miangöreŋ miwikŋaiyohot. Miwikŋaiyohotka azi ketanŋi yeŋgö sutŋine tarök. Tari kusum wanŋigeri, mi möta qesim enŋiba tarök.

⁴⁷ Tata Buŋa keugö könaŋi törörök möt asariba diŋdiŋanök melenŋiga körek pakpak yeŋön mi möta welipköget.

⁴⁸ Iwinamŋan eka auruba namŋan jii mörök, “Nahöni, gi denöwögöra mewö ak netkizan? Mötnöŋ, niri iwigabuk göhöra waimanŋat möta qeta jaruba malit.”

⁴⁹ Mewö jiiga kewö melenŋi etkiyök, “Inŋiri mönö wuanöŋgöra ni göraim niŋgizahot? Ni Iwinaŋgö mire tatpi dop kölja, mi mötzahot me qahö?”

⁵⁰ Mewö melenŋi etkiyökmö, yetköŋ keu jiyöhi, miangö könaŋi mi qahö möt asariyohot.

⁵¹ Qahö möt asariyohotmö, töndup wahöta yetpuk lilingöba Nazaret taonöŋ anda iwinamŋi tem köl etkiba malök. Jisösnöŋ keu jiyöhi, namŋan mi pakpak möta urukönömŋe ala jöhöba anŋön kölök.

⁵² *Jisösnöŋ mala qarii yambu (yara)ŋi öngöiga mötkutukutuŋi asariba sehiiga Anutunöŋ kalem möriamŋi wanŋii köhöiba ambazip aka Anutu yeŋgö jeŋine dop köl enŋiyök. Mewö.

3

Jon O-melun azinöŋ Buŋa keu jiyök.

Mat 3.1-12; Mak 1.1-8; Jon 1.19-28

¹ Zekaraiagö nahönŋi Jon yaŋön nupŋi könahiyök. Nalö miangöreŋ sisa kiŋ qetŋi Taiberius yaŋön Rom sitinöŋ mala gölmeŋi gölmeŋi mindiriba yambu (yara) 15 azi kembu aka toroqeba galöm köl enŋii malget. Galöm köl enŋimangöra gölmeŋi gölmeŋi Israel liliköba ahözei, mi mesinŋetka bahöŋi 4 aiga mienŋö kiŋini 4 mi kewö kuŋguget:

Pontius Pailöt, Herod, Filip aka Lisantias. Pontius Pailöt mi Judia prowinsgö premiönŋina malök. Kiŋ Herodnöŋ Galili prowins galöm köl enŋiyök aka datŋi Filipnöŋ Ituria aka Trakonitis prowins yahöt mienŋö kembunŋina malök aka Lisantias yaŋön Abilene gölme memba malök.

² Jike nup galöm bohonŋini yahöt malohot, qetŋiri Anas aka Kaiafas. Nalö miangöreŋ Zekaraiagö nahönŋi Jon yaŋön gölme qararaŋkölkölŋe maliga Anutugöreŋ Buŋa keu asuhuiga mörök.

³ Anutugö Buŋa möta anda Jordan o töwatŋaŋgö kösutŋe miri dop liliköba malök. Liliköba mala Buŋa keunöŋ uruŋini kuŋguba kewö jiba malök, “Inŋini mönö uruŋini melenŋetka nöŋön o melun mem enŋimam. Mewö aketka Anutunöŋ siŋgisöndokŋini saŋgoŋda mosötma.”

⁴ *Miangö keuŋi mi kezapqetok azi Aisaianöŋ ohoi yaŋgö Buzup Kimbinöŋ kewö ahöza,

“Kolek garata kunŋan gölme qararaŋkölkölŋe qeta maliga anda qetŋi kewö mötme,

‘Kembunöŋ kamawo! Miangöra mönö jöjöröba könaŋi mesatket. Mönö uruŋini mindiŋgöba könaŋi qölöleiget.

⁵ Köna örue pakpak mönö qem tigetka diŋdiŋi akŋa.

Kunduŋi wanŋaŋi pakpak mi mönö qeköba köl qölöleigetka köröŋi akŋa.

Köna mösökqösökŋambuk mi mönö möhamgögetka diŋgime.

Luhutnöŋ köna misiiga simbiŋsambaŋ tatzawi, mi mönö kutuba mesatketka solanima.

⁶ Anutunöŋ oyaenŋkoyaen Tonŋi melaii kaiga gölmeŋi gölmeŋi pakpak

* 2:52: 1 Sml 2.26; Qam 3.4 * 3:4: Ais 40.3-5

yejñon mi eka ek kutume.”

7 *Jonñon miangö dop uruñini kuñguiga ambazip kambuñi kambuñi yejñon o melun mem engimapköra yangöreñ kagetka engeka yengöra kewö jiyök, “O qatö moröñi, inini uruñini qahö melengetka Anutugö irimñan seholiiga likepñi melen engimangö akza. Mi ölöñ kölbingsö goro keuñi mi mönö dañon jii möta sömbuñini möta ki kaze?”

8 *“Miangöra mönö ölñanök uruñini melenme. Bölönamñineyök lilingögetka ölñi asuhui mi mönö ahakmemeninan aukñe kondela malme. Uruñine möndömöndö keu kewö kude mötmörime, ‘Nejñon mönö Abrahamgö gwölönarökña malinga Anutunöñ qahö ayuhum neñgima.’ Mewö töptöpñine gemakzemö, ölñi mi qahö ahakze. Nöñon miangöra kewö jibi mötket: Anutunöñ köt ki ölop jim kutum engiiga letota Abrahamgö gwölönarökurupñi aka Anutu möpöseimakñemö, inini denöwö?”

9 *“Uruñini qahö melenme ewö, Anutunöñ mönö inini ip ewö tengöri etpingö akze. Ip pakpak ölñi ölopñi qahö kuñgumakzei, mi mönö köli etket könöpnöñ gili geme. Ip mewöñi kölmangö kesinji lök jitñi sanje ala ip könaje ali jöjöröba ahöza. Anutunöñ mönö bölönamñinañgö likepñi melen engima.”

10 Mewö jiiga ambazip kambuñi kambuñi yejñon kewö qesiba jiget, “Mewögöra nini mönö denöwö ahinga dop köлма?”

11 Qesiba jigetka kewö melenök, “Kunñan maluku yahöt memba maljawi, yañon mönö mietköreñök kun mi malukuñi qahö i wañgima aka denike yejñon neneninambuk maljei, yejñon mönö mewöyök nenenini qahö yengöra menden engime.”

12 *Takis meme azi tosatan mewöyök o melun mem engimapkö kaba qesim wañgiget, “Böhi, nejñon mönö denöwö ahinga dop köлма?”

13 Qesim wañgigetka jii mötket, “Gawmanöñ takisgö jim kutum engii ahözawi, dop mi mönö qahö ongita meme.”

14 Yarö azi tosatan mewöyök qesim wañgiget, “Niniato? Nejñon denöwö ahinga dop köлма?” Qesim wañgigetka kewö jii mötket, “Kungöreñ monengöra kuñguba upetkupert aka kiom kude kölmemö, nanñini töwanini memakzei, miambuk mönö urumohok aka ösöñ malme.”

15 Ambazip pakpak yejñon “Jonñon Amötqege Tonji Kraist akapuk,” jiba uruñinan mewö mötmöriget. Miangö könaji mötpingö kezapñini köröpñi aket.

16 Mewö aketka Jonñon körek yengöra kewö jiyök, “Nöñon o töhönöñ melun mem engizalmö, azi kukösumñi köhöikñi kun kama. Yangö kukösumñi öngöngöñan mönö nöngöreñ ongitma. Yañon azi öngöngöñi akñawanögöra nöñon yangö köna esuñangö kösöñi bauköba pösatmamgö qötötangömam. Yañon mönö Uña Töröñi uruñine ali könöp bölamñan kölmönjörat engiiga mewö mianñon melun mem engima.

17 Yañon ölñi aka kamböñi menden etkimangö sapakñi memba kangota uba qöröreñgöba kewötma. Kewöta wit kötni tokoba köweñe almapmö, kamböñi aka gwaugulapñi mi mönö usuñniga könöpnöñ geba teteköñi qahö jema.”

18 Keu mewöñi mewöñi gwötpuk toroqeba jiba uruñini kuñguba Ölöwak Buña ambazip kambu yengöra jim asariba malök.

19 *Malökmö, gölme bahöñangö kin Herod yañon datñangö anömñi qetñi Herodias mi ölöñ meyök aka bölöñi könaji könaji aka malöhi, miangö sapñi Jonñon qeba munjarariga jim wañgiyök.

* 3:7: Mat 12.34; 23.33 * 3:8: Jon 8.33 * 3:9: Mat 7.19 * 3:12: Luk 7.29 * 3:19: Mat 14.3-4; Mak 6.17-18

²⁰ Jim wanğiba bölönəmni kun toroqeba aka Jongören nupni tözöpköba suahö galömni jii Jon memba kösö mire alget. Mewö.

Jonön Jisös o melun mem wanğiyök.

Mat 3.13-17; Mak 1.9-11

²¹ Jonön ambazip pakpak o melun mem enğiba Jisös mewöyök o melun mem wanğiyök. Mem wanğii köuluköiga mianğörenök Suepnön añañiyök.

²² *Añañiiga Uña Töröñan melenđa kembö nei ewö aka Jisösgö qakne erök. Mewö eriga Suepnöhök qet kun kewö asuhuyök, “Göñön mönö nani wölböt nahöna aknönğa köröni ölöwahiga geknahöm ak gihizal.” Mewö.

Jisösgö isikurupni yengö qet areñini

Mat 1.1-17

²³ Jonön Jisös o melun mem wanğiiga yambu (yara)ni 30 mianğö dop aiga amötqeçe nupni könahiba memba malök. Memba maliga Josefgö nahönña akzawi, ambazipnön mewö mötmöriget. Jisös iwiñi Josef, asañi qetni Heli.

²⁴ Jisös amböñi qetni Matat, sukumñi qetni Liwai. Liwai iwiñi Melki, asañi Janai, amböñi Josef,

²⁵ sukumñi Matatias. Matatias iwiñi Amos, asañi Nahum, amböñi Esli, sukumñi Nagai.

²⁶ Nagai iwiñi Mat, asañi Matatias, amböñi Semen, sukumñi Josek. Josek iwiñi Joda,

²⁷ asañi Joanan, amböñi Resa, sukumñi Zerubabel. Zerubabel iwiñi Sealtiel, asañi Neri,

²⁸ amböñi Melki, sukumñi Adi. Adi iwiñi Kosam, asañi Elmadam, amböñi Er,

²⁹ sukumñi Josua. Josua iwiñi Eliezer, asañi Jorim, amböñi Matat, sukumñi Liwai.

³⁰ Liwai iwiñi Simeon, asañi Juda, amböñi Josef, sukumñi Jonam. Jonam iwiñi Eliakim,

³¹ asañi Melea, amböñi Menna, sukumñi Matata. Matata iwiñi Neitan, asañi Deiwid,

³² amböñi Jesi, sukumñi Obed. Obed iwiñi Boaz, asañi Salmon, amböñi Nason,

³³ sukumñi Aminadab. Aminadab iwiñi Admin, asañi Arni, amböñi Hezron, sukumñi Perez. Perez iwiñi Juda,

³⁴ asañi Jeikob, amböñi Aisak, sukumñi Abraham. Abraham iwiñi Tera, asañi Nahor,

³⁵ amböñi Serug, sukumñi Reu. Reu iwiñi Peleg, asañi Eber, amböñi Sela,

³⁶ sukumñi Kainan. Kainan iwiñi Arpaksad, asañi Siem, amböñi Noa, sukumñi Lamek.

³⁷ Lamek iwiñi Metusela, asañi Enok, amböñi Set, sukumñi Adam. Adam mi Anutunön mei ahuyök. Mewö.

³⁸ (-)

4

Satanön Jisös esapköba malök.

Mat 4.1-11; Mak 1.12-13

¹ Jonön Jisös o melun mem wanğiiga Uña Töröñan uruñi kokolak qei Jordan onöhök lilingöiga wanğita gölme qararančkölñe anök.

² Anda mianğören mali Bölönji Tonan esapköm wanğii wehön 40 teköyök. Nalö 40 mianğören nene kun qahö namba mali teköiga nenenanğö kömuyök.

* **3:22:** Jen 22.2; Sum 2.7; Ais 42.1; Mat 3.17; Mak 1.11; Luk 9.35

³ Yakanangö kömuiga Bölöni Tonan jii mörök, “Gi Anutugö nahönna akzan ewö, mi mönö kondela köt ki jim kutunönga letota beret aketka neman.”

⁴ *Jii möta melenök, “Qahö, Buja Kimbinöng keu kewö ohoget ahöza, ‘Nenenöhök ambazip malmal qahö nenngimakza.’ ”

⁵ Melenniga wangita kundunji köröpni kunöng öngöba gölmegö kantrinji kantrinji pakpak mi zilañ kondel wangiyök.

⁶ Kondel wangiba jii mörök, “Nöñon kantri pakpak mi galöm köl engimangö kukösumni aka inap yuainangö aködamunni mi nöngö böröne alalña ahöza. Miangöra mi nani sihimnangö dop niñia wangimam jiba ölop wangimam. Miangöra yuai pakpak ki mönö göhö böröge almam.

⁷ Miangöra gi waikni memba möpöseim ningiman ewö, mi pakpak mönö göhö buñaya ak teköma.”

⁸ *Mewö jii möta kewö melenök, “Qahö, Buja Kimbinöng keu kewö ohoget ahöza, ‘Gi mönö Kembugi Anutu waikni memba möpöseiba ia mohot welen qem wangiba malman.’ ”

⁹ Melenniga Jisös wangita Jerusalem sitinöng anda jöwöwöl jikegö boñe euyangören öngöba kewö jii mörök, “Gi Anutugö nahönna akzan ewö, mönö kiangörenök luhuba emu geman.

¹⁰ *Buja Kimbinöng keu kun kewö ohoget ahöza, ‘Anutunöng garataurupni jim kutum engiiga ölopñanök galöm köla sel jöhöm gihime,’

¹¹ *aka keu kun kewö, ‘Yeñon böröñine ala nöngölim gihigetka geba kötnöng könage qahö guhum qizit akña.’ ” Miangöra geba kude ayuhuman.

¹² *Mewö jiyökmö, Jisösnöng kewö melen wangiyök, “Qahö! Anutunöng jiza, ‘Gi mönö Kembugi Anutu kude esapköm wangiman.’ ”

¹³ Bölöni Tonan esapesap pakpak mi Jisös ak wangii teköiga mosöta anök. Mewö.

Jisösnöng könahiba amötqeqe nup meyök

Mat 4.12-17; Mak 1.14-15

¹⁴ Jisösnöng gölme qararañkölkölñi mosöri Uña Töröngangö ösumñan yambuk kiniga Galili prowinsnöng lilingöyök. Lilingöiga keu buzupñan sehiba miri gölme liliköba tat angeri, mi pakpak dop köla anök.

¹⁵ Dop köli mirinji mirinji liliköba köuluk mirinje öngöba Buja keu kusum engiyök. Kusum engiiga mötkeri, körek yeñon mönö söngaiba möpöseim wangiget. Mewö.

Nazaret yeñon Jisös andö qeget.

Mat 13.53-58; Mak 6.1-6

¹⁶ Jisösnöng lilingöba malqarip taonni Nazaret miangören anök. Sonda kendonöng kaiga ahakzawangö dop köuluk mire öngöba Buja Kimbi oyong engimangö wahörök.

¹⁷ Wahöri kezapqetok azi Aisaiagö Buzup Kimbi wangigetka kötula keu kembangan kewö ohoget ahözawi, mi miwikñaiyök:

¹⁸ * “Kembugö Uña Töröngan nöngö urune geba nup memegö kelök supapni köl niñgiba ambazip etqeqeni yeñöra Ölöwak Buja jim asarimakzal. Yanñon melaim niñgiiga keu kewö jim sehimakzal:

Bölöngan gwaröhöm engii maljei, Anutunöng mönö i pösata meköm engiiga malme.

Anutunöng jegömöl ambazip jeñini mem tohoiga kunbuk uba ekñe.

* 4:4: Dut 8.3 * 4:8: Dut 6.13 * 4:10: Sum 91.11 * 4:11: Sum 91.12 * 4:12: Dut 6.16 * 4:18: Ais 61.1-2

Taikpaik memba eta alget maljei, Anutunöŋ mönö i meköm enjiiga siyonşayonji qahö malme.

19 Kembunöŋ amötqeqegö yambu ölopŋi ali kam kuŋgumawi, nöŋön miangö kolekŋa kaba mi jim asarimakzal.”

20 Keu mewö oyonŋda köpöp supap mi köpeiba galömnji waŋgiba eta tarök. Tariga köuluk mire tatkeri, yeŋön körek je qisilmisilŋi qahö dörötköba ehiget.

21 Ehigetka könahiba kewö jii mötket, “Buzup Kimbigö keu ki oyonŋbi kezapŋine gei mötzei, miangö ölnan mönö merak asuhuza.”

22 Mewö jii mötketka kalem möriam keuŋi keuŋi numbuneyök eriga körekŋan mi möta welipköba jim soroköm waŋgiba keu miangö jiji-kilik-kilikŋi mi kewö jiget, “Azi ki Josefgö nahönŋa me?”

23 Jigetka kewö jii mötket, “Inini nalöŋi nalöŋi keu kötnji ki jimakze, ‘Mem ölöwak azi gi mönö nangi mem ölöwak aŋguman.’ Inini keu kötnji mi dölni nöŋöra jibingö mötze, mi mötzal. Mi jiba kewö jibeak, ‘Gi Kaperneam taonöŋ anda aŋgöletot öŋgöŋgöŋi menöŋga buzupŋi mörini, miangö dop mönö nangi miri kiangöreŋ mewöyök meman.’”

24 *Mewö jiba jiyök, “Nöŋön keu ölni kun kewö jibi mötme: Kezapqetok ambazip kunöŋ mönö nanŋi malqarip taonöŋ qahö dop kölja.

25 *“Nöŋön keu ölbölŋi kun kewö jibi mötme: Elaijagö (Elia) nalöŋe Anutunöŋ Suep naŋuŋi köli yambu (yara) karöbut aka köiŋ 6 miangö uruŋe kie qahö yöhöiga bödi ketanŋi ahuiga gölme pakpak dop kölök. Nalö miangöreŋ ambi malö gwötpuk Israel uruŋe malget.

26 *Gwötpuk malgetmö, Anutunöŋ Elaija yeŋgöreŋök kungöreŋ anmapkö qahö melaiyökmö, kian gölme Saidongö miri qetŋi Sarefat miangöreŋ ambi malö mohot-töp yaŋgöreŋ melaiiga anök.

27 *Kezapqetok azi Elisagö nalöŋe uzikukunöŋ Israel azi gwötpuk turum enjiiga malgetmö, yeŋgöreŋök kunŋan kun qahö solaniyök. Qahöpmö, kian gölme Siriagö azi qetŋi Naman yaŋön mohot-kun mönö Elisagö keuŋi möt nariba solaniba ölöwahök.”

28 Jisösnöŋ mewö jiiga köuluk mire tatkeri, yeŋön körek keu mi möta irimŋini seholiiga urupik aket.

29 Urupik aka wahöta Jisös közöla taon yaigepŋe wuatangöba taon mi kundunangö sem kösutŋe meget kinöhi, miangöreŋ aköget gemapköra anget.

30 Angetmö, sutŋine qendenŋa enğömosöta anök. Mewö.

Kaperneam taonöŋ öme kun közölök.

Mak 1.21-28

31 Jisösnöŋ Galili prowins uruŋe Kaperneam sitinöŋ eta aŋgota Sabat kendonöŋ ambazip kambu kusum enjiyök.

32 *Kusum enjiiga keuŋan kukösumŋambuk aiga jiyök. Miangöra könagesö yeŋön mi eka auruba welipköget.

33 Köuluk miri miangöreŋ azi kun ömeŋambuk tarök. Tariga ömeŋan teriŋgöba silata qetŋi kewö qerök,

34 “Aek! Jisös, Nazaret azia! Gi wania ak neŋgimangö akzane? Mönö ayuhum neŋgimangöra kazan me? Ni könaŋangi möt kutuzal. Gi Anutugöreŋ azi Tök-kutukutuŋi akzan.”

35 Mewö qeriga Jisösnöŋ tembula kewö jim waŋgiyök, “Gi mönö keugi bököiga azi ki mosöta kesalnöŋ.” Mewö jim waŋgiiga ömenöŋ azi mi memba gili tala sutŋine gölmenöŋ geiga miziqizikŋi qahöpmahöp aka kota mosöta anök.

* 4:24: Jon 4.44 * 4:25: 1 Kiŋ 17.1 * 4:26: 1 Kiŋ 17.8-16 * 4:27: 2 Kiŋ 5.1-14 * 4:32: Mat 7.28-29

³⁶ Aniga körekñan nemböñini teköiga welipköba sutñine eraum möta kewö jiget, “Yei! Keu ki mönö wani keuya? Yanñon kuk aka ösum-mumu qakñe ömewöröme jim kutum enñiiga tem köla kota anje.”

³⁷ Mewö asuhuiga Jisösgö qetbuñan sehiba miri pakpak kösutñe tat angeri, mianğoreñ anda gölme mi dop kölok. Mewö.

Jisösnöñ kawöl ambazip gwötpuk meiga ölöwaket.

Mat 8.14-17; Mak 1.29-34

³⁸ Jisösnöñ wahöta Kaperneam köuluk miri mi mosöta Saimon Pitögö mire öngöyök. Öngöiga Saimongö suhunñan sile könöp öngöngöñi yöhöi ahöyök. Ahöiga yanğöra aka Jisös köuluköm wanğiget.

³⁹ Köuluköm wanğigetka anda sipköba geba sile könöp jim kutum wanğiiga mosöriğa mianğoreñök wahöta nene ohoba gumohom enñiyök.

⁴⁰ Wehön jeñi teköba geiga mianğoreñ ambazip denike yeñon alaurupñini kawöl könañi könañi mianñon enğöhöi ahögeri, mi körek enğuanğita Jisösgöreñ kaget. Kagetka böröñi körek yeñgö qakñine inannik inannik aliga ölöwak teköget.

⁴¹ Ömewöröme yeñon mewöyök ambazip gwötpuk yeñgö urunineyök kota silata kewö qetket, “Gi Anutugö nahöññi akzan.”

Jisösnöñ Amötqeçe Tonji Kraist akzawi, yeñon mi mötkerañgöra Jisösnöñ jim enğiba numbuñini muhungöba enğuatangöyök. Mewö.

Amötqeçe nupñi Galili dop kölok.

Mak 1.35-39

⁴² Jisösnöñ gaun ahöiga miri wanğaran suruiga wahöta nannik tirin (tin) kutuba geba görañe kunöñ anök. Anökmö, ambazip yeñon göraim wanğiba anda miwikñaiba kude enğömosöta anmapköra esapköba angön köl wanğiget.

⁴³ Angön köl wanğigetmö, kewö jii mötket, “Nöñon Anutu bemtohonñangö Ölöwak Buñani mi taon tosatñi yeñgöra mewöyök jim asarim enğibi dop kölma. Anutunöñ mönö mianğöra melaim niñgiyök.”

⁴⁴ Mewö jiba anda Galili prowins liliköba köuluk mirinñine Buña keunöñ uru kunğum enğiba malök. Mewö.

5

Jisösnöñ gwarekurupñi mutukñi enğohölök.

Mat 4.18-22; Mak 1.16-20

¹ *Nalö kunöñ Jisösnöñ Genesaret o angö jitñe kiniga ambazipnöñ kambu köla Anutugö Buña keu mötpingö ölöqölököba liliköm wanğiget.

² Liliköm wanğigetka kinda wanğe yahöt köwet görañe tarohotka etkehök. Söra örörö yeñon wanğe mi mosöta geba mösakñini kusahöla sanğonget.

³ Wanğe kun mi Saimongöreña. Jisösnöñ mianğoreñ öngöba tonji kewö qesim wanğiyök, “Göñon mönö nanğönöñga borom kun noanğita onöñ göröken anma.” Qesim wanğiiga nanğöiga anda wanğenöñ tata ambazip kambu kusum enñiyök.

⁴ Kusum enñim teköba Saimongöra jiyök, “Göñon mönö wanğe ki nanğönöñga o angö bibine aniga alaurupki yembuk mösakñini söragöra gilgetka gema.”

⁵ *Jiiga Saimonöñ melenñök, “Ketanamni, nini sunğem köröp mösak gil bibihiba ölni kun qahö mezin. Qahöpmö, göñon jim kutuzanañgöra mönö töndup anda gilin gema.”

* 5:1: Mat 13.1-2; Mak 3.9-10; 4.1 * 5:5: Jon 21.3

6 *Mewö meleni jiyöhangö dop aketka söranöŋ awamni qahö mösaxine gegetka buratibingö aket.

7 Mewö aketka alaurupni wange kunöŋ malgeri, yengöra kaba bauköm engimegö börökaek kölgetka kaget. Kagetka wange yahöt mi söranöŋ kokolak qegetka nemulahöm taköyohot.

8-9 Söra öngöngöni mewö memba eka miangöra köreŋan welipköget. Welipköba Saimon Pitönöŋ mi eka Jisösgö wösöŋe geba simin köla jiyök, “O Kambu, ni siŋgisöndok azia akzalaŋgöra mönö nömosöta anöŋ.”

10 Saimongö alayahötŋi Jeims aka Jon Zebedigö nahönyahötŋi yetkөн mewöyök nemböŋiri teköiga welipköyohot. Saimonöŋ keuŋi jiyökmö, Jisösnöŋ kewö melenök, “Mönö keŋgötŋi kude mötman. Gi kiangö andöŋe ambazip mi söra ewö öröba engömemba malman.”

11 Mewö jiiga wangeŋini öröba kota saknöŋ ala öroyuaiŋini pakpak mosöta Jisösgö andöŋe wuatangöba anget. Mewö.

Jisösnöŋ uzikuku azi kun mem solaniyök.

Mat 8.1-4; Mak 1.40-45

12 Jisösnöŋ taon kunöŋ maliga miangöreŋ azi kun silenŋi uzikukunöŋ mem bölim teköiga tarök. Tata Jisös eka kösutŋe simin köla geba kewö köuluköm wangiyök, “O Kambu, göŋön sihimŋan mem ölöwak niŋgimangö mötzan ewö, mönö ni ölöp mem solanim niŋgiman.”

13 Mewö jiiga böröŋi böranda silenŋi misiriba jiyök, “Nöŋön mi akŋamgö mötzal. Gi mönö solaniman.” Mewö jiiga uzikukuŋi mi miangöreŋök solaniyök.

14 *Solaniiga kewö jim kutum wangiyök, “Mötnöŋ kiangö buzup keuŋi mi kun kude jinöŋ mötme. Qahöpmö, gi mönö jike nup galömgöreŋ anda silegi kondel wangiba Mosesgöreŋ jimkutukutuŋi wuatangöba solanizanaŋgö saiwap nalukŋi ala jöwöwöl ohoman. Mi ohonöŋ ehiga ambazipnöŋ könaŋamgi möt kutume.”

15 Mewö jiyökmö, mi töndup Jisösgö qetbuŋaŋi sehiba miri dop asariba anök. Anöhangö dop ambazip kambuŋi kambuŋi yeŋön keuŋi mötpingö aka kawölŋini mem ölöwakŋapkö yangöreŋ kaba tokoget.

16 Kagetmö, Jisösnöŋ engömosöta gölme qararaŋkölkölŋe anda mala köuluköyök. Mewö.

Jisösnöŋ azi sile likeŋi kömukömuŋi möhamgöyök.

Mat 9.1-8; Mak 2.1-12

17 Jisösnöŋ wehön kunöŋ Buŋa keu kusum enŋiiga Farisi (Köna keugö kaŋkölköl) aka Köna keugö böhi tosatŋan Galili aka Judia prowinsgö miriŋi miriŋi aka Jerusalemök kaba ambazip kambu sutŋine tatket. Kambuŋi kukösumŋan Jisös nam köl wangiiga ambazip kawölŋini mei ölöwaket.

18 Nalö miangöreŋ azi tosatŋan alaŋini sile likeŋi kömukömuŋi mi kululunöŋ ala aŋguba kaget. Kaba kutuba Jisösgö kösutŋe miri uruŋe öngöba albingö esapköget.

19 Esapkögetmö, ambazip kambunöŋ ölököba kingeraŋgöra paŋpaŋgöba miri uruŋe öngöbingö köna kun qahö miwikŋaiba memba miri qakŋe öngöget. Öngöba bo kötnöŋ memenŋi mi esim lulungetka kinimŋi ahui kawöl azi kululunambuk kösönöŋ jöhöba miangöreŋ algetka ambazip sutŋine Jisösgö wösöŋe geyök.

20 Mewö geiga Anutu möt narim wangigeri, Jisösnöŋ yeŋgö tandökŋini mi ehi dop köliga kawöl azigöra kewö jiyök, “Alani, nöŋön siŋgisöndoki mosötzal.”

* 5:6: Jon 21.6 * 5:14: Lew 14.1-32

²¹ Mewö jiiga Köna keugö böhi aka Farisi yenön mi möta könahiba kewö jiba mötmöriget, “Azi ki niñia? Yanön mönö Anutu ilita mepaqepaik akza. Anutu mohotjan singisöndoknini mosörakzapmö, azi kunjan mi qahö.”

²² Mewö mötmörigetmö, Jisösnöñ uruñini ek kutuba kewö jii mötket, “Tosatñi iñini uruñinan wuanöngöra keu jizali, miangöra gwötpuk mötmörize? Mi qahö dop kölja.

²³ Nöñön singisöndoki mosötzal, jizali, keu mianön mönö awamñanök jijiña. Kunjan mewö jiiga tosatñan keu miangö ölni qahö ekñe. Miangöra mi keu awamñangö dop. Nöñön keu kun kewö jimamangö mötzal, ‘Mönö wahöta anöñ.’ Keu mi mönö lömbötñambuk jijiña akza. Mewö jibiga ölni asuhuma me qahöwi, mianön mönö aukñe asuhui ekñe.

²⁴ Mötket, gölmenöñ singisöndok mosötmosötkö kukösumñi mi Suep gölmegö azi ölnangören ahözawi, iñini miangö könanangöra janjuñ malbepuk. Miangöra keu lömbötñi mi azi kiangöra jibi ölni eket.” Mewö jiba azi sile likepñi kömukömuñi yangöra jiyök, “Nöñön göhöra jizal: Gi mönö wahöta tumbulahöpki memba mirige anöñ. Keu lömbötñi mi ölnambuk akña ewö, keu awamñi mi mönö mewöyök denöwögöra omanñi akawak?”

²⁵ Mewö jiiga miangörenök jeñine wahöta tumbulahöpñi ahöyöhi, mi memba Anutu möpöseiba mosöta miriñe anök.

²⁶ Mewö asuhuiga ambazip köreñan welipköba sömbuñini möta Anutu möpöseiba jiget, “Yei! Merak yuai qetpuk soroha ekzin.” Mewö.

Jisösnöñ Matyu (Liwai) oholök.

Mat 9.9-13; Mak 2.13-17

²⁷ Miangö andöñe Jisösnöñ Kaperneam mosöta anda takis ofis ongitmamgö aiga miangören takis meme azi qetñi Liwai tariga eka jii mörök, “Gi mönö nöngö andöñe kanöñ.”

²⁸ Mewö jii möta nupñi pakpak mosöta wahöta Jisösgö andöñe anök.

²⁹ Anda Jisös miriñe köl öröba yangöra közölömbuan ketanñi mözözömgöyök. Mözözömgöba takis meme tilipqilipñinambuk aka alaurupñi tosatñi öröm enjiiga kambu ketanñi köla yembuk tata nene neget.

³⁰ *Mewö negetka Farisi (Köna keugö kapañkölköl) aka yengören böhi yenön mi eka jimongot aka Jisösgö gwarekurupñi kewö jim enjiget, “Aek! Iñini mönö wuanöngöra takis meme tilipqilipñinambuk aka singisöndok ambazip yembuk tata nene aka o neze? Mi qahö dop kölja.”

³¹ Mewö jim enjigetka Jisösnöñ likepñi kewö jii mötket, “Sile unditundit ambazipnöñ doktagöra qahö ak enjimakzapmö, kawöl ambazipnöñ mönö doktagören anakze.

³² Nöñön singisöndok ambazip uruñini melenmegö engoholmamgöra kaba maljalmö, ambazip nanñinanöñ mötketka solanñi akzei, i qahö.”

Nene sinji malmalgö keuñi

Mat 9.14-17; Mak 2.18-22

³³ Ambazip tosatñan Jisösgören kaba qesiget, “Jon O-melun azigö gwarekurupñi neñön nalö gwötpuk Anutugöra nene sinji mala köuluk totoko köröpñi alakzin. Farisi (Köna keugö kapañkölköl) yengö gwarekurupñinan mewöñanök aka maljemö, nangi gwarekurupkan mönö pondañ nene aka o nemakze.”

³⁴ Mewö qesigetka kewö melennök, “Ölna! Nini wani nalönöñ nene sinji malakzin? Ambi meme nalöñe azigö andöurupñan könöpñi algetka ambigö sep kitipurupñan yuai mi tökömakze me qahö? Nöñön nani gwarekurupñi

* 5:30: Luk 15.1-2

yenjö azi bunaya aka yenjö sutñine köisirik tatzal. Tatpiga sinji malbingö jigetka yenjön aijölön söngaiba tata sinji malbingö osimakze.

³⁵ Osimakzemö, Anutunöñ noañgiri kömumbiga yenjön mönö nalö miangörenj ölöp sinji malakñe.

³⁶ “Injini malmal walñi aka sösongai Buña dölökñi mi mindirim etkibingö osime. Miangö dopkeu pasetñi kun mi kewö jibi mötket: Löngölöngöt walñi jurariga kunöñ löngölöngöt dölökñi mitiba opo su jöhanñi miangön qahö ala uhum görenjömakza. Mewö akawak ewö, opo su jöhanñi dölökñan mönö walñambuk örörönj qahö aka mi öröba munjarariga böliqölibapuk.

³⁷ “Mewöñanök kunöñ wain o dölökñi mi jobö me toru walñi lama silenjan memenji miangörenj qahö kusuiga gemakza. Mewö akawak ewö, wain o dölökñan mönö qariba toru qesiñniga jula mokoiga gölmenöñ eta sohoiga torujan böliqölibepuk.

³⁸ “Miangöra wain o dölökñi mi toru dölökneyök mokoin geiga dop kölma. (Mewöñanök kunöñ o ölöpñi mi gina gisagisahöñe qahö umakzin. Mewö ubinak ewö, miangön mönö jula kisipisirik eriga namba kawöl nenjöhöbapuk. Mewö akapuköra o ölöpñi mi gina ölöpñe umakzin. Injini mewöyök malmal walñi aka Ölöwak Buña dölökñi mi mindirim etkibingö osime.)

³⁹ Kunñan wain o walñi möpöseiba namba malakzawi, yanjön wain o dölökñi nemangö sihimñi qahö möta ölan alakza.” Mewö.

6

Jisösnöñ Sabat kendongö Kembunji akza.

Mat 12.1-8; Mak 2.23-28

¹ *Miangö andöñe Sabat kendon kunöñ Jisösnöñ wit padi nup köröñi ketanji kutuba anök. Aní gwarekurupñan wösöñini enjuiga wit ölñi mohot mohot böröñinan misiba sömanja neget.

² Mewö negerangöra Farisi (Köna keugö kapañkölköl) tosatñan mi eka kewö jiget, “Injini mönö wuanöngöra Sabat kendongö nup meme songonji ongitze?”

³ *Mewö jigetmö, Jisösnöñ kewö melenök, “Kin Deiwidnöñ yarö aziurupñi yembuk liliköba wösöñini enjuiga yuai akeri, mi lök oyonget me qahö?”

⁴ *Yanjön mönö Anutugö opo seri jikenöñ öngöba beret kömbukñi Anutugö jemesoholñe altanöñ alget tariga ösumñan walöñniga qekögeri, mi mönö meiga neget. Beret kömbukñi mosötmosötñi mi jike nup galöm yenjönök nezema. Yanjön aka yanjö sunjgurumurupñan mi nembepuköra songo ahöyök mi töndup neget.”

⁵ Mewö jiba kewö jii mötket, “Suep gölmegö azi ölñan mönö Sabat kendongö Kembunji akza.” Mewö.

Jisösnöñ azi böröñi sösröngöñi mem ölöwahök.

Mat 12.9-14; Mak 3.1-6

⁶ Jisösnöñ Sabat kendon kunöñ köuluk mire öngöba Buña kusum enjiyök. Miangörenj azi kun böröñi ölñi soholiiga tarök.

⁷ Köna keugö böhi aka Farisi (Köna keugö kapañkölköl) yenjön Jisös eka keu jakeñe al wañgibingö könañi jaruba “Azi mi Sabat kendonöñ möhamgöma me qahö?” jiba je galöm memba tatket.

⁸ Tatketmö, Jisösnöñ mötmötñini mi möt kutuba azi böröñi sosoholiñi mi kewö jii mörök, “Möno wahöta jenine kinöñ.” Mewö jiiga wahöta kinök.

* 6:1: Dut 23.25 * 6:3: 1 Sml 21.1-6 * 6:4: Lew 24.9

⁹ Kini Jisösnöŋ jii mötket, “Köna keu wuatangöba Sabat kendonöŋ yuai ölopŋi me bölöŋi akin? Ölop kungö bohonŋi jöhöbin me mosöringa ayuhuma. Wanat kun meinga dop kölma? Mi qesim engibi jiget.”

¹⁰ Mewö jiba körek pakpak lilingöm purik engeka azi miangö jiyök, “Gi mönö börögi qötöteinöŋ.” Mewö jiiga böröŋi qötöteiiga kunbuk ölöwahök.

¹¹ Ölöwahökmö, galöm yeŋön irimŋini gwötpuk seholiiga “Jisös denöwö ak wangibin?” jiba nanŋini eraum mötket. Mewö.

Gwarekurupŋi 12 möwölöhöm engiyök.

Mat 10.1-4; Mak 3.13-19

¹² Nalö miangöreŋ Jisösnöŋ kundunje köulukömamgö öngöba sunjem köröp mi Anutu köuluköm wangiba mali miri alök.

¹³ Miri gianŋiga gwarekurupŋi engohola yeŋgöreŋök 12 möwölöhöm engiba melaimelai azi aposol qet mi engiyök.

¹⁴ Qetŋini kewö qerök: Saimon, Jisösnöŋ qetŋi Pitö wangiyök, yangö munŋi Andru aka Jeims, Jon, Filip, Bartolomyu,

¹⁵ Matyu, Tomas, Jeims Alfusgö nahönŋi aka Saimon qetŋi kun Tuaköpek azi qetket.*

¹⁶ Judas Jeimsgö nahönŋi aka Judas Iskariot. Kariot azi mianŋön könanŋen mamalolo azia ahök.

Jisösnöŋ kawöl ambazip mem ölöwak engiyök.

Mat 4.23-25

¹⁷ Jisösnöŋ aposolurupŋi yembuk kunduneyök eta gölme köröŋe anda kinget. Kingetka gwarek kambuŋi ketanŋi aka ambazip kambuleleme yeŋön yangöra tokoba mambötket. Yeŋön “Buŋanŋi jii möringa kawölnini mem ölöwakŋa,” jiba miangöra Judia prowins pakpak, Jerusalem siti aka köwet jitneyök Taiö aka Saidon taon miangöreŋök kaba tokoget.

¹⁸ Ömewörömenöŋ kölköljinŋin mem engiyöhi, yeŋön mewöyök kaba ölöwaket.

¹⁹ Kukösumŋan yangöreŋök kutuba yeŋgöreŋ öngöiga körek ölöwak engiyök. Miangöra ambazip körekŋan Jisös misiribingö jaram tiget. Mewö.

Simbawonŋi aka kezapjupjup ahakö keunŋi

Mat 5.1-12

²⁰ Jisösnöŋ gwarekurupŋi uba wahöta engeka kewö jiyök, “Anutugö bemtohoŋ mi wanapŋi engö buŋaya. Miangöra wanapŋi inŋini mönö simbawonŋi akze.

²¹ Nalö kewöŋe nenegö ewö kömumba qemjen qeba maljei, Anutunöŋ mönö sihimŋini mi gumohom engima. Miangöra inŋini mönö simbawonŋi akze.

Nalö kewöŋe sahötzei, enön mönö sösöŋgai aka gön kölme. Miangöra wösöbirik maljei, inŋini mönö simbawonŋi akze.

²² * “Ambazipnöŋ inŋini Suep gölmegö azi ölnangöra aka kazik aka yaköriba silene ala uruqeŋe keu töhöreŋ jim engiba kiam sekbölö ewö qetŋini kutumei, inŋini mönö simbawonŋi akze.

²³ * Amböskonurupŋinan miangö dop kezapqetok ambazip yeŋgöra ak engiba malget. Mötket! Anutunöŋ töwanŋini öngöŋgöŋi Suep mire ali ahöza. Miangöra mewö ak engigetka nalö miangöreŋ mönö söŋgaiba köiran kölme.

²⁴ Inŋini simbawonŋi maljemö, pomŋi sukinapŋinambuk inŋini malmal siyoŋsayonŋi qahö maljei, mi teköma. Miangöra nöŋön engöra wölköba ‘Yei!’ jizal.

* **6:15:** Nasönöl pati zelot yeŋön Rom gawman tuarenŋonŋi aka nanŋine kinkin membingö tuaköpek memba malget. * **6:22:** 1 Pitö 4.14 * **6:23:** 2 Hist 36.16; Apo 7.52

²⁵ Nalö kewöŋe nem timbireŋ maljei, iŋini mönö wösöŋini ali (buörö) bödi malme. Mianğöra nöŋön engöra wölköba ‘Yei!’ jizal. Nalö kewöŋe sösöŋgai aka gön köljei, iŋini mönö amburereŋ aka sahötme. Mianğöra nöŋön engöra wölköba ‘Yei!’ jizal.

²⁶ “Ambösakonurupŋinan kezapgetok ambazip takapulakaŋi jim möpöseim engiba malget. Ambazip pakpak mianğö dop ak engigetka nöŋön engöra wölköba ‘Yei!’ jizal.” Mewö.

Kerökurupki mönö jöpaköm engiman.

Mat 5.38-48; 7.12a

²⁷ “Bölöŋi ak engimemö, iŋini keuni möta maljei, nöŋön engöra kewö jibi mötme: mönö kerökurupŋini uruŋinan jöpaköm engiba malme. Denike yeŋön kazik ak engizei, i mönö ölöŋanök ak engiba malme.

²⁸ “Denike yeŋön qesuahöba jinjerereŋ ak engizei, i mönö köl tömbiba kötuatköm engime. Örom ureim ak engizei, yeŋgöra mönö Anutugö köuluköme.

²⁹ “Kunŋan nuŋgulumgi likepŋi qekötahöliiga likepŋi mewöyök melen waŋiman. Kunŋan qakŋaŋgö malukugi goaŋgiriga göŋön mönö dutŋaŋgö oponi mohokŋe memamgö möri mi kude aŋgön kölman.

³⁰ “Yuaigö ulet gihigetka mi mönö körek yeŋgöra engiman. Kunŋan göhö inap yuaigi meiga mi mönö melen gihimapkö kude kapaŋ köla qesiman.

³¹ *Ambazipnöŋ yuai nanninaŋgö ak engimegö mörakzei, mianğö dop mönö nannini mewöyök i ak engimakŋe.

³² “Gölmegö siŋgisöndok ambazipnöŋ alaurupŋinan jöpaköm engigetka kitipŋi melen da jöpaköm engiba möpöseim aŋgumakze. Iŋini mianğö dop gölmegö tandökŋi wuatanaŋgömakze ewö, Anutugöreŋ tosa qahö ahuiga mönö denöwö iŋini möpöseim engibawak? Alaurupŋini aka kerökurupŋini mi mönö mohotŋe jöpaköm engigetka töwa engiiga oyaenŋkoyaen akŋe.

³³ “Gölmegö siŋgisöndok ambazipnöŋ alaurupŋinan yuai ölöŋi ak engigetka kitipŋi melen engiba ala ak aŋguba möpöseim aŋgumakze. Iŋini mianğö dop aka gölmegö tandökŋi wuatanaŋgömakze ewö, Anutugöreŋ tosa qahö ahuiga iŋini qahö möpöseim engima.

³⁴ “Gölmegö siŋgisöndok ambazipnöŋ monen yuai mi siŋgisöndok ambazip tosatŋi yeŋgöra engiba kitipŋi miyök melen engimegöra kapaŋ kölakze. Mi gölmegö ahakmemeya. Iŋini tosatŋan tosaŋini melen engimegö al mambötkeŋka Anutunöŋ mönö denöwö möpöseim engibawak? Tosatŋan tosaŋini qahö melen engigetka Anutunöŋ mönö kitipŋi mi melen da töwa engima.

³⁵ “Iŋini mönö Suep Toŋaŋgö ahakmemeya aka memba malme. Gölmegö ambazipnöŋ bölöŋi aka saiwap qahö jimakzemö, Anutunöŋ töndup i ölöŋi ak engimakza. Mianğöra iŋini mönö kerökurupŋini uruŋinan jöpaköba ölöŋanök ak engiba monen yuai engiba mianğö likepŋi kun melen da engimegöra kude al mambötme. Mewö aka malgetka töwaŋinan sehiba öŋgöŋgöŋi aiga Anutu öŋgöŋgöŋaŋgö nahönböratuŋi aka malme.

³⁶ “Suep Iwiŋinan körek pakpak ak kömum engimamgö mötzawi, iŋini mönö mianğö dop ambazip pakpak ak kömum engiba malme.” Mewö.

Jimtekötekö toŋi ewö kude akŋe.

Mat 7.1-5

³⁷ “Ambazip tosatŋi yeŋgö keuŋini mi kude kewöta jim teköme. Mi qahö jim teköm engigetka Anutunöŋ mönö nannini mewöyök qahö jim teköm engima. Iŋini tosatŋi yeŋgö siŋgisöndokŋinaŋgö likepŋi mi qahö melen engime. Mi qahö melen engigetka Anutunöŋ mönö nannini siŋgisöndokŋinaŋgö likepŋi

* 6:31: Mat 7.12

mi mewöyök qahö melenj engima. Injini mönö tosatnji yengö singisöndokñini mosötme. Mi mosötketka Anutunöñ nanñini singisöndokñini mewöyök sanjonnda mosötma.

³⁸ “Injini ambazip tosatnji yengöra yuai ak engigetka Anutunöñ mönö mianğö dop kewöta yuai mi melennda engöra ak engima. Mianğöra injini mönö yuai kalema engimakñe. Mewö engigetka Anutunöñ mönö mewöñanök kalema engimakña. Öñña, Anutunöñ ekbonep qahö möta bauköm engimakña. Anutunöñ kewöta injini engigeri, mianğö dopñi jömuk memba kiwinöñ mokoï numbuñe kori utuköi qörörañ aiga mulumgöi gei toroqeba qakñe mokoï dopñi onğita qeqelanlan eri, mi mönö gösöñine löngöt engima.” Anutugö könañi mewö.

Ambazipnöñ nanñini könañini eka mötme.

³⁹ *Jisösnöñ dopkeu kun kewö jii mötket, “Jegömöl ambazip kunöñ jegömöl alañi kun ölop böröñe memba wanğitma me qahö? Mewö anbahorak mönö mohotñe lömnöñ geba etkubawak.

⁴⁰ *Gwareknöñ böhiñi qahö onğitza. Böhiñinan mötmöt pakpak törörök kusum enğii möt kömumei, körek yeñön mönö böhiñini ewö akñe.

⁴¹ “Gi wuanöñgöra alagahö jeñe gödöwöröt morörökñi ekzanmö, nangi jege ip sahötñi ketañi ahözawi, mia denöwö kude ek kutuzan?”

⁴² Nangi jege ip sahötñi ketañi ahözawi, mi qahö ek kutuba denöwögöra alagahö kewö jibanak, ‘Alani mötnöñ! Jege euke gödöwöröt geba tatzawi, mi ölop itaköbi etma.’ O urumelenğö silesile azi, gi mönö mutuk nange jegeyök ip sahötñi (tapötñi) ketañi mi memba gilman. Mi mem gilagun törörök ek kutuba alagahö jeñe gödöwöröt geba tatzawi, mi ölop itakönöñga etma.” Mewö.

Ipkö könañi mi ölni eka kewöta möt kutume.

Mat 7.16-20; 12.33-35

⁴³ “Ip ölopñi kunñan ölni bölöñi qahö kuñgumakza. Mewöñanök ip bölöñi kunñan ölni ölopñi qahö kuñgumakza.

⁴⁴ *Jau kötni mi jömnöñ asuhuiga membingö osimakzin aka muli ölni mi koururuknöñ asuhuiga qeköbingö osimakzin. Mianğö dop ipkö ölni eka kewöta könañi möt kutume.

⁴⁵ *“Azi uruñan yuai kokolak qei ahözawi, mia mönö numbuñan aukñe jimakza. Mianğöra azi ölopñanğö uru köweñe ölopñanğö möriamñi ahözawi, yañön mönö ölopñi mi aukñeyök jimakza. Azi bölöñanğö uru köweñe bölöñi ahözawi, yañön mönö bölöñi mi aukñe jimakza.” Mewö.

Miri tandö köhöikñi aka lölöwöröñi

Mat 7.24-27

⁴⁶ “Injini nöñgöra ‘Kembu Kembu!’ qet mi mönö wuanöñgöra qerakzemö, nöñön yuai memegö jimakzali, mi qahö tem köla memakze.

⁴⁷ “Denike yeñön nöñgöreñ kaba keuni möta tem köla mezei, nöñön yengö könañamñini kondela dopkeunöñ jimam.

⁴⁸ Yañön mitim qeçe azi kianğö dop akza: Azi mianjön ‘Miri memam,’ jiba löm köröpñi esiba geba tandöñi köt jamönñiñ qakñe kuñgum köhöii kinök. Mewö kiniga kie uru nalöñe o göulu köhöikñi gila miri kambañe kuñguyökmö, ölopñanök mem muhungöi kinök. Mianğöra kusumamğö qem bibihiiga köhöiba kinök.

⁴⁹ Qem bibihiyökmö, kunöñ keuni möta qahö tem köla mezawi, yañön mönö mitimqeçe azi kianğö dop akza: Yañön ‘Miri memam,’ jiba tandö qahö esim

* 6:39: Mat 15.14 * 6:40: Mat 10.24-25; Jon 13.16; 15.20 * 6:44: Mat 12.33 * 6:45: Mat 12.34

kömöta gölme çakne kut bim miyök ala meyök. Mei kiniga kie uru nalöje o göulu köhöikni gila miri kemberne kuŋguiga miri mi mianğörenök kusuiga goromororongöba erök.” Mewö.

7

Jisösnöŋ suahö galöm kungö nup aziŋi mem ölöwahök.

Mat 8.5-13

¹ Jisösnöŋ ambazip kambu sutŋine mala Buŋa keuŋi pakpak mi jii mötketka enğömosöta Kaperneam taonöŋ kaŋgorök.

² Mianğören Rom suahö galöm kungö nup aziŋan kawöl yöhöi kömumamgö ahök. Galömnan yaŋgö möri öngöngöŋi ahök.

³ Mianğöra Jisösgö buzupŋi möta Juda yeŋgö jitnememe tosatŋi melaim enğiiga Jisösgören anda kewö qesiget, “Mönö kaba welen aziŋi mem ölöwakŋan.”

⁴ Anda Jisösgören aŋgota kapan köla köuluköba jiget, “Ketanamnini, suahö galöm mianön mönö bauköm waŋgimananğö dop ölop sorokŋi akza. Mianğöra mönö kanöŋ.”

⁵ Mötnöŋ, yaŋön Juda ambazip kambu neŋgöra ak waŋgiiga ‘Köuluk mirinini membini,’ jiinga kian yaŋön monen ali meget.”

⁶ Mewö jiget möta yembuk anök. Anökmö, suahö galömgö miriŋi dopdowii yaŋön alaurupŋi melaim enğiba Jisösgöra keu kewö alök, “O Kambu, ni mewörökŋi malbiga nöngö miri boŋan gualöŋmapkö gamuni mötzal. Mianğöra mönö qahö aum kömumba kaman.

⁷ Ni nananğö mötpi eretŋi akzawaŋgöra göhören kamamgö dop kude mötzalmö, keu jitkanök jinöŋga welen azinan ölöwakŋa.

⁸ Mi kewögöra: Ni nanak mewöyök galömnanğö kukösum bapne al ningiget maljal. Nöngö bapne yarö azi malgetka mi jim kutum enğimakzal. Yeŋgörenök kungöra ‘Anman’ jim kutubi yaŋön anma. Kungöra ‘Kanöŋ’ jim kutubi yaŋön kama aka welen azini kungöra ‘Nup ki meman,’ jibiga yaŋön mi mema.”

⁹ Jisösnöŋ keu mi möta suahö galömgöra welipköba ambazip kambu wu-atangöba kageri, yeŋgören lilingöba kewö jiyök, “Nöŋön kewö jibi mötme: Israel könagesö sutŋine mewöyök mötnariŋ ketanŋi mewöŋi mi kungö uruŋe qahö miwikŋaial.”

¹⁰ Mewö jiiga suahö galömgö kolekaziurupŋan lilingöba mire aŋgota welen azi miwikŋaiba eketka ölöwaka tarök. Mewö.

Jisösnöŋ malö kungö nahönŋi mem guliyök.

¹¹ Mianğö andöŋe Jisösnöŋ taon qetŋi Nain mianğören aniga gwarekurupŋi aka ambazip kambulelembenöŋ wuatangöba anget.

¹² Mianğören taon kiripo nanğuni dopdowiiga qamöt kun aŋguba kaget. Malö kungö nahönŋa mohok-kunŋan kömuiga taongö ambazip kambu ketanŋan tokoba löm kölbingö kaget.

¹³ Kembunöŋ malö mi eka wösöŋi möta jii mörök, “Kude sahötman.”

¹⁴ Mewö jiba anda bokis aŋguba kageri, mi jii dörök algetka bokis misiriba kewö jiyök, “Azi gwabö, mönö wahötnöŋ. Nöŋön göhöra mewö jizal.”

¹⁵ Mewö jiiga qamöt mianön guliba wahöta könahiba keu jiyök. Keu jiiga Jisösnöŋ namŋambuk anmapkö waŋgiyök.

¹⁶ Ambazip pakpak yeŋön mi eka qem sömbuŋini möta Anutu möpöseiba jiget, “Kezapqetok azi ketanŋi kunöŋ mönö sutŋine asuhaba malja.” Tosatŋan jiget, “Anutunöŋ könagesöŋi mesohol köl neŋgii maljin.”

¹⁷ Yaŋgö keu buzupŋi mi sehiba Judia prowins pakpak dop köla gölmenŋi gölmenŋi likeplikep mianğören an teköyök. Mewö.

Jongö gwarekyahötñi Jisösgöreñ kayohot.

Mat 11.2-19

18 Jon O-melun azinöñ kösö mire tariga gwarekurupñan yuai pakpak mi asuhuyöhi, miangö kösohotñi jiget mörök.

19 Jiget möta gwarekñi yahöt etkoholi kayohotka Kembangöreñ anda kewö qesim wangimahotköra melaim etkiyök, “Mem ölöwak azi kamapköra mamböringa göñön mia akzan me azi kun bian kamapköra mambötpin.”

20 Melaim etkiiga Jisösgöreñ angota jiyohot, “Jon O-melun azinöñ kewö qesim gihitköra melaim netkiiga kazit, ‘Mem ölöwak azi kamapköra mamböringa göñön mia akzan me azi kun bian kamapköra mambötpin.’”

21 Jisösnöñ nalö miangöreñök ambazip gwötpuk uzi kawöl izekwaizek (ijenwajen) aka ömeninambuk mi mem ölöwak engiyök aka jegömöl ambazip gwötpuk jeñini metohoi uba eket.

22 *Jongö gwarek yahötñan angota qesim wangiyohotka kewö melenök, “Yuai eka mötzahori, miangö kösohotñi mönö anda Jon kewö jiyohot mötma: Jegömöl yeñön uba eketka lokon yeñön köna anda kagetka uzikuku yeñön solanigetka kezapduhup yeñön keu mötketka kömuget yeñön guliba wahötketka etqeçeni yeñöra Ölöwak Buña jim asaribiga mörakze.

23 Mewö asuhui eketka kungö uruñan qahö bölii andö nuñgumawi, yeñön mönö simbawoñ akza.”

24 Mewö jiiga Jongö gwarek yetköñ anohotka Jisösnöñ könahiba Jongö könañi ambazip kambu yeñöra kewö jim asariyök, “Inini gölme qararankölkölñe miangöreñ wania ekingöra anget? Luhutnöñ jehot uwutapköba metali anjanbanjan ahakzawi, inini azi mewöñi ekingöra anget me?”

25 “Me wanat yuaia ekingöra anget? Azi malukuñi aködamunñambuk löngöta malöhi, mi ekingöra me? Mötket, ambazip malukuñini kulemñi ek sihimñambuk löngöta anda kaba siyoñsayoñi qahö maljei, mienön mönö kin yeñgö jakömbuak miriñine malje. Mi gölme qararankölkölñe qahö.

26 “Me wanat yuaia ekingöra anget? Kezapqetok azi kun ekingöra me? Ölna, nöñön kewö jibi mötket: Azi ekeri, yeñön mönö kezapqetok ambazip tosatñi engoñgita tandökñi kun akza.

27 *Yeñgö könañi mi mönöwök kewö ohoget ahöza, ‘Mötnöñ, nöñön kolekni garata kun melaibiga qeljiñe anda ambazip uruñini mindiñgöba göhö könagi mesariga göñön mönö yeñgö andöñe gölmenöñ emu geman.’

28 Keu mewö ahözapmö, nöñön kewö jibi mötket: Ambinöhök morö pakpak engömegetka asuhugeri, yeñgö sutñine Jonöñ mönö körek engoñgita qetbuñambuk kinja. Kinjapmö, Anutugö bemtohoñ uruñe angota Anutugö qetbuñañi miwikñaimakzei, yeñgö sutñine eretñi kondikñi yeñön mönö Jon oñgitza.”

29 *Ambazip könagesö pakpak aka yeñgö sutñine takis meme yeñön mohokñe Jongö Buñañi mötkeri, yeñön jim kölenja “Aha! Anutugö köna diñdiñi jim asariza,” jiba uruñini melengetka Jonöñ o melun mem engiyök.

30 Mewö engiyökmö, Farisi aka Köna keugö böhi yeñön Anutugö areñi qahö tem köla Buñañi andö qeba silekmalek aketka Jonöñ o melun qahö mem engiyök.

31 “Ambazip merak gölmenöñ maljei, mi mönö wanatpuk dop al engibilenak? Yeñgö silikñini mi denöwö?”

* 7:22: Ais 35.5-6; 61.1 * 7:27: Mal 3.1 * 7:29: Mat 21.32; Luk 3.12

³² Yenön namande ewö akze. Mienön maket sombemnöñ tata keu gön gila lañ qeta kewö jimakze, ‘Nini awölop uinga inini liñet gwawet qahö unduget. Nini jinñeñ kölinga inini qahö toroqeba sahötket.’

³³ Miangö könani kewö: Jon O-melun azinöñ kaba nene sinji mala wain o qahö neiga inini yangöra jimakze, ‘Öme kunöñ uruñe geiga malja.’

³⁴ “Suep gölmegö azi ölnan kaba nene nem söñgaip aiga enön jimakze, ‘Mötket, yanön bau numbu tandök közöjeriba wain o gwötpuk nemba takis tilipqilipñinambuk aka bölöñi meme yengö alañina malja.’

³⁵ Körek pakpak Anutugö mötkutukutu köl gulimakzei, yengö ahak-memeninangö ölnan mönö mötkutukutuñinan dop köljawi, mi kondelakza.” Mewö.

Sinjisöndok ambinöñ Jisösgö könani kelök miriyök.

³⁶ Farisi (Köna keugö kapankölköl) azi yengöreñök kunñan Jisös mi nanñi miriñe kaba nene nemapkö köl öroyök. Köl öroi anda miriñe öngöba nene dunñe tarök.

³⁷ *Taon miangöreñ sinjisöndok ambi kun malök. Yanön Jisös Farisi azigö mire öngöba tata nene neyöhi, miangö buzupñi möta kelök umköhöwakñambuk mokoi köt kirin kun kokolak qeyöhi, mi memba öngöba kayök. Kirin mi nöluk tuat-tuat qetñi alabastö mianön memenja.

³⁸ Öngöba kaba Jisösgö könane geba tata könahiba sahöri imbilñan tingita geba könane miriyök. Miriiga nörop jupñan kereñ memba kutui öroniiga könani numbuñan yöhötüm nemba kelök umköhöwakñambuknöñ miriyök.

³⁹ Miriyökmö, Farisi azinöñ Jisös köl öroyöhi, yanön mi eka uruñan kewö mötmöriyök, “Ambi ki sinjisöndokñambuha. Azi kianön kezapqetok azia malbawak ewö, yanön mönö ambi könane misirizawangö könani möt kutubawak.”

⁴⁰ Jisösnöñ mi möt kutuba kewö melenja jiyök, “Saimon, nöñon keu kun jimangö mötzal.” Jiiga jiyök, “Böhi, ölop jinöñ mötpi.”

⁴¹ Jiiga Jisösnöñ kewö jii mörök, “Ambazip yahötñan benknöñ anda tosa albitkö monen galömñangö qesiyohot. Kunöñ silim 500:kö töwanji (Kina 2500,-), kunöñ silim 50:gö töwanji (Kina 250,-) miangö dop tosa albitkö qesiyohot. Qesiyohotka miangö dop etkiyök.

⁴² Etkiba könangep tosanjiri misimahot jiiga monenjiri qahöwahiga osiyohot. Osiyohotka benk galömñan tosanjiri qeköba kutuba mosöt etkiyök. Mosöt etkiiga yetköreñök danön i uruñan gwötpuk jöpaköm wanñimakza?”

⁴³ Mewö qesiiga Saimonöñ kewö melenñök, “Nöngö mötmötnöñ tosa ketanji kutuba mosöt wanñiyöhi, yanön.” Mewö melenñiga jiyök, “Gi keu törörök kewöta jizan.”

⁴⁴ Mewö jiba ambigöreñ lilingöba kewö jii mörök, “Ambi ki eknöñ. Nöñon mirige kotpiga göñon könani sanñonmamgö o kun qahö niñgizanmö, ambi kianön mönö könani imbilñan miriba nörop jupñan kereñ memba kutui öroniza.

⁴⁵ Göñon numbuni qahö yöhötüm nezanmö, ambi kianön mönö mire kotpiga miangöreñök kapan köla könani yöhötüm nemba malja.

⁴⁶ Göñon nöropni kelök kude mirizanmö, ambi kianön mönö kelök umköhöwakñambuknöñ könane nömiriza.

⁴⁷ Miangöra nöñon kewö jibi mötnöñ: Anutunöñ ambi kiangö sinjisöndokñi gwötpuk mi mosöta sanñonñiga miangöra uruñan ni gwötpuk jöpaköm niñgiza. Kunöñ sinjisöndok boromdökñi ahiga Anutunöñ sinjisöndokñi morörökñi mosöriya yanön uruñan borom kun miyök jöpaköm niñgimakza.”

* 7:37: Mat 26.7; Mak 14.3; Jon 12.3

⁴⁸ Mewö jiba ambi mi kewö jii mörök, “Nöñön göhö siñgisöndoki sañgonđa mosötzal.”

⁴⁹ Mewö jiiga azi mohotne nene nemba tatkeri, yeñön könahiba nanñinök kewö jiget, “Siñgisöndok sañgonđa mosöztawi, yañön mönö niñi azia akñamgö mötza?”

⁵⁰ Mewö jigetmö, Jisösnöñ ambigöra jiyök, “Mötnaripkan mönö amöt qem gihiza. Ölop luainöñ anman.” Mewö.

8

Ambi tosatñan Jisös nanğöba anget.

¹ Mianğö andöñe Jisösnöñ liliköba taonñi taonñi aka miriñi miriñi mianğöreñ anda Anutugö bemtohoñgö könañi jim asariba Ölöwak Buña keunöñ ambazip uruñini kuñguba malök. Gwarekurupñi 12 yeñön yambuk mohotne anget.

² *Mewöyök ambi tosatñan yambuk anget. Amba mi mutuk kawöl enğöhöi ömenöñ kölköljinjin mem enğii malgetka Jisösnöñ mem ölöwak enğiyök. Amba mi kewö: Maria qetñi kun Magdalagö ambia qetket. Jisösnöñ yañgö uruñeyök öme 7 közöl enğii kota anget.

³ Amba kun qetñi Joana. Yañgö apñi qetñi Kuza yañön kin Herodkö jakömbuak miri mianğöreñ gawmangö moneñ galömña malök. Amba kun qetñi Susana, Yeñön aka ambi tosatñi gwötpuk yeñön nanñini moneñ inapñinan Jisös aka gwarekurupñi könanöñ galöm köla nanğöm enğiget. Mewö.

Qesiñqesiñ azigö dopkeu

Mat 13.1-9; Mak 4.1-9

⁴ Ambazipnöñ taon dop mianğöreñök öröba Jisösgöreñ kaba kambulelembenöñ tokogetka Jisösnöñ dopkeu kun kewö jiyök:

⁵ “Azi kunöñ nene kötni qesiñ gilmangö anök. Anda qesiñniga kötni tosatñan köna jitne geba kölget. Geba kölgetka ambazipnöñ tim tökötahögetka könakemba (warawen) neiñi neiñi kañgota mi nem teköget.

⁶ Kötni tosatñan köt jamönjinöñ geba kölget. Geba köla mianğöreñ gölme oñambuk qahö miwikñaiba korapñi kota soholiba gororoñgöget.

⁷ “Kötni tosatñan siri uret wahiñinambuknöñ geba kölget. Geba kölgetka mienöñ öröröñ kota enğonğita qem turuba böbölohot mem enğiget.

⁸ Kötni tosatñan gölme ölopñe geba kölget. Geba köla jula wahöta ölni ölopñi asuha handötkö dop ahum sehiğet.”

Keu mi jim teköba qet ketañi kewö qerök, “Kunñan urukezapñambuk malja ewö, yañön mönö dopkeu ki kezap ala möt kutuma.” Mewö.

Jisösnöñ denöwögöra dopkeugö könañi jiyök.

Mat 13.10-17; Mak 4.10-12

⁹ Mewö jiiga gwarekurupñan dopkeu kianğö könañagöra Jisös qesim wañgiget.

¹⁰ *Qesim wañgigetka jiyök, “Anutugö bemtohoñe añgota malbingö keu tölapñi mi enğöra aukñe jibi möt kutuzemö, tosatñi yeñgöra mia dop keunöñ jibi mörakze. Mewö möta nanñini jeñinan yuai ekagun könañi töndup qahö ek kutume. Nanñini kezapñinan keu törörök mötagun könañi töndup qahö möt asarime.”

Jisösnöñ dopkeugö könañi jiyök.

Mat 13.18-23; Mak 4.13-20

* **8:2:** Mat 27.55-56; Mak 15.40-41; Luk 23.49 * **8:10:** Ais 6.9-10

11 “Dopkeu miangö kōnaŋi kewō: Kōt qesiŋ giljawi, mi Anutugōreŋ Buŋa keu.

12 Nene kōtŋi kōna jitŋe geba kōlgeri, mi kewō: Ambazip tosatŋan Buŋa keu mōtzemō, mi mōtketka Bōlōŋi Toŋan kaba uruŋini melenŋa Suepkō buŋa akepukōra keu kōtŋi mi uruŋineyōk qekōba eŋguanŋgirakza.

13 Nene kōtŋi qesiŋniga kōt jamōnŋiŋnōŋ geba kōlgeri, mi ambazip söpsōpŋi kun. Yeŋōn Buŋa keu mōta mi sōsōŋgai qakŋe mōt aŋgōn kōlakzemō, uruŋine geba jalōŋini qahō megeraŋgōra nalō törōptōkŋi miyōk mōt nariba malgetka esapesapkō nalōŋe mōnō tala eŋguma.

14 “Nene kōtŋi qesiŋniga siriuret wahinŋinambuknōŋ geba kōlgeri, mi kewō: Yeŋōn Buŋa keu mōtketka uruŋine gezapmō, gōlmenōŋ malmalgō waiman-jatŋi aka moneŋ inap memegō urukōnōpŋi ahuba lōmbōrim eŋgimakza. Qetbuŋaŋinambuk akingōra kōpōsōŋgōgetka sihim kōmbōnaŋi bōlōŋi tosatŋan mewōyōk uruŋine dumgōba Buŋa keu bōbōlohot mem waŋgize. Mewō aiga ōlŋini qahō gilipitŋi akŋe.

15 Qahōpmō, nene kōtŋi gōlme ōlōpŋe geba kōlgeri, mi ambazip kewōŋi: Yeŋōn Buŋa keu kezap ala mōtketka uruŋini ōlōpŋi geŋmoŋi qahō miangōreŋ geiga sohobapukō mōkōsōŋda 8kapan kōla galōm kōlgetka ōlŋini ōlōpŋi ōlōpŋi miwikŋaimakze.” Mewō.

Yuai asa-asambōtŋi pakpak mi aukŋe ahuma.

Mak 4.21-25

16 **“Kunŋan lambe me kiwa ohotiriba kimbutnōŋ kude kōl turuma me dum bapŋe qahō alma. Mi qahōpmō, mi miangō dum qakŋe ali tatma. Tata asariiga tosatŋan miri uruŋe ōŋgōbingō mōtzei, yeŋōn miangō asakŋi eka ōlōp ōŋgōme.*

17 **“Mewōŋanōk urunine yuai kun asambōtket tōlapŋe ahōzawi, mi mōnō aukŋe asuhum tiŋgitma. Yuai kun kōl turuin ahōzawi, mi mōnō luluŋgetka kōtula ahōma.*

18 **“Miangōra Anutugō keu mōtzei, mi mōnō urukōnōmŋine ala mōtmōriba kōl guliba malme. Kunŋan mōtkutukutuŋambuk maljawi, Anutunōŋ mōnō mi toroqem waŋgii qarimapmō, kunŋan mōtkutukutuŋi qahō maljapmō, ‘Miambuk maljal,’ jizawi, Anutunōŋ mōnō mōtmōtŋi morōŋi mi mewōyōk qekōba waŋgitma.” Mewō.*

Jisōsgō nam-munurupŋi.

Mat 12.46-50; Mak 3.31-35

19 Jisōsnōŋ mewō jiba maliga nam munŋan i ekingō kagetmō, ambazip kambu ketanŋan ōlōkōba gwōzōŋgeraŋgōra kōsutŋe anbingō osiget.

20 Osiba kingetka kunŋan kewō jii mōrōk, “Gōhō nam-mungan mōnō yaigep kinda gi gekingō mōtze.”

21 Jii mōrōkmō, Jisōsnōŋ kewō melenŋa jii mōtket, “Ambazip ki Anutugō Buŋa keu mōta tem kōla kōl gulimakzei, mienŋōn mōnō nōŋgō namni aka munurupni akze.” Mewō.

Jisōsnōŋ jiiiga raidimbom görōŋ qeyōk.

Mat 8.23-27; Mak 4.35-41

22 Wehōn kunōŋ Jisōsnōŋ gwarekurupŋi kewō jii mōtket, “Mōnō mosōta o aŋgō kutuba likepŋe aŋgotpin.” Mewō jiiiga waŋgenōŋ mohotŋe ōŋgōba o aŋgō qakŋe anget.

* **8:16:** Mat 5.15; Luk 11.33 * **8:17:** Mat 10.26; Luk 12.2 * **8:18:** Mat 25.29; Luk 19.26

²³ Anda opo seri mörörengögetka luhutnönj nanngöiga angetka Jisösnönj gaun ahöyök. Ahöiga luhut raidimbom o angnönj gila siri kunduriga wanje uruje geyök. Geba numbuje qemangö aiga ayuhubingö aket.

²⁴ Ayuhubingö aka gwarekurupnan anda möndöba jiget, “Kembu Ketanaminini, mönö nini angnönj ayuhubingö akzin.” Mewö jigetka imbiñi möta luhut aka o angnögö siriñi kewö jim qetal etkiiga ösumñiran eriga nönj qeba ahöyök.

²⁵ Mewö aiga jii mötket, “Engö mötnaripñini mi denike?” Mewö jiyökmö, yeñon awöwöliba qem sömbuñini möta jiget, “Yei, azi kia mönö denöwöñan malja? Yanön mönö luhut aka köwet siri jim kutum etkiiga jitñi tem köl wanjizahot.” Mewö.

Ömenönj bau uruñine gegetka azinönj ölöwahök.

Mat 8.28-34; Mak 5.1-20

²⁶ Jisösnönj gwarekurupñi yembuk toroqeba opo seri mörörengögetka luhutnönj nanngöi anda o angnögö kutuba Galili prowins likepñe Gerasa gölmenönj angotket.

²⁷ Miangörenj angota saknönj öngöi azi ömenambuk kun mi taonöhök kaba Jisös miwikñaiyök. Azi mi qaksirinönj mala qamöt kötenj esiba urorohoget ahögerangörenj ahöm malök. Nalö köröpñi opo maluku qahö löngöta miri kungö uruje qahö ahömalök.

²⁸⁻²⁹ Ömenönj nalö köröpñi öröm ureim wanjiiga azi gwötpukñan börö takñi qeba könani tapepnönj (mungamunga) jöhöba galöm köla malgetmö, tapepñi öroi tingitqinqiriga ömenönj kunguiga gölme qararankölkölñe anda lañ malök. Miangöra Jisösnönj ömenj mi kewö jim kutum wanjimangöra ahök, “Öme bölöñi, gi mönö kota azi ki mosöta anönj.” Mewö jimangö aiga Jisös eka silata gölmenönj kösutñe geba qet gigilahöba kewö qerök, “Aek Jisös, gi Anutu öngöngöñangö nahönñi akzan. Gi mönö denöwö ak niñjimangöra ki kazan. Nönön ulet gihizal: Gi sihimbölö könöpñambuk kude ak niñginönj.”

³⁰ Mewö jiiga kewö qesiyök, “Gi qetki niñi?” Ömewöröme gwötpuk uruje geba malgerangöra “Qetnini lijön jizin” jiget. Mi nanine keunönj Kerök kambu ketani.

³¹ Mewö jiba Jisös kewö ulet wanjiget, “Gi nenquatangöba öme löm dutñi qahö miangörenj gebingöra kude jim kutum nenjiman.”

³² Kösutñine kundunji marömñe miangörenj bau kambu ketani kun gwözözak uruje kulunja malget. Miangöra ömenönj kewö jiba ulet wanjiget, “Gi ölop jinönja nini bau miengö uruñine gebin.” Ulet wanjigetka “Mönö anda geget.” Jiba jim kutum enjiyök.

³³ Jim kutum enjiiga azi uruñeyök kota anda bau uruñine geget. Gegetka bau kambu yeñon mönö luhuba nembönembönönj anda jororongöba o angnönj geba nemulahöba kömuget.

³⁴ Mi asuhuiga bau galöm yeñon mi eka taon aka miri morömorö miangörenj ölöñ unjurata anda keu buzupñi mi jiget mötket.

³⁵ Jiget möta ambazip sesegilgil yeñon yuai asuhuyöhi, mi ekingöra kaget. Kaba Jisösgörenj kangota azi uruñeyök ömenönj kotkeri, yanön könane tariga miwikñaget. Opo sileötañi törörök jöhöba uruñi amöriiga imbi mötmötñi pakpak asuhuiga eka awöwöliget.

³⁶ Azi ömenambuk malöhanön denöwö ölöwahöhi, mi jeninan ekeranön jiget mötket.

³⁷ Möta gwötpuk awöwöliba qem sömbuñini mötket. Miangöra Gerasa gölmegö ambazip kambu pakpak yeñon Jisösnönj engömosötmapköra ulet wanjiget. Ulet wanjigetka lilingöba anmamgö wanjenönj öngömangö ahök.

³⁸ Öngömamgö aiga azi uruñeyök ömenöñ kotkeri, yañön kaba Jisösbuk mo-hotñe anda malmamgöra qesiyök. Mewö qesiyökmö, Jisösnöñ qetala melaim wañgiba kewö jiyök,

³⁹ “Gi mönö lilingöba mirige anda Anutunöñ aᅅgöletot ketañi ketañi ak gi-hiyöhi, mianᅅgö kösohotñi jinöñga mötme.” Mewö jiiga anda Jisösnöñ aᅅgöletot ketañi ketañi ak wañgiyöhi, mianᅅgö keuñi mi taon uruñe liliköba miri dop jim sehiyök. Mewö.

Jairusnöñ böratñangöra Jisös köuluköyök.

Mat 9.18-26; Mak 5.21-43

⁴⁰ Ambazip pakpak Jisösgö mambötketka lilingöba kaiga kambu köla söñgaiba öröm wañgiget.

⁴¹ Köuluk mirigö keu galöm kun qetñi Jairus yañön kaba Jisösgö wösöñe geba simin köla miriñe kamapköra köuluköm wañgiyök.

⁴² Moröurupñi qahöpmö, böratñi mukmorö mohok yambuñi (yara) 12:gö dop mala kömumamgö ahök. Jisös köl öröm wañgigetka aniga ambazip kambunöñ likeplikep ölököba utal wañgiget. Mewö.

Kawöl ambi kunöñ Jisösgö malukuñi misiriyök.

⁴³ Utal wañgiba angetka mianᅅgören sutñine ambi kun malök. Yañön yambu (yara) 12 mianᅅgö dop köiñnöñ ehiga nalö dop kawöl yöhöiga malök. Yañön sile galöm yeñgö töwañini monen inapñi pakpak gil maliga sile galöm körekñan mem ölöwakingö osiget.

⁴⁴ Ambi mianöñ Jisösgö andöñe anda malukuñangö kitip suñi misiriiga mianᅅgorenöñ sepñi jöpköyök.

⁴⁵ Jisösnöñ qesiba jiyök, “Dañön nömisiriza?” Mewö jiyökmö, ambazip körekñan mi qañ kölgetka Pitönöñ jiyök, “Ketañamni, ambazip kambunöñ ölököba utal aᅅguba kaba goseize.”

⁴⁶ Jiiga Jisösnöñ jiyök, “Qahö, kunñan nömisiriiiga ösumni kun ani mötzal.”

⁴⁷ Mewö jiiga ambinöñ “Könañamni lök asuhuza,” jiba jönömñi unduiga kaba Jisösgö wösöñe simin köla kawölñangö könañi aka misiriba mianᅅgorenöñ ölöwahöhi, mianᅅgö könañi aukñe jiiga ambazip kambu körekñan mötket.

⁴⁸ Mötketka Jisösnöñ kewö jii mörök, “Böratni, mötnariᅅkan mönö mem ölöwak gihiza. Ölop urubönjöñnöñ anman.” Mewö.

Jisösnöñ Jairusgö böratñi mem guliyök.

⁴⁹ Keu mewö jiba kiniga köuluk mirigö keu galömñangö mireyök kunñan welen kaba Jairusgöra jiyök, “Böratkan kömuza! Mianᅅgöra böhigö qakñe lömböt toroqeba kude alman.”

⁵⁰ Jiyökmö, Jisösnöñ keu mi möta köuluk mirigö keu galömñi kewö jii mörök, “Keñgötki kude mötman! Mohok-kun akñan. Mönö ni möt narim niñginöñga böratkan ölöwakña.”

⁵¹ Mewö jiba yañgö mire anda ambazip tosatñi eᅅgömosöta Pitö, Jon, Jeims aka morö böratkö iwinamñi iyök eᅅguañgiri nanñinök miri uruñe öñgöget.

⁵² Öñgögetka ambazip körekñan jingey köla sahöta amburereñ megetmö, Jisösnöñ jiyök, “Yañön qahö kömuzapmö, gaunök ahöza. Mianᅅgöra mönö sahöt mosötme.”

⁵³ Mewö jiiga gönahit ewö aiga “Mönö kömuza!” möta gön köl wañgiget.

⁵⁴ Gön köl wañgigetmö, börat mi böröñe memba qeta jiyök, “Böratni, mönö wahötnöñ.”

⁵⁵ Mewö jiiga uñañan lilingöiga mianᅅgorenöñ wahöta kinök. Kiniga numbu nene wañgiget nemapkö jiyök.

⁵⁶ Iwinamñan mi eka welipköyohotmö, Jisösnöñ yuai asuhuyöhi, miangö buzupñi kun jiget mötpepukö songo al engiyök. Mewö.

9

Jisösnöñ gwarekurupñi 12 melaim engiyök.

Mat 10.5-15; Mak 6.7-13

¹ Jisösnöñ gwarekurupñi 12 mi engoholi tokogetka ömewöröme pakpak közöl engimegöra aka uzi kawöl mem ölöwakñegöra kukösumñi ösum-mumuñambuk al engiyök.

² Kukösum engiba kewö jiba melaim engiyök, “Inini mönö anda Anutugö bemtohoñangö könañi ambazip jim asarim engiba kawöl ambazip mem ölöwak engiba malme.”

³ *Melaim engiba jii mötket, “Inini köna anmeangöra yuaiñi kun qahö memba anme, öröp qahö, gösö qahö, köna nalem qahö, soujeñi qahö. Maluku semönñi qahöpmö, mohok meme.

⁴ “Anda mire denike denike angotmei, mönö miangöreñök mala nup memba taon mi mosöta köna anme

⁵ Anda mala miri kunöñ angotketka qahö köl öröm engiba keuñini qahö mötketka nesampurekñini mönö kewö jiba kondel engime, ‘Nini engö gölmenöñ kainga sölbuham köna tambönine mekötahözawi, mi mönö tim tönjöraringa nanñine lilingöba gema.’ Mewö jigetka könañamñini solanñi möt kutugetka ölop taon mi mosöta toroqeba anme.”

⁶ Mewö jiiga mosöta anda miriñi miriñi liliköba miri dop Ölöwak Buña jim asariba kawöl ambazip mem ölöwak engiba malget. Mewö.

Herodnöñ Jisösgöra lalalulu siksauk ahök.

Mat 14.1-12; Mak 6.14-29

⁷ *Yuai pakpak asuhuyöhi, miangö qetbuñanñan sehiba gölme bahöñangö (Galili prowinsgö) kiñ Herodkö kezapñe geiga mörök. Ambazip tosatñan kewö jiget, “Jon O-melun azinöñ mönö kömupnöhök wahöta malja.” Miangöra kiñnöñ keugö jaruba lalalulu siksauk ahök.

⁸ Ahökmö, tosatñan jiget, “Elaijanöñ kunbuk asuhuba malja.” Tosatñan toroqeba jiget, “Kezapqetok azi walñi yengöreñök kunöñ mönö guliba wahöta malja.”

⁹ Mewö jigetmö, kiñ Herodnöñ kewö jiyök, “Jon O-melun azi mi nöñön jibi jölñi kutugetmö, kungö keuñi mewö jiget mötzali, mi mönö danñon?” Mewö jiba Jisös ekñamgö kapan köla jörömqöröm ahök. Mewö.

Jisösnöñ azi 5000 nene gumohom engiyök.

Mat 14.13-21; Mak 6.30-44; Jon 6.1-14

¹⁰ Melaimelai azi aposol yeñön Jisösgöreñ lilingöba yuai aka megeri, miangö kösohotñi pakpak jiget mörök. Jiget möta enguangita ambazip qenjarökñini mosöta taon qetñi Betsaida miangö kösutñe nanñinök kötikñe malbingö anget.

¹¹ Angetmö, ambazip kambu yeñön mi möta Jisös andöñe wuatangöba anget. Anda Jisösgöreñ kagetka köl öröm engiba Anutu bemtohoñangö könañi jim asariba kawöl ambazip mem ölöwak engiyök.

¹² Mewö aka mali wehön jeñan teköba gemamgö ahök. Mewö aiga gwarek 12 yeñön kaba Jisös kewö jiget mörök, “Nini gölme kötikñi kiangöreñ maljinangöra gi ölop ambazip kambu ki melaim enginöñga miri koum dowe dowe tat anjei, miangöreñ anda ahöahö miri aka nene miwikñaime.”

* 9:3: Luk 10.4-11; Apo 13.51 * 9:7: Mat 16.14; Mak 8.28; Luk 9.19

¹³ Mewö jigetmö, kewö jii mötket, “Enjön mönö nanñinak i nene gumohom engime.” Mewö jiiga melenget, “Nini beret sahötñi 5 aka söra yahöt miyök memba maljin. Mianğöra denöwö akinto? Nini ölop anda ambazip kambu ki pakpak yengöra nene söngöröñi membinak me?”

¹⁴ (Yeñön azi 5000:gö dop malje.)” Mewö melengetka gwarekurupñan kewö jii mötket, “Enjön mönö ambazip engöra jiba menden engigetka kambu dop 50:gö dop nene nemingö tokoba eta tatme.”

¹⁵ Jiiga mewö aka menden engigetka ambazip körekñan eta kambuñi kambuñi tat anget.

¹⁶ Tat angetka beret 5 aka söra yahöt mi memba suepnöñ ui öngöiga kötuetsköyök. Kötuetsköba beret mindipköba gwarekurupñi engiiga ambazip kirip dop menden da sutñine alget.

¹⁷ Sutñine algetka körekmakörek nembra nem timbireñ aket. Nene kitipñi kitipñi mosötkeri, mi gwarek yeñön qezakögetka sakap 12 mianğöreñ geba kokolak qeyök. Mewö.

Pitönöñ Jisösgö könañi jim miwikñaiyök.

Mat 16.13-20; Mak 8.27-30

¹⁸ Nalö kunöñ Jisösnöñ nanñök gölme kungen köuluköiga gwarekurupñan yambuk malgetka qesim engiba kewö jiyök, “Ambazipnöñ nöngöra denöwö jimakze? Ni niñia akzal?”

¹⁹ *Jiiga melen da kewö jiget, “Tosatñan ‘Gi Jon O-melun azia akzan,’ jimakzemö, tosatñan ‘Gi Elaija akzan,’ jimakze aka tosatñan toroqeba kewö jimakze, ‘Gi kezapqetok azi walñi yengöreñök kunñan kömupnöhök wahöta maljan.’ ”

²⁰ *Mewö jigetka kewö qesim engiyök, “Aka nanñinak nöngöra denöwö jize? Ni niñia akzal?” Qesim engiiga Pitönöñ melen da jii mörök, “Gi Anutugöreñ Amötqeqe Tonñ Kraist akzan.” Mewö.

Jisösnöñ kömumamgö keuñi jiyök.

Mat 16.20-28; Mak 8.30-9.1

²¹ Mewö jiiga könañi aukñe jiget kunñan mötpepuköra songo köhöikñi al engiyök. Mewö.

²² Jisösnöñ jiyök, “Suep gölmegö azi ölnan mönö sihimbölo gwötpuk mötma. Kantrigö jitñememe, jike nup galöm aka Köna keugö böhi yeñön mönö andö qeba qegetka kömuma. Kömumba wehön karöbut aiga kömupnöhök wahötma.” Mewö.

Kraist wuatangöbingö söngöröñi

²³ *Jisösnöñ ambazip pakpak yengöra keu kewö jii mötket, “Kunñan nöngö andöne nuatangöba kamamgö mötzawi, yanñön mönö nanñi urusilenangö sihim kömbönañi bölöñi andö qeiga sisitñi megetka sihimbölo mi bisimakña. Mi maripomnöñ kömumawangö dop mököson da ni nuatangöba kama.

²⁴ *“Kunñan malmalñi nanñangöra angön köla nanñi imbi-imbi maljaw, yanñön mönö malmalñi ölni jöhöi sohoma. Sohomapmö, kunñan gölmegö malmalñi nöngöra aka kölen da tököm niñimaw, yanñön mönö malmal ölnangö könañi miwikñaiba köhöiba malma.

²⁵ “Kunñan gölmenji gölmenji miengö öröyuainji pakpak köl öröiga buñani an teköiga urunangö malmalñi mem sohoba silebile mala kömuiga Anutunöñ keuñi jim teköiga könöp sianöñ geba unañan ayuhuiga qahö dop kölma. Sukinapñi mianñön mönö urusösöngai qahö ak wangima. Qahöp mahöp!

* **9:19:** Mat 14.1-2; Mak 6.14-15; Luk 9.7-8 * **9:20:** Jon 6.68-69 * **9:23:** Mat 10.38; Luk 14.27

* **9:24:** Mat 10.39; Luk 17.33; Jon 12.25

26 “Kunjan nongö qetni aka Buja keuni memba eta aljawi, i Suep gölmegö azi öljan mewöyök ehörön kölma. Yanön könangep Suep garata töröni yembuk ki etketka yengö, nanjanjö aka Iwinjanjö asakmararanjini eka aurume. Nalö miangören azi me ambi mewöni mönöhörön köl wangima.

27 Nönön keu ölni kun kewö jibi mötme: Kiangören kinjei, engö sutjineyök tosatjan Anutugö bemtohojan asuhumawi, mi ek kutume. Jebuk mala kömupkö sihimbölöni qahö mötketka asuhum tinjiriga mi ekne.” Mewö.

Jisösgö sileje letotqetot ahök.

Mat 17.1-8; Mak 9.2-13

28 *Keu mi jiiga wehön 8:kö dop teköiga Jisösnön Pitö, Jon aka Jeims enguanjita kundune öngöba Anutu köuluköyök.

29 Köuluköiga miangören jemesoholjanjö kaisongolomjan letota tandökni murutni ahök. Malukujan tuat lalamni aka kölköl-bilikbilikjambuk asariyök.

30 Miangörenök etetka azi yahötjan asuhuba Jisösbuk keu keu jiget. Mi Moses aka Elaija.

31 Asakmararan urune asuhuba Jisösbuk keu kewö eraum mötket, “Anutunön Jisös sihimbölö möta kömumapkö melaiiga eta zilan Jerusalem sitinön aniga arej mianön öljanbuk ak teköma.”

32 Mewö eraum mötketmö, Pitönön alayahötne yetpuk jeninan lömböriiga gaun ahöget. Ahögetmö, gaunöhök imbinini möta jeni uba Jisösgö asakmararanjini aka azi yahöt yambuk kinohori, mi engeket.

33 Engeketka kinda Jisös mosötpitkö ahotka Pitönön Jisösgöra jiyök, “Ketanjamni, nenön kiangören uru ölowak mötzin. Miangöra nenön ölop kum karöbut qebin: Göhö kun, Mosesgö kun aka Elaijagö kun.” Pitönön mewö jiyökmö, nanne keujanjö könane mi qahö möt kutuyök.

34 Mewö jiba kiniga unununun kunön eta aunjan esuhum engiiga kousu urune mala awöwöliba jönömni unduyök.

35 *Jönömni undui kingetka kousu uruneyök qet kun kewö eriga mötket, “Azi ki mi nani nahöna. I ambazip amöt qem engimangöra möwölöhöm wangial. Mönöhörön keunne möta malme.”

36 Qet mianön eri möta gwarek yenön miangörenök uba Jisösnön nanjök kini etet. Kundune yuai ekeri, miangö buzupni mi nalö miangören kude jiba keu bök malgetka kunjan kun qahö mörök. Mewö.

Jisösnön öme wuatangöi morönön ölowahök.

Mat 17.14-21; Mak 9.14-29

37 Ahöba wahötketka Jisösnön gwarekurupni karöbut yembuk kunduneyök eta sörokne ambazip kambuleleme engeget.

38 Engegetka ambazip kambunöhök azi kunjan qeta kewö jiyök, “Böhi, nongö nahöni mukmoröya akzawangöra mönöhörön kaba i ekjan. Miangöra köuluköm gihizal.

39 Mötnön, öme kunön i memba mendawöli miangörenök qet gigilahöi utuköm wangii wölöhariiga numbuneyök qölqölsöutsöut erakza. Öme mianön öröm ureim wangiba nalö gwötpuk qahö mosörakza.

40 Mewö aiga göhö gwarekurupki öme mi wuatangömegö ulet engizalmö, yenön mi osize.”

41 Mewö jiiga Jisösnön melen wangiba jiyök, “Yei, gölmegö yangisen aka misimkaulup ambazip, nenön mönöhörön nalö dawik embuk mala qatön engubiga Anutu qahö möt narigetka sihimbölö mötmam? Nahöngi mönöhörön wangita ki kanöne.”

* 9:28: 2 Pitö 1.17-18 * 9:35: Ais 42.1; Mat 3.17; 12.18; Mak 1.11; Luk 3.22

⁴² Morö mi wanğita kaiga nalö mianğörej mewöyök ömenöj morö utuköba urepköm wanğiga wölöhariyök. Mewö ahökmö, Jisösnöj öme mi jim wanğii mosöri morö mem ölöwaka iwiñi wanğiyök.

⁴³ Anutugö kukösumñi ketanjan mewö asuhuiga körekñan mi eka nemböjini teköi welipköget. Mewö.

Jisösnöj kömumamgö buñani jiiga yahöt ahök.

Mat 17.22-23; Mak 9.30-32

Jisösnöj yuai pakpak mi meyöhi, mianğöra ambazip körekñan welipkögetka Jisösnöj nalö mianğörej gwarekurupñi keu kötñi kewö jii mötket,

⁴⁴ “Keu ki mönö kezap ala mötme: Anutunöj Suep gölmegö azi ölni mi gölme ambazip yengö böröjine al wanğii gema.”

⁴⁵ Keu kötñi mi jii mötketmö, mi qahö möt kutuget. Anutunöj mi köl turui tölapñe ahöiga mi qahö möt asariget aka könañi denöwö, mi qesibingö kölköldömdöm aket. Mewö.

Gwarek sutñine danñon mutukñi akza?

Mat 18.1-5; Mak 9.33-37

⁴⁶ *Gwarek nengörejök ‘Danñon öngöngöñi akza?’ jiba keu mi mötmöriget.

⁴⁷ Mi mötmörigetmö, Jisösnöj urumötmötñini möt kutuba namande moröñi kun memba qöhöröñe ali kinök.

⁴⁸ *Kiniga kewö jii mötket, “Körek engörejök kunñan eretñi kondökñi akzawi, yanñon mönö öngöngöñi akza. Mianğöra kunñan namande ki nöngö qetne miriñe köl öröba köyan kölmawi, yanñon mönö ni köl öröm niñgima. Kunñan ni köl öröm niñgimawi, yanñon melaim niñgiyöhi, mönö i mewöyök köl öröm wanğima.” Mewö.

Kunöj keröki qahö, yanñon mönö alagi akza.

Mak 9.38-40

⁴⁹ Nalö mianğörej Jonöj könahiba keu kewö jiyök, “Ketanjamni, azi kunñan göhö qetnöj öme közöl enğiiga ehin. Yanñon nembuk qahö liliköba maljawanğöra nini i qetal wanğiin.”

⁵⁰ Mewö jiyökmö, Jisösnöj kewö jii mörök, “I kude qetal wanğime. Kunñan qahö qetal enğimakzawi, yanñon mönö engö areñnöj malja. (Mianğöra inñi mönö nöngö alaurupni tosatñi mi qetala anğösirip mem enğibepuk.)” Mewö.

Samaria miri kun yanñon Jisös andö qeget.

⁵¹ Jisösnöj Suepnöj öngömamgö ahök. Mianğö nalöñi törizawanğöra Jisösnöj kinda “Jerusalem sitinöj anmam,” jiba jim köhöiba könahiba könanöj anök.

⁵² Anda kolek qeljine aliga mutuk anget. Könanöj anda mala Samaria prowinsgö miri kunöj anğota “Jisösgöra mözöqözözöm akingöra kazin,” jiget.

⁵³ Jiba angetka anökmö, “Ni Judia prowinsnöj Jerusalem jike göröken anmam” jiiga mianğöra miri anğon köla yaizökzök qahö jiget.

⁵⁴ *Mewö aketka gwarekyahötñi Jeims aka Jon yekñon mi eka jiyohot, “O Kambu, Suepnöhök könöp eta enğohoi qahöwakeak, mewö köuluköbingö mötzan me qahö?”

⁵⁵ Mewö jiyohotmö, Jisösnöj lilingöba tembula jim etkiyök.

⁵⁶ Mianğörejök toroqeba miri kunöj anget. Mewö.

Jisös wuatangöbingö möndömöndö keunji

Mat 8.18-22

⁵⁷ Könanöj angetka azi kunñan kaba Jisösgöra jiyök, “Gi denike denike anmani, nöñon mönö mianğörej gi guatangöba kamam.”

* 9:46: Luk 22.24 * 9:48: Mat 10.40; Luk 10.16; Jon 13.20 * 9:54: 2 Kiñ 1.9-16

⁵⁸ Mi möta Jisösnöŋ kewö jii mörök, “Arökŋangö kiam yeŋön köteŋine ahögetka könakemba nei yeŋön aipŋini memba malakzemö, Suep gölmegö azi ölnan mönö denike anda nöropŋi wani qömböŋnöŋ nariba luhut membawak.”

⁵⁹ Jisösnöŋ azi kungöra jiyök, “Gi kaba ni nuatangöman.” Jiyökmö, kewö melenök, “Kembu, mi ölöpmö, iwinan kömumangö aiga mutuk jinöŋga anda galöm kölbi kömui löm kölbigun.”

⁶⁰ Mewö jiyökmö, Jisösnöŋ melenöda jiyök, “Mosötnöŋ! Köhömuŋi yeŋön qamötŋini köhömuŋi mi ölop löm kölmemö, göŋön mönö anda Anutu bemtohoŋangö könaŋi jim asarim engiba malman.”

⁶¹ *Kunbuk azi kunŋan kaŋgota jiyök, “Kembu, nöŋön gi guatangömamgö sihimni mötzalmö, mötnöŋ, gi ölop jinöŋga mutuk mire anda tinitosolomurupni yaizökzökŋini jibigun.”

⁶² Jiyökmö, Jisösnöŋ melenök, “Kunöŋ gölme mesiŋmesiŋgö kinöŋ mi hos andöŋe jöhöba böröŋan kinöŋ supŋe memba kini aniga dumŋe liliŋgöba andöŋe uzawi, yeŋön mönö Anutugö bemtohoŋnöŋ aŋgota nupŋi memawangö dop qahö akza.” Mewö.

10

Jisösnöŋ gwarek 72 melaim engii anget.

Mat 9.37-38; 10.7-16

¹ Miangö andöŋe Kembunöŋ gwarek tosatŋi 72* mi möwölöhöm engiyök. Nannak “Taonŋi taonŋi miriŋi miriŋi anmam,” jiba miangöreŋ yahöt yahöt meköba mutuk melaim engiyök.

² * “Melaim engimam,” jiba kewö jii mötket, “Anutugö nupnöŋ nene ölni gwötpuk öliba ahözapmö, mi tokobingöra nup meme ambazip nini awamdökŋi maljin. Miangöra mönö nene öliöliŋangö Kembuŋi köuluköm wangigetka nup meme ambazip melaim engiiga ölni mem tokome.

³ * “Inini mönö anme. Mötket, lama yeŋön arökŋangö kiam kalŋi yeŋö sutŋine gegetka luhuba engöhöbepuk, nöŋön inini miangö tandök ewö melaim engibi anme.

⁴ * “Inini moneŋ irimuŋga me gösö kun me köna esu mi kude memba anme. Anda könanöŋ ambazip engeka jiji-kilik-kilik yaizökzök kude akŋe.

⁵ “Anda miri kunöŋ öngöba mutuk kewö jime, ‘Anutunöŋ miri kiangöreŋ luai ali bönjöŋ malme.’

⁶ Mewö jigetka kunŋan luai aŋgön kölmamgö dop akzawi ewö, luaiŋinan mönö yeŋö qakŋe öngömapmö, kunŋan mi qahö aŋgön kölma ewö, luaiŋinan mönö liliŋgöba nannini qakŋine öngöma.

⁷ * “Miri öngömei, mönö miangöreŋök mala nup meme. Ambazipnöŋ nup meme ambazip malmalŋini nanngömeaŋgö dop akze. Miangöra yeŋön nene aka o engime, mi mönö neme. Miri tosatŋe laŋlaŋ kude ahöme. Miri suen kude anda kame.

⁸ “Taon miangöreŋ me miangöreŋ aŋgotketka köl öröba nene engime, mia mönö neme.

⁹ Nemba tosatŋan miangöreŋ kawöl engöhöi ahömei, i mönö mem ölöwak engime. Mewö aka kewö jiget mötme, ‘Anutugö bemtohoŋan mönö dowe kaiga miangö uruŋe aŋgotme.’

¹⁰ * Mewö akŋemö, taon kunöŋ aŋgotketka andö engumei, miangöreŋ mönö maketnöŋ me sombemnöŋ anda kewö jiget mötme,

* **9:61:** 1 Kirj 19.20 * **10:1:** Tosatŋan oyoŋda 70 jize. Tosatŋan 72 jize. * **10:2:** Mat 9.37-38 * **10:3:** Mat 10.16 * **10:4:** Mat 10.7-14; Mak 6.8-11; Luk 9.3-5 * **10:7:** 1 Kor 9.14; 1 Tim 5.18 * **10:10:** Apo 13.51

11 'Nini engö taonöŋ kainga sölbuham yuai köna tambönine mekötahözawi, mi mönö tim tönjöraringa nanŋine lilingöba gema. Gemapmö, keu ki mönö möt yaköme: Anutugö bemtohoŋan mönö kösutŋine asuhuza.'

12 *Nöŋön kewö jibi mötket: Anutunöŋ nalö ketanŋe qemasolokepŋinanŋö likepŋi melenŋi taon mianŋö qakŋe öngömawi, dop mianŋön mönö Sodom yeŋgö sihimbölo dopŋi onŋita toroqem engima."†

Jisösnöŋ taon 3 yeŋgöra 'Yei wösöbirik!' jiyök.

Mat 11.20-24

13 *"O Korazin tonŋi, nöŋön engöra 'Yei!' jiba sahötzal aka Betsaida tonŋi, engöra mewöyök 'Yei!' jiba sahötzal. Nöŋön yeŋgöreŋ anbiga keuni jibi sösonihii anŋöletotni kukösumŋinambuk asuhugetmö, uruŋini töndup qahö melenŋet. Anŋöletot mi kian gölmenöŋ Taiö aka Saidon sitinöŋ asuhubeak ewö, yeŋön mönö nalö köröpŋi uruŋini melenŋingö kaisösöpŋi kondela dodohonöŋ anŋömiriba kau ariba sahötpeak.

14 "Sahötpeakmö, Anutunöŋ könanŋep Korazin aka Betsaida yeŋgö keuŋini jim teköba likepŋi melenŋi sihimbölo mötmei, nalö ketanŋi mianŋöreŋ mi mönö Taiö aka Saidon yeŋgö sihimbölo dopŋi onŋita mötme.

15 *Aka Kaperneam tonŋi, Anutunöŋ inŋini ölop mem wahöt engii Suep mire öngöbeak me qahöpto? Qahöpmahöp! Inŋini mönö kömupkö senjom mire kölölohoba geme.

16 *"Kunŋan keuŋini mötmawi, yaŋön mönö nöŋgö keuni mötma. Kunŋan andö engumawi, yaŋön mönö ni andö nuŋgumapmö, kunŋan ni andö nuŋgumawi, yaŋön melaim niŋgiyöhi, mönö i andö qema." Mewö.

Gwarek 72 yeŋön lilingöba söŋgaiget.

17 Gwarek 72‡ yeŋön mala lilingöba kaba söŋgaiba kewö jiget, "Kembu, nini göhö qetke öme wöröme jim kutum engiinga yeŋön mewöyök keunini bapŋe anda tököba anget."

18 Mewö jigetka Jisösnöŋ melenŋök, "Nöŋön Satan kakögetka Suepnöhök luhuba wölbilik ewö aköba gei ehal.

19 *Mötket, nöŋön kukösum engibiga inŋini ölop kitim soramen, skorpion (nendaŋ kömbukŋi pomemba) aka kerökkninanŋö ösum-mumuŋi jitŋambuk pakpak tiget eriga luhut alme. Mianŋöra yuai kunŋan qahö engum mizit ak engima.

20 "Mianŋöra ömewöröme yeŋön keuŋini bapŋe anjemö, töndup engöreŋ sösongai bohonŋi mi mianŋöra kude söŋgaime. Engö qetŋini Suep mire ohoget Anutugö buknöŋ ahözawi, mianŋöra mönö önöŋi qahö söŋgaime." Mewö.

Jisösnöŋ söŋgaiba Anutu möpöseiyök.

Mat 11.25-27; 13.16-17

21 Nalö mianŋöreŋ Uŋa Töröŋan Jisös inahöm wanŋiiga söŋgaiba keu kewö jiyök, "O Iwini, göŋön Buŋa keugi mötkutukutu ambazip mötmöt ketanŋi megeri, yeŋgöreŋ asambötnöŋmö, ambazip nahönbörat ewö nanŋinanŋöra mötketka gukmaulem akzei, mi mönö yeŋgöreŋ indelnöŋga möt asarize. Mianŋöra nöŋön Suep gölmegö Kembuŋi gi möpöseim gihizal. O Iwini, gi nangak mewö asuhumapköra mötnöŋ dop köli ölöwahök.

22 *"Iwinan mönö yuai pakpak jim kutuiga nöŋgö buŋaya ahök. Iwinan Nahönŋanŋö könanŋi nanŋök möt yaköiga kunŋan mi qahö mötza. Mewöyök

* **10:12:** Jen 19.24-28; Mat 11.24; 10.15 † **10:12:** Sodom yeŋön bölöŋi kanjamŋambuk memba mala uruŋini qahö melenŋetka Anutunöŋ könöpŋön köndenŋ engiyök. * **10:13:** Ais 23.1-18; Eze 26.1-28.26; Joel 3.4-8; Amos 1.9-10; Zek 9.2-4 * **10:15:** Ais 14.13-15 * **10:16:** Mat 10.40; Mak 9.37; Luk 9.48; Jon 13.20 ‡ **10:17:** Tosatŋan oyonŋda 70 jize. Tosatŋan 72 jize. * **10:19:** Sum 91.13 * **10:22:** Jon 3.35; 10.15

kunjan Iwiŋaŋgö könaŋi qahö möt yaköiga Nahönŋanök mi mötza aka ambazip möwölöhöm enġiba yeŋgöra mi indelmawi, yeŋön mönö Iwi möt waŋgime.”

²³ Jisösnöŋ mewö jiba gwarekurupŋi yeŋgöreŋ liliŋgöba nanŋinök ölöŋ kewö jii mötket, “Inini yuai ek kutuzei, denike yeŋön mi ek kutuzei, yeŋön mönö jeŋinaŋgöra aka simbawoŋ akze.

²⁴ Mianġö könaŋi kewö: Nöŋön keu kewö jibi mötket, Kezapqetok ambazip aka kiŋ azi kembu gwötpukŋan inini yuai ki ekzei, mi ekingö awöweŋgöba malgetmö, mi qahö eket. Inini keu ki mötzei, yeŋön mi mötpingö awöweŋgöba malgetmö, mi qahö mötket.” Mewö.

Jöjopaŋ keu bohonŋi yahöt mi denöwö?

Mat 22.34-40; Mak 12.28-31

²⁵ *Köna keugö böhi kunjan wahöta Jisös bötak ala kewö qesim waŋgiba jiyök, “Böhi, nöŋön denöwö aka malmal kömbönaŋi teteköŋi qahö buŋa qem aŋgubilenak?”

²⁶ Jiiga Jisösnöŋ kewö melenġa qesiyök, “Mosesgö Köna keunöŋ keu denöwö ohoget ahöza? Mianġö könaŋi denöwö?”

²⁷ *Qesiiga melenġa jiyök, “ ‘Gi urugi jömküŋi, uŋagi jömküŋi, kuki jömküŋi aka mötmötki jömküŋi mianġön mönö Kembu Anutugi jöpaköba malman,’ aka ‘Nangi jöpaköm aŋgumakzani, mewöŋanök mönö ambazip pakpak jöpaköm enġiba malman.’ ”

²⁸ *Jiiga Jisösnöŋ melenġök, “Törörök melenġan. Mi tem köla malmal kömbönaŋaŋgö buŋaya akŋan.”

²⁹ Mewö melenġökmö, Köna keugö böhinöŋ ‘Mi tem köla solanŋi akzal,’ mewö mötmöriba könaŋamŋi kondelmangö möta Jisösgöra jiyök, “Ambazip sutŋine mala koralı, yeŋgöreŋök mönö dagöra jizan? Niŋia qahö jöpaköm waŋgibilenak?”

Samaria azinöŋ gurusep azi ak-kömum waŋgiyök.

³⁰ Mewö jiiga Jisösnöŋ melenġa jiyök, “Azi kunjan Jerusalem siti mosöta Jeriko mire geba könanöŋ kegwek-kahasililiŋ yeŋgö böröŋine gei meget. Memba inap yuaini waŋgita oponi qeköba gurusep qeba gila angetka kömumangö aka ahöyök.

³¹ Ahöba mamböriga jike nup galöm kunjan köna miyök anda eka ek siriba köna likepŋeyök anda oŋgita anök.

³² Aniga mamböri jike nup azi (Liwait) kunjan mianġöreŋ kaŋgota eka mewöŋanök ek siriba oŋgita anök.

³³ *Anökmö, Samaria prowinsgö azi§ kunjan köna miyök anda ahöyöhi, mianġöreŋ aŋgota eka wösöŋi möta ehoriyök.

³⁴ “Ehoriba kösutŋe geba uziŋi kelök aka wain oŋan miriba esuhuyök. Uziŋi esuhuba memba kököbihiba doŋkiŋi qakŋe ala waŋgita qenjarök ahöahö mire anda ala köyan köl waŋgiyök.

³⁵ Köyan köl waŋgiba ahöba wahöta söŋanök silim yahötkö töwaŋi (Kina 10-) uzeta qenjarök mirigö toni waŋgiba jiyök, ‘Azi ki mönö köyan köl waŋgiba malnöŋga monen ġihizali, mi kude dop köla oŋgitma ewö, mi mönö liliŋgöba kaba mianġöreŋ toroqeba ġihimam.’

³⁶ Azi karöbut könaŋamŋini mewö kondelget. Azi kegwek-kahasililiŋ yeŋgö böröŋine geyöhi, yaŋgö alaŋi daŋön ahök? Yeŋgöreŋök dagöra mötnöŋ, i uru kalem ak waŋgiyök?”

* **10:25:** Mat 22.35-40; Mak 12.28-34 * **10:27:** Lew 19.18; Dut 6.5 * **10:28:** Lew 18.5 * **10:33:** 2 Hist 28.15 § **10:33:** Juda yeŋön Samaria ambazip jijiwilit ak enġizema.

³⁷ Qesim waŋgiiga melenök, “Ak kömum waŋgiyöhi, yaŋön.” Mewö meleniga Jisösnöŋ jii mörök, “Gi mönö anda mewöŋanök aka malman.” Mewö.

Jisösnöŋ Marta Maria yetpuk kusus tarök.

³⁸ *Jisösnöŋ gwarekurupŋi yembuk könanöŋ angetka Kembuŋinan miri kunöŋ aŋgorök. Aŋgoriga ambi kun qetŋi Marta yaŋön köl öröm waŋgii miriŋe öŋgöyök.

³⁹ Martagö munŋi qetŋi Maria malök. Yaŋön Kembu eka könaŋi kösutŋe eta tata Buŋa keu jiyöhi, mi kezap ala mörök.

⁴⁰ Mörökmö, Martanoŋ lömbuaŋ nupnöŋ öroi anda kaba mökösusu aka Jisösgöra jiyök, “Kembu, munan nömosöri nanök welen nup membi mötnöŋ dop kölja me qahö? Miangöra mönö Maria jinöŋga kaba bauköm niŋgima.”

⁴¹ Jiiga Kembunoŋ melenŋa jii mörök, “Marta Marta, gi yuai könaŋi könaŋi miangöra waimanjat möta mötkurumkurum aka könöpŋambuk aka kinjan.

⁴² Mewö kinjanmö, waimanjat mohok kun memba mem köhöininga dop kölma. Nini yuai sehisehiŋi miangöra qahö osizin. Marianöŋ kewöta urugö likepŋi möhamgöm aŋgumamgö möwölöhöba simbawoŋ akza. Malmalgö bahöŋi ölopŋi mi kunŋan kun kude waŋgitma.” Mewö.

11

Jisösnöŋ köulukö könaŋi kusum enŋiyök.

Mat 6.9-13; 7.7-11

¹ Jisösnöŋ miri kunöŋ köuluköba mali teköiga gwarekurupŋi yeŋgöreŋök kunŋan kewö jiyök, “Kembu, Jon O-melun azinöŋ gwarekurupŋi köulukö könaŋi kusum enŋiyöhi, gi mönö mewöŋanök nini kusum neŋgiman.”

² Jiiga Jisösnöŋ kewö jii mötket, “Inini köuluköbin jiba kewö jime: Iwi, göhö qetkan mönö töröŋi ahöma. Mönö galöm köl neŋginöŋga bemto-hoŋgahö ölni asuhuma. (Göhö jitsihitki Suepnöŋ tem kölakzei, gölmenöŋ mönö mewöŋanök asuhuma.)

³ Gi wehön dop nene dopnine neŋgiman.

⁴ Tosatŋan bölöŋi ak neŋgigeri, nini körek yeŋgö siŋgisöndokŋini mosötzin ewö, gi mönö neŋgöreŋ siŋgisöndok saŋgoŋ neŋgiman. Gi esapesapnöŋ eta neŋgubapuköra aŋgön köl neŋgiba Bölöŋi Toŋaŋgö böröŋeyök meköm neŋgiman.”*

⁵ Jisösnöŋ toroqeba kewö jii mötket, “Enŋöreŋök kunŋan suŋgem bibiŋe alaŋaŋgö mire anda möndöba kewö jima, ‘Alani, beret karöbut niŋginöŋga likepŋi bian melenŋ gihibi.

⁶ Alani kunŋan könanöŋ mala nöŋgöreŋ kaŋgoriga neneŋamni qahöpköra gumohom waŋgimamgö jaruzal.’

⁷ Mewö jii alaŋan miri uruŋeyök kewö melenŋa jima, ‘Gi gaun gwölö ak neŋgizan. Ni naŋguŋi lök köl köhöibiga nahönböراتurupnan nömbuk tumbu-lahöpnini tumbula gaun ahözin. Miangöra wahöta mi gihimamgö osizal.’

⁸ Mewö jimapmö, nöŋön jibi mötket: Miri toŋan alaŋi akzawaŋgöra aka qahö wahöta waŋgimapmö, mi töndup kapaŋ köla jiba kinjawaŋgöra mi ölop wahöta qesizawaŋgö dop körek waŋgima.

⁹ “Nöŋön miangö likepŋi kewö jibi mötket: Mönö Anutu köuluköme. Köulukögetka enŋima. Anutugöreŋ mönö yuaigö böröŋaŋ memba jarume. Mi jarugetka kondeliga miwikŋaime. Kinda naŋgunöŋ qeme. Qegetka naŋgu tal enŋima.

* **10:38:** Jon 11.1 * **11:4:** Tosatŋan keu mi kewö melenŋa jimakze: bölöŋeyök meköm neŋgiman.

10 Kunñan Anutu köulukömakzawi, yañön mönö likepñi buña qem aṅguma, yuaigö jarumakzawañön mönö mi miwikñajima. Nañgunöñ qemakzawañgöra mönö nañgu öröm wañgima.

11 “Iwiurup engöreñök dañön kewö akza: Nahönñan söragöra qesiiga salupñe qatö wañgima.

12 me kuruk kötnaṅgö qesiiga skorpion (nendañ kömbukñi pomemba) wañgima?

13 Mewögöra inñi ambazip bölöñi akze aka töndup kalem ölopñi ölopñi mi nahönböroraturupñini engibingö mötze ewö, Suep Iwinöñ mönö kalemñi denöwö aṅgön kölbawak? Yaṅgö uruñgö ahakmemeñi mi neñgongita tandökñi kun akza. Mianğöra Uña Töröñaṅgöra köuluköba qesim wañgime ewö, yañön mönö sihimñan i melaiiga uruñine gema.” Mewö.

Jisösnöñ öme yeṅgö ösumñini oṅgita qei etza.

Mat 12.22-32; Mak 3.20-27

14 Ömenöñ azi kun töñöt aka numbuñi jöhöiga mötök maliga Jisösnöñ ömeñi mi wuatañgöiga kota mosöri nesilamñan lolohoiga kunbuk keu jiyök. Keu jiiga ambazip kambu yeñön mi eka welipköget.

15 *Welipkögetmö, yeṅgöreñök tosatñan kewö jiget, “Yañön mönö öme yeṅgö kembuñini Katakömulat yaṅgö ösumnöñ ömewöröme eṅguatañgömakza.”

16 *Mewö jigetka tosatñan Jisös keugö bötaknöñ örömapköra esapköm wañgiba kewö qesiget, “Gi mönö jim kutunöñga Suepnöhök aṅgöletot kun asuhuiga ekin.”

17 Qesigetmö, yañön uru mötmötñini möt teköba kewö jii mötket, “Kantri denike yeṅgö galömurupñinan sutñine aṅgururuk aka julmei, yeñön mönö ayuhum aṅgugetka kantriñinan böliba sahopñanök ahöma. Mewöyök miri kungö könagesö yeñön julmei, miriñinan mönö qeqelanñan ahöma.

18 “Mötket! Satangö könagesö yeñön mewöyök sutñine aṅgururuk aka julbeak ewö, yeñön mönö gawman nupñini memingö osigetka ömetohonñan mönö denöwö kinbawak? Inñi nöñgöra kewö jize: Yañön Katakömulatkö ösumnöñ ömewöröme eṅguatañgömakza.

19 Mewö jizemö, mötket, nöñön Katakömulatkö ösumnöñ ömewöröme közöl eṅgibileñak ewö, eṅgö alaurupñinan mönö dagö ösumnöñ mi közöl eṅgibeak? Mianğöra yeñön mönö keuñini ölñi me qahö, mi kewöta jim teköme.†

20 Mi jim tekömemö, Anutugö ösumñan nöñgö börö kesötñi sölölohöi öme eṅguatañgömakzal ewö, Anutugö bemtohonñan mönö engöreñ kam kuñguza.

21 “Azi köhöikñan timbi liñgipñambuk miri gölmeñi galöm meiga sukinapñan mönö kahaimök ahöma.

22 Mewö ahömapmö, azi köhöikñi kötökñan luhuba kaba qeba luhut al wañgiba timbi liñgipñi nariyöhi, mi körek wañgita qezanña sukinapñi memba anda alaurupñi mendeñ eṅgima.

23 * “Kunñan nömbuk qahö maljawi, yañön mönö qetal niñgimakza. Kunñan ambazip nöñgö qetne tokomegöra qahö öröm eṅgimakzawi, yañön mönö mendeñ eṅgimakza.” Mewö.

Öme yeñön azi uruñe liliñgöbingö kapanñ kölje.

Mat 12.43-45

* **11:15:** Mat 9.34; 10.25 * **11:16:** Mat 12.38; 16.1; Mak 8.11 † **11:19:** Naññi sile galömurupñinan Anutugö qetñi qeta töndup öme mi Katakömulatkö kukösumnöñ közöl eṅgigetka nöñön mi Anutugö ösumnöñ közöl eṅgimakzal. Öroröñ qahö kinjinañgöra dañön ölñi aka dañön keu munenñi wuatañgömakzawi, mi ambazipnöñ kewöta jim teköme. * **11:23:** Mak 9.40

24 “Ömenöŋ azi uruŋeyök kota gölme qararaŋkölkölŋe anda laŋ liliköba mala luhut memamgö miri jaruba kun qahö miwikŋaiba ölan yöhöiga kewö jima, ‘Mirini mosöta kazali, miangören mönö kunbuk lilingömam.’

25 Mewö jiba lilingöba miriŋi usuŋda meŋölöi ahöyöhi, mi mewöŋanök ahöi miwikŋaiba.

26 Mewö miwikŋaiba anda öme tosatŋi 7 enġuaŋgitma. Öme 7 mi nanŋi oŋgita bölöŋi kötökŋi akze. Yaŋön mi enġuaŋgiriga kaba miri mi öngöba miangö uruŋe malme. Mewö aiga azi miangö könaŋi mutuk kilenkilen ahökmö, könaŋgep bölim qölim teköma.” Mewö.

Denike yeŋön simbawoŋ akze?

27 Jisösnöŋ keu mewö jiba mali ambazip kambu sutŋineyök ambi kunŋan qeta Jisös kewö jii mörök, “Gömokni, ambinöŋ gölöm ala gömimba juzu gumohom gihiyöhi, nöŋön yaŋgö mötŋi simbawoŋ akza.”

28 Mewö jiyökmö, Jisösnöŋ kewö melenök, “Mi jizanmö, nöŋön kewö jimam: Ambazip Anutugö keugöra kezap ala möta tem köla köl gulimakzei, yeŋön mönö simbawoŋ akze.” Mewö.

Böhi tosatŋan aŋgöletököra kapaŋ köla uletket.

Mak 8.11-12; Mat 12.38-42

29 *Ambazip kambunöŋ tokogetka qariiga Jisösnöŋ toroqeba keu kewö jiyök, “Ambazip merak gölmenöŋ maljei, mi kambu bölöŋa. Yeŋön Anutugö aiwesökŋaŋgöra kapaŋ kölakzemö, aiwesök kun kezapqetok azi Jonagöra lök asuhuyök. Anutunöŋ aiwesök murutŋi kun qahö al enġima.

30 *Keu miangö könaŋi kewö: Anutunöŋ mönöwök Jona melaiiga Niniwe yeŋgö sutŋine anda Anutugö aiwesökŋi ahök. Miangö dop Suep gölmegö azi ölnan mewöyök ambazip kambu kiangö sutŋine asuhaba uruŋini melenmegöra kuŋgum enġiba aiwesökŋina akŋa.

31 *“Könaŋamŋinaŋgö kaisösöpŋi kun kewö: Anutunöŋ mönöwök mötkutukutu öngöŋgöŋi ketanŋi mi kin Solomon waŋgiiga Saut görökenök kantri kungö qin ambinöŋ Solomongö mötkutukutuŋi mötmamgö sihimŋi mörök. Sihimŋi möta gölme göraneyök wahöta köna köröp tiŋtiŋi kaba mala Solomongö mötmötŋi mörök. Mi mörökmö, mötket, nalö kewöŋe nöŋön sutŋine asuhaba kinda Anutugören mötkutukutu öngöŋgöŋi memba kazali, mi Solomongö mötkutukutuŋi oŋgitza. Oŋgitzapmö, iŋini töndup nesampurek ak niŋgiba tönpin kingetka qahö dop kölja.

“Miangöra Anutunöŋ könaŋgep ambazip körek pakpak öröm enġii keuŋini jim tekömapköra jeŋe aŋgotmei, nalö miangören Saut kantrigö qin ambi mianön mönö mewöyök aŋgotma. Yaŋön ambazip kambu ki kinjei, embuk öröröŋ kömupnöhök wahöta enġö qöhöröŋine mohotŋe kinma. Mohotŋe kinda keu kewö enġö silenine alma, ‘Iŋini Jisös nesampurek ak waŋgigetka Anutunöŋ likepŋi melen enġii sihimbölä öngöŋgöŋi mötme.’ Yaŋön mewö jiiga silikŋi kewöta nanŋinaŋgöra gamuŋini mötme.

32 *“Jonanöŋ Niniwe ambazip sutŋine anda Anutugö keunöŋ uruŋini kuŋgui möta miangörenök uruŋini melengetmö, mötket, nöŋön sutŋine asuhaba kinda Jonagö ahakmemenŋi oŋgita ahakzal. Mewö ahakzalmö, iŋini töndup nesampurek ak niŋgimakze.

Miangöra Niniwe ambazipnöŋ jimtekötekögö nalö ketanŋe ambazip kambu ki kinjei, embuk öröröŋ kömupnöhök wahöta enġö qöhöröŋine mohotŋe kinme. Mohotŋe kinda Niniwe yeŋön keu kewö enġö silenine alme, ‘Iŋini Suep

* 11:29: Mat 16.4; Mak 8.12 * 11:30: Jona 3.4 * 11:31: 1 Kin 10.1-10; 2 Hist 9.1-12 * 11:32: Jona 3.5

gölmegö azi ölni nesampurek ak wangetka Anutunöŋ likepni melen engii sihimbölo öngöngöni mötme.' Niniwe yeŋön mewö jigetka ahakmemeninan nanŋini könaŋamŋini indelgetka gamuŋini mötme." Mewö.

Kiwa mi asakŋi neŋgimapköra ahöza.

Mat 5.15; 6.22-23; Mak 4.21-23

³³*"Kunŋan lambe me kiwa ohotiriba köwe wanŋömŋe me kimbutnöŋ qahö almapmö, mi mönö mianŋö dum tatatnöŋ alma. Mewö ali tosatŋan miri uruŋe öngöbingö mötzei, yeŋön mianŋö asakŋi eka ölop öngöme.

³⁴Göhö jegi mi uru silegahö kiwanŋi akza. Mianŋöra kawöl kunöŋ jegi qahö mem böliŋa ewö, mianŋön mönö tohoba asarim teköi Anutugö asakŋan ölop uruge mem asariiga malmalgi pakpak asakŋe malman. Asakŋe malmanmö, sihim kömbönaŋi bölöŋan me yuai kunŋan jegi mem böliŋa asakŋi közambötza ewö, mianŋön silegö malmalgi mewöyök mem söŋauiga pandaman uruŋe jipjap malman.

³⁵"Mewö aiga mötnöŋ, söŋaupnöŋ urugahö asakŋi közamböri söŋaubapuköra mönö tihitki möta galöm mem anŋuman.

³⁶Mewö aknöŋga Anutugö asakŋan urugi körek dop köli wanŋömŋi kun qahö söŋauza ewö, göhö silegan mönö mewöyök ason-kilik-kilikŋambuk aka jemesoholgan asariza. Kiwa ketaŋan silege kuŋguba kölköl-bilikbilikŋambuk mem asarim gihizawi, malmalgi mönö mianŋö dop Anutugö asakŋe al teköba malman." Mewö.

Urumeleŋgö silesile tandököra 'Yei!' jiiga 6 ahök.

Mat 23.1-36; Mak 12.38-40; Luk 20.45-47

³⁷Jisösnöŋ keu mi jim teköi Farisi (Köna keugö kapaŋkölköl) azi kunöŋ kewö jiba köl öröm wanŋiyök, "Gi ölop nöngö mire öngöba tata nene nembin." Mewö jiiga anda öngöba nene nemamgö tarök.

³⁸Mutuk böröŋi qahö saŋonŋa eta tarökmö, Farisi azinöŋ silik mi eka welipköyök.

³⁹Welipköiga Kembunöŋ kewö jii mörök, "O Farisi inŋini mönö ölna amöt qem anŋubingöra qambi aka al nenegö silenŋi saŋonŋ yakömazemö, nanŋini uruŋinan mönö tölohoza. Mi dogo jimamonŋ aka qewölonŋ mianŋön kokolak qei malje.

⁴⁰"O inŋini, uruŋini qahö. Kunöŋ silenŋi pakpak miwikŋaiyöhi, yanŋön mönö uruŋi mewöyök miwikŋaiyök me qahö? Inŋini mönö wuanöŋgöra uru likepŋanŋöra taŋqaŋ akze? Mi qahö dop kölja.

⁴¹Mianŋöra yuai kiwi al nenenöŋ tatzawi, mi mönö kalema ambazip wanapŋi engime. Mewö aketka Anutunöŋ amöt qem engii engöreŋ yuai pakpak mönö sarakŋi ahöma." Mewö.

⁴²*"O Farisi ambazip, lömböt qakŋine öngözawanŋöra mönö wöliköba 'Yei!' jizal. Inŋini nene pakpak mendenŋa bahöŋi 10 mianŋöreŋök mohot Anutugö buŋaya qemakze. Gipŋi, supe aka yöha könaŋi könaŋi mi mewöyök menŋenŋa tenöhök mohot mi Anutugö buŋa qemakze. Naluk mi törörök alakzemö, Köna keugö kötni bohonŋi ki mönö onŋgita mosörakze: Gi Anutu uru könömgan jöpaköm wanŋiman aka ambazip sutŋine ahakmeme diŋdiŋi wuatangöba malman. Keu bohonŋi mi mönö kapaŋ köla wuatangöba malme aka keu morömorö mi mewöyök kude onŋgita mosötme.

⁴³"O Farisi, lömböt qakŋine öngözawanŋöra mönö wöliköba 'Yei!' jizal. Inŋini köuluk mire dum tatat mutukŋe jegep tatpingö sihimŋi mörakze. Maketnöŋ me könanöŋ ambazip engeketa jölöŋini jimegö mörakze.

* **11:33:** Mat 5.15; Mak 4.21; Luk 8.16 * **11:42:** Lew 27.30

44 O inini, lömböt qakñine öngözawañgöra wölköba ‘Yei!’ jizal. Inini qaksiri qetñini qahö miangö dop akze. Ambazipnön qamöt wörönñambuk denike ahözawi, mi qahö möta qakñine lanlan tiba yuai dönqizinñambuk oseiba tölohomañke.” Mewö.

45 Jisösnön keu mewö jiiga Köna keugö böhi yengörenök kunñan möta melenja kewö jiyök, “Böhi, gi keu mewö jiba nini mewöyök gamu qem nenqizan.”

46 Mewö jiyökmö, Jisösnön keu kewö jiyök, “O Köna keugö böhi, engö qakñine mewöyök lömböt öngözawañgöra wölköba ‘Yei!’ jizal. Inini keuñi keuñi jim kutuba miangö könjön lömbötñi ambazip qakñine alagun algetka mi tem kölbingö lömböriiga jarañbarañ ahakzemö, nanñinak i kesötñinan borom kun bauköm engibingö wösömötmötñini kun qahö ahöza.

47 “O inini, lömböt qakñine öngözawañgöra mönö wölköba ‘Yei!’ jizal. Inini kezapqetok ambazip yengö qaksirinön simen kouw memba meñölömakzemö, nanñini ambösakonñinan mönö i enguget kömuget.

48 Nanñini ambösakonñinan kezapqetok ambazip enguget kömugetka inini yengö qaksirinine kouw memba simen alakze. Mewö aka mianjön ambösakonñini yengö ahakmemegöra imbi köla keuñini nanjöba jiba dangunu ewö kinje.

49 “Miangöra Anutu, mötkutukutu Tonji yanön kewö jiza, ‘Nönön kezapqetok ambazip aka aposol melaim engibi engören kame. Kagetka yengörenök tosatñi i enguget kömume aka tosatñi sesewerowero ak engime.’

50 “Anutunön Sup gölme miwikñaim etkiyöhi, nalö miangörenök könahiba kezapqetok ambazip engugetka sepñini mokoget eri, miangö sep kitipñi pakpak mi ambazip merak maljei, mönö engö qakñine öngöi sihimbölö mötme.

51 *Abelgö sepñan eri miangörenök könahiba enguba kota mala Zekaraia jöwöwöl alta aka jöwöwöl jike kömbukñi mietkö sutñire qeget sepñi eri miangören teköyök. Nönön keu kewö jibi mötme: Sepñinangö kitipñan mönö ambazip merak maljei, engö qakñine öngöiga sihimbölö mötme.

52 “O Köna keugö böhi inini, lömböt qakñine öngözawañgöra mönö wölköba ‘Yei!’ jizal. Inini Anutugö mötmöt membingö nanju ki moröñi mi ambazip enguanqita angön köl engimakze. Nanñinak miangö uruñe qahö angotket aka tosatñan miangö uruñe angotpingö akzei, inini i jöhöba angön köl engiba malget.”

53 Jisösnön keu mewö jiba mosöta ani Köna keugö böhi aka Farisi yanön könahiba keu könöñambuk jim wanqiba keu könañi könañi jimapkö qeqesi gwötpuk al wanqiget.

54 Al wanqigetka numbuñeyök keu kun qiwitipköiga mianjön köpeiba keugö bötaknön örömapköra mönöget. Mewö.

12

Urumelenjö silesile malmalgö galöm meme keu

Mat 10.26-27

1 *Jisösnön keuñi jiiga nalö sutñe miangören ambazip tausenni tausenni yangören tokoba ölöqölököba utakutal anguba kinget. Mewö aka kingetka könahiba gwarekurupñi kewö jii mötket, “Yuai mutukñi ki: Inini mönö Farisi (Köna keugö kapañkölköl) yengö urumelenjö silesile ahakmemenjanangöra galömñini meme. Mi wösö kömbukñi ewö akza. Mi qahö mosötme ewö, mianjön mönö yist ewö qariba mem bölim engima.

2 * “Ambazipnön yuai önun meget ahözawi, mi pakpak mönö kötulgetka

* 11:51: Jen 4.8; 2 Hist 24.20-21 * 12:1: Mat 16.6; Mak 8.15 * 12:2: Mak 4.22; Luk 8.17

aukne ahuma. Mewöñanök keu asambötket ahözawi, mi pakpak mönö indelgetka möt kutume.

³ Miangöra mönö keuñinanö galöm memba malme. Inini keu söñaupnön ölon jimei, mi mönö asakne jigetka mötme. Inini miri uruñe wanögmñi kungen sanepnön kezapñine jimei, mi sobemñön aukne jim asarime.” Mewö.

Dagöra keñgötnini mörin dop köлма.

Mat 10.28-31

⁴ “Alaurupni nöñön engöra kewö jibi mötme: Tosatñan silenini qem kömumba mianö andöñe yuai kun toroqeba akingö osimei, yengöra mönö keñgötnini kude möta malme.

⁵ Mi qahöpmö, dagöra keñgötnini mötketka dop kölmawi, nöñön mi kondel engimam. Kun dañön kukösum memba engui kömugetka total engii könöp sianön gemei, yanöra mönö keñgötnini möta malme. Engöra keu mi kunbuk jizal: yanöra mönö keñgötnini möta malme!

⁶ “Tosatñan bekösöm (jöjöröm, ulisit) 5 mi toiya yahötñan söñgöroni memegöra alakzemö, Anutunön miengörenök mohok-kungö qahö ölum qeyök.

⁷ Anutunön köyan köñ engiba nörop jupñini pakpak mewöyök oyon teköba janöñini mötza. Ambazip engö söñgöroni mi bekösöm ulisit gwötpuk engongita öngöngöñi akza. Mianöra keñgötnini mönö kude möta malme.” Mewö.

Kraist jim miwikñaim me qañ köлма?

Mat 10.32-33; 12.32; 10.19-20

⁸ “Nöñön keu kun jibi mötket: Kunñan ni ambazip jeñine jim miwikñaim ningimawi, Suep gölmegö azi öñan mönö mewöñanök i Anutugö garataurup yengö jeñine jim miwikñaima.

⁹ Mewömö, kunñan ni ambazip jeñine qañ köñ ningimawi, nöñön mönö mewöñanök i Anutugö garataurup yengö jeñine qañ kölmam.

¹⁰ * “Kunñan Suep gölmegö azi öñi qetala keu jimawi, Anutunön mi ölop mosötmapmö, kunñan Uña Töroni ilita mepaqepaik akñawi, yanö sinöndokñi mi Anutunön qahö mosötma.

¹¹ * “Ambazipnön inini öroba keu jakeñine al engigetka köuluk miriñine me kiap premiö aka kantriñi kantriñi miengö kiñ kembu yengö jemesoholñine kinmei, nalö mianöreñ keuñinanö likepñi wani keuya denöwö jibinak mianö waimanjatñi kude mötme.

¹² Mi kewögöra: Inini keu jimei, mi Uña Töronan aua mianöreñök kusum engiiga jime.” Mewö.

Nepaqepalok azi pomñangö dopkeu

¹³ Ambazip kambu sutñineyök azi kunñan Jisösgö jiyök, “Böhi, iwiniran kömuiga gi mönö datnangö jinönga iwiniranöreñ börösamotñi mendenja ningima.”

¹⁴ Mewö jiyökmö, Jisösnön kewö melen wanöyök, “O azi, dañön etkö jimtekötekö toniri akñangöra kunöñ ningiyöha gölmeñiri mendenbilenak?”

¹⁵ Mewö jiba keu kewö toroqeyök, “Inap ainemalukuñinan awamñanök me keñmaleñ ahöbawak, malmalñinanö könañi mi mianöreñ qahö ahöza. Malmalñini qahö kewöta moneñ sukinapnön möndöme ewö, mönö ayuhume. Mianöra membagan mendingö nepaqepalok (gridi) pakpaköra mönö galöñini memba malme.”

* **12:10:** Mat 12.32; Mak 3.29 * **12:11:** Mat 10.19-20; Mak 13.11; Luk 21.14-15

16 Mewö jiba dopkeu kun kewö jii mötket, “Azi pomñi kun malök. Yanñon gölmeñe nene nupñi meiga töhötmöriam ketañi asuhuyök.

17 Mi asuhuiga uruñan kewö mötmöriiba jiyök, ‘Nöñgö köwe mirini mi morörökñi. Mianğöra padi gösöñi gösöñi, koñ kambuñi kambuñi, sehoñ böranñi böranñi mi mönö denikeañğoreñ tokobileñak? Mönö denöwö akñamto?’

18 Mewö jiba jiyök, ‘Mönö kewö akñam: Ni köwe mirini köndenña salupñe köwe miri ketañi ketañi memam. Mi memba nene töhötmöriamni aka sukiñapni pakpak mönö mianğoreñ qezaköbi tatma.

19 Mianğoreñ tariga nanañğöra kewö jimam: O gi simbawoñ! Töhötmöriamgi mönö awamñi qahö ahöm gihiza. Mianğöra mönö nene nem söñgaiba yambuñi yambuñi siyoñsayoñi qahö luhut memba ösöñ malman.’

20 Mewö jiyökmö, Anutunöñ kewö jii mörök, ‘O gi, urugi qahö! Nöñon nalögi ala jim teköba uñagi sunğem kianğoreñök goañgitpiga kömuman. Kömunöñga öroyuai pakpak buña qem añguba malnöñi, mi mönö dagö buñaya akñapto?’

21 “Kunñan nannañğöra ainemaluku guli dötnam yuai tokomakzapmö, Anutugö qöhöröñe urugö töhötmöriamñi qahö ahöm wañgizawi, yanğöra mönö lömböt ketañi mewö asuhuma.” Mewö.

Anutu möt nariba waimanjat kude akñe.

Mat 6.25-34

22 Jisösnöñ gwarekurupñi kewö jii mötket, “Mewö asuhumapmö, nöñon engöra kewö jibi mötket: Inñi gölmenöñ malmeañgö waimanjatñi mi kewö jiba kude akñe: Nini mönö wanat yuainöñ gumohom añgubinak aka wanatnöñ sileninañgö löñgötpinak?

23 Sileninañbuk maljei, mianñon bohonñi aiga opo kereñnöñ mönö mianğö nembö bapñe ahöza. Jeñinañbuk maljei, mianñon bohonñi aiga nenenöñ mönö mianğö nembö bapñe ahöza.

24 “Mönö koekoe nei engekñe: Mienñon nene köñi qahö qesin gilakze. Padi öñi qahö yandiba köwe miriñine qahö tokomakze. Yöha sihiñini mi qeköm nemi mirinöñ qahö alakze aka Anutunöñ mi töndup i gumohom engimakza. Ambazip engö söñgöroñini mi nei söñgöroñini enğonğita öñgöba ahöza. Mönö mi mötmöriget anök.

25 “Enğoreñök kunñan waimanjat aka mewö mianñon gölmenöñ mal-mawañgö nalöñi mi sömañi mohotkö dop mem toroqema me qahö? Mi qahöpmahöp!*

26 “Mewö aiga yuai morörökñi mewö akingö osime ewö, yuai tosatñi pakpaköra mönö denöwögöra waimanjat akeak?

27 *Inñi mönö jariñ jurañi aködammunñinañbuk mi engekñe: Mienñon opo söroñinañğöra möt qahö loñgalakze. Nup yuai tosatñi kun qahö memakze aka mi töndup kewö jibi mötket: Kiñ Solomonöñ goul silwöñi qeraköba malukuñi asoñ-bilikbilikñambuk löñgöta malökmö, yanğö malukuñi mi kiteñ soranjingö dop eksihimñambuk qahö ahöyök.

28 “Jariñ jurañi töhön mi merak gölmenöñ kösutnine ahöi uran kölgetka eri gila qezaköba ohoget jema. Mi töndup Anutunöñ jurañi mewöñi kun mi tok ölöpñanök meñölömakza. Mianğöra yanñon inñi mewöyök ölop esuhum engima. Inñi jariñ jurañi mianğö dop qahö akze. Anutunöñ köyan köl engimamgö mötzawi, sihimñi mianñon mönö yuai pakpak enğonğita öñgöza. O ambazip, mötnariñinan mönö wuanöñğöra morörökñi akza?

* 12:25: Tosatñan kewö melenña jize: Enğoreñök kunñan waimanjat aka mewö mianñon silenji wan fitkö dop toroqeba mem körimamgö osima. * 12:27: 1 Kiñ 10.4-7; 2 Hist 9.3-6

29 “Mewö aiga injini mewöyök malmalñinañgöra mötkurumkurum kude akñe. Mi aka lömböröba kewö jibepuk, ‘Nini mönö wani nene aka wani o nembinak?’ Mewö jiba uruñini mianğöreñ kude ala urueret aka urukönöpuk miwikñaibepuk.

30 Kantri dop urumelengö kopa yeñon yuai mewöñi pakpak buña qem anğubingö kapan köla urukönöp ahakze. Mi ahakzemö, injini nene opo yuaigöra mözöröñgöba osizei, Iwiñinan mönö mi möt teköza.

31 Mianğö urukönöp kude akñemö, mönö Anutugö bemtohoññon anğotpingö kapan kölme. Uruñini mianğöreñ alget ahöiga yañon mönö galöm köl engiba yuai mewöñi mi mewöñanök toroqem engima.” Mewö.

Buñanini Suepnöñ me gölmenöñ tokoinga dop kölja?

Mat 6.19-21

32 “O kambuni morörökñi, Iwiñinan bemtohoñ al engimamgö mötzawañgöra mönö keñgötñini kude möta malme.

33 Gölmegö moneñ inapñi mi kapan köla qeraköbepuk. Mianğöra yuai ahöm engizawi, mi mönö söñgöröñangö ala moneñ öröba bahöñi ambazip wanapñi kalemñinañgöra engime. Mewö aketka qetbuñañini guli dötnam ewö mi Suep mire ahöba sehiba kude qahöwakña. Moneñ gösöñini qainñi kun mi Suep mianğöreñ qahö bölime. Gurem jijilukut aka yoñgorö meme yeñon mönö eu öñgöba yuai mem bölibingö osime.

34 “Yuaigöra aködamunñi memba mötnöñ öñgözawi, mianñon miri kungen ahöiga göñon mönö urugi mewöyök mianğöreñ qekötahöba malman.” Mewö.

Urugwölö mala nup megetka dop kölma.

35 * “Injini mönö Anutugö nupñi membingöra jöjöröba opo söronñini jöhöm yaköba aködamunñinambuk kinda uruñinañgö kiwanan ohotirigetka jeiga malme.

36 * “Mi kianğö dop: Miri toni kun mi ambazip amemegö lömbuaññon kaba söñgaibingöra öröm wañgigetka anök. Mianğöreñ ani moröurupñan mire tata lilingömapköra jeñinan yaigep uba ‘Kiñsiñ-pañsan!’ jiba kapan köla mambötze. Mamböta malgetka yañon nalö mianğöreñ me mianğöreñ kañgota nañgunöñ qebawak, yeñon mönö mianğöreñök nañgu örögetka kotma. Injini mönö morö miengö dop aka jöjöröba malme.

37 “Kembunöñ lilingöba kaiga nup memeurupñi tosatñan urugwölö malgetka mewö miwikñaim engimawi, yeñon mönö simbawon akze. Nöñon ölña kewö jibi mötket: Yañon kañgota tokom engiba nene dumnöñ ali tatketka nene gumohom engimamgö jöjöröm anğuba welen qem engima.

38 Yañon ömbibiñe me miri awörañgöiga mianğöreñ lilingöi tosatñan urugwölö malgetka miwikñaim engimawi, yeñon mönö simbawon akze.

39 * “Gwölö malbingö keu ki mönö ölop mötmörime: Sunğem aiga kegwek azinöñ wanat nalönöñ me auanöñ kamawi, miri toñan mi mötpawak ewö, yañon mönö gwölö mala miriñi ölop galöm meiga qesiñda öñgömamgö osima.

40 Injini ‘Suep gölmegö azi ölñan nalö kianğöreñ qahö kañgotma,’ jiba mötmörime, yañon mönö nalö mianğöreñök kañgotma. Mianğöra injini mewöyök jöjöröba malme.” Mewö.

Nup azinöñ silekmalak mala ayuhuyök.

Mat 24.45-51

41 Jisösnöñ keu mewö jii Pitönöñ qesiyök, “Kembu, gi dopkeu ki mi neñgöra me ambazip tosatñi pakpak yeñgöra mohok jizan?”

* 12:35: Mat 25.1-13 * 12:36: Mak 13.34-36 * 12:39: Mat 24.43-44

⁴² Mewö qesii Kembunöŋ jiyök, “Nup meme ambazip sutŋine danön tin kutuba tosatŋi enŋonŋitza? Tosatŋan sörörauba nup mosötketka kunŋan mötkutukutu ölöpnangö qakŋe kapan köla pöndaŋ memakzawi, yaŋön mönö simbawon akza. Miri tonŋan ahakmemeŋi kewöta eka kungen anda mirinangö öröyuaiŋi mi yaŋgö böröŋe ali galöm akŋa. Galöm aka welenqegeurupŋi jiyöhanŋö dop köyan köla nalö diŋdiŋe gumohom enŋimakŋa.

⁴³ Mewö köyan köl enŋiba maliga tonŋan lilingöba kaba mewö eka mönö simbawon jima.

⁴⁴ “Nöŋön keu ölni kun kewö jibi mötket: Tonŋan simbawon jiba sukinapŋi pakpakö galömŋi kunŋum waŋgima.

⁴⁵ Kunŋum waŋgimapmö, nup meme okonŋi yaŋön uruŋan mötmöriba kewö jima ewö, ‘Kembunangö kaka nalöŋan mönö köröpŋi ahöza.’ Mewö jiba könahiba nup meme ambazipurupŋi enŋum ureiba közölömbuanŋ ala söŋgaiba o köhöikŋi nembra uruŋi sohoiga enŋololonŋ silekmalek aka malma.

⁴⁶ Mewö mala nalö kunöŋ Kembuŋi kaŋgotmapköra qahö mambötmawi, mönö mianŋöreŋ kaŋgotma. Nalögöra ikmaok inululunŋ mali mönö aua mianŋöreŋ kaŋgota qeba yayapaleleŋ mem waŋgiba jim kutuiga qeŋetal ambazip ewö könöp sianöŋ geba sihimbölö mötma.

⁴⁷ “Nup meme kunŋan Kembunangö jitsihitŋi möt yaköyökmö, keu areŋi jiyöhanŋö dop qahö jöjöröm anŋuba nupŋi memba malöhi, Kembunŋan mianŋö likepŋi jiiga jöhöba ihileknöŋ ambemŋi gwötpuk qeaköba qeme.

⁴⁸ Mewö qememö, nup meme azi kunŋan Kembunangö jitsihitŋi qahö möt yaköba yuai aka meiga likepŋi ölop jiget ihileknöŋ qemeangö dop akzawi, Kembunöŋ mianŋö likepŋi jiiga amqeqeŋi qeme. Anutunöŋ kungöra yuai gwötpuk waŋgiyöhi, yaŋön mönö mi mem sehiiga ölni gwötpuk ahumapköra al mambötma. Anutunöŋ kungöra yuaigö warökŋi sehisehiŋi al waŋgiyöhi, yaŋön mönö mi mem sehiiga ölni sehisehiŋi ahui melenŋ waŋgimapköra qes-ima.” Mewö.

Jisösnöŋ könöp bölam memba eri denök.

Mat 10.34-36

⁴⁹ “Nöŋön gölmenöŋ könöp ala ubi jemapköra etpiga urusihimni mianŋö bölamŋan lök jeyöhanŋöra ahöza.

⁵⁰ *Ahözapmö, mi ‘Ala umam,’ jibi sihimbölö gwötpuk mi nöŋgö qakne öngöba mösölumgöm niŋgimangö akŋa. Anutunöŋ mewö mianŋön melun murutŋi mem niŋgima. O ni wahöjalinŋ ketanŋi möta malbi mem niŋgi mianŋöreŋ teköma.

⁵¹ Kewö mötmöribepuk: Jisösnöŋ luai qemangöra aka gölmenöŋ erök. Nöŋön kewö jibi mötket: Nöŋön luai qemangöra qahöpmö, nöŋgöra aka jula denŋetka köŋ jabö ahuma.

⁵² “Mi kewögöra jizal: Nöŋgö Buŋa keunan ambazip uruŋini kunŋui melenŋerangöra nalö kewöŋeyök könahiba kewö asuhuma: Miri kungö uruŋe ambazip 5 yeŋön sutŋine anŋururuk aka julme. Likep karöbut yeŋön yahöt yetpuk anŋururuk aketka likep yahöt yetköŋ karöbut yembuk jujul aka malme.

⁵³ *Iwi morö yetköŋ jula kerök-kerök ahotka nam morö yetköŋ tötal anŋuyohotka iranŋan iranŋi qetala julmahot.” Mewö.

Nalö maljini, mi möt kewötme.

Mat 16.2-3

⁵⁴ Jisösnöŋ toroqeba ambazip kambu yeŋgöra kewö jii mötket, “Wehön gegene miri böuleiba kousu töwiiga inini mi eka mianŋöreŋök ‘Kie kama,’ jimakze. Mewö jigetka kama.

⁵⁵ Saut görökenök luhut giliga eka möta kewö jimakze, ‘Miri könöpñambuk akña.’ Jigetka miangö dop akña.

⁵⁶ O urumelenjö silesile ambazip, inini suep gölmegö tandökñiri eka kie wehöngö könajiri ölop kewörakzemö, nalö ki maljini, miangö könaji qahö kewöta möt kutugetka qahö dop kölja.” Mewö.

Anjururukñini mindiñgögetka solanima.

Mat 5.25-26

⁵⁷ “Inini ‘Yuai diñdiji mi denöwö akin,’ jiba miangö könaji mi denöwögöra aka nanñinak qahö kewöta jim tekömakze? Mi qahö dop kölja.

⁵⁸ Kerökan silege ala keu jakeñe öröm gihimangö aiga jimtekötekö galömgöreñ anda köna namñe miangöreñ mönö kapan köla imbi mohok aka keuñiri jim solanimahot. Mewö qahö akñahot ewö, kerökan ölop örörahöm gihiiga (jas, majistreit) jimtekötekö tonangö jeñe angotnöñga möta jii opotöröpökö böröñe genöñga kösö mire al gihibapuk.

⁵⁹ Nöñön kewö jibi mötnöñ, Gi miangöreñ töwagi pakpak almanangö dop qaköba tatman. Toiyagi kondikñi mewöyök al teköbagun mönö töwagi memba etman.” Mewö.

13

Uruñini melenget me kömumba ayuhuget.

¹ Nalö miangöreñök tosatñan kangota Jisös kösohot kewö jiget mörök, “Galili ambazip tosatñan Jerusalem jikenöñ jöwöwöl ohogetka premiö Pailötnöñ jiiga suahö galömurupñan miangöreñ öngöba engum kömugetka sepnini eta lama bulmakau sepninambuk lolonqalon ahök.”

² Mewö jigetka melenja kewö jii mötket, “Inini miangöra kewö mötmöribepuk: Galili ambazip mienön Galili ambazip tosatñi pakpak engongita siñgisöndok aka malgerangöra sihimbölö mi mötket.

³ Mewö qahöpmö, nöñön kewö jibi mötket: Inini uruñini qahö melenme ewö, inini körekñan mönö mewöyök ayuhum teköme.

⁴ Me miri qetñi Siloam miangöreñ miri köröpñi kunñan eta köla ambazip 18 turum engii kömugeri, inini yengöra kewö mötmöribepuk: Yenön Jerusalem könagesö tosatñi pakpak engongita siñgisöndok aka keuñinambuk malget.

⁵ Qahöpmö, nöñön kewö jibi mötket: Inini uruñini qahö melenme ewö, inini körekñan mönö mewöyök ayuhum teköme.” Mewö.

Muli ip gorosonñangö dopkeu

⁶ Jisösnöñ dopkeu kun kewö jiyök, “Azi kunñan muli ip kömöri nupñe kota kini miangö ölni jarumangö anökmö, kun qahö miwikñaiyök.

⁷ Qahö miwikñaiba nup galömnangöra jiyök, ‘Mötnöñ, nöñön muli ip kiangö ölni yambu (yara) karöbutkö dop kaba jaruyalmö, kun qahö miwikñaial. Miangöra mi mönö wuanöngöra toroqeba gölmegö kelökñi önewat öroi sihitñanök akapuk. Miangöra mi mönö köla gilmöñ anma.’

⁸ Tonñan mewö jiyökmö, galömnöñ melenja jii mörök, ‘O azi kembuni, mi ölop mosötnöñga yambu (yara) ki kunbuk kinma. Nöñön nalö sutñe kiangöreñ kinoñnöñ gölme esiba kundupköba isonbasoñ ala liliköbi kelökñambuk akña.

⁹ Nöñön mewö akiga yambu (yara) andöñe miangö ölni ölop ahubawak. Mi qahö ahuma ewö, mi ölop kölman.’ ” Mewö.

Jisösnöñ Sabat kendonöñ ambi kun mem ölöwahök.

¹⁰ Jisösnöñ Sabat kendonöñ köuluk miri kunöñ öngöba Buña keu kusum engiyök.

11 Mianğoreñ ambi kun tarök. Ömenöñ yambu (yara) 18 mianğö dop mem löwörim wanğiiga köniseñi milipköiga qötöteimangö osiba tata malök.

12 Jisösnöñ ambi mi eka oholi kaiga kewö jii mörök, “Ambi, eksekpeksek kawölğan mönö gömosöri ölöwakzan.”

13 Mewö jiba böröñi nöropñe ali mianğoreñök qötöteiba Anutu möpöseim wanğiyök.

14 *Möpöseim wanğiyökmö, Jisösnöñ Sabat kendonöñ ambi mi mem ölöwahöhi, köuluk mirigö galömñan mi eka mianğöra möri bölü keu könahiba ambazip kambu yeñğöra jiyök, “Nup memegö nalö 6 ahözawi, mianğoreñ mönö kaba mem ölöwak engimapköra jime. Mi Sabat kendonöñ qahö.”

15 Mewö jiyökmö, Kembunöñ melenđa kewö jiyök, “O urumelenğö silesile ambazip! İnini pakpak bulmakau azinini me donkinini mi Sabat kendonöñ mireyök pösata enguangitketka onöñ anda nemakze me qahö? Engöreñök kunöñ mi qahö anğön köl engimakza.

16 Mötket! Ambi kianğön Abrahamğö gwölönaröha aiga Satanöñ jöhöm wanğii yambu (yara) köröpñi 18:gö dop maliga nöñön kösöñi mi Sabat kendonöñ pösatpi dop köl engiza me qahö?”

17 Mewö jiiga tuarenjonurupñi pakpak yeñön gamunini mötket aka ambazip kambu pakpak yeñön anğöletot wewelipñambuk meyöhi, mi pakpak eka möta söñgaiget. Mewö.

Nejon kötñangö dopkeu

Mat 13.31-32, 34; Mak 4.30-32

18 Jisösnöñ dopkeu kun kewö jiyök, “Anutugö bemtohoñangö könañi mi denöwö? Mi wanatpuk dop albilenak?”

19 Mi nejon kötñangö dop kewö akza: Azi kunñan mi memba nupñe anda esiiga wahöta qariba ip ahök. Ip aiga könakemba neñi neñi mienñön aipñini ip mianğö böröñe alget.” Mewö.

Yistkö dopkeu

Mat 13.33

20 Jisösnöñ dumñe kunbuk dopkeu kun kewö jiyök, “Anutugö bemtohoñi mi wanat yuaibuk dop albilenak?”

21 Mi yist me flaua mem qarigarigö dop kewö akza: Ambi kunñan ‘Beret ohomam,’ jiba yist memba flaua könde karöbut mianğoreñ mindiriba melenqelen aka anda anda tari körekñanök qariyök.” Mewö.

Mönö nanğu giwikñe jaram tiba anğotme.

Mat 7.13-14, 21-23

22 Jisösnöñ anda taonñi taonñi aka mirinji mirinji mianğoreñ Buña kusum engiba anda mala Jerusalem sitinöñ göröken anök.

23 Ani kunñan kewö qesim wanğiyök, “Kembu, urunini melenğet Anutunöñ amöt qem engii letotmei, mi ambazip awamdökña me denöwö?” Qesim wanğii kewö jii mötket,

24 “Inini mönö nanğu giwikñe anğotpingö jaram tiba aum-mörime. Nöñön kewö jibi mötket: Ambazip gwötpukñan Anutugö bemtohoñ uruñe anğotpingö esapkömömö, mi osime.

25 Könañep miri tonñan wahöta nanğu köligun inini nalö mianğoreñ könahiba yaigep kinda nanğunöñ qeba kewö jime, ‘Kembu, mönö nanğu öröm nenginöñ.’ Mewö jigetka melenđa kewö jii mötme, ‘Ni qahö möt engizal. İnini denikeğöra, mi qahö mötzal.’

* 13:14: Eks 20.9-10; Dut 5.13-14

26 Mewö jiiga injini miangörenök könahiba kewö jime, 'Neñön mönö göbuk köisirik tata nene nein. Göñön mönö liliköba neñgö sombemnöñ Buña kusum neñginöñ.'

27 *Mewö jimemö, yanñon keu kewö jima, 'Injini denikeañgöra, ni qahö möt engizal. Miangöra kewö jibi mötket: Bölöñi meme pakpak, injini mönö nömosöta kesalget.'

28 **"Kesalgetka miangören Abraham, Aisak, Jeikob aka kezapqetok ambazip pakpak yanñon Anutugö bemtohoñ uruñe kingetka engekñemö, nannjini aköm engigetka yaigep kinme. Könañini mewö miwikñaiba sahöt gigilahöba irimñini yöhözömgögetka qetñi qeri malme.

29 Ambazipñi ambazipñi mi wehön kotkotñeyök aka gegeneyök aka likep-likep Not Saut miangörenök kaba Anutugö bemtohoñnöñ angota dum tatatñini memba nene nem söñgaip aka malme.

30 *Mewö malmemö, mötket! Qöndökñi yenğörenök tosatñan mutukñi akñe aka mutukñi yenğörenök tosatñan qöndökñi akñe." Mewö.

Kiñ Herodnöñ kiam soñ miangö dop akza.

Mat 23.37-39

31 Nalö miangörenök Farisi (Köna keugö kapankölköl) tosatñan Jisösgören kaba kewö jiget, "Kiñ Herodnöñ guhui kömumangö mötza. Miangöra mönö miri ki mosöta anman."

32 Jigetka kewö melenñ enğiyök, "Injini mönö arökñañgö kiam soñ mi kewö jiget mötma, 'Mötnöñ! Nöñön merak aka uran ömewöröme enğuatañgömam aka kawöl ambazip mem ölöwak enğiba malmam. Anmami, uruwale mönö miangören angota nupni mekömam.'

33 "Kezapqetok ambazip sehisehñi mi Jerusalem sitinöñ enğugetka kömuget. Miri tosatñe qahö toroqeba enğuget kömumakze, miangö tandöktandök ahöza ekzal. Miangöra nöñön merak aka uran uruwale köna anda malmam. Jerusalem anğotpiga nuñguget kömumam ewö, mönö yenğören aiakanjina mi toroqeba akñe." Mewö.

Jisösnöñ Jerusalem sitigöra sahörök.

Mat 23.37-39

34 Jisösnöñ jiyök, "O Jerusalem Jerusalem, injini kezapqetok ambazip enğuget kömugetka Anutunöñ ambazip melaim enğii enğören kamakzei, mi kötnöñ kumbuköm enğimakze. Poi namñan moröurupñi ginginñi bapñe ala köjöjohom enğimakzawi, nöñön miangö dop nalöñi nalöñi göhö könagösöurupki suhuba tokom enğimangö möta malalmö, injini mi tököba mala kotket.

35 *Mötket! 'Anutunöñ mönö jike mirinñini andö qeiga sahopñanök ahöma.' Mewö ahömappmö, nöñön kewö jibi mötket, injini ni kunbuk qahö nekñemö, könañep nalö kun kam kuñgui miangören neka kewö jime, 'Kembugö qetñe kam neñgizawi, Anutunöñ mönö i kötuetköm wañgima.' Mewö."

14

Jisösnöñ kawöl azi kun mem ölöwahök.

1 Jisösnöñ Sabat kendon kunöñ Farisi (Köna keugö kapankölköl) yenğö jitñememe kungö mirinñe öñgöba nene neyök. Nemba tari tosatñan galöm memba ektiget.

2 Miangören yanğö jemesoholñe kawöl azi kun köna böröñi onöñ ölököba qarñi tarök.

* 13:27: Sum 6.8 * 13:28: Mat 22.13; 25.30 * 13:28: Mat 8.11-12 * 13:30: Mat 19.30; 20.16; Mak 10.31 * 13:35: Sum 118.26; Jer 22.5

³ Jisösnöñ i eka könahiba Köna keugö böhi aka Farisi mi qesim engiba kewö jiyök, “Sabat kendonöñ azi mem ölöwak wanğiba mewö mianjön Köna keu onğitpin me qahö?”

⁴ Mewö jiyökmö, yeñön göröñ qeba tatket. Tatketka böröñan azi mi misiriba mem ölöwaka melaii anök.

⁵ *Ani kewö jii mötket, “Engöreñök kungöreñ morö me bulmakau aziñi mi Sabat kendonöñ o lömnöñ gema ewö, mi mönö ösumok örögetka kotma. Dañön mi qahö öröi kotpawak?”

⁶ Mewö qesim engii miangö likepñi melenbingö lömböriba numbuñini muhungöba bök tatket. Mewö.

Jisösnöñ sile mem-öñgö-öñgö mi qetalök.

⁷ Farisi (Köna keugö kapañkölköl) azinöñ ambazip nenegöra köl öröm engiyöhi, yeñön dum qaikñe eu meköba tatkeri, Jisösnöñ mi eka miangöra dopkeu kun kewö jii mötket,

⁸ *Kunñan gi amembitkö lömbuanğöreñ köl öröm gihii miangöreñ anda dum jegenneyök qahö memba tatman. Mewö akñan ewö, tosatñi köl öröm engiyöhi, yeñgöreñök kunñan gi goñgita qetbuñañambuk akapuk.

⁹ “Yañön kañgoriga lömbuan toñan göhöreñ kaba kewö jibawak, ‘Gi dum ki mosötnöñga öñgöñgöñi yañön tatma.’ Mewö jima ewö, gi mönö wahöta bapñe emu eta dum memba tata gamugi senjombuk mötpanbuk.

¹⁰ Mewö qahöpmö, kunöñ köl öröm gihimawi, gi ölop dum siminñe emu anda tatman. Mewö tatnöñga lömbuan toñan kota geke jima, ‘Alani, gi ölop kaba dum jegenñe eu anda tatman’. Mewö jiiga göñön ambazip göbuk tata nene nezei, mönö körek yeñgö jeñine qetbuñagabuk akñan.

¹¹ *Mi kewögöra: Nanñini uruñini memba öñgömei, Anutunöñ i körek memba et al engima. Kunñan nanñi uruñi memba etmawi, Anutunöñ mönö i memba öñgöba al wanğima.”

¹² Farisi (Köna keugö kapañkölköl) azinöñ ambazip köl öröm engii lömbuanñöñ tatketka Jisösnöñ lömbuan toñi lilingöba eka kewö jii mörök, “Gi silingö me sunğemgö lömbuan kun ohoba miangöreñ nangi alaurupki me darumunurupki mi kude köl öröm engiman. Tinitosolomurupki me miri kasunñanğö ambazip pomñi qetbuñañinambuk mi kude köl öröm engiman. Mewöñi lömbuanğöra köl öröm enginöñi, i mewöñanök köl öröm gihiba tosa gi mi meköm gihiget teköma. Mewö akñan ewö, Anutunöñ mönö miangö töwanji qahö gihima.

¹³ “Mewö qahöpmö, lömbuan mözözömgöba ohomani, gi mönö ambazip etqegeñi mia köl öröm engiman. Ambazip wanapñi, simalokon aka jegömöl akzei, mönö mia engoholnöñga dop kölma.

¹⁴ Mi köl öröm enginöñga yeñön tosa meköm gihibingö osigetka gi miangöra simbawon aka malman. Tosanini mi öne ahöi malnöñga solanñi yeñön kömupnöhök wahötketka nalö miangöreñ Anutunöñ nanñak mi göhöra meköm gihima.” Mewö.

Lömbuan ali möndömöndö keu jiba tököget.

Mat 22.1-10

¹⁵ Jisösnöñ mewö jiiga nene memba tatket yeñgöreñök kunñan mi möta kewö jii mörök, “Kunöñ Anutugö bemtohoñ uruñe anğota nene memba tatmawi, nöñön yañgöra simbawon jizal.”

¹⁶ Mewö jiiga kewö melenñök, “Azi kunñan sunğemgö lömbuan ketanji mözözömgöba ohoba ambazip gwötpuk öröm engiget kamegöra jiyök.

* 14:5: Mat 12.11 * 14:8: Qam 25.6-7 * 14:11: Mat 23.12; Luk 18.14

¹⁷ Lömbuan nalöni kam kungui welenqeqeni kun melaii köl öröm engimamgö jiyöhi, yengören andi jii mötket, ‘Yuai pakpak lök mözözömgöinga ahöza. Miangöra mönö ölop kame.’

¹⁸ Jii mötketmö, mi möta yenön körekmakörek könahiba yuai tosatne möndöba tököget. Mutuknan jiyök, ‘Ni arö kun söngöröni mealangöra miangören andi eknamgö mötzal. Mianön jöhöm ningiza. Miangöra ölop andi jinönga möta kude möt bölim ningima.’

¹⁹ Kunnan jiyök, ‘Ni bulmakau aziñi 10 söngöröni meali, mi kösönöñ ilikñine jöhöbi kinöñ örögetka andi nup esapköba qeba qindipkömam. Mianön jöhöm ningizawangöra ölop jinönga möta kude möt bölim ningima.’

²⁰ Kunnan toroqeba kewö jiyök, ‘Ni ambi urandöpki bohonñi mealangöra kamamgö osizal.’

²¹ “Mewö jigetka welenqeqenöñ lilingöba azi kembunangöra buzup mi jii mörök. Möta urunji könöp jeiga welenqeqeni kewö jim kutum wangiyök, ‘Gi mönö wölan taongö köna namne aka sombemnöñ andi ambazip etqeqeni, wanapñi, köna böröñiñi titingitñi, jegömöl aka simalokon ambazip mi mönö enguanqitnöñga lömbuan miri urunje ki kame.’

²² Jiyöhanqö dop ak teköba kaba kewö jiyök, ‘Kembuni, jim kutum ningizananqö dop akzalmö, dum tinji tok ahöza.’

²³ “Mewö jiiga azi kembunöñ jiyök, ‘Gi mönö könanöñ aka rowonqeqenine andi ambazip tat anjei, mi kapan köla kunqum enginöñga lömbuan miri urunje kanqota kokolak qeme.’

²⁴ Nöñön kewö jibi mötket: Ambazip mutuk köl öröm engimamgö jiali, yengörenök kunnan kun nöngö lömbuanñöñ qahö kanqota namba nahömñi mötma.’ ” Mewö.

Jisösgö gwarek malmalgö könanji

Mat 10.37-38

²⁵ Jisösnöñ ani ambazip kambu ketanji yenön wuatangöba angetka lilingöba kewö jii mötket,

²⁶ * “Kunnan nömbuk kaba malmam jiba ni göragöra al ningiba iwinamñi, anöm-moröñi, darumunñi, nenbehötñi aka nanñi malmalñi mewöyök jegep ala jöpakömakzawi, yanön mönö nöngö gwarekni aknamgö osima.

²⁷ * Sisitñini megetka kunnan ni nuatangöba sihimbölö möta maripomnöñ kömumamgö qahö jöjörömawi, yanön mönö nöngö gwarekni aknamgö osima.

²⁸ “Engörenök kunnan miri köröpñi memamgö mötza ewö, yanön mönö mutuk eta tata moneñi miri mem tekömawangö dop akza me qahö, mianqö könanji kewöta ek kutuma.

²⁹ Mewö qahö aka miri tandöñi kömöta mi mem tekömamgö köhököhöñi qahö ahöm wanggiiga mosöri öne kiniga ambazip pakpak mi eka könahiba jiji-ilit jiba mepaik wangibepuk.

³⁰ Mewö ak wangiba kewö jibepuk, ‘Azi mi könahiba mirinji meyökmö, mi mem tekömamgö qahö köhöiyök.’ Mianqö dop Jisös wuatangöman me qahö, mi törörök kewöta möt kutuman.” Mewö

³¹ Jisösnöñ keu mi toroqeba kewö jiyök, “Mewöyök kinji azi kembu kunnan kinji kunbuk arönda ‘Bim qemam,’ jiba denöwö akña? Yanön zilanök kerök qahö al wangimapmö, mutuk jembonurupñi öröm tokom engii tata qamban keu kewö eraum mötme, ‘Nanine aziurupnini 10.000 maljin aiga likepne kerökurupnini mi 20.000 malje. Azi kembuninan i enguanqita kaget engeka ölop köhöiba engubin me qahöpto?’

* 14:26: Mat 10.37 * 14:27: Mat 10.38; 16.24; Mak 8.34; Luk 9.23

³² ‘Qahö köhöibin,’ jime ewö, yañön kerök kiñnönj köröwen tariga miangöreñök jitmemeurupñi melaim engii yangöreñ anda luai qebingö goro eraum mötme.

³³ Mewöyök engöreñök kunñan yuai pakpak ahöm wangizawi, mi jegep almawañön mönö nongö gwarekni akñamgö osima. Miangöra mönö nia jegep al niñgigetka dop kölma.” Mewö.

Howe nahömñi qahö mi yuaia omanji kötökñi.

Mat 5.13; Mak 9.50

³⁴ “Howe mi ölöñji akzapmö, sihimñi mosötma ewö, mi mönö denöwö möhamgöinga kunbuk sihimñambuk akawak?

³⁵ Nesak omanji mi gölme kelökñambuk akñapköra tokoba isonbasonj alakz-inmö, howe nahömñi qahö mi yuai kungöra qahö dop kölma. Qahö! Mi mönö önewat gölmenönj gilinga geba öne töhöntöhön ahöma. (Gi mewöñanök nongö gwarekni aka kembraje kutuba nömosötman ewö, mönö yuai omanji akñan.) Kunñan kezapñambukñönj malja ewö, yañön mönö keu mi möt kutuma.” Mewö.

15

Lamanönj sohyök, miangö dopkeu

Mat 18.12-14

^{1*} Takis tilipqilip aka megeri aka singisöndok ambazip tosatñi mi jesöngöñan Jisösgö Buñanji mötpingö kaget.

² Mewö kagetmö, Farisi aka Köna keugö böhi yeñön Jisösgöra uruñinan böliiga irikuruk keu kewö jiget, “Azi mianñön singisöndok ambazip engimemba yembuk tata nene neza.”

³ Mewö jigerangöra Jisösnönj dopkeu kun kewö jii mötket,

⁴ “Engöreñök kungö lamaurupñi 100 malgetka miengöreñök kunñan sohoba janjuñ aniga toñan denöwö akña? Yañön mönö 99 mi gölme qararanökölñe engömosöta anda mohot janjuñ anöhi, miangö jaruba anda mala miwikñaiiga teköma.

⁵ Miwikñaiiba urusösöngai aka awötñe ala kama.

⁶ Mire kaba alaurupñi aka tosatñi kösutñe malmei, mi engoholi tokogetka kewö jii mötme, ‘Lamani sohyöhi, mi lök miwikñaiizalagöra mönö nömbuk sösöngai akin’

⁷ Nöñön kewö jibi mötme: Miangö dop singisöndok azi mohotñan uruñi melenmawi, yangöra Suep mire sösöngai ketanji asuhuma. Ambazip 99 nanñine jeñine solanñi diñdiñi aka uruñini melenbingö qahö möta maljei, yeñgöra sösöngai mewöñi qahö asuhuma.” Mewö.

Moneñ kötñi sohyök, miangö dopkeu

⁸ “Mewöyök ambi kunñan silwö moneñ kötñi 10 memba maliga miengöreñök mohokñan geba sohoiga denöwö akña? Yañön mönö kiwa ohotiriba kapan köla miri usunja jaruma. Jaruba mala miwikñaiiga teköma.

⁹ Mi miwikñaiiba ambi alaurupñi aka ambi tosatñi kösutñe maljei, mi engoholi tokogetka kewö jii mötme, ‘Nongöreñ soujenji mohotñan sohyöhi, mi miwikñaiizalagöra mönö nömbuk sösöngai aki.’

¹⁰ Miangö dop nöñön kewö jibi mötme: Singisöndok ambazip kunñan uruñi melenniga Anutugö garataurupñi yeñön miangöra sösöngai öngöñgöñi akñe.” Mewö.

Nanñi imbi-imbini azinöy kumkanjam aka imbiñi melenök.

¹¹ Jisösnönj toroqeba kewö jiyök, “Azi kungö nahönyahötñi yahöt malohot.

* 15:1: Luk 5.29-30

12 Munjan iwiŋaŋgöra kewö jiyök, 'Iwini, gi mönö monen sukinapki mendenä nönögö bahöŋi niŋgiman.' Mewö jiiga öröyuaini pakpak dopŋire mendenä etkiyök.

13 Mi etkiiga nahönŋi moröŋan sömaŋi yahöt karöbut mala inap yuaini pakpak mi kölöhoba memba kantri kungen anök. Miangöreŋ anda nanŋi imbi-imbi aka köna ketani ambi yembuk kiam bau ewö söŋaup malmal mala monen inapŋi gil teköyök.

14 "Yuai pakpak gil teköiga bödi (buörö) ketani asuhaba gölme pakpak mi dop kölök. Yaŋön nalö miangöreŋ könahiba öngöpŋi aka osiyök.

15 Osiba kantri miangö toni kungöreŋ anda nupköra qesim waŋgiiga melaii yaŋgö bau selŋe geba bau galömŋina malök.

16 Miangöreŋ mali bau yeŋön sokop köŋŋi neget eka 'Ölöp mi nemi gölömni dop kölöbawak,' jiyökmö, mi mewöyök kunjan qahö waŋgiyök.

17 "Mewö mala uruŋi ahuiga kewö jiyök, 'Iwinanögö nup ambazip wanat awanŋi yeŋön nup megetka söŋgörüŋi enŋii nene nem timbireŋ aka maljemö, nöŋön kiangöreŋ uzukörörap aka bödi mala kömumamgö akzal.

18 Ni mönö wahöta iwinanögöreŋ lilingöba anda kewö jibi mötma, 'Iwini, ni siŋgisöndok memba mianön gi aka Suep Toni qetal etkiba qetki mem böliäl.

19 Miangöra göŋön kunbuk nöŋgöra 'Nahöni,' jimananögö dop qahö akzal. Gi ölöp jinöŋga welenqeŋega kun akŋam.'

20 "Mewö jiba wahöta iwiŋaŋgöreŋ anök. Anda mala miri dopdowii iwiŋan tikep endu kinda ehi kaiga wösöŋi pöröraköiga ehoriba ösumjan diŋdiŋgöba anda imbiŋe gili geiga numbuŋi yöhötim namba 'Nahöni, owe owe!' jiyök.

21 Mewö ahökmö, nahönŋan jiyök, 'Iwini, ni siŋgisöndok memba mianön gi aka Suep Toni qetal etkiba qetki mem böliäl. Miangöra göŋön kunbuk nöŋgöra 'Nahöni,' jimananögö dop qahö akzal.'

22 "Mewö jii iwiŋan miangöreŋök welenqeŋeurupŋi kewö jii mötket, 'Inini mönö ösumok maluku aködamunŋambuk kun memba kaba löŋgöt waŋgiget. Ila jalö imbiŋe köla meŋölöm waŋgiba köna esu könaŋe löŋgöt waŋgiget.

23 Mewöyök selnöŋ anda bulmakau döŋŋi kelökŋambuk kun memba kaba qeba ohogetka namba söŋŋgai albin.

24 Nahöni ki kömum taköyöhaŋön mönö kunbuk guliba kaza. Yaŋön lök sohoigun Anutunöŋ kunbuk miwikŋaiiga asuhum tiŋgitza.' Mewö jiiga könahiba söŋŋgai alget.

25 "Söŋŋgai algetmö, datŋan nupnöŋ mala lilingöba miri dopdowiba miangöreŋ liŋet gwawet köla unduba söŋgaigeri, miangö kourukŋi mörök.

26 Mi möta welen morö kun qeri kaiga 'Mi denöwögöra akze?' jiba qesim waŋgiyök.

27 Qesim waŋgiiga kewö jiyök, 'Mungan lilingöba kaiga iwiŋan i kunbuk meiga unditundit aiga miangöra jiiga bulmakau döŋŋi kelökŋambuk qeba ohoba söŋgaize.'

28 "Mewö jiiga irimŋi seholiiga mire öŋgömamgö tököyök. Tököyökmö, iwiŋan mi möta yaigep eta uruluai keu ösöŋ jiba mölöwörim waŋgiyök.

29 Mölöwörim waŋgiyökmö, yaŋön melenä kewö jiyök, 'Iwini, nöŋön yambu gwötpuk welengi qeba mala jimkutukutugi nalö kunöŋ qahö onŋita malalmö, töndup göŋön nalö kunöŋ meme (noniŋ) moröŋi kun alaurupni yembuk söŋŋgai albingöra qahö niŋginöŋ.

30 Qahö niŋginöŋmö, nahöŋi kianön köna ketani ambi yembuk mala monen inapki ayuhaba kaŋgoriga göŋön mönö yaŋgöra aka jinöŋga bulmakau döŋŋi kelökŋambuk qeba ohoze.'

³¹ “Jiiga iwiñan kewö jii mörök, ‘Nahöni, gi nalö dop nanambuk malakzan. Mianğöra nani buñani pakpak mi mönö göhö buñaya mohok akza.

³² Mohok akzapmö, mungi kianön kömum taköyöhañön kunbuk guliba kaza. Yanön lök sohoiga Anutunöñ kunbuk miwikñaiiga asuhum tiñgitza. Mianğöra dölki nene sösöñgai alinga dop kölja.’ ” Mewö.

16

Sukinap galöm tilipqilipñambukö dopkeu

¹ Jisösnöñ gwarekurupñi keu kun kewö jii mötket, “Azi pomñi kungö sukinap galömñi kun malök. Tosatñan kaba azi pomñi mi luasö keu jiget mörök, ‘Yanön göhöreñ moneñ inapki köndennda lañ gila malja.’

² Mi möta galöm mi jii kaiga jim wañgiyök, ‘Ni göhöra buña bölöñi jiget mötzal. Gi nöngö miri aka sukinapni kunbuk galöm kölmanañgö dop qahö akzan. Mianğöra mi denöwö galöm köla malnöñ, mianğö löpötñi jim asarim niñgiman.’

³ Mewö jiiga uruñan kewö mötmöriyök, ‘Miri toñan galömkölköl nupni noañgiri denöwö akñamto? Ösumni qahö dop köljawañgöra gölme esimangö osizal aka ulet azi malmangö gamuni mötzal.

⁴ Yanön galömkölköl nupni noañgitmawi, nöñön nalö mianğöreñ denöwö akiga tosatñan miriñine köl öröba köyan köl niñgibeak? Aha! Köna kun mötmörizal.’

⁵ “Mewö jiba ambazip toñan tosa al engiyöhi, mi pakpak nannik nannik öröm engiiga kaget. Mutukñan kaiga yañgöra kewö jiyök, ‘Tonañgöreñ tosa göhöreñ dawik ahöza?’

⁶ Mewö qesiiga jiyök, ‘Oil dram 100 meal.’ Mewö jiiga kewö meleñnök, ‘Gi tosa papiagi memba ki tata ösumok uteköba 50 ohonöñga ahöma.’

⁷ Mewö jiba azi kun qesim wañgiyök, ‘Aka gi? Göhöreñ tosa dawik ahöza?’ Qesiiga kewö jiyök, ‘Wit flaua mi 21.000 kilogram meal.’ Mewö jiiga jiyök, ‘Gi tosa papiagi memba mianğöreñ 16.800 kilogram mewö ohonöñga ahöma.’

⁸ “Mewö aiga miri toñan möta jim-ölöwak keu kewö jiyök, ‘Galömnan tilipqilip qakñe yuai ahöhi, mi mötkutukutu ölöpñi kondelja.’ ” Kembu Jisösnöñ kösohot mewö jiba toroqeba jiyök, “Söñaupkö ahakmeme wuatañgömakzei, yeñgö mötkutukutuñini mi ambazip tosatñi merak maljei, mi tilipqilip ak engiimeañgö dop ahözapmö, Anutugö asakñe maljei, yeñgö mötkutukutuñini mi mianğö bapñe akza.

⁹ “Mianğöra kewö jibi mötket: Tosatñan gölmegö moneñ inapnöñ ambazip tilipköm enjimakzemö, enñön mönö mianñön memba alaurup miwikñaim enjime. Mi miwikñaim engigetka gölmegö yuainöñ qahöwakñawi, Anutunöñ mönö nalö mianğöreñ köl öröm engiiga malmal köhöikñi mire añgota teteköñi qahö malme.

¹⁰ “Kunñan yuai morörökñi memba kapan köla törörök galöm köljawi, yanön mönö yuai ketañi mewöyök törörök galöm kölma. Kunñan yuai morörökñi galöm köla kitik-katuk akzawi, yanön mönö yuai ketañi mi mewöyök galöm kölmapkö jiinga kitik-katuk akña.

¹¹ Gölmegö moneñ inapñi böröñine algetka mi pöndañ qahö galöm kölgetka öñi qahö asuhuyök ewö, kunñan mönö yuai buñañi öñgöñgöñi öñi mi böröñine qahö alma.

¹² Injini tosatñi yeñgöreñ yuai mi pöndañ qahö galöm kölgetka öñi qahö asuhuyök ewö, nannini uruñinañgö buña öñi mi dañön kun enjibawak?

13 **“Welenqeçe kunjan kembu yahöt welen qem etkimamgö osimakza. Kunjan mewö akñamgö mötzawi, yañön mönö kun kazik ak wañgiba kun urunan jöpaköma. Kungören qekötahöba kun jijiwilit ak wañgima. Miangöra enön Anutu aka monen inap mi mindiriba welen qem etkibingö osime.”* Mewö.

Monengö urukönöp akepukö goro keu

Mat 11.12-13; 5.31-32; Mak 10.11-12

14 Farisi (Köna keugö kapankölköl) yeñön monengö nahöm gwötpuk ahöm engii malgerangöra Jisösnöñ keu pakpak mi jiyöhi, mi möta je misiba ilit wañgiget.

15 Iilit wañgigetka kewö jii mötket, “Farisi enön mönö ambazip jeñine solanni tandök kondel engibingö könöpuk ahakzemö, Anutunöñ uruñinangö könañi möt kutum teköza. Ambazip jeñine yuai kungöra mötketka öngöngöñi akzawi, mi Anutunöñ ehi imbilonñambuk ahakza.

16 **“Bemtohongö könañi mi Mosesgören Köna keunöñ aka kezapqetok ambazip yeñgö Buzup Kimbiñine ohogetka oyonda mala koringa Jonöñ asuhuba ölni aukñe indelök. Nalö miangörenök könahiba keu mi jim sehiba Anutugö bemtohone angotmegöra ambazip uruñini kuñgumakzin. Ambazip köreknan mönö jaram tiba kapan köla bemtohoñ miangö uruñe angotpingö ahakze.*

17 **Suep gölmenöñ göröñ qemahotkö dop akzahotmö, Köna keugö kulem jönbölanñi mohok-kun mi nalö kungen qahö kötökñi ayapköma. Mewö.*

18 **“Azi kunjan anömñi mosöta ambi kun memawi, yañön mönö qesabulum akña. Azi kunjan ambi apñan mosöröhi, mi memawañön mönö mewöyök qesabulum akña.”* Mewö.

Azi pomñi aka Lazarus

19 “Azi pomñi kun malök. Yañön opo maluku gugakgugak pisikñi aködamunñambuk löngöta mala nalö dop nene söngaip aka siyoñsayoñi qahö malök.

20 Mewö malökmö, yañgö miri nañguni kösutñe azi wanapñi kun qetñi Lazarus ahöba malök. Uzi nömböñnöñ silenñi dop köla tarök.

21 Wösöñi aliga gwarönöñ ahöba azi pomñangö tebolnöhök nene irip boromñi eri mia nemamgö mörök. Möta ahöiga kiam yeñön kañgota uzi nömböñi bözöba malget.

22 “Mewö mala wanapñi yañön kömuyök. Kömui Suep garata yeñön wañgita öngöba Abrahamgö qöhöröñe alget tarök. Azi pomñi yañön mewöñanök kömuiga löm kölget.

23 Löm kölgetka kömupkö senjom mire geiga jem sölöngöi sihimbölö ketanji möta ui öngöiga Lazarus Abrahamgö qöhöröñe köröwen endu tari etkehök.

24 Etkeka silata qeta jiyök, ‘O iwini Abraham, mönö wösögi möt niñgiman. Ni könöp bölamnöñ nohoi kiangören wahöjalij öngöngöñi möta kinjal. Miangöra mönö Lazarus melainöñ anda kesöt suñan onöñ kusahöla kaba nesilamne mirii amörima.’

25 “Mewö jiyökmö, Abrahamnöñ melenök, ‘Nahöni, mönö ki mötmörinöñ anök. Göñön gölmenöñ malmal sösongainambuk lök malnöñ teköyökmö, Lazarusnöñ gölmenöñ malmalñi qemjem-mamjenñ aka malök. Mewö malökmö, nalö kewöñe urukölalep ak wañginga tatzapmö, göñön sihimbölö möta wahöjalij qakñe kinjan.

26 Mewö maljin aiga toroqeba kewö jizal: Anutunöñ nini aka inñi sutnine mendenñda jabö al köhöii ahöza. Miangöra tosatñan jabö qösököba neñgörenök

* 16:13: Mat 6.24 * 16:16: Mat 11.12-13 * 16:17: Mat 5.18 * 16:18: Mat 5.32; 1 Kor 7.10-11

engörej kangotpingö mötpeak, mi mönö osime. Mewöyök likep endu maljei, enön mewöyök nenngörej yuhu kangotpingö qaköme.'

²⁷ Mewö jiiga kewö jiyök, 'Iwini, mewö aiga kewö ulet gihizal: Göjön mönö Lazarus melainönga iwinangö mire anma.

²⁸ Miri miangörej darumunurupni 5 maljei, yejön mewöñanök senjom miri kiangörej eta sihimbölö ketanji mötpepek. Miangöra mönö jinönga anda kezapqetok keu jii mötme.'

²⁹ "Mewö ulerökmö, Abrahamnöñ jiyök, 'Qahö! Mosesgö Köna keu aka kezapqetok ambazip yengörej Buzup Kimbi mi yengö bunaya ahöza. Keu mia mönö kezap ala mötme!'

³⁰ Mewö jiiga kewö jiyök, 'O iwi Abraham, mewö qahöpmö, kömukömuñi nenngörejök kunñan yengörej anbwak, mewö mönö uruñini melenbeak.'

³¹ Jiiga Abrahamnöñ kewö jii mörök, 'Yejön Moses aka kezapqetok ambazip yengö keugöra kezap qahö alje ewö, mewöñanök kömukömuñi nenngörejök kunñan wahöta keu jibawak, yejön mönö töndup Anutu qahö möt narim wangibeak.' Mewö.

17

Singisöndokö kölgrom mönö qetal engime.

Mat 18.6-7, 21-22; Mak 9.42

¹ Jisösnöñ gwarekurupni keu kewö jii mötket, "Bölönangö supatitikan mönö awamñanök asuhumakza. Kunöñ supatitik angön kölmamgö osimakzäpmö, kun danön tosatni kölgrom ak engiiga singisöndok akñei, yangöra mönö wöziköba 'Yei!' jizal. Sihimbölö öngöngöñan mönö yangö qakñe öngöma.

² Yanön ambazip moröñi yengörejök kun kölgrom ak wangiiiga singisöndok akñawi, azi mianön mönö lömböt öngöngöñi miwikñaima. Anutunöñ lömböt miangö likepni denöwö wangiiiga dopñe akawak? Kemun jamönjin jölñe jöhöba köwet röndumnöñ gilget mulungöi gebawak, mianön mönö awamñi ahum wangii tandök akawak.

³ *"Miangöra mönö nanñini galömñini mem anguba malme. Alagi kunñan singisöndok akzawi, i mönö jim mindin ak wangiman. Jim mindin ak wanginönga möt bölim anguba wösöñi mötma ewö, gi mönö singisöndokni mosöt wangiman.

⁴ Wehön kungö uruñe singisöndok 7 ak bölim gihiba indimñi 7 göhörej lilingöba kewö jima, 'Alani, ni singisöndok akzalanğöra möt bölim anguzal.' Mewö jima ewö, gi mönö singisöndokni mosöt wangiman." Mewö.

Mötnaripkö ölni mi kukösumñambuk.

Mat 17.20; 21.21; Mak 11.23

⁵ Aposol yejön Kembugöra jiget, "Mötnaripnini mönö toroqeba mem köhöiman."

⁶ Mewö jigetka Kembunöñ melepñök, "Mötnaripñinangö ölni mi nejon kötnangö dop ahöbawak ewö, enön ölop nömozup ip* kianğöra kewö jim kutubeak, 'Gi mönö jöla jalögabuk wahöta luhuba köwetnöñ geba nangi kömöta kinman.' Mewö jiba möt narigetka ip mianön mönö keunini tem kölma." Mewö.

Welenqeqe ölopñi mi denöwö?

⁷ "Engörejök kungö nup azinöñ bulmakau memba nupnöñ anda kinöñ öröi gölme mesinma me lama galömñina malma. Mala mire kangori miangörej tonñan kewö jii mötma me qahöpto, 'Gi mönö mire kota tata nenegi neman.'

* **17:3:** Mat 18.15 * **17:6:** Jisösnöñ mulberi ip kun kondelök. Ip mi nömozup ewöya, kötni köuruk (köwörörök) kötni ewö neneja.

⁸ Mewö qahö! Yanön mönö kewö jima: ‘Gi mönö o ariba möhamgöm anguba sunjemgö nenenamni ohoba ala ninjinöy nemam. Miangö andöje nangi nenenamgi ohom neman.’

⁹ Mewö jim kutum wanjiiga nup aziñan jiyöhangö dop nupñi mem teköi dop köliga galömñan miangöra möpöseim wanjima me qahö? Qahö!

¹⁰ Engö könanini mi mewöñanök ahöza. Galömñinan yuai pakpak jim kutum engiyöhi, inini mi ak teköba miangöreñ kewö jime, ‘Nini nup ambazip töhöna maljin. Galömninan yuaigöra jiyöhi, mönö miyök memba kazinanğöra möpömöpösei jarubingö osizin.’” Mewö.

Jisösnöy azi 10 silenini mem solaniyök.

¹¹ Jisösnöy Jerusalem sitinöy anmamğöra Galili aka Samaria prowins yahöt mietkö sutñire köna ahöyöhi, miangöreñ anök.

¹² Könanöy anda miri kunöy angoriga azi 10 silenini uzikukunambuk yeñon miwikñaiba eka tikep endu kinget.

¹³ Kinda köhöikñanök qeta jiget, “Ketanamnini Jisös, mönö neğğöra ak kömum gihima!”

¹⁴* Qeta jigetka engeka kewö jii mötket, “Inini mönö jike nup galöm yeğğöreñ anda silenini kondel engime.” Mewö jiiga tem köla könanöy angetka sileninan miangöreñ solaniba ölöwahök.

¹⁵ Ölöwahökmö, 10 yeğğöreñök kunñan silenii solanii eka lilingöba kaba Anutu köhöikñanök qeta möpöseiyök.

¹⁶ Möpöseiba Jisösgö könañe geba sipköba simin köla ‘Saiwap!’ jiyök. Azi mi Samaria azia. Juda yeñon Samaria prowinsgö ambazip yeğğöra mötketka eretñi ahakzapma.

¹⁷ Saiwap! jiiga Jisösnöy melenđa jiyök, “Mi ölop akzanmö, azi pakpak 10 engö sileninan lök solanim teköyök me? Azi 9 mienön mönö denike malje?”

¹⁸ Kian azi göñon nangik lilingöba kaba Anutu möpöseizanmö, azi 9 yeñon mönö anda nönöngan akze.”

¹⁹ Mewö jiba kewö jii mörök, “Mötnaripkan mönö mem ölöwak gihiza. Mianğöra ölop wahöta anman.” Mewö.

Anutugö bemtohoñi mi denöwö asuhuma?

Mat 24.23-28, 37-41

²⁰ Farisi (Köna keugö kapankölköl) yeñon Jisös kewö qesim wanjiba jiget, “Anutugö bemtohoñi mi mönö wanat nalönöy asuhuma?” Jiget möta melenđa kewö jiyök, “Anutugö bemtohoñan mönö jeninan ekinangö dop qahö asuhuma.

²¹ Mötket! Anutugö bemtohoñi mi sutñine uruñine asuhuba ahöza. Mianğöra mi kianğöreñ me enduyanğöreñ ahözawi, mewö jibingö osimakzin.”

²² Jisösnöy gwarekurupñi kewö jii mötket, “Könañep nalö kun kam kunğumawi, mianğöreñ Suep gölmegö azi ölñangö nup meme wehönñi miengöreñök kun ekingö ak engimapmö, mi kunbuk ekingö osime.

²³ Nalö mianğöreñ kewö jiget mötme, ‘Mötket! Amötqeqe Tonan mönö endu malja. Mötket! Mönö ki asuhuza.’ Mewö mewö jigetka i ekingöra mianğöreñ ösumok kude luluhuba anme.

²⁴ Mi kewögöra: Suep gölmegö azi ölñan kunbuk kamawi, nalö mi wölbilikö dop kewö akña: Mi suep likepñeyök zilañ biliksik ala asariba likepñe dop köla anjawi, yanön mönö mianğö dop asuhuma.

²⁵ Könañep mewö asuhumapmö, mutuk ambazip nalö kewöñe gölmenöy maljei, yeñon azi mi yaköriba andö qem wanjigetka sihimbölo ketanji mötma.

* 17:14: Lew 14.1-32

26 **“Mönöwök Noagö nalöne ambazipnöñ malmalñini qemasolokep qakne mala ayuhugeri, miangö dop mönö Suep gölmegö azi ölnan kunbuk kamawanö nalöne mewöyök asuhuma.*

27 **Noagö nalöne nene lömbuan ala o köhöikñi nempa ambi kenam bohonangö alget anda kaiga angömeget. Ahakmeme mewö aka memba qemasolokep malgetka Noanöñ wanje urune öngöyöhi, silim miangören teköyök. Teköiga o göulu ketanjan kaba ambazip jinonñi qahö löm köl engii o nemulahöba kömuget.*

28 **“Lotkö nalöne mewöyök qemasolokep malgetka mewöñanök asuhuyök. Ambazipnöñ nene lömbuan ala o jawat nempa nup köl kömöta jike mirinñi memba qeköm nemi ala yuai bohonñi memegöra algetka yuai tosatñi bohonñi memba malget.*

29 *Mewö aka memba malgetmö, Lotnöñ Sodom miri mosöta aniga wehön miangörenök könöp aka köt sömsöm könöpñambuk mi mönö kie ewö suepnöhök eta ambazip jinonñi qahö engohoi kömuget.*

30 *Könanjep Suep gölmegö azi ölnan kunbuk asuhumawi, nalö miangören ambazipnöñ mewöñanök qemasolokep aka mala ayuhume.*

31 *“Silim miangören sombemnöñ malmawanön mönö inap yuainñi memangöra miri urune kude öngöma me nupnöñ anda malmawanön mönö mewöñanök mirinje kude lilingöba kama.*

32 *Lot anömñan melenja andöñe uba kömumba köt ahöhi, mönö mi mötmörime.*

33 **Kunñan malmalñi siyonñsayonñi qahö nanñangöra angön köla nanñi imbi-imbi malmangö mötzawi, yangö malmalñan mönö sohomapmö, kunñan malmalñi nöngöra aka köleñniga sohomawi, yanön mönö malmal ölnangö könanñi miwikñaiba oyaenköyaen malma.*

34 *“Nöñön kewö jibi mötket: Sunjem miangören azi yahöt dumnöñ mohotñe ahöyohotka yetkörenök kun wangita kun mosötme.*

35 *Mewöyök ambi yahöt mi mohotñe tawen urasiba (bunahöba) tatmahori, yetkörenök kun wangita kun mosötme.”*

36 *(Azi yahöt nupnöñ malohotka yetkörenök kun wangita kun mosötme.)*

37 *Jisösnöñ mewö jiiga gwarekurupñan melenja jiget, “O Kembu, mi denikeangören asuhuma?” Mewö jigetka kewö jii mötket, “Sömbup gisakñan kungen göröken ahömawi, manu köraraknöñ mönö miangören öröba tokomakzei, mönö miangö dop asuhuma.” Mewö.*

18

Malönöñ kapan köla uleriga azi ketanjan bauköyök.

1 *“Inini mönö nalö dop Anutu köuluköba qemalokolip qahö aka malme.” Jisösnöñ mewö jiba miangö dopkeunñi kewö jii mötket,*

2 *“Taan kunöñ keu jimtekötekö azi kun malök. Yanön ambazip yengö keugöra gamunñi qahö möta nanñi imbi-imbi mala Anutugö jitñi ongitpilenbuköra kengetñi qahö mörök.*

3 *Taan miangören malö ambi kun malök. Yanön sundan dop keu jimtekötekö azi miangören anda kewö jiba malök, ‘Kunñan nömbuk anjururuk akzawanöñ gönön ölop bauköm niñgibanak.’*

4 *“Mewö jiiga nalö köröpñi mi möta andö qeba malökmö, könanjep urunjan kewö jiyök, ‘Nöñön ambazip yengö keugöra gamuni qahö möta nani imbi-imbi mala Anutugö jitñi ongitpilenbuköra kengetñi qahö mötzal.*

* 17:26: Jen 6.5-8 * 17:27: Jen 7.6-24 * 17:28: Jen 18.20-19.25 * 17:33: Mat 10.39; 16.25; Mak 8.25; Luk 9.24; Jon 12.25

⁵ Mewö maljalmö, malö kianjon mönö keu söksök pöndañ jim niñgiba kamakzawangöra olan nöhöiga ölop bauköm wangibiga keuñi teköma. Qahö bauköm wangibileñak ewö, yañon mönö qösösök kaiga qeriqerini mötpileñbuk.’ ”

⁶ Kembunöñ kösohot mi mem teköba jiyök, “Jimtekötekö azi goñgoñan keu jiyöhi, mönö miangöra kezap ala könañi mötmöriget.

⁷ Anutunöñ ambazip nannangöra möwölöhöm enjgiyöhi, yeñon sun gem asak bauköm enjimapköra köulukögetka Anutunöñ mönö yeñgö keuñini kewöta jim teköi ölöwakñe. Bauköm enjimangö jiba tañqañ qahö aka nalö qahö könjörari öngöma. Mi qahöp mahöp!

⁸ Nöñon kewö jibi mötket: Anutunöñ mönö nalö kude köriiga keuñini kewöta jim teköi ölöwakñe. Wölañ bauköm enjimakzappmö, mi töndup Suep gölmegö azi ölnan lilingöba kaba ambazip kewöt enjimawi, nalö miangören mötnarip ölni miwikñaima me qahöpto?” Mewö.

Farisi aka takis meme yetkö köulukñiri

⁹ Ambazip tosatñan nanninangö mötket öngöiga solanñi diñdiñi akzin jiba tosatñi mötketka eretñi ahök. Jisösnöñ i engeka dopkeu kun kewö jii mötket,

¹⁰ “Azi yahötñan jöwöwöl jikenöñ öngöba köuluköyohot. Kunöñ Farisi aka kunñan takis meme azia.

¹¹ “Farisi (Köna keugö kapañkölköl) yañon kinda nannök kewö köuluköyök, ‘O Anutu, ambazip tosatñan uruñini goñgiiga kalöpmalöp aka sero yoñgorö ahakze, ni yeñgö dop qahö maljal me takis meme endu kinjawi, ni yañgö dop mewöyök qahö maljal. Miangöra saiwap jim gihizal.

¹² Nöñon sonda dop sömañi yahöt nenegö sinji malakzal. Nöñon moneñ inapni pakpak mendeñda 10:nöhök mohok Anutugö buñaya qemakzal.’

¹³ “Mewö köuluköyökmö, takis meme yañon wangömmñi kunöñ kinda Suepnöñ eu umangö gamuñi möta böröñan jeñi esuhuba kewö köuluköyök, ‘O Anutu, sinjisöndok azi ni mönö ak kömum niñgiman.’

¹⁴ *Nöñon kewö jibi mötme: Yañon mönö Anutugö jeñe solaniba miriñe lilingöyökmö, Farisi (Köna keugö kapañkölköl) yañon mewö qahö. Denike yeñon nannini uruñini memba öngömei, Anutunöñ mönö i körek memba et al enjimappmö, kunñan nannini uruñi memba etmawi, Anutunöñ mönö i memba öngöba al wangima.” Mewö.

Jisösnöñ nahönbörat kötuatköm enjgiyök.

Mat 19.13-15; Mak 10.13-16

¹⁵ Ambazip tosatñan nahönbörat morömorö mewöyök enjgungita Jisösnöñ böröñan enjimisirimapköra yañgören kaget. Kagetmö, gwarek yeñon mi eka jim qetal ak enjiget.

¹⁶ Mewö aketmö, Jisösnöñ nahönbörat mi köl öröm enjii kagetka kewö jiyök, “Nahönbörat moröñi mi ölop enjömosötketka nöngören kame. Anutunöñ ambazip mewö mia bemtohoñi buña qem enjgima. Miangöra i kude jöhöm enjgime.

¹⁷ Nöñon keu ölni kun kewö jibi mötme: Kunñan Anutugö bemtohoñi mi nahönbörat ewö buña qahö qem anjgumawi, yañon mönö miangö uruñe angotmamgö osima.” Mewö.

Jisösnöñ azi pomñi kungö qambañ keu jiyök.

Mat 19.16-30; Mak 10.17-31

¹⁸ Galömkölköl azi kunñan Jisösgören kaba kewö qesim wangiyök, “Böhi ölopñi, nöñon mönö denöwö aka malmal köhöikñangö buña qem anjgubileñak?”

* 18:14: Mat 23.12; Luk 14.11

¹⁹ Qesim wanjiiga kewö jii mörök, “Gi nongöra ‘Böhi ölopni’, mi wuanongöra jizan? Anutu mohotnan ölopni akza. Azi kunnan i ewö ölopni qahö akza.

²⁰ *Gi jöjopañ keu ki möt teközan, ‘Sero yongorö kude aknan, Ambazip kun kude qenöñ kömuma, Yongorö kude meman, Jitnöñ alal keu kude jiman, Iwinamgi mönö göda qem etkimaknan.’ ”

²¹ Mewö jiyökmö, galömkölköl azinöñ kewö jiyök, “Mi pakpak mönö gwaböneyök tem köla mala kotzal.”

²² Jii Jisösnöñ möta kewö jii mörök, “Mohot-kungöra kewö osizan. Gi mönö anda sukinapki pakpak söngöröñi memegöra alnöñ moneñ kaiga menjenja ambazip wanapni engiman. Mewö aknöñga sukinapki ketani (guli masapu, milyön kina ewö) mi Suep mire ahöm gihima. Mewö aka ni nuatanjöba kaman.”

²³ Mewö jiyökmö, azi mianön kindinbirik malöhanjöra aka keu mi möta wösöbirik aka jeñi asöliiga öne mosöta anök.

²⁴ Wösöbirik ahöhi Jisösnöñ mi eka kewö jiyök, “Yei! Ambazip moneñ inapninambuk yeñön mönö Anutugö bemtohoñnöñ angotpingö lömböriba kupuk-kapak akne.

²⁵ Mi kewö jim tuarimam: Sömbup ketani kamel mi kondi kinimne ölop qahö angotma. Mianjö dop ambazip pomni yeñön Anutugö bemtohoñ urune angotpingö lömböriba qaköme.”

²⁶ Keu mi jii mötkeri, yeñön kewö jiget, “Opopoñ! Ambazip danön mönö Suepkö bunaya akawak?”

²⁷ Mewö jigetka kewö melenök, “Ambazipnöñ mi esapköba osiba qakömakzemö, Anutunöñ mönö yuai pakpak ölop ahakza. Yanön yuai kun aka memangö qahö osiba qakömakza.”

Jisösgö nup memegö töwani

²⁸ Pitönöñ keu mi möta melenja kewö jiyök, “Mötnöñ, neñön mönö miri gölmenini mosöta gi guatanjöba kain.”

²⁹ Mewö jiiga Jisösnöñ kewö jii mötket, “Nöñön keu ölni kun kewö jibi mötme: Kunnan Anutugö bemtohoñanjöra aka yuai kun mosöröhi, - mi miri gölmenji, anöm-moröñi, darumunji me iwinamji - mi engömosoriga

³⁰ Anutunöñ mönö salupne toroqeba ongita likepni melen wanjiiga mi gölmegö malmalnöñ mema aka malmal könanjepne malmal köhöikni teteköñi qahö bunja qem anjuma.”

Jisösnöñ kömumangö keñi jiiga karöbut ahök.

Mat 20.17-19; Mak 10.32-34

³¹ Jisösnöñ gwarekurupni 12 mi öröm engii kagetka kewö jiyök, “Mötket, nini Jerusalem öngöbin. Kezapqetok ambazipnöñ Suep gölmegö azi ölnanjöra keu pakpak ohogeri, mi mönö ölnambuk ak teköma.

³² Kunöñ i mamalolo mem wanjiiga kian gawman yengö böröñine gema. Yeñön jijiwilit aka mepaiköba keu töhöreñ jim wanjiba söutkölap qeme.

³³ Söutkölap qeba ihilek wahinambuknöñ tauköm wanjiba qeget kömuma. Kömumba wehön karöbut aiga kömupnöñök wahötma.”

³⁴ Mewö jiyökmö, gwarek yeñön keu mi qahöpmahöp möt asariget. Keu jiyöhi, mi asa-asambötne ahöiga mi qahö möt kutuget. Mewö.

Jisösnöñ jegömöl azi kun mem ölöwahök.

Mat 20.29-34; Mak 10.46-52

³⁵ Jisösnöñ anda Jeriko mire dopdowiiga jegömöl azi kunnan nene moneñ wanjimegöra uleta köna jitne tarök.

* 18:20: Eks 20.12-16; Dut 5.16-20

³⁶ Tariga ambazip kambu könanöŋ onŋita angetka kourukŋini möta “Wanat yuai asuhuza?” jiba qesim enŋiyök.

³⁷ Qesim enŋiiga kewö jiget, “Jisös, Nazaret azinöŋ mönö könanöŋ kaba gonŋitmangö akza.”

³⁸ Jigetka kewö qerök, “Jisös, Deiwidkö gwölönarökŋi! Gi mönö ak-kömum ningiman!”

³⁹ Mewö qeriga ambazip mutuk angeri, yeŋön bök tatmapköra qetal wanŋigetmö, yaŋön kapaŋ köla qet gigilahöyök, “Deiwidkö gwölönarökŋi! Gi mönö ak-kömum ningiman!”

⁴⁰ Qet gigilahöiga Jisösnöŋ dörök ala kewö jim kutuyök, “I mönö böröŋe memba nöŋgöreŋ kame.” Jiiga memba dowe kaŋgotketka kewö qesim wanŋiyök,

⁴¹ “Alani! Gi mönö wani yuai ak gihimangöra mötzan?” Qesim wanŋiiga jiyök, “Kembu! Ni jeni kunbuk umangöra mötza!”

⁴² Jiiga Jisösnöŋ kewö jii mörök, “Mönö jegi unöŋ. Mötnariŋkan mönö mem ölöwak gihiza.”

⁴³ Mewö jiiga mianŋgöreŋök jeŋi tohoiga törörök uba Anutu möpöseiba Jisös wuatangöba andöŋe anök. Ambazip pakpak yeŋön yuai mi eka Anutu möpöseiget. Mewö.

19

Zakiusnöŋ uruŋi melenök.

¹ Jisösnöŋ Jeriko taonöŋ kaŋgota kutuba anmamgö ahök.

² Mianŋgöreŋ azi kun qetŋi Zakius malök. Yaŋön azi pomŋi aka takis meme yeŋgö jitŋememeŋina malök.

³ Yaŋön Jisösgö kaisoŋgolomŋi ekŋamgö ak wanŋiyökmö, azi töröptökŋaŋgöra ambazip kambu sutŋine kinda kököriba osiyök.

⁴ “Jisösnöŋ ki kaba neŋgonŋitma,” jiget möta ekŋamgöra ösumök anda ambazip enŋonŋita sikamore ip* qakŋe öŋgöba tarök.

⁵ Tari Jisösnöŋ mianŋgöreŋ aŋgota jeŋan ui öŋgöi eka yaŋgöra kewö jiyök, “Zakius, gi mönö ösumök etnöŋ. Ni merak göhö mire kabi mohotŋe tatpit.”

⁶ Mewö jiiga ösumök eta söŋgaiba köl öröm wanŋiiga miriŋe anohot.

⁷ Anohotka ambazip körekŋan mi eka irikuruk aka kewö jiget, “Mönö wuanöŋgöra siŋgisöndök azi mewöŋaŋgö mire öŋgöba tatza?”

⁸ Mewö jigetmö, Zakiusnöŋ ambazip sutŋine aukŋe wahöta kinda Kembugöra kewö jiyök, “Kembu mötnöŋ, nöŋön ainemalukuni bibiŋe mendeŋda likeŋi ambazip wanapŋi yeŋgöra enŋimam aka denike yeŋgöreŋ öröyuai kun dop onŋita tilipqilip aka wanŋirali, mi mönö ambemŋi 4:gö dop toroqeba melenŋa enŋimam.”

⁹ Mewö jiiga Jisösnöŋ yaŋgö könaŋaŋgöra kewö jiyök, “Anutunöŋ merak miri kianŋö tonŋi amöt qem wanŋi letotza. Yaŋön mewöyök Abrahamgö gwölönarökurupŋi yeŋgö sutŋine malja.

¹⁰ *Suep gölmegö azi ölnan mönö ambazip sohogeri, mi jaruba amöt qem enŋimangöra aka erök.” Mewö.

Moneŋ esu 10 mendeŋda enŋiyök, mianŋgö dopkeu.

Mat 25.14-30

¹¹ *Jisösnöŋ kaba Jerusalem siti dopdowiba keuŋi jii ambazip mi mötkeri, yeŋön kewö mötmöriget, “Anutugö bemtohoŋaŋgö ölnan zilaŋ asuhuma.” Mewö mötmörigerangöra Jisösnöŋ dopkeu kun kewö jiyök,

* **19:4:** Sikamore mi köwu ewöya, kötni neneŋa. * **19:10:** Mat 18.11 * **19:11:** Mat 25.14-30

12 “Azi qetbuñambuk kunñan kewö jiyök, ‘Ni mirini mosöta kantri kunöñ köröwen anbiga miangören ni kiñ kembu kunñum niñgigetka mala lilingöba kamam.’

13 Mewö gölme köröwen anmamgö jiba nup aziurupñi 10 engoholi kagetka moneñ esu 10 mendenja engiba kewö jiyök, ‘Nöñön anda mala bian lilingöba kamam. Enñön nalö sutñe kiangören moneñ kianñön kölköl-örörö nup memba mem sehime.’

14 Mewö jiba anökmö, könagesöurupñan kazik ak wañgiba kewö jiget, ‘Nini azi kianñön nanine azi kembu aka galöm köñ neñgimapkö töközin.’ Mewö jiba welen azi tosatñi melaim engiget andöñe anda buzup mi jiget mörök.

15 “Mewö mörökmö, töndup kantri anök, miangören yeñön i azi kembu kunñum wañgigetka nanñi prowinsnöñ kunbuk lilingöba kayök. Kaba nup aziurupñi moneñ esu engiyöhi, mi jiiga yañgö jeñe kañgotket. Mohot mohot yeñön kölköl-örörö nup memba moneñ mem sehigetka dawik asuhuyöhi, mi kondelget ekñangöra qesim engiyök.

16 Nup azi mutukñan jeñe kañgota jiyök, ‘Kembu, nöñön moneñ esugi mem sehibiga toroqeba kunbuk esu 10 miwikñaijal.’

17 “Mewö jiiga kewö jii mörök, ‘Mi ölop. Gi nup meme azi ölopñi. Gi yuai morörökñi memba mi kapañkapañ aka galöm köla malnöñga sehiyök. Miangöra nöñön taon gölme 10 mindiriba göhö böröge albi yeñgö galömñina malman.’

18 Mewö jiiga nup azi alañan jeñe kañgota kewö jiyök, ‘Kembu, nöñön göhö moneñ esugi mem sehibiga toroqeba kunbuk esu 5 miwikñaijal.’

19 Mewö jiiga yañgöra mewöyök kewö jii mörök, ‘Mi ölop. Nöñön taon gölme 5 mindiriba göhö böröge albi yeñgö galömñina malman.’

20 “Kunbuk kunñan kañgota jiyök, ‘Kembu eknöñ. Göhö moneñ esugi ki. Mi oponöñ esuhuba lolongöbi ahöyök.

21 Göñön azi könöpñambuk akzangöra aka göhöra keñgötni möta malal. Gi nangak inap yuai köwenöñ qahö alnöñi, mia töndup memamgö mörakzan. Gi nangak nene kötni qahö kömötnöñga asuhuyöhi, miangö ölni mi töndup yandiba memamgö mörakzan.’

22 “Mewö jiiga melenja kewö jim wañgiyök, ‘Gi nup azi bölöñi. Nangak keu jizani, nöñön miangö dop kewöt gihiba likepñi melen gihimam. Ni azi könöpñambuk akzal. Nanak yuai köwenöñ qahö ala mi memamgö mörakzal. Nanak nene kötni qahö kömöta miangö ölni mi töndup yandiba memamgö mörakzal. Mi ölop möta malnöñ.

23 Gi könani mewö mötagun mönö wuanöñgöra moneñ esuni mi benknöñ qahö alnöñga qariyök. Mi kölköl-örörö nupnöñ albanak ewö, miangöñ mönö sehiiga nöñön kaba suñambuk membilenak.’

24 “Mewö jiba azi kösutñe kingeri, mi kewö jii mötket, ‘Inini mönö yañgö böröñeyök moneñ esuni mi wañgita esu 10 miwikñaiyöhi, i wañgime.’

25 Jii möta kewö jiget, ‘Kembu, yañgören moneñ esu 10 mi lök ahözal!’

26 *Mewö jigetka melenja jiyök, ‘Nöñön kewö jibi mötket: Ambazip yuai ahöm engizawi, yeñgöra körek mönö mi toroqem engigetka sehimapmö, kungören yuai kun qahö ahözawi, morörökñi mia mönö mewöyök wañgitketka öne töhöñ malma.’

27 Mewö jizalmö, kerökurupnan nöñön kiñ kembu aka galöm köñ neñgimamgö tökögeri, i mönö enñuanñgita kagetka enñeka jim kutubi enñugetka kömume.’” Mewö.

* 19:26: Mat 13.12; Mak 4.25; Luk 8.18

*Jisösgöra köiran kölgetka Jerusalem öngöyök.
Mat 21.1-11; Mak 11.1-11; Jon 12.12-19*

²⁸ Jisösnöñ keu mi jim teköba mosöta Jerusalem sitinöñ öngömamgöra mutuk anök.

²⁹ Anda Betfage aka Betani miri yahöt kösutñire kaba kundunji qetñi Oil ip kundunji qerakzei, miangöreñ öngöba gwarekyahötñi yahöt melaim etkiyök. Melaim etkimamgö aka

³⁰ kewö jiyök, “Miri wösöñire tatzawi, mönö miangöreñ anmahot. Anda miangöreñ angota donki moröñi kösönöñ jöhöget kinjawi, mi miwikñaimahot. Donki mi dölökña, azi kunöñ qakñe qahö tatatña. Mi mönö pösata memba ki kamahot.

³¹ Pösarohotka kunñan ‘Mi wanigöra pösatzahot?’ jiba qesim etkiiga kewö jimahot, ‘Kembuniran miangöra osiza.’”

³² Mewö melaim etkiiga anda jiyöhangö dop miwikñaiyohot.

³³ Miwikñaiba donki moröñi pösatpitkö ahotka tonan jiget, “Hei! Donki moröñi mi wanigöra pösatzahot?”

³⁴ Jigetka kewö melenohot, “Kembuniran miangöra osiza.”

³⁵ Mewö jiba memba Jisösgöreñ kaba malukunini qeköba donki qakñe tumbula jigetka Jisösnöñ öngöba tarök.

³⁶ Mewö tata aniga ambazip kambu yeñön göda qeba opo malukunini qeköba köna namñe tumbulget.

³⁷ Tumbulgetka anda Jerusalem dopdowiba Oil ip kundunjangö sörokñe geiga gwarek kambu pakpak yeñön könahiba söngaiba anöletot pakpak kukösum qakñe mei ekeri, miengöra qet ketanji qeta Anutu möpöseim wanjiba

³⁸ *kewö jiba qetket, “Anutu möpöseizin. Kiñ Kembugö qetñe kamawi, Anutunöñ mönö i kötuetsköma. Luaigi aka qetbuñagi möpöseininga Suepnöñ euyangöreñ öngöza. Owe owe!”

³⁹ Mewö qetketka Farisi (Köna keugö kapankölköl) tosatñan ambazip kambu sutñine kinda kewö jim wanjiget, “Böhi, mönö gwarekurupki jim enjinöñ.”

⁴⁰ Mewö jim wanjigetka kewö melenök, “Nöñön kewö jibi mötme: Yeñön göröñ kinbeak ewö, köt yeñön mönö silata qetpeak.” Mewö.

Jisösnöñ Jerusalem sitigöra sahörök.

⁴¹ Jisösnöñ Jerusalem dopdowiba siti mi eka sahörök.

⁴² Sahöta kewö jiyök, “Engöreñ luai denöwö ahubawak! Inini miangö könañi wehön kiangöreñ möt kutugetka dop kölbawakmö, nalö kewöñe mi jeñini qahö tohozawangöra aka tölapñe ahöza.

⁴³ Miangö könañi kewö: Nalö kun kam kunjumawi, miangöreñ kerök yeñön kangota kiripo köhöikñan siti ki kunjum liliköba likeplikap eu emu kinda gwan ala kahasililij ak engime.

⁴⁴ Anutunöñ mesohol köla engoholiga inini nalö bohonñi mi qahö möt kutuba nesampurek aka Anutu andö qeba lañ mala kotzei, miangöra kerök yeñön köndenmönden engigetka mirigö köt kun mi köt kungö qakñe qahö kinmapmö, siti kianñön mönö qeqelanlañ ahöma. Yeñön jike mirinini köndenja moröurupñini siti uruñe maljei, mi engum ureime.” Mewö.

Jisösnöñ jöwöwöl jike jim kömbuhiyök.

Mat 21.12-17; Mak 11.15-19; Jon 2.13-22

⁴⁵ Jisösnöñ keu mi jim teköba jöwöwöl jikegö tohon uruñe anda inap bohonñi memegöra algeri, mi könahiba közöl enjiiga etket.

* 19:38: Sum 118.26

⁴⁶ *Közöl engiba kewö jii mötket, “Aisaianöŋ keu kun kewö ohoi ahöza, ‘Nöŋgö jikenan mönö köulukö miriŋina akŋa.’ Keu mi ahözapmö, iŋini mi utekögetka kegwek-kahasililiŋ yeŋgö baŋet ewö akza.”

⁴⁷ *Jisösnöŋ nalö dop jöwöwöl jikenöŋ öŋgöba Buŋa keu kusum engiba malök. Mewö malökmö, jike nup galöm aka Köna keugö böhi yeŋön tokoba kantri jike kaunsöl yembuk eraum möta kewö jiget, “Mönö denöwö jiinga qegetka kömumbawak?”

⁴⁸ Mewö jigetmö, ambazip kambu pakpak mienöŋ yambuk qekötahöba Buŋaŋi kezap ala mötket. Miangöra “Mönö denöwö akinak?” jiba köna kun qahö miwikŋaiget. Mewö.

20

Jitŋememe yeŋön Jisösgö kukösumŋaŋgö qesiget.

Mat 21.23-27; Mak 11.27-33

¹ Jisösnöŋ jöwöwöl jikenöŋ öŋgöba ambazip kambu kusum engiba Ölöwak Buŋa jim asarim engiba malök. Nalö kunöŋ mewö aiga jike nup galöm aka Köna keugö böhi yeŋön kantrigö jitŋememe tosatŋi yembuk Jisösgö jeŋe kaŋgotket.

² Kaŋgota kewö qesim waŋgiget, “Gi kiangöreŋ yuai akzani, mi mönö daŋön jim kutum gihiiga ahakzan? Miangö kukösumŋi mi daŋön gihiyök? Mi jinöŋga mötpin.”

³ Qesim waŋgigetka kewö melenj engiyök, “Nöŋön mewöyök qesim engibi mi jiget mötmam.”

⁴ Jonöŋ ambazip o-melun mem engiba malöhi, yaŋön miangö kukösumŋi mi denikeyök meyök? Suep Tonjan waŋgiyök me gölme tonjan waŋgiget?”

⁵ Mewö melenj engiiga sutŋine eraum möta kewö jiget, “‘Kukösumŋan Suepnöhök asuhuyök,’ mewö jibin ewö, yaŋön mönö kewö jima, ‘Mewö aiga iŋini i mönö wuanöŋgöra qahö möt narim waŋgiget? Mi qahö dop kölja.’

⁶ Könagesö pakpak yeŋön Jongöra ‘Kezapqetok azia akza,’ jiba mi köhöikŋanök möt nariba malje. Miangöra ‘Gölme ambazipnöhök asuhuyök,’ jibin ewö, yeŋön mönö irimŋini seholiiga kötnöŋ nenŋume.”

⁷ Keu mewö kewöta kewö melenget, “Kukösumŋan denikeyök ahuyöhi, nini mi qahö mötzin.”

⁸ Mewö melengetka Jisösnöŋ kewö jii mötket, “Mewö aiga nöŋön mewöyök yuai ki ahakzalaŋgö kukösumŋi daŋön niŋgiyök, mi qahö jibi mötme.” Mewö.

Wain kösö nup galöm bölöŋi, mienŋö dopkeu

Mat 21.33-46; Mak 12.1-12

⁹ *Jisösnöŋ könahiba ambazip dopkeunöŋ kewö jii mötket, “Azi kunŋan wain kösö nup köla kömörök. Köl kömöta nup galöm tosatŋi miwikŋaim engiba jiiga nupŋi memba ölnaŋgö bahöŋi nanŋini memba bahöŋi tonji waŋgimegöra böröŋine alök. Böröŋine ala engömosöta kantri kunöŋ anda nalö köröpŋi malök.

¹⁰ “Mala mali ölni öliyöhaŋgö nalöŋi (yambu 5) töriiga miangöreŋ welenŋe-ŋeŋi kun melaim waŋgiiga galöm yeŋgöreŋ anda wain nup ölnaŋgö bahöŋi waŋgimegöra jiyök. Jiyökmö, nup galöm yeŋön i kömbinöŋ qeba wuatanaŋgögetka böröŋi börak liliŋgöyök.

¹¹ Miangö andöŋe welenazi kun melaim waŋgiiga anökmö, i mewöyök kömbinöŋ qeba gamu qem waŋgiba wuatanaŋgögetka böröŋi börak liliŋgöyök.

* 19:46: Ais 56.7; Jer 7.11 * 19:47: Luk 21.37 * 20:9: Ais 5.1

12 Lilingöiga nup toŋan welenazi kun kunbuk melaii aniga ambemni karöbut ahökmö, i mewöyök sepgwörörök qeba nup yaigepne gilget geyök.

13 “Mewö aketka wain nup toŋan keu jaruba jiyök, ‘Mönö denöwö akŋamto? Nani wölböt nahöni mönö melaibiga ani i eka göda qeme me denöwö?’

14 Mewö jiba nahönŋi melaiiga anökmö, wain nup galöm yeŋön i eka sutŋine kewö eraum möta jiget, ‘Yaŋön mönö börösamotŋaŋgö toŋi akŋa. Ayop, i mönö qein kömuiga wain kösö nup kianŋön mönö nanine buŋanina akŋa.’

15 Mewö jiba gilgetka nup yaigepne geiga qeget kömuyök. Wain nup toŋan mi möta mönö denöwö ak engima?

16 Yaŋön mönö nanŋak kaba nup galöm mi könden engima aka nup galöm dölöknj miwikŋaim engiba wain kösö nupŋi yeŋgö börönjine alma.” Jisösnöŋ dopkeu mewö jii möta jiget, “Mi qahö dop kölja. Yapmakek!”

17 *Jigetmö, Jisösnöŋ i törörök engeka kinda kewö jiyök, “Buŋa Kimbigö keu kun kewö ahöza,

‘Miri meme yeŋön köt tandö kun andö qeba öne mosötket taröhi, mianŋön mönö tandö kömbönaŋi aiga miwikŋaiget.

Mianŋön tiŋgiriga mirinöŋ mönö gororöŋgöba eta kölma.’ Keu mianŋö könaŋi denöwö?

18 Mianŋöra kewö jibi: Kunŋan tandö bohönŋi mianŋöreŋ töttöŋgata eta qe-mawi, mi mönö silenŋi kutumutumapmö, ain tandö mianŋön jöla tala kungö qakŋe eta kölmawi, mi mönö körek qözömözözamgöma.”

19 Jisösnöŋ mewö juiga Köna keugö böhi aka jike nup galöm yeŋön keu mianŋö könaŋi möt asariba kewö jiget, “Dopkeu mi mönö neŋgöra jiza.” Mianŋöra i nalö mianŋöreŋök memba jöhöbingö mötketmö, ambazip kambu yeŋgöra keŋgötŋini möta osiget. Mewö.

Takis alalgö Jisös esapköm waŋgiget.

Mat 22.15-22; Mak 12.13-17

20 Juda jitŋememe yeŋön Jisösgö jegalöm meget. Mewö memba keuŋi kun qiwitipköi keugö bötaknöŋ öröi gwaröhöm waŋgimegöra aka azi tosatŋi melaim engiget yaŋgöreŋ kaget. Opotöröp aka premiö yeŋgö börönjine al waŋgibingö möta Buŋa keu ölöpnj jiji tandök aka qesiba keuŋaŋgö kezap alget.

21 Areŋ mewö ala qesiba kewö jiget, “Böhi, nini göhö könaŋi mötzin. Göŋön keu diŋdiŋi jiba kusum neŋgimakzan. Göŋön ambazip tosatŋi qahö engek soriba tosatŋi qahö qepureim engimakzanmö, dop mohotnöŋ kewöt neŋgimakzan. Mewö aka Anutugöreŋ köna mi keu ölnaŋgö dop kusum neŋgimakzan.

22 Mianŋöra nini sisa-kiŋgöra takis ala mianŋön Mosesgö Köna keu siŋgibin me qahö?”

23 Mewö jigetmö, Jisösnöŋ isimkakalek areŋini möt kutuba kewö jii mötket,

24 “Ölöp silwö moneŋ (Kina 5) kun kondel niŋgigetka eki. Dagöreŋ imut aka qet mi mianŋöreŋ ohoget ahöza?” “O, mi sisa-kiŋgöreŋ,” mewö melenŋa jiget.

25 Jigetka kewö jii mötket, “Mewö aiga yuai sisa-kiŋgö imutŋambuk buŋaŋi akzawi, mi mönö yaŋgöra al waŋgime. Yuai kun Anutugö buŋaya akzawi, mi mönö Anutugö buŋa qeme.”

26 Jisösnöŋ mewö jiyöhaŋgöra ambazip kambu yeŋgö jeŋine keugö bötaknöŋ al waŋgibingö osiba keuŋaŋgöra welipköba keu bök kiŋget. Mewö.

Kömupnöhök wahötwahötkö Jisös esapköm waŋgiget.

Mat 22.23-33; Mak 12.18-27

* 20:17: Sum 118.22

27 *Sadyusi böhi pati yeñon “Kömugeri, yeñon kude wahötme,” jiba malget. Yeñgöreñok tosatñan Jisösgö jeñe kañgota kewö qesim wañgiba

28 *jiget, “Böhi, Mosesnön kewö jim kutum neñgiyök ahöza, ‘Azi kun ambi meiga nahönbörat qahö ahui kömuiga munñan ölop malöñi memba mala gwölönarök qiwikñaim wañgiiga datñangö qet bisiba malma.’

29 “Mötnön! Nalö kunön darumun 7 malget. Datñini mutukñan ambi memba mala gwölönarökñi qahö öne mala kömuyök.

30 Kömuiga munñan malöñi mi meyök.

31 Mianğö andöñe munñi kunñan ambi miyök meyök. Mewöña mewö darumun 7 pakpak yeñon ambi mohok miyök memba gwölönarök qahö mala kömum teköget.

32 Kömugetka tekögetka qöndökñi malöñini mi mewöyök kömuyök.

33 Göñon ‘Kömugeri yeñon guliba wahötme,’ jizanmö, nini mi qahö möt narizin. Mötnön, azi 7 pakpak mi örörön wahötpeak ewö, ambi mohok mi anömñina meget malöhañgöra aka mönö dagö anömña akawak?”

34 Mewö jigetka Jisösnön kewö melenök, “Nalö kewöñe gölme kianğöreñ ambazip awanöm aka malahakze.

35 Mi malahakzemö, ambazip uruñini melengetka Anutunön eka möri dop köliga kömupnöhök wahöta miri gölme kun euyañgöreñ añgota malmei, yeñon mianğöreñ qahö amime.

36 “Mianğö könañi kewö: Mötnarip ambazip guliba kömupnöhök wahötmei, yeñon Anutugö nahönböratuñi akze. Yeñon Suep garata tandök ewö aka kunbuk qahö kömumemö, teteköñi qahö mal öngöme.

37 *Mötket! Kömugeri, yeñon guliba wahötmegö keuñi mi Mosesnön mewöyök nañgöba jiyök. Ip köhösnönön köñöp bölam ahuba qahö jem kutuyöhi, yañon mi eka kösohotñi ohoi mianğöreñ keu kewö ahöza, ‘Nöñon Anutu Abrahamgö Kembu, Aisakö Kembu aka Jeikobkö Kembu mala kota maljal.’

38 Isik bömön karöbut yeñon Anutubuk mala mal köhöiba öngöme. Körek köhöiba maljei, yeñon mönö malmalñini Anutugöra malje. Mianğöra Anutunön köhömuñi yeñgö Kembuñini qahöpmö, malmal köhöikñi maljei, mönö yeñgö Kembuñina akza.”

39 Jisösnön mewö melenñiga Köna keugö böhi tosatñan melenđa kewö jiget, “Böhi, mi törörök jizan.”

40 Mewö jiba keu kun kunbuk qesim wañgibingö kölköldömdöm aka mosötket. Mewö.

Kraist mi kiñ Deiwidkö Kembuñi aka gwölönarökñi.

Mat 22.41-46; Mak 12.35-37

41 Jisösnön keu kun kewö jii mötket, “Kraistnön Kiñ Deiwidkö gwölönarökñi akzawi, tosatñan keu mi denöwögöra jimakze?

42 *Deiwidnön nanñak keu kewö jiiga Sumbara (Buña liñet, sam) Kimbinön ahöza,

‘Anutunön kinda nöngö Kembuni kewö jii mörök, Göñon mönö kaba nöngö böröni ölñe tatnöñga

43 nöñon nalö sutñe kerökurupki tim tötala luhut al engiba göhö köna tambö gwaröñe al engimam.

Nalö mi kam kuñgumawañgö dop mönö asakmararañnön ki tatman.’

44 Deiwidnön mewö jiba qetñi ‘Nöngö Kembuni’ jiza. ‘Kembuni’ jiba mönö denöwö aka yañgö gwölönarökñi mohot akawak?” Mewö.

Urumelenğö silesile malmalgö galöm meme keu

Mat 23.1-36; Mak 12.38-40; Luk 11.43

⁴⁵ Jisösnöñ gwarekurupñi yeñğöra keu kewö jiiga ambazip kambu pakpak mi mötket,

⁴⁶ “Köna keugö böhi yeñğöra mönö galömñini memba malme. Yeñön maluku köröpñi löngöta anda kaba kondel anğubingö mörakze. Maketnöñ me könanöñ ambazip enğeketka jölöñini jimegö mörakze. Mewöyök köuluk mire qaikñe eu tatpingö sihimñi mörakze aka közölömbuañnöñ dum tatat mutukñe jegep tatpingö mörakze.

⁴⁷ Yeñön malö yeñğöreñ miri yuai bidañda gagabe köla enğuanğirakze aka qetbuñañini asuhumapköra köuluk köröpñi köuluköba töptöpñine qemakze. Mianğöra Anutunöñ keuñini jim teköba likepñi öngöngöñi melenñi qakñine öngöma.” Mewö.

21

Ambi malö kunñan naluk kötin ölni alök.

Mak 12.41-44

¹ Jisösnöñ kinda ui ani ambazip pomñi yeñön nalukñini mi naluk dundumñe alget geyök.

² Alget geiga ambi malö wanapñi kunñan kaba souje kötni pisikñi yahöt ali geyöhi, mi mewöyök ehök.

³ Mi eka kewö jiyök, “Nöñön keu ölni kun kewö jibi mötket: Malö wanapñi kianön naluk aljawi, mi mönö tosatñi pakpak enğonğita alja.

⁴ Mianğö könañi kewö: Körek yeñön monen ketanji ahöm enğiiga kitipñanöhök aljemö, ambi kianön köruebörue maljawanğö dop yuaiñi pakpak al teköba öne töhön malma.” Mewö.

Jöwöwöl jikenöñ köndenñmönder asuhuma.

Mat 24.1-2; Mak 13.1-2

⁵ Jerusalem jöwöwöl jike mi köt eksihimñambuk aka kalemñi kalemñi Anutugöra algeri, mianön menjölögetka aködamunñambuk ahöyök, gwarek tosatñan mi eka eraum mötketka Jisösnöñ keu kewö jii mötket,

⁶ “Miri ki enğekzei, mi mönö köndengetka mirigö köt kun mi köt kungö qakñe qahö ahömapmö, qeqelanlan aka sahopñanök ahöma.”

Kahasililij aka sesewerowero asuhuma.

Mat 24.3-14; Mak 13.3-13

⁷ Mewö jiiga möta qesim wanğiget, “Böhi, keu jizani, mianğö ölni mönö wanat nalönöñ asuhum tiñgitma aka asuhumamgö akñawi, mianğö aiwesökñan mönö denöwö asuhuma?”

⁸ Qesim wanğigetka kewö jiyök, “Kunñan isimkakalek aiga janjuñ anbepeköra mönö galömñini memba malme. Ambazip gwötpukñan asuhuba nöngö qetne kewö jime, ‘Nöñön Kraist akzal,’ aka, ‘Nalönöñ mönö töriza.’ Mewö jimemö, enön mönö yeñğö andöñine kude anme.

⁹ Yarö aka karimñi karimñi asuhugetka ötöñini mötmemö, jönömñini kude unduma. Yuai mi mutuhök asuhumapkö jijiña. Mi asuhumapmö, gölmegö nalöñan mönö mianğöreñök zilan qahö teköma.”

¹⁰ Mewö jiba toroqeba kewö jii mötket, “Kantri kunöñ kantri kun enğubingöra wahötme. Ambazip kambu kunöñ kambu kun yembuk aröñ anğubingöra wahötme.

¹¹ Gölmeñi gölmeñi mianğöreñ kenöñ ketanji ketanji qözöla memba gölme melenñi gemakña. Mewöyök bödiñi bödiñi (buöröñi buöröñi) asuhuba öngöba ahöma. Kawöl köhöikñi köhöikñi mienön asuhugetka sesegilgil kömumakñe.

Suepnöŋ aiwesök ketanji jemurutŋi murutŋi engeka kengöt kotkot akŋe.” Mewö.

Ölöwak Buŋagöra kerök asuhuma.

Mat 24.9-14; Mak 13.9-13

¹² “Yuai pakpak mi asuhumemö, mutuk qeljine tosatŋan inŋini uruŋini melengerangöra aka engömembra jöhöba sesewerowero ak engime. Tosatŋan öröm engiba köuluk miriŋine keu nupŋini memba jim tekögetka kösö miriŋi miriŋi miangören al engime. Tosatŋan nöŋgö qetnangöra aka enjuangitketka kantriŋi kantriŋi yeŋgö kiŋ kembu aka premiö yeŋgö jemesoholŋine kinme.

¹³ Mewö kinda nöŋgö könaŋamni naŋgöba jigetka mötme.

¹⁴ *Keu jakeŋe al enjigetka kinmei, nalö miangören keu denöwö jibinak, miangö waimanjatŋi qeljine kude mötme. Keu mi mönö urukönömŋine algetka ahöma.

¹⁵ “Mi kewögöra: Nöŋön embuk kinda mötkutukutu engiba numbuŋini mem amqemam. Uruawamŋanök malgetka tuarenjoŋurupŋini yeŋgörenök kunŋan mötkutukutu mi qetala keuŋini qeapköba memba et al enjibingö osima.

¹⁶ Nannŋini iwinam, darumun, tinitosolom aka alaurupŋini yeŋön mewöyök angönaŋ mem enjigetka engörenök tosatŋi enjugetka kömume.

¹⁷ Kantri pakpak yeŋön nöŋgö qetnangöra aka kazik ak enjigetka malme.

¹⁸ “Mewö malmemö, nöŋön köyan köl engibi nöropŋinaŋgö jupŋi kunŋan qahö sohoma.

¹⁹ Inŋini kapan köla köhöiba böŋ qeba kinda miangön mönö luhut ala oyaenjoyaen malmal buŋa qem angume.” Mewö.

Jerusalem sitigö köndenmönden uru-önönŋambuk

Mat 24.15-21; Mak 13.14-19

²⁰ “Könaŋgep yarö kambu yeŋön kaŋgota Jerusalem siti liliköba gwan almei, inŋini mi eka miangören kewö mötmörime, ‘Siti bohonŋi köndenmöndenmegö nalöŋan mönö kam kuŋguza.’

²¹ Nalö miangören Judia prowinsnöŋ malmei, enön mönö misiŋgöba öröba kunduje anme. Sitiŋöŋ malmei, enön mönö siti mosötme. Siti yaigepŋe mire malmei, enön mönö sitiŋöŋ kude anme.

²² * “Mi kewögöra: Buŋa Kimbinöŋ kezapqetok keu ohoget ahözawi, mi pakpak mönö ölnambuk akŋa. Keu miangö dop Anutunöŋ nalö miangören siŋgisöndokninaŋgö likepŋi melenŋa qakŋine ali öŋgöma.

²³ Anutunöŋ Israel könagesö siŋgisöndokŋinaŋgöra irimŋi seholiiga kazikŋi kondel enjiiga gölmenöŋ kahasililiŋ keta bölökŋi asuhuma. Ambi gölömbuk aka morö juzunöŋ yeŋön mönö nalö miangören denöwö ösumŋinan anbeak? Miangöra Yei! jizal.

²⁴ “Köndenmönden miangören ambazip tosatŋi mi bingö sou ketanjan enjugetka kömume. Tosatŋi kösö gwaröhöm engiba enjuangitketka kantri pakpak yeŋgö sutŋine angotme. Angotketka kian kantri yeŋön kaŋgota Jerusalem tiangöba malme. Mewö malgetka Anutunöŋ nalöŋini tohot qei tatzawi, miangön kam kuŋguiga mosötme.” Mewö.

Suep gölmegö azi ölnan mönö asuhum tiŋgitma.

Mat 24.29-31; Mak 13.24-27

²⁵ * “Wehön aka köiŋ jeŋire aka seŋgelau miangören aiwesök murutŋi murutŋi asuhume. Köwetnöŋ siri qegetka ötoŋ ketanji ahumakzawangöra gölmegö kantri pakpak yeŋön tötbörömŋini kaiga wahöjaliliŋ möta malme.

* **21:14:** Luk 12.11-12 * **21:22:** Hos 9.7 * **21:25:** Ais 13.10; Eze 32.7; Joel 2.31; Ind 6.12-13

²⁶ Mewö malgetka suepnöŋ uturuköiga miangö öröyuaini mi tatatŋini mosöta enjololon aketka sohoma. Miangöra gölmenji gölmenji miangören lömböt bölönji kötökŋi asuhumapköra mamböt-torok mala kenğötŋini möta uruŋini duhuiga jegilgil akŋe.

²⁷*“Nalö miangören Suep gölmegö azi ölnji yanön kousu qakŋe kanğori ekŋe. Kukösumŋi ketaŋan saköl-diŋdiŋambuk aukŋe asuhuiga asakmararaŋi ekŋe.

²⁸ Mewö kanğotmapmö, yuai mi könahiba asuhumei, enön mönö nalö miangören Suepnöŋ öngöbingö nalöŋinan törimawangöra nöropŋini uba wahöta uruŋini qezaköba awösamkakak kinme.” Mewö.

Geröp ipkö dopkeu

Mat 24.32-35; Mak 13.28-31

²⁹ Jisösnöŋ dopkeu kun kewö jii mötket, “Inini geröp aka ip tosatŋi mi eka tandökŋini mötme.

³⁰ Ip mi sinŋan yoŋgoigetka mi eka miangö könaŋi nanŋinak möt asariba kewö jimakze, ‘Wehön nalöŋan lök dopdowiza.’

³¹ Enön mewöŋanök keu jizali, miangö ölnan asuhuiga eka möt asariba könaŋi kewö jime, ‘Anutugö bemtohoŋan mönö dopdowiza.’

³² “Nöŋön keu ölnji kun kewö jibi mötket: Ambazip merak gölmenöŋ maljei, yeŋön qahö kömugetka yuai pakpak jizali, mi mönö yeŋö malmal nalöŋine asuhuma.

³³ Suep gölmenöŋ göröŋ qemahotmö, nöŋgö Buŋa keunan mönö qahö ayapköma.” Mewö.

Urugwölö mosöta köhömuŋi malbinbuk.

Mat 24.42-44; Mak 13.33-37

³⁴⁻³⁵ “Nalö ketaŋi mianön ambazip körek gölmenöŋ maljei, yeŋö qakŋine mewö asuhuma. Miangöra mianön wölaŋök kaba simba ewö qeraköm enğibapuk. Miangöra gölmenöŋ malmalgö waimanjatŋan qakŋine öngöiga közölömbuan ala o köhöikŋi negetka enjololon aiga uruŋinan lömböribapüköra mönö galömnini mem aŋguba malme.

³⁶ “Miangöra mönö nalö dop urugwölö mala köuluköba malme. Mewö malgetka ösum enğiiga yuai pakpak mi asuhumawi, miangö uruŋeyök kök ala mönö Suep gölmegö azi ölnaŋgö jemesoholŋe awösamkakak kinme.” Mewö.

³⁷*Nalö miangören Jisösnöŋ wehön dop jöwöwöl jikenöŋ kinda Buŋa kusum enğiiga miri mare aiga mosöta kundunji qetŋi Oil ip kundunji qerakzini, miangören öngöba ahömalök.

³⁸ Mewö maliga ambazip kambu pakpak yeŋön wehön dop söŋanök jöwöwöl jikenöŋ öngöba Buŋaŋi jii mötpingöra yangören kamalget. Mewö.

22

Jisös qein kömumapkö aŋgönaŋ alget.

Mat 26.1-5; Mak 14.1-2; Jon 11.45-53

¹*Mewö malgetmö, beret yistŋi qahö miangö sösoŋgainji, qetŋi kun Pasowa kendon jimakzin, mi törüyök.*

² Töriiga miangören jike nup galöm aka Köna keugö böhi yeŋön ambazip kambu yeŋö kenğötŋini mötkeraŋgöra aka nanŋinök tokoba “Denöwö ahinga qeget kömumbawak,” jiba köna jaruba mötmöriget.

Judasnöŋ Jisös mamalolo mem waŋgimangö urumohok ahök.

Mat 26.14-16; Mak 14.10-11

* **21:27:** Dan 7.13; Ind 1.7 * **21:37:** Luk 19.47 * **22:1:** Eks 12.1-27 * **22:1:** Pasowa mi nanine keunöŋ neŋgehoriba neŋgoŋgirök. Eksodus 12.15

³ Nalö miangöreñ Satanöñ Judasgö uruñe geyök. Judas mi Jisösgö gwarekurupni 12 yeñgöreñök kun. Kariot mireyök kayöhañgöra qetñi kun Iskariot qetket.

⁴ Yañön jike nup galöm aka jikegö kiripo galöm bohonñi yeñgöreñ anda Jisös mamalolo memba böröñine almamgö keuñi jiyök.

⁵ Yeñön mi möta “Ayop!” jiba uruñinan ölöwahiga söñgöroñi monerñ wangibingö keu jöhöget.

⁶ Keu jöhögetka Judasnöñ Jisös ölöñ mamalolo memba böröñine almamgö köna möt jaruba köiñbingöba malök. Mewö.

Jisösnöñ gwarek yembuk Pasowa lama neget.

Mat 26.17-25; Mak 14.12-21; Jon 13.21-30

⁷ Beret yistñi qahö miangö kendon silim kunöñ Pasowa lama qeba ohozema. Nalö miangön kam kuñguyök.

⁸ Jisösnöñ Pitö aka Jon kewö jiba melaim etkiyök, “Injiri anda Pasowa lama mözözömgöyohotka nembin.”

⁹ Mewö jiiga qesim wangiyohot, “Mi denikeangöreñ anda mözözömgöbit?”

¹⁰ Qesim wangiyohotka kewö melenñök, “Mörohot! Injiri sitinöñ angorohotka azi kun o kimbut kunduta kaiga miwikñaimahot. Miwikñaiaba i wuatangöba anda mire öñgömawi, miangöreñ öñgömahot.

¹¹ Öñgöba miri toni kewö jiyohot mötma, ‘Böhinöñ göhöra jiza: Ala mirigi denike? Neñön ölöp miangö uruñe kaba gwarekurupni yembuk Pasowa lama nembin?’

¹² Mewö jiyohotka möta miri qakñe eu öñgöba uruñi ketañi kun kondel etkima. Miangöreñ dum tatat yuai mözözömgöget ahöza. Mi kondel etkiiga miangöreñ lama qeba ohomahot.”

¹³ Mewö jii anda Jisösnöñ keu jiyöhi, miangö dop miwikñaiaba kinda lama qeba ohom mözözömgöyohot. Mewö.

Kembubuk semön qöndökñi neget.

Mat 26.26-30; Mak 14.22-26; Jon 13.21-30; 1 Kor 11.23-25

¹⁴ Nene nalöñan kaiga Jisösnöñ aposolurupni yembuk nene nemingö eta tatket.

¹⁵ Tatketka kewö jii mötket, “Nöñön Pasowa lama ki embuk nemingö gwötpuk ak niñgiba malök. Nene ki nembagun mönö sihimbölö mötmam. Miangö nalöñan töriza.

¹⁶ Mi törizawangöra kewö jibi mötket: Nöñön Pasowa lama kiangöreñ kun toroqeba qahö nemam. Könañgep nene semön kiangö ölnan aukñe asuhumawi, mi Anutugöreñ bemtohoñ uruñe euyangöreñ nemam.”

¹⁷ Mewö jiba wain qambi memba kötuetsköba kewö jiyök, “Mönö ki memba nanñinak anguba neme.

¹⁸ Nöñön kewö jibi mötket: Ni wain kösögö ölni kiangöreñ kunbuk toroqeba qahö nemam. Kunbuk nemami, mi Anutugöreñ bemtohoñ asuhum teköiga miangöreñ nemam.”

¹⁹ Mewö jiba beret memba kötuetsköba mindipköba engiba kewö jiyök, “Ki nani busuni. Ki engöra aka tököm engizal. Nemba ni mötmörim niñgiba malme.”

²⁰ *Mi engii negetka mewöñanök wain qambi memba kewö jiyök, “Qambi ki mi jöhöjöhö areñ dölökñi akza. Nöñön amöt qem engimangöra aka sepni mokoba kömumam. Sep miangön mönö Anutugöreñ jöhöjöhö areñi mem köhöima.

²¹ * “Mewö akzapmö, mötket, mamalolo mem niñgimawanöñ mönö mohotñe

ki nene namba tatzit.

²² Ölña, Anutunöñ jim kutuyöhi, Suep gölmegö azi ölñan mönö miangö dop gölme mosöta anma. Anmapmö, mamalolo mem wañgimawi, yangöra mönö wölziköba 'Yei!' jizal. Anutunöñ mönö likepñi öñgöñgöñi melenj wañgima."

²³ Mewö jiiga gwarekurupñan könahiba sutñine eraum qesim anguba jiget, "Neñgöreñök mönö dañön mamalolo mem wañgibawak?" Mewö.

Gwarek yeñön sutñine goranora aket.

Mat 20.25-27; Mak 10.42-44

²⁴ * "Gwarek neñgöreñök galöm bohonñi mi dañön akza?" mewö jigetka miangöra mewöyök sutñine goranora asuhuyök.

²⁵ * Mi asuhuiga Jisösnöñ kewö jii mötket, "Gölmegö kantriñi kantriñi miengö kiñinan mönö azi kembu tandök aka galöm köl enjimakze. Yeñgö pom jembonñinan mönö keu jim kutuba könagesöñini mindiñgöm enjigetka welenñini qeba 'Azi ölöpñi!' jiba möpöseim enjimakze.

²⁶ * Mewö ahakzemö, eñön miangö dop kude akñe. Enjö sutñine kunñan ketanñini akzawañön mönö eretñangö dop aka malma. Galöm bohonñan mönö welenqeçe ewö aka malma.

²⁷ * "Kunöñ tata nene neiga kunñan nene köl wañgiba anda kamakzawi, yetköreñök öñgöñgöñi mi dañön? Ölña, 'Tata nene nezawañön mönö öñgöñgöñi akza.' Mewö jiget mörakzinmö, nöñön enjö sutñine welenqeçe ewö aka maljal.

²⁸ "Mewö malbi esapköm niñgigetka wahöjalinj wahösömbu uruñe angotpiga inini töndup kapañ köla nömbuk qekötahöba mala kotze.

²⁹ Iwinan jim kutum niñgiiga nöñön yangö bemtohoñi kukösum qakñe galöm kölakzal. Miangöra nöñön toroqeba jim kutum enjibiga inini mewöyök kukösum qakñe ambazip kiñ ewö galöm köl enjimakñe.

³⁰ * Miangöra inini ölöp nöñgö bemtohoñne angota nene dumni liliköba tata o aka nene namba malme aka azi kembu tatatnöñ tata Israel ambazip kambu 12 yeñgö keuñini kewöta jim teköm enjime." Mewö.

Pitönöñ Jisös qañ kölmakö jii mörök.

Mat 26.31-35; Mak 14.27-31; Jon 13.36-38

³¹ Jisösnöñ jiyök, "O Saimon Saimon! Mötnöñ! Kölkömöt azinöñ wit padi köñi joutnöñ ala uturuköiga kamböñi denja erakzawi, Satanöñ mönö miangö dop eñön löwöriba yangö böröñe gemegöra uturuköba esapesap al enjimagö kapañ köla jöjöröza.

³² Jöjörözapmö, göhö mötnaripkan sörauba pömsöm qebapuköra nöñön göhöra köuluköba malal. Miangöra nalö kungen urugi melenja nöñgöreñ kamani, miangöreñ mönö mötnarip alaurupki nañgöba mem köhöim enjiman."

³³ Mewö jiiga Saimonöñ melenñök, "Kembu, nöñön göbuk kösö mire anbitkö aka mohotñe kömumbitkö jöjöröba maljal."

³⁴ Mewö jiyökmö, Jisösnöñ jii mörök, "Pitö, nöñön kewö jibi mötnöñ: Kuruknöñ merak qahö qeriga göñön mutuk ni möt niñgimagö qañ kölnöñga indimñi karöbut akña.

Gösö aka bingö sou ketañi miyök memba anme.

³⁵ * Jisösnöñ gwarekurupñi kewö qesim enjiyök, "Nöñön inini mutuk gösö qahö, moneñ gösö qahö, köna esu qahö mewö melaim enjibi angeri,

* **22:24:** Mat 18.1; Mak 9.34; Luk 9.46 * **22:25:** Mat 20.25-27; Mak 10.42-44 * **22:26:** Mat 23.11; Mak 9.35 * **22:27:** Jon 13.12-15 * **22:30:** Mat 19.28 * **22:35:** Mat 10.9-10; Mak 6.8-9; Luk 9.3; 10.4

mianğoreñ yuai kungöra osiget me qahö?” Qesim enjiiga “Yuai kungöra qahö osiin,” jiget.

³⁶ Jigetka kewö toroqeba jiyök, “Mutuk mewö aketmö, nalö kewöñe kungöreñ gösö aka moneñ gösö tuñi ahözawi, mi ölop memba tengöba malma. Bimgö sou ketanji mi kungöreñ qahö ahöza, yanön mönö malukunji bohonji memegöra ala moneñ miwikñaiba sou mi bohonji mema.

³⁷ *Nöñön mianğöra kewö jibi mötket: Anutugö keu nöngöra jigeri, mi körek pakpak köhöim teköma. Mianğö nalöñan mönö kam kungumangö akza. Buña keu kun kewö ohoget ahöza, ‘Yanön bölöñi meme yengö kambuñine ahöma, jiget.’ Mianğöra jizal: Keu mianğö ölnji mi nöngöreñ asuhum teköma.”

³⁸ Mewö jiiga gwarekurupñan jiget, “Kembu eknöñ, bimgö sou ketanji yahöt ki ahözahot.” Mewö jigetka “Mi dop kölja,” jiba melen enjiyök. Mewö.

Jisösnöñ Gezeman arönöñ köuluköyök.

Mat 26.36-46; Mak 14.32-42

³⁹ Jisösnöñ miri mosöta silikñi wuatangöba Oil ip kundunje öngöiga gwarekurupñan andöñe anget.

⁴⁰ Öngöba mianğöreñ angota kewö jii mötket, “Esapesapnöñ et engubapuköra mönö köuluk nup meme.”

⁴¹ Mewö jiba engömosöta köt gilil anakzawi, mianğö dop anda simin köla köuluköyök

⁴² Köuluköba kewö jiyök, “Iwini, göñön urusihimgi mötzan ewö, sihimbölögö qambinji kianön mönö nöngö qakne öngöbapuköra noangitman. Noangitman me qahö, mi mönö nangi jit keugahö dop asuhuma. Mi nöngö sihimgö dop qahö.”

⁴³ Mewö köuluköiga garata kunñan Suepnöhök asuhuba mem köhöim wanjiyök.

⁴⁴ Mem köhöim wanjiiga köñjilin öngöngöñi möta mönö kapan köla urunji qezaköba köuluköyök. Köuluköiga nöngöpñi mi sep jöjöl ewö tingita gölmenöñ etket.

⁴⁵ Köuluköm teköba wahöta gwarekurupñi yengöreñ anök. Anda miwikñaiba engehi wösöbiriknöñ mem et enjii sörrörauba gaun ahöget.

⁴⁶ Ahögetka jiyök, “Mönö wuanöngöra gaunök ahöze? Mönö wahöta esapesapnöñ et engubapuköra köuluköget.” Mewö.

Jisös qeraköba memba jöhöget.

Mat 26.47-56; Mak 14.43-50; Jon 18.3-11

⁴⁷ Jisösnöñ mewö jiba kiniga mianğöreñ azi kambu kanğotket. Gwarekurupñi 12 yengöreñök kun qetñi Judas yanön jitñemem enjiba Jisösgöreñ kanğota numbunji yöhötüm neyök.

⁴⁸ Yöhötüm neyökmö, Jisösnöñ kewö jii mörök, “Judas, gi numbuni yöhötüm memba mewö mianön Suep gölmegö azi ölnji mamalolo mem wanğizan me?”

⁴⁹ Mewö aiga tosatñan Jisös liliköm wanğiba kingeri yeñön yuai asuhumangö ahi mi eka jiget, “Kembu, nini bimgö sou ketanjan enjuin me?”

⁵⁰ Mewö jiba yengöreñök kunñan jike nup galöm bohonñangö welenqeqeni qeba kezapñi ölnji köteköi erök.

⁵¹ Erökmö, Jisösnöñ melenja “Mönö mosötket!” jiba welenqeqegö kezapñi yandiyöhi, mi misiriiga ölöwahök.

⁵² Ölöwahiga kinda jike nup galömurup, jikegö kiripo galöm bohonñi aka kantrigö jitñememe yeñön Jisös membingö kanğotkeri, mi kewö jii mötket, “Ni kegwek-kahasililin azia qahöpmö, töndup nöngöra mewö möta bimgö sou ketanji aka linğip memba kanğotze.

* 22:37: Ais 53.12

⁵³ *Nöñön wehön dop jöwöwöl jikenöñ embuk malbiga inini böröñini böranda ni qahö nömitet. Mi qahöpmö, döлки söñaupkö ösumñan luhut ala aukñe asuhuiga enjö nalöñinan kam kuñguza.” Mewö.

Pitönöñ Jisös qañ kölok.

Mat 26.57-58, 69-75; Mak 14.53-54, 66-72; Jon 18.12-18, 25-27

⁵⁴ Mewö aiga yarö azi yeñön Jisös memba jöhöba wañgita jike nup galöm bohonñangö mire anget. Angetka Pitönöñ andöñine sikepsikep enjuatanjöba anök.

⁵⁵ Mianjören anda jakömbuak mirigö kiripo uruñe geba sombem bibiñe könöp ohoba mohotñe tatket. Pitönöñ mewöñanök yeñgö sutñine tarök.

⁵⁶ Tari welenqeçe ambi kuññan Pitönöñ könöp kösutñe tari ehiba kewö jiyök, “Azi kianñön mönö mewöyök yambuk malök.”

⁵⁷ Mewö jiyökmö, Pitönöñ qañ köla kewö jiyök, “Ambi, ni i qahö möt wañgizal.”

⁵⁸ Mewö jiba tari kude köriiga azi kuññan eka jiyök, “Gi mewöyök yeñgöreñök kun akzan.” Mewö jiyökmö, Pitönöñ melenñök, “Alani, ni qahö.”

⁵⁹ Aua mohotkö dop teköiga kuññan keu mi kuñbuk kapan köla jiyök, “Azi kianñön mewöyök ölna yambuk malök. Yanñön mönö Galili azia akza.”

⁶⁰ Mewö jiyökmö, Pitönöñ melenñök, “Azi, keu jizani, mi köndatzal.” Mewö jiba kiniga mianjörenñök kuruk qerök.

⁶¹ Qeriga Kembunöñ lilingöba Pitö uba ehiga mianjörenñök keuñi kewö jiyöhi, mi mötmöriyök, ‘Gi merak indimñi karöbut qañ köl niñginöñga kuruknöñ qetma.’

⁶² Keu mi mötmöriiba wösöñi julmamgö aiga yaigep geba sahöt böliyök. Mewö.

Jisös jim gönahit ak wañgiget.

Mat 26.67-68; Mak 14.63-65

⁶³ Yarö azi Jisös memba jöhögeri, yeñön mepaqepaik ak wañgiba kinda qeapköget.

⁶⁴ Qeapköba jemesoholñi esuhuba qesiba jiget, “Gi kezapqetok azia akzanangöra danñön guhuzawi, mönö yanñgö qetñi qetnöñ!”

⁶⁵ Mewö jiba gwötpuk terenqerenda ilita jim qetal wañgiget. Mewö.

Jikegö jitñememe yeñön Jisösgö keu nup meget.

Mat 26.59-66; Mak 14.55-64; Jon 18.19-24

⁶⁶ Jim qetal wañgiba malgetka miri gianñiga kantrigö jitñememe aka jike nup galöm aka Köna keugö böhi yeñön tokoba Jisös wañgita Juda yeñgö jike kaunsöl kambu yeñgö jeñine alget.

⁶⁷ Mianjören algetka jiget, “Göñön Amötqeçe Tonñ Kraist akzan ewö, mi mönö aukñe pañ jinöñga mötpin.” Mewö jigetka melenñök, “Mi jibi mötpeaha kun, mi mönö qahö möt narime.

⁶⁸ Me qesim enjibilenaha kun, mi mönö qahö melen niñgime.

⁶⁹ Mewö mötzalmö, nalö kewöñeyök könahiba Suep gölmegö azi ölni yanñön mönö Anutu, kukösum Tonñangö böröñi ölna tata malma.”

⁷⁰ Mewö jiiga mianjörenñök körekñanök kewö jiba qesiget, “Ölna, gi Anutugö nahönña akzan me qahö?” Mewö qesigetka kewö melen enjiyök, “Mi akzalanñgö keuñi mönö nanñinak jize.”

⁷¹ Melen enjiiga jiget, “Nanñak unñemunñem (gunñemgunñem) keuñi mönö nanñi numbuñan jiiga möt teközin. Mianjöra tosatñan keuñi nanñgömegöra mönö wuanöñgöra kuñbuk qesim enjibinak?” Mewö.

* 22:53: Luk 19.47; 21.37

23

Jisösnöñ premiö Pailötkö jeñe kinök.

Mat 27.1-2, 11-14; Mak 15.1-5; Jon 18.28-38

¹ Mewö jiiga kambu körek yeñön wahöta Jisös wañgita premiö Pailötköreñ anget.

² Yañgöreñ anda könahiba silene keu ala undenja kewö jiget, “Azi kiangö könañi kewö eka mörin: Yañön ambazip kuñgum enjiiga enjololon aka karim asuhumakze. Nini Sisa kiñgö takis kude almegöra soñgo alakza. Nannañgöra ‘Ni Amötqeqe Tonji Kraist aka kiñ akzal,’ jimakza.”

³ Mewö jigetka Pailötnöñ kewö qesim wañgiyök, “Ölña, gi Juda yeñgö kiña akzan me qahö?” Qesim wañgiiga Jisösnöñ melenja jiyök, “Mönö nangak jizani, mewö.”

⁴ Pailötnöñ jike nup galöm aka ambazip kambu yeñgöra kewö jii mötket, “Nöñön azi kiangö pinjitñi kun qahö miwikñaizal.”

⁵ Mewö jii möta kunbuk kapan köla kuñguba jiget, “Yañön mönö ambazip kambu kuñgum enjiba Buñañi Galili prowinsnöñ könahiba kusum enjiba gölme dop köla kaba Judia prowins kiangöreñ mewöyök mi jim sehimakza.”

⁶ Mewö jiget möta qesim enjiba jiyök, “I Galili azia me akza qahö?”

⁷ Mewö jiiga “Mönö mi!” jiget möta Herodnöñ Galili aka prowins tosatñi mindiriba galöm köñ enjiba nalö miangöreñök Jerusalem sitinöñ kaba malöhi, miangöra Pailötnöñ Jisös Herodköreñ wañgita anget. Mewö.

Jisösnöñ kiñ Herodkö jeñe kinök.

⁸ Herodnöñ Jisösgö kösohotñi möta lök nalö köröpñi ekñamgö sihimñi möta malöhañgöra i eka uruñan gwötpuk ölöwahök. Jisösnöñ anjöletot kun meiga ekñamgö al mamböta malök.

⁹ Miangöra qeqesi gwötpuk Jisös qesim wañgiyök. Mi qesim wañgiyökmö, Jisösnöñ likepñi kun qahö jii mörök.

¹⁰ Jike nup galöm aka Köna keugö böhi yeñön kinda silenöñ alal keu könöpñambuk jim wañgiget.

¹¹ Herodnöñ yarö aziurupñi yembuk Jisös memba et ala jijiwilit aka mepaqepaik mem wañgiget. Mewö aka maluku aködamunñambuk kun löngöt wañgiget kini melaiiga kunbuk premiö Pailötkö jeñe anök.

¹² Mutuk Pailöt aka Herod yetkөн kerök-kerök ak anjuba malohora nalö miangöreñ ala-ala ahot. Mewö.

Pailötnöñ Jisös kömumapkö jim teköyök.

Mat 27.15-26; Mak 15.6-15; Jon 18.39-19.16

¹³ Jisösnöñ kaiga premiö Pailötnöñ jike nup galöm aka galömkölköl aziurupñi aka ambazip kambu öröm enji tokoget.

¹⁴ Tokogetka kewö jii mötket, “Injini azi ki kewö jiba nöngöreñ wañgita kaze, ‘Yañön ambazip kambu kuñgum enjiiga enjololon ahakze.’ Mötket! Injini keu silene aljei, nöñön miangö könañi enjö jeñine kewöta kewö miwikñaizal: Injini azi kiangö silene keu aljei pakpak, miangön pinjitñi qahö akza.”

¹⁵ Herodnöñ keu mewöñanök jiba melaiiga kunbuk neñgöreñ kaza. Mötket, yañön yuai pinjitñambuk kun qahö ahök. Miangöra kömupkö buñaya akñapkö osima.

¹⁶ Miangöra nöñön jibi yarö azi yeñön ihileknöhök qegetka pösatpi etma.”

¹⁷ (Pailötnöñ yambu (yara) dop Pasowa sösoñgai nalöñe köso mireyök azi mohok pösat enjimaljapma.)

¹⁸ Mewö jiiga yeñön körekbörek silata qeta jiget, “Ia mönö yapmakek! Barabas mönö pösat neñginöñ.”

¹⁹ Barabas mianjön sitinöj karim gila malgeri, yengö galömñina aka azi kun qei kömuyöhi, mianjöra kösö mire alget tarök.

²⁰ Pailötnöj Jisös pösatmamgö möta keu kunbuk jiyök.

²¹ Jiyökmö, yenjön qetala öranjöran misiba qet gigilahöget, “Maripomnöj qeget! Maripomnöj qeget!”

²² Qet gigilahögetka yanjön keu indimñi karöbut kewö jiyök, “Yanjön mönö wani bölöña ahök? Nönjön yangören pinjit kun kude miwikñaibiga kömupkö bujaya akñawanjö dop qahö akza. Mewö aiga nönjön jibi yarö azi yenjön ihileknöhök qegetka pösatpi etma.”

²³ Mewö jiyökmö, yenjön jakbak memba kapan köla toroqeba qet gigilahöba qetket, ‘Jisös maripomnöj qeget kömuma.’ Mewö qeta Pailötkören keu mi qeapköget.

²⁴ Qeapkögetka Pailötnöj keunini bapñe anda keu kapan köla jigeri, mianjö ölni ahumapkö jim teköyök.

²⁵ Jim teköba Barabas etmapkö kapan kölgeranjöra i pösari erök. I karim qeba malgeri, yengö galömñina aka azi kun qei kömuyöhi, mianjöra kösö mire alget tarök. Mi pösari erökmö, Jisös sihimñinanjö dop jaunjauranja ak wanjimejöra böröjine alök. Mewö.

Jisös maripomnöj qeget.

Mat 27.32-44; Mak 15.21-32; Jon 19.17-27

²⁶ Pailötnöj Jisös böröjine aliga wanjita köna namñe anda Afrika siti qetñi Sairini mianjö azi kun qetñi Saimon miwikñaiget. Yanjön nupnöhök kanjoriga jim kutum wanjiba Jisösgö maripomñi wanjita yangö awötñe algetka anjuba wuatangöba anök.

²⁷ Mewö aniga ambazip kambu ketanji yenjön lulunda andöñe wuatangöba anget. Yengö sutñine ambi tosatan mewöyök jinñe köla sahöta anget.

²⁸ Sahöta angetka Jisösnöj lilingöba engeka kewö jiyök, “O Jerusalem ambi, injini mönö nönjöra kude sahötket. Nönjöra qahöpmö, nanñini aka nahönböraturupñini mienjöra mönö sahötme.

²⁹ Mötket! Könanjep nalö kun kai mianjören kewö jime, ‘Ambi köpin mi simbawon. Gölöm qahö ala morö kude megeri, mi simbawon akze. Nahönbörat juzu enjiba qahö dohongögeri, mi simbawon.’

³⁰ *Nalö mianjören ambazipnöj könahiba kundunji Tonji yengöra kewö uletme, ‘Inini mönö kundunji mi jigetka teköba qaknine öngöme.’ Aka sem siagö Tonji mi kewö ulet enjime, ‘Inini mönö banjetñine asamböt nenjime.’

³¹ “Nönjön Anutugören ip gwölögwölö akzal aka nönjöra töndup kewö ak ninjize. Inini ip köhömunji sinjisöndokñinambuk könöp sihit qeba kinje. Mianjöra Anutunöj likepñi melej enjiiga könöpnöj amqeqenänök enjohotiriiga sihimbölö öngöngöñi mötme.”

³² Bölöñi meme yahöt mi mewöyök Jisösbuk mohotñe etkubingöra etkuangita anget.

³³ Anda gölme qetñi Nöröpsihit qetzei, mianjören anjota Jisös maripomnöj qeget. Qeba bölöñi meme yahöt mi mohotñe kun ölnje kun qanñe likepliket mewö etkuget.

³⁴ *Mewö aketmö, Jisösnöj jiyök, “Iwini, yenjön yuai akzei, mianjö könanji qahö möt kutuzeanjöra sinjisöndokñini mönö mosöt enjiman.”

Qeget kiniga Jisösgö sile esunanjöra kiawen megetka qötöñi ahui mianjö dop mendenja meget.

* **23:30:** Hos 10.8; Ind 6.16 * **23:34:** Sum 22.18

35 *Mewö aketka ambazip kambu yeñön kinda mi uba eket. Eketmö, Juda jitnememe yeñön mewöyök mepaqepaik mem wangiba kewö jiget, “Anutunöñ möwölöhöm wangii Amötqeqe Tonji Kraist akza ewö, tosatnji bauköm engiba malöhañön mönö nanñi bauköm anguma.”

36 *Yarö azi yeñön mewöyök keu gönahit jiba ilita kösutnje anda wain o asölñambuk kusahöla memba öngöba wangiba

37 kewö jiget, “Gi Juda yeñgöreñ kiñ kembuya akzan ewö, mönö ölop nangi bauköm anguman.”

38 Nöröpñe eu kulem kun kewö ohoget kinök, “Juda yeñgö kiñ kembuñina ki.”

39 Kegwek-kahasililin azi yahöt mohotnje möndögetka kingeri, yetköreñök kunñan uruqeqe keu töhöreñ Jisös jim wangiba kewö jiyök, “Gi Amötqeqe Tonji Kraist akzan ewö, mönö nangi bauköba niri mewöyök bauköm netkinöñ.”

40 Mewö jiyökmö, alañan jim wangiba kewö jiyök, “Gi gödaqeqegi qahö. Gi Anutugöra mewöyök keñgötki qahö mötzan me? Yeñön jim teköba sihimbölo öröröñ nengigetka bisizin.

41 Niri ölna pinjit ahirañgöra likepñi dopnje melenä ak netkigetka sihimbölo mötzit. Mi mötzitmö, azi kianñön bölöñi kun qahö aiga ia töndup ayuhuze.”

42 Mewö jiba jiyök, “Jisös, gi bemtohoñgahö uruñe angotmani, mianñgöreñ mönö ni mötmörim niñgiman.”

43 Jiiga kewö jiyök, “Nöñön keu ölna jibi mötnöñ: Göñön mönö merak nömbuk oyaenköyaen mire öngöba malman.” Mewö.

Jisösnöñ kömuyök.

Mat 27.45-56; Mak 15.33-41; Jon 19.28-30

44 Silim bibiñi 12 kilok aiga wehön jeñi böuleiiga söñaupnöñ eta gölme pakpak dop köla ahöiga anda aua karöbutkö dop ahök.

45 *Nalö mianñgöreñ jöwöwöl jike uruñe opo kinöhi, mianñön mönö euyök bibiñe jurata eta yahöt ahök.

46 *Jisösnöñ nalö mianñgöreñ köhöikñanök qeta kewö jiyök, “Iwini, nöñön unani göhö böroge aljal.” Mewö jiba söngörö ösum kondikñi öroba kömuyök.

47 Kömuiga yuai asuhuyöhi, suahö galömnöñ mi eka Anutu möpöseiba kewö jiyök, “Yañön mönö ölna azi solañña akza.”

48 Ambazip kambu pakpak mi ekingö kaba tokogeri, yeñön yuai mi asuhui eka wösöñini juliga nörop gila mohot mohot miriñine anget.

49 *Angetmö, ambazip pakpak Jisös möt wangigeri, yeñön sikep kinda i uba eket. Ambi tosatñan Jisös wuatangöba Galiliyök kageri, yeñön mewöyök kinda mi eket. Mewö.

Jisösgö qamötñi löm kölget.

Mat 27.57-61; Mak 15.42-47; Jon 19.38-42

50-51 Juda yeñgöreñ taon qetñi Arimatia mianñgöreñök azi ölopñi qetbunañambuk qetñi Josef yañön mewöyök kayök. Yañön Anutu bemtohoñangö ölni asuhumapköra mamböta malök. Yañön Juda yeñgö jike kaunsöl kambugö jitnememe mala Jisösgö keu jim jöhöba akeri, mianñgö urumohok qahö ahök.

52 Yañön Pailötköreñ anda Jisösgö qamötñi memamgö qesiyök.

53 Qesiba öngöba qamötñi maripomnöhök qeköba memba eta opo tuatñan esuhuyök. Esuhuba memba qaksirinöñ anda köt köteñ kun urorohoba qamöt kun mianñgöreñ qahö algeri, Jisösgö qamötñi mi mianñgöreñ alök.

* 23:35: Sum 22.7 * 23:36: Sum 69.21 * 23:45: Eks 26.31-33 * 23:46: Sum 31.5 * 23:49: Luk 8.2-3

⁵⁴ Sabat kendon tatatkö yuaini mözözömgögeri, miangö wehön jeni gemamgö ahök.

⁵⁵ Gemamgö aiga ambi Jisösbuk Galiliyök kageri, yeñön Josefgö könanje qaksirinöñ anda yanön Jisösgö qamötñi memba köt köteññöñ alöhi, mi eket.

⁵⁶ *Miangöreñök lilingöba mire anda jiniñ suamburup umköhöwakñambuk aka kelök qösösökñambuk Jisösgö qamötñe miribingö mözözömgöget. Mözözömgögetmö, Mosesnöñ Köna keunöñ Sabat kendongöra jim kutui ahöyöhi, mi wuatangöba luhut memba ösöñ tatket. Mewö.

24

Jisösnöñ kömupñöhök wahörök.

Mat 28.1-10; Mak 16.1-8; Jon 20.1-10

¹ Sabat kendon tatket teköiga Sonda söñanök miri gianjiiga ambi yeñön wahöta jiniñ jimoronñ umköhöwakñambuk mözözömgögeri, mi memba qaksirinöñ anget.

² Anda kunñan qaksirigö numbuñe köt ketañi qetali ani eket.

³ Mi eka köt köteñ uruñe öngögetmö, Kembu Jisösgö qamötñi qahö mi-wikñaiget.

⁴ Miangöra mötkurumkurum möta kingetka azi yahöt malukunñiri tuatñi kölköl-bilikbilikñambuk yetkön wösöñine kinohotka etkeket.

⁵ Mi etkeka awöwöliba gölmenöñ geba dapkögetka kewö jiyohot mötket, “Jebuk mal köhöizawi, i mönö denöwögöra kömukömuñi yeñgö sutñine jaruze?”

⁶ *Yañön ki qahö ahözapmö, mönö guliba wahötza. Galili prowinsnöñ mala keu jii mötkeri, mi mönö mötmörime:

⁷ Yañön kewö jiyök, ‘Kunöñ Suep gölmegö azi öñji mamalolo mem wanjiiga bölöñi meme yeñgö böröñine geiga maripomnöñ qeget kömumba wehön karöbut aiga guliba wahötma.’ ”

⁸ Mewö jiyohotka keuñi mi mötmötñine angoriga mötmöriget.

⁹ Mewö mötmöriba qaksirinöhök lilingöba kaba yuai pakpak asuhuyöhi, miangö buzup keuñi mi gwarek 11 aka tosatñi pakpak yeñgöra jiget mötket.

¹⁰ Keu mi jigeri, mi Magdalagöra Maria, Joana aka Maria Jeimsgö namñi aka ambi tosatñi yembuk malgeri, yeñön mi kaba aposol yeñgöra jiget mötket.

¹¹ Buzup keu mi jiget mötketmö, keu jigeri, mi keu omanñi tandök ahöhi, mewö mötmöriba mi qahö möt nariget.

¹² Qahö möt narigetmö, Pitönöñ wahöta ösumñan qaksirinöñ anda köt köteñ uruñe ui aniga opo esu miyök miangöreñ tari ehök. Mi eka yuai asuhuyöhi, mi nanñök mötmöriba welipköba mire lilingöyök. Mewö.

Gwarek yahötñan Emeus könanöñ anohot.

Mak 16.12-13

¹³ Wehön miangöreñök Jisösgö gwarekurupñi yeñgöreñök yahötñan Jerusalem siti mosöta miri qetñi Emeus sewen mail miangöreñ anbitkö anohot.

¹⁴ Könanöñ anda yuai asuhuyöhi, mi pakpak nanñirök eraum mörohot.

¹⁵ Mi eraum möta könanñi jim lömböriba anohotka Jisösnöñ nanñak kösutñire angota mohotñe anget.

¹⁶ Angetmö, jenñiri közamböri i qahö ek kutuyohot.

¹⁷ Qahö ek kutuyohotka kewö jiyök, “Inñiri nanñirök wani keuya könanöñ eraum möta kazahot?” Mewö jiiga dörok mitiba wösöbirik jeje uba eka kinohot.

* **23:56:** Eks 20.10; Dut 5.14 * **24:6:** Mat 16.21; 17.22-23; 20.18-19; Mak 8.31; 9.31; 10.33-34; Luk 9.22; 18.31-33

18 Eka kinda yetkörenjök kun qetnji Kliopas yanjön kewö qesim wangiyök, “Pasowa kendonöy yuai asuhuyöhi, mi Jerusalem ambazip körekñan mötze. Gi mohotñan kiana aka mi qahö mötzan me?”

19 Qesim wangiiiga “Mi wania?” jiiga möta kewö jiyohot mörök, “Nazaret azi Jisösgöra yuai asuhuyök mi. Yanjön kezapqetok azia mala Anutu aka ambazip pakpak yengjö jenjine ahakmeme kukösumñambuk aka keu köhöikñi jiba malök.

20 Mewö maliga nengjö jike nup galömnini aka galömkölköl aziurupninan i wangita premiögö böröñe algetka kömumapkö jim teköi maripomnöy qeget kömuyök.

21 Yanjön Israel könagesönini kösönöhök pösata sohpnini memapköra al mamböta jörömqöröm aka malinmö, Yei! i mönö qeget kömuyök. Yuai mi asuhuiga mala koringa merak sömañi karöbut lök akza.

22 “Mi qahö dop köliga merak nengörenjök ambi tosatñan keunöy kunjuba welipköm nengiget maljin. Yenjön söñan amandine qaksirinöy anda,

23 qamötñi qahö miwikñaiba lilingöba kewö jize, “Nini Suep garata yahötkö jemelen imut ehinga yetköñ ‘Jisösnöy guliba malja,’ ” jiyohotka mötzin.

24 Keu mi möta azi nembuk maljei, yengörenjök tosatñan qaksirinöy anda ambi yenjön keu jizei, miangö dop ahöiga ekze. Löm gwamönñi ekzemö, nanñi qahö ekze.”

25 Keu mi möta kewö jii mörohot, “Yei! Injini kezapqetok yenjön keu jigeri, mi pakpak mönö wuanöngöra ölanbölan aka ajojohoba gawönjeje mala qahö möt narize?”

26 Amötqeçe Tonji Kraistnöy sihimbölö mewöñi mötagun nanñi asakmararanj uruñe öngöma. Miangö dop ohoget ahöza me qahö?”

27 Mewö jii mörohotka Moses aka kezapqetok ambazip pakpak yenjön keu jigeri, miangörenjök könahiba nanñangöra keunji pakpak ohoget ahözawi, miangö könañi jim asarim etkiyök.

28 Jim asarim etkiba anda miri anbitkö jiba anohori, mi dopdowiba miangörenjoroqeba anmamgö mörök.

29 Mewö mörökmö, yetköñ kapanj köl wangiba kewö jiyohot, “Miri mare aiga wehön jenjan lök gemangö akza. Miangöra ölop netpuk tata ahöman.” Mewö jiyohotka yetpuk mire öngöba tatket.

30 Tata yetpuk nene nembangö aka beret memba kötuetköba mindipköba etkimangö aiga yuai kewö asuhuyök:

31 Miangörenjök jenjiran tohoiga ek kutuyohotka at atop (jiataton) köliga kunjuba qahö ehot.

32 Mewö aiga nanñirök kewö eraum mörohot, “Köna namñe Buña Kimbigö keu jiba könañi jim asarim netkizawi, nalö miangörenjök mönö urunire köñöp jezawangö dop mötzi.”

33 Mewö jiba miangörenjök wahöta Jerusalem sitinöy lilingöba angota gwarekurupñi 11 aka alaurup yembuk tokoba tatkeri, mi miwikñaim enjyohot.

34 Miwikñaim enjyohotka kewö jigget mörohot, “Kembunöy mönö ölna wahöta Saimongörenj asuhum wangiza.”

35 Mewö jiggetka nanñirak könanöy yuai asuhuyök aka beret mindipköyöhi, nalö miangörenj urunjiri tohoiga möt kutuyohot, miangö kösohotñi mem enjyohot. Mewö.

Jisösnöy gwarek kambunji asuhum enjyök.

Mat 28.16-20; Mak 16.14-18; Jon 20.19-23; Apo 1.6-8

³⁶ Gwarekurupni yeñon keu mi eraum möta tatketka miangörenek Jisösnöñ nanpak sutjine asuhaba kinda kewö jiyök, “Alaurupni, luainöñ embuk ahöma!”

³⁷ Mewö jiiga kenjötporin aka jönömñini undui “Öme imura ekzin,” mewö mötmöriget.

³⁸ Mewö mötmörigetmö, kewö jii mötket, “Injini denöwögöra auruba mötmöt mewöñi uruñine ahuza?”

³⁹ Ni nanak ki maljal. Mi nanñinak köna böröni uba eka mötme. Öme imut mi bususihitñini qahö. Ni bususihitnambuk kinbi nekze. Mönö nömisiriba nek kömume.”

⁴⁰ Mewö jiba köna böröñi kondel engiyök.

⁴¹ Kondel engiyökmö, mi sösongainangöra töndup qahö möt nariba welipköba tatketka kewö qesiba jiyök, “Nenemñini kun ki tatza me qahö?”

⁴² Mewö jiiga söra jejeñi miangö kitipni kun wangiget.

⁴³ Wangigetka memba neiga eket.

⁴⁴ Neiga eketka kewö jii mötket, “Ni embuk mala nalö miangöreñ keu jibi mötkeri, miangö öñi nalö kiangöreñ asuhui ekze. Nöñon kewö jiba malal: Nöngö keu mi Mosesgö Köna keu aka kezapqetok azi yeñgö Buzup Kimbi aka Sumbara (Buña liñet) bukñöñ ohoget ahözawi, mi pakpak mönö öñjambuk ak teköma.”

⁴⁵ Mewö jii mötketka miangöreñök Buña Kimbigö könañi möt kutumegöra uruñini metohoyök.

⁴⁶ Metohoba kewö jii mötket, “Keu kewö ohoget ahöza: Kraistnöñ sihimbölo möta kömumba sömañi karöbut aiga kömupnöñök wahötma.

⁴⁷ Miangöra eñon mönö Jerusalem sitinöñ könahiba Buña keu nöngö qetne jim asariba kantri pakpak dop köla anda uru kuñgum engimakñe. Denike yeñon uruñini melenmei, Anutunöñ mönö yeñgö siñgisöndokñini mosöta sanjoñma.

⁴⁸ “Keu mi öñjambuk ahök aka akñawi, injini mi asuhui eka nanjöba jiba dangunu ewö kinme.

⁴⁹ *Mötket! Iwinan kalem engimapkö keu jöhöyöhi, nöñon i melaibiga uruñine gema. Euyangöreñök kukösum albi qakñine öngöma. Injini siti kiangöreñ miangöra mamböta tata malme.” Mewö.

Jisösnöñ Suep mire öngöyök.

Mat 16.19-20; Apo 1.9-11

⁵⁰ *Jisösnöñ keuñi jim teköba gwarekurupni enguangita anda Betani miri kösutñe angota miangöreñ böröñi mem wahöta kötuetköm engiyök.

⁵¹ Kötuetköm engiiga miangöreñök Anutunöñ wangiriga engömosöta Suepnöñ öngöyök.

⁵² Öngöiga sösongai ketañi möta sipköba waikñi memba möpöseim wangiba Jerusalem lilingöget.

⁵³ Lilingöba sundan dop jöwöwöl jikenöñ mala Anutu möpöseim wangiba malget. Mewö.

* 24:49: Apo 1.4 * 24:50: Apo 1.9-11

Jon

Ölöwak Buña Jonöñ ohoyök.

Jim-asa-asari

Jonöñ nanñi qetñi Ölöwak Buña kiangöreñ aukñe qahö ohoyökmö, nanñangöra kewö jiza, “Gwarek Jisösnöñ uruñan jöpaköm wanñiyök.” (19.26) Jonöñ urujöpak urukalemgö keuñi kapan köla jimakza. Jonöñ Ölöwak Buña ki mi ambazipnöñ keu kewö möt kutumegöra (20.31) ohoyök, “Jisös Kraist mi gölme aziyöhök qahö malökmö, ölna Anutugö Nahönñi aka Amötqege Toñi akza. Inini mönö i möt köhöiba mewö mianñön malmal köhöikñi miwikñaima.” Jisösnöñ mutuk Iwigöreñ mala keu jitña malök. (1.1) Mewö mala gölme azia aka ösum-mumuñi aka mötmötñi mi aiwesök anñöletot memba mianñön kondelök. Mi kondela bemtohongö könañi jim asariiga tosatñan uruñini melengetka tosatñan töndup yanñiseñ aket.

Jisösnöñ kewö akza, jiyök: Amötqege Toñi (4.26), malmalgö nene wötñi (6.35), miri gölme euyangö buñaya (8.23), bem koñkoñ (8.58), gölme pakpakö asakñi (9.5), nanñu (10.7), lama galöm ölöpñi (10.11), Anutugö Nahönñi (10.36), Kembu aka Böhi (13.13), kömupnöñöhök wahötwahöt Toñi aka malmal kömbönañi Toñi (11.25), köna, keu ölni aka malmal köhöikñi (14.6), wain ip ölni (15.1), kulem namñi mutukñi aka teteköñi A aka Z (Ind 1.8), Mutukñi aka Qöndökñi (Ind 1.17) aka mewö mewö.

Jisösnöñ gwarekurupñi ölna jöpaköm enñiba malöhi, goro keu qöndökñan (Boñ 13-17) mi törörök kondelja. Keu mi nahömñambuk. Kömupnöñöhök wahötagun Pitö mem köhöimapköra kewö qesiyök: “Ni jöpaköm niñgizan me qahö? Mewö akzan ewö, mönö alaurupñi köyan köñ enñiman.”

Buk kiangö bahöñi bohönñi 6 mi kewö:

Keu mutukñi 1.1-18

Jon O-melun azi aka gwarekurup mutukñi 1.19-51

Jisösnöñ qenjarök nup meyök 2.1-12.50

Teteköñe Jerusalem kaba mala kömuyök 13.1-19.42

Guliba wahöta alaurupñi asuhum enñiyök 20.1-31

Galili kaba gwarekurupñi asuhum enñiyök 21.1-25

Anutugö numbu jitñi malmalñambuk.

¹ Könakönahiñe möpñangö möpñeyök keu jit malök. Yanñön malmalgö könañi nanñöba jiba kota malök. Keu jit yanñön Anutugö qöhöröñe mala korök aka nanñak bem Anutuyöhök ahök.

² Keu jit yanñön könakönahiñe Anutugö qöhöröñe malök.

³ Yanñö qöhöröñe mala bauköm wanñiiga yuai pakpak ahuyök. Yuai kun qahö bauköm wanñibawak, mi mönö qahö ahubawak.

⁴ Keu jit yanñön malmal bömönñanök ahök. Yanñöreñ malmal köhöikñi mianñön ambazip mem asarim enñiiga eka mala kotket.

⁵ Asakñan panaman uruñe asarimakzapmö, söñaupnöñ malgeri, yeñön asakñangö könañi mi qahö möt asariba mala kotket. Mewö.

⁶⁻⁷ *Anutunöñ ambazip körek pakpak asakñi möt narimegöra möta kolek azi qetñi Jon melaiiga asuhuyök. Asuhuba kaba asakñangö könañi indela nanñöba jiba malök.

* 1:6-7: Mat 3.1; Mak 1.4; Luk 3.1-2

⁸ Jonöñ nannak asakñi mi qahö aka malökmö, yanön mönö asakñangö könañi mi nanğöba jiba malök.

⁹ Asak ölbölñi yanön ambazip gölme dop mem asarim neñgimakzawi, yanön gölmenöñ asuhumamgö ahök.

¹⁰ Yanön könakönahiñe gölmenji gölmenji miangö öröyuaiñi pakpak mi nam köl enjiiga ahuget. Ahugetka nannak sutñine mala korökmö, gölme ambazipnön töndup i qahö möt kutum wañgiba tönpin malget.

¹¹ Mewö tönpin malgetka nanñi miri gölmeñe kaiga könagesöurupñan zikzik tököba nesampurek aka andö qem wañgiget.

¹² Mewö aketmö, denike yeñön köl öröm wañgiba qetbuñañi möta möt narigeri, yanön mönö körek yeñgöra köna mesari kewö asuhuyök: Nannak nam köla kukösum enjiiga ahuhahu dölökñi ahuba Anutugö nahönböraturupñi aket.

¹³ Anutugö jitsihitñan mönö nam köl enjiiga asuhuget. Gölme azinöñ jit sihitñi wuatangöba anömnambuk keu jöhöiga gölöm ala morö meiga asuhuzawi, yeñön köna mewö miangöñ Anutugö nahönböraturupñi qahö aket. Mewö.

¹⁴ Keu jit yanön azi silebuk aka sutñine anda kaba malök. Mewö maliga aködamunñi uba eka malin. Iwiñan Nahönñi mohok-kungöra aködamunñi pakpak ala aum köl wañgiiga qainñi kun maljawi, yanön mönö miangö dop kalem möriamñan uruñi kokolak qeiga aködamunñambuk aka nalö dop keu öl töhönñi jiba malök.

¹⁵ Jonöñ azi miangö könañi nanğöba kewö qeta jiba malök, “Nöñön kungöra keu jiba malali, yanön mönö mia akza. Kewö jiba malal: Nöñgö andöne azi kun kamawi, nöñön qahö asuhubiga yanön mutuk malök. Miangöra yangö qetbuñañan mönö ni nonğita öñgöñgöñi akza.” Jon O-melun azinöñ mewö jiba malök.

¹⁶ Kalem möriamñan azi miangö uruñi kokolak qeiga aködamunñambuk malöhi, yanön mönö miangö dop kötuatköm neñgiba malök. Kötumötuetñi mi nalöñi nalöñi mokoiga körek neñgö qaknine öñgöi malin.

¹⁷ Mosesnöñ Köna keunini nam köli asuhuyökmö, Jisös Kraistnöñ keu ölni indel teköba Anutugö kalem möriamñi nam köli aukñe asuhuyök.

¹⁸ Gölme azi kunñan Anutu nalö kunöñ qahö ehök. Nahönñi mohok-kunñan Iwigö wösöñe mala kota malöhi, yanön mönö gölmenöñ eta könañi indel neñgi mörin. Mewö.

Jon O-melun azinöñ nanñi könañi jim asariyök.

Mat 3.1-12; Mak 1.1-8; Luk 3.1-18

¹⁹ Juda jitñememe yeñön jike nup galöm aka jöwöwöl jikegö welenqeçe tosatñi Jerusalem sitinöhök melaim enğigetka Jongöreñ kaget. Kaba qesim wañgiba jiget, “Gi wani azia akzan? Könañamgi denöwö?” Mewö jigetka könañamñi indela jii mötket.

²⁰ Könañamñi qahö qañ kölökmö, aukñe kewö jim miwikñaiyök, “Nöñön Amötqeçe Tonñ Kraist qahö akzal.”

²¹ *Mewö jiiga kapan köla qesim wañgiget, “Gi mönö azi ninja akzan? Gi Elaija (Elia) akzan me qahö?” Qesim wañgigetka “Qahö!” jiyök. “Gi kezapqetok azi kun akzan me qahö?” Mewö qesigetka “Mewö qahö!” melenök.

²² Melenñiga qesiget, “Gi ninja akzan? Melaim neñgigetka kazini, yeñgöra mönö denöwö melenñda jiin mötme? Gi nangi könagi denöwö jim asariman?”

²³ *Qesigetka kewö jii mötket, “Kezapqetok azi Aisaianöñ keu kun kewö jii ahöza, ‘Ni garata aka gölme qararañkölkölñe mala kewö qerakzal: Kembunöñ kamawo!

* 1:21: Dut 18.15, 18; Mal 4.5 * 1:23: Ais 40.3

Miangöra injini mönö urunini mindingöba könañi mesata möhamgöget.' Ni miangö kolek garatañi akzal."

²⁴ Azi melaim engigetka Jongören kageri, mi Farisi (Köna keugö kapankölköl) azia aket.

²⁵ Yenön kunbuk kewö jiba qesim wanget, "Gi Amötqeqe Tonji Kraist qahö akzan aka Elaija (Elia) me kezapqetok azi yengörenök kun qahö akzani, miangöra mönö wuanöngöra ambazip o melun mem engimakzan?"

²⁶ Qesim wangetka kewö melen engiyök, "Nönön o töhönöng engömirimakzalmö, azi kun injini qahö möt kutuzei, yanön lök sutñine kinja.

²⁷ Azi kun nöngö andöne kamapköra jiba malali, yanön mönö mi. Yanön kaiga ketañamni aka malma. Miangöra nöngön yangö kösutñe anda wayangösöñi tengöba köna esuñangö kösöñi pösatmamgö qötötangömam."

²⁸ Jonön Jordan o likepñe miri qetñi Betani miangören mala ambazip o melun mem engiba malök. Yuai mi mönö miangören asuhuyök. Mewö.

Jonön Jisösgöra "Anutugö lama moröñi," jiyök.

²⁹ Mi asuhuiga miri gianjiiga Jonön Jisös tikep kaiga eka jiyök, "Eket, azi mi Anutugören lama moröñi. Yanön mönö gölmeñi gölmeñi nengö sinjisöndoknini köl könjörari solanibin.

³⁰ Nönön kungöra keu jiba malali, yanön mönö mia akza. Kewö jiba malal: Nöngö andöne azi kun kamawi, nöngön qahö asuhubiga yanön lök mutuhök malök. Miangöra yangö qetbunañan mönö ni nonjita öngöngöñi akza.

³¹ Nönön i mutuk qahö möt kutuyalmö, Anutunöñ könañamni Israel ambazip nengöra indeli mötpingöra mötza. Mi möta ni melaim ninjiiga kaba o melun mem engimakzal."

³² Jonön mewö jiba dangunu ewö kinda nangöba kewö jiyök, "Uña Töröñan mönö Suepnöhök eta kembö nei ewö yangö nööröpñe eta köla tari ehal.

³³ Nönön i mutuk qahö möt kutuba malalmö, kunöñ ambazip o melun mem engimangöra melaim ninjiyöhi, yanön kewö jii möral, 'Uña Töröñan kungö nööröpñe eta köla tari ekñani, yanön mönö Uña Töröñi ambazip urunine ala melun mem engima.'

³⁴ Nönön mi ehalangöra aka könañamni kewö nangöba jizal, 'Yanön Anutugö Nahönñi akza.'" Mewö.

Jisösnöñ gwarekurupñi mutukñi enggoholök.

³⁵ Mewö jiiga miri gianjiiga Jonön kunbuk o jitñe miangörenök aniga gwarekurupñi yengörenök yahötñan yambuk mohotñe kinget.

³⁶ Kingetka Jisösnöñ miangören engongita anöhi, i törörök uba ehiba jiyök, "Azi mi ehot. Yanön mönö Anutugören lama moröñi ewö akza."

³⁷ Mewö jiiga gwarek yahöt yetkön keu mi möta Jisösgö andöñe anohot.

³⁸ Anohotka Jisösnöñ lilingöba andöñe kayohori, i etkeka kewö qesim etkiyök, "Injiri ninja jaruba kazahot?" Mi möta jiyohot, "Ketañamniri! Gi miri denike ahöba maljan?" (Juda yenön 'Ketañamnini' keu mi böhigöra jiget.)

³⁹ Mewö jiyohotka melenök, "Mönö kaba ehot!" Mewö melenniga wehön möñaiiga 4 kilok miangö dop ahök. Wehön möñaiiga miangören mohotñe anda miri denike ahöba malöhi, mi eket. Mi eka miangören yambuk malohotka miri söñauba sunjem aiga mosöta kayohot.

⁴⁰ Jonön keu jiiga gwarek yahötñan möta Jisösgö andöñe anohori, yetkörenök kungö qetñi Andru, datñi qetñi Saimon Pitö.

⁴¹ Andru yanön mutuk datñi Saimon miwikñaiba kewö jii mörök, "Niri Amötqeqe Tonji mönö miwikñaizit." Amötqeqe Tonji mi Grik keunöñ Kraist.

⁴² Mewö jiba datñi waŋgita Jisösgöreñ anohot. Anohotka Jisösnöñ Saimon törörök uba ehiba jiyök, “Gi Saimon, Jongö nahönñi akzanmö, nöñön qetki Sifas qetpi ahöma.”* Mewö.

Jisösnöñ Filip aka Natanael etkoholök.

⁴³ Miri gianjiiga Jisösnöñ Galili prowinsnöñ anmamgö möta anda könanöñ azi qetñi Filip miwikñaiba kewö jii mörök, “Gi mönö ni nuatanğöba kaman!”

⁴⁴ Filipnöñ Andru aka Pitö yetpuk miriñini mohok. Taonñini qetñi Betsaida.

⁴⁵ Filipnöñ azi qetñi Natanael miwikñaiba kewö jii mörök, “Mosesnöñ azi kungöra Köna keunöñ ohoba kezapqetok yeñön toroqeba ohoget ahözawi, nini mönö azi mia miwikñaizin. Azi mi qetñi Jisös, iwiñi qetñi Josef, miriñi qetñi Nazaret.”

⁴⁶ Natanaelnöñ mi möta welipköba jiyök, “O Nazaret! Mi miri qandakña. Yuai ölöpnñi kun mönö mianğöreñök asuhumawaŋgö dop qahö.” Mewö jiiga Filipnöñ jii mörök, “Mönö kaba nangak ek kutuman!”

⁴⁷ Mewö jii möta Jisösgöreñ kaba asuhuiga eka yaŋgöra keu kewö jiyök, “Eket! Azi kianñön mönö Israel azi ölnñi akza. Uruñe munenñ geñmonñi kun qahö.”

⁴⁸ Mewö jiiga Natanaelnöñ qesim waŋgiba jiyök, “Gi mönö denöwö aka ni möt kutum niñgizan?” Mewö jiiga Jisösnöñ melenđa jiyök, “Gi fig ip† könañe tatnöñga gek kutuyal. Mutuk gek kutubiga Filipnöñ mianğö bapñe geka goholök.”

⁴⁹ Mewö jiiga Natanaelnöñ melenđa jii mörök, “O Ketañamni, gi mönö ölnña Anutugö Nahönñi akzan. Gi Israel neñgöreñ azi Kembuya maljan!”

⁵⁰ Mewö jiiga Jisösnöñ melenđa jiyök, “Ni mutuk kewö jizal, ‘Gi fig könañe tatnöñga gek kutuyal.’ Mewö jim miwikñaizalaŋgöra ölöpn möt narim niñgizan. Anutugöreñ kukösum ki eka mötzani, mi mönö yuai kötonđökñi akza. Ölnñi ketañi mi mönö bian eka möta malman.”

⁵¹ *Mewö jiba toroqeba jii mörök, “Nöñön keu öl töhönñi kun kewö jibi mötnöñ: Könañgepnöñgö gwarekurupni aketka kutum enğuasöriğa imut kewö ekñe: Suep nañgunöñ taliga Anutugö garataurupñan asuhiba Suep gölmegö Azi Ölnñi yambuk nariba yaŋgöreñ eta öñgöba aketka enğekñe.” Mewö.

2

Jisösnöñ o mem letoriga wain ahök.

¹ Jisösnöñ Filip aka Natanael etkoholiga silimñi karöbut teköi malgetka kunöñ ambi memegö maren lömbuañ ali tokoget. Mi Galili prowinsgö miri qetñi Kana mianğöreñ alget. Jisösgö namñan mianğöreñ mohotñe ani malget.

² Jisös aka yaŋgö gwarekurupñi mi mewöyök öröm enğigetka lömbuañnöñ mohotñe malget.

³ Mianğöreñ malgetka wain onöñ qahöwahiga Jisös namñan nahönñaŋgöra jiyök, “Yeñgöreñ wain o qahöwakza.”

⁴ Mewö jiiga kewö jii mörök, “Namni, mi denöwö akñaŋgöra jizan? Jim kutum niñgizan me? Nöñgö aŋgöletot meme nalönan mönö qahö kam kuñguiga maljal.”

⁵ Mewö jii möta welenqeçe yeñgöra kewö jiyök, “Yañön yuai kungöra jim kutum enğimawi, mi iñini ölöpn akñe.”

⁶ Juda yeñön amöt qem aŋgubingöra Köna keuñini wuataŋgöba böröñini sañgoñmaljema. Mianğö dop miri mianğöreñ köurañen ketañi 6 tarök.

* **1:42:** Sifas mi Grik keunöñ Pitö, nanine keunöñ köt jamönñiñ. † **1:48:** Fig mi sambu ewöya. Mi nupñine kömötketka kötnñi nahömñambuk asuhuiga mi nalö gwötpuk nezema. * **1:51:** Jen 28.12

Köurañen mohot mohot mi o gina 8 me 12 mianñon geba kokolak qenahanğo dopñan tatket.

⁷ Jisösnöñ mi eka kewö jii mötket, “Inini mönö o uba kaba mokogetka köurañen ki kokolak qeget.” Mewö jii möta jiyöhanğo dop aket.

⁸ Köurañen mi kokolak qegetka kewö jim kutum enğiyök, “Mönö o qakñi tosatñi uba anda lömbuañ galöm wañgime.” Jim kutum enğiiga memba anget.

⁹ Uba angetmö, galömnöñ o letota wain ahöhi, mi memba möta denikeyök memba kageri, mi qahö möt asariba auruyök. Auruyökmö, welenqeqenöñ o ugeri, yeñon mi möta jigetka galömnöñ maren toñi oholi kayök.

¹⁰ Kaiga kewö jii mörök, “Maren nalöñe körek pakpak yeñon wain o ölopñi mi mutuk memba kaba enğimakze aka mi memba enjololon aketkun wain o nahömñi qahö mi könañgep enğimakze. Göñon wain o ölopñi mi mutuk anğon köla qahö enğiba dölki nalö onğita memba kazan. Mi silik murutñi kun akzan.”

¹¹ Jisösnöñ anğöletot mutukñi ki mi Galili prowinsgö miri qetñi Kana mianğoreñ meyök. Mi memba mewö mianñon kukösumñi indeliga asuhuyök. Mi asuhuiga gwarekurupñan möt narim wañgiget.

¹² *Közölömbuañnöñ malget teköiga Jisös, yañgö nam-munñi aka gwarekurupñi yeñon miriñine Kaperneam anget. Mianğoreñ anda sömañ tosatñi toroqeba malget. Mewö.

Jisösnöñ jöwöwöl jike jim kömbuhiyök.

Mat 21.12-13; Mak 11.15-17; Luk 19.45-46

¹³ *Nalö mianğoreñ Juda neñgöreñ ak-kömukömu kendon nalöñan dopdowiyök. Anutunöñ mönöwök neñgehoriaba neñgoñgiröhi,* mianğöra söñgaibingö aketka Jisösnöñ mewöyök miriñi mosöta Jerusalem sitinöñ öngöyök.

¹⁴ Sitinöñ öngöba jöwöwöl jikegö tohon uruñe anda yuai kewö miwikñaiyök: Ambazip bulmakau azinji, lama aka kembö nei mi bohonñi memegöra alget aka tosatñan monen utekutek albingöra tatkeri, mi engehök.

¹⁵ Mi engeka kösönöñ tapep (muñgamuñga) mönjöñda mianñon enğohotiriba enğuyök. Enğuba ambazip mi körek közöl enğiba lama bulmakauñinambuk jöwöwöl jikenöhök enğuatangöyök. Utekutek ambazip yeñgö souje kötnini metaliga mokoba eriga tebolñini metali anget.

¹⁶ Kembö bohonñini memegöra algeri, ambazip mi kewö jim enğiyök, “Yuai mi mönö memba kesala yaigep anget. Inini nöñgö Iwinanğö jöwöwöl jikenji ki mönö wuanöñgöra utekögetka kölköl-örörö miri ewö akza?”

¹⁷ *Mewö jiiga Buña keu kun gwarek yeñgö mötmötñine kañgoriga mötmöriget. Keu mi kewö ohoget ahöza, “Nöñgö urunan göhöreñ jike mi kömbukñi ahömapköra kapan kölbiga mianñon urune newañ könöp ewö jeiga waimanjat mianñon kawöl miwikñaimakzal.”

¹⁸ Mi közöl enğiiga Juda jitmeme yeñon tembula wahöta Jisösgöreñ kañgota kewö qesim wañgiget, “Gi mönö wani anğöletot kun aknöñga kukösumgi ehinga dop köl neñgiigun kimbi mewöñi akanak?”

¹⁹ *Mewö qesim wañgigetka kewö melen enğiyök, “Inini jöwöwöl jike ki köndengetka gölmenöñ eriga nöñon mi wehön karöbutkö uruñe memba wahöta kuñgumam.”

* **2:12:** Mat 4.13 * **2:13:** Eks 12.1-27 * **2:13:** Anutunöñ Ijpt mianğoreñ Israel ambazip neñgehoriaba neñgoñgirök, mianğö söñgaibingö mi Nei keunöñ Pasowa. Eksodus, Mekömekö 12.15 * **2:17:** Sum 69.9
* **2:19:** Mat 26.61; 27.40; Mak 14.58; 15.29

²⁰ Melen enjiiga kewö jiget, “Yambu (yara) 46:gö uruñe jöwöwöl jike ki memba mala mem tekögetka asuhuba kinja aiga göñön mi wehön karöbutkö uruñe mönö denöwö aka memba wahöta kuñgubanak?”

²¹ Mewö jigetmö, Jisösnöñ jikegö keu mi nanñi silenangö söpsöpña ala jiyök.

²² Jisösnöñ könanjep kömupnöhök wahöriga söpsöp keu jiyöhi, mi nalö miangöreñ gwarekurupñi yenjö mötmötñine kanjori ölop möt asariget. Mi mötmöriba Jisösnöñ keu jiyöhi, mi aka Buña keu ohogeri, mi pakpak möt nariget. Mewö.

Jisösnöñ ambazip könanjani möt teköza.

²³ Jisösnöñ Jerusalem sitinöñ ak-kömukömu kendongö nalöñe mala anjölötöt kukösumñambuk meyöhi, mi ambazip gwötpukñan eka qetñi möt nariba yanjöreñ lapingöget.

²⁴ Lapingögetmö, Jisösnöñ ambazip pakpak yenjö könanjanini möt kutum teköyök. Mewögöra ambazip pakpak qahö möt narim teköm enjiba keunjanangö bapñe qahö anda malök.

²⁵ Ambazip uruñine keu yuai ahöyöhi, Jisösnöñ kunñan ambazip uruñinangö könanji mi indela kondel wanjimawanjö dop qahö ahök. Mönö nanñak mi ölop möt kutum teköyök. Mewö

3

Jisösnöñ Nikodemus urumelenjö könanji kusum wanjiyök.

¹ Juda könagesögö jike kaunsöl sutñine jitñememe azi kun qetñi Nikodemus malök. Yanñon Farisi (Köna keugö kapañkölköl) kambunöñ kinök.

² Yanñon sunjem kunöñ Jisösgöreñ kanjota kewö jii mörök, “Ketanjamni, gi anjölötöt memakzani, mi azi kunñan Anutu yambuk qahö kiniga nanñök memangö osimakza. Miangöra gi Anutunöñ nam köl gihiiga böhi akzan, mewö mötzin.”

³ Mewö jiiga kewö jiba melen wanjiyök, “Nöñon keu öl töhöññi kun kewö jibi mötnöñ: Kunñan Anutugöreñök ahuahü dölökñi qahö ahuma ewö, yanñon mönö Anutugö bemtohoñe anjota ekñangö osima.”

⁴ Melen wanjiiga kewö jiyök, “Kunñan lök ahuba ambazip namñi aka malagun ahuahü dölökñi mönö denöwö ahubawak? Yanñon mönö nam körö uruñe anjori kunbuk gölöm ala memangö osima.”

⁵ Mewö jiiga kewö melenök, “Nöñon keu öl töhöññi kun kewö jibi mötnöñ: Kunñan o melun mem wanjigetka Uña Töröñan uruñe geiga mewöñi mianñon ahuahü dölökñe qahö ahüza ewö, mewöñi mianñon mönö Anutugö bemtohoñ uruñe anjotmamangö osima.

⁶ Gölmegö iwinam engöreñök morö ahuzawi, mi gölme moröya. Uña Töröñan inahöba nam köliga morö asuhumakzawi, mi mönö Suepkö moröya.

⁷ “Mewögöra inñi ahuahü dölökñi Anutugöreñök qahö ahume, mianñon mönö qahö dop kölja. Keu mi jibiga miangöra mönö kude auruman.

⁸ Luhutnöñ nanñi imbi-imbi lan giliga ötöñi mörakzanmö, mi denikeyök kaba gilakza aka denike gila anakzawi, gi miangö könanji qahö möt asarizan. Uña Töröñan ambazip nam köl enjiiga ahuahü dölökñe ahugeri, körek yenjö könanjanan mönö luhut miangö dop akza.”

⁹ Mewö meleniga Nikodemusnöñ köñkuñ aka kewö jiyök, “Mi ahakö dop qahö.”

¹⁰ Mewö jiiga Jisösnöñ jiyök, “Gi Israel könagesö kusum neñgimakzan aka töndup keu miangö könanji qahö möt asarizan. Mi kude dop kölja.

11 Nöñön keu öl töhöññi kun kewö jibi mötnöñ: Neñön wania möt kutuzini, mi jiba indelakzin aka wania jeninan eka mötzini, mi nanğöba jimakzin. Mewö ahakzinmö, eñön töndup Buña keunini mi qahö möt anğön kölakze.

12 “Gölmegö yuaini jenöñ ehekñi miangö keuñi jibiga möta qahö möt narim niñgize ewö, nöñön Suepkö yuaini qahö ehekñi miangö könañi jibiga mötmei, mi mönö denöwö möt naribeak?

13 Gölmegö azi kunñan Suepnöñ qahö öñgöyökmö, Suep gölmegö Azi ölnan Suep mire mala eta asuhuyöhi, yañön mönö lilingöba Suepnöñ öñgöma.

14*“Anutunöñ Moses gölme qararañkölkölñe jim kutui kopö ainöñ mokolen imutñi memba tohotnöñ kösököi kinöhi, miangö dop Suep gölmegö Azi Ölni mi kösökögetka öñgöba kinma.

15 Ambazip i möt narim wañgizei, yeñön körek pakpak malmal köhöikñi miwikñaiba malmegöra aka eu öñgöma.

16 “Miangö könañi kewö: Ambazip i möt narim wañgizei, yeñgöreñök kunñan ayuhubapuköra Anutunöñ gölme dop önöñi qahö jöpaköm neñgiyök. Neñön körek letota malmal köhöikñañgö buñaya akingöra mönö Nahönñi mohotsirik mi neñgiyök.

17 Ambazip gölme dop mal anjini, Anutunöñ Nahönñi neñgö keunini jim tekömapköra aka qahöpmö, Nahönñan amöt neñguiga kantri dop letota oy-aenköyaen akingöra aka melaiiga gölmenöñ erök.

18 “Ambazip kunñan Nahönñi möt narizawi, Anutunöñ yañgö keuñi jim teköiga qahö ayuhumapmö, kunñan Jisös qahö möt narim wañgizawi, Anutunöñ yañgö keuñi lök jim teköiga malja. Anutugö Nahönñi mohotsirikö qetñi qahö möt narizawañgöra aka könöp siagö buñaya akña.

19 Anutunöñ gölme ambazip keunini jim tekömakzawi, miangö könañi kewö: Asakñan lök gölmenöñ eta asuhuyökmö, ambazipnöñ ahakmeme bölöñi bölöñi aka memba malget. Mewö mala Anutugö asakñi tököba uruñini söñaupkö ahakmemenöñ lañ jöhöba mala kotket.

20 “Körek pakpak ahakmeme bölöñi ahakzei, yeñön Anutugö asakñi tököba andö qemakze. Anutunöñ ahakmemenini bölöñi bölöñi mi indela jim enğiiga gamuñini mötpepuköra keñgötñini mörakze. Mi möta asakñañgö uruñe qahö anğorakze.

21 Qahö anğorakzemö, kunñan kun keu ölni wuatangöba maljawi, yañön ölop asakñañgö uruñe kañgotma. Anutunöñ sölölohöm wañgiiga ahakmemenini aka memba malöhi, miangöra ahakmemenini miangön aukñe asuhumapköra mötza.” Mewö.

Jon O-melun azinöñ Jisösgö könañi jim miwikña iyök.

22 Jisösnöñ mewö jim teköba kinda gwarekurupñi enğuañgita Jerusalem siti mosöta Judia prowinsgö miri andöñe anget. Miangöreñ anda gwarekurupñi yembuk sonda tosatñi toroqeba yembuk mala ambazip o melun mem enğiba malök.

23 Jisösnöñ mewö malökmö, Jonöñ mewöyök miri qetñi Salim miangö kösutñe malök. Miri qetñi Aion miangöreñ o jök ahöyök aka ambazipnöñ Jongöreñ kañgota o melun mem enğimapkö qesigetka amqeba mem enğiba malök.

24*“Nalö miangöreñ Jon mi kösö mire qahö algetka tarök.

25 Juda yeñön amöt qem anğubingöra böröñini sañgonmaljema. Mewögöra Jongö gwarekurupñi yeñön Juda azi kunbuk keu miangö goranora aka könahiba jitrakölik jiget.

* 3:14: Jan 21.9 * 3:24: Mat 14.3; Mak 6.17; Luk 3.19-20

²⁶ Mewö jigetka lömböriiga Jongöreñ kaba kewö jiget mörök, “Ketanamni mötnöñ, azi Jordan o likepñe göbuk maliga nangak könañamñi nañgöba jinöñi, yañön ambazip o melun mem enjiiga jesöñgöñan mönö yañgöreñ anakze.”

²⁷ Jonöñ mi möta kewö melenök, “Anutunöñ azi kungöra yuai kun Suepnöhök qahö al wañgibawak ewö, yañön mönö mi buña qem añgumamgö osiza.

²⁸ *Yambuk mala kewö jial, ‘Ni Amötqeqe Tonji Kraist qahö akzalmö, Anutunöñ melaim niñgiiga mutuk kazala yañön andöne kama.’ Nöñön keu mi jiali, inñini mi ölop nanñinak nañgöba jiba malbehañgö dop akze.

²⁹ Miangö keuñi dop ala kewö jimam: Azi kunñan ambi buñañambuk aka ambi memamgöra sösongai keu jim sehiba malja. Mewö maliga azi alañan kösutñe kinda sösongai keuñangö jölñi möta yañgöra öñöñi qahö söngaimakza. Miangö dop nöñön Jisösgö alañi aka yañgöra söngaibiga sösongai mianñön döлки uruni kokolak qeiga maljal.

³⁰ Jisösgö qetbuñañan qarim sehiiga nöñgöreñan mönö waziiga dop kölma.” Mewö.

Jisösnöñ Suepnöhök eröhañgö könañi jiyök.

³¹ “Dañön euyangöreñök eröhi, yañön ambazip körek pakpak enñongita öñgöñgöñi akza. Kunñan gölmenöñ asuhiba gölmegö buñaya akza aka gölmenöñ malmalgö keuñi jimakza. Suepnöhök eta kayöhañön mönö körek pakpak enñongita öñgöñgöñi akza.

³² Yañön yuai eka möt kutuba malöhi, miangö könañi jiba nañgöba dangunu ewö kinja. Mewö kinjapmö, nañgönañgö keuñi mi ambazip kunñan kun qahö möt añgön kölja.

³³ “Ambazip kunñan nañgönañgö keuñi möt añgön köljawi, yañön Anutu ölbölñi akzawañgö keuñi mem köhöiiga pöwöwömñi akña.

³⁴ Anutunöñ kolek aziñi melaiba Uñañi Töröñi musa qakñe qahöpmö, kelenmaleleñ wañgimakza. Miangöra kolek aziñan mönö Anutugö keu töhöññi indela jimakza.

³⁵ *Iwinöñ Nahönñi uruñan jöpaköm wañgimakzawañgöra aka yuai pakpak buña qem wañgiba böröñe ali ahöza.

³⁶ “Ambazip kunñan Nahönñi möt nariba uruñi melenjawi, yañön mönö kunbuk letota malmal köhöikñañgö buñaya akza. Kunñan Nahönñañgö keuñi qahö tem kölakzawi, Anutugö irimsesewölñan mönö yañgö qakñe öñgöba pöndañ kini malmal köhöikñañgö könañi qahö ek kutuba önewat lañ malja.” Mewö

4

Jisösnöñ Samaria ambi kunbuk keu eraum mörohot.

¹ Jisösnöñ mewö ambazip kusum enjiiga gwarekurupñi aketka o melun mem enjiba mewö mianñön Jon O-melun azi luhut ala malöhi, keu mi Farisi (Köna keugö kapañkölköl) yengö kezapñine gei mötket. Yenñön mi mötkeri, buzup mi jiget sehiba Kembugö kezapñe gei mörök.

² Jisösnöñ nanñak ambazip qahö o melun enjiyökmö, yañön jiiga gwarekurupñan mi aket.

³ Mi möta Judia prowins mosöta lilingöba kunbuk Galili prowinsnöñ göröken anget.

⁴ Köna mewö anda Samaria prowins ongita anget.

* 3:28: Jon 1.20 * 3:35: Mat 11.27; Luk 10.22

5 *Onḡita anda Samaria prowinsgö taonḡi kun qetḡi Sikar mianḡoreḡ anḡorök. Sikar taon mi Jeikobnönḡ gölme bahönḡi kun nahönḡi Josef waḡgiyöhi, mianḡö kösutḡe ahöza.

6 Jeikobkö o lömḡi diginḡambuk mi Sikar taonönḡ ahöza. Jisösnönḡ köna kayöhaḡgöra aka silenḡi lömböriiga silim bibiḡe o lömḡi mianḡoreḡ anḡota kösutḡe eta tarök.

7 O löm kösutḡe tariga Samaria ambi kunönḡ o umamḡö kayök. Kaiga Jisösnönḡ eka kewö jii mörök, “Gi ölop o ninḡinönḡa nembilenḡak.”

8 Nalö mianḡoreḡ gwarekurupḡan nene bohonḡi memingöra i mosöta taonönḡ angetka nanḡirök kinohot.

9 *Juda ambazipnönḡ Samaria prowins qepureim enḡiba yembuk köisirik qahö maljema aka pake mohot mianḡön o qahö uzema. Mewögöra nanḡirök kinohot mianḡoreḡ ambinönḡ kewö jii mörök, “Gi Juda azia aiga ni Samaria ambiapmö, denöwögöra ‘O ninḡinönḡa nembilenḡak,’ jiba qesim ninḡizan?”

10 Jisösnönḡ qequesi mi möta kewö melenḡ waḡgiyök, “Gi Anutu kalemḡanḡö könaḡi möt kutunönḡa dop kölbawak. Daḡön ‘O ninḡinönḡa nembilenḡak,’ jiba qesim gihizawi, yanḡö könaḡi möt asaribanak ewö, i mönö qesinönḡa malmalgö onḡi gihibawak.”

11 Mewö jiiga kewö jii mörök, “O ketaḡamni, o umamḡö pakegi kun qahö ahöza aka o löm kianḡön mönö diginḡambuk akza. Mianḡöra malmalgö ogöra jizani, mi mönö denikeyök miwikḡainönḡa ahubawak?”

12 Isik bömönini Jeikob yanḡön o lömḡi ki nenḡiyök. Yanḡön mutuk nanḡak aka yanḡö andönḡe nahönurupḡan ki kaba o uba nemba maljema aka bulmakau kambuḡi kambuḡi o enḡigetka nemba maljema. Gi Jeikob onḡita öḡḡönḡönḡi aka ambazip o mem sehim enḡimamḡö jizan me?”

13 Mi möta Jisösnönḡ kewö melenḡnök, “Ambazip körekḡan o ki nembagun mönö kunbuk ogö kömumba nemingö mörakḡe.

14 Mewö malmemö, nönḡön kungöra o waḡgimami, yanḡön mi nembagun nalö kunönḡ ogö kunbuk qahö kömuma. Mewö qahöpmö, o waḡgimami, mi mönö yanḡö uruḡe letota malmalgö o jeḡi jöppöpkönḡi qahö aiga malma. Mewö mali mönö uzumgöba malmal köhöikḡi tetekönḡi qahö waḡgimakḡa.”

15 Mewö melenḡniga ambinönḡ jiyök, “O ketaḡamni, gi mönö o mia ninḡinönḡa nembi. Mi nembagun nalönḡi nalönḡi kunbuk ogö qahö kömumbilenḡak aka o umamḡöra ki könasöksök qahö tibilenḡak.”

16 Mi jiiga kewö jim kutum waḡgiyök, “Gi mönö anda apki waḡgita ki kamahot.”

17 Mewö jim kutum waḡgiiga “Ni apni qahö,” jiba melenḡnök. Melenḡniga kewö jii mörök, “Gi ‘Apni qahö,’ keu mi törörök jizan.

18 Gi ölḡa azi 5 enḡömemba malnönḡ aka merak kun memba maljani, yanḡön mönö göhö apki qahö akza. Keu jizani, mi öl töhöḡḡa.”

19 Ambinönḡ mi möta kewö jii mörök, “Ketaḡamni, gi mönö kezapqetok azi qainḡi kun akzan. Nönḡön tandöki mewö gek kutum gihizal.

20 Nenḡö ambösakonurupḡinan kundunḡi kondela kianḡoreḡ öḡgöba sipköba köuluköba malgetmö, Juda enḡön kewö jimakze, ‘Samaria enḡön mönö Jerusalem sitinönḡ öḡgöba jöwöwöl jikenönḡ sipköba köulukögetka dop kölḡa.’ ”

21 Mi möta Jisösnönḡ kewö jim kutuyök, “O ambi, nalö kun kam kuḡguma. Inḡini nalö mianḡoreḡ Iwi waikḡi memba möpöseibingöra kundunḡi kianḡoreḡ me Jerusalem mianḡoreḡ qahö öḡgöba malme. Gi keu mi ölop möt narinönḡa dop köлма.

* 4:5: Jen 33.19; Jos 24.32 * 4:9: Esra 4.1-5; Neh 4.1-2

22 Samaria inini Anutugö kōnaŋi törörök qahö möt kutuba tōndup yangö waikŋi laŋ memba möpöseimakze. Amötqeqegö kōnaŋi mi Juda neŋgö sutnine aukŋe asuhuba ahöza. Miangöra Juda neŋön Anutuninaŋgö kōnaŋi möt kutuba waikŋi memba möpöseininga dop kölja.

23 “Tōndup nalö kun kewö asuhuma: Nalö miangören Uŋa Töröŋan ambazip sölölöhöba inahöm enŋiiga keu ölni wuatangöba Iwi waikŋi memba ölna möpöseiba malme. Iwininan ambazip mewöŋi jarum enŋiba asuhumegöra sihimŋi möta malja. Nalö murutŋi mianŋön mönö lök kam kuŋguba dölki ahöza.

24 Anutunöŋ Uŋaya akza. Miangöra Uŋa miangö waikŋi memba möpöseimakzei, yeŋön mönö Uŋa Töröŋan sölölöhöba inahöm enŋiiga keu ölni wuatangöba möpöseiba malme.”

25 Jisösnöŋ mewö jim kutuiga ambinöŋ jii mörök, “Amötqeqe Tonŋi qetŋi Kraist qetzei, yaŋön kamangö akza, mi mötzal. Yaŋön kamawi, nalö miangören mönö keu pakpak indel neŋgiiga mötpin.”

26 Jisösnöŋ keu mi möta kōnaŋi kewö indelök, “Göbuk ki kinda keu eraum mötziri, nöŋön mönö mia akzal.” Mewö.

Gwarek yeŋön kaba yetpuk toroqeqet.

27 Kōnaŋamŋi indeliga gwarek yeŋön miangörenök lilingöba kaget. Kaba ambibuk eraum mörohot, mi eka welipkögetmö, kunöŋ kewö qahö qesiyök, “Gi denöwögöra yambuk keukeu jizahot?” me “Wanigöra ak gihiza?” Mewö qesibingö mötketmö, körekŋan ölöŋ tatket.

28 Ölöŋ tatketka ambinöŋ o pakenŋi mosöta taonöŋ anda ambazip yeŋgöra kewö indela jii mötket,

29 “Mötket! Nöŋön azi kun miwikŋaibiga yuai pakpak aka malali, miangö kōnaŋi indela jii mötzal. Miangöra yaŋön mönö Amötqeqe Tonŋi Kraist akapuk. Mönö nanŋinak kaba azi mi ekŋe.”

30 Keu mi möta taon mosöta öröba Jisösgören anget.

31 Gwarek yeŋön nalö sutŋe miangören Jisös qesim waŋgiba kewö jiget, “Ketaŋamnini, ölöŋ nene nenöŋ.”

32 Mewö jigetmö, kewö jiyök, “Nöŋön neneŋamni qainŋi kun memba maljali, inini miangö kōnaŋi qahö möt kutuze. Qahö!”

33 Mi möta nanŋini qesim aŋguba kewö jiget, “Kunŋan nene kun memba kaba waŋgiza me denöwö?”

34 Mewö jigetka kewö jii mötket, “Melaim niŋgiiga kayali, nöŋön yangö jitŋi tem köla nupŋi mem sorokömakzali, mianŋön mönö nöŋgö neneŋamni akza.

35 Inini keu kewö jibepuk, ‘Koiŋ 4 kunbuk ahöiga ölöm-izi-izi nalöŋan törima.’ Mötket, nöŋön miangöra kewö jizala kezap alget: Nup boŋi ketanŋi miengö ölninan lök öliiga meme nalöŋinan kam kuŋguza. Inini mönö jeŋini uget aniga mi uruŋine ek kutume.

36 Tosatŋan mutuk keu kötni qesiŋda gila malgetka ölnan nalö kewöŋe asuhuiga tosatŋan mi lök tokoba töwanŋini megetka ambazipŋi ambazipŋi malmal köhöikŋangö buŋaya ahakze. Mewö asuhuiga ölni meme yeŋön qesiŋ gilgil ambazip yembuk mindiriba mohotŋe söŋgaiba simbawoŋ mötze.

37 ‘Kunöŋ kötni qesiŋ giliga kunöŋ ölni mezawi,’ keu mewö jimakzei, mi keu ölna. Mi Anutugö nup memegö kōnaŋi indelja.

38 Nöŋön inini melaim enŋibiga nup qainŋi kunöŋ nanŋinak yuai kötni qahö kömötkeri, mönö nup miangören anda ölni meme. Tosatŋan mutuk silenŋi qeba nup memba malgetka enön yeŋgö kōnaŋine anda nup megerangö ölni miwikŋaiba memakŋe. Mewö melaim enŋizal.” Mewö

Samaria ambazip gwötpukŋan uruŋini melenŋet.

³⁹ Samaria ambinöŋ keu kewö naŋgöba jiyök, “Nöŋön azi kun miwikŋaibiga yuai pakpak aka malali, yaŋön mönö miangö könaŋi indela jii mötzal.” Mewö jiyöhaŋgöra Samaria ambazip gwötpukŋan Sikar taon miangöreŋ uruŋini melenŋa Jisös möt narim waŋgiget.

⁴⁰ Möt narim waŋgiba yaŋgöreŋ kaba yembuk toroqeba malmapköra kapan köla qesigetka silim yahötkö dop toroqeba miangöreŋ malök.

⁴¹ Mewö mala keu jiba malöhaŋgöra aka gwötpukŋan Jisös möt nariba toroqem waŋgigetka kambuŋini qariyök.

⁴² Toroqem waŋgiba ambigöra kewö jiget, “Azi kianön ölna gölmeni gölmeni nenngöreŋ Amötqeŋe Tonina akza. Neŋön mi göhö keugörök qahö toroqeba möt narizinmö, mi naninak kezap ala möta möt kutuzin.” Mewö.

Jisösnöŋ jembon azi kungö nahönŋi mem ölöwahök.

⁴³ Jisösnöŋ Samaria maliga silim yahöt teköiga engömosöta Galili prowinsnöŋ anök.

⁴⁴ *Jisösnöŋ nanŋak nalö kunöŋ keu kun kewö naŋgöba jiyök, “Kezapqetok ambazip kunŋan nanŋe miri gölmenöŋ maliga yaŋgöra qahö mötket öngöiga göda qahö qem waŋgimakze.”

⁴⁵ *Mewö jiyökmö, töndup nalö miangöreŋ nanŋe Galili prowinsnöŋ kaŋgoriga miangöreŋ mewöyök tosatŋan jölöŋi jiget. Yeŋön ak-kömukömu kendongöra Jerusalem sitiŋöŋ öngöba Jisösnöŋ kendon nalöŋe aŋgöletot meyöhi, mi pakpak eka mötket. Miangöra nalö miangöreŋ ölop köl öröm waŋgiget.

⁴⁶ *Galili prowins yeŋön köl öröm waŋgigetka miri qetŋi Kana mutuk o meiga letota wain ahöhi, miangöreŋ kunbuk kayök. Taon qetŋi Kaperneam miangöreŋ kiŋ kembangö jembonŋi kun malök. Yaŋgö nahönŋan kawöl yöhöiga ahöyök.

⁴⁷ Ahöba kömumamgö ahök. Miangöra Jisösnöŋ Judia prowins mosöta Galili uruŋe kayöhi, yaŋön miangö buzupŋi möta Jisösgöreŋ anda kewö qesim waŋgiyök, “Gi ölop kaba nahöni mem ölöwak waŋgiman.”

⁴⁸ Qesim waŋgiiga kewö jii mörök, “Inini ni öne qahö möt narim niŋgimeanngö dop akzei, mi qahö dop kölja. Nöŋön aŋgöletot aiwesök membi ekagun mönö amqeba ni möt narim niŋgiba uruŋini melenbeak.”

⁴⁹ Mewö jii mörökmö, jembonöŋ kewö jiyök, “Ketaŋamni, nahönan kömumbapuköra mönö ösumok kaman.”

⁵⁰ Mewö jiiga melen waŋgiyök, “Nahöŋgan mönö ölöwaka malma. Miangöra mönö ölop lilingöba anman.” Mewö melen waŋgiiga yaŋön mi möt nariba lilingöba anök.

⁵¹ Anda könanöŋ maliga welenqeŋeurupŋan kaba miwikŋaiba kewö jiget mörök, “Nahöŋgan lök ölöwaka malja.”

⁵² Mi möta qesim engiba jiyök, “Wani nalönöŋ könahiba ölöwahök?” Mewö jiiga jiget mörök, “Uran mare wan kilok miangöreŋ sile könöpŋi mosörök.”

⁵³ Mi möta mötmötŋi kewö ahuba asariyök: Aha! Jisösnöŋ “Nahöŋgan mönö ölöwaka malma,” jiyöhi, mönö aua miangöreŋök ölöwahök. Keu mi möt asariba i aka saiwaurupŋi pakpak yeŋön uruŋini melenŋa Jisös möt narim waŋgiget.

⁵⁴ Jisösnöŋ Judia mosöta Galili prowins uruŋe kaba aŋgöletot kun ki meiga yahöt ahök. Mewö.

5

Jisösnöŋ Betesda o aŋgö jitŋe azi kun mem ölöwahök.

* 4:44: Mat 13.57; Mak 6.4; Luk 4.24 * 4:45: Jon 2.23 * 4:46: Jon 2.1-11

¹ Könangep nalö kunöŋ Juda yeŋgö kendon ketanĵi kun töriiga Jisösnöŋ Jerusalem sitinöŋ öngöyök.

² Jerusalem sitigö selnöŋ nanġu kun mi lama yeŋgöra ahöyök. Miangö kösutŋe o anġö kun qetŋi Hibru keunöŋ Betesda qetkeri, mi ahöyök. Miangö göraŋe luhut miri köröpŋi ketanĵi 5 tatket.

³ Luhut miri 5 miangö uruŋe kawöl ambazip kambu ketanĵi ahözema. Tosatŋan jeŋini gömölii tatket. Tosatŋan simalokon aka tatket. Tosatŋan likepŋini kömukömuŋa tatket.*

⁴ Nalö tosatŋe Kembangöŋ garata kunöŋ eta o anġönöŋ timjaliiga unduzapma. Onöŋ unduiga nalö miangöŋök kunŋan mutuk anġönöŋ geiga kawölŋi mi me mi miangön ölöwahakzapma. Miangöra mamböta tatket.

⁵ Miangöŋe azi kun yambu (yara) 38 miangö dop kawöl yöhöiga ahömalök.

⁶ Miangöŋe ahöiga Jisösnöŋ kaŋgota eka lök nalö köröp tiŋtiŋi kawöl yöhöi ahöba malöhi, mi möta kewö qesim waŋgiyök, “Gi ölöwakŋangö ak gihiza me qahö?”

⁷ Qesim waŋgiiga kewö melen waŋgiyök, “O Kambu, onöŋ unduba ötoŋ qeiga alani daŋön noanġita o anġönöŋ anda al niŋgibawak? Alani mewöŋi kun qahö malja. Nanak anmamgö möta esapköba malali, nalö miangöŋök tosatŋi yeŋgöŋök kunöŋ ni noŋgita anda gemalget.”

⁸ Melen waŋgiiga Jisösnöŋ jii mörök, “Gi mönö wahöta tumbulahöpki memba anöŋ.”

⁹ Mewö jii möta miangöŋök ölöwaka tumbulahöpŋi memba anök. Anökmö, yuai mi Sabat kendonöŋ asuhuyök.

¹⁰ *Miangöra Juda yeŋön azi ölöwahöhi, yaŋgöra kewö jiget mörök, “Merak Sabat kendon akza. Miangöra tumbulahöpki memba anġunöŋga qahö dop kölja.”

¹¹ Mi möta kewö meleni mötket, “Möhamgöm niŋgizawaŋön mönö kewö jim teköm niŋgiza, ‘Gi mönö tumbulahöpki memba anöŋ.’”

¹² Mi möta kewö qesim waŋgiget, “Azi daŋön göhöra ‘Tumbulahöpki memba anöŋ, jiza?’”

¹³ Qesim waŋgigetmö, Jisösnöŋ mem ölöwahiga ambazip kambu ketanĵan ölökögetka yeŋgö sutŋineyök sömuniba anök. Miangöra daŋön mi ak waŋgiyöhi, mi qahö möta töŋpin kinök.

¹⁴ Miangö andöŋe jöwöwöl jike tohoŋ uruŋe öngöiga Jisösnöŋ miangöŋe miwikŋaim waŋgiba qambaŋ keu kewö jii mörök, “Mötnöŋ, gi lök ölöwakzan. Miangöra ayuayuhu töŋsait bölöŋi kötökŋi kun asuhum gihibapuköra mönö ŋiŋisöndok kunbuk kude aka malman.”

¹⁵ Azi ölöwahöhi, yaŋön Jisös ek kutuba anda Juda jitŋememe yeŋgöra kewö jii mötket, “Azi mem ölöwak niŋgiyöhi, yaŋgö qetŋi Jisös.”

¹⁶ Mi möta Jisösnöŋ Sabat kendonöŋ nup mewöŋi meyöhi, Juda jitŋememe yeŋön miangöra aka sesewerowero ak waŋgiba malget.

¹⁷ Mewö malgetmö, Jisösnöŋ kewö melen eŋgiyök, “Nöŋgö Iwinan sundan dop nup memakza aiga nöŋön mewöŋanök mi memakzal.”

¹⁸ Mewö melen eŋgiba ambazip Sabat kendongö keu tosatŋi toroqeba algetka Jisösnöŋ mi ahakmemenġan qeapköba yeŋgö jeŋine ŋiŋisöndok ahök. ŋiŋisöndok mi toroqeba Anutugöra ‘Iwini’ jiba Anutu tandök ewö maljawangö dop aka nanŋi mem öngöyök. Juda ambazip yeŋön yuai yahöt miangöra aka möt kömbuhiba kapaŋ köla Jisös qebingö jim köhöiget. Mewö.

* **5:3:** Mötmöt ambazip tosatŋan kewö mötmörimakze: Könakönahiŋe jabö 3:gö kitipŋi teteköŋi aka jabö 4 mi kewö ohoget ahöyök: Yeŋön o anġönöŋ gwözöŋda undumapkö mamböta tatzema. * **5:10:** Neh 13.19; Jer 17.21

Malmal gulimapkö kukösumñi mi Jisösgöreñ ahöza.

19 Mewö aketmö, Jisösnöñ keu kewö jii mötket, “Nöñön keu öl töhöññi kun kewö jibi mötket: Nahönöñ nanñi uruñangö yuai kun qahö memakzapmö, Iwinöñ yuai memakzawi, Nahönñan mönö mewöñanök memakza. Mianğöra Iwinöñ yuai meiga ehakzawi, yañön mönö miyök memakza.

20 Iwinöñ Nahönñi urunöñ jöpaköm wañgiba mala nanñak nup memakzawi, mi pakpak kondel wañgimakza. Mianğöra aᅅöletot eka maljei, mi yuai eretñi. Mianğö öññi mi köñaᅅep kondel enᅅiiga eka nemböñini teköi welipköba malme.

21 “Kun kewögöra welipköme: Iwinöñ ambazip kömukömuñi enᅅömindiga gulimakze. Nahönñan mönö mianğö dop mewöñanök ambazip köhömuñi niñia gulimegö mötzawi, mi enᅅömindiga gulimakze.

22 Mewöñanök Iwinöñ kungö keuñi qahö jim tekömakzapmö, jimtekötekö nupkö kukösumñi pakpak mi kewögöra Nahönñangö böröñe ali ahöza:

23 “Ambazip Iwi göda qem wañgimakzei, mianğö dop körekñan Nahönñi göda qem wañgimegöra mötza. Iwinöñ Nahönñi melaim wañgiyök. Mianğöra kunñan Nahön qahö göda qem wañgizawi, yañön mönö Iwi mewöyök göda qahö qem wañgiza.

24 “Mianğöra nöñön keu öl töhöññi kun kewö jibi mötket: Kunñan nöñgöreñ Buña keu möta mötmöriba ni melaim niñgiyöhi, i möt narim wañgiza ewö, yañön mönö malmal köhöikñangö buñaya akza. Nöñön keuñi jim teköbiga köñöp siagö buñaya qahö akña. Kömup köhöikñangö likepñi mosöta jabö kutuba malmal köhöikñangö likepñe angota mal öñgöma.

25 “Nöñön keu öl töhöññi kun kewö jibi mötket: Nalö kun kama aka nöñgöra aka lök kam kuñguza. Nalö mianğöreñ siñgisöndok aka uru köhömuñi akzei, yeñön Anutugö Nahönñan keu qeri mötme. Mi möta tem kölmeanön mönö guliba köhöiba malme.

26 Mi kewögöra: Iwinöñ nanñak malmal köhöikñi kondorakzawi, mianğö dop malmal gulim köhöimapkö kukösumñi mi Nahönñi wañgii yañön mewöyök ambazip mem gulim enᅅimakza.

27 Yañön Suep gölmegö Azi Öññi maljawañgöra aka Iwinöñ ambazip keuñini jim tekömapkö kukösumñi mewöyök yañgö böröñe ali buñani ahök.

28 “Nöñön keu köññi jizali, mianğöra mönö kude aurume. Nalö kun kam kuñgumawi, mianğöreñ körek pakpak qaksirinöñ ahözei, yeñön mewöyök qet qetmawi, mi mötme.

29 *Qetñi mi möta wahöta aukñe asuhugetka ahakmeme ölöpnñi aka malgerañön malmal köhöikñe öñgömemö, ahakmeme bölöññi aka malgeri, nöñön yeñgö keuñini jim teköbiga kömup köhöikñangö buñaya akñe.

30 Nöñön nani uruñangö yuai kun nanak aka memamgö osizal. Ni Iwigö jitñe mörakzali, mönö mianğö dop ambazip keuñini jim teköm enᅅimakzal. Nani imbinangö dop lañ qahö memakzalmö, melaim niñgiyöhi, mönö yañgö keuñi wuatañgömakzal. Mianğöra jimtekötekö keuni jimakzali, mi mönö dopñeyök asuhumakza.” Mewö.

Tosatñan Jisösgö köñañamñi nañgöba jiget.

31 “Nöñön nani köñañamni nañgöba jibilenñak ewö, keuni mianñön ölöp qahö köhöibawak.

32 Alani kunöñ nöñgö köñañamni nañgöba jimakza. Yañön nöñgöra keu jimakzawi, mianñön mönö köhöiba öññambuk akza, mi mötzal.

33 *Inñini jitñememe melaim enᅅigetka Jongöreñ kagetka keu öññangö dop nöñgö köñañamni indela jiba nañgöyök.

* 5:29: Dan 12.2 * 5:33: Jon 1.19-27; 3.27-30

³⁴ “Jiba nanğöyökmö, nöñön gölme azigö nanğönanğö keuñi mi möta qahö mötpi öngöza. Qahö öngözapmö, Jongö nanğönanğö keugöra jimakzali, mi mönö inini nalö kewöñe letotketka Anutunöñ bohonñini jöhömapköra aka jimakzal.

³⁵ Jonöñ kiwa ketanji aka ölopñanök jeba asariyökmö, inini nalö köröpñi qahöpmö, töröptökñanök yanğö asakñe lañ söñgaibingö sihimñi mötket.

³⁶ “Jonöñ könani töröptökñanök jiiga mötketmö, kunöñ mi nanğöba jimakzawi, yanğö keuñan mönö Jongöreñ nanğönanğö keu öngitza. Nani Iwinan nupñi al niñgii membiga ölni asuhumakza. Ölni mianön mönö könañamni kewö nanğöba indelakza: Iwinöñ mönö melaim niñgii jitñe memeni akzal.

³⁷ *Iwinöñ melaim niñgii erali, yanön könañamni nanğöba jiba malök. Inini nalö kunöñ yanğö keu kourukñi qahö mötket aka kaisongolomñi qahö eket.

³⁸ Yanön niñia melaiiga eröhi, inini i qahö möt narim wanğize. Mianğöra yanğö keuñan mönö engö uruñine qahö kinja.

³⁹ “Inini malmal köhöikñanğö könañi mi Buña Kimbinöñ ahöm engiza, mewö mötmöriba mi oyonda uru könömñine ala Suepkö buñaya akingö mötze. Mewö mötzemö, kimbinji kimbinji pakpak mienön mönö nöngö könañamni nanğöba indelakze. Mi möt yaköze me qahö?”

⁴⁰ Nanğönanğö keu gwötpuk ahözapmö, inini malmal köhöikñi buña qem anğubingöra nöngöreñ kabingö tökömakze.

⁴¹ “Gölme ambazipnöñ qetbuña niñgigetka qarimapköra qahö mambötzal. Mi niñgigetka mötpi qahö öngöi maljal.

⁴² Mewö maljalmö, engö könañamñini mi kewö ahöza, mi mötzal: Inini uruñini Anutugöreñ qahöpmahöp jöhöba urukalem qahö ak wanğiba malje.

⁴³ Nöñön Iwinanğö qetñi qeta kabiga inini andö qem niñgimakzemö, kunöñ nanñi qetñi qeta kamawi, inini mönö i ölop möt anğön köla köl öröm wanğime.

⁴⁴ “O inini nanñini möpöseim anğuba qetbuñanñini qarimapkö mötket öngöza. Öngözapmö, bem mohotñan Anutu ölni akzawi, yanön qetbuña engimapköra qahö kapan kölje. Mewö aködamunñinambuk akñegöra qahö jaram tiba kinje. Mianğöra denöwö ni möt narim niñgibeak? Mi mönö osibeak.

⁴⁵ “Nöñön inini ‘Iwigö jemesoholñe keu jakene al engimam,’ mewö mötmöribepuk. Inini Mosesgö keugö jörömqöröm al wanğiba Suep mire öngöbingö mamböta maljemö, Anutugö jene angotketka Mosesnöñ nanñak Anutugö keu jakene ala jim aum engiiga gamuñini mötme.

⁴⁶ “Mi kewögöra: Mosesnöñ nöngö könañamni jim asariba Buña Kimbinöñ ohoi ahöza. Mianğöra Moses möt narim wanğibeak ewö, mönö nia möt narim niñgibeak.

⁴⁷ Mewömö, Mosesgöreñ kimbia qahö möt nariba tem köljeanğöra mönö nöngö keuni mi denöwö möt naribeak? Mi kupuk-kapakñambuk akapuk.” Mewö.

6

Jisösnöñ azi 5000 nene gumohom engiyök.

Mat 14.13-21; Mak 6.30-44; Luk 9.10-17

¹ Mianğö andöñe Jisösnöñ Galili o anğö, qetñi kun Taiberias o anğö qetkeri, mi kutuba likepñe anğorök.

² Kawöl ambazip möhamgöm engii anğöletot asuhui ekeranğöra aka ambazip kambu jesöngöñan Jisösgö andöñe wuatangöba kaget.

³ Jisösnöñ gwarekurupñi engömeiga kundunje öngöba tatket.

* 5:37: Mat 3.17; Mak 1.11; Luk 3.22

⁴ Nalö miangörej Juda neŋgörej ak-kömukömu kendonöŋ törüyök.*

⁵ Jisösnöŋ je ui aniga ambazip kambu jesöŋgöŋan yaŋgörej kaŋgotkeri, i engeka Filipköra jiyök, “Nini nene denikeyök bohonŋi meinga kambu mewöŋan nem timbireŋ aketka dop kölbawak?”

⁶ Yuai akŋangö ahöhi, mi nanŋak mörökmö, keu mi Filip esapköm waŋgiba jiyök.

⁷ Mewö jiiga kewö melenök, “Nene beret silim 200:kö töwaŋi (Kina 1000,-) miangön bohonŋi memba mendenŋinga körek yeŋön kitipŋanöhök nembeak aka töndup qahö dop köl enŋibawak.”

⁸ Mewö jiiga gwarekurupŋi yeŋgöreŋök kun qetŋi Andru, Saimon Pitögö munŋan kewö jii mörök,

⁹ “Azi moröŋi kun kiangörej malja. Yaŋgörej bali† beret 5 aka söra yahöt ahözapmö, ambazip sehisehiŋi kewö kagetka yeŋgöra mi qahö dop kölma.”

¹⁰ Jisösnöŋ jiyök, “Inini mönö ambazip kambu ki jiba mendenŋ enŋigetka nene nemingö eta tatme.” Gölme miangörej kegwaŋ luplup gwötpuk ahöyök. Miangöra azi jaŋgöŋini 5000:gö dop yeŋön gölmenöŋ eta tatket.

¹¹ Eta tatketka Jisösnöŋ beret mi memba saiwap jiba ambazip tatkeri, mendenŋa enŋiyök aka söra mi mewöyök mendenŋa sihimŋinan jigerangö dop enŋiyök.

¹² Mendenŋa enŋiiga memba nem timbireŋ aketka Jisösnöŋ gwarekurupŋi kewö jii mötket, “Nene kitipŋi ayuhubapuköra mi mönö qezaköget.”

¹³ Mewö jiiga möta bali beret 5 miangöreŋök memba kitipŋi kitipŋi mosötket taröhi, mi qezakögetka sakap 12 miangörej geba kokolak qeyök.

¹⁴ Jisösnöŋ aŋgöletot mewö mei asuhiiga ambazipnöŋ eka welipköba jiget, “Kezapqetok azi gölmenöŋ asuhumapkö jigeri, yaŋön mönö ölŋa mia akza.”

¹⁵ Mewö jiba Jisösgöra köiraŋ ala kiŋ kembuŋini akŋapkö mötmöriŋet. Mötmöriba kaba liliköm waŋgiba walimgöba kiŋ kuŋgum waŋgibingö aket. Mewö möt kutuba enŋek tököba enŋömosöta kunbuk kundune öŋgöba nanŋök malök. Mewö.

Jisösnöŋ o aŋgö qakŋe tiba tiba anök.

Mat 14.22-33; Mak 6.45-52

¹⁶ Neget teköiga mare aiga Jisösgö gwarekurupŋi yeŋön o aŋgöŋö jiteŋe geget.

¹⁷ Geba waŋgenöŋ öŋgöba gölme mi mosöta o aŋgö kutuba likepŋe Kaperneam mire göröken anget. Angetka miri söŋaum teköiga Jisösnöŋ töndup yeŋgöreŋ qahö asuhuyök.

¹⁸ Angetka luhut köhöikŋanök giliga o aŋgönöŋ könöpuk kunduta öŋgöba erök.

¹⁹ Öŋgöba eriga lökuatnöŋ qeba nanŋöba 5 me 6 kilomita miangö dop angetka Jisösnöŋ o aŋgö qakŋe tiba tiba waŋge kösutŋe kaiga eka auruba keŋgötporiŋ aket.

²⁰ Mewö mötketka kewö jii mötket, “Nanak kazal. Keŋgötŋini kude mötme.”

²¹ Mewö jii möta Jisösnöŋ waŋgenöŋ öŋgömapkö jigetka öŋgöyök. Öŋgöiga waŋgenŋinan miangöreŋök ösumok enŋuaŋgita gölme görane anbingö akeri, miangöreŋ aŋgotket. Mewö.

Ambazip yeŋön Jisösgöra um jarum bibihiget.

²² Miangörej aŋgotketka miri gianŋiiga ambazip kambu ketanŋi yeŋön o aŋgö likepŋe toroqeba mala kewö mötmöriŋet, “Uran waŋge mohotŋan tari ehinga Jisösnöŋ gwarekurupŋi yembuk waŋgenöŋ qahö öŋgöba anök. Jisös umbula

* **6:4:** Anutunöŋ mönöwök neŋgehoriba neŋgoŋgiröhi, Juda yeŋön miangöra yambu (yara) dop nalö ala söŋgaimakze. Nei keunöŋ qetŋi Pasowa jize. Eksodus 12.15 † **6:9:** Bali mi padi, wit, out aka sehön miangö alaŋini kun.

nanninök anget. Wanje murutnji kun qahö ehin. Mianğöra Jisösnöj kunbuk ki malja.”

²³ Mewö mötmörība tosatñan kewö jiget, “Wanje mohotnöj angetmö, ölña, Taiberias taonök wanje tosatñi kaget. Wanje mi Kembunöj beretkörä saiwap jiiga nemba tarini, mönö gölme mianğö kösutñe kagera Jisösnöj wanje miengöreñök kunöj öngöba anök me denöwö?”

²⁴ Ambazip kambu yeñön mewö jiba Jisös aka gwarekurupñi mianğöreñ qahö miwikñaim enjiget. Mewö eka möta mewöñanök wanjenöj öngöba Kaperneam taonöj anda Jisös jaruget. Mewö.

Jisösnöj malmal köhöikñangö neneñi akza.

²⁵ Ambazipnöj Jisös jaruba o anğö likepñe yuke göröken miwikñaiiba eka kewö jiget mörök, “O Ketañamnini, gi mönö wani nalönöj ki kazan?”

²⁶ Mewö jigetka kewö melenj enjigiyök, “Nöñön keu öl töhöññi kun kewö jibi mötket: Inini anğöletot membi ekeranğöra aka ni qahö jarum niñgizemö, nene beret kötuetköbi nemba nem timbireñ akeri, mönö mianğöra ni nuatanğöba ki kaze.

²⁷ Nene ayapkömawi, mi miwikñaiibingöra urukönöp kude aka malmemö, urugö neneñan malmal köhöikñi enjimakzawi, mönö mia buña qem anğubingöra kapan köla malme. Iwi Anutunöj mungem silimbannji Suep gölmegö Azi Ölñi wanjiiga kukösumñan walöñniga ölop urugö nene enjiiga oyaenköyaen akñe. Mewö aka mal köhöiba kömumba toroqeba teteköñi qahö malme.”

²⁸ Mewö melenj enjiiga kewö qesim wanjiget, “Anutugö sihimñangö dop ahakmeme tandökñi mönö denöwö ahinga dop kölbawak?”

²⁹ Qesim wanjigetka kewö melenñök, “Anutunöj azi melaim wanjiyöhi, inini i möt narim wanjiba malme. Ahakmeme mianñön mönö Anutu sihimñangö dop akza.”

³⁰ Mewö melenñiga kewö qesim wanjiget, “Mewö aiga gi kunbuk wani anğöletot kukñambuk kun menöñga eka möt narim gihibinak? Gi mönö wani yuai kun Mosesnöj ahök, mianğö dop aka meman?”

³¹ *Buña Kimbi kun kewö ohoget ahöza, ‘Yañön Suepnöhök nene beret enjiiga neget.’ Keu mianğö dop nanine ambösakon yeñön gölme qararanğölkölñe anda mala nene qetñi mana nemba malget aka gi mönö könañangi Moses onğita denöwö kondelbanak?”†

³² Qesim wanjigetka Jisösnöj kewö jii mötket, “Inini mianğö könañi ölop qahö möt kutuze. Nöñön keu öl töhöññi kun kewö jibi mötket: Mosesnöj anğöletot Toñi qahö ahök. Yañön nene beret mi Suepnöhök qahö enjii negetmö, nani Iwinan mönö Suepnöhök beret ölbölñi enjimakza.

³³ Anutugö nene beret mi mönö Suepnöhök eta asuhaba gölme dop ambazip malmal köhöikñi enjimakza.”

³⁴ Mewö jii möta kewö jiget mörök, “O Kembu, gi nalö dop nene beret mi neñginöñga nemba malbin.”

³⁵ Jisösnöj mi möta jiyök, “Nöñön malmal köhöikñangö neneñi akzal. Kunñan nöngöreñ kazawi, yañön nem timbireñ aka wösöñi nalö kunöj qahö alma. Kunñan ni möt narim niñgimakzawi, yañön ogöra qahö kömuma.

³⁶ Mewö aigun inini ni nek teköba töndup qahö möt narim niñgize. Mi mönö lök jibi mötze.

* **6:31:** Eks 16.4, 15; Sum 78.24 † **6:31:** Gölme qararanğölkölñe Anutunöj söñan dop söñangö yuai amötñi, jöhanñi tuatñi aka awamñi juzu paura ewö ali gölmenöj ahöi eka yaigep sombemnöj anda qezaköba koumñine kaba beret lölöwöröñi memba nezema. Eks 16.13-36

³⁷ Aka töndup Iwinöŋ ambazip tosatŋi niŋgimakzawi, yeŋön mönö körek nöŋgöreŋ kame. Kunŋan nöŋgöreŋ kamawi, nöŋön mönö i qahö yakörimam.

³⁸ “Nöŋön Suepnöhök eta nani imbinanŋö dop yuai laŋ aka memba malmamgöra qahö asuhuyal. Mewö qahö. Melaim niŋgiyöhi, mönö yanŋö jitkö dop nup memba malmamgöra eral.

³⁹ “Melaim niŋgiyöhi, yanŋö jitsihitŋan kewö ahöza: Yanŋön ambazip nöŋgö böröne al enŋiiga maljei, nöŋön mi pakpak köyan köl enŋiba malbiga yeŋgöreŋök kunŋan kun qahö sohoba ayuhuma. Qahö ayuhugetka nöŋön i nalö ketanŋe enŋömindiba mem gulim enŋimam.

⁴⁰ “Iwinanŋö jitsihitŋan kewö ahöza: Tosatŋan Nahönŋi eka möt narim wanŋizei, yeŋön körek nalö kewöŋe letota malmal köhöikŋi buŋa qem anŋuba malme. Mewö mal kömugetka nöŋön i nalö ketanŋi mianŋöreŋ enŋömindiba mem gulim enŋimam.”

⁴¹ Jisösnöŋ mewö jiiga keu kötŋi kun kewö ahök, “Nöŋön malmalgö nene ölni aka Suepnöhök eta asuhuyal.” Mewö jiyöhanŋöra aka Juda jitŋememe yeŋön möt böliba uruŋinan ihururuk jiba jim wanŋiget.

⁴² Jim wanŋiba jiget, “Azi ki Jisös, Josefko nahönŋa. Yanŋö iwinamŋi mi ölöp möt etkizinmö, mönö denöwögöra ‘Suepnöhök eta asuhuyal,’ jiza?”

⁴³ Mewö jigetka möta kewö melenŋök, “Uruŋinan mönö kude ihururuk jiba jim niŋgime.

⁴⁴ Iwi ni melaim niŋgiyöhi, yanŋön ambazip qahö öröm enŋiza ewö, enŋöreŋök kunŋan nöŋgöreŋ kamamgö osima. Öroi kabawak ewö, nöŋön i mönö nalö ketanŋe enŋömindiba mem gulim wanŋimam.

⁴⁵ * “Kezapqetok yeŋgöreŋ kimbinöŋ keu kewö ohoget ahöza, ‘Anutunöŋ i körek pakpak kusum enŋii mötme.’ Iwinöŋ ambazip kusum enŋii keu möta urukönömŋine ala maljei, yeŋön mönö körekŋanök nöŋgöreŋ kame.

⁴⁶ Ambazip kunŋan Iwi qahö eka malja. Iwigöreŋök eröhi, yanŋön mohot kun mönö i eka malja.

⁴⁷ Nöŋön keu öl töhönni kun kewö jibi mötket: Kunŋan ni möt narim niŋgizawi, yanŋön mönö malmal köhöikŋi buŋa qem anŋuba mal öŋgöma.

⁴⁸ “Nöŋön malmal köhöikŋanŋö nene ölni akzal.

⁴⁹ Mötket! Enŋö ambösakonuruŋinan gölme qararanŋölkölŋe anda mala nene qetŋi mana memba malgetmö, töndup kömumba gisahöget.

⁵⁰ Yeŋön kömugetmö, nene beret nalö kewöŋe Suepnöhök eta maljawi, kunŋan mi memba mala qahö kömum köhöima.

⁵¹ “Nene beret malmalŋambuk Suepnöhök eröhi, mi nöŋön akzal. Kunŋan nene mi memba malmawi, yanŋön mönö teteköŋi qahö köhöiba malma. Nene wanŋiba malmami, mi nöŋgö busuni. Gölmeŋi gölmeŋi yeŋön köhöiba malmegöra mi al enŋimam.”

⁵² Jisösnöŋ mewö melenŋiga Juda jitŋememe yeŋön sutŋine urukönöpŋöŋ jim qesim anŋuba jiget, “Yei! Azi kianŋön mönö denöwö aka busuni neŋgiiga nembinak?”

⁵³ Mi möta jigetka kewö jii mötket, “Nöŋön keu öl töhönni kun kewö jibi mötket: Inini Suep gölmegö Azi ölnanŋö sepŋi aka busuni qahö neme ewö, malmal köhöikŋi mianŋön mönö enŋö uruŋine qahö ahöma.

⁵⁴⁻⁵⁵ Nöŋgö sepnan o ölni akza aka nöŋgö busunan nene ölni akza. Mianŋöra kunŋan nöŋgö sep busuni nemakzawi, yanŋön mönö letota malmal köhöikŋanŋö buŋaya aka mal öŋgöma. Mewö mal kömuiga nöŋön i nalö ketanŋe mindiba mem gulim wanŋimam.

* 6:45: Ais 54.13

⁵⁶ “Kunḡan nōḡō sep busuni nemakzawi, yaḡōn mōnō nōmbuk qekōtahōba kinakza aka nōḡōn yambuk kinakzal.

⁵⁷ Iwinōḡ Malmal Toḡi aka melaim niḡgiba wōtḡi aka nam kōl niḡgiiga kōhōiba maljal. Mewōḡanōk kunḡan ni nem niḡgimakzawi, nōḡōn mōnō mewōḡanōk yaḡō wōtḡi aka nam kōl waḡgibiga ölöp kōhōiba malma.

⁵⁸ Nene öḡi Suepnōhök erōhi, mi nōḡōn akzal. Enḡō ambōsakonurupḡinan Anutugō nene nemba mala kōmugetmō, nalō kewōḡe enḡōreḡōk kunḡan beret ki nemba malmawi, yaḡōn mōnō tetekōḡi qahō kōhōiba malma.”

⁵⁹ Jisōsnōḡ Kaperneam taongō kōuluk miriḡe kinda keu mi jim kusum enḡiyōk. Mewō.

Gwarek gwōtpukḡan uruḡini böliḡa Jisōs mosōtket.

⁶⁰ Jisōsgō gwarekurupḡi yeḡōreḡōk gwōtpukḡan keu mi mōta jiget, “Keu jit jizawi, mianḡōn mōnō keu kōt ewō lömbōtḡambuk akza. Mi mōringa uruninan lömbōriba bölim tekōza. Mianḡōra mi kunbuk mötḡingō ölan neḡḡōhōiga i mōnō mosōtḡin.”

⁶¹ Gwarek yeḡōn Jisōsgō keugōra möt böliba uruḡinan ihururuk jiba jim waḡgigetka Jisōsnōḡ mi uruḡan enḡuaḡgita mōta kewō jii mötket, “Keu jizali, mi möt bölizē me qahō?”

⁶² Keu mianḡōra möt bölizē ewō, kōnaḡḡep mōnō denōwō asuhubawak? Sueḡ gölmegō Azi öḡḡan mutuk miri mala korōhi, euyaḡḡōreḡ kunbuk liliḡōba öḡḡōi ekḡe ewō, nalō mianḡōreḡ mōnō denōwō mötme?

⁶³ “Uḡa Tōrōḡi yaḡōn ambazip mem gulim enḡimakza. Inḡini gölme ambinōhök ahuba busuḡinambuk akzemō, ahuahū dölökḡe qahō ahuba nannḡini ösumḡinan öne letota Sueḡkō buḡa ahak mi qahōḡmahöp. Uḡa Tōrōḡan malmal kōhōikḡi enḡizawi, nōḡōn keu kōtḡi mi jim tuaribi mōta malḡet.

⁶⁴ Mewō möta malḡetmō, enḡōreḡōk tosatḡan töndup ni qahō möt narim niḡgiba malje.” Denike yeḡōn qahō möt narim waḡgigeri aka daḡōn kōnaḡḡep mamalolo mem waḡḡimawi, Jisōsnōḡ mi kōnakōnahiḡeyōk möta korök. Mianḡōra mewō jiyōk.

⁶⁵ Mewō jiba toroḡeba jiyōk, “Mianḡōra nōḡōn kewō jibi mötme: Nōḡō Iwinan ambazip kun qahō inahöm waḡgiza ewō, yaḡōn mōnō nōḡḡōreḡ kamangō osima.”

⁶⁶ Keu mianḡōra aka gwarek yeḡōreḡōk gwōtpukḡan poraiba ziriḡziriḡ aka mosōta yambuk qahō toroḡeba anda kaget.

⁶⁷ Mianḡōra Jisōsnōḡ gwarek 12 miḡḡōra kewō jiyōk, “Inḡini mōnō mewōḡanōk nōmosōta anbingō mötze me qahō?”

⁶⁸ *Mewō jiḡa Saimon Pitōnōḡ melenḡōk, “O Kambu, nini mōnō dagōreḡ anbinak? Malmal kōhōikḡaḡḡō Buḡa keuḡi mi mōnō göhōreḡ ahōza.

⁶⁹ Göḡōn Anutugōreḡ azi sarakḡi akzani, nini mi möt nariba möt asariba maljin.”

⁷⁰ Mewō melenḡniga Jisōsnōḡ möta jiyōk, “Nōḡōn azi 12 inḡini möwölöhöm enḡial aka enḡōreḡōk kunōḡ mōnō bölöḡaḡḡō bohōḡi akza.”

⁷¹ Judas Saimon Iskariotkō nahōḡḡi yaḡōn gwarek 12 yeḡḡō sutḡine mala kōnaḡḡep mamalolo mem waḡḡiyōk. Jisōsnōḡ keu mi yaḡḡōra möta jiyōk. Mewō.

7

Jisōsnōḡ munurupḡi yembuk keu eraum mötket.

* 6:68: Mat 16.16; Mak 8.29; Luk 9.20

¹ Juda jitnememe yeñon Jisös qebingö kapan kölgerangöra Judia prowins uruñe anda kamamgö tököyök. Miangöra Judia mosöta Galili prowins uruñe anda liliköba maliga köiñ tosatñi teköyök.

² *Mi teköiga Juda yeñgöreñ kendon kun qetñi koumkoum miangö nalöñan töriyök.*

³ Miangöra Jisösgö munurupñan kewö jiget mörök, “Gi kiangöreñ mala angöletot memakzani, mi gwarekurupkan mewöyök ek kutumegöra gi mönö gölme ki mosöta Judia anöñga dop kölma.

⁴ Kunñan nanñak aukñe asuhumamgö mörakzawi, yañon yuai kun tölapñe qahö memakza. Angöletot mewöñi memakzanangöra mönö ambazip kambuñi kambuñi yeñgö jeñine anda asuhaba könañamgi indelman.”

⁵ Munurupñan qahö möt narim wañgiba tönpin malgerangöra aka mewö lañ jiget.

⁶ Mewö jigetka kewö jii mötket, “Urugö nup aukñe memamgö nalöñan qahö kam kuñguiga maljalmö, engö nalöñinan mönö sundan dop anmeangö dop ahöza.

⁷ Gölme ambazipnöñ kazik ak engibingö osimakzemö, nöñon yeñgö ahakmemeñini bölöñi indela nañgöba jibi mötzeangöra mönö ni kazik ak niñgimakze.

⁸ Anmamamgö nalönan mönö qahö kam kuñguza. Miangöra nöñon sösongai kendon kiangöreñ qahö öngömam. Nöñon mire tatpiga iñini ölop endu anda öngöba söngai.”

⁹ Keu mewö jii mötketka Galili prowins uruñe toroqeba malök. Mewö.

Jisösnöñ koumkoum sösongainöñ malök.

¹⁰ Jisösgö munurupñan koumkoum kendongöra angetmö, nanñak mire tata könañep aukñe qahöpmö, tölapköba anda Jerusalem öngöyök.

¹¹ Juda yeñgö jitnememeurupñinan sösongai nalöñe Jisösgö jeñi jaruba qesiqesi aka kewö jiget, “Azi mi denike?”

¹² Ambazip kambu yeñon sutñine Jisösgöra sañep keu gwötpuk jiget. Tosatñan “Azi mi ölop sorokñi,” jigetmö, tosatñan kewö jiget, “Qahö! Yañon mönö ambazip kambu eñololon ak engiiga kahapmahap ahakze.”

¹³ Mewö mewö lañ jigetmö, Juda jitnememe yeñgöra keñgötñini möta malgerangöra kunñan yangö keuñi aukñe qahö jiyök. Mewö.

Jisösnöñ nanñi könañi ambazip kusum engiyök.

¹⁴ Kendon sösongai bibiñe malgetka Jisösnöñ jöwöwöl jike tohoñ uruñe öngöba könahiba ambazip kusum engiyök.

¹⁵ Kusum engiiga Juda yeñon welipköba kewö jiget, “Azi ki mötmöt jake öngöngöñe qahö öngöba töndup Buña Kimbigö könañi denöwö möt soroköza?” Mewö jiba welipköget.

¹⁶ Welipkögetka kewö jii mötket, “Mötmöt Buña jimakzali, nöñon miangö Toñi qahö akzal. Nanak qahöpmö, melaim niñgiyöhi, nöñon mönö yangö mötmötñi memba kaba jimakzal.

¹⁷ Ambazip kunñan Anutugö jitsihitñangö dop aka memamgö mötzawi, yañon mötmöt jibiga miangö Toñi dañon akza, mi möt kutuma. Anutunöñ Buñañi nöñgö urune ali asuhaba me nani imbinangö keu lañ jimakzal?

* **7:2:** Lew 23.34; Dut 16.13 * **7:2:** Juda yeñgöreñ yambu jeñi qeçe sösongai kendonñi mi yambu (yara) dop kewö alget: Wain nupñine anda ip sinni memba koumkoum qeba miangöreñ ahöba wehön 8 söngaiba kendon tata malget. Wehön kondikñe sösongai öngöngöñi alget. Mönöwök gölme qararañkölkölñe yambu (yara) 40 miangö dop opo koumñine ahöba kaba malgeri, mi mötmöriba söngaiget. Lew 23.33-36,39-43; Dut 16.13-15

18 “Kunjan nanji imbiŋe mötmöriba keu jimakzawi, yaŋön nanjak qet-bunjaŋambuk akŋangö mötza. Mewö mötzapmö, melaimelai azi kun toŋan qet-bunjaŋambuk akŋapköra kapaŋ köljawi, yaŋön mönö jitŋememe ölbölŋi geŋmonji qahö akza.

19 Mosesnöŋ Köna keu al enŋii mi ahöza me qahö? Mi ahözapmö, enŋöreŋök kunjan mi qahö tem köla wuatangömakza. Inini mönö wuanöŋgöra kapaŋ köla ni nuŋgubingö mötmörize?”

20 Mewö jii möta ambazip kambu yeŋön kewö melenŋet, “Ömewörömenöŋ mönö uruge geba kinja. Daŋön kapaŋ köla gi guhumamgö mötmöriza?”

21 Mewö melenŋetka jii mötket, “Nöŋön anŋöletot mohot membiga inini körek pakpak auruba köŋkuŋ akze.

22 *Mosesnöŋ silenŋine Anutugö aiwesök yandibingöra jim kutum enŋiyöhi, o Mosesnöŋ mi mutuk qahö jim kutuyökmö, ambösakonurupninan mi könahiba memba malgetka silik mi neŋöreŋ kaiga Sabat kendonöŋ mewöyök azi silenŋini yandimakze.

23 *“Nini Mosesgö Köna keu walöŋnin siŋgisöndok ahubapuköra köhöikŋi mötzin. Mi mötzinmö, keu mi qetala Sabat kendonöŋ mewöyök azi silenŋini yandiba töndup nanŋini qahö jim anŋuba silebile malje. Mewö maljemö, nöŋön azi jömukŋi Sabat kendonöŋ mem ölöwak waŋgiali, mianŋöra mönö wuanöŋgöra mi yom jim niŋgize?

24 Inini ambazip silenŋini miyöhök eka mewö mianöŋ bahösöhamök kewöta keu laŋ jim tekömakzei, mi mönö mosötme. Mi mosöta uruŋini törörök möt kewöta keu ölnanök jim teköme.” Mewö.

Jisösnöŋ Amötqeŋe Toŋi akza me qahö?

25 Jerusalem toŋi yeŋöreŋök tosatŋan kewö jiget, “Azi kapaŋ köla qebingö mötmörizei, yaŋön mönö mia me?

26 Eket, yaŋön ambazip jeŋine aukŋe keu jiiga qahö jim waŋgize. Mewögöra azi kianöŋ Amötqeŋe Toŋi Kraist akzawi, keu mi ölna galömkölköl azi yeŋgö kezapŋine geiga mötze me qahö?

27 Amötqeŋe Toŋi Kraistnöŋ kamapköra jiba kota malgeri, yaŋön ‘Denikeyök asuhumawi, mi kunöŋ kun qahö mötma,’ jizemö, azi kianöŋ denikeyök asuhuyöhi, mi mönö ölöp mötzin.”

28 Mewö eraum mötketka Jisösnöŋ jöwöwöl jikegö tohon uruŋe kinda imbiŋi memba wahöta kusum enŋiba keu kewö jiyök, “Inini nöŋgöra kewö jize, ‘Azi mi möt waŋgiba miriŋi denikegö mi ölöp mötzin.’ Nani kukösum qakŋe qahö asuhuba kinjal. Melaim niŋgiyöhi, yaŋön melaimelai Toŋi ölni aiga i qahö möt kutum waŋgiba malje.

29 Yaŋön melaim niŋgiiga yaŋöreŋök eralaŋgöra i ölöp möt waŋgizal.”

30 Mewö jiiga i memba jöhöbingö mötketmö, nalöŋan qahö kam kuŋguyöhaŋgöra aka kunjan silenŋe qahö meyök.

31 Mewö mötketmö, ambazip kambu yeŋöreŋök gwötpukŋan möt narim waŋgiba kewö jiget, “Kraistnöŋ kamawi, yaŋön mönö azi ki oŋgita anŋöletot memba malma me denöwö? Mewö tandök akza.” Mewö.

Jisös memba jöhömegöra nanŋu galöm melaim enŋigetka kaget.

32 Ambazip kambu yeŋön Jisösgöra mewö goranora jiba jitnakölik akeri, mi Farisi (Köna keugö kapaŋkölköl) yeŋön mötket. Mi möta jike nup galöm yembuk kinda nanŋu galöm (sikiriti) tosatŋi melaim enŋigetka memba jöhöbingö kaget.

* 7:22: Jen 17.10; Lew 12.3 * 7:23: Jon 5.9

³³ Kageetka Jisösnöñ kewö jiyök, “Nöñön embuk nalö töröptökñi toroqeba malmam. Mi malagun engömosöta melaim niñgiiga erali, mönö yangören lilingöba öngömam.

³⁴ Öngöbiga göraim niñgiba malmemö, ni qahö miwikñaim niñgime. Nöñön miri malmami, inini miangören kabingö osime.”

³⁵ Mewö jiiga Juda jitmeme yeñön sutñine kewö erauget, “‘Nini miwikñaim wangibingö osibin,’ jiza. Miangöra mönö denikeangören öngömamgöra jiza? Juda ambazip tosatñan denða kantri tosatñe anda Grik yeñgö sutñine maljei, mönö yeñgören anda Grik ambazip kusum engimamgö möta jiza me?

³⁶ Keu kewö jiza, ‘Göraim niñgiba malmemö, ni qahö miwikñaim niñgime,’ aka keu kun kewö jiza, ‘Nöñön miri malmami, inini miangören kabingö osime.’ Keu yahöt mietkö könañiri denöwö?”

Malmal köhöikñangö oñan mönö jeñi tohoba kañgotma.

³⁷ *Mewö eraugetmö, kendon söñgaigeri, miangö wehön qöndökñi ketanji mianñon kam kuñguiga Jisösnöñ kinda köhöikñanök qeta kewö jiyök, “Kunñan ogöra kömuzawi, yañön mönö nöngören kaba nema.

³⁸ *Buña Kimbigö keu kun kewö ohoget ahöza, ‘Kunñan ni möt narim niñgizawi, yangö uruñeyök malmal köhöikñangö oñan mönö tohoba saksaköba kañgorakña.’ ”

³⁹ Mewö jiyökmö, keu mi Uña Töröñangöra aka kewö jiyök, “Denike eñön ni möt narim niñgizei, inini mönö Uña Töröñi buña qem añguba malme.” Anu-tunöñ Jisös gölmenöñ malöhanñgö dop Suepkö asakmararañi qahö al wanggiiga malök. Miangöra Uña Töröñi qahö melaiiga eta uruñine geiga öne malget. Mewö.

Ambazip sutñine jujul ahui malget.

⁴⁰ Jisösnöñ mewö jiiga ambazip kambu yeñgörenök tosatñan keu mi möta kewö jiget, “Azi kianñon mönö öñña kezapqetok azi asuhumapkö jigeri, mönö mia akza.”

⁴¹ Tosatñan jiget, “Yañön Amötqeqe Tonji Kraist akza.” Mewö jigetmö, tosatñan qetala jiget, “Kraistnöñ mönö denöwö Galili prowinsnöñök kabawak? Mi qahö dop köñja.

⁴² *Buña Kimbinöñ kewö jiza, ‘Kiñ Deiwidnöñ Judia prowinsgö taon moröñi Betlehem miangören malöhi, Kraistnöñ miangörenök asuhuba Deiwidkö gwölönarökurupñi yeñgörenök kunñan akña.’ ”

⁴³ Mewö mewö lañ jigetka ambazip kambu yeñön Jisösgöra aka jula denget.

⁴⁴ Yeñgörenök tosatñan memba jöhöbingö mötketmö, kunñan silene qahö meyök. Mewö.

Juda galöm yeñön Jisös qahö möt narim wangiget.

⁴⁵ Jöwöwöl jikegö kiripo galöm (sikiriti) yeñön lilingöba jike nup galöm aka Farisi (Köna keugö kapañkölköl) yeñgören kagetka kewö jim engiget, “Inini wuanöñgöra i qahö memba kaze?”

⁴⁶ Jim engigetka kewö melenget, “Azi mianñon keu jimakzawi, kunñan nalö kunöñ keu tandökñi mewöñi qahö jiyök.”

⁴⁷ Mewö melengetka Farisi (Köna keugö kapañkölköl) yeñön qesiba jim engiget, “Inini tok eñololon ak engii malje me?”

* 7:37: Lew 23.36 * 7:38: Eze 47.1; Zek 14.8 * 7:42: 2 Sml 7.12; Mai 5.2

⁴⁸ Galömkölköl azi neŋgöreŋök kunŋan mönö i qahö möt narim waŋgiyök. Aka Farisi (Köna keugö kapaŋkölköl) neŋgöreŋök kunöŋ kun uruŋi yaŋgöreŋ göröken meleşnök me qahö?

⁴⁹ Mewö qahöpmaöhöpmö, ambazip kambu Mosesgö Köna keu qahö möt kutuba Jisösgö keu möta kopa keu laŋ jimakzei, yeŋgöra muat! Anutunöŋ mönö i qesuahöm enŋiiga ayuhume.”

⁵⁰ *Mewö jim enŋigetka azi qetŋi Nikodemus mutuk Jisösgöreŋ kaiga qambaŋ waŋgiyöhi, yaŋön mewöyök yeŋgöreŋök kun aka sutŋine tata kewö jii mötket,

⁵¹ “Azi kunöŋ siŋgisöndok ahöhi, mi qahö qesiinga jiiga möta töndup kewöriŋga dop kölja me qahö? Qahö kewöta keuŋi öne jim teköbin ewö, mönö naninak Köna keunini qebin me? Mi qahö dop köлма.”

⁵² Mewö jii möta kewö meleş waŋiget, “Gi mewöyök Jisös ewö meleşda Galili qandak azia akzan me? Galili prowinsnöhök kezapqetok azi kun qahö asuhumawi, mi mötzin. Mewö mi nangak Buŋa Kimbi oyoŋda könaŋi jaruba möt kutuman.”

⁵³ Mewö jitaŋkölik aka jula deŋda miriŋine anget. Mewö.

8

Ambi kunöŋ serowilin aiga miwikŋaiget.

¹ Miriŋine angetmö, Jisösnöŋ anda Oil ip kundupe öŋgöyök.

² Öŋgöba ahöba miri gianjiiga söŋanök kunbuk liliŋgöba jöwöwöl jikenöŋ öŋgöiga ambazip kambu pakpak kaba liliköm waŋigetka eta tata kusum enŋiyök.

³ Kusum enŋiiga Köna keugö böhi aka Farisi (Köna keugö kapaŋkölköl) yeŋön ambi kun waŋgita yaŋgöreŋ kaget. Ambi mianöŋ sero yoŋgorö ahiga miangöra memba jöhögeri, mi waŋgita kambu jeŋine alget.

⁴ Jeŋine ala Jisösgöra jiget, “Böhi, ambi kianöŋ qesabulum ahiga mönö miangöreŋök miwikŋaiba memba kazin.

⁵ *Mosesnöŋ Köna keu ala miangöreŋ ambi mewöŋi mi kötnöŋ gila qeinga kömumapköra jim kutum neŋgiyöha ahöza. Mewö ahözapmö, göŋön yaŋgöra denöwö jiman?”

⁶ Mewö jiba miangöreŋ möndöba Jisös keugö bötaknöŋ öröi qaköiga qebingö könaŋi ahui keu jakeŋe albingöra jiget. Mewö jigetka sipköba eta böröŋan kulem kun gölmenöŋ ohoyök.

⁷ Ohoyökmö, toroqeba kapaŋ köla qesim waŋigetka hök ala wahöta diŋdiŋi kinda kewö jii mötket, “Enŋöreŋök kunŋan siŋgisöndok kun qahö aka maljawi, yaŋön mönö ölop köt mutukŋi memba gila qema.”

⁸ Mewö jii mötketka kunbuk sipköba eta kulem kunbuk gölmenöŋ ohoyök.

⁹ Jisösnöŋ keu jiyöhi, mianöŋ enŋömemba jöhöiga nanŋini siŋgisöndokŋini gamuŋambuk akeri, mi Anutunöŋ kondeliga nanŋini uruŋinan nanŋöba jiiga isikusukŋini qahöwahök. Mianöŋ qahöwahiga keu göröŋ kingetka bohönŋinan mutuk enŋömosöta aniga yaŋgö nemböŋan andöŋe aniga tosatŋi mohot mohot yeŋön mömölaköba körek an teköget. Qöndökŋan aniga Jisösnöŋ zoŋ kuŋguba tari ambinöŋ nanŋök yambuk kinök.

¹⁰ Jisösnöŋ hök ala wahöta diŋdiŋi kinda ambi eka kewö jii mörök, “Ambi, keu jakeŋe al gihibingö jizei, yeŋön mönö denike gi sök ni sök anjeje? Yeŋgöreŋök kunöŋ kinda gi kömumangö keuŋi qahö jim teköza me?”

* 7:50: Jon 3.1-2 * 8:5: Lew 20.10; Dut 22.22-24

11 Jii möta melenök, “O Kembu, kunöñ qahö jim teköm ningizal!” Mewö meleniga jii mörök, “Nöñön mewöyök gi qahö jim teköm gihizal. Gi mönö dölki könahiba siñgisöndok kunbuk kude aka malman.” Mewö.

Gölme dop neñgö asaknini mi Jisös.

12 *Jisösnöñ keu kunbuk suariba kewö jii mötket, “Nöñön ambazip gölmeñi gölmeñi tat anjei, engö asakñini akzal. Kunñan ni nuatanjöba kamawi, yañön mönö söñapnöñ jipjap qahö qeba malmamö, malmal köhöikñanjöba asakñi mianjö uruñe malma.”

13 *Mewö jiiga Farisi (Köna keugö kapankölköl) yeñön kewö jiget mörök, “Nanganök könañamgi nañjöba jim asarimakzani, mianjön mi qahö dop köl köhöiza. Qahö!”

14 Mewö jiget möta kewö jii mötket, “Nöñön denikeyök eta kayali aka denike anda öngömami, mi möt teközal. Mianjöra nanak könañamni nañjöba jim asarimakzali, keu mi mönö ölop dop köl köhöiza. Mi köhöizapmö, iñini nöñgö könani mi ölña qahö möt kutuze.

15 Eñön ambazip silenini miyöhök eka mewö mianjön bahösapsap kewöt engiba keuñini lañ jim tekömakzemö, nöñön ambazip kungö keuñi qahö jim tekömakzal.

16 “Ni nanök qahö maljalmö, Iwi melaim ningiyöhi, yañön mönö nömbuk kini maljit. Mianjöra kungö keuñi jim teköbilenjak ewö, mi mönö diñdiñanök kewöta dopñe jim teköbilenjak.

17 *Yahötñan keu kun urumohot aka nañjöba jiyohotka dop köl köhöimakza. Keu mi engö Köna keuñine mewöyök ohoget ahöza.

18 “Nöñön nani könañamni nañjöba jimakzal aka Iwi melaim ningiyöhi, yañön mewöyök nöñgö könañamni nañjöba jimakza. Mianjöra yahöt akziga mianjön ölop dop köla köhöim teköza.”

19 Jisösnöñ mewö jii möta kewö qesim wañgiget, “Göhö Iwigi mi denike malja?” Qesim wañgigetka melenök, “Iñini ni aka Iwini netkö könañamniri qahö möta malje. Iñini nöñgö könañamni möt kutubeak ewö, mönö nöñgö Iwini mewöyök möt wañgibeak.”

20 Jisösnöñ jöwöwöl jikegö naluk dum kösutñe kinda ambazip kusum engiba keu mi jiyök. Mi jiyökmö, nalöñan qahö kam kuñguyöhanjöra aka kunñan i qahö memba jöhöyök. Mewö.

“Denike öngömami, iñini mianjöreñ öñgöbingö osime.”

21 Jisösnöñ keu kun kewö toroqeba jii mötket, “Nöñön engömosöta anda malbiga iñini ni göraim ningiba malme aka siñgisöndok akeri, mianjöreñ qekötahöba kinda kömum köhöime. Mianjöra denike öngömami, iñini mianjöreñ öñgöbingö osime.”

22 Juda jitñememe yeñön mi möta jiget, “Kewö jiza, ‘Denike öngömami, iñini mianjöreñ öñgöbingö osime.’ Keu mi denöwö? Imbi aumangöra jiza me?”

23 Mewö jigetka jii mötket, “Iñini gölme kianjö tonji aka maljemö, nöñön miri gölme euyanjö buñaya akzal. Eñön gölmeñöñ ahuba gölme kianjö buñaya aka maljemö, nöñön mutuhök gölme kianjöreñ qahö ahuyal.

24 Qahö ahuba malmalgö könañi nalö dop mala korali, nöñön mönö mia akzal. Nöñgöra mewö qahö möt narize ewö, mönö siñgisöndok akeri, mi qahö mosötpiga mianjöreñ qekötahöba kinda kömum köhöime. Könañi mianjöra aka kewö jibi mötze, ‘Iñini siñgisöndok akeri, mönö mianjöreñ qekötahöba kinda kömum köhöime’. Keu mi ölña.”

* 8:12: Mat 5.14; Jon 9.5 * 8:13: Jon 5.31 * 8:17: Dut 19.15

²⁵ Keu mi möta kewö qesim wangiget, “Gi mönö ninia akzan?” Qesim wangigetka melenök, “Könañamni lök indelbiga mötzei, nöñön mönö mia akzal.

²⁶ Nöñön engöra keu gwötpuk ölop toroqeba jibilenjak aka singisöndok gwötpuk akeri, miangö keunji ölop jim teköbilenjakmö, melaim ningiyöhi, yanön mönö nöngö melaimelai Toni ölnji akza. Yanön keu jiiga yangörenök möta kota maljali, nöñön mönö keu mi aukne jibiga gölmeñi gölmeñi yeñön mörakne.”

²⁷ Mewö melenökmö, Iwigöra keu suariba jiyöhi, yeñön mi qahö möt asariget.

²⁸ Jisösnöñ toroqeba kewö jii mötket, “Nöñön malmalgö könañi nalö dop mala korali, mönö mia akzal. Miangö könañi mi könañep ölop möt asarime. Nöñön yuai kun nani ösumnan me nani imbinangö dop qahö ahakzalmö, Iwinan keu kusum ningiba malöhi, mönö miangö dop keu jitni ki jimakzal. Keu kötnji yahöt miangö könañi mi könañep möt asarime. Injini Suep gölmegö Azi Ölnji kösökögetka eu öngöba kömumawi, nalö miangören mi ölop möt asarime.

²⁹ Melaim ningiyöhi, yanön mönö nömbuk kini maljit. Ahakmeme möri dop köl wangimakzawi, nöñön mönö sundan mia ahakzal. Miangöra yanön qahö nömosöriga nanök qahö maljal.”

³⁰ Keu mewö jiyöhangöra aka ambazip gwötpukñan uruñini melenäda Jisös möt narim wangiget. Mewö.

Abrahamgö gwölönarökurup munenji aka Jisös.

³¹ Jisösnöñ Juda ambazip tosatñan möt narim wangigeri, yengöra keu kewö jii mötket, “Nöngö Buña keunan uruñine geiga miangören qekötahöba kinje ewö, mönö ölnja nöngö gwarekurupni akze.

³² Mewö mala keu ölnangö könañi möt kutugetka Buña keu ölnjan injini bölöñangö kösönöhök pösat engiiga solanji (fri) aka malme.”

³³ *Mewö jii möta melenäda kewö jiget, “Nini Abrahamgö gwölönarökurupñi mala könagesö walñi akzin. Mewögöra azi kunöñ kösö gwarö mem nenjiiga maljinangö jizani, mi qahö. Nini mönö nalö kunöñ etqeqeni mewö qahö aka malin. Aiga gi denöwögöra aka kewö jizan, ‘Kösönöhök pösat engiiga solanji aka malme?’ Keu mi qahö dop kölja.”

³⁴ Mewö jigetka kewö melen engiyök, “Nöñön keu öl töhönñi kun kewö jibi mötket: Singisöndok akzei, körek yeñön singisöndokö welenqeqe omanji töwa qahö aketka miangö kösönjan köpeim engimakza.

³⁵ Köpeim engimakzapmö, welenqeqenöñ tonangö miri uruñe nalö dop qahö mal öngöma. Nannji Nahönñan ölop miriñe nalö teteköñi qahö malma.

³⁶ “Nahönñan bölöñangö kösönöhök pösat engiiga solanime ewö, enön mönö ölnja kösö gwarö qahö solanji (fri) aka malme.

³⁷ Injini Abrahamgö gwölönarökurupñi maljei, mötzalmö, bölöñan uruñini gwözönjawangöra nöngö Buña keunan mösösönihim engiba kondondongöba erakza. Könañi miangöra mönö kapan köla ni nuñgubingö mötze.

³⁸ Nöñön Iwinangö qöhöröñe mala yuai eka mala korali, miangö keunja jimakzal. Enön mewöyök iwininan keu jii mötkeri, miangö dop ahakze.”

³⁹ Jisösnöñ mewö melen engiiga kewö jiget mörök, “Abrahamnöñ mönö nanine iwiambönini akza.” Mewö jiget möta jiyök, “Injini Abrahamgö gwölönarökurupñi akeak ewö, mönö yangö ahakmemeñi wuatangögetka dop kölbawak.

* 8:33: Mat 3.9; Luk 3.8

⁴⁰ Mianğö tandökñi kewö akza: Nöñön Anutugö jitleyök keu möta mianğö dop keu ölbölñi mi jibi mörakze. Nalö kewöñe inini kapan köla azi ni nunğubingö mötzemö, Abrahamnön mewö qahö ahök.

⁴¹ Nannini iwiurupñinağö ahakmeme miyök wuatangöba malje." Mewö jiga jiget mörök, "Serowilinön qahö ahuba iwi qahö (bastet) mi qahö akzinmö, Iwininambuk maljin. Anutunön mohok-kun nannak iwi ak neñgiza." Mewö.

"Bölöñi Toñangö buñaya akze," jiyök.

⁴² Jisösnön kewö jii mötket, "Anutunön nannak iwi ak engibawak ewö, nöñön yanğoreñök eta asuhuyalağöra mönö ölop ni uru jöpaköm niñgibeak. Nani ösumnön nam köliga qahö asuhuyalmö, Anutunön melaim niñgiiga eta maljal.

⁴³ Keu jimakzali, mi wuanöngöra möt asaribingö lömbörimakze? Nöngö keunan uruñini undenjawangöra mi möt kutubingö olan qeba zikzik tökömakze. Mewögöra mi möt asaribingö osimakze?

⁴⁴ "Mönö iwiñini Bölöñi Toñangö buñaya akze. Sihim kömbönañinan mönö iwiñinağö sihimñi bölöñi wuatangöbingöra ahöza. Yanön könakönahineyök ambazip enguget kömukömu azia aka kota malja. Keu ölnan uruñe qahö kinjawangöra aka keu ölni onğita lolonqalolon kinja. Munen jiji azia aka munen jijigö iwiñi akzawangöra munen jimakzawi, mi mönö nannu uruñangöra jimakza.

⁴⁵ "Yanön munen jimakzampö, nöñön keu ölni jimakzal aigun inini ni qahö möt narim niñgimakze.

⁴⁶ Inini körekñan nöngö könani kewö kondelbingö osize: Yanön siñgisöndok aka keuñambuk malja. Könañamni mewö jaruzemö, nöñön keu ölni jimakzali, mi mönö wuanöngöra qahö möt narim niñgize?

⁴⁷ "Kunñan Anutugö buña akzawi, yanön mönö Anutugöreñ keu kezap ala mörakza. Inini Anutugö buña qahö akzeangöra aka keu mi qahö möta möt asarimakze." Mewö.

Jisösnön nanñangöra denöwö jim miwikñaiyök?

⁴⁸ Jisösnön Juda ambazip yeñgö könani indeliga likepñi melenđa kewö jiget mörök, "Gi Samaria prowinsgö lolonqalon azia aknönğa ömewörömenön uruge geiga maljan. Mewö jiba dopñe jizin me qahöwi, mi ölop nangak jinön mörin."

⁴⁹ Mewö möta kewö melenñök, "Ömenön urune qahö geiga maljal. Ni Iwinanök göda qem wangiba maljal aigun töndup eñön gamu qem niñgimakze.

⁵⁰ Mewö ahakzemö, nanak qetbuñanambuk akñangö jaram qahö timakzal. Mohot kunñan mewö akñangö bimñi qeba malja. Azi yanön mohot kewöt niñgiba 'Dop köljan,' jiba jim teköm niñgimakza.

⁵¹ Nöñön keu öl töhöñni kun kewö jibi mötket: Kunñan nöngö Buña keuni tem köla wuatangömakzawi, yanön mönö nalö kunön kömup köhöikñangö buñaya qahö akña."

⁵² Mewö melenñiga Juda jitlememe yeñön Jisös kewö jiget mörök, "Abraham aka kezapqetok ambazip yeñön kömuget aigun göñön töndup kewö jinönğa siksauk akza, 'Kunñan nöngö Buña keuni tem köla wuatangömakzawi, yanön nalö kunön kömup köhöikñangö buñaya qahö akña.' Mewö jizanağöra gi öme kunön uruge geiga maljan. Mi dölkö ölop möt asarizin.

⁵³ Neñgö bömönini Abraham kömuyöhi, göñön mönö i onğita yanğö ketanñi akzan me? Kezapqetok yeñön mewöyök kömuget. Gi nangahöra mötnön onğöiga 'Ketanñi niñia akzal?' jiba mötzan?"

⁵⁴ Mewö jiget möta kewö melenñök, "Nanağöra mötpi onğöiga Anutugö aködamunñi mi nana buña qem anğubilenjak ewö, qetbuñani mi mönö nesak

akawak. Iwinan nanŋi aködamunŋi niŋgiyöhangöra aka qetbuŋanambuk aka maljal. Eŋön yaŋgöra ‘Neŋgö bem Anutunini akza,’ jize.

⁵⁵ Eŋön könaŋi mi ölop qahö möt kutumakzemö, nöŋön i ölop möt waŋgizal. ‘I qahö möt waŋgizal,’ jibileŋak ewö, mönö inŋini ewö tilipqilip azi akileŋak. Ni azi mewöŋi qahö akzalmö, i ölop möt waŋgizal aka yaŋgö keunŋi tem kölakzal.

⁵⁶ Eŋgö bömöŋni Abrahamnöŋ ni gölmenöŋ eta malmamgöra mamböta nalö mi ekŋamgöra uru sösoŋgai aka malök. Nalö kewöŋe Suepnöŋ mal köhöiiga nöŋön asuhubiga nöŋgö nalöni eka miangöra söŋgaiyök.”

⁵⁷ Mewö melenŋiga Juda jitŋememe yeŋön kewö jiget mörök, “Yambugi (yara) 50 qahö oŋgita miangö bapŋe maljan aka ‘Abraham ehal,’ jinöŋga qahö dop kölja.”

⁵⁸ Mi möta jii mötket, “Nöŋön keu öl töhöŋni kun kewö jibi mötket: Abrahamnöŋ qahö asuhuiga nöŋön lök nalö miangöreŋ malal.”

⁵⁹ Mewö jii möta kötnöŋ gila qebingöra köt umburaŋgöba megetmö, Jisösnöŋ tölapköba jöwöwöl jikegö tohoŋi mosöta ölöŋ köla anök. Mewö.

9

Jisösnöŋ jegömöl azi kun mem ölöwahök.

¹ Jisösnöŋ toroqeba köna anda azi kun nam körö uruŋeyök jegömöl asuhuyöhi, mi ehök.

² Mi ehiga gwarekurupŋan qesim waŋgiba jiget, “Ketaŋamnini, yaŋön mönö dagö siŋgisöndoköra aka jegömöl mewöŋi asuhuyök? Nanŋi siŋgisöndoköra me iwinamŋi yetkö siŋgisöndoköra?”

³ Jigetka kewö melenöŋ, “Nanŋak siŋgisöndok kun qahö ahök aiga iwinamŋan siŋgisöndok qahö ahotmö, Anutugö kukösumŋan yaŋgö malmalŋe aukŋe asuhumapköra mewö ahuyök.

⁴ Wehöŋöŋ asariba ahözawaŋgöreŋ mönö melaim niŋgiyöhangö nuwa töp memba malbin. Sunŋem akŋawi, miangöreŋ körek nup membingö osibin.

⁵ *Nöŋön gölmenöŋ malmamaŋgö dop gölmeŋi gölmeŋi eŋgö asakŋini aka asariba malmam.”

⁶ Mewö jiba gölmenöŋ söutköi geiga gwakötak melenŋa jegömöl azigö jene timbilyök.

⁷ Timbiliba kewö jim kutuyök, “Gi mönö Siloam o aŋgönöŋ anda jegi saŋoŋman.” (Siloam qet mi nanine keunöŋ Melaimelai azi.) Mewö jim kutuiga anda jeŋi saŋoŋni tohoiga ui asariiga liliŋgöba miriŋe kayök.

⁸ Mewö kaiga alaurupŋan kösutŋe malgeri aka tosatŋan mutuk nene yuaigöra ulet eŋgiba mali ekeri, yeŋön i eka jiget, “Jegömöl azi nenegö uleta tata malöhi, yaŋön azi mia me?”

⁹ Tosatŋan jiget, “Yaŋön mönö mia.” Tosatŋan jiget, “Qahö, kaisoŋgolomŋi i ewö akzapmö, yaŋön qahö.” Mewö mewö jigetka nanŋak jiyök, “Nöŋön mönö ia akzal.”

¹⁰ Mewö jiiga kewö qesiget, “Jegi mönö denöwö aknöŋga tohoza?”

¹¹ Qesigetka kewö melenŋ eŋgiyök, “Azi qetŋi Jisös qerakzei, yaŋön söutköi gwakötaknöŋ geiga melenŋa jene timbiliba jim kutuba kewö jiyök, ‘Gi mönö Siloam o aŋgönöŋ anda jegi saŋoŋman.’ Mewö jiiga o miangöreŋ anda jeŋi saŋoŋbi tohoiga ubi asariyök.”

¹² Mewö melenŋ eŋgiiga kewö qesiget, “Azi mi denike malja?” Qesim waŋgigetka “Qahö mötzal,” jiyök. Mewö.

Farisi yeŋön jeŋi tohoyöhangöra qeqesi alget.

* 9:5: Mat 5.14; Jon 8.12

¹³ Azi jegömöl malöhi, yañön “Qahö mötzal,” jiiga ambazipnöh i wangita Farisi (Köna keugö kapankölköl) yengören anget.

¹⁴ Jisösnöh söutñan gwakötakupuk melenja jene timbiliba metohoyöhi, mi mönö Sabat kendon nalöñe meyök.

¹⁵ Mianğöra Farisi yeñön mewöyök kewö qesim wangiget, “Jegi mönö denöwö aknöhga tohoza?” Qesim wangigetka kewö melenj engiyök, “Azi mi-añön mönö söutñan gwakötakupuk melenja jene timbiliiga anda jemesoholni sanğonda jeni ubi asariza.”

¹⁶ Mewö melenj engiiga Farisi yengörenök tosatñan jiget, “Azi mianñön Sabat kendon köteközawi, mianğöra mönö Anutugören azia qahö akza.” Tosatñan jiget, “Mewö qahö! Azi gonğoni kunñan mönö denöwö aka anğöletot mewöñi memangö köhöibawak?” Mewö mewö jiba nanñini jula denget.

¹⁷ Mewö dengetka jegömöl azi mianğören kunbuk lilingöba jiget, “Jegi metohoyöhi, yañğöra mönö denöwö jiman?” Mewö jigetka “Kezapqetok azia akza,” jiyök.

¹⁸ Mewö jiiga jeni ölña gömöliyöha tohoiga uyöhi, Juda jitñememe yeñön mi qahö möt nariget. Qahö möt nariba uruyahöt kinda iwinamñi öröm etkigetka kayohot.

¹⁹ Kayohotka kewö qesim etkiget, “Azi ki etkö nahönñira me qahö? ‘Jegömöl asuhuyök,’ jizahotmö, denöwö aka mönö dölki jeni uba ekza?”

²⁰ Qesim etkigetka kewö melenjohot, “Azi ki netkö nahönira akza aka jegömöla asuhuyök, mi ölop mötzit.

²¹ Mewö mötzitmö, denöwö aka dölki jeni uba ekzawi, mi qahö mötzit. Dañön jeni metohoi uzawi, niri mewöyök qahö mötzit. Gömokñi qahö, lök qariba töwatñi jörak alalña aka mötkutukutuñambuk akza. Mianğöra mönö nanñanğö qesigetka könani ölop jima.”

²² Juda jitñememe yengöra kenğötñiri möta mewö jiyohot. Yeñön sutñine keu kewö jöhöba urumohot aka kinget, “Kunñan Jisös Amötqeçe Tonji Kraist akzawi, mewö jim miwikñaima ewö, i mönö köuluk miri kambunöhök közöl wangibin.”

²³ Keu mianğöra aka kewö jiyohot, “Gömokñi qahö, lök qariza. Mianğöra mönö nanñi qesim wangime.”

²⁴ Mianğöra azi jegömöl malöhi, mi kunbuk öröget kaiga kewö jiget mörök, “Azi mi siñgisöndok azia akza, mi mötzin. Mianğöra mönö Anutugö qetbuñani möpöseinöhga aködamunñambuk ahi dop kölma.”

²⁵ Mi möta kewö melenjök, “Siñgisöndok azia akza me qahö, nöñön mi qahö mötzal. Mohot kewöyök mötzal: Nöñön jegömöl malalmö, dölkwöñe kunbuk ölop uba ekzal.”

²⁶ Mewö melenjniga kewö qesim wangiget, “Wani yuaia ak gihiza? Jegi mönö denöwö metohoza?”

²⁷ Qesim wangigetka kewö melenj engiyök, “Nöñön lök melenj engizalmö, eñön keu jizali, mi qahö mötze. Wuanöngöra mi kosikñi kunbuk jibi mötpingö kapan kölje? Eñön mönö mewöyök yañğö gwarekurupñi akingö mötze me?”

²⁸ Mewö melenj engiiga mepaqepaik aka uruqeçe keu töhöreñ kewö jim wangiget, “Gi mönö yañğö gwarekña akzanmö, neñön Mosesgö gwarekurupña maljin.

²⁹ Anutunöh Mosesya Buña keu wangii mötzinmö, azi mianñön mönö igen me waigenök asuhuyöhi, mi qahö mötzin.”

³⁰ Mewö jigetka keu kewö jii mötket, “Yañön denikeyök asuhuyöhi, inñini mianğöra tok kök qeba tönpin akzeañğöra mi welipközal. Ölña welipközalmö, töndup nöngö jeni metohoiga ölop uba ekzal.

³¹ Ambazip gonḡonji yeḡon Anutu köulukögetka qahö möt enḡimakza, mi mötzin. Mi mötzinmö, kunḡan Anutu göda qem waḡgiba diḡgiba keu jiti tem köla wuatangömakzawi, yaḡö köulukḡi mönö kezap ala mörakza.

³² Kun jegömöl asuhuiga kunöḡ kaba jeḡi metohoyöhi, kösohot mewöḡi mi mutuhök qahö möta malin. Suep gölmenöḡ asuhuyohot, nalö miangörenök könahiba kota mala merak miangören kösohot mewöḡi kun qahö mörin.

³³ Anutugörenök qahö kabawak ewö, yaḡon mönö yuai mewöḡi memangö osibawak.”

³⁴ Mewö jii möta kewö jim waḡgiget, “Iwinamgan siḡgisöndokpuk gölöm alohotka siḡgisöndok pakpak miambuk ahuba qarinoḡaḡon merak ninia kusum neḡgimangö mötzan. Mi qahö dop kölja.” Mewö jim waḡgiba közölgetka gumnöḡ erök. Mewö.

Urujenöḡ gömöliiga ilingösöḡ jipjap malmal.

³⁵ Közölgetka gumnöḡ eröhi, keu miangön Jisösgö kezapḡe gei möta azi mi miwikḡaiba kewö jii mörök, “Gi Anutugö Nahönḡi möt narim waḡgizan me qahö?”

³⁶ Mi möta kewö qesiba melenök, “O Ketaḡamni, azi mi daḡon? Mi jinöḡ mötagun i ölop möt narim waḡgimam.”

³⁷ Meleniga kewö jim kutum waḡgiyök, “Gi kewö uba neknöḡ. Göbuk keu jizali, azi mia mönö nöḡon akzal.”

³⁸ Mi möta jiyök, “O Kembu, ni möt narim gihizal.” Mewö jiba sipköba köuluköm waḡgiyök.

³⁹ Jisösnöḡ jiyök, “Nöḡon ambazip kewöta keuḡini jim tekömangöra aka eta gölmenöḡ asuhuyal. Nöḡöra aka tosatḡan jegömöl akzei, yeḡö jeḡini tohoiga ölop uba ek kutume. Tosatḡi jeḡini ölopḡi maljei, yeḡon nöḡöra aka bau jegömöl aka malme.”

⁴⁰ Mewö jiiga Farisi tosatḡan kösutḡe miangören kinda keu mi möta kewö qesiget, “Wae! Nini tok jegömöl azia akzin me? Neḡöra jizan me?”

⁴¹ Mewö qesigetka kewö jii mötket, “Iḡini ‘Jegömöl akzin,’ jibeak ewö, mönö siḡgisöndok qahö ahöm enḡibawakmö, nalö kewöḡe ‘Ölop ek kutuzin,’ mewö jimakzeangöra aka siḡgisöndokḡinan mönö ahöm köhöim enḡima.” Mewö.

10

Lama aka galömḡini ölopḡi.

¹ Jisösnöḡ galöm meme keu kewö jiyök, “Nöḡon keu öl töhöḡni kun kewö jibi mötket: Tosatḡan lama tohoḡ uruḡe öḡgöbingöra naḡgunöhök qahöpmö, sel walöḡda gezei, yeḡon mönö kegwek aka yoḡgorö meme ambazip akze.

² Kunḡan naḡgunöḡ gezawi, yaḡon lama miengö galömḡina akza.

³ Yaḡon kaḡoriga naḡgu galömḡan eka naḡgu öröm waḡgiiga eta qeriga lama yeḡon keu jölḡi ölop möt kutumakze. Galömḡinan nanḡi lamaurupḡi enḡohola qetḡini qeta enḡuaḡgiriga tohoḡini mosöta ölop yaigepḡe anakze.

⁴ “Nanḡi lamaurupḡi pakpak enḡuaḡgiriga tohoḡini mosöta yaigepḡe angetka yaḡon jitiḡememenḡini aka mutuk aniga keu jölḡi möt kutuzeangöra andöḡe wuatangöba anakze.

⁵ Nanḡini galömḡini ölop wuatangömakzemö, kian kunḡan kaiga i qahöpmahöp wuatangöme. Kian yeḡö keu jölḡini qahö möt kutuzeangöra mönö ziriḡziriḡ aka yaḡöra kök ala deḡme.”

⁶ Jisösnöḡ keu tölapḡi mi jii mötketmö, keuḡangö könaḡi qahö möt asariba köḡkuḡ qeget. Mewö.

Jisösnöḡ lama galöm ölopḡi akza.

⁷ Köŋkun qegetka toroqeba engöra kewö jiyök, “Nöŋön keu öl töhöŋŋi kun kewö jibi mötket: Nöŋön lama tohöŋgö nanŋuŋi akzal.

⁸ Nöŋgö andöne kambu galöm pakpak mutuk kageri, yeŋön kegwek aka yongorö meme ambaziwa aket. Mewö akeranŋöra lama yeŋön i qahö möt kutum engiba malget.

⁹ “Nöŋön mohot lama tohöŋgö nanŋuŋi akzal. Denike eŋön Anutubuk köhöiba malbingö jiba nömbuk qekötahöba maljei, nöŋön mönö amöt qem eŋgibiga letotme. Mewö aka lama tohöŋ uruŋe öŋgöba eta yaigep anda nene gölmeŋi möriamŋambuk miwikŋaimakŋe.

¹⁰ Yongorö meme yeŋön wuanöŋgöra kamakze? Yeŋön yongorö memba neŋguba ayuhum neŋgibingöra kamakze. Yuai murutŋi akingöra qahö. Nöŋön mewö qahö akzal. Nöŋön iŋini malmal köhöikŋi miwikŋaiba oyaenŋkoyaenŋ aka malmegöra kaba maljal.

¹¹ “Nöŋön lama galöm ölöŋŋi akzal. Lama galöm ölöŋŋan mönö lamaaurupŋi yeŋgöra aka malmalŋi köleŋda engima.

¹² Kunŋan lama toŋi qahö aka bohon memegörök kaba laŋ galöm köl eŋgimazawi, mi kewö: Kiam kalŋan kaiga eka lamaaurup engömosöta unjurata aniga kiam kalŋan lama engöhöba kiom enguba mendeŋ engima.

¹³ Yaŋön yaigewök kaba bohon memegörök ‘Lama galöm köl eŋgimam,’ mi jitnöŋ jiba lama engöra waimanŋat qahö möta nesampurek qakŋe mala laŋ unjurata anma.

¹⁴⁻¹⁵ *“Nöŋön lama galöm ölöŋŋi akzal. Iwinan ni möt niŋgiiga nöŋön Iwini möt wanŋiba maljal. Mianŋö dop nöŋön nani lamaaurupni möt eŋgibiga yeŋön ni möt niŋgimakze. Nöŋön malmalni lamaaurupni engöra aka köleŋda mosötмам.

¹⁶ Nöŋgöreŋ lama kambu tosatŋi mi mewöyök ahuba malme. Yeŋön lama tohöŋ kianŋö toŋi qahö maljemö, töndup nöŋgö keu jölŋi mörakŋe. Nöŋön i mewöyök eŋguanŋitpiga mianŋö dop anda kamakŋe. Könaŋep kambuŋi kambuŋi mienöŋ mindiriba kambu mohot aketka galöm mohotŋan galöm köl eŋgiiga malme.

¹⁷ “Iwinöŋ kewögöra aka ni urunöŋ jöpaköm niŋgimakza: Nöŋön malmalni mosöta kunbuk guliba mal öŋgömam. Mi Iwigö jeŋe dop kölja.

¹⁸ Malmalni kunŋan qahö noanŋitmapmö, mi nanak köleŋda mosötмам. Iwinan jim kutum niŋgiiga nanak malmalni köleŋda mosötмам aka mianŋö andöŋe kunbuk guliba mal öŋgömam. Kukösum mewöŋi mi nöŋgöreŋ ahöza.”

¹⁹ Jisösnöŋ keu mi jiyöhanŋöra aka Juda jitŋememe yeŋgö sutŋine goranora kunbuk asuhuyök.

²⁰ Yeŋgöreŋök gwötpukŋan kewö jiget, “Ömewörömenöŋ uruŋe geyöhawa mala kahapmahap akza. Mönö wuanöŋgöra keuŋi mötpinak? Muat mosötpin.”

²¹ Tosatŋan jiget, “Keu mewöŋi mi kölkölŋiŋiŋ azigö keu ewö qahö. Ömewörömenöŋ mönö jegömöl ambazip yeŋgö jeŋini denöwö metohobawak?” Mewö erauget.

Juda jitŋememe yeŋön Jisös andö qeget.

²² Mönöwök jöwöwöl jike köl köŋjörata nanŋuŋi öröget. Mi yambu (yara) dop mötmöriba kendongö söŋgaibingöra* Jerusalem tokoget. Nalö mianöŋ kam kuŋguiga kömunŋan kie uru nalö amötŋi ahök.

²³ Jisösnöŋ jöwöwöl jikegö tohöŋ uruŋe kiŋ Solomongö sombem söranŋambuk qetkeri, mianŋöreŋ anda liliköyök.

* **10:14-15:** Mat 11.27; Luk 10.22 * **10:22:** Kendon qetŋi Hanuka mi Disemba 25 könahiba wehöŋ 8 mianŋö dop tata söŋgaiget. Miri pakpak kiwa ohotiriget asariiga ip sinŋi tokoba liŋet köla söhöŋgai aket.

24 Anda liliköiga Juda jitnememe yeñon kaba liliköm wangiba kewö qesim wangiget, “Könañamgi köyatinönga mönö nalö dawik toroqeba mambötpingö mötzan? Gi Amötqeqe Toñi akzan me qahö, mi mönö aukñe jinönga mötpin.”

25 Mewö jim qesim wangigetka kewö melenj engiyök, “Nöñon lök jibiga mötketmö, injini nöngö keuni mi qahö möt narize. Nöñon Iwinangö qetñe anğöletot ahakzali, mianñon mönö könañamni indela nanğöba kondelakze.

26 Mi nanğöba kondelakzemö, injini nöngö lama kambu uruñe qahö mal-jeañgöra aka keuni qahö möt narimakze.

27 “Nöñon mönö lamaurupni möt engibiga yeñon mewöyök nöngö keu jölñi möta ni nuatanğömakze.

28 Nöñon malmal köhöikñi engibiga letota nalö kunöñ qahö kötökñi ayuhume. Kunñan kun i nöngö böröneyök qahö öröba köndenj engima.

29 Nöngö Iwinan i nöngö böröne al engiyöhi, yanñon körek engonğita öngöngöñi ketanji akza. Mianğöra körekñan i nöngö Iwinangö böröneyök öröba köndenj engibingö osime.

30 Ni aka Iwi netkön mönö mohot aka maljit.”

31 Jisösnöñ mewö jiiga Juda jitnememe yeñon kunbuk gölmenöhök köt um-burangöba memba mianñon gila qebingö aket.

32 Mewö aketmö, kewö jim engiyök, “Iwinöñ nam köl niñgiiga anğöletot ketanji gwötpuk aka membiga ekeri, miengöreñök mönö wania kun mötmöröba ni kötnöñ gila nunğubingö mötze?”

33 *Jim engiiga Juda yeñon melenja jiget, “Neñon anğöletot ketanji aknöñangöra aka qahö kötnöñ gila guhubingö akzinmö, Anutu mepaqepaik ak wangizanangö likepñi ak gihibin. Gi gölme azia aigun silegi öne mem öngöba Anutu tandök akñamgö jizan.”

34 *Mewö jigetka Jisösnöñ melenj engiyök, “Buña Kimbinöñ Köna keu kun kewö ohoget ahöza, ‘Anutu nöñon jial: Injini mönö nöngö bemurupni akze.’

35 Buña Kimbigö keu mi mönö pömsöm qahö qemapmö, pöwöwöm ahöma. Mianğöra Anutunöñ keunji ali kaba ambazip buñanina ahöhi, Anutunöñ yeñgö qetñini ‘bemurup’ mewö qet engiyök.

36 Ambazip omanji mewö qet engiyökmö, Iwinöñ azi mem sarahiba melaiiga gölmenöñ eröhi, enñon mönö denöwö aka yanğöra kewö jize, ‘Gi Anutu mepaqepaik ak wangiba maljan.’ Nöñon ‘Anutugö nahöññi akzal,’ keu mewö jibiga enñon mönö wuanöngöra mi mötket qahö dop kölja? Injini Anutugöreñ Buña keu mi qeze me?

37 “Nup memakzali, mi eketka Iwinangö ahakmemegö dop qahö ahakza ewö, mönö kude möt narim niñgime.

38 Iwinangö ahakmemegö dop aka memba maljal ewö, könañamni mewö eka mönö möt narim niñgime. Mi keunangöra aka qahö möt naribeak ewö, mönö anğöletotnanğöra aka töndup möt narim niñgime. Iwinöñ nömbuk qekötahöba kinja aka nöñon Iwibuk qekötahöba kinjali, injini mianğö könañi möt sölöngöba asarimegöra jizal.”

39 Jisösnöñ mewö jiiga kunbuk memba jöhöbingö mötketmö, börö bapñineyök unjurata eta anök.

40 *Engömosöta Jordan o töwatñi kutuba kunbuk likepñe anda Jonöñ mutuk o melun mem engiba malöhi, mianğöreñ anğota nalö tosatñi toroqeba mianğöreñ malök.

* 10:33: Lew 24.16 * 10:34: Sum 82.6 * 10:40: Jon 1.28

⁴¹ Mianğoren maliga ambazip gwötpukñan yangören kangota eka kewö jiget, “Jonön anğöletot mohot kun qahö meyökmö, keu pakpak azi kianğöra jiyöhi, mi mönö keu ölña jiba malök.”

⁴² Kangotkeri, yengörenök gwötpukñan uruñini melenđa möt narim wangiget. Mewö.

11

Jisösgö alañi Lazarusnön kömuyök.

¹ *Betani taongö azi kun qetñi Lazarus mianjön kawöl yöhöi ahöyök. Maria aka Marta darumun yetkön Betani taon mianğorenök malohot.

² *Maria mianjön Kembu o köhökambuknön miriba nöröp jupñan könañi kereñ meyök. Lazarus kawöl yöhöi ahöyöhi, mi yangö nenna.

³ Lazarusnön kawöl yöhöi ahöiga nenyahötñan buzup keu kewö alohotka Jisösgören anök, “Kembu mötnön, alagi yangö ak gihimakzawi, yanön mönö kawöl yöhöi ahöza.”

⁴ Buzup mi anökmö, Jisösnön mi möta kewö jiyök, “Kawöl mianjön azi alani kömumapköra aka qahö asuhum wangii ahöza. Mianğöra qahöpmö, Anutugö Nahönñan i mem ölöwaka mianğöra Suepkö aködamunñambuk aiga ambazipnön könañi mi ek kutuba Anutu möpöseigetka qetbuñan asarim sehima. Kawöl mi mianğöra aka asuhum wangiyök.”

⁵ Jisösnön Marta, yangö munñi aka nenniri Lazarus yengöra ak wangiiiga malök.

⁶ Mewö malökmö, töndup kawölñangö buzupñi möta miri malöhi, mianğorenök sömañ yahöt toroqeba malök.

⁷ Mi mali nalö mi teköiga gwarekurupñi yengöra kewö jii mötket, “Nini mönö Judia prowinsnön lilingöba anbin!”

⁸ Mewö jiiga melenget, “Ketanamnini, Juda yeñon uruwale kapañ köla kötnön gila guhubingö mötket. Mianğöra kunbuk Judia lilingöba anmamgö jizani, mi qahö dop kölja.”

⁹ Mewö melengetka Jisösnön keu kewö jiyök, “Wehögö auañi 12 ahözei, kunñan mianğö asakñe köna anmawi, yanön mönö yuai kunñan qem mizit qahö ak wangima. Gölmegö asakñan asarim wangiiiga ölop eka anma.

¹⁰ Ölop anmapmö, kunñan kiwanñi qahö ahöm wangiiiga sunğem jipjap anmawi, yanön mönö qem mizit miwikñaima.”

¹¹ Keu mi jibagun kewö jii mötket, “Alanini Lazarusnön gaunwat ahözapmö, nönön anda gaunöhök möndöbi wahötma.”

¹² Keu mi möta kewö jiget mörök, “Kembu, ölña gaun ahöza ewö, mönö ölop ahöba ölöwakña.”

¹³ Jisösnön Lazarus kömuyöhangö keu sainñi jiyökmö, gwarek yeñon ‘Gauna ahöza,’ jiyöhi, mianğö möt bibihiba keu könañi qahö möt kutuget.

¹⁴ Qahö möt kutugerangöra Jisösnön aukñeyök jim miwikñaiiba jiyök, “Lazarusnön kömuyöha ahöza.

¹⁵ Nönön yambuk qahö malbiga kömuyöhangöra nönön anda mem gulibiga wahöri eketka mötnaripñinan asuhum köhöima. Mewö aiga engöra söngaiba ‘Simbawon akñe!’ jizal. Mönö wahötketka yangören anin.”

¹⁶ Mewö jim miwikñaiiga Tomas qetñi kun Siwisiwi qetkeri, yanön gwarek alaurupñi yengöra kewö jii mötket, “Nini ölop mohotñe mianğoren anin. Andagun yambuk kömuin.” Mewö.

Malmal Tonan nenyahötñi uruñiri qesawöliyök.

* 11:1: Luk 10.38-39 * 11:2: Jon 12.3

¹⁷ Lazarusnönj kömumba wehön 4 lök qaksirinönj ahöi teköiga Jisösnönj kanjoriga buzupni mewö jiget mörök.

¹⁸ Betani taon mi Jerusalem siti mosöta 3 kilomita anangö dop dowe ahöyök.

¹⁹ Miangöra Juda ambazip gwötpukñan Marta Maria nenñiri kömuyöhanğöra ‘Songon etkekin,’ jiba kaba tatket.

²⁰ Tatketka Martanönj “Jisös kaza,” jiget möta miri mosöta könanönj anda miwikñaiyökmö, Marianönj mire tarök.

²¹ Könanönj miwikñaiba kewö jii mörök, “Kembu, gi kiangörenj malbanak ewö, nenan mönö qahö kömumbawak.

²² Qahö kömumbawakmö, göñön nalö kewöñe mewöñanök Anutugö yuai kungöra köuluköman ewö, mi pakpak ölop miwikñaim gihiiga asuhuma, mewö mötzal.”

²³ Keu mi möta Jisösnönj jii mörök, “Göhö nengan mönö guliba wahötma.”

²⁴ Mi möta Martanönj jiyök, “Gölmegö nalö teteköñe kömukömuñi yeñön wahötmei, yañön mönö nalö ketañi miangörenj guliba wahötmawi, mi möt yaközal.”

²⁵ Mewö jiiga Jisösnönj jii mörök, “Kömupnöhök wahötwahötkö Tonji mi nöñön akzal. Nanak Malmal köhöikñangö Tonji akzal. Miangöra kunñan ni möt narim niñgizawi, yañön kömumapmö, töndup toroqeba mal köhöiba malma.

²⁶ Kunñan kun gölmenönj mala möt narim niñgiza ewö, yañön mönö nalö kunönj qahö kömum köhöima. Qahö! Keu mi möt narizan me qahö?”

²⁷ Martanönj keu mi möta jiyök, “O Kembu, mi möt narizal. Göñön Anutugö Nahönñi akzan. Amötqeqe Tonji Kraist gölmenönj asuhumapkö jigeri, göñön mönö mia akzan. Mewö möt narizal.” Mewö.

Jisösnönj sahöri imbilñan erök.

²⁸ Martanönj keu mewö jiba miriñe lilingöba anda munñi Mariagöra keu ölonj jiiga görañe kaiga jiyök, “Böhinönj kaba könanönj kinda göhöra endu anda ekñangöra jiza.”

²⁹ Mewö jiiga Marianönj keu mi möta miangörenjök i mosöta Jisösgörenj anök.

³⁰ Anökmö, Jisösnönj miri sombemnönj qahö kanjoriga endu Martanönj köna namñe miwikñaiba ehöhi, miangörenjök kinök.

³¹ Juda ambazip yeñön Mariabuk miri uruñe uru qesawölökö tatketka Marianönj zilañ wahöta gumnönj eta aniga eka kewö mötmöriba jiget, “Yañön mönö qaksirinönj anda sahötma.” Mewö jiba yangö andöñe wuatangöba anget.

³² Marianönj anda Jisös kinöhanğörenj angota eka könañe sipköba eta kewö jii mörök, “O Kembu, göñön ki malbanak ewö, nenan mönö qahö kömumbawak.”

³³ Mewö jiba silata qeta sahöriğa Juda ambazip yambuk kaba nañgöba mohotñe sahötkeri, Jisösnönj mi eka wösöñi pölpölgöiga jeñi asöliiga köna böröñi jönömñambuk unduyök.

³⁴ Jönömñambuk undui qesim enjiyök, “I denike alget ahöza?” Qesim enjiiga jiget mörök, “Kembu, kewö kaba eknöñ!”

³⁵ Mewö jigetka Jisösnönj sahörök.

³⁶ Sahöriğa Juda ambazip yeñön eka jiget, “Yei! Mönö alañangöra önöñi qahö ak wañgi malök.”

³⁷ Mewö jigetmö, tosatñan keu mi qeba kewö jiget, “Jegömöl ambazip jeñini metohoba malök ewö, mönö ölop Lazarus jiiga qahö kömumbawak me?” Mewö.

Jisösnönj Lazarus mem guliiga kömupnöhök wahörök.

³⁸ Mewö laŋ jigetka Jisösgö wösöŋi kunbuk pölpölgöiga jeŋi asöliiga qaksirinöŋ anök. Qaksirinöŋ anda yuai kewö ehök: Köt köteŋ urorohoba qamötŋi mianğö uruŋe ala nanğunŋi köt ketaŋan köl közipkögetka tarök.

³⁹ Mi eka kewö jiyök, “Mönö köt qililingögetka anök.” Mewö jiiga azi kömuyöhaŋğö nenŋi Marta yaŋön kewö jii mörök, “O Kembuni, sömaŋ 4 ahözawaŋğöra lök wörönŋambuk akza.”

⁴⁰ Jisösnöŋ mi möta Martagöra kewö jiyök, “Gi möt narim niŋgibanak ewö, Anutugö kukösumŋan aködammunŋambuk asuhuiga ekanak. Mutuk keu mewö jibiga mötnöŋ me qahö?”

⁴¹ Mewö jiiga köt qililingöget aniga Jisösnöŋ eu ui öngöiga kewö jiyök, “Iwi, gi köulukni mötzanaŋğöra aka ‘Pipsaiwap!’ jim gihizal.

⁴² Gi nalö dop köulukni mörakzani, mötzalmö, göŋöŋ melaim niŋginöŋga gölmenöŋ erali, ambazip kambu liliköm niŋgiba ki kinjei, yeŋön mi möta möt narimegöra aka keu ki jizal.”

⁴³ Mewö jiba imbiŋi memba wahöta ketaŋanök qeta kewö jiyök, “Lazarus, gi mönö wahöta kaŋgotnöŋ!”

⁴⁴ Mewö qeriga azi kömukömuŋi yaŋön guliba wahöta kayök. Köna böröŋi opo kawukŋambuknöŋ esuha jemesoholŋi opo jöhanŋan köpeiba jöhöget ahöi dundunŋambuk kayök. Mewö kaiga Jisösnöŋ jiyök, “Mönö dundunŋi pösatketka ölop anma.” Mewö.

Juda galöm yeŋön Jisös kömumapkö anğönaŋ geget.

Mat 26.1-5; Mak 14.1-2; Luk 22.1-2

⁴⁵ Juda ambazip Mariagöreŋ kaŋgota Jisösnöŋ yuai aiga asuhuiga ekeri, yeŋgöreŋök gwötpukŋan uruŋini melenđa Jisös möt narim waŋgiget.

⁴⁶ Möt narim waŋgigetmö, tosaŋan Farisi (Köna keugö kapaŋkölköl) yeŋgöreŋ anda Jisösnöŋ yuai ahöhi, mianğö kösohotŋi jiget mötket.

⁴⁷ Mi jiget mötketka jike nup galöm aka Farisi yeŋön jike kaunsöl jitŋememe öröm eŋgiget tokogetka kewö jiget, “Azi mianğön anğöletot kukösumŋambuk sehisehiŋi memakzawaŋğöra i mönö denöwö ak waŋgiinga dop kölbawak?

⁴⁸ Wakosoraŋ aka yuai kun qahö ak waŋgiinga toroqeba mewö aka malma ewö, mönö ambazip körek pakpak i möt narim waŋgibeak. Mewö aketka Rom gawman yeŋö irimŋini sehöliiga kaba nanini jöwöwöl jikenini aka ambazip kambu ki nenguaŋgitketka öne töhön malbinbuk.”

⁴⁹ Mewö jiget tatketka yeŋgöreŋök kun qetŋi Kaiafas yaŋön yambu (yara) mianğöreŋ jike nup galöm bohonŋi aka nup mia memba malök. Yaŋön wahöta goro keu kewö jii mötket, “Inini uru mötmötŋinaŋğö kinimŋi tok qahö tohoza.

⁵⁰ Inini keu ki ölop qahö kewötze: Nini ambazip kambu körekŋanök ayuhuinga lömböt keta bölökŋi akapuk. Mianğöra azi mohotŋan Juda kambu neŋğö aip selnini ala sohopnini memba kömuiga dop kölma.”

⁵¹ Yaŋön keu mi nanŋi imbiŋe qahö ahuiga jiyökmö, yambu (yara) mianğöreŋ jike nup galöm bohonŋi malöhaŋğöra aka nanŋak keuŋaŋğö könaŋi qahö möta kezapqetok keu jiyök, “Jisösnöŋ ambazip kambu neŋğöra aka kömui dop kölma.” Keu mi ölŋa jiyök.

⁵² Juda ambazip kambu neŋğöröhök qahö kömuyökmö, Anutugöreŋ urumelen könağesö gölme dop denqenđa mal anjini, nini mewöyök mindirim neŋgiiga urumelen kambu mohok aka malbingöra kömuyök. Kömumapkö keuŋi mi qeljiŋe jiyök.

⁵³ Wehön mianğöreŋök könahiba jitŋememe yeŋön tokoba mewö eraum möta Jisös kömumapkö keuŋi jim köhöiba arenŋi alget.

⁵⁴ Mianğöra Jisösnöñ toroqeba Juda yeñgö sutñine aukñe qahö anda kaba malök. Mewö qahöpmö, engömosöta gölme qararanğölkölnağö gorañe anök. Mianğöreñ anda taon qetñi Efraim mianğöreñ aņgota gwarekurupñi yembuk nanñinök malget.

⁵⁵ Juda neñgöreñ ak-kömukömu kendonöñ töriyök.* Mianğöra Juda ambazip gwötpukñan miri dop miriñini mosöta köl könjörat ak aņgubingöra möta Jerusalem sitinöñ öñgöget.

⁵⁶ Jisös jaruba mala jöwöwöl jikegö tohoñ uruñe kinda eraum möta kewö qesim aņguget, “Jisösnöñ sösoñgai kendongöra ki kama me qahöpto? Denöwö mötze?”

⁵⁷ Mewö qesim aņgugetmö, jike nup galöm aka Farisi yeñön jimkutukutu keu kewö algetka sehiyök, “Kunñan Jisösgö ahöm tatatñi eka mötmawi, yañön mönö neñgöreñ kaba buzupñi jii möta anda memba jöhöbin.” Mewö.

12

Marianöñ Jisös o köhöwakñambuknöñ miriyök.

Mat 26.6-13; Mak 14.3-9

¹ Anutunöñ mönöwök neñgehoriba neñgoñgiröhi, mianğö ak-kömukömu kendonñan* töriba sömañi 6 teköiga mianğöreñ kam kungumangö ahök. Jisösnöñ nalö mianğöreñ miri qetñi Betani mianğöreñ anök. Mutuk azi qetñi Lazarus mem gulii kömupnöñök wahöta malöhi, mönö yañgö mire aņgorök.

² Mianğöreñ aņgoriga Jisös göda qem wañgibingöra miri kunöñ nene ohoba mözözömgöget. Martanöñ ohom töñden köl eñgiyökmö, azi Jisösbuk mohotñe tata nene negeri, Lazarusnöñ yeñgö sutñine tarök.

³* Mewö tatketka Marianöñ kelök kirin kun lömbötñi 500 gram mi memba Jisösgöreñ kayök. Kirin mi o umköhöwakñambuk ölni qetñi nad bohonñi öñgöñgöñi ketañi mianğön kokolak qeçeña. Yañön mi memba kaba simin köla Jisös könañe mimbiliba miriba nörop jupñan kereñ meyök. Mewö aiga miri uruñe tatkeri, mi ogö wöronñan pukpuköba dop köla ahöiga mötket.

⁴ Mewö asuhuiga Jisösgö gwarek yeñgöreñök kun qetñi Judas Iskariot, könañep Jisös mamalolo meyöhi, azi mianğön qetala kewö jiyök,

⁵ “O köhöwakñambuk mi mönö wuanöñgöra bohonñi memegöra qahö alök? Iwinağö jitñi! Mi albawak ewö, mönö silim 300:kö töwañi (Kina 1500,-) mianğö dop yöhötibawak. Mia ambazip wanapñi eñgiinga dop kölbawak.”

⁶ Mewö jiyökmö, keu mi ambazip wanapñi yeñgöra waimañat möröhañgöra aka qahö jiyök. Yeñgöra aka qahöpmö, yoñgorö meme azia mala monen gösö kutukutulañini galöm köli monen alget geiga mianğöreñök kitipñi nanñanğöra memba malök. Mönö mianğöra aka mi jiyök.

⁷ Mewö jiiga Jisösnöñ jiyök, “Inini ambi ki mönö kude jim wañgime. Nöñön kömumbiga löm köl niñgimeañgö nalöñi törizawañgöra ölop sileni o umköhöwakñambuknöñ nömiriza.

⁸* Ambazip wanapñi mi mönö nalö dop sutñine malakzemö, nöñön embuk nalöñi nalöñi qahö malmam.” Mewö.

Lazarus qebingö keu jöhöba aņgönañ alget.

⁹ Jisösnöñ Betani mire malöhi, mi Juda ambazip kambu gwötpukñan möta mianğöreñ kaget. Jisösgöröhök qahö kagetmö, Lazarus kömupnöñök mem gulii wahöröhi, i mohot ekingö likeplikkep öröba kañgotket.

* **11:55:** Kendon qetñi Nei keunöñ Pasowa jize. Anutunöñ mönöwök Israel ambazip neñgehoriba neñgoñgiröhi, mianğöra yambu dop nalö ala söñgaimakzema. Eksodus 12.15 * **12:1:** Eksodus 12.15

* **12:3:** Luk 7.37-38 * **12:8:** Dut 15.11

10 Mewö kaŋgotketmö, jike nup galöm yeñon Lazarus mewöyök qein kömumapkö keu jöhöget.

11 Juda ambazip gwötpukñan Lazarusgöra aka Betani anda uruñini melenđa Jisös möt nariget. Mianğöra keu mewö jöhöget. Mewö.

Jisös köirañ kölgetka Jerusalem öngöyök.

Mat 21.1-11; Mak 11.1-11; Luk 19.28-40

12 Mewö aketka ahöba wahöta mianğoreñ ambazip kambulembenöñ ak-kömukömu kendongöra Jerusalem sitinöñ kaŋgota malgeri, yeñon buzup keu kewö mötket, “Jisösnöñ Jerusalem kamamgö könanöñ kaza.”

13 *Keu mewö möta umji böröñi memba könanöñ miwikñaibingö anda kewö jiba qetket,

“Hosana, owe owe! Anutu möpöseizin. Kembangö qetñe kamawi, Anutunöñ mönö kötuetköma! Israel nenğö Kiñ Kembunini owe owe!”

14 Jisösnöñ donki moröñi kun miwikñaiba mianğö qakñe öngöba tarök. Mi kezapqetok keu kun kewö ohoget ahözawangö dop asuhuyök,

15 * “O Jerusalem ambazip Zaion kundunji liliköba maljei, inini mötket, enğö Kiñ Kembuninan mönö kama.

Donki moröñangö qakñe tata kama. Mianğöra kenğötñini mönö kude mötme.”

16 Jisösgö gwarekurupñan yuai asuhuyöhi, mianğö könanji mutuk qahö möt kutugetmö, könanğep ölop möt asariget. Jisösnöñ Suepnöñ öngöba asakmararañambuk malöhi, keu mi nalö mianğoreñ mötmöriba kewö jiget, “Aha! Keu mi mönö Jisösgöra ohoget ahöza aka ambazipnöñ keu mianğö dop ak wangigetka ölnambuk ahök.”

17 Ambazip Jisösbuk Betani malgeri, yeñon dangunu ewö kinda buzupñi jim sehiget. Jisösnöñ Lazarus qeriga kömupnöhök guliba wahöta qaksirigö köt köteñ mosöta kaŋgoriga ambazip kambunöñ ekeri, yeñon Jisösgö könanji nanğöba jiba jim asariget.

18 Jisösnöñ anğöletot mi meyöhi, keu mi mötkerañgöra aka ambazip kambunöñ luluñda köl öröm wangibingö anget.

19 Mewö angetka Farisi (Köna keugö kapañkölköl) yeñon nanñinök eraum möta kewö jiget, “Mötket. Gölmeñi gölmeñi ambazip yeñon mönö luluñda öröba yañgö andöñe anakze aka nini keu nup miyök mem bibihiinga ölni kun qahö asuhuza.” Mewö.

Grik ambazip tosatñan Jisös jaruget.

20 Juda ambazip ak-kömukömu kendongöra Jerusalem sitinöñ öngöba Anutu waikñi memba möpöseigeri, yeñgö sutñine Grik ambazip tosatñi mohotñe malget.

21 Yeñon gwarek qetñi Filip yañgoreñ kaget. Filipnöñ Galili prowinsgö taon qetñi Betsaida mianğö azia malök. Grik yeñon yañgoreñ kaba qesiba kewö jiget mörök, “Ketañamnini, nini sihimninan Jisös ekingö mötzin.”

22 Mewö jiget möta Andrugoreñ anda keu mi jii mörök. Jii möta mohotñe anda Jisös jiyohot mörök.

23 Keu mi möta melenđa kewö jiyök, “Suepkö asakmararañan Suep gölmegö Azi Ölni yañgoreñ kunbuk asuhum kutuiga asarimawi, mianğö nalöñan mönö töriza.

24 Nöñon kömupnanğö söpsöp keu öl töhönñi kun kewö jibi mötket: Sehoñ kötni gölmeñöñ qahö geba julma ewö, mönö öne miyök ahöma. Mewö öne ahömapmö, geba julma ewö, korapñan mönö jula öndölböndöl wahöri ölni gwötpuk söhöma.

* 12:13: Sum 118.25, 26 * 12:15: Zek 9.9

25*“Miangö dop denike yeñon malmalñini nanñinangöra angön köla nanñini imbi-imbi siyonşayonji qahö malbingö ak engimakzawi, yeñgö malmalñinan mönö sohoma. Mewö sohomapmö, kunñan kun nanñi malmalñi göragöra ala nia jegep al niñgimawi, yañon mönö malmal ölnji öndölböndölnambuk miwikñaiba köhöiba teteköñi qahö mal öngöma.

26 Kunñan ni welen qem niñgimangö jizawi, yañon mönö ni nuatangöba mali dop kölma. Weleni qemakzawi, mönö ni anda kaba malmamangörenj mewöyök nömbuk malma. Kunñan nömbuk mala weleni qem niñgimakzawi, Iwinöñ mönö i göda qem wañgii malma.” Mewö.

Jisösnöñ kömumba gulimawangö keu saiñi jiyök.

27 Jisösnöñ jiyök, “Wösöni döлки kot gwözöñniga amqam aka maljal. Denöwö jibileñak? Keu jaruzal. O Iwi, gi ölop aua nalö kewöñangö köñjiliñnöhök meköm niñgiman. Töndup kewögöra mewö qahö köulukömam: Aua kiangö sihimbölonji mi mökösonda bisimangöra aka nangak qakne aljan.

28 O Iwi, gi mönö nangi aködamungi al niñgiba qetbuñagi mem qariman.” Mewö köuluköiga Suepnöhök keu kewö asuhaba erök, “Nöñon aködamuni lök al gihiba mewö qetbuñani mem qarial aka toroqeba mem qaribiga sehiba anma.”

29 Keu mi asuhuiga ambazip kambu kinget yeñon mi möta jiget, “Wöl pöndañ qetza.” Tosatñan jiget, “Suep garata kunñan yañgöra keu jiiga kou-rukñi mötzin.”

30 Mewö mewö jigetka kewö jii mötket, “Kouruk mi nöñgöra aka qahö asuhuzapmö, mi engöra aka asuhaba.

31 Nalö kewöñe gölmeñi gölmeñi ambazip ahakmeme bölonji wuatangömakzei, yeñgö kewötkewöt nalöñinan mönö mesohol köl engiza. Anutunöñ yeñgö keuñini jim teköba likepñi melenj engiiga qakñine öngömapkö akza. Nalö kewöñe Anutunöñ Bölonñangö Kembuñi gölme dop galöm köl engimakzawi, mönö i közöliga yaigep etmapkö akza.

32 Yañon etmapmö, nöñgöra kewö asuhuma: Ambazipnöñ gölmenöhök nömemba könakemba kösököm niñgigetka öngöba kinbiga köna ahuiga ambazip gölme dop öröm engibiga luluñda nöñgörenj kaba kambu köla kinme.”

33 Mi kömup denöwöñi kömumawi, miangö keu saiña mewö jii mötket.

34* Ambazip kambu yeñon mi möta kewö jiget mörök, “Nini Köna keu oyoñda kewö mötzin, ‘Kraistnöñ qahö kömumba teteköñi qahö mal öngöba malma.’ Göñon wuanöñgöra kewö jizan, ‘Suep gölmegö Azi Ölnji gölmenöhök memba kösökögetka könakemba öngöba kinma.’ Suep gölmegö Azi Ölnji mi dañon?”

35 Mi möta melenj engiyök, “Asakñan nalö töröptökñi kunbuk sutñine asariba malma. Söñaupnöñ qakñine öngöba turum engii miangö buñaji akepuköra mönö asakñe anda kaba malme. Asakñan ahöm engimawangö dop mönö asakñe malme. Dañon panamanöñ jipjap anda kamakzawi, mönö denike angotmawi, mi qahö mötza.

36 Miangöra asakñan nalö dawik embuk malmawi, nalö miangörenj mi mönö urunöñ möt angön köla malme. Asakñangö könagesö aka malmegöra mönö asakñi mi möt nariba malme.” Jisösnöñ keu mewö jiba engömosöta tölapköba anök. Mewö.

Juda ketañi yeñgö uruköhöikñinan qahö löwöriyök.

37 Jisösnöñ angöletot gwötpuk memba maliga Juda yeñon mi jeñinan eketmö, töndup i qahö möt narim wañgiba silebile malget.

* 12:25: Mat 10.39; 16.25; Mak 8.35; Luk 9.24; 17.33 * 12:34: Sum 110.4; Ais 9.7; Eze 37.25; Dan 7.14

38 *Mewö malgetka kezapqetok azi Aisaiagöreñ keu kun mi ölnambuk asuhuyök. Yañön keu mi kewö ohoyöha ahöza,
 “O Kambu, neñön Buña keu jim asariba uruñini kuñgum engimakzinmö, danñön mi möt naribawak?

Kembunöñ kukösumñi mi mönö dagöra indeli möt asarima?”

39 Amötqeçe Tonji möt narim wañgibingö lömböriba osigeri, Aisaianöñ miangö könañi möta keu kun qeljine kewö jiba ohoyöha ahöza,

40 **“Nanñini jeñinan yuai eka könañi ek kutubepuk me uruñinan keu könañi möt asaribepuk. Mi möt asariba uruñini melenjepuk.*

Uruñini melengetka mem ölöwak engibilenbuk. Yañön mewö asuhubapuköra ambazip jeñini mem gömöliba uruñini gwözöñniga malje.”

41 Jisösnöñ Suepkö asakmararañöñ asariba mali Aisaianöñ mewö eka könañi jim asariba keu mi jiyök.

42 Jitnememe aka galömkölköl azi yengöreñök gwötpukñan mewöyök Jisös möt narigetmö, Farisi (Köna keugö kapañkölköl) yañön köuluk miri kambunöhök közöl engibepuköra mi aukñe qahö jim miwikñaiget.

43 Ambazipnöñ möpöseim engimegöra kapañ kölgetmö, Anutunöñ möpöseim engimapköra mi qemasolokep aket. Mewö.

Jisösgö keuñan ambazip kewöta keunini jim teköma.

44 Tosatñan mewö aketmö, Jisösnöñ keu qeta kewö jiyök, “Kunñan möt narim niñgizawi, yañön niyök qahö möt narim niñgizapmö, kunöñ melaim niñgiyöhi, i mewöyök möt narim wañgiza.

45 Kunñan ni neka mönö melaim niñgiyöhi, i mewöyök ehakza.

46 Ambazip kun ni möt narim niñgizawañön mönö söñaupnöñ qekötahöba malbapuk. Miangöra nöñön eta asuhuba gölmeñi gölmeñi engö asakñina aka maljal.

47 “Nöñön eta asuhuba gölmeñi gölmeñi engö keuñini jim tekömamgöra aka qahö kayalmö, ambazip gölme dop amöt qem engibiga nalö kewöñe letota Suepkö buñaya akñegöra aka kayala maljal. Miangöra ambazip nöñgö Buña keuni möta qahö tem köla wuatangömakzei ewö, nöñön yengö keuñini qahö jim tekömam.

48 Denike yañön jijiwilit ak niñgiba Buña keuni qahö möt añgön köljei, yengö jim teteköñinan mönö kewö asuhuma: Nöñön Buña keu jibi mötkeri, keu miangön mönö nalö ketane keuñini jim teköiga sihimbölöñini miangö dop mötme.

49 “Könañi kewögöra mewö asuhuma: Nöñön Buña keu jiba malali, mi keu omañi qahö. Mi nani imbineyök qahö asuhuiga jiba kota malal. Mewö qahöpmö, Iwi melaim niñgiyöhañön nanñak keu jit denöwö jimami, miangö jim kutum niñgiiga jiba kota maljal.

50 Iwigöreñ jimkutukutu miangön mönö iñini malmal köhöikñe al engimakza, mi mötzal. Miangöra Iwinan mi jimamgö jim kutum niñgiyöhi, mönö miangö dop Buña keu jimakzal.” Mewö.

13

Jisösnöñ gwarek yengö könañini sangoñök.

1 Ak-kömukömu kendonöñ* töriiga Jisösnöñ könañi kewö möt yaköyök, ‘Gölme mosöta Iwinañgöreñ öngömamañgö nalöñan mönö töriza.’ Mewö möt

* 12:38: Ais 53.1 * 12:40: Ais 6.10 * 13:1: Anutunöñ mönöwök Israel ambazip neñgehoriba neñgongiröhi, kendon miangö qetñi Nei keunöñ Pasowa jize. Eksodus 12.15

yaköba nanñi alaurupñi gölmenöñ malgeri, mi uruñan jöpaköm ençgiba mala teteköñe miançgöreñ mewöyök uru jöjöpañi mi kondel ençgiyök.

² Kömumawañgö nalöñan kam kuñgumamgö aiga nalö kunöñ sunçgemgö nene nemingö tokoba mohotñe tatketka yuai kewö asuhuyök: Saimon Iskariotkö nahönñi çetñi Judas i Satanöñ lök sölölohöyök. Jisös mamalolo ak wañgimapkö keuñi mi sañep ali uruñe geiga möta tarök.

³ Jisösnöñ nanñi könani mi kewö möt kutuyök, 'Iwinöñ yuai pakpakö kukösumñi mi nöñgö böröne aliga Anutugöreñök eta mala kunbuk yañgöreñ öñgömamgö akzal.'

⁴ Könani mewö möt kutuba nene nemba tatkerañgöreñök wahöta malukuñi köteköba nupkö opo jöhanñi kun memba kemañe köpeiba jöhöyök.

⁵ Mi jöhöba o joutnöñ mokoï geiga könahiba gwarekurupñi yengö könani sañgoñök. Sañgoñ teköba opo jöhanñi (tauöl) kemañe köpeiba jöhöyöhi, miançön könani kutuyök.

⁶ Sañgoñda anda Saimon Pitögö kemañe kañgoriga kewö jii mörök, "O Kembu gi welençeqe etçeqeñi qahö. Göñön nöñgö könani sañgoñöñga qahö dop kölma."

⁷ Mewö jii möta kewö melençök, "Yuai döлки akzali, göñön miançgö könani nalö kewöñe qahö möt kutuzanmö, kemañepnöñ mi ölop möt asariba malman."

⁸ Melençniga kewö kapañ köla jiyök, "Gi mönö nöñgö könani nalö kunöñ qahöpmahöp sañgoñman." Mewö jiiga kewö jiyök, "Nöñön gi qahö sañgoñ gihimam ewö, gi mönö nöñgö gwarekni toroçeba malmamgö osiman."

⁹ Mewö jiiga Saimon Pitönöñ pörösöl ala auruba melençök, "Kembu, mewögöra gi könananök qahöpmö, böröni aka nöropni mi mohotñe sañgoñman."

¹⁰ Mewö melençniga kewö jii mörök, "Kunñan o ariba kaiga könani tok sañgoñninga töwötñi qahö sarakñi ak teköma. Inini körek lök sarakñi ak teközemö, mohotnöñök sarakñi qahö akza."

¹¹ Dañön mamalolo ak wañgimamgö ahöhi, Jisösnöñ mi möta miançgöra kewö jiyök, "Inini körek sarakñi qahö akze."

¹² *Könani sañgoñ teköba malukuñi kunbuk löngöta eta tari negetka kewö qesim ençgiba jiyök, "Nöñön yuai ak ençgizali, inini miançgö könani möt asarize me qahö?"

¹³ Inini nöñgöra 'Böhi!' aka 'Kembu!' mewö noholakze aka nöñön mi ölna akzal. Miançgöra mi dopñe jimakze.

¹⁴ Nöñön ençgö Kembu Böhiñini aka welençeqe eretñangö silik memba könani sañgoñjal ewö, inini mönö mewöñanök memba et al añguba weleçeqe aka könani sañgoñ añguba malgetka dop kölma. Mi mönö nupñina.

¹⁵ "Nöñön aka kondel ençgizali, inini mönö miançgö dop nañgöba welen çem añguba malme. Mewö malmegöra miançgö silikñi nöñön merak kondel ençgibiga ekze. Mi mötmöriba miançgö tandökñi wuatañgögetka dop kölma.

¹⁶ *Nöñön keu ölö töhöñni kun kewö jibi mötket: Welençeqeñereti aiga toñan öngöngöñi akza. Gwareknöñ böhiñi onçgita öngöngöñi akñamgö osima. Mewöyök azi kembu kunöñ garatañi melaiiga kolek anda nup memakzawi, yañön mönö kembuñangö bapñe malakza.

¹⁷ Inini keu kötni mi merak möt kutuze. Mewögöra silememe mosöta alaurupñini nembö bapñine anda malme ewö, nöñön mönö ençgöra 'I-ia simbawoñ!' jimam." Mewö.

* **13:12:** Luk 22.27 * **13:16:** Mat 10.24; Luk 6.40; Jon 15.20

Kunöŋ mamalolo ak waŋgimapkö qeljine jiyök.

Mat 26.20-25; Mak 14.17-21; Luk 22.21-23

18 **“Keu jizali, mi mönö inini lökŋanök qahö engömeza. Nöŋön niŋja möwölöhöba engömeali, engö könaŋamŋini mönö ölop möt kutuzal. Mewö maljalmö, Buŋa Kimbi kun mianŋön ölnambuk aiga dop kölma. Keu mi kewö, ‘Kunöŋ nöŋgöreŋ nene mohotŋe neziri, yaŋön mönö kelewele aka gwakötŋan tötal niŋgiba nuŋgumamgö jöjöröza.’†*

19 *“Ni ölni könaŋgep asuhumawaŋgö keuŋa mutuk jizal. Mianŋöra ölni asuhumawi, inini nalö mianŋöreŋ nöŋgö könani möt asariba kewö jime, ‘Aha! Malmalgö könaŋi nalö dop mala kota malöhi, yaŋön mönö mia akza.’ Mewö jiba möt narim niŋgimegöra nöŋön keu mi qeljine aukŋe jibiga mötze.*

20 **“Nöŋön keu öl töhöŋŋi kun kewö jibi mötket: Nöŋön ambazip kun melaibi nup memamgöra kaiga kunŋan i köl örozawi, yaŋön mönö ni tok köl öröm niŋgima. Mewöŋanök ni köl öröm niŋgizawaŋön mönö melaim niŋgiyöhi, mönö i mewöyök köl öröm waŋgima.”*

21 *Jisösnöŋ keu mewö jiba wösöŋi kot gwözöŋda jul takömamgö ahiga keu indela kewö jiyök, “Nöŋön keu öl töhöŋŋi kun kewö jibi mötket: Engöreŋök kunŋan ni mamalolo mem niŋgima.”*

22 *Mewö jiiga gwarekurupŋan nanŋini kuŋkaliliŋ uba aŋgehiba nanŋök nanŋök kewö mötmöriŋet, ‘Mönö dagöra jizapto?’ Mewö mötmöriba uruyahöt tönpin tatket.*

23 *Tönpin tata nene negetka Jisösgö wölböt gwarekŋan yaŋgö qöhöröŋeyök tarök.*

24 *Yaŋön tariga Saimon Pitönöŋ nöropŋan gwarek mi söpsöp ak waŋgiba kewö jii mörök, “Keu mi dagöra jizawi, mi qesiba jinöŋ mötŋi.”*

25 *Mewö jii möta lapingöba Jisösgö töptöpŋe naŋgöba kewö qesiyök, “Kembu, azi mi daŋön?”*

26 *Mewö qesiiga melen waŋgiyök, “Beret kitipŋi kuluŋnöŋ kundumgöba kun waŋgimami, yaŋön mönö mi.” Melen waŋgiba beret kitipŋi memba kuluŋnöŋ kundumgöba Judas waŋgiyök. Judasgö iwiŋi qetŋi Saimon Iskariot.*

27 *Beret kitipŋi mi waŋgiiga Satanöŋ mianŋöreŋök Judasgö uruŋe geyök. Mianŋöra Jisösnöŋ i jim kutum waŋgiba kewö jiyök, “Yuai akŋani, mi mönö zilaŋ akŋan.”*

28 *Keu mewö jiyökmö, mi wuanöŋgöra jii möröhi, mi gwarek tosatŋan mohokŋe tata nene negeri, yeŋgöreŋök kunŋan kun qahö möt asariyök.*

29 *Gwarek tosatŋan mianŋöra kewö mötmöriŋet, “Judasnöŋ moneŋ gösögö galömŋa malöhi, mianŋöra kendon nalöŋe yuai osibini, mi bohonŋi memapköra melaiza me ambazip wanapŋi moneŋ yuai kun memba enŋimapköra jiza.”*

30 *Judasnöŋ keu mi ölop möt asariba beret kitipŋi mi memba mianŋöreŋök mosöta yaigep aniga suŋgem ahök. Mewö.*

Jisösnöŋ jöjöpŋ keu döläkŋi jim kutuyök.

31 *Judasnöŋ mosöta yaigep aniga Jisösnöŋ kewö jiyök, “Dölki Anutunöŋ aködamunŋi Suep gölmegö Azi Ölni al teköm waŋgiiga yaŋön Anutugö qetbuŋaŋi mem qarui asuhuza.*

32 *Yaŋön Anutugö qetbuŋaŋi mem qariba Anutubuk qekötahözawaŋgöra Anutunöŋ mönö mewöŋanök yaŋgö qetbuŋaŋi mem qarima. Mi nalö qahö körii mem qaruiŋa asakmararaŋan asuhum tiŋgiri mal öŋgöma.*

* **13:18:** Sum 41.9 † **13:18:** Gwakötŋan tötal niŋgiba nuŋgumamgö jöjöröza, keu mi Israel yeŋgöreŋ dopkeu kun. Könaŋi kewö: Yaŋön uruŋan qetala utaköm niŋgiza. * **13:20:** Mat 10.40; Mak 9.37; Luk 9.48; 10.16

³³ **“O gömökurupni, nöñön nalö töröptökñi kunbuk embuk malmam. Mi mala engömosötpiga könañgep jarum niñgiba malme. Juda yeñgöra kewö jibi mötket, ‘Ni miri anmami, iñini mianğöreñ kabingö osime.’ Keu miyöhök döłki engöra mewöyök jizal.*

³⁴ **“Nöñön jöjopañ keu döłökñi jim kutum engizal: Iñini mönö uruñinan jöpaköm añguba malme. Nöñön urukalem ak engiba malali, iñini mönö mianğö dop jöpaköba urukalem ak añguba malme.*

³⁵ *Sutñine uruñinan jöpaköm añguba malme ewö, ambazip körek yeñön engeka könañamñini möt kutuba kewö jiba malme, ‘Aha! Mönö Jisösgö gwarekurupñi akze.’ ” Mewö.*

Pitönöñ Jisös qañ köłmapkö keu qeljiñe jiyök.

Mat 26.31-35; Mak 14.27-31; Luk 22.31-34

³⁶ *Saimon Pitönöñ Jisös kewö qesim wañgiyök, “Kembu, gi denike anman?” Qesim wañgiiga melenök, “Ni denike anmami, gi mianğöreñ nuatañgöba kamangö osiman. Nalö kewöñe osimanmö, könañgep mia ölop nuatañgöba kaman.”*

³⁷ *Melenñiga kewö qesiyök, “Kembu, ni mönö wuanöñgöra nalö kewöñe gi guatañgöba kamangö osimam? Nöñön mönö malmalni göhöra aka kölenja mosötman.”*

³⁸ *Qesiiga kewö melenök, “Gi ölna malmalgi nöñgöra aka kölenja mosötmanğö jizan me? Keu mi jitkanök jizan. Nöñön keu öl töhöññi kun kewö jibi mötnöñ: Merak kurukñöñ qetmamğö dopdowiiga göñön nalö mianğöreñ qañ köł niñginöñga indimñi karöbut akña.” Mewö.*

14

Jisösnöñ gwarekurupñi urukölalep mem engiyök.

¹ *“Uruñinan mönö waimanjat kude möta wösöbirik kude aka malme! Mönö Anutu möt narime aka ni mohok möt narim niñgiba malme!*

² *Nöñgö Iwinañgö miri bohonñe miri uruñi sehiseñi ahöze. Mi qahö ahöbeak ewö, mönö engöra keu kewö jibileñak: Nöñön mönö mianğöreñ öñgöba engö dum miri mem möhamgömam.*

³ *“Nöñön mutuk anda öñgöba engö dum miriñini mem möhamgömam-mö, nöñön miri malmami, iñini mewöyök nömbuk mianğöreñ mohotñe malbingö sihimñi mötzal. Mianğöra nöñön mönö kunbuk lilingöba kaba enğuanğitpiga euyañgöreñ öñgöme.*

⁴ *Nöñön miri denike anmami, iñini mianğö könañi lök möt kutuze.” Mewö.*

Iwigöreñ anangö köna mi Jisös.

⁵ *Jisösnöñ mewö jiiga gwarek qetñi Tomas yañön kewö jiyök, “O Kembu, gi miri denike anmani, nini mi qahö mötzin. Mianğöra mianğö könañi mi mönö denöwö möt kutubinak?”*

⁶ *Mi möta kewö jii mörök, “Nöñön Köna akzal. Nöñön Keu ölni aka Malmal köhöikñi akzal. Kunñan Iwigöreñ añgotmamğö möta nöñgöreñ kama ewö, yañön mönö köna miwikñajima. Köna murutñi kun qahö ahöza.*

⁷ *Iñini ni ölna möt kutum niñgibeak ewö, mönö nani Iwini mewöñanök möt kutum wañgibeak. Iñini nalö kianğöreñök könahiba nöñgö Iwini lök eka möt wañgize.”*

⁸ *Mewö jiiga Filipnöñ kewö jii mörök, “O Kembu, gi Iwi kondel neñginöñga neñön i uba ehinga dop köł neñgima.”*

* **13:33:** Jon 7.34 * **13:34:** Jon 15.12, 17; 1 Jon 3.23; 2 Jon 5

⁹ Mi möta Jisösnöñ jii mörök, “O Filip, ni nalö köröp tıntıñi embuk pöndañ malbigun neka töndup könani qahö möt kutuzan me? Kunñan ni nek kutuyöhi, yañön mönö Iwini mewöyök eka malja. Mianğöra gi mönö denöwögöra Iwi kondel neñginöñga ekingöra jizan?”

¹⁰ “Nöñön Iwibuk qekötahöba kinbiga Iwinöñ nömbuk qekötahöba kinjawi, mi möt narizan me qahö? Keu Buña jibiga mörakzei, nöñön keu mi nani uruneyök qahö memba jimakzal. Qahö! Nup memakzali, mi mewöyök Iwi nömbuk qekötahöba kinjawañön nam köl niñgii ölni ahumakza. Mianğöra nup memakzali, mi mönö yañgö nuwa memakzal.

¹¹ “Nöñön Iwibuk qekötahöba kinbiga Iwinöñ nömbuk qekötahöba kinja. Inini mönö mewö möt narim niñgiget. Keu mi jitnöñ jibi möta qahö möt narim niñgibeak ewö, mi mönö aņgöletotni ekzeañgöra aka möt narim niñgime.

¹² Nöñön keu öl töhöññi kun kewö jibi mötket: Denike yeñön ni möt narim niñgizei, yeñön mewöyök ni aņgöletot memba malali, miyöhök memakñe. Miyöhök memakñe aka nalö tosatñe nöñön meali, mianğö dopñi oņgita mi memakñe. Nöñön Iwigöreñ öñgöba malmamañgöra aka aņgöletot öñgöñgöñi ketañ megetka asuhume.

¹³ “Iwinan nöñgöra aka qetbuñañambuk akñapkö mötzal. Mianğöra aka Inini nöñgö qetne wani yuaigöra köulukömei, nöñön mönö mi akñam. Mewö akigun mianñön Iwinañgö qetbuñañi jigetka qarimakña.

¹⁴ Inini yuai kungöra nöñgö qetne köuluköba qesim niñgime ewö, nöñön mönö mi akñam.

¹⁵ Inini uruñinan jöpaköm niñgimakze ewö, mönö nöñgö jöjöpañ keuni tem köla wuatañgöba malme.” Mewö.

Jisösnöñ Uña Töröñi melaimangö jim jöhöyök.

¹⁶ “Nöñön Iwi köuluköm wañgibiga yañön nam köiput Toñi kun eñgiiga eta nöñgö salupni aka teteköñi qahö embuk mal öñgöma.

¹⁷ Nam köiput Toñi mi Uña Töröñi. Yañön keu ölnañgö Toñi akza. Uruñini qahö melenget yeñön i qahö ek kutuba qahö möt wañgize. Mianğöra yeñön i köl öröba möt aņgön kölbingö osimakzemö, Uña yañön lök embuk malja aka könañgep uruñine geba embuk kinma. Mianğöra i kiana qahöpmö, i ölop möt kutum wañgize.

¹⁸ “Nöñön eñgömosötpiga gwani morö ewö qahö aka malme. Ni mönö eñgöreñ lilingöba kamam.

¹⁹ Nalö töröptökñi teköigun gölme ambazip omanñi yeñön ni kunbuk qahö neka malme. Yeñön qahöpmö, uruñini melenğeri, eñön ni ölop nehakñe. Nöñön köhöiba maljalañgöra inini mewöñanök guliba köhöiba malme.

²⁰ Iwi, nani aka inini, nini mohok aka maljin. Nöñön Iwinambuk qekötahöba kinbiga inini nömbuk qekötahöba kingetka nöñön embuk qekötahöba kinjal. Mianğö könañi mi Uña Töröñan uruñine gemawañgö nalöñe ölop möt asarime.

²¹ “Kunñan nani jöjöpañ keuni pakpak möt aņgön köla tem kölakzawi, yañön mönö uruñan ni jöpaköm niñgimakza. Kunñan ni jöpaköm niñgiiga nöñgö Iwinan mönö i jöpaköm wañgimakza aka nöñön i jöpaköm wañgimakzal. Nöñön i jöpaköba könañamni indel wañgibiga möt kutuma.”

²² Jisösnöñ mewö jiiga Judas Iskariotkö wakanñi Judas yañön kewö jiyök, “Kembu, gi denöwögöra könañamgi neñgöreñök indelman aka ambazip uruñini qahö melenğeri, yeñgöra mi köyatim eñgimangö jizan?”

²³ Mewö jiiga kewö melen wañgiyök, “Kunñan uruñan jöpaköm niñgimakza ewö, yañön mönö nöñgö Buña keuni tem köla wuatañgöba malma. Mewö maliga Iwinan i jöpaköm wañgiiga Iwi netkön mönö yañgö uruñe geba pöndañ yambuk mohotñe malbin.

²⁴ Kunḡan ni uruḡan qahö jöpaköm niḡimakza ewö, i mönö nöḡö Buḡa keuni qahö tem köla wuatḡöba malma. Keu jibi mörakzei, mi nani Buḡaya qahöpmö, Iwi melaim niḡiyöhi, yaḡön mi niḡiiga jimakzal.

²⁵ “Nöḡön keu pakpak mi embuk pöndaḡ malali, nalö miḡöreḡ kusum enḡiba malal.

²⁶ Mewö malalmö, Iwinöḡ Uḡa Töröḡi nöḡö qetne melaiiga eta nam köiput (aka tinjonjon) Toḡini akḡa. Yaḡön keu pakpak kusum enḡiba nöḡön qambaḡ keu pakpak enḡiali, mi ölum enḡubapuköra köl gulim enḡimakḡa.

²⁷ “Nöḡön luai enḡizal. Nane luai sorokni qainḡi kun mi albi uruḡine ahöma. Gölmönö ambazip yeḡön luai qem anḡumakzei, nöḡön miḡö tandök ewö kude qem enḡimakzalmö, mi onḡita luai qainḡi kun enḡimakḡam. Miḡöra uruḡinan mönö wösöbirik kude aka keḡöḡḡini kude möta malme.

²⁸ “Nöḡön keu kewö jibiga mötket, ‘Nöḡön enḡömosöta öḡöba mala kunbuk enḡöreḡ lilingömam.’ Inḡini uruḡinan ni öḡa jöpaköm niḡibeak ewö, keu jizali, miḡöra ölöp söḡaibeak. Iwinöḡ nöḡö ketaḡamni akza. Miḡöra ni ‘Iwinḡöreḡ öḡömam,’ jizali, inḡini mi möta ölöp urusösöḡai miwikḡaigetka dop kölbawak.

²⁹ Keu döḡki jibi mötzei, miḡö öḡi biaḡ asuhuma. Öḡi asuhumawi, inḡini nalö miḡöreḡ mi ölöp mötmöriba möt narime. Miḡöra mi nalö kiaḡöreḡ qeljiḡe jibi mötze.

³⁰ “Nalöni törizawaḡöra embuk keu gwötpuk kunbuk jimangö dop qahö mötzal. Böḡöḡö Kembuḡan gölme dop galöm köḡ enḡimakzawi, yaḡön mönö kamangö jöjöröza. Yaḡö ösumḡan mönö luhut qahö al niḡiba kondondöḡöma. Nöḡöreḡ köna mi yaḡön jim kutumawaḡö dop qahö ahöza.

³¹ Qahö ahözapmö, nöḡön Iwi jöpaköm waḡim�kzalaḡöra yuai pakpak keu jim kutum niḡimakzawaḡö dop ahakzal. Göḡme ambazipnöḡ nöḡö könaḡamni mewö jim kusum enḡigetka möt asarimeḡöra mötzal. Miḡöra mönö mosöta wahöta kaḡetka anbin.” Mewö.

15

Jisösnöḡ wain ip bömöḡḡi, neḡön bömöḡḡi akzin.

¹ Jisösnöḡ gwarek yeḡöra kewö jiyök, “Nöḡön wain ip öḡ sorokḡi akiga nöḡö Iwinan wain nupkö toḡi akza.

² Nöḡön ip ewö qak bömöḡḡi akzal. Ip bömöḡḡi pakpak öḡḡini qahö miwikḡaiba gilipitḡi akzei, Iwinan mi kutum gil enḡima. Ip bömöḡḡi pakpak nöḡöreḡ tatketka öḡḡini ahum sirizei, Iwinan mi mönö köḡ köḡjörat enḡima. Ahakmemegö öḡḡi qarim kuwulem sehiseḡḡi miwikḡaimeḡöra mönö mem solanim enḡima.

³ “Inḡini Buḡa keu jibi mötketka miḡön lök mem solaniba köḡ köḡjörat enḡii sarakḡi aka malje.

⁴ Miḡöra enḡön mönö nömbuk qekötahöba kinme. Mewö kingetka nöḡön embuk kinmam. Wain bömöḡḡi kunḡan ip kemaḡe qahö tata tala etza ewö, mi mönö nanḡi nam köḡ anḡuba öḡḡi ahum waḡim�pkö osima. Miḡö dop inḡini mewöḡanök nömbuk qahö qekötahöba kinje ewö, mönö nanḡinök ahakmemegö öḡḡi öne ahum waḡibingö osime.

⁵ “Ni waingö ipḡi akiga enḡön miḡö bömöḡḡi akze. Inḡini nömosöta nanḡinök kinda yuai kun akingö osime. Miḡöra kunḡan nömbuk qekötahöba kiniga nöḡön yambuk qekötahöba kinbiga yaḡön mönö ahakmemegö öḡḡi ömöḡi qahö miwikḡaiba siriba malma.

⁶ Denike yeñon nömbuk qahö qekötahöba kinje ewö, wain ip tonjan mönö i ip böröni ewö kutum engiba gili yaigep anme. Anda soholigetka memba tokoba könöpnöñ gili geba jeme.

⁷ “Yeñon jememö, likepñi inini mönö nömbuk qekötahöba kinme. Mewö kingetka nöngö Buña keunan engö uruñine qekötahöba kinja ewö, inini i me wai buña qem angubingö mötzei, mi mönö Iwi köuluköm wangigetka engima.

⁸ Inini nöngö gwarekurupni aka kingetka ahakmemenjanängö öñi önöñi qahö ahuba eta tatketka malme. Mewö memba malgerangöra Iwinängö qetñan mönö aködamunñambuk aka ahöma.

⁹ Iwinan ni jöpaköm niñgiba malöhi, nöñon mönö miängö dop mohot jöpaköm engiba malal. Inini mönö nöngö urukalem uruñe kinme.

¹⁰ Nöñon Iwinängöreñ jöjöpañ keu tem köla mala kota yangö urukalem uruñe kinjal. Miängö dop eñon nöngö jöjöpañ keuni memba tem köla malme ewö, mönö ölop nöngö urukalem uruñe kingetka jöpaköm engiba malmam.

¹¹ “Nöñon uru sösongai al engibi engöreñ kutuiga uruñini kokolak qei ahöiga önöñi qahö söngaim sehiba malmegöra keu mi jibi mötze.

¹² *Nöngöreñ Köna keu mi kewö: Nöñon uru jöpaköm engiba malali, inini mönö miängö dop nanñini jöpaköm anguba malme.

¹³ Kunñan alaurupñi yeñgöra aka nanñi malmalñi tököba mosötmawi, mi-anñon mönö urukalem öngöngöñi ketanñi akza. Kunñan mi ongita jöpaköm engimangö osima. Urukalem tosatñi mi miängö eretñi.

¹⁴ “Nöñon yuai akñegöra jim kutum engimakzali, inini miängö dop ahakze ewö, mönö nöngö alaurupni akze.

¹⁵ Welenqegegö könañi kewö: Galömñan nupñi denöwö aka memakzawi, mi welenqegeñan qahö mörakza. Miängöra engö qetñini ‘Welenqegeurupni,’ mewö qahö toroqeba engoholmam-mö, Iwinängöreñök Buña keu mörali, mi pakpak mönö engöra indelbiga mötze. Mewögöra qetñini ‘Alaurupni,’ mewö engoholbiga dop kölja.

¹⁶ “O alaurupni, eñon ni qahö möwölöhöm niñgigetmö, nöñon inini möwölöhöba kuñgum engibiga kinje. Miängöra eñon liliköba anda öñi kewö miwikñaiba pöndañ sirigetka ahöahöñi ahi dop köлма: Nöngö qetni qeta yuai mi me mi miängöra Iwi köulukömei, mi mönö engii buñanñini akña.

¹⁷ Inini mönö sutñine jöpaköm anguba malme. Nöñon jöjöpañ keuni mewö jim kutum engizal.” Mewö.

Urumelengö kopañi yeñon inini kazik ak engime.

¹⁸ “Gölmenöñ uruñini qahö melenget yeñon kazik ak engime ewö, mönö keu kewö mi möt kutume: Yeñon mutuk ni mewöñanök kazik ak niñgiba malget.

¹⁹ Inini urumelengö kopa kambunöñ malbeak ewö, kambu-urup mienñon mönö nanñini alaurupñini urukalem ak engibeak. Mi ak engibeakmö, nöñon inini möwölöhöba yeñgö areñnöñök engömembiga murutñi aka malje. Yeñgöreñ ahakmeme bölöñi mi andö qeba maljeangöra aka kazik ak engimakze.

²⁰ *“Nöñon keu kun kewö jibi mötkeri, mi mönö urukönömñine ala mötmörime, ‘Welenqegeñonñ eretñi aiga tonjan ketanñamñi akza. Gwareknöñ böhiñi ongita öngöngöñi akñamgö osima.’ Miängö dop tosatñan ni sesewerowero ak niñgiba mala kotket ewö, tosatñi yeñon mönö nöngö undumurupni inini mewöñanök sesewerowero ak engiba malme. Yeñon nöngöreñ Buña keu möt angön köla malget ewö, inini nöngö keuni jim sehiba malgetka mönö mewöñanök ölop möt angön köla malme.

* **15:12:** Jon 13.34; 15.17; 1 Jon 3.23; 2 Jon 5 * **15:20:** Mat 10.24; Luk 6.40; Jon 13.16

21 Mewö malmemö, ni melaim ningiyöhi, yeñön i qahö möt wangize. Mianğöra silebile qakne yuai kōnañi kōnañi lañ ak engimei, mi mönō nōngö qetbuñanangöra aka asuhum engima.

22 “Nōñön yeñgöreñ qahö eta Buña keu jibi mötpeak ewö, yeñön mönō köpōsहितñinañgö gamuñi qahö möta malbeak. Mewö öne malbeakmō, nalö kewōñe siñgisōndokñini möt tekōba köl turubingö osize. Möndömöndö keuñini mönō denōwō miwikñaibeak?

23 Kunñan ni kazik ak ningizawi, yañön mönō Iwini mewōñanök kazik ak wangiza.

24 Anğöletot öngöñgöñi ketañi meali, mi kunñan kun engö sutñine qahö memba malök. Nōñön mi qahö membilenak ewö, yeñön mönō köpōsहितñinañgö gamuñi mi qahö möta malbeak. Tōñpin malbeakmō, nalö kewōñe nōñön mi membiga ek tekōbagun tōndup ni aka Iwini mewōñanök öne tōhön kazik ak netkiba malje.

25 **“Mewö ak netkiba malgetka Buña keu kun öñambuk ahök. Mosesnōñ kōna keu engiyöhi, mianğöreñ keu mi kewö ohoget ahōza, ‘Yeñön öne tōhön lañ kazik ak ningiba malget.’ Keu mianñön lök öñambuk ahök.*

26 Nōñön Iwigöreñ öngöba köiput Tonji melaibiga engöreñ kaba uruñine geba nañgöm engima. Uña Töröñi yañön keu öñangö Tonji akza. Yañön Iwigöreñök eta nōngö kōnañamni nañgöba jim asarim engiba malma.

27 Yañön mewö malma aka eñön mewōñanök nōngö kōnañamni nañgöba jim asariba malme. Nōñön kōnahiba urugö qenjarök nup memba malali, eñön mönō kōnakōnahiñeyök nōmbuk mala kotket. Mianğöra iñini mönō mi ölop jim asariba malme. Mewö.

16

Jisösgö gwarekurupñi bim engöhöi utal engime.

1 Jisösnōñ toroqeba kewö jiyök, “Iñini tala eta engui janjuñ akepukōra nōñön keu mi qeljiñe jibi mötze.

2 Uruñini qahö melenget yeñön mönō köuluk miri kambuñineyök utal engigetka yaigep eta malme. Kōnañep nalö kun kam kuñgumawi, mianğöreñ iñini nōngöra aka engugetka kömume. Mewö enguba kewö jime, ‘Mewö mianñön Anutugö welenni qeinga Anutugö uruñan ölöwakza.’ Köreñan mewö möt sohoba jime.

3 Yeñön Iwi aka ni netkö kōnañamniri qahö möt asarimakzeangöra aka mewö ak engiba malme.

4 “Mewö tōñpin malmemö, nōñön keu mi qeljiñe engöra jibi mötze. Mianğöra nalö mi kam kuñguiga keu mianğö öñi asuhumawi, iñini nalö mianğöreñ ölop kewö jime, ‘Kraistnōñ kiangö buzup keuñi lök qeljiñe jii mörin.’ Nanak embuk malalañgöra aka keu mi nalö köröñi ahōiga mutuk qahö jibi möta kotket.” Mewö.

Uña Töröñan nupñi kewö memakza:

5 “Nōñön nalö kiangöreñ melaim ningii erali, mönō yangöreñ öngömamgö akzal aigun engöreñök kunñan kun kewö qahö qesim ningiza, ‘Gi denike anman?’

6 Keu mewö jizali, eñön mi möta mianğöra wösöbiriknōñ uruñini kokolak qei malje.

7 “Mewö maljemö, tōndup nōñön mianğö likepñi keu öñi kun kewö jibi mötket: Nōñön engömosöta lilingöba öngömami, mianğö öñan asuhiiga mönō kewö mem ölöwak engima: Nōñön öngöba köiput Tonji melaibiga engöreñ eta

* 15:25: Sum 35.19; 69.4

uruḡine gema. Nöḡön qahö enḡömosöta öḡöbilenḡak ewö, Toḡi yaḡön mönö enḡöreenḡ etmamḡö osima.

⁸ “Köiḡut Toḡi yaḡön eta malmalgö könaḡi kewö kondel enḡiba malma: Gölmē dop siḡgisöndokḡini indela kondeli Anutunöḡ keuḡini jim teköiga solanime me uruḡini qahö melenḡetka keuḡini jim teköba likeḡḡi melenḡgima. Ambazipnöḡ könaḡamḡini mewö eka möt kutume.

⁹ Ni qahö möt narim niḡgizeaḡḡöra siḡgisöndokö könaḡi indel enḡiiga möt kutume.

¹⁰ “Anutugö köna solanḡi möt sohoba nöḡḡöra keu laḡ jimakze. Mianḡöra yaḡön nöḡḡö könaḡamni indela kondel enḡiiga kewö möt kutum niḡgime: Nöḡön solanḡi mala Iwinanḡöreenḡ liliḡöba öḡḡöbiga ni kunbuk qahö neka malme.

¹¹ Bölöḡanḡö Kembuḡi gölmē dop galöm köl enḡimakzapmö, Anutunöḡ yaḡö keuḡi lök jim teköyöha könöḡ siagö Toḡi akḡa. Mianḡö dop körek neḡḡö keunini mewöyök jim teköma.

¹² “Nöḡön ölöḡ keu gwötḡuk toroḡeba jibilenḡakmö, mi nalö kewöḡe jibiga usuḡumburaḡ aka köl gulibingö osibepuk.

¹³ Mi osibepukmö, keu ölnḡanḡö Toḡi, Uḡa Töröḡi yaḡön eta uruḡine geba keu saḡep qei mötme. Mi nanḡi imbiḡanḡö dop laḡ qahö jiba malmapmö, Anutugöreenḡ keu kezap ala mötzawi, yaḡön mönö miyök jimakḡa aka könaḡep yuai asuhumawi, mi qeljiḡe indela jima. Mianḡöra yaḡön enḡömemba keu ölnḡi pakpak mianḡö o anḡöḡe al enḡiiga keu ölnḡanḡö köna tiba anme.

¹⁴ “Yaḡön mönö nane köwenöhök keu memba jim asariba uru kuḡum enḡiba malma. Mianḡöra mönö nöḡḡö könani indeliga nöḡön qetbuḡanambuk ahakḡam.

¹⁵ Iwinanḡöreenḡ yuai pakpak ahözawi, mi mönö nöḡḡö böröne ali ahöza. Mianḡöra jizal, ‘Yaḡön mönö nane köwenöhök keu memba jim asariba uru kuḡum ak enḡiba malma.’ Keu mi mewö.”

Wösöbirik malḡetka melenḡiga urusösöḡgai mötme.

¹⁶ “Nalö töröḡḡi kun teköiga iḡini ni kunbuk qahö nekḡe. Mianḡö andöḡe nalö töröḡḡi kun teköigun mönö asuhum enḡibi ölöḡ kunbuk nekḡe.”

¹⁷ Mewö jiiga gwarekurupḡi yeḡöreenḡök tosatḡan nanḡinök kewö eraum mötket, “Keu kewö jiza, ‘Nalö töröḡḡi kun teköiga iḡini ni qahö nekḡe. Mianḡö andöḡe nalö töröḡḡi kun teköigun mönö asuhum enḡibi ölöḡ kunbuk nekḡe,’ aka keu kun kewö jiza, ‘Ni Iwinanḡöreenḡ öḡḡömam.’ Mewö jiiga mötzini, keu yahöt mianḡö könaḡi mi denöwö?”

¹⁸ Mewö eraum möta uzohola jiget, “Yaḡön ‘Nalö töröḡḡi teköigun,’ jizapmö, keu mianḡö könaḡi denöwö? Mi wuanöḡḡöra jizawi, nini mi qahö möt asarizin.”

¹⁹ Mewö jiba qesim waḡgibingö mötketka Jisösnöḡ enḡek kutuba kewö jii mötket, “Keu kewö jizal, ‘Nalö töröḡḡi kun teköiga iḡini ni qahö nekḡe. Mianḡö andöḡe nalö töröḡḡi kun teköigun mönö asuhum enḡibi ölöḡ kunbuk nekḡe,’ Iḡini mönö keu mianḡö könaḡi jaruba eraum mötze me?”

²⁰ “Nöḡön keu öl töhöḡḡi kun kewö jibi mötket: Nöḡön anbiga iḡini jinḡen köla sahötmemö, uruḡini qahö melenḡet yeḡön laḡ börum memba sösöḡgai aka malme. Iḡini wösöbirik aka malmemö, wösöbirikḡini mianḡön mönö nöḡḡöra aka melenḡda sösöḡgai aka malme.

²¹ Ambinöḡ morö memamḡö nalöḡi kam kuḡuiga masö qeiga qemjen qakḡe morö mezapmö, morö dölöḡḡi memba kinda i eka sösöḡgaiḡḡöra mönö sihimbölöḡi mi ölum qemakza.

22 Mianğö dop inini mewöyök nalö kewöñe wösöbirikpuk maljemö, nöñön könañgep kunbuk asuhuba engekiga inini ölop urusösöñgaibuk malme. Urusösöñgainini mi kunñan kun qahö enğuanğitma.

23 “Nalö mianğöreñ yuai kungöra ni qahö qesim niñgimemö, köulukñini Iwigöreñ algetka diñdiñanök ani amqei malme. Nöñön keu öl töhöññi kun kewö jibi mötket: Inini nöñgö qetnöñ yuai kungöra Iwi köuluköm wañgime ewö, yañön mi mönö tököm enğima.

24 Nömbuk mala kageri, inini nalö mianğöreñ yuai kungöra nöñgö qetne qahö köuluköba malget. Mönö Iwi köuluköba malme. Köulukögetka ölop melen enğima. Mi enğiiga söösöñgaininan asuhum sehiba uruñini kokolak qem teköi malme.” Mewö.

Jisösnöñ gölmegö ahakmeme bölöñi mi luhut alakza.

25 “Keu jibi möta kamakzei, mi keu sainjambuk jibi möta malget. Könañgep nalö kun kam kuñgumawi, mianğöreñ keu saini mi kunbuk qahö qeba jibi mötme. Qahöpmö, Iwinanğö könañi mi aukñe jim asariba malmam.

26 Nalö mianğöreñ inini nöñgö qetni qeta Iwi köuluköba malme. Mianğö könañi kewö: Inini köulukñini Iwigöreñ albingöra nöñgöreñ kunbuk qahö kamakñemö, nanñinak Iwigöreñ diñdiñi köuluköba malme. Nöñön enğö jiti memba Iwigö qahö köulukömam.

27 “Iwinöñ nanñak uruñan jöpaköm enğiba köulukñini kewögöra möta malma: Nöñön Anutugöreñök erali, inini nöñgö könani mewö möt nariba pöndañ uruñinan jöpaköm niñgiba mala kotketka köna mewö ahuiga köulukñini möta malma.

28 Nöñön Iwi mosöta gölmenöñ eta mala gölme mosöta kunbuk lilingöba Iwinanğöreñ öñgömam.”

29 Mewö jiiga gwarekurupñan jiget, “Mötnöñ, keu döлки jizani, mi saini qahö qeba jizan. Mi mönö aukñeyök jinöñga ölop möt asarizin.

30 Nini merak könañamgi kewö möt yaközin: Göñön mönö nanganök yuai pakpak möt tekönöñga kunñan kun qesiba kusum gihimapköra qahö osizan. Mianğöra gi Anutugöreñök etnöñi, nini mi ölop möt narizin.”

31 Mewö jigetka Jisösnöñ melenđa jiyök, “Merak ölop möt narim niñgizemö,

32 mötket, nalö tandökñi kun kama aka mianjön lök mesohol köla nañgunöñ kinja. Nalö mianjön kam kuñguiga enön kenğötñini möta nömosöta denqenđa simbisembel aketka nanök malmam. Töndup nanöhök töhöñ qahö malmammö, Iwinan nömbuk malma. Iwinöñ nömbuk malmawanğöra aka nanöhök töhöñ qahö malmam.

33 Enön toroqeba gölmenöñ mala kahasililiñ qakñe möta malmemö, nömbuk qekötahöba luainöñ malmegöra möta keu qöndökñi ki jibi mötze. Keuyök qahö jizalmö, nöñön gölmegö ahakmeme bölöñi mi lök luhut ala wahijambanñi kusum teköbiga erök. Mianğöra mönö ewebibiñinambuk köhöiba saitñingiti malme.” Mewö.

17

Jisösnöñ nanñanğöra Iwi köuluköyök.

1-2 Jisösnöñ keu mewö jim teköba Suepnöñ göröken ui öñgöiga kewö köuluköyök, “Iwini, göñön gölme dop ambazip pakpak Nahöñgi nöñgö bapne al enğinöñga kukösum qakñe Kembu ak enğizal. Ambazipnöñ Nahöñgi nöñgö keuni ölop qahö andö qeba oñgita malme. Göñön ambazip sutñineyök tosatñi meköba nöñgö böröne al enğiba kewö jim kutum niñginöñ, ‘Gi mönö i körek kusum enğinöñga malmal köhöikñi miwikñaiba malme.’ Nup mi mem teköbiga

Nahöngan qetbuñagi mem qarimapkörä mönö aködamungi niñginöñ. Nöñgö nalöni mi döлки kam kuñguiga kindä mewö köuluközal.

³“Malmal köhöikñangö könañi mi kewö: Göñön mohot Anutu ölni akzan aka azi Jisös Kraist ni melaim niñginöñga erali, ambazipnöñ netkö könañamniri mewö möt kutume. Malmal kömbönañi mewö miwikñaime.

⁴Nup al niñgiba ‘Meman,’ jiba jim kutum niñginöñi, nöñön mi tem köla memba mala meköyal. Aködamungabuk mala qetbuñagi gölmenöñ indel sehibiga aködamunñambuk ahök.

⁵“O Iwi, nöñön gölme qahö asuhuiga Suep mire miangöreñ göhö qöhöröñge asakmararañbuk asariba malal. Asakmararañ miyöhök mönö döлки kunbuk al niñginöñga asuhum kutum niñgiiga kunbuk göhö qöhöröñge asakmararañbuk asariba malmam.” Mewö.

Jisösnöñ gwarekurupñi yeñgöra aka köuluköyök.

⁶“O Iwini, göñön gölme ambazip tosatñi kewöta nöñgö böröne al eñginöñi, nöñön göhö qetbuñagi mi yeñgöra indela kondela malal. Yeñön göhö buñaya aketka göñön i nöñgö böröne al eñginöñga yeñön göhö Buña keugi mi möt añgön köla malje.

⁷Göñön yuai niñginöñga mi pakpak göhöreñök kamakzawi, yeñön mi nalö kewöñe lök möt kutuze.

⁸Göñön keu Buña niñginöñi, nöñön mi gwarekurupni kusum eñgibiga möt añgön köla malje. Ni gömosöta gölmenöñ erali, yeñön mi ölna möt yaköze. Göñön melaim niñginöñga asuhuyali, yeñön mi mewöyök möt narize.

⁹“Ni yeñgöra aka köuluköm gihizal. Urumeleñgö kopa ambazip yeñgöra qahö köuluközalmö, könagesö nöñgö böröne al eñginöñga uruñini melenđa göhö buñaya akzei, mönö yeñgöra aka köuluköm gihizal.

¹⁰Ambazip pakpak nöñgö buña akzei, yeñön mönö göhö buñaya akzei aka ambazip göhö buñaya akzei, yeñön mönö nöñgö buña mewöyök akze. Nani aködamuni al eñgibiga miangö qakñe kindä ahakmemeni aketka nöñgö qetbuñanan qarim sehimakña.

¹¹Ni gölmenöñ malmalni teköiga göhöreñ kotmamgö akzalmö, yeñön toroqeba gölmenöñ malme. O Iwi Töröñi, göñön qetki niñginöñga miangö ösumñan mönö sel jöhöm eñginöñga qahö julme. Netkön mohot aka maljiri, yeñön miangö dop mohot aka malmegöra köuluközal.

¹²*“Nöñön yembuk gölmenöñ mala korali, nalö miangöreñ qetbuñagi niñginöñga miangön sel jöhöm eñgiba malal. Buña Kimbigö keu kunöñ ölnambuk akñapköra azi mohok-kunñan sohoba köñöp siagö buñaya aka sihimbölö möta malma. Nöñön galöm köl eñgialangöra yeñgöreñök tosatñan qahö janjuñ aka sohoget.

¹³Tosatñan qahö sohogetmö, nöñön döлки gölmenöñ mala göhöreñ kamamgöra kaba keu ki jizal: Nöñgö uru sösongainan mönö yeñgöreñ kutui megetka uruñini kokolak qeiga söñgaiba malme. Mewö asuhumapköra köuluközal.

¹⁴Nöñön göhö Buña keugi kusum eñgibiga möta malje. Nöñön gölmegö ahakmeme bölöñi mi qahö wuatangömakzali, yeñön mönö mewöyök mi qahö wuatangöba andö qemakze. Miangöra gölmenöñ uruñini qahö melenget yeñön mönö kazik ak eñgimakze.

¹⁵“Nöñön gölmenöhök eñguangitmangöra qahö qesim gihizalmö, Bölöñi Tonangöreñök añgön köla sel jöhöm eñgiba malmangöra köuluközal.

¹⁶Nöñön gölmegö ahakmeme bölöñi andö qeba mi qahö wuatangöbiga yeñön mewöyök mi andö qeba qahö wuatangömakze.

* 17:12: Sum 41.9; Jon 13.18

¹⁷ Keu ölni mianön mönö mem sarahim engiba malman. Göhö Buña keugan mönö keu öl töhönji akza.

¹⁸ Göñön melaim niñginönga gölme ambazip sutñine anda nup memba malali, nöñön mewöñanök i melaim engibiga gölme ambazip yeñgö sutñine dennda anme.

¹⁹ O Iwini, yeñön keu ölnaño dop malmalñini körek tököm gihimegöra aka bauköm engiba nani malmalni jömuk tököm gihizal.” Mewö.

Jisösnöñ mötnariñ ambazip pakpak neñgöra köuluköyök.

²⁰ “O Iwini, nöñön gwarekurupni yeñgörök aka qahö köuluközalmö, Buña keu jim sehigetka ambazip möt narim niñgimei, mönö yeñgöra aka mewöyök köuluközal.

²¹ Iwi göñön nömbuk qekötahöba kinönga nöñön mewöyök göbuk qekötahöba kinjal. Miangö dop yeñön mewöyök netpuk qekötahöba kinmegöra mötzal. Nangak melaim niñginönga erali, gölme ambazipnöñ mi möt narimegöra aka yeñön körek pakpak mohot aka malmegöra köuluközal.

²² Naniri mohot aka maljiri, yeñön mewöñanök mohot aka malmegöra aka aködamungi al niñginöñi, nöñön mi yeñgöra al engial.

²³ “Nöñön yembuk qekötahöba kinbiga göñön nömbuk qekötahöba kinjan. Miangö dop yeñön keuñini jöhöm teköba mohot aka malmegöra köuluközal. Mohot aka kingetka gölme ambazipnöñ könañamni kewö möt asarime: Göñön melaim niñginöñ etpiga jöpaköm niñgiba malnöñi, miangö dop i mewöyök jöpaköm engiba malnöñ.

²⁴ “O Iwini, göñön gölme qahö miwikñainöñi, qeljine nalö miangöreñ lök urugan jöpaköm niñgiba asakmararañ al niñginönga mala koral. Könañgep alaurup niñginöñi, nöñön yeñön mewöyök asakmararañ mi ekñegöra mötzal. Miangöra nöñön miri malmami, yeñön miangöreñ nömbuk mohotñe malbingö sihimñi mötzal.

²⁵ “O Iwi solanñi, gölme ambazip uruñini qahö melenjeri, yeñön gi qahö möt kutum gihiba mala kotketmö, nöñön gi ölöpñanök möt kutum gihizal. Nangak melaim niñginöñi, nöngö urumelen alaurupnan mi lök möt yaköze.

²⁶ Nöñön göhö qetki mi jim tuarim engibiga möta malget. Göñön urugan jöpaköm niñgiba malnöñi, urukalem mianön uruñine ahöi mötketka nöñön yembuk qekötahöba kinbi malmegöra mönö toroqeba qetki jim tuarim engiba malmam.” Mewö.

18

Jisös memba jöhöget.

Mat 26.47-56; Mak 14.43-50; Luk 22.47-53

¹ Jisösnöñ keu mi jim teköba gwarekurupñi engömeiga siti mosöta geba o qetñi Kidron kutuba likepñe angota arö kun ahöyöhi, miangöreñ anget.

² Jisös aka yañgö gwarekurupñi yeñön qösösök miangöreñ tokoba malget. Miangöra Judas mamalolo mem wañgimangö ahöhi, yañön mewöyök arö mi ölöp mörök.

³ Jike nup galöm aka Farisi (Köna keugö kapañkölköl) yeñön jöwöwöl jikegö kiripo galöm (sikiriti) tosatñi melaim engigetka Judasnöñ i aka gawmangö yarö azi kambu kun engömeiga mohotñe kaget. Yeñön kiwa lambe aka timbi liñgipñini memba bisiba arönöñ kaget.

⁴ Kagetka Jisösnöñ yuai pakpak mewö asuhum wañgimawi, mi lök möröhañgöra aka wahöta aukñe kaba kewö qesim engiyök, “Inñi dagöra jaruze?”

⁵ Qesim enjiiga kewö melenget, “Nini Jisös Nazaret tonji mia jaruzin.” Melengetka kewö jiyök, “Mia nöñön.” Judas mamalolo meme azi yanñon mewöyök yembuk kinök.

⁶ “Mia nöñön,” Jisösnöñ keu mewö jiiga möta andöandö anda gölmenöñ tala eta enguyök.

⁷ Mewö aketka kunbuk qesim enjiyök, “Inini mönö dagöra jaruze?” Qesim enjiiga jiget, “Jisös Nazaret tonji ia jaruzin.”

⁸ Jigetka melenök, “Mia nöñön, mi lök jibi mötze. Inini nia jarum ningize ewö, mönö azi ki ölop engömosötketka öne anme.”

⁹ Mutuk köuluköba gwarekurupñi yengöra keu kun kewö jii mötket, “Ambazip nöñgö böröne al enjinöñga maljei, nöñön mi köyan köl engiba malbiga yengöreñök kunöñ kun qahö sohoba ayuhuyök.” Keu mianñon ölnambuk akñapköra Jisösnöñ jitñememe yengöra keu mewö jiyök.

¹⁰ Mewö jiiga Saimon Pitönöñ bingö sou ketanji memba malöhi, yanñon mi kupinneyök öröba jike nup galöm bohonñangö welen aziñi qeba kezapñi öñje göröken köteköi erök. Welenqege azi mi qetñi Malkus.

¹¹ *Mewö asuhuiga Jisösnöñ Pitö kewö jim kutum wanjiyök, “Gi bingö sou ketanji mi mönö kunbuk alnöñga kupinñe geyök. Iwinan sihimbölögö qambi o qölnambuk nöñgö buñaya qeyöhi, mi ölop möta mökösoñda mesohol kölmam.” Mewö.

Jisös wanjitetka Anasgö jeñe kinök.

¹² Suahö galömñinan jiiga yarö azi kambu aka Juda yengö nanju galöm (sikiriti) yeñon Jisös memba jöhöget.

¹³ Jöhöba wanjita mutuk jike nup galöm qetñi Anas yangö mire anget. Anasgö qinñi qetñi Kaiafas yanñon jike nup galöm bohonñi aka yambu (yara) mianñoreñ nup mi memba malök.

¹⁴ *Kaiafasnöñ mutuk Juda ambazip yengöra qambañ keu kewö jiyök, “Ambazip kambu jömuk ayuhum teköbinbuköra azi mohotñan neñgöra aka kömuiga dop kölma.” Mewö.

Pitönöñ Jisös könahiba qañ kölök.

Mat 26.69-70; Mak 14.66-68; Luk 22.55-57

¹⁵ Jisös memba angetka Saimon Pitö aka gwarek alañi kun yetkön andöñine anohot. Anohotka alañi mianñon jike nup galöm bohonñi möt wanjiyöhanñgöra aka ölop amqeba Jisös wuatangöba jakömbuak miri sel uruñe geyök.

¹⁶ Yanñon geyökmö, Pitönöñ sel yaigepñe nanjunöñ kinök. Mewö kiniga gwarek alañan jike nup galöm bohonñi möt wanjiyöhi, yanñon yaigepñe geba nanju galöm ambi yambuk keu jii möta nanju öröiga Pitö wanjita sel uruñe geyohot.

¹⁷ Gebitkö ahoñi, mianñoreñ welenqege ambi sel nanjunji galöm kölöhi, yanñon Pitö eka kewö qesim wanjiyök, “Gi ölna mewöyök azi mianñö gwarek yengöreñök kun akzan me?” Mewö qesim wanji möta “Ni qahö!” jiyök.

¹⁸ Welen azi aka nanju galöm (sikiriti) yeñon amötñangöra aka könöp jeba ururungöba ahöiga jömöta kinget. Mewö kingetka Pitönöñ mewöyök yengö sutñine anda könöp jömöta kinök. Mewö.

Jike nup galöm bohonñan Jisös qeqesi al wanjiyök.

Mat 26.59-66; Mak 14.55-64; Luk 22.66-71

¹⁹ Jike nup galöm bohonñi Anas yanñon Jisösgö qeqesi al wanjiba kewö jiyök, “Gi ambazip denöwö kusum enjiba gwarekurupki niñi niñi engömemba maljan?”

* **18:11:** Mat 26.39; Mak 14.36; Luk 22.42 * **18:14:** Jon 11.49-50

²⁰ Mewö jiiga kewö melen wangiyök, “Ni nalö dop aukne ambazipni ambazipni kusum engiba malal. Juda könagesö pakpak neñon jöwöwöl jikenön öngöba köuluk mirininañgö dop tokomakzini, ni mönö mianğoreñ kinda kusum engiba malal. Buña keu tölapani kun qahö jial.

²¹ Nöñon keu denöwö ambazip kusum engiba malali, wuanöngöra ni mewö qesim niñgizan? Nöñon keu jibiga ambazip möta malgeri, yeñon mönö keunangö kötñi möt teköze. Mianğöra i qesim enginönga dop kölma.”

²² Mewö melen wangiyökmö, jikegö kiripo galöm (sikiriti) kunöñ kösutne kinda Jisös nunğulumne qekötahöba jiyök, “Jike nup galöm bohonñan qesim gihiiga gi keu silik mewöñi mönö wuanöngöra melen wangizan? Gödaqegegi qahö.”

²³ Mewö jiiga kewö melen wangiyök, “Keu bölöña jibilenak, mi mönö indelnönga dop kölmapmö, keu ölni jizal ewö, mönö wuanöngöra ni öne nunğuzan?”

²⁴ Mewö melen wangiiiga Anasnöñ Jisös melaiba jiiga tapepni (munğamunğa) tok böröñe tariga wangita jike nup galöm bohonñi Kaiafas yangöreñ anget. Mewö.

Pitönöñ Jisös qañ köliga yahöt karöbut ahök.

Mat 26.71-75; Mak 14.69-72; Luk 22.58-62

²⁵ Saimon Pitönöñ könöp jömöta kiniga tosatñan qesiba kewö jiget, “Gi ölna mewöyök yangö gwarekurupni yeñgöreñök kun akzan me qahö?” Mewö jigetka qañ köla “Ni qahö,” jiyök.

²⁶ Pitönöñ jike nup galöm bohonñangö welen aziñi qeba kezapni qeköi eröhi, yangö tinitosolomni welenqege alanj kunöñ mi möta qesiba jiyök, “O gi mönö arönöñ yambuk mohokne malohotka gekzal me denöwö?”

²⁷ Mewö jiiga Pitönöñ kunbuk qañ köliga nalö mianğoreñök kuruknöñ könahiba qeriga mörök. Mewö.

Jisösnöñ premiö Pailötkö jeñe kinök.

Mat 27.1-2, 11-14; Mak 15.1-5; Luk 23.1-5

²⁸ Miri gianjiiga söñanök Jisös Kaiafasgö mirinöhök wangita eta Rom premiögö jakömbuak mire anget. Juda yeñon uruñini tölöhoba kölköljinjinj akinbuköra waimanjat möta kewö jiget,* “Ak-kömukömu kendongö lama nembingö osibinbuk.” Mewö jiba möt lömböriba premiögö jakömbuak miri uruñe qahö öngöget.

²⁹ Mianğöra premiö Pailötnöñ yaigep eta engeka kewö qesim engiyök, “Azi kianön mönö wani pinjit aiga keu jim wangiba wangita kaze?”

³⁰ Qesim engiiga melenget, “Azi mianñon kegwek me bölöñi meme azi kun qahö akawak ewö, neñon mönö öne töhön i wangita göhö böröge qahö albinak.”

³¹ Mewö melengetka Pailötnöñ jii mötket, “Injini mönö nanñinak keu jakenjine al wangiba Köna keuninañgö dop kewöta keunji jim teköme.” Mewö jii möta jiget, “Neñon azi kun kömumapkö keunji jim teköbingö songo ahöi osizin.”

³² *Juda yeñon mewö jigetka Jisös nanñak kömup denöwöñi kömumawi, keu mi indela jiiga mewö mianñon ölnjambuk ahök.

³³ Pailötnöñ Juda yeñgö keunini möta kunbuk jakömbuak miri uruñe öngöba Jisös oholi kaiga kewö qesim wangiyök, “Gi Juda engöreñ kin kembunina akzan me qahö?”

* **18:28:** Rom gawman yeñgöra Juda yeñon kewö möt nariget: Nini Rom yeñgö jakömbuak mire öngöinga urunini tölöhoi ösumnini eri kölköljinjinambuk aka ak-kömukömu kendongö lama töröñi nembingö osibin. Mianğöra sombemnöñ yaigep malget. * **18:32:** Jon 3.14; 12.32

³⁴ Mewö qesim wanğiiga melenḁa kewö qesiyök, “Keu mi mönö nangi urugeyök jizan me tosatḁan nöḁgöra keu mewö jiba jítke algetka jizan?”

³⁵ Mewö qesiiga Pailötnöḁ melenḁök, “Yei! Ni mönö Juda azia aka Juda enḁö keuḁini nanḁömakzal me? Qahöpmahöp! Ni Rom premiö malbiga nangi ambazip kambu-urupki aka jike nup galöm yeḁön mönö goanḁgita nöḁgö böröne al gihize. Göḁön mönö wanat yuai aknöḁ?”

³⁶ Mewö melenḁniga jiyök, “Nöḁgö kiḁtohoḁni miangö könaḁi mi gölme kianḁöreḁ qahö ahöza. Nöḁön gölmegö kiḁtohoḁ kungö kiḁ kembuya akilenḁak ewö, nöḁgö sunḁurumurupnan mönö ölop wahöta nöḁgöra aka suahö akeak. Suahö aka nöḁön Juda jítḁememe yeḁgö böröḁine gebilenḁbuköra kapan köla bim qegetka nömembingö osibeak. Mi osibeakmö, nöḁgö kiḁ tohoḁnanḁgö könaḁi mi miri kungen ahöza. Ni gölme azi kembuya qahö akzal.”

³⁷ Keu mi jiiga Jisös kewö qesim wanḁiyök, “Gi töndup kiḁ kembu qainḁi kun akzani, mi ölna me qahö?” Mewö qesim wanḁii melenḁök, “Ni kiḁ kembu qainḁi kun akzali, mi nangak jizan. Nöḁön keu ölni nanḁöba jim tuarimangöra aka gölmenöḁ eta asuhuyal. Körek yeḁön keu ölnanḁgö likepḁe maljei, yeḁön mönö nöḁgö keuni kezap ala mörakze.”

Jisös kömumapkö jim teköget.

Mat 27.15-31; Mak 15.6-20; Luk 23.13-25

³⁸ Mewö melenḁniga Pailötnöḁ mepaqepaik aka qesiyök, “Keu ölni mi mönö wania kun?” Mewö qesiba kunbuk Juda yeḁgöreḁ geba söndaknöḁ kinda kewö jii mötket, “Nöḁön azi miangö pinjitḁi jaruba kun qahö miwikḁaizal.”

³⁹ “Kun qahö miwikḁaizalmö, ahakmemeni kun kewö ahöi mötze: Yambu (yara) dop ak-kömukömu kendon nalöḁe kösö mireyök azi mohot enḁöra pösatpi erakza, mi mötze. Miangöra Juda enḁö kiḁ kembuḁini ölop enḁöra pösatpi etpawak me qahö? Miangöra inḁi sihimḁinan denöwö mötze?”

⁴⁰ Mewö jii möta melenḁa kewö qetket, “Qahö, i qahöpmö, Barabas pösatnöḁga nenḁöreḁ etma!” Mewö qetketmö, Barabas yanḁön kegwek azia aka bim karim kun megeri, miangö bohonḁi ahök. Mewö.

19

Pailötnöḁ Jisös maripomnöḁ kömumapkö jim teköyök.

¹ Silata qetketka Pailötnöḁ Jisös wanḁgita anda jiiga yarö azi yeḁön ihilek wahinambuknöḁ tauköba qeget.

² Yarö azi yeḁön tauköba mepaqepaik kewö ak wanḁiget: Yeḁön Jisös qeba kösö wahinambuk memba köpeiba ila möhamgöba nöropḁe kölget geiga maluku pisikḁi gugakgugakḁambuk mi köl wanḁigetka geyök.

³ Mewö aka kösutḁe arenḁöba kinda jiget, “Owe owe! Juda enḁö Kiḁ Kembuḁini, owe!” Mewö jiba nunḁulumḁe gwötpuk qekötahöget.

⁴ Mewö mepaqepaik ak wanḁigetka Pailötnöḁ kunbuk yaigepḁe geba kewö jii mötket, “Mötket! Nöḁön azi mi kewöta pinjitḁi kun qahö miwikḁaizal. Miangöra i kunbuk wanḁitpiga enḁö jeḁine eriga könaḁi mewö möt kutuba ekḁe.”

⁵ Mewö jii mötketka Jisösnöḁ eta söndakḁe kini kewö eket: Tosatḁan kösö wahibuknöḁ ila köpeiba nöropḁe köla maluku pisikḁi gugakgugakḁuk köl wanḁigetka kiniga Pailötnöḁ jii kewö mötket, “Azi ölni ki eket!”

⁶ Mewö jii mötketka jike nup galöm aka nanḁu galöm (sikiriti) yeḁön i eka keu wölwölbuk qeta jiget, “Maripomnöḁ qeget kömuma. Maripomnöḁ qeget kömuma.” Mewö jigetka Pailötnöḁ jítḁine memba kewö jii mötket, “Nöḁön pinjitḁi kun qahö miwikḁaizal. Miangöra inḁi mönö nanḁinök i memba maripomnöḁ qeget kömumbawak.”

⁷ Juda jitnememe yeñon keu mi möta kapan köla kewö jiget, “Nengören Köna keu ahöza. Keu miangö dop kewöringa kömumawangö dop akza. Nannji memba öngöba ‘Anutugö nahönñi akzal,’ jimakza. Miangöra mönö kömupkö buñaya aiga dop köлма.”

⁸ Mewö kapan köla jigetka Pailötnöñ möta böññi wahöriga jönömñi undui kenğötñi mörök.

⁹ Mewö möta Jisös wangita kunbuk jakömbuak miri uruñe öngöba kewö qesim wangiyök, “Gi denikegöra?” Qesim wangiyökmö, yañon kitipñi kun qahö melenđa keu bök kinök.

¹⁰ Keu bök kiniga kewö jii mörök, “Gi nöngöra keu kitipñi kun melenđman me qahö? Nöñon jim teköbiga pösat gihime me maripomnöñ guhugetka kömuman. Miangö kukösumñi mi nöngören ahöza. Miangö könañi mötzan me qahö?”

¹¹ Mewö jii möta kewö melenđ wangiyök, “Kunöñ euyangörenök kukösum qahö al gihiyök ewö, gi mönö azi omanñi mala yuai ak niñgimangö osibanak. Miangöra azi kun danñon ni göhö böröge al niñgizawi, yangö sinğisöndokñan mönö göhören pinjit onğita ketanñi akza.”

¹² Mewö melenđ wangiyöhangöra aka Pailötnöñ Jisös pösari etmapkö kapan kölok. Mewö kapan kölökmö, Juda yeñon qet gigilahöba kewö jiget, “Pösatnöñga etma ewö, mönö sisa kiñgö alañi qahö toroqeba aka malman. Kunöñ nanñangö möri öngöiga ‘Kiñ kembuya akzal’ jizawi, yañon mönö sisa kiñ tuarenjon ak wangiza.”

¹³ Mewö jigetka keu mi möta jim kutuiga Jisös wangita yaigep etket. Etketka premiö Pailötnöñ jake kun kötnöñ ala tömbulget ahöyöhi, miangören öngöba keu jimtekötekögö dum tatatñe eta tarök. Jake miangö qetñi Hibru keunöñ Gabata jimalget. Mi nanine keunöñ Jake Kötnöñ mem tömbultömbulñi.

¹⁴ Eta taröhi, Juda ambazipnöñ wehön miangören ak-kömükömu kendon tatpingöra jöjöröget. Wehön mi aiga silim bibiñi dopdowiiga Pailötnöñ dum tatatñe tata Juda yeñgöra kewö jii mötket, “Eket, engö kiñ kembuñini ki!”

¹⁵ Mewö jii möta qet gigilahöget, “Yapmakek! Yapmakek! Maripomnöñ qeget kömuma!” Qet gigilahögetka kewö jiyök, “Engö kiñ kembuñinangö keunñi jim teköbiga maripomnöñ öngömapköra jize me?” Mewö jiiga jike nup galöm yeñon melenđa jiget, “Sisa kiñnöñ mohok kiñ kembunina akza. Nengören kiñ kembu murutñi kun qahö ahöza!”

¹⁶ Mewö melenđa jigetka Pailötnöñ Jisösgö keunñi jim teköba maripomnöñ qeget kömumapköra böröñine alök. Böröñine aliga yarö azi yeñon Jisös memba galöm kölget.

Jisös maripomnöñ qeget.

Mat 27.32-44; Mak 15.21-32; Luk 23.26-43

¹⁷ Galöm kölgetka nannji maripomñi nanñak anguba siti kutuba yaigep geba gölme kun qetñi Nöröpsihit qerakzema, miangören anget. Nöröpsihit qet mi Hibru keunöñ Golgota qerakze.

¹⁸ Miangören anda maripomnöñ qeget aka yambuk azi yahöt likeplikep mohotñe etkuba Jisös sutñire algetka kinget.

¹⁹ Mewö qegetka Pailötnöñ kulem ohoba jiiga maripomnöñ Jisösgö nöropñe göröken eu ala qeget. Kulem mi kewö ohoi kinök, “Jisös Nazaret tonñi, Juda yeñgö kiñ kembuñina ki.”

²⁰ Jisös maripomnöñ qegeri, gölme mi siti kösutñe ahöyök aka kulem mi keu karöbut, Hibru, Latin aka Grik keu miangön ohoget kinök. Miangöra Juda ambazip gwötputkñan onğita anda kaba eu uba kulem mi oyonget.

²¹ Mewö ohoiga Juda yeŋgö jike nup galöm yeŋön Pailöt kewö jiget mörök, “Juda yeŋgö kiŋ kembuŋina ki,’ mewö kude ohomanmö, kewö ohoman, ‘Nanŋaŋgöra Juda kiŋ kembunina akzal, jiyök.’ ”

²² Mi möta Pailötnöŋ keu kewö melenök, “Keu lök ohozalangöra mi mönö mewö ahöma.”

²³ Yarö azi yeŋön Jisös maripomnöŋ qebagun opo silepöke öröyuaini memba azi 4 sutŋine mendenä 4 aiga totonine meget. Mewö megetka malukuŋi ahöi megetmö, mi kewögöra ölop qahö mendenget: Mi körekŋanök opo johanni mohotŋan memenja. Opo kitipŋi kitipŋi qahö mindiriba euyök lilikilik uhum megetka emu gegeni ahöyök. Miangöra mi bölibapuköra mendenbingö osiget.

²⁴ *Osiba eraum möta kewö jiget, “Mi mitiinga qahö dop kölma. Miangöra ölop miangö unji qeinga toŋi ahuma.” Mewö jiba unji qegetka Buŋa keu kun ölnambuk ahök. Keu mi kewö ohoget ahöza, “Yeŋön opo silepökene memba sutŋine mendenä totonine memba maluku-nanŋö unji mönahot algetka kunöŋ luhut alma.”

Yarö azi yeŋön keu miangö dop aket.

²⁵ Jisös maripomnöŋ qeget kiniga ambi kewöŋan könaŋe kinget: Jisösgö nam nasöŋi aka Klopas anömŋi qetŋi Maria aka Magdalagö ambi qetŋi Maria.

²⁶ Jisösnöŋ namŋi aka wölböt gwarekŋi kösutŋe kinohotka etkeka namŋangöra kewö jiyök, “Namni, mönö nahöŋgi ki eka töŋjonŋöba malman.”

²⁷ Mewö jiba gwarek mi kewö jii mörök, “Mönö namgi ki eka töŋjonŋöba malman.” Mewö jii möta Jisösgö namŋi nalö miangöreŋök waŋgiriga miriŋe anda mohotŋe malohot. Mewö.

Jisösnöŋ maripomnöŋ kindä kömuyök.

Mat 27.45-56; Mak 15.33-41; Luk 23.44-49

²⁸ *Jisösnöŋ nupŋi pakpak mem teköyöhi, mi möta miangöreŋ Buŋa Kimbigö keu kunöŋ ölnambuk akŋapaköra kewö jiyök, “Ni ögöra ak niŋgiza.”

²⁹ Miangöreŋ qem nene kun wain o asölnambuk mianön kokolak qeba tarök. Mi tariga köwet mömöndö kun kahali tandök mi memba wain onöŋ kundumgöba soŋgorep suŋe qesamböta meget öŋgöiga numbuŋe alget.

³⁰ Algetka wain o asölnambuk mi nemba jiyök, “Mönö teköza.” Mewö jiba malmalŋi mosötmangöra nöropŋi wambelahöi eri imutŋi koriga nöŋ qeyök. Mewö.

Jisösgö marömŋi liŋgipnöŋ utohoget.

³¹ Jisösnöŋ nöŋ qeiga Juda ambazipnöŋ silim miangöreŋ ak-kömükömu kendon tatpingöra jöjöröget. Ak-kömükömu Sabat kendon mi kendon nalö ketanŋi ahök. Miangöra Juda jitŋememe yeŋön waimanjat möta kewö jiget, “Qamöt mienön Sabat kendon nalöŋe maripomnöŋ kingetka qahö dop kölja.” Mewö jiba premiö Pailötköreŋ anda kewö qesim waŋgiget, “Gi ölop jinöŋga anda maripomnöŋ engugeri, yeŋgö töwat sihitŋini kusugetka qamötni meköin etme?”

³² Qesim waŋgigetka jim teköiga yarö azinöŋ kaŋgotket. Kaŋgota Jisösbuk maripomnöŋ etkugeri, mi zilaŋ kömumahotköra mutuk yetköreŋök kungö töwat sihitŋi kusuba likep anda kungöreŋ mewöŋanök aket.

³³ Mewö aketmö, Jisösgöreŋ kaŋgota eketka lök kömuyök. Mewö eka sihitŋi qahö kusuget.

³⁴ Qahö kusugetmö, yarö azi yeŋgöreŋök kunŋan liŋgip memba marömŋi umburatiiga miangöreŋök sep aka o erök.

* 19:24: Sum 22.18 * 19:28: Sum 69.21; 22.15

³⁵ Mewö aketka kunöŋ yuai mi jeŋan ehöhi, yaŋön mi naŋgöba jiba ki ohoi ahöi dölki oyonje. Keu naŋgöba jiba ohoi ahözawi, mi mönö keu ölna akza. Injini mewöyök mi möt narimegöra möta keu ölna jizawaŋgö dop mötza.

³⁶ *Yuai mi asuhuyöhi, mi Buŋa Kimbigö keu kunöŋ ölnambuk akŋapköra asuhuyök. Keu mi kewö,
“Yaŋgö sihitŋi mönö kude kusume.”

³⁷ *Aka Buŋa Kimbigö keu kun kewö ahöza,
“Azi utohogeri, yeŋön mönö yaŋgören göröken jeŋini uba ekŋe.”
Injini keu yahöt miaŋgöra aka mi möt narime. Mewö.

Jisösgö qamötŋi köt köteŋnöh löm kölget.

Mat 27.57-61; Mak 15.42-47; Luk 23.50-56

³⁸ Miaŋgö andöŋe Arimatia taon toŋi qetŋi Josef kayök. Yaŋön Jisösgö gwarekŋi aka malökmö, Juda jitŋememe yeŋgöra keŋgötŋi möta mötnariŋi köyatiba malök. Yaŋön kaba premiö Pailötkören anda Jisösgö qamötŋi mekömamgö qesim waŋgiyök. Qesim waŋgiiga möta jim teköiga kaba meköyök.

³⁹ *Azi qetŋi Nikodemus mutuk Jisösgören sungem kayöhi, yaŋön mewöyök kayök. Kaba qamöt mirimamgöra kelök köhöwakŋambuk qetŋi mör mi repa oŋambuk melenŋeri, mi esu mohot lömbötŋi 30 kilogö dop bohonŋi memba kaba Josef bauköm waŋgiyök.

⁴⁰ Bauköm waŋgiba mohotŋe Jisösgö qamötŋi meköyohot. Meköba jiniŋ wöronŋi ölöŋŋi memba qamöt silenje ala opo tuatŋi miaŋön köpeiyohot. Juda ambazip neŋön qamötnini mewö aka mözözömgöba löm köl engizinma.

⁴¹ Jisös maripomnöŋ qegeri, gölme miaŋgö likeŋŋe arö kun ahöyök. Arö miaŋgören qaksirigö köt köteŋ löm dölökŋi kun urorohoget kinök. Miaŋgören qamöt kun qahö algetka gwamönŋi ahöyök.

⁴² Gwamönŋi aka kösutŋe ahöiga Juda ambazipnöŋ ak-kömukömu kendon tatpingöra jöjörögetka nalönini törüyök. Miaŋgöra Jisösgö qamötŋi memba miaŋgören ala löm kölohot. Mewö.

20

Jisösgö löm qaksirinjan gwamönŋi ahök.

Mat 28.1-8; Mak 16.1-8; Luk 24.1-12

¹ Sabat kendon tatket teköiga Magdalagö Maria yaŋön Sonda söŋanök waŋgaran suruiga qaksirinöh anök. Anda je ui ani köt ketanŋi ehiga miaŋön lök köteŋ urorohonŋi miaŋgö numbuŋeyök qetalget kaba ahöyök.

² Mewö eka miaŋgörenök mosöta ösumok anda Saimon Pitö aka Jisösgö wölböt gwarekŋi yetkören kaba kewö jii mörohot, “Mönö Kembedö qamötŋi qaksirinöhök memba anda denike alget ahözawi, mi qahö mötzin.”

³ Mewö jii möta mosöta qaksirinöh anohot.

⁴ Mohotŋe ösumok anohotmö, gwarek alanan ösumŋan anda Pitö oŋgita mutuk qaksirinöh angorök.

⁵ Angota köt köteŋ urorohonŋi miaŋgö uruŋe qahö öngöba numbuŋe öne kököriba ui aniga oponŋi köpekopeinjanök ahöiga ehök.

⁶ Mi ehiga Saimon Pitönöh mewöyök andöŋe kaŋgota köt köteŋ uruŋe öngöba oponŋi köpekopeinjanök ahöi ehök.

⁷ Mi ehök aka nöropŋi opo jahönŋi kunöŋ köpeiba esuhugeri, mi tosatŋan kusuba silegö oponŋi miambuk qahö mindiriba kungen algetka nanjök tariga ehök.

* 19:36: Eks 12.46; Jan 9.12; Sum 34.20 * 19:37: Zek 12.10; Ind 1.7 * 19:39: Jon 3.1-2

⁸ Mewö ehiga gwarek alañan mutuk qaksirinöŋ kaŋgoröhi, yaŋön mewöyök köt köteŋ uruŋe öŋgöba yuai mi eka möt nariyök.

⁹ Jisös guliba kömupnöhök wahötmawi, yetköŋ Buŋa Kimbigö keu mewöŋi mi qeljine qahö möt asariba tönpin mala korohot. Mewö.

Jisösnöŋ Magdalagö ambi Mariagöreŋ asuhuyök.

Mat 28.9-10; Mak 16.9-11

¹⁰ Mala kota miangöreŋök möt nariba lilingöba miriŋire anohot.

¹¹ Yetköŋ anohotmö, Marianöŋ nanŋök qaksirigö köt köteŋ numbuŋe kinda sahörök. Mewö sahöta köteŋ urorohöŋi miangö uruŋe kököriba ui anök.

¹² Ui aniga Suep garata yahöt malukuŋiri tuat lalamŋi etkehök. Jisösgö qamötŋan ahöyöhi, yetköŋ mönö miangöreŋ tarohot. Kunöŋ nöropŋi ahöyöhaŋgöreŋ tariga kunöŋ könaŋe tarök.

¹³ Mewö tata kewö jiyohot mörök, “Ambi, gi mönö wuanöŋgöra sahötzan?” Mi möta jiyök, “Kembunaŋgö qamötŋi memba anda denike alget ahözawi, mi qahö mötzal.”

¹⁴ Mewö jiba lilingöba Jisösnöŋ kösutŋe kiniga ehökmö, kaisöŋgolomŋi mi qahö ek kutuba tönpin kinök.

¹⁵ Tönpin kiniga Jisösnöŋ kewö qesim waŋgiyök, “Ambi, gi mönö wuanöŋgöra sahötzan? Dagöra jaruzan?” Mewö qesim waŋgiiga arö galömŋan kinja me denöwö, mewö mötmöriba kewö jiyök, “O ketaŋamni, gi qamötŋi memba aŋguba kungen anda alnöŋ ewö, mönö denike ahöza, mi jinöŋga möta anda memam.”

¹⁶ Mewö jiiga Jisösnöŋ qetŋi qeta “Maria!” jiyök. Mi qeta jiiga yaŋgöreŋ lilingöba Hibru keunöŋ qeta “Raboni!” jiyök. Mi nanine keunöŋ “Ketaŋamni.”

¹⁷ Mewö jiiga kewö jii mörök, “Ni Iwinaŋgöreŋ qahö öŋgöba ki kinjal. Miangöra ni kude nömisirimannö, nöŋgö munurupni yeŋgöreŋ anda buzup kewö jinöŋ mötme: Nöŋön mönö Iwi Anutuni aka eŋgö Iwi Anutuŋini yaŋgöreŋ lilingöba öŋgömam.”

¹⁸ Mewö jii möta Magdalagö ambi Maria yaŋön lilingöba anda gwarekurupŋi kewö jii mötket, “Nöŋön Kembu ekiga keu mewö mewö jii mötzal.” Mewö.

Jisösnöŋ gwarekurupŋi asuhum eŋgiyök.

Mat 28.16-20; Mak 16.14-18; Luk 24.36-49

¹⁹ Sonda miangöreŋök miri söŋauiga gwarek yeŋön ömbibiŋe tokoba Juda yeŋgöra keŋgötŋini möta miri naŋuŋi köla ki namŋi misiget geiga tatket. Mewö tatketka Jisösnöŋ asuhuba sutŋine kinda kewö jiyök, “Alaurupni, luainöŋ embuk ahöma!”

²⁰ Mewö jiba böröyahötŋi aka marömŋi kondeliga Kembu eketka sösoŋgainöŋ uruŋini kokolak qeyök.

²¹ Kokolak qeiga toroqeba kewö jiyök, “Alaurupni, luainöŋ embuk ahöma! Iwinöŋ ni melaim niŋgiiga nöŋön iŋini mewöŋanök melaim eŋgizal.”

²² Mewö jiba nöropŋine memba ösum eŋgiba uwulamgöba jiyök, “Mönö Uŋa Töröŋi meget.

²³ *Iŋini ambazip siŋgisöndokŋini mosöta saŋgoŋje ewö, mi mönö Anutugö jeŋe solanim teköza. Ambazip siŋgisöndokŋini qahö mosöta saŋgoŋje ewö, mi mönö Anutugö jeŋe qahö solaniza.” Mewö.

Jisösnöŋ Tomas asuhum waŋgiyök.

* 20:23: Mat 16.19; 18.18

²⁴Jisösnöŋ gwarekurupŋi mewö asuhum enġiyökmö, gwarek 12 yeŋgöreŋök kun qetŋi Tomas, qetŋi alaŋi Siwisiwi qetkeri, yaŋön nalö mianġöreŋ sutŋine qahö malök.

²⁵Tomasnöŋ kaiga gwarek tosatŋan “Mönö Kembu ekzin,” jiget möta kewö jiyök, “Jenan biriŋ löpötŋi böröŋe eka kesötŋan marömŋe misirimam ewö, mönö ölop möt narimam. Ni nanak mi qahö eka misiriba oseimam ewö, mönö keuyök jiget möta ölna mi qahö möt narimam.”

²⁶Mewö jiiga sonda mohot teköiga gwarek yeŋön Sonda mianġöreŋ kunbuk mire qezaköba naŋgu köla ki memba Tomasbuk mohotŋe tatket. Mohotŋe tatketka Jisösnöŋ kunbuk asuhaba sutŋine kinda kewö jiyök, “Alaurupni, luainöŋ embuk ahöma!”

²⁷Mewö jiba Tomasgöra jiyök, “Gi mönö börögi böröŋda böröyahötŋi eka kesötkan marömne misirimam. Mewö aka yaŋgiseŋ mosöta uruyahötŋi yaköriba ni möt narim niŋgiman.”

²⁸Mewö jiiga kewö melenök, “O, gi nöŋgö Kembu Anutuna!”

²⁹Mewö meleniiga kewö jii mörök, “Gi nekzananġöra ni ölop möt narim niŋgizammö, ambazip qahö neka töndup ni möt narim niŋgimakzei, yeŋön mönö simbawoŋ akze.” Mewö.

Jonöŋ Ölöwak Buŋa ki kewögöra ohoyök:

³⁰Jisösnöŋ nup ösum-mumu qakŋe memba maliga aŋgöletot sehisehiŋi tosatŋi mi gwarek yeŋgö jeŋini qakŋe asuhugetmö, mi buk kianġöreŋ qahö ohoyal.

³¹Keu tosatŋi ohoyali, mi kewögöra ohoyal: Jisösnöŋ Anutugö Nahönŋi aka Amötqeŋe Toŋi Kraist akzawi, iŋini keu mi möt nariba mewö mianön Jisösgö qetbuŋaŋgöra aka malmal köhöikŋi buŋa qem aŋgume. Mewö aka malmegöra nöŋön Ölöwak Buŋa papia ki ohobiga enġöreŋ kaza. Mewö.

21

Jisösnöŋ gwarek 7 yeŋgöreŋ asuhuiga söra jök öröget.

¹Könaŋep Jisösnöŋ kunbuk gwarek tosatŋi yeŋgöreŋ asuhuyök. Taiberias o aŋgö jite mianġöreŋ kewö asuhum enġiyök:

²Gwarek azi kewöŋan mohotŋe malget: Saimon Pitö, Tomas qetŋi kun Siwisiwi qetkeri, Natanael azi mi Galili prowinsgö Kana taonöhök aka Zebedigö nahönyahötŋi yahöt aka gwarek tosatŋi yeŋgöreŋök yahöt.

³*Mohotŋe malgetka Saimon Pitönöŋ jii mötket, “Ni mönö söra örömamgöra anmam.” Mewö jiiga tosatŋan jiget, “Nini ölop göbuk mohokŋe anbin.” Mewö jiba mosöta waŋgenöŋ öŋgöba anda suŋgem mianġöreŋ söra kun qahö öröget.

⁴Söra qahö öröba öne malgetka miri lök ġiaŋiiga Jisösnöŋ saknöŋ kinök. Kinökmö, yaŋgö kaisoŋgolomŋi mi qahö ek kutuget.

⁵Jisösnöŋ kinda enġohola jiyök, “Alaurupni, söra kun öröze me qahö?” Jiiga melenä “Qahö!” jiget.

⁶*“Qahö!” jigetka kewö jim kutum enġiyök, “Iŋini mönö mösakŋini waŋge ölna göröken ġilgetka eri ölop söra miwikŋaime.” Mi möta mösakŋini ġilgetka söra sehisehiŋi geba ölökögeraŋgöra öröget kotmapkö osiiga öröm suksuköget.

⁷Mewö aiga Jisösgö wölböt gwarekŋi mianön Saimon Pitö kewö jii mörök, “Mi mönö Kembuya!” Mewö jiiga Kembangö qetŋi möta opo bindoŋanök jöhöba malöhaŋgöra silepökeŋi köpeiba mianġöreŋök o aŋgönöŋ luhuba geyök.

* 21:3: Luk 5.5 * 21:6: Luk 5.6

⁸ Yeñon sak qöhöröñe 100 mita mianğö dop kösutñe anda malget. Mianğöra Pitönöñ geba ani gwarek tosatñi yeñon wañge lökuatnön qem nanğöba anda mösak sörañambuk örögetka wañge andöñe kayök.

⁹ Mewö kaba sak körikñe öngöba mianğöreñ yuai kewö eket: Könöp jeiga gapnön söra jejeñi aka beret soñsoñ ahöyök.

¹⁰ Mi eketka Jisösnön kewö jii mötket, “Inini dölki söra örözei, mönö mianğöreñök tosatñi memba ki kaget.”

¹¹ Mi jiiga Saimon Pitönön möta wañgenön öngöba mösak öröiga körikñe öngöyök. Öngöiga ölni 153 eket. Mösak mi söra ketanji sehisehiji mienön kokolak qegetmö, mösaknön töndup qahö tiñgirök.

¹² Ölni mi eketka Jisösnön kewö jii mötket, “Mönö kaba söñangö nenenji neget!” Mewö jii möta kaba “Mi Kembunina,” mewö möt kutugetmö, gwarek yeñgöreñök kunñan “Gi danñon?” mewö qesimangö urulömböt aka qahö qesiyök.

¹³ Qahö qesiyökmö, Jisösnön anda beret memba enğiba söra mewöyök mendennda enğiyök.

¹⁴ Jisösnön kömupnöñök wahöta gwarekurupñi asuhum enğiyöhangö indimñi karöbut mi ahök. Mewö.

Jisösnön Pitö kunbuk kunğuba mem köhöiyök.

¹⁵ Söñangö nenenji neget teköiga Jisösnön Saimon Pitögöra kewö jii mörök, “Saimon Jongö nahönñi! Alaurupki kienön ni uruñinan jöpaköm niñgimakzei, gi mönö i enğonğita gwötpuk jöpaköm niñgimakzan me qahö?” Mi möta kewö melenök, “O Kembu, ni göhöra ak niñgimakza. Gi wölböt alani akzan. Mi nangak ölop mötzan.” Mewö melenñiga Jisösnön jii mörök, “Gi mönö nöñgö lamaurupni moröñi gumohom enğiba malman.”

¹⁶ Mewö jii möri indimñi yahöt qesim wañgiyök, “Saimon Jongö nahönñi! Gi ölna jöpaköm niñgimakzan me qahö?” Mi möta kewö melenök, “O Kembu, ni göhöra ak niñgimakza. Gi wölböt alani akzan. Mi nangak ölop mötzan.” Mewö melenñiga Jisösnön jii mörök, “Gi mönö nöñgö lamaurupni galöm köl enğiba malman.”

¹⁷ Mewö jii möri indimñi karöbutñi qesim wañgiyök, “Saimon Jongö nahönñi! Gi mönö ölna wölbötkan (jojopangan) nöñgö ak gihimakza me qahö?” Mewö qesim wañgiiga urujöjöpakö qequesiñi mohot miyök qesiiga indimñi karöbut ahöhangöra Pitönön wösöbirik möta melennda kewö jiyök, “O Kembu, gi yuai pakpak ölop möt teközan. Gi wölböt alani akzan. Göñon mönö nangak mi ölopñanök mötzan.” Mewö jiiga Jisösnön jii mörök, “Gi mönö nöñgö lamaurupni gumohom enğiba malman.

¹⁸ “Nöñon keu öl töhöññi kun kewö jibi mötnön: Gi sepgulia mala nangak sileötanji jöhöba köna igen me waigen ‘anmam,’ jiba ak gihiyöhangö dop ölop anda kaba malnön. Mewö mala malnöñmö, azi namñi akñani, nalö mianğöreñ börögi böranñonga kunñan kaba opo silepökegi jöhöm gihiba köna kungen qahö anmangö mötmani, mönö mianğöreñ goañgiriga anman.”

¹⁹ Jisösnön kezapqetok keu mewö jiba Pitö kömumawangö keu saiñi indelök. Yañon kömup tandökñi qainñi kun kömuiga Anutugö qetbuñanji qarimapköra mötmöriba mi jiyök. Keu mi jiba yañgöra jii mörök, “Gi mönö kaba ni nuatangöba malman!” Mewö.

Jisösnön Pitöbuk gwarek kungö keuñi eraum mörohot.

²⁰ Pitönön Jisösbuk anda lilingöba Jisösgö wölböt gwarekñan andöñire kaiga ehök. Gwarek mianön ak-kömükömu lama negeri, mianğöreñ nöñöpñan Jisösgö töptöpñe nariba jiyök, ‘Kembu, göhöreñ mamalolo azi mi danñon?’

²¹ Gwarek mianjon kōnanjire kaiga Pitōnōŋ i eka Jisōs kewō qesim wanġiyōk, “Kembu, gwarek kianġōra mōnō denōwō asuhuma?”

²² Qesim wanġiiga kewō jii mōrōk, “Nōŋōn yanġō malmal areŋi mewō me mewō albilenak, mi mōnō gōhōreŋ waimanjara qahō. Nōŋōn jibiga yanjon qahō kōmumba nōŋōn gōlmenōŋ liliŋōba kamamaŋgō nalōŋe toroqeba jebuk mal ōŋgōbawak, keu mi yanġō keuya akawak. Gi mōnō yanġō keuŋi mosōta nangi malmalgi mōhamgōba galōm kōl anġuba nōŋgō andōne kaba ni nuatanġōba malman.”

²³ Keu mewō jiiga tosatŋan laŋ mōta jim sehigetka urumelen alaurup yenġō sutŋine keu mi kewō jim sohoget, “Gwarek mianjon qahō kōmuma.” Mewō jim sohogetmō, Jisōsnōŋ jebuk tetekōŋi qahō mal ōŋgōmapkōra qahō jiyōkmō, keu kewō jiyōk, “Nōŋōn yanġō malmal areŋi mewō me mewō albilenak, mi mōnō gōhōreŋ waimanjara qahō. Nōŋōn jibiga yanjon qahō kōmumba nōŋōn gōlmenōŋ liliŋōba kamamaŋgō nalōŋe toroqeba jebuk mal ōŋgōbawak, keu mi yanġō keuya akawak. Gi mōnō yanġō keuŋi mosōta nangi malmalgi mōhamgōba galōm kōl anġuba malman.” Mewō.

Nanak mi pakpak jenan eka nanġōba ohom enġizal.

²⁴ Gwarek mianjon yuai mi jeŋan eka mala mianġō dop mi nanġōba jim asariba Ölöwak Buŋa ki ohoyōk. Kōrek pakpak eŋōn gwarek mianġō kōnanji mōtzeanġōra aka ölöp tōnguba kewō jiba malme, “Yanjon keu nanġōba jiyōhi, mianjon mōnō keu öl tōhōnŋi akza.”

²⁵ Jisōsnōŋ nup aka anġōletot tosatŋi sehisehiŋi mi mewōyōk aka memba malōk. Miēŋgō kōsohotŋini mohot mohot mi lökŋanōk törōrōk ohobinak ewō, mōnō buk papia bōranŋi bōranŋi sehisehiŋi asuhugetka kantri dop papia kōwe miri (laibreri) pakpak mianġōreŋ alinga kokolak qeba ölököiga tiŋi tōndup qahō dop kōlbawak. Mewō mōtmōrizal.

Aposol Nup Meme

Aposol yeñön Uña Töröñangö ösumnöñ nup meget.

Jim-asa-asari

Dokta Luknöñ buk qetñi “Kraistkö Ölöwak Buña” ohoba kösohotñi toroqeba buk qetñi “Aposol nup meme” ohoyök. Jisösnöñ gwarekurupñi mutukñi kusun engii Uña Töröñan sölölohöm engiiga Kraistkö keu buzupñi jim sehigeri, Luknöñ miangö kösohotñi aukñe almamgöra möta kewö (1.8) ohoyök, ‘Yeñön mi Jerusalem sitinöñ könahiba Judia prowins dop köla Samaria prowinsnöñ anda toroqeba gölme göräñe eu emu likeplikep angetka dop köl teköba anök.’ Mutuk Juda könagesö uruñe nup megetka uruñini melenđa guligetka Kraistkö qeburuñ könahiba yöhöba sehiba anda anda kantriñi kantriñi dop köliga urumelen könagesö yeñgö bohonñini ahök. Kösohotñi oyonjei, Luknöñ yeñgö uruñini böñjön almamgö kapan köla keu kötñi yahöt kewö ohom asariyök,

1) ‘Kraistkö alaurupñan Rom mindimindiri gawman mi tuarenjoñ qahö ak engiba malje. Yeñön mi memba et almegöra tuaköpek qahö akze. Tosatñan mewö mötpeak, mi böññi öne wahötpapuk.’

2) ‘Juda yeñön jike nup meget korembenji aiga ölni asuhumapköra mamböta malgeri, Jisösnöñ mönö ölni mi memba kaba engiyök.’ Keu kötñi mi.

Jisösgö Buña keuñi kuñguba jim sehiba zioz könahiba mem köhöigetka toroqeba aniga urumelen yeñgö kambuñinan qariryök. Miangö dop “Aposol nup meme,” kösohot mi juliga keu bahöñi bohonñi karöbut kewö akze: 1) Jisösnöñ Suep mire öngöiga gwarek yeñön Jerusalem malgetka Kraistkö Buña keuñan könahiba qeburuñ yöhöyök. 2) Yöhöba qariba Palestain gölmegö prowins tosatñe anök. 3) Kunbuk qariba kantriñi kantriñi Sutñire Köwet liliköba tat anjei, mi dop köla teteköñe siti bohonñi Rom anök.

“Aposol nup meme” miangö keu bohonñi mi Uña Töröñangö könañi aka nup memenji. Aposol aka mötnarip ambazip yeñön yambu dölökñangö (Pentekost) nalöñe Jerusalem köulukögetka Uña Töröñan ösumñambuk uruñine geyök. Uruñine geba sölölohöba mem köhöim engiiga denđa kantri liliköba nup megetka ölni könañi könañi asuhuyök. Zioz ambazip aka yeñgö jitñememe yeñön Kraistkö Buña keu mi könakönahije denöwö jiba malgeri, Luknöñ miangö keuñi ohoiga mi ölop buk kiangöreñ oyonđa mötpin. Ambazip uruñini melenđa mindiriba nangöm anguba malgeri, yeñön Buña keugö kukösumñi möt kutugetka miri dop aukñe asuhuyök. Denöwö asuhuyöhi, Luknöñ miangö kösohotñi ohoba Uña Töröñangö kukösumñi kondel nenğiza.

Buk kiangö bahöñi bohonñi 4 mi kewö:

1. Buña keu nangöba jibingöra jöjöröget 1.1-26
 - a) Jisösnöñ jimkutukutu ala Uña engimangö jiyök 1.1-14
 - b) Judas Iskariotkö salupñe Matias meköget 1.15-26
2. Jerusalem sitinöñ Buña keu nangöba jiget 2.1-8.3
3. Judia aka Samaria Buña keu nangöba jiget 8.4-12.25
4. Polnöñ misin nup memba malök 13.1-28.31
 - a) Misin nup liliköba megetka 1 ahök 13.1-14.28
 - b) Jerusalem totoko ala keu jöhöget 15.1-35
 - c) Misin nup liliköba megetka 2 ahök 15.36-18.22
 - d) Misin nup liliköba megetka 3 ahök 18.23-21.16
 - e) Pol Jerusalem, Sisaria aka Rom kösö mire tarök 21.17-28.31

Jisösnöñ zioz könahiyök.

1* O Tiofilus!

Luk nöñön kösohotni mutukñi ohoyali, miangöreñ Jisösnöñ nup könahiba memba liliköba ambazip kusum engiba malöhi, miangö kösohotñi pakpak arengöba albi eknöñ.

2 Jisösnöñ nup memba melaimelai azi aposolurupñi möwölöhöba kusum engiba mala Uña Töröñangö ösum qakñe nup memegöra jim kutum engiyök. Mi engiiga Anutunöñ wangiri Suepnöñ öngöyök. Nöñön kösohotni ohoyali, mi miangöreñ ohom teköyal. Merak miangöreñök kösohot mi toroqeba ohomam.

3 Jisösnöñ sihimbölö möta kömumba kömupnöñök wahöta wehön 40 gölmenöñ toroqeba malök. Nalö miangö uruñe aposolurupñi sömañi gwötpuk asuhum engiba Anutu bemtohoñangö könañi toroqeba jim asarim engiba malök. Mewö mala aiwesök tandök könañi könañi memba kondel engiyök. Yeñön mi eka Jisösnöñ guliba maljawi, mi ölop möt yaköget. Aiwesök ekeri, yeñön mi nangöba jiba dangunu ewö kinje aka kunñan mi qeapkömamgö osima.

4* Nalö kunöñ yembuk mohotñe mala kewö jim kutum engiba jiyök, “Injini Jerusalem siti ki mönö zilañ kude mosötme. Iwinan ‘Kalem uruñine al engimam,’ jiba keuñi jöhöi jibi mötkeri, mi mönö ölnambuk akña aiga eñön mönö miangöra mamböta malme.

5* Mutuk Jonöñ ambazip o töhönöñ melun mem engiba malökmö, Anutunöñ nalö kude köriiga Uña Töröñi uruñine ala mianñön melun mem engima.” Mewö.

Jisösnöñ Suep mire öngöyök.

6 Aposol yeñön nalö kunöñ tokogetka Jisösnöñ sutñine asuhuiga kewö qesim wangiget, “Kembu, göñön mönö nalö kewöñe me wani nalönöñ Israel kantrigö tohoñi mi kunbuk kunñuba mem köhöiman?”

7 Qesim wangigetka kewö jii mötket, “Iwinöñ nanñi kukösum qakñe yambu gwani aka aua nalö arengöba ali ahözawi, mi mönö eñön mötmeangö dop qahö.

8* Mi qahöpmö, Uña Töröñan eta uruñine gemawañön mönö kukösum engiiga letota nöngö könani nangöba jiba malme. Mi Jerusalem sitinöñ könahiba Judia prowins dop köla Samaria prowinsnöñ anda liliköba toroqeba gölme görane eu emu likeplikep angetka dop köl teköba anma.”

9* Jisösnöñ keu mi jim teköiga Anutunöñ jeñini qakñe wangita wahöriga kusunöñ eta esuhuiga euyangöreñ öngöiga ekingö uget öngöba at atop (jiata-ton) köliga jaruba kinget.

10 Mewö öngöiga suepnöñ eu ehiba kingetka miangöreñök azi yahöt malukunñiri tuat lalamñi yetkön kösutñine asuhaba kinohot.

11 Kinda kewö jiyohot, “Galili azi injini mönö denöwögöra suepnöñ eu ubayök kinje? Anutunöñ Jisös ki engö sutñineyök wangita Suep mire eu öngöi ekzei, yanñön mönö tandök mewöñanök kunbuk lilingöba etma.” Mewö.

Judas Iskariotkö salupñe Matias meget.

12 Mewö jiyohotka aposol yeñön Jerusalem siti kösutñe kundunñi qetñi Oil ip kundunñi miangöreñök lilingöba eta 1 kilomitagö dop kaba sitinöñ kangotket*.

13* Jerusalem kangota miri uruñi kun qakñe tat malgeri, miangöreñ anda öngöget. Öngögeri, yeñgö qetñini kewö: Pitö, Jon, Jeims aka Andru; Filip,

* 1:1: Luk 1.1-4 * 1:4: Luk 24.49 * 1:5: Mat 3.11; Mak 1.8; Luk 3.16; Jon 1.33 * 1:8: Mat 28.19; Mak 16.15; Luk 24.47-48 * 1:9: Mak 16.19; Luk 24.50-51 * 1:12: Juda yeñön 1100 mita mi Sabat kendonöñ qahö onñgita anjema. Miangöra Köna keu qahö onñgita kaget. * 1:13: Mat 10.2-4; Mak 3.16-19; Luk 6.14-16

Tomas, Bartolomyu aka Matyu; Jeims Alfiusgö nahönñi, Saimon Zelot politik azia aka Judas Jeimsgö nahönñi†.

¹⁴ Azi pakpak mienön urumohot aka ambi yembuk kapan köla köuluköba malget. Yengö sutñine Jisös munurupñi aka namñi Maria yenön mewöyök malget.

¹⁵ Köuluköba mala wehön kunön mötnarip ambazip jañgöñini 120 miangö dop tokogetka Pitönön sutñine wahöta keu kewö jiyök,

¹⁶ “Azi alaurupni! Jisös memba jöhögeri, Judasnön yengöra köna kondelök. Uña Töröñan Judasgö keu mi mutuhök kiñ Deiwidkö uruñe sañep ali numbu jitñan jiiga Sumbara buk (Buña Liñet buk Sam) miangören ohoget ahözawi, mianön mönö öljambuk ahuyök.

¹⁷ Jisösnön Judas möwölöhöi nanine kambunön kun mali nupñi memapkö kuñgui melaimelai azi bohonñi aposol ahök.

¹⁸ *“Judasnön ahakmeme bölöñi aiga söngöröñi wañgiget memba mianön gölme köröñi kun bohonñi meyök. Mi memba miangören imbi auba nöropñan melenña gölmenön kuñguiga gölömñi juliga irip kömongokñi datñi munñi mi körek usuba erök.

¹⁹ Mewö ahiga Jerusalem ambazip pakpak miangö buzupñi möt teköba gölme miangö qetñi nanñine keunön Akeldama qetket. Mi nanine keunön Sep Gölme köröñi.”

²⁰ *Pitönön toroqeba kewö jiyök, “Sumbara (Sam) buk miangören keu kun kewö ohoget ahöza,

‘Miriñi mönö balonñi gwamön kinma. Mi kunñan tonñi qahö aka maliga miriyök kinma,’
aka keu kun kewö ahöza,

‘Kunön ölop yañgö salupñe galöm nup memba kinma.’

²¹⁻²² *“Mewögöra aka nini azi kun möwölöhöba kuñguinga nembuk jitñe meme aka dangunu ewö kinda Jisösnön kömupnöhök wahöröhi, miangö Buñanñi nañgöba jiba mali dop kölma. Jonön Jisös o melun mem wañgiiga Kambunön nalö miangörenök qenjaröknön anda nupñi könahiba memba neñgö gölmenön liliköba anda kaba mali Anutunön sutñineyök wañgita öñgöyök. Azi nalö pakpak miangören kambunine mohotñe mala korini, mönö yengörenök kun möwölöhöinga dop kölma.”

²³ Pitönön mewö jiiga azigö jaruba azi yahöt qetñiri qetket. Kun qetñi Josef, qetñi alañi Barsabas aka qetñi kun Jastus. Azi kungö qetñi Matias.

²⁴ Qetñiri qeta kewö köuluköba jiget, “O Kambu, gi ambazip urunini körek pakpak möt kutuzan. Miangöra gi azi kietkörenök ninia möwölöhözani, mi mönö kondel neñgiman.

²⁵ Judasnön gongiba geñmon aka eta aposol nup mosöta bölöñamñangö dop ayuhuba geyöhi, yañgö salupñe azi kunön mönö aposol aka kinda melaimelai azigö nup memba malma.”

²⁶ Mewö jiba yetkö kiawen (kas, lot) algetka Matias asuhuyök. Asuhuiga aposol 11 yengö sutñine dum kun wañgigetka kambunine toroqeyök. Mewö.

2

Uña Töröñan eta gwarek uruñine geyök.

† **1:13:** Zelot pati yenön nanñini kinkin mbingöra Rom mindimindiri gawmanbuk tuaköpek aka urukönöp aka malget. * **1:18:** Mat 27.3-8 * **1:20:** Sum 69.25; 109.8 * **1:21-22:** Mat 3.16; Mak 1.9; 16.19; Luk 3.21; 24.51

¹ *Jisösnöŋ kömuyöhi, nalö miangöreŋök sonda 7 teköiga wehön 50* miangöreŋ yambu jeŋi qeŋe nalöŋi kam kuŋguiga urumelen ambazip pakpak yeŋön tokoba kendon tatket.

² Tatketka miangöreŋöhök Suepnöhök yuai kun biliksik eri kouruk ketanji asuhui mötket. Dimbomnöŋ köhöikŋanök qemakzawi, mönö miangö tandök ewö asuhuba eta miri tatkeri, mi körek kokolak qeyök.

³ Miri kokolak qeba yuai mianjön denqenqenda sehiba könöp bölam tandök ewö nöropŋini qakŋe öngöi eket.

⁴ Mewö asuhuiga Uŋa Töröŋan körek yeŋgö uruŋini kokolak qeiga gölme tosatŋe keu ahözawi, mi könahiba jiget. Uŋa Töröŋan sölölohöba keu saŋep alöhaŋgö dop aukŋe jiget.

⁵ Juda ambazip tosatŋan Anutu göda qeba kantri könaŋi könaŋi suep baŋŋe tat anjei, miangöreŋ denqenda anda mala Jerusalem lilingöba kageri, tosatŋi mewöŋi mewöyök sitinöŋ malget.

⁶ Mewö mala kouruk ketanji mi möta ambazip kambu gwötpukŋan kaŋgota tokoget. Tokoba kingetka mötnariŋ ambazipnöŋ keu murutŋi murutŋi jigeri, mi pakpak möta nanŋak nanŋak möt asariba miangöra aurumpurik aka köŋkuŋ aket.

⁷ Köŋkuŋ aka welipköba jiget, “Mötket! Azi ki keuŋi keuŋi jizei, yeŋön mönö körek Galili ambaziwa akze me?”

⁸ Nini kantri murutŋi murutŋi miangöreŋ ahuba kota malinga yeŋön mönö denöwö aka malqariŋ kantrininaŋgö dop keunini nanŋik nanŋik jigetka mötzin?

⁹ Nini Partia ambazip, Midia ambazip aka Elam ambazip ki kinjin. Nini tosatŋan Mesopotemia malin. Tosatŋan Judia malje aka tosatŋan Kapadosia gölmenöŋ malget. Ambazip tosatŋan Pontusgöra, tosatŋan Eisia prowinsgöra akzin aka yeŋön nanini keunine keu jigetka mötzin.

¹⁰ “Tosatŋan Frigia gölme mosöta ki kaba malje. Tosatŋan Pamflia taon mosötket. Tosatŋan Ijipt kantrinöŋ malget. Tosatŋan Sairini gölme likepŋe Libia kantrinöŋ malget. Tosatŋi nini Rom sitiyoŋ kusukŋanök ki kaba maljin.

¹¹ Nini tosatŋan Juda ambazip ahuba maljin aka tosatŋan kantri tosatŋe ahuba könaŋŋep Juda ambazip ahin. Mewö kinjin aka yeŋön keu jigetka nini keunini mohot mohot mi ölop möt kutuzin. Neŋgöreŋök tosatŋan gölme jölanŋi qetŋi Krit mosöta köwet kutuba kaget. Tosatŋan Arebia keu jize. Nini mewöŋan maljinmö, yeŋön söŋgaiba Anutunöŋ aŋgöletot öngöŋgöŋi ahöhi, miengö könaŋi mi nanine keunöŋ nanŋik nanŋik jigetka mötzin.”

¹² Mewö jiba körek yeŋön auruba lalalulu siksauk aka nanŋini kewö jim qesim aŋguget, “Kiaŋgö könaŋi mönö denöwö?” Mewö qesim aŋguba keu jaruba tönpin kinget.

¹³ Tönpin kingetmö, tosatŋan mepaqepaik aka kewö jiget, “Yeŋön wain o nahömŋambuk gwötpuk nempa enjololoŋ akze.” Mewö.

Pitönöŋ Uŋa Töröŋaŋgö könaŋi jim asariyoŋ.

¹⁴ Mewö jigetka Pitönöŋ aposol 11 yembuk mohotŋe wahöta kinda köhöikŋanök qeta ambazip kambu yeŋgöra kewö jii mötket, “Alaurup, Juda ambazip aka ambazip körek Jerusalem maljei, nöŋön yuai asuhuzawaŋgö könaŋi jibi kezap ala mi mötket.

¹⁵ Inini tosatŋan neŋgöra kewö jize, ‘Yeŋön o köhöikŋi negetka uruŋinan enjololoŋ akza.’ Mewö mötmörizemö, neŋön mewö qahö akzin. Ki söŋangö 9 kilokŋi akza. Söŋan mi o nene nalöya qahö.

* 2:1: Lew 23.15-21; Dut 16.9-11 * 2:1: 50 mi Grik keunöŋ Pentekost.

16 Qahöpmö, kezapqetok azi Joelnöy Buña keu kewö jiyöhi, mianön mönö ölñambuk akza,

17 *‘Anutunöy jiza: Kembangö kaka nalöñan törimawi, nöñön nalö miangöreñ Uñani Töröñi mokobiga ambazip körek yengö qakñine öngöma. Öngöba sölölohöba kutum enguasöriga kewö asuhuma: Engö nahönböraturupñinan kezapqetok keunji keunji jimakñe. Engö gwabö seramurupñinan jeñini melenji imutñi imutñi ehakñe. Engö ambazip namñi yeñön gaunñi gaunñi ekñe.

18 Uñani Töröñi mokomami, mi azi aka ambi weleni qeba malmei, yengö qakñine mewöyök öngöiga kezapqetok keu jimakñe.

19 Nöñön anğöletot suepnöy albige uget eu öngöiga ekñe aka gölmenöy aiwesök mi kewö ekñe:

Yuai sepnambuk, könöp öngöngöñi aka köwak köndumñambuk mi asuhume.

20 Wehön jeñan pandaman meiga köiñnöy pisihiba sep ewö akña. Mewö asuhuiga miangö andöñe Kembangöreñ nalö ketanjan kam kuñguma. Wehön mi aködamun aka qetbuñanambuk.

21 Denike yengöreñök kunjan kun Kembangö qetñi qeta köulukömawi, yañön mönö amöt qem wañgiiga letotma.’ Joelnöy mewö ohoi ahöza.

22 “O Israel ambazip, iñini mönö kezap ala keu ki mötket: Anutunöy Jisösgö malmal nalöñe sölölohöm wañgii mali anğöletot, aiwesök aka aiaka ösum-mumuñambuk mi engö sutñine gölmenöy aukñe asuhuget. Iñini mi ölop mötze. Anutunöy yuai mi asuhum wañgiba mewö mianön Nazaret azi miangö könañi nanğöba jiba kondel engiba malök.

23 *‘Anutunöy mönöwök Jisösgö keunji qeljiñe jöhöba möt kutuba kewö jiyöha ahöza, ‘Amötqeqe Toñan mönö pinjit azi yengö böröñine etma.’

Keu miangö dop Anutunöy Jisös qahö anğön köli engö böröñine erök. Mewö eriga iñini kömumapkö qetketka kian kantri gawman yeñön Mosesgöreñ Köna keu qahö möta töndup jim kutugetka böröñinan Jisös memba maripomnöy qeget kömuyök. Kömuyökmö, sepnan mönö engö qakñine öngöyöha ahöza.

24 *Jisösnöy kömuyökmö, kömupkö kösö gwaröñe eri kömup Toñan i jöhöba nalö köröpñi galöm köl wañgimamgö osiyök. Mi Anutugöreñ qahö dop kölök. Miangöra yañön i mem guliba kömupkö sihimbölöñeyök meköiga wahörök.

25 *Kiñ Deiwidnöy Jisösgöra kewö jiyök ahöza, ‘Nöñön garanğuruñ aka talbilenbuköra Kembunöy böröni öñe malja. Yañön nalö dop qöhöröñne kini imut ewönöy eka maljal.

26-27 Mewö mala kömumam-mö, kömupkö uñem mire gebiga andö qahö nuñguman.

Göñön nangi wölböt azi sarakñi tök-kutukutuñi ni mönö meköm niñginöyga kömupkö lömnöy ahöba qahö gisahömam.

Miangöra urunan sösongai aiga numbu nesilamnan renduñ liñet köla maljal. Silenan mewöyök guliba wahötmawanğöra al mamböta jörömqöröm aka luhut memba ahöma.

28 Göñön malmal köhöikñangö könañi kondel niñginöyga möt kutumam. Nöñön göhö jemesoholge pöndañ malbiga göñön uruni sösongainöy kokolak qeman.’ Deiwidnöy Jisösgöra mewö jii ahöza.

29 “O alaurupni! Pitö nöñön bem ambönini kiñ Deiwidkö könañi mi awösamakak qakñe aukñe kewö jim asarimam: Deiwidnöy kömuiga löm kölgetka qaksiriñan merak sutñine ki ahöza.

30 *Deiwidnöy kezapqetok azia aka malöhañön kewö mörök: Anutunöy

* 2:17: Joel 2.28-32 * 2:23: Mat 27.35; Mak 15.24; Luk 23.33; Jon 19.18 * 2:24: Mat 28.5-6; Mak 16.6; Luk 24.5 * 2:25: Sum 16.8-11 * 2:30: Sum 132.11; 2 Sml 7.12-13

gwölönarökurupñi yengörenök kun möwölöhöba kungui nannji ewö azi kembugö dum tatatje tatma. Anutunöñ keu mi jöhöba jöjöpañ keunöñ jim köhöiba malök.

³¹ Kunñan tatmawi, mi qeljiñe eka mörök. Amötqeçe Tonji Kraist yanñon kömupnöhök wahötmawi, Deiwidnöñ mi möta kewö jiyök, 'Kraistnöñ mala kömumapmö, kömupkö unjem mire geiga Anutunöñ i andö kude qei ahöma.

Yanñö sileñi mi kude mosöri qamötñan kömupkö lömnöñ qahö gisahöma.'

³² Anutunöñ Jisös mem gulii wahöriğa mewö mianñon keu mi ölnjambuk ahök. Nini körek mi je kötninan eka nanğöba jiba dangunu ewö kinjin.

³³ Jisösnöñ wahöta mala Anutunöñ wanğiri öngöba böröñi ölnje tatza. Mianğoreñ tata Iwinöñ Uña Töröñi melaimapkö jim jöhöyöhi, yanñon (promis) mi möta i mokoï eriga ölnji merak ki asuhui eka mötze.

³⁴ *Deiwidnöñ Suepnöñ kude öngöyök. Yanñon nanñak keu kewö jii ahöza, 'Anutunöñ Suep miri uruñe nani Kembunanğöra kewö jim kutui mörök: Göñon mönö kaba böröni ölnje asakmararañ kianğoreñ eta tata malman.

³⁵ Mewö tata malnöñga nöñon nalö sutñe kianğoreñ tuarenjoñurupki tim tötala luhut al engimam.

Luhut al engibiga yeñon tala geba sihimbölö möta sahöta köna döp ewö akñe. Mewö aketka göñon ölop wahöta yengö qakñine tiba söñgaiba malman.'

³⁶ "O Israel ambazip, inñini Jisös maripomnöñ qegetka kömuyökmö, Anutunöñ Jisös mi kunguiga Kembu aka Amötqeçe Tonji Kraist ak neñgiba malja. Israel kambu pakpak inñini mönö mianğö könañi möt yaköme."

³⁷ Pitönöñ mewö jiiga ambazip kambunöñ möta uruñini qesiñni Pitö aka aposol tosatñi yengöra kewö jiget, "Azi alaurup, nini mönö dendenöwö ahin dop kölma?"

³⁸ Jigetka Pitönöñ kewö jii mötket, "Inñini mönö uruñini melenget. Mohot mohot uruñini melenğerañgö dop neñon mönö Jisös Kraistkö qetñe o mem melun mem engibin. Mi enñiinga Anutunöñ siñgisöndokñini sanğonñda mosöta Uña Töröñ kalemñi mi buña qem engima.

³⁹ Anutunöñ Uña mi engimangö jim jöhöyöhi, keu mi mönö nanñini aka engö gwölönarökurupñini engöra aka jiyök. Engöra aka tosatñi köröwen mal angetka Anutu Kembuninan engoholmawi, yanñon jöhöjöhö keu (promis) mi mönö körek engöra aka mewöyök jiba jöhöi ahöza."

⁴⁰ Pitönöñ mewö jiba toroqeba qambañ keu tosatñi gwötpuk mianñon uruñini kunguba kewö jiyök, "Ambazip misimkaulup ki gölmenöñ maljei, Anutunöñ mi amöt qem enñiiga letotmegö mötza. Yembuk sihimbölö miwikñabepuköra mönö uruñini melenñda ambazip gonğonñi mi jabö ala engömosötme."

⁴¹ Pitönöñ mewö jiiga ambazip jesöngöñan keuñi möt anğon kölgetka o melun mem enñiget. Mi mem enñigetka könagesöñine toroqetgetka janğöñinan wehön mianğoreñök 3000 mianğö dop qariyök. Mewö.

Mötnarip yeñon uru jöhöm anğuba malget.

⁴² Uruñini melenğeri, yeñon urumohok aka urunöñ jöhöm anğuba nalö dop anğeka tokogetka aposol yeñon Buña keu kusum enñigetka beret mindipköba nempa köuluk nup memba malget. Pöndañ malmal mewöñi malget.

⁴³ Mewö kinda Anutugö qetñan bölibapuköra jönöm undu-undu aka malget. Mewö malgetka Anutunöñ sölölohöm enñiiga aposol yeñon jitñe memeniñi aka nup megetka anğöletot aiwesök murutñi murutñi asuhuget.

⁴⁴ *Anutu möt narigeri, yeñon körek malmalñini mohotñe mala sukinap

* 2:34: Sum 110.1 * 2:44: Apo 4.32-35

(ainemaluku) yuainini pakpak mindiriba mohotje memba malget.

⁴⁵ Mewö memba mala gölme sukinap yuainini bohonji memegöra algetka söngöröñi engiget kayöhi, mi sutñine mözöqözöröñ aka osigeranğö dop mendenğ anguba malget.

⁴⁶ Mewö mindiriba mala qösösök (qörörök) urumohot aka nalö dop jöwöwöl jikenöñ tokomalget. Beret mi miriñini dop mindipköba nemalget aka numbu nenenini mi geñmonini qahö sösöñgai qakñe tata nemalget.

⁴⁷ Aiakanini mewö aka Anutu möpöseiba malgetka ambazip pakpak yeñön i engek soriba malget. Engek soriba malgetka kambuñinan qarüiga Kembunöñ nalö dop ambazip tosati uru melenğ enğiiga letota mindimindiri areñine toroqeget. Mewö.

3

Pitönöñ lokon azi kun mem ölöwahök.

¹ Juda yeñön mare dop 3 kilok köuluközema. Mare kunöñ Pitö Jon yetköñ köuluk nalö mianğoreñ jöwöwöl jikenöñ öngöyohot.

² Öngöyohotka mianğoreñ azi kun nam körö uruñeyök lokon asuhuba tat malöhi, mi anguba kaba jöwöwöl jikegö kiripo nanğune alget. Alaurupñan silim dop kaba kululunöñ anguba kiripo nanğun qetñi Nanğun Eksihimñambuk qetkeri, mianğoreñ alget tarök. Tata ambazip jikenöñ öngögeri, yeñön moneñ kalem wañgimegöra ulet enğiba malök.

³ Mewö algetka tari Pitö Jon yetköñ jöwöwöl jikenöñ öngöbitkö ahotka etkeka i mewöñanök kalemğö ulet etkiyök.

⁴ Ulet etkiiga jemesoholñi uba eka Pitönöñ kewö jii mörök, “Mönö niri netkeknöñ!”

⁵ Mewö jii möta je kusumusulñi qahö etkehiba yuai kun böröñireyök niñgimahotkö mambörök.

⁶ Etkehiga Pitönöñ jiyök, “Nöñğoreñ silwö me goul moneñ qahö ahözapmö, nöñğoreñ yuai kun ahözawi, mi ölop gihimam: Gi mönö Nazaret azi Jisös, Amötqege Tonji Kraistkö qetñe wahöta anman!”

⁷ Mewö jiba böröñi ölñe memba kököbihiiga wahörök. Wahöriga könañi aka gwaköt sihitñi mönö mianğoreñök köhöiget.

⁸ Köhöigetka wahöta luhuba yetpuk jöwöwöl jikenöñ öngöba mianğoreñ anda kaba serenşereñ unduba Anutu möpöseiyök.

⁹ Mewö anda kaba Anutu möpöseim wañgiiga ambazip kambu pakpak yeñön mi eket.

¹⁰ Mi eka kewö jiget, “Azi ki kalem wañgimegöra jikegö kiripo Nanğun Eksihimñambukö kösutñe tata uleta malöhi, mönö mia.” Mewö jiba möt wañgiba “Sileñe wani yuaia asuhuzapto?” jiba auruba nemböñini teköi welipköget. Mewö.

Pitönöñ jöwöwöl jikenöñ Buña keu jii mötket.

¹¹ Welipkögetka ulet azi mianön sundan Pitö Jon yetpuk mohotje anda kaiga ambazip kambu körek pakpak yeñön ösumñinan kösutñine kaba jöwöwöl jikegö tohon uruñe öngöba kiñ Solomongö sombem söranñambuknöñ tokoba kind a ehiget.

¹² Mewö ehigetka Pitönöñ enğeka könahiba kewö jii mötket, “O Israel alaurupni, iñini mönö wanigöra yuai ki eka auruze? Wanigöra niri uba netkehize? Azi kianön ölöwaka köna anda kazawi, mi mönö netkö ösumnöñ me Anutugö Buñañe pitirik maljirañğöra aka qahö. Mewö kude mötmörime.

¹³ *Nanine ambösakonini Abraham, Aisak aka Jeikob yeñğö bem Anutunöñ

* 3:13: Eks 3.15

mönö Nahönñi Jisös asakmararan wanggiiga jitnememeni öngöngöñi ahiga öñi asuhuiga ekze. Inini Jisös mi memba galöm yengö böröñine algetka premiö Pailötnöñ pösatmamgö keunji jöhöba jiyökmö, enön Jisös mi yangö jeñe qañ köla andö qem wangiget.

14 *¹⁴“Inini azi diñdiñi aka sarakñi mi andö qem wangiba azi qeçe azi kun pösatmapkö kapan köla qeta qesiget.

15 Mewö qeta qesiba mewö mianön malmalgö Tonjan kömumapkö keunji jigetka kömuyök. Kömuyökmö, Anutunöñ i mem guliiga kömupnöhök wahörök. Netkön mi jeninan eka nañgöba jiba yangö dangunu ewö kinjin.

16 Mewö kinda Jisösgö qetñi möt narim wangiba maljit. Azi ki eka möt wangizei, mi mönö qet miangö ösumñan mem köhöiiga kinja. Jisösnöñ sölölohöm netkii mötnaripniran asuhui miangö qakñe kinda jim kutuziga köna gwakötñan ölöwak teköiga inini körek mi ekze.

17 “O alaurupni! Jisös kömumamgö kapan kölgeri, enön mi mönö gukmaulem qakñe aket, mi mötzal. Nanñini aka galömurupñinan mewöyök yuai ak wangigeri, miangö könañi kude möt kutuba lañ aket.

18 Mewö aketmö, miangö likepñi Anutunöñ kewö ahök: Anutunöñ keunji mönówök kezapqetok ambazipurupñi pakpak yengö jitñine aliga qeljine kewö jiba ohoget, ‘Anutugö Amötqeqe Tonji Kraistnöñ mönö sihimbölö mötma.’ Miangöra inini mewö aketka Anutugö keu mianön mönö mewö öñjambuk ahök.

19 Miangöra mönö uruñini melenja Anutugöreñ lilingöba kagetka siñgisöndokñini kutuba sanjoñma.

20 “Anutunöñ oyaenköyaen Tonji akza. Inini öne lañ malbepuköra Anutunöñ Jisös qeljine möwölöhöyök. Miangöra inini mönö uruñini melenjetka Amötqeqe Tonji Kraist melaiiga engöreñ kaiga yambuk qekötahögetka malmalñinan guliiga oyaenköyaen nalöñinan kam kuñguma.

21 Anutunöñ möpñangö möpñe könahiba keunji kezapqetok ambazipurupñi tök-kutukutuñi pakpak yengö jitñine aliga qeljine kewö jiba malget, ‘Anutunöñ Amötqeqe Tonji angön köl wangii Suep mire tata mali yuai pakpak kunbuk arengöba kölönaimawi, mönö nalö miangöreñök melaiiga Suep mosöta etma.’ Jisösnöñ keu miangö dop eta nenğöreñ kayök.

22 *²²Mosesnöñ kewö jii mötket,

‘Kembu Anutunöñ Juda kambu engö sutñineyök kezapqetok azi kun mem guliiga wahöta Moses ni ewö akña.

Yañön ipñina kinda engöra keu jimawi, mönö mi pakpak kezap ala möta tem köla malme!

23 *²³Kunñan kun kezapqetok azi miangö keunji qahö tem kölmawi, Anutugö könagesö enön mönö yangö keunji jim teköba ayuhum wangime.’

24 Kezapqetok ambazip Samuelgöreñök könahiba kota keu jigeri, mienön mönö körekmakörek mewöyök kezapqetok keu nalö kewöñe öñjambuk akzawi, mia qeljine jiba malget.

25 *²⁵Anutunöñ amböskonurupnini yembuk jöhöjöhö areñi aka Abrahamgöra kewö jii mörök,

‘Göhö gwölönarökurupki yengöreñök kunñan ahuba wahötmawi, Anutu nöñön mönö yangöra aka gölmegö ambazip kambuñi kambuñi pakpak kötuetköm engibi oyaenköyaen akñe.’

* 3:14: Mat 27.15-23; Mak 15.6-14; Luk 23.13-23; Jon 19.12-15 * 3:22: Dut 18.15, 18 * 3:23: Dut 18.19 * 3:25: Jen 22.18

Anutunöŋ jöhöjöhö keuŋi indeli kezapqetok ambazipnöŋ mi toroqeba jim köhöiba malgeri, mi mönö enğöra aka ali ahöza.

²⁶ Anutunöŋ Nahönŋi mem guli wahöri kötuetköm enğimapköra melaiiga mutuhök enğoreŋ erök. Miangöra mönö dölki uruŋini melenđa nanŋik nanŋik malmalŋinanğö köna bölöŋi andö qeme. Mewö aka oyaenčkoyaen akŋe.” Mewö jiyök.

4

Pitö Jon yetköŋ jike kaunsöl kambunöŋ kinohot.

¹ Pitö Jon yetköŋ ambazip kambu yeŋğöra keu mewö jiyohotka jike nup galöm yeŋön, jikegö kiripo galöm bohonŋan aka Sadyusi (Jike nupkö kapankölköl) yeŋön wahöta jeŋire kaŋgotket.

² Gwarekyahötŋan ambazip kambu kusum enğiba kewö jiyohot, “Jisösnöŋ kömupnöhök wahörök. Miangö dop kömugeri, yeŋön mewöŋanök guliba wahötme.” Mewö jiyohotka uruŋini bölüiga yetköreŋ kaŋgotket.

³ Kaŋgota etkömemba miri söŋauyöhaŋğöra aka kösö mire al etkiba jiget, “Miri gianaŋiigun keu jakeŋe al etkibin.”

⁴ Mewö jigetmö, Buŋa keuŋiri mötkeri, yeŋğöreŋök jesöŋğöŋan uruŋini melenđa Jisös möt nariget. Möt narigeri, yeŋğö jaŋğöŋinan qariiga 5000:gö dop aka malget.

⁵ Miri gianaŋiiga galömkölköl aziurupŋini, Juda yeŋğö jitŋe memeurupŋini aka Köna keugö böhi yeŋön Jerusalem tokoget.

⁶ Tokoba jike nup galöm bohonŋi qetŋi Anas yaŋön sutŋine tarök. Mewöyök Kaiafas, Jon, Aleksander aka jike nup galöm bohonŋanğö saiwaurupŋi tosatŋi pakpak mi mohotŋe tatket.

⁷ Tatketka Pitö Jon etkuangita jeŋine al etkiget kinohotka kewö qesim etkiget, “Etkön mönö denöwö ahot? Dagö qetŋi qerohotka ösumŋi etkualöŋni letorök?”

⁸ Qesim etkigetka Uŋa Töröŋan Pitögö uruŋi kokolak qei kinda kewö jii mötket, “Kantrigö galömkölköl azi aka jitmemeurupnini, mötket!

⁹ Niri lokon azi denöwö alabauk ak waŋgiziga könaŋi guliba ölöwahök, merak mewö qesim netkize.

¹⁰ Miangöra miangö likepŋi mi ölöp jibiga inŋini aka Israel ambazip könagesö pakpak mötme. Enön Nazaret azi Jisös, Amötqeŋe Tonini maripomnöŋ qegetmö, Anutunöŋ i mem guli kömupnöhök wahörök. Jisös qetŋanğö ösumŋan mönö azi ki möhamğöiga enğö jeŋine ölöwaka kinja.

¹¹ *Keu kun kewö,
‘Miri meme azinöŋ köt tandö kun andö qeba mosötketmö,
Anutunöŋ mi aliga ain tandö kömbönaŋi bohonŋi akza.’
Ain tandö bohonŋi mi Jisös.

¹² “Jisös mohotnöŋ mönö amöt qem neŋgiza. Qet kun köuluköingä mi osimemö, Jisösgö qetŋan mönö dop kölja. Anutunöŋ qet kun Suepkö bapŋe qahö neŋgiiga ahöza. Qahö! Qet mohot mi qeta letota Suepkö buŋaya akin.”

¹³ Mewö jim teköiga tandökŋiri eka kewö jiget, “Azi yahöt kietköŋ mötmöt mire qahö öŋğöba töndup keu köhöikŋi köhöikŋi jiba awösamkakak kinda suahö ewö akzahot.” Mewö jiba köŋkuŋ aka welipköba könaŋiri möt kutuba jiget, “Alakŋa! Azi yahöt mietköŋ mönö Jisösbuk mala letorohot.”

¹⁴ Könaŋiri möt kutuba jiba lokon azinöŋ ölöwaka yetpuk kinöhi, mi eka keuŋiri qeapköbingö osiget.

* 4:11: Sum 118.22

¹⁵ Mi osiba jike kaunsöl kambu engömosöta yaigep gemahotkö jim kutuget geyohotka nanñinök keu jaruba goro aket.

¹⁶ Goro aka jiget, “Nini azi yahöt ki mönö denöwö ak etkibinto? Yetkön jim kutuyohotka angöletot qainñi kun asuhuyöhi, mi Jerusalem körek pakpak yeñön möt teköze aka nini mi mewöyök qañ kölbängö osizin.

¹⁷ Mi osizinmö, miangö keuñi ambazip sutñine kunbuk sehiba anbapuköra mönö ölop kewö jim kutum etkiinga dop kölma, ‘Inñiri mönö Jisösgö qetnön keu kunbuk kude jimahot.’ Mewö jiba köhöikñanök jim qetal etkiinga sörauyohotka kunñan kun mi qahö möri teköma.”

¹⁸ Mewö jim jöhöba etkoholget öngöyohotka kewö jim kutum etkiget, “Inñiri mönö Jisösgö qetnön keu kun kude toroqeba jiba ambazip kusum engimahot.” Mewö jiba songo köhöikñi al etkiget.

¹⁹ Mewö jim kutum etkigetmö, Pitö Jon yetkön melenđa kewö jiyohot, “Netkön engö jimkutukutuñini tem kölbitköra Anutugöreñ keu memba et aljiga omani akapuk. Mi Anutugö jemesoholñe dop kölja me qahöwi, mi mönö nanñinak kewöta jiba jöhöme!

²⁰ Mewö me mewö jiba jöhöbeakmö, netkön yuai eka möriri, mi köyatiba keu bök malbirangö dop qahö.”

²¹ Mewö jiyohot mötketka ambazip körekñan angöletot asuhuyöhi, miangöra Anutu möpöseiget. Mewö möpöseigerangöra aka “Likepñi denöwö ak etkibinak?” jiba köna kun qahö miwikñaiget. Qahö miwikñaiba galöm meme keu köhöiba jim etkiba etkömosötketka erohot.

²² Angöletot asuhuiga lokon azi ölöwahöhi, mi (yara) yambuñi 40 lök onğita malök. Miangöra mönö Anutu gwötpuk möpöseiba malget. Mewö.

Mötnariñ yeñön köuluköba kin köhöiget.

²³ Jike nup galöm bohonñi aka jitmeme yeñön Pitö Jon galöm meme keu jim etkiba etkömosötketka nanñiri alaurupñiri yeñgöreñ lilingöba anohot. Anda keu pakpak jigeri, mi jiyohotka mötket.

²⁴ *Mi jiyohotka möta urumohot aka uruñini qezaköba jölñini memba wahöta Anutu kewö köuluköm wañgiget, “O Kambu öngöngöñi ketanñi, göñön Suep, gölme, köwet aka yuai pakpak miengöreñ ahözawi, mi miwikñaim engiba Tonina akzan.

²⁵ *Göñön mönöwök nangi Uña Töröñi melainön eta nup azigi Deiwid, neñgö ambönini yañgö numbuñe keugi ali göhö jitki memba kewö jiyök, ‘Urumelenğö kopa yeñön mönö wuanöngöra göjuñi göjuñi memakze? Kantriñi kantriñi yeñön mönö denöwögöra aka mötmöt omani omani mötmörimakze?’

²⁶ Gölmegö kin kembuñi kembuñi yeñön gölmenñanğö dop wahörakze. Pom jembonñi jembonñi yeñön mindiriba tokomakze. Mewö qeburuñ yöhöi Kambu aka yañgö Amötqeqe Tonji qetal etkimakze.’

²⁷ *Ölña, keu miangö dop siti kianğöreñ asuhuyök. Gi Nahöngi Töröñi Jisös kuñgunönga Amötqeqe Tonina akza. Yañön asuhuiga azi kembu yahöt Herod aka Pontius Pailöt yetkön Rom gawman galöm aka nanine Israel isikurupnini yembuk mindiriba totoko ala tuarenjon ak wañgiget.

²⁸ Gi nangak ösumgi aka jirkahö dop yañgöra yuai asuhumapkö keuñi jiba qeljiñe jöhöba arengönön. Yeñön yuai mi ak wañgigetka keu areñ pakpak mi mewö ölnambuk ahök.

* 4:24: Eks 20.11; Neh 9.6; Sum 146.6 * 4:25: Sum 2.1-2 * 4:27: Mat 27.1-2; Mak 15.1; Luk 23.1, 7-11; Jon 18.28-29

29 “O Kambu, nini gi welen qem gihiinga merak galöm meme keu nengizei, gi mönö mi eka nanğöm nenğinönga ölop göhö Buňa keugi suahö ewö awösamkakak kinda jiba malbin.

30 Göñön mönö börögi surunönga kawöl ambazip mi Nahöngi Töröñi Jisösgö qet ösumnje ölowaknje aka anğöletot aiwesök murutñi murutñi asuhumaknje. Keu mi ölna.”

31 Mewö köulukögetka miri tokoba tatkeri, gölme mi memenjaliba utuköiga Uňa Töröñan körek pakpak uruñini kokolak qeiga anda suahö ewö awösamkakak kinda Anutugö Buňa keu jiba malget. Mewö.

Mötnarip ambazipnöñ uru jöhöm anğuget.

32 *Urumelen kambu ketañi yeñön urumohot aka mötmöt mohot aka malget. Yuai pakpak ahöm enğiyöhi, mi göhörenök me nöngörenök, mewö qahö jigetmö, yuai pakpakñini mi mutulanğöba mohot aiga malget.

33 Mewö malgetka Anutugö ösumñan enğualöñniga köhöigetka aposol yeñön jitñini memba dangunu ewö kinda Kambu Jisösnöñ kömupnöhök guliba wahöröhi, keu mi nanğöba jiba malget. Mewö malgetka Anutunöñ kalem möriamñi ketañi mokom enğiiga ambazipnöñ göda qem enğiget.

34 Mewö malgetka mianğö dop sutñine kunñan yuai kungöra qahö mözöröngöba osiba malök. Körek pakpak nene nupñi nupñi aka miriñi miriñi miengö toni akeri, yeñön mi bohonñi memegöra alget. Mewö algetka söngöröñi monen kaiga mi memba kaget.

35 Memba kaba aposol yeñgö böröñine algetka körek pakpak mözöröngöba osigeranğö dop mi sutñine mendenđa enğiba malget.

36 Azi kun qetñi Josef, aposol yeñön qetñi Barnabas qetkeri, mi nanine keunöñ: Uru nanğönanğö azi, yanñön gölme jölanñi qetñi Saiprus mianğören asuha qariba jike nup azia (Liwait) malök.

37 Yanñön mewöyök nene nup gölmenñi bohonñi memegöra ali monen kaiga söngöröñi mi memba aposol yeñgören kaba böröñine alök. Mewö.

5

Ananaias Safaira yetkörenñ tilipqilip

1 Mewö aka malgetmö, azi kun qetñi Ananaias anömñi qetñi Safaira yetköñ nup gölmenñiranğö bahöñi bohonñi memegöra alohot.

2 Alohotka söngöröñi kaiga azinöñ monen bahöñi nanñanğöra anğön köla asamböri anömñan mi möt teköi bahöñi kun memba kaba aposol yeñgö böröñine alök.

3 Böröñine alökmö, Pitönöñ kewö jiyök, “O Ananaias, gi mönö wuanöngöra Satan qahö qetalnönga urugi kokolak qeza? Yanñön urugi kokolak qeiga göñön esapköba Uňa Töröñi isimkakalek ak wanğiba nup gölmegö monen bahöñi anğön köla asambötzan?”

4 Gi mianğö toni aknöñi, nalö mianğören mi nangi buñaya ahök me? Aiga nup gölmeği bohonñi megetka söngöröñi kayöhi, monen mi mönö göhö buñaya ahök me? Gi mönö wuanöngöra urugan keu jöhöba yuai ki akzan? Gi munen jiba mewö mianñön ambazip qahö tilipköm nenğizanmö, Anutu nanñi mönö tilipköm wanğizan!”

5 Mewö jiiga keu mi möt sasaba tala gölmenöñ geba kömuyök. Mewö kömuiga ambazip pakpak mianğö buzupñi möta sömbu mötmöt ketañi aket.

6 Kömuiga azi gwabö yeñön kota qamötñi memba esuha anğuba anda löm kölget.

* 4:32: Apo 2.44-45

⁷ Aua karöbut teköiga anömñan yuai asuhuyöhi, mi qahö möta kayök.

⁸ Kaiga Pitönöñ anömñi Safaira kewö qesim wañgiyök, “Injiri nup meme gölmeñiri bahöñi bohonñi memegöra alohotka monen kayöhi, mi miangö dop me qahö? Mi jinöñga mötpi!”

Qesim wañgiiga kewö melenök, “Monen mi ölna miangö dop kayök.”

⁹ Mewö meleniga jim wañgiyök, “Injiri mönö wuanöngöra urumohok aka Kembugö Uña Töröñi tilipköm wañgizahot? Mötnöñ, apkan kömuiga azinöñ memba anda löm köljei, yeñön mönö nanju ki dopdowigetka kourukñi mötzan. Yeñön gi mewöyök esuhuba anjum gihiba anme.”

¹⁰ Mewö jiiga miangöreñök tala Pitögö könañe geba kömuyök. Kömuiga azi gwabö yeñön kota qamötñi miwikñaiba memba anjuba anda anjanjö qöhöröñe löm kölget.

¹¹ Löm kölgetka urumelen kambu jömukñi yeñön möta awöwöligetka buzupñi sehiiga körek pakpak mötketka sömbu mötmöt ketanji aket. Mewö.

Aposol yeñön ambazip gwötpuk mem ölöwak enjiget.

¹² Mewö aketka Anutugö kukösumñan aposol inahöm engiiga nup memba böröñini ambazip qakñine algetka Anutunöñ aiwesök anöletot meiga sutñine gwötpuk asuhuget. Ambazip Jisös möt narigeri, körek yeñön jöwöwöl jikegö tohon uruñe öngöba kin Solomongö sombem söranñambukñöñ tokoba kambu mohot aka malget.

¹³ Mewö tokoba malgetka ambazip tosatñan kenjötnini möta zirin zirin aketka kunñan totoköñine qahö öngöyök. Mewö qahöpmö, ambazip kambu yeñön göda gwötpuk qem enjiba malget.

¹⁴ Mewö tokoba malgetmö, töndup ambazip sehisehñi yeñön kambuñini toroqem enjiba malget. Azi aka ambi kambuñi kambuñi yeñön Jisös möt nariba uruñini melengetka kambuñinan qariba sehiyök.

¹⁵ Aposol yeñön nup mewö megetka ambazip sehisehñan ölöwaket. Mewö ölöwakerangöra aka tosatñan kawöl ambazip enjuangita kululu köla anjuba köna görañe mewöyök dum möhamgöba möki tumbula miangöreñ al enjiba kewö jiget, “Pitönöñ kaba nenngonitmawi, imutimutñan mönö nalö miangöreñ yeñöreñök kungö qakñe öngöi ölöwakawak!”

¹⁶ Mewöyök taon aka miri Jerusalem siti liliköba tat anjei, miengöreñök ambazip kambu gwötpukñan öröba kaget. Mewö kaba ambazip kawöl enghöyöhi aka ömenöñ töñöt memba* kölköljinjin ak enjigeri, mi enjuangita kaba kanjotket. Kanjotketka körek yeñön ölöwaket. Mewö.

Garatanöñ aposol kösö mireyök enjuangiri etket.

¹⁷ Mewö aka malgetka jike nup galöm bohonñan aka yangö sunjurumurupñi Sadyusi (Jike nupkö kapañkölköl) pati nanjom wañgigeri, körek yeñön irimñini seheliiga urupik aket.

¹⁸ Urupik aka aposol enghömemba jöhöba gawmangö kösö mire al enjiget.

¹⁹ Al enjigetmö, sunjem miangöreñ ahögetka Kembugöreñ garata kunöñ kösö miri nanjun öröba enjuangita yaigep eta kewö jiyök,

²⁰ “Mötket! Injini mönö anda jöwöwöl jikenöñ öngöba ambazip jeñine kinda malmal dölökñangö könañi pakpak aukñe jigetka mötme.”

²¹ Mewö jii möta miri gianjiiga jöwöwöl jikenöñ öngöba kinda Buña keu kusum enjiget. Mewö kinda kusum enjigetka jike nup galöm bohonñi aka alaurupñan nanjom wañgigeri, yeñön angota jike kaunsöl kambu aka Israel jitnememurup köl öröm enjigetka mohotñe tokoget. Tokoba kinda opotöröp tosatñi aposol enjuangitpingö melaim enjigetka kösö mire anget.

* **5:16:** Töñöt mi kewö: Ömenöñ numbuñi möwöngöiga keu bökö malja.

22 Angetmö, i miangören qahö miwikñaim engiba öne lilingöba kösohotñini kewö alget,

23 “Nini ölña kösö mire angota nanğunı köhöikñi kötökñi kölget kini wahip azinöñ nanğunöñ kingetka ehin. Mi ehinmö, nanğunı öröba öngöba miangören azi kun qahö miwikñaizin.”

24 Mewö jigetka jikegö kiripo galöm bohonñi aka jike nup galöm bohonñi yeñön keu mi möta uruñini lalalulu siksauk aiga jiget, “Opoñ! Merak mewö asuhaba könanjep kunbuk supapköiga denöwö akapuk!”

25 Mewö jigetka kunñan kota kewö jii mötket, “Mötket, azi kösö mire al engigeri, yeñön mönö jöwöwöl jikenöñ kinda ambazip Buña keu kusum engize!”

26 Mewö jii mötketka jikegö kiripo galöm bohonñan opotöröp engömeiga anget. Anda “Ambazipnöñ köt gila nenjubepuk!” jiba kenğötñini möta lolonñanök jöwöwöl jikenöñ öngöba aposol enğuanğita kaget.

27 Mewö enğuanğita kaba jike kaunsöl kambu yeñö jeñine alget kingetka jike nup galöm bohonñan kewö qesim engiyök,

28 **“Inini Jisösgö qetñe keu kun kude kusum engime! Neñön mewö jiba songo köhöikñi al engiinmö, keu miangö ölñan mönö denöwö asuhuyök? Eñön mönö toroqeba kusum engiba mala Jerusalem siti ki Jisösgö keunöñ kokolak qegetka maljin. Aiga azi miangön kömumba sepñi mokoiga eñön nenğöra kewö jimakze, ‘Yanğö keunñan mönö Juda nenğö qakñine öngöyöha ahöza.’”*

29 Mewö jiyökmö, Pitö aka aposol tosatñan kewö melenget, “Neñön ambazip engö jimkutukutuñini tem kölbingöra aka Anutugören keu andö qeinga qahö dop kölma. Qahö!

30 Anutunöñ nanine amböskonurupñinangö bemñina akza. Inini Jisös ip kemañe möndöba qegetka kömuyökmö, Anutunöñ i mem gulii wahörök.

31 Anutunöñ i mem guliba wañgita öngöi nanñi böröñi ölñe ali tatza. Euyangören tari Anutunöñ singisöndokñini mosöt nenğimangöra kuñgui Pom Kembunini aka Amötqeqe Tonini akza. Mewö aka Israel könagesö urumelen ak nenğimangö mötza.

32 Nini yuai mi eka keu pakpak mi nanğöba jiba dangunuñi aka kinjin. Uña Töröñan mewöyök keu mi nanğöba jimakza. Anutunöñ Uña Töröñi ambazip jitñi tem köl wañgimakzei, mönö yeñö uruñine ala buña qem engiza.”

33 Pitönöñ keu mewö jiiga jike kaunsöl kambu yeñön mötketka uruñini sounöñ qesiñqesiñ ewö qesiñök. Qesiñniga uruñini könöp jeiga aposol enğuget kömumegö mötket. Mewö.

Gamalielnöñ alaurupñi jim mölöwörim engiyök.

34 Mewö mötketmö, Farisi (Köna keugö kapañkölköl) azi kun qetñi Gamaliel yanön jike kaunsöl kambu yeñö sutñine tarök. Yanön Köna keugö böhi azia mali ambazip pakpak göda qem wañgigetka jitñemememñina ahök. Mewö aka wahöta aposol enğuanğitketka yaigepñe geba borom kun mambötmegöra jim kutuyök.

35 Mewö jim kutui gegetka jitñememe alaurupñi kewö jii mötket, “Israel aziurup, inini azi ki denöwö ak engibeak, miangöra mönö ölöpñanök galöm mem añgume.

36 Mutuk emune azi kun qetñi Teudas yanön wahöta ‘Nöñön ketañamñina akzal,’ jiiga merak (yara) yambu tosatñi teköi maljin. Teudasnöñ mewö jiiga azi 400:gö dop yambuk öröröñ jöhöba mindiriba malgetmö, kunñan qei kömui tosatñan aziurupñi imbi köl wañgigeri, mi kuñgum enğigetka buratigetka qeburuñinan pömsöm qeba qahöwahök.

* 5:28: Mat 27.25

37 “Yaŋgö andöŋe Galili azi kun qetŋi Judas asuhuyök. Yaŋön takis memegöra ambazip qetŋini ohoba areŋgögeri, nalö miangören asuhuyök. Asuhuba ambazip mölöwörim enjiiga karim akŋegöra sungurum alabaurupŋi aket. Mewö aketmö, i mewöyök qegetka kömuyök aka tosatŋan sungurumurupŋi imbi köl waŋgigeri, mi kuŋgum enjigetka buratiget.

38 Mewö aiga nöŋön kewö jibi mötket: Inini mönö azi kiengö silenine yuai laŋ kude akŋe. Yeŋön nup ki megetka qeburun ahuzawi, mi gölme ambazipkö mötmöt areŋineyök ahuza ewö, mi mönö sohoba pömsöm qeba qahöwakŋa. Miangöra i mönö enjömosötketka etme.

39 Mi qahöwakŋapmö, Anutugö mötmöt areŋnöhök ahubawak ewö, enön mönö qeburun mi jöhöbingö osime. Inini Anutu nanŋi qetala tuarenjoŋ ak waŋgiba malbepuk. Nanŋini könanŋi mewö miwikŋaibepüköra mönö galömnini mem aŋgume!”

40 Gamalielnöŋ mewö jiiga goro keuŋi aŋgön köla wuatangöget. Mi wuatangöba aposol engholget kotketka opotöröpköra jigetka raukapaŋ (raurapaŋ) mem enjiget. Raukapaŋ mem enjigetka jike kaunsöl kambu yeŋön aposol mi Jisösgö qetŋe keu kun toroqeba jibepükö soŋgo köhöikŋi al enjiba “Eta anme,” jiget.

41 Mewö jigetka jike kaunsöl kambu mosöta anget. Könanöŋ anda kewö jiget, “Jisösgö qetköra aka qetbuŋanini mewö mem sohozei, mi Anutunöŋ mötza. Yaŋön nini sihimbölö mewöŋi mötpinaŋgö dop möta neŋgehiga ölöp dop kölja.” Mewö jiba uruŋinan miangöra ölöwahiga söŋgaiget.

42 Söŋgaiba nup toroqeba memba silim dop jöwöwöl jikenöŋ öŋgöget aka miriŋi miriŋi miangören anda Buŋa keu kusum enjiba malget. Jisösnöŋ Amötqeqe Toŋi Kraist akzawi, yeŋön miangö Ölöwak Buŋaŋi jiba mianön ambazip uruŋini kuŋguba malget. Mewö.

6

Nupbauru azi (dikon) 7 meköm enjiget.

1 Gwarek jaŋgöŋinan qariba öŋgöiga Juda ambazip kambu yahöt aka malget. Tosatŋan kantri tosatŋeyök kaba Grik keu jiget aka tosatŋan nanŋine gölmeŋine mala kota Arameik aka Hibru keu jiget. Mewö malgetka nalö miangören goranora (noragora) asuhuyök. Grik keu jigeri, yeŋön kewö jigetka böliyök, “Aposol yeŋön nalö dop nene inap mendeŋ neŋgimazkemö, Grik keu ambi malö neŋgö nene inap bahöŋi mi bahösapsap neŋgimazke. Öroröŋ qahö misigetka qahö dop kölja.”

2 Mewö jigeranögöra aka aposol 12 yeŋön gwarek kambu köl öröm enjiget tokogetka kewö jiget, “Neŋön silegö nup memba nene mendeŋda enjiba Anutugö Buŋa nupköra nalönini ölöp qahö dop köli urugö nupninan etpapuk. Mi kude dop kölja.

3 Mewögöra alaurupnini, mötket! Enön mönö nanŋini sutŋineyök nupbauru miwikŋaim enjime. Uŋa Töröŋan azi uruŋini kokolak qeiga Anutunöŋ mötkutukutuŋi qainŋi kun al enjii qetbuŋa ölöpŋi memba kinjei, mönö azi mewöŋi 7 meköm enjime. Mi meköm enjigetka nup mi enjiinga mi galöm köla memba malme.

4 Yeŋön mewö malmemö, naninak nalö jömukŋanök köuluköba Anutugören Buŋa keu jegep kinda jim sehiba malbin. Nup miangören mönö pöndaŋ kinbin.”

5 Mewö jigetka kambu pakpak yeŋön “Ölöp dop kölja!” jiget. Mewö jiba azi qetŋi Stiwen meköget. Stiwen mi Anutu köhöikŋanök möt narim waŋgiiga Uŋa Töröŋan uruŋi kokolak qei malök. Toroqeba azi kewö meköba möwölöhöm

engiget: Filip, Prokorus, Nikanor, Timon, Parmenas aka Nikolas. Nikolas mi kian kantrigö siti qetnji Antiokia miangörej ahuba könangep Juda azia aka urunji Kraistkörej melenök.

⁶ Mi meköba möwölöhöm engigetka aposol yengö jemesoholjine öngöm angetka böröjini nöröpjine ala köuluköba kötuatköm engiget.

⁷ Anutugörej keu jim sehigetka töhötmöriamjambuk aiga gwarek yengö jangöjnan Jerusalem sitinöj qariba sehiyök. Jike nup galöm yengö kambunöhök sehisehiji yenjön mewöyök urunjini melenja Jisös möt nariget. Mewö.

Stiwen meraköba memba jöhöget.

⁸ Anutugö kalem möriamji aka kukösumnji mianjön nupbauk azi Stiwengö urunji kokolak qei kinda aiwesök angöletot ketanji ketanji mi ambazip sutnjine mei asuhuget.

⁹ Mi asuhugetmö, Juda tosatjan wahöta Stiwen angötuarenjone ak wangiget. “Lolohoba kagerangö köuluk miri kambu”^{*} yengö sutnjine Juda tosatjan Sairini aka Aleksandria Ijpt siti yahöt miangörejök lilingöba kaba kinget. Azi mewöjnan mindiriba wahöta Silisia aka Eisia prowinsnöhök kageri, yengö kambunöhök Juda azi tosatnji engömembra mohotje Stiwenbuk möndönja goranora aka jitnakölik erauget.

¹⁰ Mewö jigetmö, Uja Töröjnan Stiwen sölölohöi mötkutukutu ketanjangö qakje keunji melenja jiyöhi, mi Juda yenjön qeapköbingö osiba etket.

¹¹ Osiba eta mömölaköba anda azi tosatnji miwikjaiba kungum engiba kaba kewö jiget, “Yanjön mepaqepaik keu jiba mianjön Moses aka Anutu qetal etkii mörin.”

¹² Mewö jiba anda ambazip kambu, yengö jitjememe aka Köna keugö böhi miengö urugege keu jigetka urunjini könöp jeyök. Könöp jeiga kölölohoba kaba Stiwen öröba meraköba memba jike kaunsöl kambu yengö jenjine anget.

¹³ Anda azi tosatnji enguangitketka kota Stiwengö silenje keu muneji ala kewö nangöba jiget, “Azi kianjön mönö jöwöwöl jikenini aka Mosesgörej Köna keu tuarenjone aka qahö mosörakzappmö, mi toroqeba jimahakza.

¹⁴ Tuarenjone aka kewö jii mörin, ‘Jisös, Nazaret azinöj mönö jöwöwöl jike ki köndenjiga qeqelanjan ahöma aka Mosesnöj Köna keu nenjii ahözawi, mi uteköma.’”

¹⁵ Mewö jigetka jike kaunsöl kambugö totokonöj tatkeri, yenjön körekjan Stiwen törörök ugetka kaisongolomjan Suep garata tandök ewö ahiga eka mötket. Mewö.

7

Stiwenöj keu likepni melenja jii mötket.

¹ Stiwen keu jakenje al wangigetka kini jike galöm bohonjan kewö qesim wangiyök, “Keu mi ölna me muneja?”

Stiwenöj Abrahamgö kösohotnji jiyök.

² *Qesim wanggiiga likepni kewö melenök, “Aziurup, iwi darumuni, nöjön kewö jibi mötket: Nanine ambönini Abrahamnöj Mesopotemia gölmenöj maliga asakmararan Tonji Anutu yanjön asuhum wanggiiga Mesopotemia mosöta Haran mirinöj anda malök.

³ Anutunöj kewö jii mörök,

* **6:9:** Köuluk miri kambu kungö qetnji mi kewö asuhui qetket: Ambazip pomji yenjön tosatnji bohonjini engömegetka bunjanjini aka tonjanangö welennjini öne qeba mala (sleiw) böröjineyök lolohoba kageri, yenjön mönö nanjini köuluk miri kambunjini ala qetnjini mi mewö qetket. * **7:2:** Jen 12.1

‘Gi nangi miri gölmeği aka tinitosolomurupki engömosöta gölme kun kondel gihimami, mönö miangören anda malman.’

4 *Mewö jii möta Kaldia gölme mosöta Haran gölmenöñ anda malök. Miangören mali iwiñan kömui Anutunöñ melaim wañgiiga inini nalö kewöñe ki maljei, mönö gölme kiangören kaba könahiba tata malök.

5 *Gölme kiangören tata maliga Anutunöñ gölme kitipñi borom kun köna tamböñangö dop mi qahö buña qem wañgiyök. Gölme kiangö tonji qahöpmahöp qahöpmö, Abrahamgö gwölönarökñi qahö ahuiga Anutunöñ nalö miangörenök yangö keu qeljine kewö jiba jöhöyök, ‘Nöñön gölme ki mi gi aka göhö andöge gwölönarökurupki ahumei, mönö engöra engibi miangö tonji akrje.’

6 *Mewö jiba toroqeba keu kewö jiyök,

‘Göhö gwölönarökurupkan gölme kungen anda kian aka malme. Kian aka malgetka gölme miangö tonji yeñön jöhöm engigetka tonjanangö welennini öne qeba malme. Mewö malgetka tulumgöm engigetka nup lömbötñi lömbötñi öne megetka söngöröñi qahö engigetka (yara) yambu 400:gö dop wahöjalij qakñe malme.

7 *Mewö malmemö, nöñön könañep gölme ambazip welennini qeba malmei, mi keunöñ ala jim teköm engimam.’

Mewö jiba toroqeba jiyök,

‘Mewö asuhuiga gwölönarökurupkan gölme mi mosöta gölme kiangören lilingöba kaba waikni memba möpöseim niñgiba malme.’ Mewö.

Aisak, Jeikob aka Josef yangö kösohotñini jiyök.

8 *‘Anutunöñ Abrahamgöra mewö jiba aiwesök kewö akrjegöra jii mörök, ‘Inini nömbuk jöhöjöhö akrjegöra mönö nöngö aiwesök esöñini köla azi silenine yandiba malme.’ Miangö dop Abrahamnöñ nahönñi Aisak ahuiga silim 8 aiga miangören aiwesök mi silene yandiyök. Aisaknöñ nahönñi Jeikob qiwikñaiwa aiwesök mi yandiyök aiga Jeikobnöñ nahönurupñi qiwikñaim engiba miangö dop yandim engiyök. Jeikobkö nahönurupñi 12 yeñön Israel neñgören amböskonurupnina aket.

9 *‘Amböskonurupninan munñini Josef mi andö qem wañgiba bohonñi memegöra algetka tosatñan söngöröñi memba wañgita Ijpt kantrinöñ anda algetka malök. Miangören malökmö, Anutunöñ yambuk kinök.

10 *Yambuk kiniga köñjilij könañi könañi qakñe öngöi möröhi, körek miengörenök mönö meköm wañgiyök. Meköm wañgiba kalem möriamñi wañgii mötkutukutunji ölöpñan asuhuyök. Mi asuhuiga Ijpt kantrigö farao kin yangö jeñe añgori ehi dop köliga azi kembu kuñgum wañgii Ijpt kantri aka farao kinjö jakömbuak miri yuainji galöm köñ engiba malök.

11 *Galöm köñ engiiga bödi nalöñi kam kuñguiga Ijpt pakpak aka Kenan gölme mi dop kölö. Miangöra ambazipnöñ kahasililij ketañi möta malget. Mewö mala nanine amböurupninan nene miwikñaiwingö meme yangap meget.

12 ‘Mewö megetka ‘Ijpt gölme miangören padi ahöza,’ mewö jigetka Jeikobnöñ mörök. Mewö möta nahönurupñi, nanini amböurupnini mi nalö mutukñi melaim engii miangören anget.

13 *Mewö anda mala lilingöba iwiñinangören kaget. Könañep indimñi kun kunbuk angetka Josefnöñ könañamñi indeli mötket. Mötketka farao kinñöñ mewöñanök tinitosolomñi engeka könañini möt kutuyök.

* 7:4: Jen 11.31; 12.4 * 7:5: Jen 12.7; 13.15; 15.18; 17.8 * 7:6: Jen 15.13-14 * 7:7: Eks 3.12

* 7:8: Jen 17.10-14; 21.2-4; 25.26; 29.31-35.18 * 7:9: Jen 37.11, 28; 39.2, 21 * 7:10: Jen 41.39-41

* 7:11: Jen 42.1-2 * 7:13: Jen 45.1, 16

14 *Möt kutuiga Josefnöŋ keu ala iwiŋi Jeikob aka tinitosolomurupŋi pakpak mi köl öröm enġii yaŋgöreŋ anget. Ambazip angeri, yeŋgö jaŋgöŋini mi 75 ahök.

15 *“Jeikob mewö waŋgitketka Ijpt gölmenöŋ anök. Anda mala mianġöreŋ kömuyök. Amböurupninan mewöyök kömum teköget.

16 *Kömum tekögetka qamötŋini memba aŋguba Kenan gölmenöŋ liliŋgöba Sekem mire kaba löm köl enġiget. Mönöwök Abrahamnöŋ Sekem (Sikem) mala gölme kun azi qetŋi Hamor yaŋgö gwölönarökurupŋi yeŋgöreŋök moneŋnöŋ söŋgöröŋi meyöhi, mönö mianġö qaksiriŋe köt köteŋ urorohoba mianġöreŋ al enġiget.” Mewö.

Mosesnöŋ Ijpt kantrinöŋ ahuba mala korök.

17 *Stiwenöŋ toroqeba kewö jiyök, “Anutunöŋ mönöwök jöhöjöhö keu Abraham waŋgiyöhi, mi öljambuk akŋapkö nalöŋi töriba dopdowiyök. Dopdowiyöhi, mianġö dop Israel yeŋön Ijpt gölmenöŋ ahum sehiba malgetka kambuŋinan qariba öŋgöyök.

18 Qariba öŋgöiga farao kiŋ kunöŋ wahöta könahiba Ijpt galöm köl enġiyök. Kiŋ dölökŋi mianġön Josefgö könaŋi mi qahö möta malök.

19 *Yaŋgö könaŋi kude möta nanini könagesö mi isimkakalek qakŋe tilipköba amböurupnini mulumgöm enġii malget. Mewö malgetka kiŋnöŋ köhöiba Israel kewö jim kutum enġiyök, ‘Inini mönö morö azi sepsepŋini memba yaigepŋe anda onöŋ gilgetka geba kömume.’

20 *“wö jiiga nalö mianġöreŋök morö kun qetŋi Moses asuhuyök. Anutunöŋ i eka möri dop kölök. Mosesnöŋ ahuiga iwinamŋan i köiŋ karöbut mianġö dop miriŋire galöm köla malohot.

21 *Köiŋ karöbut mi teköiga namŋan waŋgita yaigepŋe anda köndenöŋ o qakŋe ala mosörök. Mosöta ani farao kiŋgö böratŋan miwikŋaiba meiga nahönŋi aiga galöm köl waŋgii malök.

22 Mewö maliga Ijpt yeŋgöreŋ mötmöt aka aiaka pakpak mi kusum waŋgigetka mianġö dop Ijpt yeŋgöreŋ mötkutukutu azi ketanŋi ahök. Yaŋön keuŋi aka ahakmemeŋi mi ösum-mumu qakŋe jiba aka malök.

23 *“Mosesgö (yara) yambuŋi 40 teköiga mianġöreŋ Israel darumunurupŋi yeŋgö prowinsnöŋ anda enġekŋamgö mötmöriba keuŋi jöhöba anök.

24 Anda Ijpt azinöŋ Israel azi kun yambuk öne töhöŋ aŋgururuk aka öröm ureim ak waŋgiba qeyöhi, mi ehök. Mi eka anda Israel azi mi bauköm waŋgiba andöŋe anda likepŋi melenġa Ijpt azi mi qeba qem kömuyök.

25 Qem kömuiga Anutunöŋ Mosesgöreŋ nariba Israel ambazip farao kiŋgö böröŋeyök meköm enġimangöra kukösum waŋgii kayök. Yeŋön Moses eka könaŋi mewö ölop möt asarize, mewö mötmöriyökmö, yeŋön mi qahö möt asariba öne tönpin malget.

26 “Miri gianjiiga kunbuk yeŋgöreŋ ani Israel azi yahötŋan auyohotka etkehök. Etkeka esapköba sutŋire luai ahumapkö möta kewö jiyök, ‘Azi yahöt, iŋiri darumuna. Nanŋiri mohot mianġön mönö wuanöŋgöra mewö ayuhum aŋguzahot?’

27 Mewö jiyökmö, azinöŋ alaŋi mem bölim waŋgiyöhaŋön mönö Moses könöpkuk utala kewö jim waŋgiyök, ‘Gi mönö nengöreŋ galöm aka jimtekötekö azia akzan me? Daŋön mewö kuŋgum gihiiga kinjan?’

* 7:14: Jen 45.9-10, 17-18; 46.27 * 7:15: Jen 46.1-7; 49.33 * 7:16: Jen 23.3-16; 33.19; 50.7-13; Jos 24.32 * 7:17: Eks 1.7-8 * 7:19: Eks 1.10-11, 22 * 7:20: Eks 2.2 * 7:21: Eks 2.3-10 * 7:23: Eks 2.11-15

28 Gi uran Ijipt azi qenöŋ kömuyöhi, mönö mewö ni nuŋgumangöra jizan me?’

29 *Mewö qesim waŋgiiga keu miangöra aka Ijipt kantri mosöta ölöŋ köla Midian gölmenöŋ anda kiana malök. Mewö mala ambi memba nahönyahötŋi yahöt qiwikŋaim etkii malget.” Mewö.

Mosesnöŋ gölme qararaŋkölkölŋe yambu 40 malök.

30 *Stiwenöŋ keu toroqeba kewö jiyök, “Mewö malgetka (yara) yambu 40 teköiga miangören Mosesnöŋ gölme qararaŋkölkölŋe liliköba kundunŋi qetŋi Sainai miangö könaŋe mali Suep garata kunŋan asuhuyök. Mi ip köhöösö kemaŋe könöp bölam asuhuba qahö jem kutuyöhi, miangören asuhum waŋgiyök.

31 Mewö asuhum waŋgiiga tandök miangöra welipköba könaŋi eka möt kutumangöra kösutŋe ani Anutugörenök keu kun kewö kai mörök,

32 ‘Nöŋön göhö ambösakonurupki yeŋgö Anutuŋina akzal. Nöŋön Abraham, Aisak, Jeikob yeŋgö Kembuŋina mala kota maljal.’ Mewö jii möta jönömŋi könahiba unduiga miangören göröken uba ekŋamgö keŋgötŋi mörök.

33 “Keŋgötŋi mörökmö, Kembunöŋ kewö jii mörök, ‘Gölme tiba kinjani, mi gölme kömbukŋa. Miangöra gi mönö köna esugi qeköman!

34 Nöŋgö ambazip kambu-urupni Ijipt maljei, mi mulungöm enjigetka sihimbölo qakŋe aum-möriba malje. Nöŋön mi eka maljal. Yeŋön osongom enjui sahöt uletzei, nöŋön mi möt teközal. Nöŋön yeŋgö böröŋineyök meköm enjimangöra etzal. Miangöra gi mönö dölkö wahöta ki kanöŋga melaim gihibiga Ijipt anman!’ Mewö jiyök.”

Mosesnöŋ Israel enjuaŋgiri yambu 40 könanöŋ malget.

35 *Stiwenöŋ keu toroqeba kewö jiyök, “Yeŋön Moses qaŋ köla köndat waŋgiba kewö jiget, ‘Gi mönö galöm aka jimtekötekö azia akzan me? Daŋön mewö kuŋgum gihiiga kinjan?’ Mewö qaŋ köla jigetmö, Anutunöŋ Moses mi melaim waŋgiiga yeŋgö pom kembuŋina ahök. Suep garatanöŋ ip köhöösönöŋ bölam jeyöhaŋgören asuhum waŋgiyöhi, yaŋön mönö Anutugören buzup keu mi memba kaba uruŋi kuŋgui mekömekö aziŋina ahök.

36 *Israel mekömekö aziŋina aka ambazipurupŋi mi aiwesök aŋgöletot könaŋi könaŋi memba Ijipt kantrinöhök meköba enjuaŋgiriga mosöta Köwet Pisikŋi miangören kaget. Emu kagetka miangören aka gölme qararaŋkölkölŋe mewöŋanök toroqeba aiwesök aŋgöletot murutŋi murutŋi mi (yara) yambu 40 miangö uruŋe memba kondeli eka malget.

37 *Mosesnöŋ pom kembuŋina mala Israel könagesö yeŋgöra kewö jiyök, ‘Anutunöŋ Juda kambu enö sutŋineyök kezapqetok azi kun möwölöhöba kuŋguiga ni ewö akŋa.’

38 *‘Israel yeŋön gölme qararaŋkölkölŋe kaba malgetka pom kembuŋini aka nanine ambösakonurupnini yembuk mala könagesöŋini galöm köl enjuyök. Galöm köl enjiba kundunŋi qetŋi Sainai miangören öŋgöi Suep garata kunŋan keu jii möta yambuk malök. Mewö mala Anutunöŋ malmal köhöikŋaŋgö keuŋi sundan jii möta malöhi, yaŋön keu mi miangö dop jiiga neŋgö Bunaya ahök.

39 “Yaŋön pom kembuŋina malökmö, nanine ambösakonini yeŋön keuŋi tem köl waŋgibingö ölan enöghöiga andö qeget. Andö qeba utal waŋgiba uruŋini möŋaiiga Ijipt kantrinöŋ kunbuk lilingöbingö sihimŋi mötket.

* 7:29: Eks 18.3-4 * 7:30: Eks 3.1-10 * 7:35: Eks 2.14 * 7:36: Eks 7.5; 14.21; Jan 14.33 * 7:37: Dut 18.15, 18 * 7:38: Eks 19.1-20.17; Dut 5.1-33

40 *Mewö möta Mosesgö datñi Aron yangöra kewö jiget, 'Mosesnön pom kembunini aka Ijipt kantrinöhök meköba neŋguaŋgiriga kaini, yañön kunduje öngöba tandök denöwö akzawi, nini mi qahö mötzin. Mi qahö mötzinañgöra göñön ölop tandö lopion menöñga mienön jitñememenini aketka könañine toroqeba anbin.'

41 *"Mewö jiba miangörenök goul memba miañön lopion kun bulmakau moröñangö tandök meget. Mi memba jöwöwöl memba kaba al wañgiba lömbuañ ohoba yuai böröñinan megeri, miangö sösoñgai aka möpöseiget.

42 *Mewö aketmö, Anutunön mi eka ölan yöhöiga andö engui Suepkö senjelau Tonji waikñini memba möpöseim engegimegöra engegimosörök. Kezapqetok azi Amosnön keu kun ohoi Buzup Kimbinön ahözawi, mönö miangö dop kewö aket,

'O Israel ambazip, inini gölme qararañkölkölñe kaba (yara) yambu 40:gö dop mala nalö miangören sömbup jöwöwöl ohoba naluk tosati memba kaba niñgiba malget me qahö?

43 Mi qahöpmö, enön mönö bem qetñi Molok yangö opo seri koumñi mi anguget aka bem qetñi Refan yangören senjelau imutñi mi anquba kaba malget.

Enön imut lopion mi waikñiri memba möpöseim etkibingö meget buñajina ahök.

Miangöra aka nöñön mönö inini közöl engebii kerökurupñinan kaba enguañgiketka anda mala köröwen Babilon kantrigö andöñe öngöba malme!' " Mewö.

Stiwenön opo seri jikegö keuñi jiyök.

44 *"Ambösakonurupnini yeñön gölme qararañkölkölñe kaba mala Anutugö dangununji kuñguba opo seri jike memba anquba malget. Mi memba anquba Anutunön jikenji memegöra Moses jim kutum wañgiba söpsöp imutñi kondel wañgii ehöhi, mönö miangö dop meget kinök.

45 *Mosesnön ambösakonurupnini galöm köl engeiga yeñön opo seri jike mi anquba malget. Könañep Josuanön wahöta galöm köl engeii gwölönarökurupñinan jike mi buña qem anquba toroqeba kaba mala kantri ki kañgotket. Kantri ki kañgotketka Anutunön gölme tonji kambunji kambunji enguatanöi angetka gölmeñini anön köla meget. Memba tata malgetka kin Deiwidnön asuhuyök.

46 *"Yañön asuhuba Anutu jemesoholñe kalem möriamñi miwikñaiba kewö qesim wañgiyök, 'Anutu Jeikobkö bemñi, göñön ölop jinöñga nöñön jim kutubi nini göhöra jöwöwöl jike bohonñi membin.'

47 *Mewö qesim wañgiyökmö, Solomonön jiiga Anutugöra jöwöwöl jike meget.

48 Mi megetmö, Öngöñgöñi Ketani yañön azinön miri böröñinan megeri, miangören qahö malja. Miangö keuñi kezapqetok azi kunjan kewö ohoi ahöza,

49 *Kembunön jiza: Nöngören jakömbuak dum tatatni mi Suepnön ahöiga gölme mi könañangö döpnji aiga miangören tiba tatzal.

Inini mönö nöngöra miri tandökñi denöwö megetka dop kölbawak?

Me miri denikeangören miwikñaim niñgigetka miangören öngöba luhut memba malbilenjak?

* 7:40: Eks 32.1 * 7:41: Eks 32.2-6 * 7:42: Amos 5.25-27 * 7:44: Eks 25.9, 40 * 7:45: Jos 3.14-17 * 7:46: 2 Sml 7.1-16; 1 Hist 17.1-14 * 7:47: 1 Kin 6.1-38; 2 Hist 3.1-17 * 7:49: Ais 66.1-2

⁵⁰ Yuai pakpak mi mönö nanak nani börönan miwikñaim engial mi mötze.' ” Mewö.

Stiwenöy kaunsöl yengö uruñini kungyök.

⁵¹ *“O qegetal ambazip, engö uruñinan mönö duhuiga kopa akze! Kezapñinan köungöba qahö kötökñi tohoza! Mi duhuzawangöra Anutugören keu qetala kezapjupjup ahakze. Ambösakonñinan Uña Töröñi tuarenjon ak wangiba malgetka enön mönö yengö dop toroqeba mewöñanök Uña Töröñi sundan dop andö qemakze!

⁵² Engö ambösakonurupñinan kezapqetok ambazip awamñi qahö sesewerowo ak engiba malget. Yengörenök danön mönö kahasililin qahö miwikñaiyök? Yenön Azi Solanñan asuhumapkö kezapqetok keuñi jigetka i enjuget kömuget. Yenön kömugetka Azi Solanñan nanñak asuhuiga inini i mamalolo ak wangiba qeget kömuyök.

⁵³ Anutunöy garataurupñi melaim engiiga Suepnöhök eta Köna keu engigetka Buñanini ahökmö, enön mi qahö tem köla malget.” Mewö.

Stiwen kötnöy qeget kömuyök.

⁵⁴ Stiwenöy keu mewö jiiga jike kaunsöl yenön mötkeri, mi uruñini sounöy qesinqesini ewö qesinök. Qesiniga uruñini könöp jeiga ambarik (amdabö) yöhöba wahöta kinget.

⁵⁵ Mewö aketmö, Uña Töröñan Stiwegö uruñi kokolak qeiga jeni Suepnöy göröken ui öngöiga Jisös Anutugö asakmararaj uruñe euyangören Anutugö böröñi ölñe kini ehök.

⁵⁶ Jisös eka jiyök, “Mötket! Suepnöy anañiiga Suep gölmegö Azi Ölñan mönö Anutugö böröñi ölñe kiniga ekzal.”

⁵⁷ Mewö jii möta qet gigilahögetka göju ketanji wahöriga kezapñini böröñinan gwözönnda körekñan luhuba anda qeraköba meget.

⁵⁸ Mewö memba taon göräñe örörahöba anda yaigepñe ala kötnöy könahiba gila qeget. Mewö qegetka tosatñan mi eka kinda malukuñini qeköba mölohoba azi gwabö Solgö kösutñe alget.

⁵⁹ Mewö aka kötnöy gila qebayök kingetka Stiwenöy Anutugö köuluköba kewö jiyök, “O Kambu Jisös, gi mönö uñani memba angön kölman!”

⁶⁰ Mewö jiba siminñan geba köla qet gigilahöba jiyök, “Kambu, sinjisöndok ki akzei, miangö lömbötñi mönö yengö qakñine kude alman!” Mewö jiba nöy geba kömuyök. Mewö.

8

Solnöy urumelen kambu sesewerowo ak engii denget.

¹ Stiwen qeget kömuyöhi, mi Solnöy mewöyök möri dop kölök. Nalö miangörenök sesewerowo ketanji ahuiga Jerusalem sitigö urumelen kambu kazik ak engiget. Miangöra yenön körekñanök siti mosöta denja Judia aka Samaria prowins yahöt mi dop köla angetka aposol yenönök kapan köla sitinöy malget.

² Ambazip Anutu göda qeba waikñi memba malgeri, yengörenök tosatñan Stiwen kömuyöhanğöra jinğen köla gwötpuk sahöta qamötñi memba anda löm kölget.

³ *Löm kölgetmö, Solnöy urumelen könagesö jangauranga mem engiba mirinji mirinji liliköba öngöba urumelen azi aka ambi örörahöba engömemba gili etketka jiiga kösö mire al engiget. Mewö.

* **7:51:** Ais 63.10 * **8:3:** Apo 22.4-5; 26.9-11

Filipnōj Samaria sitinōj Buja nup meyök.

⁴ Urumelen ambazipnōj denja miri dop anda kaba lilikōba malgeri, yeñon Ölōwak Buja jiba mianōn ambazip uruñini kuñguba malget.

⁵ Filipnōj Samaria prowinsgō siti kunōj geba Amōtqege Tonj Kraistkō kōnañi jim asarim enjii mōtket.

⁶ Mia jim asarim enjiba anğōletot meiga letotketka ambazip kambu yeñon mi eka keu jiyōhi, mi urumohot aka kezap ala mōta anğon kōlget.

⁷ Filipnōj nup meiga Anutugō ösumñan öme gwōtpuk mi ambazip uruñineyök enğuatanğöyök. Enğuatanğöiga qet bölöbölö qeta kota anget. Nup meiga ambazip sehisehiñi likepñini kōmukōmuñi aka lokon malgeri, mi ölōwaket.

⁸ Mewō aiga Samaria sitinōj sösōngai öngōngōñi asuhuba ahöyök. Mewō.

Sile galöm azi Saimonōj timbiqim bilim ahök.

⁹ Sösōngai ahöyökmō, Samaria siti mianğoreñ suña jinañ azi kun qetñi Saimon malök. Yañon (yara) yambu tosatñi qarōsongo amōtqege nup memba Samaria ambazip welipkōm enjiiga malget. Mewō malgetka “Azi öngōngōñi akzal,” jiba nanñangōra mōri öngöyök.

¹⁰ Ambazip öngōngōñi eretñi yeñon körek pakpak Saimongō keugōra kezap ala mōta kewō jimalget, “Anutugō ösumñi qetñi ‘Kukōsum ketañi,’ qetzei, mianōn mōnō azi mianğō uruñe geiga ahōza.”

¹¹ Saimonōj qarōsongo amōtqege nup mi nalō köröpñi memba ambazip welipkōm enjiiga malget. Mewō ak enjiyōhanğōra aka yanğoreñ qekōtahōba malget.

¹² Mewō malgetmō, Filipnōj kaba Anutugō bemtohoñe anğotpingō Ölōwak Bujañi aka Jisōs Kraist qetñangō kōnañi mi jim asarim enjiyök. Mi jim asarim enjiiga ambazip gwōtpukñan Buja keu mōt nariba uruñini melengetka o melun mem enjiyök.

¹³ Mewō aketka Saimonōj mewöyök keu mi mōt nariiga o melun mem wanğigetka Filipkō kōsutñe kaba mala wuatangöyök. Mewō aiga Filipnōj anğōletot aiwesök ketañi ketañi mei asuhugetka mi eka welipkōba malök. Mewō.

Uña Törōñan Samaria yeñgō uruñine geyök.

¹⁴ Samaria ambazipnōj Anutugōreñ Buja keu mewō mōt anğon kōlgeri, mianğō buzupñan sehiba Jerusalem sitinōj ani aposol yeñon mōtket. Yeñon mi mōta Pitō aka Jon mekōba melaim etkigetka yeñgoreñ anohot.

¹⁵ Anda anğota yeñgōra aka kōulukōba Uña Törōñan uruñine gemapkōra Kembu qesiyohot.

¹⁶ Kōnañi kewögōra qesiba kōulukōyohot: Yeñon Kembu Jisōsgō qetñe o melun mem enjigetmō, Uña Törōñan yeñgoreñök kungō uruñe qahō gei öne malget.

¹⁷ Mianğōra kōulukōba börōñiri nöröpñine alohotka Uña Törōñan uruñine geiga meget. Mewō.

Saimonōj Uña Törōñi söñgōrōñi memamgō jiyök.

¹⁸ Aposol yetkōn börōñiri ambazip nöröpñine alohotka Anutunōj mianğō dop Uña Törōñi yeñgō uruñine aliga Saimonōj mi eka moneñ memba kaba kewō jiyök,

¹⁹ “Injiri mōnō kukōsum mewōñi mi nia kun niñgiyohotka memba börōni denike yeñgō nöröpñine almami, Uña Törōñan mōnō yeñgō uruñine gema.”

²⁰ Mewö jiyökmö, Pitönöŋ kewö jim waŋgiyök, “Aek! Yapmakek! Göŋön Anutugö kalemŋi mi moneŋnöŋ söŋgöŋöŋi memamgöra jizan. Miangöra gi mönö moneŋgabuk könöp sianöŋ geman.

²¹ Göhö urugan mönö Anutugö jeŋe qahö diŋgiza. Miangöra gi Buŋa keu kiangö ölni kun qahöpmaöhöp meman.

²² Bölöŋamgeyök mönö urugi melenä Kambu köulukönöŋga yaŋön uru mötmötkahö siŋgisöndokŋi mi mosötpawak.

²³ Göhö urugan mönö kömbuhiiga wösökömbuk ewö jula kokolak qem gihiza. Siŋgisöndokan mönö kösö ewö köpeim gihiiga qaközan.”

²⁴ Pitönöŋ mewö jiiga suŋa jinaŋ azi Saimonöŋ kewö melen etkiyök, “Mönö nöŋgöra aka Kembugö köuluköyohotka keu jizahori, miangö ölni kun qahö asuhum niŋgibawak.”

²⁵ Aposol yetköŋ Kembugö Buŋa keu mi siti miangöŋeŋ naŋgöba jiba jim asariba eŋgömosöta anohot. Könanöŋ anda Samaria prowinsgö miriŋi miriŋi liliköba ambazip uruŋini Ölöwak Buŋa keunöŋ kuŋgum eŋgiba mala Jerusalem sitinöŋ lilingöba anohot. Mewö.

Filipnöŋ Afrika azi kungöra Buŋa keu jii mörök.

²⁶ Kembugöŋeŋ garata kunŋan Filipköra keu kewö jii mörök, “Gi mönö Jerusalem siti mosöta Saut göröken anman. Gölmö qararaŋkölkölŋe köna isikŋi (walŋi) Gaza taonöŋ gemakzei, mönö miangöŋeŋ anman.”

²⁷ Mewö jii möta Filipnöŋ amqeba mosöta anök. Anda Afrika azi kunŋan miriŋe lilingöba ani könanöŋ miwikŋaiyök. Yaŋön Etiopia kantrigö kandasi qingö jembonŋi öŋgöŋgöŋi aka ambi kembugö jakömbuak miriŋe moneŋ aka inap yuaini galöm köla malök. Silenŋgö yuaigöra aka Juda azi akŋamgö osiyökmö, töndup Anutugö waikŋi memba möpöseimamgöra Jerusalem sitinöŋ kayök.

²⁸ Kaba miriŋe lilingömamgöra hos karenöŋ öŋgöiga hosnöŋ öŋögetka könanöŋ anök. Miangöŋeŋ anda kezapqetok azi Aisaiagö buk kötula oyoŋda tarök.

²⁹ Mewö aiga Uŋa Töröŋan Filipköra saŋep ala keu kewö jiyök, “Gi mönö hos kare miangö qöhöröŋe anda mötöteiba anman.”

³⁰ Uŋa Töröŋan mewö jiiga miangöŋeŋök ösumŋan kösutŋe anök. Anda azinöŋ kezapqetok azi Aisaiagö buk miangö Buŋa keuŋi oyoŋni mörök. Möta kewö qesim waŋgiyök, “Keu oyoŋjani, mi ölop möt asarizan me qahö?”

³¹ Qesim waŋgiiga jiyök, “Kunŋan qahö jim asariiga nanak mi denöwö möt asaribileŋak?” Mewö jiiga hos karenöŋ öŋgöiga mohotŋe tarohot.

³² *Buŋa Kimbi oyoŋnöhi, mi kewö,
“Azinöŋ lama qem yandibingöra memba waŋgitzei, yaŋön mönö miangö dop ösöŋ sororoŋgöba ahöyök.

Galömŋan lama moröŋaŋgö jupŋi fitanöŋ mitiiga qöhöröŋe göröŋ qeba tim gwiriŋi qahö kinjawi, yaŋgö numbuŋaŋgö dop mönö qahö waumgöba aŋaŋiyök.

³³ Memba et al waŋgigetka kunŋan keu jakene keuŋaŋgö likepŋi qahö naŋgöba jiiga öne jim teköget. Gölmönöŋ malmalŋi mewö waŋgitket. Gwölönarökurupŋi qahö mewö kömuyök. Miangöra kunŋan qet areŋi könaŋgep qahö oyoŋda jima.”

³⁴ Jembonöŋ mi oyoŋda Filip kewö qesim waŋgiyök, “Kezapqetok azinöŋ keu mi dagöra jiza? Mi nanŋaŋgöra me azi kungöra jiza? Gi ölop miangö könaŋi jinöŋ mötŋi.”

* 8:32: Ais 53.7-8

³⁵ Qesim waŋgiiga kezapqetok yeŋgöreŋ Buzup Kimbinöhök könaħiba Jisösgö Ölöwak Buŋa mi könaħambuk jim asarii mörök.

³⁶ Mewö eraum möta könanöŋ anda o kösutŋe aŋgorohotka qin jembonŋan jiyök, “Eknöŋ, o töwatŋi ki ahöza. Miangöra gi ölop o melun mem niŋgiman. Keu kunöŋ aŋgön köl gihiza me qahö?”

³⁷ (Mewö jiiga Filipnöŋ jiyök, “Gi keu jibi mötzani, mi urugi jömuk Anutugöreŋ ala möt narizan ewö, mi ölop akŋam.” Jiiga keu kewö melenök, “Jisös Kraistnöŋ Anutugö Nahönŋi akza, nöŋön mi möt narizal.”

³⁸ Mewö melenäda jim kutuiga hos kare jöhögetka mohotŋamŋire oe geba Filipnöŋ o melun mem waŋgiyök.

³⁹ Mi mem waŋgiiga onöhök korohotka Kembugö Uŋa Töröŋan Filip waŋgiri öŋgöba sök aliga qin jembonŋan i kunbuk qahö ehök. Qahö ehökmö, toroqeba sösoŋgai qakŋe miri gölmeŋe Etiopia anök.

⁴⁰ Filipnöŋ sök ala anda taon qetŋi Asdod miangöreŋ asuhui miwikŋaiget. Miangöreŋök toroqeba taonŋi taonŋi liliköba miangöreŋ Ölöwak Buŋa keunöŋ ambazip uruŋini kuŋguba anda mala Sisaria taonöŋ kaŋgorök. Mewö.

9

Kembunöŋ Sol asuhum waŋgiiga uruŋi melenök.

Apo 22.6-16; 26.12-18

¹ Nalö sutŋe miangöreŋ Solnöŋ urukönöp qakŋe kinda uru silenji bölam tepköiga Kembugö gwarekurupŋi eŋgum ureim eŋgiba malök. Mewö mala jike nup galöm bohonŋi yaŋgöreŋ anök.

² Yaŋgöreŋ anda kewö kuŋguba qesiyök, “Köna dölökŋi wuatangöba maljei, yeŋgöreŋök tosatŋan Damaskus sitinöŋ köröwen malje. Miangöra nöŋön ölop endu anda jarum eŋgiba kun miwikŋaimami, i mönö jöhöba waŋgita Jerusalem sitinöŋ kamam. Damaskus sitinöŋ Juda neŋgö köuluk miri galöm kölakzei, yeŋön i aŋgön köl eŋgibepuköra mönö jimtekötekö kimbi ohoba niŋginöŋga memba anda kondel eŋgiman.” Mewö jii ohoi memba anök.

³ Könanöŋ anda mala Damaskus siti dopdowimamgö aiga yuai kun wölaŋ kewö asuhuyök: Asakmararaŋ kun Suepnöhök wölbilik ewö asuhuba eta liliköm waŋgiyök.

⁴ Liliköm waŋgi tala gölmenöŋ geba ahöba kouruk kun möriga keu kewö jii mörök, “Sol Sol, gi mönö wuanöŋgöra sesewerowero qakŋe al niŋgizan?”

⁵ Mewö jiiga Solnöŋ qesiba jiyök, “Kembu, gi daŋön?” Mewö jiiga melenök, “Ni Jisös sesewerowero qakŋe al niŋgimakzani, ni mönö mi.

⁶ Mi akzalmö, ölop wahöta sitinöŋ anman. Miangöreŋ anda wani yuai akŋani, kuŋŋan miangö buzupŋi jii mötman.”

⁷ Azi yambuk köna anda malgeri, yeŋön keuŋini qahöwahiga tömtömimba kinget. Yeŋön keu kouruk ölŋa mötketmö, azi kun qahö eket.

⁸ Keu meleniga Solnöŋ gölmenöhök wahörökmö, jeŋi uba yuai kun qahö eka jipjap kinök. Mewö kiniga böröŋe memba Damaskus sitinöŋ waŋgita anget.

⁹ Angetka wehön karöbut miangö dop jipjap mala o me nene kun qahö nempa öne malök. Mewö.

Ananiasnöŋ Sol o melun mem waŋgiyök.

¹⁰ Damaskus sitinöŋ Jisösgö gwarekŋi kun qetŋi Ananias malök. Kembunöŋ kutum wasöriga imut ehiga “Ananias!” qerök. Qetŋi qeriga jiyök, “O Kembu, ni ki maljal.”

11 Mewö jiiga jii mörök, “Gi mönö wahöta köna qetnji Köna Diñdiji jimakzei, mianğoreñ anman. Mianğoreñ anda Judasgö mire öngöba Tarsus azi qetnji Solgöra qesiman. Mötnöñ, yañön ni köuluköm niñgiba tatza.

12 Köuluköba tata uruñan imut kun kewö ehök: Azi qetnji Ananiasnöñ miriñi uruñe kañgota jeñi kunbuk tohomapköra böröñi nöröpñe alma.”

13 Kembunöñ keu mewö jii möta meleşnök, “O Kambu, ambazip gwötpukñan azi mianğö kösohotñi lök jiget möral. Yañön Jerusalem sitinöñ göhöreñ könagesöurup sarakñi mi gwötpuk engum ureim ak engiba malök.

14 Jike nup galöm bohonñi yeñön nam köla kukösum wañgigetka Damaskus siti kianğoreñ mewöyök nup miyök memamgöra kayök. Ambazip göhö qetki qeta köulukömakzini, yañön mönö nini körek pakpak neñgömembra jöhöm neñgimangö mötza.”

15 Mewö meleşnökmö, Kembunöñ jii mörök, “Nöñön azi mi meköm wañgibiga qetni bisiba nöñgöra bim qeba malma. Mewö mala gölmeñi gölmeñi liliköba Buñani jim sehiiga Israel aka kian kantri ambazipnöñ mötme. Keu jakeñi jakeñi mianğoreñ örögetka azi kambu gwötpuk yeñgö jeñine angota Buñani jii mötme. Mianğöra mönö töndup anöñ.

16 Yañön qetni bisiba mianğöra sihimbölö gwötpuk mötma. Nöñön mianğö areñi kondel wañgimangö mötza.”

17 Mewö jii möta Ananiasnöñ anda miri mianğö uruñe öngöba böröyahötñi Solgö nöröpñe ala jiyök, “Sol alani, köna namñe kanöñga Jisösnöñ asuhum gihiyöhi, Kambu mianğön mönö melaim niñgiiga kazal. Göhö jegan kunbuk tohoiga Uña Töröñan urugi kokolak qemawañgöra jiiga kazal.”

18 Mewö jiiga mianğoreñök yuai sönuetñambuk tandök mianğön jeñeyök tala et teköi jeñi tohoiyök. Jeñi tohoiga ui asariiga wahörök. Wahöta jiiga o melun mem wañgiyök.

19 O melun mem wañgiiga nene nembra köhöiyök. Solnöñ köhöiba gwarek yeñgö sutñine Damaskus sitinöñ wehön tosatñi malök. Mewö.

Solnöñ Damaskus sitinöñ Buña nup meyök.

20 Mala mianğoreñök wahöta Juda yeñgö köuluk miriñi miriñi mianğoreñ öngöba Jisösgö könañi jim asariba ambazip uruñini kuñguba kewö jiyök, “Jisösnöñ mönö Anutugö nahönñi akza.”

21 Mewö jii möta körek yeñön auruba welipköba jiget, “Jerusalem sitinöñ qet mia qet köulukögeri, azi kianğön mi engum ureiba malök me qahö? Mewöñanök kianğoreñ kayöhi, mi mönö nini jöhöba neñgungita jike nup galöm bohonñi yeñgö böröñine al neñgimangöra kayök. Mianğöra mönö denöwö letota nanjak Anutugö keu miyök nanğöba jiza?”

22 Mewö jigetmö, Anutunöñ Sol ösum-mumu wañgii kunbuk köhöiba malök. Köhöiba mala Juda ambazip Damaskus sitinöñ malgeri, yeñgö uruñini kuñguba kewö jiba malök, “Jisösnöñ ölna Anutugöreñ Amötqeqe Tonji Kraist akza.” Keu mi jim köhöiba könañi kondela maliga yeñön köñkuñ aka keu mi qeapköbingö osiba malget.

23* Silim gwötpuk teköiga mianğoreñ Juda yeñön tokoba keu nup memba Sol qeget kömumapkö angönañi alget.

24 Angönañi algetmö, mianğö buzupñi mi Solgö kezapñe gei mörök. Solnöñ Damaskus siti mosötmangö aiga mianğoreñ qeget kömumapköra siti kiripo nanğunje yañgöra sunğem asak je galöm memba malget.

25 Mewö memba malgetmö, gwarekurupñan sunğem kunöñ sakap (misak) ketañi memba kösönöñ jöhöba Sol sakapnöñ ala siti selgö kinimñeyök alget geba anök. Mewö.

* 9:23: 2 Kor 11.32-33

Solnön Jerusalem kusukñanök anda malök.

²⁶ Solnön anda Jerusalem sitinön angota Jisösgö gwarekurup yembuk esapköba toroqeyökmö, körek yeñön Sol gwarek aka malöhi, mi qahö möt narigeranğöra aka yanğöra kenğötñini mötket.

²⁷ Kenğötñini mötketmö, azi qetñi Barnabas yanğön ala ak wañgiba köyan köla wañgita aposol yeñğoreñ anda kondela kösohotñi kewö jim asarim enğiyök, “Sol azi kianğön könanön kaiga Kembunön asuhum wañgii ehiga keuñi jii mörök aka könanğep Jisösgö qetñi mi Damaskus sitinön jim asariba köhöikñanök uru kuñgum enğiba malök.”

²⁸ Kösohotñi mewö jim asarim enğiiga yembuk toroqeba Jerusalem siti uruñe liliköba awösamkakak kinda Kembugö qetñi aukñe qeta ambazip urukuñgukuñgu köhöikñi al enğiba malök.

²⁹ Mi al enğiba mala Juda ambazip Grik keu möta malgeri, yembuk eraum möta möndömkösök keu melenqeleñ ahökmö, yeñön Sol kapan köla qeget kömumapkö mötket.

³⁰ Mi esapkögetka alaurupñan Sol miwikñaiba wañgita Sisaria taonön anda kinda melaigetka nanñök toroqeba ahuahua taonñi qetñi Tarsus mianğoreñ anök. Mewö.

Urumelen kambu yeñön luainön malget.

³¹ Solnön uruñi melenñiga mianğö andöñe urumelen könagesö pakpak Judia, Galili aka Samaria prowins dop köla malgeri, yeñön luai miwikñaigetka Uña Töröñan i mem köhöiba nanğöm enğiiga malget. Mewö mutulanğöba Kembugö keuñi onğitpinbuköra kenğötñini möta nup megetka urumelen könagesönñinan qarim sehiiga malget. Mewö.

Pitönön Lida azi kun mem ölöwahök.

³² Pitönön mirinñi mirinñi liliköba Jisösgö könagesö sarakñi enğeka anda mala nalö kunön taon qetñi Lida mianğoreñ anğorök.

³³ Angota mianğoreñ azi kun qetñi Ainius miwikñaiyök. Likepñi kömukömuñi aiga dumnöhök ahöba mali (yara) yambu 8 teköyök.

³⁴ Pitönön i miwikñaiba kewö jiyök, “Ainius, Jisös Kraistnön gi mem ölöwak gihiza. Mianğöra mönö wahöta tumbulahöpki qezaköman.” Mewö jiiga mianğoreñök wahörök.

³⁵ Mewö asuhuiga Lida aka Saron ambazip pakpak yeñön i eka uruñini melenñda Kembugöreñ qekötahöget. Mewö.

Pitönön Jopa anda Tabita mem guliyök.

³⁶ Jopa taonön gwarek ambi kun qetñi Tabita malök. (Qet mi Grik keunön Dorkas, nanine keunön teu, Inğlis keunön deer.) Yanğön nalö dop nup ölöpñi ölöpñi memba kalem sehisehinñi mendenñda ambazip etqeqeñi bauköm enğiba malök.

³⁷ Pitönön gölme mianğoreñ mali Tabitanön nalö mianğoreñ kawöl asuhum wañgii kömuyök. Kömui qamötñi sanğonñda memba miri uruñi kunön onğöba alget.

³⁸ Lida mi Jopa taon kösutñe tarök. Mianğöra Pitönön Lida malöhi, gwarek yeñön mi möta azi yahöt melaim etkigetka anda Pitö kewö qesim wañgiyohot, “Gi mönö zilañ kanönğa netpuk Jopa taonön anbin.”

³⁹ Qesim wañgiyohotka mianğoreñök amqeba yetpuk anget. Anda anğotketka qamöt miri uruñe ahöyöhanğoreñ wañgita onğöget. Onğögetka ambi malö pakpak Pitö liliköba sahöta Dorkasnön yembuk mala opo maluku uhum memba enğiyöhi, mi kondel wañgiget.

⁴⁰ Kondel wangigetmö, Pitönöŋ jii körek yeŋön gem tekögetka simin köla köuluköyök. Köuluköm teköba qamöt mesohol köla kewö jiyök, “Tabita, mönöhöhönöŋ.” Mewö jiiga jeŋi uba Pitö eka wahöta tarök.

⁴¹ Tariga Pitönöŋ böröŋe memba kököbiihiiga wahöta kinök. Kiniga urumelenŋ alaurupŋi aka ambi malö enŋoholi öŋgöget. Öŋgögetka kömupnöhök guliba wahöröhi, ambi mi jemesoholŋine ali eket.

⁴² Mianŋö keu buzupŋi mi Jopa uruŋe miri dop ani möta ambazip gwötpukŋan könahiba Kembu möt narim wangiget.

⁴³ Pitönöŋ Jopa mianŋöreŋ sömaŋi tosatŋi toroqeba mala Saimongö mire tata ahöyök. Azi mi köna esu memegöra bulmakau silenŋi urasiba sanŋonŋa möhamgöba malök. Mewö.

10

Korniliusnöŋ Pitö ohola uruŋi meleŋnök.

¹ Taon qetŋi Sisaria mianŋöreŋ suaöhö galöm kianŋi kun qetŋi Kornilius malök. Yaŋön yarö kambu bahöŋi kun qetŋi “Italigö yarö kambu” qetkeri, mianŋöreŋ yarö azi 100 yeŋgö galömnina malök.

² Yaŋön saiwaurupŋi pakpak yembuk Anutu göda qeba waikŋi memba möpöseiba malget. Mewö malgetka Juda ambazip wanapŋi yeŋgöra kalem sehisehiŋi enŋiba Anutu qösösök (qörörök) köuluköba malök.

³ Mare kunöŋ 3 kilok mianŋö dop aiga Kembunöŋ Kornilius kutum wasöriga imut kun ehök. Imut törörök eka mianŋöreŋ Anutugöreŋ garata kunŋan miriŋe öŋgöi ehök. Garata mianŋön öŋgöba “Kornilius!” jiba qetŋi qerök.

⁴ Mewö qeriga garata ehiba sömbuŋi möta jiyök, “Ketanamni, wanigöra ki kazan?” Mewö jiiga meleŋnök, “Gi köuluköba malnöŋga keugi Anutugöreŋ öŋgöiga möri ölöwakza. Gi ambazip wanapŋi kalemŋi kalemŋi mendeŋ enŋimakzani, mi Anutunöŋ möta anŋön köla göhöra mötmöriba melaim niŋgiiga kazal.

⁵ Mianŋöra mönöhöhönöŋ kölek alnöŋga Jopa taonöŋ aniga azi qetŋi Saimon, qetŋi kun Pitö qetzei, ia wangita kame.

⁶ Yaŋön sömbup silenŋangö nup meme azi qetŋi Saimon yaŋgö mire köwet jitŋe mianŋöreŋ malja.”

⁷ Suep garatanöŋ Korniliusgöra keu mewö jibagun mosöta anök. Mosöta aniga welenqeqeŋi yahöt etkoholi kayohot. Kayohotka yarö azi kun kösutŋeyök kapan köla Anutu göda qeba malohori, i mewöyök oholi kayök.

⁸ Kagetka garatagöreŋ keu mi körek jii mötketka melaim enŋii Jopa taonöŋ anget. Mewö.

Kembunöŋ Pitö kutum wasöriga imut ehök.

⁹ Azi yeŋön könanöŋ angetka miri gianŋi taon dopdowigetka silim bibiŋe mianŋöreŋ Pitönöŋ miri uruŋi kun eu mianŋöreŋ öŋgöba kinda köuluköyök.

¹⁰ Kinda köuluköba nenegö kömumba yuai nemangö möta jii ohoget. Ohogetka nalö mianŋöreŋ Kembugö alburupŋan qeiga tata imut kun kewö ehök:

¹¹ Suepnöŋ aŋaŋiiga könde ketanŋi kun erök. Könde mi opo tuatŋi ketanŋangö tandök ewö ahök. Garata yeŋön yuai mianŋö wangömnŋi 4 mianŋöreŋ memba nanŋöbeak, mianŋö tandök ewö gölmenöŋ erök.

¹² Yuai mianŋö uruŋe sömbup könaŋi könaŋi tatket. Sömbup tosatŋan köna 4:ŋan tiba anakze. Tosatŋan wösönöŋ ölölöŋgöba anakze. Mewöyök neiŋi neiŋi könakemba bölbölgöba anakzei, yuai mewöŋi mewöŋi mi könde mianŋö uruŋe mohotŋe etket.

¹³ Etketka miangören qet kun asuhuba keu kewö jii mörök, “Pitö, gi mönö wahöta yuai ki qeba ohoba nenö.”

¹⁴ Mewö jii mörökmö, Pitönö jiyök, “O Kambu, mewö qahö kötökni! Mi dönqizinambuk. Ni nalö kunö yuai anjöörakambuk mi kude neal. Ni miangöra imbilonlon mötzal.”

¹⁵ Mewö jiiga qet mianön kunbuk asuhuba yangöra jiyök, “Anutunö yuai jim könjörari ahözawi, gönön miangö qetni anjöörakambuk mewö qetnonga qahö dop kölja.”

¹⁶ Yuai mewöni mi kunbuk asuhui indimni karöbut ahök. Indimni karöbut aiga miangörenök künde mi kunbuk örögetka Suepnö öngöyök.

¹⁷ Pitönö imut mi eka miangö kōnaangöra kōnkun aka mötmangö möt bibihiba tarök. Mewö tariga nalö miangörenök Korniliusnö azi melaim engii kaba Saimongö miri jaruba miangöra qeqesi aka miwiknaiba kangota miri nangunë kinget.

¹⁸ Miri nangunë kinda kewö qeta qesiget, “Saimon qetni alanj Pitö qetzei, yanön miri kiangören malja me qahö?”

¹⁹ Pitönö toroqeba imut miangö kōnaangöra möt bibihiba tariga Uña Törönan kewö jii mörök, “Mötnö, azi karöbutnan kaba gi jarum gihize.

²⁰ Nönön azi mi melaim engibiga ki kaze. Miangöra mönö dölki wahöta geba uruyahöt mosöta yembuk anman.”

²¹ Mewö jiiga Pitönö azi miangören geba jiyök, “Mötket, injini azi jaruzei, nönön mia akzal. Mönö denöwögöra kaze?”

²² Jiiga melenget, “Suahö galöm Kornilius mi azi diñdini akza. Yanön Anutu waikni memba möpöseiba mali Juda ambazip kambu körek yenön göda öngöngöni qem wangimakze. Anutugö garata töröni kunjan asuhum wangiba kewö jim kutui mörök, ‘Gi mönö kolek ala Pitö köl öröm wanginonga mirige öngöba keu uruneyök jimawi, mi kezap ala mötman.’ ”

²³ Mewö melengetka öröm engii miri urunë öngögetka köyan köl engii köisirik tata ahöget. Ahögetka miri gianjiiga Pitönö wahöta yembuk anök. Jopa taon miangörenök ala tosatni engömeiga yambuk mohotne anget. Mewö.

Pitönö kian ambazip yembuk tokoget.

²⁴ Mohotne anda sömanj mohot ahöba anda mala Sisaria taonö angotket. Angotketka Korniliusnö yengö mamböt aka malök. Mewö mala tinitosolom aka alaurupni ölopni mi köl öröm engii mirine tokoba tatket.

²⁵ Angota Pitönö mire öngömangö aiga Korniliusnö wahöta eta jölöni jiba kōna geba sipkōm wangiyök.

²⁶ Sipkōm wangiyökmö, Pitönö böröne memba kökōbihiiga wahöri kewö jiyök, “Mönö wahötnö, nia kun gölme aziyök akzal.”

²⁷ Mewö jii yambuk eraum möta miri urunë öngöyohotka ambazip gwötpuknan tokoba tatkeri, mi engehök.

²⁸ Engeka kewö jii mötket, “Injini Juda ambazip nengö kōnaamnini mötze. Juda nini ambazip kianni engö mire öngöba embuk köisirik tatatkö songo ahöi osizin. Mi osizinmö, Anutunö keunji kun kondel ningiba kewö jiyök, ‘Gönön ambazip inji wainj yengö qetnini mi anjöörak imbilonlonambuk mewö kude qetman.’ ”

²⁹ Miangöra injini kolek ala köl öröm ningigetka nönön qahö qetala kaba kangotzal. Kangota kewö qesizal: Injini mönö wuanöngöra kolek ala köl öröm ningiget? Mi ölop jiget mötpi.”

³⁰ Mewö jiiga Korniliusnö melenök, “Ni mare kunö nalö kewöne 3 kilok miangören mirine tata köuluk nup memba mala kotpi merak sömanj

4 akza. Köuluk nup memba malbiga miangörenök azi kun sileötanji asakmararajambuk mianön asuha wösöne kinök.

³¹ “Wösöne kinda kewö jiyök, ‘Kornilius, gi köuluköba malnonga keugi Anutugören öngöiga möri ölöwakza. Gi kalemni kalemni ambazip wanapni menden engimakzani, mi Anutunön möta anğön köla göhöra mötmöriba melaim ninggiiga kazal.

³² Miangöra mönö dölki kolek alnonga Jopa taonön aniga azi qetnji Saimon, qetnji kun Pitö qetzei, ia wanğita kame. Yanön sömbup silenangö nup meme azi Saimon yanğö mire köwet jitne malja.’

³³ “Mewö jiyöhangöra aka nöñön miangörenök kolek albiga göhören kaget. Göñön keuni möta kazanangöra uruni ölöwakza. Kembunön keu pakpak jimangö jim kutum gihiyöhi, göñön mi ölop jinön mötpin. Nini pakpak dölki miangöra tokoba Anutugö jemesoholne ki tatzin.” Mewö.

Pitönön Korniliusgö mire Buja keu jiyök.

³⁴ *Korniliusnön mewö jiiga Pitönön könahiba kewö jiyök, “Aha! Anutunön ambazip tosatnji qahö engek soriba tosatnji qahö qepureim engimakzapmö, dop mohotnön kewöt nenğimakza. Yanğö jeñe kunjan anğöjörakjambuk qahö akza. Nöñön mi dölki ölja möt kutuzal.

³⁵ “Mewö qahöpmö, ambazip kambunji kambunji körek yeñgö sutnjine denike yeñgörenök kunjan Anutu waiknji memba möpöseiba aiakanan köna diñdini wuatangözawi, yanön mönö Anutugö jeñe dop kölja.

³⁶ Jisös Kraistnön ambazip körek neñgö Kembuya aka luai qem nenğimakzawi, Anutunön Buja keunji mi Israel könagesö nenğoren ali kayök. Buja mianön kaiga nini miangö Ölöwak Bujanji jim asariba maljin.

³⁷ Jonön ambazip urunini kuñguba kewö jiyök, ‘Inini mönö urunini melengetka nöñön o melun mem engimam.’ Mewö jiiga miangö andöñe keu mi Galili prowinsnön könahiba jiget sehiba anda Judia prowinsnön anğota körek dop kölök. Inini mi lök mötze.

³⁸ “Anutunön Uña Törönji Nazaret azi Jisösgö uruñe mokoiga kukösum buja qem anğuba gölme dop liliköba malöhi, mi yambuk kiniga anda ambazip ak kömum enğiyök. Bölönangö Tonjan ambazip ösumñan jöhöba öröm enğii gegeri, yanön mi pakpak mem ölöwak enğim teköyök.

³⁹ Yuai mi Juda neñgö gölmenön aka Jerusalem sitinön aka memba maliga ip kemañe ala qeget kömuyök. Nini mi pakpak eka nanğöba jiba dangununji aka kinjin.

⁴⁰ Kömumba ahöi sömañi karöbut aiga Anutunön mem gulii wahörök. Wahöta indimni gwötpuk ambazip asuhum enğiyök.

⁴¹ “Yanön ambazip kambu pakpak yeñgöra qahö asuhuyökmö, Anutunön mutuhök nini möwölöhöm nenğiiiga Jisösnön kömupnöhök wahöta malöhi, nalö miangören yambuk keu eraum möta nene anğum nem malini, mönö neñgöra asuhuiga nini miangö keunji nanğöba jiba kinjin.

⁴² Mewö kininga Jisösnön kewö jim kutum nenğiyök, ‘Anutunön kuñgum ninggiiga nöñön ambazip maljei aka kömuger, yeñgören jimtekötekö Tonjina akzal. Miangöra enön mönö nöngö könañamni mi ambazip kambu dop yeñgöra nanğöba jim asariba malme.’

⁴³ Ambazip denike yeñön Jisös möt narim wanğiba qetnji qerakzei, Anutunön mönö qet mi möta yeñgö siñgisöndokñini mosöta sanğonmakza. Yanğö könañamni mewö ahözawi, mi kezapqetok ambazip körek yeñön nanğöba jim asariba ohoget ahöza.” Mewö

* 10:34: Dut 10.17

Uña Töröñan kian ambazip yengöreñ erök.

⁴⁴ Pitönöñ keu mewö jibayök kiniga Uña Töröñan ambazip kezap ala mötkeri, yengö uruñine geyök.

⁴⁵ Anutunöñ Uña Töröñ kalemñi mi kian ambazip yengö uruñine mewöyök mokoi geyöhi, mi Pitögö alaurupñan eka aurugot. Juda ambazip silenine Anutugö aiwesökñi yandigetka uruñini melenđa Jisös möt nariba Pitö wuatangöba kaba tatkeri, mienön mönö auruba kewögöra welipköget:

⁴⁶ Yeñön kantri tosatñi yengö keuñini murutñi murutñi könahiba jiba Anutu möpöseiget. Mianğöra welipkögetka Pitönöñ kewö qesiba jiyök,

⁴⁷ “Yeñön Uña Töröñi mi neñön ahin ewö angön köla buña gem anguzei, mi mötzin. Mianğöra i ölop o melun mem enğiinga dop kölma. Mi ahinga danön qetal nenğibawak?”

⁴⁸ Mewö jiba jim kutum enğiiga Pitögö alaurupñan kinda Jisös Kraistkö qetne Kornilius saiwaurupñi o melun mem enğiget. O melun mem enğigetka Pitö angön köl wangigetka toroqeba silim tosatñi yembuk malök. Mewö.

11

Pitönöñ Jerusalem anda nupñangö kösohotñi jiyök.

¹ Kian kantri yeñön mewöyök Anutugöreñ keu memba angön kölgeri, mianğö buzupñi mi aposol aka urumelen alaurup Judia prowins dop köla mala mötket.

² Mianğöra Pitönöñ Jerusalem sitinöñ lilingöba öngöiga Juda silenine Anutugö aiwesök yandigetka uruñini melenğeri, yeñön jijiwilit (jelikit) aka jim wangiget.

³ Jim wangiba kewö jiget, “Kian kantri azi Anutugö aiwesökpuk qahö maljei, gi mönö wuanöngöra anda yembuk köisirik tata nene nenöñ? Mi qahö dop kölja.”

⁴ Mewö jigetka könakönahineyök könahiba yuai asuhuyöhi, mi körek pakpak areñambuk jim asarim enğiba kewö jiyök,

⁵ “Nöñön Jopa sitinöñ mala köuluköbiga Kembugö alburupñan nunğuga tata imut kun kewö ehal: Suepnöñ anañiiga könde ketañi kun erök. Könde mi opo tuatñi ketañangö tandök ewö ahök. Garata yeñön yuai mianğö wangömñi 4 mianğöreñ memba nanğöbeak, mianğö tandök ewö nöngö kösutneyök eta ahöyök.

⁶ Eta ahöiga yuai mianğö uruñe törörök ekiga sömbup könani könani mianğöreñ tatket. Sömbup tosatñi mi gölmenöñ köna 4:ñan tiba anakze. Tosatñi kalñi könöpñinambuk akze. Tosatñan wösöñinan ölölöngöba anakze. Mewöyök nei könani könani könakemba bölbölgöba anakzei, yuai mewö mi könde mianğö uruñe mohotne etketka enğehal.

⁷ Engekiga qet kun mewöyök asuhuba kewö jii möral, ‘Pitö, mönö wahöta yuai ki qeba ohoba nenöñ.’

⁸ “Mewö möralmö, nöñön kewö jial, ‘O Kembu, ni mianğöra imbilonlon mötzal. Yuai dönqizin angöjörakñambuk mewöñi mi nalö kungen nöngö numbunan qahö oseiyök. Mianğöra mi mönö qahö kötökñi nemam.’

⁹ Mewö jibiga qet mianön kunbuk Suepnöhök asuhuba kewö jiyök, ‘Anutunöñ yuai jim könjörari ahözawi, göñön mianğö qetñi angöjörakñambuk mewö kude qetman.’

¹⁰ Yuai mewöñi mi indimñi karöbut asuhuyök. Mewö asuhuiga yuai pakpak mi kunbuk örögetka Suepnöñ lilingöba öngöyök.

11 Öngöba atatop (jiataton) köliga nalö miangörenök Korniliusnöh Sisaria taonöhök azi karöbut melaim engii nöngören kageri, yeñon miri tarini, miangö nanguje kinget.

12 “Nanguje kingetka Uñanöh kewö jim kutum ningii möral, ‘Gi mönöh uruyahöt yaköriba yembuk anman.’ Keu mi mötpiga urumelen alaurupni 6 yeñon mewöyök Jopa mosöta nömbuk Sisaria taonöh anin. Sisaria angota suahö galöm miangö mire öngöin.

13 Öngöinga keu kösohot kewö ak neñgiyök, ‘Garata kunñan nöngö mire asuhuiga ekiga kinda kewö jii möral: Gi mönöh Jopa mire kolek ala azi qetñi Saimon, qetñi kun Pitö i wangita kaget.

14 Yañon kaiga Buña keu jiiga gi aka saiwaurupkan mi möt nariba uruñini melengetka körek amöt qem engiiga letotme.’

15 “Kösohot mi ak neñgiiga nöñon könahiba Buña keu jial. Mi jibi mötketka Uña Töröñan könakönahije neñgö urunine geyöhi, mönöh miangö dop kezap ala mötketka yeñgö uruñine mohot geyök.

16 *Yañon geiga ekiga miangörenök Kembangö keu kun nöngö mötmötnöh kangori mötmörial. Keu mi kewö, ‘Jonöh o töhönöh melun mem engiyökmö, nöñon Uña Töröñi uruñine ala miangön melun mem engimam.’

17 Neñon Kembu Jisös Kraist möt narim wanginga Anutunöh kalemñi neñgiyöhi aka yeñon möt narigetka Anutunöh kalemñi miyök engö uruñine mewöyök alök. Miangöra aka ni ewöñan mönöh denöwö Anutu kukösum Tonj esapköba qetal wangibileñak? Yañon mewö ak engiiga nöñon angön köl wangimangö osial.”

18 Pitönöh kösohotñi mewö jii möta uruñini amörii böñjöh aiga Anutu möpöseiba kewö jiget, “Ölña, nini urunini melenja malmal köhöikñangö buñaya akzin mötzinmöh, Anutunöh köna mohot mi kian kantri ambazip yeñgöra mewöyök al engii ahöza. Mi mönöh dölkö asariba möt kutuzin.” Mewö.

Kian kantrinöh urumelen kambu mutukñi asuhuyök.

19 *Stiwen qeget kömuyöhangöra aka kahasililij asuhuiga urumelen ambazipnöh denja liliköba anda kaget. Anda kagetka tosatñan köwet jitñe Fonisia gölmenöh anget. Tosatñan köwet kutuba gölme jölanñi qetñi Saiprus miangören anget. Tosatñan Siria prowinsgö sitiñi qetñi Antiokia anget. Mewö denja angetmöh, ambazip sutñine Jisösgö Buña keu mi Juda ambazip yeñgörök jigetka mötket. Kian kantri yeñgöra mi qahö jiget.

20 Qahö jigetmöh, Saiprus aka Sairini azi tosatñan yeñgö sutñine malget. Yeñon kian gölmenöh qariba Antiokia sitiñöh kangota gölme tonj yembuk Grik keunöh eraum möta Kembu Jisösgö Ölöwak Buña mi mewö Juda qahö yeñgöra mewöyök jim asarim engiget.

21 Mi jim asarim engigetka Kembunöh yembuk mali ösumñan ambazip uruñini kungum engii gwötpuk yeñon Kembu Jisös möt nariba uruñini melenja yangören qekötahögetka kambuñini qariiga ketanj ahök.

22 Mewö aiga miangö buzupñan anda Jerusalem könagesö yeñgö kezapñine gei mötket. Mi möta Barnabas melaigetka Antiokia sitiñöh anök.

23 Anda angota Anutunöh kalem möriamñi ambazip engii ölöwakeri, mi jeñan eka möri öngöi söngäiba qambañi kewö jiyök, “Inini mönöh körek pakpak uruñini qezaköba köhöiba Kembubuk qekötahöba kinme.”

24 Barnabasnöh azi ölöpñi aiga Uña Töröñan uruñi kokolak qeiga uruyahöt andö qeba uruñi jömuk miangön Jisös möt narim wangiba malök. Miangöra

* 11:16: Apo 1.5 * 11:19: Apo 8.1-4

ambazip gwötpukñan uruñini melenja Kembangö kambunöñ toroqeketka qariyök.

²⁵ Barnabasnöñ Antiokia mosöta Sol jarumangöra Tarsus taonöñ anök.

²⁶ Anda miwikñaiba wangiri Antiokia sitinöñ kayohot. Kaba miangörej mohotñamñire (yara) yambu mohot jömukñanök mala zioz nup memba uruñini melenjeri, mi kambuñi kambuñi köla kusum engiyohotka ambazip gwötpukñan mötmöt memba urukönömñine alget. Antiokia ambazipnöñ mutukñi könahiba gwarek qetñini Kraistkö alaurup (kristen, Kraistkö buña) qeta malget. Mewö.

Kian kantrigö urumelen yeñön Juda nanjöm engiget.

²⁷ Nalö miangörej kezapqetok ambazip tosatñan Jerusalem mosöta Antiokia sitinöñ eta kanjotket.

²⁸ *Yeñgöreñök kun qetñi Agabus mi wahöta Uña Töröñan sölölohöi buzup keu kewö jii mötket, “Bödi ketañan asuha gölmeñi gölmeñi dop köla ahöma.” Mewö jiiga miangö dop sisa kiñ qetñi Klodius yangö galömkölköl nalöñe asuhuyök.

²⁹ Mi asuhuiga gwarek yeñön mindiriba urumelen alaurupñini Judia prowinsnöñ malgeri, mi nanjöm engiba mindimindiri naluk ketañi alget anmapkö keu jöhöget.

³⁰ Keu mi jöhöget aka miangö dop ölña aket. Yeñön monen aka yuai tokoba Barnabas Sol yetkö böröñire ala melaim etkigetka Jerusalem anda urumelen könagesö yeñö jitmemeurupñini engeka engiyohot. Mewö.

12

Herodnöñ Jeims qeba Pitö kösö mire alök.

¹ Nalö miangörej kiñ Herodnöñ* urumelen könagesö sesewerowero mem engibingö möta jiiga urumelen ambazip tosatñi engimemba jöhöm engiget.

² Kiñnöñ jiiga Jongö datñi Jeims mi bimgö sou ketañan qegetka kömuyök.

³ Mewö jii kömuiga Juda ambazip tosatñan mi mötket ölöwahiga ehök. Mi eka miangöra toroqeba jiiga Pitö mewöyök memba jöhöget. Yuai mi beret yistñi qahöpkö kendon nalöñe jiiga asuhuyök.

⁴ *Miangöra kiñnöñ kewö jiyök, “Nöñön ak-kömukömu kendon† teköiga Juda yeñgö keu jakeñe almam.” Mewö jiba jii kösö mire alget. Algetka yarö azi 16 yeñön sutñine kambu 4 köla nalö utekutek aketka azi 4:ñan sundan sunjem asak kinda galöm mem wangiba malget.

⁵ Pitö mewö galöm mem wangiba malgetka kösö mire ahöyökmö, urumelen könagesö yeñön sundan dop yangöra aka Anutu kapañ köla köuluköba malget. Mewö.

Suep garatanöñ Pitö pösata wangita erök.

⁶ Köuluköba malgetka ak-kömukömu (Pasowa) kendon teköiga sunjem miangörej yarö azi yahötñan Pitö tapep (munjamunja) yahötnöñ jöhöm köhöiyohotka sutñire gaun ahöyök aka wahibuk tosatñan nanju andöñe kinda kösö miri galöm meget. Kiñ Herodnöñ miri gianjiiga Pitö wangita keu jakeñe almangö mötmöriba areñ ali gaun ahöget.

⁷ Gaun ahögetmö, Kembangö garata kunñan wölañ asuha Pitö qöhöröñe kini kösö mirigö uruñi asarim teköi Pitögö nambulñe qeba jiyök, “Mönö

* **11:28:** Apo 21.10 * **12:1:** Kiñ Herod Agripa I (mutukñi) yanön (yara) yambu 37-44 miangörej Palestain pakpak galöm köl engiba malök. * **12:4:** Eks 12.1-27 † **12:4:** Pasowa nanine keunöñ qetñi alañi mi walöñsörak aka goukölköl. Israel ambazip yeñön Ijipt mala nanjuñini sepnöñ mirigetka Anutugö garatanöñ nenjehoriba nenjogita morö mutukñini qahö engui kömuget.

zilaŋ wahötnöŋ.” Mewö jii tapep (muŋgamuŋga) yahötŋan mianğöreŋök Pitögö böröŋeyök öne sulohot.

⁸ Sulohotka garatanöŋ jii mörök, “Mönö opogi jöhöba köna esugi utnöŋ.” Mi möta mewö ahök. Mi aiga toroqeba jii mörök, “Mönö malukugi kölnöŋ geiga ni nuatanğöba kaman.”

⁹ Mewö jii möta miri uruŋi mosöta wuatangöyök. I wuatangöba anökmö, garatanöŋ yuai ahöhi, mi ölna asuhuyök me qahö, yaŋön mianğöra möri janjuŋ ahök. Yaŋön gaun ahöba imut ehöhi, mianğö tandöktandök möri ahök.

¹⁰ Miri uruŋi mosöta naŋgu mutukŋe galöm memba kinohori, mi etkoŋgita naŋgu kunöŋ aŋgota etkoŋgita öne kutuba anda kösö miri silenangö ain kiripone aŋgorohot. Aŋgorohotka naŋgu köhöikŋi ketanŋi mianğön mönö nannök öne taliga yaigepŋe siti köna numbuŋe geyohot. Geba köna namŋi strit kun toroqeba anohotka garatanöŋ wölaŋ Pitö mosöta sök alök.

¹¹ Sök aliga Pitögö uruŋi tohoiga kewö jiyök, “O Kembunöŋ mönö garatanŋi melaii kaba Herodgö böröŋeyök meköm niŋgiza, mi mötzal. Juda ambazipnöŋ nöŋgö silene yuai asuhumapköra mambötzei, yaŋön mönö yuai pakpak mianğöreŋök bohoni jöhöza. Nöŋön dölkü mi ölna möt kutuzal.”

¹² Mewö möt kutui asariiga Jongö namŋi Mariago mirinöŋ göröken anök. Jon mianğö qetŋi kun Mak qetket. Miri mianğöreŋ ambazip gwötpukŋan tokoba Anutu köuluköba malget.

¹³ Mewö malgetka Pitönöŋ kaba söndaknöŋ kinda naŋgunöŋ qeyök. Naŋgunöŋ qeiga welenqeŋe ambi qetŋi Roda yaŋön kaba “Gi danöŋ?” jiba qesiyök.

¹⁴ Qesiba kinda Pitögö jölŋi möt kutuba “I-ia kazan!” jiba söŋgaiba luhuba naŋgu qahö öröba ösumŋan miri uruŋe öngöba jiyök, “Pitönöŋ kaba naŋgunöŋ kinja.”

¹⁵ Jii möta yaŋgöra “Urugi sohoi jizan,” jiget. Jigetmö, yaŋön bohon köla “Keu ölna jizal!” jiyök. Mewö jüiga jiget, “Mi mönö Pitögö garatanŋan kinja.”

¹⁶ Mewö eraum mötketmö, Pitönöŋ naŋgu qebayök kiniga öröba eka auruet.

¹⁷ Auruetka böröŋan söpsöp ala ölöŋ almegö jiyök. Jiba Kembunöŋ kösö mireyök waŋgiri yaigepŋe eröhi, kösohot mi jiyök, “Inini buzup ki mönö bisop Jeims aka urumelen alaurup tosatŋi yeŋgöra jigetka mötme.” Mewö jiba eŋgömosöta miri kungen anök. Mewö.

Pitönöŋ kösö miri mosöriŋa Herodgö irimŋi seholidyök.

¹⁸ Miri gianjiiga yarö azi yeŋön Pitö jaruba “Denike sömuniba sök ala anja?” jiba mianğöra kahasililiŋ aka waimanjat ketanŋi mötket.‡

¹⁹ Herodnöŋ mewöyök Pitö miwikŋaimegö jii jarum bibihiba qahö mi-wikŋaigetka azi wahibuk Pitögö galöm megeri, mi keu jakeŋe ala gwötpuk qesim eŋgiba jim teköba eŋguanŋita eŋguget kömumegö jim kutum eŋgiyök. Mianğö andöŋe Judia prowins mosöta Sisaria taonöŋ geba mianğöreŋ malök. Mewö.

Anutunöŋ kiŋ Herod kitipŋi waŋgii kömuyök.

²⁰ Fonisia prowinsgö taon qetŋiri Taiö aka Saidon yeŋön nenegö nupŋini membingö osiba kiŋ Herodkö kantri yeŋgöreŋök nene yuaiŋini bohonŋi memba malget. Mewö malgetka Herodkö irimŋi seholidiŋa Taiö Saidon kerök ak eŋgiba nene eŋgimegö songo alök. Mianğöra yeŋön mindiriba jitŋememeurupŋini melaim eŋgigetka kambu köla kiŋ Herod ekingöra anget.

‡ **12:18:** Kösö azinöŋ ölöŋ kölbawak, azi wahibuk mi mönö eŋgugetka kömuzema. Rom gawman nupkö areŋi mewö. Mianğöra kahasililiŋ aka waimanjat ketanŋi mötket.

Angetka jembonji qetji Blastus jakömbuak mirinangö galömnan i mutuk engehök. Engehiga jiget, “Nini keu jim solaniinga luai ahumapkö qesib-ingöra kazin.” Mewö jiba jim mölöwörim ak wanjigetka jiyök, “Ölöp keunini kötöngöba andöjine kinmam.”

²¹ Mewö jiiga kiñnöh keu melen enjimamgö nalö mem enjiiga miangören tokogetka nanji silenji menjölöba kiñ azi kembugö malukuñi köla eta jakömbuak dum tatatne tata yengöra sösöngai keu jiyök.

²² Jiiga ambazip kambu yenhön möta kewö jiba qetket, “Keu mi Anutugören keuya. Mi gölme azigö keuya qahö.”

²³ Mewö qetketmö, kiñnöh mewö aka Anutugö qetbuñaji qañ köla qahö möpöseiba nanji möri öngöyök. Miangöra Kembugören Suep garata kunjan miangörenök qei döhönöh yöhösii kömuyök.

²⁴ Mewö asuhuyökmö, Anutugören Buña keu mi jiba malgetka töhötmöriamñambuk aka sehiyök.

²⁵ Antiokia siti yenhön Barnabas aka Sol nanjönangö misin nup kun§ etkigeri, yetkөн mi Jerusalem mala meköyohot teköyök. Mi teköiga Jon qetji kun Mak qetkeri, i wanjita mohotne Jerusalem mosöta Antiokia sitinöh lilingöba kaget. Mewö.

13

Barnabas Sol yetkөн misin nupkö könahiba anohot.

¹ Antiokia sitinöh tosatnan urunini melenja urumelen könagesö aketka jitnememeni kewönan kezapqetok keu jiba kusum engiba malget: Qetjini Barnabas aka Simeon qetji kun Injaji (Grik keunöh Naijö) aka Lusius (Sairini gölmegöra), Manain (mi kembu gawönö Herod* yambuk öröröh mala qariyohot) aka Sol.

² Urumelen könagesö yenhön Kembugö waikñi memba möpöseiba nene sinji malgetka miangören Uña Törönan kewö jiyök, “Nöhön Barnabas aka Sol nup qainji kun memahotköra etkoholal. Miangöra ehön mönö i jim teköba melaim etkigetka anmahot.”

³ Mewö jiiga köulukömegöra nene sinji mala böröjini nöropñire algetka Kembugö ösumnan etkualöjniga melaim etkigetka anohot. Mewö.

Saiprus gölme jölanje anda nup meget.

⁴ Uña Törönan mewö melaim etkiiga miri qetji Selusia miangören geyohot. Miangören geba wanjenöh öngöyohotka opo seri öröba mörörengögetka luhutnöh nanjöi anda gölme jölanji Saiprus miangö wehön kotkotne angotket.

⁵ Angotketka siti qetji Salamis miangören anda Juda ambazip yengö köuluk mirinji mirinji miangören öngöba Anutugö Buña keu jiba uru kunjum enjiyohot. Azi qetji Jon i mewöyök wanjirohotka yetpuk anda kaba alabaukñira malök.

⁶ Mewö mala gölme jölanji jömukñi liliköba kutuba likepñe wehön gegene Pafos sitinöh angotket. Miangören angota Juda azi qetji Barjisös miwikñaiget. Yanön suna jinan azia aka kezapqetok azi takapulakanji malök.

⁷ Suna azi mi gölme jölanji miangö kiapñi qetji Sergius Pol yangö mire tata malök. Kiap mianön mötkutukutu azia malök. Mewö mala Anutugören Buña keu mötmamgö sihimñi ahöiga Barnabas Sol köl öröm etkii yangören kayohot.

§ 12:25: Antiokia yengören nanjönangö monen mi memba anda Jerusalem urumelen könagesögit jitnememaurup yengö böröjine alohot. Miangöra qetji nanjönangö misin nup kun jizin. Apo 11.30

* 13:1: Herod Antipas yanön (yara) yambu 4 B.K.-39 A.D. miangören Galili aka Perea prowins yahöt mi galöm köl engiba malök.

⁸ Kayohotmö, Elimas, (suña memegöra qetnji Grik keunöŋ mewö jimalgeri,) yañön kiapnöŋ Anutu möt narim waŋgabapüköra tuarenjon ak etkiba kiap uruñi keunöŋ enjololon memangö esapköyök.

⁹ Esapköiga Sol, qetnji alaŋi Pol qetkeri, Uña Töröŋan yangö uruñi kokolak qei Elimas törörök ek kutuyök.

¹⁰ Ek kutuba kewö jiyök, “Yei! Timbiqim bilim azi gi mönö Bölöŋi Tonangö moröya akzan! Satanöŋ urugi isimkakaleknöŋ kokolak qeiga silenöŋ alal könaŋi könaŋi aka malakzan. Keu diŋdiŋi pakpakö kerökŋi aka Kembugören köna diŋdiŋi möwöramgönöŋga goŋgimakzawi, mi mönö mosötman me?”

¹¹ Miangöra mötnöŋ! Kembunöŋ mönö böröŋi qake aliga ösumŋan turum gihiiga jegi gömölii wehön asakŋi ekŋangö osiman. Yañön nalö meyöhangö dop mönö janjuŋ aka malman.” Jii miangörenök söŋaupnöŋ qakŋe eta turui ömuŋ köla jipjap aka ilingösöŋ anda kaba böröŋe memegö qesiba böröŋan mezaŋqezan ahök.

¹² Yuai mi asuhuiga kiapnöŋ mi eka Kembugö Buña keu mötmötŋangöra welipköba möt narim waŋgiyök. Mewö.

Pisidiagö Antiokia taonöŋ misin nup meget.

¹³ Polnöŋ neŋakurupŋi yembuk Pafos miri mosöta waŋgenöŋ öngögetka opo seri öröba mörörengögetka luhutnöŋ naŋgöiga anda mala Pamfilia prowinsgö siti qetnji Perga miangören angotket. Miangören angota kinda Jonöŋ etkömosöta eleŋda Jerusalem sitinöŋ lilingöyök.

¹⁴ Lilingöyökmö, yetkön Perga siti mosöta toroqeba anda Pisidia prowinsgö taon qetnji Antiokia miangören angorohot. Miangören angota Sabat kendonöŋ köuluk miriŋine öngöba tarohot.

¹⁵ Tarohotka köuluk mirigö galöm yeñön Mosesgö Köna keu aka kezapqetok yeŋgören Buzup Kimbi oyoŋda welen algetka eta kewö qesim etkiget, “Azi alayahöt, etkören keu kun könagesö urunini kuŋgubingöra ahöza ewö, mi mönö ölop jiyohot mötpin.”

¹⁶ Mewö jigetka Polnöŋ wahöta börö misiba kewö jiyök, “Israel kianurup aka gölme toŋi nembuk Anutu waikŋi memba möpöseimakzei, iŋini mönö kezap ala mötket.

¹⁷* Israel ambazip kambu nanine bemnini mi Anutu. Yañön bömönurupnini möwölöhöm enŋiiga ambösakonurupninan Ijpt gölmenöŋ anda kian aka malget. Anutunöŋ nalö miangören Israel ambazip kambu mi töhötmöriam enŋiiga sehiba qetbuŋaŋinambuk aket. Mewö aketka Anutunöŋ angoletot aka kukösumŋi kondela mianöŋ enŋuaŋgiri Ijpt kantri mosöta yaigep kaget.

¹⁸* “Kaba mala gölme qararaŋkölkölŋe kutuba kaba ahakmeme bölöŋi aka malgetka Anutugö irimŋan seholiiga (yara) yambu 40:gö dop urubölö möta malök.

¹⁹* Möta malökmö, töndup kaba mala Kenan gölmenöŋ kaŋgotket. Kaŋgotketka miangören ambazip kambu 7 közöla könden enŋiba gölmeŋini memba mendenŋa isikurupnini toŋe toŋe akŋegö buña qem enŋiyök.

²⁰* “Mewö asuhuiga (yara) yambu 450 miangö dop anök. Miangö andöŋe Anutunöŋ jimtekötekögö azi kembuŋi kembuŋi kuŋgum enŋiyök. Mi kuŋgum enŋii mala kotketka Samuelnöŋ asuhuyök. Yañön jimtekötekögö azi kembu qöndökŋi aka kezapqetok azia malök.

²¹* “Samuelnöŋ asuhaba mali nalö miangören kiŋ kembugöra uletketka Anutunöŋ azi qetnji Sol enŋiyök. Sol yañön Benjamin isikurup yeŋgörenök azi

* **13:17:** Eks 1.7; 12.51 * **13:18:** Jan 14.34; Dut 1.31 * **13:19:** Dut 7.1; Jos 14.1 * **13:20:** Kemb 2.16; 1 Sml 3.20 * **13:21:** 1 Sml 8.5; 10.21

qetnji Kis yangö nahönña ahök aka (yara) yambu 40:gö dop kin kembunina malök.

22 *Mi malökmö, Anutunöñ Sol uteköba salupñe azi qetnji Deiwid kin azi kembunini akñapköra möwölöhöba kuñguyök. Kuñguba könañamñi jim asariba kewö jiyök, 'Nöñön Jesigö nahönñi Deiwid miwikñaizal. Yangö uruñi kewöta mötpi ölop dop köl niñgiza. Yanön mönö ahakmemenñi pakpak miangöreñ nöngö jitni tem köla malma.'

23 Anutunöñ mönöwök Amötqeçe Tonji melaim neñgimapkö jiyöhi, jöhöjöhö keu miangö ölnan mönö kewö asuhuyök: Deiwidkö gwölönarökurupñi yeñgöreñök azi qetnji Jisös asuhuiga Anutunöñ i Israel kambu neñgö Amötqeçe Tonini aka malmapköra kuñguyök.

24 *'Jisösnöñ qahö asuhuiga qeljine miangöreñ Jonöñ mutuk kaba kewö jiba malök, 'Inini mönö uruñini melenget. Uruñini melengetka nöñön o melun mem enñimam.' Mewö jiba Israel ambazip kambu pakpak uru kuñgum enñiba malök.

25 *Mewö malökmö, yanön mirililik nupñi mem tekömamgö aka miangöreñ kewö jii mötket, 'Inini nöngöra denöwö mötmörize? Yuai mötmörize, nöñön mia qahöpmö, mötket, nöngö andöne azi kun kama. Yanön kaiga nöñön yangö qöhöröñe eretñi maljalangöra wayangösöñi tenjöba köna esu kösöñi pösatmamgö qötötangömam.'

26 "O alaurupni, Abrahamgö gwölönarökurupñi aka gölme tonji enñön nembuk Anutu waikñi memba möpöseimakzei, Anutunöñ amöt qem neñgimapkö Buñani mi ali neñgöreñ kaza.

27 Miangö könañi kewö: Jerusalem tonji aka galömurupnini yeñön Jisösgö könañi qahö möt kutuget. Kezapqetok yeñgöreñ Buzup Kimbi Sabat kendon dop oyonmakzemö, miangö könañi qahö möt asarimakze. Mewö tönpin maljemö, töndup galömkölköl aziurupninan Jisös kömumapkö keuñi jim tekögetka kezapqetok ambazip yeñgöreñ keu mi mewö miangöñ ölnambuk ahök.

28 *Yeñön Jisös kömupkö buña akñawangö dop keu könañi jaruba kun qahö miwikñaiba töndup "Yapmakek!" qetket. Qeta Pailötnöñ jim teköi kömumapkö qeta uletket.

29 *'Yangöra keu pakpak ohoget ahözawi, yeñön mönö miangö dop aketka ölni ahum teköiga Jisös ipnöhök meköba eta qaksirinöñ anda köt köteñ uruñe alget.

30 Algetmö, Anutunöñ i kömupnöhök mem gulii wahörök.

31 *Wahöri yambuk Galili prowinsnöhök Jerusalem sitinöñ kageri, yeñgöra mönö silim gwötpuk miangöreñ asuhum enñiyök. Alaurupñi asuhum enñiyöhi, yeñön nalö kewöñe ambazip sutñine dangunu ewö kinda könañi nañgöba jim asariba malje.

32 Anutunöñ Juda ambösakonurupnini yembuk yuai akñamgö keu jim jöhöiga nini yeñgö gwölönarökurupñini ahinga keu walñi miangö ölnan mönö nalö kewöñe neñgöra kewö asuhuyök: Yanön Jisös mem gulii wahöta malja. Miangöra neñön miangö Buña ölopñi mi jim asarim enñizin.

33 *'Anutunöñ Jisösgöra keu jii Deiwidnöñ möri Sumbara (Buña liñet Sam) jañgö yahöt miangöreñ kewö ohoi ahöza, 'Göñön nani nahöna akzani, nöñön mi merak ambazip enñgöra kondelbiga eka mötze.'

Yanön keu miangö dop Jisös mem gulii wahörök.

* 13:22: 1 Sml 13.14; 16.12; Sum 89.20 * 13:24: Mak 1.4; Luk 3.3 * 13:25: Mat 3.11; Mak 1.7; Luk 3.16; Jon 1.20, 27 * 13:28: Mat 27.22-23; Mak 15.13-14; Luk 23.21-23; Jon 19.15 * 13:29: Mat 27.57-61; Mak 15.42-47; Luk 23.50-56; Jon 19.38-42 * 13:31: Apo 1.3 * 13:33: Sum 2.7

34 *Jisös mem gulii kömupnöhök wahöta köhöiba mala könangep kunbuk qahö kömuma. Miangö keunji Anutunöŋ kewö jii ahöza,
'Ni kalem möriamni kinj Deiwid wangiba malbiga sarakŋi aka pöwöwöm köhöiba kinöhi, miangö dop mi mönö engöra tököm engimam.'

35 *Deiwidnöŋ miangö keunji mi Sumbara (Buŋa linjet Sam) kun miangöŋew mewöyök kewö ali ahöza,
'Nangahö wölböt azigi sarakŋi i mönö qahö mosötnöŋga kömupkö lömnöŋ qahö gisahöma.'

36 Nini kinj Deiwidkö könaŋi mötzin: Yanön malmalni mala Anutugö jitŋi wuatangöba nup wangiyöhi, mi mem teköba nöŋ qeba kömuyök. Kömui amböskonurupŋi yengö kösutŋine löm kölgetka qamötŋan ahöba gisahöba qahöwahök.

37 Deiwidnöŋ gisahöba qahöwahökmö, Anutunöŋ azi mem gulii wahöröhi, yanön mönö qahö gisahöyök.

38 "Azi alaurupni, miangöra keu ki mönö mötket: Anutunöŋ Jisösgöra aka ŋiŋisöndokŋini mosöta sanŋoŋma. Neŋön miangö Buŋaŋi jim asarim engizin.

39 Mutuk 'Mosesgöŋew Köna keu wuatangöba mewö mianön solanŋi akin,' jünmö, mi inöŋ wainöŋ qaköba osiba malin. Mewö malinmö, nalö kewöŋe denike yeŋön Jisös möt nariba yambuk qekötahömei, Anutunöŋ mönö körek yengö keunini jim teköiga solanime.

40 Kezapqetok ambazipnöŋ keu jiba ohoget ahözawi, Anutunöŋ miangö dop likepŋi melenŋi qakŋine öngöbapuköra mönö galömnŋini mem angume. Keu mewöŋi kun kewö,

41 *'Nöŋön engö malmal nalöŋe angöletot qainŋi kun memam.

Kunŋan miangö keu buzupŋi jii mötpeak, mi ölni akŋapkö qahö möt naribeak. Miangöra keu mi memba et ala jijiwilit ahakzei, inŋini mönö öne uba eka welipköba ayuhume.' "

42 Polnöŋ mewö jiiga Barnabasbuk köuluk miri mosöta erohotka tosatŋan kewö qesim etkiget, "Nini keu ki kunbuk mötpingö mötzin. Miangöra mi Sabat kendon euneanön ölop toroqeba jiyohot mötpinak."

43 Köuluk mireyök eta dengetka ambazip gwötpukŋan Pol aka Barnabas könaŋire etkuatangöget. Tosatŋan Juda ahuba malget aka tosatŋan kian kantrinöŋ ahuba könangep Juda ambazip aka malget. Yeŋön etkuatangögetka eraum möta qamban keu kewö engiyohot, "Anutunöŋ kalem möriam engiyöhi, miangöŋew mönö böŋ qeba kinme."

44 Sabat kendon kun kam kuŋguyöhi, miangöŋew taon gölme miangö ambazipŋi mi kölolohoba "Anutugö Buŋa keu mötpin!" jiba kaŋgota tokoget.

45 Kaŋgota tokogetka Juda yeŋön ambazip kambuŋi kambuŋi engeka irimŋini seholim teköyök. Seholim teköiga Polgö keunji qemegö jitnakölik aka goranora (noragora) jiba mepaqepaik ak etkiget.

46 Mewö ak etkigetka Pol Barnabas yetkön awösamkakak kinda köhöiba keu kewö jiyohot, "Anutunöŋ nup netkiiga Buŋaŋi mutuk Juda ambazip engöra jiinga dop kölbawakmö, inŋini mi andö qeba lan kewö jize, 'Nini malmal köhöikŋe angotpingö dop qahö.' Miangöra mötket, netkön mönö engömosöta kian kantriŋi kantriŋi yengöŋew elenŋa anbit.

47 *Kembunöŋ miangö keunji kewö jiba jim kutum neŋguyök,
'Nöŋön kuŋgum gihibiga kian kantri yengö asakŋina aka amötqeqegö könaŋi jim asariba malnöŋga gölme göraŋi göraŋi dop köl teköi likeplikew eu emu yeŋön letota Suepkö buŋaya akŋe.' "

* 13:34: Ais 55.3 * 13:35: Sum 16.10 * 13:41: Hab 1.5 * 13:47: Ais 42.6; 49.6

⁴⁸ Mewö jiyohotka gölme toni Juda qahö malgeri, yeñon möta uruñini ölöwahi Kembugörej Buñani möpöseiget. Möpöseiba malmal köhöikñangö buña akñegöra Anutunöñ möt kewöt engiyöhi, yeñon miangö dop uruñini melenđa Jisösgö Buñani möt nariget.

⁴⁹ Möt narigetka Kembugö Buña keu jim sehigetka prowins pakpak mi dop köla anök.

⁵⁰ Ölop anökmö, Juda yeñon taongö azi ipñi aka ambi öngöngöñi Anutu göda qeba malgeri, miengö uruñini esiba kuñguba Pol Barnabas mohotje sesewerowero ak etkiba miri gölmeñineyök etkuatanğöget.

⁵¹ *Anbitkö aka nesampurekñini kondela kewö jiyohot, “Netkön engö gölmenöñ kaziga sölbuham köna tambönire ahözawi, mi mönö tim tönjöratziga nanñine lilingöba gema.” Mewö jiyohotka könañamniri solanñi möt kutugetka anda Galesia prowins uruñe siti qetñi Aikoniam miangörej anğorohot.

⁵² Anğorohotmö, gwarekurup Antiokia taonöñ malgeri, Uña Töröñan yengö uruñini kokolak qei önöñi qahö söñgaiba malget. Mewö.

14

Aikoniam sitinöñ uru kuñgum engiyohot.

¹ Pol Barnabas yetkön Aikoniam sitinöñ anğota mewöñanök Juda yengö köuluk mire öngöba Buña keu jiyohot. Jiyohotka Juda aka kian kantri ambazip yengörejök kambu sehisehñi yeñon uruñini melenđa Jisös möt nariget.

² Möt narigetmö, Juda ambazip qahö möt narigeri, yeñon gölme toni Juda qahö malgeri, miengö uruñini esiba aposol urunöñ gege ak etkimegöra uruñini kuñguget.

³ Kuñgugetka töndup nalö köröpñi miangörej mala Kembu möt nariba awösamkakak kindu Buñani jiba malohot. Kembu kalem möriamñangö keuñi jim asariyohotka keuñiri nanğöba ösumñi böröñire ali aiwesök anğöletot meyohotka asuhuget.

⁴ Mewö asuhugetka taongö ambazipñan jula denget. Tosatñan Juda jitñememe yembuk öröröñ jöhögetka tosatñan aposol yetpuk toroqeba kinget.

⁵ Mewö aröñda kingetka gölme toni aka Juda ambazip kiannñi yeñon wahöta jitñememeurupñini yembuk urumohot aka melaimelai azi aposol mi “Kötnöñ gila etkubin!” jiba mötmöriget.

⁶ Mewö mötmörigetka möta ölöñ köla tököba Likaonia prowinsnöñ anohot. Miangörej anda taon qetñiri Listra aka Derbe aka miri liliköm etkiba tat angeri, miangörej anğorohot.

⁷ Miangörej anğota Ölöwak Buña jim asariba uru kuñgum enğiba malohot. Mewö.

Listra taonöñ Pol Barnabasgöra bem qetket.

⁸ Listra taonöñ azi kun köna yahötñi kömukömuñi malök. Mi nam körö uruñeyök lokon asuhaba nalö kungen köna qahö tiba öne tatmalök.

⁹ Polnöñ Buña keu jii möta tari uba könañamnñi kewö eka mötmörüyök, “Yanğö uruñe mötnariñi ahöm wañgiyöhanğöra aka ölop ölöwakña,” mewö jiyök.

¹⁰ Mewö mötmöriba qet ketanñi qeta jii mörök, “Mönö wahöta kinöñ.” Mewö jii pöran ala wahöta anda kaba kinök.

¹¹ Polnöñ mewö aiga ambazip kambu yeñon mi eka Likaonia keuñine kewö silata jiget, “Bem yetkön letota azi silebuk aka sutnine asuhaba nenğörej eta maljahot.”

* **13:51:** Mat 10.14; Mak 6.11; Luk 9.5; 10.11

12 Mewö jiba Barnabas qetnji bem bohonnini qetnji Zus qetket aka Polnön jitje memba keu jiyöhanğöra aka bem qetnji Hermes qetket.

13 Mewö qetketka bem Zus yangö jöwöwöl jikenji taon wösöñe ahöyöhi, mianğö jike nup galömnjan bulmakau azinji enguangita kayök. Mewö kaba ila kösatorom memba kaba taon kiripo nanğuje kinda ambazip kambu yembuk jakenöñ ala jöwöwöl ohom etkibingö aket.

14 Mewö aketka aposolyahöt yetkön mi möta “Qahö dop kölja,” jiba qetala silepökenjiri munjurata ösumñiran ambazip kambu uruñe anda qerohot.

15 *Qeta kewö jiyohot, “Aziurup, inini mönö denöwögöra aka yuai mewöñi akze? Niri mewöyök inini ewö gölme azi töhöna akzit. Niri Anutugö Ölöwak Buña jim asarim engizit. Mianğöra inini mönö bem omanji andö engume aka uruñini melenđa Anutu malmal Toñanğöreñ qekötahöme. Anutu malmal Toñan Suep, gölme, köwet aka miengö uruñine yuai pakpak ahözawi, mi miwikñaim engii malje.

16 Gölmeñi gölmeñi pakpak yeñön mönöwök mala kotkeri, Anutunöñ i qahö anğön köl engii nanñini imbiñinanğö dop malmalñini ilingösöñ malget.

17 “Qahö anğön köl engiyökmö, tondup tönpin jipjap qahö malget. Qahöpmö, Anutunöñ yuai ölöpnji ölöpnji ak engiba malök. Yanñön jiiga kie yöhöi wehön qei töhötmöriamñan nalöñi nalöñi asuhui nem söñgaip aka mewö mianñön uruñini kuñgum engii malget. Mewö malgetka nanñi könañi mötmegöra kalemñi mi kondel engiba mewö mianñön dangunuñi ali malget.”

18 Yetkön mewö jiba ambazip kambu jöwöwöl ohom etkibepuköra jarañbarañ tiba jim susuhum engiyohotka löwöriba mosötket. Mewö.

19 Listra yeñön Pol Barnabas etkömosötketmö, Juda ambazip tosatñan Antiokia taon aka Aikoniam siti mietköreñök kañgota ambazip kambu urunöñ gege ak engiget. Ak engiba yembuk öröröñ luhuba Pol kötnöñ qeba “Mönö kömuza!” jiget. Mewö jiba örörahöba taon andöñe eta mosötket ahöyök.

20 Ahöyökmö, gwarek yeñön kañgota liliköm wañgigetka wahöta anda taonöñ öngöyök. Mianğöreñ öngöiga ahöyohot miri gianjiiga Barnabasbuk Derbe sitinöñ anohot.

Siriagö Antiokia sitinöñ lilingöba kayohot.

21 Derbe sitinöñ Ölöwak Buña jim asariba uruñini kuñgum engiyohotka gwötpukñan uruñini melenđa Jisösgö gwarekurupñi aket. Mewö aketka Derbe taon mosöta Listra Aikoniam aka Antiokia taon miengöreñ lilingöba anda engehot.

22 Engeka tata miri dop liliköba Jisösgö gwarekurup yeñgö uruñini nanğöba mem köhöiyohot. Kembu möt narigeri, yambuk qekötahöba kinmegö qambañ keuñi engiba kewö jiyohot, “Nini mönö iririkwarörök qakñe (lömböt könañi könañi miwikñai) mala pañpañgöba Anutugö bemtohoññöñ eu anğotpin.”

23 Urumelen könañesö dop jitñememeurupñini möwölöhöba galöm malmegö könañi kusum engiba kuñgum engiyohot. Kuñgum engiba Anutugöra nene siñgi mala gwarek kambu yeñgöra köuluköba Kembu möt narigeri, yangö böröñe al engiyohot.

24 Al engiba engömosöta Pisidia prowins kutuba anda Pamfilia prowinsnöñ anğorohot.

25 Mianğöreñ anğota Perga sitinöñ tata Buña keu jiba uruñini kuñgum engiba Atalia taonöñ geyohot.

26 Mianğöreñ gebe wañgenöñ öngöyohotka opo seri öröba möröreñgögetka luhutnöñ nanğöi anda mala Antiokia sitinöñ anğorohot. Antiokia urumelen

* 14:15: Eks 20.11; Sum 146.6

könagesö yejön i Anutugö kalem möriam uruje misin nup memahotköra mutuk Anutugö böröje al etkigetka engömosöta anohot. Anda liliköba nupñiri mi mem teköba kunbuk nanñire sitinöñ lilingöba kayohot.

²⁷ Mianğoreñ kaba urumelen könagesö köl öröm engiyohot. Köl öröm engiyohot tokogetka keu kösohotñiri kewö jiyohot, “Anutunöñ netpuk mala anğöletot ketanji ketanji aka memba malök. Yanön nam köl netkii nup meziga kian kantrinji kantrinji yejön Jisös möt narimeğöra nanju öröm engii urunini melenget.”

²⁸ Kösohotñiri mewö jiba gwarek kambu yembuk nalö köröpñi qem köriba tata malohot. Mewö.

15

Kian kantri yeğöra aka zioznöñ julmamgö ahök.

¹ *Antiokia malohotmö, Judia prowinsnöhök ambazip tosatñan eta kaba könahiba urumelen ambazip kewö kusum engiget, “Inini Mosesğoreñ Köna keugö dop Anutugö aiwesökñi silenine qahö yandime ewö, mewö mönö Suepkö buñaya akingö osime.”

² Mewö kusum engigeranğöra aka anğururuk ahuiga Pol Barnabas yetkөн tuarenjoñ ak engiba könöpñambuk jim engiyohot. Jim engiyohotka urumohot qahö aka keu kewö jöhöba jiget, “Nini mönö Pol Barnabas aka jitñememe tosatñi melaim engiinga Jerusalem sitinöñ öngöba keu mi memba aposol aka Jerusalem urumelen könagesögö jitñememe yeğoreñ anda jime.”

³ Keu mewö jöhöba jigetka urumelen könagesö yejön i melaim engigetka könanöñ anget. Anda mala Fonisia aka Samaria prowins yahöt mi kutuba könanöñ könagesöñi könagesöñi engeket. Engeka kian kantri tosatñi yejön urunini melenğeranğö buzupñi jiba urumelen kambu yeğöra sösongai ketanji al engiget.

⁴ Al engiba anda mala Jerusalem sitinöñ anğotket. Anğotketka aposol aka jitñememe yejön urumelen könagesö yembuk köl öröm engiget. Köl öröm engigetka kösohotñini kewö jiget, “Anutunöñ nam köl neñgii misin nup meinga nembuk mala anğöletot ketanji ketanji aka memba malök.”

⁵ Kösohot mi jigetmö, Farisi (Köna keugö kapankölköl) kambunöhök urumelen azi tosatñan wahöta kewö jiget, “Kian kantri yejön urunini melenğeri, yeğöra mönö kewö jim kutubin: Yejön mönö Anutugö aiwesök silenine yandiba Mosesğoreñ Köna keu pakpak wuatangöba malme.” Mewö.

Jerusalem totoko ala anğururuk keu mindinğöget.

⁶ Mewö jigetka aposol aka jitñememe yejön keu mi jim kewötpingö tokoget.

⁷ *Tokoba goranora (noragora) keu gwötpuk jiba jitnakölik aket. Mi aketka Pitönöñ wahöta kewö jii mötket, “Azi alaurupni, Anutunöñ mutuhök sutnine nup mendenđa möwölöhöm niñgiba nöngöra kewö jiyök, ‘Gi mönö kian kantrinöñ anda Ölöwak Buña keu jim asarim enğinöñga yejön urunini melenđa Kembu möt narime.’ Inini keu mi mötze.

⁸ *Anutunöñ ambazip pakpak urunini möt kutuzawanöñ könanjamñi kondela Uña Töröñi Juda ambazip neğöra melaiiga eröhi, mianğö dop mönö kian kantri ambazip yeğöra mewöñanök i melaii urunine geyök.

⁹ “Melaii geiga mewö mianöñ Juda ambazip qahö engek soriba kantri tosatñi qahö qepureim engiyök. Qahöpmö, yejön Anutu möt narigetka siñgisöndokñini mosöta urunini sanğonñiga sarakñi aket.

* 15:1: Lew 12.3 * 15:7: Apo 10.1-43 * 15:8: Apo 2.4; 10.44

10 Miangöra inini mönö wuanöngöra Anutu esapesapnöŋ al wangibeak? Wuanöngöra gwarek dölökŋi yeŋgö qakŋine tem könjöŋ toroqeba alinga aŋgubeak? Tem könjöŋ mewöŋi mi nanine ambösakoninan me naninak mewöyök aŋgubingö dop qahö akmalin.

11 Mewö qahöpmö, kewö möt narizin: Kembu Jisösgö kalem möriamŋan mönö Anutu nam köl waŋgiiga amöt qem neŋgiiga Suepkö buŋaya akin. Kian kantri yeŋön mewöyök köna mohot miyök wuatangöba letota Suepkö buŋaya akingö möt narimakze.”

12 Mewö jiiga kambu yeŋön lökŋanök keu jaruba bök tatket. Tatketka Pol Barnabas yetkön keu kösohotŋiri kewö jiyohot, “Anutunöŋ nam köl netkii kian kantrinöŋ anda sutŋine misin nup meziga aiwesök aŋgöletot ketanŋi ketanŋi asuhuget.” Mewö jiyohotka kezap ala mötket. Mewö.

Bisop Jeimsnöŋ keu jii mötket.*

13 Pol Barnabas yetkön kösohotŋiri jim teköyohot mötketka Jeimsnöŋ keu kewö jiyök, “Azi alaurupni, nöŋön keu jibi kezap ala mötket.

14 Anutunöŋ nalö mutukŋi kian kantri ambazip mesohol köl eŋgiba sutŋineyök ambazip nanŋangöra möwölöhöm eŋgiiga qetŋi bisiba könagesöŋi toroqeket. Anutunöŋ mewö aka könaŋamŋi kondel neŋgiyöhi, Saimon Pitönöŋ miangö keuŋi jii mötzin.

15 Keu mewöŋi mi kezapqetok ambazip yeŋön mewöyök naŋgöba jize. Yeŋön keu kun kewö ohoget ahöza,

16 *Miangö andöŋe nöŋön lilingöba kaba kiŋ Deiwidkö kantri tohoŋi kunbuk memba wahötмам. Yaŋön mutuk jakömbuak koumŋi qeba ambösakonini galöm köl eŋgiiga koumŋan buratiba tiŋgita erökmö, nöŋön mi kunbuk möhamgöba kuŋgubiga kantrinöŋ ölöwaka kinma.

17 Mi kewö asuhumapköra akŋam: Ambazip kambu tosatŋi pakpak yeŋön Kembu jarume. Kian kantri pakpak nani buŋani akŋegöra eŋgoholali, yeŋön Kembu ni göraim niŋgime.

Kembu nöŋön mewö jizal aka miangö dop kantriŋini mem ölöwakŋam.

18 Mewö ahakzali, mi mönö möpŋangö möpŋeyök möta kota malje.’

19 “Miangöra Jeims nöŋön keu mi kewöta mötmötnan kewö möta jizal: Kian kantri ambazip uruŋini Anutugöreŋ melenjei, neŋön mönö lömböt könjöŋ ketanŋi yeŋgö qakŋine alinga qahö dop köлма.

20 *Mewö qahöpmö, yeŋgöra kimbi kewö ohoinga dop köлма: Yeŋön sömbup busuŋi bem lopiongö naluk buŋa qeba könaŋine algetka ösumŋinan walöŋnöhi, mi kude neme. Sero yoŋgorö kude akŋe. Sömbup jölŋi qeŋeŋangö busuŋi aka sep mi kude neme. Yuai 4 mi mosötmegöra jim köhöibinak.

21 Mosesgö Köna keu mi mönö möpŋangö möpŋeyök miri dop jim asariba kota maljin. Mi Sabat kendon dop köuluk mirinine oyoŋda mörakzin. Miangöra keu 4 mi ölop qahö mosötpin.” Mewö.

Jerusalem totokonöŋ kian kantri yeŋgöra kimbi ohoget.

22 Jeimsnöŋ mewö jiiga aposol aka jitŋememe yeŋön könagesö pakpak yembuk keu mi mötket dop kölök. Mötket dop köliga sutŋineyök azi tosatŋi möwölöhöm eŋgiba Pol Barnabas yetpuk mohotŋe Antiokia sitinöŋ melaim

* 15:12: Bisop, Grik keunöŋ episkopos, nanine keunöŋ jegalöm me inspekta. Yaŋön zioz nup pakpakö mindimindiri galömŋi akza. Jeims kianön Jisösgö gwarekŋi qahöpmö, Jisösgö munŋi. * 15:16: Amos 9.11-12 * 15:20: Eks 34.15-17; Lew 17.10-16; 18.6-23

engibingöra jiget. Mewö jiba azi qetņi Judas qetņi alaņi Barsabas aka Sailas möwölöhöm etkiget. Azi yahöt mi urumelen kambugö jitņememe azia ahot.

²³ Azi mi melaim etkibin jiba kimbi kun kewö ohoba böröņire alget,

“Mötnaripkö kian alaurupnini, Antiokia siti aka Siria aka Silisia gölmenöņ maljei, neņön engö jölöņini jizin. Aposol neņön mötnarip könagesögö jitņememe yembuk engö urumelen alaurupņina akzin. Mewö embuk keu eraum mötņingöra kimbi al engizin.

²⁴ Nanine ambazip tosatņi qahö jim kutum engiinga nanņinök neņgömosöta engöreņ kaba uruņini kuņguba keu murutņi kekelolo engigetka uru mötmöņini siksauk aiga mörin.

²⁵ Mianğöra nini köreķanök totoko ala urumohot ahin dop kölök. Dop kölīga azi yahöt meköba melaim etkiinga wölböt alayahöt Barnabas Pol yetpuk engöreņ kame.

²⁶ Barnabas Pol yetkön nanine Kembu Jisös Kraistkö qetņangöra aka malmalņiri köleņnohotka tosatņan etkuget kömumbitkö ahot.

²⁷ Nini Judas Sailas melaim etkiinga kaba keu miyök toroqeba jitnöņ jiyohotka mötme.

²⁸ Uņa Töröņi aka neņön keu kewögöra urumohot ahinga dop kölja: Engö qakņine lömböt könjöņ qahö toroqeba albin. Keu bohonņi 4 miyök wuatangöme. Mi oņgitketka julbinbuk.

²⁹ Keu 4 mi kewö: Sömbup busuņi bem lopionğö naluk buņa qeba könaņine algetka ösumņinan walöņnöhi, mi kude neme. Mewöyök sep me sömbup jölņi qequeņğö busuņi mi kude neme. Sero yoņgorö kude akņe. Yuai 4 mi mosöta andö qegetka urumohot ahinga Anutunöņ kötuetköm engiiga ölöwaka malme. Mönö uru böņjöņ malme.” Mewö.

Keu memba angetka Antiokia siti yeņön söņgaiget.

³⁰ Kimbi mewö ohoba melaim engigetka anget. Köna anda geba Antiokia sitinöņ angotket. Anğota urumelen könagesö köl öröm engigetka tokoget. Tokogetka kimbi mi engigetka oyoņget.

³¹ Mi oyoņgetka mianğöra amqeba urukölalep möta söņgaiget.

³² Judas Sailas yetkön nanņirak kezapqetok azia mala goro keu gwötpuk engiba urugö naņğönaņğö keu jiba mem köhöim engiyohot.

³³ Mem köhöim engiba nalö tosatņi mianğöreņ toroqeba malohot. Malohot teköiga urumelen alaurup yeņön “Luaibuk anmahot,” jiba melaim etkiget. Jerusalem malohotka melaim etkigeri, Judasnöņ mönö yeņğöreņ lilingöyök.

³⁴ (-)†

³⁵ Pol aka Barnabas yetkön toroqeba Antiokia sitinöņ mala ambazip tosatņi gwötpuk yembuk Kembugöreņ Buņa keu kusum engiba uruņini kuņgum engiba malget. Mewö.

Pol aka Barnabas yetkön deņnohot.

³⁶ Mewö malgetmö, nalö tosatņi teköiga Polnöņ Barnabasğöra kewö jiyök, “Netkön taon miri pakpak liliköba Kembugöreņ Buņa keu jim asariba maliri, mönö mianğöreņ lilingöba urumelen alaurupniran denöwö maljei, mi ölop anda eka mötpit.”

³⁷ Mewö jiiga Barnabasnöņ Jon qetņi alaņi Mak qetkeri, i mewöyök waņgita mohotņe anbingö mörök.

† **15:34:** Tosatņan toroqeba jabö v 34 kewö alje: Lilingöyökmö, Sailasnöņ keuņi jöhöba toroqeba mianğöreņ malök.

³⁸ *Mewö mörökmö, Jonöŋ mutuk Pamfilia taonöŋ löwöriba etkömosöta yetpuk toroqeba nup qahö meyök. Mianğöra Polnöŋ i waŋgita anbingö möri qahö dop kölök.

³⁹ Qahö dop kölīga aŋgururuk aka uruŋiri könöp jeiga deŋnohot. Deŋda Barnabasnöŋ Mak waŋgita geba waŋgenöŋ öŋgöyohotka opo seri öröba möröreŋgögetka luhutnöŋ naŋgöi gölme jölanŋi Saiprus mianğöreŋ anohot.

⁴⁰ Anohotmö, Polnöŋ azi qetŋi Sailas meköiga urumelen alaurup yeŋön Kembugö böröŋe al etkiba kalem möriamŋan sel jöhöm etkimapköra jigetka mosöta anohot.

⁴¹ Anda mala Siria aka Silisia prowins yahöt mi kutuba liliköyohot. Liliköba Polnöŋ urumelen könagesöŋi könagesöŋi engeka mem köhöim enğiba malök. Mewö.

16

Timotinöŋ Pol aka Sailas yetpuk toroqeyök.

¹ Polnöŋ liliköba anda mala taon qetŋiri Derbe aka Listra mianğöreŋ aŋgorök. Listra aŋgota mianğöreŋ gwarek kun qetŋi Timoti miwikŋaiyök. Namŋan Juda urumelen ambia ahökmö, iwiŋan Grik azia.

² Polgö azi alaurupŋan Listra aka Aikoniam malgeri, yeŋön Timotigö könaŋi jim ölöwaka jiget mörök.

³ Mewö jiget möta waŋgiri mohotŋe anmamgö mörök. Mi mörökmö, Timotigö iwiŋan Grik azia malöhi, mi köreŋan möt teköget aka miri gölme mianğöreŋ Juda ambazip gwötpuk malget. Mianğöra yeŋön Pol jim waŋgibepuköra Timoti waŋgita Anutugö aiwesökŋi sileŋe yandiyök.

⁴ Yandiiga anda taon aka miri dop aŋgotkeri, mianğöreŋ Jerusalem mindi-mindiri totokogö keuŋi jiget. Aposol aka Jerusalem urumelen könagesögö jitŋememe yeŋön keu jöhöm köhöigeri, mi wuatangömegöra jim kutum enğiget.

⁵ Mewö lilikögetka Jisösgö könagesöŋi könagesöŋi miri dop malgeri, yeŋgö mötnariŋŋinan köhöiyök. Mewö köhöiba Buŋa keu jigetka tosatŋan uruŋini melenða wehön dop kam toroqetgetka kambuŋinangö jaŋgöŋan qariba öŋgöyök. Mewö.

Anutunöŋ Pol gaunöŋ kutum wasöriğa Yurop anget.

⁶ Liliköba mala “Eisia prowinsnöŋ anda Buŋa keu jim asaribin,” jigetmö, Uŋa Töröŋan songo ala aŋgön köl enğiyök. Mianğöra yeŋön toroqeba anda Frigia aka Galesia prowins yahöt mi öne kutuba etkongita anget.

⁷ Anda mala Misia gölme goraŋe aŋgota Bitinia prowinsnöŋ aŋgotpingö mötketmö, Jisösgö Uŋa Töröŋan mianğöreŋ anmegö urumohot qahö ahök.

⁸ Urumohot qahö aiga mosöta anda Misia gölme öne kutuba köwet jitŋe geba Troas taonöŋ aŋgotket.

⁹ Troas aŋgota suŋgem gaun ahögetka Anutunöŋ Pol kutum wasöriğa imut kun kewö ehök: Yurop azi kunŋan Masedonia likepŋe kinda ohola kewö jiba köuluköm waŋgiyök, “Gi mönö köwet kutuba Masedonia gölmenöŋ kaba bauköm neŋgiman.”

¹⁰ Polnöŋ jemelen imut mi ehiga nini mianğö könaŋi kewö möt kutuba jiin, “Anutunöŋ mönö neŋgohola köwet kutuba Yurop uruŋe anda Ölöwak Buŋa Masedonia prowinsnöŋ jim asarim enğibingöra jiza.” Mewö jiba mianğöreŋök mosöta anbingö mötmöriba amqein. Mewö.

Filipai ambi Lidianöŋ uruŋi meleŋnök.

* 15:38: Apo 13.13

11 Neñon amqeba geba wanjenon ongöinga opo seri öröba möröngögetka luhutnon nangöi Troas siti mosöta anda diññanök Samotres gölme jölanje angorin. Angota ahöba miri gianjiga toroqeba anda Neapolis sitinon angorin.

12 Miangören angota wanjenöhök eta köna anda Filipai sitinon angorin. Rom ambazip yeñon mönöwök kaba Filipai siti mi memba miangören malmal tatatjini algetka Masedonia prowinsgö siti ketanj ahök.* Nini Filipai angota wehön tosatji miangören malin.

13 Miangören mala Sabat kendonon siti kiripo yaigepje anin. Miangören anda Juda yeñon o sakje tokoba Anutu köulukömakzei, mewö mötmöriba geba rowonqeqe kunon anin. Anda ambi tokoba tatkeri, i engeka tata eraum möta Anutugören Buja keu yengöra jiinga mötket.

14 Mötkeri, yengö sutjine ambi kun qetji Lidia malök. Yanon Taiataira sitinöhök Filipai kaba opo pisikji gugakgugak aködamunñambuk tokoba bohonji memegöra ala malök aka Anutu waikji memba möpöseiba malök. Kembunon urunji mem amqeiga Polnon keu jiyöhi, miangöra sihimñan ahui kezap ala möta angön kölok.

15 Angön köli nanji aka saiwaurupji o melun mem enjiinga qesim neñgiba kewö jiyök, "Inini nongöra 'Kembu möt narizal,' jize ewö, mönö ölop kaba nongö mire ongöba tata nene nempa ahöme." Mewö jiba kapan köla qesim neñgiyök. Mewö.

Pol Sailas yetkön kösö mire tarohot.

16 Nini nalö kunon köuluk rowonqeqe gebingö köna namje aninga welenqeqe ambi kunon miwikñaim neñgiyök. Ambi mi andö lawönñambuk mala ambazip könanjini aukje jim miwikñaimangö mörök. Mi möta kezapqetok keu asambötji jim miwikñaiba mewö mianon monen yuai mi gwötpuk öröba mali tourupji yengö böröjine geyök.

17 Yanon Pol aka nini neñgeka neñgö andönine kaba kewö jiba qerök, "Azi kienon Anutu ongöngöñi ketanangö welenni qeba Suepkö buñaya akingö könanji jim asarim enjimakze."

18 Mewö jiba sömanji gwötpuk qeta malök. Mi malökmö, Polnon tököba miangöra sihimbölö mörök. Mi möta nalö kunon lilingöba ömenji kewö jim kutum wanjiyök, "Ni Jisös Kraistkö qetje jizal: Gi mönö ambi kiangö uruneyök kota anon." Mewö jim kutum wanji miangörenök kota mosöta anök.

19 Mi anökmö, ambi tourupñan mi möta monen yuai öröbingö könanji jöpköyöhi, mi miwikñaiba irimñini seholidyök. Irimñini seholidyega Pol Sailas etkömempa jöhöba maket sombemje öröm etkiba galöm azi yengö jenje etkuangita anget.

20 Etkuangita anda keu jake galöm yengö jenje al etkiba silenire keu kewö ala jiget, "Nini siti kiangören luainon maljinmö, azi yahöt kietkön kaba enjololon ak neñgimazahot. Yetkön Juda azia akzahot

21 aka Juda silikñini kusum neñgimazahot. Nini Rom mindimindiri kantrigö tohon tonji akzin. Miangöra nini silikñini mi ölop qahö möt angön kölbin. Mi memba wuatangöbingö songo ahöi osizin."

22 Silenire keu mewö aka jim etkigetka ambazip kambu yeñon mewöyök wahöta mindiriba qetal etkim köhöiget. Qetal etkim köhöigetka galöm yeñon kungum enngigetka sileotaniri öröba munjukunjuritket aka jim kutum enngigetka arawambu kömbinon etkuget.

* **16:12:** Masedonia prowinsgö siti bohonji mi Tesalonaika. Distrik mutukñangö siti bohonji mi Amfipolis aka siti keta bölökñi kun Filipai. Rom yeñon Filipai mi Itali ewö galöm köli enngiget. Grik miri tonji yeñon nanjine gölmenon kian ewö aka malget.

²³ Gwötpuk etkum teköba kösö mire al etkibingö etkuangita wahibuknön ölöpñanök galöm mem etkimapkö jim kutum wanğiget.

²⁴ Mewö jim kutum wanğigetka möta etkömembra kösö miri bibiñe miri uruñi kunön anda könayahötnjiri ip özöpañ† sutñire ala kösönön jöhöba miri uruñi mianğö nanğunji yahöt mi ki misigetka tarohot. Mewö.

Kösö miri galömñan uruñi meleşnök.

²⁵ Pol Sailas yetkön mewö tarohot. Tata mala sunğem bibiñi aiga mianğöreñ Anutu köuluköba liñet köla möpöseiba malohotka kösö azi köreknjan kezap ala mötket.

²⁶ Mewö aketka mianğöreñök wölañ kenön (nañ) ketani giliga kösö mirigö tandöñi pakpak anjanjanjan kölget. Mewö kölgetka mianğöreñök nanğu pakpak talgetka kösö azi pakpak yeñgö ain tapepñinan (munğamunğa) lolohoba erök.

²⁷ Mewö asuhuiga kösö miri galöm yañön gaun uruñeyök wahörök. Wahöta kösö mirigö nanğunji pakpak tal tekögeri, mi eka jiyök, “Kösö azinön an teköze me denöwö?” Mewö jiba mötmöriba jönömñi unduiga bingö sou ketani mi kupinñeyök öröba nanñi aumamgö ahök.‡

²⁸ Nanñi aumamgö ahökmö, Polnön paunpaun teriñgöba kewö jiyök, “Nini köreknjanök ki tatzin. Mönö nangi silegi öne kude ayuhuman.”

²⁹ Mewö jii möta kiwa wanğimegöra qesii wanğigetka ösumñan kösö miri uruñe anda jönömñi unduiga Pol Sailas yetkö kösutñire anda simin köl etkiyök.

³⁰ Simin köl etkiba kösö mireyök etkuangita eta kewö qesim etkiyök, “Azi ketani yahöt, ni mönö denöwö akiga Anutunön amöt qem niñgiiga letotpilanjak?”

³¹ Qesim etkiiga jiyohot, “Mönö urugi meleşda Kembu Jisös möt narim wanğinönğa gi aka saiwaurupkan mewöyök letota Suepkö buñaya akñe.”

³² Mewö jiyohotka miriñe angetka könagesöurupñi pakpak yembuk tokogetka Anutugöreñ Buña keu jiyohot mötket.

³³ Jiyohot möta sunğemgö aua mianğöreñök etkuangita anda uziñiri sanğonñök. Sanğonñiga mianğöreñök i aka saiwaurupñi pakpak mi o melun mem enğiyohot.

³⁴ O melun mem enğiyohotka etkuangiri nene mire öñgöba nene ohoba ala etkiyök. Etkiba nanñi aka saiwaurupñi yeñön körek Anutu möt narigeranğöra sösönğai aket. Mewö.

Kösö mireyök közöl etkigetka erohot.

³⁵ Miri gianjiiga keu jake galöm (majistreit) yeñön opotöröp melaim enğigetka kösö mire kaba kewö jiget, “Azi yahöt mi mönö pösat etkinönğa etmahot.”

³⁶ Mewö jigetka wahibuknön kaba buzup mi Polgöra kewö jii mörök, “Majistreit galöm yeñön keu kewö alget kaza: Injiri mönö kösönjiri pösatpiga etmahot. Mianğöra etkön mönö dölki mosöta eta luainön anmahot.”

³⁷ Mewö jii mörökmö, Polnön opotöröp yeñgöra kewö jiyök, “Rom mindimindiri gawmanön sel jöhöm netkiba mianğö (jimkutukutu) paspot netkigetka maljit. Mianğöra yeñön keuniri qahö kewöta jim teköba töndup aukñe ambazip jeñine öne lañ arawambu kömbinön netkuba kösö mire al netkiget. Mi gamuñambuk. Mewö al netkiget tatziga dölki denöwögöra melaim netkiget öne ölöñ etpirak? Mi qahö dop kölja. Niri qahöpmahöp etpitmö, yeñön mönö nanñinak kaba netkömegetka etpirak.”

† 16:24: Ip özöpañnön könajiri yöhöraköiga osiba tarohot. Imutñi ekñan. ‡ 16:27: Kösö azinön ölöñ köliga galömñi mi keu jakene ala qegetka salupñe sihimbölä möta kömuzapma. Nanñi gamuñi möta aubawak, mewö amgeba kömumbawak.

³⁸ Polnön opotöröp yengöra mewö jiiga keu mi memba majistreit galöm yengören anda jiget mötket. Mi möta Rom gawmangö (jimkutukutu) paspot memba malohori, mi möta auruba sömbuñini mötket.

³⁹ Sömbuñini möta kösö mire kaba ösön susuhuba kelök ala kuñgum etkigetka geyohot. Geyohotka Filipai siti mosötmahotkö ulet etkiget.

⁴⁰ Ulet etkigetka Pol Sailas yetkön kösö miri mosöta Lidiagö mire anohot. Miangören anda urumelen alaurupñiri engeka urugö nanğonangö keu jiba enğomosöta anohot. Mewö.

17

Tesalonaika nup megetka sesewerowero aket.

¹ Anda mala Amfipolis aka Apolonia siti yahöt mi kutuba Tesalonaika sitinön anğotket. Siti bohonñi miangören Juda yeñon köuluk miriñini meget kinök.

² Polnön ahakmemenñi aka malöhi, miangö dop köuluk miriñine öngöba Sabat kendon karöbut miangören yembuk Urumelenğö Buña Kimbi oyonđa könañi eraum möta malget.

³ Mewö mala Buña Kimbigö könañi jim asariba kewö jiyök, “Anutunön areñ ala Amötqeçe Tonan sihimbölä möta kömumba kömupnöhök wahötmapkö jiyök.” Mewö jiba miangö könañi Buña Kimbinöhök kondela uruñini kuñguba kewö jiyök, “Azi Jisös jim asarim enğizali, yañon mönö Amötqeçe Tonñ Kraist akza.”

⁴ Mewö jiiga Juda könagesö yengörenök tosatñan möt nariba uruñini melenđa Pol Sailas yetpuk toroqeba kinget. Grik ambazip tosatñan Anutu waikñi memba möpöseigeri, yengörenök mewöyök kambu ketañi yeñon yembuk toroqeget aka ambi öngöngöñi qetbuñaninambuk yengörenök gwötpukñan uruñini melenget.

⁵ Uruñini melengetmö, Juda ipñi yeñon uruñini seholiiga urunön mututqutut möta andöqeçe aket. Mi aketka injarere ambazip rowonqeçenön lañ malgeri, yengören anda azi goñgonñi tosatñi enğomeget. Mi enğomemba mindiriba ambazip kambu uruñini kuñguba öröm enğigetka tokoget. Tokoba lañ qetketka qeburunğöjupmajup ahuiga siti dop köl teköyök. Lañ qeta luhuba azi qetñi Jeison yangö miri töungöba (töwöngöba) Pol Sailas ambazip kambu jeñine al etkibingöra jarum etkiget.

⁶ Jarum etkigetmö, qahö miwikñaim etkiba Jeison aka urumelen alaurup tosatñi jöhöm öröm enğiba sitigö galömkölköl azi yengö jeñine anğota kewö qetket, “Yei! Azi gölmenñi gölmenñi liliköba miri dop uru kuñgum enğigetka kahapmahap aka sohomakzei, yeñon mönö ki mewöyök kayohot.

⁷ Kiangören kayohotka Jeisonön i etkömemba anğon köl etkiyök. Ambazip pakpak mienön kewö jimakze, ‘Azi kun qetñi Jisös yañon kiñ kembunini akza.’ Mewö jiba Rom sisa kiñgö jimkutukutuñi qetala memba eta alakze.”

⁸ Mewö qetketka ambazip kambu aka galömkölköl azi yeñon mötketka uruñinan eta raidimbom ewö siksauk ahök.

⁹ Siksauk aiga Jeison aka urumelen alaurup tosatñi kuñguba qesim enğigetka moneñ ala meköm etkiba pösatketka eta anget. Mewö.

Berea angetka Baiböl stadi ala keuñiri kewötket.

¹⁰ Eta angetmö, urumelen alaurup yeñon Pol aka Sailas miangörenök melaim etkigetka mosöta sunğem miri qetñi Berea miangören anohot. Anda anğota Juda yengö köuluk miriñine öngöyohot.

¹¹ Köuluk miriñine öngöba Buña keu jiyohori, mi sihim ketañi möta möt anğon kölget. Juda könagesö Berea malgeri, yeñon Tesalonaika könagesö

engongita ölop sorokni aket. Keu törörök jiyohot me qahö, mi wehön dop Buña Kimbigö keunöy kewöta oyoñda eraum möta malget.* Silik ölopni mewöni wuatangöba Juda ambazip Tesalonaika malgeri, mi luhut al engiget.

¹² Buña keu jiyohotka Juda yengörenök jesöngöñan möt nariba uruñini melenget. Grik ambazip yengörenök mewöyök gwötpukñan Jisös möt narigetka sutñine ambi öngöngöñi qetbuñaninambuk mi gwötpuk malget.

¹³ Jisös möt narigetmö, Polnöy Berea miangören mewöyök Anutugören Buña keu jim asariba malöhi, miangö buzupñan sehiba Tesalonaika anda Juda jitñememe yengö kezapñine geyök. Kezapñine gei möta wahöta Berea kaba mewöñanök ambazip uruñini esiba kuñguget.

¹⁴ Kuñgugetka urumelen alaurup yeñön mi möta miangörenök Pol melaigetka köwet jitñe geyök. Geyökmö, Sailas Timoti yetkön toroqeba Berea malohot.

¹⁵ Azi Pol umbulgeri, yeñön toroqeba wangita anda Atens sitinöy angotket. Angotketka kewö jim kutum enjiiga mötket, “Inini mönö lilingöba Sailas aka Timoti jigetka ösumok nöngören kamahot.” Keu mi möta mosöta anget. Mewö.

Polnöy Atens sitinöy mala nup meyök.

¹⁶ Polnöy Atens sitinöy tata Sailas Timoti yetkö mamböta mala liliköyök. Liliköba siti mi tandö lopionni lopionni mienön kokolak qegetka köna töwokñe töwokñe kingetka engeka awöwöliba tembula uruñi könöp jeyök.

¹⁷ Polnöy Juda yengö köuluk mirinñine öngöba Juda kian ambazip aka gölme toni Anutu waikni memba möpöseigeri, yembuk kinda eraum mötket. Polnöy wehön dop rowonqeqe sombemñini dop anda ambazip miwikñaim enjiba yembuk aitonöba eraum mötket.

¹⁸ Eraum mötketka Epikuros aka Stoik mötmöt jake yahöt mietkörenök böhi tosatñan kaba Polbuk keu singinñi singinñi jiba goranora aka jitnakölik erauget.† Tosatñan toroqeba Polgö keuñi möta kewö jiget, “Mötmöt kitipñi kitipñi zezengek ewö usunñda um jaruba lan qezaköba mohot yahöt miwikñaim bibihiba memba kaza. Mi memba kaba sesekñai ewö lan jizapmö, keuñangö ölni wania jimangö mötzawi, mi qahö mötzin.”

Polnöy Jisösgö Buñani jim asariba uruñini kuñguba kömupnöhök wahörök‡ jiyök. Miangöra tosatñan toroqeba kewö jiget, “Bem kiannni memba kaba mietkö könanñiri jim asariza, miangö tandök ewö akza, ekzin.”

¹⁹ Mewö lanlan jigetka Pol wangita maket sombem ketani Areopagus§ miangören öngöba kaunsöl yengö jeñine alget kini kewö jiget, “Gi mötmöt aren dölökñi aukñe kusum nenjimakzani, miangö könanñi denöwö? Mi ölop jinönga mötpin.

²⁰ Göñön kian kantri yengören keu murutñi memba kaba jinönga kezapñine gei mötzin. Miangöra göhö keu arengahö könanñi mi törörök mötpingö mötzin.”

²¹ Atens toni aka kian miangören malgeri, yeñön pakpak öne lanlan mala mötmöt keu dölökñi dölökñi ongitongit aka jiba möta uruñini miangören ala nalöñini ayuhuba malget. Mewö.

Polnöy Areopagus sombemñöy kinda keu jiyök.

* **17:11:** Berea yeñön Baiböl stadi ölopni alget. † **17:18:** Mötkutukutu böhi qetñi Epikuros yanön uruölöwak mötpingö könanñi kusum enjiyök. Stoik mötmöt jake (akademi) miangö böhinñi qetñi Zeno yanön sihim ölopni aka bölöñi qömbököba böñ qeba köhöiba kinbingö könanñi kusum enjiyök. ‡ **17:18:** Jisös aka Kömupnöhök wahötwahöt keu yahöt mi qahö möt asariba tönpin kinda kewö jiget, ‘Yanön mönö bem azi ambi yahöt yetkö qetñiri mewö qetza.’ § **17:19:** Areopagus miangö könanñi mi yarögö bemñi qetñi Ares yangö kunduna.

22 Polnön wahöta Areopagus sombem bibiñe anda kaunsöl yengö jenine kinda kewö jiyök, “Atens aziurup, nöñön ki kaba yuai pakpak eka könañini kewö ahöi mötzal: Inini bemurupñini göda ölopñi qeba möpöseim engiba malje.

23 Nöñön liliköba engören miri kömbukñi kömbukñi eka miengö sutñine alta kulemñambuk kun miwikñaijal. Miangören kewö ohoget ahöi ehal, ‘Bem könañi qahö mötzini, yangöra mein.’ Miangöra inini bem kun könañi qahö möta töndup waikñi memba möpöseimakzei, nöñön mönö yangö könañi indela jibi mötme.

24 *[“]Bem Anutunön Suep gölme aka yuai pakpak mietkö uruñire ahözawi, mi miwikñaim engiyök. Yañön Suep gölmegö Kembuñja akza. Yañön jöwöwöl jike börönönj memenji miangören qahö tata malja.

25 Yañön nanñak malmalgö könañi akza. Mi aka neñön gölmenönj malbinangöra sile, uña (imut) aka yuai tosatñi pakpak neñgiiga söngörö ösum örömakzin. Mewö neñgimakzawangöra aka nanñak nene me yuai kungöra qahö osiza. Miangöra ambazip nini gumohom wangibingö osizin. Nini böröñinan yuai qahö memba naluk al wangiin ewö, yañön mönö qahö kömuma. Yañön azi tandök qahö malja. Qahö.

26 “Yañön mutuk azi mohot miwikñaiiga yangörenök sehiba denña gwala inñani aka sile tosatñi aka gölmenji gölmenji pakpak dop köla maljin. Yañön nalöñini pakpak törörök arengöm neñgiiga miangö dop maljin aka miri gölme denike denike ahöm tat ala maljini, miangö görañi aka aiwesökñi ala jim kutuiga miangö dop maljin.

27 Nini mönö Anutu nanñi möt jarum wangibingöra yuai pakpak mi arengöba al neñgiyök. Yañön körek pakpak kösutñineyök maljapmö, töndup mezanqezanñ ala Anutu jaruba mala miwikñaiabin me qahö?

28 Nanñini Grik mötmöt ambazipnönj keu kötnji arengöba ohogeri, yengörenök yahötñan mewöyök keu kötnji kun kewö jiyohot, ‘Ninia kun yangö gwölöñarökurupñi maljin.’

Azi mewöñi kunñan keu kötnji kun kewö ohoyök,

‘Yañön mönö mem letot neñgiiga yangö aumñe malmalnini malakzin,

könanini anda kamakzin aka ahöm wahötnini ahakzin.’**

29 Keu miengö dop nini mönö Anutugö gwölöñarökurupñi mala kösutñeyök kinjin. Kösutñeyök kinjinmö, töndup yangö könañi möt sohoba janñun ak-inbuk. Imut ohoho azi yeñön mötmöt qakñe kinda bem kungö tandökñi mötmöriba goul, silwö me köt jamönñinñ memba urorohoba tandö lopionji söhöba meñölöba memakzei, yañön mönö mewö tandök qahö akza.

30 Ambazipnönj gukmaulem aka jipjap mala kotketka Anutunönj nalö miangören ahakmemenini möt böliiga likepñi qahö melenña malökmö, nalö kewöñe keuñi indela kewö jiza, ‘Ambazip körek pakpak miriñini dop tat anjei, inini mönö uruñini melenña nöñgören kaget.’

31 “Anutunönj nalö ketani ali kam kunguma. Yañön nalö miangören ambazip gölmenji gölmenji pakpak mal anjei, mi tokom neñgiba keunini kewöta törörök jim teköma. Yañön azi kun keunini jim tekömapköra möwölöhöba jimtekötekögö kukösumñi böröñe alök. Yañön azi mi mem gulii kömupnöhök wahöriga mewö mianñön kukösumñi ketani mi ambazip pakpak kondel neñgiiga eka mötzin. Azi kömupnöhök wahöröhi, yañön mönö jimtekötekö Tonina akza.”

32 ‘Anutunönj azi kun kömupnöhök mem gulii wahöröhi,’ tosatñan keu mi möta mepaqepaiköget. Mewö aketmö, tosatñan kewö jiget, “Keu jizani, nini

* 17:24: 1 Kinj 8.27; Ais 42.5; Apo 7.48 ** 17:28: Mötmöt azi ketani Pol yañön mötmöt jakenji jakenji öngöba Grik yengören buk murutñi murutñi oyoñda möt kutuba miangörenök keu kötnji kötnji amqeba memba aukñe jiyök.

mi kunbuk mötpingö mötzin. Miangöra gi ölop nalö kunöñ keu mi toroqeba jim tuariman.”

³³ Mewö aketka Polnöñ yeñgö sutñineyök wahöta engömosöta anök.

³⁴ Anökmö, tosatñan kaba Jisös möt nariba yambuk toroqezet. Möt narigeri, yeñgö sutñine Areopagus kaunsöl kambu yeñgö jitñememe azi kun qetñi Dionisius malök. Mewöyök ambi ketañi kun qetñi Damaris aka tosatñan yetpuk toroqeba möt nariget. Mewö.

18

Polnöñ Korint sitinöñ ani uruñini melenget.

¹ Yuai mi asuhuiga Polnöñ Atens siti mosöta Grik siti kun qetñi Korint miangöreñ anök.

² Korint anda Juda azi kun qetñi Aqila miwikñaiyök. Aqila yañön Eisiagö prowinsñi qetñi Pontus miangöreñ ahuba könangep mindimindiri siti Rom anda malök. Miangöreñ mali sisa kiñ qetñi Klodius yañön jimkutukutuñi kewö alök, “Juda ambazip iñini mönö körek pakpak Rom siti mosöta denme.” Mewö jiyöhangöra aka Itali kantri mosöta Grik geba nalö miangöreñ Korint kañgorök. Kañgoriga Polnöñ miwikñai i aka anömñi qetñi Prisila yetköreñ anök.

³ Malmalñiri nañgöbitköra opo koumñi koumñi meyohot. Polnöñ mewöyök opo seri koum meme azia. Miangöra yetköreñ ani nupñini öröröñ ahöiga yetpuk mala ahöba opo seri koum nup mohotje meget.

⁴ Memba malgetka Sabat kendon dop köuluk mire öngöba Juda aka Grik ambazip yembuk Jisösgö könañi erauba mesin da uruñini melenmegöra kuñgum engiba malök.

⁵ Kuñguba mali alayahötñi Sailas Timoti yetköñ Masedonia prowinsnöhök kañgorohotka Jisösgö Buñañi nalö dop jim asariba malök. Mewö mala Jisösnöñ Amötqeqe Toñi Kraist akzawi, miangö könañi aukñe kondela keu mianjön Juda ambazip uruñini kuñguyök.

⁶ Uruñini kuñguyökmö, Pol tuarenjön aka uruqeqe keu töhöreñ jim wangigetka böröñan jeñine kuñguba sölburañi töñjörari eriga kewö jiyök, “Nöñön köpösihit qahö akiga iñini ayuhuba miangö likepñi mi mönö nöngö qakne albingö osime. Mi nanninak bisime. Iñini Buña keu qetalgetka nöñön ölop engömosöta merak kinda öngömawi, miangöreñ kian kantri ambazip yeñgöreñ elen da anmam.”

⁷ Mewö jiba engömosöta köuluk miri göräñe azi kun qetñi Titius Jastus yangö mire öngöba malök. Yañön Juda azia qahöpmö, töndup Anutugö waikñi membä möpöseiba malök.

⁸ Göräñe anökmö, köuluk mirigö galöm qetñi Krispus aka yangö anömmoröñi yeñön körek uruñini melen da Kembu möt nariget. Mewöñanök Korint ambazip tosatñi Polgöreñ keu mötkeri, yeñgöreñök gwötpukñan Jisös möt nariba uruñini melengetka o melun mem engiget.

⁹ Polnöñ sunjem kunöñ gaun ahöiga Kembunöñ kutum wasöri ga imut ehiga kewö jii mörök, “Gi keñgötki kude mötmanmö, Buña keu mönö köhöiba jiba malman.

¹⁰ Siti kiangöreñ ambazip kambu gwötpuk yeñön nöngö buñaya akze. Miangöra nöñön göbuk malbiga kunñan yuai kun qahö könahiba mem bölim gihima.”

¹¹ Mewögöra Polnöñ nalöñi mem köri ba yeñgö sutñine (yara) yambu mohot aka köiñ 6 miangö dop mala Anutugöreñ Buña keu kusum engimalök.

¹² Kusum engimalökmö, Rom yeñon azi Galio kuñgugetka Akaia prowinsgö kiap gawönö malöhi, nalö miangören Juda jitnememe yeñon mindiriba Pol tuarenjon ak wañgiba öröba keu jakeje al wañgiget.

¹³ Keu kewögöra al wañgiget, “Azi kianön ambazip enjololon ak engimakza. Rom yeñon jimkutukutunini alget ahözawi, yanön ambazip köna mi qösököba Anutugö waikni memba möpöseimegöra uru kuñgum neñgimakza.”

¹⁴ Keu mewö silene ala jigetka Polnön keu jimangö aiga kiap gawönö Galio yanön Juda ambazip yeñgöra jiyök, “Juda ambazip engö sutjine kunñan azi qei kömumbawak me pinjit bölöni kötökni kun akawak ewö, miangöra nöñon ölop keunini kezap ala mötpileñak.

¹⁵ Mimö, engö sutjine mötnaripkö keu asuhuiga qet murutni murutni qeta anjururuk aka jimkutukutunini denöwö aknei, mi mönö nanñini lömbötñina. Nöñon yuai mewöni mi kewöta jim tekömamanjö dop qahö akzal.”

¹⁶ Mewö jiba keu jakeñeyök enjuatanjöiga etket.

¹⁷ Eta nanñinök mindiriba mohotne luhuba köuluk mirigö galöm qetni Sostenes mi qeraköba memba kaba keu jakeñangö köna numbunje ala qeget. Qegetka kiap gawönö Galionön mi eka miangöra möriga ölni kun qahö ahök. Mewö.

Polnön nanñi mirine Antiokia sitinön lilingöyök.

¹⁸ *Polnön töndup toroqeba Korint sitinön silim gwötpuk malök. Mal teköba urumelen alaurupni yaizözkök keunini jiba engömosöta Prisila aka Aqila etkömemba köwetnön geba wañgegöra mamböta tatket. Mutuk Anutugö jene kewö jiyök, “Nöñon Anutugö nupni pöndañ kapañ köla memam.” Keu mewö jiba mi jöjöpañ keunön jöhöba malök. Nalö mi teköiga köwetnön miri qetni Senkria miangören geba jöjöpañ keuñangöra jiiga nörop jupni mitiget. Wañge kun Siria prowinsnön anmamgö ahöhi, mi miwikñaiba miangören öngöba opo seri öröba möröreñgögetka luhutnön nanjöi anget.

¹⁹ Anda Efesus taonön angota Polnön Prisila aka Aqila etkömosörökmö, nanñak köuluk mire öngöba Juda yembuk Jisösgö könañi eraum mötket.

²⁰ Eraum möta kewö qesim wañgiget, “Gi ölop nalö köröñi nembuk malman.” Mewö qesim wañgigetmö, Polnön miangö urumohot qahö ahök.

²¹ Miangöra yaizözkök kewö jiyök, “Anutunön miangö On! jima ewö, mönö ölop lilingöba engören kamam.” Mewö jiba wañge kunön öngögetka opo seri öröba möröreñgögetka luhutnön nanjöi Efesus mosöta anget.

²² Anda taon kun qetni Sisaria miangören angota wañge mosöta gölme köna Jerusalem öngöyök. Öngöba lilingöba urumelen könagesö jölöñini jiyök. Mi jiba tata wahöta geba Antiokia sitinön anök.

²³ Antiokia sitinön anda mali sonda tosatni teköiga engömosöta könanön anök. Könanön anda Galesia aka Frigia prowins yahöt mi ongita miri dop liliköba gwarek pakpak engeka köl gulim enjii köhöiget. Mewö.

Apolosnön Efesus aka Korint nup meyök.

²⁴ Nalö miangören Juda azi kun qetni Apolos mi Efesus kayök. Apolos yanön Ijptkö taon qetni Aleksandria miangören ahuba mala mötmöt mire öngöi teköiga Buña Kimbi Wañangö keunni ölopñanök möt kutuyök. Mi möt kutuba könañi jii keunni tandökni miangöra ambazip miri dop sihim gwötpuk möta söngaiget.

²⁵ Kembugö könañi wuatangöbingö könañi kusum wañgigetka Anutugören köñop bölamñan urunje jeyök. Jisösgö könañi törörök diñdini kusum engiba Jonön o melun mem enjiyöhi, miangö könañi ölop möt sölöngöba jiyök. Mi

* 18:18: Jan 6.18

jiyökmö, miangö likepni kun mosörök. Uña Töröñan melun mem neñgizawi, mi qahö mörök.

²⁶Yañön kaba köuluk miri uruñe könahiba keu ösum-mumuñambuk jiyök. Jiiga Prisila Aqila yetkөн keuñi möta kinda wañgirohotka yetkö mire anget. Anda Anutugö könañi ölöpñanök toroqeba jim asariba jiyohotka mörök.

²⁷Apolosnөñ Grik kantrigö bahөñi qetñi Akaia miangөreñ anmamgө möriga Efesus urumelen alaurup yeñön kötөngөm wañgiget. Kötөngөm wañgiba Akaia gwarekurup yeñgөra kimbi kewө ohoget, “Azi ki mönө köl örөm wañgime.” Apolosnөñ kimbi mi memba Akaia prowinsnөñ anda ambazip Anutugö kalem möriamñi möt asariba uruñini melenjeri, mi gwөtpuk baukөm enjiyök.

²⁸Baukөm enjiba “Jisөsnөñ Amөtqeqe Tonji akza,” jiba miangö könañi mi Buña Kimbigö keuñi keuñi oyoñda miangөн kondel enji mötket. Juda yeñön keu mi möta jitnakölik aketka goranora (noragora) ahuyökmö, Apolosnөñ Anutugö kukөsum qakñe kinda keuñini aukñe qeapkөiga etket. Mewө.

19

Polnөñ Efesus mala nup meyök.

¹ Apolosnөñ Korint sitinөñ maliga Polnөñ Antiokia siti mosөta prowins tosatñi* oñgita mala mala köwet gөrañe Efesus sitinөñ añgorök. Añgota miangөreñ gwarek tosatñi miwikñaiiba engehök.

² Engeka kewө qesim enjiyök, “Inini möt nariba uruñini melenjeri, Uña Törөñan mönө nalö miangөreñ uruñine geyök me qahö?” Mewө qesim enjiiga kewө melenja jiget, “Uña Törөñan maljawi, nini miangö keuñi qahөpmahöp mörin.”

³ Melenja jigetka kewө jiyök, “Inini mönө wani o melun mem enjigerawa malje?” Mewө jiiga melenjet, “Nini Jonөñ o melungөra jiba malөhi, mönө mi mem neñgiget mein.”

⁴*Mewө melenjetka Polnөñ jiyök, “Jonөñ Jisөsgөra keu jiba ambazip kambu uruñini kuñguiga kewө mötket, ‘Nөngө andөne azi kun kamawi, inini mönө i möt nariba uruñini melenjet.’ Mewө jii möta uruñini melenjeri, Jonөñ i o melun mem enjiba malök.”

⁵ Mewө jii mötketka Polnөñ Kembu Jisөsgө qetñe o melun mem enjiyök.

⁶ Mem enjiba börөñi nöropñine aliga Uña Törөñan uruñine geiga kantri tosatñangö keu murutñi murutñi könahiba jiba kezapqetok keu jiget.

⁷ Azi mi mindiriba 12 miangö dop malget.

⁸ Polnөñ köuluk mire öngөba kinda Anutugö bemtohoñangö könañi eraum möta awösamkakak kinda suahө ewө uruñini kuñgui keuñi qeapkөbingö osiba malget. Mewө malgetka köin karөbut tekөyök.

⁹ Qeapkөbingö osigetmö, tosatñan yañgiseñ aka qahö möt nariba Kembugөreñ könañi aukñe jim böliba ambazip jeñine luasö jiba kinget. Mewө jiba kingetka Polnөñ kewөta menden enjiba enjömosөta gwarekurupñi enjuañgiriga tikep anget. Tikep anda azi qetñi Tiranus yañgө qenjarök mötmöt jakenөñ silim dop (aua 5 tokoba) kusum enjiiga eraum-mөtmöt aka malget.

¹⁰ Mewө aka malgetka Kembugö Buña keuñan sehiiga (yara) yambu yahöt tekөyök. Mi tekөiga Buña keu mi Eisia prowins uruñe miri tonji aka Juda ambazip pampak yeñgө kezapñine gei möt tekөget. Mewө.

Sewa nahönurupñan öme közölbingö osiget.

* **19:1:** Gölme mi nalö kewөñe kantri qetñi Tөki (Turkey) miangö uruñe ahöza. * **19:4:** Mat 3.11; Mak 1.4, 7-8; Luk 3.4, 16; Jon 1.26-27

11 Anutugö kukösumñan Polgöreñ angoriga nup memba böröñi ambazip nöröpñine ali Anutunöñ anğöletot murutñi murutñi meiga asuhuget.

12 Mewö mali ambazip kawöl engöhöi malgeri, tosatñan Polgö sileneyök nöngöp mitimiti aka opo jöhanñi tosatñi mewöyök memba anda kaba qakñine algetka kawölñini engömosöri ömeñini kota angetka ölöwaket.

13 Juda sile galöm tosatñan liliköba öme enğuatangöba anda kaba malgeri, yeñön mewöñanök könahiba ömenöñ kölkölñinjñi mem engigeri, yeñgö qakñine Kembu Jisösgö qetñi qeta ösumñi köl öröbingö esapköget. Esapköba kewö jiget, “Polnöñ Jisösgö qetñi qeta uru kuñgum neñgimakzawi, nöñön mönö Kembu miangö qetñe öme kota kesalmegöra jim kutum engizal.”

14 Jisösgö qetñi mewö qetkeri, yeñgö sutñine Juda jike nup galöm bohonñi qetñi Sewa yañgö nahönurupñi 7 yeñön mewöyök malget.

15 Yeñön ömewöröme kun mewö jim kutum wañgigetmö, yañön melenđa kewö jim engiyök, “Ni Jisös möt wañgizal aka Pol möt wañgizalmö, injini mönö niñia?”

16 Mewö jim engiba azi uruñe kinöhanöñ mönö luhuba qakñine öngöba qeraköba engömeyök. Mewö körek pakpak luhut ala yayapaleleñ mem engiba silenini kutumutuba opo malukuñini munjukunjurariyök. Munjukunjurariga nannik nannik silenine sepgwörörök eta kini tököba kesala miri uruñi mi mosöta silenini gwamönñi aukñe eta angaiget.

17 Mewö asuhuiga Juda kian aka gölme tonji Efesus malgeri, körek yeñön miangö buzupñi möta gwötpuk auruba awöwöliget. Awöwöligetka tosatñan Kembu Jisösgö qetñi kapan köla möpöseigetka aködamunñambuk ahök.

18 Möt nariba uruñini melenğeri, yeñgöreñök gwötpukñan anda siñgisöndokñini indela jim köleñget.

19 Tosatñan qarösongo amötqeqe memba malgeri, yeñgöreñök gwötpukñan buk papiañini memba kaba tokoba ambazip pakpak yeñgö jeñine kinda aukñe könöpnöñ gilget jeyök. Buk papia miengö söngöröñini oyoñda mindirigetka mindimindiri jañgöñini mi silwö moneñ (Kina) 50.000 miangö dop ahök.

20 Tandök mewö aketka Kembangö Buña keuñan mönö ösum-mumuñambuk sehiba köhöiba anök. Mewö.

Polnöñ nupñangö areñi alök.

21 Yuai pakpak mi asuhum teköiga Uña Töröñan Pol sölölohöm wañgii keuñi jöhöba kewö jiyök, “Ni köwet kutuba Grik kantrigö likepñi yahöt Masedonia aka Akaia miangöreñ liliköbi teköiga mosöta Jerusalem sitinöñ anmam.” Mewö jiba toroqeyök, “Miangöreñ anda tata Jerusalem mosöta Rom siti mewöñanök anda ekñam.”

22 Mewö jiba neñakñi yahöt Timoti aka Erastus melaim etkiiga Masedonia anohotka nannak toroqeba nalö tosatñi Eisia prowins uruñe malök. Mewö.

Efesus yeñön bim karim aket.

23 Efesus sitinöñ Kembangöreñ köna wuatangögetka miangöra nalö miangöreñ enololonğ göjupmajup keta bölökñi asuhuyök.

24 Silwö nup meme azi kun qetñi Demetrius yañön silwö ohoiga kolkolgöiga qekötahöba bem ambi qetñi Artemis yañgö jöwöwöl jikegö dop imut morömorö memba malök. Mi meiga bohonñi memba malgetka moneñ öngöngöñi öröi kölköl-örörö alaurupñan mendenđa meget.

25 Megetka Demetrius aka kambu tosatñan nup mewöñi memba malgeri, mi mohotñe engoholi kaba tokogetka kewö jii mötket, “Azi alaurup, nini nup ki meinga bohonñi ölöpñi asuhaba kamakza, mi mötzin.

²⁶ Mi môtzinmö, Pol azi mianön Efesus kiangören kangota ambazip urunini esiba ki aka Eisia prowins pakpak dop köla ambazip kambuñi kambuñi kungum engii janjuñ akzei, mi nalö kewöñe ölop eka mötze. Yanön kewö jimakza, ‘Bem börönöñ memenji mi bem ölni qahö.’

²⁷ “Mewö jiba maliga nini kölköl-örörö nupnini memakzini, miangö qetñi mem bölü jijiwilit akepukö urulömböt akza. Aka miyöhök qahöpmö, urulömböt kun kewö ahöza: Ambazip pakpak Eisia prowins uruñe aka gölmeñi gölmeñi pakpak miangören bem ambi öngöngöñi Artemis waikñi memba möpöseimakzei, yangö bem qetbuñani ketanñan ayuhuba ösumñan et-papuk aka jöwöwöl jikenangö qetñan bölüba ambazip jenine eta omanñi akapuk. Urulömböt mewö ahöza. Miangöra waimanjat möta keu ki jizal.”

²⁸ Demitriusnön mewö jiiga sungurum alaurupñan mi möta irimñini seholidiga kewö jiba qet gigilahöget, “Efesus nenngören Artemis mi öngöngöñi!”

²⁹ Qet gigilahögetka enjololöñ göjupmajup mianön sehiba sehiba siti körek dop kölok. Mewö aiga Masedonia azi yahöt qetñiri Gaius aka Aristarkus Polgö sungurumyahötñi mi qeraköba etkömembra örörahöm etkiba qezakqezak mirinön anda totoko alget.

³⁰ Totoko algetka Polnön mewöyök ambazip kambulelembe yeñgö sutñine anmamgö mörökmö, urumelen ambazipnön i angön köl wanget.

³¹ Eisia prowinsgö galömkölköl azi tosatñan Polgö alaurupñi akeri, yeñon mewöyök kolek ala kewö ulet wanget, “Qezakqezak mirinön totoko aljei, gi mönö nangi miangören kude kondel engiman.”

³² Totoko algeri, miangören ambazip gwötpukñan kinda tokogerangö könani kun qahö mötkerangöra nannik nannik lanlan qet gigilahöba siksauk enjololöñ ketanñi megetka sehiba anök.

³³ Mewö ani Juda yeñon azi qetñi Aleksander kunguba nanngögetka kambu yeñon öröba köna algetka qaikñe eu öngöba kinök. Öngöba kinda ambazip jemesoholñine keu likepñi meköba jimamgö möta börö pözön misiba aiwesök mem engiyök.

³⁴ Aiwesök mem engiyökmö, Juda azia akzawi, mewö möt kutuba miangörenök numbuñini mindiriba körekñan könahiba keu kewö qetket, “Efesus nenngören Artemis mi öngöngöñi!” Mewö qeta mala aua yahötkö dop silata qeta kinget.

³⁵ Qeta kingetka siti pomñan ambazip kambu uruñine memba eta ali görön algetka kinda kewö jiyök, “Efesus ambazip, nini nanine siti kiangören Artemis öngöngöñi mi möpöseiba maljin. Nini yangören jöwöwöl jike aka köt imutñi kömbukñi Suepnöhök eröhi, mi galöm köla maljin. Keu mi inini körek ölop mötze.

³⁶ Mi kunñan qan kölmawangö dop qahö. Miangöra inini mönö uruñini ösön memba eta ala böñjön malme. Kezapjupjup yuai kun kude akñe.

³⁷ Azi ki jöwöwöl jikenön öngöba yuai kun qahö kiom qeba mem bölüyohot. Bem ambinini qahö ilit wanjiyohot. Inini töndup i etkuangitketka ki kinjahot.

³⁸ “Demitrius aka yangö kölköl-örörö alaurupñan tosatñi yembuk angururuk aka keu jim angubeak ewö, kiap mönö ahöze aka keu jakegö totokoni totokoni mi keu mindingöbingöra alakze. Miangöra mönö ölop miangören anda keu jakeñe al anguba arönda kingetka dop kölma.

³⁹ Inini yuai kun toroqeba jibingö mötpeak ewö, siti kiangö tonñan mönö ölop könagesö öröm engiiga qenjarök sombemnön tokoba keu kewöta jim teköme.

⁴⁰ Merak enjololöñ göjupmajup ketanñi ki könani qahöpmö, töndup imbisölöm asuhuzawi, mi Rom gawman yeñon möta kewö jibepuk, ‘Efesus yeñon Rom mindimindiri gawman qetala bim karim akze.’ Mewö jiba keu jakeñe al

nenjibepuk. Miangö urulömbötñi akza, mi mötzal. Keu jakeñe al nenjiba karim kiangö könañangöra qesim nenjibeak ewö, nini mönö likepñi gagabe köla jibinanngö dop qahö mötzin.”

⁴¹ Efesus siti pomñan keu mewö jiba ambazip kambu köndenñ enjiiga söroräuba denña anget. Mewö.

20

Polnöh Masedonia aka Grik anda nup meyök.

¹ Efesus miangörenñ göjupmajup mianñön sörauba teköiga Polnöh gwarekurupñi enghoholi kagetka urugö nanngönanngö keu qambañ enjiba yaizökzök jiba enngömosöta Masedonia prowinsnöhñ anök.

² Masedonia anda gölmeñi gölmeñi kutuba liliköba miangörenñ qambañ keu gwötpuk jiba mala Grik kantrinöhñ kayök.

³ Grik kaba köiñ karöbut malök. Mi mal teköiga wange memba köwet kutuba Siria anmamgö mörök. Mewö mörökmö, Juda jitñememe yeñön könanöhñ qebingö anngönañi algetka kezapñe gei mörök. Mi möta miangöra Masedonia prowins kutuba gölme köna miriñe lilingömamgö keuñi uruñan jöhöyök.

⁴ Keuñi jöhöi sunngurumurupñi kewöñan yambuk anget: Berea azi qetñi Sopater Pirusgö nahönñi, Tesalonaika azi qetñiri Aristarkus aka Sekundus, Derbe azi qetñi Gaius, Timoti aka Eisia prowinsgö azi qetñiri Tikikus aka Trofimus.

⁵ Yeñön qeljiñe Troas anda miangörenñ nenngöra mamböta malget.

⁶ Troas anda malgetmö, Luk ni aka tosatñi nenñön beret yistñi qahöpkö kendon mi Filipai sitinöhñ tarin. Mi tarin teköiga wanngöñenñ öngöinga opo seri öröba mörörenngögetka luhutnöhñ nanngöi anda wehön 5 aiga Troas yeñgörenñ angorin. Troas anngota miangörenñ wehön 7 toroqeba malin. Mewö.

Polnöh nalö kondikñi Troas malök.

⁷ Wehön 7 malin teköiga Polnöh wehön 8 miangörenñ enngömosöta anmamgö mörök. Mi möta sunngem kondikñi Sondagie miangörenñ tokoba Jisös mötmöröba beret mindipköbingöra tarin. Mewö taringa Polnöh yembuk eraum möta keuñi jim köriiba mali mali sunngem bibiñi ahök.

⁸ Nini miri uruñi kungö qakñe eu öngöba tokoba taringa lambe gwötpukñan jeba asariget.

⁹ Tokoba taringa azi gwabö kun qetñi Yutikus yanñön jenngenanñöh tarök. Tari Polnöh keu jiba mali möri nalö köriiga gaunngö möta ahöba gwörörök öröba könakembayök tala imbiñi qahö möta miri uruñi karöbut onngita gölmenöhñ geba qeyök. Geba qeiga luhuba geba memba wahöringa kömuyöhi, ehin.

¹⁰ Mewö ehinmö, Polnöh geba kepölaköba jiyök, “Kunbuk söngörö ösum ala guliza. Miangöra kude awöwöliget.”

¹¹ Mewö jiba kunbuk eröhanngörenñ öngöba beret mindipköba neyök. Nemba yembuk nalö köropñi keu jiba mala mala miri gianñigun enngömosöta könanöhñ anök.

¹² Aniga azi gwabö mi wanngitketka guliba malöhi, mi eka urukölalep ketanñi möta anget. Mewö.

Polnöh Troas mosöta Miletus anök.

¹³ Yeñön angetmö, Polnöh nanngak gölme köna anmamgö möta kewö jim kutum nenngiyök, “Inini mönö qeljiñe köwet köna miri qetñi Asos miangörenñ angetka aitanngöba noanngitketka wanngöñenñ öngöbin.” Miangöra nenñön mosöta wanngöñenñ öngöinga opo seri öröba mörörenngögetka luhutnöhñ nanngöi anda Asos miangörenñ angorin.

14 Asos angota nembuk aitonböba Pol wangiringa wangenöŋ öngöba miri qetŋi Mitilini miangören anin.

15 Mitilini anda miangören opo seri kunbuk öröba mörörengetka luhutnöŋ nanöi anda mala ahöba wahöta gölme jöhanni qetŋi Kios miangö kösutŋe angorin. Angota toroqeba kutuba anda ahöba wahötagun miri qetŋi Samos miangören geba kunbuk anda ahöba wahöta miri qetŋi Miletus miangören kewögöra angorin:

16 Polnöŋ “Yambu dölökŋi (Pentekost) mi esapköba Jerusalem sitinöŋ tatmam,” jiba nalö ayuhubinbuköra ösumok anbingö mörök. Miangöra Eisia prowinsnöŋ nalö köröpŋi ayuhubinbuköra möta wangenöŋ öngöba Efesus siti ongitpingö keuŋi jöhöi malin. Mewö.

Polnöŋ Efesus yengöra keu kondikŋi jiyök.

17 Miletus angoringa Polnöŋ Efesus yengöra kolek ala urumelen könagesögö jitŋememurup yeŋön eta kamegöra köl öröm enġiyök.

18 Köl öröm enġii miri qetŋi Miletus miangören kanġotketka enġeka kewö jii mötket, “Nöŋön nalö mutukŋi Eisia prowinsnöŋ kayali, miangörenök könahiba nalö pakpak embuk mala kota nup meali, inġini miangö tandökŋi ölop möt yaköze.

19 Nöŋön Kembangö jeŋe uruni mem et al anġum teköba nupŋi denöwö memba kota malali, inġini mi ölop mötze. Nupŋi memba ambazip enġöra sahöta imbilni eriga malal. Juda yeŋön uruŋini qahö melenġeri, yeŋön nalö tosatŋi miangören silenöŋ alal aket aka nuŋgubingöra areŋ asa-asambötŋi ala malġet. Mi ala malġerangöra aka esapesap murutŋi murutŋi miwikŋaiba sihimbölo möta malal.

20 “Nöŋön Buŋa keu mem ölöwak enġimakzawi, mi jim asarim enġiba malal. Mi qenjarökŋöŋ tokoba aka miriŋi miriŋi miangören öngöba kusum enġiba malal. Nöŋön miangöra poraiba nup qahö mosöral.

21 Nup qahö mosöralmö, Juda kian aka gölme toni enġöra mewöyök keu kötŋi kewö nanġöba jiba malal, ‘Inġini mönö uruŋini melenġa Anutugören qekötahöba Kembunini Jisös Kraist möt narim wangime.’ Inġini mi pakpak ölop möt teköze.

22 “Mötket, merak Uŋa Töröŋan ni Jerusalem sitinöŋ anmamgö kuŋgum niŋgiza. Miangören anbi wani yuai asuhum niŋgimawi, mi qahö mötzal.

23 Mohok-kun kewö mötzal: Nöŋön taon denike denike anda malali, Uŋa Töröŋan miangören saŋep ala kewö nanġöba jii möta malal, ‘Gi mönö ka-hasililiŋ möta malnöŋga kösö mire al gihigetka tatman.’

24 *Mewö jii möta malalmö, muat. Nöŋön toroqeba malbilenġak me kömumbilenġak, mi keu kun qahö ak niŋgiza. Mi qahöpmahöpmö, Kembu Jisösnöŋ nup al niŋgiyöhi, nöŋön mönö mia mem yakömangö möt köhöizal. Yaŋön nöŋgöra kewö jiyök, ‘Anutunöŋ kalem möriamŋi ambazip enġimamgö mötzawi, gi mönö miangö Ölöwak Buŋaŋi jim asariba malman.’ Miangöra gölmenöŋ malmami me kömumami, mi mönö yuai omanġi kötökŋi ak niŋgiza. Ambazip mönahotkö aonġit akzei, kuŋŋan miangören kembangö kutuba luhut qahö alma. Nöŋön mönö miangö dop nupŋi memba kembangö kutuba mosötpilenġbuköra ösumni pakpakŋan kapan köla anda malmam.

25 “Mewö malmam-mö, mötket, nöŋön enġö sutŋine anda kaba Anutu bemtohoŋangö könaŋi jim asaribi mötkeri, inġini nöŋgö jesöŋgöroni mi kunbuk qahö ekŋe. Enġörenök kuŋŋan kun qahö nekŋawi, merak mewö mötzal.

26-27 Miangöra nöŋön inġini Anutugö jitŋi pakpak wuatangömegöra jiba uru kuŋgum enġiba malal. Mi mönö qahö poraiba mosöral. Miangöra enġörenök

* 20:24: 2 Tim 4.7

kunjan kun siŋgisöndokŋaŋgöra sohoba kömumba könöp sianöŋ gema ewö, iŋini mönö ni jim niŋgibingö osime. Nöŋön mi merak eŋgöra aukŋe naŋgöba jim köhöizal.

²⁸ “Kembunöŋ nanŋi sepŋi mokoba mianöŋ könagesöurupŋi bohonnini meiga buŋaŋi ak teközei, iŋini mönö i lama ewö galöm köla köyan köl eŋgiba malme. Uŋa Töröŋi yaŋön nanŋak nup mi al eŋgiyök. Miangöra iŋini mönö nanŋini aka Kembangöŋ lama kambu yeŋgöra galömnini mem aŋguba malme.

²⁹ Nöŋön anbiga miangö andöŋe ambazip kanjamŋinambuk mi kiam kalŋi ewö eŋgö sutŋine asuhume. Yeŋön asuhuba lama kambu eŋgöra qahö möta piakŋi aka laŋ kaba eŋgöhöme, mi mötzal.

³⁰ Nanŋini sutŋineyök azi tosatŋan wahöta kinda Jisös gwarekurupŋan goraŋe anmegöra öröm eŋgiba munenŋ keu jiba malme.

³¹ Miangöra iŋini mönö uruguliguli mala keu ki uru könömnine ala mötmörime: Nöŋön (yara) yambu karöbutkö dop sungem asak qambaŋ keuŋi keuŋi mi iŋini mohot mohot qösösök (qörörök) kusum eŋgiba malbiga imbilni erök.

³² “Nöŋön merak iŋini Anutugö böröŋe al eŋgiba kewö jizal: Yaŋgö Buŋa keuŋan mönö kalem möriamŋi indela köyan köl eŋgimakŋa. Anutunöŋ köhöiba uruŋini naŋgöba möhamgöiga ölop köhököhöi miwikŋaiba mutulaŋgömakŋe. Iŋini Anutubuk lapingögetka alaurupŋi pakpak tök kutum eŋgiiga sarakŋi akzei, mönö yeŋgö sutŋine aŋgota dum tatatŋini memba oyaenŋkoyaenŋ aka malme.

³³ Ni eŋgöreŋök kungö guli jalö me monenŋ opo mi qahö buŋa qem aŋgumamgö möta malal.

³⁴ Ni aka sunŋurumurupŋan yuaigöra osiba malini, mi mönö nani böröni kianöŋ nup memba miwikŋaiba malal.

³⁵ “Mi pakpak aka memba silik ölopŋi kondel eŋgial. Iŋini mönö mewöŋanök nup memba malme. Mewö mala ambazip löwöriba nup memegö osizei, mi ölop köyan köl eŋgiba malme. Nup megetka ölni ahuiga Kembu Jisösgöreŋ keu ki mötmörime: Yaŋön nanŋak keu kun kewö jiyök, ‘Inap yuai buŋa qem aŋgugetka teköba pömsöm qeiga öne malmemö, tosatŋi yeŋgöra yuai kalemŋina eŋgigetka Anutunöŋ likepŋi melenŋiga oyaenŋkoyaenŋ akŋe.’ Mewö.”

³⁶ Polnöŋ keu mewö jiba eta simin köla körek yembuk Anutu köuluköyök.

³⁷ Köuluköiga körek yeŋön amburereŋ aka urusahöt qeba aŋgum waŋgiba numbuŋi yöhötim neget.

³⁸ Polnöŋ mutuk keu kun kewö jii mötket, “Iŋini nöŋgö jesöŋgörüni kunbuk qahö ekŋe.” Keu mewö möta miangöra wösöbirik öŋgöŋgöŋi möta kinda waŋgita waŋgenöŋ öŋgöba yaizözkök jiba umbulget. Mewö.

21

Polnöŋ Jerusalem anök.

¹ Yaizözkök jiba neŋgömosötketka opo seri öröba möröreŋgögetka luhutnöŋ naŋgöi anda gölme jölanŋi qetŋi Kos miangöreŋ göröken diŋdiŋanök anda aŋgorin. Aŋgota ahöba wahöta toroqeba gölme jölanŋi qetŋi Rodos miangöreŋ anin. Miangöreŋök toroqeba Lisia prowinsgö mirinŋi qetŋi Patara miangöreŋ aŋgorin.

² Aŋgota kinda waŋge kun Fonisia gölmenöŋ anmamgö ahiga mi miwikŋaiba miangöreŋ öŋgöinga opo seri öröba möröreŋgögetka luhutnöŋ naŋgöi anin.

³ Anda mala gölme jölanŋi qetŋi Saiprus miangö kösutŋe kaba eka mösököba Saut görökenök oŋgita toroqeba luhutnöŋ naŋgöiga Siria prowins göröken

anin. Anda “Wangegö inapni mi Taiö taonöŋ anda wanŋenöhök memba albin,” jigeranğöra mianğoreŋ anin. Mianğoreŋ anda wanŋe mosöta gein.

⁴ Geba gwarekurup miwikŋaim enğiba yembuk toroqeba wehön 7 malin. Mianğoreŋ malinga Uŋa Töröŋan sölölöhöm enğii Pol Jerusalem sitinöŋ anba-puköra galöm meme keu jiget.

⁵ Mi jigetmö, nini wehön 7 mi yembuk malin teköiga enğömosöta köna anin. Köna anbin jiinga yeŋön körek pakpak anöm-moröurupŋinambuk nenğubula taon mosöta silenŋe kaget. Taon silenŋe kaba köwet sakŋe eta simin köla Anutu köuluköin.

⁶ Köuluköba yaizözköknini jim anğuinga Jerusalem anbingöra wanŋenöŋ öngöinga yeŋön mirinŋine lilingöget.

⁷ Pol aka nini yanğö sunğurumurupŋan mewö Taiö mosöta toroqeba anda miri qetŋi Tolemes mianğoreŋ anğota wanŋe mosörin. Wanŋe mosöta urumelen alaurup jölöŋini jiin aka yembuk wehön mohot malin.

⁸ *Mala ahöba wahöta enğömosöta gölme köna anda Sisaria taonöŋ kanğorin. Jerusalem urumelen kambu uruŋe urukunğukunğugu azi (ewanjelis) sewen meköm enğigeri, * yeŋğoreŋök kun qetŋi Filip yanğön Sisaria malök. Neŋön Sisaria kanğota yanğö mire anda tata ahöin.

⁹ Filipkö bōraturupŋi 4 malget. Anutunöŋ ambi seram miengö uruŋine kezapqetok keu jijigö mötmöt kalem aliga malget.

¹⁰ *Neŋön Sisaria taon mianğoreŋ wehön gwötpuk toroqeba malin. Mianğoreŋ malinga Juda prowinsnöhök kezapqetok azi kun qetŋi Agabus erök.

¹¹ Neŋğoreŋ eta Polğoreŋ origit memba mianğön nanŋi köna bōröŋi jöhöba kewö jiyök, “Uŋa Töröŋan kewö jiza, ‘Juda jitŋememe yeŋön origit kianğö toŋi mi Jerusalem sitinöŋ kewö jöhöba kian kantrigö galöm† yeŋğö bōröŋine alme.’ ”

¹² Mewö jii möta nini aka urumelen alaurup mianğoreŋ malgeri, yeŋön mohot Polnöŋ Jerusalem anba-puköra uleta qetal wanğiin.

¹³ Qetal wanğiinga kewö melenđa jiyök, “Inini mönö denöwö akze? Sahöta keu jiba mewö mianğön uruni munjuratze. Nöŋön Jerusalem anbi gwaröhöm niŋgimegöra jöjörözal aka miyök qahöpmö, Kembu Jisös qetŋanğöra aka nunğugetka kömumbilenjak, nöŋön mönö mianğöra mewöyök jöjöröba kinjal.”

¹⁴ Mewö jiiga mölöwörim wanğibingö osiba urunini bōnjöŋ köliga kewö jiin, “Mi mönö Kembugö jitsihitŋanğö dop asuhuma.”

¹⁵ Sisaria taonöŋ malin nalö mi teköiga amğöba mözözmğöba enğömosöta anda Jerusalem sitinöŋ öngöin.

¹⁶ Sisaria mianğoreŋök gwarek tosatŋan mewöyök nenğö köinini kaget. Kaget yeŋön kewö jiget, “Inini Saiprus azi qetŋi Nason yanğö mire ahöba malme.” Mewö jiba nenğuanğita yanğö mire anin. Nasonöŋ mutuhök uruŋi melenđa Jisösgö gwarekŋi aka mala korök. Mewö.

Polnöŋ Jerusalem sitinöŋ kanğorök.

¹⁷ Neŋön Jerusalem anğoringa urumelen alaurup yeŋön nenğömemba söŋgaiba jölöŋnini jiget.

¹⁸ Jölöŋnini jigetka ahöba wahöta Polnöŋ nembuk bisop Jeims ekingö möta anin. Aninga urumelen könagesögö jitŋememe yeŋön körek pakpak mianğoreŋ kanğota tatket.

* **21:8:** Apo 6.5; 8.5 * **21:8:** Aposol nup meme boŋ 6 mianğoreŋ azi 7 mi meköm enğigetka nanğönanğö nup aka ewanjelis nup mi mindiriba meget. * **21:10:** Apo 11.28 † **21:11:** Kian kantri yeŋğö bōröŋine alget, mi Rom gawman yeŋğöra jiza.

19 Tatketka Polnön jölönini jiba kösohotnji alök. Anutunön köiput aka nam köl nenjiiga kian kantri yengö sutnjine anda liliköba misin nup meinga ölni ahuyöhi, mianjö kösohotnji mesinöda mohot mohot mi körekñanök jii mötket.

20 Mi jii möta Anutu möpöseigetka azi ipnji kunñan kewö jiyök, “Pol alanini, Juda ambazip tausenji tausenji yenön Jisös möt nariba urunini melenöda töndup körek pakpak toroqeba Mosesgö Köna keu mi törörök wuatangöbingö kapan kölje.

21 Mewö kapan köljemö, göhö buzupki mi kewö lan jiget mötket, ‘Juda ambazip denöda kian kantri yengö sutnjine anda maljei, gönön liliköba i kewö kusum engiba maljan, jimakze, “Inini mönö Mosesgö köna keu andö qeba Anutugören aiwesök mi azi morosepsep silenine kude yandime aka Juda ahakmeme tosatnji mi kude wuatangöme.” ’

22 “Mi jimakzeangöra aka gönön kazani, yenön mi möta mianjörenök öröba kambu ketanji köla tokobeak. Mianjöra nini waimanjat möta mönö denöwö ahinga dop kölbowak?

23 *Mianjöra nenön döлки keu göhöra jibini, gönön mönö mianjö dop akñan. Azi 4:ñan yuai akingö keunini Anutugören jiba jöjöpñan keunön jöhöget.

24 Mi keunön jöhögetmö, monengöra osiba mamböta sutnjine ki malje. Mianjöra gönön mönö i engömembra yembuk köl könjörat ak anguba yengöra aka naluk alnönnga dop köli ölop nörop jupñini mitigetka keunini köhöima. Gönön mewö aka Mosesgö Köna keu tem köla wuatangöba maljani, körek pakpak göhö könañamgi mi törörök eka möt asarime. Mi möt asariba göhöra keu jiget mötkeri, mi ölni kun qahö miwikñagetka omanji aiga kömuma.

25 *Göhören keu kömumapmö, kian kantri yenön Jisös möt nariba urunini melengeri, nenön yengöra keu kewö jöhöba kimbi ohoba alin anök, ‘Sömbup busunji bem lopion yengö naluk buña qeba könañine algetka ösumñinan walönñöhi, mi mönö kude neme. Mewöyök sep me sömbup jölñini qeqeni mianjö busunji mi kude neme. Serowilin kude akñe. Yuai kanjamñambuk 4 mi mönö mosöta andö qegetka dop kölma.’ ”

26 Jitñememe yenön mewö jigetka Polnön azi 4 mi engömembra ahöba wahöta yembuk köl könjörat ak anguget. Ak angugetka jöwöwöl jikenön öngöba azi mohot mohot engöra naluk ala jöwöwöl ohogetka köl könjörat nalönini tekömawi, mianjö nalö buzupñi jii mötket. Mewö.

Jöwöwöl jikegö tohon urunje Pol memba jöhöget.

27 Polnön mi jii mötketmö, silim 7 mi tekömangö aiga Juda tosatnji Eisia prowinsnöhök kageri, yenön Pol jöwöwöl jikenön öngöi eket. Eka ambazip kambu körek urunini kuñgum engiget wahöri Pol qeraköba meget.

28 Qeraköba memba kewö qetket, “Israel ambazip, mönö bauköm nengiget! Azi kianön mönö gölmenji gölmenji liliköba miri dop kusum engiba urunini kewö kuñgum engimakza: Inini pakpak mönö Israel ambazip kambu qetala mem bölim nengime. Nanine Köna keu mosöta jöwöwöl jikenine lan öngöba iwilele aka malme. Mewö kusum engiba malök aka merak Grik azi mi tok wangita jöwöwöl jikenön öngöiga miri kömbukñi kianön mönö töwiba kölköljinñambuk akapuk.”

29 *Mi kewögöra qetket: Efesus azi Trofimus yanön mutuk siti könanön Polbuk ani etkeka kewö mötmöriget: Polnön i wangiri mohotñe jöwöwöl jikenön öngöbahotpuk.

30 Mewö qetketka ambazipnön enjololñ aka ösumñinan lulunöda kaba tokoba göjupmajup aketka qeburun ketanji yöhöi siti körek dop kölök. Mewö aiga

* 21:23: Jan 6.13-21 * 21:25: Apo 15.29 * 21:29: Apo 20.4

Pol qeraköba jöhöba jöwöwöl jikenöhök öröba yaigep eta miangörenök jikegö kiripo nanğunj pakpak mi miangörenök köla jöhöget.

³¹ Pol jöhöba qebingö kapan kölgetka buzupni sehiba Rom yarö kambugö suahö galöm bohonni yangö kezapne keu kewö geiga mörök, “Jerusalem pakpak yenön karim aka bim qeze.”

³² Mewö möta miangörenök yarö azi kambu tosatni suahö galömninambuk enjuangita luhuba yengören geget. Gegetka i engeka Pol qegeri, mi mosötket.

³³ Mosötketka suahö galöm bohonnan sutjine anda jim kutuiga Pol memba tapep (mungamunga) yahötnöj jöhöget. Jöhögetka kewö jiba qesim engiyök, “Azi ki ninja?” aiga “Wania aiga qeze?”

³⁴ Qesim engiyökmö, ambazip kambunöhök keu murutni murutni melenja lanlan qetket. Mewö lanlan qeta göju megerangöra aka könani törörök mötmangö osiyök. Mi osiba miangöra jim kutuiga Pol wangita yarö azi yengö ain kiripo uruje anget.

³⁵⁻³⁶ Wangita angetka ambazip kambu ketani yenön könane enjuatangöba kaba kewö qetket, “Mönö qeget kömuma. Yapmakek!” Mewö qetketka yarö azi yengö ain kiripo nanğunje angoriga könöpuk anda kaba göjupmajup ketani akerangöra aka gwötpuk lömböriyök. Miangöra yarö azi yenön Pol memba anguba anget. Mewö.

Polnöh keunangö likepni könahiba melenja jiyök.

³⁷ Anguba kaba yarö azi yengö sel uruje öngöbingö aketka Polnöh suahö galöm bohonni kewö qesim wangiyök, “Ni göhöra keu kun ölop jimam me qahö?” Qesim wangiga möta könkun aka jiyök, “O, gi Grik keu mötzan me?”

³⁸ Miangöra gi Ijpt azia akzan me qahö? Ijpt azi kunjan uruwale tuarenjon azi timbinambuk 4000 mi enjololon ak enjiiga Rom gawman tuarenjon aka bim karim könahiba aka enjuangiri gölme qararakölkölne anget. Gi galöm azi mia akzan me qahö?”

³⁹ Mewö jiiga Polnöh jiyök, “Ni Juda azia. Ni Silisia prowinsgö taon qetni Tarsus mötzani, mönö miangören ahuba mala koral. Miangöra qesim gihibi: Gi ölop jinönga nöjön ambazip kambu kienjöra keu jibi mötme.”

⁴⁰ Mewö jiiga “Ölop jiman,” jiiga Polnöh döpnöh kinda ambazip engöra börö misiyök. Börö misiiga göju mosöta keu bök kingetka Hibru keunöh keu kewö jii mötket,

22

¹ Polnöh kinda kewö jiyök, “Azi alaurupni, nöjön keugö likepni jimami, mi mönö kezap ala mötket.”

² Hibru keunöh keu jii möta keunini körek bököm teköi kingetka toroqeba jiyök,

³*“Ni Juda azia. Ni Silisia prowinsgö taon qetni Tarsus miangören ahubiga Jerusalem siti kiangören galöm köl ningigetka mala qarial. Mala qariba kota böhi qetni Gamaliel yangö keu bapne tatpiga yanön Juda amböskonurupnini yengören Köna keu aka ahakmeme mi törörök kusum ningiiga miangö mötmötñi möta malal. Merak enön körek pakpak Anutugö keu bapne angota kapan köla yangöra bim qeba maljei, nöjön mönö miangö dop aka malal.

⁴*Mewö mala ambazip Kembugö könani wuatangöba maljei, mi köndenja sesewerowero ak engibiga sihimbölö möta tosatnan kömuget. Nöjön ambazipni ambazipni enjuangita tapepnöh (mungamunga) jöhöba kösö mire al enjial.

* 22:3: Apo 5.34-39 * 22:4: Apo 8.3; 26.9-11

⁵ Jike nup galöm bohonji aka jitnememe pakpak yejön mi ölop mötze aka yeğöreñ anda qesim enjiinga mi ölop nanğöba jibeak. Yejön Juda azi ipñi Damaskus sitinöñ maljei, yeğöra kimbi ohoba niñgiget memba malal. Mianğöreñ ambazip Kembugö könani wuatangöba maljei, nöñön mönö mi mewöñanök ‘Likepñi melen enjimegöra gwaröhöm enjiba Jerusalem ki enjuañgitmam,’ jiba könanöñ anal.”

*Polnöñ nanji urumelenangö könani jiyök.
Apo 9.1-19; 26.12-18*

⁶ “Könanöñ analmö, Damaskus siti dopdowibiga mianğöreñ yuai kun kewö asuhuyök: Silim bibiñe mianğöreñ asakmararañ ketani kun Suepnöhök wölbilik ewö asuha wölañ eta turum niñgiyök.

⁷ Turum niñgiiga tala gölmenöñ eta ahöbiga Suepnöhök keu kun kewö asuhui möral, ‘Sol Sol, gi mönö wuanöngöra sesewerowero qakñe al niñgimakzan?’

⁸ Mi möta melenjal, ‘Kembu, gi danöñ?’ Mewö melenbiga jiyök, ‘Ni Nazaret azi Jisös, sesewerowero qakñe al niñgimakzani, nia mönö mi.’

⁹ Azi nömbuk kaba kingeri, yejön asakmararañ mia eketmö, keu nöngöra jiyöhi, mianğö kourukñi kun qahö mötket.

¹⁰ Mewö jiiga nöñön qesiba jial, ‘Kembu, mönö nöñön denöwö akñam?’ Jibiga jiyök, ‘Gi mönö döki wahöta Damaskus sitinöñ anöñga Anutunöñ wani yuaia akñangö jimawi, mi kunñan jiiga mötman.’

¹¹ Asakmararañ mianjön jeni qeiga janjuñ aka kinbiga azi nömbuk malgeri, yejön böröne memba noañgitketka Damaskus sitinöñ anin.

¹² “Mianğöreñ azi kun qetñi Ananias malök. Yañön Anutu göda qeba Mosesgöreñ Kona keu törörök wuatangöba malök. Mianğöra Juda ambazip Damaskus malgeri, yejön körek gödani ölopñi ak wangiba malget.

¹³ Yañön nöngöreñ kaba kösutne kinda nöngöra kewö jiyök, ‘Sol alani, jegi mönö kunbuk tohoyök.’ Mewö jiiga aua nalö mianğöreñök jeni tohoiga uba ehal.

¹⁴ Ekiga Ananiasnöñ jiyök, ‘Göñön ahakmeme diñdiñi solanñangö Toña eknöñga keu jitñan jii könömñi mötnöñ. Nanine amböskonini yeğöreñ Anutu yañön gi möwölöhöm gihiiga yangö jitsihitñi möt kutuman.

¹⁵ Gi wani yuai eka mötzani, mönö mi nanğöba jiba yangö jitñe memenji aka gölmenji gölmenji ambazip jeñine dangunu ewö kinda malman.

¹⁶ Mewögöra gi wuanöngöra mambötzan? Mönö wahöta yangö qetñi qeta köuluköba jinöñga o melun mem gihiinga siñgisöndoki sanğonñiga solanima.’ Ananiasnöñ mewö jiyök.”

Misin nup kian kantri yembuk memangöra noholök.

¹⁷ “Damaskus siti mosöta Jerusalem sitinöñ lilingöba jöwöwöl jikenöñ köuluköbiga Kembugö alburupñan (añsumbemñan) nuñgui kinda imut kun ehal.

¹⁸ Imut mianğöreñ Jisös ekiga nöngöreñ kaba kewö jiba jii möral, ‘Gi kantri kianğöreñ nöngö könani aka Buña keuni mi kude jiba malman. Mi nanğöba jinöñga nesampurek aka andö qeme. Mianğöra Jerusalem siti ki mönö ösumok mosöta anman.’

¹⁹ “Mewö jiiga jial, ‘Kembu, yejön könanjamni mötze. Nöñön mutuk liliköba ambazip gi möt narim gihizei, mi köuluk miriñi miriñi mianğöreñ öngöba miwikñaim enjiba jöhöba ihilek wahinambukñöñ tauköm enjiba tosatñi kösö mire al enjiba malal.

20 *Göhören nupbauk azi Stiwenön könagi nanğöba jiiga qeget sepñi mokoi eri nöñön nalö miangören mewöyök kösutñine kinda imbi köla malukuñini galöm memba kinbiga qeget kömuyök.’

21 Mewö jibiga Kembunön nöngöra jiyök, ‘Nöñön melaim gihizalawa gi mönö köröwen kian kantri ambazip yengören anman.’ Mewö.”

Romgö yarö azi yeñön Pol galöm kölget.

22 Polnön keu likepñi jiyöhi, mi ambazip kambu yeñön kezap ala mötketmö, (Kembunön kian kantri ambazip yengören anmamgö jiiga jiyöhi,) keu mi möta miangörenök köhöikñanök silata jiget, “Yapmakek! Azi mewöñi mi qeget kömuma. Mi gölmenön nembuk malmawangö dop qahö.”

23 Mewö jiba qeta opo kereñ qeköba gila (könañinan börömböröm tiba) sömsöm urata könakemba lañlañ gilget.

24 Mewö aketka Rom enğö suahö galöm bohonñan jim kutuiga yarö azi yeñön Pol wangita anda yarö azi yengö ain kiripo uruñe alget. Kiripo uruñe algetka Juda yeñön i wanigöra aka göju memba qetzei, miangö könañi mötmangöra kewö jim kutuyök, “Inini mönö Pol memba ihilek wahiñambukñöñ qeba qesim wangigetka könañi aukñe jii mötpin.”

25 Mewö jim kutuyökmö, Pol memba jöhöba ihilek wahiñambukñöñ qebingö aketka Rom suahö galöm kunñan kösutñe kini Polnön kewö jiyök, “Rom mindimindiri gawman yeñön sel jöhöm niñgigetka böröñine maljal. Nöñön miangö (jimkutukutu) paspot memba maljal. Miangöra inini nöngö keuni qahö möta kewöta lañ jim teköba öne ihilek wahiñambukñöñ nuñgumei, mi mönö Rom jimkutukutu toñi yengö jeñine dop kölma me qahö?”

26 Polnön mewö jiiga suahö galömnöñ möta miangörenök suahö galöm bohonñi yangören anda buzup wangiba kewö jiyök, “Azi miangön mönö Rom gawmangö (jimkutukutu) paspot memba malja. Miangöra gi mönö denöwö akñan?”

27 Mewö jiiga suahö galöm bohonñan Polgören anda qesiba jiyök, “Gi ölña Rom gawmangö (jimkutukutu) paspot memba maljan me qahö? Mi jinöñ mötpi.” Jiiga Polnön meleñnök, “Ölña, nöñön mi memba maljal.”

28 Mewö meleñniga jiyök, “Ni monen ketañi gila Rom mindimindiri gawmangö (jimkutukutu) paspot bohonñi membi niñgigetka maljal.” Jiiga Polnön jiyök, “Mi ölöpmö, nöngö iwinan Rom gawmangören paspot memba maliga nöñön yangö nahöñni ahuba miangörenök qet mi memba maljal.”

29 Mewö jiiga azi qesim wangibingö akeri, yeñön miangörenök mosöta lilingöba anget. Polnön “Ni Rom gawmangö paspot memba maljal,” jiiga suahö galöm bohonñan mi möta Rom azia gwaröhöm wangiyöhangöra aka awöwöliba sömbuñi mörök.* Mewö.

Polnön jike kaunsöl kambu yengö jeñine kinök.

30 Miri gianjiiga suahö galöm bohonñan wahöta Juda yeñön wuanöñgöra Pol keunöñ al wangiba jigeri, miangö könañi törörök mötmangöra möta jike nup galöm bohonñi aka jike kaunsöl kambu pakpak yeñön tokomegöra jim kutum enğiyök. Mewö tokogetka jiiga Polgö tapepñi (muñgamuñga) pösatketka wangita eta yengö jemesoholñine ali kinök. Mewö.

23

1 Polnön kinda jike kaunsöl kambu mi uba engeka kewö jiyök, “Azi alaurupni, nöñön ahakmemeni pakpak mi Anutugö jemesoholñe aka memba

* 22:20: Apo 7.58 * 22:29: Kun Rom gawmangö paspot memba malöhi, mi kösönöñ gwaröhöm wangibepukö songo ahöyök. Kunñan songo mi walöñnök ewö, i mönö keunöñ al wangizema. Miangöra sömbuñi mörök.

malbiga yañon eka 'Dop kölja,' jiiga urunañgö kezapnan möta ölöwaka kota mala merak ki kinjal."

² Polnön mewö jiyökmö, jike nup galöm bohonji qetnji Ananias yañon kösutnje kingeri, i jim kutum enjiiga nuñgulumnje qekötahöget.

³ *Qekötahögetka Polnön jii mörök, "Anutunön mönö gi qekötahöm gihima. Göñon miri sel tuatñangö dop akzan. Silenji mundanön ohogetka tuatnji akzappmö, urunji sewön memba injanji akza. Göñon Mosesgö Köna keu memba mianön kewöt ningiba keuni jim tekömamgöra tatzanmö, töndup nangak Mosesgö Köna keu miyök qeba jim kutum enjinönga nuñguze. Mi qahö dop kölja."

⁴ Polnön mewö jiiga kösutnje kingeri, yeñon jiget, "Gi Anutugören jike nup galöm bohonji mepaqepaik aka gamu qem wañgizan me?"

⁵ *Mewö jigetka jiyök, "O alaurupni, yañon jike nup galöm bohonji akzawi, mi qahö möta jizal. Buña Kimbigö keu kun kewö ahöza, 'Gi mönö könagesö kambugahö azi kembunji kude qesuahöman.' "

⁶ *Mewö jiyökmö, jike kaunsöl kambu yeñgörenök tosatñan Sadyusi (Jike nupkö kapañkölköl) pati qekötahögetka tosatñan Farisi (Köna keugö kapañkölköl) pati azia malget. Polnön mi möta miangöra jike kaunsöl kambu yeñgö jeñine keu kewö qerök, "Azi alaurupni, nöñon Farisi azia akzal. Iwinan mewöyök Farisi pati azia. Kömukömuñi yeñon guliba wahötmei, nöñon mewö asuhumapkö al mamböta jörömqöröm aka maljal. Mewö maljalangöra aka keu jakeñe al ningigetka kewöt ningiba jize."

⁷ Mewö jiiga miangörenök Farisi aka Sadyusi pati miengö sutñine anjururuk ahui jike kaunsöl kambu yeñon jula kambu yahöt aket.

⁸ *Sadyusi (Jike nupkö kapañkölköl) yeñon kewö jizema, "Ambazip kömukömuñi yeñon kude guliba wahötme. Suep garata qahö malje. Öme aka uña mi qahö malje." Mewö jigetmö, Farisi (Köna keugö kapañkölköl) pati yeñon keu karöbut miangören qekötahöba miangö dop möt nariba kinjema.

⁹ Kambu yahöt mewö aka qetketka göju ketanji ahuiga Köna keugö böhi tosatñan Farisi kambu yeñgö sutñineyök wahöta könöpñambuk terengöba kewö jiget, "Nini azi kiangö bölönjamñi kun qahö miwikñajizin. Suep garata me uña kunñan keu kutum wasöta yañgö uruñe ali jibawak, mi mönö denöwö dop köl enjibawak?"

¹⁰ Mewö jigetka anjururuk mianön kunbuk könöwiba qariyök. Qariiga awöranjöba Pol likeplikep örögetka anda kaiga mesin taköget. Mewö tandök ahök. Mewö aiga suahö galöm bohonñan miangö kengetñi möta yarö kambu kun jim kutum enjiiga geba Pol sutñineyök öröba wañgita yarö azi yeñgö ain kiripo uruñe alget.

¹¹ Algetmö, sungem miangören gaun ahöiga Kembunön Polgö qöhöröñe kinda kewö jiyök, "Mönö ewebibigabuk aka saitñigit malman. Nöngö könöñamni Jerusalem kiangören nañgöba jiba malnöñi, miangö dop mönö Rom sitinön mewöyök anda mi nañgöba jim asariba malman." Mewö.

Pol qebingö anjónañ meget.

¹² Kembunön mewö jiyökmö, miri gianjiiga miangören Juda azi tosatñan ölöñ tokoba Pol kömumapkö anjónañ meget. Yeñon areñ mi alget aka mi jöjöpñ keunön jöhöm köhöiba kewö jiget, "Nini Pol kömumapköra mamböta nalö sutñe kiangören nene siñi malbin. Siñi mala qein kömuiga miangö andöñe ölöñ nene me o kun kunbuk nembin."

* **23:3:** Mat 23.27-28 * **23:5:** Eks 22.28 * **23:6:** Apo 26.5; Fil 3.5 * **23:8:** Mat 22.23; Mak 12.18; Luk 20.27

¹³ Azi 40 aka jaŋgö mi oŋgitkeri, yeŋön mindiriba jöjöpaj keu mi jöhöm köhöiba jiget.

¹⁴ Mi jibagun jitnememe aka jike nup galöm yeŋgöreŋ anda kewö jiget, “Nini Pol kömumapköra mamböta nalö sutŋe kiangöreŋ nene ŋiŋgi malbin. Polnön qahö kömuma ewö, ambazipnön mönö ölna qesuahöm neŋgigetka dop kölma. Miangöra nini mönö mindiriba jöjöpaj keu kewö jöhöm köhöiba maljin: Pol qein kömuiga miangö andöŋe ölop nene me o kun kunbuk nembra malbin.

¹⁵ Miangöra aka inini mönö döлки jike kaunsöl kambu yembuk mohotŋe mindiriba suahö galöm bohonnaŋgöreŋ anda keu kewö ala qesime, ‘Nini Polgöreŋ keu könaŋi kunbuk qesiinga jii ölna mötpingö mötzin.’ Mewö tandök aiga qesigetka ölop Pol waŋgiriga eŋgöreŋ etma. Etpawakmö, könanön kaba eŋgöreŋ kaŋgotmamgö akŋawi, miangöreŋ mönö i qein kömumapkö jöjöröba malbin.”

¹⁶ Mewö jigetmö, qein kömumapkö aŋgönaŋ algeraŋgö buzupŋi mi Pol behötŋaŋgö kezapŋe gei mörök. Mi möta yarö azi yeŋgö ain kiripo uruŋe anda Pol taröhaŋgöreŋ öngöba jii mörök.

¹⁷ Jii möta suahö galöm kun qeri kaiga kewö jiyök, “Azi gwabö kianaŋon keu kun memba kazawaŋgöra göŋön i ölop waŋgita suahö galöm bohonnaŋgöreŋ anöŋga keu mi jii mötma.”

¹⁸ Mewö jiiga i memba waŋgita suahö galöm bohonnaŋgöreŋ anohotka jiyök, “Kösö azi Polnön noholi yaŋgöreŋ anbiga azi gwabö ki waŋgita göhöreŋ kamapköra qesim niŋgiza. Yaŋön göhöra keu kun memba kaza.”

¹⁹ Mewö jiba aniga galöm bohonnaŋ böröŋe memba waŋgita göraŋe anda qesim waŋgiyök, “Gi wani keuya memba kazaŋ?”

²⁰ Qesim waŋgiiga jiyök, “Juda jitnememe yeŋön keu kun qesim gihibingöra jöhöba göhöreŋ kaba kewö jime: Nini Polgö keu könaŋi törörök qahö möt kömuzin. Miangöra gi ölop Pol uran waŋgitnönnga jike kaunsöl kambu yeŋgöreŋ eriga kunbuk qesim waŋginönnga jii könaŋamŋi ölni mötpin. Yeŋön mewö asuhumapköra mötze.

²¹ Mewö kaba jimemö, göŋön keu miangö imbi ölop kude kölman. Juda könaŋesö yeŋgö sutŋineyök azi 40 aka jaŋgö mi oŋgitkeri, yeŋön mindiriba Polgöra kewö jiba mi jöjöpaj keunön jöhöm köhöiget, ‘Nini Pol kömumapköra mamböta nalö sutŋe kiangöreŋ nene ŋiŋgi malbin. ŋiŋgi mala qein kömuiga miangö andöŋe ölop nene me o kun kunbuk nembin.’ Mewö jiba göŋön imbi kölmangöra mamböta jöjöröba mönöze.”

²² Mewö jiiga azi gwabö mi melaiba kewö jii mörök, “Buzup ki jinön mötzali, mi kun kude jinön mötma.” Mewö.

Pol waŋgiketka Sisaria taonön anök.

²³ Suahö galöm bohonnaŋ mi möta suahö galömyahötŋi etkoholi kayohotka kewö jii mörohot, “Iniri mönö timbi azi 200, hos yarö azi 70 aka liŋgip yarö azi 200 mi jim kutum eŋgiyohotka merak suŋgemgö 9 kilok miangöreŋ Sisaria anmegöra jöjöröme.

²⁴ Mewöyök hos tosati meköba möhangöm eŋgiba Pol kungö qakŋe ala köyan kölgetka suŋgem kiangöreŋök premiö Feliksgöreŋ anma.”

²⁵ Mewö jii mörohotka premiögöra kimbi kun kewö ohoyök,

²⁶ “O Öngöŋgöŋamni sorok premiö Feliks! Klodius Lisias, nöŋön jölönŋi jizal.

²⁷ “Juda yeŋön azi ki memba jöhöba qein kömumapköra aket. Mewö aketmö, Rom mindimindiri gawmangö (jimkutukutu) paspot memba maljawi, nöŋön mi möta miangöreŋök yarö kambu yembuk kaŋgota sel jöhöm waŋgiba meköba bohonnaŋi jöhöyal.

- 28 Wani keugöra keu jakeje aljei, nöñön miangö könañi mötmamgö möta wangita Juda yeñgö jike kaunsöl kambu yeñgö jeñine al wangial.
- 29 Al wangibiga keu jakeje ala nanñini Köna keugö kösawörañ keuñi keuñi miangöra anjururuk aka tuarenjoñ aka jim wangigetka miwikñaijal. Mi miwikñaijalmo, yuai bölöñi kömumapkö dop me kösö mire alin tatmawangö dop mi qahö ahök. Yeñön keu mewöña kun qahö jiget möral.
- 30 Mi qahö möralmo, kunöñ yangö buzup keuñi kewö indeli möral: Tosatñan ‘Azi mi qein kömuma,’ jiba anöñañ alget ahöza. Buzup keu mi möta dölkiangöreñök melaibiga göhöreñ kaza. Keu jakeje al wangibingö mötzei, nöñön i mewöyök jim kutum engibiga göhö jemesoholge kañgota keuñini pakpak aukñe jim miwikñaigetka mötman.”
- 31 Kimbi mewö ohoiga yarö azi jim kutum engigeri, yeñön keu mi wuatangöba Pol memba wangita söñaupnöñ miri qetñi Antipatris miangöreñ anget.
- 32 Anda miri gianñiga yarö azi hosñinambuk yeñön Pol wangita köna toroqeba angetmö, timbi azi yeñön nanñinak lilingöba yarö azi yeñgö ain kiripo uruñe kaget.
- 33 Yarö azi hosñinambuk yeñön Sisaria taonöñ angota kimbi mi premiö wangiba Pol mewöyök yangö jeñe alget.
- 34 Algetka kimbi oyoñda “Pol mi wani prowinsgöra?” jiba qesiyök. Qesiiga “Silisia prowins azia,” mewö jiget mörök.
- 35 Mewö jiget möta jiyök, “Keu jakeje al gihibingö mötzei, yeñön mewöyök kañgotketka miangöreñ ölop qesim gihimam.” Mewö jiba jim kutuiga Pol wangita kiñ Herodkö jakömbuak mirigö kiripo uruñe ala jegalöm mem wangiget. Mewö.

24

Pol keunöñ algetka premiö Filiksgö jeñe kinök.

- 1 Wehön nup memenji 5 teköiga jike nup galöm bohonñi qetñi Ananaias yañön jitñememe tosatñi aka loya (Köna keugö mötmöt azi) qetñi Tertulus yembuk aitoñgöba Sisaria taonöñ geba premiö Filiksgö jeñe öñgöba Pol keu jakeje albingö keuñi jiget mörök.
- 2 Mi möta Pol köl öroi kañgori loya Tertulusnöñ könahiba Polgö silene keu ala premiögö jemesoholñe keu kewö jiyök, “O Filiks, göñön galöm köl neñgiba malnöñi, nini nalö miangöreñ luai ketañi möta gunböñjönjön malin. Göñön ölopñanök köyan köla jim kutum neñginöñga malmal tatatnini likeplikep möhamgögetka kantri kianñön uteköba wahöri ölöwakzin.
- 3 O ketañamnini Filiks, nini mi miri dop ölopñanök möt kutuba göhöra söñgaiba kilik-kalukñi kun qahö möta saiwap jim gihizin.
- 4 Saiwap jim gihizinmö, nöñön keu köröññi jibi ölan göhöbapuköra kewö qesim gihizal: Nini keu memba kainga kötoñanök jimami, mi mönö neñgöra ak gihiiiga kezap ala mötman.
- 5 “Nini azi kiangö könañi kewö eka miwikñainin: Yañön kegwek-kahasililiñ azi keñgöt kotkotñambuk akza. Yañön gölmeñi gölmeñi liliköba Juda ambazip uruñini esiba kuñgum engiiga karimñi karimñi miri dop asuhugetka göjupmajup qeta alakze. Tosatñan tuaköpek aka Nazaret azi kungö qetñe pati aljei, yañön mönö yeñgö ketañamñina akza.
- 6 Yañön jöwöwöl jike mi mewöyök kapan köla mem töwiba memba et almangö ahök. Miangöra nini i memba jöhöin. Nini keuñi kewöta nanine Köna keu wuatangöba jim teköbingö mörin.

7 (Mi mörinmö, suahö galöm bohonji Lisias yanön yarö azi yembuk kaba kukösum ketanji mianön könöpuk böröneyök meköba wangetket.*

8 Wangeta keu silene ala jim wangetzei, i göhö jemesoholge kangotmegöra jim kutum nenjiyök.) Göñön nangak qesim wangetinönga könanji indela jima. Mi jiiga keu memba kazini, miangö ölnji pakpak ölop aukne asuhuiga mötman.”

9 Mewö jiiga Juda ambazip yanön mewöyök “Keu pakpak mi ölna,” jiba imbi köla mi nangöba toroqeba silene ala jim wanget. Mewö.

Polnöh keu likepni melenji Filiksnöh mörök.

10 Pol jim wangetka premiönöh keu jimapköra böröjöpän kunjuiga kewö melenja jiyök, “Göñön (yara) yambu gwötpuk ambazip kambu kiangö jimtekötekö tonji aka malnöh mötzal. Miangöra nöñön keunangö likepni mi göhö jege awösamkakak jimam.

11 Nöñön uruwale Anutu waikni memba möpöseimangöra Jerusalem sitinöh öngöyal. Mi wehön 12 miyök teköiga merak ki kinjal. Nangak qesim engibanak ewö, mi ölop nangöba jime.

12 Nöñön jöwöwöl jikenöh me köuluk miri kungen öngöba azi me ambi kunbuk goranora (noragora) keu jiba jitnakölik akiga mewö qahö miwiknaim ningiget. Siti urune köna me sombem kunöh ambazip urunini kunjubi ölököba liliköm ningigeri, mewö qahö neket.

13 “Mewö qahö neka döлки keu silene ala jim ningizei, yanön miangö ölnji kondel gihibingö osize. Keu omanji jize.

14 Mi osizemö, keu kun mi ölna jim miwiknaim gihimam: Yanön Nazaret pati qetnji qetzei, nöñön mönö miangö köna wuatangöba mala nanine amböskonurup yengörenj bem Anutu mi waikni memba möpöseimakzal aka Mosesgörenj Köna keu aka kezapqetok yengörenj Buzup Kimbi miangörenj keu ohoget ahözawi, mi pakpak möt narim köhöizal.

15 Anutunöh ambazip diñdñi aka gonjonji mi körek pakpak mem gulim engii kömupnöhök wahötmei, Juda azi kienön miangöra mambötze. Nöñön yembuk toroqeba öröröh kinda mewö asuhumapköra jörömqröm aka mamböta maljal.

16 Mewö mala Anutu aka ambazip jeñine diñdñi kinbiga Anutunöh keuni nangöba jiiga urunangö kezapñan mörakzal. Jönömnan qahö unduza. Mönö sarakni aka malmangöra nalö dop kapan köla köhöiba malakzal.

17*“Nöñön kungen malbiga (yara) yambu tosatnji teköi lilingöba miri tosatnji yengörenjök kalem memba uruwale kayal. Mewö kaba ‘Mi nani könagesöurup wanapni yengöra mendenj engimam,’ jiba Anutugö jöwöwöl ohoba naluk al wangetmangöra Jerusalem öngöyal.

18 Miangörenj öngöba köl könjörat ak anguba solanji mala jöwöwöl jikenöh öngöyal. Yuai mi ohoba Anutu al wangetbiga miwiknaim ningiget. Miwiknaim ningigeri, miangörenj ambazip tosatñan qahö kaba liliköba ölököm ningiba göju meget.

19 Juda ambazip tosatñan Eisia prowinsnöhök kaba jikenöh öngöba nekeri, yanön mönö döлки göhö jege kiangörenj kangota kinda keu kun ahöm engibawak, mi aukne silene ala jim ningigetka dop kölbawak.

20 “Me jike kaunsöl kambu yengö jeñine kinda keu jiali, mi wani Köna keu ongeta pinjit akiga keu jakene alalgö keuni miwiknaim? Azi ki tatzei, yanön mönö mi jigetka dop köлма.

* 24:7: Keu sel urune ahözawi, mi mötmöt ambazip yanön kewöta Luknöh mi könakönahije ohoyök aka tosatñan mi qahö ohoyök, mewö jigetka uruyahötñambuk akza. * 24:17: Apo 21.17-28

21 *Nöñön yengö sutñine kinda keu mohok-kun jiba töhöreñ qetpiga lömböriyök. Köpösihit mewö kun ahal me qahö? Mi denöwö kewötket ahöza? Keu kewö qeta jial, 'Kömukömuñi yeñön guliba wahötmei, nöñön mewö möt narizalangöra aka keu jakeñe al niñgigetka merak keuni kewöta jim teköm niñgibingö akze.' ” Mewö.

Polgö keuñi qahö jim teköba kösö mire alget.

22 Polnöñ mewö jiiga premiö Filiksnöñ Jisösgö könañi wuatangöba maljei, miangö könañi ölop möt soroköba Polgö keuñi kembang kutuba kewö jiyök, “Suahö galöm bohonñi Lisiasnöñ kangoriga nalö miangöreñ Polgö keuñi jim tekömam.”

23 Mewö jiba suahö galöm jim kutuiga Pol qahö jöhöba öne jegalöm meiga kösö mire tarök. Tinitosolomurupñan Pol köyan köla yuai osiyöhi, mi memba wangimegöra qahö qetal engiyök.

Polnöñ keuñi jiiga Filiks aka Drusila mörohot.

24 Wehön tosatñi teköiga Filiksnöñ anömñi qetñi Drusila, Juda ambi mi wangita kayohotka Polgöra keu ali kaiga keuñangöra kezap ali Kraist Jisös möt narim wangibingö könañi jim asariiga mörök.

25 Mi mörökmö, Anutugö keu tosatñi toroqeba eraum mötketka lömböriyök. Polnöñ Anutugö jeñe solanibingö könañi jim asariba nanine ahakmemenini galöm köl angubingöra jiyök aka Anutunöñ nalö kun ali miangöreñ kewöt neñgiba keunini jim tekömawi, keu karöbut mianön uruñi kuñguyök. Polnöñ keu mewöñi jiiga töwöratiba bökö qesin da jiyök, “Yapmakek! Muat mosötnöñ. Dölki ölop mosöta anöñga nalö kun mötppi dop kölmawi, miangöreñ ölop kunbuk köl öröm gihibi kaman.”

26 Mewö jiba töndup toroqeba Pol nanñi töwaya moneñ wangimapköra mötmöriyök. Mewö al mamböta jörömqöröm aka sömañi gwötpuk köl öröm wangii kaiga keukeu jiba tarohot.

27 Polnöñ kösö mire tari (yara) yambu yahöt teköyök. Mi teköiga azi qetñi Porsius Festus yanön Filiksgö undumña premiö akñangö ahök. Mewö aiga Filiksnöñ Juda ambazipnöñ nek sorimegöra möta Pol qahö pösari kösö mire toroqeba tarök. Mewö.

25

Polnöñ premiö Festusgö jeñe keu likepñi jiyök.

1 Festusnöñ premiö aka prowins uruñe angota tariga wehön karöbut teköiga Sisaria taon mosöta Jerusalem sitinöñ öngöyök.

2 Öngöiga jike nup galöm bohonñi aka Juda jitñememe yeñön jemesoholñe kangota Pol keu jakeñe albingö jiba aröñda kinget.

3 Aröñda kinda kewö jiba uletket, “O premiö, göñön ölop neñön möringa dop kölmakköra jim tekönöñga keu algetka Pol wangita Jerusalem sitinöñ ki kame.” Yeñön mutuk keu kewö jöhöba jiget, “Polnöñ könanöñ kaiga miangöreñ mönö qein kömuma.” Mewö jiba jöjöröba mönögerangöra kaba uletket.

4 Mewö uletketmö, Festusnöñ kewö melen engiyök, “Pol mi Sisaria taongö kösö mire tari galöm kölje. Ni nanak nalö kude köriiga miangöreñ lilingöba anmangö mötzal.”

5 Mewö jiba toroqeyök, “Miangöra azi mianön bölöñi kun akawak ewö, ölop engö jitñememurup tosatñan nömbuk Sisaria geba miangöreñ keuñini silene ala jim wangigetka mötmam.”

* 24:21: Apo 23.6

⁶ Mewö jiba wehön 8 me 10 miangö dop Jerusalem sitinöŋ yembuk mali teköiga lilinöba Sisaria taonöŋ geyök. Geba ahöba wahöta miangörenök keu jimtekötekögö dum tatatŋe tata jim kutuiga Pol waŋgita kagetka jene kaŋgota kinök.

⁷ Polnöŋ kaŋgota kiniga Juda jitŋememe yeŋön Jerusalem sitinöhök kageri, yeŋön liliköm waŋgiba kinda kazik qakŋe keu bölöŋi gwötpuk silenŋe ala jiget. Mi jigetmö, keuŋinaŋgö ölni mi kondelbingö osiget.

⁸ Kazik keu öne jiba kingetmö, Polnöŋ mi qeapköba kewö jiyök, “Nöŋön yuai bölöŋi kun qahö ahal. Juda neŋgöreŋ Köna keu qahö qetalal. Jöwöwöl jike qahö mem töwial aka Rom sisa kiŋgöreŋ keugöra tuarenjon qahö ahal.”

⁹ Mewö jiiga Festusnöŋ Juda yeŋön nanŋaŋgö mötket öngömapkö möta Pol kewö qesim waŋgiyök, “Silenöŋ alal keu ki jizei, gi ölop miangö likepŋi mi Jerusalem öngöba miangöreŋ nöŋgö jemesoholne kinda jiman me qahö?”

¹⁰ Qesim waŋgiyökmö, Polnöŋ jiyök, “Rom sisa kiŋnöŋ jim kutuiga keu jake ki kuŋgugera ki kinbiga kewöt niŋgiba keuni jim tekönöŋga dop kölma. Ni Juda ambazip yeŋgöra bölöŋi kun qahö ahal. Mia nangak ölop möt yaközan. Mönö Wuanöŋgöra kunbuk yeŋgöreŋ anbilenaŋk?

¹¹ Bölöŋi kun qahö ahalmö, Köna keu kun qösököba yuai kun ak böliba miangöra kömupkö buŋaya akilenaŋk ewö, ‘Nöŋön kömumbilenaŋbuk,’ jiba qahö ölöŋ köla anmam. Mi qahöpmö, yeŋön kazik keu öne töhöntöhön jiba keuŋinaŋgö könaŋi kondelbingö osize ewö, keu omanaŋgöra aka kunŋan nöminba yeŋgö böröŋine almapkö osima. Rom sisa kiŋnöŋ mönö keuni mindinöba jim teköi diŋgima. Miangöra nöŋön mönö yaŋgö jene anmamgö köhöiba qesizal.”

¹² Mewö jiiga Festusnöŋ jembonurupŋi yembuk qambaŋ keu jaruba kewöta kewö melen waŋgiyök, “Gi sisa kiŋgöreŋ anmamgö möta qesizani, miangöra mönö ölop Rom anda yaŋgö jene kinman.” Mewö.

Polnöŋ kiŋ Agripagö jene kinök.

¹³ Wehön tosatŋi teköiga kiŋ Agripa aka nenŋi Bernaisi yetköŋ Festus eka gödaŋiri kondelbitköra Sisaria taonöŋ kayohot.

¹⁴ Kaba miangöreŋ wehön gwötpuk malohotka Festusnöŋ Polgöreŋ keu mi kiŋbuk eraum möta kewö jiyök, “Filiksnöŋ azi kun qahö pösari kösö mire kiangöreŋ tata malja.

¹⁵ Nöŋön Jerusalem anbiga Juda yeŋgö jike nup galöm bohonŋini aka jitŋememurupŋinan nöŋgöreŋ kaŋgota kewö qesim niŋgiget, ‘Nini azi miangö keu memba kainga göŋön mönö ölop yaŋgö könaŋi kewöta keuŋi jim teköman.’

¹⁶ “Mewö qesim niŋgigetmö, nöŋön yeŋgöra kewö jibiga mötket, ‘Rom gawman neŋgöreŋ köna mi kewö: Kungö silenŋe keu bölöŋi ala jizei, nini ambazip kun yaŋgö keuŋi mi laŋ kude jim tekömakzin. Mutuk öröba keu jakenŋe alin kazikurupŋan kagetka likeplikep öröröŋ aröŋda kingetka keu silenŋe ala jim waŋgigetka likepŋi ölop jima. Keu likepŋi jiiga mi kewöta ölni ahuiga miangö dop ölop keuŋi jim tekömakzin.’

¹⁷ Yeŋön ki kaba tokogetka nöŋön nalö qahö köriiga ahöba wahöta miangöreŋök jimtekötekögö dum tatatŋe tata jim kutubiga azi mi waŋgita kagetka nöŋgö jene kaŋgorök.

¹⁸ “Kaŋgorökmö, keu memba kageri, yeŋön liliköm waŋgiba aröŋda kinda keu silenŋe ala jim waŋgiget. Mewö aketka yuai bölöŋi kötökŋi kun akawak, mewö jimegöra mamböralmö, keu mewöŋi kun qahö jiget möral.

¹⁹ Mi qahö jiget möralmö, salupŋe azi mi qetala nanŋini mötnariŋinaŋgö keu kemaŋi tosatŋi aka azi kun qetŋi Jisös yaŋgöra aŋgururuk aket. ‘Jisösnöŋ kömuyök,’ jigetmö, Polnöŋ ‘Guliba malja,’ jiba kapaŋ köla köhöiyök.

20 Mewö jiba kazik algetka nöñön ‘Keu mewöñi mi denöwö kewötpilenak?’ jiba köna jaruba uruyahöt möral. Mi möta kinda kewö qesim wanğial, ‘Silenöñ alal keu jizei, gi ölop mianğö likepñi mi Jerusalem öngöba mianğöreñ jibanak me qahö?’

21 Qesim wanğialmö, Polnöñ Öngöñgöñamninañgö jeñe anmamgö kapan köla kewö qesiyök, ‘Mönö jinöñga galöm köl ningigetka sisa kinğöreñ anbiga keuni mindiñgöiga diñgima.’ Mewö qesiiga wahip azi jim kutum engibiga galöm kölgetka tatza. Bian melaim wanğibiga sisa kinğö jemesoholñe anma.”

22 Festusnöñ mewö jiiga Agripanöñ jii mörök, “Nia kun azi mianön keuñi jii mötmangö sihimñi mötzal.” Jiiga melenök, “Urangun ölop keuñi mötman.”

23 Mewö jiiga ahöba wahötketka kantrigö jembon, suahö galöm ketani aka jitñememe öngöñgöñi yeñön kaba Agripa aka Bernaisi yetköra jura sorom jölñire uta sösöñgai liñet köla köl öröm etkigetka keugö jake miri öngöñgöñi mianğö uruñe angotket. Festusnöñ jim kutuiga Pol wanğitketka mianğöreñ kanğorök.

24 Polnöñ kanğoriga Festusnöñ wahöta kinda kewö jiyök, “Kin Agripa aka azi ketani pakpak nembuk ki tatzei, inini mönö azi ki eket. Juda ambazip kambu pakpak yeñön yanğöra aka uruni kuñguget. Sisaria taon kianğöreñ aka Jerusalem siti mianğöreñ ölna keunöñ kuñgum ningiba qet gigilahöba kewö jiba malget, ‘Azi kianön gölmenöñ malmawanğö dop qahö. Mönö yapmakek!’

25 “Mewö qeta malgetmö, nöñön kewötpiga yuai kun kömupkö buña akñawanğö dop mi qahö ahök. Nöñön könañi mewö miwikñaiba ehalmö, nanñak Rom Öngöñgöñamninañgö jeñe ani keuñi mindiñgöiga diñgimapköra kapan köla qesiyök. Mianğöra keu jöhöba melaibiga Rom anma.

26 Rom sitinöñ anmapmö, yanğöreñ keu mi denöwö ohoba Rom azi kembunanğöra albi anawak? Yanğöra keu lan jizemö, keu könañambuk kun mi törörök qahö möt asarizal. Mianğöra jibi wanğita kaba kin Agripa göhö jege aka inini tosati kinğö andöñe ki tatzei, engö jemesoholñine algetka kinja. Inini ölop böröjan memba keuñi kewötketka ölni asuhui mönö mi möta ölop kimbinöñ ohobilenak.

27 Azi kun kösönöñ jöhöba keu jakeñe alalgö keuñi denöwö jizei, mi aukñe jibingö osiba töndup öne melaibinbuk. Silik mi nöñgö mötmötnöñ kezapjupjup tandök ewö akza.” Mewö.

26

Polnöñ keuñanğö likepñi kin Agripagö jeñe jiyök.

1 Mewö tatketka kin Agripanöñ Polgöra jiyök, “Gi ölop nangahö keu likepñi jinöñga mötpi.” Mewö jiiga Polnöñ kinda börö kutum wanğiba nanñi keuñi anğön köla kewö könahiba jiyök,

2 “O kin Agripa! Juda jitñememe yeñön keu silene ala jim ningizei, nöñön keu pakpak mianğö likepñi mi merak ölop göhö jege aukñe jimamgö simbawon mötzal.

3 Göñön Juda neñgöreñ ahakmeme aka anğururuk keunini pakpak mi törörök möt yaközan. Mianğöra nöñön ölna simbawon mötzal. Mewö aiga qesim gihizal: Keu jimami, mi ölop möta mökösoñda kezap alman.

4 “Nöñön Juda ambazip kambu uruñe ahuba könakönahinñeyök könahiba nani kantri ki aka sitinini Jerusalem mianğöreñ mala koral. Mianğöra Juda ambazip pakpak yeñön malmalni gwaböneyök denöwö kota malali, mi ölop möt kutuze.

⁵ *Yenön kōnaŋamni nalö köröpñi möt kutuze. Sihimñini ahöi mi ölop kewö naŋgöba jibeak: Nanine jike nup uruŋe Farisi pati neñön asa yengören jike mötmöt mi törörök kötökñi wuatangöba maljin. Nöñön mutuk yengö kambu patinöŋ aŋgota Köna keu kapan köla wuatangöba malal.

⁶ Anutunöŋ amböskonurupnini yengöra jöhöjöhö keu alöhi, nöñön miangö ölni ahumapköra al mamböta jörömqöröm aka maljal. Miangöra aka merak keu jakeŋe al niŋgigetka kinjal.

⁷ “Nanine Israel ambazip kambu 12 neñön körek pakpak jöhöjöhö keu miangö ölni asuhumapköra mambörakzin. Mi mamböta jörömqöröm aka qösösök (qörörök) suŋgem asak Anutu waikñi memba möpöseimakzin. O Öngöŋgöŋamni, nöñön jörömqöröm mewö ahakzalaŋgöra Juda jitŋememe yenön keu bölöŋi bölöŋi silene ala jim niŋgimakze.

⁸ Anutunöŋ ambazip kömukömuñi mem gulim engii wahötmei, iñini mi mönö denöwögöra aka qahö möt narize?

⁹ *“Nanak mewöyök kewö mötmöriba malal, ‘Ni Jisös Nazaret azigö qet-buŋaŋi saŋgolbi qahöwakŋapköra bim gwötpuk qemamaŋgö dop akzal.’ Mewö mötmöriba kazik aka malal.

¹⁰ Kazik aka Jerusalem miangören ölna bim qeba malal. Jike nup galöm bohonñi yenön nam köl niŋgiget jim kutubiga Anutugö ambazip sarakñi mi gwötpuk engömembra kösö mire al engiget aka tosatñi kömumegö keu jigetka nöñön mewöyök keu mi kötöngöba imbi köla (wout ala) malal.

¹¹ Nalöŋi nalöŋi liliköba köuluk miri dop böröjaŋ mem engibiga uruñini melenŋeri, mienön asuhuget. Asuhugetka Jisös qaŋ köla ilit waŋgimegöra kuŋguba töhöreŋ öröm ureim engial. Mewö ak engibiga ihileknöŋ könöpuk tauköba engugetka sihimbölö kahasililiŋ möta malget. Urunan könöp jem sölöŋgöiga sesewerowero ak engimangöra köröwen kötökñi kian kantrigö sitiŋi sitiŋi miangören anda malal.” Mewö.

Polnöŋ uruñi melenhöhaŋgö kösohotñi jiyök.

Apo 9.1-19; 22.6-16

¹² “Kaisilik mewö aka malbiga nalö kunöŋ jike nup galöm bohonñi yenön nömbuk urumohot aka nam köl niŋgigetka Damaskus sitinöŋ anmamgöra kōnaŋöŋ anal.

¹³ O Öngöŋgöŋamni, nöñön kōnaŋöŋ anbiga silim bibiŋe miangören Suepnöhök asakmararaŋ kun wölaŋ erök. Eta wölbilik ewö asuhaba wehön jeŋi onŋita asariiga ehal. Asak mianön mönö ni aka azi nömbuk anini, nini turum nenŋiyök.

¹⁴ Turum nenŋiiga körek tala gölmenöŋ eta kölin. Eta köla ahöinga nöngöra keu kun kaiga Hibru keunöŋ kewö jii möral, ‘Sol, Sol, gi wuanöngöra sesewerowero ak niŋgizan? Gi mönö bulmakau aziŋi ewö akanbuk. Toŋan gölme mözözamgömapköra bulmakau aziŋi kinonöŋ jöhöi ösöŋ öröiga dop köljapmö, laŋ öröba könöpuk yaköriba öröm ureiiga kerösuap jitŋan uiga si-himbölö mörakza. Gi mönö miangö dop laŋ luhuba nangi könisemgi öne töhön kutubanbuk.’

¹⁵ “Mi möta qesial, ‘O Kambu, gi daŋön?’ Qesibiga jiyök, ‘Ni Jisös sesewerowero qakŋe al niŋgimakzani, mönö mia akzal.

¹⁶ Mi akzalmö, ölop wahöta kinöŋ. Ni aka yuai ekzani aka kōnaŋgep toroqeba asuhaba kondel gihimami, mi mönö naŋgöba jiba dangunu ewö kindä nöngö jitŋememeni aka weleni qeba malman. Gi nup mi memba malman. Nöñön miangöra aka asuhum gihizal.

* 26:5: Apo 23.6; Fil 3.5 * 26:9: Apo 8.3; 22.4-5

17 Nöñön mönö nangi Israel ambazip kambu yeñgö böröñineyök meköm gihimam aka kian kantri ambazip yeñgören melaim gihibiga anmani, yeñön guhubepuköra mewöyök galöm mem gihimam.

18 Nöñön melaim gihibiga anda ambazip jeñini metohonöñga uruñini melenđa söñaupnöñök asakñe kañgotme. Jeñini tohoiga imbiñini melenđa Satangö kukösumnöñök lolohoba Anutugö sel uruñe kame. Mewö kaba möt narim niñgigetka siñgisöndokñini sañgoñda mosötmmam. Mosötpiga Anutunöñ alaurupñi tök kutum enñgiiga sarakñi akzei, mönö yeñgö sutñine angota dum tatatñini memba oyaenköyaen aka malme.' Jisösnöñ mewö kutum nuasöta jiyök."

Polnöñ urugö nupñangö kösohotñi jiyök.

19 "O kiñ Agripa, Jisösnöñ mewö jiiga nöñön Suepnöhök jemelen imut eka könañi möta mi köyatiba malmangö mötpiga osiyök. Mianğöra nöñön imut mianğö keuñi mi tem köla nup memba malal.

20 *Mi tem köla liliköba Buña keu kewö jim sehiba malal: Inñini mönö uruñini melenđa Anutugören liliñgöba kaba uru melenđerangö ölni mi ahak-memeñinan kondela malme. Buña keu mi mutuk Damaskus aka Jerusalem siti yahöt mianğören maljei, yeñgöra jim asariba malal. Mianğö andöñe Juda kantri pakpak yeñgöra jial aka kian kantri yeñgöra jiba uruñini kuñguba malal.

21 Könañi mianğöra aka Juda ambazip tosatñan jöwöwöl jikenöñ öñgöba mianğören qeraköba nömmimba kapan köla köhömuñi nuñgubingö aket.

22 "Mewö aketmö, uruni melenñalangeröñök mala kotpiga Anutunöñ bauköm niñgiba maliga nalö kewöñe toroqeba ölop maljal. Baukbauk mianğöra aka ki kinda öñgöñgöñi aka eretñi enğö jeñine keuni ki jizal. Moses aka kezapqetok ambazip yeñön yuai asuhumapkö jigeri, nöñön mönö yeñgö keuñini miyök törörök wuatangeröba keu kewö nangöba jizal:

23 *Anutunöñ areñ ali Amötqeqe Tonji Kraist yanön sihimbölä möta kömumba azi mutukñi kömupnöñök wahötma. Wahöta Anutu asakñangö könañi mi Juda kambu neñgöra aka kian kantri yeñgöra indela jim tuarim enñgiba malmangö jiyök."

24 Polnöñ keuñangö likepñi mewö jiiga premiö Festusnöñ terenğöba keu kembane kutuba jiyök, "Pol, gi kahapmahap akzan. Papiya miriñi miriñi mianğören öñgönöñga mötmötkan sehiba nöropsohop mem gihii maljan."

25 Mewö jiyökmö, Polnöñ melenñök, "O kembu sorokni Festus, nöñön nöropsohop qahö akzal. Keu jizali, mi mötkutukutu keu ölna akza.

26 Kiñ Agripanöñ keu kianğö könañi möt soroköza, mewö mötzal. Yuai pakpak mi tölapñe wangöm kunöñ qahö asuhuyök. Mianğöra keu buzupñi pakpak mi mönö kiñgö kezapñe gei möt teközawi, mewö möt köhöizal. Mianğöra nöñön keuni ki ölop awösamkakak qakñe kinda jibiga mötzan.

27 O kiñ Agripa, Juda azi gi kezapqetok yeñgören Buzup Kimbigö keuñi möt narizan me qahö? Mi möt narizan, mewö mötzal."

28 Polnöñ mewö jiiga Agripanöñ melenđa jiyök, "O Pol, göñön nalö töröptökñi kianğören uruni kuñgunöñga nöñön uruni melenđa Kraistkö alañi akilenakgö mötzan me? Mewö mötmörizan me?"

29 Mewö jiiga Polnöñ melenñök, "O kiñ, keu köröpñi me kötoñi jibilenak, mi muatmö, göñönök qahöpmö, dölki keuni kezap ala mötzei, körek enön mewöyök Kraistkö alaurupñi akñegöra urusihimnan möta kewö köuluközal:

* 26:20: Apo 9.20, 28-29 * 26:23: Ais 42.6; 49.6; 1 Kor 15.20

O Anutu, urunini melenj enginönga nöñön ki maljali, mönö miangö dop akñe. Tapep (muñgamuñga) miyök al engimapköra qahö köuluközal.”

³⁰ Mewö jüiga kinñöñ wahöriga premiö aka Bernaisi yetkөн mewöyök wahöröhot aka yembuk tatkeri, yeñön körek wahötket.

³¹ Wahöta mosöta angetka azi ipñan nanñinök eraum möta kewö jiget, “Azi kianön bölöñi kun qahö aiga wuanöñgöra mönö gwaröhöm wangiget? Yanñön kömupkö buña akñawangö dop qahö akza, mi mötzin.”

³² Mewö jiba eraum möta Agripanöñ Festusgöra jiyök, “Sisa kinñöñ anbiga keuni mindiñgöi diñgimapköra qahö kapan köla qesiba jibawak ewö, mönö ölop pösaringa gebawak.” Mewö.

27

Pol wangenöñ algetka könahiba Rom anök.

¹ Azi ipñi yeñön nenñgöra keu kewö jöhöget: Nini wangenöñ öñgöinga luhutnöñ nanñgöi Itali kantrinöñ anbin. Keu mewö jöhögetka Pol aka kösö miri azi tosatñi mi suahö galöm kun qetñi Julius yangö böröñe al engiget. Julius yanñön yarö kambu bahöñi kun qetñi “Rom sisa kinñö yarö kambu” qetkeri, miangöñ yanñön yarö azi 100 yeñgö galömñina malök.

² Miri kun qetñi Adramitium miangöñök wange kun kaba Eisia prowinsgö köwet jitñi mötöteiba wange döpnji mohot mohot miangöñ anmapkö aka jöjöröyöhi, miangöñ öñgöin. Öñgöinga opo seri öröba möröñgögetka luhutnöñ nanñgöi köwetnöñ anin. Masedonia prowinsgö siti qetñi Tesalonaika miangöñök azi kun qetñi Aristarkus yanñön sunğurumnini aiga mohotñe anin.

³ Anda ahöm wahöta miangöñ Saidon mire anğorin. Anğoringa Juliusnöñ Pol ala ak wangiba jim teköiga wange mosöta alaurupñi yeñgöñ anda enğehiga wani yuaigöra osiyöhi, mi bauköm wangiget.

⁴ Miangöñök kunbuk köwetnöñ aninga luhutnöñ köna anbin jüini, miangöñ görökenök qeba gilöhanğöra lömböriiga toroqeba gölme jölanñi qetñi Saiprus miangö tölapñe geba qöhöröngöba mötöteiba anin.

⁵ Aninga luhutnöñ nanñgöi köwet kutuba Silisia aka Pamfilia prowins yahöt mi etkonğita Lisia prowinsgö siti qetñi Maira miangöñ anğorin.

⁶ Anğota miangöñ suahö galömninan wange kun miwikñaiyök. Wange miangöñ Ijiptkö siti qetñi Aleksandria miangöñök kaba Itali kantrinöñ anmamğö aka jöjöröyök. Mi miwikñaija jim kutum nenñgö miangöñ öñgöin.

⁷ Öñgöba köwetnöñ aninga luhutnöñ ölop qahö nanñgöi wehön gwötpuk mi ösöñsöñ anda malin. Mewö malin teköiga miangöñ kupuk-kapak aka köwet miangöñ Nidas taon kösutñe anğorin. Kösutñe anğoringa luhut köhöikñanök gila miangöñ göröken toroqeba anbinangö könanñi jöhöyök. Jöhöiga lömböriiga Krit gölme jölanñangö jitñi köröpñi qetñi Salmone mi onğita anda gölme jöhanñangö tölapñe geba qöhöröngöba mötöteiba anin.

⁸ Köwet jitñi dowe mötöteiba osikosibuk anda mala Lasea taon kösutñe miri qetñi “Wange surusuruñi eksihimñambuk, Fair Hafens” qerakzei, miangöñ anğorin.

⁹ Miangöñ anğota nalö köröpñi mösöhöba malin. Mewö malinga singisöndok sanğonsanğongö kendonñi qetñi Yom Kippur* miangö nalöñan teköiga luhutqeçe nalöñan lök kam kungui anğorin. Luhutqeçe nalöñe ambazip köwetnöñ anda “Ayuhubinbuk,” jiba wangenñini jöhözema. Miangöñ Polnöñ galöm meme keu kun kewö jüi mötket,

* 27:9: Yom Kippur sösongai kendon mi Septembe teteköñe me Oktobe könaköñahiñe alakze.

10 “Aziurup, nini köwet qakne toroqeba anbinbuk. Mönö kupuk-kapak qakne anda ayuayuhu miwikñaibinbuk. Wañgenini raidimbomnöñ qei jömgöiga sukinapni geñmororonj öngöñgöñi aiga naninak mewöyök kömumbinbuk. Miri tandökñan mewö ahiga ekzal.”

11 Galöm meme keu mewö jiyökmö, suahö galömninan Polgöreñ keu mi qetala wañge tonji aka stia (möñaqöñai lökuat) galömñi yetkön “Ölöp anbin,” jiyohori, suahö galömninan keunjiri mi möt nariyök.

12 Miri qetñi “Wañge surusuruñi eksihimñambuk” miangö wañge döpnji mi luhutqege nalö tatatkö dop qahö ahök. Miangöra aka azi gwötpukñan anbingö keu kötöngöba kewö jiget, “Ki tatpingö ölan neñgöhöza. Ölöp opo seri öröba möröreñgögetka köwetnöñ anbin. Anda kapañ köla mala köna ahuiga Finiks wañge döpnöñ angotpinak. Miangöreñ angota luhutqege nalö ki ölöp tata malin teköma.” Wañge döpn qetñi Finiks mi Krit gölme jölannji miangö jitñe wehön geñeñ göröken ahöza. Mewö.

Raidimbomnöñ köwet meiga böliyök.

13 Anbingö keu mewö jigetka luhutnöñ ösöñösöñ könahiba Saut görökenök gilök. Giliga “Ölöp anda areñnini wuatangöba Finiks ekin,” jiba mötmöröba kinda wañgegö kösö mendannji musulgetka korök. Koriga wañgenöñ lolohoiga luhutnöñ nanjöi ösöñ neñgüanñiriga Krit gölme jölannangö jitñi mötöteiba dowe anin.

14 Mewö aninmö, nalö kude köriiga luhut ösumñi köhöikñi qetñi mura (yoware, Not Istkö raidimbom (piwi)lililikñi) miangön mönö gölme jölannji miangö qakneyök qeba gila neñguba kayök.

15 Neñguba kaiga wañgenini galöm köl wañgibingö mem bibihigetka luhut qeba kayöhanğöreñ göröken anmamgö osiyök. Osiiga mosötketka luhutnöñök wañge kuñguba memba wañgiriga nanñak öne ani utuköm neñgiiga lan malin.

16 Utuköm neñgiiga mala gölme jölannji moröñi kun qetñi Kauda miangö tölapñe Saut göröken anin. Miangöreñ anda gomba kösönöñ jöhögetka wañge andöñe o kutuba kayöhi, mi aum-möröba köwetnöñök öröinga gwötpuk lömböriiga töndup kapañ köla öröinga korök.

17 Gomba mi öröin koriga wañge ketane alin. Wañgenöñ utuköba jömgöbapuköra möringa kösö memba wañge köpeiba jöhöm köhöiget. Mewö anda mala sak qetñi Sirtis† miangöreñ köwet röndumñi köröpñi qahö ahözawañgöreñ kuñguba qaköbinbuköra keñgötñini mörin. Mewö mörinangöra aka wañgegö opo seri yuainji mi meköba eta ala wañge galömkölköl mosötket. Mi mosötketka luhutnöñ wañge kuñguba neñgömisiiga öne lan anin.

18 Öne lan aninmö, raidimbom miangön mönö könöpñambuk toroqeba gila utuköm neñgiyök. Mewö utuköm neñgiiga miri gianjiiga miangöreñ könahiba wañgegö sukinap tosattji memba köwetnöñ gilget geyök.

19 Wehön karöbut aiga miangöreñ wañgegö öröyuai aködamunñambuk mi nanñinak memba gilgetka köwetnöñ geyök.

20 Mewö memenjaliba anda mala sungem silim gwötpuk miangöreñ wehön me sengelau kun qahö ehin. Raidimbom miangön mewöyök köhöikñanök toroqeba gila ahöyök. Gilayök ahöiga lömböriiga “Mönö qahöwakin!” jiba malmal jöhöjöhögö möta uruninan eri tötbörömnini tali tarin.

21 Raidimbom uruñe nalö köröpñi kaba mala nene kun qahö nein. Miangöra aka Polnöñ sutñine wahöta kinda kewö jiyök, “Aziurup, nöñön Krit gölme jölannji qahö mosöttingö goro jiali, injini nöñgöreñ keu mi wuatangögetka

† 27:17: Sirtis mi Afrika kantri qetñi Libia miangöreñ göröken ahöza. Sirtis miangöreñ köwet dutñe sak kukundu ahöza.

dop kölbawak. Mewö ahinga genmororon aka ayuayuhu kianön mönö qaknine qahö öngöbawak.

²² Goroni mosötkekmö, dölki qamban keu kewö engizal: Engörenök kunjan kun malmalni qahö ayuhuma. Mi qahöpmö, wanğeyök ayuhuma. Mianğöra injini mönö ewebibiñini möta tatme.

²³ “Nöñön bem qetñi Anutu yangö buñaya aka welenni qeba maljal. Sunğem gaun ahöbiga yanön Suep garatani kun melaiiga nöngö kösutne kaba kinja.

²⁴ Kinda kewö jiza, ‘Pol, gi kenğotki kude mötman! Gi ölop Rom sisa kinğö jemesoholñe anöñga kewöt gihima. Mötnöñ! Anutunöñ körö ölöwakñi kondel gihiba ambazip pakpak göbuk wanğenöñ mohotñe maljei, yeñgö malmalni mönö göhö böröge ali göbuk kinda kunjan qahö kömuma.’

²⁵ Suep garatanöñ nöngöra keu jizawi, mönö mianğö dop asuhuma. Nöñön Anutu mewö möt narim wanğizal. Mianğöra aziurup, injini mönö eweñini möta tatme.

²⁶ Mewö asuhumapmö, luhutnöñ gila muwutapköm neñgiiga gölme johanñi kungö jitñe anğotpinanğö dop akza.” Mewö.

Sunğem 14 aiga gölme dopdowiget.

²⁷ Wanğeninan Gölme Sutñire Köwetkö (Mediterranean Sea) bahöñi qetñi Adria Köwet mianğoren öne lan aniga sunğem 14 ahök. Mi aiga sunğem bibiñe mianğoren wanğe nup meme azi yeñön “Mönö gölme kun dopdowizin,” jiba uruñinan mewö mötket.

²⁸ Mewö möta kinda kösö kun lömbötñambuk jöhöba gilgetka geba köwet dutñi misiriyök. Misiriiga köwet röndungö qötöñi ahuyöhi, mi 40 mita (120 fit) mianğö dop ahök. Borom kun toroqeba anda tandök mohot miyök aketka qötöñi mianğön 30 mita (90 fit) mianğö dop aiga miwikñaiget.

²⁹ Mi miwikñaiba wanğeninan köt törom kembangan kunğubapuköra kenğotñini mötket. Mewö möta wanğegö kösö mendanñi 4 mi wanğe andöneyök pösata ösöñ memba eta alget aka asarimapkö miri qeba mamböta köuluköba tatket.

³⁰ Mewö tatketmö, wanğegö nup meme azi yeñön kewö möndöba jiget, “Nini mönö wanğe numbunğe göröken wanğegö kösö mendanñi tosatñi gilinga gema.” Mewö möndöba jiba wanğe moröñi gomba kun wanğenöhök meköba mem et algetka köwetnöñ eri wanğe mosöta esapköba tölapñe ölöñ köla anbingö aket.

³¹ Mewö aketmö, Polnöñ suahö galöm aka yarö azi yeñgöra kewö jiyök, “Yeñön wanğenöñ qahö mösölatiba kinme ewö, engö malmal jöhöjöhögö könañi kun qahö ahuma.”

³² Mewö jiiga yarö azi yeñön anda gombagö kösöñi yandigetka nanñök aniga nup meme azi yeñön ölöñ köla anbingö osiget.

³³ Wanğaran suruiga mianğoren Polnöñ körek pakpak nene nemegö qamban keu jim kutum engiba kewö jiyök, “Injini lök nalö köröñi uruyahöt mamböta nene kun qahö yöhösöröba malgetka merak wehön 14:ñi akza.

³⁴ Mianğöra kewö jim kutum engizal: Nini malmal jöhöbingö aum-möröbini, mianğoren ösumnini etpapuköra mönö köhöiba kinda ölöwahinga dop kölma. Mianğöra injini mönö nene neme. Engörenök kunjan kun silenñi qahö qema. Nöröp jupñini moröña kun mi qahö kötökñi sohoma.”

³⁵ Mewö jiba Polnöñ beret memba körek pakpak yeñgö jemesoholñine Anutugö saiwap jiba mindipköba könahiba neyök.

³⁶ Mewö neiga eka körek yeñön awösamñini geiga mewöyök nene memba neget.

³⁷ Nini wanğe uruñe mindiriba janğö 276 mianğö dop malin.

38 Yeñön körek pakpak nene nempa nem timbiren aket. Mewö aka wanğenöñ amqemapkora wit padi toru memba gilgetka köwetnöñ geyök. Mewö.

Wanğenöñ köwet töromnöñ kuñguba qaköba jömgöyök.

39 Miri gianjiiga gölme eka mi qahö möt kutuget. Qahö möt kutugetmö, köwet wanğömñi (bay) kun sakñambuk miwikñaiba eket. Mi eka “Mönö wanğe melenđa esapköba mianğoren anğotpinak,” jiba keu jöhöget.

40 Keu mewö jöhöba kinda wanğegö kösö mendanñanğö kösöñi yandigetka suliga mosötketka köwet dutñe ahöyök. Mi yandiba mianğorenök likepliket stia (möñaqöñai) lökuat yahöt ahöyöhi, mietkö kösöñiri pösatketka lolohoyök. Mi pösata wanğe wösöñanğö opo serini öröba mörörenğögetka luhutnöñ nanğöi wanğe möñaigetka saknöñ göröken anin.

41 Mewö aninmö, wanğenöñ köwet töromnöñ anhapuköra jöhöbingö osiba mosöta gilgetka anda kuñguyök. Mianğoren kuñguba wanğe giliñan töromnöñ qeba qaköba anda kamamğö osiba tarök. Mewö tariga köwet siriñan wanğegö andö likepñi gila kinda ösum köhöikñi mianğön qeba qesiñmesiñök.

42 Mewö ahiga jiget, “Kösö miri azi yeñğorenök kuññan o qeba kutuba ölöñ köla anhapuk.” Mewö jigetka yarö azi yeñön kösö azi nini körek neñğubingö mötket.

43 Mewö jigetmö, suahö galömninan Polgö malmalñi jöhömamğö möta yarö aziurupñan mewö akepuköra anğön köl enğiyök. Anğön köl enğiba kewö jim kutum neñgiyök, “Denike enğön köwet qeba anangö könañi mötzei, inini mönö mutuk luhuba geba köwet qeba anda körökñe öngöme.

44 Yeñön mutuk angetka tosatan andöñine katapa sahötñi qelanjiba meme me wanğegö kitipñi könañi könañi miwikñaiba mianğö qakñe ahöba köwet qeba anme.” Mewö jim kutum neñjiiga tandök mewö aka körekñan malmal-nini jöhöba köwet jitñe anğot teköin. Mewö.

28

Malta gölme jölanñe mamböta malin.

1 Malmalnini jöhöba köwet jitñe kanğota mianğoren gölme jöhanñi qetñi Malta qetketka mörin.

2 Kanğoringa kienöñ könahiba eri miri amöriyökmö, Malta ambazipnöñ ala-ala tandök ölop kötökñi kondel neñgiba könöp ohoba neñğuanğitketka körekñanök könöp kösutñe anda jömöta tarin.

3 Polnöñ könöp omajarek qezaköba börangöba könöpnöñ alök. Mi ali jeiga qatö kunöñ könöp umñan kösuiga kota böröñe jöhöba yöhöyök.

4 Mokoleñnöñ mewö jöhöba böröñe möndöba eta kiniga gölme jölanñanğö toñan eka nanñini eraum möta kewö jiget, “Azi ki köwetnöhök malmalñi jöhöba korökmö, Songoriñnöñ töndup likepñi melenđa malmalñi kutum wanğii kömuma. Mianğöra mönö enğui kömukömu azia akza. Mewö möt köhöizin.”

5 Mewö jigetmö, Polnöñ soramen utuköba kinda giliga könöp uruñe geiga sileñe geñmororoñ kun qahö ahuyök.

6 Mewö jiba ehiba “Sileñi qariba pisihima me wölan kömumba gölmenöñ tala eta kölma,” mewö jiba ek tiba mamböta kinget. Nalö köröpñi mamböta kingetmö, Polgö sileñe yuai bölöñi kun qahö ahuyök. Mewö aiga mötmöñni melenñiga jiget, “O, azi ki mönö bem azia akza.”

7 Malta saknöñ kanğota lan uba kösutñe nene nup gölme körö jajapñi aka bau bulmakau kambuñi kambuñi ahögetka ehin. Mi gölme jöhanñanğö azi kembuñini qetñi Publius yanğö buñaya ahöyök. Gölme toni mianğön köl öröm

nenngii miriņe öngöinga urukalem qakņe köyan köl nenngiiga yambuk köisirik taringa wehön karöbutkö dop anök.

⁸ Taringa Publius iwiņan silekönöp aka irip suaip sepņambuk kawöl (dysentery) mianjön yöhöiga dumnöhök ahöyök. Ahöiga Polnön yangören anda köuluköba böröņi nöröpņe ala mem ölöwahök.

⁹ Mewö asuhuiga mianjörenök kawöl ambazip tosatņi pakpak gölme jöhanņe ahögeri, yeņön mewöyök kaņgotketka Polnön Anutu köuluköiga ölöwaket.

¹⁰ Yeņön kalem könaņi könaņi gwötpuk nenngiba mewö mianjön göda qem nenngiba malget. Könaņep waņgenöņ öngöbingö ahini, nalö mianjören köwet qakņe köna malmalgö yuainangö osiini, mi memba nenngöra waņgenöņ alget. Mewö.

Malta mosöta anda Rom sitinöņ angorin.

¹¹ Köiņ karöbut teköiga waņge kun qetņi “Bem Siwisiwi” miwikņaiget. Waņge mianjögö nundüne siwisiwi bemyahöt qetņiri Kastor aka Poluks mietkö imutņira memba meņölöba alget kinohot. Waņge mianjön Ijipt kantrigö siti qetņi Aleksandria mianjörenök kaiga gölme jöhanņe jöhöba luhutqege nalöņi mi tatket. Mi tatket teköiga öngöinga opo seri öröba mörörenjögögetka luhutnön naņgöi mosöta anin.

¹² Anda mala siti qetņi Sairakyus mianjören angota gölmenöņ eta wehön karöbut tarin.

¹³ Tata waņgenöņ öngöinga opo seri öröba mörörenjögögetka anda Regium sitinöņ angorin. Angota ahöm wahöta luhut Saut görökenök könahiba gilök. Gili anda silimņi yahöt aiga mianjören Rom likepņe Puteoli taongö waņge döpnöņ angorin.

¹⁴ Angota mianjören urumelen alaurup tosatņi miwikņaiğa engehin. Engehinga kewö qesim nenngiget, “Inini ölop nembuk sonda mohot malbeak me qahö?” Qesim nenngigetka “Ölop!” jiba yembuk malin. Malin teköiga enjögömosöta Rom sitinöņ öngöin.

¹⁵ Urumelen alaurupninan Rom siti malgeri, yeņön kainangö keu buzupņi mötket. Mi möta miwikņaim nenngibingöra tosatņan wahöta (köna 43 mail kaba) miri qetņi Apius Forum maket mianjören kaget. Tosatņan (33 mail kaba) miri qetņi Kian miri karöbut, mianjören kaba miwikņaim nenngiba angehin. Angeka Polnön “Anutu saiwap!” jiba möpöseiba uruņi amqeiga ölöwahök. Mewö.

Polnöņ Rom tata Juda ambazip uruņini kuņguyök.

¹⁶ Rom sitinöņ kaņgota mianjören Polnöņ miri kunöņ nanjök malmapkö jim teköm waņgigetka yarö azi kunņan galöm memba yambuk malök.

¹⁷ Mewö jim teköm waņgigetka miri mianjören tari silim karöbut teköiga Juda ambazip ipņi köl öröm enngii kaba tokoget. Tokogetka Polnöņ kewö jii mötket, “Iwi alaurupni, nöņön nanine Juda ambazip kambunini qahö qetala kazik ak enģial me amböskonurupnini yeņjörenök ahakmeme möta maljini, mi qahö ak böliäl. Mewö qahöpmö, töndup Jerusalem sitinöņ qeraköba nönimba jöhöm niņgiba kösö mire al niņgiget tatpiga Rom gawman yeņgö böröņine al niņgiget.

¹⁸ Al niņgigetka böröjaņ memba könaņamnaņgö qesiba kewötketka ölöwahök. Nöņön yuai bölöņi kun qahö aka kömupkö buņaya akilenjakö dop qahö ahal. Yeņön mewö eka pösat niņgibingö mötket.

¹⁹ * “Mewö mötketmö, Juda jitņememe yeņön Judia mianjören keu mi qetala tuarenjön aket. Mewö aketka siksauk aka lömböriiga nöņön köna jaruba kun qahö miwikņaiğa kewö kapan köla qesial, ‘Ni ölop Rom sitinöņ anbiga sisa

* 28:19: Apo 25.11

kiñnõñ keuni mindingöi dingima.' Mewö qesibiga melaim ningigetka ki kayal. Nani Juda kambu yeñõn kazik al ningigetmõ, tõndup yeñgõ silenine keu bölõñi kun ala jim enjgimangõ qahõ mötzal. Mewö qahõ.

²⁰ Anutunõñ azi kun asuhumapkõ jöhõjõhõ keu al neñgiiga Israel neñõn keu miangõ õlñi ahumapkõra mambõta jörõmqörõm ahakzini, nõñõn mõnõ azi sorokñi yanğõra aka gwarõhõm ningigetka tapep (munğamunğa) ki bisizal. Kõnañamni mewõ. Miangõra aka merak enjgeka keukeu eraum mötpingõra kõl örõm enjgibiga ki kaba tokoze."

²¹ Mewõ jiiga jiget, "Judia gölmenõñ gõhõra keu jiba malgetmõ, neñgõra kimbi kun qahõ alget kaiga ehin. Mewõyõk alaurupninan miangõrenjõk ki kageri, yeñgõrenjõk kunñan gõhõ keu buzup me kõsohot bölõñi kun qahõ jii mõrin.

²² Mi kun qahõ jiget mõrinmõ, uruge keu ahõzawi, nini mi õlõp mötpingõ mötzin. Gõhõrenj Nazaret pati kambu miangõ keunji mi gölme dop jigetka ambazipnõñ qetalgetka likeplikkep miangõrenj goranora keu gwõtputk jiba kazik ahakze. Pati kambu miangõ buzupñan mewõ kezapnine gei mötzin."

²³ Mewõ jiba Polnõñ keu kunbuk jimapkõra nalõ kun arengõget. Mi arengõgetka Juda ambazip jesõngõñan nalõ miangõrenj kaba Pol miri malõhanğõrenj tokoget. Tokogetka sõñanõk kõnahiba Anutu bemtohoñangõ kõnañi jim asariba mali miri sõñauyõk. Jisõsgõ kõnañi möt yakõba möt nariba uruyahõt mosõtmeğõra kapan kõla uru kuñgum enjgiba malõk. Mutuk Mosesğõrenj Kõna keu aka kezapqetok ambazip yeñgõrenj Buzup Kimbi oyoñda keu miangõrenjõk kõnahiba Jisõsgõ kõnañi indela miangõn kondela nanğõba jiba malõk.

²⁴ Buña keu mewõ jiba maliga tosatñan uruyahõt mosõta möt narigetmõ, tosatñan mi qahõ möt nariba tõnpin malget.

²⁵ Nanñini urumohot qahõ ak anğuba sutñine mötmõt kambu yahõt aka denbingõ aket. Denbingõ aketka Polnõñ keu kewõyõk jii mötket, "Uña Tõrõñan keu kun kezapqetok azi Aisaiagõ uruñe sañep ali ambõsakonñini jii mötkeri, mi mõnõ enğõra dopñine tõrõrõk jiyõk.

²⁶ *Aisaianõñ keu mi kewõ jii ahõza, 'Gi mõnõ ambazip kambu kienğõrenj anda kewõ jinõñ mötme: Injini mõnõ kezapñini ala keu õlña mötagun kõnañi möt bibihiba tõndup qahõ möt asarime.

Jenjan uba yuai õlña ekagun kõnañi ek bibihiba tõndup qahõ ek kutume.

²⁷ Ambazip kambu kienğõ uruñinan mõnõ kõhõiba gwõzõñda ahõza. Kezapñinan keu möt bibihiba jenini kõmazilikõba malje. Mewõ qahõ akeak ewõ, mõnõ jenjan yuai õlõp ek kutuba kezapñinan keu mõta uruñinan kõnañi möt asariba uruñini melengetka nõñõn i õlõp mem õlõwak enjgibileñak.' "

²⁸ Polnõñ keu mi jim tekõba kewõ jiyõk, "Miangõra injini mõnõ keu kõtñi ki õlõp möt yakõme: Anutunõñ amõtqeqegõ Buña keunji mi mõnõ kian kantri yeñgõrenj ali anma. Yeñgõrenj aniga yeñõn mi õlõp kezap ala mötme."

²⁹ (Polnõñ mewõ jim tekõiga Juda yeñõn nanñinõk kõnõpuk jitnakõlik aka goranora erauget õngõba eriga mosõta anget.) *

³⁰ Polnõñ nanñanğõra miri kun kusuk sõngõrõñi memba miangõ uruñe (yara) yambu yahõt jõmukñanõk ahõm malõk. Miangõrenj mala ambazip denike yeñõn ekingõ kageri, yanğõn mi pakpak õlõp kõl örõm enjgiba malõk.

* **28:26:** Ais 6.9-10 * **28:29:** Mötmõt ambazip yeñõn Jabõ 29:gõ keunji kewõta tosatñan Luknõñ mi kõnakõnahiñe qahõ ohoyõk jizemõ, tosatñan keu miambuk urumohot qahõ akze. Miangõra jabõ 29 mi sel uruñe ahõza.

³¹ Awösamkakak qakɛ kinda Anutu bemtohoŋgö könaŋi jim asariba uru kuŋgum eŋgiba malök. Kambu Jisös Kraist möt waŋgimegöra Anutu amötqeqegö könaŋi kusum eŋgiba malök. Mewö maliga kuŋŋan kun qahö qetal waŋgiiga mala kota malök. Mewö.

Rom kimbi Polnön Rom yengöra kimbi alök. Jim-asa-asari

Jim-asa-asari Rom sitinön kopa malgetka urumelen kambuñi kambuñi yeñön sutñine simbisembel denđa malget. Juda tosatñan uruñini melenđa Juda ahakmemenön aka Köna keunön qekötahöba silenini yandiba sömbup qahö namba malget. Kian kantrigö urumelen kambu yeñön Anutugö kalem möriamñi qekötahöba Anutugö Köna keu bapñe qahö anda söngöröqök aka siñgisöndok amqeba akingö mötket. (6.15) Anutunön Juda könagesö ölni andö enguba salupñine kian ambazip engoholi buñañi akeri, miangöra söngaiba ilit engiget. (11.18-20) Mewö aka Juda urumelen yeñön silikñini walñi mewöyök wuatangögerangöra aka jijiwilit ak engiba malget. Juda kambu yeñön kian kantrigö urumelen alaurupñini qepureim engiba Juda silikñini qahö wuatangögerangöra aka keuñini töhöreñ jim teköba söngöröqök aket. (2.17-20; 14.3)

Mindirim engimangöra Polnön kambu yahöt yengöra goro keu nanñök nanñök engimakza. Juda yengö könañini indeliga (2.21-27) kian kantri yeñön söngaiget. Keu bohonñi kewö jiyök, 'Jisös möt nariinga Anutunön mötnaripnini eka keunini jim teköiga solanibin. Köna murutñi kun qahö ahöza.' (1.17) Kian kantri ambazip söngöröqökñini qekömapköra könañini indela kewö jiyök: "Anutunön nanñini ölöpninangöra aka qahöpmö, nanñi ak-kömukömuñangöra aka inñini möwölöhöm engiyök. (11.30-32) Miangöra mönö kapañ köla Köna keu tem köla malme. (7.12-24) Körekmakörek siñgisöndokö kösö gwarönön mala ayuhubingö akzinmö, (3.23; 5.12) Anutunön nanñi irimsesewölñan etmapköra aka Kraist melaiyök. (5.8-9) Uña Töröñan meköba siñgisöndok aka kömupkö kukösumnöhök pösat neñgima. Miangöra siñgisöndok ahakmeme mosöta (6.11-14) mindiriba jöpaköm anguba kopa yengö sutñine kopa tandök kude malme." Goro mewö enjiiga ösönösön tem köla mindiriba malget. Polnön nalö mutukñi Rom ani nanñöm wanñigetka toroqeba Spein kantrinön anmangö möta mewö ohoyök.

Buk kianğö bahöñi bohonñi 7 mi kewö:

Jim asa-asari keu aka keu bohonñi *1.1-17*

Köreknan siñgisöndokö amötqeqegöra osizin *1.18-3.20*

Anutunön amöt qem neñgimakzawangö könañi *3.21-4.25*

Kraistpuk malmal dölökñangö könañi *5.1-8.39*

Israel yeñön Anutugö mötmöt areñnön malje *9.1-11.36*

Urumelen neñgö silik ahakmemegö keu *12.1-15.13*

Keu teteköñi aka nanñi yaizözkök keuñi *15.14-16.27*

¹ Pol ni Jisös Kraistkö nup meme azia aka Rom urumelen ambazip embuk keu eraum mötpingöra kaba kimbi ohozal. Anutunön noholiga melaimelai azi aposol akzal. Anutunön Ölöwak Buñañi jim sehimangöra möwölöhöm niñgiiga maljal.

² Anutunön oyaenköyaen akingö Ölöwak Buñañi indelmapkö keuñi mi qeljine jöhöba jiiga kezapqetok ambazipnön möta Buña Kimbi töröñi miangöreñ ohogetka ahöza.

³ Ölöwak Buñağö könañi mi nanñi nahönñi Jisös Kraist. Yanñön gölme azi ewö kiñ Deiwidkö gwölönarökurupñi yengöreñök asuhuyök.

⁴ Suep azi ewö Uñañan solanji töröñi ahök. Anutunöñ i mem guliiga kömupnöñök wahöriga kukösumñan aukñe asuhuyök. Anutunöñ mewö mi-anön nanñi Nahönñi akzawañgö keunji mi jim köhöiba kuñgum wañgiyök. Kembuninañgö könañi mewö.

⁵ Kraistnöñ nupkö öñji kewö asuhumapköra mörök: Neñön kian kantriñi kantriñi liliköba Jisösgö qetñi sutñine jim sehiinga möta uruñini melenña möt narim wañgiba keunji tem köla malme. Mianğöra aposol nupñi aka kalem möriamñi mi neñgiiga memba maljin.

⁶ Anutunöñ ambazip Jisös Kraistkö buñaya aka malmegöra engoholöhi, Rom iñini mewöyök yeñgö sutñine malje.

⁷ Uruñini melenña Rom sitinöñ maljei, nöñön körek engöra kimbi ki ohozal. Anutunöñ iñini nanñi ambazip sarakñi malmegöra engohola jöpaköm engimakza. Anutu Iwinini aka Kembu Jisös Kraist yetkön mönö kalem möriam engiyohotka luainöñ malme. Mewö köulukömakzal.

Polnöñ Anutu möpöseiba kewö köuluköyök:

⁸ Gölmeñi gölmeñi pakpak yeñön Rom engö mötnariñinañgö kösohotñi jigetka mörakzal. Mianğöra keuni könahiba Jisös Kraistnöñ nam köñ niñgiiga körek engöra aka Anutuni saiwap jimakzal.

⁹ Nöñön mötmöt sihimni pakpak Anutugö nupnöñ ala welenni qeba Nahönñañgö Ölöwak Buñañi jim asarimakzal. Mianğöreñ sundan iñini mötmörim engimakzali, mi Anutunöñ nañgöba jimakza.

¹⁰ Nalö dop kewö jiba köulukömakzal, “O Anutu, nöñön Rom yeñgöreñ anmamgö möta nalö köröpñi lök mambötzal. Mianğöra mönö sihimgahö dop jinöñga köna asuhuiga nalö kewöñe ölop anmam.” Mewö.

¹¹ Engeka mötnariñinan köhöimapköra möta ölop nup memegö mötmöt kalem kun engimam. Mianğöra nalö mutukña engöreñ kaba engekñañgö awöweñgöba maljal.

¹² Kewö akingö awöweñgömakzal: Nöñön engekiga mutulañgöba ni aka iñini denöwö möt narimakzini, mi eraum möta urunöñ nañgöba körö-ölöwak qem añgubin.

¹³ *O urumelenñ alaurupni, iñini mönö kewö mötmöriba malme: Nöñön kian kantri tosatñi yeñgö sutñine liliköba uruñini kuñgum engibiga melenñeri, mianğö dop engö sutñine mewöyök öñji asuhui ekñañgö mötzal. Mianğöra nalö gwötpuk lök engöreñ kusuk kamamgö areñi ala malalmö, yuai tosatñan mönö nalöñi nalöñi jöhöm niñgiiga osial.

¹⁴ Anutugö jeñe tosa kewö ahöm niñgiza: Ambazip kambu könañi könañi bauköm engimamañgö keuñañ mönö nöñgö qakne ahöza. Mötmöt ambazip aka gukmaulem ambazip miengö welenqeñeñini öröröñ akzal. Mindimindiri keu Grik mötzei aka qandam * mala nanñini keunine irohowaroho jimakzei, mi körek bauköm engimamgö mötzal.

¹⁵ Mewö möta Ölöwak Buña mi Rom siti engöra mewöyök jim asarimamgö amqeba urukönöp ahakzal. Mewö.

Ölöwak Buñañgö kukösumñi kewö:

¹⁶ *Anutugö kukösumñan nini körek mem letot neñgiiga nalö kewöñe Suepkö buñaya akzin. Juda neñön mutuk urunini melenña mi möt nariin aka neñgö andönine kantri tosatñi yeñön mewöyök mi möt nariget. Mianğöra Anutunöñ kukösumñi Ölöwak Buñañöñ ali ahözawañgöra mi algamusum qahö ahakzal.

* **1:13:** Apo 19.21 * **1:14:** Qandam, Siawari imbinöñ qandak, Nei keunöñ bus kanaka, ambazip arökñe nanñinök töñpin mala mötmöt miriñini qahö gukmaulemnöñ malget. * **1:16:** Mak 8.38

17 *Ölöwak Buñanöñ mönö solanñi akingö könanñi indelakza. Buña keu kun kewö ohoget ahóza, “Solanñi akzawi, yañön mönö Anutu möt nariba mewö mianñön köhöiba mal öngöma. Keu mianñö könanñi kewö: Nini Anutu könahiba möt nariinga mötnaripnini eka keunini jim teköiga solaniin aka gölmenöñ malbinanñö dop toroqeba möt narim wanñiba jeñe solanimakin.” Mewö.

Nenñö sinñisöndoköra Anutugö irimñan seholimakza.

18 Ölöp solanibinakmö, ambazip keu ölni ahakmemeñinan közanñöba sik-sauk memakzei, Anutunöñ mi Suepnöñ euyan-göreñök uba ehi qahö dop köliga irimñi seholimakza. Ambazip mewöñi pakpak engeka anñöjörakñini qetala silikñini bölöñanñöra aka kazikñi indeli asuhumakza.

19 Mi kewögöra: Anutugö könanñi möt kutubinanñö dop akzawi, mi mönö nanñak indel enñiiga sutnine aukñeyök ahöiga mörakze.

20 Anutugö malmalñi qahö ehakzinmö, kukösumñi mi Suep gölme mi-wikñaim etkiba mianñöreñök könahiba kondela mala koriga nalö teteköñi qahö asuhumakza. Mianñöra Anutugö börösöwöñi törörök ehinga bem aködamunñambuk akzawanñö könanñan mönö ölöp möt kutubinanñö dop akza. Mianñöra ambazipnöñ yuai kunöñ möndöba nanñine keuninanñö likepñi nanñöba jibingö osimakze.

21 *Anutugö könanñi möt kutuba malgetmö, töndup “Yañön bemnina,” mewö qahö jiba i qahö möpöseigetka qetbuñanñi sutñine qahö ahöyök. Mewö qahö ahöyökmö, keu omanñi lanñan mötmörigetka mötmötñinan löwöriiga mötök aket. Uru mötkutukutunñi qahö mianñön mönö ömuñ köla pandaman meiga jipjap malje. Mianñöra “Anutugö könanñi qahö mötzin,” jiba möndömöndö lanñ aketka qahö dop kölja.

22 “Mötkutukutu ambazip maljin,” jiba silenñini memba öngöba malgetmö, mewö mianñön uruqahö ambazip akze.

23 *Anutu qetbuñanñi asakmaranñambuk nalö teteköñi qahö mal öngömawi, i qahö möpöseiba waikñi qahö memba malgetmö, i mosöta salupñe tandö lopionñ aka imut tosatñi kunñuget. Tandö lopionñ söhögetka kaisongolomñinan azi kömukömuñanñö dop akze. Imut tosatñi megetka nei sömbup aka gölmenöñ bapñinan köla ölölöngömakzei, mienñö dop akze. Yenñön mi sipköba bem ewö möpöseim enñiba malget.

24 Mewö aka malgeranñöra Anutunöñ i andö enñuiga nanñini uruninanñö sihim kömbönanñini lanñ wuatannöba serowilin aka nanñini silenñini gamu qeba mem et al anñuba malje.

25 Anutugö keu ölni mosöta salupñe keu munenñi qekötahöget. Miwimi-wikñai Tonñi ölna qahö göda qeba welennñi qahö qeba malgetmö, yuai mi-wikñaiyöhi me nanñini böröñinan megeri, mianñö sihimñi asuhui möta börösöwö mienñö waikñini memba möpöseim enñiba malget. Mewö malgetmö, nenñön miwimi-wikñai Tonñini mi nalö teteköñi qahö möpöseimakin. Keu mi ölna.

26 Mewö aka malgeranñöra Anutunöñ i andö enñuiga nanñini sihim kömbönanñini gamunñambuk mi lanñ wuatannöba kewö aket: Yenñö ambiurupñinan awanöm köna diñdiñi mosöta nanñinak melenñda amimba malget.

27 Azi yenñön mewöyök ambibuk amimba malmal mosöta gonñiget. Kaisero akitkö sihim kömbönanñini mi azi sutñine öröm anñuba mötketka könöpnambuk aiga nanñinak melenñda amimba anñöjörakñinambuk aka malget. Gonñiba jaubatbat malgeranñö likepñi mi Anutunöñ dopñine melenñ enñiiga qakñine öngöiga böliget.

²⁸ Anutugö kōnaŋi mōt kutubingōra mōtketka eretŋi aiga mosōtketka Anutunōŋ mōnō mewōŋanōk i andō enŋuiga nanŋini mōtmōtŋini goŋgoŋan galōm köl enŋiiga ahakmeme gamuŋambuk aka memba malget.

²⁹ Ahakmeme goŋgoŋi aka silik bōlōŋi kōnaŋi kōnaŋi mianŋōn uruŋini kokolak qeiga kewō ahakze: Yuaigō nepaqepalok membagun membingō kōpōsōngōba isimkakalek ahakze. Tosatŋi yeŋgōreŋ yuaigōra kōrōgisigisi ahakze. Ambazip enŋuget kōmumakze. Anŋururuk aka tosatŋi tilipkōm enŋimakze. Ambazip tosatŋi jiliwitŋ qakŋe bōlōŋi ak enŋibingō mōrakze. Keu ambazip kezapŋine saŋep alget geiga diwoŋdawoŋ anakza.

³⁰ Andōqeŋe keu jimakze. Anutugō yom jimakze. Silik bōlōŋi kōnōpŋambuk tem kōla wuatāŋgōmakze. Jakbak-ōraŋbōraŋ aka silenŋini memba wahōrakze. Silenōŋ alal aka silik bōlōŋi murutŋi murutŋi miwikŋaimakze. Iwinam keuŋini qahō tem kōlakze.

³¹ Mōtmōtŋini qahō tohoiga uruqahō mala keu laŋ jōhōba qahō wuatāŋgōmakze. Ala-ala qahō aka tosatŋi yeŋgōra wōsōmōtmōt qahō ak enŋimakze.

³² Anutunōŋ kōna diŋdiŋi kewō jim kutui ahōza: Ambazip bōlōŋi mewōŋi ahakzei, yeŋōn mōnō kōmup kōhōikŋaŋgō buŋaya akŋeaŋgō dop akze. Yeŋōn jimkutukutu mi mōt asarizemō, tōndup nanŋinak bōlōŋi mi ahakze aka miyōk qahōpmō, tosatŋan mewō aketka “Ölöp!” jiba imbi kōla naŋgōm enŋimakze. Mewō.

2

Anutunōŋ keunini kewōta diŋdiŋanōk jim tekōmakza.

¹ *O alani, gi tosatŋi yeŋgō keuŋini jim tekōmakzan me qahō? Gi tosatŋi yeŋgō keuŋini jim tekōba nangak ahakmeme miyōhōk ahakzan. Mianŋōra alagahō keuŋi kun jim tekōzan ewō, mōnō nangahō keu mewōyōk jim tekōnōŋga mianŋō lömbōtŋan nangi qake öŋgōma. Mianŋōra öŋgōŋgōŋi me eretŋi akzani, mi tōndup mōnō yuai kunōŋ möndōba nangahō keugō likepŋi naŋgōba jimangō osimakzan.

² Ambazip ahakmeme bōlōŋi mewōŋi ahakzei, Anutunōŋ yeŋgō keuŋini keu öŋaŋgō dop kewōta jim tekōmakza, mi mōtzin.

³ Mianŋōra denōwō mōtmōrizan? Gi gölme azia aka tōndup yuai mewōŋi ahakzei, yeŋgō keuŋini jim tekōba nangak ahakmeme miyōhōk aknōŋga dop kōlja me qahō? Anutunōŋ keugi kewōta jim tekōba likepŋi melenŋ gihiiga öŋa göhō qake öŋgōma. Anutugōra jeŋe qahō mōmōlakōba asambōtman.

⁴ Anutunōŋ ala ak neŋgiba bōlōŋamninaŋgō likepŋi zilaŋ qahō melenŋmapmō, mambōta mōta mōkōsōŋmakzawi, keu mianŋōra jijiwilit akzan me? Anutunōŋ uruölöpŋi kondela urugi melenŋ-mangōra örōm gihimakzawi, mianŋōra tōnpin malbanbuk.

⁵ Gi kezapjupjup aka urugi qahō melenŋmani, mewō mianŋōn Anutugō jeŋe qahō mōmōlakōmanmō, irimsesewōlŋan göhō qake sehiba öŋgōma. Kazik nalōŋan kam kuŋguiga keunini diŋdiŋanōk jim tekōma. Likepŋi melenŋ neŋgimawi, nalō mianŋōreŋ irimsesewōlŋi mōnō aukŋe indeliga eka mōtpin.

⁶ *Anutunōŋ mōnō “Ahakmemeninangō dop mohot mohot neŋgōra likepŋi melenŋ neŋgimawi,” mi kewō:

⁷ Anutunōŋ qetbuŋaŋi neŋgimapkōra mambōta akōdamuninambuk akingōra kapaŋ kōla pōndaŋ kindā nup ölöpŋi ölöpŋi memba maljini, neŋgōra malmal kōhōikŋi neŋgima. Mi neŋgiiga nalō tetekōŋi qahō oyaenŋkoyaen mal öŋgōbin.

* 2:1: Mat 7.1; Luk 6.37 * 2:6: Sum 62.12; Qam 24.12

8 Mewö mal öngöbinmö, ambazip nanñinañgörök mötmöriba girinjabak memba Buña keu ölni andö qeba keu bölöni wuatangömakzei, Anutugö irimñan mönö mianğöra seholiiga kazikni ali qakñine öngöma.

9 Kazikni mi mutuk Juda neñgö qakñine öngöiga neñgö andönine kantri tosatni aiaka bölöni ahakzei, körek yeñgö qakñine mewöyök öngöiga sihimbölö kahasililiñ möta malme.

10 Mewö malmemö, Juda aka neñgö andönine kantri tosatñan mewöyök urunini melenđa aiaka ölöpnı ahakzini, Anutugö aködamunñan mönö körek neñgö qakñine öngöiga qetbuña neñgiiga luainöñ malbin.

11 *Anutunöñ ambazip tosatni qahö neñgek soriba tosatni qahö qepureim enjgimakzadmö, dop mohotnöñ kewöt neñgimakza.

12 Mianğö könañi kewö: Kantri tosatni yeñön Anutugöreñ Köna keu qahö oyoñda möta siñgisöndok lañ ahakzei, yeñön mönö körekñanök tönpin mala ayuhume. Juda neñön Anutugöreñ Köna keu oyoñda möta töndup siñgisöndok ahakzini, Anutunöñ mönö keu mianğö dop körek kewöt neñgiba keunini jim teköma.

13 Ambazip Anutugöreñ Köna keu öne mörakzei, yeñön Anutugö jeñe solanñi qahö akze. Qahöp mö, Köna keu tem köla wuatangömakzei, Anutunöñ mönö yeñgö keunini jim teköiga solanize.

14 Kantri tosatñan Anutugöreñ Köna keu qahö memba maljemö, tosatñan töndup lañ nanñini imbi mianğö dop mötmöriba ahakze. Anutugö köna keunı qahö mötzmö, töndup mötmötñinan jim kutum enjgiiga Anutugö köna keugö dop aka mianğö bapñe malje.

15 Mewö maljeangö könañi mi aukñe asuhuba kewö ahöza: Anutunöñ ambazip miwikñaim neñgiba mianğöreñ Köna keuñangö jimkutukutuñi mi körek neñgö urunine ali ahöza. Mianğöra Anutunöñ keunı jiba sañep alakzawi, mi kian kantri yeñön mewöyök mörakze. Mi uruñinañgö kezapñan mötketka keunini jiiga Anutubuk öröröñ mörakze. Anutunöñ urumötmöt enjgiyöhi, mianğön nalö tosatñe keu jakeñe ala kuñgum enjgiiga möt bölimahakze aka nalö tosatñe keunini nañgöba jiiga möt ölöwahakze.

16 Ölöwak Buña jim asarimakzali, mianğö dop nalö ketañe kewö asuhuma: Kraist Jisösnöñ Anutu bauköm wañgiiga ambazip neñgöreñ keu tölapñi tölapñi kewöta jim teköm neñgima. Mewö.

Köna keu mianğön könañamnini denöwö indelja?

17 Gi nangi qetki Juda azia qeta Köna keunöñ amöt qem gihimapkö möt nariba “Anutugö buñaya akzal,” jiba silegi möpöseinöñga dop kölja me qahö?

18 Gi Anutugö jitñangö dop malmalgö keunı möt sölöñgöba maljan. Anutugö Köna keu kusum gihigerangöra aka köna qetpuk sorok wuatangömangö jiba keu pakpak kewöta ölni aka muneñi menderñmakzan.

19 Gi “Ölöp jegömöl ambazip alabaukñini aka enğuañgitmam,” jiba aiwe-liköm añgumakzan. Söñaupnöñ maljei, mi mem asarim enjgimanañgö dop awösamkakak akzan.

20 Mewö aka kewö jimakzan, “Köna keu kusum niñgigetka mötkutukutu lök miwikñaiba keu ölnañgö könañi mötzal.” Mewö jiba amqeba kewö jimakzan, “Ni ölöp ambazip mötmötñini qahö yeñgö böhiñina akñam. Ölöp mönö namande yeñgö qaqañuñina aka kusum enjgimakñam.”

21 Mewö jiba tosatni kusum enjgiba wuanöñgöra nangi qahö kusum añgumakzan? “Yoñgorö kude memañ,” jiba ambazip uruñini kuñgum enjgimakzadmö, nangak yoñgorö meme aknöñga qahö dop kölja.

* 2:11: Dut 10.17

22 “Sero yongorö kude akñan,” mewö jinöñ mötketka nangak kaisero akzan me qahö? Tandö lopion sisit mem engimakzanmö, töndup nangak jöwöwöl jikenöñ öngöba yuaini angön köla kiom qeba memakzan. Mi qahö dop kölja.

23 Anutugören Köna keubuk maljanangöra silegi lañ memba öngömakzanmö, nangak mi walönda mewö mianön Anutugö qetbuñani memba et ala malnönga gamunambuk ahakza.

24 *Miangö keuñi mi Buña Kimbinöñ kewö ohoget ahöza, “Engö silikñinanangöra aka kian kantri könagesö yeñön Anutugö qetñi ilita sutñine mepaqepaik ahakze.”

25 Anutugören Köna keu wuatangöba maljan ewö, Anutugö aiwesökñi silege yandigeri, mianön mönö bauköm gihiiga dop kölja. Mi dop köljamö, köna keu walönda singisöndok ahakzan ewö, mönö aiwesöki qahö memenji mewö tandök aka öne lañ maljan.

26 Tosatñan Anutugö aiwesökñi silenine qahö yandigetka töndup köna keugö jimkutukutuñi wuatangömakze ewö, Anutunöñ aiwesök mi silenine ahözawangö dop ewö engehiga dop kölja.

27 Mewö engehiga yeñgörenök kunñan ölop Köna keugö dop göhö keugi töhöññi kewöta jim teköiga etman. Anutugö aiwesökñi silege yandigetka Köna keugö bohonñi mohot mohot möt angön köla maljanmö, mi walönda singisöndok ahakzanangöra aka etman.

28 Azi kunñan silenöhök Juda azia akza ewö, yañön mönö Juda azi ölni qahö akza. Mewöyök Anutugö aiwesökñi sileneyök yandigetka yañgisen ahakze ewö, mi mönö aiwesök omanji, ölni qahö.

29 *Ölni qahöpmö, azi kun uruñan Juda azia akzawi, yañön mönö Juda azi ölni akza. Mewöñanök Anutunöñ urunini qesönda Uñani Töröñi miangören ali maljawi, mianön mönö aiwesök ölni akza. Köna keugö bohonñi wuatangöba azi silenji yandigetka gölme ambazipnöñ mötketka öngömakzapmö, Anutunöñ aiwesökñi urunine kinjawangöra möri öngöi möpöseim nengimakza. Mewö.

3

Anutunöñ keuñi pöndañ wuatangömakza.

1 Mewö ahöiga Juda ambazip maljini, mianön mönö denöwö bauköm nengibawak? Anutugö aiwesökñi silenine yandigeri, miangö ölnan mönö denöwö ahum nengiza?

2 Ölnan mönö malmal pakpak miangören gwötpuk ahuba ölna bauköm nengimakza. Miangö keuñi mutukñi kewö: Anutunöñ Buña keuñi nenggiiga buñanina aiga maljin.

3 Mewö maljinmö, nengörenök tosatñan Anutu qahö möt narim wangiba malgetka denöwö ak engima? Yañgisen malgerangö likepñi melenja mönö denöwö ak nengima? Urukalemñi jöhöba angön köliga omanji akña me denöwö?

4 *Mi qahöpmahöp! Nini körek pakpak munen ambazip akzinmö, Anutunöñ öln töhöññi akza. Anutugö könanji mi Buña Kimbinöñ kewö ohoget ahöza, “Keu jakene ala qesim gihigetka keugahö likepñi jim asariba miangören diñdiñi aka luhut al engiba kinman. Göhö könanjamgi mewö miwikñaiba nangöba jime.”

5 Neñön ahakmeme gonñonji wuatangöinga Anutunöñ qindiñaim nenggiiga ahakmemenji diñdiñan mewö aukñe asuhuza ewö, neñön keu miangöra mönö

* 2:24: Ais 52.5 * 2:29: Dut 30.6 * 3:4: Sum 51.4

denöwö jibinak? Ni keu mi gölme ambazip mötmötkö dop kewö jizal: Anutunöŋ likepŋi melenŋiga irimsesewölŋan qaknine öngözawi, yaŋgö mötmötŋan mewö goŋgiza me qahö?

⁶ Qahö, mi yapmakek! Anutunöŋ goŋgoŋi akawak ewö, yaŋön gölmeŋi gölmeŋi nengö keunini mönö denöwö kewöta törörök jim teköbawak?

⁷ Nöŋön muneŋ azia akiga Anutunöŋ keuŋi ölnan qindinaim niŋgiiga yaŋgö qetbuŋaŋan mewö aukŋe asuhum tiŋgitza. Mewö aiga nöŋön siŋgisöndok ahali, Anutunöŋ miangö keuŋi mönö denöwögöra jim teköza? Nömosöri nani imbi-imbi malbi dop kölbawak me qahö? Keuŋan mönö qahö löwöriba etma.

⁸ Mönö kewö jiinga dop kölbawak, “Nini ölop bölöŋi toroqeba ahinga Anutunöŋ mi qindinaiga ölopŋaŋgö ölnan asuhuiga keuŋan qetbuŋaŋambuk akŋa.” Tosatŋan nengöra keu sirongen mewö jiba toroqeba kewö jimakze, “Polnöŋ keu mewö jiba miangö dop laŋ ahakza.” Mewö aka jigerangö keuŋi mi Anutunöŋ kewöta dopŋine jim teköm engima, mötzal. Mewö.

Ambazip kunŋan solanŋi qahö akza.

⁹ Keu mewö eraum möta mi denöwö jim teköbinak? Juda neŋön kantri tosatŋi engoŋgita Anutugö jeŋe diŋdiŋi akzin me qahö? Saumbaŋ! Miangö keuŋi lök qeljŋe kewö jim köhöinin: Juda me kantri tosatŋi akinak, nini körekmakörek siŋgisöndok ahinga köpeim neŋgiiga maljin. Miangöra silenini memba öngöbingö osimakzin.

¹⁰* Miangö keuŋi mi Buŋa Kimbinöŋ kewö ohoget ahöza, “Kunŋan kun solanŋi diŋdiŋi qahö kötökŋi akza.

¹¹ Kungö uruŋe mötmöt qahö ahum kutui laŋ malje. Kunŋan kun Anutu miwikŋaimangö qahö kapan kölakza.

¹² Qahöpmö, köreknan mönö köna oŋgita janjuŋ aka malje.

Körekmaköreknan mönö böliba Anutugö jeŋe aŋgöjörakŋinambuk akze. Ölopŋi ahakzawi, mohot-töwa kun mi qahöpmahöp miwikŋaizal.

¹³* Nesilamŋinan isimkakalek ahakze.

Jöl ginaginaŋinan qaksirigö löm ewö aŋaŋiba kiniga kömupkö qösösökŋi ewö miangön ambazip laŋ ayuhum engimakze. Keu bölöŋi mi qatögö jitŋi möröm warabe ewö numbuŋine kokolak qeba ahöiga jitŋinan ambazip laŋ engöhömakze.

¹⁴* Sait keu kömbukŋambuknöŋ mönö numbuŋini kokolak qeiga ambazip laŋ qesuahöm engimakze.

¹⁵* Ambazip laŋ enguba sepŋini mokomegöra könaŋinan kik-kek ösumok anda kamakze.

¹⁶ Könaŋini goŋgii maljeangö aiwesökŋini kewö akza: Denike lilikömakzei, miangöreŋ mönö köndeŋ-möndeŋ aketka ambazip uruŋinan böliba kömbuhi-makza.

¹⁷ Luainöŋ malmalgö könaŋi mi qahö möt kutum yaköze.

¹⁸* Anutu göda qebingö keuŋi mi uruŋine qahö ahöza. Jitŋi oŋgitpinbuköra kenöŋtŋini qahö möta önewat laŋ malje.”

Anutugöreŋ keu mewö ahöza.

¹⁹ Anutunöŋ Köna keu kewögöra neŋgiyök, mi mötzin: Köna keu pakpak miangön gölme dop jöhöm neŋgimakza. Nini keu miangö bapŋe anda tem köla malinga dop kölma. Qahö tem kölbin ewö, Anutunöŋ mönö likepŋi melenŋ neŋgii ayuhubin. Miangöra sömbunini möta möndömöndönini mosöta keu bök mala tem köl waŋgiinga dop kölma. Anutunöŋ ambazip könanini mewö indelöha ahöza.

* **3:10:** Sum 14.1-3; 53.1-3 * **3:13:** Sum 5.9; 140.3 * **3:14:** Sum 10.7 * **3:15:** Ais 59.7-8 * **3:18:** Sum 36.1

20 *Köna keunöŋ jöhöm neŋgimakzapmö, nini lökŋanök mi wuatangöbingö osimakzin. Anutugöreŋ Köna keunöŋ siŋgisöndok qiwikŋaiiga aukŋe eka ölop möt kutubinmö, köna mianŋön Anutugö jeŋe solanŋi akingö osibin. Mewö.

Solanŋi akinanŋö könanŋi mi mötnarip.

21 Naninak osimakzinmö, Anutunöŋ Köna keu wuatangöba solanŋi ak- ingöra mi qahö jiyökmö, köna murutŋi kewö arengöba jii ahöza: Anutunöŋ nanŋak keunini jim teköiga yanŋö jeŋe solanibin. Anutunöŋ keu mi Moses aka kezapqetok ambazip yeŋgöra indeliga nanŋöba jiba Buŋa Kimbinöŋ ohogetka nalö kewöŋe aukŋe asuhuiga mötzin.

22 *Mianŋöra denike denike neŋön Jisös Kraist möt narizini, Anutunöŋ mönö körek neŋgö keunini jim teköiga solanibin. Ambazip kambu murutŋi murutŋi neŋön Anutugö jeŋe öröröŋ akzin.

23 Ambazip körek neŋön siŋgisöndok aka Anutugö asakmararaŋanŋöra os- izin.

24 Mi osizinmö, Anutugö kalem möriamŋan asuhuiga Kraist Jisösnöŋ sohop- nini meyök. Anutunöŋ kalem mianŋöra aka keunini jim teköiga solanibin.

25 Mutuk siŋgisöndok aka malgeri, Anutunöŋ mi möta mökösoŋda likepŋi zilaŋ qahö melenŋ eŋgiyök. Mi qahö melenŋ eŋgiba nanŋi ahakmeme solanŋan aukŋe asuhumapköra möta Kraist Jisös jöwöwöl sömbup ewö aliga qeget kömuiga Anutugö jeŋe köl könjörat neŋgimapkö könaŋa ahök. Sepŋi mokoyöhi, mi möt nariŋga mewö mianŋön siŋgisöndoknini mosöri solanibin.

26 Könanŋi mi nalö kewöŋe aukŋe asuhumapköra möta Jisös mewö ak waŋgiyök. Anutugö ahakmeme solanŋi mi kewö: Nanŋak solanŋi akza aka kunŋan Jisös möt narizawi, mönö yanŋö keuŋi jim teköiga solanimakza.

27 Mewö aiga mönö wanigöra silenini mem öngöbinak? Yuai kungöra aka qahöpmahöp. Köna keu wuatangöba solanŋi akingöra mi osizin. Mewö solanŋi qahö akinmö, Jisös möt nariŋga Anutunöŋ neŋgeka keunini jim teköiga solanimakin.

28 Keu ki jim teköba kötŋi kewö jim köhöizin: Köna keu wu- atangömakzinaŋgöra qahöpmö, Jisös möt narim waŋgizinaŋgöra aka Anutunöŋ keunini jim teköiga solanimakin.

29 Anutunöŋ Juda neŋgö Anutuninanök qahö akza. Mönö kantri tosatŋi yeŋgö Anutuŋina mewöyök akza me qahö? Mönö yeŋgö Anutuŋina mohot akza.

30 *Anutunöŋ mohot akza. Mianŋöra silenini yandiget maljini, neŋön möt narim waŋgiŋga mem solanim neŋgimakza aka silenini qahö yandiget maljei, mi mewöyök möt narim waŋgigeranŋgöra aka mem solanim eŋgimakza.

31 Mötnarimegö keu jiba mianŋön kungum eŋgiba mewö mianŋön Köna keu memba et alinga omaŋi akŋa me qahö? Mi yapmakek qahöpmö, Anutugöreŋ Köna keu mi qahö qeapkömakzinmö, mi mem köhöimakzin. Mewö.

4

Abrahamnöŋ Anutu möt nariba solanŋi ahök.

1 Nini bömön jalönini Abrahamgö könananŋgöra denöwö jibin? Yanŋön Anu- tugö könanŋi denöwö miwikŋaiba yanŋö jeŋe solanŋi ahök?

2 Ölŋa, Anutunöŋ yanŋö keuŋi ahakmemeŋi ölopŋanŋgöra aka jim teköiga solanibawak ewö, yanŋön mianŋöra ölop silenini memba öngöbawakmö, mi Anutugö jeŋe qahö.

* 3:20: Sum 143.2; Gal 2.16 * 3:22: Gal 2.16 * 3:30: Dut 6.4; Gal 3.20

³ *Miangö keunji Buña Kimbinöŋ kewö ohoget ahöza, “Abrahamnöŋ Anutu möt nariiga mötnaripŋi ehi dop köliga keunji jim teköiga solaniyök.” Keu mewö ahöza.

⁴ Keunji mönö kalema jim teköiga solaniyökmö, kunŋan nup meiga galömnŋan töwaŋi kalema qahöpmö, nup memakzawaŋö dop ek kewöta töwaŋi waŋgimakza.

⁵ Gölme galömnöŋ mewö waŋgimakzapmö, Anutunöŋ aŋgöjörak ambazip neŋgö keunini jim teköiga solanimakin. Miangöra kunŋan oyaenköyaen akŋangöra nup qahö memba Anutu öne möt narim waŋgizawi, Anutunöŋ mönö mötnaripŋi mi ehi dop köliga keunji jim teköiga solanima.

⁶ Deiwidnöŋ mewöyök keu miangö könaŋi naŋgöba keu kewö indela jiyök, “Kunŋan oyaenköyaen akŋangöra nup qahö meiga Anutunöŋ mötnaripŋi ehi dop köliga keunji jim teköiga solanizawi, yaŋön mönö simbawoŋ akza.”

⁷ *Mewö jiiga keunji mi kewö ohoget ahöza, “Ambazip Köna keu walöŋgetka Anutunöŋ siŋgisöndokŋini mosöta köl könjörari maljei, yeŋön mönö simbawoŋ akze.

⁸ Kembunöŋ kungö siŋgisöndokŋi saŋgoŋda ehi dop köliga likepŋi qakŋe qahö ali öŋgömawi, yaŋön mönö oyaenköyaen akza.”

Keu mewö ahöza.

⁹ Anutunöŋ oyaenköyaen akingö könaŋi mewö indela Anutugö aiwesökŋinambuk neŋgörok jii ahöza me qahö? Mi qahö. Mi mönö kantri tosatŋi aiwesökŋini qahö yeŋgöra mewöyök ahöza. Neŋön lök kewö jiba ohozin, “Abrahamnöŋ Anutu möt nariiga mötnaripŋi ehi dop köliga keunji jim teköiga solaniyök.”

¹⁰ Mönö wani nalönöŋ ehi dop köliga keunji jim teköiga solaniyök? Anutugö aiwesökŋi silene yandiget malöhi, nalö miangöreŋ qahöpmö, mutuk öne malöhi, Anutunöŋ mönö nalö miangöreŋ mötnaripŋi ehi dop köliga keunji jim teköiga solaniyök.

¹¹ *Mutuk öne mala Anutu möt nariiga keunji jim teköiga solaniyök. Miangö andöŋe dop köljawaŋgö aiwesökŋi mi silene yandimegöra jiiga muŋgem supap ewö ahök. Mewö aiga yaŋgö andöŋe Anutugö aiwesökŋinambuk qahö mala möt narim waŋgiinga mötnaripŋini ehi dop köliga keunini jim teköiga solanibini, Abrahamnöŋ körek neŋgö bömöŋ jalönina ahök.

¹² Bömöŋ jalönini yaŋön öne mala nalö miangöreŋ uruŋi melenŋa Anutu möt nariba malöhi, nini aiwesökŋinambuk yaŋgö dop aka maljin. Anutugö aiwesökŋinambuk mala urunini melenŋa maljini, mönö neŋgö bömöŋina mewöyök ahök. Aiwesök yandim neŋgigetka öne laŋ qahö maljinmö, Abrahamgö köna lasupŋi wuatangöba möt narimakzin. Mewö.

Anutugö jöhöjöhö keu möt nariinga öljambuk akŋa.

¹³ *Anutunöŋ Abraham gölme buña qem waŋgiiga tonji aiga gwölönarökurupŋan yaŋgö andöŋe mewö mal öŋgömegö keunji jiba jöhöyök. Keu mi Köna keu wuatangöyöhaŋgöra aka qahö jiyökmö, Anutunöŋ mötnaripŋi ehi dop köliga keunji jim teköi solanŋi ahöhaŋgöra keu mi jiyök.

¹⁴ *Tosatŋan oyaenköyaen akingöra Köna keunöŋ qekötahöba mewö mianön Anutugöreŋ yuai mi buña qem aŋgubeak ewö, yeŋön mönö möt naribingö keunji qeapkögetka omanji akawak. Mewö Anutugö jöhöjöhö keugöra qahö osiinga keu mianön omanji akapuk.

* 4:3: Jen 15.6; Gal 3.6 * 4:7: Sum 32.1-2 * 4:11: Jen 17.10 * 4:13: Jen 17.4-6; 22.17-18; Gal 3.29
* 4:14: Gal 3.18

15 Anutugörej Köna keu walöninga irimni seholiiga kaziknan qaknine öngömazapmö, Köna keu qahö ahöbawak, mewö singisöndokö keunji qahö jibinak.

16 *Abrahamnöj mewö mindirim nenjiba körek nenjö bömöni akza. Miangöra jöhöjöhö keunji nenjiyöhi, mi Köna keunöj qekötahömakzei, yengörök qahöpmö, Abraham ahök ewö möt narimakzini, nenjörej mewöyök öljambuk aknapköra mörök. Miangöra Anutunöj jöhöjöhö keunji mi kewö arengöba alök: Mi möt nariinga ölj körek nenjöra kalema nenjiiga kalem möriamjan aukne asuhumakza.

17 *Abrahamgö keunji kun mi Buja Kimbinöj kewö ohoget ahöza, “Nöjön gi kungum ghibiga ambazip könagesö gwötpuk yengö iwinina aknan.” Keu miangö dop Abrahamnöj Anutugö jeje iwi ak nenjimakza. Anutunöj kömukömunji mem gulim engimakza. Könagesö malmalini qahö, mi jebuk maljeangö tandök ewö engoholi asuhumakze. Abrahamnöj mönö Anutu mewöni möt narim wangiyök.

18 *Anutunöj mutuk Abrahamgöra kewö jii mörök, “Göhö gwölönarökurupkan ahum sehigetka jangöjini senjelaue ewö aiga malme.” Jöhöjöhö keu mi möta denöwö öljambuk asuhubawak, mi qahö mörökmö, mi töndup jörömöröm aka ambazip könagesö gwötpuk yengö iwinini aknamgö mamböta malök. Jöhöjöhö keu mutuknanjö dop asuhumapköra mönö Anutu möt narim wangiba malök.

19 *Saragö köröjan morö memegö dop qahö aiga nanjak yambuji lök 100:kö dop ahök. Miangöra nanji mötmöriiga lök azi namji silenji waziba sohoholiini ahökmö, töndup Anutugörej keunöj öljambuk aknapköra möt narim wangiba maliga Abrahamgö mötnaripjan qahö sörauba löwöriyök.

20 Qahö löwöriyökmö, keunan öljambuk aknapkö möt nariba miangörej köhöiba kinök. Anutugö jöhöjöhö keugöra urujan an qem kam qem uruyahöt qahö ahökmö, mötnaripjan köhöiiga Anutu möpöseiba maliga Anutugö qet-bujanjan sehiyök.

21 Anutunöj yuai asuhumapkö keunji jiba jöhöba mi ak tekömamgö köhöimakzawi, mi möt köhöim teköba uruyahöt kun qahö aka malök.

22 Mewö aka malöhanjöra Anutunöj Abrahamgö mötnaripni ehi dop köliga keunji jim teköiga solaniyök.

23 Mötnaripni ehi dop köliga keunji jim teköiga solaniyöhi, keu mi Abrahamgörök qahö ohoget ahöza.

24 Abrahamgörök qahöpmö, nenjöra aka mewöyök mi ohoget ahöza. Nini Kembunini Jisös mem guli kömupnöhök wahöröhi, Anutu ia möt narim wangiiinga mötnaripnini ehi dop köliga jim teköm nenjiiga solanibin.

25 *Anutunöj nenjö singisöndok-ninanjöra aka Jisös qahö anjön köli kömuyök aka solanji akingöra aka mem guliiga kömupnöhök wahöta malja. Mewö.

5

Anutugö jeje solaniba söngaiba luainöj maljin.

1 Nejön Anutu möt nariinga keunini jim teköiga solanizin. Miangöra Kembunini Jisös Kraistnöj mönö nam köl nenjiiga Anutubuk luai miwiknaiba maljin.

* 4:16: Gal 3.7 * 4:17: Jen 17.5 * 4:18: Jen 15.5 * 4:19: Jen 17.17 * 4:25: Ais 53.4-5

² Mewöyök Jisös Kraist möt nariinga nam köl nenjiiga kalem möriam buña gem anğubingö könañi miwikñaiba nalö kewöñe kalem möriam uruñe maljin. Anutugö asakmararan uruñe anğotpingö jörömqöröm aka söngaimakzin.

³ Mianğörök qahö söngaimakzinmö, wahöjalin möta mianğöra mewöyök söngaimakzin. Könjilin möta mököşöñda mewö mianñon kapañkölköl miwikñaibin. Mi möta mianğöra söngaimakzin.

⁴ Kapañkölköl miwikñaiba esapesapnön köhöiba kinbin. Esapesap-nön köhöiba kininga jörömqörömninan köhöimakña.

⁵ Anutunön Uña Töröñi al nenjiiga köna asuhuiga urukalemñi mokoiga urunine geiga maljin. Mianğöra jörömqöröm aka oyaenköyaen akingö al mamböta gamumamusum qahö miwikñaibin.

⁶ Mianğö könañi kewö: Nini mutuk lölöwöröñi ösumnini qahö malini, Kraistnön mönö nalö diñdini mianğöreñök kömumba ambazip anğöjörakninambuk nenjö sohopnini meyök.

⁷ Kunön Köna keu törörök wuatangöba diñdini akzawi, ala mewöñangöra kunñan ölop qahö kömumbawak? Mi möriğa osibawakmö, kunön urukalem gwötpuk ambazip ak enğimakzawi, alañi kunñan yangöra aka ölop sileni köleñda kömumangö mötpawak.

⁸ Ambazipnön mewö ahakzinmö, Anutunön uruñan jöpaköm nenğimakzawi, yañon mi kewö kondelök: Yañon Kraist melaiiga eta mutuk anğöjörak ambazip malini, nalö mianğöreñök mönö nenğöra aka kömuyök.

⁹ Kömuiga nalö kewöñe sepñan sañonñda jim teköm nenjiiga solaniba maljin. Töndup mi korembenji ewö aiga ölnan mönö könañep kewö asuhuma: Anutunön siñgisön-dokö urukönöpñi aukñe kondeliga yuai kanjamñambuk gölmenön asuhuma. Mi asuhuiga Anutugö jeñe solanji akzinağöra Jisösnön mönö jeñbereren mianğöreñök meköm nenjiiga oyaenköyaen akin.

¹⁰ Nini mutuk Anutugö kerökurupñi malini, nalö mianğöreñ nanñi Nahönñi melaii kömumba mianñon töwanini ahiga Anutubuk ala-ala ahin. Ahini, mianñon korembenji akzapmö, ölni bohonñan könañep kewö asuhuma: Töwanini ali Anutugö alaurupñi malinga Jisösnön köhöiba maljawangöra mönö amqeba meköm nenjiiga oyaenköyaen akin.

¹¹ Kembunini Jisösnön Anutugö amötqeqe nupñi meiga Anutunön töwanini ali yambuk ala-ala ahini, miyöhök qahöpmö, ölna Anutubuk jöpaköm anğuba kindi köirañ köla söngaimakzin. Mewö.

Adamğöra aka köhömuñi akzinmö, Kraistköra aka gulibin.

¹² *Azi mohotnön siñgisöndok gölmenön kondoriga asuhuyök. Anutunön siñgisöndok mianğö likepñi aliga kömup asuhuyök. Mianğö dop ambazip körek nenñon siñgisöndok aka malinga kömupnön mianğöra ambazip körek pakpak dop köl nenji maljin.

¹³ Mutuk Köna keu qahö asuhuiga nalö mianğöreñ mewöyök siñgisöndok lök aukñe asuhuba ahöyökmö, Köna keu qahö ahöiga siñgisöndokö keuñi mi qahö jim kewöta lañ malget.

¹⁴ Adamğö nalöneyök könahiba lañ mala kotketka Mosesğö nalöñe Köna keu asuhuyök. Ambazip nalö sutñe mianğöreñ siñgisöndok aketmö, Adamnön köna walöñnöhi, mianğö dowök qahö walöñda malgetmö, kömupnön töndup i mewöyök galöm köl enji malget.

Adam, azi mutukñi yañon mönö azi kun kamawangö söpsöpña ahök.

¹⁵ Söpsöpña ahökmö, könañiri mi örörön qahö akzahot. Adamnön Köna keu walöñda eri siñgisöndok asuhum sehiba ambazip gwötpuk dop köl enjiiga kömumba malget. Mi kömupkö könañi akzapmö, oyaenköyaen akingö könañi

* 5:12: Jen 3.6

mi kun. Mi kewö: Azi mohot Jisös Kraist yañön nam köl neñgiba kalem möriamñi indeliga Anutugö kalemñan aukñe asuhuba ambazip gwötpuk dop köla qesalöpköm neñgiyök.

¹⁶ Toroqeba kewö jimam: Köna yahöt mi öröröñ qahö akzahot. Azi mohotnöñ siñgisöndok aiga Anutunöñ keuñi jim teköiga siñgisöndok ambazip körek neñön könöp siagö buñaya akzin. Mi gölme azigö könañi akzapmö, Suep azigö könañi mi kun. Mi kewö: Nalö gwötpuk Anutugö Köna keu walöñninga kalemñi kondela jim teköm neñgiiga solanimakzin.

¹⁷ Mi dumge jimam: Azi mohotnöñ Köna keu walöñda kömup kondoriga ambazip körek makörek kömumba maljin. Adamgö siñgisöndoköra aka kömupnöñ körek dop köla galöm köl neñgii lañ malin. Mi köna etqegeñi akzapmö, Anutu ösum-mumuñangö könañi mi kewö: Ambazip nini solanñi akingö kalemñi mi kelenmaleleñ buña qem anguba kalem möriamñangö uruñe maljini, neñön mönö oyaenköyaen akin. Azi mohot Jisös Kraist yañön nañgöba inahöm neñgiiga suahö*

¹⁸ Dumge kunbuk jimam: Azi mohotnöñ Anutugö Köna keu walöñda eri Anutunöñ keuñi jim teköiga ambazip körek neñön könöp siagö buñaya ahin. Mewöñanök azi kunñan solanñi akingö kondoriga urunini melenninga Anutunöñ ölop ambazip pakpak neñgö keunini jim teköiga solaniba köhöiba mal öngöbin.

¹⁹ Dumge kunbuk kewö jimam: Azi mohotnöñ qegetal aka siñgisöndok bohon köli sehiiga ambazip sehisehiñi neñön melennda siñgisöndok ambazip ahin. Mewöñanök azi kunñan Anutugö jitñi tem köla siñgisöndokninañgö töwañi aliga köna asuhuiga Anutunöñ ambazip sehisehiñi neñgö keunini jim teköiga solanibin.

²⁰ Mutuk öne lañ mala kotketmö, Mosesgö nalöñe Anutunöñ Köna keu ambazip siñgisöndokñini möt kutumegöra toroqem enñiyök. Mi toroqem enñiyökmö, mi mötketka siñgisöndokñinan sehiba aukñe asuhuyök. Mewö aiga Anutunöñ mönö kalem möriamñi mewöyök mem sehiiga siñgisöndok oñgita asuhuyök.

²¹ Siñgisöndokö kukösumñi mi ketañi. Miangöra siñgisöndok ahinga mianjön galöm köl neñgiiga köhömuñi mala kömumba mala korin. Anutugö kalem möriamñi mianjön mönö mewöñanök kukösumñambuk akza. Jisös Kraist Kembuninan solanibingö kondoriga Anutunöñ keunini jim teköiga diñgiba malmal köhöikñi miwikñaiiba nalö teteköñi qahö mal öngöbin. Mewö.

6

Siñgisöndok andö qeba Kraistpuk guliba malme.

¹ Anutunöñ kalem möriamñi neñgii sehimapköra siñgisöndok toroqeba aka malbin me qahö? Miangöra mönö denöwö jiinga dop kölma?

² Siñgisöndok yapmakek! Nini siñgisöndokö kösönöhök lolohoba urunini walñan qamöt ewö aiga siñgisöndok akingö tököba maljin ewö, mönö denöwögöra siñgisöndoknöñ toroqeba galöm köl neñgii malbinak?

³ Keu ki mötze me qahö: Nini körek Kraistköreñ qeköta-höbingöra aka o melun mem neñgiget. Miangöreñ urunini walñan mönö Jisös qeget kömuyöhanñgö tandök kömui malbingöra o melun mi mem neñgiget.

⁴ *Iwinöñ asakmararañi kondela Kraist mem gulli kömupnöñöhök wahöröhi, neñgö uruninan mewöyök kölönaiiga dölökñi aka malinga dop kölma. Iwininan nini Kraistkö tandök ewö guliba wahöta ahakmeme dölökñi aka memba

* **5:17:** Jembon oñi nene (Siawari keunöñ qariwe ilikñi nene) ewö köhöiba mal öngöbin. ewö köhöiba mal öngöbin. * **6:4:** Kol 2.12

malbingöra mötza. Miangöra o melun mi kewögöra mem nenjiget: Urunini walñan Jisösbuk mohotñe kömumba ahömapköra urunini walñi mi mewö löm kölget.

⁵ Urunini walñan Kraistpuk örörönj kömui miangörenj yambuk qekötahöba maljin ewö, Iwininan nini mewöyök Kraistpuk kinbingöra mötza. Kraistnönj kömupnöhök wahöröhi, mönö yangö tandök örörönj guliba malinga dop kölma.

⁶ Urusilegö sihim kömbönañnini bölöñan siñgisöndok akingö köpösönjomakzawi, Anutunönj sihim mi köndenñi gemapköra mörakza. Anutunönj siñgisöndoknönj toroqeba galöm köl nenjii welenni qeba malbinbuköra mötza. Miangöra urunini walñi mi Kraistpuk maripomnönj lök qeiga kömuyök. Miangö dop maljin, mi mötzin.

⁷ Kungö uruñi walñan kömuiga yañön mönö siñgisöndokö kösönöhök lolohoba malja.

⁸ Urunini walñan Kraistpuk kömuyök ewö, mewöñanök yambuk guliba mal köhöibingö möt narizin.

⁹ Mewö möt nariba Kraistkö könañi kewö ahöi möt yaközin: Anutunönj i mem guli kömupnöhök wahöta mal köhöiba kunbuk qahö kömuma. Kömupnönj i qahö toroqeba galöm kölga mal öñgöma.

¹⁰ Kömup kömuyöhi, mewö mianjön mönö nalö mohot miangörenj siñgisöndokö kukösumñi köndenñiga nalö teteköñi qahö lölöwöröñi ahöm öñgöma. Malmal köhöikñi maljawi, mi mönö Anutugöra mala mal öñgöma.

¹¹ Qamötnönj siñgisöndok akingö osime. Inini mönö mewöñanök nanñinañgö mötketka qamöt ewö aiga Kraist Jisösbuk qekötahöba kinda Anutugöra köhöiba malme.

¹² Silenñini kömumawi, miangö sihim kömbönañi bölöñan galöm köl enjiiga i tem köl wañgiba siñgisöndok akepuköra mi mönö jöhöba malme.

¹³ Miangöra sile kitipñini pakpak mi mönö siñgisöndok Tonangö böröñe kude alme. Mala mewö algetka buñani aiga bohon kölga anğöjörak asuhubapuk. Mewö qahöpmö, köhömuneyök gulibagun mönö nanñini Anutu tököm wañgime. Sile kitipñini pakpak mi Anutugö böröñe algetka buñani aiga bohon kölga ahakmeme solanñi asuhumakña.

¹⁴ Inini Köna keu bapñe qahöpmö, kalem möriam uruñe malje. Miangöra siñgisöndoknönj mönö öne jöhöba galöm köl enjii malbepuk. Mewö.

Solanñi malmalgö Tonji welen qeba malme.

¹⁵ Miangöra denöwö jibinak? Nini Köna keu bapñe qahöpmö, kalem möriam uruñe mala siñgisöndok ahinga dop kölja me qahö? Mi yapmakek!

¹⁶ To yahöt akzahot. Nanñini yetköreñök kungö böröñe al anğuba jitñi tem köla welenni qemakzei, miangöra mönö keu ki möt yaköme: Inini kun jitñi tem kölakzei, mönö yangö welenqegeurupñi akze. Siñgisöndok Tonangö welenqegeurupñi akze ewö, yañön mönö enğuanğiriga kömum köhöime. Anutugö jitñi tem köla welenni qemakze ewö, yañön mönö keuñini jim teköiga solanñi aka mal öñgöme.

¹⁷ Inini mutuk siñgisöndok Tonangö welenqegeurupñi aka malget. Mewö malgetka Buña keu mindingöm enjimakñapköra kusum enjigetka mötket. Mi möta miangö dop uruñini melenđa nalö kewöñe Buña keu törörök tem köla Anutugö könañi wuatangömakze. Mewö möta enğöra “Anutu saiwap!” jiba maljin.

¹⁸ Mi wuatangöba siñgisöndokö kösönöhök lolohoba Anutugö welenni qeba ahakmeme solanñi aka memba malje.

¹⁹ Urusilenñinan lölöwöröñi akzawañgöra aka keu miangö könañi mi mönö gölme ambazip nenğö keu jijigö dop nöñön kewö jimam: Inini mutuk sile

kitipnini pakpak tököba iwilele Tonangö (Satangö) böröŋe ala welenni qeba malget. Mewö malgetka ahakmeme angöjörakŋambuk asuhuiga uruŋinan tölöhoi malget. Mewö malgetmö, nalö kewöŋe sile kitipnini pakpak mi mönö tököba Anutugö böröŋe alme. Mewö ala welenni qegetka ahakmeme solanŋi asuhuiga sarakŋi ahakŋe.

²⁰ Inini singisöndok Tonangö welenqeŋeurupŋi malgeri, nalö miangöreŋ ahakmeme solanŋi mi qahö wuatangögetmö, nanŋini imbi-imbi laŋ malget.

²¹ Nalö kewöŋe ahakmeme miangöra gamuŋini mötze mö, nalö miangöreŋ mewö aka mala ölni mönö denöwö miwikŋaiget? Ahakmeme gamuŋambuk miangö ölni mi kömup köhöikŋi.

²² Nalö kewöŋe Anutunöŋ singisöndokö kösönöhök pösat enŋiiga lolohoba Anutugö welenqeŋeurupŋi aketka ölni asuhuiga sarakŋi ahakze. Mewö aka malmal köhöikŋi mala teteköŋe oyaenŋkoyaenŋ aka mal öngöme.

²³ Singisöndok ahinga Tonan töwa neŋgiiga kömup köhöikŋi miwikŋaibinmö, Anutugö kalemŋi mi oyaenŋkoyaenŋ malmal. Kraist Jisös Kembuninambuk qekötahöba kinbin ewö, mönö köhöiba teteköŋi qahö mal öngöbin. Mewö.

7

Awanöm malmalgö söpsöp keu

¹ O urumelenŋ alaurupni, inini Köna keu mötzeangö dop enŋöra kewö jimam: Köna keunöŋ ambazip jöhöm neŋgiza. Gölmenöŋ mal öngöbinangö dop mönö miangö bapŋe malbin, inini mi mötze me qahö?

² Miangö söpsöpŋi kun kewö: Köna keunöŋ ambi apŋambuk jöhöiga azinöŋ malmawangö dop awanöm malmahotmö, apŋan kömuma ewö, anömŋan mönö awanöm malmalgö Köna keunöhök lolohoma.

³ Miangöra apŋan jebuk maliga azi kungöra On! jiiga mema ewö, yangö qetŋi mönö qesabulum ambia jimakzin. Mewö jimakzinmö, apŋan kömuma ewö, Köna keu mianön qahö toroqeba jöhöi malma. Mewö mala azi kun memawi, yanön mönö qesabulum ambia qahö akŋa.

⁴ Miangöra urumelenŋ alaurupni, enŋö könaŋamŋinan mönö mewöŋanök ahöza. Inini mewöyök azi kungö buŋaŋi akŋegöra Kraistpuk qekötahöget. Anutunöŋ i mem gulii kömupnööhök wahöriŋa malmalninan ölni Anutugöra miwikŋaii asuhumapköra mörakza. Kraistnöŋ kömuiga uruŋini walŋan yambuk kömuiga qamöt ewö aka Köna keugö buŋaŋi qahö malje.

⁵ Mutuk urusilegö sihim kömbönaŋi bölöŋan galöm köl neŋgiiga laŋ malin. Nalö miangöreŋ Köna keunöŋ sölölohöba kungum neŋgiiga singisöndok akingö sihim kömbönaŋnini bölöŋan asuhum tiŋgita galöm köl neŋgiget. Miangöra urusileninan wahöriŋa malmalninan kömup köhöikŋangö ölni miwikŋaiba laŋ malin.

⁶ Mewö malinmö, mutuk keu mianön jöhöm neŋgiiga gwaröŋe mala köna keugö bohonŋi mohot mohot wuatangöbingö kapan köla nupŋi memba malin. Kraistpuk qekötahöba kininga urunini walŋan yambuk kömuiga nalö kewöŋe köna keugö buŋa ahinangöreŋök lolohoba kunbuk welenni qahö qemakzin. Nalö kewöŋe könaŋamŋinan kölöŋaiiga Uŋa Töröŋan inahöm neŋgiiga amqeba Anutugö nupŋi memakzin. Mewö.

Singisöndok akinbukö kapan köla aum-mörimakzin.

⁷* Miangöra denöwö jibinak? Köna keu nanŋak singisöndok-ŋambuk akza me qahö? Mi yapmakek! Köna keunöŋ mönö singisöndokö könaŋi kondel niŋgiiga möral. Köna keu kun kewö ahöza, “Kungöreŋ yuaigöra kude köpösöŋgöman.” Mewö qahö jibawak ewö, nöŋön yuaigö köpösöŋgömakzali, miangö könaŋi

* 7:7: Eks 20.17; Dut 5.21

qahö möt kutubilenjak. Mianğöra Köna keu qahö möt kutubilenjak, mewö siŋgisöndok qahö möt yaköbilenjak.

⁸ Köna keu qahö ahöbawak, siŋgisöndoknöŋ mönö keu omani aka köhömuŋi akawak. Mewö akawakmö, jöjöpaŋ keu mötpiga sel jöhöm niŋgiiga mi walöŋmamaŋgö könaŋi ahuiga siŋgisöndok aki asuhuyök. Jöjöpaŋ keunöŋ mönö kuŋgum niŋgiiga urunan wahöriŋa sihim kömbönaŋni bölöŋi könaŋi könaŋi asuhum tiŋgitketka bölöŋaŋgöra laŋ köpösöŋgömakzal.

⁹ Mutuk Köna keu qahö möta tönpin malalmö, jöjöpaŋ keu mötpiga mianjön aŋgön köl niŋgiyöhaŋgöra siŋgisöndokö sihimnan guliiga urunan wahöri mi ahal. Siŋgisöndok akiga mem kömum niŋgiiga köhömuŋi ahal.

¹⁰ Anutunöŋ jöjöpaŋ keu mi wuatangöba mal köhöimamgöra aka al niŋgiyökmö, keu mi wuatangömamgö esapköbiga mem kömum niŋgiiga köhömuŋi ahal. Köhömuŋi ahali, mianjön mönö aukŋe asuhui miwikŋajal.

¹¹ *Jöjöpaŋ keu möt kutubiga sel jöhöm niŋgiiga mi walöŋmamaŋgö könaŋi ahu jöjöpaŋ keunöŋ kuŋgum niŋgiiga siŋgisöndoknöŋ tilipköm niŋgiiga mi ahal. Siŋgisöndok aka keunambuk ahal. Mewö mianjön Anutugö jöjöpaŋ keu mianjön siŋgisöndok bohon köliga aki mem kömum niŋgiiga köhömuŋi ahal.

¹² Mewö ahalmö, töndup Köna keu mianjön mönö kömbukŋi aka sarakŋi akza. Mianğö jöjöpaŋ keunan mönö diŋdiŋi aka ölöŋŋi akza.

¹³ Mewö aiga jöjöpaŋ keu ölöŋŋi mianjön mem kömum niŋgiiga köhömuŋi ahal me qahö? Mi yapmakek! Keu ölöŋŋan qahöpmö, Köna keunöŋ mönö nani siŋgisöndoknaŋgö könaŋi indeli möt kutuyal. Siŋgisöndokö gamuŋi aukŋe asuhui kanjamŋambuk mötmamgöra aka jöjöpaŋ keu mianjön siŋgisöndokö selŋi jöhöiga urunan wahöri walöŋda siŋgisöndok ahal. Nani siŋgisöndokni mianjön mönö mem kömum niŋgiiga köhömuŋi ahal. Mewö.

Urone siŋgisöndokö yarö ahöi maljal.

¹⁴ Uŋa Töröŋan Köna keu neŋgiiga diŋdiŋi akzawi, mi mötzinmö, nöŋön siŋgisöndok azia aka sihim kömbönaŋni bölöŋambuk akzal. Eta kölbiga siŋgisöndoknöŋ galöm köl niŋgiiga tem köla welenŋi qeba siŋgisöndok ahakzal.

¹⁵ *Mianğöra yuai ölöŋŋi akŋamgö mörakzali, mi qahö ahakzal. Mimö, yuai bölöŋi akŋamgö tököba sisitŋi memakzali, mönö mia ahakzal. Mianğöra yuai ahakzali, nöŋön mianğö könaŋi ölöŋ qahö möt kutumakzal.

¹⁶ Mianğöra yuai bölöŋi akŋamgö olan aka mia ahakzal ewö, Köna keunöŋ mönö töndup ölöŋŋi akza. Köna keugöra mönö urumohot akzal.

¹⁷ Mewö aiga nöŋön nanak mi qahö toroqeba ahakzalmö, siŋgisöndok urune ahözawaŋön mönö kuŋgum niŋgiiga mi ahakzal.

¹⁸ Ahakmeme ölöŋŋi akŋamgö sihimŋi ölna mörakzalmö, mi akŋamgö ösumnan qahö asuhum niŋgimakza. Mianğöra nöŋgö urune yuai ölöŋŋi kun qahö ahözapmö, urusilenan mönö siŋgisöndok akŋamgö kuŋgum niŋgimakza, mewö mötzal.

¹⁹ Mianğöra yuai ölöŋŋi akŋamgö sihimŋi mörakzali, mia qahö ahakzalmö, yuai bölöŋi qahö akŋamgö mörakzali, mönö mia ahakzal.

²⁰ Mewö aiga yuai akŋamgö tökömakzali, mia töndup ahakzal ewö, mi nanak qahö toroqeba ahakzalmö, siŋgisöndok urune ahözawaŋön mönö kuŋgum niŋgiiga mia ahakzal.

²¹ Mianğöra nani könani kewö ahöi miwikŋaimakzal: Yuai ölöŋŋi akŋamgö sihimŋi mötpiga bölöŋaŋgö sihimŋan mönö uruni jöhöiga qakömakzal.

²² Mianğö könaŋi kewö: Uruneyök göröken Anutugöreŋ Köna keugöra urumohot aka tem kölmamgö mörakzal.

* 7:11: Jen 3.13 * 7:15: Gal 5.17

²³ Mewö mörakzalmö, sileneyök göröken nani könañamni kewö ahöi miwikñaimakzal: Silenañgö kitipñi mienñon siñgisöndokö bohonñi aketka akñamgö mörakzal. Siñgisöndok akñamgö sihimnan mönö urusihimni ölopñi mi memba et almapköra möri auba yarö qemakzahot. Siñgisöndok akñamgö sihim kömbönañnan mönö silenenañgö kitipñi kitipñi sölölohöm enjiba jöhöm niñgiiga kösö gwarönöñ maljal.

²⁴ O nöñon bölim teköba añañgööraknambuk akzal. Urusilenañgö sihimni bölöñan noañgiri kömup köhöikñi kömumbilenñbuköra mönö dañon sohopni memba amöt qem niñgibawak?

²⁵ O Jisös Kraist Kembuni, mönö yambuk nam köla “Anutu saiwap!” jizal. Könañamnan mewö aiga nanak urunanöhök Anutugöreñ Köna keugö bapñe anda welenni qemakzalmö, sileni siñgisöndokñambuk mianañgöreñ göröken siñgisöndok akñamgö sihim kömbönañnan jöhöm niñgiiga mianañgö kösö gwarönöñ maljal. Mewö.

8

Uña Töröñan tim töndanini aiga mal köhöizin.

¹ Mianañgöra ambazip Kraist Jisösbuk qekötahöba kinjini, Anutunöñ mönö neñgö keunini jim teköiga nalö kewöñe könöp siagö buña qahö aka maljin.

² Mianañgö könañi kewö: Gi siñgisöndokö sihimni tem köla malnöñañgöra aka kömup köhöik-ñañgö buñaya aka malnöñ. Mewö malnöñmö, Kraist Jisösbuk qekötahöba kinöña malmal köhöikñañgö Uñañan mönö kömup köhöikñañgö kösönöhök pösat gihiiga maljan.

³ Ambazip urusilenine sihim kömbönañnini bölöñi mi ahöza. Mi wu- atañgöinga Köna keugö ösumñan löwöriba malmal köhöikñi neñgimapkö osiiga qaköin. Qaköba urusileninan siñgisöndok aka malini, Anutunöñ siñgisöndok mianañgö keuñi jim teköba likepñi kewö melenök: Yañon nanñi Nahönñi melai- iga gölmenöñ eta siñgisöndok azigö sile tandök ahök. Toroqeba siñgisöndokö jöwöwöl tandök ewö aiga ohogetka kömuyök. Anutunöñ malmal köhöikñañgö könañi mewö mesarök.

⁴ Anutunöñ könañi mi kewögöra mesarök: Köna keunöñ nini solanñi aka diñdiñi malbingöra jim kutum neñgimazawi, Anutunöñ keu mianañgö öñan neñgöreñ asuhum tekömapköra mörök. Mianañgöra nini urusileninañgö sihim kömbönañnini bölöñi wuatañgöbingö tököba Uña Töröñañgöreñ nañgöba jitsi- hitñi wuatañgöba ahakzin.

⁵ Ambazip urusileninañgö sihim kömbönañi bölöñi wuatañgömakzei, yenjö uruñinan mönö siñgisöndoköreñ göröken akingö ahöza. Ambazip Uña Töröñañgöreñ nañgöba jitsihitñi wuatañgöba ahakzini, neñgö uruninan mönö Uña Töröñañgöreñ göröken akingö ahöza.

⁶ Urusileninañgö sihim kömbönañnini bölöñan mönö öröm neñgiiga kömup köhöik-ñañgöreñ anbingöra ahözapmö, Uña Töröñan urunine luai qeiga mal köhöibingö sihimni mörakza.

⁷ Anutunöñ Köna keu neñgiiga siñgisöndok akingö sihim kömbönañninan mönö keu mianañgö bapñe qahö anakza. Mi anmamgö osiza. Mi osiiga lañ mala uruninan Anutu qetala kerök ak wañgimazkin.

⁸ Ambazip urusilegö sihim kömbönañinan galöm köñ enjigetka lañ maljei, yenñon mönö Anutugö jeñe dop köñbingö jiiga qaköme.

⁹ Yenñon qakömemö, Anutugö Uña Töröñan enjö uruñine malja ewö, yañon mönö galöm köñ enjii malje. Urusilegö sihim kömbönañnini bölöñi mienñon mönö inini qahö galöm köñ enjimazke. Kraistkö Uña Töröñan kungö uruñe qahö geiga öne maljawi, yañon Kraistkö buñañi qahö akza.

10 Qahö akzapmö, Kraistnöḡ engö uruḡine malja ewö, silenḡinan siḡisöndoköra aka kömumemö, uḡaḡinan solanḡi akzeanḡöra aka mal köhöim öḡöme.

11 *Anutunöḡ Kraist Jisös mem gulii kömupnöhök wahöröhi, yanḡö Uḡaḡan uruḡine malja ewö, yetkön inḡini Anutubuk qekötahöba kingetka silenḡini köhömuḡi mi mewöyök mem gulimahot.

12 O urumelenḡ alaurupni, guliba malḡinanḡöra nenḡön mönö Anutugörenḡ tosabuk malḡin. Urusileḡö sihim kömbönanḡnini bölöḡi wuatangöbinanḡö tosanḡi qahöpmö, Uḡa Töröḡanḡö jitḡi tem köla malbingö tosanḡan mönö ahöm nenḡgiza. Mianḡöra nanini imbi-imbi lanḡ malbinbuk.

13 Urusileḡö sihim kömbönanḡini bölöḡi wuatangöba malje ewö, inḡini mönö kömup köhöikḡanḡö buḡaya akḡe. Mewö akḡemö, Anutugö köulukögetka Uḡa Töröḡan urusilenḡinanḡö ahakmeme bölöḡi mem kömumakḡa ewö, mewö mianḡön mönö guliba mal köhöiba malme.

14 Anutugö Uḡaḡan ambazip enḡuangiri maljei, yeḡön körek Anutugö nahönbö-raturupḡi akze.

15 **Ömewöröme yeḡön ambazip sölölohöm enḡigetka jönömḡini undui wenḡeḡe omanḡi aka maljemö, inḡini öme mewöḡi mia kun qahöpmö, Uḡa Töröḡi i buḡa qem anḡuba malje. Mianḡöra inḡini mönö kunbuk toroḡeba kenḡöt qakḡe malbepuk. Uḡa Töröḡi yanḡön mönö mem letot enḡiiga Anutugö nahönböraturupḡi akze. Uḡa mianḡön sölölohöm nenḡiiga Anutugöra “Aba *

16 Anutugö nahönböraturupḡi akzini, keu mi Uḡa Töröḡan nanḡak nanini uḡaninambuk imbi köla mohotḡe nanḡöba jimakzahot.

17 Anutugö nahönböraturupḡi akzin ewö, yanḡön nanḡi ambazipurupḡi nenḡöra oyaenḡoyaen mözözömgöi ahözawi, mi mewöyök buḡa qem anḡubin. Anutunöḡ Kraistköra yuai mözözöm-göi ahözawi, mi mönö mewöyök Kraistkö qöhöröne kinda buḡa qem anḡubin. Kraistpuk mohotḡe sihimbölö mörakzin ewö, mönö mewöyök Kraistkö asakmararanḡnöḡ öḡgöba yambuk mohotḡe asariba malbin. Mewö.

Malmal asakmararanḡambuknöḡ öḡgöba malbin.

18 Nalö kewöḡe sihimbölö möta malḡini, mianḡön malmal eretḡi akza. Könanḡep Kraistkö asakmararanḡnöḡ öḡgöba asariba oyaenḡoyaen malbini, mianḡön mönö malmal öḡgöḡöḡi aködahunḡambuk akḡa. Malmal yahöt mi likeplikep ala kewöt-pinanḡö dop qahö. Mewö mötmörizal.

19 Anutunöḡ sömbup aka yuai pakpak miwikḡaiyöha ahözei, mienḡön mönö mamböta Kraistnöḡ kaba Anutugö nahönböraturupḡi meköba kondel enḡiiga asakmararanḡ asuhum enḡimapköra awöwenḡömakze.

20 *Anutunöḡ sömbup aka yuai pakpak miwikḡaiyökmö, mienḡön mala kömumba ayapköme. Nanḡini sihimḡinanḡö dop qahöpmö, Anutunöḡ mönö nanḡi sihimḡanḡö dop mewö areḡöyök. Yuai pakpak ayapkömemö, töndup jörömqöröm enḡiiga oyaenḡoyaen kewö asuhumapköra al mambörakze:

21 Anutunöḡ sömbup aka yuai pakpak miwikḡaiyöha ahözei, mienḡön mönö mewöyök kewögöra mambörakze: Anutunöḡ i mewöyök anḡöjörak malmalḡö kösöneyök pösat enḡiiga qahö kömumba ḡisahöba ayapkömemö, Anutugö nahönbörat ewö lolohoba asakmararanḡinambuk asariba ahöm öḡgöme.

22 Mianḡö könanḡi kewö: Anutunöḡ sömbup aka yuai pakpak miwikḡaiyöha ahözei, mienḡön körek pakpak mönö mohotḡe osonḡom köla morö memegö masö tandök möta ahöba kota nalö kewöḡe mewöyök ahakze. Mi mötzin.

* 8:11: 1 Kor 3.16 * 8:15: Mak 14.36; Gal 4.6 * 8:15: Gal 4.5-7 * 8:15: Aba mi Arameik keunöḡ iwi. Iwini!” qerakzin. * 8:20: Jen 3.17-19

23 *Anutunöŋ sömbup aka yuai pakpak miwikŋaiyöha ahözei, mienönöhök qahöpmö, Anutugö yambu jeŋiqeŋe ahinga Uŋaŋi kalema neŋgii maljini, neŋön mönö mewöyök uruninan osongom köla maljin. Anutunöŋ neŋgungiri nahönböraturupŋi qainŋi kun akingö mamböta mala osongom ahakzin. Neŋgungita sile sohpnini meiga kunbuk letotpingöra awöweŋgöba maljin.

24 Mewö letotpingö jörömqöröm aka urunini melenŋa Suepkö buŋaya ahin. Yuaigöra jörömqöröm ahakzini, mianŋö ölni asuhui ehinga jörömqörömnini mewö mianön teköma. Kunöŋ kun yuaigö ölni asuhui eka mianŋö jörömqörömŋi mi qahö toroŋeba aka mambörakza. Mi qahö.

25 Yuaigö ölnan qahö asuhui ehakzini, mianŋöra jörömqöröm akzin ewö, mi mönö kapaŋ köla asuhumapköra al mamböringa uruninan qahö erakza.

26 Mewöŋanök löwöriinga Uŋa Töröŋan bauköm neŋgimakza. Denöwö köuluköinga dop kölbawak, mi qahö mötzinmö, Uŋa Töröŋan mönö nanŋak köuluk nupnine bauköm neŋgiba neŋgöra aka köuluköba keu jitŋi aukŋe qahöpmö, osongom aka saŋepnöŋ alakza.

27 Saŋepnöŋ ala Anutugö jitsihitŋangö dop ambazip sarakŋi neŋgöra aka köulukömakza. Anutunöŋ ambazip urunini ek kewörakzawi, yaŋön mönö amŋeba Uŋa Töröŋangö uru mötmötŋi mörakza.

28 Anutunöŋ köulukŋi möta öröyuai pakpak galöm köliga mianŋö mindi-mindiri ölnan mönö nanŋi alaurupŋan ölöwakŋegöra asuhumakza. Mi mötzin. Ölni mianön ambazip amötŋeŋe areŋangö dop enŋoholi jöpaköm waŋgimakzei, mönö i mewö me mewö bauköm enŋimakza.

29 Anutugö areŋangö könanŋi kewö: Nanŋi nahönŋan urumelenŋ alaurup sehisehiŋi neŋgö sutnine mutuknini ak neŋgimapköra mörakza. Mianŋöra qeljiŋe areŋ ala nini tandökŋinan Nahönŋangö dop akingöra mörök. Mianŋöra ambazip qeljiŋe möt neŋgiyöhi, nini mewöyök mewö akingöra jim möwölöhöm neŋgiyök.

30 Qeljiŋe jim möwölöhöm neŋgiyöhi, nini mewöyök neŋgohölök. Neŋgohölöhi, neŋgö keunini mewöyök jim teköiga solaniin. Solaniini, neŋgöra mewöyök köna kondeliga nanŋe asakmararaŋnöŋ öngöba oyaenŋkoyaen akin. Mewö.

Anutugö urukalemŋangö möpömpösei liŋet.

31 Keu mi möta mianŋöra denöwö jibinak? Anutunöŋ sel jöhöm neŋgiba likepnine malja ewö, danön mönö qetal neŋgibawak?

32 Anutunöŋ nanŋi Nahönŋi tok qahö anŋön kölökmö, i jim teköiga malmalŋi körek neŋgöra aka köleŋnök. Mi köleŋniga Anutunöŋ yambuk kalem korem-beŋi tosatiŋi pakpak mi mewöyök amŋeba neŋgima.

33 Anutunöŋ ambazip nanŋangöra möwölöhöm neŋgiba keunini jim teköiga solanimakzini, mianŋöra danön mönö keu jakeŋe al neŋgibawak?

34 Kraist Jisösnöŋ kömuiga Anutunöŋ kunbuk mem guliiga Suepnöŋ öngöba Anutugö böröŋi ölni tata toroŋeba neŋgöra aka köulukömakza. Mianŋöra kunŋan kun keunini kewöta könöp sianöŋ gebingöra jim teköm neŋgimamŋö osima.

35 Kraistkö urukalem uruŋe malinga danön mönö mianŋöreŋök menden neŋgiiga etpinak? Kahasililiŋ ak neŋgigetka wahöjaliŋ mötpinakmö, Kraistkö urukalemŋeyök ölöp qahö etpin. Sese-werowero ak neŋgibeakmö, mianŋöreŋök ölöp qahö etpin. Bödi akinak me opo söroninan qahöwahi malbinak, mönö ölöp qahö etpin. Kömumbinbukö keŋgöt qakŋe malbinak me yarö gilgetka kazik asuhubawakmö, mönö ölöp qahö etpin.

36 *Mianŋö keuŋi Buŋa Kimbinöŋ kewö ohoget ahöza,

“Nalö dop söjanök könahiba kömumbingöra nenjugetka anda mala sunjem ahakza. Lamaya engum nembinañgörök maljei, nenjöra mianjö tandök mötmörimakze.”

³⁷ Keu mianjö dop ak nenjibeakmö, Kraistnöñ urukalemñi indeli mörini, yanñon töngum nenjiiga lömböt pakpak mianjörenñ mönö luhut ala köiranñ köla malbin.

³⁸ Yuai kunöñ mönö Kraistkö urukalemñeyök mendenñ nenjimangö osima. Mi öl töhöñña möt yaközal. Kömupnöñ me malmalgö yuainñi kunöñ mönö mendenñ nenjimangö osima. Suep garata me ömewöröme yeñon mönö nalö kewöñe me könañgep nini mendenñ nenjibingö osime. Bem suahö kukösumñinambuk yeñon mi osime.

³⁹ Euyangö euñe me emuyangö emuñe maljei, yeñon mönö mendenñ nenjibingö osime. Anutunöñ öröyuai tosatñi kun miwikñaiyöha ahözei, mienñon mönö mewöyök Anutugö urukalem mianjörenñök mendenñ nenjibingö osime. Anutugö urukalemñi mianñon mönö Kraist Jisös Kembunini yanjörenñ asuhui indeli, mi mötzin. Mewö.

9

Anutunöñ sihimñangö dop Israel möwölöhöm engiyök.

¹ Nöñon Kraistpuk qekötahöba kinda munenñ keu qahöpmö, keu öl töhöññi kun jimam. Uña Töröñangö keugöra kezap albi keuni nanjöba jim köhöiba sañep urune ali kewö möta jizal:

² Nöñon Juda ambazip tosatñi yeñgö wösöbirikñinan nunñguiga urunan sihimbölö ketanñi teteköñi qahö kewögöra mörakzal:

³ Yeñon nömbuk gölme silenöñ Israel könagesöya mohot akzinmö, urunñinan Kraistpuk qahö qekötahöba lañ malje. Nöñon Israel alaumurupnan urunñini melenñmegöra aum-mörimakzal. Anutunöñ yeñgö keunñini kewöriga nanak yeñgö salupñini akiga likepñi melenñda nöngö qakne kewö öngömapkö mötzal: Yanñon ni Kraistkörenñök mendenñ niñgii könöp siagö buñaya akñangö mötzal.

⁴ *Yeñon Israel kambu uruñe malgetka Anutunöñ enñuanñgiri buñanñi akze. Anutugö qetbuñanñi bisiba aködamunñinambuk akze. Anutunöñ yembuk oyaenñkoyaenñ akingö jöhöjöhö walñi aka dölokñi aka Köna keunñi al engiyök. Mianjöra jöwöwöl jikenöñ öngöba Anutugö waikñi memba möpöseimakze. Anutunöñ kötümötuetñi sehimapkö keu jöhöyöhi, mianjö ölnan asuhumapköra mambörakze.

⁵ Yeñon bömön jalönini Abrahamgö gwölönarök-urupñi yeñgö isi moröurupñina malje. Kraistnöñ yeñgörenñök gölme sile memba azia asuhuyök. Kraistnöñ Anutunina aka yuai pakpak galöm köliga qetñi nalö teteköñi qahö möpöseimakin. Keu mi ölna.

⁶ Mewö maljemö, Israel könagesönöhök asuhum sehiba maljini, nenñon pakpak mönö töndup Israel ambazip ölni qahö akzin. Mianjöra Anutugö keunñan siñgiiga ösumñan erök tandök ahakza me? Mewö jibinak, mi keu ölna qahö.

⁷ *Abrahamgö gwölönarök-urupñi yeñgörenñök ahuzinañgöra aka körek nenñon mönö Anutugö nahönböraturupña qahö akzin. Mewö qahöpmö, Anutunöñ Abrahamgöra kewö jiyök, “Aisakö isimoröurupñan mönö göhörenñ toroqeba qetki bisiba mal öngöme.”

⁸ Keu mianjö könanñi kewö: Abrahamgö gwölönarökurup gölme ambazip siliknöñ morö ahumakzini, körek nenñon mönö Anutugö nahönböraturupñi

* 9:4: Eks 9.4 * 9:7: Jen 21.12

qahö akzin. Mewö qahöpmö, Anutunöŋ keu jöhöi ahözawaŋgö dop ahuini, Anutunöŋ mönö ninia möt neŋgiiga Abrahamgö gwölönarökurupŋi ölni akzin.

⁹*Jöhöjöhö keu mianjön Abrahamgöreŋ kewö kaiga mörök, “Yambu mohot teköiga mianjöreŋ kunbuk kaba gekiga Saranöŋ mönö morö nahönŋambuk akŋa.”

¹⁰ Keu mewö möri yaŋgöreŋ mewö asuhuyökmö, mianjöreŋök qahö teköyök. Yaŋgö andöŋe Rebekagöreŋ mewöŋanök Anutugö keugö dop asuhuyök. Bömönini Aisak yaŋön anömŋi mi gölöm waŋgiiga nahönyahötŋiri siwisiwi asuhuyohot.

¹¹ Siwisiwi yetköŋ gölömŋe tata qahö asuhiba yuai ölopŋi me bölöŋi kun qahö ahoŋi, Anutunöŋ mönö nalö mianjöreŋ nahön yetköreŋök kun nanŋaŋgöra möwölöhöyök. Nanŋi mötmöt arenjan köhöiba ölnjambuk ak tekömapköra aka munŋi möwölöhöyök.

¹²*Nanŋi jitsihitŋan ölnjambuk akŋapaköra Rebekagöra kewö jiyök, “Datŋan mönö munŋaŋgö welenqeqeŋi aka nembö bapŋe malma.” Anutunöŋ mewö jiba ahakmemeŋiri akahorahi, mianjögö dopŋe i qahö kewöt etkiyökmö, nanŋi mötmöt sihimŋi miyök wuatangöba munŋi oholiga datŋaŋgö ketaŋamŋi ahök.

¹³*Mianjögö keuŋi Buŋa Kimbinöŋ kewö ohoget ahöza, “Jeikob urunan jöpaköba malalmö, Iso (Esau) mi tököba kazik ak waŋgiba malal.”

¹⁴ Keu mianjögöra mönö denöwö jibinak? Anutunöŋ diŋdiŋi qahö akza me? Mewö qahöpmahöp!

¹⁵*Anutunöŋ Mosesgöra keu kewö jii ahöza, “Nöŋön mönö nani jitsihitni wuatangöba kun niŋia ehoriba ak kömumamgö mötzali, ia mönö ak kömum waŋgi-makzal. Kun dagöra wösö mötmöt ak waŋgimamgö jizali, yaŋgöra mönö wösöni mörakzal.”

¹⁶ Keu mianjögöra aka gölme azinöŋ Anutu qahö galöm kölakzapmö, yuaigö sihimŋi möta akŋamgö esapköm bibihibawakmö, mi töndup Anutu qahö oŋgitma. Anutu nanŋak kalem möriamŋaŋgö dop yuai pakpak galöm köliga yaŋgö böröŋe ahöza.

¹⁷*Anutunöŋ farao kiŋgöra keu jiiga Buŋa Kimbinöŋ kewö ahöza, “Nani qet-buŋani jim sehigetka gölme körek pakpak dop kölmapköra mötzal. Mewö möta kukösumni kondelbi aukŋe asuhumapköra kuŋgum gihibiga göŋön asuhum tiŋgitnöŋ. Asuhum tiŋgita mala tuarenjön ak niŋgiba malnöŋga mönö luhut al gihial.”

¹⁸ Keu mianjögö dop Anutunöŋ nanŋi jitsihitŋi wuatangöba kun ehoriba ak kömumamgö mötzawi, ia mönö ak kömum waŋgimakŋa aka kungö uruŋi mem gwözöŋmamgö jizawi, ia mönö mem gwözöŋniga yaŋgiseŋ ahakŋa. Mewö.

Anutugöreŋ irimsesewöl aka ak-kömukömu

¹⁹ Enjögöreŋök kunŋan nöŋgöra kewö jibawak, “Mewö aiga körek neŋön mönö Anutugö jitsihitŋi tuarenjön ak waŋgibingö osimakzin. Mewö aigun Anutunöŋ mönö wuanöŋgöra toroqeba jim neŋgimakza?”

²⁰*Kunŋan mewö jibawakmö, gölme azi gi mönö niŋia aka Anutu tuarenjön aka aŋgururuk ak waŋgibanak? Börösöwönöŋ mönö nanŋi miwimiwikŋai Toŋi kewö ölop qahö jim waŋgima, “Gi mönö wuanöŋgöra tandök kewöŋi miwikŋaim niŋinöŋ?”

* 9:9: Jen 18.10 * 9:12: Jen 25.23 * 9:13: Mal 1.2-3 * 9:15: Eks 33.19 * 9:17: Eks 9.16
* 9:20: Ais 29.16; 45.9

21 Kimbut meme azinöŋ mönö nanŋi kukösum qakŋe sihimŋaŋgö dop gwaköm melenŋa möwölöhöba gwaköm mohot mianŋgöreŋök kouranŋen murutŋi murutŋi memakza. Tosatŋi nalö dop memba nupnöŋ alakzin aka tosatŋi aködamunŋinambuk mi mönö sösöŋgai nalöŋeyök nupnöŋ alakzin.

22 Anutu miwimiwikŋai Toninan mönö mewöŋanök ak neŋgimakza. Yaŋön irimsesewölŋi ambazip kondel neŋgiiga kukösumŋi eka mötpingöra mörakza. Mewö möta irimŋan seholiiga kazikŋan ambazip tosatŋi yeŋgö qakŋine öŋgöiga jöjöröba köndenŋ enŋgimangö aka malök. Mi töndup likepŋi zilaŋök qahö melenŋ enŋgiyökmö, yeŋgöra aka sihibölö gwötpuk möta mökösoŋda uruŋini melenŋmegöra mamböta malök.

23 Mewöŋanök kalem möriamŋi indeli kelenmalelenŋ asuhu-mapköra mörakza. Mewö möta ambazip aködamunŋi buŋa qem aŋgubingöra möwölöhöm neŋgiyöhi, nini mönö neŋgehoŋiiga aködamunŋambuk asarimakzin.

24 Nini mewöyök mewö akingöra neŋgoholök. Juda ambaziwök qahöpmö, kian kantriŋi kantriŋi i mewöyök mewö akŋegöra enŋgoholök.

25 *Anutunöŋ mianŋgö keuŋi jiiga kezapqetok azi Hoseagö kimbinöŋ kewö ahöza,

“Ambazip nani könagesöurupni qahö aka malgeri, nöŋön mönö i enŋgoholbiga nani könagesöni akŋe. Tosatŋan nani wölböt alani qahö malgeri, yeŋgöra mönö ‘Nani wölböt alaurupni,’ mewö jiba malmam.

26 *Nöŋön gölme kungö ambazip yeŋgöra kewö jiba malal, ‘Inini nani könagesöurupni qahö malje.’ Mewö jiba malalmö, i mönö gölmeŋine mianŋgöreŋök enŋgohola qetŋini kewö qetmam: Inini mönö Anutu mal-mal Tonanŋö nahönböratuŋi akze. Utekutek mewö asuhuma.”

27 *Aisaianöŋ mewöyök Israel ambazip neŋgöra aka kewö sahöta jiyök, “Israel ambazip jaŋgönini köwet sak ewö akawak ewö, mia kun töndup neŋgöreŋök awamŋi neŋönök mönö urunini melenŋninga amöt qem neŋgima.

28 Kembunöŋ gölmeŋi gölmeŋi pakpak neŋgö keunini zilaŋzilaŋ kewöta jim teköba likepŋi körek melenŋ neŋgim teköma.”

29 *Aisaianöŋ mewö jiba qeljiŋe keu kun jiyöhi, mianŋgö ölŋan mönö neŋgöreŋ kewö asuhuza, “Kembu kukösum pakpak Toninan gwölönarökurupnini tosatŋi qahö enŋgehoŋi uruŋini melenŋbeak ewö, gölmeninan lök Sodom ewö melenŋi geiga könöp jebawak. Neŋön mönö Gomora ambazip ewö ayuhubinak. Anutunöŋ lök mewö ak neŋgibawak.” Mewö jiyök.

Israel jesöŋgöŋan Anutu yaŋgiseŋ ak waŋgimakze.

30 Mianŋgöra mönö denöwö jibinak? Kantri tosatŋan Anutugö jeŋe solanŋi akingö nupŋi qahö kapaŋ köla megeri, yeŋön mönö Anutugö jeŋe solaniget. Uruŋini melenŋda Anutu möt narigetka mianŋgöra keuŋini jim teköiga solaniba malje.

31 Mewö maljemö, Israel neŋön solanŋi akingöra Köna keu wuatangöbingö kapaŋ köla mala kota mi töndup Anutugö jeŋe qahö solaniin.

32 Mianŋgö könaŋi kewö: Nanŋinanök esapköba ahakmeme diŋdiŋi aka mewö mianŋön solanŋi akingö kapaŋ köla Jisös qahö möt narim waŋgiget. Yaŋön köt pöwöwöm ewö akzawi, mönö yaŋgöreŋ tötanŋöba enŋgui qaköba andö qeget. Mianŋgöra solanŋi qahö aket.

33 *Mianŋgö keuŋi Buŋa Kimbinöŋ kewö ohoget ahöza, “Eket, Anutu nöŋön mönö ain köt kun Zaion kunduje Israel kambu uruŋine kuŋgubiga yeŋön mianŋgöreŋ tötanŋöba et enŋgui andö qemakŋe. Kunŋan

azi ip pöwöwöm köhöikni mi möt narim waŋgimawi, yaŋön mönö nalö kunöŋ yaŋgöra gamu qahö miwikŋaima.” Mewö.

10

¹ O urumelen alaurupni, nöŋön nani könagesöurupnan uruŋini melenmegöra awöweŋgömakzal. Anutunöŋ amöt qem enŋimapköra uruni qezaköba yeŋgöra aka Anutu köuluköm waŋgimakzal.

² Yeŋgö könaŋamŋinan kewö ahöza: Yeŋön Anutugöra urukönöp ahakzemö, mi gukmaulem qakŋe ahakze. Yeŋgö keuŋini mewö naŋgöba jizal.

³ Anutunöŋ keunini jim teköiga solanizini, mianŋö könaŋi qahö möt yaköba nanŋinanök esapköba solanŋi akingö kapan kölakze. Mewö aka Anutunöŋ keunini jim teköiga solanibingö jimakzawi, keu mianŋö bapŋe qahö anda qaköba öne laŋ malje.

⁴ Kraistnöŋ nanŋök Köna keu wuatangöm teköyök. Nini tosatŋan mi osiba Kraist möt nariba urunini melenjini, mewö mönö Kraistköra aka Anutugö jeŋe solaniba dop köljin. Mewö.

Anutunöŋ nini körek amöt qem neŋgimangö mötza.

⁵ *Mosesnöŋ Köna keu wuatangöba mewö mianŋön solanŋi akingö keuŋi mi kewö ohoi ahöza, “Köna keu wuatangöm tekömawaŋön mönö mianŋöra aka mal köhöima.”

⁶ *Keu mewö ahözapmö, urunini melenja möt nariinga Anutunöŋ keunini jim teköiga solanimakzini, Mosesnöŋ mianŋöra keu kewö jii ahöza, “Urugan kewö mötmöriba jibanbuk: Azi daŋön mönö Suep mire öŋgöbawak?” Ambazipnöŋ mi Kraist waŋgita etmapköra laŋ jiget.

⁷ me “Azi daŋön mönö kömup mirigö dutŋe gebawak?” Ambazipnöŋ mi Kraist waŋgita kömupnöhök wahötmapköra laŋ jiget.

⁸ Mewö jiba toroqeba kewö jiyök, “Buŋa keu mi köröwen qahöpmö, mönö göhö numbuge aka uruge ahöza.” Buŋa keu mi möt naribingöra aka ahöza. Neŋön keu mianŋön ambazip uru kuŋgum enŋiba kewö jim asarim enŋimakzin:

⁹ Anutunöŋ Jisös mem gulii kömupnöhök wahörök. Göŋön keu mi urugan möt nariba numbu jitkan “Jisösnöŋ Kembuni akza,” mewö jim miwikŋaizan ewö, mönö amöt qem gihiiga letotman.

¹⁰ Gi urugan Buŋa keu möt narinöŋga Anutunöŋ keugi jim teköiga solaniman aka numbu jitkan Jisös jim miwikŋainöŋga amöt qem gihiiga letotman.

¹¹ *Buŋa Kimbigö keu kun kewö jiget ahöza, “Daŋön i möt narim waŋgimawi, yaŋön mönö gamu qahö miwikŋaima.”

¹² Anutunöŋ Juda ambazip qahö neŋgek soriba kantri tosatŋi qahö qepureim enŋimakza. Kembu mohot yaŋön mönö körek neŋgö Kembunini aka dop mohotnöŋ kewöt neŋgimakza. Ambazip i qeta köulukömakzini, yaŋön mönö kötümötuetŋi nini körek kelen-malelen neŋgimakza.

¹³ *Mianŋö keuŋi mi Buŋa Kimbinöŋ kewö ahöza, “Ambazip denike yeŋön Kembugö qetŋi qeta köulukömei, yaŋön mönö i körek amöt qem enŋiiga letotme.”

¹⁴ Ambazipnöŋ Kembu qahö möt narim waŋgiba yaŋgö qetŋi mönö denöwö qeta köuluköbeak? Yaŋgö könaŋi qahö jiget mötkeri, i mönö denöwö möt narim waŋgibeak? Kunŋan Buŋa keu qahö jim asarima ewö, yeŋön mi mönö denöwö mötpeak?

¹⁵ *Ambazip kun Buŋa keugöra qahö melaibin ewö, yaŋön mönö denöwö anda mi jim asaribawak? Mianŋö keuŋi Buŋa Kimbinöŋ kewö ohoget ahöza,

* 10:5: Lew 18.5 * 10:6: Dut 30.12-14 * 10:11: Ais 28.16 * 10:13: Joel 2.32 * 10:15: Ais 52.7

“Ambazip Buṇa keu ölöṛṇi memba kamakzei, yeṅgö köna ötöṇini möringa qetpuk sorokṇi akza.”

16 *Mewö ohoget ahözapmö, nöṅgö Israel könagesö öṛṇi yeṅön Ölöwak Buṇa qahö tem köla malje. Mianṅö keuṇi mi kezapqetok azi Aisaianöṇ kewö jii ahöza, “O Kembu, nini Buṇa keu jim sehiinga danön mönö uruṇi melenḁa mi möt naribawakto?”

17 Keu mianṅö dop Kraistkö keuṇi jim sehiinga kezapṇine geiga mötketka mötnaripṇinan mönö mewö asuhuma.

18 *Mötnarip mewö asuhumapmö, kewö qesim enḡizal: Buṇa keu mianön mönö Juda yeṅgö kezapṇine qahö geiga mötket me? Qahö, mi mönö mötket. Mianṅö keuṇi mi kewö jigetka Buṇa Kimbinöṇ ahöza, “Keu jigetka keu kourukṇinan mönö anda anda gölme pakpak dop kölök. Mi gölmeṇi gölmeṇi eu emu likeplikep mianṅöreṇ mötket.”

19 *Keu mianṅö dop Buṇa keu lök mötketmö, kunbuk toroqeba kewö qesim enḡizal: Israel ambazipnöṇ mi qahö möt asariget me? Mosesnöṇ mutuk keu kewö jiyök,

“Ambazip könagesö öṛṇi qahö nöṅön mi amöt qem enḡibiga enḡö uru mututututṇinan mönö mianṅöra aka asuhuma. Kian kambu gukmalem maljei, yeṅön iṇini enḡonḡitketka silik mianön mönö Juda enḡö uruṇini kuṅgubiga irimṇini seholiiga uruṇinan wahötma.”

20 *Aisaianöṇ mönö köhöiba kinda kewö jii ahöza, “Ambazip ni qahö jarum niṅgiba laṇ malgeri, yeṅön mönö ni miwikṇaim niṅgiget.

Ambazip nöṅgö könananḡöra qahö qesiba malgeri, nöṅön könanamni mönö yeṅgöra indelbi mötket.”

21 *Yeṅgöra mewö jiyökmö, Israel neṅgöra mönö keu kewö jii ahöza, “Silim dop söṇanök könahiba qeḡetal könagesö kezapjupjup ahakzei, iṇini nöṅgöreṇ kamegöra enḡohola enḡöra börö kaek köla malbiga sunḡem ahakza.” Mewö.

11

Israel uruṇe urumelenḡ kambu moröṇi ahöza.

1 *Mianṅöra kewö qesizal: Anutunöṇ nanṇi könagesöṇi andö qem neṅgiyök me qahö? Mi qahöpmaḡöp! Nöṅön mewöyök Abrahamḡö gwölönarökṇi kun akzal. Nanak Israel könagesögö kambu qetṇi Benjamin mianṅö uruṇe maljal.

2 Anutunöṇ nanṇi könagesöṇi qelṇiṇe möwölöhöm neṅgiyöhi, nini mönö qahö andö qem neṅgiiga maljin. Kezapqetok azi Elaijagö (Eliagö) kösohotṇi mi Buṇa Kimbinöṇ ohogetka ahöza. Yanön Anutugö jeṇe Israel ambazip jim enḡiba köuluköyöhi, iṇini keu kemaṇi mi mötze me qahö? Keu mi kewö,

3 * “O Kembu, yeṅön mönö göhö kezapqetok ambazipurupki enḡuget kömugetka göhöreṇ jöwöwöl ohoho altaṇi altaṇi köndenḡmöndenḡet. Ni mohot nömosötket malbiga mömö-laköba mönömba nuṅgubingö jöjöröze.”

4 *Mewö jiyökmö, Anutunöṇ mi möta mönö kewö melenḡ waṅgiba jiyök, “Gi nangok qahö maljanmö, nöṅön azi 7000 mewöṇanök sel jöhöm enḡibiga nani buṇani aka bem muneṇi Bal i qahö simin köḡ waṅgiba göbuk toroqeba malje.”

5 Keu mianṅö dop nalö kewöṇe mewöṇanök Anutugö kambu moröṇi ahöza. Anutunöṇ kalem möriamṇanḡö dop ambazip awamṇi möwölöhöm neṅgiiga maljin.

* 10:16: Ais 53.1 * 10:18: Sum 19.4 * 10:19: Dut 32.21 * 10:20: Ais 65.1 * 10:21: Ais 65.2
* 11:1: Fil 3.5 * 11:3: 1 Kiṇ 19.10, 14 * 11:4: 1 Kiṇ 19.18

⁶ Kalem möriamñan mönö nam köl wanñiiga möwölöhöm nenñiyök. Nini ahakmeme ölöpnji aka memba malbinahi, miangöra aka qahö möwölöhöm nenñiyök. Gölme ambazip ahakmemeninan nam köl wanñiiga möwölöhöm nenñibawak ewö, yangö kalem möriamñan mönö yuai omani akawak.

⁷ Miangöra mönö denöwö jibinak? Israel könagesönöñ solanñi akingö kapan köla malgetmö, solanibingö könani mi qahö miwikñaiget. Yenön qahöpmö, Anutunöñ kambu moröñi möwölöhöm nenñiyöhi, nenñon kalemñi mi miwikñaiba solanñi ahin. Tosatñan mötmöt bölöñan urunñi gwözöñni öne lañ malje.

⁸ *Miangö keunji mi Buña Kimbinöñ kewö ohoget ahöza, “Gaun jeje malgetka Anutunöñ öme qahö jöhöiga urunñine geiga köhömuñi aket. Yuai eka könani ek kutubepuköra jeñini mem sohoiga ömuñ kölok. Keu kezapñinan möta möt asaribepuköra mi mem gwözöñnök. Mewö tönpin mala kota nalö kewöñe mewöyök öne lañ malje.”

⁹ *Kiñ Deiwidnöñ miangö keunji kewö jii ahöza, “O Anutu, yenñon közölömbuanñ ala nemba lañ söñgaimakze. Miangöreñ mönö engek miwikñaiba siñgisöndokñinanñgöra simba alnöñga enñimema. Mönö nannñini dumñine tötañgöba et enñuiga likepñi melenñ enñinöñga sihimbölo mötme.

¹⁰ O Anutu, gi mönö jeñini mömbauba mem gömölinöñga uba ekingö osime. Mönö likepñi melenñ enñinöñga qakñine öñgöba lömböriiga sundan dop upköba malme.”

Deiwidnöñ mewö köuluköyök.

Kian kantri yenñon Anutugö ipñi ölnji aket.

¹¹ Toroqeba kewö qesizal: Juda könagesö ölnji yenñon tötañgöba et enñuiga urunñinan gwözöñniga ölöwakingö osime me qahö? Mi qahö osime! Et enñuyöhi, miangön mönö Anutu möt kutubingö awöwengömegöra aka asuhuyök. Juda könagesö ölnji yenñon köna onñgita et enñuiga kian kantri yenñon salupñini aka urunñini melenñda Anutugö buñani aket. Mewö akeri, miangön urunñini kuñguiga miangöra irimñini sehöliiga urunñini melenñmegö sihimñan asuhumapköra aka mewö asuhuyök.

¹² Juda könagesö ölnji yenñon köna siñgiba et enñuiga miangöra kian gölmeñi gölmeñi yenñon oyaenñkoyaenñ akingö könani miwikñaiget. Mi miwikñaiba urunñini melenñda kötümötuet urunñe maljemö, Juda könagesö ölnji yenñon tönpin mala Anutugö jeñe qahö dop kölje. Könañep Juda yenñon mewöyök körek urunñini melenñme. Mewö asuhuiğa Anutugö kötümötuetñan sehiba kelenñmalelenñ aukñe asuhuma.

¹³ Nöñon keuni ki Juda enñgöra qahöpmö, kian kantri könagesö enñgöra jizal. Nöñon kian kantri enñgöreñ melaimelai azi aposol akzalanñgöra “Nupni qetbuñañambuk akza,” jiba mewö mötmörizal.

¹⁴ Nupni mi membi ölnji asuhuiğa urunñini melenñmakzei, nani Israel könagesöurupnan miangö buzupñi mötmegöra kapan köla awöwengömakzal. Buzup keu miangön mohot mohot yenñgö urunñini kuñguiga miangöra irimñini sehöliiga urunñini melenñbingö sihimñan asuhui melenñgetka Anutunöñ amöt qem enñgima. Nupni qetbuñañambuk mi mönö miangöra aka kian kantri enñgö sutñine memakzal.

¹⁵ Anutunöñ Juda kambu andö qem nenñiiga miangö ölnjan mönö kewö asuhuyök: Kian kantriñi kantriñi enñon salupñine aketka Anutunöñ töwanñini qeba enñgömeiga alaurupñi aket. Juda könagesö ölnji yenñon urunñini melenñgetka

* 11:8: Dut 29.4; Ais 29.10 * 11:9: Sum 69.22-23

Anutunöŋ amöt qem engiba möt anğön köl engimawi, miangö ölŋan mönö kömupnöhök guliba mal köhöimeangö dop akŋa.

¹⁶ Yambu jeŋiqeŋe dölökŋe nene Anutugöra kewöta ala sösöŋgai ahinga sarakŋi akza ewö, nupkö numbu neneŋi pakpak mönö mewöyök sarakŋi akza. Ip jalöŋan töröŋi akza ewö, böröŋan mönö mewöyök töröŋi akze.

¹⁷ Juda kambu mi Anutu nanŋangö oil ipŋi akza. Anutunöŋ nanŋi oil ipŋi mi öŋböŋi memba böröŋi tosatŋi mitii etket aka arökŋangö oil ip böröŋi memba kaba sutŋine ali toroqeba qarimakze. Kantri tosatŋi iŋini arökŋangö oil ip miangö dop akzemö, Anutunöŋ töndup engömeiga nalö kewöŋe ip börö qainŋi kun miengö sutŋine mal köhöimakze. Iŋini mönö Juda kambugö oil ip jalöŋeyök nene oŋi öröba namba qarimakze.

¹⁸ Iŋini Juda nembuk kinjemö, töndup Juda neŋgongita silenini memba öŋgöbepuk. Silenini mem öŋgöbeak ewö, mönö keu ki mötme: Kantri tosatŋi iŋini ip böröŋanök ewö akze. Iŋini jalönini qahö bisimakzemö, nanine ip jalöŋan mönö iŋini engömisiiga kinje.

¹⁹ Keu kewö jibeak, “Anutunöŋ nini nanŋi ip kemaŋe al neŋgimapköra aka ip böröŋi mi kutui eriga tiŋi asuhuyök.”

²⁰ Keu mi ölŋa. Anutunöŋ Juda ambazip uruŋini qahö melenŋa möt narigerangöra aka kutum engii etketmö, iŋini mönö mötnariŋinan töndangöm engiiga zeŋ kinje. Mewö kinda jakbak-öraŋböraŋ kude aka aiweliköba malmemö, mönö kewö et engubapüköra sömbuŋini möta malme:

²¹ Anutunöŋ nanŋi ipŋangö böröŋi ölŋi qahö engehoriba Juda könagesö kutum engiyök ewö, iŋini mönö “Ölöp neŋgehorima,” mewö jibepuk. Öne mewö mötmöriba laŋ malbepuk.

²² Miangöra kian kantri iŋini Anutugö könaŋi mötmöriba kewö jime, “Juda ambazip köna siŋgiba et enguyöhi, Anutunöŋ miangö likeŋi melenŋa mönö ölŋa könöpŋambuk ak engimakzapmö, nini ölöwak Toŋambuk qekötahöba kininga mem ölöwak neŋgimakza. Yambuk qahö toroqeba kinbin ewö, mönö kantri tosatŋi nini mewöyök kutum neŋgii etpin.”

²³ Mewö ölöp jimemö, Anutunöŋ ambazip köna siŋgigeri, mi mewöyök ölöp köhöiba ip kemaŋe kunbuk toroqem engima. Miangöra Juda könagesö yeŋön yaŋgiseŋini mosöta uruŋini melenŋe ewö, i mönö ölöp Jisösbuk toroqem engima.

²⁴ Anutunöŋ iŋini arökŋangö oil ip miangöreŋök kutum engiba kölkömötkö könaŋi oŋgita oil ip qainŋi kungö kemaŋe al engii toroqeget. Kantri tosatŋi iŋini mewö ak engiyök ewö, miangöra nanŋi ip böröŋi ölŋi Juda könagesö ölŋi mi mönö amqeba engömembra sihimŋan nanŋi oil ipŋangö kemaŋe al engii kunbuk toroqeme. Mewö.

Anutunöŋ Israel körek ak kömum neŋgimangö mötza.

²⁵ O urumelen alaurupni, nanŋini mötkutukutu qakŋe laŋ malbepüköra mönö keu tölapŋi kun indela möt asarimegöra mötza. Keu mi kewö: Mötmöt bölöŋan Israel könagesögö bahöŋi kun yeŋgö uruŋini gwözöŋni maljemö, nalö teteköŋi qahö yaŋgiseŋ qahö toroqeba malme. Qahöpmö, mutuk kian kantri yeŋgöreŋök jesöŋgöŋan uruŋini melenŋa Anutugö bemtohoŋ uruŋe kaŋgotme. Mewö aketka Anutunöŋ jaŋgöŋini ehi dop kölmawi, nalö miangöreŋ Juda könagesö neŋgö yaŋgiseŋ nalöninan teköiga körek uruŋini melenŋe.

²⁶ *Uruŋini melenŋetka Anutunöŋ Israel könagesö pakpak amöt qem engiiga letotme. Miangö keuŋi mi Buŋa Kimbinöŋ kewö ohoget ahöza, “Amötqeŋe Toŋan mönö Zaion kundueyök asuha Jeikob kambu neŋgö ahakmemenini aŋgöjörakŋambuk mi köl könjöratma.

* 11:26: Ais 59.20

27 * Anutu nõjõn singisõndokñini kõl kõnjõrata oyaenkyoaen akingõ jõhõjõhõ areni mi yembuk akiga mohotje malbin.”

Keu mewõ ahõza.

28 Juda kõnagesõ õlñi yejõn Õlõwak Buja andõ qeba Anutugõ kerõkurupñi akerangõra kantri tosatñi eñõn salupñine Anutugõ alaurupñi akze. Mewõ akzemõ, Anutunõj Israel bõmõn jalõ-urupñini mõwõlõhõm enjyõhangõra Juda neñõn mõnõ toroqeba wõlbõt alaurupñi õlbõlñi akzin.

29 Anutunõj ambazip niñia mõwõlõhõba enghola kalem enjimakzawi, keu mi mõnõ kunbuk uruñi mõñaiiga utekõmawanjõ dop qahõ.

30 Kian kantri iñini mewõyõk mutuk Anutugõ jiti qahõ tem kõla laj malgetmõ, Juda kõnagesõ õlñi yejõn yangiseñ akerangõra aka Anutunõj iñini ak kõmum enjiiga letotket.

31 Juda kõnagesõ õlñi yejõn nalõ kewõne Anutugõ jiti qetala laj mala kotzemõ, eñõn letotkerangõra aka Anutunõj Juda kõnagesõ nini mewõñanõk nalõ kewõne ak kõmum neñgimangõ mõtza. Kian kantri eñõn uruñini melenja letotketka miangõ silikñan uruñini kuñgumakzawi, miangõra yejõn mõnõ mewõ-ñanõk amqeba uruñini melenja ak-kõmukõmuñi buja qem anjume.

32 Ambazip lõkñanõk pakpak nini Anutu qetala laj malinga qegetalnini miwikñaiiba gwarõhõm neñjyõk. Kõrek pakpak ak kõmum neñjimapkõra aka kõsõnõj gwarõhõm neñjyõk. Mewõ.

Anutu mõpõseiba omsa lijet kewõ kõlakzin:

33 * Anutu kalem mõriamñangõ kõweñan mõnõ keta bõlõkñi akza. Iwinangõ jiti, mõtmõtñi mõnõ gegeni tetekõñi qahõ. Mõtkutukutuñan neñgõngita õngõngõñi ketanji akza. Yanõn keunini kewõta jim tekõmakzawi, neñõn mi lõkñanõk jim asarim tekõbingõ osibin. Malmalninañgõ kõna arengõmakzawi, miangõ kõnanji mõnõ mõt kewõta miwikñaim tekõbinañgõ dop qahõ.

34 * “Kembugõ urukõnõmñangõ areni mi ambazip kõrekñan mõt yakõbingõ osiba mala korin. Kunñan kun goro wanjimawanjõ dop qahõ.”

35 * “Gõlme ambazip kalem anjgumakzinmõ, yambuk mewõ akingõ osiba mala korin.

Yuai wanjiinga kitipñi qahõ melen neñjiiga õlõp dop kõl wanjiza. Yuai kun bian neñjimapkõ tosa wanjibingõ osimakzin.”

36 * Mi kewõgõra osimakzin: Yanõn yuai pakpakõ Tonji aka bõmõn jalõñi akza. Yanõn yuai pakpak nam kõliga asuhuyõk. Mi nanñi akõdamun miwikñaim wanjimapkõra aka asuhuyõk. Miangõra neñõn qetbuñanji mõpõseininga tetekõñi qahõ akõdamunñambuk ahõba õngõba ahõma. Keu mi õlña.

12

Malmalnini denõwõ malinga Anutugõrenj dop kõlma?

1 O urumelen alaurupni, Anutunõj mewõ ak kõmum neñjyõ-hangõra nõjõn mõnõ uruñini kewõ kuñgum enjizal: Iñini mõnõ ak-kõmukõmuñi mi urukõnõmñinan mõtmõriba miangõ dop kitipñi melen wanjiba waikñi memba mõpõseiba malme. Mewõyõk nanñini silenji mi Anutugõ kõtõn naluha alme. Mewõ alme ewõ, iñini mõnõ guliba sarakñi aketka Anutunõj nalukñini mi ehi dop kõli sihimñi mõrakña.

2 Mutuk gõlmegõ ahakmeme bõlõñangõ areni wuatangõba malgetmõ, nalõ kewõne mewõ kude toroqeba ahakje. Mewõ qahõpmõ, mõnõ urumõtmõtñinan kõlõñaiiga letota malme. Mewõ mala Anutunõj enjõra

* 11:27: Jer 31.33-34 * 11:33: Ais 55.8 * 11:34: Ais 40.13 * 11:35: Job 41.11 * 11:36: 1 Kor 8.6

sihimñi denöwö mötzawi, mi jaruba ölop köhöiba kewöta miwikñaime. Mi miwikñaiba miangö dop ahakñe ewö, mönö köna ölopñi wuatangögetka dop köl wangii aködamunñinambuk ahakñe.

³ Siksauk lañ malbepuköra keu kun jimam. Anutunöñ kalem möriam ningiiga miangö qakñe kinda körek engöra kewö jizal: Inini mönö nannini mötket öngöngöñi qahö akñapmö, mohot mohot inini mönö törörök möt kutum anguba malme. Anutunöñ mötnarip neñgiiga miangö ölni asuhumakzawangö dop mönö nannini kewöt anguba miangö dopkeu jiba malme.

⁴ *Miangö könañi kewö: Sileninan mohot akzapmö, sile kitipnini mi gwötpuk. Kitipñi pakpak mienön nup mohot miyöhök qahö memakze.

⁵ Miangö dop urumelen ambazip neñön mewöyök gwötpuk maljinmö, töndup Kraistpuk qekötahöba kinda sile ewö ölni mohot akzin. Mohot akzinmö, nannök nannök neñön mönö toroqem anguba mohotñe nup meinga dop köli kinjin.

⁶ *Anutunöñ kalem möriamñi neñgiyöhangö dop nup memegö mötmöt kalem murutñi murutñi buña qem anguba maljin. Kunöñ kezapqetok nupkö mötmöt kalemñi buña qem anguza ewö, yañön mi mönö nupnöñ alakña. Mötnaripñan töndangöm wangii-makzawangö dop nupnöñ ala Anutugö keunji jiba malma.

⁷ Kungöra welenqeqe nupkö mötmöt kalemñi wangiyök ewö, miangö dop mönö tosatñi pöndañ bauköm engiba malma. Kungöra böhi qaqazu nup memapkö mötmöt kalemñi wangiyök ewö, yañön mönö memburik-qemburikñi qahö pöndañ tosatñi kusum engiba malma.

⁸ Kungöra uru nangönañgö nupkö mötmöt kalemñi wangiyök ewö, yañön mönö pöndañ kapañ köla ambazip uruñini kunguba nangöm engiba malma. Tosatñan yuaigöra mözöröngöba osigetka kungöra i nangöm engimapkö mötmöt kalemñi wangiyök ewö, yañön mönö kongwarakñi qahö pöndañ nangöm engiba malma. Kungöra galömkölköl nupkö mötmöt kalemñi wangiyök ewö, yañön mönö zeñ kinda tosatñi galöm köl engiba malma. Kungöra urukalem nupkö mötmöt kalemñi wangiyök ewö, yañön nup mi mönö sösongai qakñe memba malma. Mewö.

Urukalemgö könañi törörök wuatangöme.

⁹ Mönö geñmoñ mosöta törörök urukalem ak anguba malme. Bölöñi sisit memba andö qeba malme. Ölopñangöra ak enjiiga miangöreñ mönö qekötahöba malme.

¹⁰ Urumelen alaurupñini mi mönö guñböñjönjön qakñe ak engiba törörök jöpaköm anguba malme. Göda qem angubingö kapañ kölakzei, miangöreñ mönö awöweñgöba möpöseim anguba malme.

¹¹ Uruñinan mönö kude sörauba löwörimapmö, köulukögetka Uña Töröñan inahöm enjiiga urukönöpnöñ kinda Kembangö nup memba malme.

¹² Jörömqöröm aka sösongainöñ malme. Kahasililiñ möta mökösoñda malme. Mönö böñ kinda Anutu köuluköba malme.

¹³ Anutugö ambazip sarakñan yuaigöra osizei, i mönö bauköm engiba malme. Mönö ambazip köl öröm engiba mohotñe tata nene nem sösongai ahakñe.

¹⁴ *Sesewerowero ak engimakzei, ambazip mi mönö kude qesuahöm engimemö, mönö Anutu köulukögetka kötuëtköm engimakña.

¹⁵ Söngaizei, yembuk mönö bauköba söngaim. Sahötzei, yembuk mönö bauköba sahötme.

* **12:4:** 1 Kor 12.12 * **12:6:** 1 Kor 12.4-11 * **12:14:** Mat 5.44; Luk 6.28

16 *Mönö urumohot ak anguba luainöŋ malme. Nanŋinanğöra mönö kude mötket öngöma. Jakbak-öranğöra kude akŋemö, ambazip eretŋi mönö ala ak enğiba malme. Nanŋinanğöra mötketka mötkutukutu ambaziwa maljeanğö dop kude akŋa.

17 Jinöŋ jibi, nuŋgunöŋ guhubi, aknöŋ aki mi kungöra kude akŋe. Ambazip körekŋan silik tosatŋi mienğöra mötketka ahakmeme ölöŋŋi akzei, mi mönö kapan köla memba malme.

18 Yuai kungöreŋ qahö qaköze ewö, mönö köhököhöi ahöm enğizawanğö dop kapan köla ambazip körek yembuk luainöŋ malme.

19 *Keu kun mi Buŋa Kimbinöŋ kewö ohoget ahöza, “Nöŋön mönö bölöŋanğö likeŋŋi melenğiba qakŋine öngöma. Mi nöŋö nuwa. Kembu nöŋön mewö jizal.” Mianğöra wölböt alaurupni, inini nanŋinak bölöŋanğö likeŋŋi kude melenğemö, mi Anutugöra mosötketka irimŋan seholiiga enğö kitipŋi melenğda meköm enğima.

20 *Mianğöra mi nanŋinak kude melenğemö, Buŋa keu ki mönö wuatangöba malme, “Kerökan nenegö kömuza ewö, i mönö nene gumohom wanğiman. Göhö kerökan ogö mötza ewö, i mönö o wanğinöŋga nema. Mewö aka göhöreŋ silik ölöŋŋi mianğön mönö uru kuŋgum wanğinöŋga gamuŋi möta mosötpawak.” Keu mi mönö wuatangöba malme.

21 Kunŋan silik bölöŋi mianğön luhut al gihibapukmö, nangak mönö silik ölöŋŋi aka mianğön luhut al wanğiba silikŋi bölöŋi mi koyonaniman. Mewö.

13

Gawman yeŋgö keu bapŋine anda tem köla malme.

1 Gawman kun mi nanğök qahö asuhuyökmö, Anutu, kukösum Toŋi yaŋön mönö gawman kuŋgui mianğö dop ketaŋamninan kukösum qakŋe kinda galöm köl enğimakze. Jimkutukutu nupkö kondotkondotŋi mi Anutu. Mianğöra inini körek mönö nanŋini gawman yeŋgö keu bapŋe anda malme.

2 Könaŋi mewö mötzeanğöra aka kunŋan jimkutukutu galöm yeŋgö kukösumŋini qetaljawi, yaŋön Anutunöŋ malmalgö areŋi alöhi, mönö mi qetalja. Jimkutukutu Toŋi qetaljei, Anutunöŋ yeŋgö keuŋini jim teköba likeŋŋi melenğ enğiiga lömböt miwikŋaime.

3 Galömkölköl yeŋön ambazip ahakmeme bölöŋi ahakzei, mi keŋgöt mötmöt ak enğimakzemö, ölöŋŋi ahakzei, mi mewö qahö ak enğimakze. Mianğöra galöm kukösumŋinambuk yeŋgö keŋgötki mötmangö mötzan me qahö? Mi qahö mötmangö mötzan ewö, mönö ahakmeme ölöŋŋi aka memba malnöŋga möpöseim gihimakŋe.

4 Gawman yeŋön mönö Anutu welenŋi qeba mem ölöwak gihibingö mötze. Mewö mötzeanğöra ambazip bölöŋi akzei, mönö mianğö likeŋŋi melenğda qakŋine öngöi lömböt mötmegöra kinje. Anutugö welenqequeurupŋi aketka buldömingö sou ketaŋi enğiyöhi, mi öne töhöŋ qahö memba malje. Mianğöra yuai bölöŋi akzan ewö, mönö keŋgötki möta malman.

5 Lömböt qakŋine öngöi mötpepuköra mönö gawman jitŋini tem köla malme. Mianğörök qahöpmö, Anutugö jeŋe mohot dop kölmapköra mönö mewö ahakŋe. Qahö tem kölgetka Anutugö irimŋan sehoolii jii urukönömŋinan mewö mötketka uruŋinan bölibapuköra mönö mewöyök gawman yeŋgö keu bapŋe anda malme.

* 12:16: Qam 3.7 * 12:19: Dut 32.35 * 12:20: Qam 25.21-22

⁶ *Gawman yenön mönö Anutugö nup bahöñi kun memba miangörej zen kinda galöm köl engimakze. Nupñini mi memegöra enön mönö bauköm engiba takis mewöyök alakze.

⁷ Gawmangö takis aka kötön könañi könañi dawik engimegö jimakzei, mi mönö körek miangö dop engimakñe. Gawmangö takis könañi könañi pakpak mi mönö törörök engimakñe. Gawmangö nup meme ambazip yengöra mönö ewe ala göda qem engimakñe. Mewö.

Nalö ketanjan dopdowiiga mönö jöpaköm anğuba malme.

⁸ Mewö aka kungörej tosa kun embuk kude ahöi malme. Töndup engö tosañini mohok-kun mi nalö dop kewö ahöza: Injini mönö uru jöpaköm anğuba malme. Kunjan tosañi jöpaköba urukalem ak engimakzawi, yañon mönö Köna keu wuatangöm tekömakza.

⁹ *Jöjöpañ keu bohonñi kewö, “Nangi jöpaköm anğumakzani, miangö dop mönö tosañi pakpak jöpaköm engimakñan.” Keu miangö uruñe jöjöpañ keu kewöñi ahöze, “Sero yongorö kude akñan,” “Ambazip kun kude qenöñ kömuma,” “Yongorö kude meman,” “Yuaigöra mönö kude köpösöngöman.” Mi aka jöjöpañ keu tosañi pakpak mi mönö keu bohonñi miangö nemböñe akze.

¹⁰ Ambazip kun jöpaköm wangizan ewö, yengöra mönö yuai bölöñi kun kude ak wangiman. Miangöra urukalem aka mewö miangön mönö jöjöpañ keu körek pakpak tem köla wuatangö-makzan.

¹¹ Nalö kianğö könañi mötzeangöra mönö ahakmeme mewöñi aka memba malme. Mutuk Kraist möt nariba urunini meleşnini, nalö miangörejök könahiba mala koringa Kembunöñ meköm neñgii Suepnöñ öngöbini, miangö nalöñan mönö dowe ahöza. Miangöra injini gaun ahözei, miangörejök imbiñini möta wahötmeangö nalöñan mönö lök kam kuñguza.

¹² Sunğem köröñi malinga wehön jeñi jililingöba koriga asarimangö akza. Miangöra söñaupkö ahakmeme mi mönö tömbulujaniget geiga asakñangö bim qebingö aködamunñi mi mönö memba kölget geiga kinbin.

¹³ Asakñangö uruñe maljinangö dop mönö ahakmeme sarakñi aka memba malbin. Tosatñan közölömbuan pati ala bau numbu namba o köhöikñangöra enololon ahakze. Sero namböñnamböñ aka lañ ambi yongorö örömakze. Julia denđa anğururuk aka anğöhöba urunöñ mututqutut möta andönöñ qem anğumakze. Ahakmeme mewöñan mönö qahö dop kölja.

¹⁴ Urusilegö sihim kömbönañini bölöñan guliba wahötketka miengö sihimñini tem köl engibepuköra mönö mi kude kezap ala mötmörim engimakñe. Mewö qahöpmö, Kembu Jisös Kraistkö ahakmemeñan mönö timbi saiwanñini aiga mi maluku ewö löngöt anğuba malme. Mewö.

14

Alaurup lölöwöröñi i kude jim engiba malme.

¹ *Kungö mötnariñan lölöwöröñi aiga i mönö köyan köla köl öröm wangiba malme. Yambuk eraum möta kösawörañ keugöra jitnakölik kude ahakñe.

² Tosatñan mötnariñinanğö dop nene pakpak ölop nemakzemö, tosañi yengö mötnariñinan lölöwöröñi aiga nene piakñanök nemakze. Uruñinan tölöhobapuköra uruyahöt aka sömbup tandö lopionğö naluk alalñi mi sisitñi memba yöha töhönök inannik ohom nemakze.

³ Nene pakpak nemakzeañon mönö alaurupñini yöhayök nemakzei, mi jiji-wilit kude ak engimakñe. Anutunöñ alaurupñini nene pakpak nemakzei, mi

* **13:6:** Mat 22.21; Mak 12.17; Luk 20.25 * **13:9:** Eks 20.13-15, 17; Dut 5.17-19, 21; Lew 19.18 * **14:1:** Kol 2.16

mewöyök “Dop kölje,” jiba köyan köl engimakza. Mianğöra yöhayök nemakzei, eñön mönö alaurupñini yeñgö keuñini kude jim teköme.

⁴ Göñön mönö niñia aka kungö welenqeqeñi jim teköm wañgibanak? Yanñon mönö nanñi toñangö jeñe keuñangö likepñi jiiga kewöta jim teköiga dop kölga kinma me lömböt qakñe öñgöiga etma. Kembunöñ mönö köhöiba böñ qeba kinmapköra nañgöm wañgimakña. Mianğöra mönö ölop böñ qeba kinma.

⁵ Tosatñan silim pakpaköra mötmörigetka tandökñini öröröñ ahözemö, tosatñan silimñi silimñi kewöta silim kungö mötket öñgöiga qainñi kun aiga silim tosatñan mianğö nemböñe akze. Inñini mohot mohot mönö nanñini mötmötñini qekötahöba mianğöreñ uruyahöt körek yaköriba awösamakak kinda malme.

⁶ Tosatñan silimñi silimñi kewöta öñgöba eta alakzei, yeñön mi mönö Kembu qetbuña wañgimapköra aka ahakze. Tosatñan sömbup nemakzei, yeñön mönö Anutu möpöseiba Kembunöñ mewö qetbuñañambuk akñapköra nemakze. Tosatñan sömbupkö sinji malakzei, yeñön mönö Kembunöñ qetbuñañambuk akñapköra aka mi ahakze aka mewö mala Anutu möpöseimakze.

⁷ Neñgöreñök kunñan kun mönö nanñangörök qahö malja aka nanñangörök qahö kömuma.

⁸ Mianğö könañi kewö: Jebuk malbin ewö, mönö malmalnini Kembugöra köleñda malbin. Kömumbin ewö, mönö Kembugöra kömumbin. Mianğöra malbin me kömumbin ewö, mönö Kembugö buñaya akzin.

⁹ Kraistnöñ mönö kömugeru aka jebuk maljini, körek neñgö Kembunini aka malmapköra kömumba guliyök.

¹⁰ *Anutunöñ mönö körek neñgüañgita nanñi keu jakeñe al neñgiiga kinbin. Mianğöra tosatñi eñön mönö niñia aka urumelen alaurupñini jim teköm engimakze? Mewöyök alaurupni tosatñi eñön mönö wuanöñgöra urumelen alaurupñini tosatñi mi jijiwilit ak engimakze? Jujul silikñini mianñon mönö qahö dop kölja.

¹¹ *Mianğö keuñi mi Buña Kimbinöñ kewö ohoget ahöza, “Kembu nöñön mal köhöizali, mianğö dopkeu öl töhöññi kewö jizal: Ambazip körek pakpak inñini mönö nöñgö jemesoholne simin köla jitñinan Anutu ni möpöseim niñgime.”

¹² Keu mianğö dop nini körekñan mönö inanñök inanñök ahakmemeni-nañgö kösohotnini mi Anutugöra jim asariinga kewöt neñgima. Mewö.

Kunöñ tötañgöba et qebapüköra mötmörime.

¹³ Mianğöra mönö kude toroqeba jim bölim añguba keuñini jim teköme. Urumelen alaurup yeñgö könanöñ tötañgöba et engubapükö yuai kun mönö kude alakñe. Mianğö keuñi mönö kapan köla jiba jöhöme.

¹⁴ Nene yuai kunöñ nanñanök añgöjörakñambuk qahö akzapmö, ambazipnöñ yuaigö mötketka añgöjörakñambuk akzawi, yeñgörohök mi añgöjörakñambuk akza. Nöñön Kembu Jisösbuk kinda keu mi möta mianğöra uruyahöt kun qahö akzal.

¹⁵ Anutunöñ nene pakpak amöt qem teköi sarakñi akzemö, töndup alaurup tosatñan döñqizizinnini aka sömbup qahö nemakze. Kraistnöñ yeñgöra aka kömuiga tosatñi eñön mönö wuanöñgöra sömbup namba mewö mianñon yeñgö uruñini mem bölimakze? Mewö nanñini imbi-imbi aketka urumelen alaurupñinan mianğöra wösöbirik ahakzei, mewö mönö urukalemgö könañi mi qahö toroqeba wuatangömakze.

* 14:10: 2 Kor 5.10 * 14:11: Ais 45.23

¹⁶ Mötmöt ölopni ahöm engizapmö, mianjö qakne ahak-memeninan lan aketka tosatnan mianjöra sirongen keu jiba jim engimakze. Mewö asuhubapuköra galöm mem anguba malme.

¹⁷ Wani neneya nembini aka wani oya nembini, mianjön Anutu bemtohojangö aiwesökni qahö akza. Yuai mianjön mönö eretni akza. Yangö bemtohoj uruje malmalgö ölni mi kewö: Uja Töröjan inahöm neñgiiga ahakmeme diñdini wuatangöinga luai qem neñgiiga söngaiba maljin. Mianjön mönö aiwesök muñgemni akza.

¹⁸ Denike yeñon mewö aka Kraistkö welenni qemakzei, yeñon mönö Anutugö jeñe dop kölgetka ambazipnön keunini mötketka dop köl engimakza.

¹⁹ Mianjöra nini luai qem anguinga urumohot sehimapköra kapan kölbin. Mewö mianjön mönö urunini möhamgöba mem köhöim angubin.

²⁰ Anutunön nene pakpak amöt qem teköi sarakni akze, mi mötzinmö, kunön sömbup me nene kun neiga alañangö urujan mianjöra böliiga urukönöpni ahuiga singisön-dokpuk akzawi, mianjön mönö qahö dop kölja. Kunjan tosatni yeñöra qahö mötmöriba nanñangörök möta lan nezawi, yañon mönö mewöyök singisöndokpuk akña. Mianjöra Anutunön yeñö urujine nupni meyöhi, tosatni eñon mönö nupni ölopni mi nenegöra aka kude mem bölime.

²¹ Mianjöra urumelen alaurupni yeñöra aka sömbupkö singi mala wain o mi kude namba malme. Mewö mianjön mönö mohotne ölöwakne. Mewöyök urujinan yuaigöra aka böliiga singisöndokpuk aka löwöribawak, eñon mi kude akne. Mewö mönö mohotne ölöwakne.

²² Kösaörañ keugö mötnaripni mewö me mewö ahöm gihizawi, mi mönö Anutugö jemesoholne angön köla malman. Kunjan keu kungöra “Dop kölja,” jiba mianjören qekötahöba möt köhöiba mianjöra nanñi qahö jim teköm anguzawi, yañon mönö simbawon akza.

²³ I me wai mötnarip qakne qahö kinda ahakzini, mi pakpak mönö singisöndok akza. Mianjöra kunjan nene kungöra uruyahöt aka töndup mi neza ewö, yañon mönö mewö singisöndok akña. Mötnarip qakne qahö kinda nezawangöra Anutunön mönö yangö keunji jim teköi qaköba lömböt miwikñaima. Mewö.

15

Mönö Kraistkö mötmötñi wuatangöba malme.

¹ Mötnaripninan köhöikni akzawi, neñon mönö naninangörök lan söngaiba nanini imbi-imbi malbinbuk. Tosatni yeñö mötnaripninan lölöwöröñi aiga tötopinpinön köna ongita törörök qahö wuatangömakzei, neñon i urukalem ak engiba lömbötñini bisimegö bauköm engibin.

² Nini mohot mohot mönö alaurup-ninan ölöwakneangö dop mötmöriba ak engimakin. Mewö ak engiba urujini möhamgögetka köhököhöi miwikñaima.

³ *Kraistnön mewöyök nanñangörök nanñi imbi-imbi qahö söngaiba ahökmö, Buña keu kianjö dop ak wangigetka malök, “Ambazip keu töhören jiba gi jim gihimakzei, yeñö keuninan mönö nuñguiga sihimbölöñi mörakzal.” Keu mewö ahöza.

⁴ Anutunön neñöra sihimni kewö mörakza: Neñon kapan köla köhöiba kinda Buña Kimbi oyoñninga urunini nanjöiga mewö mianjön jörömqröm aka malbin. Mianjöra Buña keu pakpak mönöwök ohogeri, Anutunön mönö mianjö dop kusum neñgimangö mötza. Mianjöra mi ohoget ahöza.

* 15:3: Sum 69.9

⁵ Anutunöŋ mönö nanŋak uruŋini nanŋöiga ölop kapan köla kin köhöime. Yaŋön mönö Uŋaŋi enŋiiga inahöm enŋiiga sutŋine uru jöhöjöhö aka Kraist Jisösgö mötmötŋi wuatangöba malme.

⁶ Mewö mala ölop urumohot qakŋe numbuŋini mindiriba Anutu, Kembunini Jisös Kraistkö Iwiŋi mi möpöseiba malme. Anutunöŋ enŋön mewö aka malmegöra mörakza. Mewö.

Ölöwak Buŋanöŋ kantri tosatŋe anda kayök.

⁷ Kraistnöŋ iŋini möt anŋön köla köyan köl enŋimakzawi, miangö dop iŋini mönö mewöyök köyan köl anŋuba malme. Anutugö qetbuŋaŋan sehimapköra mönö mewö aka malme.

⁸ Nöŋön keu ölni ki jimam: Anutunöŋ keuŋi keuŋi Juda könagesö nenŋö bömönurupnini yengöra jiba jöhöyöhi, mianŋön ölnambuk akŋapköra mörök. Mianŋöra Kraist melaiiga Anutugö Buŋa keu ölnan köhöimapköra aka Juda nenŋö sutŋine eta welen qem nenŋiba malök.

⁹ *Juda nini welen qem nenŋiba malökmö, kantri tosatŋi yeŋön mewöyök yaŋgö ak-kömukömuŋi möta mianŋöra Anutu möpöseiba malje. Mianŋö keuŋi mi Buŋa Kimbinöŋ kewö ohoget ahöza, “Mianŋöra nöŋön kantri tosatŋi yengö sutŋine mala möpöseim gihiba qetbuŋagan sehimapköra liŋet kölakŋam.”

¹⁰ *Mianŋö keuŋi kun mi kewö jiba ohoget ahöza, “Anutunöŋ Juda nini möwölöhöm nenŋiiga könagesöŋi aka söŋgaimakzin. Kantri tosatŋi iŋini mönö nembuk toroqeba söŋgaiba köiranŋ ala malme.”

¹¹ *Mianŋö keuŋi kun mi kewö, “Kian kantrigö kambu pakpak iŋini mönö Kembu möpöseiba malme. Gölme dop maljei, iŋini mönö körek ‘Anutu saiwap!’ jiba liŋet köla malme.”

¹² *Kezapqetok azi Aisaia yaŋön mewöyök mianŋö keuŋi kewö jii ahöza, “Azi qetŋi Jesi yaŋgö andöjalöŋan mönö sötni jula wahöta ambazip gölme dop galöm köl enŋima.

Mewö ak enŋiiga jörömqörömŋini yaŋgörenŋ ala bauköm enŋimapköra mamböta malme.”

Keu walŋi mianŋön mönö nalö kewöŋe ölnambuk ahakza.

¹³ Uŋa Töröŋaŋgö ösumŋan mönö nanŋöm enŋiiga jöröm-qörömŋinan köhöiba pöwöwöm akŋapköra mötzal. Mianŋöra jörömqöröm Tonŋi Anutu yaŋön mönö luai qem enŋiba söŋŋai pakpak mianŋön uruŋini kokolak qema. Mewö köuluköbiga ölop Anutu möt narim waŋgiba oyaenŋoyaenŋ akingö mamböta malme. Mewö.

Keu köhöikŋi mi denöwögöra ohozal?

¹⁴ O urumelenŋ alaurupni, nanak enŋöra kewö möt köhöizal: Iŋini mönö tönpin qahö maljemö, Anutunöŋ yuai pakpak ölopŋi uruŋine ali kokolak qeiga mötmöt könaŋi könaŋi miwikŋaiba mianŋön ölop goro qeba kusum anŋubinaŋgö dop akze.

¹⁵ Mewö akzemö, töndup keu mi ölum enŋubapuköra möta miengö könaŋini mi kunbuk köl gulim enŋizal. Anutunöŋ kalem möriam niŋgiiga mianŋö qakŋe kinjalangöra mönö awösamkakak qakŋe keu köhöikŋi tosatŋi ohom enŋizal.

¹⁶ Mianŋö könaŋi kewö: Anutunöŋ kian kantri enŋön uruŋini melengetka Uŋa Töröŋan mem sarahim enŋimapköra mörakza. Mutuk jöwöwöl ohogetka köwakŋan öŋgöi Anutunöŋ söŋgaizapma, mianŋö dop nalö kewöŋe Anutunöŋ ambazip gölme dop buŋaŋi aketka enŋeka söŋgaimangöra awöweŋgömakza.

* 15:9: 2 Sml 22.50; Sum 18.49 * 15:10: Dut 32.43 * 15:11: Sum 117.1 * 15:12: Ais 11.10

Miangöra Ölöwak Buñani kantri tosatni yengö sutñine jim sehimamgö jiba nupñi qakne aliga miangö dop urugö nup galöm aka Kraist Jisösgö welenni qemakzal.

¹⁷ Miangöra Kraist Jisösbuk qekötahöba kinda Anutugö nupñi membiga qetbuña ninggiiga sileni memba öngöba awösamkakak kinjal.

¹⁸ Kraistnöñ kantri tosatni yeñon Anutugö jitiñi tem kölmegöra möta sölölohöba kuñgum ningimazkawi, miangön mönön nam köl ninggiiga keuni jiba ahakmemeni ahakzal. Keu tosatni lañ jim sehisehigö awösamkakakñi mi qahö ahöm ningiza.

¹⁹ Uña Töröñangö ösumñan mönön nam köl ninggiiga angöletot aiwesök kukösumñinambuk asuhuget. Nöñon Jerusalem siti mosöta kantriñi kantriñi liliköba anda mala mala Yuropkö siti qetñi Ilirikum miangöreñ angoral. Mewö gölme dop liliköba Kraistkö Ölöwak Buña mi jim asarim engim teköyal.

²⁰ Kunöñ tandö kuñguiga kunñan kaba nanñi miriñi miangö qakñe memba mönön keuñambuk akña. Miangö dop kunöñ Kraistkö keuñan mötnaripkö tandö lök kuñgui kinöhi, nöñon mönön kaba yangö tandö qakñe töndangöba kinda uruñini toroqeba möhamgöba mem köhöim engimamgö tököba malal. Urugö nup mutukñi memba miangön aködamuni miwikñaimamgö kapañ köla malal. Miangöra ambazip denike yeñon Kraistkö qetñi qahö möta tönpin malgeri, nöñon Ölöwak Buña yengöra jim asarimamgö awöweñgöba malal.

²¹ *Miangö keuñi Buña Kimbinöñ kewö ohoget ahöza, “Denike yeñon keuñi qahö jiget mötkeri, yeñon mönön mala i ekñe. Denike yeñon könañi mutuk qahö möta tönpin malgeri, yeñon mönön mala mi möt asarime.”

²² *Nup mewöñan jöhöm ningiyöhangöra mönön nalö dop engöreñ kamamgö osiba malal. Mewö.

Polnöñ Rom anmamgö areñi alök.

²³ Mewö malalmö, liliköba urukungukungu nup mutukñi memba gölme pakpak möt engizini, miangöreñ mi mem teköba malal. Urugö nup mutukñi memamangö gölmeñi mi nalö kewöñe kunbuk qahö ahöza. Mewöyök inñi engekñamgö sihimñi möta malbiga yambu (yara) gwötpuk lök teköyök.

²⁴ Miangöra kantri qetñi Spein anmami, miangö könañe mönön engöreñ kamamgö areñi ala engekñamgö jörömqöröm aka kewö mötzal: Engeka embuk sösongai aka borom kun köisirik tatpiga bauköm ningigetka ölop köna toroqeba Spein anmam.

²⁵ *Mewö mötzalmö, nalö kewöñe Jerusalem sitigö könagesö sarakñi nanñom engibingöra miangöreñ anmam. Miangöreñ andagun engöreñ kamam.

²⁶ Masedonia aka Akaia prowins yahöt mietkö urumelen könagesö kambuñi kambuñi yeñon mönön Jerusalem sitigö ambazip sarakñi bauköm engibingö keu jöhöget. Anutugö ambazip sarakñi wanapñi maljei, mönön yengöra keu jöhöba naluk gwötpuk ketañi ala mindirigetka mi membagun anda engimam.

²⁷ *Mewö akingö uru sösongai möta keu jöhöba mindimindiri naluk ketañi mi alget. Mewö almegö tosa ahöm engiiga algetka ölna dop kölja. Anutunöñ Juda könagesö kötuetköm neñgimamgö keuñi jii ahöiga kötumötuet miangön kian kantriñi kantriñi dop köla qakñine öngöi malje. Miangöra kian kantri yengöreñ tosa ahöiga likepñi melenja kalemñinan Juda könagesögö wanapñi bauköm enigetka dop kölja.

* 15:21: Ais 52.15 * 15:22: Rom 1.13 * 15:25: 1 Kor 16.1-4 * 15:27: 1 Kor 9.11

²⁸ Nöñön kalem mi memba anda böröjine albi nupni mianjön teköiga mianjö andöje engömosöta kusukñanök engören kaba engekagun toroqeba Spein anmam.

²⁹ Engören kamami, nalö mianjören mönö Kraistkö kötümötuetni mi körek memba kaba engimam. Mewö möt yaközal.

³⁰ O urumelen alaurupni, nöñön Kembu Jisös Kraistpuk qekötahöba kinda kewö uru kungum engizal: Uña Töröñan jöpaköba nañgöm engimakzawanjö dop mönö nöñgöra Anutu köuluköba malme. Aum-mörimakzali, mianjören mönö uruka-lemñinan bauköm niñgiba malme.

³¹ Judia prowinsnöñ anda ambazip Kraistköra yangisen ahakzei, yengö böröjine gebilenbuköra mönö Anutugö köulukögetka sel jöhöm niñgibawak. Mewöyök naluk kalem ketani memba Jerusalem anda ambazip sarakni yengö böröjine albiga dop köli sihimni mötmegöra mönö köuluköba malme.

³² Mewö köulukö-getka Anutunöñ sihimni mötza ewö, nöñön mönö sösöngai qakne engören kaba embuk köisirik tata körö-ölöwak qem niñgigetka malmam.

³³ Luai Tonji Anutu yanjön mönö körek embuk kinma. Keu mi ölna.

16

Yaizözkök keu teteköñi

¹ Alanini Fibi (Foibe) yanjön Senkria urumelen könagesögö nup meme ambia akza. Yanjön Rom engören kamawi, i köyan kölmegöra mönö qesim engiba böröjine aljal.

² Yanjön ambazip gwötpuk aka ni mewöyök bauköm neñgiba malök. Mianjöra Anutugö ambazip sarakñan alaurupnini köl öröm engimakzini, mianjö dop Fabinöñ kaiga i mönö Kembugö qetne köuluköba köl öröm wanjime. Engören kaba yuai kungöra osibawak, mianjören mönö bauköm wanjime.

³ *Awanömyahöt Prisila aka Aqila Kraist Jisösbuk kinjahori, neñakyahötni yetköra mönö nöñgören yaizözkökni jigetka mötmahot.

⁴ Yetköñ mönö nöñgöra aka malmalñiri kölenja kömumbitkö ahot. Nöñönök qahö möpöseim etkizalmö, kantri tosatne urumelen könagesö kambuñi kambuñi yanjön mönö mewöyök yetköra saiwap jimakze.

⁵ Urumelen könagesö mirinire tokomakzei, yengöra mewöyök mönö nöñgö yaizözkökni jigetka mötme. Eisia prowinsnöñ nup membiga ölni mutukñan asuhuiga Epainetus yanjön urunji melenja Kraistkö buña ahöhi, wölböt alani yangöra mönö nöñgören yaizözkökni jigetka mötma.

⁶ Marianöñ engöra aka nup ketani memba malöhi, yangöra mönö nöñgören yaizözkökni jigetka mötma.

⁷ Andronikus aka Junias tinitosolomyahötni yetköñ mutuk Kraistkören qekötahöyohotka nöñön yetkö andöñire uruni melenbiga mianjö andöje nömbuk kösö mire malin. Aposol yanjön yetköra mötketka sutñine öngöñgöñi akzahot. Yetköra mönö nöñgören yaizözkökni jigetka mötmahot.

⁸ Wölböt alani Ampliatus Kembubuk kinjawi, yangöra mönö nöñgören yaizözkökni jigetka mötma.

⁹ Neñaknini Urbanus Kraistpuk kinjawi aka wölböt alani Stakis yetköra mönö nöñgören yaizözkökni jigetka mötmahot.

¹⁰ Apeles Anutunöñ esapesap wanjiiga dop köli Kraistpuk qekötahöba kinjawi, yangöra mönö nöñgö yaizözkökni jigetka mötma. Aristobulusbuk miri mohot maljei, yengöra mönö nöñgören yaizözkökni jigetka mötme.

* 16:3: Apo 18.2

11 Tinitosolomni Herodion yangöra mönö nongören yaizözköknj jigetka mötma. Narsisusbuk Kembu qekötahöba miri mohot maljei, yengöra mönö nongören yaizözköknj jigetka mötme.

12 Trifina aka Trifosa ambi yahöt mietkön nup ketanji memba Kembubuk kinjahori, yetköra mönö nongören yaizözköknj jigetka mötmahot. Wölböt ambi alani Persis yanön Kembugöra nup keta bölökni memba maljawi, yangöra mönö nongören yaizözköknj jigetka mötma.

13 *Rufus yanön Kembugö nupni ölop kötökni memakzawi aka yangö namni nalö dop ni tok nahönni ewö köyan köl ningiba malöhi, yetköra mönö nongören yaizözköknj jigetka mötmahot.

14 Asinkritus, Flegon, Hermes, Patrobas, Hermas aka urumelen alaurup tosatni yembuk maljei, yengöra mönö nongö yaizözköknj jigetka mötme.

15 Filologus, Julia, Nereus nenjambuk aka Olimpas aka ambazip sarakni tosatni pakpak yembuk maljei, yengöra mönö nongören yaizözköknj jigetka mötme.

16 Urumelen alaurup sutjine mönö angum anguba nemböjini suhuba jölöjini jiba malme. Kraistkö urumelen könagesö pakpak yenön mönö yaizözköknj algetka engören kaza. Mewö.

Qamban keu teteköji

17 O urumelen alaurupni, nöjön urujini kewö kunguba jizal: Ambazip tosatnan uru mendenmenden asuhumapkö nam kölakzei, yengöra mönö je galöm mem anguba malme. Urumohotkö silik ölopni kusum engigetka mötzemö, keu mi qetala kösawöran keu tosatni miajön urujini kungugetka bölii qaköba erakze. Ambazip mewöjini mi mönö engömosöta tikep malme.

18 Ambazip mewöjan mönö nanini Kembunini Kraistkö nupni qahö memakzemö, nanjini sihimjinangö dop asuhumapköra tuaköpek jiba nanjini welen qem angumakze. Kelök keu ölopni ölopni nahömjambuk jiba ambazip genjoni qahö yengö urujini kunguba tilipköm engimakze.

19 Injini Ölöwak Buja tem köla wuatangömakzei, keu mi körek nenjö kezap-nine geiga mötzin. Miangöra nöjön engöra aka önöjini qahö söngaimakzal. Mewö akzalmö, injini kewö aka malmegöra mötzal: Mönö bölöjini akingö mötkutukutuñini mosötketka etma. Ölopni akingö mötkutukutuñini mi mönö pöndan köl guliba mem qarime.

20 Luai Tonji Anutu yanön mönö Satan ösumok töjöhöi engö bapjine eri köiran köla söngaiba malme.

Kembunini Jisösgö kalem möriamjan mönö embuk ahöma.

21 *Nongö nenjakni Timoti yanön mönö yaizözköknj ali engören kaza. Nongö tinitosolomurupni Lusius, Jeison aka Sosipater yanön mewöyök yaizözköknj algetka engören kaza.

22 Tertius nöjön Polgö keunji möta kimbi ki ohozali, nöjön mewöyök Kembubuk kinda yaizözköknj albige engören kaza.

23 *Gaiusnöj mirinji jim teköi malbiga urumelen könagesö pakpak yanön mewöyök ki kaba tokogetka nene köisirik al nenjimakzawi, yanön mönö yaizözköknj aliga engören kaza. Erastus yanön siti pomjanjö ofis uruje takis monen galöm kölakzawi aka urumelen alanini Qartus yetkön mönö yaizözköknj alohotka engören kaza.

24 Kembunini Jisös Kraistkö kalem möriamjan mönö embuk ahöma. Keu mi ölja.

* 16:13: Mak 15.21 * 16:21: Apo 16.1 * 16:23: Apo 19.29; 1 Kor 1.14; 2 Tim 4.20

Kembu möpöseiba kewö köulukömakzal:

²⁵ Ölöwak Buᅇa keu ölni mi möpᅇaᅇgö möpᅇeyök mala kotketka mianᅇöreᅇ tölapᅇe ahöyök. Mewö ahöiga Jisösnöᅇ eta indela jim asariiga möta jim sehimakzal. Buᅇa keu mianᅇgö dop Anutunöᅇ mönö köhöiba mötnariᅇᅇini mem köhöiiga ölop zeᅇ kin köhöime. Mianᅇöra neᅇön mönö Anutugö qetbuᅇaᅇi möpöseininga sehimakᅇa.

²⁶ Mutuk Buᅇa keu ölnan asa-asambötᅇe ahöba korökmö, nalö kewöᅇe kezapqetok ambazip kulem ohoget ahözawaᅇgö dop mönö aukᅇe asuhuyök. Anutunöᅇ nalö dop mala kota teteköᅇi qahö mal öᅇgömawi, yaᅇön ambazip kambuᅇi kambuᅇi neᅇön urunini melenᅇda Buᅇa keu möt nariba tem köla malbingöra mötza. Mianᅇöra nup kewö membingö jim kutum neᅇiyök, “Inini mönö anda gölme dop liliköba Buᅇa keu jim asariba malme.” Keu mianᅇgö dop neᅇön Buᅇa keu mi ambazip kambu pakpak mötmegöra jim asariba malin.

²⁷ Anutu nanᅇök mötkutukutu Tonᅇi akzawi, neᅇön mönö Jisös Kraistkö qetᅇe yaᅇgö qetbuᅇaᅇi möpöseininga nalö teteköᅇi qahö aködamunᅇambuk ahöm öᅇgöba ahöma. Keu mi ölna.

Korint Kimbi 1 **Polnön Korint yeŋgöra Kimbi mutukŋi alök.** **Jim-asa-asari**

Polnön misin nup memba liliköiga indimŋi yahöt ahöi Grik siti Korint miangören anök. Korint mi Akaia prowinsgö siti bohonŋi. Miangö kösohotŋi mi (Apo 18.1-6) eka oyoŋme. Nalö miangören Korint mi siti keta bölökŋi. Bisnisŋini kōnaŋi kōnaŋi gwōtpuk ala meget. Korint yeŋön tandö lopioŋ aka bem kōnaŋi kōnaŋi waikŋini memba möpöseiba malget. Mōnahotŋini kōnaŋi kōnaŋi ala sōŋgaiget. Gwōtpukŋan serowilin aka malget.

Kimbi ki kewögöra ohoyök: Polnön misin nup memba liliköiga indimŋi karöbut ahöi Efesus sitinön maliga tosatŋan Korintnöhök kaba sutŋine lömböt asuhuyöhi, miangö buzupŋi jigetka mörök. Lömböt tosatŋi kewö: Urumelen kambu yeŋön deŋda simbisembel malget (1.10-4.21), serowilin laŋ aket (5.1-13), awanöm malmalgö kōnaŋan sohayök (Boŋ 7), tandö lopioŋgö bau nenegö goranora aket (Boŋ 8), semön töröŋi nenegö eŋololoŋ aket (11.17-34), zioz malmalgö areŋ qahö wuatangöba ilingösöŋ malget, kantri tosatŋangö keuŋi keuŋi aonŋit aka jiget (12-14). Tosatŋan keu kewö jiget: “Kömugeri, yeŋön kunbuk qahö wahötme.” (15.12-33) Korint yeŋön kimbi kun mewöyök ohogetka Polgören kayöhi, miangören qeqesi tosatŋi al waŋgiget, (mi 7.1; 8.1; 12.1; 16.1 miangören oyoŋman).

Polnön qeqesiŋini mi melenŋa lömbötŋinangö qamban keu eŋgiba kimbi ki ohoyök. Urukalemgö keu (Boŋ 13 mi qetpuk sorokŋi. Kōnaŋep nanŋak Korint anda eŋgekmanŋö keuŋi jiba ohoyök (16.5-7).

Buk kiangö bahöŋi bohonŋi 8 mi kewö:

Jim-asa-asari keu 1.1-9

Deŋda kambuŋi kambuŋi malget 1.10-4.21

Serowilin aka awanöm malmal 5.1-7.40

Urumelenŋö aka urumelenŋö kopa malmal 8.1-11.1

Urumelen malmal aka möpömöpösei areŋ 11.2-14.40

Kraist aka körek neŋön kömupnöhök wahötŋin 15.1-58

Judia urumelen kambu yeŋgöra naluk alget 16.1-4

Polgö areŋi aka yaizökzök keuŋi teteköŋi 16.5-24

¹ Kraist Jisösnöŋ Pol ni noholiga Anutugö jitŋangö dop melaimelai azi aposol akzal. Nöŋön urumelen alani Sostenes yambuk tatzit.

² *Anutugören kōnagesö Korint sitinön maljei, nöŋön embuk Buŋa keu er-aum mötŋingöra kazal. Kraist Jisösnöŋ inŋini eŋgoholiga yambuk qekötahögetka tök kutum eŋgiiga sarakŋi akze. Mewöyök ambazip denike yeŋön gölme dop Kembunini Jisös Kraistkö qetŋi qeta köulukögetka i aka nini mohok kembu ak neŋgimakzawi, mönö körek eŋgöra Buŋa Kimbi ki ohozit.

³ Anutu Iwinini aka Kembu Jisös Kraist yetkōn mönö kalem möriam eŋgiyohotka luainöŋ malme. Mewö.

Polnön Korint yeŋgöra Anutu kewö möpöseiza:

⁴ Inŋini Kraist Jisösbuk qekötahöba kingetka Anutunöŋ kalem möriamŋi eŋgiyöhi, miangöra mönö nalö dop eŋgöra Anutuni saiwap jiba möpöseimakzal.

⁵ Inŋini Kraistpuk qekötahöba kingetka nup memegö mötmöt kalemŋi kelenmalelen eŋgiiga mötmöt kōnaŋi kōnaŋi buŋa qem anguba ölop Buŋa keugö kōnaŋi pakpak jimakze.

* 1:2: Apo 18.1

⁶ Nini Kraistkö kōnaŋi naŋgōba jiinga keu mianğō ölnan ahuba kōhöii kinjeaŋgō dop mötmöt kalem pakpak mi enğiyök. Mianğōra Anutu möpöseimakzal.

⁷ Mianğōra nup memegö mötmöt kalem kungōra qahö osiba kinda Kembunini Jisös Kraistnōŋ kunbuk asuhumapkōra mambōrakze.

⁸ Kembunini Jisös Kraistnōŋ mem kōhöim enğiiga nalö tetekōŋe aukŋe asuhumawi, nalö mianğōrenŋ inini solanŋi aka keuŋini qahö kinda i ekŋe.

⁹ Anutunōŋ keuŋi törörök wuatanağōba baukōm enğimakŋa. Yaŋön inini nanŋi Nahōnŋi Jisös Kraist Kembuninambuk toroqeba malmegōra enğohölök. Mewö.

Kōnagesōŋinan denđa kambuŋi kambuŋi ala kinje.

¹⁰ O urumelenŋ alaurupni, nōŋön Kembunini Jisös Kraistkö qetŋe kewö uru kuŋgum enğizal: Inini mönō kōrekŋanök urumohot aka sutŋine jujul kude aka malmemö, uruŋini mindirigetka mohot aiga mötmöt mohot wuatanağōba malme.

¹¹ O urumelenŋ alaurupni, inini sutŋine aŋgururuk gwötpuk aka maljei, mianğō buzup keuŋi ambi Kloegö saiwaurup tosatŋan mönō jigetka mōral.

¹² *Kewögōra mi jizal: Enğōrenök tosatŋan kewö jimakze, “Neŋön Polgö keuŋi wuatanağōmakzin.” Tosatŋan “Neŋön Apolosgö keuŋi wuatanağōmakzin,” jimakze. Toroqeba tosatŋan kewö jimakze, “Neŋön Pitögö keuŋi wuatanağōmakzin.” Dumŋe kunbuk tosatŋan kewö jimakze, “Neŋön mönō Kraistkö keuŋi wuatanağōmakzin.”

¹³ Kraistnōŋ jula gwötpuk ahök me? Pol nōŋön mönō enğōra aka maripomnōŋ kōmuyal me? Pol nōŋgö qetne o melun mem enğiget me? Mewö möt sohobepuk?

¹⁴ *Nōŋön enğōrenök Gaius aka Krispus o melun mem etkialmō, tosatŋi mi qahö mem enğialaŋgōra “Anutu saiwap!” jizal.

¹⁵ Mianğōra “Polgö qetŋe o melun mem nenğiget,” kuŋŋan keu omani mewö jibapuk.

¹⁶ *O ölna, Stefanas aka yaŋgö saiwaurupŋi mi mewöyök o melun mem enğialmō, yeŋgö andōŋine kun o melun mem waŋgial me qahöpto, mi törörök qahö mötzal.

¹⁷ Kraistnōŋ ni ambazip o melun mem enğimamgōra aka qahö melaim niŋgiyökmö, Ölöwak Buŋa jim sehimamgōra jiiga anda kamakzal. Kraistnōŋ nenğōra aka maripomnōŋ kōmuyōhi, nup mianğō ösumŋan eta omani akapuk. Mianğōra Buŋa keu mi gölme azigö mötkutukutu qakŋe laŋ qahö jimakzal. Mewö.

Kraistnōŋ Anutugö kukösumŋi aka mötmöt areŋi indelök.

¹⁸ Ambazip kōnöp siagö buŋaya akŋei, yeŋön maripomŋaŋgö Buŋa keuŋi möta mianğōra mötket uruqahö keuya akza. Mewö akzapmō, Suepkö buŋaya akzini, nenğōra keu mianğōn mönō Anutugö kukösumŋi indeli mōrakzin.

¹⁹ *Mianğō keuŋi Buŋa Kimbinōŋ kewö ohoget ahōza, “Nōŋön mötmöt ambazip mötkutukutuŋini kōndenbiga sohoma. ‘Möt asarim yakōmakzin,’ jimakzei, yeŋgö mötmötŋini mönō mem sohobiga sōrōrauba omani akŋa.”

²⁰ *Mötkutukutu ambazip ölni mi denike malje? Buk oyoŋda mötmötkö kōnaŋi miwikŋaigeri, mi denike? Gölmēnōŋ jitrakōlikö böhi aka keu melenqelenđa jimakzei, mi mönō ölna qetpuk akze me? Gölmēnōŋ mötkutukutu ketanŋi

* **1:12:** Apo 18.24 * **1:14:** Apo 18.8; 19.29; Rom 16.23 * **1:16:** 1 Kor 16.15 * **1:19:** Ais 29.14

* **1:20:** Job 12.17; Ais 19.12; 33.18; 44.25

ahözawi, Anutunöŋ mönö mi mem kaheiiga (sahahaiiga) uruqahö mötmöra akza. Keu mi ölŋa.

²¹ Anutunöŋ nanŋi mötkutukutuŋaŋgö dop gölmenöŋ malmalgö arenŋi alökmö, ambazipnöŋ nanŋini mötkutukutuŋine nanŋöba mewö mianŋön Anutugö könaŋi möt kutubingö osiba tönpin malget. Osiba mala Kraistnöŋ maripomnöŋ kömuyöhi, mianŋöra “Uruqahö keuya!” jiba mötketmö, Anutunöŋ Buŋa keu mi neŋön jim sehibingöra jiyök. Mi jim asariinga denike yeŋön uruŋini melenŋda möt narizei, mi dom-amöt qem enŋimangö möri dop kölök.

²² Juda yeŋön aiwesök aŋgöletot asuhumegöra kapan kölakzemö, Grik kantri yeŋön mötkutukutuŋinan sehimapköra jarumakze.

²³ Mi jarumakzemö, neŋön Kraist maripomnöŋ qeget kömuyöhaŋgö Buŋa keuŋi jim sehimakzin. Juda yeŋön keu mi mötketka uruŋini böliiga mianŋöreŋ qaköba uruŋini qahö melenŋmakze. Kian kantri yeŋön mianŋöra mötketka uruqahö keuya akza.

²⁴ Gwötpukŋan mewö mötzmö, Anutunöŋ neŋgoholi urunini melenŋini, neŋgöra Kraistnöŋ mönö Anutugö mötkutukutuŋi indela Anutugö kukösumŋi neŋgimakza. Juda me kantri tosatŋi akzini, mi töndup Kraistpuk qekötahöba kinda mohot akzin.

²⁵ Ambazip neŋgö mötkutukutunini aka ösumnini mi eretŋi. Anutunöŋ uruqahö akawak, mianŋön mönö töndup ambazip mötkutukutunini oŋgita öŋgöŋgöŋi ketanŋi akawak. Anutunöŋ lölöwöröŋi akawak, mianŋön mönö töndup ambazip ösumnini oŋgita köhöikŋi kötökŋi akawak.

²⁶ Urumelen alaurupni, nanŋini könaŋini denöwö ahöiga Anutunöŋ enŋgohölöhi, mi mötmöriget? Inŋini gwötpukŋan gölmegö mötkutukutu ketanŋi qahö memba malget. Gwötpukŋan kukösum qakŋe sukinapŋinambuk qahö malget. Iwiurupŋini gwötpukŋan qetbuŋaŋinambuk qahö malget.

²⁷ Mewö qahöpmö, gölme ambazipnöŋ enŋöra mötketka uruqahö ambazip omanŋi akzei, Anutunöŋ mönö inŋini mewöŋi möwölöhöm enŋiyök. Gölmegö mötmöt ambazip ipŋi mi gamu qem enŋiyök. Gölme ambazipnöŋ enŋöra mötketka lölöwöröŋi akzei, Anutunöŋ mönö inŋini mewöŋi möwölöhöm enŋiyök. Gölmegö kukösum ambazip ipŋi mi gamu qem enŋiyök.

²⁸ Gölme ambazipnöŋ jijiwilit ak enŋiba könaŋinaŋgöra mötketka etqeqeŋi akzei, Anutunöŋ mönö inŋini mewöŋi möwölöhöm enŋiyök. Gölmenöŋ yuai akzei, yeŋgö qetbuŋaŋini mem solanii qahöwakŋapköra yuai kun qahö akzei, mönö mi möwölöhöm enŋiyök.

²⁹ Kunöŋ Anutugö jemesoholŋe silenŋi memba öŋgöbapuköra mönö mewö meköba möwölöhöm enŋiyök.

³⁰ Anutunöŋ nam köl enŋiba enŋuaŋgiriga Kraist Jisösbuk qekötahöba mal köhöimakze. Yaŋön Anutugö mötkutukutuŋi qainŋi kun indeli mörakzin. Kraistnöŋ sohopenini memba keunini jim teköi solaniba maljin aka tök kutum neŋgiiga sarakŋi akzin.

³¹ *Buŋa Kimbinöŋ keu kewö ohoget ahöza, “Kunŋan silenŋi memba öŋgömawi, yaŋön mönö Kembu möt waŋgizawaŋgöra aka silenŋi mem öŋgöma.” Keu mianŋö dop ahinga dop kölma. Mewö.

2

Kraist maripomnöŋ kömuyöhaŋgö keuŋi jial.

¹ Urumelen alaurupni, nöŋön enŋöreŋ kaba Anutugö könaŋi nanŋöba jim asarim enŋiali, mi keuni nahöm sorokŋambuk akŋapköra qahö jiba malal me

* 1:31: Jer 9.24

gölmegö mötkutukutu öngöngöni kondela mianön sileni qahö memba öngöba malal.

² Nöñön engö sutñine mötmöt murutñi pakpak görañe ala Jisös Kraistkö keuñi aka maripomnöñ kömuyöhañgö könañi miyök möt kutuba mi jim sehi-mamgö keu jöhöyal.

³ *Keu mewö jöhöba engöreñ kayali, nalö miangöreñ azi lölöwöröñi aka jönömni gwötpuk undui kenget qakñe malal.

⁴ Nöñön Buña keu jim asarim engiali, mi mötkutukutu ketañangö kelök keuñi qahö jiba malal. Mi qahöpmö, Uña Töröñan sölölohöm engii ösum-mumuñan uruñine inahömapköra kapañ köla jiba malal.

⁵ Gölme ambazipkö mötkutukutuñinan qahöpmö, Anutugö kukösumñan nam köl engiiga möt narimegöra kapañ köla malal. Mewö.

Uña Töröñangö mötkutukutu mi qainñi kun.

⁶ Nöñön töndup urumelen alaurup aködamunñinambuk maljei, yengö sutñine tatpiga Anutugö mötkutukutuñi gegeni mi ölop eraum mörakzin. Gölme mötkutukutuñi mi qahö eraum mörakzin. Gölmeñi gölmeñi galöm köl engiba malgetka kukösumñinan qahöwakñawi, yengö mötkutukutuñini mi mewöyök qahö eraum mörakzin.

⁷ Mi qahöpmö, Anutugö mötkutukutu tölapñi mönö mi eraum mörakzin. Anutunöñ Suep gölme qahö miwikñaim etkiiga miangöreñ mönöwök qeljine lök areñi kewö ala jöhöyök, “Ambazipnöñ bian ahuba aködamun miwikñaiba oyaenköyaen akñegöra mönö mötkutukutuni qainñi kun mi engimam.” Mewö jiba tölapñe ali ahöyök.

⁸ Gölme azi kembuñi kembuñi mala kotkeri, yengöreñök kunñan mönö mötkutukutu mi qahö möt kutuyök. Mi möt kutubeak ewö, Kembunini asakmararañambuk i mönö maripomnöñ qahö qegetka kömumbawak.

⁹ *Mötkutukutu qainñi kun miangöra keu kewö ohoget ahöza, “Kunñan yuai mi je kezapañ qahö eka mörök. Miangö mötmötñan kungö uruñe qahö asuhui mörökmö, ambazip Anutu uruñinan jöpaköm wañgimakzei, yengöra mi mönö mözözömgöiga jöjöröba ahöza.”

¹⁰ Gölme ambazip yuai mi qahö möta jipjap malgetmö, Anutunöñ mi mönö Uñañi melaiiga neñgöra indeli mörin. Yañön keu pakpakö könañi jaruba miwikñaimakza. Anutugö mötmöt gegeni mewöyök möt teközawañön mönö mi sölölohöm neñgiiga mörin.

¹¹ Kungö uruñi kunöñ qahö mötza. Uruñangö uñañi yañönök mönö mi möt yaköza. Mewöñanök Anutugö uruñi mi kunñan qahö mötzapmö, Anutu nanñi Uñañi Töröñi yañönök mi möt yaköza.

¹² Neñön gölmegö ahakmeme bölöñangö ömeñi kun qahö buña qem anguinmö, Anutunöñ yuai kalem neñgiyöhi, miangö könañi mötpingöra mönö nanñi Uñañi melaii urunine geiga maljin.

¹³ Miangö könañi gegeni tokoba eraum mörakzin. Gölme ambazipnöñ mötkutukutuñinanangö qakñe keu kusum neñgigetka miangö dop mi qahö eraum mörakzin. Mewö qahöpmö, Uña Töröñan keu kusum neñgiyöhi, miangö dop mönö urugö keu ölni kewöringa sölölohöm neñgii jim asarimakzin.

¹⁴ Uña Töröñan sölölohöm neñgiiga keu mi mewö kewötzin ewö, könañi mönö miwikñaiba möt asaribinangö dop akza. Miangöra Uña Töröñan denike yengö uruñine qahö mali öne lañ maljei, yañön Anutu Uñañangö buñañi mi möt anğön kölbängö osimakze. Yañön Buña miangöra mötketka uruqahö keu tandök aiga könañi möt asaribängö osize.

* 2:3: Apo 18.9 * 2:9: Ais 64.4

¹⁵ Yenön osizemö, Uña Töröñan sölölöhöm neñgiza ewö, mönö keu pakpakö könañi kewöta jim teköbinañgö dop akzin. Mewö akzinmö, urumelen ambazip kungö könañamñi mi gölme ambazip körekñan törörök jim teköbingö osimakze.

¹⁶*Miañgö könañi mi Buña Kimbinöñ kewö ohoget ahöza, “Kembugö urumötmötñi mi azi kunñan kun qahö mörök. Miañgöra kunñan i goro qambañ wañgimawañgö dop qahö.” Kunñan mi qahö mörökmö, neñön Kraistkö urumötmötñi memba maljin. Mewö.

3

Anutugö nup meme ambazip

¹ O urumelen alaurupni, inini namande ewö Kraistpuk qekötahöba kinget. Miañgöra nöñön inini gölmegö ahakmeme mötöteimakzeañgö tandök malgetka Buña keu mi jim asarim eñgiba sutñine malal. Uña Töröñan sölölöhöm eñgii maljeañgö tandök ewö eñgöra jimangö osiba malal.

²*Nöñön keu möt asarimeañgö dop juzu oñi ewö gumohom eñgiba malal. Nene ölni nemingö dop qahö akerañgöra keu gegeni mi qahö eñgial. Nalö miañgöreñ nene ölni nemingö osiget aka nalö kewöñe mewöyök mi ölop qahö nemakze.

³ Inini toroqeba gölmegö ahakmeme bölöñi mötöteiba malje. Inini urunöñ mututqutut möta añgururuk aka keu jijinöñ nonñitnöñ gonñitpi ahakze. Mewö aketka uru silegö sihim kömbönañini bölöñan galöm köl eñgiiga urumelenñgö kopa ambazip omanñi yeñgö tandök ahakze.

⁴*Tosatñi inini kewö jimakze, “Nini Polgö keuñi wuatañgömakzin.” Tosatñan kewö jimakze, “Nini Apolosgö keuñi wuatañgömakzin.” Mewö mewö jiba mönö gölme ambazip omanñan ahakzeañgö tandök aka malje.

⁵ Apolosnöñ ninia akza aka Pol nöñön ninia akzal? Niri mönö Anutugö nuwa memba maljit. Kembunöñ nanñik nanñik netköra nup netkiyöhi, miañgö dop bauköm eñgiziga uruñini melenña Kembu möt nariba malje.

⁶*Nöñön kötni kömötpiga Apolosnöñ o memba kaba miañgöreñ mokoyökmö, Anutunöñ mönö meiga töhötmöriam asuhuyök.

⁷ Miañgöra kömörohü, yañön qetñambuk qahö akza. O mokoyöhi, yañön mewöyök qetñambuk qahö akzappmö, Anutunöñ kötuetköiga töhötmöriamñi kota qarimakzei, yañönök mönö qetbuñambuk akza.

⁸ Mewö akzappmö, kömörakzali aka o mokomakzawi, netköñ mönö dop mohot akzit. Mohot akzitmö, mi töndup töwaniri mi mönö nupniri memakzirangö dop nanñök nanñök membit.

⁹ Netköñ Anutugö nup neñakyahötñi aka yambuk nup memakzit. Eñgö uruñini mi Anutugö arö ewö aiga kölkömöt nupñi miañgöreñ memakza. Anutunöñ miri ewö uruñini inahöba mindirim eñgiiga köhöiba wahörakze.

¹⁰ Anutunöñ kalem möriam ninñiyöhi, nöñön miañgö dop miri memegö mötmöt azi ewö aka Anutugö tandö kömbönañi uruñine kuñguba kömötpiga kunöñ miañgö qakñe miri memakza. Ölop memakzappmö, mohot mohot neñön mirigö nupñi ölopñanök membinangö dop akzin. Ek kutuba memb-ingöra mönö je galöm mem añgubin.

¹¹ Urugö tandöñi mi Jisös Kraist. Nöñön mi lök uruñine kömötpiga kunñan mötnaripkö tandö kun miwikñaimangö osima.

* 2:16: Ais 40.13 * 3:2: Hib 5.12-13 * 3:4: 1 Kor 1.12 * 3:6: Apo 18.4-11.24-28

¹² Tandö mohot akzapmö, mianjö qakne tosatnan mirinini goul silwönöñ me köt ölninambuk tosatni mianön memakze. Tosatnan mirinini ip kösönöñ, tömbö bohöm sinñan me señgwenöñ memakze. Siliknini mewö me mewö memakzin ewö,

¹³ urugö nupninanjö ölnan mönö inannök inannök aukne asuhuma. Kembunöñ nalöñan kam kunjuiga mianjörej mönö mirigö esunji luluñma. Miri esuninan mönö Anutugö könöp bölamnjan asuhuiga jeba eriga ölnan aukne ekingö dop akña. Könöp mianön mönö mohot mohot neñgö mirininanjö tandökni ölni mi esapesapnöñ ala kewötma.

¹⁴ Könöpnöñ jeba miri pakpak kewöt enjiiga megetka ölninan köhöiba kinme ewö, yeñön mönö nupninanjö töwanji buña qem angume.

¹⁵ Tosatnan mirinini megetka ölninan jeba etme ewö, yeñön mönö töwa qahöpmö, geñmororon miwikñaime. Mi miwikñaime, nanñinak töndup Suepkö buñaya malme. Könöp bölamnöñ jem enghoiga mianjö tandök ongitpingö jaram tiba kök alal ewö aketka Anutunöñ meköm enjiiga Suepnöñ öngöme.

¹⁶ *Nanñinak Anutugö Buña jike (tempöl) aketka Anutugö Uñanjan urunine maljawi, mi mötze me qahö?

¹⁷ Anutugö Buña jikenji mi kömbukni akzawi, mianjö dop enñön sarakni akze. Mianjöra kunñan Anutugö jike mem böliza ewö, Anutunöñ mönö i nanñi mem bölim wanjima.

¹⁸ Kunñan nanñi gölmegö mötmötñi wuatangöba tilipköm angubapuk. Enjö sutñine kunñan nanñanjöra möri “Gölmegö mötkutukutu öngöñgöñi memba maljal,” jiza ewö, yanñön mönö mutuk uruqahö aka mewö mianön mötkutukutu ölni miwikñaibawak.

¹⁹ *Anutunöñ gölmegö mötkutukutu öngöñgöñi mianjöra möri uruqahö keuya akza. Mianjö keunji Buña Kimbinöñ kewö ohoget ahöza, “Anutunöñ mötkutukutu öngöñgöñi memba maljei, mi gwaröhöm enjiiga nanñini mötmöt imbi-imbinöñ supapköba qaköme.”

²⁰ *Mianjö keunji kun kewö ahöza, “Kembunöñ mötkutukutu ambazip yeñgö mötmöt areñinanjöra möri omanji akza.”

²¹ Mianjöra enjörejök kunñan mönö ambazip neñjöra aka silenji memba wahötpapuk. Körek neñön mönö enjö buñaya akzin.

²² Pol, Apolos, Pitö* neñön mönö enjö buñaya akzin. Ambazip gölme dop maljini, neñön mönö körek enjö buñaya akzin. Mianjöra ölop keu mi me mi kewöta memba mewö mianön malmalnini malme aka kömupñini kömume. Nalö kewöñe maljini, körek neñön mönö enjö buñaya akzin aka könanjep nup meme ambazip malmei, yeñön mönö mewöyök enjö buñaya akne.

²³ Mewö ak enjizinmö, enñön Kraistkö buñaya aketka Kraistnöñ Anutugö buñanji akza. Mewö.

4

Nini Kraistkö aposolurupñi akzin.

¹ Mianjöra ambazip körekñan mönö neñjöra kewö mötketka dop kölma: Kraistnöñ jim kutum neñjiiga nupñi memakzin. Anutunöñ keunji tölapñi neñjiiga buñanini aiga galöm kölakzin. Neñön miri galömñanjö tandök ewö akzin.

² Galöm yeñgö tonñan miri yuainji galöm kölmegöra böröñine aljawi, yanñön mönö keu bohonñi kewö kapan köla jim kutum enjimakza, “Nupñini mönö

* **3:16:** 1 Kor 6.19; 2 Kor 6.16 * **3:19:** Job 5.13 * **3:20:** Sum 94.11 * **3:22:** Pitö qetñi alañi Sifas

misila pöndaŋ memba malme. Memburik-qemburik kude akŋe. Mewö miwikŋaim enġibiga dop kölma.”

³ Korint eŋön me gölmegö keu jake kungö galömŋan ni kewöta jim teköm niŋgibeak ewö, nöŋön mönö keu miangöra mötŋi eretŋi kötökŋi akza. Nanak mewöyök nani keuni qahö jim teközal.

⁴ Uruni kewöta keu kun qahö mötŋiga mem lömbörim niŋgizapmö, miangöra töndup solanŋi qahö akzal. Ambazipnöŋ qahöpmö, Kembunöŋ mönö nöŋgö keuni kewöta jim teköm niŋgimakza.

⁵ Miangöra iŋini mönö nalö kewöŋe kungö keuŋi kun mi kude jim teköme. Kembunöŋ nalöŋi ali kam kuŋgumapköra mönö mambötme. Mamböta malgetka miangöreŋ kaba keu yuai ömukŋe asambötket ahözawi, mi mönö asakŋan indeliga aukŋe asuhuma. Yaŋön kaba ambazip urunini mem asari-iga könaŋamnini ölnan aukŋe ekŋamgö dop akŋa. Könaŋamnini ölni eka mohot mohot kewöt neŋgiiga Anutunöŋ mönö miangö dop nalö miangöreŋ möpöseim neŋgibawak.

⁶ O urumelen alaurupni, iŋini jula jakbak-öraŋböraŋ aka laŋ likeplikep arönda kinda qetal aŋgumakze. Mewö malbepüköra mönö Apolos niri mötmörim netkiba nanŋini imbi-imbi mosöta keu kiangö könaŋi mötme, “Buŋa keu ohoget ahözawi, mi mönö kude oŋgitme.” Keu mi mötket uruŋine ahöi tem kölgetka ölöwakŋegöra mönö kösohotniri mewö ohozal. Mi nani aka Apolos netkö könaŋamniri kewöta mötmöriba möt asarimegöra ohozal. Jujulŋinan mewö teköma.

⁷ Gölmegö kunŋan mönö qahö mem letot gihiiga tosatŋi enġoŋgita qainŋi kun akanak me qahö? Mi qahö. Yuai pakpak ahöm gihizawi, mi mönö Anutunöŋ kalem gihiiga buŋa qem aŋgunöŋ me qahö? Mi kalema buŋa qem aŋgunöŋ ewö, mönö wuanöŋgöra kalem qahöpkö tandök ewö silegi memba öŋgömakzan? Mi qahö dop kölja.

⁸ Yuai pakpak memba malbingö sihimŋi mötzei, mi mönö lök ahöm enġim teköza. Anutunöŋ Suep köweŋeyök kalemŋi kalemŋi mokom enġiiga lök simbawoŋ akze. Neŋön qahö bauköm enġiinga nanŋinak töndup mötnariŋkö azi kembu tandök akze. Nanŋinaŋgöra mewö mötmörim aŋguze. O eŋön ölna kiŋ aketka dop kölbowak. Mewö aketka neŋön mönö mewöyök azi kembu-urupŋini aka enġö qöhöröŋine ölop silenini memba öŋgöba aiweliköm aŋgubinak. Nöŋön mewö akingö sihimŋi mötzal.

⁹ Nöŋön mewö mötzalmö, nanini könaŋamnini eki tandök kewö akza: Anutunöŋ aposol nini al neŋgiiga ambazip jeŋine etqeŋeŋi töhöŋ aka maljin. Ambazip enġuget kömumegö jim tekögeraŋgö tandök aukŋe anda kainga laŋ qeta gamu qem neŋgimakze. Yuai ehekŋi qainŋi kun ahinga gölme dop miengö toŋi aka Suep jakeni jakeni miengö pom garataŋi miengön mönö jeŋinan neŋgek kutuba neŋgehimakze.

¹⁰ Kraistköra aka uruni sohoi maljali, nöŋgöra mewö jimakzemö, eŋön Kraistpuk kinda mötmöt ambazip aködamunŋinambuk akzeaŋgö tandök akze. Nöŋön lölöwöröŋi akzalmö, eŋön “Ambazip köhöikŋi akzin,” jize. Ambazipnöŋ iŋini göda qem enġimakzemö, nöŋgöra mötket eriga jijiwilit ak niŋgimakze.

¹¹ Nalö dölkewöŋe mewöyök nenegö kömumba ogöra ak neŋgiiga opo walŋi jujuratŋi löngöta malinga binnöŋ laŋ neŋgugetka dum mirinini qahö mala toroqeba anda kamakzin.

¹²* Nanini böröŋinan sileqeŋe tandök nup memakzin. Ambazipnöŋ laŋ qesuahöm neŋgimakzemö, neŋön mönö kötuetköm enġiba yeŋgöra köulukömakzin.

* 4:12: Apo 18.3

Sesewerowero ak nenjimakzemö, nenjon mönö mi möta mökösoḅda kapan köla maljin.

¹³ Uruqeḅe keu töhöreḅ jim nenjimakzemö, nenjon mönö guḅböḅjöḅjöḅ qakḅe ösoḅnöḅ melenmakzin. Nenjon gölmegö nesak lömḅaḅgö tandök ewö ahinga gölmeḅi gölmeḅi yeḅön sisitnini memba andö qem nenjimakze. Mewö mala kota nalö dölkewöḅe mewö toroqeba maljin.

¹⁴ Gamu qem enjimamgöra keu ki qahö ohozalmö, wölböt nahön böraturopni ewö mönö goro qambaḅ enjimamgö mötzal.

¹⁵ Mötnaripkö böhi 10.000 yeḅön Kraistpuk qekötahöba köyan köla kusum enḅibeak ewö, mi töndup nöḅön mönö Kraist Jisösbuk qekötahöba Ölöwak Buḅa jim asariba iwiḅini akiga uruḅini melenḅet. Mianḅöra iwiurupḅini gwötpuk qahö malje.

¹⁶ *Mianḅöra uruḅini kewö kuḅum enḅizal: Nöḅön silik ahakzali, mianḅö dop enjon mönö nöḅgö silikni mi wuatḅgöba malme.

¹⁷ Nöḅön silikni Kraist Jisösbuk qekötahöba aka memba gölmeḅi gölmeḅi liliköba urumelen köḅagesö dop kusum enḅimakzali, mianḅöra mönö ölum enḅubapuk. Nöḅön mianḅöra aka wölböt nahöni Timoti melaibiga enḅöreḅ kama. Yaḅön nömbuk pöndaḅ mala Kembubuk qekötahöba kinda kaba köḅaḅamni jiba köḅ gulim enḅima.

¹⁸ Enḅöreḅök tosatḅan nöḅön enḅöreḅ qahö kabilenḅak ewö möta silenḅini möpöseiba jakbak-öraḅböraḅ aka laḅ malje.

¹⁹ Mewö maljemö, Kembunöḅ sihimḅan ni kamamgö mötma ewö, mönö ösumök enḅöreḅ kamam. Kamami, nalö mianḅöreḅ jakbak-öraḅböraḅ ambazip yeḅgö kukösumḅinaḅgöra qesim enḅibiga jim miwikḅaigetka mötmam. Silenḅini memba wahöta keu ketanḅi ketanḅi laḅ jimakzei, mianḅön nöḅgöreḅ eretḅi akza.

²⁰ Anutugö bemtohoḅ mi keuyök jijigö yuaia qahöpmö, öḅḅi mi Anutugö kukösum. Mianḅön mönö nam köḅ nenḅiza.

²¹ Mianḅöra uruḅini qahö melenḅa laḅ malme ewö, nöḅön mönö kömbin memba kaba keunöḅ enḅohotirimam. Uruḅini melenḅme ewö, mönö uruböḅjöḅ qakḅe urukalem ak enḅimamgöra kamam? Keu yahöt mi kewöta nöḅgöra sihimḅini denöwö mötzei, mi möt kewöta jime. Mewö.

5

Kunöḅ serowilin ahöhi, i mönö sutḅineyök közölme.

¹ *Keu kun kewö jigetka nöḅgö kezapne geyök: Tosatḅan urumelen köḅagesö sutḅine serowilin ahakze. Kunḅan iwiḅaḅgö anöḅḅi memba malja. Serowilin mewöḅi mi urumelenḅgö kopa ambazip yeḅgö sutḅine mewöyök kun qahö ahöza.

² Kunḅan mewö aiga iḅini töndup silenḅini memba öḅgöba laḅ jakbak-öraḅböraḅ ahakze. Mi qahö dop köḅjapmö, silikḅaḅgö wösöbiriknöḅ mönö mem kömum enḅiiga dop köḅbawak. Mewö aka ölop azi siḅḅisöndok mewö ahöhi, i mönö sutḅineyök közölḅetka yaigep etma. I denöwö aka qahö közöljeje?

³ Nöḅön öḅḅa enḅöreḅök körowen malbi silenḅi qahö nehakzemö, töndup uḅanan mönö embuk maljal. Kunḅan ahakmeme kanḅamḅambuk ahöhi, nöḅön lök yaḅgö keuḅi kewöta sutḅine maljalḅgö tandök möta jim teköba kewö jizal:

⁴ Iḅini mönö Kembunini Jisösgö qetḅe totoko alḅetka nöḅgö uḅanan embuk toroqeiga Kembunini Jisösgö kukösumḅan nam köḅ enḅiiga öroröḅ kinda keuḅi jiba mönö kewö jöhöme:

* 4:16: 1 Kor 11.1; Fil 3.17 * 5:1: Dut 22.30

⁵ Satanöŋ silenangö sihim kömbönaŋi bölöŋi qei etmapköra mönö andö qem wanŋiba yanŋö böröŋe algetka mindiŋgöm wanŋima. Mindingöm wanŋiiga löwöriba uruŋi melenŋi Anutunöŋ amöt qem wanŋiba Kembangö nalöŋe unŋaŋi meköiga Suepkö bunŋaya akawak.

⁶ *Silenini memba öŋgömakzei, mi ölöŋi qahö. Inini keu yahöt ki möt yaköze, “Yist kitipŋi moröŋi obuk mindiriba plauanöŋ alinga mem qariiga dis kokolak qemakza. Mewöyök bau wösö kömbukŋan tiŋgirakzawi, mianŋön mönö busu pakpak mem bölimakza.”

⁷ *Keu mianŋö dop inini lök plaua dis sarakŋi ewö aketmö, siŋgisöndökö yistŋi kun mi ket ewö sutŋine kanŋota enŋöhömakza. Körek bölibepuköra mönö yistŋini walŋi mi kewöt uteköme. Azi mi wösö kömbuk ewö közöla mönö dumŋe kunbuk yambu jeniqeŋe dölökŋangö plaua dis sarakŋi ewö aka malme. Ak-kömukömu kendon nalöŋe lama jöwöwöl ohoba beret yistŋi qahö nemakzei, mianŋö dop Kraistnöŋ nanine ak-kömukömu lamanini aiga lök qeget kömuyök. Mianŋöra inini ölöŋ plaua dis sarakŋi yistŋi qahö ewö akŋe aka kunbuk oyaenŋkoyaenŋ uruŋe kanŋota malme.

⁸ *Kraist kömuyöhanŋöra mönö sösöŋgai kendon aka malbin. Yist me wösö kömbukŋi mi ahakmeme bölöŋi inŋonmanŋonambuk. Mianŋö qakŋe mönö sösöŋgai kendon kude akin. Mianŋöra mönö geŋmonŋ mosöta keu ölni wuatangöba beret yistŋi qahö ewö aka mianŋö qakŋe sösöŋgai kendon aka malbin.

⁹ Nöŋön Buŋa Kimbi ohom enŋiba kewö jial: Inini serowilin ahakzei, yembuk mönö kude köisirik tata eraum mötme.

¹⁰ Gölmenöŋ uruŋini qahö melenŋa ahakmeme bölöŋi ahakzei, yeŋgöra keu mi qahö ohoyal. Yeŋön serowilin aka yuaigö nepaqepalok membagan membingö köpösöŋgömakze. Yuai kalöpköba yonŋorö memakze aka tandö lopionŋ waikŋini memba möpöseim enŋimakze. Yeŋgöra aka mewö ohom enŋibileŋak ewö, inini mönö gölmenöŋ malbingö osibeak.

¹¹ Yeŋgöra aka qahöpmö, könaŋi kewögöra keu mi ohom enŋial: Kunŋan nanŋi qetŋi urumelenŋ ala jiba töndup serowilin akza me yuaigö nepaqepalok membagan memangö kösösöŋgömakza me tandö lopionŋ waikŋi memba möpöseimakzawi, yambuk mönö kude köisirik tata eraum mötme. Mötnarip kambu enŋö sutŋine kunŋan mepaqepaik ahakza me o köhöikŋi nempa enjololonŋ ahakza me yuai kalöpköba yonŋorö memakza ewö, yambuk tata nene kun kude neme.

¹² Yaigep maljei, nöŋön yeŋgö keuŋini qahö jim tekömakzal. Mi nöŋgorenŋ nuwa qahö. Inini mewöyök könagesö pakpakö keuŋini qahöpmö, uruŋini melenŋa sel uruŋe maljei, mönö yeŋgö keuŋini miyök kewöta jim tekömakze.

¹³ *Yaigep lanŋ maljei, Anutunöŋ mönö yeŋgö keuŋini kewöta jim teköma. Mianŋöra mönö Buŋa keu kianŋö dop akŋe, “Azi bölöŋi mi mönö sutŋineyök közölme.” Mewö.

6

Urumelenŋ alaŋini mi yaigep yeŋgö keu jakeŋe kude alme.

¹ Urumelenŋ ambazip sutŋine kunŋan alaŋi keu jakeŋe almangö mötza ewö, yanŋön Anutugö ambazip sarakŋi enŋongita ambazip gonŋonŋi yeŋgö jeŋine aniga qahö dop kölja. Qahö! Urumelenŋö kopa ambazip bauköm wanŋimegöra qesim enŋiiga gamuŋambuk akza.

² Anutugö ambazip sarakŋi neŋön kantriŋi kantriŋi yeŋgö keuŋini kewöta jim teköbini, mi lök mötze. Inini gölme pakpak yeŋgö keuŋini jim teköbingö dop

* 5:6: Gal 5.9 * 5:7: Eks 12.5 * 5:8: Eks 13.7; Dut 16.3 * 5:13: Dut 13.5; 17.7

akze ewö, mönö denöwö aka keu morömorö kewöta jim tekömeangö dop qahö akze? Inini mönö ölŋa mianğö dop akze.

³ Urumelen ambazip neñon Suep garataurup yeñgö keuñini kewöta jim teköbini, mi lök mötze. Mianğö dop akzin ewö, gölmenöñ malmalgö keuñi mi mönö amqeba kewöta ölop jim tekömakin.

⁴ Mianğöra gölmenöñ malmalgö keuñi sutñine asuhumakzawi, keuñini mi mönö wuanöñğöra silene yeñgö keu jakeñe öñgöba jim tekömegö qesim enğimakze? Urumelenğö kopa ambazip sutñine jijiwilit ak enğimakzei, yeñğöra töndup keu nalöñe mötketka öñgömakza. Mi qahö dop kölja.

⁵ Keu mi gamu qem enğimamğöra jizal. Mötnarip ambazip enğö sutñine keu ahözawi, enğöreñök kungö mötkutukutuñi dop kölga keu mi ölop jim tekömawanğö dop akza me qahö? Mönö ölop sutñineyök azi mewöñi mi-wikñaime.

⁶ Qahö tandök aiga urumelen ala kunöñ alañi silene yeñgö keu jakeñe alakza. Mewö ala ambazip Anutu qahö möt narizei, mönö yeñgö jeñine anda keu nupköra qesim enğimakza. Mi qahö dop kölja.

⁷ Sutñine keu jakeñe al anğumakzei, mewö mianñon mönö nanñini eta enğuga Kraistkö qetbuñan lök eretñi aiga malje. Ambazipnöñ ak bölim enğigetka uruñini mianğöra wahöri keunöñ al enğigetka Anutugö jeñe qahö dop kölja. Tilipqilip aka yuainini öröba megetka inini likepñi qahö melen enğigetka mewö mianñon Kraistkö könañan mönö aködamunñambuk akña.

⁸ Inini Kraistkö qetñi kewö mem bölimakze: Mönö nanñinak tilipqilip aka ambazip ak bölim enğiba yuainini öröba memakze. Urumelen alaurupñini yeñğöra mewöyök mewö ak enğimakze.

⁹ Irimqirim ambazip yeñon mönö Anutu bemtohoñangö uruñe öñgöba dum qahö meme. Mi mötze. Ahakmemeninan mönö tilipköm anğuba janjuñ akepak. Tosatñan serowilin aka tandö lopion waikñini memba möpöseimakze. Tosatñan awanöm malmal onğita qesabulum ahakze. Tosatñan monenğöra lañ amimba malje aka azi nanñirök ambi nanñirök amimba malje. Mewöñi mienñon mönö Anutu bemtohoñangö buñani qahö akñe.

¹⁰ Tosatñan yonğorö memba yuaigö nepaqepalok membagan memingö köpösöngömakze. Tosatñan o köhöikñi memba enololon aka lañ mepaqepaik ahakze. Tosatñan yuai kalöpköba yonğorö memakze. Ambazip mewöñan mönö Anutugö bemtohoñi buña qahö qem anğume.

¹¹ Enğöreñök tosatñan mutuk mewö aka malgetmö, könañgep Kembunini Jisös Kraist buña qem anğugetka sepñan sanğonda tök kutum enğiba yanğö qetñe sarakñi aket. Mem solanim enğiiga Anutuninangö Uñanñan mönö in-ahöm enğiiga diñgiba malje. Mewö.

Sileninan Anutugö jike kömbukñi akza.

¹² *Nöñon yuai pakpak ölop memamanğö dop akzalmö, yuai pakpaknöñ mönö qahö mem ölowak niñgiza. Yuai pakpak ölop memamanğö dop akzalmö, yuai kunöñ kembu ak niñgibapaköra mönö galöm mem anğumakzal.

¹³ “Nene mi neneyök. Mi kömonğokninanğöra aka ahöza. Kömonğoknini mi nene nein gemapköra aka ahöza.” Kunöñ mewö jibawakmö, Anutunöñ mönö nene aka kömonğok mi mohotñe jim teköi qahöwakñahot. Silenini mi serowilin akingöra qahöpmö, Kembangö nupñi memingöra aka ahöza. Mewö ahöiga nanñak silenini ölowakñapaköra nene yuai nenğimakza.

¹⁴ Anutunöñ nanñi kukösumñan Kembu mem guli kömupnöhök wahöröhi, yanñon mönö nini mewöyök mem gulim nenğii wahötpin.

* 6:12: 1 Kor 10.23

¹⁵ Engö sileninan Kraistpuk toroqeba silenangö kitipni akzei, mi mötze me qahö? Miangöra nöñon Kraist silenangö kitipni kun memba köna ketani ambibuk qekötahömam me qahö? Mi qahöpmahöp! Mönö yapmakek!

¹⁶ *Anutunöñ keuñi kewö jii ahöza, “Yetkön mönö sile mohot akñahot.” Miangöra kunñan köna ketani ambibuk qekötahözawi, yanñon mönö yambuk sile mohot akñahot. Mi mötze me qahö?

¹⁷ Mohot akñahotmö, kunñan Kembubuk qekötahözawi, yanñö uñañan mönö Kembugö Uñañambuk mindiriiga mohok aka malmahot.

¹⁸ Serowilin mi mönö misingöba mosötme. Singisöndok tosatni mi me mi ahakzini, mi pakpak mönö sileninanangö yaigepñe asuhumakza. Kunñan serowilin ahakzawi, yanñon mönö nanñi silenji mem böliba singisöndok ahakza.

¹⁹ *Sileninan mönö Uña Töröñangö Buña jikenji (tempöl) akza. Anutunöñ Uñani enñiiga buña qem anñugetka uruñine malja. Miangöra nanñini buñaya qahö akzei, mi mötze me qahö?

²⁰ Nanñini buñaya qahöpmö, Kraistnöñ söñgöröñini ketanñan bohonñini meiga yanñö buñaya akze. Miangöra sileninan mönö ahakmeme sarakñi aketka Anutugö qetbuñañan sehimakña. Mewö.

7

Awanöm aka gwabö seram malmal tatat

¹ Inini keu tosatni ohoba qesigeri, mi jim asarimam. Azinöñ ambi qahö memba gwaböya maljawi, mi ölop.

² Mi ölopñi akzapmö, silegö sihimñan sero yonñorö akepuköra inini mohot mohot mönö nanñik nanñik awanöm amemba malme.

³ Azinöñ mönö anömñangö sihimñangö dop awanöm malmalgö arenji wu-atangöma. Anömñan mewöyök mönö apñangö sihimñi wuatangöba malma.

⁴ Anömñangö sileninan mönö nanñi buñani qahö aiga nanñök mi qahö galöm kölakzapmö, apñan mi galöm kölakza. Apñangö sileninan mewöyök nanñi buñaya qahö aiga nanñanök qahö galöm kölakzapmö, anömñan mi galöm kölakza.

⁵ Miangöra nanñiri mönö kude anñon köñ anñuba malmahot. Nanñirök urumohot aka pöndan köñluk nup membitköra ölop nanñök nanñök malmahotmö, nalö tosatni mewö malagun mönö kunbuk mindiriba mohotñe malmahot. Uruñiri ölop qahö galöm kölohotka Satanöñ esapköm etkiiga singisöndoknöñ etpahotpuköra mönö mewö aka malmahot.

⁶ Mewö akñahotköra ölop jizalmö, jöjöpañ keu mewöñi mi qahö al engizal.

⁷ Nöñon ambazip körek pakpak ni ewö gwabulum malmegöra mötzalmö, inini tosatni Anutugö nup memegöra mötmöt kalem mewöñi mi qahö memba malje. Anutunöñ mötmöt kalemñi mendenñiga mohot mohot neñon mi me mi nanñök nanñök buña qem anñuba maljin.

⁸ Awanöm qahö aka malö maljei, engöra kewö jizal: Enñon ni ewö toroqeba awanöm qahöpmö, solanñi malmei, mi mönö ölopñi akza.

⁹ Ölopñi akzapmö, awanöm akingö uruñini könöp jeiga malbepuköra mönö ölop awanöm aketka amqema. Miangöra yeñon uruñini galöm kölbingö osize ewö, mönö ölop awanöm akñe.

¹⁰ *Awanöm maljei, engöra kewö jim kutuzal, nöñonök qahöpmö, Kembunöñ nanñak mönö keu ki jiza: Anömñan apñi kude mosötma.

¹¹ Mewö jizapmö, töndup apñi mosötma ewö, mönö azi kun kude memba öne malma me apñambuk kunbuk eraum möta urumohot aka malmahot. Mewöyök apñan anömñi kude mosötma.

* **6:16:** Jen 2.24 * **6:19:** 1 Kor 3.16; 2 Kor 6.16 * **7:10:** Mat 5.32; 19.9; Mak 10.11-12; Luk 16.18

12 Mi Kembangö keuyapmö, awanöm tosatnji engö goronjini mi Kembangö qahö jizapmö, nanak mi kewö jizal: Urumelen azi kungö anömñan urunji qahö melenja töndup yambuk malmangö mötzawi, yanjon mönö anömñi mi kude mosötma.

13 Mewöñanök urumelen ambi kungö apñan urunji qahö melenja töndup yambuk malmangö mötzawi, yanjon mönö apñi mi kude mosötma.

14 Miangö könani kewö: Kungö apñan urumelen gö kopa azia aiga Anutunöñ i töndup urumelen anömñi gekötahözawan göra aka tök kutum wanjiiga sarakñi akza. Mewöñanök kungö anömñan mötnaripñi qahöpmö, urumelen apñi gekötahözawan göra aka Anutunöñ i tök kutum wanjiiga sarakñi akza. Kunöñ sarakñi qahö akawak ewö, nahönböratñiran mönö Anutugö sel yaigepñe malbeak. Mewö malbeakmö, Anutunöñ mohotñe tök kutum engiyöhöngöra mönö sarakñi akze.

15 Sarakñi akzemö, kunñan qahö möt nariba apñi me anömñi mosötmangö mötza ewö, mönö ölop mosötma. Mewö asuhuiga nöngö keunan urumelen alanini mi qahö jöhöma. Anutunöñ injini luainöñ malmegöra engoholök.

16 Ambi, gi apki uru kungum wanjinöñga urunji melenja me qahöwi, mi mönö denöwö mötpanak? Me azi, gi anömgi uru kungum wanjinöñga urunji melenja me qahöwi, mi mönö denöwö mötpanak? Miangöra mönö luainöñ malme. Mewö.

Anutunöñ engoholöhan gö dop mönö toroqeba malme.

17 Kembangöñ mohot mohot engö malmalñini areñ aliga awanöm me solanji malgetka Anutunöñ engoholöhi, miangö dop mönö toroqeba mala malmalñinan gö könani kude uteköme. Urumelen könagesöñi könagesöñi liliköba miri dop mewö jim kutum engimakzal.

18 Anutugö aiwesökñi azi kungö silene yan diget maliga mewö oholök ewö, mi mönö kutumangö kude kapan köлма. Anutugö aiwesökñi kungö silene qahö yan diget maliga mewö oholök ewö, mönö mi yandimegö kude kapan köлма.

19 Anutugö aiwesökñi silenine yandiget ahöza me qahöwi, mianjon Anutugö jeñe yuai omani akzapmö, jöjöpan keunji tem köla wuatängöinga ölni akza.

20 Anutunöñ engoholiga nalö miangören awanöm me solanji malgeri, injini mohot mohot mönö miangö dop toroqeba malme.

21 Kungö welenqeçe omani aknöñga Anutunöñ goholök ewö, miangöra mönö waimanjat kude aka malman. Urugi melenja ölop solanji aka nup kun miwikñai banak ewö, mi mönö ölop miwikñaiman me urugi amqeiga ölop toroqeba welenqeçe omani malman.*

22 Mi kewögöra: Kunöñ welenqeçe omani aiga Kembangöñ mewö oholi urunji melenjiga singisöndokñangö kösöñi pösariga solanji aka malja. Mewöñanök kunñan solanji aiga Kembangöñ mewö oholi urunji melenjiga nanñi imbi-imbi qahöpmö, Kraistkö jitñi tem kölmapkö kösönöñ kinda welenñi qeba malja.

23 Kraistnöñ bohonñi ketanjan söngörönjini meiga maljean göra mönö gölme ambazip yengö keu kengöt bapñe anda welenqeçenini omani aka malbepuk.

24 Miangöra urumelen alaurupni, Anutunöñ engoholiga nalö miangören solanji kösöñini qahö me welenqeçe tonjan gö kösö gwarönöñ malgeri, injini mohot mohot mönö miangö dop Anutugö jeñe toroqeba malme. Mewö.

Gwabö seram aka malö yengö goro keunji

25 Ambi seram jömukñi† engö goroya mi Kembangöñ qahö jim kutui mötzal.

* 7:21: Keu miangö könani kun kewö: Urugi melenja ölop solanji aka nup kun miwikñai banak ewö, gi ölop toroqeba welenqeçe omani malman. † 7:25: qesabulum qahö qeçenji

Miangöra Kembunöŋ ak kömum niŋgiiga keuni laŋ qahöpmö, möt nariget dop köljawanö dop jimakzali, mönö miangö dop kewöta nani mötmötnan kewö jimam:

²⁶ Kahasililiŋ nalöŋi dopdowizawanö gwabö seram maljei, körek eŋön mönö miangö dop toroqeba malgetka ölöwakza. Mewö mötmörizal.

²⁷ Ambi memba maljan ewö, anömgi mosötmangö kude akŋan. Anömgi qahö solanŋi maljan ewö, mönö ambigöra kude jaruman.

²⁸ Töndup ambi memani, mianöŋ mönö siŋgisöndokŋi qahö akŋa. Mewöŋanök ambi seramnöŋ azi memawi, yaŋön siŋgisöndok qahö akŋa. Siŋgisöndok qahöpmö, mewö akŋei, yeŋön mönö silenjan kahasililiŋ gwötpuk miwikŋaiba mötme. Eŋön mi mötpepuköra mönö aŋön köl eŋgimangö mötzal.

²⁹ Mewö möta goro eŋgizalmö, urumelen alaurupni, keu kun kewö jimam: Kembu kamawanö nalöŋan törizawanö aka ambi memba maljei, eŋön mönö mewöyök nalö kianöŋoreŋök könahiba anömŋini qahö tandök ewö aka malme.

³⁰ Wösöbirik aka sahötzei, eŋön mönö qahö sahötmeanö tandök ewö aka malme. Uruŋini ölöwahiga söŋgaizei, eŋön mönö qahö söŋgaimeanö tandök ewö aka malme. Yuai bohonŋi mezei, eŋön mönö mi qahö buŋa qem aŋgumeanö tandök ewö aka malme.

³¹ Gölmeneŋ nalö kewöŋe areŋ wuatangömakzei, mianöŋ mönö ayapkömawanö dop akza. Miangöra gölmegö öroyuaiŋi kölköl-örörö aka nupköra alakzei, eŋön mönö mianöŋ uruŋini jöhömakzawanö tandök ewö kude aka malme.

³² Inini gölmegö lömbötköra waimanjat qahö malmegö sihimni mötzal. Awanöm qahö solanŋi maljawanö mönö Kembugö öroyuaigöra waimanjat mörakza. Mi möta “Denöwö akiga Kembugö uruŋan ölöwahi dop kölbawak,” nanŋanöŋa mewö jimakza.

³³ Mewö jimakzapmö, ambi memba maljawanö mönö gölmegö öroyuaigöra waimanjat mörakza. Mi möta “Denöwö akiga anömnanö uruŋan ölöwahi dop kölbawak,” nanŋanöŋa mewö jimakza.

³⁴ Kembunöŋ likep anömŋan likep mötmötni öroyohotka urudenŋeŋ aka malja. Mewöŋanök ambi apŋi qahö aka ambi seram solanŋi maljahanö mönö Kembugö öroyuaigöra waimanjat mörakzahot. Mi möta “Denöwö akiga uŋani aka sileni sarakŋi aiga Kembugöra dop kölbawak,” nanŋiranöŋa mewö jimakzahot. Mewö jimakzahotmö, azi memba maljawanö mönö gölmegö öroyuaigöra waimanjat mörakza. Mi möta “Denöwö akiga apnanö uruŋan ölöwahi dop kölbawak,” nanŋanöŋa mewö jimakza.

³⁵ Nanŋini bauköm eŋgimangö möta goro mi eŋgizal. Mi tosatŋi kösö ewö jöhöm eŋgibi lömböt miwikŋaimegöra qahöpmö, könaŋi kewögöra mi eŋgizal: Nöŋön inini ahakmeme diŋdiŋi wuatangöba urudenŋeŋ qahöpmö, pöndaŋ Kembubuk qekötahöba kin köhöimegöra mötzal. Miangöra goronŋini mi jizal. Mewö.

³⁶ Azi kunŋan ambi serambuk buŋa qeba malagun aŋgömosötpitkö mötmörizahori, yetkö goronŋiri kewö jimam: Azi mianöŋ kewö mötmöriba jiza, “Ambi mi memba mewö törörök qahö ak wanŋibileŋak.” Mewö jiiga ambi memawanö sihimŋi möt köhöiiga ambigö yambuŋi azi memegö dop akza ewö, yaŋön mönö ölöp sihimŋanö dop aiga ameyohotka dop köлма. Mewö mianöŋ siŋgisöndokŋiri qahö akŋa.

³⁷ Qahö akŋapmö, azinöŋ ambi mi qahö memapkö keuŋi nanŋi uruŋan jöhöba möt köhöizawi, miangöra kewö jimam: Kunŋan azi mi kuŋgui qahö qaközapmö, ölöp nanŋi sihimŋanö dop wuatangöba keunöŋ qahö jöhöi ahakza ewö, yaŋön mönö ölöp sihimŋanö dop aka ambi mi qahö mema.

³⁸ Mewö aiga ambi seram mezawañon mönö dopñe akzapmō, i qahō mezawañon mönö kõna ölop sorokñi wuatangōba törörök akza. Mewö.‡ (v 37b) Qahō akñapmō, iwiñan bōratñi azi qahō wañgimapkō keuñi nanñi uruñan jöhōba möt köhöizawi, mianğōra kewō jimam: Kunñan iwi mi qahō kuñgui qakōzapmō, ölop nanñi sihimñangō dop wuatangōba keunōñ qahō jöhōi ahakza ewō, yañon mönö ölop sihimñangō dop aka bōratñi angōn kölma. (v 38b) Mewö aiga bōrat seramñi azi wañgizawañon mönö dopñe akzapmō, i qahō wañgizawañon mönö kõna ölop sorokñi wuatangōiga törörök akza. Mewö.

³⁹ Ambinōñ apñan jebuk malmawañgō dop amōamögō keuñan jöhōi maljapmō, apñan kōmuma ewō, keu mianğon mewōñanök kōmuiga ölop azi sihimñan jimawañgō dop mema. Urumelenğō kopa azia qahōpmō, azi Kem-bubuk qekōtahōzawi, miyök mema.

⁴⁰ Ölop azi memba sōsōngai qorembeñi miwikñaimapmō, toroqeba solannı malma ewō, mönö urusōsōngai ölnı miwikñaiaba sōngaimakña. Nōñon keu mi kewōta mewō jizal. Anutugō Uñañan nōngō urune mewōyök maljawi, mianğōra mönö mewō mötmōriba jizal. Mewö.

8

Nene tandō lopionğō naluk alalñi mi nembin me qahō?

¹ Inini nene tandō lopionğō naluk alalñi mianğōra ohogetka goro kewō jimam: Urukalemnōñ mönö baukōm engima. Goranora jigetka tosatñan kewō jimakze, “Kōrek neñon tandō lopionğō kōnañini möt yakōinga omani akza.” Keu mi ölbölña akza, mi mötzin. Inini mötmöt mewōñi jiba malgetka uruñinan wahōriga koñaen ewō tererenğōba aiwelikōmakze. Mewö aka deñda siksauk malje. Kōna bohonñi mi urukalem. Kōna mewō mianğon mönö nanini urunini möhamğōba mem köhöim angubin.

² Kunōñ “Keu kungō kōnañi möt yakōzal,” mi jitnōñ jizawi, yañgō mötkutukutuñi ölnan mönö qahō asuhuiga toroqeba tōnpin malja.

³ Mi keunōhök jizapmō, kunñan Anutu uruñan jōpakōmakzawi, Anutunōñ mönö yañgōra möri ölnı akza.

⁴ Nene tandō lopionğō yañgōra naluk algeri, mi nembin me qahōpto? Keu kewō jimakze, “Tandō lopionğō mi bem ölnı qahō maljeangō kaisōpsōpñini akze,” aka keu kun kewō, “Anutu mohotnōñ malja. Alañi kun qahō.” Keu yahöt mi ölnı akzahot, mi mötzin.

⁵ Keu mianğō kōnañi kewō, “Öme bemñi bemñi,” qetñini mewō qerakzei, mi gwōtpuk malje. Suepnōñ me gölmenōñ maljei, mi ölop qahō mötzin. Ölnı ömewōrōme, bem aka azi kembu mi gwōtpuk malje.

⁶ Mi maljemō, mi tōndup Anutu mohot yañonök nanini bemnini aka Iwinini akza. Yañon yuai pakpak miwikñaii asuhuyök. Malmalnini yañgōra malbingōra aka al neñgii maljin. Mewōyök Kembu mohot Jisōs Kraist malja. Yañon Anutu baukōiga yuai pakpak miwikñaiyohot. Nini mewōyök baukōm neñgiiga mal köhöimakzin.

⁷ Mewö möt narizinmō, ambazip körekñan mönö mötkutukutu mewōñi mi qahō memba malje. Mi qahōpmō, tosatñan mutuk tandō lopionğō waikñini memba möt köhöigerangōra aka dōlkewōñe mewōyök toroqeba nene tandō lopionğō naluk alalñi mi memba mewō mianğon amqeba bemurup mi

‡ **7:38:** 36b Azi kunōñ bōratñi azi wañgimangō uruyahöt mötzawi, yañgō goronı kewō jimam: Iwiñan kewō mötmōriba jiza, “Bōratni wañgiba mewō törörök qahō ak wañgibileñak.” Mewö jiiga bōratñangō yambuñi azi memegō dop aiga azi wañgimangō sihimñi möt köhöiza ewō, yañon mönö ölop sihimñangō dop aka mosōriga azi meiga dop kölma. Iwiñan mewō mianğon siñgisōndok qahō akña.

mötmöriba malje. Uruņinan lölöwöröņi aiga uruyahöt aka negetka uruņinan mianğöra tölöhomakza.

⁸ Tölöhomakzapmö, nenenöņ neņguanğita Anutu kösutņe qahö al neņgimakza. Nene sinği malbini, mewö geņmororoņ qahö miwikņabin. Nene nempa malbini, qetbuņaninan mewö qahö qarima.

⁹ Mi töndup nene pakpak nemingö amqzei, eņön mönö jaubatbat laņ malbepuköra galöm mem aņguba malme. Mewö malgetka tosatņan eņgeka uruņinan lölöwörö aka bölii et eņgubapuk.

¹⁰ Mianğö kōnaņi kewö: Gōņön mötkutukutu ölni memba mala amqeba tandö lopioņ jikenę anda tata nene nenōņa alagi kunņan gehi kewö lömbörima: Uruņan lölöwöröņi aiga uruyahöt akzawi, yaņön mewö geka uruņan wahöri amqeba nene tandö lopioņgö naluk alalņi mi nempa et qebawak.

¹¹ Gōhö mötkutukutugi ölni mianğön mönö nangi urumelen alagi kunğuga uruyahöt qakņe lölöwöröņi akzawaņğöra mönö amqeba nempa et qebawak. Kraistnōņ yaņğöra aka kōmuyökmö, nene mi nempa mewö et qeba ayuhuiga qahö dop kölma.

¹² Ayuhumapmö, urumelen alaurupņini mewö mem bölim eņgiba uruņini lölöwöröņi mi qeba kōndenđa sinğisōndok ahakzei, mewö mianğön mönö Kraist nanņi qetala sinğisōndok ahakze.

¹³ Mianğöra nōņön nene kun nembiga mianğön urumelen alani kölgorom waņgiiga et qeba sinğisōndok akza ewö, nōņön mönö nalö kunōņ nene mi qahö toroqeba nemam. Nōņön alani jölōņgōba kölgorom waņgibileņbuköra kapan kölma kinjal. Mewö.

9

Aposol denöwö akiga dop kölbowak?

¹ Wani kösōnōņ jōhöm niņgiiga solanņi qahö akilenak? Eņön kewöt niņgigetka aposol akzal me qahö? Kembunini Jisōsnōņ asuhum niņgiiga ehal me qahö? Nōņön Kεmbugōreņ naņğōba nup membiga iņini nup mianğö ölni akze.

² Kembunōņ nanņak aposol nup niņgii yambuk kinda membiga iņini uruņini melenđa nōņgö muņgem supapni akze. Mianğöra tosatņan kewöt niņgigetka aposol qahö akilenak ewö, eņön mönö kōnaņamni mewö möt yakōze. Mi mönö amqeba naņğōba jigetka dop kölma.

³ Ambazip tosatņan nōņğöra “Aposola qahö akza,” jiba tokoba andōnōņ qeqe ak niņgimakzemö, nōņön mönö eņğōreņ kōsohot jiba mianğön nani kōnaņamni naņğōba jimakzal.

⁴ Mianğöra kōnöp numbu nene neņgigetka neņakurupni yembuk memba nempa malbinak, mianğön mönö dopņe akawak.

⁵ Pitö, aposol tosatņi aka Kembu Jisōsgö munurupņi yeņön anōmurupņini mötnariņinambuha eņguanğita mohotņe anda kamakze. Nōņön mewöyök mianğö dop akilenak ewö, silik mianğön mönö kōna walōņđa qötōņgatpileņak me qahö? Mi qahōpmahöp.

⁶ Silegö malmalņe iņini ambazip iņi naņğöm eņgimakzemö, ni aka Barnabas qahö. Niri töwa qahö netkigetka öne malakzit. Mi mötketka dop kölja me qahö? Tosatņan urugö nup megetka töwa eņgigetka sileninaņğö nup qahö memakzemö, netkōrōhök mönö naņğōnaņğōniri nanirak miwikņabitkō dop jize me?

⁷ Gawmangö yarö nup memakzei, yeņğōreņök kunņan nanņi malmalņi naņğöm aņguba memakza me qahö? Wain nup kōmōrakzei, yeņön kōrek

mianğö ölni memba nemakze me qahö? Mewöñanök bulmakau galöm kölakzei, yeñön körek mianğö juzu onji nemakze me qahö?

⁸ Keu mi gölme ambazip nanine mötmötnöhök mötöteiba qahö jizal. Anutunöñ mewöyök mönö keu miyök Mosesgö Köna keunöñ jiza.

⁹ *Mosesgö Köna keunöñ Juda yeñgö nup meme silikñini mi jim asariba kewö ohoget ahöza, “Wit padigö kötni aka kamböñi kewötpingöra bulmakau aziñi wañgitketka padi kambu qakñe tiba tözöزامgömakzawi, yañgö numbuñi mönö kude mözöpköme. Mewö gumohom wañgigetka ölop nene kitipñi neiga dop köлма.” Mianğö dop kiamnöñ böröjañ memba sömbup meköi qeba nene kitipñi wañgiget neiga dop köлма. Anutunöñ kiam bulmakau mienğöra waimanjat qahö möta mewö jiza. Mi qahö.

¹⁰ Sömbupköra qahöpmö, keu mi mönö neñgöra jii ahöza. Keu mi neñön kewö akingöra aka ohoget ahöza: Kionoñnöñ nup barözawañön mönö ölni asuhumapkö jörömqöröm qakñe nupñi memakña. Mewöyök padi dudutnöñ qeba ölni aka kamböñi kewötzawañön mönö bahöñi memba nemapkö al mamböta nupñi memakña.

¹¹ *Neñön urugö keu kötni sutñine qesin gila malinga eñön malmalgö nañgönañgö yuai qahö neñgigetka gamuñambuk akza. Nöñön mem ölöwak eñgibiga eñön mianğö likepñi melenđa niñgigetka dopñe akña.

¹² Tosatñan sutñine urugö nup megetka nañgöm eñgigetka dopñe akza ewö, ni mönö dop mi onğita nañgöm niñgigetka dop köлма. Likepñi eñginga mianğö likepñi neñgigetka dop kölbawakmö, nöñön mianğö dop akñegöra qahö qesim eñgial. Kraistkö Ölöwak Buña keu sehimapkö könañi jöhöbinbuköra mönö yuai neñgimegöra qahö qesim eñgiin. Qahöpmö, naninahök mönö kapan köla köhöiba lömböt pakpak bisiba malin.

¹³ *Keu ki mönö mötmörime: Jöwöwöl jikenöñ nup memakzei, yeñön mönö jike mianğöreñök numbu neneñini memba nemakze. Jöwöwöl ohoba alt-agö könöpñi galöm kölmegöra kuñgum eñgigetka kinjei, yeñön ambazip nene nalukñini altagöreñ algetka nene mianğö kitipñi tosatñi mi mianğöreñök buña qem añgumakze.

¹⁴ *Keu mianğö dop Kembunöñ mewöyök jim kutuba keu kewö jiyök, “Ölöwak Buña jim sehigetka ambazipnöñ mötmei, yeñön mönö Ölöwak Buñağö likepñi kötön naluk algetka malmalñinañgö nañgönañgöñini miwikñaiba malme.”

¹⁵ Nöñön ölop keu mianğö dop mötmöriba urugö nup memba töwa niñgimegöra qesim eñgibileñakmö, kötön naluk almeañgö keu pakpak mi mönö mosöral. Moneñ almeañgö keu ohozali, mi eñön mewö ak niñgimegöra aka qahö ohozal. Töwa memamgö mötmöriba lömböriiga kömukömugö mötpiga amqeza. Nanañgöra mi keu omañi qahöpmö, töwa qahö niñgimegö keuñi mi mönö sileni möpöseiba jizal. Nöñgöreñ keu mi kunöñ kun qeapkömamgö osiiga malmam.

¹⁶ Ölöwak Buña jim sehimakzali, mianğöra sileni möpöseimamgö dop qahö akzal. Nöñön Anutugö jimkutukutu bapñe mala mi jim sehimamgö dop akzal. Nup mi mönö mosötmamgö osizal. Ölöwak Buña qahö jim sehibileñak ewö, mianğöra lömbötnöñ qakne öngöiga neka pölzik jimeañgö dop akileñak.

¹⁷ Nani sihimnañgö dop nup mi möwölöhöba membileñak ewö, mönö ölop töwa niñgimegöra mambötpileñak. Mimö, Anutunöñ kuñgum niñgiiga nani sihimni qahö mötöteiba Buñañi galöm kölakzal ewö, mi mönö Anutunöñ möt narim niñgiba nupñi niñgii maljalañgö dop memakzal.

* 9:9: Dut 25.4; 1 Tim 5.18 * 9:11: Rom 15.27 * 9:13: Dut 18.1 * 9:14: Mat 10.10; Luk 10.7

¹⁸ Mewö aiga wanatnöŋ mönö töwa ak niŋgimakza? Ölöwak Buŋa jim sehiba mi söŋgöŋöŋi qahö ahakzali, mianŋön mönö töwa ak niŋgimakza. Anutunöŋ nupŋaŋgö likepŋi niŋgimegöra jim kutui Buŋa Kimbinöŋ ahözawi, keu mianŋö dop töwagöra qahö kapan kölakzal.

¹⁹ Ambazip kunŋan kun qahö jöhöm niŋgiiga ölop nani imbi-imbi mal-bilenakmö, mi töndup mönö nani memba et al aŋguba maljal. Ambazip körekŋan uruŋini melenmegöra kapan kölakzal. Mewö akŋegöra ambazip körek welenŋini qeba maljalmö, sehisehiŋi yeŋön töndup Kraistkö buŋaya qahö akŋeaŋgö dop akze.

²⁰ Juda yeŋön uruŋini melenmegö bauköm eŋgiba sutŋine Juda tandök aka malal. Mosesgö Köna keu bapŋe maljeaŋön uruŋini melenmegö bauköm eŋgiba nanak Köna keu mianŋö bapŋe qahö mala töndup keu mianŋö gwaröŋe maljal tandök aka sutŋine malal.

²¹ Mosesgö Köna keu qahö möta maljeaŋön uruŋini melenmegöra bauköm eŋgiba sutŋine Köna keu qahö möta maljalaŋgö tandök aka malal. Nanak Anutugö Köna keugöra tönpin qahö maljalmö, Kraistkö Köna keu bapŋe anda mi tem kölakzal. Mi töndup yeŋgö sutŋine Anutugö Köna keu qahö mötmöt tandök aka malal. Ambazip sehisehiŋan uruŋini melenmegöra mewö aka malal.

²² Mötnariŋnöŋ lölöwöŋöŋi maljeaŋön uruŋini melenŋa köhöimegö bauköm eŋgiba sutŋine lölöwöŋöŋi tandök aka malal. Ambazip tosatŋi wani awamŋan köna inöŋ me wainöŋ uruŋini melenmegö meköm eŋgiba ambazip könaŋi könaŋi yeŋgö sutŋine tandök könaŋi könaŋi aka malal.

²³ Tandök pakpak mi Ölöwak Buŋanöŋ sehimapköra aka ahakzal. Sehiiga kötumötuetŋan nani qakne öŋgöi nanak mewöyök oyaenŋkoyaenŋ akŋamgöra aka mewö ahakzal.

²⁴ Keu ki mönö mötmörime: Ösumtiti nalöŋe körek yeŋön luhut almegöra ösumŋini qezaköba anakzemö, mohot kunŋan mönö luhut ala töwa mema. Inŋini mönö mohot mianŋö dop ösumŋinan anda töwa membingöra kapan köla malme. Mönö mianŋö dop mötnariŋ köl guliba malme.

²⁵ Ambazip mönahotnöŋ luhut albingö anakzei, yeŋön mönö körekŋan nanŋini törörök galöm köl aŋgubingö köl gulimakze. Yeŋön kösatorom julkula gororöŋgömawi, miyök membingö kapan kölakzemö, neŋön ila jalö qahö ayapkömawi, mönö töwa mi membingö kapan kölakzin.

²⁶ Mianŋöra nöŋön ösumnan laŋlaŋ an köl kam köl qahö anakzal. Böröni misiba bim laŋlaŋ qahö qemakzalmö, aŋgit alaurupni luhut al eŋgimamgöra mönö diŋdiŋanök törörök qemakzal.

²⁷ Nöŋön ambazip tosatŋi Buŋa keunöŋ uruŋini kuŋguba malbi teköiga Anutunöŋ mönö andö nuŋgui nanak ila jalöŋi qahö membilenbuk. Mianŋöra mönö nani sileni mindiŋgöba törörök köl guliba galöm kölakzal. Mewö.

10

Israel mutuk malgeri, yeŋgöreŋ galöm meme keu

¹ *O urumelen alaurupni, Israel neŋgö ambösakoninan Mosesgö andöŋe kaba wuatanaŋgetka yuai asuhuyöhi, mianŋöra mönö gukmaulem malbepuk. Mianŋöra Israel neŋgö könanini kewö suariba ohozal: Yeŋön mönö körek kousu bapŋe kaba mala Köwet Pisikŋi kutugetka yeŋgöreŋök kunŋan kun qahö ayuhuyök.

² Anutunöŋ o melunŋi kousunöŋ aka köwetnöŋ aliga mi kutuba kaba körekŋan uruŋini melenŋa Mosesgö könaŋesöŋi aket.

* 10:1: Eks 13.21-22; 14.22-29

3 *Mewö aka körek yeñon urugö nene miyöhök miwikñaiba nempa malget.

4 *Mewöyök körek yeñon urugö onji miyöhök miwikñaiba nempa malget. Urugö onji mi köt ketani kunöñ enkuatangöba könañine kayöhi, mönö miangörenök miwikñaiget. Köt ketani mi Kraistkö söpsöpñi.

5 *Mewö malgetmö, mi töndup Anutunöñ könagesö ölni miengöra urusösöngai qahö möta maliga gölme qararankölkölñe ayuhugetka qamötñinan qeqelanlan ahöba gisahöget.

6 *Mewö asuhuyöhi, mi nanini kezapqetoknina akza. Anutunöñ mönö söpsöp mi neñgöra aka aliga galöm meme keunina kewö akza: Yeñon uruñini qahö galöm köla bölöñangöra köpösöngögeri, neñon mönö miangö dop aka ayuhubinbuk.

7 *Mewöyök Israel yeñgörenök tosatñan tandö lopion waikñini memba möpöseiba malgeri, eñon mönö miangö dop aka malbepuk. Yeñgöra Buña Kimbinöñ keu kewö ohoget ahöza, “Könagesö yeñon nem sösöngai ala tokoba tatketka uruñinan wahöriga miangön melenña kezapjupjup kewö ahök: Yeñon linet gwawet unduba o köhöikñi nempa serowilin lan aket.” Keu mewö ahöza.

8 *Yeñgörenök tosatñan serowilin aketka Anutugö irimsesewölñangöra aka ambazip 23.000 miangö dop silim mohotkö uruñe kömumba etket. Neñon mönö tosatñi miengö dop serowilin akinbuk.

9 *Mewöyök Israel yeñgörenök tosatñan Kambu esapköm wangigetka mokoleññon engehögetka kömuget. Neñon mönö tosatñi miengö dop Kambu esapköm wangibinbuk.

10 *Yeñgörenök tosatñan galömurupñini irikuruk jimongot aka andö enguba malgetka mem ayuayuhu garatanöñ mönö engui kömuget. Neñon mönö tosatñi miengö dop irikuruk jimongot lan aka malbinbuk.

11 Mewö asuhum engiyöhi, söpsöp keu mi mönö nanini kezapqetoknina akza. Gölmenöñ malmalgö nalö teteköñan kam kungum neñgii maljini, kösohot mi mönö neñgöra aka ohogetka galöm meme keunina akza.

12 Miangöra kin köhöimangö jizani, mönö et guhubapuköra galöm mem anguba malman.

13 Esapesap qakñine öngömakzei, mi gölme ambazip körek neñgö qaknine öngömakze. Esapesap qainñi kun miwikñaibeak, miangören ösumñinan qahö dop köljawanğöra etpeakmö, Anutunöñ keuñi jöhöyöhangö dop mi pöndañ wuatangöba ahakza. Yanñon esapesap Tonji angön köliga esapesap ösumñini qahö dop kölmawanğö dop mi al engimangö osimakza. Mewögöra esapesap mötketka Anutunöñ ösumñi engiba mewö miangön ölöñ kölbängö köna mewöyök mesat enñgii asuhumakza. Miangöra eñon gölmegö esapesapñi mi ölop kin köhöiba luhut almeanğö dop akze. Mewö.

Tandö lopionğö lömbuan aka Kembangö semön kömbukñi

14 Miangöra wölböt alaurupni, tosatñan tandö lopion waikñini memba möpöseim engimakzemö, eñon mi kök ala mosötme.

15 Nöñon mötmöt ambazip aködamunñinambuk akzeangö dopkeu jimami, mi mönö nanñinak kewöta miangö ölni miwikñaime.

16 *“Kembangö semön nene nembin,” jiba kötumötuetkö qambigöra Anutu saiwap jiba köuluköba qambi miangörenök nemakzinangören mönö Kraistköreñ toroqeba sepñi nemakzin. Beret mindipköba miangörenök

* 10:3: Eks 16.35 * 10:4: Eks 17.6; Jan 20.11 * 10:5: Jan 14.29-30 * 10:6: Jan 11.4 * 10:7: Eks 32.6 * 10:8: Jan 25.1-18 * 10:9: Jan 21.5-6 * 10:10: Jan 16.41-49 * 10:16: Mat 26.26-28; Mak 14.22-24; Luk 22.19-20

nemakzinangörej mönö Kraistkörej toroqeba busunji nemakzin. Mianğöra ölüm engubapuk.

17 Körek neñon beret mohot mianğörejök nemakzin. Beret mi mohot akzawangöra aka gwötpuk neñon mönö Kraistkö ölñi mohot akzin.

18 *Injini mönö Israel könagesögö malmalñi mötmörime. Ambazip jöwöwöl ohomegöra nene algetka tosatñan mianğö kitipñi nemakzei, yeñon mönö altagörej toroqeba nupñi Anutugöra memakze.

19 Keu mianğö könani ölñi mi mönö denöwö jibilenak? Tandö lopion engöra bau qegetka sepñi eri jöwöwöl ohomakzei, mianñon ölñambuk akzawangöra jiza me qahö? Tandö lopion mi ölñi akzeangöra jiza me qahö? Keu mianğö könani denöwö?

20 *Tandö lopion mi ölñi qahöpmö, urumelengö kopa yeñon töndup jöwöwölñini ömewöröme yeñgöra ala ohomakze. Mi Anutugöra qahö. Nöñon injini ömewöröme yembuk toroqeba malbepuköra waimanjat mötzal.

21 Injini Kembugö qambinöhök aka ömewöröme yeñgö qambinöhök öröröñ nembangö osime. Mewöyök Kembugö nene dum aka ömewöröme yeñgörej nene dum mi öröröñ toroqebingö osime.

22 *Ahakmeme mewöñan mönö Kembugö urunji qei bölüiga irimñi seholimapköra mötzin me? Kukösumninan mönö Kembu onğita onğöba maljin me?

Nanine imbi-imbi mosöta Kembu möpöseibin.

23 *Tosatñan kewö jimakze, “Nini ölöp nanine imbi-imbi yuai pakpak ahakzin.” Keu mi ölñapmö, ahakmeme pakpak mianñon mönö qahö bauköm neñgimakza. “Nini ölöp nanine imbi-imbi yuai pakpak ahakzin,” mewö jimakzemö, ahakmeme pakpakñon mönö urunini qahö nangöba mem köhöim neñgimakza.

24 Kunñan kun nanñangörök mötmöriba ölöwakñangöra kapan kölhapukmö, alaurupñan ölöwakñegöra kapan köli dop kölma.

25 Sömbup i me wai maketnöñ aka qeköm nene mire bohonñi memegöra alakzei, mi mönö uruyahöt mosöta nemakñe. Sömbupköra uruninan tölöhobapukö qesiqesinji kun mönö kude akñe. Qahö!

26 *Keu mianğö könani mi Buña Kimbinöñ kewö ohoget ahöza, “Gölme aka yuai pakpak mianğörej ahözawi, mi Kembugö buñaya akza.”

27 Kun Kraist qahö möt narizawanñon engoholiga yangörej anbingö möta anda tatketka nene i me wai jeñine al engime, mi mönö uruyahöt mosöta neme. Nenegöra uruninan tölöhobapukö qesiqesinji mi mönö kude akñe. Qahö!

28 Nannñangöra qahöpmö, “Nene ki mönö tandö lopion yeñgö naluk alalñi akza,” kunöñ mewö jii mötme ewö, mi jiyöhi, yangöra aka uruñan bölöbapuköra mönö galöm mem anğuba kude neme.

29 Nangi urugan tölöhobapuköra qahö jizalmö, alagahö uruñan bölöbapuköra mi jizal. Nöñon nani imbi-imbi yuai akiga alanangö uruñan bölüiga kewöt niñgiba Anutunöñ keuni jim teköba likepñi melen niñgibapuk. Öne mewö menden anğuinga jabö ahuiga qahö dop kölja.

30 Nöñon ambazip yembuk toroqeba tata nenenñangöra “Anutu pipsai-wap!” jiba sömbup nemami, tosatñan mewö neka mianğöra andö nunğugetka qahö dop kölma. Sömbupköra Anutu möpöseizali, mianğöra mönö keu töhörej jim niñgigetka qahö dop kölja.

* 10:18: Lew 7.6 * 10:20: Dut 32.17 * 10:22: Dut 32.21 * 10:23: 1 Kor 6.12 * 10:26: Sum 24.1

³¹ Mianğöra o me nene nemei aka i me wai akñei, mi pakpak mönö Anutugö qetbuñañan sehimapköra aka ahakñe.

³² Yuai kun kude aketka kungö uruñan mianğöra böliiga mötnaripñan sörörauba etpapak. Juda me kantri tosatñañgö ambazip me Anutugö könagesö miengö sutñine kungö uruñan mönö engöra aka bölibapak.

³³ Nöñön mewöyök yuai pakpak ahakzali, mianğöreñ mönö ambazip körek pakpak uruñinan ölöwakñapaköra kapan köla maljal. Nanök ölöwakñamğöra qahö kinjalmö, ambazip sehisehñan ölöwakñegöra jaram tibiga kunbuk letota Suepkö buñaya akñegöra kapan kölakzal. Mewö.

11

¹ *Nöñön Kraistkö silik ewö ahakzali, mianğö dop eñön mönö nöngö silikni wuatangöba malme. Mewö.

Ambi eñön mönö nöropñini esuhuba Kembu möpöseime.

² Nöñön yuai pakpak ahakzali, inini mianğöreñ mötmörim niñgimakzeangöra saiwap jim engizal. Inini kusum engialangö dopkeuni tem köla wuatangömakzei, mianğöra mönö möpöseim engizal.

³ Nöñön inini keu ki möt kutumegöra mötzal: Kraistnöñ azi körek neñgö bohonini akza. Azinöñ ambigö bohonni akza aiga Anutunöñ Kraistkö bohonni akza.

⁴ Mianğöra azi inini mönö duhuñini qeköba köuluköba Anutugö keu jigetka dop kölja. Azi körekñan nöropñini turuba köuluközei me Anutugö kezapqetok keu jim asarizei, Anutunöñ mönö yeñgö mötmötñinañgöra möri gamuñambuk aiga nanñini memba et al angumakze.

⁵ Mewömö, ambi kunñan nöropñi qahö esuhuba qenjarök totokonöñ köuluközawi me Anutugö kezapqetok keu jim asarizawi, yañön mönö apñi nöropñi akzawi, mi gamu qeba nanñi memba et alja. Mewö aka nörop jupñi körek mitigetka aukñe öne maljawangö dop akza.

⁶ Ambinöñ nöropñi qahö esuhuza ewö, yañön mönö nörop jupñi mewöyök jiiga mitigetka dop kölja. Mi dop köljapmö, ambinöñ nörop jupñi jiiga mitigetka gamuñambuk akapak. Mianğöra mönö nöropñi esuhuba mali dop kölja.

⁷ *Ambinöñ apñangö aködamunñi akzapmö, azinöñ Anutugö imutñi aka aködamunñi akza. Mianğöra azinöñ mönö nöropñi kude esuhui dop köлма.

⁸ *Mi kewögöra: Mutuhök azinöñ ambinöhök qahö asuhuyökmö, ambinöñ azigöreñök asuhuyök.

⁹ Anutunöñ azi mi ambigöra qahöpmö, ambi mi azigöra miwikñaiiga malje.

¹⁰ Könañi mianğöra aka ambinöñ mönö kukösum bapñe malmalgö aiwesökñi mi nöropñi esuhuba maliga dop kölja. Mewö aiga Suep garata yeñön gödaqeqegö silik ölöpñi ehakze.

¹¹ Mewö dop köljapmö, Kembubuk qekötahöba malinga ambinöñ mönö azigö keuñi qahö ongita nanñi imbi-imbi lañ kude malma. Azinöñ mewöyök ambigö keuñi qahö ongita nanñi imbi-imbi lañ kude malma.

¹² Ambinöñ azigö sihitneyök asuhuiga mianğö dop azinöñ mewöyök ambigö körö uruñeyök asuhuba maljinmö, öroyuai pakpakö könañi mi Anutu.

¹³ Mianğöra ambinöñ nöropñi qahö esuhuba Anutu köuluköiga dop kölja me qahö? Keu mi mönö nanñinak kewöta jöhöme.

¹⁴ Anutunöñ ambazip miwikñaim neñgiba gölmenöñ mohotñe malmal arengöyöhi, areñ mi eka kewöta silik kewöñi mönö möt asarizin me qahö? Azinöñ nörop jupñi qahö mitiiga köriza ewö, mianğön mönö gamu qem wangiza.

¹⁵ Anutunöŋ ambigö nöröp jupŋi köröpŋi mi esuŋi akŋapköra waŋgii malja. Mianğöra ambinöŋ nöröp jupŋi qahö mitiiga köriza ewö, mianğön mönö aködamunŋi ak waŋgiza.

¹⁶ Kunöŋ keu mianğöra goranora akŋamgö mötza ewö, nöŋön mianğöra keu mohok-kun kewö jimam: Anutugö könagesöŋi könagesöŋi Anutu möpöseibingö tokomakzei, yeŋön mönö nembuk urumohot aka silik miyöhök wuatangöba silik tosatŋi tökömakze. Mewö.

Kembugö semön töröŋi nemegö silikŋi

Mat 26.26-29; Mak 14.22-25; Luk 22.14-20

¹⁷ Inŋini urumelen totokonöŋ tokoba mianğöreŋ qahö ölöwahakzemö, mönö toroqeba böliqölimakze. Mianğöra qahö möpöseim engizalmö, areŋ ala jim kutum engizal.

¹⁸ Keu mutukŋi kun kezapne gei kewö möral, “Inŋini urumelen könagesögö totokonöŋ tokomakzei, mianğöreŋ mönö sutŋine anğururuk ahakze.” Keu mi jiget möta bahöŋanök ölni akzawi, mewö möt narizal.

¹⁹ Sutŋine deŋda kambu morömorö aketka Anutunöŋ engehiga denike eŋön mötnaripkö esapesapnöŋ kin köhöize aka denike eŋön qahö dop köljei, keu mianğön mönö aukŋe asuhumakza. Mianğöra uruyahöt qahö mötzal.

²⁰ Urumelen totokonöŋ tokomakzei, mianğöreŋ mönö Kembugö semön töröŋi nembangö silikŋi qahö wuatangömakze.

²¹ Mi kewögöra jizal: Semön töröŋi nemakzei, mianğöreŋ öröröŋ qahöpmö, nanŋök nanŋök neneŋini memba könahiba laŋ neget teköiga tosatŋan toroqeba wösöŋini aliga tosatŋan o köhöikŋi gwötpuk memba eŋololon akze.

²² Ahöahö miriŋini ahöm engiza me qahö? Mianğöreŋ ölop nene aka o neme. Anutugö urumelen könagesö jijiwilit ak engibingö mötze me ambazip wanapŋi neneŋini qahö mi memba et al engibingö mötze me? Mianğöra nöŋön inŋini möpöseim engimamgöra mötze me? Mewö qahöpmahöpmö, denöwö jim engibileŋak?

²³ Kembunöŋ keu niŋgiyöhi, nöŋön mönö eŋön mewöyök mi mötmegöra kewö jimam: Kembu Jisös mamalolo mem waŋgigetka sunğem mianğöreŋ beret meyök.

²⁴ Mi memba kötuetsköba saiwap jiba mindipköba kewö jiyök, “Ki nani busuna. Mi engöra aka tököm engizal. Mi memba mönö ni mötmörim niŋgiba malme.”

²⁵*Mewö jiiga neget teköiga mewöŋanök qambi memba kewö jiyök, “Qambi ki mönö jöhöjöhö dölokŋi akza. Nöŋgö sepni kianğön mönö Anutugö jöhöjöhöŋi mem köhöii ahöma. Mi nemakŋeangö dop mönö ni mötmörim niŋgiba malme.”

²⁶ Beret aka qambi mianğöreŋök nemakŋei, mianğöreŋ mönö nalö dop Kembunöŋ kömuyöhi, mianğö buŋaŋi mem asariba mal öŋgögetka liliŋgöba kaiga teköma.

²⁷ Mianğöra kunŋan beret me Kembugö qambi mianğöreŋök iwilele qakŋe nezawi, yaŋön mönö Kembugö busuŋi aka sepŋi memba et ala siŋgisöndokŋambuk akza.

²⁸ Mianğöra ambazip neŋön nanini uruninaŋgö könaŋi kewötagun mönö beret aka qambi mianğöreŋök neinga dop kölma.

²⁹ Kunŋan Kembugö busuŋi aka sepŋi qahö göda qeba nene töhön ewö laŋ nezawi, Kembunöŋ mönö yaŋgö keuŋi jim teköiga lömböt qakŋe öŋgöma.

³⁰ Laŋ memba malgeraŋgöra aka ambazip sehisehiŋan mönö sutŋine löwöriba kawöl miwikŋaigetka gwötpukŋan lök nöŋ qeba kömuget.

* 11:25: Eks 24.6-8; Jer 31.31-34

³¹ Kömugetmö, nanini urunini kewötpinak ewö, Anutunöŋ mönö keunini kewöta jim teköiga lömböt qahö miwikñaibin.

³² Mi qahö miwikñaibinmö, Kembunöŋ keunini kewöta jim teköba mewö mönö nalö kewöŋe mindingöm neŋgimakza. Könaŋgep jim teköm neŋgiiga ambazip uruŋini qahö melenŋeri, yembuk öröröŋ könöp sianöŋ gebinbuköra mönö mindingöm neŋgimakza.

³³ Mianŋöra urumelen alaurupni, nene nemegöra tokomakŋei, mianŋöreŋ mönö nanŋinanŋöra mamböt aŋguba öröröŋ nemakŋe.

³⁴ Kunöŋ wösöŋi alja ewö, yaŋön mönö nanŋe mire neneŋi nema. Tokoba laŋ negetka Anutunöŋ eŋgeka keuŋini jim teköi lömböt miwikñaibepuköra mi jizal. Keu tosatŋi eŋgöreŋ kamami, nalö mianŋöreŋ jim kutum eŋgimam. Mewö.

12

Nup memegö mötmöt kalem mienŋö könaŋini

¹ O urumelen alaurupni, nöŋön Uŋa Töröŋaŋgö mötmöt kalemŋi kalemŋi mianŋö keugöra gukmaulem malbepuköra mötzal.

² Urumelenŋö kopa malgeri, nalö mianŋöreŋ inöŋ me wainöŋ eŋguaŋgiriga tandö lopioŋ omaŋi waikŋini memba möpöseiba malget. Mewö me mewö janjuŋ anda laŋ malgeri, mi ölop mötze.

³ Mianŋöra inŋini keu ki mötmegöra jizal: Anutugö Uŋaŋan kun sölölohöiga “Jisös qesuahözal,” keu mi qahö jiza. Mewöyök Uŋa Töröŋan azi me ambi kun qahö sölölohöm waŋgiza ewö, yaŋön mönö “Jisösnöŋ Kembu ak niŋgiza,” keu mi jimamgö osiza.

⁴ *Nup memegö mötmöt kalemŋi mi könaŋi könaŋi akzemö, Uŋa Töröŋan mönö mohot akza.

⁵ Urumelen könagesö welen qem eŋgibingöra nup könaŋi könaŋi memakzinmö, Kembunöŋ mönö mohot akza.

⁶ Welen qem eŋgibingöra Anutunöŋ kukösumŋi körek neŋgöra menden neŋgiiga amqeba köhöiba nup meinga ölni könaŋi könaŋi asuhumakza. Ölni pakpak mi Anutugöreŋök kamakzapmö, Anutunöŋ mönö mohot akza.

⁷ Uŋa Töröŋan könagesö urunini naŋgöi köhöibingöra möta nup memegö mötmöt kalemŋi indeliga ölnan mönö mohot mohot neŋgöreŋ kewö me kewö asuhumakza:

⁸ Uŋa Töröŋan kungö uruŋe geba Anutu nam köliga mötkutukutu keu jijigö kalemŋi waŋgiza. Uŋa mohot mianŋönök mönö kun sölölohöiga mötmöt qainŋi kun möt yaközawaŋgö kalemŋi buŋa qem aŋguza.

⁹ Kunöŋ Uŋa mohot mi qekötahöba mötnaripkö kalemŋi buŋa qem aŋguza. Toroqeba kunöŋ Uŋa Töröŋi miyöhök qekötahöba mem ölö-ölöwakö kalemŋi kalemŋi buŋa qem aŋguza.

¹⁰ Kungöra aŋgöletot memegö ösumŋi waŋgiza. Kungöra Anutugö kezapqetok keu jijigö kalemŋi waŋgiza. Kungöra uŋa aka öme mendenbingö kalemŋi waŋgiiga uŋa ölopŋan me ömewöröme kunöŋ sölölohöiga maljawi, mi ölop kewörakza. Kungöra keuŋi keuŋi qainŋi kun jijigö kalemŋi waŋgiza. Toroqeba kunöŋ keu qainŋi kun jiiga kungöra mi melenmapkö kalemŋi waŋgiza.

¹¹ Nup memegö mötmöt kalem pakpak mi Uŋa Töröŋi mohot mianŋönök mönö sölölohöba möri dop köljawaŋgö dop mendenŋiga körek neŋön nanŋök nanŋök buŋa qem aŋguba maljin. Mewö.

Kraistkö ölni mohotmö, kitipurupŋi gwötpuk.

¹² *Silenini mohot akzapmö, töndup mianŋö uruŋe silegö kitipurupŋi mi

* 12:4: Rom 12.6-8 * 12:12: Rom 12.4-5

gwötpuk akze. Kitipni pakpak mi gwötpuk akzemö, töndup mi mindiriba sile mohot akze. Kraistkö ölnan mewöyök mönö miangö dop akza.

¹³ Miangö könani kewö: Uña mohotnöñ mönö körek nini sölölohöba melun mem nengüiga Kraistkö ölni mohot akzin. Nini Juda me kantri tosatñangö toni maljini, nanini nupnini memakzini me tonini öne welen qem engimakzini, mi töndup körek nini mönö Uña miyök buña qem anginga urunine geiga möt wangizin.

¹⁴ Sileninan mönö sile kitipni mohotkö dop qahö akzapmö, miangö uruñe kitipurupni mi gwötpuk akze.

¹⁵ Könaninan kewö jibawak, “Ni böröya qahö. Miangöra sile qahö toroqeba maljal.” Mewö jibawak ewö, miangöra mönö töndup sile mosöta nanñök qahö malbawak.

¹⁶ Kezapninan kewö jibawak, “Ni jeya qahö. Miangöra sile qahö toroqeba maljal.” Mewö jibawak ewö, miangöra mönö töndup sile mosöta nanñök qahö malbawak.

¹⁷ Sileninan jömuk je akawak ewö, keu mötmötkö kezapninan mönö denike tatpawak? Mewöyök jömukñanök kezap akawak, mewö wörön mötmötkö söngörönninan mönö denike tatpawak?

¹⁸ Nanñök nanñök qahöpmö, Anutunöñ sile kitip mohot mohot mi arengöba möri dop köljawanö dop mindirim engüiga sile mohot akze.

¹⁹ Sile kitip pakpak mi kitip mohot akeak ewö, mönö denöwö sile mohot akawak?

²⁰ Mewö qahöpmö, sile kitipnini mi gwötpukmö, silenöñ mönö mohok akza.

²¹ Miangöra jenöñ börögöra kewö jimangö osiza, “Ni göhöra qahö osizal.” Mewöyök nöropnöñ könagöra “Ni göhöra qahö osizal,” mewö jimangö osiza.

²² Simbisembel qahöpmö, sile kitipnini möringa lölöwöröñi akzei, mienön qahöwaketka jebuk malbingö osibin.

²³ Sile kitipnini möringa qetbuñanini eretni akzei, mi mönö esuhuinga qetbuñaninambuk akze. Sile kitipnini möringa gamuñinambuk akzei, mi mönö törörök esuhuinga ambazip jenine dop kölja.

²⁴ Sile kitipnini aukñe kondelbingö gamu qahö mötzini, mi mönö qahö esuhuinga dop kölja. Mewö ahakzinmö, Anutunöñ sile kitipni kitipni mindiriba jöhöm engiba kitipni omani mi qetbuña ketani wangiiga öröröñ akze.

²⁵ Sile kitip yeñön sutñine jula angururuk akepukmö, tandök mohot köyan köñ anjumegöra mönö arengöiga öröröñ akze.

²⁶ Sile kitip kunñan sihimbölö mötzawi, tosatni pakpak mönö yambuk sihimbölö mörakze. Sile kitip kunöñ qetbuña miwikñaizawi, tosatni pakpak mönö yambuk söngaimakze.

²⁷ Enön Kraistkö ölni akze aka mohot mohot enön mönö yangö ölnangö sile kitipni akze.

²⁸ *Miangö dop Anutunöñ al engüiga urumelen könagesögö nup kewö memakze: Mutuk tosatni kuñgum engüiga melaimelai azi aposol akze. Miangö andöñe kambu yahötñi kuñgum engüiga kezapqetok ambazip akze. Kambu karöbutni yeñön böhi qaqazu akze. Miangö andöñe tosatñan angöletot meme ambazip akze. Tosatni yengöra mötmöt kalem engüiga kawölñi kawölñi mem ölöwahakze. Tosatñan amqeba köhöiba tosatni alabauk ak engimakze. Tosatni yengöra kalem engüiga galömkölköl nup memakze. Tosatñan keu qainni kun jimakze.

²⁹ Körek enön mönö melaimelai azi aposol qahö akze. Saumban! Körek enön mönö kezapqetok ambazip qahö akze. Körek enön böhi qaqazu akze me qahö? Körek enön angöletot meme ambazip akze me qahö?

* 12:28: Ef 4.11

³⁰ Kawöl mem ölöwakingö mötmöt kalemñi kalemñi mi körek engörej ahöza me qahö? Körek enön mönö keu qainñi kun qahö jimakze. Qahö. Keuñi keuñi qainñi kun jigetka enön mönö körek mi melenbingö amqeze me qahö?

³¹ Enön mönö nup memegö mötmöt kalemñi kalemñi ölop sorokñi mi buña qem anğubingöra awöweñgömakñe. Mewö awöweñgögetka nöñon kõna qetpuk sorokñi kondela mianğö mötmöt kalemñi mi kewö jim asarimam:

13

Jöpaköm anğuanğugö kalemñi

¹ Nöñon ambazip aka Suep garata yeñgö keuñi keuñi qainñi kun mianñon keu jiba malbilenakmö, urukalemnan qahö asuhuza, mönö töndup kewö akilenak: Goñ qegetka goñgoñ qeri anğötömualñi mörakzini me göjön (biret) uturukögetka kinqororoñ qerakzawi, mönö mianğö dop akilenak.

² *Kezapqetok keu jijigö mötmöt kalemñi ahöm niñgiiga keu asa-asambötñi pakpak mötpilenak aka keu pakpakö kõnañi möt yaköbilenak, mianñon mönö dopñe akza me qahö? Mi töndup urukalemnanğö ölñan qahö asuhuiga mewö mönö yuai omananök aka öne töhön malbilenak. Mötnarip köhöikñi kötökñi miwikñaiba mianğö qakñe kundunğö Toñi jim kutubiga ölop tem köla kundunñi qeköba kungen albawakmö, urukalemni qahö asuhuza, mewö töndup mönö yuai omananök aka öne töhön malbilenak.

³ Sukinapni pakpak ambazip wanapñi yeñgöra menden engibilenak aka sileni tosatñan ohoget jemapköra tököm engibilenakmö, urukalemnanğö ölñan qahö asuhuza ewö, mianñon mönö qahö kötökñi bauköm niñgima.

⁴ Kunñan alañi uruñan jöpaközawi, yañon mönö urukönöpñi qahöpmö, urubönjön qakñe ala ak wañgimakza. Körogisigisi qahö möta yuainğöra qahö köpösöngömakza. Silenñi qahö mem wahöta jakbak-öranbörañ qahö malja.

⁵ Ahakmemenjan alañanğö uruñi qahö mem bölimakza. Nanñi ölöwakñangörök qahö kapan kolakza. Uruqege ak wañgigetka urukönöp zilañ qahö ahakza. Mem bölim wañgigetka sihimbölö möröhi, mi qahö mötmöriba mosörakza.

⁶ Tosatñan bölöñi akzei, mianğöra qahö söñgaizapmö, keu ölñi wuatangömakzei, mönö yembuk mohotñe söñgaimakza.

⁷ Nalö dop alañi sel jöhöba qöhöröñe kin köhöiba möt narim wañgimakza. Mewö me mewö asuhuiga Anutugö jörömçöröm aka al mamböta awösamakak kinda sihimbölö pakpak möta mökö söngömakza.

⁸ Urukalem ahakmeme mi nalö teteköñi qahö ahöm öngöma. Kezapqetok keu jiba keuñi keuñi qainñi kun jimakzei, mianñon qahöwakña aka mötmöt qainñi kun mianñon mönö mewöyök omanñi ak teköma.

⁹ Mötmöt qainñi kun mi bahösapsap möt yakömakzin aka kezapqetok keu mi bahösapsap jimakzin.

¹⁰ Bahösapsap ahakzinmö, Anutugö kalemñi kalemñi aködamunñinambuk asuhumei, nalö mianğoreñ bahösapsap malmalninan mönö qahöwahiga oy-aenkyoaeñ siyoñsayoñi qahö malbin.

¹¹ Nöñon namande malali, nalö mianğoreñ namande keu jiba malal. Urumötmötnan namande aiga mianğö dopkeu kewöta mötmöriba malal. Azi ketanñi aka mianğoreñ namandegöreñ ahakmeme mi mosöta andö qeal.

¹² Mianğö dop nalö kewöñe Anutugö aködamunñi mi ölop qahö ehakzin. Mi piliknön uba ehökö tandök ek bibihiba tandökñi törörök qahö möta öne mötmörimakzin. Mewö mötmörimakzinmö, kõnañgep Anutubuk mesohol köl anğuba ek sorököbin. Nalö kewöñe mötmöt qainñi kun mi bahösapsap möt

* 13:2: Mat 17.20; 21.21; Mak 11.23

yaközalmö, nalö mianğoreñ mi mönö körek möt yaköm tekömam. Anutunöñ ni möt kömum niñgizawi, nöñön mianğö dop yangö könañamñi möt kömum tekömam.

¹³ Keu ki jim köhöizin: Kalem karöbut mötnarip, jörömqöröm aka urukalem mi köhöiba ahöm öñgömemö, urukalem ahakmeme mianñön mönö sutñine öñgöñgöñi akza. Mewö.

14

Kezapqetok keu aka keu qainñi kun jijigö kalemñi

¹ Urukalemğö könañi mönö wuatangöba malme aka nup memegö mötmöt kalem könañi könañi mi mönö buña qem angubingö kapañ köla malme. Mianñön ölöpmö, kezapqetok keu jijigö kalemñi memingöra mönö köhöiba kapañ köla malme.

² Kunöñ keu qainñi kun jizawañön mönö ambazip neñgöra qahöpmö, mönö Anutugörök mi jimakza. Uña Töröñan sölölohöiga keu asa-asambötñi asuhui jimakzawañgöra tosatñi neñön keu mi qahö möt asarim wañgimakzin. Mönö nanñanök bauköm angumakza.

³ Tönpin maljinmö, kezapqetok keu jimakzawañön mönö ambazip urunini mem köhöiba nanğöba urukölalep ak neñgimangöra aka keu jimakza.

⁴ Kunñan keu qainñi kun jiba mianñön mönö nanñi uruñi möhamğöba köhököhöi miwikñaimakzapmö, kezapqetok keu jimakzawañön mönö urumelen könağesö pakpak urunini möhamğöba mem köhöim neñgimakza.

⁵ Inini körekñan keu qainñi kun jimeğöra mötzalmö, kezapqetok keu jimeğöra mönö kapañ köla gwötpuk mötzal. Kezapqetok keu jimakzawañön mönö keu qainñi kun jimakzawi, mi onğitza. Keu qainñi kun jiba mi mianğoreñök nanine keunöñ melenjawwi, mewö mönö öröröñ akzahot. Mewö aiga keunñan mönö urumelen könağesö urunini möhamğöba mem köhöim neñgiiga dop kölja.

⁶ O urumelen alaurupni, nöñön engöreñ kaba keuñi keuñi qainñi kun jibilenak, mewö mönö denöwö mem ölöwak engibilenak? Mewö qahöpmö, Anutugöreñ keu indelmam me mötmöt qainñi kun engimam me kezapqetok keu jimam me goro kusum engimam ewö, mianñön mönö mem ölöwak engimam.

⁷ Awölop me gita kulele me yuai kunöñ liñetkö imbiñi miwikñaimakzini, mienñön mönö malmalñini qahöpmö, könañini mönö mewöñanök kewö ahöza: Kunñan awölop lañ uba me gita kulele lañ qeiga mianñön qetñini nanñök nanñök qahö miwikñaimakza ewö, liñetkö imbiñi mönö denöwö möt asarib-inak?

⁸ Mewöyök tömun um böligetka qetñi törörök qahö möt asarizin ewö, dañön mönö bim qegegöra jöjöröbawak?

⁹ Engö könañinan mewöñanök ahöza: Nesilamñinan ambazip qahö möt asarimeangö dopkeu lañ jize ewö, kunñan keu mewöñi mönö denöwö möt asaribawak? Keu mewö jizei, mianñön mönö öne lañ luhutnöñ anakza.

¹⁰ Gölmeñi gölmeñi mianğoreñ keu murutñi murutñi dawik jimakzini, mi dañön mötpawakmö, töndup körek mienñön mönö keugö könañi möt asarib-ingöra aka ahöze.

¹¹ Könañi mianğöra aka jimakzinmö, kunöñ keu jiiga keuñangö könañi qahö mötzal ewö, nöñön yangö keuñangö kianñi akiga yañön mewöyök nöñgö keuñangö kiani akza.

¹² Engö könañinan mewöñanök ahöza: Inini nup memegö mötmöt kalemñi kalemñi buña qem angubingö awöweñgögetka dop kölja. Mianğoreñ mönö kalem kewöñi memingöra kapañ köla malme: Mötmöt kalem urumelen

könagesö uruḡini möhamgöba mem köhöimakzei, mönö mi buḡa qem aḡuba nupnöh algetka qetpuk akḡa.

¹³ Mianḡöra keu qainḡi kun jimakzawaḡön mönö kewö köuluköiga dop köлма, “O Anutu, keu jizali, mi melenḡamḡö mötmöt kalemḡi ningiman.”

¹⁴ Mianḡö könaḡi kewö: Nöhön keu qainḡi kun jiba köuluközal ewö, nöḡö uḡanan keuyök jiba köuluközapmö, urumötmötnan mönö öḡi kun qahö mi-wikḡaiza.

¹⁵ Mianḡöra mönö denöwö akiga dop köлма? Nöhön mönö uḡananöhök qahöpmö, urumötmötni mewöyök mianḡöreḡ ala köulukömakḡam. Linet köla möpöseimakzali, mi uḡananöhök qahöpmö, urumötmötni mönö mewöyök mianḡöreḡ ala kölakḡam.

¹⁶ Gi Anutu uḡagan möpöseim waḡizan ewö, ambazip omaḡi kunḡan totokone kaba tata möpöseizanaḡö könaḡi qahö möt kutumawi, yaḡön mönö “Keu mi öḡa,” mi denöwö jibawak? Wania jizani, yaḡön mi qahö möt asariba öne tönpin tatza.

¹⁷ Gi ölop Anutu möpöseizalmö, keugan tosatḡi yeḡö uruḡini qahö möhamgöba mem köhöim eḡiza.

¹⁸ Nöhön körek iḡini eḡḡogita keuḡi keuḡi qainḡi kun mi gwötḡuk jimakzali, mianḡöra Anutu möpöseizal.

¹⁹ Anutu möpöseizalmö, urumelen könagesö uruḡe ambazip kusum eḡḡimamḡöra kapaḡ köla möt asarimeḡöra keu jitḡi 5 jimamḡö möḡpi öḡi akza. Keuḡi keuḡi qainḡi kunöh keu jitḡi 10.000 nanaḡörök jimamḡö möḡpi eretḡi akza.

²⁰ Urumelen alaurupni, iḡini keu kewöta mötmörimakzei, mianḡöreḡ mönö namande tandök mosöta ambazip ketanḡi yeḡö dop mötmöriba malme. Bölöḡi akin jigetka mianḡöreḡ mönö moröseḡep ewö aka osimemö, mötkutukutuḡinan mönö ambazip ketanḡi aka malme.

²¹ *Mosesḡö Köna keunöh keu kun kewö ohoget ahöza, “Nöhön kian ambazip kuḡum eḡḡibiga könagesö kienḡöreḡ kaba jitḡinan keu tandökḡi kun jigetka laḡ welipkömakḡemö, mi töndup nöḡö keuni qahö mötme. Kembu nöḡön mewö jizal.”

²² Keu mianḡö dopkeu qainḡi kun jiinga uruḡini qahö melenḡet yeḡön mötketka Anutugö aiwesökḡi ak eḡḡizapmö, mötnariḡ ambazip neḡöra mi-aḡön mönö aiwesökḡi kun qahö akza. Mi qahöpmö, kezapqetok keu jiinga mianḡön mötnariḡ ambazip neḡöra Anutugö aiwesökḡi akza. Urumelenḡö kopa yeḡön mi mötketka Anutugö aiwesökḡi kun qahö ak eḡḡiza.

²³ Urumelen könagesö eḡön tokoba körek eḡön keuḡi keuḡi qainḡi kun mianḡöreḡ jigetka tosatḡan Buḡa keu qahö kusum eḡḡigetka uruḡini qahö melenḡa öne mianḡöreḡ öḡömei, yeḡön mönö auruba kewö jibeak me qahö, “Nöröpḡinan mönö sohoi kahalalom akze.”

²⁴ Mewö jibeakmö, körek eḡön kezapqetok keuḡi keuḡi jigetka kunḡan Buḡa keu qahö kusum waḡigetka mötnariḡḡi qahö öne totokone öḡöma ewö, körek eḡön mönö siḡisöndökḡi indela uruḡi qahö melenḡöhḡö keuḡi jim tekögetka könaḡamḡi möt kutuiga aukḡe asuhuma.

²⁵ Uruḡaḡö keu tölapḡi tölapḡi aukḡe asuhuiga yaḡön mönö dapköba eta Anutu waikḡi memba möpöseiba kewö jim miwikḡaiba qetma, “Anutunöh öḡa eḡö sutḡine malja.” Mewö.

Urumelen totokogö areḡi kewö:

²⁶ O urumelen alaurupni, mewögöra nini mönö denöwö jiinga dop köлма? Iḡini Buḡa keugö tokomakḡei, mianḡöreḡ mohot mohot eḡön mönö körek

* 14:21: Ais 28.11-12

arejini kun me kun mi kewö ahakñe: Kunöñ Buña liñetkö areñi aliga kunöñ Buña keu kusum enjiiga kunöñ Anutugö goro dölokñi indeliga kunöñ keu qainñi kun jiiga kunöñ mi melenma. Areñ pakpak mi mönö urumelen könagesö urunini kunguget köhöibingöra aka ahakñe.

²⁷ Tosatñan keu qainñi kun jime ewö, ambazip 4 qahöpmö, yahöt me karöbut yeñönök mönö totoko mohotkö uruñe mewö jime. Yeñönök mönö areñinañgö dop awatan jigetka kunñan mi melenma.

²⁸ Kunñan keu melenmamgö dop qahö akza ewö, yeñön mönö urumelen könagesögö totokonöñ keu bök tata nanñinañgörök keuñini qainñi kun jigetka Anutunöñ mötma.

²⁹ Kezapqetok ambazip yeñgöreñök yahöt me karöbut yeñgörök mönö areñ enjigetka keu jigetka tosatñan mönö keuñini kewötme.

³⁰ Mewö akñemö, kunñan totokonöñ tariga Anutunöñ goro keu uruñe indeli mötza ewö, yañön mönö mi jiiga kezapqetok keu mutuk jizawañön keuñi mosöta bök tatma.

³¹ Ambazip körekñan Anutugö goroñi mötketka uruñini nanñgöi ölöwakñegöra inñini mönö körek pakpak ölop nalöñini memba areñinañgö dop kezapqetok keu jime.

³² Kezapqetok ambazip yeñön mönö ölop uñañini galöm kölgetka uñañinan keu bapñe anjeañgö dop akze.

³³ Anutunöñ kizik-kazuk Tonji qahöpmö, luai Tonji akza. Miangöra totokonñini mönö areñnöñ wuatangöba ahakñe. Ambazip sarakñi yeñgö sutñine könagesö dop ahakzei, inñini mewöyök mönö miangö dop kewö ahakñe:

³⁴ Ambi enñön mönö urumelen könagesögö totokonñine keu bök tatme. Yeñön keu jimeañgö dop qahö akzemö, Köna keu ahözawañgö dop mönö keu bapñe anda malme.

³⁵ Ambinöñ urumelen könagesögö keu jim kutuba kusum enjiiga qahö dop kölja. Miangöra keu kungö könani mötpingö mötze ewö, yeñön mönö mirinñine anda tata nanñini apurupñini qesim enjime.

³⁶ Anutugöreñ Buña keu mianñön mönö enñgö sutñineyök ahuyök me qahö? Keu mianñön ahuba sehiba mala enñgöreñ kaba enñgö buñayök akza me qahö?

³⁷ Kunöñ kewö jibawak, “Nöñön kezapqetok keu jibiga Uña Töröñan sölölohöm ningiiga keu miambuk urumohot qahö akzal.” Mewö jizawañön mönö keu ki möt yaköma: Nöñön ambigöra keu ohom enñgizali, mianñön mönö Kembugö jöjopañ keu akza.

³⁸ Kunñan keu miangö kezap qahö ala silebile malja ewö, inñini mönö azi yañgö keugö kude kezap al wañgiba malme.

³⁹ Miangöra urumelen alaurupni, inñini mönö kezapqetok keu jibingöra awöweñgöba malme aka keu qainñi kun jimegö songoñi mi kude alme.

⁴⁰ Mi kude almemo, yuai pakpak mönö törörök areñ ala wuatangöba ahakñe. Mewö.

15

Kraistnöñ kömupñöhök wahörök.

¹ O urumelen alaurupni, nöñön Ölöwak Buña jim asarim enñgiali, mi ölüm enñgubapüköra mönö köl gulim enñgimam. Inñini mi buña qem anñguba mötnaripñini miangöreñ ala töndangöba kinje.

² Nöñön Ölöwak Buña jim asarim enñgiali, inñini mi miangö dop töp memba anñgön kölme ewö, mianñön mönö mem letot enñgiga Suepkö buñaya akñe. Mewö qahö akñe ewö, uruñini mönö öne töhön melenma malje.

3* Nöñön keu tosatñi pakpak görañe ala nanak Buña keu möt anğön kölali, mi mötpi öngöiga mianğö keu kötni mötmegöra mi kewö enğial: Kraistnöñ mönö Buña Kimbi ahözawañgö dop neñgö siñgisöndokninañgöra aka kömuyök.

4* Kömuiga Buña Kimbi ahözawañgö dop löm kölgetka sömañi karöbut aiga kömupnöñök wahörök.

5* Kömupnöñök wahöta Pitögöreñ asuhuyök aka mianğö andöñe gwarekurupñi 12 yeñgöreñ asuhuyök.

6 Mianğö andöñe nalö mohot mianğöreñök urumelen alaurupnini qötöñini 500 onğiröhi, mönö yeñgöreñ asuhuyök. Yeñgöreñök ambazip ölni yeñön toroqeba nalö kewöñe mewöyök maljemö, tosatñan lök kömuget.

7 Mianğö andöñe munñi Jeimsgöreñ asuhuyök aka mianğö andöñe aposol pakpak yeñgöreñ asuhuyök.

8* Mienğöreñ körek asuhubagun qöndökñi mönö nöngöreñ mewöyök asuhuyök. Nöñön aposol mi asai ewö öröpköba aluñi asuhuyal.

9* Mianğö könañi kewö: Nöñön aposol yeñgö sutñine mötpi eriga dagibezupñini akzal. Anutugö urumelen könagesö sesewerowero ak enğiba malali, mianğöra nöngö qetni aposol qetketka mötpi gamuñambuk akza.

10 Gamuñambuk akzapmö, nalö kewöñe yuai akzali, mi mönö Anutugö kalem möriamñan mem letota nam köl niñgiiga maljal. Yañön kalem möriamñi niñgiiga liklak qahö akiga eta qeba omañi qahö ahökmö, nöñön mönö aposol körek luhut al enğiba köhöiba nup memba malal. Mi nanak qahöpmö, Anutugö kalem möriamñan mönö inahöm niñgiiga nupnañgö ölni mewö asuhuba sehiyök.

11 Nöñön meali me yeñön megetka ölni asuhuyöhi, mi muat. Neñön mönö Ölöwak Buña keu mewö jim asarimakzin aka inñini mianğö dop uruñini melenđa Kraist möt nariba malje. Mewö.

Nini kömupnöñök denöwö guliba wahötpin?

12 Mötket! Kraistnöñ guliba kömupnöñök wahöröhi, yañgö könañi mewö jim asarimakzin ewö, enğöreñök tosatñan mönö denöwö aka kewö jimakze, “Kömukömuñi yeñön qahö guliba wahötme.”

13 Mewö jimakzemö, kömukömuñi yeñön qahö guliba wahötpeak ewö, Kraistnöñ mönö mewöyök qahö guliba mal köhöibawak.

14 Anutunöñ Kraist qahö mem gulii kömupnöñök wahötpawak ewö, nini Buña keuñi mi jim asarimakzini mi omañi akawak. Mi möt narigetka mianğön mewöyök pömsöm qeba omañi akawak.

15 Anutunöñ ölna kömukömuñi qahö mem gulim enğii wahötpeak ewö, Kraistnöñ mönö mewöyök qahö mem gulii wahötpawak. Nini mi töndup Anutugö könañi kewö nañgöba jimakzin, “Anutunöñ mönö Kraist mem gulii kömupnöñök wahörök.” Keu mi ölni qahö akawak, ambazipnöñ mönö mianğöra aka könañamnini miwikñagetka munenñi aiga ölop nöngöra kewö jibeak, “Anutugö könañi mönö nañgöba jim sohomakza.” Keu mianğön mönö gamuñamñuk akawak.

16 Anutunöñ kömukömuñi qahö mem gulim enğii wahötme ewö, Kraistnöñ mönö mewöñanök qahö guliba wahötpawak.

17 Anutunöñ Kraist qahö mem gulii wahötpawak ewö, inñini mönö öne töhöntöhön möt narim wañgiba toroqeba siñgisöndokñinañgö kösöğwarönöñ malbeak.

* 15:3: Ais 53.5-12 * 15:4: Sum 16.8-10; Mat 12.40; Apo 2.24-32 * 15:5: Mat 28.16-17; Mak 16.14; Luk 24.34, 36; Jon 20.19 * 15:8: Apo 9.3-6 * 15:9: Apo 8.3

18 Mewö aiga alaurupninan Kraistpuk qekötahöba kömugeri, yeñön mönö mewöyök sohoba könöp siagö buñaya akeak.

19 Nini Kraist jörömqöröm ak wañgiba gölmenöñ malbinangö dop galöm köl neñgii miangöreñ tekömapköra mambötzin ewö, nini mönö ambazip tosatñi pakpak engongita bapñine geba öngöpñi daböñi malinga körekñan wösö mötmöt ak neñgimakzeangö dop akinak.

20 Mewö akinakmö, Kraistnöñ mönö ölna guliba kömukömuñi yeñgö jitje memeniñi aka kömupnöñök wahörök.

21 Miangö könañi kewö: Azinöñ kömup kondoriga asuhui könahiba kömumba mala korin. Kömumba maljinangöra aka azi kunñan kömumba guliba malmal köhöikñi kondoriga asuhuyök. Miangöra nini körekñan mönö mewöyök guliba kömupnöñök wahötpin.

22 Körek neñön Adam ewö aka kömumbini, mewöñanök Kraistpuk qekötahözini, Anutunöñ nini körek mal köhöibingöra mem gulim neñgima.

23 Mem gulim neñgimamö, körek neñön mönö Anutunöñ nalö alöhangö dop guliba wahötpin. Kraistnöñ jitjememenini aka guliiga miangö andöñe yangö buñañi akzini, neñön lilingöba kaiga nalö miangöreñ guliba wahötpin.

24 Kraistnöñ mönö lilingöba kaba ömewöröme pakpak gölme dop ösummumu qakñe galöm kölakzei, miengö kukñini memba et ala ösumñini körek köndenma. Mi köndenña bemptohöñi Anutu Iwigö böröñe aliga gölmenöñ malmal miangöreñ teköma.

25 *Kraistnöñ galöm köla mal öngöiga Anutunöñ Buña keu ahözawangö dop “mönö kerökurupñi körek luhut ala nanñi köna bapñe al engima.” Kraistkö galömkölköl nupñan mönö miangöreñ teköma.

26 Kerökurupñi luhut al engiiga miangöreñ kömup Tonjan mönö qöndökñi aiga memba et al wañgima.

27 *Miangö könañi mi Buña Kimbinöñ kewö ahöza, “Anutunöñ mönö yuai pakpak yangö köna bapñe ali ahöza.” Keu mewö ahözapmö, “Yuai pakpak ali ahöza,” keu mewö jiiga könañi mönö aukñe kewö ahöza: Anutunöñ yuai pakpak Kraistkö bapñe ali ahöiga nanñi mönö qahö memba eta Kraistkö bapñe al anguyök.

28 Mewö qahöpmö, Anutunöñ yuai pakpak Nahönñangö bapñe aliga galöm köla kerökurupñi pakpak nanñi kukösumñangö bapñe al engima. Mi teköiga miangöreñ Anutunöñ mönö Nahönñi mewöyök nanñi kukösumñangö bapñe ala galöm köl wañgima. Mewö aka Anutunöñ yuai pakpakö Kembuñi ak teköba mal öngöma.

29 Keu kun kewö: Ambazip tosatñan uruñini qahö melenña öne kömugerangöra tosatñan kömukömuñi mi bauköm engimegöra jiba salupñini aketka dumñe kunbuk o melun mem engimakze. Kömukömuñi yeñön qahö guliba wahötpeak ewö, yeñgö nup ölnan mönö denöwö asuhubawak? Anutunöñ kömugeri, mi qahöpmahöp mem gulim engii wahötpeak ewö, ambazip mewöñan mönö denöwögöra aka jigetka yeñgö salupñine o melun mem engimakze? Nupñini mi mönö öne membepuk.

30 Kömumba qahö wahötpinak ewö, neñön mewöyök mönö urunini Anutugö nupnöñ qahö ala jöhöbinak. Anutugö nupköra aka kömumbinbukö lömböt bapñe sundan qahö anda malbinak. Qahö.

31 Kömupnöñ mönö nalö dop gwahöt niñgimangö dop akza. Keu mi ölna. O urumelen alaurupni, nöñön Kraist Jisös Kembunini yambuk kinda engöra aka sileni memba öngömakzali, miangö dopkeu ölni mi aukñe jibi mötmegöra mötzal.

* 15:25: Sum 110.1 * 15:27: Sum 8.6

32 *Nani imbi-imbi wuatangöba nup ki memangö mötmörize ewö, yuai kianön mönö denöwö bauköm ningima? Mewö qesim engibiga mi mönö mötmöriba meleşme: Nöñön Efesus siti kiangöreñ ambazip ubibi kanjamñinambuk ewö miwikñaiba kömumbilenbuköra yembuk auba malal. Mönö tötböröm aka auba malal. Kömumbagun qahö guliba wahötpini, mewö mönö qahö aubilenjak. Qahö! Mewö aiga ölop tosatñi yembuk kewö jibilenjak, “Uran kömumbinangöra mönö ölop nene sösöngai ala o köhöikñi nemba malbin.”

33 Janjun kude akñe. “Ambazip bölöñi yembuk köisirik tatketka ahakmeme ölopñan bölöma.” Keu kun mewö ahöza.

34 Engö sutñine tosatñan Anutu qahö möt wangizei, miangöra gamuñini mötmegöra mi jizal. Miangöra mönö gukmaulemñini mosötme. Imbiñinan letoriga törörök möta siñgisöndok kude toroqeba ahakñe. Mewö.

Sileninan guliba wahöta tandökñi kun akña.

35 Kunöñ kewö qesibawak, “Anutunöñ kömukömuñi mi denöwö mem gulim engii wahötme? Sileninan mönö tandök denöwö meleşniga asuhume?”

36 Mewö qesibawak, mönö uruqahö keuya jibawak. Inini sehoñ kötni qahö kömuiga öne qesiñ gilme ewö, mianön mönö qahö jula wahötma.

37 Kötnangö ipñi wahötmawi, mi qahö kömötzanmö, kötnanök qesiñ giljan. Wit me sehoñ kötni me kötni tosatñi gilakzan.

38 Miyök gilakzanmö, Anutunöñ mönö sihimñangö dop ipñi wangima. Kötni tandökñi nanñök nanñök mi nanñini ipñi engimakza.

39 Yuai busuñini mi tandökñini mohot qahö. Ambazip busuñini nanñök, sömbup busuñini nanñök, nei busuñini nanñök aka söra busuñini mi nanñök.

40 Miangö dop Suepnöñ malmalgö sile mi nanñök akza aka gölmenöñ malmalgö sile mi nanñök akza. Nanñök nanñök akzahotmö, Suep silegö aködamunñi mi gölme silegö aködamunñi oñgita qainñi kun akza.

41 Wehöngö asakmararañi mi nanñök, köingö asakmararañi nanñök aka señgelau miengö asakmararañini mi nanñök. Señgelau asarigetka tosatñi miengö asakmararañini mi señgelau tosatñi miengö asakmararañini oñgirakza.

42 Guliba kömupnöhhök wahötpini, miangö könañan mönö miangö dop ahöza. Sile löm kölbini, mianön gisahöba qahöwakñapmö, Anutunöñ mi mem guli wahötmawi, mianön mönö qahö kömuma.

43 Sile löm kölbini, mianön lölöwöröñi aködamunñi qahö akzapmö, Anutunöñ mi mem guli wahöta miangöreñ mönö köhöikñi aka asakmararañambuk akña.

44 Sile löm kölbini, mianön gölmenöñ malmalgö sileya akzapmö, Anutunöñ mi mem guli wahöta miangöreñ mönö uña mire malmalgö sileya akña. Gölmegö sile ahöza ewö, miangö dop uñagö sileñi mi mewöyök ahöza.

45 *Miangö keuñi mi Buña Kimbinöñ mewöyök kewö ohoget ahöza, “Azi mutukñi Adam yañön letota uñañi miwikñaiba söngörö ösumñi öröba malmalñambuk ahök.” Keu mi möringa likepñi kewö asuhuyök: Adam qöndökñan mönö memguliguligö uñañi ahök.

46 Uñagö yuaini mi mutuk qahö asuhuyökmö, gölmegö yuaini mianön mönö mutukñi akza. Uñagö yuainan mönö miangö andöñe asuhuyök.

47 Anutunöñ azi mutukñi sömsömnöhök miwikñaiga gölme azia asuhuyök. Azi könañepñi yañön mönö Suepnöhök eta sutñine asuhuyök.

48 Gölme ambazipnöñ azi gölmenöhök asuhuyöhi, mönö yangö dop akze. Suepkö buña akzinañön azi Suepnöhök eta asuhuyöhi, mönö yangö dop akzin.

* 15:32: Ais 22.13 * 15:45: Jen 2.7

⁴⁹ Nini gölme azi mutukñangö kaisongolomñi memba maljini, miangö dop Suep azigö kaisongolomñi mi mewöyök memba malbin. Mewö.

⁵⁰ O urumelen alaurupni, nöñön keu kewö jibi mötme: Sep busuninan mönö Anutugö bemtohoñ uruñe angota dum memegö dop qahö. Mi osimahot. Sile kianñon gisahöba qahöwakñawi, mianñon mönö oyaenñkoyaenñ qahö akña. Suepkö dum qahö ayapkömawi, sile kianñon mönö mi memamgö osima.

⁵¹ *Mötket! Nöñön keu tölapñi kun kewö indelman: Körek neñon mönö qahö nöñ qeba kömumbin. Qahöpmö, kömukömuñi yeñon letotketka tosatñi neñon mönö sileninambuk letotpin.

⁵² Anutunöñ kömukömuñi mem gulim enñiiga tömun qainñi kun qöndökñan qeriga miangörenñ wahötketka neñon biliksik aliga wölanñök letotpin. Mutuk kömugeri, yeñon mönö kunbuk qahö kömume.

⁵³ Sep busu ki gisahöba qahöwakñawi, mianñon mönö letota qahö ayapkömawanñgö dop akña. Sile ki kömumawi, Anutunöñ mi mönö opo ewö qeköba miangö salupñe sile qahö kömumawi, mi neñii memba maluku ewö löngötpin.

⁵⁴ *Mewö akzapmö, letotletot mi ak teköiga silenini qainñi kun meinga qahö kömumba gisahömawi, nalö miangörenñ mönö söñgaibin. Buña Kimbinöñ keu ohoget ahözawi, mianñon mönö öññambuk aiga miangö dop kewö jime, “Yañon mönö kömup Toñi köndenña luhut aliga köirañ aljin.”

⁵⁵ *Keu miangö alañi kun kewö, “O kömup Toñi, göñon mönö luhut almanangö dop qahö. O kömup Toñi, göhörenñ lingip jitñi mianñon mönö neñgöhömangö osima.”

⁵⁶ Keu mewö ahözapmö, kömupkö lingip jitñi mi siñgisöndok ahakmeme. Jöjöpañ keuñan mönö siñgisöndok akinbukö soñgo aliga töndup ahinga kukñambuk ahakza.

⁵⁷ Kukñambuk ahakzapmö, Kembunini Jisös Kraistnöñ mönö Anutugörenñ bohon köliga alabauknini aiga yangöra aka luhut ala malbin. Miangöra “Anutu saiwap!” jizal.

⁵⁸ O wölböt alaurupni, luhut albinangöra enñon mönö kin köhöiba anjanbanjan mosöta uruñini kude öngöba eta ahakña. Kembugörenñ qekötahöba nupñi megetka öññan mönö eta omanñi qahö akña. Mi möt yaköba Kembugö nupñi mi mönö urukönöp* qakñe böñ qeba pöndañ memba malme. Mewö.

16

Jerusalem alabauk enñimegö jimkutukutuñi

¹ *Judia könagesö sarakñi yeñgöra alabauk monenñ tokomegöra qesim niñgigeri, miangöra kewö jim kutum enñizal: Nöñon Galesia prowinsgö urumelenñ könagesöñi könagesöñi jim kutum enñiali, enñon tok mönö miangö dop kewö ahakñe:

² Sonda dop wehön mutukñi miangörenñ inñini körek nanñök nanñök mönö naluk alakñe. Töhötmöriam memakzeangö dop monenñini bahöñi mi köweñini gorañe ala galöm köla malme. Mewö aketka nalö enñgörenñ kabiga miangörenñ naluk sanğabañga almeanñgö dop qahö akñemö, mi ölop köweñineyök memba altanöñ alme.

³ Mewö aketka enñgörenñ kamami, nöñon nalö miangörenñ ölop jim-asa-asari kimbi ohoba azi nup miangö mötket dop köljawi, mönö yeñgö böröñine ala melaim enñbiga mindimindiri kalemñini mi memba Jerusalem anme.

* **15:51:** 1 Tes 4.15-17 * **15:54:** Ais 25.8 * **15:55:** Hos 13.14 * **15:58:** Urukönöp mi Kembugörenñ ölopñangöra jiza. Urukönöp bölöñi mi qahö. * **16:1:** Rom 15.25-26

⁴ Nöñön yembuk mohotje anmamgö anmam ewö, yeñön mönö ölop nömbuk toroqeba mohotje köwet kutuba anbin. Mewö.

Polgö nupñangö aka kõna anangö areñi

⁵ *Nöñön Masedonia prowins ongita anmam. Miangöra Masedonia mosötagun mönö engörej kamangö mötzal.

⁶ Engörej kaba nalö tosatñi embuk tatpilenjak me kömunjan kie nalöñi (winter) mi mewöyök engö sutñine toroqeba mal teköbilenjak. Mewö malbi ölop bauköm niñgigetka denike denike anbilanjak, miangörej mönö amqeba kõna toroqeba anmam.

⁷ Nalö kewöñe engörej kaba kusukñanök engeka engongita anmamgö qahö mötzalmö, Kembunöñ on jima ewö, mönö nalö tosatñi embuk tatmamgö jöjörözal.

⁸ **Mewö jöjörözalmö, mutuk Efesus siti kiangörej toroqeba malbi yambu jeniqege dölökñi (pentekost) mianñon kam kuñguma.

⁹ Anutunöñ nöngöra nupkö nanñuñi ketanji öroi ölop nup ketanji membi ölni asuhum sehimakzalmö, gwötpukñan tuarenjon ak niñgimakze. Miangöra kiangörej toroqeba malmangö mötzal.

¹⁰ *Timotinöñ ni ewö Kembangö azi ipñi aka nupñi memba malja. Miangöra yanñon engörej kama ewö, inñini mönö köyan köl wanñigetka kenñöt mötmöñi qahö engö sutñine malma.

¹¹ Kunñan kun kude ek sirik kölmampö, embuk mal teköba nöngörej kamangö jimawi, miangörej mönö bauköm wanñigetka luainöñ engömosöta lilingöba kama. Nöñön urumelen alaurup yembuk i ekingö mambötzin.

¹² Urumelen alanini Apolos yangö keuñi kewö jimam: Yanñon urumelen alaurup yembuk engörej kamegöra jiba köhöikñanök uru kuñgum wanñial. Mi wanñialmö, nalö kewöñe engörej kamangö tököm köhöiza. Könanñep nalöñi ölop ahöm wanñimawi, mönö miangörej kama. Mewö.

Yaizözkök keu teteköñi

¹³ Inñini mönö uruguliguli mala mötnariñini köl guliba kin köhöiba malme. Azi köhöikñangö dop mönö urugö nanñonangö ambazip aka Kembangö kukösumñambuk kinme.

¹⁴ Yuai pakpak aka memei, mi mönö urukalemnöñ aketka asuhuma.

¹⁵ *Stefanas yangö mire maljei, inñini mi möt engize. Akaiia prowinsnöñ nup meinga uruñini melengetka nupninangö ölni mutukñi mewö asuhuyöhi, mötze. Yeñön ambazip sarakñi mi pöndañ welen qem engiba uruñini miangörej jöhöba ala maljei, mi mötze. O urumelen alaurupni, nöñön uruñini kewö kuñgum engizal:

¹⁶ Inñini tok ambazip mewöñi aka yembuk toroqeba nup mohotje memba Anutu welenñi qemakzei, mönö körek yeñgö keuñini bapñe anda malme.

¹⁷ Nöñön Stefanus Fortunatus aka Akaikus ki kangerangöra söngaimakzal. Inñini nömbuk Efesus ki qahö malgetka yeñön mönö engö salupñini aka köisirik ak niñgigetka dop kölja.

¹⁸ Yeñön engö unañini körö-ölöwak qeba maljei, miangö dop mönö nöngö unani mewöyök körö-ölöwak qem niñgiba malget. Miangöra inñini mönö azi mewöñi yeñgöra mötket öngöiga mi aukñeyök jiba keuñinangöra törörök kezap ala malme.

¹⁹ *Urumelen könagesöñi könagesöñi Eisia prowins kiangörej maljei, yeñön mönö yaizözkökñini algetka engörej kaza. Aqila Prisila aka urumelen

* 16:5: Apo 19.21 * 16:8: Lew 23.15-21; Dut 16.9-11 * 16:8: Apo 19.8-10 * 16:10: 1 Kor 4.17

* 16:15: 1 Kor 1.16 * 16:19: Apo 18.2

könagesö yetkö mire tokomakzei, yeñön mönö Kembedö qetne yaizökzökni gwötpuk algetka engören kaza.

²⁰ Urumelen alaurup pakpak Efesus ki maljei, yeñön mönö yaizökzökni algetka engören kaza. Inini mönö urumelen alaurupni yembuk jölöni jiba angum anguba numbuñini yöhötüm namba malme.

²¹ Nani yaizökzökni engören ala qetni nani börönan kewö ohozal: Pol.

²² Kunñan Kambu qahö jöpaköba urukalem qahö aka malja ewö, Kambunöñ mönö qesuakni yañgö qakne ali öngöma. Kambunini, gi mönö kanöñ!

²³ Kambu Jisösgö kalem möriamñan mönö embuk ahöma.

²⁴ Kraist Jisösbuk qekötahöba kinjei, nöngö urujöpaknan mönö körek embuk ahöba kötuatköm engii malme. Keu mi ölna. Mewö.

Korint Kimbi 2 Polnön Korint yengöra kimbi aliga 2 ahök. Jim-asa-asari

Pol aka Korint urumelen könagesö yejön urumohot ölopni qahö aketka nalö miangören Polnön Masedonia mala kimbinji ki ohoyök. Tosatjan Pol tuarenjon köhöikni ak wangigetmö, Polnön töndup anjururuk memba et ala yembuk urumohot akingö kapañ kölök. Anjururukni tekömapkö urusösöngainji kondel engiyök.

Kimbi bahöni mutukni (Boñ 1-7) miangören Polnön Korint urumelen könagesö yembuk jöhöjöhö ahöhangö keunji jiza. Könañi denöwögöra urumelen könagesö mi köhöiknanök jim engiyök? Mewö aiga urunini melenja urumohot akeri, miangö sösöngainji kondela jim asariza.

Kimbi bahöni 2 (Boñ 8-9) miangören Judia urumelen könagesö bauköm engiba naluk engimegöra kungum engiza.

Kimbi bahöni 3 (Boñ 10-13) miangö keunji kewö: Böhi takapulakanji tosatjan nanñini qetñini 'Aposol ölni' jiba Polgöra aposol munenji jigetka Polnön keu miangö likepni melen engiyök.

Buk kiangö bahöni bohonji 5 mi kewö:

Jim-asa-asari keu 1.1-11

Pol aka Korint urumelen könagesö 1.12-7.16

Judia urumelen kambu yengöra naluk alme 8.1-9.15

Polnön aposol ölni akzawanjö kukösumni 10.1-13.10

Keu teteköni 13.11-13

¹* Anutunön sihimnanjö dop Pol ni kungum ningiiga Kraist Jisösgö melaime-lai azi aposol akzal. Nöñön urumelen alanini Timotibuk tatzit. Korint sitinön Anutugö urumelen könagesö maljei aka ambazip sarakni pakpak Akaia prowinsni dop köla maljei, netkön embuk Buña keu eraum mötpingöra kaba kimbi ki ohozit.

² Anutu Iwinini aka Kembu Jisös Kraist yetkön mönö kalem möriam engiyohotka luainön malme.

Polnön Anutu urukölalepnanjö möpöseiza.

³ Nini Kembunini Jisös Kraistkö Anutu Iwinji möpöseimakzin. Yanön mönö ak-kömukömu Tonji aka urukölalep pakpak nengimakzawanjö Anutunji akza.

⁴ Nini kahasililin könañi könañi miwikñaimakzini, nalö miangören Anutunön uruqesawölim nengimakza. Uruqesawölim nengii möta miangö qakne kininga tosatjan kahasililin könañi könañi miwikñaimakzei, mi mönö ölop amqeba uruqesawölim engimakin.

⁵ Miangö könañi kewö: Kraistpuk qekötahöinga yanjö sihimbölöjan qaknine öngöi kelenmalelen mörakzinmö, miangö dop uruqesawölim mewönanök nengii Kraist qekötahöinga urukölalepnan urunine geiga kelenmalelen mörakzin.

⁶ Neñön köñjilin urune maljin ewö, Anutunön mönö injini uru qesawölim engii urunini kunbuk melenja oyaenköyaen akñegöra mötza. Anutunön uru qesawölim nengiiiga enön mi eka nanñinak uru qesawölim miwikñaima. Uru qesawölim nengimakzawanjö ölnan mönö urunine kewö asuhumakza: Nini sihimbölö möringa enön tok sihimbölö miyöhök miwikñaima ewö, mi mönö ölop möta mökösonda kin köhöiba malme.

* 1:1: Apo 18.1

⁷ Sihimbölönöñ qakñine öñgöi mörakzei, uru kölalepnöñ mönö mewöñanök qakñine öñgöi malje, mötzin. Mi möta miangöra enñon kin köhöimegöra mamböta jörömqöröm köhöikñi ahakzin.

⁸ *O urumelenj alaurupni, nini Eisia prowins uruñe nup memba mala nupkö sihimbölö möta kahasililij miwikñaiba mörini, inini miangöra gukmaulem malbepuköra mötzin. Nupkö lömbötñan ösumnini onñgita öñgöñgöñi aka mulumgöm neñgiiga kin köhöibingö osiinmö, töndup kapanj kölinga mem et al neñgiiga malin. Mewö asuhuiga toroqeba malbin me qahöwi, miangöra mewöyök tötböröm aka malin.

⁹ Mewö mala uruninan kewö mötmöriin: Kunöñ kömumbingö keuñi lök jim teköi keu miangön qakñine öñgöi ayuhubingö mambörin. Nanini ösumnöñ nariba malbinbukmö, Anutu kukösum qakñe nariba malbingöra aka mewö asuhuyök. Anutunöñ kömukömuñi mem gulim enñii wahötmei, yanñon mönö amqeba nini mewöyök bauköm neñgimakña.

¹⁰ Kömumbinbukö keñgöt mötmöt öñgöñgöñi ahinmö, Anutunöñ mönö miangöreñök meköm neñgiyök. Meköm neñgiyök aka toroqeba meköm neñgimakña. Nini jörömqörömnini Anutugöreñ ala mewö möt narim wangiba kinjin.

¹¹ Inini mewöyök bauköm neñgiba neñgöra aka köulukögetka meköm neñgimakña. Gwötñukñan neñgöra aka köulukögetka Anutunöñ möta miangö likepñi meleñni kalem möriamñan dop köl neñgii neñgehorimakña. Mewö meköm neñgiiga alaurup gwötñukñan mi möta neñgöra aka mindiriba möpöseigetka köirañ köulukñinan öñgöba Anutugö kezapñe gemakña. Miangöra mönö toroqeba nöñgöra aka Anutu köulukökmañe. Mewö qesizal.

Polnöñ köna anangö areñi uteköyök.

¹² Tosatñi inini nöñgö könañamñangöra uruyahöt akzei, miangöra keu kewö jimam: Anutunöñ solañni malbingö mörakzawi, neñon miangö dop gölmeñi gölmeñi liliköba miangöreñ ahakmeme sarakñi mi pöndañ wuatangöba malin. Engö sutñine mi mönö kapanj köla törörök wuatangöba malin. Mi gölme ambazip mötkutukutuninañgö dop qahöpmö, Anutugö kalem möriamñan inahöm neñgiyöhañgö dop mi aka memba malin. Anutunöñ ahakmemeni mi eka nañgöba “Dop kölja,” jiiga urukezapnan keu mi mörakzal aiga miangöra silenini memba öñgömakzin.

¹³ Kulem ohomakzali, miangö keuñi pakpak mönö ölöp oyoñda möt asarimeangö dop akza. Keuni mi geñmoñi qahö. Keu könañi asa-asambötñi kun qahö ohomakzal. Mi aukñeyök ahöza. Miangöra nöñgö könani mi körek möt asarim tekömegöra möta jörömqöröm akzal.

¹⁴ Nöñgö könani mi lök bahösapsap kewö möt asarize: Kembunini Jisösnöñ kunbuk kamawi, nöñon mönö nalö miangöreñ engöra aka silenini memba öñgömam. Miangö dop inini mewöyök ölöp nöñgöra aka silenini möpöseigetka dop köлма. Inini nöñgö könani mewö möt asarim tekömegöra mötzal.

¹⁵ Nöñon keu miangö qakñe awösamakak kinalangöra aka mutuk engöreñ kaba engekñamgö areñi alal. Indimñi yahöt engekiga kötumötuet mötmegöra aka köna anmamgö areñi kewö albi ahöyök:

¹⁶ *Masedonia prowinsnöñ anmamgö könanöñ mutuk inini engeka toroqeba Masedonia anda lilingöba kunbuk engöreñ kamamgö jial. Kaba malbi yuai tosantñi bauköm niñgiba melaim niñgigetka engömosöta Judia prowinsnöñ anmamgö möral.

¹⁷ Areñni mewö albi ahöyökmö, mi uteköyal. Mewö aka an köl kam köl qakñe möndöba lañ qahö ahal. Nani areñni mi gölme ambazipkö dop

* 1:8: 1 Kor 15.32 * 1:16: Apo 19.21

nanangöra laj mötmöriba qahö ahal. Mewö kude mötmörime. Numbu ösum mohot mianjönök “On, ölop kamam!” aka “Qahö kamam!” keu yahöt mi mindiriba qahö jial. Mönö ahakmeme saraknji wuatangömakzal.

¹⁸ Anutunöŋ keu jiba miangö dop pöndaŋ ahakzawi, neŋön mönö yangö jeŋe kewö jim köhöizin: Neŋön nalö kunöŋ “On, mi ölop akin,” jim jöhöba miangö andöŋe “Mi qahö akin,” pötagororoŋ keu mewö melenqelen qahö jiba malin.

¹⁹* Anutu Nahönŋangö könaŋi kewö: Nöŋön Sailas aka Timoti yetpuk engö sutŋine Kraist Jisösgö könaŋi jim asariba malinga yanön “Anutugö jitŋi tem kölmam!” aka “Qahö tem kölmam!” keu jöl yahötyahötkö qakŋe melenqelenda qahö kaba malökmö, Anutugöra keu jiba jöhöyöhi, miangöra mönö “On!” jiba miangö dop aka memba malök.

²⁰ Anutunöŋ jöhöjöhö keu (promis) sehisehiŋi dawik neŋgiyöhi, qötöŋini qahö mötzinmö, Kraistnöŋ keu körek miengöra “On!” jiba mem köhöiiga pöwöwöm ahöza. Miangöra Kraistnöŋ mewöyök nam köl neŋgi keu miengö ölninan asuhui möta “Keu mi ölna,” jibin. Mewö ahinga Anutugö qetbuŋaŋan sehimakŋa.

²¹ Anutu nanŋak mönö nini aka iŋini mohot mem köhöim neŋgiiga Kraistpuk qekötahöba kin köhöibin. Yanön mönö Buŋa keu jim sehibingöra aka bedu mem neŋgi maljin.

²² Anutunöŋ urunine Uŋa Töröŋi mekötahöiga yanön oyaenköyaen malbingö keuŋi nanngöba jim köhöimakza. Anutunöŋ mewö aka buŋaŋi akzinangö muŋgem supapŋi mi mekötahöm neŋgiyök.

²³ Nöŋön tembula lömböt engibileŋbuköra möta zilaŋ Korint engöreŋ qahö lilingöba kayal. Mewö jiba Anutugö qetŋi qetpi ölop keuni mi nanngöba jima.

²⁴ Silik denöwö aka Anutu möt narimakzei, miangöreŋ kembu ak engimangö qahö mötzal. Mötnariŋinan lök töndangöm enŋiiga kin köhöimakze. Miangöra sösongai qakŋe malmegöra bauköm engimangö möta embuk mohotŋe urugö nup memakin. Mewö.

2

¹ Mutuk engöreŋ kaba siksauk akerangöra jim engibiga gamuŋini möta wösöbirik aket. Miangöra engöreŋ kabiga kunbuk mewö akepüköra möta urunan keu jöhöba köna anangö areŋni uteköyal.

² Miangö könaŋi kewö: Gamu qem engibi wösöbirik akeak ewö, danön ölop uruni qesawölim niŋgiiga kunbuk sösongai miwikŋaibileŋak? Janjuŋinangöra aka jim engibi wösöbirik akeak ewö, tosatŋan sösongai ak niŋgibingö osigetka nanak mewöyök wösöbirik aka malbileŋbuk. Miangöra zilaŋ kaba gamu qem engimangö töközal.

³ Kimbi köhöikŋi mi könaŋi kewögöra ohoba alal: Nöŋön söŋgaibiga körek enön mönö nömbuk söŋgaime. Nöŋön iŋini körek mewö uruyahötŋi qahö möt narim engizal. Nöŋön tosatŋi engöra sösongai miwikŋaimangö mötzalmö, kabiga könaŋamŋini sohoi laj malgetka engeka wösöbirik akileŋbuk.

⁴ Wösöbirik akŋegöra kimbi mi qahö ohoyalmö, önöŋi qahö uru jöpaköm engimakzali, iŋini miangö könaŋi möt yakömegöra mönö keu köhöikŋi mi kimbinöŋ ohoyal. Urunan engöra aka waimanjat ketanŋi möta köŋjiliŋ qakŋe tata imbilnan eriga ohoyal. Mewö.

Kunŋan köna ongiröhi, yangö siŋgisöndokŋi mönö mosötme.

⁵ Kunöŋ siŋgisöndok aiga gamu aka wösöbirik asuhuyöhi, mianön mönö nöngö qakneyök qahöpmö, körek engö qakŋine mewöyök öngöyök. Keu mi jim

* 1:19: Apo 18.5

qaribi sohobapuköra mönö kewöyök jimam: Gamu mianjön mönö körek dop köl enjii mianjöra gwötpuk me borom kun wösöbirik aket.

⁶ Könagesö ölnan keunanjö likepnji melenj wanjigeri, mianjön mönö dop köl wanjii urunji kunbuk melenjök.

⁷ Nalö kewöne gamu aka wösöbirik keta bölökni möriga mianjön jem keleleñgöbapuköra mönö lömböt kude toroqem wanjime. Lömböt qahöpmö, mönö kapanj köla sinjisöndokni mosöta urukölalep ak wanjime.

⁸ Mianjöra kewö uru kunjum enjizal: Injini mönö keu jöhöba urukalemjnini kunbuk toroqeba köhöiba kondel wanjiba malme.

⁹ Nöñön kimbinini mi kewögöra ohoyal: Injini nöngö keuni pakpak tem köla esapesapnöh kin köhöime me qahö tem köla töteköba etme, mianjögö könanji kewöta mötmangöra möta mi ohoyal.

¹⁰ Injini kungö sinjisöndokni mosötze ewö, nöñön mi mewöyök mosöt wanjizal. Bölöni ak ninjiyöhi, mianjöra qahö mötpi öngözapmö, enjön kunbuk ölöwaka mindirim anjumegöra mötzal. Mianjöra bölönamni mi lök Kraistkö jene ölna mosöt wanjibiga teköyök.

¹¹ Satanöh arenji ala silenöh alal könanji könanji ahakzawi, mianjöra tönpin qahö maljal. Mianjöra Satanöh luhut al nenjibapuköra aka azi mianjögö sinjisöndokni mönö mosöt teköme. Mewö.

Polnöh Troas mala Taitusgöra waimanjat mörök.

¹² *Nöñön Kraistkö Ölöwak Buñanji jim sehimangöra aka Troas taonöh anbiga Kembunöh nanju öröm ninjiiga nupni mianjögöreñ memangö amqeyök.

¹³ Mewö amqeyökmö, urumelenj alani Taitus qahö miwikñaibi keunini qahö jii möralanjöra aka waimanjat möta luainöh urune qahö ahöyök. Mianjöra yaizözköknini jiba enjömosöta Taitus jarumangöra Masedonia prowinsnöh anal. Mewö.

Kraistnöh ösum nenjiiga luhut alakzin.

¹⁴ Neñön Anutu kewögöra möpöseimakin: Kraistkö buña aka welenji qeinga Anutunöh nalö dop suahö galöm ewö aka nenjuangiriga anda köiranj kölakzin. Luhutnöh plaua jurananjögö wörönji ölöpnji memba kaiga mörakzin. Mianjögö dop Anutunöh nam köl nenjiiga denike denike liliköba Kraistkö könanji jim asariinga aukne asuhum sehiba aniga gölme dop mörakze. Mianjöra Anutu möpöseimakzin.

¹⁵ Mianjögö könanji kewö: Neñön ambazip Suep mire öngömei aka könöp sianöh gemei, yenjögö sutjine anda kainga wörönini sarakni mörakze. Kraistkö könanji jim sehiinga Anutunöh nupninanjögö wörönji möt ölöwahakza.

¹⁶ Könöp sianöh gemei, yenjön Buña keunini mötketka mianjön keunini jim teköiga kömum köhöimegö möta mönö qamötkö mumu wörönji ewö akza. Suep mire öngömei, yenjön Buña keunini mötketka oyaenjoyaen enjimapkö möta mönö malmal kömbönananjögö wörönji umköhöwakñambuk ewö akza. Danjön nup mewöni memawanjögö dop akza?

¹⁷ Ambazip tosatni gwötpukñan mönö ni ewö qahö akze. Yenjön malmalnini nanjögöbingöra möta Anutugöreñ keu mi kölköl-örörö ewö lañ memba ala jimakze. Nöñön yenjögö dop qahö ahakzalmö, Kraist qekötahöba köñbiñ mosöta uruni sarakni aiga kinjal. Anutunöh melaim ninjiyöhi, mi möta yangö jemesoholne kinda Buña keunji törörök jim sehimakzal. Mewö.

3

Jöhöjöhö areñ döläknanjögö nup meme ambazip akzin.

* 2:12: Apo 20.1

1 Nanak kõnañamni kunbuk kõnahiba jim ölöwakñamañgöra mötmörize me? Mi qahö. Nup meme ambazip tosatñan Korint enñon yengö kõnañini mötmegöra möta jim ölöwak kimbi ohobingö kapan kölakze. Tosatñan Korint enñon yengö kõnañini nañgöba jiba jim ölöwak kimbiñi kimbiñi ohomegöra inñini kuñgum enñimakze. Nöñon nupni diñdiñanök mealañgöra jim ölöwak kimbi mewöñañgöra qahö osizal.

2 Anutunöñ Korint inñini böröne al enñii letota wölböt kötni aka nanninak nöngö jim ölöwak kimbiñi ewö akze. Anutunöñ nöngö jim ölöwak kimbiñi mewö ohoiga ambazip körekñan silik tandökñini dölökñi mi eka oyoñmakze.

3 *Inñini Kraistkö papia kimbi ewö akzei, mianñon aukñe ahöza. Mosesnöñ Köna keuñi nañim onñi inñi mianñon köt tafenöñ ohoyöhi, inñini mianñö dop qahö akzemö, Kraistnöñ kimbiñi enñö uruñinañgö tafene kewö ohoi kinje: Neñon nup meinga ölni asuhui Kraistnöñ Anutu malmal köhöikñi Tonañgö Uñañi uruñine ali letotket. Ambazipnöñ nupninañgö ölni mi eketka mianñon bauköm enñiiga nupninañgö kõnañi möt asarimakze.

4 Kraistpuk qekötahöinga Anutunöñ nupninañgö tandökñi mötza. Mianñgöra nup meinga inñini Kraistkö buñañi akeri, mi ölop Anutugö jeñe awösamakak kinda jizin.

5 Nanini köhököhöi qakñe nup ölopñi ki Anutugö jeñe membinanñgö dop akzini, mewö ölop qahö jibin. Nanini yuai kunöñ qahö lapingömakzinmö, Anutunöñ nanñök inahöba mötmöt neñiiga nup ki memakzin.

6 *Anutunöñ inahöba mötmöt neñiiga jöhöjöhö areñ dölökñanñgö nup meme ambazip akzin. Mosesgö Köna keuñanñgö kulemñi mohot mohotköra urukönöp akinak ewö, keu mianñon mönö keunini jim teköiga kömum köhöibinak. Uña Töröñanñgö nup areñi jim asariinga yañon mem gulim neñiiga mal köhöibin. Mianñgöra Köna keugö areñi miyök wuatañgömegöra qahö kapan kölakzinmö, Uña Töröñi möt anñon kölmegöra uru kuñgum enñimakzin. Mewö.

Jöhöjöhö areñ dölökñanñgö nupñi mi aködamunñambuk.

7 *Anutunöñ Köna keuñi jiba kulemñi kötnöñ möndömgöba ohoyökmö, ambazipnöñ mi qahö tem kölgetka Anutunöñ keu mianñö dop kewöta likepñi melenñ enñiiga kömumba köhömuñi mala kotket. Anutunöñ mutuk Köna keuñi neñiiga nalö mianñoreñ asakmararañan Mosesgö jemesoholñi qei asariyök. Asakmararañ mianñon waziba ayapkömawanñgö dop ahökmö, mi töndup Israel ambazipnöñ jemesoholñi törörök uba ekingö dop qahö aket. Gwötpuk asariyöhanñgöra mi osiget. Köna keugö Buña areñ walñan lök mewö asakmararañambuk asuhuyök.

8 Mewö asuhuyökmö, Uña Töröñan Buña areñ dölökñi neñii mianñö asakmararañan asuhumawi, mianñon mönö jöhöjöhö areñ walñanñgö asakmararañi onñgita önöñi qahö asariba jenini gamugamu ahakña.

9 Mutuk Mosesgö Köna keu asuhuba kewöt neñiiga mianñö dop könöp siagö buñaya akzin. Buña keu mi lök aködamunñambuk asuhuyök. Mianñgöra Anutunöñ keunini kewöta jim teköi solanibini, Buña keu mianñö aködamunñan mönö keta bölokñi akza. Mianñon jöhöjöhö areñ walñanñgö aködamunñi mi gwötpuk onñgita qetbuñanñambuk akza.

10 Buña nup walñan mutuk aködamunñambuk ahökmö, mi Buña nup areñ dölökñambuk mindiriba kewöringa walñi mianñon mönö qetbuñanñi qahö akza. Uña Töröñanñgö nup areñ mianñö aködamunñan öñgöñgöñi akzawanñgöra nup areñ walñan mönö yuai omanñi ewö akza.

* 3:3: Eks 24.12; Jer 31.33; Eze 11.19; 36.26 * 3:6: Jer 31.31 * 3:7: Eks 34.29

¹¹ Anutu amötqeqeñangö köna walñan lök waziba ayapkömawangö dop ahök. Mianñon lök asakmararañambuk asuhuyök. Mianğöra köna dölökñi teteköñi qahö ahöm öngömawi, mianğö asakmararañan mönö köna mutukñangö asakmararañi mi önöñi qahö onğita jenini gamugamu ahakza.

¹² Jöhöjöhö dölökñan teteköñi qahö bauköm neñgiiga asakmararañan asuhumawi, mewö Anutu jörömqöröm al wangimakzin. Mianğöra kenğötnini qahöpmahöp möta awösamkakak kinda keu mi kusum engimakzin.

¹³ *Mosesnöñ Israel ambazip asakmararañ waziba ayapköyöhi, mi ehibepüköra manjat möta jemesoholñi opo jahönñan esuhuyök. Neñon mianğö dop qahö ahakzinmö, Buñanini aukñeyök jimakzin.

¹⁴ Buña walñangö asakmararañi eketmö, uruñinan töndup gwözöñni lañ mala kotket. Nalö kewöñe mewöyök yuai kunñan mönö opo jöhan mianğö dop Juda ambazip gwötpuk yeñgö uruñini gwözöñni malje. Mianğöra Jöhöjöhö Walñangö Buña keuñi keuñi oyoñjei, miengö könañini mi törörök qahö möt asarimakze. Uruñini melenđa Kraistpuk toroqezetka mewö mianñonök mönö opo jöhanñini mi qeköi möt asarime.

¹⁵ Nalö kewöñe mewöyök Mosesgö Köna keuñi oyoñgetka yuai kunñan mönö opo jöhan ewö uruñini gwözöñni mötmötninan lömbörii malje.

¹⁶ *Mewö maljemö, Buña Kimbigö keu kun kewö ahöza, “Mosesnöñ ‘Kembubuk eraum mötpit,’ jiba opo jöhanñi mesoholñeyök qeközapma.” Keu mewö ahöiga yeñgöreñök kunñan uruñi melenđa Kembubuk toroqezawi, nalö mianğöreñök mönö yuai opo jöhanñangö dop mi qeköi Anutugö amötqeqeñangö könañi möt asarima.

¹⁷ Keu mianñon “Kembugöra” jiba mi mönö Kembugö Uñañangöra jiza. Kembugö Uña Töröñan denike yeñgö uruñine maljawi, yañon mönö singisöndokñinangö kösöñi pösariga solannji (fri) malje. (Mewö mala solannji diñdiñi akingöra Köna keu wuatangöbingö qahö kapan kölakze.)

¹⁸ Mianğö dop urunini melenñinga Kembugö asakmararañan körek neñgö je mesoholnine kuñguiga bilikbilik aliga jenini qahö esuhuinga ambazipnöñ neñgeka Anutugö aködamunñi qetpuk mi piliknöñ uba ehekö tandök ehakze. Nini mi qarim sehiba ehakñeangö dop letorakin. Mewö letota aködamunñi qetpuk mi qariba asariba Kembugö tandöktandök ahakin. Kembunöñ Uñaya akzawi, yañgö asakmararañan mönö mewö mem letot neñgimakza. Mewö.

4

Nini kourañen ewö ahinga Uña Töröñan ölni akza.

¹ Anutunöñ ak kömum neñgiyöhanğö dop nup ki qaknine ali memakzini, mianğöra mönö böñ kininga uruninan qahö etma. Qahö!

² Neñon nup memegö köna tölapñi gamuñinambuk mi körek andö qein. Tilipqilip qahö aka Anutugö keuñi qahö möwöramgömakzinmö, keu ölni mi aukñeyök alakzin. Mewö Anutugö jemesoholñe ambazip uruölöwak möt neñgimegöra kininga jim ölöwak keuninan asuhui körekñan keunöñ törörök jim neñgibingö osimakze.

³ Mewö ahakzinmö, iñini tosatñan kewö jimakze, “Polnöñ Ölöwak Buñañi mi esuñambuk jimakza.” Mewö jibilenjak ewö, esu mianñon könöp sianöñ gemei, mönö yeñgö uruñine ahöba mianğöra gwözöñniga qakömakze.

⁴ Kraistnöñ Anutugö imutñi akza. Kraistkö aködamunñi mi nanñi Ölöwak Buñañan indela asakñi ewö asarimakzapmö, yeñgö jeñinan ömuñ köli jipjap ahakza. Nalö kewöñe bölöñangö Kembuñi gölme dop galöm köl engimakzawi,

* **3:13:** Eks 34.33 * **3:16:** Eks 34.34

yañön urumelengö kopa ambazip yengö mötmöt jeñini mem gömöliiga lan malje. Mianğöra Ölöwak Buñagö asakñi ek asaribingö osimakze.

⁵ Nani qetbuñanan qarimapkö Buña keuñi qahö jim asarimakzalmö, eñön Kembu Jisös Kraistkö könañi möta jitñi tem kölmegöra uru kuñgum enjimakzal. Neñön Kembangö jitñi wuatangöba inñini welen qem enjimakzin.

⁶ *Könañi kewögöra welen qem enjimakzin: Anutunöñ mutuk kewö jim kutuyök, “Asaknan mönö söñaup qeiga asarima.” Mewö jiyöhañön mönö Buñañangö asakñi ali urunini qeiga asariyök. Kraistnöñ ahakmemeñi aka meiga Anutugö asakmararañan jemesoholñe asarii ekeri, Anutunöñ nini mianğö könañi möt kutubingöra kapañ kölakza. Asakñangö könañi jim sehibingöra aka asakñi mi neñgiyök.

⁷ Asakñan urunini qei asariinga mötkutukutu mianğö bohonñi mi milyön kina onğita öngöngöñi akzapmö, silenini mi kourañen ewö amqeba julakza. Anutu asakñan mönö sile mewöñangö uruñe ahöza. Ambazipnöñ mianğö könañi ekñegöra Anutunöñ areñi al neñgiyök. Dopkeu mianğö könañi kewö: Kukösum önöñi qahö al neñgimazawi, mi neñgöreñök öne asuhumakzawangö dop qahöpmö, Anutunöñ mönö mianğö Tonji akza.

⁸ Eu emu likep likep mianğöreñök lömböt könañi könañi qaknine öngöba qölölömbörim neñgigetka wahöjalij mörakzin. Mi mörakzinmö, töndup mienñön qahö qözöjahöm neñgigetka erakzin. Nalö tosatñe juñ ewö wangömmñe qaköba köna qahö miwikñaimakzinmö, töndup tötböröm qahö ahakzin.

⁹ Ambazipnöñ sesewerowero ak neñgimazemö, Anutunöñ andö qahö neñgumakza. Ambazipnöñ mulungöm neñgimazemö, töndup qahö ayuhumakzin.

¹⁰ Jisös qem kömugeri, mianğö dop nini mewöñanök buñani jim sehimakzinangöra aka neñguget kömumbinbukö möta anda kaba maljin. Jisösbuk mal köhöininga inahöm neñgimazawi, ambazipnöñ mianğö könañi möt kutumegöra aka mewö malbingö urumohot akzin.

¹¹ Gölmenöñ jebuk mala Jisösgö nupñi memakzinangöra aka nalö dop kömumbingö dop akzin. Sileninan kömumawangö dop akzapmö, Jisösnöñ urunine mal köhöiba silenini mem gulimazawi, ambazipnöñ mianğö öñi ek asarimegöra aka kinjin.

¹² Nini nalö dop sihimbölä möta kömumbingö dop ahakzinmö, nöñön enğö sutñine nup memba malali, eñön mianğöra aka guliba malmal köhöikñe anğota mal öngöme.

¹³ *Sumbara (Sam) kunöñ keu kewö ohoget ahöza, “Anutu möt nariba kömupnöñök meköm niñgimapkö köuluköba malal.” Neñön keu mianğö dop kömupnöñök meköm neñgimapkö möt narizin. Mötnaripkö Uña Töröñi miyök buña qem anğuzinañgöra neñön mönö mewöyök keunini jiba köulukömazzin.

¹⁴ Anutunöñ Kembu Jisös mem gulii kömupnöñök wahöröhi, yañön mönö nini mewöyök mem gulim neñgii wahöta Jisösbuk öngöinga jemesoholñe al neñgii embuk mohotñe mal öngöbin. Mi mötzinañgöra aka keunini jiba köulukömazzin.

¹⁵ Keunini jiba köuluköinga Anutugö kalem möriamñan toroqeba ambazip sehiseñi dop köl enjima. Mewö aiga yeñön amqeba Anutu keñmaleleñ möpöseigetka qetbuñanan sehimakza. Eñön mewöyök Anutu möpöseim sehimegöra mötzal. Mianğöra lömböt könañi könañi bisiba aum-möröba maljin.

Mötnarip malmalñangö tandök mi kewö:

¹⁶ Nini mem gulim nengimapkö möta mönö böñ qeba kininga uruninan qahö etma. Ölña silenini ewö waziba soholimakzinmö, mi töndup urunini ewö nalö dop kölönjaimakzin.

¹⁷ Mi kewögöra: Gölmenöñ kahasililin nalö töröptökñi möta malbinmö, miangö andöñe asakmararan önöñi qahö miwikñaiba teteköñi qahö oyaenkoyaeñ malbin. Asakmararan aka kahasililin yahöt mi kewöt etkiinga asakmararan miangön mönö öngöngöñi aiga gölmegö kahasililin könañi könañi mi möringa awamñi aka eretñi akza.

¹⁸ Ambazip aka öröyuai jenöñ ehekñi mi nalöñini teköi ayapkömemö, Suep mirigö öröyuaiñi nalö kewöñe qahö ehakzini, mienön mönö nalö teteköñi qahö ahöm öngöme. Miangöra neñön jeninan ehekñi mia qahöpmö, qahö ehekñi mönö mienjöreñ göröken uba engehakzin. Mewö.

5

Polnöñ Suepkö oyaenkoyaeñ koumnöñ anmamgö mörök.

¹ Neñön keu ki mötzin: Gölme silegö opo seri koumñe malinga kömupnöñ mi köndenñiga etmawi, Anutunöñ nalö miangöreñ silegö miri dölökñi nanjak meiga Suepnöñ ahömawi, mi buña qem neñgiiga miangöreñ malbin. Silegö miri qainñi kun mi teteköñi qahö köhöikñi ahöm öngöma.

² Keu mi möta nalö sutñe kiangöreñ letotpingö osonjom köla Suep malmal mirinine öngöbingö möta awöweñgömakzin.

³ Suepnöñ öngöinga sile qainñi kunöñ löngöt neñgii tatpini, nalö miangöreñ mönö uña sile meinga kunñan aukñe qahö miwikñaim neñgima.

⁴ Gölme sile ki qekömegöra qahö mötzinmö, Suep malmal mirinine öngöba silenini dölökñi memingö awöweñgömakzin. Sile ki kömumawi, mi malmal köhöikñan gwahöri qahöwahiga Anutunöñ salupñe oyaenkoyaeñ sileya nengimapkö mötzin. Miangöra nalö kewöñe seri koum kiangö uruñe mala urulömbötnini bisiba letotpingö osonjom ahakzin.

⁵ Anutu nanjak Suep sile memingöra möta miwikñaim neñgiba Uña Töröñi urunine aliga oyaenkoyaeñ akingö dangunuñi akza.

⁶ Miangöra neñön mönö nalö dop ewebibininambuk saitingit mal köhöiba kewö mörakzin: Sileninañgö malmal koumnine ki malbini, nalö miangö dop eu Suep malmal mirinine Kembu Jisösbuk qahö malbin.

⁷ Nalö kewöñe Suep mirigö öröyuaiñi qahö uba engehakzinmö, töndup mi möt nariba miangö dop aka memba malinga nam köl neñgimakze.

⁸ Miangöra ewebibininambuk köhöiba sileninañgö malmal koumñi ki mosötpingö kapañ köla mirinini öñi eu öngöba Kembubuk malbingö mötzin.

⁹ Miangöra mirinine ki me eu malbini, neñön mönö urunini Kembu Jisös uruölöwak ak wañgibingöra jöhöba miangöra köhöiba kapañ kölakzin.

¹⁰ *Miangö könañi kewö: Körek neñön mönö Kraistkö keu jakeñe asuhubin. Gölmenöñ silebuk mala Kembugö jitsihitñi dopñe tem kölini me qötömötötañ ahini me önewat lañ malini, nanjak mönö keunini mi kewöta miangö dop töwanini nanjök nanjök neñgii buña qem anjubin. Mewö.

Ambazip Anutubuk urumohot akñegö nupñi memakzin.

¹¹ Kraistkö keu jakeñe kinbini, neñön mi möta Kembugö mötmötñi ongitpinbuköra keñgötnini mörakzin. Mi mötzinañgöra ambazip könanini sarakñi mötmegöra kapañ köla uru kuñgum enjimakzin. Könaninan mönö Anutugö jeñe aukñe ahöza. Nöñön tilipqilip azia qahö, enñön mewöyök mi uruñinan möt yakömegöra möta jörömqöröm akzal.

* 5:10: Rom 14.10

12 Mewö jiba nanini jim ölöwak keunini mötmegöra kunbuk qahö kapan kölakzalmö, könanini miyök jim asarim engimamgö mötzal. Injini mi möta ölop nenjö silenini mi böhi takapulakanj yengö jejnine möpöseigetka dop kölma. Yenön yuai engö urunine ahözawi, miangöra qahöpmö, sileninanjö yuainj jenön ekingö dop akzawi, mönö miangöra aiweliköba nanjini silenini memba öngöba keu laj jimakze. Miangöra keuni ki jizal. Enön yengö keunjini gilipitji (ambetakji) mötzeangöra mönö nenjö könanini jim asariba törörök melen engime.

13 Enön nöngöra “Urusohop tandök ewö akza,” jiget ewö, nöñön mönö Anutu nupñangöra aka urukönöp aka malal. Tosatñan nöngöra kewö jize, “Urukönöpñi qahöpmö, keunji ösönök jimakza,” Mewö jize ewö, mi mönö injini bauköm engibingöra aka ahal. Miangöra ölum engubapuk.

14 Miangö könaji kewö: Kraistnöñ jöpaköm nengimakzawi, mianön mönö kondota kungum nenjiiga nupñi memakzin. Azi mohotnöñ körek nenjö salupnine nenjö kömupnina kömuyök. Miangöra singisöndokninanjö likepñi qahö melen nenjiyökmö, körek nenjö singisöndoknini mosöri toroqeba köhömuñi qahö akzin. Keu mi möt asariba möt yaközini, Kraistkö urukalemñan mönö körek nini jölöngöba nupñi membingöra kungum nengimakza.

15 Yanön mönö kewögöra körek nenjö salupnine kömuyök: Gölmenöñ jebuk maljini, nenön mönö malmalnini toroqeba naninanjöörök malbinbuk. Mewö qahöpmö, kun nenjö aka kömumba wahöröhi, malmalnini mönö yanjöra tököba ala malbingöra kömuyök.

16 Miangöra urunini melenjini, nalö miangöreñök könahiba ambazip silesile qahö kewöt engizin. Ambazip kun gölmenöñ silikñanjö dowök qahö möt kutum wanjizin. Mutuk Kraist kewöta möringa gölme azi töhön ahökmö, nalö kewöñe möt kutum wanjiinga Suepkö Amötqeqe Tonina akza.

17 Miangöra kunñan Kraistpuk qekötahöza ewö, yanön mönö ahuahu dölokñi ahuba dömnji dölokñi akza. Malmal walñan ayapköiga malmal dölokñan mönö salupñe asuhum wanjiza.

18 Mewö maljapmö, yuai pakpak miangö kondotkondot Tonji mi Anutu. Yanön Kraist melaiiga töwanini qeba nenjömeiga Anutu nanñambuk urumohot akingö könaji möwölöhöyök. Köna mewö asuhuiga Anutunöñ nup nenjiiga nenön ambazip Anutugö alaurupñi akñegöra jölöngöba kungum engimakzin.

19 Anutubuk urumohot akingö könaji kewö: Kraistnöñ eta gölmenji gölmenji nenjö töwanini qeiga dop köli Anutunöñ nenjömeiga alaurupñi ahin. Köna onjita mala korini, singisöndok miengö keunjini qahö oyonda mötmöröba likepñi qahö melen nenjiyök. Anutugö alaurupñi ahinga möt narim nenjiba Kraistkö töwagöra aka Anutubuk urumohot akingö Buña keunji mi börönine alök.

20 Mi aliga Kraistkö jitñememeurupñi akzin. Anutunöñ keu sanep al nenji miangö dop ambazip urunini kungum engimakzin. Kraistkö jitñi memba kapan köla kewö qesim engimakzin: Mönö Kraistkö töwanji buña qem anjuba Anutugö alaurupñi akñe.

21 Anutunöñ körek nenjö singisöndokninanjö keunji jim teköba likepñi melenja Kraist singisöndok kun qahö ahöhanjö qakñe ali öngöiga salupnine sihimbölö mörök. Kraistkö sihimbölöñ miangöra aka yanjören qekötahöinga Anutunöñ ölop keunini jim teköi solanibin. Mewö.

6

1 Nini Anutu nanñanjö nup meme alaurupñi akzinanjöra aka urunini kewö kunguzin: Anutugö kalem möriamñan omanji akapüköra mi mönö buña qem anjuba malme.

² *Anutunöŋ keu kun kewö jii Buŋa Kimbinöŋ ahöza, “Gehorimangö nalönan kam kuŋguiga nöŋön köuluki möral. Amötqeŋe nalönan kam kuŋguiga mianŋöreŋ bauköm gihial.” Keu mewö ahöiga mötket! Nalö dölkianöŋ mönö Anutugö amötqeŋe nalöŋi akza. Anutunöŋ engehorimangö möri nalöŋan kam kuŋguiga ak-kömukömuŋi mi mönö döлки buŋa qem aŋgume. Mewö.

Polnöŋ kahasililiŋ könaŋi könaŋi miwikŋaiyök.

³ Neŋön mönö kungö uruŋan neŋgöra aka bölii etpapuköra galömnini mem aŋgumakzin. Jim neŋgigetka nupninan keuŋambuk aka etpapuköra mewö ahakzin.

⁴ Anutugö nup meme ambazip ölöŋ sorokŋi akzini, ahakmeme pakpakninan mönö mi kondelakza. Kahasililiŋ aka jaŋgauranŋa könaŋi könaŋi ak neŋgigetka wahöjalin uruŋe maljinmö, mianŋöreŋ mönö mökösöŋda kapan köla kin köhöimakzin.

⁵ *Ihilek wahinambuknöŋ neŋguba kösö miriŋi miriŋi mianŋöreŋ al neŋgigetka malin. Karimŋi karimŋi asuhugetka mianŋö uruŋe kömumbinbukö keŋgötnini möta malin. Gaun guli aka nenegöra wösönini aliga malinmö, töndup silenini qeba nup memba malin.

⁶ Ahakmeme sarakŋi wuatangöba Anutugö sihimŋi möt asariba lömböt möta mökösöŋda ambazip ala ak engimakzin. Uŋa Töröŋan urunini kokolak qeiga sutŋine geŋmoŋi qahö jöpaköm engiba maljin.

⁷ Keu ölnanök jiinga Anutugö kukösumŋan bohon köl neŋgiiga ahakmeme solanŋanŋö timbi saiwanŋi meinga börö ölnine aka qaninine ahöiga kinjin. Mewö kinda likep Buŋa keu jim sehiba likep keu munenŋi silenine algetka mianŋö likepŋi jim mindingöba malin.

⁸ Qetbuŋa neŋgigetka silenini qahö möpöseimakzin. Yom jiba gamu qem neŋgigetka uruninan qahö erakza. Neŋgöra kösohot ölöŋŋi kösohot bölöŋi mi laŋ jimakze. Munenŋi jiji ambazip ewö ak neŋgimakzemö, töndup keu ölnanök pakpak jimakzin.

⁹ Ambazipnöŋ könanini ölöŋ möt kutumakzemö, töndup tosatŋan nöŋöŋan aka nesampurek ak neŋgimakze. Nalö tosatŋe kömumbingö aka malinmö, töndup toroqeba jebuk maljin. Kegwek-kahasililiŋ ewö neŋguba malgetmö, töndup qahö kömuin.

¹⁰ Wösöbiriknöŋ neŋguiga töndup nalö dop söŋgaiba maljin. Wanapŋi mala töndup ambazip gwötpuk bauköm engiinga uruŋinan pomŋi ahakze. Gölmegö sukinapnini qahöpmö, töndup oyaenŋkoyaen pakpak buŋa qem aŋguba pipsimbawoŋ maljin.

¹¹ O Korint ambazip, neŋön mönö uruninanŋö nanŋuŋi engöra öröba keu kun qahö kölin geiga könanini aukŋeyök jibiga mötze.

¹² Eŋön neŋgö urumötmötnini mötpepuköra mi qahö aŋgön kölakzinmö, neŋön engö uruŋini mötpinbuköra mönö nanŋinanök aŋgön köl aŋgumakze.

¹³ Nöŋön urumötmötni engibiga eŋön mönö mianŋö likepŋi mewöyök törörök niŋgime. Nöŋön nahönböratuŋuŋi ewö tandök keu engöra kewö jiba ohozal: Inŋini mewöyök mönö nanŋini uruŋinanŋö nanŋuŋi öröba urukalemŋini mi sehiba kondel neŋgime. Mewö.

Mötnariŋŋini qahö yembuk kude qekötahöme.

¹⁴ Ambazip uruŋini qahö melenŋeri, yembuk mönö uruŋini kude jöhöba* öröröŋ kude malme. Malmal solanŋi aka malmal gonŋonŋi mi nanŋök nanŋök

* **6:2:** Ais 49.8 * **6:5:** Apo 16.23 * **6:14:** Köŋjöŋ me mötöp (yoke) mi hos me bulkamau yahötkö imbiŋire alget geiga kare me kinöŋ yuai örömakzahot. Mewö nanŋiri imbi-imbi akitkö osimakzahot. Mewö janŋuŋ anbanbuk.

akzahot. Mi mindirim etkibingö osibin. Söñaup aka asakñi mi mohotñe qahö akzahot. Qahö!

¹⁵ Kraist aka Katakömulat (Satan) yetkön mönö urumohot aka mohotñe malbitkö osimahot. Miangöra urumelenj ambazip kunñan ahakmemeñi urumelenjö kopa ambazip kun yambuk mohotñe mindiriba akitkö osimakñahot.

¹⁶*Anutu nanñak keuñi kun kewö jii ahöza, “Nöñön könagesöni yeñgö uruñine mala sutñine anda kaba Kembuñini ak enjigiba yeñön nöngö weleni qeba möpöseim niñgiba malme.”

Keu miangö dop Anutugö Uñañan uruñine maliga sileninan Anutu malmal köhöikñi Toñañgö jikenj akza. Anutunöñ nanñi jöwöwöl jikenj tandö lopion möpöseibingö soñgo ali ahöi osimakzin. Anutugö jikenj aka asa jikenj mi inanñök inanñök. Miangö dop neñön urumelenjö kopa ambazip yembuk qekötahöbingö soñgo ali ahöi osimakzin.

¹⁷ Miangöra inñini mönö Kembunöñ keu kewö jiyöhañgö dop akñe, “I mönö enğömosöta yaigep kaba kambu nanñi kun malme. Anğöjörakñinambuk ahakzei, mi mönö kude enğoseigetka nöñön möt anğön köla köyan köl enğiba malmam.

¹⁸ Nöñön mönö Iwiñini akiga inñini nöngö nahönböraturupni aka malme. Kembu kukösum pakpakö Toñan mewö jiza.” Mewö.

7

¹ O wölböt alaurupni, Anutunöñ mönö köyan köl neñgimangö keuñi mewö jöhöm neñgii ahöza. Miangöra yuai sile uñanini mem tölöhozawi, neñön mönö mi körek qeköbingöra Kraist köuluköinga amöt qem neñgima. Anutugö jitñi onğitpinbuköra mönö keñgötnini möta kapan kölinga mem solanim neñgiiga sarakñi ak teköbin. Mewö.

Uruñini melenğerañgöra Polnöñ uruölöwak mörök.

² Neñön kun qahö mem bölim wañgiinga ayuhuyök. Kun qahö geñmororon ak wañgiin. Miangöra enñön mönö uruñinañgö nanñuñi öröba nini urunöñ jöhöm neñgiba malme.

³ Tosatñan sutñine nup memba silenöñ alal keu mewö jiba jim neñgigetmö, nöñön keu mi enğö keuñini jim teköba likepñi melenj enğimangöra aka qahö jizal. Nöñön lök keu kewö jibi mötket: Neñön uruninañgö nanñuñi öröba inñini uruninan jöhöm enğimakzin. Mewö aka ölop embuk öröröñ jöhöba kömumbin aka öröröñ mal köhöibin.

⁴ Enğö uruyahöt qahö mötnaripni ketañi enğiba maljal. Enğö silenini mönö gwötpuk möpöseimakzal. Enğöra aka urukölalepni ketañi miwikñaizalañgöra kahasililij könañi könañi möta miangören mönö töndup önöñi qahö söñgaizal.

Masedonia prowinsnöñ anda Taitusbuk aitonğöit.

⁵ *Taitus jaruba malalañgöra* jiali, keu mi toroqeba jimam. Masedonia prowinsnöñ kañgota miangören mönö mewöyök uruluai miwikñaaimangö osial. Denike denike anali, miangören mönö köñjilij könañi könañi miwikñaial. Anutugö bim qeba tosatñi yembuk anğururuk aka enğöra waimanjat möta malal.

⁶ Mewö malalmö, Anutunöñ urueret ambazip nanğöm neñgimakzawi, yañön mönö Taitus kayöhi, mianñön urukölalep ak niñgiyök.

* **6:16:** Lew 26.12; Eze 37.27; 1 Kor 3.16; 6.19; Ais 52.11; 2 Sml 7.14; 1 Hist 17.13; Ais 43.6; Jer 31.9

* **7:5:** 2 Kor 2.13 * **7:5:** 2 Kor 2.13 miangören Taitusgöra jiyök.

⁷ Taitusnõj kayõhi, mianõnõk qahõpmõ, Korint enõn urukõlalep ak wangigetka yanõn jii mõtpiga Anutunõj mianõn mewõyõk urukõlalep ak ningiyõk. Enjõ kösohotnini kewõ jiyõk, “Enõn ni nekingõ köpõsõngõba kinje. Wõsõnini õlña mõt ningiba lõmbõt ningigeranõ keunji jiba nõngõ likepne nanõgõba jibingõ jõjõrõmakze.” Kösohot mi jii mõta urusõsõngai keta bölõkni mõral.

⁸ Nõjõn urunini Buña keunõj kunguba kimbi mi ohobi oyonõda nannini mõt bölim anõguger, mianõgõra qahõ mõt bölim anõguzal. Mutuk mõt bölim anõguyali, mi tõndup nalõ kewõje kewõgõra kunbuk sõngaizal: Kimbi keunan urunini mem bölii wõsõbirik aketmõ, wõsõbirik mianõn mõnõ melenõda nalõ tõrõptõknanõk ahõba tekõyõk. Kõnanini mewõ ehal.

⁹ Nalõ kewõje inini mõt bölim anõgugeranõgõra aka qahõ sõngaizalmõ, kewõgõra sõngaizal: Inini ahakmemenjanõgõra aka mõt bölim anõgugetka gamu wõsõbiriknan baukõm enõgiiga urunini kunbuk melenõda diõngiget. Mi Anutugõ jitanõgõ dop asuhuiga uruninan mõnõ nenõgõra aka qahõ böliyõkmõ, õlña baukõm enõgial.

¹⁰ Siõngisõndõkninanõgõra aka mõt bölim anõguzin ewõ, gamu wõsõbirik mianõn mõnõ baukõm nenõgiiga urunini kunbuk melenõda diõngibin. Diõngibinanõgõren Anutunõj mõnõ nenõguanõgiri Suepnõj õngõbin. Mianõgõra kunõnan urunji melenõda mianõgõra qahõ mõt bölim anõguma. Gõlme ambazip tosatnan siõngisõndõkninanõgõ wõsõbirik mõrakzemõ, Anutunõj mi mosõtmakpõ qahõ qesime ewõ, yanõn mõnõ likepni melenõ enõgiiga kõmum kõhõime.

¹¹ Enõn Anutugõ sihimnanõgõ dop wõsõbirik aketka gamu mianõgõ õlõnan urunine ahui letotkeri, mi kewõta ek welipkõba kewõ jime, “Nini gõnmõnahotnini mosõta urunini tokoba urukõnõp qakne wahõta kõnanini sohosõhõni kewõta mindõngõin. Ambazip siõngisõndõk akeri, miõngõra uruninan wahõri sisit memba jim enõgiin. Anutugõ jitanõ onõgitpinbukõra auruba kenõgõtnini mõta Polnõj kaba uru melenõninanõgõ õlõni ekõnapkõ köpõsõngõba malin. Urunini ahakmeme diõndõni akingõra alin aka kunõj kõna qiwitipkõyõhi, mi mindõngõm wangibingõ jõjõrõba malin.” Mewõ jigetka dop kõlma. Nalõ kewõje kõna diõndõni wuatangõzei, mi kondel ningigetka ehal.

¹² Mianõgõra kunõnan sutnõine böliyõhi, iyõk mindõngõm wangimegõra aka kimbini qahõ ohoyal me kun i mem bölim wangiyõhi, iyõk baukõm enõgimegõra kimbi mi qahõ ohõba alal. Mi kewõgõra ohoyal: Inini Anutugõ jemesõholõje nõmbuk urumõhot akingõ kapaõ kõlakzei, silik mianõn mõnõ aukne asuhumapõkõra kimbi mi ohoyal.

¹³ Nani urukõlalepni miyõk qahõ mõtzalmõ, Taitusgõ urunõnan sutnõine õlõwahi ehinga mianõn mewõyõk uruni nanõgõi õnõni qahõ sõngaimakzal. Enõn kõrekõnanõk Taitus kõrõ-õlõwak qem wangigeranõgõra sõngaimakzawi, sõsõngai mianõn mõnõ mewõyõk nanõgõm kõl ningii mianõgõra õnõni qahõ sõngaizal.

¹⁴ Nõjõn silikõnanõgõra silenini Taitusgõ jeje mõpõseiba malali, enõn mianõgõra gamu qahõ ningiget. Nõjõn enõgõ sutnõine mala keu pakpak jibi mõtkeri, mi õlõnanõk jial. Mianõgõ dop enõgõ keunini Taitusgõ jeje jim mõpõseiba malali, keu mianõn mõnõ mewõnanõk kõnanini mindõngõgetka õlõni ahõk.

¹⁵ Inini kõrek pakpak mõnõ nõngõ keuni tem kõla Taitusnõj kaiga sõmbunambuk mõta jõnõmõnini undui kõl õrõm wangiget. Taitusnõj silikõnini mi mõtmõriba keu jiiga uru õlõwakõnan enõgõra aka qariiga kõhõiba mõpõseim enõgimakza.

¹⁶ Nõjõn ahakmemenini pakpak mõtmõriba mianõgõren mõnõ õlõp enõgõra aka ewebibinambuk mõt kõhõiba saitõngit malmam. Mianõgõra sõngaimakzal. Mewõ.

8

Urumelen alaurup nangöm engibingö keuji

¹*O urumelen alaurupni, Anutunöñ kalem möriamñi urumelen könagesöñi könagesöñi miangören nengii ölnan mönö Masedonia prowins urune ölöpñanök asuhuyök. Nöñön injini miangöra gukmaulem malbepuköra möta kösohotñi kewö jimam:

²Yeñön kahasililin miwikñaiba mötketka lömbötñambuk esapköm enjiiga wanapñi kötökñi maljemö, mi töndup önöñi qahö söñgaigerangöra aka urumelen alaurup nangöm engibingöra moneñ naluk keta bölökñi alget.

³Yeñgö könañini kewö nangöba jimam: Kunñan qahö kunñum enji nannñi sihimñinan töndup ahuiga amqeba ösumñinanğö dop nalukñini alget aka mi tok onğita enğiget.

⁴Yeñön mönö kapan köla gwötpuk kunñum nengiba kewö uleta jiget, “Nini tok Judia prowinsgö ambazip sarakñi bauköm engibingö mötzin. Miangöra Pol, gi ölop On! jinöñga mönö simbawon möta nup miangö bahöñi amqeba membini.”

⁵Mewö jiget jibiga naluk almegö mambörali, miangö dowök qahöpmö, mi onğita kewö aket: Yeñön mutuk nangönağö Kembugö jene dop köljawi, mi akingöra urunini jöhöget aka miangö andöñe Anutugö jitñi tem kölbिंगö möta nannñi malmalñini mi mewöyök nengö böröñine alget.

⁶Miangöra Taitus kewö jim kutum wanğial, “Gi mönö nangönağö nup mi lök könahiba menöñ. Miangöra mi mönö toroqeba Korint könagesö bauköm enğinöñga urukalemñini kondela moneñ naluk ketanji mi kunbuk toroqeba algetka sutñine teköma.”

⁷Urugö yuai könañi könañi mi kelenmalelen buña qem anğuba kewö aka malje: Ölöpñanök Kraist möt nariba Buña keu ölni jim soroköba Anutugö sihimñi möt kutuba tosatñi nangöm engibingö pöndan köpösöñgömakze. Enñön mönö tosatñi enğonğita ölöpñanök jöpaköm nengiba qetpuk akze. Miangö dop nangönağö nup ki mewöyök mönö ölop mem soroköba tosatñi enğonğitketka qetpuk akña.

⁸Mewö jiba moneñ almegöra qahö jim kutum enğizal. Mi qahöpmö, urukalemñini geñmoñambuk akza me qahöwi, mönö mi esapesapnöñ ala könañini mötmangö mötzal. Könagesö tosatñan gönmöñahot mosöta nangönağö nupñini öl töhöñña memba zen kinjei, keu mi jiba miangön injini esapköm enğizal.

⁹Naluk dawik almegöra kewötmei, miangören mönö Kembunini Jisös Kraistkö könañangö tandökñi mötmörime. Injini yangö kalem möriamñi ketanji mi kewö mötze: Yeñön Suepkö öröyuai pakpakö Tonji öngöñgöñi ahökmö, töndup injini oyaenğoyaenğö pomñi akñegöra aka gölmenöñ eta etqeqeñi aka malmalñi tököba mosörök.

¹⁰Moneñ almegöra qahö jim kutum enğizalmö, Jisösnöñ söpsöp alöhi, miangö dop qambañni miyök enğizal. Enñön yambu emune lök nangönağögö mutukñi aka miangö nupñi kapan köla meget aka mi toroqeba membingö sihimñi köhöikñi mötket.

¹¹Nalö kewöñe nupñini mi mönö mem teköme. Mutuk nangönağö nup membingö kapan köla awöweñgögeri, miangö dop mi mönö toroqeba mem teköme. Yuai ahöm enğizawañgö dop mönö nalukñini gwötpuk alme.

¹²Miangö könañi kewö: Naluk albingö sihimñinan ahuba ahöza ewö, mönö yuai ahöm enğizawañgö dop algetka Anutunöñ möt anğön köli dop kölja. Yuai qahö ahöm enğizawañgö dop mönö qahö kewöta jim enğimakza.

* 8:1: Rom 15.26; Eks 16.18

13 Naluk ketanji algetka alaurup yengö malmalñinan amqeiga nannini qakñine lömböt öngömapköra qahö mötzinmö, alaurup osiba mözöröngözei, yembuk mendenäda öröröñ malbingöra mötzin.

14 Miangöra nalö kewöñe yuai kelenmaleleñ ahöm enjiiga tosatñan malmalñinañgö yuaigöra osizei, injini mönö mi bauköm enjigetka dopñe akña. Mewö aka nannini könangep yuaigö osigetka yengö öröyuaininan kelenmaleleñ ahömawi, nalö miangöreñ mönö i kun bauköm engime. Mewö ak anjugetka alabauk silikñinan öröröñ akña.

15 Mi Buña keu ki ohoget ahözawañgö dop akña, “Gwötpuk mem tokoba malgerañön nannini dop negetka numbu surukñini qahö ahöiga boromborom mem tokoba malgerañön nene yuaigöra qahö osiget.” Mewö.

Neñakurup karöbut melaim enjiinga kaba bauköm engime.

16 Anutunöñ Taitusgö uruñi sölölohöiga engöra ni ewö waimanjat möta bauköm enjimangö kapañ köla malja. Miangöra “Anutu saiwap!” jizal.

17 Nöñön Taitus engöreñ kamapkö qesiba uruñi kuñgubiga imbiñi melenök. Miyök qahöpmö, nannak injini bauköm enjimangö möta köpösöngöba nannji sihimñangö dop neñgömosöta Korint engöreñ kamangö jiyök.

18 Neñön urumelen alanini kun melaininga yambuk kamahot. Kiangöreñ Ölöwak Buña jim sehimakzawañgöra i mönö urumelen könagesö dop möpöseim wañgimakze.

19 Yañgö keuñi toroqeba kewö jimam: Masedonia urumelen könagesö yeñön mönö i möwölöhögetka nañgönañgö nalukñi mi memba nembuk mohotñe köna anbin. Neñön Kembu nannangö qetbuñañan sehimapköra möta naluk ketanji mi ölop galöm köla Judia prowinsnöñ anda enjibin. Alabauk enjibingö urukalemnini mewö aukñe kondeljin.

20 Mewö aka nañgönañgö naluk ketanji mi tilipqilip asuhui sohobapuköra ölop galöm köl soroköbin. Kunñan siliknini miangöra jim neñgibapukö möta kapañ köla kinjin.

21 *Keu miangö könañi kewö: Neñön silik Kembugö jeñe diñdiñi akzawi, mi qötöñgatpinbukö galöm mem anjumakzin. Miyök qahöpmö, silik ambazip jeñine dop köljawi, mi mewöyök akingö möta kapañ köljin.

22 Yetpuk urumelen alanini kun mi mewöyök melaininga kama. I nalö gwötpuk esapköm wañgiba tandökñi kewö ehin: Yañön mönö nalöñi nalöñi Kembugö nupñi memangö könöpkönöp ahakza. Nalö kewöñe injini tosatñi alabauk enjibingö mötzei, mewö möt narim engizawañgöra mönö engöreñ kaba bauköm enjimangö möta urukönöp ketanji ahakza.

23 Nöñön Taitus kewögöra möwölöhöyal: Yañön nöñgö alabaukni aka nup meme neñakni akza. Urumelen könagesöñi könagesöñi yeñön alayahötnini yahöt mi möwölöhöm etkigetka jitrjememenjini akzahot. Kraistkö qetbuñañan mönö yetköra aka qarimakza.

24 Miangöra azi karöbut mi kamei, i mönö urukalem ak enjiba könañini mewö kondelgetka ekñe. Mewö akñe ewö, neñön silikñinañgöra silenjini möpöseinini, keu miangö öljñan mönö aukñe asuhuiga eketka urumelen könagesö gwötpuk yeñön mötme. Mewö.

9

Mönö urumelen alaurupñini bauköm engime.

1 Anutugö ambazip sarakñi alabauk monen enjimegöra ohomangö mötzalmö, injini keu mi lök möta miangöra qahö osize.

* 8:21: Qam 3.4

² Inini alabauk akingö sihimñinan ahui mötze. Nöñön mi möta engö silenini mi mianğöra Masedonia urumelen ambazip yenğö jenine möpöseiba kewö jial, “Korint aka Akaia urumelen alaurup tosatñan mönö yambu emuneyök könahiba Judia alabauk ak engibingö jöjöröba malje.” Mewö jibiga engö urukönöpñinanğöra mötketka keu mianñön mönö kuñgum engiyök. Mianğöra könagesö ölni yenğö uruñinan mönö amqeba alabauk akingö urukönöp aket.

³ Engö sihimñinan ahui mötzemö, töndup neñakurupni karöbut ki melaim engizal. “Korint yenñön mönö moneñ tokobingöra jöjöröba malje,” mewö jial aka keu mianğöra engö silenini möpöseial. Keu mianñön omanñi aiga gwötpukñan ekepukmö, keuñinanğö dop moneñ ölna algetka kahaimök tari körekñan mewö engekñegöra mötzal.

⁴ Keu mianñön omanñi aiga moneñinan qahö kahaimök tari öne malgetka Masedonia neñakurup tosatñan nömbuk kaba mewö miwikñaim engibeak ewö, nöñön mönö engöra aka gamu miwikñabilenbuk. Tem kölmegö möt narim engiba malbiga ölni qahö asuhubawak ewö, inini mönö mewöñanök keuñini omanñagöra aka gamu miwikñabepuk.

⁵ Mianğöra urumelen alaurupnini karöbut mi uru kuñgum engimangö mötpi dop köli kewö jial, “Inini mönö qeljiñe Korint yenğöreñ anda nanğönanğö naluk ketanñi almegö keu jöhögeri, areñ mi wuatangöba al tekömegöra mönö kuñgum engime. Mewö aketka alabauk nalukñini mi kik-kukñambuk ekbonep qakñe qahöpmö, mönö sakalakñi aka amqeba gwötpuk alme. Mi mindirigetka zioz köwenöñ kahaimök tari kabiga ölop membin.” Mewö jial.

Kötñi mönö amqeba gwötpuk qesinñda gilme.

⁶ Keu ki mönö mötmöriba malme: Nene kötni awamñanök qesinñda giljawanñön mönö ölni mewöyök awamñanök mema. Nene kötni gwötpuk qesinñda giljawanñön mönö ölni mewöyök gwötpuk mema. Mianğöra gwötpuk algetka Anutunöñ salupñe gwötpuk engima.

⁷ Inini nanñök nanñök nalukñini mönö uruñinan jöhögeranğö dop alakñe. Sösöñgainöñ amqeba mözöközöröñ ambazip kalem engizei, Anutunöñ mönö i jöpaköm engimakza. Mianğöra nalukñini kunñan kuñgum engizawanğöra aka uruyahöt qakñe kude alme. Mi kik-kukñinambuk kude alme.

⁸ Uruawam qakñe kötönñini gwötpuk algetka Anutunöñ mönö köhöiba kalem möriamñi pakpak mem sehim engimakña. Mewö engiiga malmal pakpak mianğöreñ yuaigöra osimei, mi pakpak mönö nalö dop buña gem anğugetka dop köl engimakña. Mewö aiga nup ölopñi könanñi könanñi mi ölop megetka ölni kelenmaleleñ asuhuma.

⁹ *Ekbonep mosöta naluk ketanñi ketanñi alakzei, mi Buña Kimbi keu ki ohoget ahözawanğö dop akze, “Yanñön amqeba kalemñi kalemñi mendenñda ambazip wanapñi engimakza. Ahakmemenñi diñdiñi kik-kukñi qahö mianñön mönö nalö teteköñi qahö Anutugö jeñe ahöm öngöma.”

¹⁰ *Anutunöñ qesinñ gilgil azigöra nene kötni wanñiiga nene asuhui nemakzini, yanñön mönö nenegö mözöközöröñ ahakñei, mi mewöyök engimakña. Mi engii uruñinan lolohoiga ölop amqeba keu kötni qesinñ sehiba gilgetka ahakmeme solanñanğö ölni asuhui Anutunöñ mi mem qarii sehimakña.

¹¹ Mewö aketka Anutunöñ mönö malmal pakpak mianğöreñ sehiba kötuatköm engiiga ölöwahakñe. Mewö ölop amqeba ambazip nalö dop genmonñi qahö kalem gwötpuk engimakñe. Mewö aketka mi memba (Jerusalem anda) engiinga ambazip gwötpukñan kötönñinanğöra aka Anutu möpöseigetka ölni engöreñ asuhumakña.

* 9:9: Sum 112.9 * 9:10: Ais 55.10

¹² Nangönanngö nup ki memakñei, mianjon mönö Anutugö ambazip sarakñan yuaigöra mözöközöröñ aketka bauköm engimakña. Miyök qahöpmö, miangöra “Anutu saiwap!” keu mi gwötpuk jimegöra aka ölni engöreñ asuhumakña.

¹³ Miangö könani kewö: Nangönanngö nup ki memba mewö mianjon mötnaripñinanngö könani kondelgetka ambazip gwötpukñan mi eka Anutu tem kölmeangöra möpöseim wangiba kewö jime, “Korint yeñon mönö Kraistkö Ölöwak Buñani keunöhök qahö jim miwikñaizemö, Polgö keunji genmoni qahö tem köla amqeba sakalakñi aka neñgöra aka tosatñi pakpak yeñgöra kalem jesöngö engimakze.”

¹⁴ Mewö jiba engöra köuluköba miangöreñ waikñini gwötpuk mem engiba kewö jime, “Ia! Anutunöñ mönö kalem möriamñi kelenmaleleñ Korint engiiga urukalemñinanngö ölni gwötpuk neñgiget.” Mewö jigetka Anutugö kalemñan aukñe asuhuma.

¹⁵ O nini Anutu kalemñangöra aka möpöseimakin. Yangö kalemñi Jisös Kraistnöñ mönö qetpuk sorok akza. Nangönanngö almeangö keunji mi mewö kaba teköza.

10

Polgö nupköra keu jigetka likepñi melenñök.

¹ Tosatñan engö sutñine nöngöra kewö jimakze: Mesohol köl anguba köhöikñi tandök qahö akzapmö, kungen anda miangöreñ mönö keu köhöikñanök jim neñgimakza. Mewö jimakzemö, Kraistnöñ ak kömumba gunbönjönjön ningimakzawi, nöñon mönö miangö qakñe nanak uruñini kewögöra kuñgumam:

² Tosatñi mienjon neñgöra kewö tandök mötmöriba jimakze, “Pol aka yangö neñakurupñi yeñon gölmegö ahakmeme tandök wuatangöba nanñinanngöra mötmöriba ahakze.” Nöñon engöreñ kaba keu mewö jimakzei, i mönö tembul engiba awösamakak kinda jim engimangö mötzalmö, töndup uruñini köhöikñi kötökñi kuñguba jim engimangö töközal. Miangöra inini ambazip nöngöra keu mewö jimakzei, i mönö zilañ andö engume. Keuñini mewö mindiñgögetka engeki urunan mönö luai qei sutñine kaba böñjön malmam.

³ Ölna, ahakmemeni gölmenöñ ahakzalmö, mi töndup nanangöra aka gölmegö ahakmeme bölönanngö dop bim qahö qemakzal. Mewö qahöpmö, Anutugö suahö galöm aka kerökurupñi kiripo kuñgum engiba miangöreñ areñ sarakñi wuatangöba bim qemakzal.

⁴ Gölmö ambazip uruñini walñangö dop bimgö yuaiñi pakpak miambuk bim qemakzin. Yarö azi yeñon jakömbuak ain selñi selñi eriba köndengetka erakzemö, Anutunöñ timbi saiwanji kukñinambuk neñgii inahöm neñgigetka mianjon mönö kerök yeñgö keu areñini pöwöwöm köhöikñi kuñguba qeapköinga erakze.

⁵ Urumelenngö kopa yeñon Anutugö könani möt kutubepuköra aka nanñini silenini memba öngöba mötmötñini közamböta liklak ahakzemö, neñon yeñgö kiripo areñini gonñonji pakpak mi qeapköba köndenninga erakze. Ambazipnöñ keu mötmötñini bölöñi meraköba jöhömegöra köna kondel engiinga ölop keuñini pakpak Kraist tem köl wangimakingö dop mötmörimakñe.

⁶ Mewö mötmöriba Korint inini mutuk Kraistkö keu pakpak tem köla aposol nupni nangömegöra mambötzin. Inini uruñini mewö kunbuk melengetkun nini mönö qegetal ambazip yeñgö keuñini pakpak kewöta jim teköba likepñi melenñ engibingö jöjöröba maljin. Mewö.

⁷ Inini yuai pakpak mönö silegörök kude eka kewötme. Sutñine ahakmeme sohomakzawi, miangö könani ölni mönö mötmörime. Tosatñan sutñine ni memba et ala nanñini Kraistkö jitñememurupñi akzeangöra uruyahöt

qahö aka möt köhöize ewö, yeñön mönö toroqeba nöngöra mewöyök kewö mötmörime: Yeñön Kraistkö buñañi akzei, nöñön mönö mewöyök Kraistkö buñaya akzal.

⁸ Kembunöñ kewögöra kukösum niñgiyök: Inini mem et al engimangöra qahöpmö, mönö uruñini möhamgöbi köhöimegöra aka maljal. Miangöra kukösum miangöra aiweliköba koñaen ewö sileni memba öngöba terereibileñak ewö, mi töndup mönö gamu kun qahö miwikñaibileñak.

⁹ Kimbiñi kimbiñi ohoba albi oyoñda kukösumni mötketka keñgöt mötmöt mem engibileñbuk. Miangöra keu mi nalö kewöñe qahö toroqeba jimam. Mewö.

¹⁰ Tosatñan keu kewö jimakze: Polnöñ kimbiñi miangöreñ mönö keu lömbötñambuk ohoba urunini ölna kuñgumakzapmö, sutnine kini ehinga azi löwötñi akza aka keuñi jii möringa qetpuk qahö akza.

¹¹ Nöñön keu miangö likepñi kewö jimam: Keuñini omañi mönö mosöta nöngö könanangöra kewö mötmörime: Ni kungen anda kimbinöñ keuni köhöikñi ohomakzali, miangö dop mönö sutñine mala mewöyök köhöikñanök mindiñgöm engimam.

¹² Timbiqimibilim mienön nannini jim ölöwak ak anjgumakzemö, ölna ni noñgita aposol qetpuk akeak ewö, nöñön mönö gamuni mötpileñak. Mewö aiga nani aka engö silikñini likeplikep ala kewötmangö qötötangöba kölköldömdöm akileñakmö, yeñön mönö mötmötñini töröpñi wuatangöba nannini imbiñinañgö dop uruñini dop ala kewörakze. Ahakmemenini mewö lañ kewöta “Pol ongitzin,” jiba uruölöwak mörakze. Keu omañi mewö jiba uruqahö akze. Anutugö dopnöñ kewöt niñgigetka ölop engonjita maljal.

¹³ Anutunöñ nup memegö jaböñi al niñgiyöhi, mi qahö onjita sileni gwötputuk möpöseimangöra qahö mötzal. Anutunöñ nup meme areñi al niñgii memakzali, miangö dop mönö engö sutñine mewöyök nup memakzal aka miangö ölnangörök mönö sileni möpöseimakzal.

¹⁴ Tosatñan keu kewö jim sohomakze, “Polnöñ Korint sutñine nup meyöhangöra silenji möpöseiiga qahö dop kölna. Anutunöñ gölme mesiñda nup memapkö jabö al wañgiyöhi, Polnöñ mi onjita lañlañ walöñmakza.” Yeñön mutuhök nup sutñine qahö megetmö, töndup ni mem et al niñgiba nannini silenini keunöhök jiba möpöseimakze. Nöñön Kraistkö Ölöwak Buña jim sehiba anda mala mutuk Korint engöreñ kaba urugö nup meal. Mutuk qahö kabileñak ewö, timbiqimibilim böhi mienön nöngö keuni mewö jigetka dop köli nöñön nani könanangö könañi jiba jim sohobileñak.

¹⁵ Anutunöñ gölme mesiñda nup memegö jabö al engiyöhi, yeñön selñini mi walöñda engö sutñine kaba urugö nup memakze. Nanak selni qahö walöñda tosatñi yeñgö sutñine nup mealangöra silenji qahö möpöseimakzal. Böhi tosatñan urugö nup memba malgeri, miangöra mewöyök silenji qahö möpöseimakzal. Engö sutñine mutuk nup mealangöra mewö akiga ölop dop kölna. Anutugö areñi wuatangöba sutñine nup memba malinga mötnariñinan toroqeba qariiga nañgöm neñgimegöra mamböta jörömqöröm akzal.

¹⁶ Nañgöm neñgigetka ölop gölmeñi gölmeñi Korint likepñine Not göröken ahözei, mönö enduyangöreñ mewöyök anda Ölöwak Buña jim asaribin. Nupninan mewö qariiga andöqeqe keuñinan teköma. Anutunöñ tosatñi yeñgö nup meme jaböñini al engii megetka ölni lök asuhuyöhi, miangöra nani silenji möpöseimangöra qahö mötzal.

17 *Mewö qahöpmö, Buña keu kiangö dop akñamgö mötzal, “Kunñan silenî möpöseimangö mötzawi, yañön mönö Kembugö nupkö ölnangöra aka silenî möpöseii dop kölma.”

18 Keu miangö könañi kewö: Nannini jim ölöwak ak angumakzeañön mönö Anutugö jeñe qahö dop köljemö, Kembunöñ ninia jim ölöwak ak wangimawi, yañön mönö esapesapnöñ köhöiba kinma. Mewö.

11

Aposol takapulakanî yeñön tilipköm engibepuk.

1 Nöñön borom kun uruqahö keu qakñe silememe aki miangöra mönö kude möt lömbörime. Mi töndup ni kude andö nunguze, mötzal.

2 Nöñön inini azi mohot Kraist yangö buñañi aketka ambi seram jömukñi sarakñi ewö engibiga yañönök engömemapkö keuñi jiba jöhöyal. Miangöra Anutunöñ uruñan engöra aka mututqutut mörakzawi, nöñön mönö miangö dop tosatñan kelök keunöñ jiba engömeget bölibepuköra waimanjat mörakzal.

3 *Kewögöra waimanjat mörakzal: Mokoleñnöñ isimkakalek aiga Iwnöñ (Ewanöñ) böliyöhi, miangö dop timbiqimibilim yeñön mewö me mewö jiba tilipköba engömegetka uruñinan tölöhoiga janjuñ akepuk.

4 Miangö könañi kewö: Tosatñan kaba Jisös jim asariini, mi qahöpmö, Jisös murutñi kungö könañi jim sehiba malgetka yeñgöra qahö mötket lömböriza. Uña Töröñi buña qem angugeri, mi qahöpmö, öme kunöñ tosatñi engö uruñine gei lolonqalon mala miangöra töndup köñjilij qahö mötze. Ölöwak Buña möt angön kölgeri, mi qahöpmö, keu tandökñi kun qetñanök Ölöwak Buña qeta lañ jigetka tosatñan mi awamñanök möt angön kölakze. Mewö asuhumakzawangöra mönö töndup waimanjat kun qahö akze.

5 Miangöra waimanjat mörakzalmö, ahakmemeni mewö me mewö kewötketka etqegeñi qahö akzal. Tosatñan aposol qet memba timbiqimibilim lañ ahakzei, nöñön mönö yeñgö nembö bapñine qahöpmahöp maljal.

6 Keu ningizei, miangö likepñi kewö jizal: Keu ölop sorokñi jijigö tandökñi mi ölop qahö mötzalmö, Buña keugö könañi mönö möt soroközal. Mi mönö nalö dop pöndañ aukñe indelbiga möt yaköze.

7 Inini mem wahöt engimamgö möta nani mem et al anguba malmalni nangömangöra nup memba malal. Miangöra Anutugö Ölöwak Buña mi engöra söngöröñi qahö jim asarim engiba malal. Mewö aka malalangöra tosatñan nöngöra uruqahö keu kewö jimakze, “Polnöñ mönö köna ongita singisöndok ahakza.”

8 Urumelen könañesö tosatñe nup qahö membiga töndup nalukñini öne ningigetka membi nangöm ningiiga inini welen qem engiba malal. Tosatñan miangöra kewö jimakze, “Polnöñ yongorö nene silik tandök ak engiba malja. Miangöra aposol qahö akzapmö, nannî nupña memakza.” Nöngöra mewö jiba jim sohomakze.

9 *Embuk mala yuaigöra osiba mözöröngöba miangöreñ mönö engöreñök kun qahö kuñguba mem lömböriba nene yuañi qahö memba malal. Mewö qahöpmö, urumelen alaurup Masedonia prowinsnöhök kaba yuaigöra osiali, mi ek asariba monen ningigetka dop kölök. Ahakmemeni pakpak miangöreñ mem lömbörim engibilenbuköra möta galöm mem anguba malal aka mewö toroqeba malmam.

10 Mem lömbörim engibilenbukö keuni miangöra mönö nani silenî memba öngöba maljal. Kunñan keuni mi Akaia prowinsñinangö gölmeñi gölmeñi

* 10:17: Jer 9.24 * 11:3: Jen 3.1-5, 13 * 11:9: Fil 4.15-18

pakpak miangören qeapkömamgö osima. Kraistkö keu ölnan mönö nam köl ningiiga keu mewö jöhöba jiba kinjal.

¹¹ Mi wuanöngöra? Mi injini qahö jöpaköm engibileñak, miangöra me? Mönö ölna jöpaköm engimakzali, mi Anutunöñ mötza.

¹² Aposol sesekñai ewö ahakzei, yeñön nembuk “Öröröñ akingö nup tandök miyöhök memakzin,” mewö jibingö mötze. Miangöra kewö kuñgum engimakze, “Polgö tandök ewö nup memakzinañgöra mönö Pol ewö nañgöm neñgime.” Nupñinañgöra silenini möpöseibingö möta miangö könañi jarumakzemö, mi ölop qahö miwikñaima. Nöñön i ewö qahö akzal. Miangöra mem lömbörim engibileñbuköra mönö nani galöm mem anguba maljal aka toroqeba mewö malmam.

¹³ Yeñön aposol ölni qahöpmö, mönö aposol takapulakani aka nup meme ambazip isimkakalekñinambuk akze. Kraistkö aposol neñgö tandök kondel anguba nup lañ memakze.

¹⁴ Satanöñ nanñak asakñangö garata tandök ewö kondel anguba nup lañ memakza. Miangöra timbiqimibilim mienön mewö akerangöra qahö welipkömakin.

¹⁵ Miangöra Satangö welenqeçe ambazipurup mienön ambazip welenñini qebingö tandöktandök aka Köna keu wuatangöba mewö mianön solanñi akñegöra jim sohoba kondel angumakze. Mewö nup lañ memakzeangöra mönö qahö auruba welipkömakzin. Silememe mewö ahakzemö, nalö teteköñe Anutunöñ mönö likepñi ahakmemeninañgö dop melenñ engima. Mewö.

Polnöñ aposol nup memba sihimbölö gwötpuk mörök.

¹⁶ Keuni kunbuk kewö jimam: Engörenök tosatñan nöñön uruqahö maljal, mewö mötmöribeak. Mewö mötmöribeak ewö, ni mönö uruqahö azigö tandök köl öröm ningime. Mewö aketka ölop i ewö nani sileni memba öngöba sutñine malmam.

¹⁷ Awösamakak ketanñi möta sileni memba öngöba keuni jizali, mi Kembugö mötmöt sihimñangö dop qahöpmö, mi uruqahö azigö tandök ewö jizal.

¹⁸ Ambazip gwötpukñan sutñine gölmegö ahakmeme bölöñi wuatangöba silenini memba öngömakzei, miangöra nöñön mönö mewöñanök aka keuni miangö dop jizal.

¹⁹ Nanñinak “Mötmöt ambazip öngöngöñi akzin,” jizeangöra mönö uruqahö ambazip yeñgöra mötketka qahö lömbörimakza.

²⁰ Injini öl közömña kewö akze: Ambazip kewöñi yeñgöra mötketka uruñinan qahö lömbörimakza: Kunñan engömembra jöhöiga welenqeçe uruñi etqeçeni akze. Kunñan tutuhum engiba nenenini nem tekömakza. Kunñan jim kelök ak engiiga buñanñi akze. Kunñan nanñi silenini memba öngöba keu töhörenñ jiba nunñgulumñini qekötahömakza.

²¹ I ewö öröm ureim ak engimangöra mönö lölöwöröñi aka malal. Ösöñ ak engialangöra “Keñgöt moröya akza,” jiba nöñgöra mewö mötmörize me qahö? Keu mewö jiba mianön ölop gamu qem ningimeangö dop akzal me? Keu jimami, mi mönö uruqahö azigö dop jimam. Timbiqimibilim yeñön nup memakzeangöra silenini memba öngömegöra gamuñini qahö mötze ewö, nöñön mönö mewöyök nupnañgöra aka silenini memba öngömamgö möt köhöimakzal.

²² Yeñön keu kewö jiba silenini memba öngömakze, “Nini Juda ambazip aka Hibru keu jimakzin.” Mewö jimakzemö, nia kun mewöyök akzal. “Israel ambazip akzin,” jimakzemö, nia kun mewöyök akzal. “Abrahamgö isi amböurupñi akzin,” jimakzemö, nia kun mewöyök akzal.

23 *Keu kun mi uruqahö azigö keu tandök ewö jimam, “Yenön Kraistkö nupñi memakzin,” jimakzemö, nöñön mi mönö i luhut ala enğongita memakzal. Nöñön mönö ambazip mi enğongita nup köhöiba memba malal. Kraistkö nupköra aka kösö mire al niñgigetka miangöreñ i enğongita nalö gwötpuk taral. Ihilek wahinambuknöñ mönö könöpuk könöpuk nuñguba malget. Nalöñi nalöñi lömböt miwikñaiba kömumamgö dop aka malal.

24 *Juda jike galöm tosatñan jigetka arawambu kömbinöñ nuñgugetka areñi 39 aiga sihimbölöñi möta malal. Mewö ak niñgigetka indimñi 5 ahök.

25 *Rom gawman yenön jigetka ihilek wölzikenöñ nuñgugetka indimñi karöbut ahök. Sömañi mohot kötnöñ nuñgugetka kömumamgöra ahal. Wanje ketaje malbiga köwet töromnöñ kuñguba qaköba jömgöiga indimñi karöbut ahök. Nalö kunöñ wanje jömgöiga köwetnöñ geba silimñi mohot aka sunğemñi kun köwet qakñe lanğ malal.

26 *Nalöñi nalöñi köna anda kaba malal. O töwatñi töwatñi (göwöñi göwöñi) kutuba miangöreñ lömböt miwikñaiba ayuhumamgö dop aka malal. Kegwek-kahasiliñ ambazip yengöra aka kömumamgö kenğötni möta malal. Juda könagesöurupni yengöra aka lömböt miwikñaiba ayuhumamgö dop aka malal. Kian kantri yengöra aka lömböt miwikñaiba ayuhumamgö dop aka malal. Taonñi taonñi miangöreñ lömböt miwikñaiba ayuhumamgö dop aka malal. Arökñangö mirinñi mirinñi miangöreñ lömböt miwikñaiba ayuhumamgö dop aka malal. Köwet kutuba anda miangöreñ lömböt miwikñaiba ayuhumamgö dop aka malal. Alaurup takapulakanñi yenön nuñguget kömumbilenğbuköra wösöni kot gwözöhñiga malal.

27 Malmalni nanğömamgöra nup köhöiba memba malal. Gaun guli gwötpuk malal. Nup gwötpuk mealangöra nenegö nalöni qahö ahöiga nenegö kömumba ogö kömumba malal. Nene qahöwahiga nalö gwötpuk bödi aka malal. Opo malukugöra osiba sanğenñi möta malal.

28 Miyök pakpak qahöpmö, toroqeba kewö möta malal: Urumelen könagesöñi könagesöñi pakpak yenön waimanjatñini jigetka urunan mönö nalö dop möt lömböriba malal.

29 Mötnarip alaurup denike yenön sörauba löwörize ewö, nöñön mönö mewöñanök i uru al enğizal. Kunñan kölgorom aliga urumelen alanan siñgisöndok akzawi, siñgisöndok miangö könöpñan mönö nöñgö uruni mewöyök nohoiga tembulakzal.

30 Silememe keuyök mönö mötpingö ak enğiza. Miangöra sileni memba öngömamañgö dop akilenğak ewö, ni memba et al niñgigetka ösumeret tandök akzali mönö miangöra aka sileni memba öngömakzal.

31 Kembu Jisösgö Iwi Anutuñi nalö dop möpöseininga teteköñi qahö aködamunğambuk mal öngömawi, yanön mönö nöñgö könañamni möri munen keu qahöpmö, keu ölni mi jizal.

32 *Damaskus sitinöñ malbiga kiñ Aretasgö kiapñan mönö buldömin aziurupñan nömmimba jöhöm niñgimegö jim kutum enğiiga Damaskus ambazip yengö siti sel nanğunje mönimba ölöñ köla anbilengbuköra galöm memba kinget.

33 Mewö kingetmö, alaurupnan nömemba sakapnöñ al niñgiba kösönöñ jöhöba siti sel jengenañeyök ösöhösöh algetka gölmenöñ eta köla böröñeyök ölöñ köla kayal. Mewö.

12

Polnöñ jemelen imut eka indelindel keu mörök.

* 11:23: Apo 16.23 * 11:24: Dut 25.3 * 11:25: Apo 16.22; 14.19 * 11:26: Apo 9.23; 14.15

* 11:32: Apo 9.23-25

¹ Engö silememe alaurupņinan jemelenģö keuņi keuņi jimakzei, miangöra nöņön mewöyök sileni möpöseiba jemelenģö keuni jimam. Keu mi ölop qahö bauköm engimapmö, tøndup keu toroqeba jemelen imutņi imutņi eki Kembunöņ keuņini indeli mörali, miangö kösohotņi jimam.

² Azi kun möt waņgibi Kraistpuk qekötahöba malja. Uņa Töröņan i waņgiriga gölmegö kousu luhut jaböņi oņgita öņgöba senģelau jaböņi oņgita öņgöba Anutu nanņaņģö Suep miri uruņe eu öņgöyök. Nalö miangöreņök yambu 14 lök teköi maljin. Silebuk me sileni qahö uņaņanök öņgöyöhi, mi qahö mötzal. Anutunöņ mi mötza.

³⁻⁴ Uņa Töröņan azi mi waņgiri Anutugö oyaeņkoyaeņ miriņe öņgöi keu qainņi kun jigetka mörök. Gölme azi nöņön keu mi jimamģö sonģo ahöza aka keu mi gölme ambazip neņģö keuninan jibinaņģö dop qahö. Silebuk me sileni qahö öņgöyöhi, mi Anutunöņ mötza. Nöņön mi qahö mötzalmö, yaņģö kösohotņi mötzal.

⁵ Nöņön azi yaņģöreņ yuai asuhuyöhi, miangöra sileni memba öņgömamaņģö dop akzal. Nanaņģöra mi asuhuyökmö, tøndup miangöra aka nani sileni qahö möpöseimakzal. Miangöra qahöpmö, ösumeret akzalaņģörök mönö mewö ahakzal.

⁶ Nanaņģöra sileni mewöyök memba öņgömamģö mötpileņak ewö, keuni mönö keu ölnaņģö dop jibileņak. Mewö keu omaņi jiji azia qahö akileņakmö, mi kewögöra köyatim aņgumakzal: Körek eņön jemelen mi ehalangöra keu diņdiņi oņgita nöņģöra mötket öņgöņģöņi akileņbuk. Ahakmemeni aki eketka keu jibi mötkeri, mönö miangö dowök kewöt niņgimeģöra mötzal.

⁷ Indelindel keu öņgöņģöņi mötpi keu tosatņi oņgirakzawi, miangöra aiwe-liköm aņgubileņbuköra Anutunöņ yuai jitņambuk nöņģö silene aliga kondi sötmaņģö dop nuņgumakza. Satangö garatanöņ sihimbölä mi niņgiiga mörakzal.

⁸ Miangöra Kembunöņ mi sileneyök mem gilmapköra köuluköbiga indimņi karöbut ahök.

⁹ Mewö köuluköyalmö, keu kewö jii möral, “Qahö. Ösumeret aknöņga nöņģö kukösumnan mönö amqeba urugi kokolak qeiga aködamungabuk ahakņan. Miangöra nöņģö kalem möriamni mönö buņa qem aņgunöņga dop kölma.” Keu mi jii möta Kraistkö kukösumņaņ qakne öņgömapköra mörakzal. Miangöra ösumeret ahakzalaņģöra sileni möpöseimakzal. Lömböt mi qahöwakaņapköra qahö toroqeba köulukömakzal.

¹⁰ Kraistnöņ ni ösumeret ahakzali, nalö miangöreņ ösum niņgiiga köhöiba kinakzal. Miangöra ösumeret akzalaņģöra tøndup mötpi dop köli siksuk qahö akzal. Tosatņaņ uruqeqe keu töhöreņ jim niņgigetka mötpi dop köl niņgiza. Kraistköra aka kahasililiņ sesewerowero ak niņgigetka wahöjalin möta miangöreņ tøndup uruböņjöņ miwikņaimakzal. Mewö.

Polnöņ Korint yengöra waimaņjat mörök?

¹¹ Sileni memba öņgöba mönö uruqahö tandök akzal. Diņgimeģöra aka köna murutņi kun qahö miwikņaiiba nöņģöra mötket öņgömapköra mi jizal. Ölna, Anutunöņ qahö bauköm niņgibawak ewö, nanak mönö yuai kun qahö aki andöqeqe keuņinan ölni akawak. Ölni akawakmö, ahakmemeni mewö me mewö kewötzali, mönö etqeqeņi qahö akzal. Tosatņaņ aposol qetpukö qet memba timbiqim bilim laņ maljei, nöņön mönö yengö nembö bapņine qahöpmahöp maljal.

¹² Engö sutņine nup memba lömböt gwötpuk möta mökösoņda malali, miangöreņ Anutugö kukösumņaņ sölölohöm niņgiiga aņģöletot aiwesök könaņi

könañi asuhuget. Ahakmeme mianñon mönö aposol akzalañgö könañi kondel enjiiga eket.

¹³ Injini bauköm enjial aka urumelen könañesö tosatñi mi embuk öröröñ ak enjial. Tosatñi enjömembu wahötketka injini mönö denöwö enjomosötpi öne malbeak? Ölna, nañgöm niñgimegö lömbötñi mi enjög qakñine qahö alal. Aposol takapulakañi yeñon lömböt mi enjög qakñine alakzemö, nöñon mi tosatñi yeñög qakñine albi bisimakze. Nañgöm niñgimegöra qahö kuñgum enjiba mewö köpösihit ak enjial me? Miangöra “Polnön köpösihit azia akza,” jibeak, mönö pinjitni mi mosötmegöra qesim enjizal.

¹⁴ Mötket, nalö kewöñe kunbuk enjören kamamgö jöjöröbiga indimñi karöbut akña. Kaba nupni nañgömegö lömbötñi mi dumñe kunbuk enjög qakñine qahö almal. Mi qahö. Nannini sukinapñinañgöra qahö köpösöñgömakzalmö, nanninak mönö nöñgöra ak enjimapköra mötzal. Nahönbörat yeñon iwinamurupñini nañgöba inap tokoba enjimeañgö dop qahö akzemö, iwinam yeñon mönö mi nahönböratupñini yeñgöra tokogetka dop kölja. Miangö dop urugö nupnön göröken nöñon iwinini akzal. Miangöra urunön göröken bauköm enjimamgö mötzal.

¹⁵ Miangöra enñon ölöwakñegöra yuaini pakpak mi söñngai qakñe tököm enjibi enjög buña akñapköra mötzal. Nani malmalni mewöñanök ölöwakñegöra mosötmamgö mötzal. Mewö önöñi qahö jöpaköm enjibi urukalemnan qarimakzapmö, enjög urukalemñinan mönö töndup wuanöñgöra wazimakza?

¹⁶ Ölna, nañgöm niñgimegö lömbötñi mi enjög qakñine qahö alal. Nöñgö tuarenjoñurupnan keu miangöra urumohot akzemö, tosatñan kewö jibeak, “Pol mi mötmöt azia aka tilipqilipñambuk uruñini mezañda köpeim enjiba monenini mewö me mewö örömakza.” Keu mianñon ölni qahö.

¹⁷ Mi denöwögöra jize? Neñakurupni melaim enjibiga enjören kageri, yeñgörenök kunñan Pol inap wañgimegöra kuñgum enjigiyök me qahö? Qahö.

¹⁸ Taitus enjören kamapkö kuñgum wañgiba urumelen ala kun yambuk melaibi kayohot. Taitusnön ni inap niñgimegö kuñgum enjigiyök me qahö? Qahö. Uña mohot mianñon mönö sölölohöm netkiiga nup nañgönañgögö köna mohot anda kaba malit. Mewö.

Polnön mönö Anutugö kukösum qakñe kama.

¹⁹ Kimbi ki oyoñda miangören nöñgöra kewö mötmöribepuk, “Keu jim enjiinga miangö likepña kapañ köla jiba mewö ohoza.” O wölböt alaurupni, miangöra kewö jimam: Mönö Kraistpuk qekötahöba keuni Anutugö jemesoholñe jiba ohoyal. Nupnini pakpak mi enñon uruñini möhamgöba köhököhöi miwikñaimegöra memakzin.

²⁰ Enjören kaba eki ahakmemenini tökömakzali, mi wuatangöba malbepuk. Mewö miwikñaim enjibilenbuköra waimanjat mötzal. Ahakmemeninañgö likepñi melen enjibi qakñine öñgömawi, enñon mönö tandök akñami, mi tökömegöra mötzal. Sutñine ahakmeme kewö akepuköra goro mötzal: Urunön mututqutut aka añgururuk akepuk. Urusingok aka yom jibepuk. Silenön alal ak añguba denñda nannini kambugörök mötmöriba malbepuk. Andöqeñe keu töhöreñ jiba mianñon mem bölim añgubepuk. Tosatñi yeñög keuñini tölapñe jigetka diwoñdawoñ anhapuk. Jakbak-orañbörañ aka areñi törörök qahö wuatangöba nannini imbi-imbi lañ malbepuk.

²¹ Mewö aka malme ewö, nöñon mönö kewö asuhumapköra waimanjat möta kamam: Ambazip gwötpukñan mutuk siñgisöndok aka malgeri, yeñgöra mönö urukömbuk aka sahötpilenbuk. Ahakmeme töwötñambuk lañ wuatangöba sihimñini kömbönañi miwikñaimegöra serowilin akerangöra gamu qahö möta qahö möt bölim añguget. Sutñine kabiga uruñini kunbuk qahö

melenget engekiga Anutunöŋ mönö uruni kungui kunbuk urueret akilenbuk. Mewö.

13

Galöm meme keu qöndökji

¹ *Nalö kewöŋe engöŋe kabiga indimŋi karöbut akŋa. “Keugö jakeŋe alalgö keuŋi pakpak mi mönö ambazip yahöt me karöbutŋan nanŋöba jigetka köhöimakza.”

² Nöŋön Buŋa keu mianŋö dop akzal. Engö sutŋine malbi indimŋi yahöt aiga mianŋöŋe lök galöm meme keu engial. Keu mi nalö kewöŋe kunbuk köl guliba qeljinŋeyök jizali, mianŋön teköza. Mianŋöra kunbuk kamami, nalö mianŋöŋe ambazip ŋiŋisöndok mutuk akeri me akzei, mi mönö qahö engehörimam. Bölönamŋinambuk inŋini mönö körek mindiŋgöm engimam.

³ Kraistnöŋ mönö ösumeret qakŋe qahö ak engimakzapmö, kukösumŋi sutŋine kondelakza. Kraist mianŋönök mönö sölölohöm niŋgiiga aposol aka keu jimakzali, inŋini mianŋö könaŋaŋöra uruyahöt aka kapan köla qesim aŋgumakze. Mianŋöra silikŋinanŋö dop mönö keu engiba mindiŋgöm engimam.

⁴ Kraist maripomnöŋ qegetka kömuyöhi, nalö mianŋöŋe mönö ösumeret tandök malökmö, töndup Anutugö kukösumŋan nam köl waŋgiiga mal köhöiza. Nöŋön mewöŋanök yambuk qekötahöba nani ösumeret aka maljalmö, Anutugö kukösumŋan mönö nam köl niŋgiiga Kraistkö jitŋi memba mindiŋgöm engimangö mal köhöizal.

Mönö nanŋini kewöt aŋguba uruŋini melenŋe.

⁵ Mönö nanŋini törörök kewöt aŋgume. Uruŋini melenŋe ölna Kraist möt narize me qahö, mianŋöra mönö esapesapnöŋ ala kewöt aŋgume. Kraist Jisösgö Uŋaŋan uruŋine mal köhöizawi, mi möt kutuze me qahö? Uruŋine qahö malja ewö, inŋini mönö esapesap mianŋöŋe et enŋuiga Kraistkö buŋaya qahö akze.

⁶ Nöŋön engöŋe aposol ölni akzal me qahö, inŋini mewö kewöt niŋgigetka esapesap mianŋöŋe kude eta nuŋguma, mewö mötzal. Inŋini nöŋgö könanani mewö aukŋe eka möt kutumegöra jörömqröm aka maljal. Mianŋöra mindiŋgöm engibi ölna dop kölma.

⁷ Keu pakpak ohoba kotzali, mi ak sohobepuköra Anutu köuluközin. Keu kun jim sohoba malgetka kaba mindiŋgöm engibiga tuarenjoŋurupnan mönö aposol kukösumni ölna eka ek asarime. Mewö asuhumapköra qahö köuluközal. Inŋini qahö mindiŋgöm engimamangö dop nekepuköra qahö köuluközalmö, enŋön urumelenŋ diŋdiŋi akŋegöra köuluközal. Uruŋini ölna melenŋe ewö, nöŋön mönö qahö mindiŋgöm engibi tuarenjoŋurupnan nöŋöra toroqeba azi lölöwöröŋi tandök ewö mötpeakmö, mi muat.

⁸ Nini keu ölni qetala kun uteköbingö osibinmö, keu ölnan sehimapköra ölop kinbin.

⁹ Nöŋön kukösumni qahö kondela ösumeret tandök malbiga enŋön köhöiba kinmei, nalö mewöŋe mönö sösoŋgai ahakin. Urumelenŋö aködamunŋini körek miwikŋaiba köhöiba kinmegöra neŋön Anutu köulukömazsin.

¹⁰ Kembunöŋ inŋini memba et al engimamgöra qahöpmö, uruŋini möhamgöbi köhöimegöra möta kukösumŋi mi al niŋgiyök. Kukösum mianŋö qakŋe kinda engöŋe kamami, nalö mianŋöŋe könöbuk ak engibilenbuköra mönö keu ki köröwen mala engöra kimbi ohozal. Nanŋinak mindiŋgöm aŋgume ewö, mönö ösöŋ ak engimam. Mewö.

Yaizökök keu teteköŋi

* 13:1: Dut 17.6; 19.15

¹¹ O urumelen alaurupni, keuni jim teköba qamban kewö engizal: Mönö söngaiba malme. Könañamñini sohöyöhi, mi mönö körek mindingöm teköme. Urukunğukunğu keu engizali, mi mönö buña qem anguba tem kölme. Keu jiali, miangören mönö urumohot aka luainöñ malme. Mewö aketka Anutu jöpaköm angumegöra inahöm nengiba luai qem nengimawi, yanön mönö embuk malma.

¹² Inini urumelen alaurupñini yembuk jölöñini jiba mönö köna sarakñi wuatangöba jölöñini jiba angum anguba numbuñini yöhötim nemba malme. Anutugö ambazip sarakñi pakpak ki maljei, yanön yaizökzökñini algetka engören kaza.

¹³⁻¹⁴ Kembu Jisös Kraistnöñ mönö kalem möriamñi engiiga Anutugö urujöpakñan nam köl engiiga Uña Töröñan körek inahöm engiiga urumohot aka köisirik malme. Mewö.

Galesia Kimbi Polnön Galesia yeᅇgöra Kimbi alök. Jim-asa-asari

Polnön Buᅇa Kimbi ki Galesia prowinsgö urumelen könagesö yeᅇgöra ohoyök. Galesia prowins mi Eisia Mainö (Töki) uruᅇe Rom yeᅇgö bapᅇine malget.

Aposol yeᅇön Anutugö Buᅇa keu jim sehigetka mutuk Juda tosatᅇi aka könagep kian kantri tosatᅇan mewöyök uruᅇini melenget. Nalö mianᅇgören Juda yeᅇön kapan köla keu yahöt kewö jigetka lömböriyök:

- 1) “Kian kantri yeᅇön Mosesgören Köna keugö dop Anutugö aiwesökᅇi sileᅇine qahö yandime ewö, yeᅇön mönö urumelen könagesö ölni qahö akᅇe.” Anutunön ambazip nanᅇaᅇgöra möwölöhöm enᅇiyöhi, yeᅇgö aiwesökᅇi mi sile yandiyandi. Jen 17.10–12. Polnön mi möta “Keu mi ölni qahö!” jiba kewö jim kutum enᅇiyök, “Kian kantri yeᅇön Jisös möt narigetka Anutunön mötnariᅇᅇini mianᅇgöra aka keuᅇini jim teköi solaniba urumelen kambu ölni akᅇe.”
- 2) Böhi takapulakaᅇi yeᅇön Polnön Uᅇa Töröᅇaᅇgö ösumnön nup meyöhi, mi memba et ala kewö jiget, “Pol mi aposol ölni qahö akzawaᅇgöra keuᅇi kude mötme.” Mewö jigetmö, Polnön köhöiba jiyök, “Nönön Jisösgö Ölöwak Buᅇa jiji azia aka Anutunön meköba kuᅇgum niᅇgiiga aposol ölna maljal.” Mewö jiba Galesia yeᅇgö urumelen kambuᅇi kambuᅇi ahakmemegö qambaᅇ keu ohoyök. Urunini melenᅇbin ewö, mönö amᅇeba Kraist jöpaköba nupᅇi meinga ölni asuhuma.

Buk kianᅇo bahöᅇi bohonᅇi 5 mi kewö:

Keu mutukᅇi 1.1-10

Pol ni aposol ölni akzal 1.11-2.21

Anutu kalem möriamᅇaᅇgö Buᅇa keu 3.1-4.31

Nanini imbi-imbi akinbukö soᅇgo 5.1-6.10

Kimbigö keu kötni bohonᅇi 6.11-18

¹ Pol nönön keu eraum mötᅇingöra Galesia urumelen könagesö enᅇgöra kimbi ki ohozal. Melaimelai azi akzalaᅇgö könaᅇi kewö: Ambazipnön aposol nupköra qahö kuᅇgum niᅇgigetka memba maljal. Gölmö azi kunᅇan qahö melaim niᅇgiyökmö, Jisös Kraist aka Iwi Anutu i kömupnöhök mem guliyöhi, yetkön mönö areᅇgöba aposol nup al niᅇgiyohotka kinjal.

² Neᅇakurup pakpak nömbuk kinᅇei, yeᅇön ni kötöngöm niᅇgigetka kimbi ki albi Galesia prowinsnön anda urumelen könagesö kambuᅇi kambuᅇi enᅇgören kaza.

³ Anutu Iwinini aka Kembu Jisös Kraist yetkön mönö kalem möriam enᅇiyohotka luainön malme.

⁴ Jisösnön nanine Anutu aka Iwi yaᅇgö numbu jitᅇi wuatᅇgöba neᅇgö siᅇgisöndokninaᅇgöra aka malmalᅇi köleᅇniga qeget. Nalö kewöᅇe gölmegö nalö bölöᅇe malakzini, yaᅇön mönö kianᅇoreᅇök amöt qeba meköm neᅇgimapköra aka kömuyök.

⁵ Mianᅇgöra Anutugö qetbuᅇaᅇi nalöᅇi nalöᅇi möpöseininga teteköᅇi qahö aködamunᅇambuk ahöba ahöm öᅇgöma! Keu mi ölna.

Ölöwak Buᅇa mi kude jim sohoba mondokqondoköme.

⁶ Nönön enᅇgö könaᅇinaᅇgöra aka aurubiga je kötni jölja. Anutunön Kraistkö kalem möriamᅇi buᅇa qem aᅇgumegöra enᅇgoholiga yambuk malgetmö, nönön

engömosötpiga tosatñan kaba Ölöwak Buña murutñi jigetka nalö qahö köriiga elennda keu goñgoñi mianğoreñ qekötahöba enjololon malje. Mianğöra mönö ölña auruzal.

⁷ Keuñini mi Ölöwak Buña ölñi qahöpmahöp akzappmö, ambazip tosatñan Kraistkö Ölöwak Buñañi mi enjololon memba melenqelen aketka möwököwöramgöiga goñgiza. Mewö aiga lañ liliköba ambazip kuñgum enjigetka uruñinan siksauk aiga malje.

⁸ Ambazip mewöñi mi yapmakek! Neñön Ölöwak Buña lök jim asarim engiba malini, kunñan mi qeapköba buña keu murutñi jim asaribawak ewö, yañön mönö Anutugö jeñe könöp siagö buñaya akza. Mi neñğoreñök kunñan me Suepkö garata kunñan eta jibawak, mi töndup keu mewöñi mönö qahöpmahöp tem kölme. Keu goñgoñi mi muat.

⁹ Keu mutuhök jiba malini, miyöhök mönö dölki kunbuk jizal: Enñön Ölöwak Buña lök möt anğön kölgeri, kunöñ mi qeapköba buña keu murutñi jim asaribawak ewö, Anutunöñ mönö i jörahöm wañgiiga könöp sianöñ gema.

¹⁰ Keu mewö jizali, mi ambazipnöñ nek soriget nanak jeñine dop kölmanğöra aka qahö jizalmö, Anutunöñ nehi yañgö jeñe dop kölmanğöra aka mi jizal. Nöñön gölme ambazip uru ölöwak möt niñgimegöra qahöpmahöp kapan kölakzal. Toroqeba ambazip kelök ak engiba sipköbilenjak ewö, nöñön mönö Kraistköreñ nup memangö osibilenjak. Mewö.

Kraistnöñ mem letot niñgiiga aposol ahal.

¹¹ O alaurupni, Ölöwak Buñagö könañi mi kewö möt yaköme: Buña keu jim asarimakzali, mi gölme azi kunñan qahö jimburen jiyöha ahöza.

¹² Kunñan kun mi qahö kusum niñgiyök. Mi gölme azi kungöreñök qahö möt anğön kölalmö, Jisös Kraistnöñ nanñak asuhum niñgiba Ölöwak Buñañi indeliga möt asaribiga nöñgö buñaya ahök.

¹³ *Enñön nöñgö könañamni ölop mötze. Juda ambazipnöñ Anutugö Köna keugöra urukönöp ahakzei, nöñön mutuhök yeñgö mötmöñini wuatangöba yeñgö dop aka memba malal. Mewö mala Anutugöreñ urumelen könagesö mi engum ureiba jañgauranga mem engiba malal. Könöpñambuk sesewerowero ak engiba mem ayuhum engimangö esapköba malal.

¹⁴ *Juda ambazip gwabö alaurupni qötönini mohot kota malini, nöñön yeñgöreñök sehisehiñi mi luhut al engiba Köna keugöra urukönöp aka malal. Mewö mala Juda ahakmemegö könañi törörök wuatangöba ambösakoninañgö jimkutukutu keu etpapuköra mönö önöñi qahö kapan köla malal.

¹⁵ *Mewö aka malalmö, Anutunöñ mutuhök nam körö uruñeyök neka nanñangöra möwölöhöba al niñgiyök aka könañgep kalem möriamñangöra aka noholök. Noholöhi, yañön mönö nöñgöra areñ kewö möri dop kölök:

¹⁶ Yañön Nahönñangö könañi nöñgöra indeli mötmangö möta Jisösgö Ölöwak Buñañi memba kian kantri tosatñe anda yeñgö sutñine jim asariba mal-mangö jiyök. Yañön mewö jiyöhanğöra aka nöñön wahöta könakönahineyök könahiba gölme ambazip yeñgö goro keuñinañgöra mönö qahöpmahöp jaruba qesim engiba mala koral.

¹⁷ Mewöñanök Jerusalem sitinöñ qahö öñgöba melaimelai azi aposol mutuk mala kotkeri, yeñgöreñ qahö anda asuhuyal. Mewö qahöpmö, mianğöreñök Arebia gölmenöñ anda mala kunbuk Damaskus sitinöñ liliñgöyal.

¹⁸ *Damaskus liliñgöbiga yambu (yara) karöbut teköiga “Pitö eka möt kutumam,” jiba Jerusalem sitinöñ öñgöba yambuk sömañi 15 mianğö dop malal.

* **1:13:** Apo 8.3; 22.4-5; 26.9-11 * **1:14:** Apo 22.3 * **1:15:** Apo 9.3-6; 22.6-10; 26.13-18 * **1:18:** Apo 9.26-30

¹⁹ Mianğöreñ malalmö, melaimelai azi aposol tosatñi i qahö engehal. Kembugö munñi Jeims iyök ehal.

²⁰ Mianğöra mötket, keu ohom engizali, mi keu ölni akza. Munenji kun qahö. Keu mi Anutugö jemesoholne jizal.

²¹ Jerusalem mosöta Siria aka Silisia gölmenöñ anda miri tosatñi liliköba malal.

²² Mewö anda malalmö, Judia prowinsgö urumelen könagesö kambuñi kambuñi Kraistpuk qekötahöba kinjei, yeñön qahö nekeranğöra nalö mianğöreñ ni qahö möt kutum niñgiba malget.

²³ Nöñgöreñ buzup keu kewöyöktöp yeñgö kezapñine geiga mötket, “Mutuk sesewerowero ak neñgiba malöhi, yeñön mönö letota malja. Mötnarip keu ayapkömapköra janğauranğa mem neñgiyöhi, yeñön nalö dölkewöñe nanñak keu miyöhök jim asarimakza.”

²⁴ Mewö möta nöñgöra aka Anutu möpöseim wañgiba malget. Mewö.

2

Aposol yeñön Pol örögetka sutñine kayök.

¹ *Mianğö andöñe yambu (yara) 14 teköiga mianğöreñ “Barnabasbuk Jerusalem sitinöñ kunbuk öngömam,” jiba Taitus mewöyök wañgitpiga mohotñe öngöin.

² Anutunöñ mutuk nöñgöra asuhuba anmamgö keu indelöhanğöra aka yetpuk anda Jerusalem anğota nupnanğö könani jim asarim engial. Nup pöndañ memba kota maljali, mianñön aposol yeñgöra qahö dop köliga nupnanğö ölnan eta qeiga pöröpköbapuk. Mewö mötmöröba kösohotni ambazip omani yeñgöra lan qahö jialmö, jitñememeurupnini göda qem engimakzini, iyök öröm engibiga tokoget. Tokogetka mianğöreñ Ölöwak Buña kian kantri sutñine liliköba jim sehimakzali, mi aukñe al engibiga mötket.

³ Yeñön mi möta “Ölöp!” jiget. Mewö jiba neñakni Taitus Grik azi yeñön nömbuk malökmö, töndup ketañamninan Anutugö aiwesökñi silenje yandimegö qahö jim kutum wañgiget. Juda neñgöreñ Köna keu mi qahö al köhöim wañgiget.

⁴ Juda ketañi yeñön qahöpmö, tosatñan silenji yandibingö möta sutñe sutñe kuñguba jigeri, böhi takapulakani miengö könani kewö: Yeñön “Urunini melenjin,” jiba mewö möndöba neñgö könani ek kutumegöra ölnöñ janjan kaba ala tandök sutñine kanğota malget. Nini Kraist Jisösbuk qekötahöinga malmal walñanğö kösönöhök pösat neñgiiga solanñi maljini, mianğö silikñi ek kutumegöra kinget. Yeñön neñgöra kewö möta köpösöngöget: Ölöp malgetka engömeinga nanine sel uruñe kagetka Mosesgö Köna keu bapñe al enjiinga nanine welenqegeurupnini akñe.

⁵ Mewö köpösöngöba metal neñgigetmö, neñön mönö Ölöwak Buñagö keu ölnan lolonqalon akapüköra kinjin. Mi engö sutñine kahaimök ahöm köhöimapköra kinjin. Mianğöra nalö kunöñ qahö löwöröba keunjanğö bapñe anbingö qahöpmahöp imbi köl wañgiin.

⁶ *Totokonöñ nöñgö Buña keuni jim asaribiga jitñememe yeñön “Ölöp!” jiba nöñön keu kun toroqeba jimamgö qahö jiget. Azi mi ipñina aketka göda qem engimakze. Qetbuñanini mewö me mewö akzawi, nöñön mianğö mötpi dop mohot akza. Anutunöñ ambazip tosatñi qahö neñgek soriba tosatñi qahö qepureim engimakza. Dop mohotnöñ kewöt neñgimakza.

* 2:1: Apo 11.30; 15.2 * 2:6: Dut 10.17

⁷ Buṅa keuni qahöpmahöp utekögetmö, Anutugö nup arenji miangöra mönö “Aha!” jiba kewö ek asariget: Anutunöṅ möt narim nengiba Ölöwak Buṅa jim asaribingö nupni mi kewö mendenök: Nöṅön mi kian kantri sutṅine jim sehibiga Pitönöṅ Buṅa keu miyök Juda könagesö yengöra jim asariba uruṅini kuṅgum engimakza.

⁸ Nupni mewö mendenḍa aposol Pitö inahöm waṅgiiga Juda azi silenji yandigeri, yengö sutṅine urukuṅgukuṅgu nup memakza aka ni mewöṅanök inahöm niṅgiiga melaimelai azia aka kian kantri sutṅine liliköba nup miyöhök memakzal.

⁹ Miangöra Jeims, Pitö aka Jon, azi ipni qetbuṅaṅinambuk yeṅön Kembunöṅ kalem möriam mewöṅi niṅgi malali, keu mi möt kutugetka urumohot ahin. Nup mewö mendenḍa miangö kaisöpsöṅṅa Barnabas niri böröniri qegetka kewö jim köhöinin, “Niri kian kantri yengöreṅ anda nup meziga nanṅini Juda könagesö yengö sutṅine toroqeba nup memakṅe.”

¹⁰ Mohot-kungöra qesim netkiba kewö toroqeba jiget, “Ambazip wanapni bauköm engibitköra mönö toroqeba mötmöriba malmahot.” Mewö jigetka mönö mewöyök ak engimangö kapaṅ köla maljal. Mewö.

Polnöṅ Pitö qetala jim waṅgiyök.

¹¹ Mewö jim köhöininmö, Pitönöṅ Antiokia sitinöṅ kaba möṅaqöṅai aiga ambazip uruṅinan gwötpuk böliyök. Miangöra Pitönöṅ kaiga ehali, nalö miangöreṅ mönö jeṅe kuṅguba kewögöra tuarenjoṅ ak waṅgial:

¹² Pitönöṅ mutuk kian kantri yembuk mala nene mohokṅe namba malgetmö, azi tosatṅan Jeims mosöta Jerusalemök kagetka miangö andöṅe ambazip mi engek siriköba tikeptikep kinök. Anutugö aiwesökṅi silenṅine yandiget yengöra kenḅötṅi möta zirinḅirin aka Juda kambu yembuk qekötahöba malök.

¹³ Mewö kian kantri ambazip mi ölan enguba koṅgwarak aiga Juda urumelen ambazip tosatṅan mewöyök Pitöbuk qekötahöba silesile silik aket. Silesile silik aka Barnabas mewöyök örögetka yembuk janḅuṅ ahök.

¹⁴ Mewö aka ahakmemeṅinan Buṅa keu ölni diṅḅinanök qahö wuatangögeri, nöṅön mi eka ambazip körek yengö jemesoholṅine kinda kewö jial, “Pitö, gi Juda aziapmö, töndup kian kantri yengö ahakmemeṅini wuatangöba maljan. Nangak Juda nanine ahakmeme qahö wuatangöba töndup kian kantri ambazip mi wuatangöba kinmegöra kuṅgum engiba urukönöp ahakzan? Mi qahö dop kölja.” Mewö.

Juda aka kian kantri neṅön Anutugö jeṅe öröröṅ akzin.

¹⁵ Juda asuhaba urunini melenṅini, neṅön mönö kian kantri ambazip siṅgisöndokṅinambuk qahö aka maljin.

¹⁶ *Mewö maljinmö, amötqeqegö könaṅi mi kewö ahöi möt yaközin: Jisös Kraist möt nariinga keunini jim teköi solanizin. Kuṅṅan Köna keu wuatangöba mewö mianḅön solanṅi qahö akṅa. Miangöra neṅön tok solanṅi akingö möta Kraist Jisös möt narim waṅgiinga keunini jim teköi solaniin. Mi Köna keu tem kölbinaḅangöra aka qahö.

¹⁷ Mewö Kraist qekötahöba Anutugö jeṅe solanibingö kapaṅ kölinga Anutunöṅ töndup miwikṅaim neṅgiiga naninak kantri tosatṅi tandök siṅgisöndokṅinambuk maljin ewö, Kraistnöṅ mönö siṅgisöndok akingö nam köl neṅgiza me qahö? Qahöpmahöp! Keu mi yapmakek!

¹⁸ Köna keu wuatangöba solanṅi akingö keuṅi lök köndenḍa qeapköyal. Qeapköyalmö, mi kunbuk esapköba jim kuṅgubilenḅak ewö, mönö Köna

* 2:16: Sum 143.2; Rom 3.20, 22

keu miyök qetala singisöndok azia aka könañamni kunbuk mewö mi-wikñaibilenbuk.

¹⁹ Mutuk könañamni mewö miwikñaiba Köna keugöra aka kömukömuñi tandök ewö ahal. Mewö akiga Köna keunöñ mönö qahö toroqeba galöm köñ niñgiiga solanñi maljal. Nöñön malmalni Anutugöreñ albiga Kraistpuk maripomnöñ nunguget ewö kömumba kinda yambuk köhöiba maljal.

²⁰ Miangöra nanak qahö toroqeba maljalmö, Kraistkö Uñañan mönö nöñgö urune köhöiba malja. Kraistnöñ uru jöpaköm niñgiba malmalñi nöñgöra köleñda sohopeni meyök. Miangöra toroqeba silebuk malmal malmami, mi mönö Anutugö Nahönñi möt narim wañgiba malmam.

²¹ Köna keu wuatangöba mewö mianön solanñi akinak ewö, Kraistnöñ mönö öne töhön kömumbawak. Kömuyöhi, mi möt nariba Anutugö kalem möriamñi mewö qahö qeapkömakzal. Mianön mönö nam köñ neñgiiga solan-imakzin. Mewö.

3

Köna keugörök kinme me Jisös möt narime?

¹ O Galesia kahapmahap ambazip, uruñini qahö! Nöñön Jisös Kraist maripomnöñ qegerangö könañi mi jeñine ala jim kondel enjialmö, kunñan nöñgö andöne kaba kahalalom mem enjiiga janjuñ akze. Mi qahö dop köñja.

² Yuai mohot-töp qesim enjibiga jiget mötmamgö mötzal: Enön Uña Töröñi mi mönö denöwö aka buña qem anjuget? I Köna keu wuatangögerangöra aka qahöpmö, Ölöwak Buña möta Jisös möt narigetka Uña mi uruñine ali buña qem anjuget. Nöñön keu mia ölum enjubaruköra kinda uruñini kunguzal.

³ Mia ölum enjuyök tandöktandök melenñda mötmötñini mosöta kahalalom akze. Mutuk Uña Töröñan uruñine geba inahöm enjiiga könañi könahiba angetmö, kunbuk Mosesgö Köna keugö könañe geba anakze. Nalö kewöñe nanñini ösum qakñe solanñi akingö esapkömakze me? Ösumñini mianön mönö qahö dop köñja.

⁴ Kraistköra aka sihimbölö gwötpuk ak enjigetka qakñine öñgöyöhi, mi mönö öne töhön möta bisiba malget me? Öñi qahö aiga mi mönö öñja öne töhön bisiget. Miangöra inñini mönö uruqahö ambaziwa malje.

⁵ Miangöra Anutunöñ Uña Töröñi enjiba sutñine anjöletot ösum-mumuñambuk memakzawi, mi enön Buña keuñi möta Jisös möt narimakzeangöra aka memakza. Köna keu wuatangömakzeangöra aka mi qahö memakza. Qahö. Keu mi kude ölum enjuma. Mewö.

Abrahamgö köna wuatangöinga dop köñma.

⁶ *Keu miangö dop Anutunöñ Abraham ak wañgiiga mi Buña keunöñ kewö ohoget ahöza, “Abrahamnöñ Anutu möt narim wañgiiga eka keuñi jim teköiga solaniyök.”

⁷ Miangöra Abrahamgö könañi mötmöriba kewö mötme: Denike yeñön Anutu möt narimakzei, yeñön mönö Abrahamgö undumuruñi aka malje.

⁸ *Anutunöñ qeljiñe areñi kewö alök, “Ambazip Juda qahö yeñön ni möt narim niñgigetka keuñini jim teköbi solanime.” Areñi mewö ala miangö dop Abrahamgöra Ölöwak Buña keu qeljiñe kewö jii mörök, “Göhöra aka nöñgö kötuetaan mönö gölmegö ambazip kambu pampak yeñgö qakñine öñgöma.” Tosatñan keu mi qeljiñe ek asariba Buña keunöñ ohoget.

* 3:6: Jen 15.6; Rom 4.3, 7; Rom 4.16 * 3:8: Jen 12.3

⁹ Abrahamnön Anutu möt narim wanjiiga kötuetköm wanjiiga mötnaripkö bömönjalönji ahök. Mianjö dop denike yejön Abrahamgö dop möt narizei, Anutunön i mewöyök kötuetköm enjiiga Abrahamgö undumurupnji akje.

Jisösnön salupnine qesuahöp buña qem angyök.

¹⁰ *Mewö aknemö, körek yejön Köna keu wuatängöba mianjö qakje nariba maljei, Anutunön mönö jörahöm enjiiga malme. Keu mi Buña keunön kewö ohoget ahöza, “Köna keu Kimbinön keu pakpak ohoget ahözawi, kunjan kun mi körek qahö tem köla wuatängömakzawi, Anutunön mönö i qesuahöm wanjiiga malma.”

¹¹ *Buña keu kun kewö ohoget ahöza, “Ambazip solanji kungö mötnaripjan mönö nam köl wanjiiga köhöiba malma.” Mianjöra kunjan Köna keu wuatängöba mianön solanji akjamgö mötzawi, yanön mönö Anutugö jeje qahö solanima. Qahö. Keu mi lök aukje kondel engibiga teköza.

¹² *Mötnaripnön Mosesgö Köna keu qahö nam kölja. Keu mianön jöjöpan keu pakpak tem köl teköbingöra urunini kunjumakza. Köna yahöt mi nanjök nanjök. Köna keugö könanji mi kewö jii ohoget ahöza, “Köna keu pakpak tem köla wuatängömakzawanön mönö köhöiba malma.”

¹³ *Köna keu qahö walönbinak, mewö malmal köhöikni miwiknaibinak. Mewömö, Anutunön nini nanji Köna keunangö dop qesuahömangö tököba Kraist melaiiga alabauknini aka sohpnini meyök. Buña Kimbinön keu kun kewö ohoget ahöza, “Ambazip ip kemañe möndöm engizei, Anutunön mi körek qesuahöm enjiiga malje.” Mianjö dop Kraist ipnön möndögetka nanini salupnini aiga Anutunön qesuahöm wanjiiga mewö mianön sohpnini meyök. Jöramörahöp neñgö qaknine öngöyöhi, mi qeköyök.

¹⁴ Bömönini Abrahamnön Anutu möt nariiga kötuetköm wanjiyöhi, mianjö dop kötümötuet mianön kian kantri pakpak dop köla yeñgö buñajina akjapkö mörök. Mewö möta körek neñgö sohpnini meyök. Sohpnini meiga Kraist möt nariinga köna kewö ahuma: Anutunön Uñanji neñgimangö keunji jöhöyöhi, nini urunini melenja Uña mi ölöp buña qem angubin. Mewö.

Köna keu aka oyaenjoyaen akingö jöhöjöhö keu

¹⁵ O urumelen alaurupni, nöñön gölmenön malmalgö söpsöp keunji kun kewö jimam: Kunön börosamotni tosatni yeñgö buñajina akjapkö keunji kambunön jiiga jöhögetka ahözawi, mi kunjan kun qeapköba könanjep keu kun qakje toroqemangö osima.

¹⁶ *Mötket, Anutunön jöhöjöhögö keunji mi Abraham aka yanjö gwölönarökni yetköra jiba jöhöi ahöza. Buña keu mianön “gwölönarökurupki” neñgöra gwötpuk tandök ewö qahö jizapmö, azi mohotkö tandököra kewö jiza, “Mi göhö gwölönaröki wanjimam.” Azi mohot mi Kraist.

¹⁷ *Keu mianjö könanangöra kewö jizal: Jöhöjöhögö keu mianjö ölnan mönö etmapkö osima. Anutunön mi mutuhök jiba jöhöba yambu (yara) 430 teköiga mianjöreñ Köna keunji miwiknaiba Moses wanjiyök. Köna keu mianön mönö jöhöjöhö keunji mutuk jiyöhi, mi qeapkömangö osima.

¹⁸ *Oyaenjoyaen akingö kötümötuetni mi Köna keu wuatängöba miwiknaibinak ewö, Anutugö jöhöjöhö keugöra qahö toroqeba osiinga öne töhön ahöbapuk. Buña keunji Abraham wanjiyöhi, mi öne töhön qahö ahöyökmö, Anutunön keunji mianjö dop Abraham kötuetköm wanjiiga oyaenjoyaen ahök.

* **3:10:** Dut 27.26 * **3:11:** Hab 2.4 * **3:12:** Lew 18.5 * **3:13:** Dut 21.23 * **3:16:** Jen 12.7
* **3:17:** Eks 12.40 * **3:18:** Rom 4.14

19 Abraham öne kötuetköm wanğiba Köna keu mi mönö denöwögöra ali ahöza? Mianğö könañi kewö: Ambazipnöñ köna onğita janjuñ aka malgeranğöra Anutunöñ Köna keu mi könañgep toroqeba jim miwikñaiyök. Jim miwikñaiiga Suep garata yeñön mi memba eta alabauk azi (namel man, mediator) Mosesgöra indela böröñe algetka Anutugö jitñe memba ambazip sutnine kinda jim kutuyök. Köna keu mianñön nalö dop ahöm öngöba galöm köl neñgimapköra aka qahöpmö, könañgep Köna keugö ösumñan etmapköra mi neñgiyök. Abrahamgö gwölönarök kungö jöhöjöhö keuñi neñgiiga azi mianñön asuhuyöhi, nalö mianğöreñ Köna keugö ösumñan eri teköyök.

20 Alabauk azi yanñön Anutu aka ambazip sutnine kinda keu nup memakza. Anutunöñ jöhöjöhö keuñi mi alabaukñi qahöpmö, mönö nanñak Abraham wanğiyök. Mianğöra oyaenköyaen akingö jöhöjöhö keuñi mi öngöngöñi aiga Köna keuñi mianñön nemböñi akza. Mewö.

Köna keugö nupñi ölni mi denöwö?

21 Mewö aiga Köna keu aka oyaenköyaen akingö jöhöjöhö keu mi auzahot me qahö? Saumbar! Anutunöñ mal köhöibingö Köna keuñi neñgibawak ewö, mönö ölna Köna keu wuatangöba Anutugö jeñe solanñi akinak. Mianğöra keu yahöt mi qahö auzahot.

22 Qahöpmö, keu yahöt mi nanñök nanñök. Anutunöñ jöhöjöhö keuñi mi mötnarip ambazip oyaenköyaen ak neñgimangöra aka ali ahöza. Jöhöjöhö keu mianñön Jisös Kraist möt narizini, mönö neñgöreñ ölnambuk akñapköra möta kewö arengöba jiyök, “Sinğisöndok ambazipnöñ urunini qahö melenme ewö, mönö öne töhön Anutugö jeñe qahö solanime.” Mianğö könañi mi Buña keunöñ kewö jii ahöza, “Sinğisöndoknöñ mönö gölme dop ambazip pakpak gwaröhöm neñgiiga maljin.”

23 Mutuk urunini qahö melenninga mötnaripninan qahö asuhuiga Köna keunöñ jöhöba galöm köl neñgiba gwarö uruñe misim neñgiyök. Könañgep Anutunöñ mötnaripkö könañi indeli asuhuyöhi, nalö mianğöreñ kösö gwarö malmalninan teköyök.

24 Mewö taringa Köna keunöñ mönö böhinina aka Kraistkö könañi mötpingöra kusum neñgimakza. Böhi leuam kusum engigeri, mianğö dop keu mianñön mönö neñguanğita solanñi akingö mindingöba galöm köl neñgimakza. Mewö aka Kraistkö könañi möt asariba möt narim wanğiinga keunini jim teköi solanibingöra kunğum neñgimakza. Urunini melenninga böhigö nupñan mönö nalö mianğöreñ teköza.

25 Urunini melenninga mötnaripninan asuhuiga Köna keu bapñe qahö malinga mianñön böhi ewö qahö toroqeba galöm köl neñgimakza. Mewö.

Anutugö nahönböratuñi aka maljin.

26 Körek eñön mönö Jisös möt narim wanğigetka ahuahü dölökñi enjiiga Anutugö nahönböratuñi aka Kraistpuk qekötahöba kinje.

27 Kraistpuk kinmegöra o melun mem engigeri, körek eñön mönö Kraist möt anğön köla mianñön maluku tuatñi ewö esuhum anğuba yambuk qekötahöba kinje.

28 Inini körek pakpak Kraist Jisösbuk qekötahöba kingetka mindirim enjiiga mohot aka malje. Mianğöra Juda aka kantri tosatñi eñön Anutugö jeñe kambu yahöt mi kunbuk qahö akze. Nanñini nupñini memakzei aka welenqeçe omañi akzei, Anutunöñ engehiga kambu yahöt qahö toroqeba akze. Azi ambi eñön Anutugö jeñe kambu yahöt qahö toroqeba akze.

29 *Inini Kraistkö buñaya akze ewö, mönö Abrahamgö gwölönarökñi yangörenök ahuba tinibaniurupñi malje. Mewö ahuba jöhöjöhö keuñangö ölni oyaenköyaen mi buña qem angumeangö dop akze. Mewö.

4

Nenön Kraistköra aka Anutugö nahönböratñi ahin.

¹ Keu mi toroqeba könañi kewö jimam: Nahönön iwiñangö börösamotñi buña qem angumawangö dop akzapmö, morö gwabö mala nalö miangören welenqeçe omani yembuk örörön tandök akza. Iwiñangö börösamot yuai pakpakö toni akñapmö, töndup welenqeçe yengö qöhöröjine alañina aka nup töwañi qahö memakza.

² Mewö morö mala galömnj yengö nembö bapñine kiniga yenön malmalñi pakpak arengöba galöm köla jim kutum wangimakze. Iwiñan nalö al wangii kam kuñgumawi, miangörenök könahiba nannak börösamot toni aka malma.

³ Nanini mewöñanök mutuk urugö likepñe morö gwabö ewö malin. Nalö miangören bem suahö galöm Suep gölme sutñire yuai pakpak galöm köl engimakzei, mienön mönö nini mewöyök galöm köl nenngigetka öne yengö welenñini qeba nemböñini bapñe malin.

⁴ Mewö malinmö, Anutugö nalöñan kam kuñguiga Nahönñi melaiiga ambigörenök asuhuyök. Juda nenngö Köna keu bapñe malmamgöra asuhuyök.

⁵ *Köna keu bapñeyök pösat nenngiba sohpnini memamgöra asuhuyök. Mewö Anutugö nahönböraturnjñi aka buñani möt angön köl teköba maljin.

⁶ Mewö Anutugö nahönböratñi akzeangöra aka Anutunön Nahönñangö Uñani melaiiga urunine geba kewö qerakza, “O Aba Iwini!”*

⁷ Mewö qerakzawangöra aka qahö toroqeba welenqeçe omani akzanmö, Anutugö nahönböratñi aka maljan. Mewö maljanangöra aka Anutunön oyaenköyaen Buñani gihiiga buña qem anguba galöm köla malman. Mewö.

Polnön Galesia yengöra waimanjat mörök.

⁸ Inini mutuk Anutu qahö möt kutuba malget. Nalö miangören tandö lopion aka bem suahö galöm bem ölnangö malmalñi qahö memba maljei, mi töwañini qahö welen qem engiba etqeçenji malget.

⁹ Mewö malgetmö, uruñini melenja nalö kewöñe Anutugö könañi möt kutuba malgetka Anutunön möt kutum enjiiga malje. Anutunön möt engizawi, keu mianön bohonñi ak engiza. Mewö maljemö, wuanöngöra dumñe kumbuk bem suahö galöm yuai pakpak galöm kölakzei, mönö yengören melenja mesohol köl engiba malje? Bem suahö galöm mi ösumñini eretñi akzemö, enön mönö töndup mi welen qem engiba etqeçenji akingö sihimñi mötze. Mi qahö dop kölja.

¹⁰ Mi welen qem engiba kendon tatat nalö könañi könañi mi mötket öngöiga törörök wuatangömakze. Sabat kendon tarakze. Köiñ dölökñi koriga bemñini mötmöriba köiñ dop söngaimakze. Yambu jeniqeçe sösongai aka sösongai tosatñi mi yambu (yara) dop törörök wuatangömakze.

¹¹ Nönön engöra aka kenngötni kewögöra mötzal: Nönön engö sutñine nup membiga ölni qahö ahuiga öne töhön sileqeçe akilenbuk.

Galesia yenön Pol andö qebingö aket.

¹² O urumelen alaurupni, nönön kewö kuñguba qesim engizal: Nönön inini ewö aka malalangöra enön mönö nönngö dop akñe. Yuai bölönji kun kude ak ningiget.

* 3:29: Rom 4.13 * 4:5: Rom 8.15-17 * 4:6: Aba mi Arameik keunön Iwi.

13 Nöñön mutuk engören kaba kawöl nöhöi sileni eri malali, könañi mewögöra tata Ölöwak Buña jim asaribiga mötket. Enjön mi möt kömuze.

14 Nöñön sile-eret malbiga andö nungubingö esapesapñi miwikñaiget, mi mötzalmö, töndup qahö jijiwilit aka qepureim ningiget. Mewö qahöpmö, ni neketka Anutugö garata ewö akiga nömeget. Opopon, nöngöra Kraist Jisös nanñangö tandök mötmöriba öröm ningiba “Owe owe!” jiget.

15 “Owe owe!” jiba silene pölpöl qeba je köñjini uzula ningibingö mötketmö, mi qahö dop köliga mosötket. Engö könañamñini möta mi ölna mewö nanğöba jizal. Yei! Nalö miangören jim sösöngai önöñi qahö akeri, mi mönö denöwögöra nalö kewöñe qahöwahi öne malje? Mi qahö dop kölja.

16 Engöra Buña keu ölni jimakzalanğöra mönö kerök ak ningize me?

17 Ambazip tosatñi mienjön engöra aka urukönöp ahakzemö, mi urukönöp ölöpnj qahö. Mi ölöpnj qahöpmö, yeñön inini nengörenök enguanğita sutnine jabö ala tököm ningimegöra mötze. Mewö menden nengigetka urukönöp qakñe nanñini nanğöm engimegöra kapan kölakze.

18 Inini ahakmeme ölöpnj akñegöra urukönöp ahakzei, mi mönö qetpuk. Nöñön engö sutnine malbiga nalö miangörenök qahöpmö, mönö nalö dop mewö aketka dop kölma.

19 O gömokurupni, ni ahuahu dölökñi ahumegöra masö tandök nunğuga sihimbölö mörali, miyöhök mönö dumñe kunbuk mötzal. Kraistkö ahakmemeñan engören ahum kutumapköra sihimbölö mi möta maljal.

20 Nöngö urunan mönö engöra aka lalalulu siksauk akza. Miangöra nöñön nalö kewöñe engö sutnine malmangö mötkurumkurum akzal. Embuk mala keu imbini memba eta ala keu ösöñ jimangö ak ningiza. Mewö.

Hagar aka Sara yetkö söpsöp keuñiri

21 Tosatñi enjön Juda nengö Köna keu Kimbi wuatangöbingö mötzemö, keu miangö könañi mi ölna möt kutuze me qahö? Könañi mi möt asarimegöra qesiba kunğum engizal.

22 *Buña keu kun kewö ohoget ahöza: Abrahamgö nahönyahötñi yahöt ahuyohot: Kun welenqeçe ambi etqeçeñan (sleiw) meyök aka kun mi nanñi sonğojariñ anömñi solanñi (fri) malmalñan meyök.

23 Welenqeçe ambinöñ nahönñi meyöhi, miangön morö ahuahugö könanöñ ahuyökmö, kun ambi solanñi (fri) malmalñan meyöhi, yanön Anutunöñ morö nahön ahumapkö keu jöhöyöhi, mönö keu miangö ölnan asuhumapköra ahuyök.

24 Keu miangö könañi mi tölapñi. Ambi yahöt mi Anutunöñ ambazip nembuk jöhöjöhö areñ yahöt alöhi, mönö mietkö söpsöpñira. Jöhöjöhö areñ kun mi Sainai (Sinai) kundunje alöhi, miangö söpsöpñi mi ambi qetñi Hagar. Ambazip jöhöjöhö areñ mi wuatangömakzei, yeñön mönö Köna keugö jimkutukutu bapñe malje aiga gwölönarökurupñinan keu miangö welenñi qemakñegöra ahumakze.

25 Hagar mi Sainai kundunji, Arebia gölmenöñ kinjawangö söpsöpñi akza. Sainai miangö alanji mi Juda gölmegö siti qetñi Jerusalem. Siti miangö könagesögö ketanji moröñi yeñön nalö kewöñe Köna keu bapñe malgetka jöhöm enğii solanñi (fri) qahö akze. Miangöra dopñiri mohok akzahot.

26 Solanñi (fri) qahö akzemö, Jerusalem siti kun euyangören maljei, yeñön mönö kösö gwarönjini qahö solanñi malje. Nengö namnini Sara yanön mönö siti miangö söpsöpñi akza.

27 *Miangö kezapqetok keuñi mi kewö ohoget ahöza,

* 4:22: Jen 16.15; 21.2 * 4:27: Ais 54.1

“Ambi azinöŋ ölan qeyöhi, yaŋön mönö nahönbörat engömiiga sehigetka mewö ambi aŋambuk mi luhut alma.

Miaŋgöra ambi köpin morö qahö menöŋi, gi mönö töndup söŋgaiba malman. Masö qahö guhui malnöŋi, gi mönö töndup qet gigilahöba morö ahumapköra köiraŋ ala malman.”

²⁸ O urumelen alaurupni, inini mönö Aisakö dowa Anutugö jöhöjöhö keuŋan nam köl enŋiiga ahuahu dölökŋi ahuba malje.

²⁹ *Nalö miaŋgören morö ahuahugö könanöŋ ahuyöhi, yaŋön munŋi Uŋa Töröŋan nam köl waŋgiiga ahuyöhi, mi sesewerowero ak waŋgiba malök. Nalö kewöŋe mewöŋanök sesewerowero mewöŋi mi ahöza.

³⁰ *Mewö ahözapmö, Buŋa keu kun mi toroqeba kewö jigetka ahöza, “Welenqeŋe ambigö nahönŋan mönö Iwiŋaŋgören börösamotŋi qahö mema. Ambi solanŋi malmalŋi yaŋgö nahönŋambuk mi mohotŋe qahö mendenŋa aŋgön kölmahot. Miaŋgöra welenqeŋe ambi etqeŋeŋi mi mönö közölnöŋga nahönŋambuk anmahot.”

³¹ O urumelen alaurupni, söpsöp keu mewöŋaŋgö dop neŋön mönö welenqeŋe ambigö undumurupŋi gwaröninambuk qahö akzinmö, ambi solanŋi malmalŋaŋgö undumurupŋi akzin. Miaŋgöra lolonqaloŋ ahakmeme mi közölme. Mewö.

5

Lolongöba Kraistpuk kinkin solanŋe kinme.

¹ Kraistnöŋ Köna keu bapŋeyök pösat neŋgiiga solanŋi maljin. Mewö mala tosatŋan inini kunbuk öröba Köna keugö mötöpnöŋ* jöhöm engibepuköra mönö galöm mem aŋguba malme. Welenqeŋe omani ewö akepuköra mönö köhöiba böŋ qeba kinme.

² Mötket! Pol nöŋön kewö jibi mötket: Tosatŋan Anutugö aiwesökŋi silenine yandimegö mötketka imbi kölme ewö, Kraistnöŋ mönö bauköm enŋimamgö osima.

³ Keu mi toroqeba kewö naŋgöba jimam: Azi pakpak silenine aiwesök yandimegö mötketka imbi kölmei, yeŋön mönö Köna keu pakpak tem köla wuatangöme. Mi qahö wuatangögetka qahö dop kölma.

⁴ Köna keu tem köla wuatangöba mewö miaŋön solanŋi akingö mötzei, enöŋ mönö Kraistkö selŋi qösököba yambuk qahö toroqeba kinje. Enöŋ mönö Anutugö kalem möriamŋi mosöta yaigep eta laŋ malje.

⁵ Laŋ maljemö, neŋön mönö Anutugö jeŋe diŋdiŋi akingö jörömqörömŋi aka awöweŋgömakzin. Mewö ahinga Uŋa Töröŋan inahöm neŋgiiga Anutu möt narim waŋgiinga keunini jim teköi solanibingöra mambörakzin.

⁶ Kraist Jisösbuk kininga urugö ölni mötnarip mi mohotŋan mönö bauköm neŋgimakza. Anutu möt nariinga inahöm neŋgiiga amqeba urukalem ak aŋguinga dop köljapmö, mötnarip ölni qahö mi qahö bauköm neŋgimakza. Mewöyök Anutugö aiwesökŋi silenine yandiget ahöza me qahö, mi mönö dop mohot akza. Silegö kun me kun mi Anutugö jeŋe qahö bauköm neŋgima.

⁷ Mutuk uru melenmelenö aŋgitnöŋ mönahot ewö ösumŋinan anget. Ölöpnök angetmö, böhi takapulakanŋi kunöŋ kaba siksauk mem enŋiba kambaŋe kutuiga keu ölni qahö toroqeba tem kölakze.

⁸ Kun daŋön engoholakzawi, yaŋön mönö kambaŋe kutumegöra qahö tutuuba kuŋgum enŋimakza. Mi qahö.

* **4:29:** Jen 21.9 * **4:30:** Jen 21.10 * **5:1:** Ip kambaŋi (yoke) mi bulmakau yahötkö jölnjire ala jöhögetka mindirim etkiiga miaŋön mohotŋe kare me gölmeqeŋegö kinöŋ örömakzahot. Miaŋgö dop Köna keu gwarönöŋ maljan ewö, nupŋi mönö töp meman.

9 *Yist boromdökñi kimbutnõñ ala plauabuk melenninga körek pakpak meiga qariba wahörakza. Miangö dop siksauk morõñan mönõ dop köl enjiiga körekmakörek janjuñ akepek.

10 Böhi takapulakani yanõn siksauk mem enjiiga janjuñ ahakzei, Anutunõñ mönõ yangö ahakmemeñangö likepñi melen wanjiga sihimbölõñi möta malma. Nõñõn Kembubuk kinda möt narim enjiba engöra kewö möta awösamakak akzal: Inini Kraistkö Buña keu törörök wuatangöba mötmöt murutñi pakpak yaköribingö möt köhöiba malme.

11 O urumelen alaurupni, inini mewö malmemö, nõñõn Kraist maripomnõñ kömuyõhangö kõnani jim sehibiga Juda yengö uruñinan miangöra bölimakza. Maripomgö keuñi mosötpileñak ewö, mönõ sesewerowero qahö ak niñgibeak. Anutugö aiwesök azi sileñine yandiyandimegö Buña keuñi toroqeba jiba uru kuñgum enjibileñak ewö, mönõ kahasililiñ qahö ak niñgibeak.

12 Tosatñan kuñgum enjiba siksauk memakzei, yanõn mönõ yandiyandigö keuñini wuatangöm teköba nanñini sile kitipñini körek yandim angugetka mötpi dop kölbawak.

13 O urumelen alaurupni, Anutunõñ inini kõna walñangö keunõhök lolohoba gwarõñini qahö malmegöra engoholökmö, kewögöra mönõ galöm mem anguba malme, “Mönõ lolohoba solanñi maljin,” mewö jiba möndöba uruñinan wahöri silegö sihim kömbõnanñini bölõñan mönõ galöm köl enjibapak. Nanñini imbi-imbi qahöpmö, mönõ urukalem qakñe kinda welen qem anguba malme.

14 *Kõna keu bohonñi mohot wuatangögetka Anutugöreñ keu pakpak mönõ mewöyök õlñinambuk akñe. Keu bohonñi mohok mi kewö, “Nangi jöpaköm angumakzani, miangö dop mönõ ambazip pakpak urugan jöpaköm enjimakñan.”

15 Mewö jizapmö, bau kiam ewö angöhöm söksök aka aumakze ewö, mönõ nanñini ayuhum angubepuköra töhöñini põndan möta malme. Mewö.

Uña Törõñan galöm köl enjiiga malme.

16 Nõñõn kewö jimam: Uña Törõñan mönõ ahakmemeñini galöm köliga malme. Mewö malgetka urusilegö sihim kömbõnanñini bölõñi qei eri kude tem köla wuatangömakñe.

17 *Miangö kõnani kewö: Urusilegö sihim kömbõnanñi bölõñan mönõ Uña Törõñi qetala lañ köpösöngöiga Uña Törõñan uru walñangö kukñi qemangö möriga sutñire jujul ahöi aumakzahot. Mewö aumakzahorangöra enõn yuai ölöpñi aka memingö möta mi osimakze.

18 Mi osimakzemö, Uña Törõñan enguangiriga anda malje ewö, mönõ Kõna keu bapñe qahö malje.

19 Urusilegö ahakmeme walñangö nup õlñi mi aukñe ahöi mötzin. Mi kewö: Kaisero nambõñnambõñ lañ aketka uruñinan tölöhoiga serowilin ahakze.

20 Tandö lopion waikñini memba bemñini möpõsem enjigetka uruñini sölölohöm enjii suña jinan ahakze. Kerök asuhui angururuk aka aumakze. Kungöreñ yuaigöra urunõñ mututqutut möta eröm ota yom jiba urusingok ahakze. Nanñinangörök mötmöriba yuai öröba girinjabak memakze. Julia menden anguba kambuñi kambuñi ala jijiwilit ak angumakze.

21 Tosatñi yengö yuaigöra eksihim möta körögisigisi aka közölömbuan pati ala bau numbu memba o köhöikñangöra enololon ahakze. Mi aka silik tosatñi mewõñi ahakzei, yengöra mutuk jial aka miangö dop galöm meme keu mi

qeljiŋe dumŋe kunbuk kewö jizal: Ambazip silik mewöŋi ahakzei, yeŋön mönö Anutugö bemtohoŋ uruŋe qahö öŋgöme.

²² Yeŋön qahöpmö, Uŋa Töröŋan nup memakzawaŋgö ölni mi urukalem, sösöŋgai, luai aka ahakmeme ölöŋŋi kewö: Lömböt pakpak möta mökösoŋda tosatŋi ala ak eŋgiba ahakmeme sakalakŋi ahakze. Keuŋi misila pöndaŋ wuatanaŋgömakze.

²³ Guŋböŋjönjöh qakŋe tosatŋi ak eŋgiba nanŋini törörök galöm köl aŋgumakze. Ambazip silik mewö ahakzei, yeŋön Köna keu qahö qetalakze.

²⁴ Ambazip Kraist Jisösgö buŋaya aka maljei, yeŋön uru sileninaŋgö sihim kömbönaŋini bölöŋi aka bölöŋaŋgö urukönöpŋini mi körek Jisösbuk maripomnöŋ algetka mem kömuyöhawa malje.

²⁵ Uŋa Töröŋan urunine geiga maljin ewö, ahakmemenini mönö mewöyök Uŋa mianjöh galöm köl neŋgii aka memba malbin.

²⁶ Mewö mala qetbuŋa omaŋi neŋgimegö kude kapaŋ köla öne töhöŋ kude aiweliköm aŋgumakŋe. Urubölö ak aŋgubepuköra mönö uruköŋgaŋ kude aka uruöŋgöp qakŋe kude ak aŋgumakŋe. Mewöyök körögisigisi kude ahakŋe. Mewö.

6

Lömbötŋini mönö bisiba bauköm aŋgumakŋe.

¹ O urumelen alaurupni, kunŋan köna oŋgita siŋgisöndok aiga miwikŋaize ewö, urumelen alaurup eŋön mönö mökököli qakŋe ala ewö mindiŋgöm waŋgigetka kunbuk köna miwikŋaima. Mewö aka nangak mewöyök esape-sapnöŋ et guhubapuköra mönö galöm mem aŋguba malman.

² Lömbötŋini mönö bauköm aŋguba bisimakŋe. Mewö mianjöh Kraistkö Köna keuŋi wuatanaŋgögetka ölnambuk ahakŋa.

³ Kunŋan eretŋi mala töndup nanŋaŋgö möri öŋgöŋgöŋi akzawi, yaŋön mönö nanŋi tilipköm aŋgumakza.

⁴ Mewö kude akŋemö, mohot mohot eŋön mönö nanŋini ahakmemenini kewöta esapkögetka dop kölma. Mewö aka alaŋini oŋgita qetbuŋaŋinambuk akzeanaŋgöra kude aiwelikömemö, mönö nanŋini könaŋinaŋgörök silenini möpöseigetka dop kölma.

⁵ Anutunöh lömbötŋini murutŋi murutŋi menden neŋgiiga nanjök nanjök bisimakzin. Mianjöra nanini tosatŋi yembuk likeplikep ala kewöt aŋgubingö osimakzin.

⁶ Böhi qaqaŋunöh kungöra Buŋa keu kusum waŋgimakzawi, yaŋön mönö mianjöh töwaŋi melenŋa yuaini ölöŋŋi pakpak mendenŋa bahöŋi waŋgimakŋa.

⁷ Nanŋini mönö kude tilipköm aŋgumakŋe. Kunöh nene warökŋi kömöriga ölni mianjöh dop ahui miwikŋaima. Keu mianjöh dop Anutunöh bölöŋamnini eka likepŋi mianjöh dop neŋgima. Mianjöra Anutu mi azi omaŋi ewö mepaqe-paik ak waŋgibingö osimakzin.

⁸ Urusilegö sihim kömbönaŋi bölöŋan kun nam köl waŋgiiga mianjöh warökŋi laŋ kömörakzawi, yaŋön mönö mianjöh köndenmöndenŋi miwikŋaiba bölimakŋa. Yaŋön bölimakŋapmö, Uŋa Töröŋan kun sölölohöm waŋgiiga mianjöh warökŋi kömörakzawi, yaŋön mönö ölni mianjöh dop miwikŋaiba malmal köhöikŋaŋgö buŋaya aka malma.

⁹ Nini jegep kinda nup ölöŋŋi ölöŋŋi memba mala mianjöhreŋ mönö löwöriba zölökzölök kude akŋe. Tanqan aka nup qahö mosötpin ewö, ölni meme nalöŋan kam kuŋguiga nupninaŋgö töwaŋi mönö miwikŋaibin.

¹⁰ Mianjöra gölmenöh malbinaŋgö dop neŋön mönö ambazip ölöŋŋi ak eŋgibingö jegep kinda malbin. Urumelen könagesö uruŋe maljei, i mutuk

alabauk ak engimakin aka yengö andöhine ambazip tosatji pakpak köna asuhuiga mem ölöwak engimakin.

Galöm meme aka yaizözkök keu teteköji

¹¹ Pol nöñön kirifi memba nani börönan kulem je ketanji ki engöra ohozali, mi ekje.

¹² Ambazip Anutugö aiwesökñi silenine yandimegöra kuñgum engimakzei, yeñön mönö körek sile megetka gölme ambazipnöñ yengöra mötket öngömapköra kapan kölakze. Kraistnöñ maripomnöñ kömuyöhi, keu miangöra sesewerowero ak engibepuköra mönö mewö kuñgum engimakze. Miangö könanji murutji kun qahö.

¹³ Anutugö aiwesökñinambuk mienön mönö nanñinak mewöyök Köna keu qahö wuatangöm teköba malje. Mewö qahöpmö, engö silenini yandimegö mötzeañön mönö engö sile kitipñinanangöra aka nanñini silenini mem öngöba qetbuñanambuk akingö mörakze.

¹⁴ Mewö mörakzemö, nöñön Kembunini Jisös Kraist maripomnöñ kömuyöhi, mönö Buña miangöra aka sileni möpöseimakzal. Qetbuña murutji kun qahö jarumakzal. Mi yapmakek! Kraistnöñ maripomnöñ kömuiga yambuk toroqebiga mötmöt areñnan uteköiga silik bölöñangö sisitji memakzal. Gölme ambazipnöñ silegö ahakmeme bölöñi membingö mötmöriba keu jimakzei, nöñön mönö miangöreñ göröken köhömuñi tandök akzal. Möpöseim niñgimei me silene keu almei, miangö likepñi mi qahö melenmam. Gölmenöñ keu kewöta tosatji mötket öngöi tosatji mötket eretji akzawi, mi mönö nöñgö mötmöt areñbuk dop mohot qahö akzahot.

¹⁵ Silenine aiwesök yandiget me qahöwi, mianön mönö dop mohot akza. Mianön gorosonji akzampö, ahuahu dölökñangö dömnji akzini, mianön mönö öl töhöñji akza.

¹⁶ Ambazip ahuahu dölökñangö jimkutukutu keu wuatangöba maljei, Anutunöñ Juda körek mi aka Anutugö urumelen könagesö pakpak inini mönö ak kömum engiiga luainöñ malme.

¹⁷ Keu teteköñi kewö jizal: Nöñön Jisös qegerangö löpötñi mi nani silene ahöiga bisimakzalanangöra kunöñ mönö urulömböt kude toroqem niñgima.

¹⁸ O urumelen alaurupni, Kembunini Jisös Kraistkö kalem möriamñan mönö embuk ahöba uñanji kötuetkömakña. Keu mi ölña.

Efesus Kimbi Polnön Efesus yengöra Kimbi alök. Jim-asa-asari keu

Polnön Rom sitigö kösö mire tata Efesus urumelen kambu yengöra Kimbi ki ohoyök. Efesus mi Eisia prowinsgö siti bohonji. Siti miangö uruñe kölköl-örörö gwötpuk ahömalget. Polnön misin nup memba liliköi indimñi karöbut ahiga Efesus kaba yambu karöbut miangören Buña keu jiba malök. Efesus sitinön Juda ambazip tosatñi miri tonji yengö sutñine malgerangöra Polnön kimbi ki ohoba kewö kusum engiyök, “Kraistnön lök kambu yahöt toroqeiga urumelen kambu mohok-kun akzahot.” (2.15-16),(3.6) Anutunön jitsihitñi aka kalem möriamñi urumelen kambu nengöra denöwö ali ahözawi, mi gwötpuk jim asariza. (3.10) Miangö dopkeu karöbut kewö jiyök:

1. Urumelen könagesö enön sile sep busu mohot aketka Kraistnön nanjak nöropñini akza. (1.23; 4.15-16)

2. Urumelen könagesö enön miri mohot tandök aketka Kraistnön engö tandönini kömbönañi akza. (2.21-22)

3. Urumelen könagesö enön ambi buña ewö aketka Kraistnön apñangö tandök akza. (5.25-27) Mewöyök Kraistnön Efesus engö kambu yahöt toroqem etkiiga miangöra sile sep busu mohot akze. Asakñangö ambazip ak-erangöra malmalñinañgö goro keunji keunji ohoyök. Mewö.

Buk kiangö bahöñi bohonji 4 mi kewö:

Keu mutukñi keu 1.1-2

Kraist aka urumelen könagesö 1.3-3.21

Kraistpuk malmal dölökñi 4.1-6.20

Kimbigö keu kötni bohonji 6.21-24

¹ * Anutunön Pol ni jitsihitñangö dop melaim niñgiiga Kraist Jisösgö aposol akzal. Mötnarip alaurup sarakñi Kraist Jisösbuk qekötahöba Efesus sitinön maljei, nöñon embuk keu eraum mötpingöra kimbi ki ohozal.

² Anutu Iwinini aka Kembu Jisös Kraist yetkön mönö kalem möriam engiyohotka luainön malme.

Kraistnön Anutugö kötumötuetñi neñgimakza.

³ Neñon Kembunini Jisös Kraistkö Iwi Anutuñi möpöseimakin. Yanñon nini Kraistpuk qekötahöinga uruninan ölöwakñapköra Suep mirigö kötumötuetñi aka kalemñi könañi könañi mi urunine alöha kayambu asuhui mala kotket.

⁴ Anutunön nini mutuk möpñangö möpñeyök kewö akingöra möwölöhöm neñgiyök: Kraistnön nam köl neñgiiga neñon yanñon buñañi sarakñi aka Anutugö jemesoholñe keunini qahö kinbin. Mewö möwölöhöm neñgiba miangö andöñe Suep gölme miwikñaiba al etkiyök. Nalö miangörenök könahiba ambazip jöpaköm neñgiba mala korök.

⁵ Jöpaköm neñgiba urusihimñangö dop qeljine keu jit areñi ala keunini kewö jim teköyök: Jisös Kraistnön nam köl neñgiiga Anutunön neñgömeiga nanñi nahönböraturupñi akin.

⁶ Wölböt Nahöñni neñgöra melaiiga eta Anutugö kalem möriamñangö kukösumñi buñabuñañambuk kölen da söngöröñi qahö öne neñgiyök. Nini mönö kalem möriamñi miangöra Anutu möpöseim wanñgimakin.

* 1:1: Apo 18.19-21; 19.1

7 *Anutugö kalem möriamñangö köweni mi keta bölökni. Miangö dop Jisösnöñ sepñi mokoba miangön sohopnini meyök. Mi meyöhangöra Anutunöñ ölop singisöndoknini mosöta sanjoñ neñgimakza.

8 Yañön kalem möriamñi mi köweneyök kelenmaleleñ mokoiga qaknine öngöyök. Mötkutukutuñi öngöngöñi pakpak miangö dop kewö möt asarim neñgiyök:

9 Anutunöñ mutuk nanñi uruñe keu areñ jöhöba möri ölöwahiga tölapñe ahöi öne mala kotketmö, Kraistnöñ Anutugö keu jitñangö dop wuatangöba eta neñgöreñ indeliga eka mörin.

10 Anutunöñ mutuhök kalem möriam areñangö könañi kewö mötmöriyök, “Anutu nöñön areñ mi wuatangöba mala malbiga nalöñi törörök kam kuñguiga miangöreñ öljambuk aiga kewö asuhuma: Körek Suep mirigö jakeni jakeni miangöreñ me gölmenöñ ahuba maljei, nöñön mönö mi pakpak mindiriba jöhöm enñimam aka Kraist kuñgum wañgibiga körek yeñgö bohönñini mohot aka malma.”

11 Anutunöñ mutuhök nanñi uruñangö dop keu jöhöi ahözawi, mönö areñ miangö dop kuñgukuñgu keuñi jüiga yuai pakpak asuhumakza. Nanñi areñi miangö dop qeljine Juda könagesö nini nanñi buñañi aka malbingöra jim teköba al neñgiyök. Miangö dop nini tosatñan Kraistpuk qekötahöinga meköm neñgiiga buñañi börösamot ewö angön köla memba maljin.

12 Juda könagesö neñön Kraistnöñ galöm köl neñgimapkö mamböta qeljine jörömqöröm ak wañgiba mala korini, yañön nini Anutugö kukösumñi buñabuñañambuk möpöseiba malbingöra aka möwölöhöm neñgiyök.

13 Kian kantri enñgöreñök tosatñan mewöyök Kraistpuk toroqeba qekötahöget. Amötqeqegö Ölöwak Buñañi jigetka keu ölni mi möta uruñini melenget. Uña Töröñi yañön Anutu buñañangö muñgem aiwesökñi akza. Uña mi melaii etmapkö keu jöhöyöhi, yañön mönö mi uruñine ali geyök. Kraist möt narim wañgigetka Anutunöñ aiwesökñi kömbönañi mi mekötahöm enñgiiga malje.

14 Anutunöñ könagesöurupñi Suep Buña neñgimangö keu jöhöyöhi, mi mbingö aiwesökñi Uña Töröñi mi mutuk al neñgiyök. Uña Töröñi uru-nine ali maljawangöra mönö kewö möt köhöizin: Anutunöñ lök sohopnini memba buñaurupñi ahinga bian gölmenöhök neñguanñiriga Suepnöñ öngöba oyaenköyaen akin. Miangöra mönö Anutugö kukösumñi buñabuñañambuk möpöseimakin. Mewö.

Polnöñ Anutu möpöseiba kewö köuluköyök:

15 Mewö oyaenköyaen akingöra aka nöñön Efesus engöra köulukömakzal. Enñön Kembu Jisös pöndañ möt nariba ambazip sarakñi pakpak uruñinan jöpaköm enñgimakzei, tosatñan miangö buzup keuñi jigetka möral.

16 Miangöra buzup keu mi mörali, nöñön mewöyök engöra aka Anutu möpöseiba mala qahö mosöral. Qahö. Nöñön köuluköba miangöreñ mötmörim enñgimakzal.

17 Mötmörim enñgiba Kembunini Jisös Kraistkö Anutuñi mi kewö köuluköm wañgimakzal, “O Iwi kukösum Tonji, gi mönö Uñagi Töröñi Efesus alaurup enñgiman. Uña mi uruñine alnönga mötkutukutuñini qainñi kun asuhuiga Anutugö könañi ölopñanök indeliga möt yaköme.

18 Anutu, gi mönö uru jeñini mem asarinöñga nangi Buñagahö könañi möt yaköme.” Anutunöñ nanñi ambazip sarakñi neñgöra Suep Buña kukösumñi buñabuñañambuk mi neñgimangö keu jöhöiga inñini yuai mi asuhumapkö al

* 1:7: Kol 1.14

mamböta jörömqöröm aknegöra engoholök. Jörömqöröm aketka Jisösnöñ kunbuk asuhuiga aködamunñinambuk akñei, inñini oyaenkyoayen miangö könañi möt sölöngömögöra köulukömakzal.

¹⁹ Möt narim wanjiinga Anutugö kukösum köhöikñan urunine sehiba nup memakzawi, mianñon mönö keta bölökñi teteköñi qahö akza. Inñini miangö könañi möt kutumegöra köulukömakzal. Ösum-mumuñi wewelipñambuk miangön silenini kutuba inahöm neñgimakzawi, Anutunöñ miangö kukñi kewö kondel neñgiyök:

²⁰* Anutunöñ kukösumñi nupnöñ ala Kraist mem gulim wanji kömupnöhök wahörök aka wanjiriga Suep mire öngöba selñi selñi liliköba jakeni jakeni engonjiriga Anutunöñ böröñi ölñe dum tatat mutukñe ali tatza.

²¹ Ali jakömbuak dumñe tata öroyuai pakpakö bohonina kinja. Bem suahö galöm aka yengö nemböñine jembon pom aka gawman kiap öngöngöñi eretñi kukösumñinambuk kembu ak neñgimakzei, Kraistnöñ mönö mi körek pakpak galöm köñ engimakza. Suep mire, gölmenöñ aka mietkö sutñire galöm qet pakpak qet engigetka bisizei, Kraistnöñ mi körek engongita öngöza. Gölmegö nalö kewöneyök qahöpmö, könañep nalö qainñi kun asuhuiga mal öngöbini, miangöreñ mewöyök öroyuai pakpak galöm köla mal öngöma.

²²** Anutunöñ uña, ömewöröme, ambazip aka öroyuai pakpak mi memba eta Kraistkö bapñe al neñgii malinga Kembunini öngöngöñi akza. Anutunöñ Kraist mi urumelen könagesö neñgiba bohonini kinmapköra kunjum wanjiiga malja.

²³ Yanñon kötal neñgiba bohonini aiga neñon yangö ölñangö köna börö su-urupñi akzin. Kraistnöñ nörowök aiga qahö dop kölbawakmö, neñon yangö törömunñi aka toroqeinga ölñan asuhum tinjiriga dop kölja. Kraistnöñ mewöñanök öroyuai pakpakö törömunñina kun aka toroqeiga körek pakpak mienñon mönö Anutugö aködamunñinambuk asuhuba dop köla anakze. Mewö.

2

Köhömuñeyök guliba Kraistpuk köhöiba maljin.

¹ *Mutuhök köna ongita sinjisöndokñi sinjisöndokñi akerangöra malmal köhömuñi mala kotket.

² Inñini nalö miangöreñ gölmegö ahakmeme bölöñi wuatangöget. Ömewöröme yengö Kembuninan nalö kewöñe Suep gölme sutñire mala qegetal ambazip urunini sölölohöba galöm köñ engimakzawi, mönö yangöreñ qekötahöba tem köñ wanjiba malget.

³ Neñon körek mewöñanök mutuk yengö sutñine silebile aka lañ malin. Uru silegö sihim kömbönañnini bölöñi wuatangöba nanine imbi-imbi malin. Mewö lañ malinga Anutunöñ neñgehi qahö dop köliga irimsesewölñi qaknine ali malin. Qegetal ambazip tosati yengö dowök Anutugö irimsesewölñangö buñaya aka malin.

⁴ Mewö malinmö, nalö kewöñe mewö qahö. Anutunöñ ak-kömukömuñi teteköñi qahö mianñon mönö jöpaköm neñgiyök.

⁵ Köna ongita Anutu qetala miangöra köhömuñi aka malinmö, Anutunöñ Kraist mem guliyöhi, nini mewöyök mönö mewöñanök mem gulim neñgiiga köhöiba maljin. Yangö kalem möriamñan mönö amöt qem enjiiga kunbuk letotket.

⁶ Kraistnöñ wahöröhi, nini mewöyök mönö mewöñanök neñgömindiiiga köhömuñeyök wahörin. Anutunöñ Kraist Jisös wanjiriga Suep mire öngöyöhi,

* 1:20: Sum 110.1 * 1:22: Sum 8.6 * 1:22: Kol 1.18 * 2:1: Kol 2.13

nini mewöyök mönö mewöñanök Suep malmalgö jake ahözei, mönö mianğoreñ al neñgiiga yambuk tosatñi galöm köl eñgiba maljin.

⁷ Anutunöñ kewögöra mewö al neñgiyök: Anutunöñ kalem möriamñangö köweni teteköñi qahö mianñon aukñe asuhui möt asaribingöra mörök. Möt asariba könangep nalöñi nalöñi qainñi kun asuhugetka teteköñi qahö mal öngöbini, nalö mianğoreñ mi neñgim qarimapköra mörök. Anutunöñ Kraist Jisös melaiiga kaba urukalemñi mewö kondel neñgiyök.

⁸ Anutu möt narim wangigetka kalem möriamñan mönö amöt qem eñgiiga kunbuk letotket. Nanñini nam köl anguba mewö mianñon qahö letotketmö, Anutunöñ mi kalemña ak eñgiyök.

⁹ Nanñinak yuai kun ak sorokögerangöra aka qahö letotket. Kunöñ kun nanñi silenji memba öngöbapüköra mönö kalem möriamñangörök aka mewö ak eñgiyök.

¹⁰ Nini Anutugö börösöwöya maljin. Kraist Jisösbuk qekötahöinga Anutunöñ uru dölökñi miwikñaiba al neñgiyök. Anutunöñ qeljiñe nup ölpñi ölpñi möwölöhöba mözözömgöyöhi, neñon mi memba malbingöra mewö miwikñaim neñgiiga maljin. Mewö.

Kraistpuk qekötahöba ölni mohot akzin.

¹¹ Mianğöra aka Efesus inini mutuk Juda ambazip qahö ahuba Anutugö könagesö qahö malgeri, mönö mi mötmöriba malme. Tosatñan engöra kewö jiba jim eñgimalget, “Nini Anutugö aiwesökñinambuk maljinmö, kantri tosatñi inini ambazip omani aiwesökñini qahö!” Qet mi azi börönöñ aiwesök silenine yandimakzei, mönö mi mötmöriba jimalget.

¹² Inini nalö mianğoreñ uruñini Kraistpuk qahö jöhöba öne yaigep malget. Kian kantri inini Juda könagesö neñgö kau likepurupnina malget. Anutunöñ ambazip nanñangöra möwölöhöm neñgii maljini, inini neñgö sutnine qetñini qahö malget. Anutunöñ Buñani alaurupñi eñgimangö jiba keu jöhöyöhi, inini mi qahöpmahöp möt kutuba tönpin malget. Oyaenköyaen akingö jörömqörömñini qahö. Anutunöñ qahö tandök gölmenöñ önewat lañ malget. Mönö mia mötmöriba malme.

¹³ Inini mutuk tikep malgetmö, Kraist Jisösbuk qekötahögetka sepñan sanğon eñgiiga nalö kewöñe amqeba Anutugö kösutñe kaba malje.

¹⁴ Kraistnöñ nanñak luai Tonini akza. Yanñon Juda könagesö aka kian kantri ambazip kambu yahöt nini mindirim neñgiiga kutulangömakzin. Sutnine kerök ahöba sel paset köhöikñi ewö menden neñgiyöhi, yanñon mönö sonjo mi tumbaköba luluniga urumelen könagesö mohot akzin.

¹⁵ *Jisösnöñ nanñi gölme silenjan kömuiga mewö mianñon Juda neñgöreñ Köna keu aka mianğö jöjopañ keuñi aka jimkutukutu tosatñi mi köndenñök. Sile kambu yahöt mindirim neñgiba könagesö dölökñi mohot akingöra mi köndenñök. Mianğöra uru dölökñi miwikñaiba al neñgiiga Kraistpuk qekötahöinga sutnine luai qei asuhum neñgiyök.

¹⁶ *Kraistnöñ kömumba keröknini maripomnöñ qem kömui erök. Silenji mohot mianğö sepñan mönö ambazip kambu yahöt neñguangiriga ölop lilingöba Anutugö kösutñe kabin. Mewö mindirim neñgiiga ölop böröqeçe akin. Mi ak teköba Kraistkö ölni mohot aka maljin.

¹⁷ *Kraistnöñ kaba luai asuhumapkö Buñani mi kian kantri ambazip Anutu andö qeba tikep malgeri, engöra jim asarim eñgiyök aka Juda ambazip Anutugö kösutñe malini, mönö neñgöra mohot jim asarim neñgiba malök.

18 Kraistnõj Juda aka kian kantri ambazip nini körek nam köl nenjiiga Uña Törõji mohotnje kona kondel nenjiiga ölop amqeba Iwigö jemesoholje angotpin.

19 Miangöra injini Juda ambazip qahöpmö, töndup kian ambazip qandakni mi qahö toroqeba malje. Anutugö miri gölme toni sarakni aketka nembuk mohotnje Anutugö urumelen kõnagesö akzin.

20 Kezapqetok ambazip yenõn mutuhök Anutugö keunõj tandö esim kungugetka Kraist Jisõsnõj nanjak kaba tandö kömbõnanjini aka aposol melaim nenjiba bohonini kiniga Anutugö urumelen jikeya akzin. Injini mewöyök tandö miangõren angota nangõnanjö ak anguba köhököhöi mi-wiknaimakze.

21 Yanõn mönõ miri mi jömuknanök mindirim jöhöiga kinakza. Nini Kembubuk qekõtahöba kinda kutulanjöinga mötnaripninan köhöim qariiga Anutugö urumelen jike kömbukni akzin. aka

22 Injini mewöyök Kembugõren qekõtahöba urumelen alaurup tosatni yembuk kutulanjöba mohotnje kinda urunini nangõm anguba köhököhöi mi-wiknaimakze. Mewö kinda Anutugö urumelen jike aketka Uña Törõji urunine ala mianõn nanjak jikenj mianjö urune malja. Mewö.

3

Polnõj kian kantri yenjören anda Buña nup meyök.

1 Kõnanj miangöra aka Pol nõjõn kian kantri ambazip injini baukõm engimangöra nup memba maljal. Mewö malbiga Kraist Jisösgö nupni mealangöra kösö mire al ninjigetka tata simin köla köulukõmakzal.

2 Anutunõj kalem möriamni kantri tosatni engöra menden enjiiga ölöwaknegö nup ninjiyöhi, injini mi õlña möt teköze.

3 Anutunõj keu arenj tõlapni indela jiiga möt yaközali, keu mianjö kõnanj lõk törõpnanök ohom engjal.

4 *Ohom engjali, injini kulem mi oyonnda ölop nõngö kõnani kewö möt asarime: Nõjõn Kraistkö kõnanj tõlapni mi ölopnanök möt kutuzal.

5 Möpnanjö möpneyök ambazipnõj kõnahiba mala kota malgeri, yenõn nalõ miangõren Buña tõlapni miangöra tõnpin malget. Mewö mala kotketmö, nalõ kewõne Uña Törõnan mi Anutugö aposol aka kezapqetok ambazip tõk-kutukutuñi nenjöra jim indeli mötzin.

6 Buña tõlapni mi kewö: Kraist Jisõsnõj Buña nenjimapkö jiba keu jöhöyöhi, injini mi Juda nembuk örörõj angõn köla memba malje. Ölöwak Buñanõj mianjö kõnanj mi kian kantri ambazip engöra mewöyök kondel engimakza. Injini urunini melenja ölop nembuk mohotnje kötümötuetnanjö Buñanji dop mohot memba malje. Urunini Anutubuk jöhöba mohotnje Kraistkö õlñi aka nembuk kambu mohot kinjin.

7 Yanjö kukõsumnan mönõ nõngö uruni sölölohöiga uruni melenbiga Anutunõj kalem möriamni söngörõni qahö ninjiyök. Mi ninjiiga kona asuhuiga Ölöwak Buñagö nup meme azia ahal.

8 Nõjõn Anutugö kõnagesö sarakni pakpak engö nembö bapñine eretni kötõkni maljal. Mewö maljalmö, Anutunõj töndup kalemni õngõngõni kewõni ninjiyök: Nõjõn Kraistkö oyaenkoyañ Buñanji mi kian kantri ambazip engöra jim asarimangö simbawon mötzal. Oyaenkoyañ mianjö kõnanj mi körek esiba möt kutum tekõbinanjö dop qahö.

* 3:4: Kol 1.26-27

⁹ Anutunöŋ möpŋangö möpŋe yuai pakpak miwikŋaiba Buŋaŋi tölapŋi közamböriga ambazipnöŋ mala kota malgetka nalö miangöreŋ tönpin malget. Miangöra nöŋön Anutugö Buŋa areŋ tölapŋi mi galöm köla malbiga öŋambuk ahakza. Nöŋön miangö könaŋi aukŋe jibiga ambazip körekŋan möt sölöŋömögöra simbawoŋ mötzal.

¹⁰ Anutunöŋ mötkutukutuŋi qainŋi kun könaŋi könaŋi indel neŋgiiga nalö kewöŋe urumelenŋ zioz kambu sutnine eraum möringa aukŋe ahum sehi-makza. Anutunöŋ urusihimŋan kewö mörakza: Bem suahö galöm aka pom garata öŋgöŋgöŋi eretŋi Suep gölme sutŋire öröyuai pakpak galöm kölakzei, yeŋön mewöyök Anutugö mötkutukutuŋi mi kezap ala mötmögöra mörakza.

¹¹ Yeŋön mi mötmögöra Anutunöŋ Buŋa areŋi mi möpŋangö möpŋeyök nalö qahöpŋe uruŋan jim köhöiba ali ahöyök. Miangö dop Kembunini Kraist Jisös melaiiga öŋŋi miwikŋaiiga könagesöuruŋi aka mindiriba kinjin.

¹² Kraistpuk qekötahöba kinda möt narim waŋgiinga Anutugö naŋuŋan mewö taliga ölöp yaŋgö jemesoholŋe aŋgotpingöra awösamakak kinjin.

¹³ Miangöra kewö ulet engizal: Nöŋön kösö mire tata eŋön ölöwakŋegöra aka köŋjiliŋ möta malakzali, miangöra uruŋinan mönö kude etma. Inini nöŋgö sihimbölöni miangöra aka ölöp aködamunŋinambuk akŋe. Mewö.

Polnöŋ Efesus yeŋgöra kewö köuluköyök:

¹⁴ Könaŋi miangöra nöŋön Iwinini simin köŋ waŋgiba köulukömakzal.

¹⁵ Yaŋönök mönö iwinini mutukŋi akza. Yaŋgö dop Suep aka gölmegö könagesö pakpak neŋön iwi qet memba qerakzin.

¹⁶ Kewö köulukömakzal, “Anutu, gi mönö Uŋagi Töröŋi al enŋinöŋga uruŋinan köhöimakŋa. Göhö Buŋagi kukösumŋi buŋabuŋaŋambuk mi teteköŋi qahö köwege ahözawi, gi mönö kukösumgi miangö dop mem köhöim enŋimakŋan.

¹⁷ Mem köhöim enŋinöŋga ölöp Kraist möt narim waŋgigetka uruŋine dumŋi memba malma. Mewö maliga kesötŋini Kraistkö urukalemnöŋ möndömgöba mendawölget geiga töndangöba kinme.

¹⁸ Urukalemŋan nam köŋ enŋiiga könagesö sarakŋi pakpak yembuk ölöp Kraistkö urukalemŋangö könaŋi möt kutume. Jöpaköm neŋgimakzawi, urukalem miangö dopŋi kewö: Göraŋi likeplikep teteköŋi qahö an bibihiza. Köröpŋi enduyaŋgö enduŋe angaiza. Köröpŋi euyaŋgö euŋe öŋgöza. Mewöyök dutŋe emuyaŋgö emuŋe geba ahöza.

¹⁹ Kraistkö urukalemŋan mönö gölmegö mötmötninaŋgö dopŋi öŋgita. Mi möt kömumegöra kewö köulukömakzal: Anutu, gi mönö aködamunŋi pakpakö dop mötmöt Buŋagan uruŋini kokolak qeba musulungöm enŋiman.”

²⁰ Anutu mewö köuluköba kewögöra möpöseimakzal: Nini mötmötnini öŋgita yuaigöra köuluköba qesibinak me jemelenŋ imut ala mötmöribinak ewö, yaŋön mönö yuai mi ölöp köhöiba neŋgima. Anutu kukösumŋan urunine nup memakzawi, yaŋön mönö miangö dop köuluk aka mötmöt dopnini öŋgit teköba amqeba yuai pakpak ölöp ak neŋgimakŋa. Miangöra möpöseim waŋgimakin.

²¹ Urumelenŋ könagesö neŋön tokoba Kraist Jisösgöra aka Anutugö qet-buŋaŋi möpöseininga aködamunŋambuk aka ahöma. Mi gwöt isik ahöm köhöiba teteköŋi qahö ahöba öŋgömei, nalö miangöreŋ mönö mewöŋanök aködamunŋambuk aka ahöma. Keu mi öŋŋa.

4

Kraistnöŋ mindirim neŋgiiga öŋŋi mohot akzin.

¹ Nöñön Kembubuk qekötahöba kinda nupñi mealangöra kösö miri azia akzal. Keu mi jim teköba uruñini keu kewö jiba kuñguzal: Anutunöñ ahak-meme aködamunñambuk aka memba malmegöra enghoholöhi, miangö dop inñini mönö malmal qainñi kun malme.

² *Mönö uruñini memba et ala keu bapñe anda guñböñjönjön qakñe ambazip ak engiba malme. Lömböt mököñda malme. Mönö lolongöba bölöñangö kitipñi kude mememö, qaqaengiba jöpaköm anguba malme.

³ Uña Töröñan uruñini qezaköba luaigö kösönöñ jöhöba mindirim enjimakzawi, inñini mönö uru jöhöjöhö mi sutñine ahömapköra kapan köla kinme.

⁴ Anutunöñ enghoholöhi, miangöreñ mönö öröröñ oyaenköyaen akingö jörömörömñini mohot miyök al engiiga al mamböta malje. Miangö dop inñini mewöñanök Kraistkö öl kemberñi mohot aketka Uña Töröñi mohotnöñ mönö inahöm engiiga malme.

⁵ Kembunini mohotnöñ galöm köñ engiiga öröröñ möt narim wangetka o melun mohot miyöhök mem engetka mohot aka malje.

⁶ Anutunini mohotnöñ körek iwi ak neñgimakza. Yanön yuai pakpak körek neñgongita Kambu öngöñgöñi ak neñgimakza. Mewö aka jitiñi tem kölbingöra körek kuñguba inahöm neñgiba urunini dop malmal tatat ak neñgimakza.

⁷ Miangö dop öröröñ Kraistkö öñi mohot maljinmö, Kraistnöñ kalem möriamñi mokoba sihimñangö dop neñgiyök. Nup memegö mötmöt kalem könañi könañi mi mohot mohot neñgöra dopnine mender neñgiiga maljin.

⁸ *Miangö keuñi mi kewö jigetka Buña Kimbinöñ ahöza, “Yanön euyangöreñ öngöba kinda kösö ambazip gwötpuk engömeiga buñaurupñi aketka kalemñi kalemñi mi ambazip neñgöra neñgiyök.”

⁹ “Euyangöreñ öngöyök,” Anutunöñ keu mi mönö denöwögöra jiyök? Miangö könañi kewö: Kraistnöñ mutuk Suepnöhök erök. Mönö gölme dutñe emuyangöreñ geyök.

¹⁰ Eröhi, yanön mönö mewöyök lilingöba eu öngöyök. Öngöba Suep mirigö jakeni pakpak enghongita qakñe euyangöreñ öngöba malja. Miangöreñ mala Suep gölmegö öröyuañiri pakpak mi ösumñan kokolak qeba jömuk dop köñ teköba malja.

¹¹ Kraistnöñ ambazip neñgöra mötmöt kalemñi könañi könañi kewö mender neñgiyök: Nupñi mender neñgiiga tosatñan melaimelai ambazip bohonñi (apostol) aket. Tosatñan kezapqetok ambazip (profet) aket. Tosatñan urukuñgukuñgu ambazip (ewanjelis) aket. Tosatñan lama galöm (pastor) aka kusum neñgineñgi böhi qaqazu aket.

¹² Kraistkö öñi mi urumeler ambazip. Neñön yengö uruñini nangöinga köhököhöi miwikñaibingöra nupñi mewö menderda kuñgum neñgiyök. Könagesö sarakñi neñön körek urugö nupñi membingö jöjöröm teköba malbingöra aka mewö inahöm neñgiyök.

¹³ Mewöña mewö nup murutñi murutñi memba mala Anutu möt nariba könañep Nahönñi möt yaköm soroköba miangöreñ qezaköm anguba mohot aka kinbin. Anutugö mötmötñi aka aködamun yuañi pakpak mi mönö körekñanök Kraistköreñ ahöza. Neñön Kraistkö köweñeyök mötmöt ösumñi öroinga musulungöm neñgiiga qarim sehiba köhöiba malinga aködamunñi köñ neñgi körek asuhui malbin.

¹⁴ Toroqeba namande tandök malbinbuköra Kraistnöñ urunini kuñguba nanñi ewö aködamuninambuk akingöra inahöm neñgimakza. Namande

* 4:2: Kol 3.12-13 * 4:8: Sum 68.18

tandök malinga qewölon ambazipnön aren i me wai ala möndöba tutuhum nenngigetka tala et nennguyöhi, injini mönö miangö dop aka lan malbepuk. Luhutnön lilikqilik qeiga köwetnön kunduriga sirinön gödöwöröt lan wangiriga an qem kam qem aka simbijsamban ahakza. Miangö dop gölme ambazipnön silenön alal aka unji memba tilipmötöt miwikñaiba ambazip lan kusum engigetka janjun ahakze.

15 Miangö dop lan kude malmemö, keu ölnanök töp jiba jöpaköm anquba malme. Mewö mala Kraistnön nöropnini akzawi, kesötjini mönö yangören möndömgöget geiga töndangöba yuai pakpak miangören qarim köhöiba aködamunjinambuk aka malme.

16 *Kraistnön nöropnini aka ölni jömuhök galöm köl nenngiiga ginimuramni köreknan mönö ölnangö köna böröni mindiriba jöhöm nenngigetka kutulangömakzin. Ösum mohot mohot ahöm nenngizawangö dop mönö nupnini memba kötöngöba jöpaköm anginga ölni miangön köhöiba qarimakza. Mewö.

Asakñangö ahakmeme dölökñi aka memba malme.

17 Mewö akzinangöra nöjön Kembangö jitje memba galöm meme keu kewö jibi möt yaköme: Urumelengö kopa ambazip uru mötmötjini sohoiga nesak ewö aka öne omani lan malakzei, injini yengö tandök bölöni kude toroqeba aka memba malme.

18 Urumelengö kopa ambazip yengö urumötmötjini sönauiga Anutubuk malmalgöra siksauk aka sohoze. Mötmöt bölönan urujini gwözönda duhuyöhangöra aka gukmaulem aka tönpin malje. Miangöra Anutugören malmal köhöikne qahö qekötahömakzemö, nanjinök lan töhön malje.

19 Galömjini qahö mem angugetka urujini gwözö teköiga gamu tanjen malje. Urujini kaiseröni jöhöba qewölon yuaigöra lan söngaiba tölöhömakze. Yuai membagan membingö nepaqepalok köpösöngömakze.

20 Yengön mewö ahakzemö, injini Kraistpuk malmalgö könanj mi mewö qahö kusum engiget mötket.

21 Injini keu ölnangö Tonj Jisösbuk qekötahögetka miangö dop könanj kusum engigetka ölni kewö möt yaköget:

22 *Mutuk ahakmemenini walni wuatangögetka sihim kömbönanjini bölönan isimkakalek ak engiiga ayuhum angingö aket. Köna kusum engiget mötkeri, miangö dop mönö urujini walni meteköm gila andö qeme.

23 Urumötmötjini mem guliget kölöñaiba malmegöra köna kusum engiget.

24 *Anutunön nini nanji kaisongolomñangö dop sarakni aka mal köhöibingöra miwikñaim nenngiyök. Uru dölökñangö malmal solanji wuatangöbingöra mönö al nenngiyök. Miangöra uru dölökñi miyöhök mönö bökölget geiga malme. Köna mi mönö mewö kusum engigetka möt yaköget.

25 *Köna mewö ahöiga nini Kraistkö ölni mohot miangö uru darumun ewö mindiriba ala-ala aka maljin. Miangöra munen mi mönö meteköm gilget geiga sutjine keu ölnanök pakpak eraum möta malme.

26 *Tembula kukpirinön akne ewö, mönö töndup singisöndok kude akne. Irimjini seholimawi, keunjini mi mönö zilan wehön jenan qahö teköba geiga jim tekögetka solanima.

27 Mewö Bölöñangö Tonjan sutjine kangotpapuköra qeapköba nalö kun kude wangiba zilan yakörime.

28 Kunñan yongorö meme malöhi, yanön mewö kunbuk kude akña. Mewö qahöpmö, mönö nanji börönan nup kapan köla memba malma. Nup memba

nanji nene inapji miwikñaiba ölop amqeba ambazip wanapji nanjöm enjimakña.

²⁹ Keu lösö kun jitñineyök kude etmapmö, keu ambazip uruñini nanjöba mem köhöimawi, mönö miyöhök jiba malme. Ambazip keuñini möta uruñini ahözawañgö dop qambañgöra osizei, mönö mianjö dop goro enjigetka keu nahömñi möta ölöwakeak.

³⁰ Anutunöñ buñaurupñi sohopnini meiga Suepnöñ öñgöbini, nalö mianjöra aiwesökñi kömbönañi mekötahöm enjiiga uruñine geba Anutugö muñgemñi akza. Mianjöra Anutugö muñgemñi Uña Töröñi mi mönö wösöbirik kude qem wanjime.

³¹ Inini mönö urukömbuk, urukondum aka urusingok pakpak mi qeköba gilget köröwen tatma. Urukönöpnöñ kude jula engohoiga uruñinan auba yom qeta jim angubepuk. Mewöyök andöqeçe keu töhöreñ mi kude jime. Angjöörak könañi könañi uruñini tölöhabapüköra mi mönö körek andö qegetka tikep ahöma.

³² *Tikep ahömapmö, ala-ala ak anguba mököliba gunböñjönjön qakñe ak anguba malme. Kraistpuk qekötahögetka Anutunöñ singisöndokñini mosöta sanjon enjiyöhi, inini mönö mianjö dop toroqeba köpösihitñini mosöt anguba malme. Mewö.

5

Anutugö asakñe malmal mi kewö:

¹ Anutugö wölböt nahönböraturupñi akzeañgöra silikñini mönö kapan köla Anutunöñ ahakzawañgö dop aka wuatañgöba malme.

² *Kraistnöñ jöpaköm neñgiba malmalñi neñgöra aka kölenä mosörök. Jöwöwöl ohogetka köwakñan öñgözapma, Anutunöñ mianjö dop Kraist malmalñangö kalemñi mi möt angön köli wöröññi umköhöwakñambuk ewö aka yañgö jeñe pukpüköiga söngaiyök. Inini mönö mewöyök urukalemnöñ kinda Kraistkö dop jöpaköm anguba aka memba malme.

³ Serowilin, qewölon angjöörakñambuk könañi könañi me yuai membagun membingö nepaqepalok (gridi) silikñi mi Anutugö jeñe qahö dop kölja. Mianjöra Anutugö ambazip sarakñi akzeañgö dop yuai mewöñangö keuñi kun mi sutñine kude misiriba jigetka mötme. Saumbañ!

⁴ Angögönahitnöñ lösö keu imbilonlonambuk aka uruqahö keu sinñi sinñi mi kude jime. Mianjön uruñini tölöhoiga qahö dop kölja. Mianjöra mi mönö mosöt teköba möpömpöse keu jim sehiba malme.

⁵ Keu kötni ki mönö möt kömume: Kunñan serowilin me qewölon angjöörakñambuk me membagun membingö nepaqepalok köpösöñgömakzawi, yañön mönö Anutugö bemtohoñi buña qem angumangö osima. Ahakmeme mianjön bem munenñi me tandö lopion möpöseim enjimakzeañgö tandökñi akza. Mewö akzawañön mönö Kraist aka Anutu yetkö bemtohoñ uruñe angotpingö osima.

⁶ Anutunöñ singisöndok mewöñangöra aka tembula irimsesewölñi qegetal ambazip yengö qakñine ali öñgömakza. Mianjöra kunñan keu omani mewöñi jiba kelök ala tutuhuba tilipköm enjibapuk.

⁷ Mianjöra ambazip mewöñi mönö andö enjuba yembuk köisirik kude malme.

⁸ Mutuk söñaupuk malgetmö, nalö kewöñe Kembubuk qekötahöba kinda yañgö asakñambuk malje. Ahakmemenñini mönö asakñangö buñaya akzeañgö dop aka memba malme.

* 4:32: Kol 3.13 * 5:2: Eks 29.18; Sum 40.6

⁹ Asakñangö buña akzeangö töhötmöriam ölni mi kewö: Inini ahakmeme ölöpnji wuatangögetka Anutunöñ keunini jim teköi solanime aka keu ö löhöññanök jiba malme.

¹⁰ Wani yuai Kembangö jeñe dop kölmawi, mianğö köñani mönö jaruba kewöta möt asarime.

¹¹ Söñaupkö ahakmeme gilipitñi (ambetakñi) aka memakzei, yembuk mönö köisirik kude toroqeba malme. Yeñğö bölöñamñini mi mönö indela asakñe ala jim eñgime.

¹² Tosatñan siñgisöndok tölapñe ahakzei, mi mönö aukñe jibingö gamuñambuk akapuk.

¹³ Anutugö asakñan siñgisöndokñini pakpak mem asariiga köñamñini öñan mönö aukñeyök asuhuma.

¹⁴ Asakñangö Tonjan mönö tölapñangö yuaiñi pakpak indeliga asakñe aukñeyök ahöma. Mianğöra keu kun kewö jigetka ahöza, “Gaun ahözani, gi mönö imbigi mötnöñ.

Mönö köhömuñeyök guliba wahötnöñga Kraistnöñ mem asarim gihima.”

¹⁵ Keu mianğö dop ahakmemenini mönö mötkutukutu qakñe aka memba malme. Morop aka tönpin malbepuköra mönö ölöpnñanök galöm mem añguba malme.

¹⁶ *Kewöñe nalö bölizawangöra aka urugö nup membingö köna kun ahumawi, nalö mi mönö kude mösöhöba ayuhumemö, ambazip qöhöröñine anda ösöñ qambañ köl eñgime.

¹⁷ Mianğöra uruqahö ewö lañ kude malmemö, Kembangö jitsihitñi mi ölöpnñanök möt asariba kinme.

¹⁸ Wain o köhöikñi nemba eñololon akepuk. Nanñini imbi-imbi malgetka mötmötniñi bölöñan asuhugetka söñaup malmalnöñ titeköba geba ayuhubepuk. Mianğöra eñololon akepukmö, Uñan Töröñan mönö uruñini kokolak qemapköra kapañ köla kinme.

¹⁹ *Mönö Buña keu eraum möta Sumbara (sam), möpömöpöse liñet (omsa) aka urugö liñet tosati mi urukönömñinan köla Kembu möpöseimakñe.

²⁰ Mewö me mewö asuhuiga mianğöra mönö Kembunini Jisös Kraistkö qetñi qeta Iwi Anutu sundan saiwap jim wangiba malme. Mewö.

Awanöm yeñğö goro qambañ keu

²¹ Kraistkö jitñi oñgitpepuköra kengötniñi möta mönö sutñine keu bapñe anan ak añguba malme.

²²⁻²³ *Kraistkö ölni mi urumelen köñagesö. Yanñon mianğö nööröpnji aka Amötqeqe Tonji akza. Mianğö dop azinöñ mewöyök anömñangö nööröpnji akza. Mianğöra ambi inini mönö Kembangö keu bapñe anangö dop nanñini apurupñini göda qem eñgiba keunini bapñe anda malme.

²⁴ Urumelen köñagesö neñon Kraistkö keu bapñe kinjini, mianğö dop ambi eñon mewöyök mönö apurupñinangö keu pakpak wuatangöba malme.

²⁵ *Kraistnöñ nanñi köñagesöñi jöpaköm neñgiba neñğöra aka malmalni tököba köleñnöhi, mianğö tandök azi eñon mönö mewöyök anömurupñini jöpaköba urukalem ak eñgiba malme.

²⁶ Kraistnöñ köñagesöñi Buña keuñan tök kutuba ambi buñañi sarakñi akingöra o ewö mianñon sañgonđa mösolonanim neñgiyök.

²⁷ Yanñon nini ölülu sorok akingöra möta uru sönuetnini mösolonaniba töwöt boromñi kun qahö akingöra kapañ kölakza. Köñagesö sarakñi köpösihitkö keunini qahö akingöra mörakza. Kraistnöñ kaba neñguanğiriga asakmararane

* 5:16: Kol 4.5 * 5:19: Kol 3.16-17 * 5:22-23: Kol 3.18; 1 Pitö 3.1 * 5:25: Kol 3.19; 1 Pitö 3.7

eu angoringa jihilalomnjan nennguiga ambi bunanji ewö nini nanji jemesoholne al nennguiga aködamuninambuk kinbin.

²⁸ Azi injini mewöyök mönö Kraistkö tandökni mewöni wuatangöba anömurupnini jöpaköm engiba malme. Anömni jöpakömakzawanön mönö nanji köyan köl anjumakza. Miangöra nanjini silenini köyan köl anjumakzeangö tandök mönö anömurupnini köyan köl engigetka dop kölma.

²⁹ Kunjan kun nanji silenini nalö kunöni kazik qahö ak wanngiyökmö, körek neñön silenini gumohoba köyan kölakzin. Kraistnöni mewöyök könagesöurupni nini silenini ewö keujan gumohoba köyan köl nenngimakza.

³⁰ Urumeleni könagesö neñön Kraistkö ölni akzin. Neñön Kraist ölnangö törömunni aka maljin. Miangöra gumohom nenngimakza.

³¹ *Buña keu kun kewö ahöza, “Miangöra azinöni mönö iwinamni etkömosöta anömambuk gekötahöba yahöt yetkön silemohot aka malmahot.”

³² Keu mi söpsöp keu tölapni. Mi Kraist aka urumeleni könagesö nenngö uru jöhöjöhöninangöra jiba ohozal. Keu areni miangö könanji mi tölapni aka dutni gegeni.

³³ Mewö akzapmö, engöra keu mi kewö jizal: Injini mohot mohotnan mönö mewöyök anömurupnini nanjini köyan köl anjumakzeangö dop jöpaköm engiba malme. Anöm enñön mönö mewöyök apurupnini göda qem engiba malme. Mewö.

6

Nahönbörat aka iwinam yenngö uru jöhöjöhö

¹ *Nahönbörat engöreni ahakmeme dinjini mi kewö: Injini mönö Kembubuk gekötahöba iwinamyahötini yetkö jitiniri tem köla wuatangöba malme.

² *Anutunöni jöjöpai keu 1-2-3 miengö teteköni töwa likepni nenngimangö qahö jii ahözapmö, jöjöpai keu janngö 4 mi törömunambuk. Mutuk kewö jiza, “Iwinamyahötiki mönö göda qem etkiba malman.” Keu mi tem kölinga Anutunöni töwa likepni nenngimangö keuni kewö jöhöi ohoget ahöza,

³ “Göda qem etkinöni Anutunöni töhötmöriam gihiiga toroqeba gölmenöni nalö köröni malman.”

⁴ Nahönböratuninani irimsesewöl akepuköra iwi enñön mönö urukanjam kude ak engiba malme. Mewö qahöpmö, Kembangö Köna keu tem kölmegöra kusum engiba mianngö dop mindingöm engigetka qarime. Mewö.

Welenqege aka galöm yenngö qamban keunini

⁵ *Welenqege injini mönö gölme qakne galömurupnini yenngö keunini Kraistkö keu ewö tem köla jörantauat kude ahakne. Keunini ongitpepuköra sömbunini möta jönömambuk undui malme. Urugenmon kude aka böni kinda aka memba malme.

⁶ Köndöwöni aketka ambazipnöni engek sorimegöra qahöpmö, urunini nupnöni ala memba Anutugö jitsihitni wuatangöba Kraistkö welenqege tandök ahakne.

⁷ Gölme ambazip welen qem engiba mewö mianñön Kembangö weleni gemakzin. Mewö möta nupnini mönö Kembangö jenge dop kölmawangö dop uruölöwukup memba malme.

⁸ Keu ki mönö mötme: Engö sutnini tosatan nup toni malje aka tosatan tonini töwa qahö öne welen qem engiba etqeqeni malje. Mi töndup denike yenñön nup ölöni mi me mi memakzei, Anutunöni mönö mianngö töwanji al engiiga buña qem anjume. Keu mia mönö mötmöriaba malme.

* **5:31:** Jen 2.24 * **6:1:** Kol 3.20 * **6:2:** Eks 20.12; Dut 5.16; Kol 3.21 * **6:5:** Kol 3.22-25

9 *Tourup aka welenqege engö Kembuñini mohot yañön Suep mire malja. Yañön ambazip tosatñi qahö engek soriba tosatñi qahö qepureim engimazapmö, dop mohotnöñ kewöta keunini jim teköm nengima. Galöm injini mi möt kutuzeañgöra mönö welenqege alaurupñini simin titit ölpñi dop mohot ak engiba öröm könöpkönöp memtöröp qemtöröp mosöta malme. Mewö.

Anutugö jurujamba jömuk memba malme.

10 Kimbini tekömamgö aiga keu kewö ohozal: Injini Kembubuk qekötahöba kingetka kukösumñi ketanjan mönö inahöba töngum engiiga köhöimakñe.

11 Bölöñangö Toñan silenöñ alalgö mötmöt areñ könañi könañi alakzawi, injini mi mesohol köla kin köhöimegöra mönö Anutugö wahijamba pakpak memba kölget gem anjum teköiga malme.

12 Nini gölme ambazip sep busuñinambuk yembuk bim qahö aumakzinmö, bem suahö galöm aka iwiluhut bölöñi bölöñi tuarenjoñ ak engibingöra kinjin. Bem suahö galöm bölöñi Suep gölme sutñire jakömbuak dumñine kinda kumbu ahakzei, mönö mi qetal engimakzin. Mewöyök pom böhi öngöngöñi eretñi sutnine panamangö öme tohongö azi ipñi mala öroyuai pakpak galöm kölakzei, neñön mönö yembuk yarö gilakzin.

13 Miangöra tuarenjoñ ak engibingöra mönö Anutugö jurujamba lökñanök memba kölget gem anjuiga kinme. Mewö kingetka kerökñinan nalö bölöñe engubingö gangömakñei, nalö miangöreñ mönö ölp amqeba yarö gila tötal engime aka yarö mi teköiga ölp miri gölmeñine kanjam köla kinme.

14 *Wahijambañini mönö kewö löngöt anjume: Keu öñanök jijigö irimunganñi mönö anjöne jöhöba kinme. Ahakmeme solan sorokñi mi töptöpñine göwanğöwan (kapa maluku) ewö köla sel jöhöm anğuba kinme.

15 *Köna esu böñtönök löngöta ölp töndangöba tiba anakzin. Miangö dop injini mönö luaigö Buñani jim sehibingö jöjörögetka mianön bohon köl engima.

16 Jurujamba miembuk toroqeba saiwa bohonñi qetñi mötnarip mi mönö buña qem anğuba sundan tengöba kinakñe. Bölöñangö Toñan neñgeriba qönsihim neñgimangöra möta timbi lingipñi mulahakzawi, miangö esapesap könöpñi pakpak mönö suman mianön qeapköba anğön köl anjumakñe.

17 *Anutugö Amötqege Toñi i mönö buña qem anjume. Buña qem anğuba kunbuk letotmei, dom-amöt mianön mönö nöropñini ain irikmarik ewö turuba anğön köl engimakña. Uña Töröñan bimgö sou ketanñi neñgizawi, mi Anutugöreñ Buña keu. Mi mewöyök mönö buña qem anğuba urukönömñine ala bimñini mianön qemakñe.

18 Wahöjambañini pakpak mi löngöt anğuba mönö nalö dop Anutu köuluköba qesiba malme. Uña Töröñan enguasöta inahöm engimazawangö dop mönö uletnöñ sahot wangimakñe. Mönö pöndañ uruguliguli mala sundan Anutugö ambazip sarakñi pakpak yengöra aka kapan köla köulukömakñe.

19 Nöngöra mewöyök kewö köulukömakñe, “Anutu, gi mönö keu kötñi diñdiñi Pol wanginönga göhö Ölöwak Buñagi tölapñi mi keu jitñan jimawangö dop jim asariba awösamkakahök kinda uru kuñgum engimakña.”

20 Nöñön Ölöwak Buña miangöra aka Anutugö jitñememe azi bohonñi akzalmö, nupñi memakzalañgöra aka nalö kewöñe kösö mire tatzal. Miangöra Buña keu mi Anutugö jeñe dop kölmawangö dop awösamkakahök jiba malmangöra mönö köuluköba malme. Mewö.

Yaizözkök keu teteköñi

* 6:9: Dut 10.17; Kol 3.25; 4.1 * 6:14: Ais 11.5; 59.17 * 6:15: Ais 52.7 * 6:17: Ais 59.17

²¹ Wölböt alani Tikikus yañon nõngö kösohotni alma. Yañon Kembubuk qekõtahöba nupñi memburik-qemburikñi qahö memakza. Kiangören denöwö aka memba tarakzali, mi pakpak jiiga iñini mewöyök mi mötme.

²² Neñon denöwö maljin tatzin, iñini kösohot mi mötmegöra Tikikus melaim wañgibiga Efesus engören kama. Yañon kaba urukölalep engiiga ölop böñjõñ malme.

²³ Iwi Anutu aka Kembu Jisös Kraist yetkõn mönö urumelen alaurup engören luai qeba urukalem ak engiba mötnariñini mem köhöimakña.

²⁴ Ambazip Kembunini Jisös Kraist nalö tetekõñi qahö jöpaköba malmei, Anutugö kalem möriamñan mönö körek embuk ahöba ahöm öngöma. Mewö.

Filipai Kimbi **Polnönj Filipai yeŋgöra Kimbi alök.** **Jim-asa-asari**

Polnönj misin nup liliköba meiga indimni yahöt aiga Eisia Mainö (Töki) mosöta Yuröp gölmenönj anök. Anda Rom prowins qetni Masedonia miangörenj urunini kungui melengetka Kraistkö könagesö mutukni mi Filipai sitinönj asuhuyök. Könanġep aposol Pol mi Rom sitigö kösö mire alget si-himbölö qakne tariga nup meme ambazip tosatġan tuarenjonj ak waŋgiget. Mi ak waŋgigetka tosatġan Filipai uruġe mewöġanök keu goŋgoġi kusum engigeranġöra waimanġat mörök. Nalö miangörenj Buġa Kimbiġi ki Filipai mötnarip könagesö yeŋgöra ohoyök. Waimanġat mörökmö, töndup urukölalep keu aka urunanġönanġö keu ki sösongai qakne ohoba alök.

Polnönj kösö mire tariga Filipai mötnarip könagesö yeŋön bauköm waŋgibingöra kalem alget kayöhi, yaŋön miangö saiwap jim engimangöra Kimbi ki ohoyök. Mi ohoba toroqeba urunanġönanġö keuġi gwötpuk mohotġe alök. Nanġak köġjiliġ könaġi könaġi möriġa Filipai yeŋön Polgö keuġi mi mötketka töndup köhöiba awösamkakak kinmegöra uru nanġöm engiyök. Goro keu tosatġi kewö: Nanġini silenini memba öġgöba aiweliköbepuköra mönö galöm memba malme. Dogo jimamonj möta toroqeba nepaqepalok köpösönġöbepukmö, Jisös ewö urunini mem et al anġuba malme. Keu ki ölum engubapuk: Kraistpuk qekötahöba kinġei, mi Anutugö kalemni akza. Juda yeŋön Mosesġörenj Köna keu arenġi tem köla wuatangöba Anutugöra silik yuai ahakzemö, urumelenj alaurup enġön mewö qahö. Enġön mönö Anutu möt narim waŋgigetka kalem möriamni söġgöronġi qahö engiġa buġa qem anġuba mewö mianġön malmal dölökni miwikġaiba malġe. Denike yeŋön Kraistpuk qekötahöba malġei, Anutunönj mönö i luai qem engiġa söġgaiba malme.

Kraist möt nariinga Anutunönj urusösönġai nenġiġa ölop awösamkakak qakne mal köhöibin aka urumelenj alaurup yembuk mohotġe kapan köla köhöiba kinbin. Polnönj miangö keuġi mi gwötpuk ohoyök. Polnönj Filipai könagesö yeŋgö waikġini köhöikġi membingö möta malöhi, miangö keuġi mi mewöyök aukne ohoyök.

Buk kianġö bahönġi bohonġi 7 mi kewö:

Keu mutukni 1.1-11

Polnönj denöwö aka malök 1.12-26

Kraistpuk malmalgö könaġi 1.27-2.18

Timoti Epafroditus yetkö nup arenġi 2.19-30

Tuarenjonj yeŋön tilipköm engigetka etpepuk 3.1-4.9

Polgö alaurup Filipai malġeri, yeŋgö keuġini 4.10-20

Kimbigö keu kötnġi bohonġi 4.21-23

¹ *Pol Timoti netkön Kraist Jisös welenġi qeba malġit.

Urumelenj könagesö sarakġi pakpak Kraist Jisösbuk qekötahöba kinda Filipai sitinönj malġei, niri embuk aka engö bohonġini (bisop, pasto) aka Buġa nup meme ambazip tosatġi (dikon) embuk keu eraum mötpingöra möta kimbi ki ohozal.

² Anutu Iwinini aka Kembu Jisös Kraist yetkön kalem möriam engiyohotka luainönj malmegöra mötzal.

Polnönj Anutu möpöseiba köuluköza.

* 1:1: Apo 16.12

³ Nöñön mötmörim engimakzalanğö dop Anutu möpöseimakzal.

⁴ Nalö dop körek pakpak engöra Anutu köulukömakzali, mi mönö sösöngai qakne köulukömakzal.

⁵ Nöñön Anutu kewögöra möpöseimakzal: Inini Ölöwak Buñanöñ qekötahögeri, nalö mutukni mianğoreñök könahiba nömbuk bim qeba kötöngöm niñgiba mala kota malje.

⁶ Anutunöñ uruñine nup ölöpnji könahiba memba maljawi, mi mönö toroqeba meiga Kraist Jisösnöñ kunbuk asuhumapkö nalöñe teköma. Mewö möt narim köhöiba Anutu möpöseimakzal.

⁷ O sepñini nembu, wölböt alaurupni akzeanğöra körek inini mewö mötmörim engibiga ölöpnjanök dop kölja. Anutunöñ nup niñgiiga kösö mire tarakzal me awörök nöñön Ölöwak Buñagöra bim qeba enjololöñ keu qeapköba keu ölnjan jalöñi memba köhöimapköra lilikömakzal. Mewö me mewö ahakzali, körek enön mönö nömbuk kingetka kalem möriam miyöknöñ dop köl enjiiga nupni nanğögetka mohotne simbawon akzin.

⁸ Kraist Jisösnöñ inini jöpaköba inahöm engimakzawi, nöñön mi möta mianğö qakne kinda körek engöra ak niñgiiga engekñamğö kapan köla maljal. Mewö jibiga keu ölnji jizali, mi Anutu nanñak ölöpn nanğöm niñgiba jima.

⁹ Nöñön engöra kewö köulukömakzal: Anutu, gi mönö Filipai alaurup inahöm enjinöñga toroqeba köhöiba jöpaköm anğuetka urukalemñinan qarim sehima. Mewö aiga ölöpn köna ölnji ek kutuba enjololöñ keu mosöta malme.

¹⁰ Mewö mala ölöpn keu kewöta köna ölöpn sorokni möwölöhöba sarakñi aka köpösihitkö keuñini qahö mal öngöme. Kraistnöñ lilingöba kamawi, nalö mianğoreñ lömbötninan teköma.

¹¹ Jisös Kraistnöñ ahakmeme solanñi nam köliga mianğö ölnji asuhumakña. Ölnji mianñon uruñini kokolak qeiga ambazipnöñ mewö engeka Anutu möpöseigetka qetbuñanan sehimapköra köulukömakzal. Keu mi ölnja.

Pol kösö mire algetka Buña keunöñ köhöiyök.

¹² O urumelen alaurupni, enön nöñgö könani möt kutumegöra kewö möta ohozal: Yuai bölöñi nöñgöreñ asuhuyöhi, mianğö buzupñan sehiiga Ölöwak Buñaninan ambazip dop köl enjiiga nupninan töhötmöriamñambuk akza.

¹³ *Ni Kraistköra aka kösönöñ gwaröhöm niñgigetka Rom kianğöreñ tatzali, keu mi yarö azi pakpak sisa-kingö jakömbuak miri galöm memakzei, yeñön mötze aka mewöyök ambazip tosatñi gwötpuk yeñgö kezapñine geiga möt teköze.

¹⁴ Toroqeba ölnji kewö asuhuyök: Urumelen alaurupninan kösö mire tatpi Kembunöñ bauköm niñgimakzawanğö keuñi mötket. Mi möta sehisehiñan Kembubuk qekötahöba kinda köhöiba kapan köla awösamkakak aket. Mewö aka Anutugöreñ keu kenğöñi qahö jim sehigetka toroqeba anakza.

¹⁵ Tosatñan nöñgöra mötket öñgöiga urusihim sarakne kinda Kraistkö könanji jim asarimakzemö, tosatñan nöñgöra aka uruñinan mututqutut möta andö nunğuba anğururuk akingö mötze.

¹⁶ Alaurupni ölnji yeñön nöñgö könani kewö mötze: Anutunöñ kuñgum niñgiiga awörök nöñön Ölöwak Buñagöra bim qeba enjololöñ keu qeapkömakzal. Mewö möta jöpaköm niñgiba nanğöm niñgimakze.

¹⁷ Andöqeqe ambazip yeñön nanñinanğörök mötmöriba töwagöra möndögetka uruñinan tölöhoiga Kraistkö könanji mewö jim asarimakze. Mewö aka kösö mire tatzali, nalö kewöñe anğösirip toroqeba ak niñgibingö mötze.

* 1:13: Apo 28.30

18 Mewö möt zemö, mi muat. Kraistkö könañi mi yuaigöra möndöba silebile aka me Anutu törörök tem köla jim asarigetka möt pi dop kölja. Mewö me mewö ahakzei, urunan mönö mianğöra ölöwahiga ölnja söngazala söngaimakñam.

19 Söngaibiga nöngöra köulukögetka Jisös Kraistkö Uña Töröñan nanğöm niñgiiga ölop pösat niñgigetka etmamgö tandök möt zal. Mewö asuhumapköra möta mianğöra mewöyök söngaimak zal.

20 Yuai kun aka gamu miwikñaibileñbuköra mönö jörömqöröm aka maljal. Gamu qahöpmö, nalö dop Kraist möpöseiba malali, mianğö dop nalö kewöñe mewöyök asuhumapköra möt zal. Silenan kömuma me malmawi, mi töndup mönö awösamakak pakpak qakñe Kraist möpöseibiga qetbuñan qarimakña.

21 Malmam ewö, malmalni mönö Kraistkö qetbuñan qarimaköra aka malmam. Nuñguget kömumbileñak ewö, mianğön mönö mem ölöwak niñgiiga oyaenköyaen akñam.

22 Mewö akileñakmö, gölmenöñ silebuk malmam ewö, mönö urugö nup membiba toroqeba ölnambuk ahakña. Mi mötmöröba nanğöra malmal me kömuwa möwölöhöbilenak, mi ölop qahö möt zal.

23 Malmal aka kömup sutñire panpanğöba maljal. Kraistpuk eu malbilenak, mianğön mönö yuai pakpak onğita möriam ketanji ak niñgibawak. Mianğöra gölme mosötmamgö sihimñi möta maljal.

24 Mewö maljalmö, silebuk qeköröba malmam ewö, mianğön mönö injini bauköm engibiga ölni engöreñ asuhuma. Kömumbilenak, mianğön mönö injini qahö bauköm engibawak.

25 Mewö möt narim köhöiba mianğöra nehorigetka toroqeba mala körek injini bauköm engiba malmamgö möt zal. Bauköm engibiga mötnariñinanğö ölnan mönö qarim köhöiiga ölop önöñi qahö söngaiba malme.

26 Mewöyök Kraistnöñ nehoiiga kunbuk engöreñ kabiga injini ölop nöngöra aka Kraist Jisös önöñi qahö möpöseim wanğiba malme. Mewö.

Mötnariñinan köhöimapköra bim qeba malme.

27 Ahakmemenini mi mönö Kraistkö Ölöwak Buñan aködamunñambuk akñawanğö dop aka memba malme. Mewö malgetka engöreñ kaba engekñami me qahö kaba sikep mala keu buzupñini möt pi könañini kewö ahöi dop kölma: Injini mindimindiri areñ mohotkö keu jöhöba urumohot aka kinme. Mewö kindi Ölöwak Buñagö keu ölnan sömböleibapaköra öröröñ jöhöba bim qeba malme.

28 Mewöyök tosatñan tuarenjoñ ak engimakñei, enğön mönö keu jitñini könañi könañi mianğöra kude töwöratigetka uruñinan kude etma. Könañamñini mewö möt pi dop kölma. Anutunöñ kukösum enğiiga tuarenjoñ ambazip yeñön könañamñini eka kewö möt asarime: Nanñini et enğuiga ayuhugetka Anutunöñ meköm neñgiiga oyaenköyaen aka malbin.

29 Anutunöñ areñi al engiyöhi, mi kewö: Injini Kraist möt narim wanğiba likepñi söngaiba likepñi yanğöra aka sihimbölö möta malme.

30* Nöñön mötnaripkö bim mutuk embuk mala qeali, neket aka nalö kewöñe toroqeba qemakzalanğö keu buzupñi ki mötzei, injini mönö bim miyöhök nömbuk tönguba qeba malje, mi möt zal. Mewö.

2

Kraistkö dop nanñini mem et al anğuba malme.

* 1:30: Apo 16.19-40

¹ Inini Kraistpuk qekötahöba kinjeangöra mönö uruñini nangöm angubingö gamban miwikñaime. Urukalemñini mianñon mönö urukölalep ak angumakñe. Uña Töröñambuk ösupköba kinda waikñini memba ak kömum angumakñe.

² Mewö akzeangöra mönö mötmöt mohot wuatangöba örörön jöpaköm anguba luainöñ malme. Urusihimñini mönö mötmöt areñ mohot akingöra jöhöme. Keu mewö jöhöba urumohot aketka ölni asuhui möta nöñon engöra önöñi qahö söñgaiba malmam.

³ Öroyuai nanninangörök öröbingö sihimñan mönö kude nam köl engima. Nannini qetbuñaninan qarimapköra mönö silenini kude memba öngömömö, uruñini memba et ala tosatñi yengöra mötketka öngömakña.

⁴ Inini mohot mohot mönö nannini uruñinanök ölöwakñapköra kude mötmörimemö, tosatñi yengö uruñinan ölöwakñapköra mewöyök kapan köla mötmörim yaköme.

⁵ Kraist Jisösnöñ gölmenöñ maliga imbi mötmöt ahöm wangiyöhi, miyöhök mönö engören ahöi mi wuatangöba malme.

⁶ Anutugö kaisongolom tandökñi ahöm wangii malökmö, töndup Anutugö dop malöhanğoren qahö möndöba aiweliköba malök.

⁷ Mewö qahöpmö, nannak amqeba Anutugö asakmararangi mosöta eta melenđa azi tandök asuhuba welenqeqegö kaisongolomñi memba malök.

Mönö gölme azi nanini tandök aka malök.

⁸ Mewö mala uruñi memba et al anguba Iwiñangö keu jitñi nalö dop tem köla malök. Mewö maliga gamu qem wangiba “Maripomnöñ qebin,” jigetmö, nalö miangören mewöyök tem köl teköyök.

⁹ Mewö tem köla malöhanğöra aka Anutunöñ wangiriga euyangören öngöba tariga qetbuña wangiyöhi, mianñon qet tosatñi pakpak engongita aködamunñambuk akza.

¹⁰ *Anutunöñ qetbuña öngöñgöñi mi kewögöra wangiyök: Ambazip körek pakpak neñon mönö qet miangöra aka nalö kunöñ simin köla möpöseim wangibin. Tosatñan Suep mire euyangören malje. Tosatñan gölmenöñ ki maljin. Tosatñan kömumba uñem mire me senjom mire malje. Neñon mönö körekmakörek mindiriba sipköba simin köl wangibin.

¹¹ Körek nini simin köl wangiba numbu nesilam dop Iwi Anutu aukñe göda qebingöra qetñi jim miwikñaiba kewö jibin, “Jisös Kraistnöñ mönö Kembu ak neñgiza.” Mewö.

Jisösgö asakñi mi ambazip sutñine kondela malme.

¹² Miangöra wölböt alaurupni, inini mönö Kraistkö söpsöpñi wuatangöba miangören kude sörauba etme. Nalö dop Anutugö keu tem köla letota malgeri, miangö dop silik urumelen ambazip engören dop köljawi, mi mönö kapan köla wuatangöba urugö nup memba malme. Nöñon embuk malali, nalö miangören Buña keu ölöpñanök köl guliba zen kinda malget. Engömosöta sikep maljalangören mönö mewöñanök Anutugö jeñe sömbuñinambuk möta jönömñini unduiga pöndañ nup mi mem soroköba malme.

¹³ Anutunöñ nannak mönö inini sundan sölölohöba nam köl engiba nannini areñangö dop uruñini kuñgumakza. Mewö urusihimñini Anutu dop köl wangimawangö dop ahuiga inahöm engiiga nupñi megetka ölni asuhumakña.

¹⁴ Galömurupñini yembuk keu mekömpötak kude aka malme. Jimongot aka urunöñ ihururuk lañ kude ahakñemö, areñini pakpak mönö uruyahöt ziaakpiak mosöta töp memba malme.

* 2:10: Ais 45.23

15 *Ahakmemenjanan mönö köpösihtkö keuñi qahö sarakñi aka memba malme. Ambazip gonxonji misimkaulup merak gölmenöñ maljei, injini mönö yengö sutñine Anutugö nahönbörat solan sorokñi malme. Senjelau suepnöñ eu asarizei, injini mönö mewöñanök gölmenöñ silik ölopñi aka mianjón ambazip asarim engiba malme.

16 Mewö mala malmal köhöikñangö Buña keuñi töp memba ambazip engibingö jöjöröba malme. Mewö malgetka Kraistnöñ lilingöba kamawi, nalö mianjören nongö könañamnan aukñe kewö asuhuma, “Mönahot azinöñ aonjitnöñ luhut almangöra ösumñi qezaköba anakzawi, nöñön mianjögö dop urugö nupköra sile qeba mem köhöiba malal. Mi öne töhöntöhön qahö memba malalmö, ölnji asuhuyök.” Könañamni mewö asuhuiga ölop nani sileni engöra aka möpöseimam.

17 Nöñön malmalni köleñda tököba engiba Anutugö nupñi tem köla memba malal. Mewö malbi injini uruñini melenñda Anutu möt narigetka mianjögö ölnji asuhumakza. Mianjögöra Rom gawman yeñön keuni jim teköba sömbup ewö nuñguba jöwöwöl ohoho ewö ak niñgibeak. Silenangö sepnji mewö mokobileñak ewö, mi mönö o ewö öne töhön qahö gebawak. Engö mötnarip nupñinangö ölnjängöra aka mi mönö aködamunñambuk ahiga dop kölbawak. Mianjögöra nuñguget kömumbileñakmö, urunan mönö töndup söñgaimakzal aka körek embuk mohotñe söñgaimakin.

18 Mewöñanök injini tok mönö söñgaime aka nömbuk köirañ ala söñgaiba malbin. Mewö.

Timoti melaibiga Filipai engören kama.

19 Kembu Jisösnöñ nongöra möri dop kölma ewö, mönö zilañ Timoti melaimangö möta jörömqöröm akzal. Engören kaba denöwö maljei, mi möta lilingöba kaba jii möta nongö imbinan mewöyök ölöwak soroköbawak.

20 Mötnaripñine köhöize me löwörizei, yanjón nannök engöra waimanjat mewö möta nongö qöhöröñne kinja. Tosatñan ki maljei, yeñön mönö “Nannjini manjatñina,” jiba qahöpmañöp kötöngöm engibingö mörakze.

21 Yeñön körek nannjinañgö yuaigöra möta mi köl öröba mem qaribingöra jaram timakzemö, Kraist Jisösgö nupñan ölnjambuk ahakñapköra qahö kapañ kölakze. Mönö qemasolokep lañ malje.

22 Lañ maljemö, Timotinöñ könañi ölopñi kondelöhi, mi nanninak möt yaköze. Nahönöñ nannji iwiñi welen qem wanjimakzawi, yanjón mönö mianjögö dop ni Ölöwak Buña nupkö bauköm niñgiba malök.

23 Mianjögöra Rom gawman yeñön nongö keu denöwö ak niñgibingö jöhömei, mi mötagun mönö ölop Timoti melaibiga zilañ engören kamapkö jörömqöröm akzal.

24 Nanak mewöñanök Kembubuk kinda nalö kude köriiga engören kamangö awösamakak mewö möt narizal.

Epafroditus melaibiga Filipai engören kama.

25 Nöñön yuai jaruba osiba malbiga eñön neñakni Epafroditus melaigetka kaba nanjögöba bauköm niñgiyök. Yanjón nongö qöhöröñne nup memba bim qeba malökmö, toroqeba jöhöm wanjibileñak, mianjón qahö dop kölbawak. Mewö mötmöriba urumelenñ alani i nalö kewöñeyök melaibiga engören lilingöba kama.

26 Yanjón körek injini engekñangö kapañ köla malja. Kawöl yöhöi ahöyöhi, injini keu mi mötket engören lömböriiga möta mianjögöra urueret malja.

27 Yanjón ölnja kawölbuk ahöba kömupkö jitñe ahöyökmö, Anutunöñ ak kömum wanjiiga ölöwahök. Anutunöñ Epafroditus iyök qahö ak kömum wanjiyökmö,

* 2:15: Dut 32.5

ni mewöyök nehoriba mem amqem ningiyök. Yanön kömumbawak ewö, nöngö wösöbiriknan mönö sehii qaknön qaknön öngöi malbilenjak.

²⁸ Inini Epafroditus eka kunbuk söngaigetka nöngö wösöbiriknan mewöyök amqemapköra mötzal. Miangöra nalö kewöneyök zilañ melaibiga engören kama.

²⁹ Inini Kembangö ambazipköra önöni qahö söngaimakzei, sösongai miangö qakne mönö yanön kaiga köl öröm wanqime aka nup meme ambazip mewöni mi mönö göda qem engiba malme.

³⁰ Yanön Kraistkö nupköra aka kömupkö jitneyök öngöba kömum taköyök. Inini ni nangöba bauköm ningibingö mötketmö, mi osigerangöra yanön engö salupñine mewö ak ningimangöra kaba malmalni mosöta ayuhum taköyök. Mewö.

3

Solanji akingö köna ölni mi kewö:

¹ O urumelen alaurupni, keu kötni kewö toroqeba jimam: Mönö Kembubuk qekötahöba söngaiba malme. Keu mi dumne kunbuk ohom engimangöra qahö ölan nöhöza. Ambazip tosatñan tilipköm engibepuköra mi ohom engibiga ölop dop kölja.

² Zioz nup meme ambazip bölöni yengöra mönö galömnini memba malme. Yenön urumelenkö kopa ambazip sutñine liliköba uruñini kunguba kewö jimakze, “Anutugö buñani aknegöra mönö aiwesökni silenine yandime.” Mewö kapan köla keuyök jiba kiam ewö kohop köla “Könagesö walñi akzin,” jiba öne töhön jimakze.

³ Yenön Anutugö jene qahö dingize. Silenine aiwesök miyök yandim engigetmö, ölnan mönö nenngören kewö asuhuyök: Anutugö Buña keujan urunini mesinöhi, nenön mönö yangö urumelen könagesö ölbölni aka maljin. Anutugö qetne silenine aiwesök al nenngigeri, nenön miangö qakne qahö kinda tönguba möt narimakzinmö, Kraist Jisösnön amöt qem nenngiyöhi, miangöra mönö silenini mem öngömakzin. Anutugö Uña Töröñan inahöm nenngiiga amqeba Anutugö waikni memba möpöseimakzin.

⁴ Tosatñan sileninanö yuainön tönguba Anutugö buñani akingö möt narizei, nöñön mönö i engongitzal. Miangöra ölopñanök korua ewö tererenöba gingini memba wahöta aiweliköbilenjak.

⁵ *Nöngö aködamuni kewö: Nöñön Israel ambazip kambu uruñe jitnememe kun akzal. Isik bömöni qetni Benjamin. Iwinamni Hibru ambaziwa. Nöñön yetkörenök ahuba Hibru azi ölni akzal. Asuhaba ahöbiga wehön 8 aiga miangören sileni yandiget. Farisi aka malalangöra Mosesgören Köna keu mi törörök wuatangömamgö kapan köla malal.

⁶ Farisi mala urunan uturungöba könöwiiga urumelen könagesö mi ölna sesewerowero ak engiba malal. Mosesgören Köna keu tem köla wuatangöba diñdiñi akinak ewö, nöñön mönö miangö dop köpösihitkö keunji qahö solanji malal.

⁷ Yuai mi mötpi öngöiga miangören tönguba möt nariba malalmö, uruni melenä mi pakpak mosöta zuen jizal. Nalö kewöne Kraistnön amöt qem ningii letorali, miangöra mönö mötpi öngömakza.

⁸ Kembuni Kraist Jisös möt kutuba oyaenköyaen akñami, mi möt kewötpiga bohonji öngöngöni ewö akza. Miangöra malmalni walñangö aködamun yuaini pakpak mi Kraist toroqeba miangören mosöta zuen jizal. Kraist miwikñaiba

* 3:5: Apo 23.6; 26.5; Rom 11.1, 6; Apo 8.3; 22.4; 26.9-11

nöngörej yuai pakpak mi mötpiga nesak irip töhön ewö aiga qepureiba andöne gilal.

⁹ Tosatjan “Mosesgörej Köna keu tem köl teköba mewö mianjön naninak diñdiji akin,” jizemö, nöñön dop mianjögörej solanji kunbuk qahö maljal. Nalö kewöje Kraist möt naribiga Anutunöj mewö mianjön keuni jim teköi solaniba maljal. Mötnarip qakje malbiga Anutunöj ak kömum niñgiba jim kutuiga siñgisöndoknañgö keujan kömuiga maljal. Kraistpuk qekötahöba kinda malbiga Anutunöj nöngö könañamni mewö miwikñaimapköra kapañ kölakzal.

¹⁰ Nöñön Kraist kewö möt kutumamgöra kapañ kölakzal: Sihimbölö möröhañgörej yambuk toroqemamgö jöjörözal. Sihimbölö möta kömuyöhi, nöñön tandök miyöhök kömumba mewö mianjön yanjögö tandök ewö akñamgö jöjörözal. Kömumba wahöröhi, yanjögö ösumni mianjön mönö tilimgöm niñgiiga köhöimamgö mötzal.

¹¹ Kömumbiga Anutunöj mem gulim niñgi kömupnöhök wahötmamgö jörömqöröm akzal. Mewö.

Mönö aonjgnöj kapañ köla tohotnöj anme.

¹² Nanañgöra kewö qahö jizal, “Anutunöj tohot alöhi, mianjögörej lök kañgota urumelenjögö aködamunji pakpak miwikñaiba maljal.” Mewö qahö aka maljalmö, Kraist Jisösnöj luhut ala nömeyöhañgöra mönö oyaenköyaenji buña qem añgumamgöra kapañ kölakzal.

¹³ O urumelenjögö alaurupni, Anutugö tohot mianjögörej qahö añgot teközali, mi mötzal. Mohot kewöya möta ahakzal: Yuai köteköba andö qeali, mi ölum nuñguiga Anutunöj yuai mesoholne ali ahözawi, mönö mianjögörej göröken ösumnan anmamgö awöwenjögömakzal.

¹⁴ Anutunöj euyanjögörej öñgömamgö nohola tohotji mewö al niñgiyök. Mianjögöra Kraist Jisösnöj amöt qem niñgiyöhañgöra nöñön esapesapnöj köhöiba luhut ala Anutugö tohotnöj añgotpiga yanjön ila jalö nööröpne köl niñgima. Mi memamgöra awöwenjögöba tohot mianjögörej göröken diñdijanök uraköba ösumni qezaköba kiñkingömakzal.

¹⁵ Mianjögöra urugö aködamuninambuk akzini, Anutunöj nini körek mötmöt mohotkö qakje Kraist möt kutuba malbingö mötza. Keu kungöra mötmöt imbi murutji kun ahöm enjibawak ewö, Anutunöj mönö keu mianjögöra denöwö mötketka dop köljawi, mi mewöyök jim indel enjgima.

¹⁶ Mewö qahöpmö, enjögörej waimanjat bohonji mi kewö aiga dop kölma: Nini nalö köröpji me töröpji urunini melenja Anutugö könanöj mala korini, mönö ahakmemegö köna mohot miyök toroqeba aninga dop kölma.

¹⁷ *O urumelenjögö alaurupni, nöñön ahakmemeni ahakzali, injini mönö ni neka nöngö silikni mi wuatanjögöba malme. Neñön silik ölöpji kondel enjiinga tosatjan mianjögö dop tiba öröm enjimakzei, injini mönö yenjögörej uba enjek kutuba malme.

¹⁸ Ambazip kelejmalelej yenjön ahakmemenjan Kraist kerök ak wañgiba nanjini imbi-imbi lañ malje. Maripomnöj kömuyöhi, mianjögö könañi tim koyonaniba malje. Keu mi nalö gwötpuk janjun akepuköra jibi mötketmö, nalö kewöje mi sahöta imbilni eriga jizal.

¹⁹ Silenjanjögö sihim kömbönañini bölöñan bemñini akza. Yuai gamuñambuk ahakzei, mianjögöra mötket öñgöiga aködamunjina aiga söngöröqök akze. Urumötmötnini gölmegö yuainöj jöhögetka gwaröhöm enjii lañ mala teteköje könöp sianöj geme.

* 3:17: 1 Kor 4.16; 11.1

²⁰ Yeñön emu gememö, tosatñi neñgö mindimindiri tohoñnini mi Suepnöñ eu ahöza. Gölmenöñ kiannji aka kusukñanök mala Kembu Jisös Kraist Amötqeqe Toninan kunbuk asuhuba neñguañgitmapköra mambörakzin.

²¹ Yañön neñgöreñ gölme silenini etqegeñi ki melenñiga nanñi Suep sile asakmararañambukö tandök akña. Kukösum mewöñi mi Kraist ahöm wañgiza. Yañön kukösum mewöñi mianñön ambazip aka gölme Suepkö öröyuai pakpak mi ölop köhöiba memba et al neñgiiga yañgö nembö bapñe aninga galöm köl neñgiiga malbin. Mewö.

4

Qambañ keu tosatñi

¹ O wölböt alaurupni, mewö asuhumapköra Kembunöñ mönö bauköm enñgiiga böñ qeba köhöiba kinme. Nöñön engöra ak niñgiiga engekñamgöra kapan kölakzal. Inñi sösöñgai ak niñgiget. Sutñine nup mealangö ölni asuhui kondelgetka Anutunöñ mianñgö töwa neñgimawi, mianñgöra mönö söñgöröqök aka söñgaimakzal.

² Jitñememe ambi yahöt Yuodia Sintike, etkön jula angururuk aka maljahot, mewö möral. Mianñgöra nöñön uruñiri kewö kuñguzal: Inñiri Kembubuk mohot kinjahot, mianñgöra mönö urumohot aka malmahot.

³ O neñakni ölni, nupkö köñjñi mohotñe bisiba maliri, gi mewöyök kewö qesim gihizal: Ambi yahöt mietkön urumohot akñahotköra mönö bauköm etkiman. Yetkön nömbuk Ölöwak Buña köhöiba sehimapköra bim qeba malohot. Yetkön Klemen aka neñakurupni tosatñi yeñgö qöhöröñine mohotñe bim qeba malohot. Tosatñi yeñgö qetñini mi malmal köhöikñangö buk papianöñ eu ahöza.

⁴ Nalö dop mönö Kembubuk kinda söñgaiba malme. Söñgaimel! keu mi dumñe kunbuk jizal.

⁵ Inñi mönö guñböñjñjñjñ qakñe ambazip ak enñgigetka körekñan tandökñini mi mötme. Kembunöñ lök kamamgö dopdowiza.

⁶ Yuai kungöra mönö köñjiliñ kude möta malmemö, yuai pakpak mianñgöreñ qeqesini mönö Anutugöra jigetka mötma. Mewö me mewö asuhumawi, mönö Anutu köuluköba uleta saiwap jiba malme.

⁷ Anutunöñ uruluai enñgizawi, nini mianñgö könañi möt kutubingö osimakzin. Mi mötkutukutunini pakpak onñgita qainñi kun akza. Kraist Jisösbuk kingetka Anutunöñ mönö uruñini aka keu mötmötñini sel jöhöba kölközizip mem enñgiiga malme.

⁸ O urumelen alaurupni, keuni jim tekömamgö aka qambañ keu kewö jizal: Anñgöjörak keu kude mötmörimemö, yuai pakpak göda qeinga aködamunñambuk akzawi, uruñini mönö mianñgöreñ jöhöba malme. Keu ölni, keu diñdiñi aka sarakñi mia mönö mötmöriba malme. Keu ehöhölöñi sihimninan mörakzini, mianñön mönö uruñini kokolak qeiga kinme. Keu ewebibiñambuk möpömöpösei ahumawañgö dop akzawi, uruñini mönö mianñgöreñ gekötahöba malme.

⁹ Nöñgö ahakmemeni eka Buña keuni möta uru könömñine ala buña qem anñguger, inñi mönö mi köl guliba aka memba malme. Mewö malgetka luai Tonji Anutu yañön embuk kinma. Mewö.

Polnöñ Filipai yeñgö kalemñinañgöra saiwap jiza.

¹⁰ Nöñön Kembubuk gekötahöba kinda engöra uruölöwak ketañi mötzal. Inñi mutuhök ni köyan köla moneñ niñgibingö sihim möta malgetmö, denöwö akingö köna jaruba osiget. Nalö köröpñi osiba malgetka Kembunöñ nalö kewöñe uruñini mem guliiga amqeba kunbuk bauköm niñgiget.

11 Silenangö lömbötnöŋ tata osibileŋak, miangöra keu ki qahö jizal. Nöŋöreŋ yuai ahözawi, nöŋön mönö miambuk uruluainöŋ bönjöŋ malmangö mötzal.

12 Ni jaram tiba luainöŋ malal aka malmal pomŋi siyoŋsayoŋi qahö mala luainöŋ malal. Miri dop nalö dop uruni bönjöŋ köli malmangö mötzal. Nem timbireŋ akileŋak me bödi (buörö) tatpileŋak, miangöra mönö uruni qahö memba et al aŋgumakzal. Yuaini kelenmaleleŋ me boromŋi ahöm niŋgibawak, mi muat. Mönö ölop bönjöŋ malmam.

13 I me wai kun asuhubawak, Kraistnöŋ mem köhöim niŋgiiga yuai kunŋan kun mönö qahö memba et al niŋgiiga ölop malmam.

14 Töndup köŋjiliŋni miangö uruŋeyök alabauk aka mem amqem niŋgigetka dop kölöc.

15 *Filipai iŋini mewöyök nöŋgö könani möt kömuze. Nöŋön könahiba liliköba Ölöwak Buŋa nup memba embuk Masedonia prowinsnöŋ mala engömosörali, nalö miangöreŋök könahiba mötnariŋ könagesö tosatŋan ni silegö yuaininan qahö naŋgöm niŋgiget. Nöŋön urugö Buŋa engibiga buŋa qem aŋgugetmö, silegö likepŋi kun qahö meleni niŋgiget. Filipai urumeleni könagesö iŋini mohotŋan mönö nömbuk jöhöjöhö aka malmalni naŋgögetka naluk moneniŋi buŋa qem aŋguba malal.

16 Nöŋön yuaigöra osiba malali, iŋini mi nöŋgöra algetka Tesalonaika sitinöŋ kayök. Indim mohot qahöpmö, indim yahöt silenangö yuaigöra osiali, mi algetka nöŋöreŋ kayök.

17 Engö inap kalemŋinanangöra köpösöŋgöbilenak, miangöra keu ki qahö ohozal. Anutunöŋ engö alabaukŋinanangö likepŋi meleni engimakŋawi, nöŋön mönö ölni mi engöreŋ sehimapköra mötzal.

18 *Enön nalö kewöŋe yuai algeri, mi buŋa qem aŋguba nöŋöreŋ yuai pakpak miangön mönö dopni oŋgita gwötpuk ahöm niŋgiza. Epafroditus yaŋön engö alabauk kalemŋini memba kaba niŋgiiga möriamnambuk aka maljal. Iŋini naluk kötinŋini algetka yaŋön memba kayöhi, Anutunöŋ miangö sihimŋi möri ölop dop kölja. Anutunöŋ engö nalukŋini möt aŋgön köli wöronŋi ölopŋi umköhöwakŋambuk aka yaŋgö jeŋe pukpuköiga söŋgaimakza.

19 Nöŋgö Anutunan töhötmöriam pakpakö Toŋi akza. Yaŋgö köweŋe yuai pakpak mi teteköŋi qahö ahöza. Miangöra iŋini Kraist Jisösbuk qekötahöba kinda yuaigöra osizei, mi pakpak mönö ahöm waŋgizawaŋgö dop engimakŋa.

20 Miangöra Anutu Iwinini mönö nalö dop möpöseimakin. Mewö ahinga Anutugö qetbuŋaŋan nalö teteköŋi qahö sehimakŋa. Keu mi ölna.

Yaizöczök teteköŋi

21 Nöŋön yaizöczökni alaurup sarakŋi Kraist Jisösbuk mohot kinjei, körek engöra albi kaza. Neŋakurup nömbuk ki maljei, yeŋön yaizöczökŋini algetka engöreŋ kaza.

22 Anutugöreŋ ambazip sarakŋi tosatŋi pakpak ki maljei, yeŋön yaizöczökŋini algetka engöreŋ kaza. Yeŋgöreŋök tosatŋan sisa kiŋgö jakömbuak mire nup memakzei, yeŋön mönö mewö möta kapani köla jize.

23 Kembu Jisös Kraistkö kalem möriamŋan mönö embuk ahöm öŋgöba uŋaŋini kötuatkömakŋa.

Kolosi Kimbi Polnön Kolosi yengöra Kimbi alök. Jim-asa-asari

Kolosi mi Eisia prowinsgö taon kun. Mi Efesus siti miangörenök wehön kotkotnje göröken ahöyök. Polnön Kolosi nalö kungen qahö anökmö, Eisiagö siti ketanji Efesus miangören yambu karöbut Buña nup memba Kolosi yengöra mewöñanök waimanjatnji möta malök. Könanjep Kolosi tosatjan urunini melenget (1.7; Apo 19.10). Polnön Rom sitigö kösö mire tariga nenaknji Epafras yanön Kolosi urumelen kambugö buzup keunji memba yangören kayök. (1.7-8) Kösohotnji tosatnji mi ölöpnji aketmö, Kolosi miangören böhi takapulakanji tok malget.

Böhi mienön ambazip kewö kusum sohom engimalget: “Urumelen könagesö enjön Anutu waiknji membingö köna keu könanji könanji mi ölöp wuatangöme. Enjön ölöp urunini memba et ala silenini qeba sihimbölö mötme.” (2.16, 20-21, 23) Toroqeba kewö jim kutum engiget, “Mötnarip enjön mönö simin köla garata waiknji memba malme.” (2.18) Jisös mewöyök mem et al wangiba kewö jiget, “I Anutugö Nahönji qahöpmö, garata bohönji kun.” Mewö jiba kewö toroqegget, “Nengö keunini wuatangömei, yanön mönö mötmöt tölapnji qainji kun miwikñajime.”

Miangöra Polnön Kimbi ki ohoba Kolosi urumelen kambu kewö kusum engiyök, “Yuai pakpak mönö Jisösgö bapne ahöiga yanön Anutu öl töhönnji aka (1.15-17) urumelen kambu nengö Bohonina malja.” (1.18) Toroqeba keu kewö kondel engiyök, “Kraist Jisös möt narigetka yanön Anutugö mötmöt aka mötkutukutu tölapnji ölöp kondel engima. Anutugö mötmötjni mi mötmöt tosatnji pakpak ongita qainji kun akza.” (2.2-3, 9-10) Polnön mewöyök urumelen ambazip malmalnjanängö jimkutukutu keu tosatnji ohoba al engiyök. (3.1-4.1)

Buk kiangö bahönji bohönji 4 mi kewö:

Keu mutuknji 1.1-8

Kraistkö malmalni aka nupnji 1.9-2.19

Kraistpuk malmal dölöknji 2.20-4.6

Kimbigö keu kötnji bohönji 4.7-18

¹ Anutunön Pol ni melaim ninggiiga jitñangö dop Kraist Jisösgö aposol akzal. Urumelen alanini Timoti yanön nömbuk tatza.

² O urumelen alaurupnini saraknji Kolosi taonön mala Kraistpuk qekötahögetka mötnaripñinan qahö sörauga zen kinjei, nöñön embuk keu eraum mötpingöra kimbi ki ohozal. Anutu Iwininan mönö kalem möriam engiiga luainön malme.

Engöra Anutu möpöseiba köulukömakzin.

³⁻⁴ Inini Kraist Jisös pöndan möt nariba ambazip saraknji pakpak uru könömñinan jöpaköm engimakzei, miangö keu buzupnji jiget mörin. Miangöra engöra köulukömakzini, miangören mönö nalö dop Anutu, Kembunini Jisös Kraistkö Iwinji möpöseimakzin.

⁵ Ölöwak Buñagö keu ölnan mutuk engören kaiga jigetka jörömqörömninanängö könanji lök möta möt asariget. Möt asariba Anutunön engöra yuai ali Suep mire kahaimök ahözawi, inini mi buña qem angubingö al mamböta jörömqöröm akze. Jörömqöröm miangön nam köl engiiga amqeba Anutu möt nariba uru jöpaköm anguba maljei, mönö miangöra möpöseim wangimakzin.

⁶ Ölöwak Buña keu mianjon sehiba gölmeni gölmeni dop köla ölnambuk aka qarimakza. Miangö dop engoren kaiga injini Anutugö kalem möriamnanngö könañi ölni möta möt asariget. Mi mutuhök möt asarigeri, wehön miangörenjök könahiba engö sutjine mewönanök ölnambuk aka kötuetköm engimakza.

⁷ *Wölböt neñaknini Epafras yanjon Kolosi engöra Ölöwak Buña mi kusum engiiga mötket. Epafras yanjon neñgö salupnine kinda Kraistkö nupni pöndañ kapan köla memakza.

⁸ Uña Töröñan sölölohöm engiiga jöpaköm anjumakzei, Epafrasnöñ engö könañamñini mewö eka nini jii mörin.

⁹ Miangöra buzup keu mi mörini, neñon mewöyök nalö miangörenjök könahiba engöra Anutu köuluköba mala kotzin. Enjon Anutugö jitsihitni möt yakögetka mötmöt mianjon urunini kokolak qemapköra ulet wanjimaksin. Mianjon kokolak qem engiiga Uña Töröñan mönö sölölohöba mötmöt engimakña. Mewö mianjon mönö ölop Anutugö sihimni pakpak diñdiñanök möt kutuba malme.

¹⁰ Engöra kewö köulukömakzin: Mötkutukutu mianjon nam köl engiiga mewö ölop malmalñini Kembugö jene dop kölmawanngö dop malme. Jitsihitni ahözawanngö dop ahakmemenini pakpak aka memba malme. Mewö ölop nup ölopni könañi könañi pöndañ megetka miangö ölni asuhumakña. Mötkutukutunini mewö köl guligetka ölop köhöimakña aka Anutugö könañi toroqeba möt yaköm soroköba malme.

¹¹ Anutugö kukösumni mi aködamunñambuk. Miangö dop nanñi ösummumuñi pakpak al engiiga engualönda mem köhöim engimakñapköra köulukömakzin. Anutunöñ mewö mem köhöim engiiga ölop köhöiba nalö dop kapan köla urubönjörnön kinda lömböt möta mökösonnda söngaiba malme.

¹² Söngaiba mala Iwigö saiwap jiba malmegöra köulukömakzal. Iwininan alaurupni sarakni nengöra buña yuaini arengöba ali asakmararanngö urune ahöza. Yanjon injini mewöyök letotqetot mem engiiga buñani mi buña qem anjumeanngö dop akze.

¹³ Pandamanöñ galöm köl neñgiyöhi, Iwinöñ miangörenjök meköba neñguanngita kaba wölböt Nahönnanngö bemtohon urune al neñgiyök.

¹⁴ *Nahönñi yanjon sohopenini memba siñgisöndoknini sanjonnda mosötmapkö mörakza. Miangöra mönö saiwap jim wanjimaksin. Keu mi ölna.

Kraistnöñ yuai pakpakö könañi aka bohonñi akza.

¹⁵ Kraistnöñ Anutu qahö ehekni yanngö imutni akza. Möpnanngö möpne malmal pakpak qahö asuhuiga Kraistnöñ mönö mutuhök Iwinambuk azi bohonña malök. Mewö Iwi Anutu bauköm wanngiiga öroyuai pakpak miwikñaim engiyotka ahuget.

¹⁶ Nahönñan Anutu bauköm wanngiiga öroyuai pakpak miwikñaim engiyohot. Yuai tosatni Suep mirigö jakeni jakeni miangören ahögetka qahö engehakzini aka yuai tosatni gölmenöñ ahögetka engehakzini, mi Kraistnöñ jiiga letotket. Yuai pakpak mi galöm köl engimegöra uña suahö galömni galömni miwikñaim engiiga Suep gölme sutjire jakömbuakñine kinda jimkutukutunini alakze. Yenngö nemböñine pom jembonñini öngöngöñi eretni mi al engiiga jakenine kukösumñinambuk kinda tosatni kembu ak engimakze. Nahönñan yuai pakpak asuhumapkö bömon jalöñi aiga Anutunöñ miwikñaim engiyöhi, mi mönö Kraist aködamun miwikñaim wanngimegöra al engii ahöze.

* 1:7: Kol 4.12; Flm 23 * 1:14: Ef 1.7

¹⁷ Kraistnōŋ mutuhök maligun öröyuai pakpak miangö andōŋe asuhuget. Yaŋön mönō yuai pakpak mindiriba nam köl enŋiiga kutulaŋgöba yaŋgören töndangöba kinje.

¹⁸*Kraistnōŋ bömön jalönini akza. Öröyuai pakpak neŋgö öröm neŋginenŋi bohonina aka malmapköra kömupnöhök wahörök. Kömugeri, yeŋgö sutŋineyök jitŋememenŋina aka guliba wahörök. Mewö mutukŋamnini aiga nini könagesö walŋaŋgö zioz dölök-kunŋi asuhuba kinjin. Miangöra urugö, silegö, yuai pakpakö nöröp bohonini aiga urumelen könagesö neŋön yaŋgö öl kambaŋi akzin.

¹⁹ Anutunōŋ Nahönŋi nanŋaŋgö dop köröndōŋ aka malmapkö möt teköi dop kölök. Miangöra nanŋi mötmötŋi aka aködamun yuaiŋi pakpak mi körek pakpak Kraistpuk qekötahöba kinjawaŋgöra körö-ölöwak möta malja.

²⁰*Öröyuai pakpak gölmenōŋ aka Suepnōŋ Anutubuk kazik ahakzei, Anutunōŋ mi pakpak töwaŋini ala enŋuaŋgiriga nanŋambuk qekötahöba urumohot akŋegöra möta kewö jim teköi dop kölök, “Mönö nani Nahöni melaiibi geba maripomnōŋ kömumba sepŋi mokoba luaigö nam köli asuhuma.”

²¹ Inŋini mewöyök mutuk ahakmemenŋini bölōŋi ahöyohaŋgöra aka uruŋinan Anutubuk urumohot qahö aka kerök möt waŋgiba tikep malget.

²² Mutuk mewö malgetmö, nalö kewōŋe Anutunōŋ nanŋambuk urumohot aka kinmegöra Nahönŋi melaiiga gölme silebuk kömumba köl könjörat mem enŋiyök. Mewö kingetka qewölonŋini saŋgonŋa mala enŋuaŋgita nanŋi jeŋe sarakŋi köpösihitkö keuŋini qahö al enŋii aŋgotmegöra al mamböta jörömqöröm ahakze.

²³ Jörömqöröm ahakzemö, mala anjanbanjan köla et enŋubapüköra mönō Kraist pōndaŋ möt nariba kinme. Anutunōŋ Ölöwak Buŋaŋan tandö kuŋguyöhi, inŋini miangö keuŋi mötket. Uruŋinan miangören nanŋgöba töndangöba kin köhöiba malme ewö, mönö oyaenŋkoyaen akŋe. Nini Ölöwak Buŋaŋi mi jim sehimakzin. Anutunōŋ ambazip miwikŋaim enŋiiga Suep bapŋe mal anjei, yeŋgö sutŋine mi liliköba jim asariba maljin. Pol nōŋön mewöyök Ölöwak Buŋagö nupŋi mi memba maljal. Mewö.

Polnōŋ zioz kambugö nup denöwö memba malök?

²⁴ Kraistkö ölni mi urumelen könagesö neŋön akzin. Kraistnōŋ neŋgöra aka köŋjiliŋ möriga kitipŋi ahöba urumelen könagesö qaknine öŋgömakzawi, mia Kraistkö ölni bauköm enŋimangöra aka silenana meköba möta malakzal. Mewö aiga enŋöra aka sihimbölö möta malali, miangöra nalö kewōŋe söŋgaimakzal.

²⁵ Anutunōŋ kuŋgum niŋgiiga urumelen könagesōŋi könagesōŋi welennŋini qeba nup memba maljal. Anutunōŋ kalem möriamŋi ambazip menden neŋgimangö areŋi alöhi, miangö dop Buŋa keuŋi körek jim sehim tekömamgöra jiyök. Enŋön ölöwaka köhöimegöra nup al niŋgiyök.

²⁶ Anutunōŋ Buŋa keu mi möpŋaŋgö möpŋeyök asamböriga ambazip julkösōŋ aka kömugetka gwölönarökŋi wahöta kömugetka mewö mewö aka mala kota tönpin malget. Malgetka nalōŋi nalōŋi tölapŋe ahöyökmö, nalö kewōŋe könagesōŋi könagesōŋi sarakŋi neŋgöra indel neŋgiiga mötzin.

²⁷ Anutunōŋ kalem möriamŋaŋgö areŋi kewö jiba ali ahöza, “Nōŋön keuni tölapŋi mi nani könagesöurupni enŋöra indelbi mötmegöra mötza. Yeŋön mi möt yaköba anda jim sehiŋetka Buŋani tölapŋaŋgö aködamunŋan mönö kian kantriŋi kantriŋi yeŋgö sutŋine qariba qetbuŋaŋambuk akŋa.” Keu köŋŋi tölapŋi mi kewö: Kraistnōŋ enŋö uruŋine malja ewö, mönö asakmararane aŋgotpingö jörömqörömŋi al enŋimakŋa.

* 1:18: Ef 1.22-23 * 1:20: Ef 2.16

28 Neñon Anutugö aren miangö dop Kraistkö könañi ambazip pakpak engöra jim asariba maljin. Yeñon körek Kraistpuk qekötahöba kin köhöiba aködamunñinambuk akrjegöra kusum engimakzin. Mewö enjuangiringa Anutugö jemesoholne angotmegöra mötzin. Miangöra mötkutukutunini pakpak qezaköba qambañ keuñi keuñi engimakzin.

29 Nöñon miangöra aum-mörimakzal. Kraistnöñ kukösumñañgö qakñe sölölohöba inahöm ningimakzawi, nöñon mönö miangö dop bim qeba malakzal. Mewö.

2

Polnöñ Kolosi yeñgöra waimañjat mörök.

1 Nöñon Kolosi engöra aka bim qeba maljal. Mewöyök Laodisia sitinöñ maljei aka urumelen alaurup tosatñan silenangö jemesoholni qahö nekeri, mönö körek yeñgöra köuluköba gwötpuk aum-mörimakzal. Nöñon inini miangö könañi mötmögöra mötzal.

2 Kewö köulukömakzal: Anutu, gi mönö uruñini nañgöm enjinöñga öröröñ jöhöba jöpaköm anguba mohotñe urugö aködamunñini pakpak miwikñaime. Mi miwikñaiba ölop köhöiba yuai pakpak möt kutum teköme. Mewö aka ölop Anutugö Buña tölapñi, Kraistkö könañi mi körek möt asarim teköme.

3 Anutunöñ mötmötñi aka mötkutukutuñi mi körek Kraistköreñ ala asamböriga ahöza. Anutu mötkutukutuñañgö köweñi mi guli dötnam ewö köwe tölapñe ahöiga Kraistnöñ miangö kiñi moröñi akza. Kraist tem köla mewö mianñon ölop mötkutukutuñi miwikñaibin.

4 Kunñan mondoqondoron ala kelök keu jiba uruñini kunñguba tilipköm engibapuköra Kraistköra keu mi jizal.

5 Silenan engö kösutñine qahö maljalmö, urumötmötñan mönö embuk kinja. Inini köhöiba Kraist möt nariba tem köla sutñine areninañgö dop böñjöñ maljei, engöra mewö möta mötmöriba söñgaimakzal. Mewö.

Gölmegö mötmötñan jöhöm engibapukö galöm meme keu

6 Miangöra inini Kraist Jisös möt angön kölgetka Kembuñini aka kinjawi, mönö yambuk qekötahömakzeañgö dop ahakmemeñini aka memba malme.

7 Keu kusum engigeri, miangö dop mönö kesötñini Kraistköreñ möndömgöba mendawöla yambuk qekötahöba kinda uruñini nañgöm anguba mötnaripkö köhököhöiñi toroqeba miwikñaiba malme. Saiwapñini mönö o saksaköba erakzawañgö dop jiba möpöseiba malme.

8 Ambösakon yeñon gölmegö mötkutukutu kusum engigetka köna walñi miwikñaiba tosatñan mi wuatangömakze. Mewöyök bem suahö galöm Suep gölme sutñire mala mietkö öröyuaiñiri pakpak galöm köl engimakzei, tosatñan Kraist ongita yeñgöreñ qekötahöba keu kusum engimakze. Mewö ahakzei, yeñgöreñök kunñan engömemba tilipqilip omanñi miangö kösöñan jöhöm enñiiga eta böhi miengö buñaya akepek.

9 Anutugö mötmötñi aka aködamun yuaiñi pakpak mi körekmakörek Kraistköreñ ahöiga gölme sile memba asuhuyök. Miangöra böhi takapulakani mewöñi yeñgöra mönö galömñini mem anguba malme.

10 Kraistnöñ uña suahö galöm aka pom jembon pakpak miengö nörop bohonñini akza. Kraistpuk qekötahögetka yañon Anutugö mötmötñi aka aködamun yuaiñi pakpak mi ölop dopñine enñiiga malje.

11 Mewö mala Kraistpuk qekötahögetka yañon aiwesökñi ölni mi engöreñ mewöyök yandim enñiiga malje. Aiwesök mi börönöñ silenine yandimakzeañgö dop qahöpmö, Kraistnöñ sile yandiyandi qainñi kun ak enñiyök.

Mi kewö: Yanjon silegö ahakmeme waljan galöm köl engibapuköra mönö sihim kömbönañini bölöñi jöhöiga malje.

¹² *Kraistkö qamötñi lömnöñ algeri, engö uru waljan mönö mewö tandöktandök kömumba o melun miangöreñ kömup lömnöñ geyök. Mewö geyökmö, Anutunöñ Kraist mem guliiga kömupnöñök wahöröhi, yanğö kukösumñan mönö inini mewöñanök inahöba o melun miangöreñ nam köl enğiiga guliget. Inini Anutugö kukösumñi mi möt anğön köla möt narim wanğigeranğöra aka Kraistkö qöhöröñe guliba köhöiba malje.

¹³ *Mutuk kunöñ engö sihim kömbönañini bölöñi mi qahö jöhöiga uru waljanan galöm köl enğiiga malget. Siñgisöndök akeranğöra aka uru köhömuñi malgetmö, Kraistpuk qekötahögetka Anutunöñ yanğö qöhöröñe mem gulim enğiyök. Siñgisöndoknini mönö körek sanğon teköiga köhöiba maljin.

¹⁴ *Bölönamnini aka miengö likepñanğö jimkutukutunji mi Suep mire löpöt kimbinöñ ohogetka ahöyök. Kraistnöñ löpöt mi körek pakpak kutuba qeapköyök. Löpöt miñon Anutubuk kinda andöñine qeba tuarenjoñ ak nengiba ahöyöhi, yanjon mi köteköba maripomnöñ kösököi teköyök.

¹⁵ Maripomnöñ kömumba bem suahö galöm aka uña pom Suep gölme sutñire öroyuai pakpak galöm kölakzei, Kraistnöñ miengö kukösumñini luak jaugem jitñi ewö qeapköba tölököba tözamgöm teköyök. Mewö kazikurupñi kösö gwarö memba gamu qem enğiyök. Mewö aka enğuanğita köirañ ala renduñ köliga qenjarökñe kagetka luhut al enğiyöhanğö könañi mi aukñe asuhuiga eket.

¹⁶ *Kraistnöñ luhut al enğiyöhi, miangöra inini mönö Kraistpuk kinda ewebibiñinambuk saitiñgit malme. Mewö malgetka engö sutñine kunñan wani oñi aka öñi ohoba nemakzei, miangöra öne dönqizizin ala jim kutum engibapuk. Yambu (yara) dop kendon kömbukñi kun aka köiñ dop köiñ dölöknji kotzawanğö söñgaipñi mi alakze me qahö, miangöra öne jim bölim engibepuk. Sabat kendon mi Sondagienöñ me silim kunöñ tarakzei, miangöra öne mesoholñine qeba jim engibepuköra mönö galömnini mem anğuba malme.

¹⁷ Sonğo mewöñi miengöra mönö kezap kude alme. Mi söpsöp yuaiyök akze. Öñan dopdowiba imutñi gilakzawi, miangö dop öñi mi Kraist. Nenegö me kendon tatatkö keunji mi Kraistkö söpsöpñi aka eretñi akza. Kraistnöñ lök kaiga mala öne köna söpsöpñi walñe qekötahöbepuk.

¹⁸ Tosatñi yenğö sihimñini mi nanñini urunini memba et ala Suep garata waikñini memba bem ewö möpöseim engibingöra ahöza. Mewöyök jeñini melenñi imutimutñini eka miengöra söñgöröqök ahakze. Mewö nanñine gölmegö mötmötñan kuñgum enğiiga silenini öne töhön memba öngöba tiwok-mawok ahakze. Yenğoreñök kunñan tilipköm engiba Kraistköreñök utum engibapuk. Mewö mötnaripkö aonğitnöñ luhut qahö ala töwanñini qahö mem-bepuk. Miangöra mönö galömnini mem anğuba malme.

¹⁹ *Yenjon Kraist nöroñpini akzawi, yambuk qekötahöba kinkinñini mosöta lan malje. Kraistnöñ nöroñpini aka nanñi öñi körek nini galöm köl nengiiga ölop mösölatim anğuba maljin. Sihit toroqeqeñi aka ginimuramñi miñon mönö öñanğö köna böröurupñi mindiriba jöhöm nengigetka kutulanğöba mohot akzin. Mewö aka Anutunöñ nam köl nengimakzawanğö dop qarim köhöimakzin.

Kraistpuk kingetka gölmegö mötmötñan galöm ak engibapuk.

²⁰ Inini Kraistköreñ qekötahögetka uru waljanan kömuiga bem suahö galöm yenğö kösö gwarönöhök lök lolohoget. Miñon Suep gölme sutñire mala

yuainjiri pakpak galöm köl engimakzemö, injini qahö galöm köl engigetka malje. Mianğöra böhi takapulakanı mewöñan jimkutukutu lañ al engimakzei, mi mönö wuanöngöra öne wuatangömakze? Suepkö bunaya akzemö, töndup gölmegö keuya wuatangögetka siksauk ahakza.

²¹ Songonıni kewö alakze, “Mi kude göjupköba meman. Kun mi kude yöhösöröman. Yuai mi kude misiriman.”

²² Gölmegö ambazipnöñ nanıni nöropñinan mewö jim kutuba tosatñi kusum engimakzemö, Anutunöñ mewö qahö. Yanön yuai pakpak mi lökñanök aka mendingöra jiiga nupñini engigetka qahöwawñegöra ali ahöze.

²³ Mi töndup tosatñan bem suahö galöm aka garata waikñini memba bem ewö möpöseim engimegöra kapan kölakze. Mi kapan köla “Nanini urunini memba eta aljin,” jiba mianğoreñ möndöba silegö sihim kömbönañini bölöñan galöm köl engibapuköra songonı songonı ala silenıni qeba qölsihim angumakze. Mewö aka jimkutukutunıni alakzei, mi mönö mötkutukutu qakñe alalñangö tandök aiga gwötpukñan mi möta mötket öngömakza. Öngömakzapmö, mi töndup mewö silegö sihim kömbönañini bölöñi angön kölbिंगö osiba mi lañ wuatangömakze. Mianğöra jimkutukutunıni mienön mönö yuai omanı kötökñi akze. Mewö.

3

Kraistnöñ malmal dölökñe malbingö ösumñi neñgimakza.

¹ *Kraistnöñ euyangöreñ öngöba Anutugö böröñi ölnangö jakömbuak jakenı memba qetbunangambuk tatza. Anutunöñ Kraist mem gulim wanğiyöhi, mianğö tandök injini mewöyök mem gulim enğiiga köhömuneyök wahöta malje. Mianğöra injini Suep mire eu öroyuai ahözawi, urunıni mönö mianğoreñ jöhöba malme.

² Gölmegö öroyuaigöreñ qahöpmö, euyangöreñ öroyuai ahözawi, urunıni mönö mianğoreñ jöhöm köhöiba malme.

³ Engö urunıni walñan mönö kömuiga Anutugöreñ tönguba malje. Mewö Anutugö aumñe anda malmal köhöikñangö könañi miwikñaget. Kraistnöñ Suep malmal tölapñe maljawi, engö urumalmalñinan mönö mianğö dop asa-asambötñe ahöza. Mianğöra urunıni mönö Kraistpuk jöhöba malme.

⁴ Kraist malmal köhöikñangö Toninan kunbuk kaiga asakmararanan asuhumawi, nalö mianğoreñ injini mönö mewöyök asuhugetka enğuanğiriga yambuk Anutugö asakmararane angotme.

Uru walñi aka uru dölökñi awörañgözahot.

⁵ Gölmegö sihim kömbönañini bölöñi könañi könañi mi urunıne kinda yayasenñeñ mem engimakzei, mienğö nöropñini mönö körek tözamgöm teköme. Bau kiam tandök serowilin aka qewölon angöjörakñambuk mi mönö andö qeme. Urusilegö sihim kömbönañi bölöñi mi mosöta urukönöp bölöñi mi mönö qömbökögetka bököma. Yuai membangun mendingö nepaqepalok köpösöngömakzei, mianön tandö lopion waikñini memba möpöseim enğizeangö tandökñi akza.

⁶ Mi akerangöra aka Anutugö irimñan seholiiga urukazikñi qakñine ali öngömakza.

⁷ Sihim kömbönañini bölöñi mewöñan mönö mutuk nanıni malmalñini mewöyök galöm kölga köna bölöñi mi tiba wuatangöba maljema.

⁸ Mewö malgetmö, nalö kewöñe injini mewöyök yuai kewöñi pakpak mi mönö gilget anma: Urusingok möta urukönöpñöñ jula enğohoiga urunınan auba urubölö mötzemö, mi uzeta gilget anma. Mewöyök uruqeçe keu töhöreñ

* 3:1: Sum 110.1

aka keu aᅅgöjörakᅅambuk jiba uruᅅini tölöhozei, mi mönö körek andö qeba mosötme.

⁹ *Inini uru walᅅi aka miangö ahakmeme aᅅgöjörakᅅambuk mi köteköba mem kömumba malje ewö, keu muneᅅi mönö kude eraum mötme.

¹⁰ *Inini uru walᅅi köteköba kunbuk letota uru döLökᅅi löᅅgöta malje. Miwimiwikᅅai Toninan nanᅅi könaᅅi möt teköm waᅅgibingöra söpsöp alöhi, yaᅅön mönö miangö dop uru döLökᅅi mi letot waᅅgiiga toroqeba köLöᅅaimakza.

¹¹ Miangöra nini Juda me kantri tosatᅅaᅅgö ambazip maljini, mi mönö dop mohot akza. Anutugö aiwesökᅅi silenine yandiget me qahö, mi töndup Anutugö jeᅅe dop mohot akzin. Taon ambazip mötmötninambuk me qandam (bus kanaka) mala nanᅅini keuᅅine irohwaroho jiba gukmaulem maljei, mi töndup Kraistnöᅅ urunine kiniga mohot akzin. Nanini nupnini memakzin me toninaᅅgö welennᅅini töwaᅅi qahö qemakzini, miangön yuai korembenᅅi akzapmö, ölböᅅᅅi mi Kraist. Yaᅅön kutulaᅅgöba körek nenᅅoᅅgita öᅅgöba Kiᅅ Kembunini bohönᅅi mohot akza.

¹² *Anutunöᅅ möwölöhöm enᅅiiga uru döLökᅅi wuatᅅaᅅgöba Anutugö wölböt alaurupᅅi sarakᅅi akze. Miangöra inini mönö sutᅅine ak kömumba ala ak aᅅguba malme. Uruᅅini memba et ala tosatᅅi guᅅböᅅjönjönᅅ qakᅅe ak enᅅiba lömböt möta mökösoᅅᅅda malme. Silik miangön mönö malukuᅅini aiga köᅅget geiga mi töp memba malme.

¹³ *Möno lolongöba böLöᅅaᅅgö kitipᅅi kude mememö, mönö qaqaenᅅim aᅅguba malme. Köyan köᅅ aᅅgugetka sutᅅine keu köpösihit ahuiga kunᅅan alaᅅi jim waᅅgimamᅅgö mötzawi, mi mönö mosöt aᅅgume. Kembunöᅅ siᅅgisöndokᅅini saᅅoᅅᅅda mosöröhi, inini mönö sutᅅine mewöᅅaᅅök ak aᅅgumakᅅe.

¹⁴ Mewö aka urukalemᅅ malukuᅅini mi köᅅget geiga miangö qakᅅe mönö urukalem aka jöpaköm aᅅgugetka qetpuk akᅅa. Urukalem miangön mönö aködamun tosatᅅi pakpaköra jizali, mi köyaᅅgöba mindiriba bohönᅅina kinja.

¹⁵ Kraistnöᅅ inini luainöᅅ silemohot malmegöra enᅅoholök. Miangöra yaᅅgö luaiᅅan mönö uruᅅine ahöba öLöᅅaᅅgö injup lökuatᅅi ak enᅅiiga urubönjönᅅᅅ jim möpöseip aka malme.

¹⁶ *Kraistköreᅅ Buᅅa keu miangön mönö uruᅅine kinda sutᅅine gwötpuk asuhum sehima. Mönö mötkutukutu keu pakpak jiba kusum aᅅguba qambaᅅ qem aᅅgumakᅅe. Uᅅa Töröᅅan söLölohöm enᅅimakzawaᅅgö dop mönö Buᅅa Liᅅet Sumbara (Sam), möpömpösei liᅅet (omsa) aka urugö liᅅet tosatᅅi mi urukönömᅅinan Anutu möpöseiba kölakᅅe.

¹⁷ Ahakmeme mi me mi jitnöᅅ me siliknöᅅ aka memei, mi pakpak mönö Kembu Jiösᅅgö qetᅅe ahakᅅe. Mewö aketka Kraistnöᅅ nam köᅅ enᅅiiga Iwi Anutu pipsimbawoᅅ jim waᅅgiba malme. Mewö.

Awanöm, iwinam aka welenqeqe enᅅöreᅅ qambaᅅ keu

¹⁸ *Ambi inini mönö apurupᅅini yaᅅgö keu bapᅅe anda malme. Kembugö buᅅaya akzeᅅaᅅgöra mönö mewö aketka dop köᅅma.

¹⁹ *Azi inini mönö anömurupᅅini urukalemnöᅅ jöpaköm enᅅiba urupik wösökömbuk qakᅅe kude ak enᅅiba malme.

²⁰ *Nahönbörat inini Kembubuk qekötahöba kinda iwinamyahötᅅini yetkö jitᅅiri wuatᅅaᅅgögetka Kembunöᅅ enᅅehiga dop köᅅma. Miangöra inini mönö keuᅅini jimeᅅgö dop pakpak tem köᅅ enᅅiba malme.

* 3:9: Ef 4.22 * 3:10: Jen 1.26; Ef 4.24 * 3:12: Ef 4.2 * 3:13: Ef 4.32 * 3:16: Ef 5.19-20
* 3:18: Ef 5.22; 1 Pitö 3.1 * 3:19: Ef 5.25; 1 Pitö 3.7 * 3:20: Ef 6.1

21 *Iwiurup engö nahönböraturupñinan awösamkakakñini mosötpepuköra mönö kude engum ureim ak engiba malme.

22 *Welenqege inini mönö gölme qakñe galömurupñini yengö keuñini pakpak tem köla ahakñe. Köndöwoñ aketka ambazipnönñ engek sorimegöra qahöpmö, genmoñ mosöta Kembugö jitñi ongitpinbukö sömbuñini möta uruñini nupnönñ ala memba malme.

23 Yuai aka memakñei, uruñini mönö miangörenñ jöhöba kewö mötmörime: Gölme ambaziwök qahöpmö, Kembu nanñi mönö welen qeba malje.

24 Kembu Kraist welenni qeba malgetka yañön töwañini Suep mire ali ahözawi, mi mönö engiiga buñañini akña. Mönö mewö mötmöriba malme.

25 *Kunñan nupñi mem sohomawi, Anutunönñ mewöñanök mem sohosohonangö likepñi melenñ wañgima. Anutunönñ tosatñi qahö engek soriba tosatñi qahö qepureim engimakzapmö, körek nini dop mohotnönñ kewöt neñgiba keunini jim teköma.

4

1 *Galömurup engörenñ Kembu ketanñi mi Suep mire malja, mi möt kutuzeangöra mönö welenqequeurupñini titit diñdiñi aka dop mohot ak engiba malme. Mewö.

Goro qambañ keu tosatñi

2 Köuluk nup mönö kapañ köla memba malme. Miangörenñ mönö uruguliguli mala jim möpöseip aka malme.

3 Möpöseip akñei, miangörenñ mönö neñgö mohotñe kewö köuluköba malme, “Anutu, gi mönö Pol neñakurupñi köna mem enginönnga ölop Kraistkö Buña keu tölapñi mi jim asarigetka sehima.” Nönñön mönö Buña nup miangöra aka kösö gwarönönñ tatzal.

4 Nönñön Buña keu Anutugö sihimñangö dop jibi asarimegöra mönö köulukñinan töngum niñgiba malme.

5 *Ambazip urumelenñ qahö aka yaigep maljei, i mönö mötkutukutu qakñe ak engiba malme. Urugö nup membingö köna kun ahumawi, nalö mi mönö kude mösöhöba ayuhumemö, ambazip qöhörönñine anda ösönñ qambañ köl engime.

6 Keu eraum mötmei, mi mönö nalö dop howeñambuk mindiriba jigetka nahömñambuk ahakña. Jigetka mohot mohot nahömñini ahuiga körek yengöra keu denöwö melenñ engime, mi mönö ölop möt yaköba miangö dop jimakñe. Mewö.

Polnönñ Tikikus Onesimus melaim etkiiga kamahot.

7 *Wölböt alani Tikikus yañön Kembubuk qekötahöba kinda nömbuk nupñi törörök memba neñakni akza. Yañön engörenñ kaba denöwö aka malakzali, miangö kösohotñi körek jii mötme.

8 Denöwö aka memba tata maljini, inini mönö kösohot mi mötmegöra melaim wañgibiga engörenñ kama. Yañön kaba ölop urukölalep ak engima.

9 *Mewöyök wölböt alanini Onesimus Kolosi engörenñök kaba Kembugö keuñi pöndañ wuatangöba mem yakömakzawi, nönñön i melaibiga lilingöba kama. Azi yahöt mietkön kaba kiangörenñ yuai pakpak denöwö asuhui maljini, miangö kösohotñi ölop jim teköyohotka mötme. Mewö.

Yaizökök keu teteköñi

* 3:21: Ef 6.4 * 3:22: Ef 6.5-8 * 3:25: Dut 10.17; Ef 6.9 * 4:1: Ef 6.9 * 4:5: Ef 5.16 * 4:7: Apo 20.4; 2 Tim 4.12; Ef 6.21-22 * 4:9: Flm 10-12

¹⁰ *Aristarkus nömbuk kösö mire tatzawi aka Barnabasgö numbutni Mak yetkön yaizözkökni jiba alohotka engören kaza. Maköra lök keuni kewö jim kutubiga mötket: Engören kaba kanjotma ewö, mönö ölop köl öröba ala ak wangime.

¹¹ Josua qetni kun Jastus qetzei, yanön mewöyök yaizözkökni jiba ali engören kaza. Nejakurupnan nömbuk Anutugö bemtohonangö nup memba maljei, yengö sutjine azi karöbut mienönök Juda azia malje. Yenön mönö urukölalep ak ningimalget.

¹² *Nanpine azi Epafra Kraist Jisös welenni qemakzawi, yanön mönö yaizözkökni jiba aliga engören kaza. Yanön nalö dop engöra aka köulukömakza. Keu pakpak Anutugö jitjangö dop akzawi, injini miangören töndangöba kin köhöiba aködamunjinambuk aka malmegöra aum-mörimakza.

¹³ Nönön yangö könanj möta kewö nangöba jizal: Yanön injini bauköm engimangöra nup gwötpuk memakza. Mewöyök Laodisia aka Hierapolis taon yahöt miangören möt nariba maljei, yengöra aka wani awamni nup memba aum-mörimakza.

¹⁴ *Wölböt doktanini Luk aka Demas yetkön mewöyök yaizözkökni jiba alohotka engören kaza.

¹⁵ Nönön yaizözkökni jiba ohozali, mi mönö urumelen alaurup Laodisia taonö maljei, yengöra jiget mötme. Mewöyök Nimfa aka yangö mire könagesö tokomakzei, mönö yengöra jiget mötme.

¹⁶ Kimbi ki oyon engigetka mötket teköiga miangö andöne mi mönö algetka Laodisia urumelen könagesö yengören aniga oyonme. Laodisia yengöra kimbi kun ohobiga anöhi, mi alget engören kaiga injini mi mewöyök oyonme.

¹⁷ Arkipus azi mi mönö kewö jigetka mötma, “Kembunö Buja nup mangö jim kutuba köiputki tariga maljani, gönön mönö mi mötmöriba körek mem teköman.”

¹⁸ Pol nönön yaizözkökni jiba nane börönan qetni kewö ohozal: Pol. Injini mönö kösö gwarö azi ni mötmörim ningiba malme. Kalem möriamnö mönö embuk ahöma. Mewö.

* **4:10:** Apo 19.29; 27.2; Flm 24; Apo 12.12, 25; 13.13; 15.37-39
Tim 4.10, 11; Flm 24; Flm 2

* **4:12:** Kol 1.7; Flm 23

* **4:14:** 2

Tesalonaika Kimbi 1

Polnön Tesalonaika yeŋgöra Kimbi mutukŋi alök.

Jim-asa-asari

Rom mindimindiri kantrigö prowins qetŋi Masedonia miangö siti bohonŋi mi Tesalonaika. Polnön misin nup memba liliköba Filipai siti mosöta Tesalonaika kaba nup meiga tosatŋan uruŋini melengetka kusum engii urumelen kambu alget. Mi algetmö, tuarenjoŋ mi miangöreŋök asuhuyök. Polnön Kraistköreŋ Buŋa keu jim asariba uruŋini kuŋguiga miangöreŋ Grik ambazip Juda akeri, yeŋgöreŋök gwötpukŋan uruŋini melengetka kambu mianön sehiyök. Miangöra Juda ambazip uruŋini qahö melenđa uruŋinan böliiga Pol andö qem wanŋiget. Andö qem wanŋigeranğöra lömböriiga kōna jaruba engömosöta Berea taonön anök. Kōnanğep Korint sitinön maliga neŋakŋi Timotinön alabaukŋi aka Tesalonaika sitiyök kaba denöwö möt narigeri, miangö kösohotŋi ali mörök.

Polnön Kimbiŋi mutukŋi Tesalonaika alöhi, mi Kraistkö alaurupŋi yeŋgö uruŋini nanğöba mötnariŋini mem köhöimapkōra ohoyök. Kembu möt nariba urukalem ak anğumakzei, miangö buzupŋi mötagun yeŋgöra Anutu möpöseiza. Nannak malmal yembuk denöwö aka malöhi, mia ölum engubapukōra mi papianön ohoza. Tesalonaika urumelen kambu sutŋine keu tosatŋi asuhui jigeri, Polnön mi melenđa jim asariba ohoza. Keu tosatŋi mi kewö: Kraistnön lilingöba kaiga Suep malmalnön anğotpini, miangöreŋ tosatŋan uruŋini melenđa kömupnön ahözei, yeŋgöra mönö denöwö asuhuma? Kraistnön wani nalönön lilingöba kama? Keu mi melenđa kewö jim kutum engiyök, “Injini Kraist kunbuk kamapkö jörömqöröm aka al mamböta mala miangöreŋ mönö nup ölöŋi ölöŋi mi jeğep kinda pōndanğ memba malme.”

Buk kianğö bahönŋi bohonŋi 6 mi kewö:

Keu mutukŋi 1.1

Saiwap jiba söŋgaiba möpöseiza 1.2-3.13

Ahakmeme diŋdiŋi akŋegö kuŋgum engiza 4.1-12

Kraistnön kamapkö keuŋi kusum engiza 4.13-5.11

Qamanğ keu tetekönŋi tosatŋi 5.12-22

Kimbigö keu kötŋi bohonŋi 5.22-28

¹ *Pol, Sailas, Timoti neŋön Tesalonaika urumelen kōnagesö embuk keu eraum mötpingōra kimbi ki ohozin.

Injini Iwi Anutu aka Kembu Jisös Kraist yetpuk qekötahöba kingetka yetkōn mönö kalem möriam engiyohotka luainön malme.

Mötnariŋi köl gulizeanğöra söŋgaizin.

² Neŋön qösösök mötmörim engiba körek engöra “Anutu pipsaiwap!” jiba möpöseimakzin aka köuluk nup memba miangöreŋ nalö dop qetŋini qerakzin.

³ Injini Jisös Kraist jöpaköba möt narigetka urukalemŋan nam köl engiiga nupŋi köhöiba memakze aka Kembuninan lilingöba kamapkö jörömqöröm aka kapanğ köla mambörakze. Neŋön mi pakpak Anutu Iwinanğö jemesoholŋe ölöŋ mötmörimakzin.

⁴ Urumelen alaurupnini, Anutunön jöpaköm engiba injini nanğanğöra kewö möwölöhöm engiyöhi, mi mötzin.

⁵ Neŋön Jisösgö Ölöwak Buŋanği memba engöreŋ kaba sutŋine denöwö aka malini, injini mi mötze. Neŋön Buŋa mi keu töhönök qahö jiin mötketmö,

* 1:1: Apo 17.1

Uña Töröñan mönö sölölöhöm nenñii awösamkakak kinda ösum-mumuñambuk uruñini kuñguba malin.

⁶* Mewö malinga iñini köñjilin ketanangö uruñe mala Buña keu möt angön kölget. Mi angö kölgetka Uña Töröñan sösöñgai enñiiga Kembu aka nenñö siliknini wuatangöba malje. Mi denöwö asuhuyöhi, nenñon mi ölop mötzin.

⁷ Mewö andönine kaba mala Masedonia Akaia prowins yahöt mianğoren Jisös möt narizei, körek pakpak yenğöra silik ölopñi kondel enñimakze.

⁸ Mi kewö: Iñini Kembugoren keu möta angön köla jiba malgetka tosatñan mi angötömual ewö toroqeba jim sehigetka anök. Anda mala Masedonia aka Akaia prowins yahöt mi dop köl teköyök. Mi dop köl teköyökmö, miyök qahö. Iñini Anutu möt nariba nupñi megeri, mianğö ölnan mönö gölme dop anda kaba sehiiga gwötpukñan uruñini melenget. Mi kilik-kalukñi qahö. Mianğöra nini mianğö keuñi kun qahö toroqeba jibin.

⁹ Nini enğoren kainga denöwö asuhuyöhi, mianğö kösohotñi mi miri tosatñi yenñon jigetka angötömual ewö mörakzin. Iñini tandö lopion aka bem munenñi andö enğuba Anutu ölbölni aka malmal Tonñi yanğoren melenđa nupñi memba malje.

¹⁰ Anutunöñ Nahönñi mem gulii kömupnöhök wahöröhi, iñini yanñon Suep mireyök eta asuhumapköra mambörakze. Anutugö irimsesewölñan könanğep aukñe asuhuiga Jisösnöñ mönö eta jenbereren kanjamñambuk mianğorenök meköm nenñima. Mewö.

2

Polnöñ Tesalonaika uruñe nup denöwö meyök?

¹ O urumelen alaurupnini, nini enğoren kaba nup meini, mianñon mönö qahö pömsöm qeyökmö, ölni ölop asuhuyök. Nanñinak mi mewöyök ölop mötze.

²* Qahö pömsöm qeyökmö, mutuk Filipai sitinöñ nup meinga öröm ureim ak nenñigetka sihimbölo mörini, mi mötze. Sihimbölo mi mötagun enğoren kainga tosatñan tuarenjon köhöikñi ak nenñigetmö, mi töndup Anutunöñ awösamkakak nenñii kinda Ölöwak Buñanñi jim asarim enğiba malin.

³ Nenñö könanini kewö: Urukunğukunğugu keunini mi isimkakalek qakñe qahö jimakzin. Naninak janjuñ ahinga uruninan tölöhobawak, mewö mi qahö jimakzin.

⁴ Mewö qahöpmö, Anutunöñ Ölöwak Buña jim sehibingöra nenñeka urunini kewöri dop kölīga möt narim nenñiba Buñanñi nenñiyöhi, mianğö dop mönö keuñi memba jim asarimakzin. Anutunöñ urunini esapköba kewörakza. Mianğöra nenñon yuai pakpak Anutugö jene dop kölbingöra ahakzin. Mi ambazip sihimñini wuatangöbingöra aka qahö.

⁵ Nenñon nalö kungen ambazip kelewele keu kelök ak enğibingöra qahö anda kaini, mi mötze. Nini nepaqepalok dogonini esuhuba moneñ yuai nenñimegö möndömöndö keu siñginñi qahö jiin. Anutunöñ könanamñini mi ölop jim nanğöma.

⁶ Enñon me ambazip tosatñan qetbuña nenñimegöra qahö kapan köla malin.

⁷ Kraistkö aposolurupñi akzinangöra ölop uruñini kewö kuñgubinak, “Iñini mönö nanğöm nenñigetka sutñine urugö nup membin.” Mewö jiinga dop kölbowakmö, nenñon enğö sutñine mököqököli aka malin. Nahönbörat namñinan juzu enğiba köyan köl enñimakzawi, mianğö dop mönö nanini memba et al anğuba ösöñ ak enğiba malin.

* 1:6: Apo 17.5-9 * 2:2: Apo 16.19-24; 17.1-9, 14; Apo 17.5

⁸ Neñon iwinam ewö mökökölim ak engiba malinağöra Anutugörej Ölöwak Buña engiin aka toroqeba nanine malmalnini mewöyök köleñ engibingö jöjöröba malin. Inini ölña wölböt nahönböraturupnini aket.

⁹ O urumelen alaurupnini, neñon engöra aka nup memba silenini qeba malini, mönö mi mötmörime. Nağöm neñgimegö lömbötñan engöreñök kungö qakñe öngöbapuköra suñgem asak nanine börönninan nup memba Anutugö Ölöwak Buñañi jim asarim engiba malin. Mi mönö ölum engubapuk.

¹⁰ Jisös möt narizei, neñon engö keuñini pakpak diñdiñanök kewöta sarakñi köpösihitkö keunini qahö malin. Inini mi eka möta nağöba jim nağömeanğö dop akze. Anutunöñ mewöyök mi jim nağöba dangunu ewö kinja.

¹¹ Iwinöñ nanñi nahönböraturupñi ösöñ ak engimakzawi, miangö dop neñon inini mohot mohot ak engiba malin. Mi mewöñanök ölop mötze.

¹² Neñon urugö nağönağö keu jiba urukölalep ak engiba malin. Anutunöñ inini nanñe bemtohoññöñ aņgota asakmararañe asarimegöra engoholök. Miangöra neñon uruñini kunguba keu kewö jim tuariba malin, “Ahak-memenñini mönö Anutugö jeñe dop kölmawağö dop sarak sorokñi aka memba malme.”

¹³ Miangöra neñon mewöyök sundan Anutu kewögöra möpöseimakzin: Anutugö Buña keu engiini, mi gölme ambazipkö keu ewö qahö buña qem aņgugetmö, ölña Anutugö keu jirkö dowa möta mi aņgön kölget. Mi möt narigetka mianñon mönö kölöñaim engiiga letorakze.

¹⁴ Juda ambazip Judia prowinsnöñ uruñini melengetka Juda tosatñan aņgösirip ak engigetka sihimbölö mötket. Yeñon mi möta töndup Kraist Jisösbuk qekötahöba kinda Anutugö urumelen könagesöñi aket. Urumelen alaurupnini, engö sutñine mönö mewöñanök asuhuyök: Nanñini Grik ambazipnöñ Juda yeñgö tandök ewö ak engigetka inini sihimbölö öröröñ möta Anutugö könagesöñi aket.

¹⁵ *Juda yeñon kezapqetok ambazip enjuget kömugetka Kembu Jisös mewöyök qegetka kömui nini sesewerowero ak neñgiba malget. Yeñon Anutugö jeñe qahö dop köla ambazip pakpak kerök ak neñgimakze.

¹⁶ Neñon kian kantri eñon uruñini melenđa letotmegöra Buña jibinbukö aņgön köleñ neñgimakze. Mewö siñgisöndok sundan aka qerakögetka qakñine öngömakza. Siñgisöndokñini qerakögetka dopñi Anutugö jeñe kokolak qeiga irimsesewölñi toroqeba aņgön kölmangö osiba nalö kewöñe kondeli qakñine lök öngöza. Mewö.

Polnöñ Tesalonaika kunbuk anmamgö mörök.

¹⁷ O urumelen alaurupnini, neñon nalö kewöñe nalö töröpñi denđa maljin. Sileninan denđa maljinmö, uruninan jöhöba mohotñe maljin. Miangöra engö jesöñgöröñini ekingöra mönö kapan köla awöwengöba maljin.

¹⁸ Miangöra engöreñ kabingö möta malin. Pol nöñon sömañ mohot-töp qahöpmö, indimñi yahöt kamangö esapköyalmö, Satanöñ jöhöm neñgiiga osiin.

¹⁹ Inini nanine ila jalö soroknini ewö kinje. Kembunini Jisösnöñ lilingöba kaiga yağö jemesoholñe aņgota kinbini, miangöreñ engeka “Urugö nup önewat qahö memba malin,” mewö jibingö mötzin. Neñon keu mi inini aka tosatñi yeñgöra aka awamñanök jibingö jörömqöröm akzin. Miangöra engöra önöñi qahö söñgaiba silenini memba öngömakzin.

²⁰ Neñon engöra aka qetbuña miwikñaininga sösoñgai ak neñgimakze. Mewö.

* 2:15: Apo 9.23, 29; 13.45, 50; 14.2, 5, 19; 17.5, 13; 18.12

3

Timoti melaiyohotka Tesalonaika anök.

¹* Injini denöwö aka maljei, mi mötpingö mötkurumkurum ketanji ak bibihiba toroqeba öne malbingö osiin. Miangöra nanirök Atens sitinöj malbitkö keu jöhöba

² alaniri Timoti melaiziga engörenj kayök. Yanön Anutugö nup memba netpuk Kraistkö Ölöwak Buja jim sehimakza. Yanön uru nangönanjö keu engiba mötnaripñini mem köhöimapköra kayök.

³ Anutunöj arenjini jim teköiga tosatñan angösirip ak engimakze, mi nanñinak ölop mötze. Engörenök kunñan köñjilinj urunje kongwarak aka löwöribapüköra jiinga kayök.

⁴ Neñön Tesalonaika embuk mala nalö miangörenj engöra qeljine keu kewö jiin, “Kembugö jitsihitñi tem kölinga ambazipnönj sesewerowero ak neñgigetka wahöjalinj miwikñaibin.” Mewö jiinga mianjö dop ölna asuhuyöhi, mi ölop mötze.

⁵ Mewö asuhuiga esapesap Tonan esapköm engii löwöriba etketka nupni-nanjö ölnan eta pömsöm qebapuk. Miangöra denöwö möt nariba maljei, mi mötpingö mötkurumkurum ketanji ahin lömbörii kunbuk öne malmangö osiba Timoti melaibiga qesiba mötmangöra kayök. Mewö.

Timotinöj kösohotñini ali möt ölöwahin.

⁶* Mötkurumkurum aka malinmö, Timotinöj anda engömosöta lilingöba kaba buñanini ölopñi memba kaba kewö jiyök: Injini Kembu ölop möt nariba urukalem ak angumakze aka nalö dop neñgöra mötmöriba ölöwahakze. Neñön engekingö sihimñi möringa enjön mewöyök nini neñgevingö kapan kölakze.

⁷ O urumelenj alaurupnini, neñön sesewerowero köñjilinj könanji könanji möringa nalö miangörenj kaba möt narizeanjö kösohotñi ölopñi jii mötziga keu mianön mönö ölna urukölalep ak neñgiyök. Miangöra nalö kewöne engöra aka amqeba luainöj ölöwaka maljin.

⁸ Injini Kembubuk qekötahöba böñ qeba kinmeanjöra neñön mönö ölna köhöiba maljin.

⁹ Engöra aka Anutugö jemesoholñe önöñi qahö söngaimakzini, sösongai pakpak miangöra mönö denöwö Anutu möpöseiba saiwap jiinga dopñe akawak?

¹⁰ Neñön sunjem asak urunini qezaköba kapan köla kewö köulukömakzin, ‘Anutu, mönö bauköm neñginönga Tesalonaika anda jesöngörönjini eka mutulanjöba mötnaripñinanjö yuaigöra osizei, mönö mi engibin. Keu mi ölna.’

¹¹ Mewö köuluköingä Anutu Iwinini nanñi aka Kembunini Jisös yetkön mönö köna mesat neñgiyohotka ölop engörenj kabin.

¹² Toroqeba kewö köulukömakzin, ‘Nini urukalem önöñi qahö ak engimakkzini, Kembu göñön mönö urukalemgi toroqeba kondel enginönga sutñine sehiiga kondel angumakñe aka ambazip pakpak kondel engimakkñe.

¹³ Kembu, göñön mönö urunini mem köhöimakñan. Kembunini Jisös göñön könanjep könagesögi sarakñi pakpak yembuk kunbuk kamani, nalö miangörenj Tesalonaika yeñön sarakñi köpösihitkö keunji qahö Iwinini Anutugö jeñe kinme.’ Mewö köulukömakzin.

4

Ahakmeme solanñi urukalemñambuk mi dop köлма.

¹ Urumelenj alaurupnini, keu kun kewö: Ahakmemenñini Anutugö jeñe aket dop kölmawanjö könanji kusum enjiinga mi lök köl guliba wuatanjömakzemö,

* 3:1: Apo 17.15 * 3:6: Apo 18.5

mi toroqeba gwötpuk ahaknegöra uruñini kuñguzin. Neñön qambañ keu mi Kembu Jisösgö qetñe enñgizin.

² Neñön Kembu Jisösgö kukösum qakñe kinda jöjöpañ keuñi jim kutum enñgiini, iñini keu mohot mohot mi lök möt teköze.

³ Anutunöñ enñgöra jitsihitñi kewö mötza: Inñini mönö sero yonñgorö andö qeba sarakñi aka tök-kutukutuñi aka malme.

⁴ Anutugöreñ köna diñdiñi mi mönö kewö möt kutume: Uru sileninañgö sihim kömbönañini galöm köla sarakñi (mala nanñini anömñini nanñik nanñik memba) malgetka aködamunñambuk akña.

⁵ Urumelenñgö kopa yeñön Anutugö könañi qahö möt kutuba uruñini könöp jeiga ambi lañ memakze. Mianñgö dop kude aka malme.

⁶ Mewö qahöpmö, ambi apñan kungen aniga kunöñ ölöñ kaba ambi kude saiköma. Kunöñ bölöñi mewöñi ahiga uruñiran kömbuhibapuk. Mutuk qambañ keu mi jiba galöm mem enñgiini, mianñgö dop kunöñ ambi mem bölöña Kambunöñ siñgisöndokñi pakpakö likepñi melenñ wañgima.

⁷ Anutunöñ nini qewöloñ malbingöra qahöpmö, malmal sarakñi malbingöra nenñgoholök.

⁸ Mianñgöra jöjöpañ keu mi mosötmawañön mönö gölme ambaziwa qahöpmö, Anutu nanña andö qema. Anutu Uñañi Töröñi enñgimakzawi, ia mönö andö qebepuk.

⁹ Sutñine jöpaköm anñgumakzei, mianñgö könañi Anutunöñ kusum enñgi nanñinak lök möta malje. Mianñgöra neñön urukalem ak anñgubingö keuñi kunbuk ohom enñgibingö qahö osizin.

¹⁰ Masedonia prowins uruñe urumelenñ alaurup pakpak uruñinan jöpaköm enñgiba maljemö, urumelenñ alaurupni, mi mönö toroqeba gwötpuk ahaknegöra uruñini kuñguzin.

¹¹ Mönö ösöñ mala nanñini malmal nanñönañgöñini galöm köla böröñinan nup memba malme. Mewö aka aködamunñinambuk akingö kapañ köla kinme. Mutuk mewö jim kutum enñgiinga mianñgö dop mönö aka memba malme.

¹² Mewö aketka uruñini qahö melenña yaigep kinjei, yeñön ahakmemenñini solanñi ek yaköba göda qem enñgiba malme. Injarere lañ mala nene yuaigö uleta kungö qakñe kude malme. Mewö.

Kembugö kaka nalöñe kewö asuhuma:

¹³ Urumelenñ alaurupnini! “Tosatñan uruñini melenña kömumba ahözei, yeñgöra denöwö asuhubawak?” Inñini keu mewö jiba mianñgöra gukmalem malbepuk. Ambazip uruñini qahö melenña jörömqöröm qahö maljei, yeñön kömukömuñi yeñgöra aka wösöbirik maljemö, enñön i ewö wösöbirik malbepüköra keu kewö jibin:

¹⁴ Jisösnöñ kömumba wahöröhi, nini keu mi möt nariba kewö jizin: Anutunöñ Jisös mem guliyök. Mianñgöra ambazip yambuk kömumba nöñ qegeri, Anutunöñ mönö i mewöyök mem guliba Jisösbuk mohotñe enñgungiri aukñe asuhume. Keu likepñi möt narizin ewö, likepñi kun mi mewöyök möt nariinga dop kölma.

¹⁵ *Kembunöñ keu kusum nenñgiinga neñön yanñgö jitñi mi enñgöra kewö jibin: Tosatñi neñön qahö kömumba toroqeba silebuk malinga Kembunöñ lilingöba kamawi, nini nalö mianñgöreñ mutuk qahö öñgöbin. Nini ambazip kömukömuñi qahö enñgongitpin. Qahö.

¹⁶ Mianñgö arenñi kewö: Anutunöñ tömunñi qainñi kun uiga ötoñi asuhuiga Suep garata bohonñan jimkutukutuñi qeriga ambazipnöñ kourukñiri

* 4:15: 1 Kor 15.51-52

mötketka Kembunöŋ nannak Suepnöhök etma. Kraistnöŋ eriga i möt narim waŋgiba kömugeri, yeŋön mönö mutuk kömupnöhök wahötme.

¹⁷ Yeŋön mutuk wahötketkun nini qahö kömumba jebuk malbini, Anutunöŋ mönö neŋguaŋgiri könakemba öŋgöbin. Wahötkeri yembuk öröröŋ kousunöŋ öŋgöba Kembubuk aitonŋöba yambuk Suep mire sundan dop malbin.

¹⁸ Mianŋöra keu mewöŋi jiba mianŋön mönö uruŋini nanŋöm aŋguba malme. Mewö.

5

Kembunöŋ kamapköra mönö jöjöröba malme.

¹ O urumelen alaurupnini, Kraistnöŋ lilingöba kamapmö, wani yambunöŋ aka wani nalönöŋ asuhumawi, nini mianŋö keuŋi ohom eŋgibingöra qahö osizin.

² *Inini nanninak keu mi ölöpŋanök kewö möt kömuze: Yoŋgorö memenöŋ suŋgem ölöŋ kaŋgorakzawi, Kembangö kaka nalöŋan mönö mianŋö dop wölaŋ kam kuŋguma.

³ Ambazipnöŋ kewö jime, “Merak luai qem neŋgii siyoŋsayoŋi qahö maljin.” Mewö jigetka mianŋöreŋök köndenmönden asuhaba qakŋine öŋgöma. Ambinöŋ morö memangö masöŋi qei mörakzawi, mönö mianŋö dop asuhuiga misiŋgöba anbingö osime.

⁴ Yeŋön osimemö, urumelen alaurupnini, eŋön pandaman uruŋe jipjap qahö maljeaŋgöra nalö mianŋön mönö saŋgabaŋga yoŋgorö meme ewö eŋgö qakŋine öŋgömapkö osima.

⁵ Körek eŋön mönö asakŋaŋgö ambaziwa akze aka yuai pakpak aukŋe akingö ak eŋgimakza. Nini söŋaupkö ambaziwa qahö akzin aka ömukŋaŋgö yuaiŋi tököba sisit memakzin.

⁶ Mianŋöra tosatŋi i ewö uruninan gaun ahöbapuk. Mewö qahöpmö, nanini galöm köl aŋguba uruguliguli malbin.

⁷ Gaun ahözei, yeŋön suŋgem gaun ahömakze. Ambazip o köhöikŋi nemba eŋjololoŋ ahakzei, yeŋön mönö söŋaupnöŋ mewö aka malje.

⁸ *Söŋaup uruŋe mewö ahakzemö, asakŋaŋgö ambazip neŋön mönö nanini galöm köl aŋgumakin. Wahöjambanini mönö opo maluku ewö kewö löŋgöta kinbin: Neŋön mötnarip aka urukalem köl guliba mewö mianŋön töptöpnine göwaŋgöwaŋ kepölaköba (suman ewö köla) sel jöhöm aŋguba kinbin aka Suep mire öŋgöbingö mamböta jörömqöröm aka mewö mianŋön nöroŋnini ain irikmarik ewö esuhaba turubin.*

⁹ Anutunöŋ nini et neŋgui irimsesewölŋi mötpingöra qahö jim teköyökmö, Kembunini Jisös Kraistnöŋ mem letot neŋgii oyaenŋkoyaen buŋa qem aŋgubingöra jim teköiga maljin.

¹⁰ Jisösnöŋ neŋgöra aka kömuyöhaŋgöra malmalnini gölmenöŋ malbini me kömumba nöŋ qeba ahöbini, mi mönö Jisösbuk köhöiba malbin.

¹¹ Mianŋöra uru nanŋönaŋgö aka möhamgöm aŋguba köhököhöi miwikŋaiba mutulaŋgömakzei, mi mönö toroqeba memba malme. Mewö.

Qambaŋ aka goro keu qöndökŋi

* **5:2:** Mat 24.43; Luk 12.39; 2 Pitö 3.10 * **5:8:** Ais 59.17; Ef 6.13-17 * **5:8:** Ömewöröme yeŋön sölölohöm neŋgimegöra yuai bölöŋi bölöŋi mi lingip kesarek ewö gila neŋgöra mulahakzemö, mianŋö jitŋi mi ölöp Jisös möt nariba urukalem kondela kinda likeplikep suman ewö közamböt aŋguba közaŋgömakin. Mötmötninan siksauk aiga janjuŋ anbinpuköra ölöp Anutubuk ösupköinga kalem möriamŋan nöroŋnini irikmarik ewö sel jöhöm neŋgiiga amöriiga Suepkö könaŋi wuatanaŋgömakin.

¹² Urumelen alaurupnini, neñon kewö jim kutum engizin: Galömñinan Kembubuk qekötahöba kinda sutñine nup memba qambañ engimakzei, i mönö göda qem engiba malme.

¹³ Göda qem engiba nupñini memakzeangöra mönö ölña jöpaköm engiba yengöra mötket öngöma. Könagesö sutñine mönö luai qem anguba malme.

¹⁴ Urumelen alaurup, neñon urukunḡukunḡu keu tosatñi kewö engizin: Tosatñan nanñini imbi-imbi wuatangöba injarere lañ maljei, mi mönö jim engiba galöm meme keu engime. Zirinḡirinḡ ambazip yengöra mönö uru nanḡonaḡö keu jigетка köhöiba awösamkakak akñe. Ambazip uruñini löwöriiga maljei, i mönö köyan köl engime. Urukönöp kude akñemö, ambazip pakpak mönö urubönjön qakñe ak engime.

¹⁵ Jinöñ jibi, nuḡgunöñ guhubi me aknöñ aki mi kunñan kude akña. Sonḡo mi walönḡbepuköra mönö galöm mem anguba malme. Nalö dop yuai ölopñi ölopñi mi kapañ köla ak angumakñe aka ambazip tosatñi pakpak ak engiba malme.

¹⁶ Mönö nalö dop sösöñgai aka malme.

¹⁷ Sundan dop Anutu köuluköba malme.

¹⁸ Mewö me mewö asuhumawi, miangöreñ mönö Anutu möpöseiba malme. Kraist Jisösbuk qekötahöba kinjei, Anutunöñ engöra jitsihitñi mewö mörakza.

¹⁹ Uña Töröñangö bölamñi mönö kude qömbököme.

²⁰ Anutugöreñ kezapqetok keu jimakzei, miangö jijiwilitñi mönö kude akñe.

²¹ Keu pakpak mönö kewöta esapköme. Esapkögetka keu ölopñi asuhumawi, mi mönö angön köla malme.

²² Keu aka ahakmeme bölöñi könañi könañi mi mönö andö qeba malme.

²³ Nöñon engöra kewö köulukömakzal, 'Luaigö bemñi Anutu, gi nangak mönö lökñanök tök kutum enginöñga sarakñi aka malme. Göñon mönö uruñini, uñañini aka silenñini mi lökñanök sel jöhöm enginöñga köpösihitkö keuñi qahö aka malme. Mewö nalö dop malgetka Kembunini Jisös Kraistnöñ lilingöba kaba mewö miwikñaim engima. Keu mi ölña.'

²⁴ Engoholjawi, yañon keuñi pöndañ wuatangömakza. Mianḡöra mönö köuluk miangö dop ak engim teköma.

²⁵ Urumelen alaurupnini, eñon mönö neñgöra aka Anutu köuluköba malme.

²⁶ Urumelen alaurup pakpak sutñine mönö angum anguba numbuñini yöhötim namba malme.

²⁷ Nöñon Kembangö qetñe jim kutum engiba jöjöpañ keunöñ jöhöba kewö ohozal: Kimbi ki mönö urumelen alaurup pakpak yengöra algetka oyoñ engigetka mötme.

²⁸ Kembunini Jisös Kraistkö kalem möriamñan mönö embuk ahöma. Mewö.

Tesalonaika Kimbi 2

Polnön Tesalonaika yengöra Kimbi aliga 2 ahök.

Jim-asa-asari

Tesalonaika urumelen kambu uruŋe Kraist kamapköra mambötketka tosatŋan “Lök kayök,” jigetka tosatŋan “Keu mi muneŋa,” mewö lanlan jiba siksauk aka malget. Tosatŋan “Kembugö kaka nalöŋan lök kam kuŋguyök,” jiba möt nariget. Miangöra “Polnön Kimbi Tesalonaika aliga 2 ahök,” buk mi ohoba keu mi jim tuariyök. Polnön keu muneŋi mi mindingöba könaŋi kewö indelök: Kraistkö kaka nalöŋan dopdowimawi, nalö miangöreŋ ambazip ahakmemenjanan gonggiba böloma. Mewö böloma azi tandökŋi kun qetŋi Iwilele Toŋi yaŋön asuhuba mutuk tölapŋe mala könaŋep Kraist aukŋe tuarenjoŋ ak waŋgiba ambazip kantri dop galöm köl engima.

Tosatŋan Tesalonaika urumelen kambu kahasililin mem engigetka sihimbölö möta malget. Miangöra aposol Polnön keu bohonŋi tosatŋi kewö jim tuarim engiyök, “Inini mönö kapaŋ köla köhöiba Kembubuk qekötahöba kinda möt nariba malme.” Keu kötŋi kun kewö jim tuariyök, “Nöŋön neŋakurupni yembuk malmalnini naŋgöm angingöra nup memba malini, inini mönö miangö dop injarere malmal mosöta nanŋini nene yaka miwikŋaiba mi memba malme aka nup ölöŋŋi ölöŋŋi kapaŋ köla jegep kinda memba malme.”

Buk kiangö bahönŋi bohonŋi 5 mi kewö:

Keu mutukŋi 1.1-2

Uruölöwak ak engiba söŋgaiba möpöseiza 1.3-12

Kraistnön kamapkö keuŋi kusum engiza 2.1-17

Ahakmeme diŋdiŋi akŋegöra kuŋgum engiza 3.1-15

Kimbigö keu kötŋi bohonŋi 3.16-18

¹ *Pol, Sailas aka Timoti neŋön Tesalonaika urumelen könaŋesö embuk keu eraum mötpingöra kimbi ohozin. Eŋön Iwinini Anutu aka Kembu Jisös Kraist yetpuk qekötahöba kinje.

² Iwi Anutu aka Kembu Jisös Kraist yetkön mönö kalem möriam engiyohotka luainöŋ malme. Mewö.

Sihimbölö mötagun mönö oyaenŋoyaen aka malbin.

³ Urumelen alaurupnini, engö mötnaripŋinan gwötpuk köhöiiga körek pakpak urukalem ak anŋumakzei, silik mianön mohot mohot engö uruŋine sehimakza. Miangöra neŋön engöra nalö dop “Anutu saiwap!” jiba möpöseim waŋgimakzini, mi ölöŋŋanök dop kölja. Buŋa keu köl guligerangöra saiwap jimakzini, mi mönö nupnina.

⁴ Sesewerowero anŋösirip könaŋi könaŋi ak engigetka mörakzei, mi pakpak kapaŋ köla mökösoŋda böŋ qeba kingetka mötnaripŋinan qahö sörauba löwöriza. Naninak mewöyök miangö kösohotŋi mi Anutugö könaŋesöŋi könaŋesöŋi yengö jeŋine jiba engöra aka silenini möpöseimakzin.

⁵ Anutunöŋ keu diŋdiŋanök kewöta jim tekömakzawi, anŋösirip mötmötŋinan mönö miangö aiwesökŋi akza. Anutugö bemtohoŋ uruŋe kaŋgota maljeangöra sihimbölö mötketka engehiga Suet mire öngömeangö dop sarak sorokŋi akŋegöra kapaŋ kölakza. Miangöra köŋjilin qahö anŋön köliga nalö kewöŋe qakŋine öngömakza.

⁶ Anutunöŋ diŋdiŋi akzawangöra kinda kahasililin ak engimakzei, i mönö kahasililin miyöhök melenŋiga qakŋine öngöma.

* 1:1: Apo 17.1

⁷ Qakñine öngömapmö, kahasililin möta maljei, enön mönö oyaenköyaen akñe. Kembu Jisösnöñ garataurupñi kukösumñinambuk enjgungita yembuk Suepnöhök eta asuhumei, nalö miangöreñ mönö nembuk mohotñe luhut meme.

⁸ Jisösnöñ könöp bölam uruñe etma. Mewö eta ambazip Anutu qahö möt wañgiba Kembunini Jisösgö Ölöwak Buñañi qahö tem kölakzei, i mönö likepñi melen enjiiga sihimbölö kewö möta malme:

⁹ *Kembunöñ mönö “Yapmakek!” jiba jemesoholñeyök közöl enjiiga Anutugö kukösumñi asakmararañambukñöñ qahö öngömemö, yaigepñe mala könöp siagö sihimbölöñi teteköñi qahö möta malme.

¹⁰ Kembunöñ lilingöba kamawi, nalö miangöreñ kambu-urupñi sarakñi neñön mönö yangö asakmararañi eka miangö dop letota “Owe, Jisös Kembunini owe!” jibin. Möt narim wañgiini, körek neñön mewö welipköinga ambazip omanan neñgeka Yei! jiba auruba kinme. Neñön Jisösgö könañi nañgöba jiinga enön mewöyök mi möt nariba uruñi melengerañgöra mönö letota jihilalomñinambuk asariba nembuk mohotñe kinme.

¹¹ Mewö asuhumapköra neñön nalö dop engöra kewö köulukömakzin, “Anutunini, nangak engohola miangö dop mönö nam köl enjinönga sarak sorokñi aka malme. Mönö kukösumgi ala inahöm enjinönga yuai ölopñi pakpak aka membangö sihimñini körek asuhum teköma. Mewö mötnaripkö nupñini megetka ölni körek asuhuma.”

¹² Mewö köuluköinga Kembunini Jisös möpöseigetka qetñan engöra aka sutñine aködamunñambuk akña. Nanine Anutu aka Kembu Jisös Kraist yetköñ kalem möriam enjiyohot maljeangö dop mönö nanñinak mewöyök aködamunñinambuk akñe. Mewö.

2

Kembunöñ kamangö aiga Iwilele Tonjan asuhuma.

¹ *Urumelen alaurupnini, Kembunini Jisös Kraistnöñ lilingöba kaba neñgungiriga yangöreñ eu tokobini, inñi keu mi mötzemö, neñön kewö qesiba qambañ enjizin:

² Kembangö kaka nalöñan lök kam kuñguzawañgö tandök tötbörömñinan mönö miangöreñök kaiga siksauk möta tatpepuk. Keu mi denöwö asuhuyök? Uña kunöñ azi kun alburup qeiga imutimut eka kezapqetok keu jim siñgiyök me kunöñ “Uruñi kuñgumam,” jiba keu jim siñgiiga asuhuyök? Tosatñan kewö jibepuk, “Pol alaurup yeñön keu mi kimbinöñ ohoba alget kayök.” Keu omanñi miangöra mönö öne töhöñ töwöratiba jönömñini undui malbepuk.

³ Kunñan kun mewö me mewö tilipköm enjibapüköra mönö galömñini mem anguba malme. Mi kewögöra: Mutuk aiwesök yahöt kewö asuhuyohotka Kembunöñ miangö andöñe kama: Ambazip kelenmalelen yeñön Kembu iwilele aka andö qeme aka Iwilele Tonjan nanñak mewöyök aukñe asuhuma. Anutunöñ i jim teköiga könöp sianöñ gema. Aiwesök yahöt mi mutuk asuhuyohotka miangö andöñe nalö ketanñan kama.

⁴ *Tuarenjoñ Tonji yañön jakbak-örañbörañ aka nanñi silenji mem öngöm teköma. Ambazipnöñ yuaigö waikñi memba möpöseimakzei me qetñi bem qetzei, yañön mönö mi pakpak enjogñita silenji memba öngöba malma. Mewö mala Anutugö jöwöwöl jikenöñ öngöba jakömbuak dumñi ala “Anutu akzal,” jiba kantri pakpak galöm köl neñgiba malma.

* 1:9: Ais 2.10 * 2:1: 1 Tes 4.15-17 * 2:4: Dan 11.36; Eze 28.2, 8; Ais 11.4, 9; Mat 24.24

⁵ Nöñön Tesalonaika embuk malali, nalö miangörej keu mi lök jibi mötket. Inini mi ölum engubapuk.

⁶ Iwilele Toñan zilañzilañ asuhumapkö osima. Wani yuainöñ könañi angön kölakzawi, enñon mi nalö kewöñe mötze. Nalöñi törörök kam kuñgumawi, miangörejök mönö asuhuma.

⁷ Nalö kewöñe Iwilele Toñangö ösumñi tölapñan lök asuhuba ambazip sölölohöm engimakza. Aukñe asuhubapukö könañi angön köljawanñon mi mosöri köna ahumapköra mamböta malja.

⁸⁻⁹ Mamböri könañi asuhuiga miangörejök mönö anqeba asuhuma. Satanöñ Iwilele Toñi sölölohöba nam köl wanñii angöletot muneñi aka aiwesök kimbi könañi könañi meiga eka malme. Mi eka malmemö, Kembu Jisösnöñ asakmararañambuk asuhuba auyohotka i numbu ösumñan qeba yayiapaleñ mem wanñima.

¹⁰ Ambazip Anutunöñ amöt qem engimapköra tököba keu öñi buña qem angubingö qahö ak enñiiga lañ mala köñöp sianöñ gemei, yeñon Iwilele Toñangö angöletotñi eketka kölgorom könañi könañi enñiiga janjuñ ahakñe.

¹¹ Miangöra Anutunöñ mötmöt janjuñ kawikñambuk ali asuhuiga ambazipnöñ mi kukösumñinambuk jim sehigetka sesegilgil yeñon keu kelökñi gwahöta muneñi möt narime.

¹² Könañamñinan aukñe asuhumapköra Anutunöñ janjuñ al enñii qaköme. Ambazip keu öñi qahö möt nariba urusihimñini ahakmeme gonñone ala qakögeri, Anutunöñ mönö körek yeñgö keuñini jim teköiga köñöp sianöñ geme. Mewö.

Keu öñi tem köla kapañ köla köhöiba kinme.

¹³ Yeñgörej mewö asuhumapmö, Kembugö wölböt alaurup, engöra mönö nalö dop “Anutu saiwap!” jiba möpöseininga dop kölja. Mi nupnina. Anutunöñ inini könakönahineyök Suepkö buñaya aka letotmegöra möwölöhöm enñiyök. Miangö dop keu öñi möt narigetka Uña Töröñan mem sarahim enñiiga malje.

¹⁴ Mewö malmegöra Ölöwak Buña al nengii jim asariinga mianñon inini engoholök. Mewö toroqeba mala Kembunini Jisös Kraistkö asakmararañnöñ öngöba aködamunñinambuk akñe.

¹⁵ Miangöra urumelen alaurup, koñgwarak mönö kude aka malme. Neñon keu kusum enñiba jitninan jiiñ me kimbinöñ ohoinga mötkeri, keu kötni mi mönö qekötahöba wuatangöba malme. Mewö.

¹⁶ Kembunini Jisös Kraist nanñak aka Anutu Iwinini yetkөн jöpaköm neñgiba kalem möriam qakñe oyaenñkoyaenñ akingö jörömqörömñi neñgiyohotka miangöra mamböta urukölalep teteköñi qahö möta maljin.

¹⁷ Yetkөн mönö uruñini nanñgöba nup ölöpnñi pakpak memba keu ölöpnñi pakpak jiba malmei, miangörej mönö mem köhöim enñiiga malme. Mewö.

3

Ölöp neñgöra köuluköba malme.

¹ Keu teteköñi kun ki: Kembugö keuñan sehiba enñgö sutñine aködamunñambuk ahöhi, miangö dop mönö zilañ miri tosatñe mewöñanök anda jim sehiinga öñambuk ahuba anma. Miangöra urumelen alaurup, enñon mönö neñgöra aka Anutu köuluköba malme.

² Ambazip sesegilgilñan Anutu qahö möt narimakze. Miangöra misimkaulup ambazip gonñoni aka bölöñi meme yeñon kahasililinñ ak neñgibepuköra mönö Anutugö köuluköba malgetka sel jöhöm neñgima.

³ Sesegilgil yeñon bölizemö, Kembu keuji pöndañ wuatangömakzawañon mönö mem köhöim engiba bölöneyök sel jöhöm engima.

⁴ Keu jim kutum engiini, eñon mi nalö kewöñe aka könañgep tem köla malmei, mi möta uruyahötñi qahö akzin. Neñon Kembubuk qekötahöba kinda mewö mötzin.

⁵ Kembunöñ mönö uruñini möñaiba Anutubuk jöhöiga urukalemñi möt yaköba Kraist ewö kapañ köla mökösoñda malme. Mewö.

Injarere malbinbukö galöm meme keu

⁶ Urumelenj alaurup, iñini nanñini imbi-imbi wuatangöba lañlañ malbepuköra kusum engiinmö, tosatñan keu bapñe qahö anda önewat lañ malje. Miangöra nini Kembu Jisös Kraistkö qetñe kewö jim kutum engizin: Iñini mönö urumelenj alaurup mewöñi pakpak mi engömosöta misingöba tikep malme.

⁷ Neñon engö sutñine nanini imbi-imbi lañ qahöpmö, keu bapñe malin. Miangöra neñgö köna lasupnini wuatangömegö könañi mi nanñinak ölop mötze.

⁸ Nini injarere qahö malin aka engöreñök kungö nene yuai mi öne qahö nemba malin. Qahö! Nañgöm neñgimegö lömbötñan engöreñök kungö qakñe öngöbapuköra mönö suñgem asak nup sundansundan memba silenini qeba malin.

⁹ Anutunöñ nupñi membingö kukösumñi neñgii maljinangöra ölop nañgöm neñgimegö keunöñ uruñini kuñgum engibinakmö, neñgö köna lasupnini wuatangömegö silik ölopñi kondel engibingö mötzin.

¹⁰ Embuk malini, nalö miangöreñ lök kewö jim kutum engiini: Nup memangö töközawañon mönö nene mewöyök kude nema.

¹¹ Engö sutñine tosatñan keu bapñe qahö anda nanñini imbi-imbi wuatangöba lañ malje. Yeñon nup ölni qahö memakzemö, nup meme tandöktandök öne lañ memba inöñ wainöñ möndöba tosatñi yeñgöreñ yuai mem sohoba qewöloñ silekmalak lañ malakze. Engöreñ keu kun mi mewö kaiga mörin.

¹² Neñon ambazip mewöñi mi Kembu Jisös Kraistkö qetñe jim kutuba uruñini kewö kuñgum engizin: Iñini mönö an qekötahöm kam qekötahöm mosöta zeñ mala nup megetka ölni asuhuiga nanñini nene yakanñini nemba malme.

¹³ O urumelenj alaurupnini, eñon nup ölopñi ölopñi memba miangöreñ mönö tañqañ kude akñe.

¹⁴ Neñon kimbi ki ohoba jim kutum engizini, kuññan mi qahö tem kölma ewö, iñini mönö uruñi meleñmapköra gamu qem wañgiba ehöröñ köla yambuk keukeu jiba köisirik kude tata malme.

¹⁵ Mewö mala kerök qahöpmö, ala ewö ak wañgiba qambañ köl wañgiba malme. Mewö.

Köuluk aka yaizözkök keu teteköñi

¹⁶ Kembu luai Tonñan nanñak mönö nalö dop ahakmeme pakpak miangöreñ luai qem engiiga böñjöñ malme. Kembunöñ mönö körek embuk malma.

¹⁷ Pol nanak yaizözkökni nani börönan ohozal. Kimbi pakpak ohomakzali, miangöreñ nani yaizözkök qet kimbi ki nanak alakzal. Qetni kewö ohozal: Pol*

¹⁸ Kembunini Jisös Kraistkö kalem möriamñan mönö körek embuk ahöma. Mewö.

* **3:17:** Mutuk kunöñ tilipköba Polgö qetñe kimbi kun aliga uru siksauk asuhuyök. Miangöra nanñe böröñan qetñi ohoyök.

Timotigö Kimbi 1

Polnön Timotigöra Kimbi mutukñi alök.

Jim-asa-asari

Timoti sepguli azi yangö namñi Juda ambi aka iwiñi Grik azi. Yanön Eisia prowinsnön mala uruñi melenða Kraistkö alañi aka malök. Mewö mala Polgö neñakñi aka bauköm wañgiiga mohotñe liliköba misin nup memba malohot. Polnön lömbötnön memba et al wañgibapuköra waimanjat keu bohonñi karöbut mötmöriba Buña Kimbi ki ohoyök.

Waimanjat bohonñi ketañi mi böhi takapulakanñi. Tosatñan zioz uruñe kinda keu gonjonñi kusum sohom engiba malgeri, Polnön yengöra aka galöm meme keu köhöikñi ohoyök. Böhi mienön Juda yengören mötmöt aka gölmegö mötmöt tosatñi mindirigetka könañamñini loloñqalon aiga kewö möt nariba jiba ambazip kusum engiba malget: “Gölme aka yuai pakpak ehakzini, mi bölönñi akza. Miangöra tosatñan Suepkö buña akingö kapan köla mötmöt asa-asambötñi qainñi kun qahö buña qem anğuba nenegö dönqizizin aka sonjo tosatñi walönða awanöm akze ewö, Anutunön mönö keu miangören qaköba amöt qem engimangö osima.”

Waimanjat keu bohonñi kun mi: Denöwö urumelen könagesö galöm köl enjiinga törörök Anutugö waikñi memba möpöseibeak. Polnön miangö qambañ keuñi papianön ohoyök. Mewöñanök zioz galöm, babafi aka nup meme ambazip tosatñan denöwö aka malgetka dop köljawi, miangö keu arenji mi jim asariba ohoyök.

Teteköñe keu bohonñi karöbutñi miangören Timotigöra goro keu tosatñi ohoyök. Undumñi yanön mönö denöwö Jisös Kraistkö welenqeçe ölöpnñi aka mötnarip ambazip kambuñi kambuñi engöbisiba bauköm enjiiga dop kölmawi, miangö goronñi ohom wañgiyök.

Buk kiangö bahönñi bohonñi 3 mi kewö:

Keu mutukñi 1.1-2

Ziozgö nup meme yengören jimkutukutu 1.3-3.16

Timotinön nupñi memapkö jimkutukutuñi 4.1-6.21

¹ Anutu, Amötqeçe Tonini aka Kraist Jisösnön galöm köl nengimapkö jörömqöröm al mamböt ak wañgizini, yetkön Pol nongöra jim kutuba kuñguba melaim niñgiyohotka aposol maljal. Kraist Jisösgö jitñememe mewöñi aka göbuk keu eraum mötpitköra kimbi ki ohozal.

² *O Timoti! Gi urugi melenða Jisös möt nariba mötnaripkö nahön sorokni aka maljan. Iwi Anutu aka Kembunini Kraist Jisös, yetkön mönö ak kömumba kalem möriam gihiyohotka luainön malman.

Enjololon kusum engibepukö galöm meme keu

³ Masedonia prowinsnön anmangö ahali, nalö miangören kewö jim kutum gihial, ‘Gi mönö Efesus sitinön toroqeba mala urumelen kambu bauköm engimakan. Tosatñan mötnaripkö keu kambañ tosatñi kusum sohomakzei, mi toroqeba akepuköra galöm mem anğuba malme.’ Mewö jim kutum engiba malmangöra jial.

⁴ Tosatñan bem sambañi sambañi aka ambösakon yengö qet arenji arenji mi tetekönñi qahö eraum mötketka supapköiga anğururuk aka keu qeçesi omanñi asuhui mötmörimakze. Yenön uruñini miangören ala sohobepuk. Keu sinñi

* 1:2: Apo 16.1

sinji jiji mewöŋi mi qahöp mahöp bauköm engimapmö, Anutugö malmal areŋi mi kewö ahöza, 'Kunŋan Jisös möt nariba uruŋi melenŋiga yaŋön mönö i amöt qem waŋgiiga letotma.' Merak mewö ak engimangöra kunbuk uruwahöt keu jim gihizal.

⁵ Jim kutum gihizali, miangö tohotŋi mi urujöpak. Nöŋön urukalem ahumapköra bim qeba kewö jim tuarim engiba malmangö kuŋgum gihizal: Yeŋön uruŋinan sarakŋi ahömapköra galöm köl aŋgugetka mötmöt bölöŋan mi qahö gwözöŋma. Qahö gwözöŋniga Anutunöŋ saŋep alakzawi, mi urukezapŋinan ölop möta malme. Mewö mala Kraist törörök möt narigetka Anutunöŋ mönö urukalemŋi uruŋine ali ölop ahumakŋa. Urujöpak mianjön sutŋine ahumapkö kapan kölakzal.

⁶ Tosatŋan Anutugö malmal areŋi mi siŋgiba janjuŋ aka oyoŋdewedewet keu omanj omanj laŋ jimakze.

⁷ Yeŋön Anutugö Köna keugö böhi malbingö möt zemö, nanŋinak keugö könaŋi qahö möt asariba mesohol köl ayök jimakze. Öne ambazip jeŋine awösamakak kinda keu laŋlaŋ köhöiba jiba bim gemakze.

⁸ Anutugö Köna keu mianjön mönö ölop sorokŋi akza. Mi könaŋangö dop törörök kusum aŋguba wuatangöinga ölop möhamgöm neŋgimakza, mi mötzin.

⁹ Anutu Köna keuŋangö könaŋi mönö kewö möt yaköme: Mi ambazip solanŋi diŋdiŋi yeŋgöra aka qahöpmö, Anutunöŋ mi ambazip gongonŋi mindiŋgöm engimapköra aka ali ahöza. Tosatŋan gongiba kewö ahakze: Iwilele jaubatbat aka keu qeba yaŋgiseŋ qakŋe aum jesöksök ahakze. Aŋgöjörak aka siŋgisöndokŋinambuk mala töndup Anutu nesampurek ak waŋgigetka uruŋini tölohoba nöŋöŋan malje. Iwinamŋini aka tosatiŋi enguget kömumakze.

¹⁰ Serowilin ahakze. Sodom taonöŋ akeri, miangö dop köna ongita azi nanŋirök aka ambi nanŋirök amimakze. Ambazip mem bölim engimegöra qeraköba jöhömakze. Keu muneŋ jimakze. Keu jiba jöjopaŋ keunöŋ jöhöba töndup tilipkömakze. Anutunöŋ ahakmeme diŋdiŋi akingöra Ölöwak Buŋa neŋgiyöhi, mi inŋi wainŋi aka memba mianjön qetalakze. Anutugö Köna keu mianjön ambazip mötnaripkö köna diŋdiŋi siŋgimakzei, mönö i mindiŋgöm engimapköra aka ahöza.

¹¹ Anutu, oyaenŋkoyaenŋ Tonŋi yaŋön mötnaripkö köna diŋdiŋi mi Buŋa keunöŋ ali ahöza. Nöŋön Ölöwak Buŋaŋi aködamunŋambuk jim sehimangö möt narim niŋgiba Buŋa keuŋi mi al niŋgiyök. Mewö.

Polnöŋ Kembu kalem möriamŋaŋgöra möpöseiza.

¹² Kraist Jisösnöŋ uruni keworiga nupŋi pöndaŋ memamangö dop nehi dop kölīga nupŋi niŋgiiga memakzal. Nup memamangöra kukösum niŋgiba mala kotzawi, miangöra Kembunini möpöseiba maljal.

¹³*Nöŋön mutuk Jisös mepaiköba alaurupŋi ilita sesewerowero könöpuk ak engiba malal. Mewö malalmö, yuai mi Jisös qahö möt nariba silebile tönpin mala laŋ aka memba malal. Siŋgisöndok mewö aka malalaŋgöra mönö ak kömum niŋgiiga kölönaiiba letoral.

¹⁴ Kembuninan kalem möriamŋi niŋgiba kelenmaleleŋ mokoiga nöŋgö qakne öngöyök. Mewö öngöiga mötnaripnan asuhuiga urujöpakö kondotkondot Tonŋi Kraist Jisös miwikŋaial. Yambuk qekötahöba kinda urukalemŋi buŋa qem aŋguba ambazip tosatiŋi urunan jöpaköm engimakzal.

¹⁵ Nöŋön ambazip tosatiŋi pakpak engongita siŋgisöndokö ambazip yeŋgö sutŋine ketanamŋini aka malal. Mewö malalmö, Kraist Jisösnöŋ siŋgisöndok ambazip amöt qem neŋgimangöra aka gölmenöŋ erök. Keu kötŋi mi nöŋgöreŋ

* 1:13: Apo 8.3; 9.4-5

ölñambuk ahök. Mianğöra keu köñji mianñon mönö pöwöwöm köhöikñi akza. Mi ambazip körekmakörek möt nariba aņñon kölbinaņğö dop akza.

¹⁶ Singisöndokö ambazip yeņğö ketaņamñini aka malalmö, Kraist Jisösnöñ ni kewögöra ak kömum niņgiyök: Yaņñon nömbuk uruluai qakñe amöt qem niņgiba Anutugö uru tandökñi aukñe asuhumapkö möt köhöiyök. Nöņğö könane ambazip tosatñan Jisös möt narimei, tandökñi mi yeņğöra kondel eņgimamğö mörök. Mi kondel eņgiiga ölop amqeba uruñini melenđa malmal köhöikñi aņğö buņaya akñe.

¹⁷ Ak kömum niņgiyöhaņğöra aka Anutu möpöseimakzal. Yaņñon Kiñ Kembu teteköñi qahö aka malma. Anutu mohotñan qahö göröñ qeiga kaisoņgolomñi qahö ehakzin. Nöññon yaņğö qetbuñañi nalö dop möpöseibiga teteköñi qahö aködamunñambuk aka ahöma. Keu mi ölna.

¹⁸ O mötnaripkö nahöni Timoti! Mutuk kezapqetok keu tosatñi göhöra jigeri, keu mianñon kötöngöm gihiiga ölop aködamungabuk aka malman. Keu mianğö dop kewö jim kutum giñizal: Göññon mönö malmal sarakñi malmangöra bim köhöikñi qeba malman.

¹⁹ Bim qeba mianğoreñ mötnaripki söörauba sohobapüköra mönö töp me-man. Urugi köyan köl aņgunöñga mötmöt bölöñan qahö gwözöñniga Anutunöñ urukezapnöñ saņep alakzawi, mi ölop möta malman. Ambazip tosatñan uru köyankölkölni mosöta lañ malgetka mötnaripñinan löwöriba köhömuñi aka pömsöm qeyök. Waņgenöñ köwet töromnöñ kuņguba jömgözawi, mönö mianğö dop kumkanjañ aka böliget.

²⁰ Mötnaripñinan pömsöm qeyöhi, yeņğö sutñine azi yahöt qetñiri Himeneus aka Aleksander maljahot. Nanak mindiņğöm etkimamğö osiba uruñiri melenmahotköra i Satangö böroñe al etkial. Al etkibiga Satangö kukösumñi ahakmemeñiraņğö dop möta uruñiran sihimbölogöra löwöriiga melenđa mepaqepaik kunbuk qahö akahorak. Mewö.

2

Buña nupkö köuluk areñ

¹ Yuai bohonñi mi köuluk nup. Nöññon mianğö uruwahöt keuñi jiba uruñini kewö kuņguzal: Inini mönö ambazip körek pakpak eņğöra köuluköba kapañ köla uleta Anutu qesim waņgiba saiwap jiba malme.

² Kiñ azi kembu aka gawmangö galöm ambazip könañi könañi yeņğöra aka köuluköba malme. Mewö kötöngöm eņgigetka diñdiñanök galöm köl neņgigetka luai qakñe guñböñjönjön malbin. Mewö mala Anutugö jitiñi wuatañğöba ahakmeme diñdiñi aka memba malinga aködamunñambuk ahakña.

³ Köuluk nup mewöñi mianñon ölop sorokñi akza. Mi Anutu, Amötqeqe Toninaņğö jemesoholñe ölop dop kölja.

⁴ Yaņñon ambazip körekñan Buña keu ölni möt kutuba uruñini melengetka amöt qem eņgii letotmegöra jitsihitiñi mörakza.

⁵ Anutu mohok-kun ahöza aka ambazip Anutubuk mindirim neņgimapköra azi mohok-kun mewöyök ahöza. Azi mohot Jisös Kraist yaņñon mönö mi köhöiiga tosatñan mi osimakze.

⁶ Yaņñon singisöndok ambazip pakpak neņğö sohopeni memapköra mal-malñi kölenđa mosörök. Buña keu mi Anutunöñ nalö ali tosatñan nalö törörök mianğoreñ könahiba naņğöba jim asarigetka neņğoreñ kayök.

⁷* Mianğöra aka Anutunöñ aposol akñamğö kuņguba melaim niņgiiga kantri dop lilikömakzal. Ambazip Jisös möt narimegöra Buña keu ölbölñi jim asariba

* 2:7: 2 Tim 1.11

kusum engiba uruñini kuñgum engimakzal. Könani mewö jiba munen kun qahöpmö, keu ölna mewö jizal. Mewö.

Azi aka ambi yeñgö malmal areñini

⁸ Mianğöra jitsihitnan kewö jizal: Azi eñön mönö pöndañ miri dop tokoba köuluk nup töp memba malme. Yom kazik aka aņgururuk mosötketka uruñinan sarahiiga ölop böröñini mem wahöta Anutu köulukömakñe.

⁹ *Ambi engö qambañ keuñini kewö jizal: Eñön mönö kinisöröñini löngöta silenini törörök turuba malme. Opo söro sorokñi aködamunñambuk mi mosötme. Nöröp jupñini qeba gawasü könañi könañi kude ala minjinda öñböñ meme. Kösasorom me goul mianñon kude meñölöm aņgume aka löngölöngöt söñgöröñi ketañi mianñon memba aiwelikqaiwelik kude akñe.

¹⁰ Aködamunñini ölni mi ahakmeme ölopñi. Ambi Anutugö jitiñi oņgitpinbukö keñgötñini möta qetñi jim aumakzei, eñön mönö nup ölopñi ölopñi jegang kinda memakñe.

¹¹ Azinöñ kusum engigetka ambi eñön mönö uruñini memba et al aņguba Buña keu ösöñ möta nesilam qakñe takpararak aka jitiñöñ söhöp kude melenmemö, mi urukönömñine ala malme.

¹² Ambi eñön azi galöm köla kusum engimeğöra nöñön 'On!' qahö jizalmö, tokogetka ösöñ keu böc tatme.

¹³ *Anutunöñ mutuk Adam miwikñaiba yañgö andöñe Iw (Ewa) miwikñaiyök.

¹⁴ *Mokoleñnöñ Adam qahö tilipköyökmö, ambi mi tilipköm wañgiiga keu oņgita siñgisöndok ahök.

¹⁵ Töndup ambi yeñön nup areñini wuatangöba morö memba Kraist möt nariba ahakmeme sarakñi wuatangöba urumelen alaurupñini urunöñ jöpaköm engiba ösöñ malme ewö, Anutunöñ mönö ölop amöt qem engiiga letota Suepnöñ öñgöme. Mewö.

3

Ziozgö nup galöm yeñgö keu areñ

¹ Kunñan urumelen köñagesögö uru galöm pasto akñamgö ak wañgizawi, yañön mönö nup sorokñi aködamunñambuk miwikñaima. Keu mi öl töhöñña.

² *Mianğöra urumelen köñagesögö uru galöm nupköra mönö azi kewöñi möwölöhöba kuñgugetka dop kölma: Kungö silenö köpösihitkö keuñi qahö, ambi mohot-kungö aņñi, kekpurikñi qahö, ahakmemeñi törörök galöm köl aņguiga göda qem wañgimakze. Yañgöreñ kamei, i ölop köl öröba köyan köl engiba mötmöt törörök kusum engimakza.

³ Kunöñ o köhöikñi namba bim lañ qeba aņgururuk aka moneñ membagun memamgö köpösöñgömakzawi, i qahöpmö, kunñan ölop ambazip mutulañgöba mökölim engiba guñböñjönjön ak engimakzawi, mönö azi mi kuñgume.

⁴ Kunöñ nanñi anöm-moröurupñi ölop galöm köla goro engiiga nahönböratuñan göda qem wañgiba keuñi pakpak tem köla maljei, mönö ia kuñgugetka kinma.

⁵ Galöm azi kunñan nanñi saiwaurupñi galöm köl engimamgö qötötangöza ewö, yañön Anutugö urumelen köñagesöurupñi mönö denöwö köyan köl engibawak? Mi mönö osibawak.

⁶ Azi kunñan nalö köröpñi uruñi melenña zeñ kinjawi, yañön ölop kutukutulañ galöm nup memenña aka malma. Kunñan nalö töröpñi uruñi melenña an köl kam köl aka tiwokmawok aka töptöpñe qeba silenini memba öñgöbapuk.

Bölönangö Tonjan kezapjupjup aiga Anutunöŋ keuŋi jim teköba közöl wanŋii erök. Mianŋö dop enŋö galömninan silenji memba öŋgöiga Anutunöŋ i Satan ewö jim teköiga etpapuk.

⁷ Galöm kunŋan urumelenŋö kopa yeŋgö sutŋine qetbuŋa ölöpnŋi qahö bisibawak ewö, ambazipnöŋ i lanŋ jim böliŋetka Bölönangö Tonjan mötöp simbanŋi ali mianŋön töteköi qeiga etpapuk. Mewö.

Ewanjelis aka Buŋa nup ambazip yeŋgö keu

⁸ Buŋa nup ambazip* yeŋön mewöyök ambazipnöŋ göda qem enŋimeanŋö dop taŋörakŋini qahö aka malme. Tosatŋan keu jöl yahötyahöt jiba wain o gwötpuk nembra möndömöndö qakŋe injarere mala monenŋ yuaigöra kapan kölakzei, i mönö kude kuŋgum enŋigetka kinme.

⁹ I qahöpmö, ambazipnöŋ mötnaripkö keu ölnŋi asa-asambötŋi Anutunöŋ indelöhi, mi nöm tik memba mianŋörenŋ qekötahöba uruŋinan tölöhobapuköra galöm mem anŋguba sarakŋi maljei, mönö ia kuŋgum enŋime.

¹⁰ I mewöyök mönö mutuk kewöt enŋigetka keu jizalanŋö dop köhöiba kingetka dop kölma ewö, mönö ölöp kuŋgum enŋigetka kinda Buŋa nupkö ambazipŋini aka malme.

¹¹ Yeŋgö ambiurupŋinan† mewöyök ambazipnöŋ göda qem enŋimeanŋö dop taŋörakŋini qahö aka andöqeŋe keu jitnöŋ yöhösaŋ qahö jiba malmemö, kekpurikŋini qahö mala yuai pakpak memburik-qemburikŋini qahö memba malme.

¹² Buŋa nup azinöŋ mönö ambi mohot-kungö apŋi aka nanŋi anöm-morö aka welenqeŋeurupŋi ölöp galöm köl enŋimakŋa.

¹³ Buŋa nup ambazip nupŋini ölöpnanök memakzei, ambazipnöŋ i göda qem enŋigetka qetbuŋa ölöpnŋi miwikŋaime. Mi miwikŋaiba ölöp awösamkakak kinda ambazip uruŋini kuŋguba Jisös Kraist möt naribingö keu mi köhöiba jimakŋe. Mewö.

Anutunöŋ Buŋaŋi asa-asambötŋi indelök.

¹⁴ O Timoti, nöŋön zilanŋ göhörenŋ kaba gekŋamgö jörömqöröm al mamböt akzalmö, töndup kimbi ki göhöra ohozal.

¹⁵ Nalöni qeköriiga kabilenŋbuköra mutuk kimbi ki kewögöra ohobi kaza: Gi Anutugö urumelenŋ könagesöurupŋi denöwö galöm köl enŋinöŋga ahak-memenŋinan diŋgiba ölöwakŋawi, mönö qambaŋ keu mi oyoŋda mötman. Anutugö könagesöurupŋi neŋön Anutugö mindimindiri zioz selŋi akzin. Malmal Tonŋi yanŋörenŋ qekötahöingä mindirim neŋgiiga miri dop tokoba keu ölnŋi jim sehimakzin. Keu ölnŋan böliba ösumŋi etpapuköra mianŋö wötŋi aka tandöŋi akzin.

¹⁶ Anutunöŋ amötqeŋegö könaŋi asa-asambötŋi indelöhi, neŋön Buŋa keu mi möt asariba kewö jim miwikŋaimakzin:

Buŋa Tonŋi yanŋön nanŋak gölme azia aka sutnine asuhuyök.

Asuhuiga keu jakeŋe albingö keuŋi lanŋ jarum bibihigetka Uŋa Töröŋan könaŋi solanŋi aukŋe kondelök. Mi kondela meiga Kembu aka wahöta Suep garata galöm köl enŋiiga aködammunŋi uba eket.

Mi eketka Anutunöŋ wanŋiri Suepnöŋ öŋgöba Anutubuk tata galöm köl neŋgimakza. Galöm köl neŋgiiga Buŋa keuŋi mi kantriŋi kantriŋi liliköba jim asarigetka gwötpuk yeŋön gölme dop möt narim wanŋimakze.

* **3:8:** Dikon mi azi aka dikones mi ambi, yeŋön pasto qöhöröŋine bauköba nup memba urumelenŋ kambu köyan köl enŋigiba Buŋa keunöŋ gumohoba silegö nup tosati memba mianŋön nanŋöm enŋimakze. Ewanjelis me urukuŋgukuŋgu ambazip yeŋön sel yaigepŋe kinjei, yeŋön uruŋini melenŋmegöra Buŋa keu kusuba mianŋön uruŋini kuŋguba goro enŋimakze. † **3:11:** Buŋa nup ambi aka Buŋa nup azigö anömnŋi yeŋgö jimkutukutuŋini jiza.

Mewö jim miwikñaininga ölña aködamunñambuk akza. Mewö.

4

Keu muneñi kusum enjigetka enjololon akza.

¹ Anutugö Uñañan keu kewö jim asariiga törörök möt yaközin: Gölmegö nalöñan tekömamgö akñawi, nalö mianğoreñ ambazip kelenmalelen yeñön mötnarip mosöta Kambu andö qeba ömewöröme yengö böröñine geme. Mewö gegetka ömenöñ sölölöhöba kusum enjimakzei, mönö yengöreñ mötmöt wuatangöba enjololon aka siksauk malme.

² Siksauk mi kewö asuhuma: Tosatñan urumelen silesile aketka Satanöñ aiwesökñi uruñine ain könöpñambuknöñ qekötahöba urukezapñini gwözöñniga köhömuñi aiga keu muneñi lañ jim sohomakze.

³ Yeñön ambazip kewö kusum sohom enjimakze, 'Urumelen ambazip enñön mönö awanöm anğömeme kude akñe aka nene tosatñi kude nempa malme.' Mewö kusum sohom enjimakzemö, Anutunöñ nene pakpak mi nembangöra miwikñaiyök. Mi ambazip Anutu möt nariba keu ölñi möt yaközini, yañön mi kötuatköiga ölöp saiwap jiba nembangöra al neñgiyök.

⁴ Anutunöñ yuai pakpak miwikñaiyöhi, mienöñ mönö ölöpñi akze. Mi andö qebinangö dop qahöpmö, yuai al neñgimawi, mi ölöp saiwap jiba buña qem anğubin.

⁵ Yuai ambazip jeñine dönqizinñambuk akawak ewö, mi mönö ölöp Anutugö keu jiba köuluköinga ösumñan walöñda dom-amöt qeiga sawölñi akña. Mewö.

Kraist Jisösgö welenqege ölöpñi mi kewö:

⁶ Göñön urumelen ambazip mewö kusum enjiba mala Kraist Jisösgöreñ Buña nup meme azi ölöpñi aka malman. Göñön Buña keu wuatangöba mala kotzani, mi tosatñi kusum enjiba nangak mewöñanök keu ölöpñi mi aka mötnaripkö qambañ keu pakpak oyoñda mötmöriba mianñön urugi gumohom anğuba malman.

⁷ Gölme ambazipnöñ bem samban keuñi oyoñdewedewet jigetka Anutugö Buña keunöñ böbölohot akñamgö akzawi, mi mönö yaköriba andö qeman. Mi andö qeba Kraist ewö aka malmangöra urugö kölguliguli aka malman.

⁸ Anutunöñ malmal nalö kewöñe gölmenöñ maljini, mi kötuatköm neñgiiga könañep oyaenköyaen malbingö jöhjöhö alök. Mönahot anğolat mi boromdökñanök sile guliguligöra bauköm neñgiba eretñi akzapmö, urugö kölguliguliñi mi tandönini bohonñi akza. Mianğöra urugö likepñi pöndañ kölguliba malnöñga mianñön mönö yuai pakpak mianğöreñ bohon köla nañgöm gihimakña.

⁹ Keu jizali, mi ambazip körekñanök möt anğön kölbinangö dop pöwöwöm köhöikñi akza. Keu pöwöwöm köhöikñi kun mi kewö,

¹⁰ "Anutu malmal Tonji yañön ambazip körek pakpak amöt qem neñgimamgö mötza. Urunini melenđa möt narim wañgimakin ewö, mönö ölña amöt qem neñgimakña. Mewö möt narizin. Nini tosatñan mewö asuhumapköra jörömçöröm mewöñi Anutu al wañgiba kinda nupñi memba silenini qeba aum-mörimakzin."

¹¹ Ambazip keu mianğö dop aka memegöra jim kutuba kusum enjiba malman.

¹² O Timoti, kunöñ sepgwölö maljanangöra memba et al ghibapüköra mönö mötnarip ambazip sutñine silik ölöpñi kewö kondel enjiba malman: Keu ölöpñanök jiba ahakmeme diñdiñi wuatangöba ambazip törörök jöpaköm enjiba malman. Mötnaripkö kölguliguli pöndañ memba Anutugö nupñi mem

sorokönönga miangöra möt narim gihiba malme. Mewö sarakñanök aka menönga ambazipnöñ ölop göda qem gihigetka malman.

¹³ Mönö pöndañ Urumelenjö Buña Kimbi mi jegep oyoñda kapañ köla jim asariba könagesö uruñini mianjön kunguba kusum engiba malman. Nalö sutñi kiangöreñ mewö aka malnönga nöñön kabiga dop kölma.

¹⁴ Jitñememe yeñön böröñini göhö qake ala köulukögetka Anutugö kezapqetok keu göhöra asuhuiga Anutunöñ nup memegö mötmöt kalem gihiiga uruge ahözawi, mi kude köyatimanmö, miangö qakñe nup memba malman.

¹⁵ Kude köyatimanmö, Buña Kimbi oyoñda jim asariba kusum engiba malman. Yuai karöbut mi mönö kapañ köla jegep köl guliba malman. Tanqañ qahö akñan ewö, urugahö töhötmöriamñan mönö qariiga köhöiba awösamkakak akñani, mi körekñan ek kutume.

¹⁶ O Timoti, mönö nangi uru silegi galöm köl aᅅguba urumelen nup törörök kusum engimangöra galöm mem aᅅguba malman. Mewö aka malman ewö, mönö nangi oyaenköyaen ak aᅅguman aka keugi mörakzei, mi mohotñe oyaenköyaen ak enginönga Suepnöñ öñgöme. Mewö.

5

Malö aka ambazip namñi mi kewö galöm köl engime:

¹ Azi namñi mi köhöikñanök kude mindiᅅgöba jim waᅅgimanmö, iwiᅅi ewö qambañ keu ösöñ jinönga mötma. Azi sepgwölö mi darumungi ewö ak engiba malman.

² Ambi namñi mi namurupki ewö qambañ engiman. Ambi seram mi nenurupki ewö ahakmeme sarakñi wuatangöba göda qem engiba malman.

³ Malö tinitosolomñini qahö mi mönö gödaqeᅅe qakñe ak engiba malman.

⁴ Malö kungö isimoröurupñi malje ewö, yeñön mönö mutukñi aka bohon köla i galöm köl waᅅgime. Anutunöñ jim kutum neᅅgiyöhi, yeñön mönö miangö dop nanñini saiwaurupñini köyan köl engibingö könañi mötme. Iwinamurupñinan mutuk nalö köröpñi köyan köl engiba malgetka yeñön miangö kitipñi melenᅅa tosañini meköm engigetka Anutugö jeñe dop kölma.

⁵ Malö ambi ölni, tinitosolomñi qahö nanñök maljawi, yañön mönö jörömqörömñi Anutu al waᅅgiba i sundan dop sunᅅem asak qesiba köuluköm waᅅgimakza.

⁶ Yañön mewö maljapmö, ambi malö tosañan uruñinan könöwiiga sihim kömbönañinaᅅö dop yuai laᅅlaᅅgöra böröjañ suhumakzei, yeñön gölmenöñ silebuk maljemö, töndup köhömuñi akze.

⁷ Mianᅅöra malö yeñön sileñine köpösihitkö keuñi qahö ahöi malmegöra mönö mewöyök jim tuarim engiba malman.

⁸ Kunñan nanñi tinitosolomurupñi qahö köyan köla engömosöri garömiᅅiñ maljei, yaᅅö ahakmemenñan mönö bölim teköza. Yañön Kembu möt narizawaᅅö keuñi mi silikñan qaᅅ köla urumelenjö kopa tandök oᅅgita böliqöliba malja.

⁹ Urumelenᅅ könagesö eñön malö tosañi kutukutulañ aka köyan köl engimakzei, malö kunñan yeᅅö areñnöñ kaᅅgotmapköra qeᅅesi alma ewö, ambi mi mönö kewötme. Kewötkeᅅka kewö asuhuiga iyök mönö qet areñ miangöreñ toroᅅeba ohoba alme: Kunöñ yambuñi (yarañi) 60 oᅅgita azi mohotkö anömña malök.

¹⁰ Mewö maliga tosañan könañangöra kewö naᅅgöba jimakze: Yañön nup ölopñi ölopñi memba mala morö galöm köla goro eᅅgiiga qariget. Ambazip kianañi miriñe köl öröba köyan köl eᅅgiiga Kraistkö alaurupñi sarakñan kagetka

uziņini saņģonģda esuhuba yaka tawen ģngiba malök. Wahöjalin uruņe malģeri, mi mem ölöwaka nup ölöpnģ pakpak memamģöra uruņģ pöndanģ jöhöba jeģep kinda malök. Malö mewöņģ mönö areņ papianöņ ohoba köyan köla malme.

¹¹ Malö ambi namņģ qahö, yeņģö qetņģini mönö qet areņ papia mianģöreņ kude alman. Mi albanak ewö, yeņģö sihim kömbönaņģinan könöp jeģga azi kunbuk membingö mötmöņģini ahum köhöiģa Kraist silekmalek ak waņģiba zioz nup mosötpepuk.

¹² Mi mosöta mutuk Kraist tem kölbingöra jöjöpāņ keuņģini aukņe jim jöhöģeri, mi qeģetka pömsöm qeģga Kraistnöņ keuņģini jim teköba gamu qem enģģiģa önewat laņ malbepuk.

¹³ Önewat laņ mala toroģeba kewö bölibepuk: Miriņģ miriņģ laņ liliköba nalö ayuhumegö könaņģ möt aņģön kölbepuk. Toroģeba böliba luasö keu laņ jiba keu bapņe qahö anda nanņģini imbi-imbi wuatāņģöba nup meme tandöktandök lilikqilik akepuk. Inöņ wainöņ laņ möndöba nup ölnģ qahö memba tosatņģ yeņģöreņ yuai mem sohobepuk. Keu tosatņģ yeņģöreņ yuaia qahöpmö, töndup mi öne laņ jim sehibepuk.

¹⁴ Mewö akepuköra sihimni kewö möta jizal: Malö ambi namņģ qahö yeņön mönö azi memba morö memba nup miriņģini galöm köla malģetka dop kölma. Mewö aketka tuarenģonģninan jim bölim neņģimamģö könaņģ jaruba mi qahö miwikņaima.

¹⁵ Malö tosatņģan galöm qahö mem aņģuba lök Kraist andö qeba eta Satangö könaņģe wuatāņģöba malģe.

¹⁶ Urumeleņ könaģesö neņön mönö malö ambi ölnģ, tinitosolomņģini qahö malģei, mi köyan köl enģģibingöra ahakzin. Mianģöra mötnarip ambi kungö tinitosolomurupņģan malöya akzei, yaņön mönö mi köyan köl enģģiba malma. Mianģö lömbötņģan mönö zioz kambu enģö qakņģine kude öņģöma. Mewö.

Ziozģö jitņememe mi kewö köyan köl enģģibin:

¹⁷ Jitņememeurup urumeleņ könaģesö ölöp galöm köl enģģimakzei, eņön mönö mianģö likeņģģ melenģda gödaģeģe öņģöģģöņģ kondel enģģiba malme. Yeņģöreņök tosatņģan Buņģa keu jim asariba kusum enģģimakzei, mianģöra mönö kötönņģini toroģeģet öņģöi enģģiba malme.

¹⁸ *Buņģa Kimbigö keu kunņģan mianģö könaņģ kewö jiza, “Wit padigö kötņģ aka kamböņģ mendenģbingöra bulmakau aziņģ waņģitģetka padi kambu qakņģe tiba tözözamģömakzawi, yaņģö numbuņģ mönö kude muzupköme. Mewö gumohom waņģiģetka ölöp nene kitipņģ neģga dop kölma.”

(Mianģö dop kiamnöņ böřöjaņ memba sömbup meköi qeģetka kitipņģ waņģiģet neģga dop kölma.) Keu kun kewö ahöza,

“Kunöņ nup meģga tosatņģan töwaņģ waņģiģetka dop kölma.”

¹⁹ *Jitņememe kungö silene keu laņ ala jim waņģiģetka yahöt me karöbutņģan mi qahö naņģöbeak ewö, i mönö keu jakeņģe kude alman.

²⁰ Denike yeņön siņģisöndok ahakzei, göņģön mönö i aukņe tembula jim enģģinöņģa körek pakpak keuģģi mi möta siņģisöndok akinbukö keņģötņģini möta galömņģini mem aņģumakņģe.

²¹ O Timoti, keu ohoba jim kutum ģihizali, mi mönö tem köla wuatāņģöba malman. Azi me ambi kun kude ek soriba tosatņģ kude qepureim enģģiman. Mianģöra kungö keuņģi mi qelģģe laņ kude jöhöman. Ambazip körek pakpak mönö öřöřöņ kewöta ak enģģiman. Mewö akņģangö keuņģi mi mönö Anutu,

* 5:18: Dut 25.4; Mat 10.10; Luk 10.7 * 5:19: Dut 17.6; 19.15

Kraist Jisös aka Suep garataurup sarakni yengö jemesoholñine jiba mi jöjöpän keunöñ jöhönönga mötpi dop kölma.

²² Tosatni yengö siñgisöndokñinan göhö qake öngögetka gamu miwikñaibanbuk. Miangöra kunñan “Kembugö nup memam,” me “Urumelen kambu toroqemam,” jizawi, yangö könañamni mutuk qahö kewöta börögi zilañzilañ yangö qakñe kude ala kötuetsköm wanñiman. Nangak sarakni malmangöra mönö galöm köl anguba malman.

²³ O Timoti, gi nalö tosatni kawöl ahum gihiiga “Yainmain!” qeta ahakzan. Miangöra mönö oyök kude nemanmö, wain o tosatni mewöyök nenöñga kömöñgoki bauköiga amqema.

²⁴ Keu kun kewö: Ambazip tosatñan siñgisöndok aketka zilañ aukñe asuhugetka ambazipnöñ eka qelñe jim tekögetka nalö kewöñe gamuñinambuk kinje. Mewö kinjemö, tosatñan siñgisöndok aka tölapköba mala könañgep Anutugö jeñe angotketka aukñe asuhui jim teköm enñima.

²⁵ Ambazip nup ölöñni aködamunñambuk memakzei, nup mianñon mewöyök nalö kewöñe aukñeyök ahöza. Nup ölöñni tosatni aukñe qahö ahöbeak ewö, mi mönö mewöyök tölapñe ahöbingö osiba könañgep asuhugetka ekin. Mewö.

6

Welenqeçe yengören qambañ aren

¹ Welenqeçeupurñini pakpak tonñangö mötöp bisiba nup töwanini qahö memakzei, enñon mönö tourupñini iwilele lañ kude ak engimemö, gödaqeçe pakpak kondel enñibingö dop enñeka malme. Enñon mönö tosatñan Anutugö qetñi mepaiköba jibepüköra kapañ köla kinme. Anutugö Buña keunñi ambazip kusum enñiinga mi enñö ahakmemenñangöra aka andö qegetka bölibapuk.

² Tourupñini tosatñan urumelen alaurupñini akzei, miangöra mönö gödaqeçeñini mötket eretñi akapuk. Mewö qahöpmö, tourupñini welen qem enñigetka nupñini ölöwahakzawi, yeñon Kraist möt narigetka wölböt ala ak enñigetka miangöra mönö kapañ köla tourupñinangö keu bapñe anda uruñini nupnöñ ala ölöñanök memba malme. Mönö mewö jim kutuba kusum enñiba malman. Mewö.

Buña keu jim sohogetka urukönöp akepuk.

³ Kembunini Jisös Kraistnöñ urugö kölguliguli akingöra Buña keunñi nenñiyöhi, neñon mönö miangö dop ambazip ölöwakñegöra kusum enñimakzin. Kunñan Buña keu ölni qiwitipköba keu kemañi murutñi ambazip kusum enñimakzawi, yanñon mönö kopa akza.

⁴ Yanñon silenñi mem öngömakzapmö, keugö könañi qahö möt kutuza. Qahö möt kutuba mötnaripkö keu kemañi kemañi jim melenqelenñe jitañakölik ahumapkö köpösöñgömakza. Mewö möta tosatni yembuk möndömkösök aketka ölni kewö asuhuma: Likeplikep urunöñ mututqutut anñururuk ak anguba uruqeçe keu töhöreñ jiba mem bölim anñubepükö sömbu mötmöt akze.

⁵ Mewö aka mötmötñini sohoi kahapmahap aka malmal ölnañgö könañi siñgiba kewö mötmörimakze, ‘Urunöñ kölguliguli ahinga mianñon döpnini aiga miangören tiba monen inap miwikñaibin.’ Mewö mötmöriba tokoba sundan dop jitañakölik eraumakze.

⁶ Mewö ahakzemö, neñon Anutu Buñanangö kölguliguli aka monen inap ahöm nenñizawi, mianñon uru luai qem anñumakzin. Uña Töröñan döpnini aka mem böñjöh ak nenñimakzawanñgöra mönö ölna oyaenñkoyaen ketañi miwikñaiba simbawon maljin.

⁷ Miangö könañi kewö: Nini mutuk börönanan yuai kun qahö memba öne töhön gölmenöñ asuhuin. Könañgep mewöyök börötak kömumba gölme ki mosöta anbin.

⁸ Mewö anbinmö, nalö kewöñe nene aka opo maluku ahöm nenjiiga mi-ambuk mönö mem böñjöh aka luai qem anjumakin.

⁹ Mewö akinmö, ambazip moneñ inap ketañi miwikñaibingö mötzei, yeñön mönö esapesapnöh simba ewö tötekögetka eta engumakza. Eta enjiuga sihim kömbönañini bölöñi bölöñi mi gwötpuk ahuba uru enjololoh mem enjiggetka kezapjupjup ahakñe. Sihim kömbönañini gonjonñi mienön mönö öröm johöm enjiggetka ulupköba köndenmönden miwikñaiba ayuhume.

¹⁰ Moneñ inapkö sihim kömbönañi mianjön mönö yuai bölöñi pakpakö jalöhñi akza. Gwötpuk yeñön moneñ inapkö urukönöp möta lilikqilik aka janjun aketka mötnaripñinan pömsöm qeiga lan malje. Urukönöp möt bibihigetka mianjön mönö wösöhñi qösöhñiga sihimbölö gwötpuk möta malje. Mewö.

Polnöh Timoti nupköra jim kutum wanjiyök.

¹¹ Gwötpukñan mewö maljemö, Anutugöreñ azi gi mönö yuai mewöhñi mi qizingöba andö qeba malmal kewöhñi malmangöra kapan köla malman: Ahakmeme diññi wuatangöba Anutugö malmal köhöikñi köl guliba malman. Mötnaripkö kölguliguli pöndañ memba ambazip ölna jöpaköm engiba malman. Mönö kapan köla köhöiba kinda ambazip gunböñjöhñöh qakñe ek engiba malman.

¹² Mönahot angotat azinöh aonjit miangöreñ luhut almapköra ösumñi pakpak qezaköba anjawi, gi mönö miangö dop mötnarip köl guliba aonjit aködamunñambuk miangöreñ köhöiba pöndañ bim qeba malman. Anutunöh malmal köhöikñe angotmangöra goholöhi, gi mönö malmal mi buña qem anjuba qekötahöba malman. Malmal köhöikñangö buñaya akzani, gönön keu mi ölöpnöhñök jim miwikñainöhñga gwötpukñan mi möta ölop nanjöba jimakze.

¹³ *Anutu yuai pakpak mem gulimakzawi, gi mönö yangö jeñe könañamgi jim miwikñainöhñ aka Kraist Jisösgö jeñe mi mewöyök jim miwikñainöhñga mörök. Jisösnöh premiö Pontius Pailötkö jemesoholñe könañamñi jiba keu ölöpnñi jim miwikñaiyöhi, mönö Kraist yangö jeñe kewö jim kutum gihizal:

¹⁴ Gi mönö Buña keu köl guliba pöndañ tem köla wuatangöba malman. Mewö malnöhñga kunñan siñgiba bölimanangöra aka keu jim gihimangö osima. Kembunini Jisös Kraistnöhñ kunbuk asuhumawi, nalö sutñi kiangöreñ mönö urugö nup mewö memba malman.

¹⁵ Anutunöhñ oyaenköyaen Tonji aka nalöhñi ali kam kunjiuga miangöreñ Jisös Kraist melaiiga aukñe asuhuiiga ekin. Anutunöhñ nanñök Öngöngöhñamnini aiga körekñan yangö nembö bapñe kinjin. Yanñon kin kembu yeñgö Kembunini aka pom jembon yeñgö bohonñini akza.

¹⁶ Anutu, oyaenköyaen Tonji yanñon mohot nalö kunöhñ qahö kömuma. Yanñon asakmararanñ mire euyangöreñ maliga körek neñon naninak miangöreñ öngöbingö qaközin. Gölmegö kunñan i jeñan qahö uba ehök aka ekñamgö osiza. Yangö qetbuñañi möpöseininga kukösum Tonji aködamunñambuk aka nalö teteköhñi qahö yuai pakpak galöm köla malma. Keu mi ölna.

¹⁷ Ambazip pomñi nalö kewöñe gölmenöhñ öngöngöhñi maljei, gönön mönö i kewö jim kutum engiba malman: Sukinapnöhñ nalö kungen qahöwak teköma. Miangöra yeñön mönö urunñini miangöreñ kude ala malme. Suki- nap qakñe kinda aiweliköba söngöröqök akze ewö, jörömqrömñinan mönö pömsöm qema. Urunñini gölmegö ainemalukunöhñ kude almemo, Anutunöhñ yuai pakpak miangöreñ köyan köl engimapköra al mambötketka dop kölma.

* 6:13: Jon 18.37

Anutubuk qekötahöba kingetka ölop yuai könañi könañi malmal söngaingöra kelenmaleleñ neñgimakza.

¹⁸ Kewö jim kutum engiba malman: Yeñön mönö nup ölopñi ölopñi jegep kinda memba mewö mianñon aködamunñinambuk akñe. Anutugö jeñe aködamunñinambuk aka amqeba jöjöröba tosatñi bauköm engiba kalem sehiba mendenña malme.

¹⁹ Mewö Anutugö jeñe qetbuñanñinambuk aka malmalgö guli dötnam ölni miwikñaiba mem sehimakñe. Guli dötnam mewöñi mi malmalgö tandö wötñi köhöikñi akza. Mi mem sehiba galöm köla ölop könañgep tandö wötñi mianñoreñ nangöba kinda malmal ölbölni buña qem añguba malme.

²⁰ O Timoti, Anutunöñ möt narim gihiba nup memegö mötmöt kalem uruge alöhi, mi mönö nupnöñ ala sohobapuköra galöm memba malman. Gölmegö keu oyoñdewedewet omanñi aka añgururuk supapköba jigetka sohomakzawi, mi mönö mosöta andö qeba malman. Tosatñan “Mötkutukutu eraum mötpin,” jiba keu sinñi sinñi jim sehigetka anakza. Mötkutukutu ölni mi mewö jim sohomakze.

²¹ Tosatñan mötmöt sohosoñi buña qem añguba jim miwikñaiba janjuñ aketka mötnariñinan söroräuba löwöräba sohöyök.

Anutugö kalem möriamñan mönö embuk ahöma.

Timotigö Kimbi 2

Polnönj Timotigöra Kimbi aliga 2 ahök.

Jim-asa-asari

Polnönj undumñi aka gwabö alabaukñi Timotigöra “Andö qambañi göndökñi wañgimam,” jiba Buña Kimbi ki ohoyök. Keu areñi bohonñi mi kapañkölköl. Polnönj mi jim asariba uruñi nañgöba qambañi kewö wañgiba ohoyök: Timoti göñön mönö pöndañ kinda Jisös Kraistkö könañi nañgöba jiba malman. Ölöwak Buña aka Jöhöjöhö Areñ Walñi mötzani, mönö miangören qekötahöba miangö keuñi ölbölñi mi ambazip kusum engiba urukungukungu nup memakñan. Tuarenjon ak gihigetka sihimbölö könañi könañi miwikñaiba mötpanak ewö, mönö töndup Anutunönj nup gihiyöhañgö dop mi kapañ köla memakñan.

Polnönj galöm meme keu köhöikñi Timoti kewö wañgiyök: Tosatñan “gukmaulem qakñe anjururuk omani aka kezapjupjup ahakzei,” göñön mönö miangö keunönj angota nalögi mösöhöba ayuhubanbuk. Anjururuk keu mewöñi mienön ambazip qahöpmahöp bauköm engimakzemö, ambazip kezap ala mörakzei, mönö i mem bölim engiiga ayuhume.

Polnönj qambañ keuñi pakpak nañgömamgöra nanñi malmalñangö kösohotñi ohoyök. Wuanönjgöra aka denöwö nup areñi ala bim qeba malöhi, Timotinönj miangö keuñi ölum qebapüköra mi kewö jim asariyök, “Nöñön Jisös möt nariba lömböt möta mökösoñda urukalem aka malal. Sesewerowero ak niñgigetka sihimbölö möta kapañ köla köhöiba kinal.”

Buk kiangö bahönji bohonñi 5 mi kewö:

Keu mutukñi 1.1-2

Anutu möpöseiba Timoti qambañ wañgiyök 1.3-2.13

Goro aka galöm meme keu tosatñi 2.14-4.5

Pol öröm ureim ak wañgigetka malök 4.6-18

Kimbigö keu kötni bohonñi 4.19-22

¹ Anutunönj jitsihitñi jim kutuba Pol ni kungum niñgiiga Kraist Jisösgö aposol akzal. Kraist Jisösbuk qekötahöba kininga malmal köhöikñi neñgimapkö keu jöhöyöhi, miangö Buña keuñi jim asarimamgöra melaim niñgiiga maljal.

² *Timoti göñön mötnaripkö wölböt nahöni akzan. Nöñön göbuk keu eraum mötpitköra kimbi ki ohozal.

Iwi Anutu aka Kembunini Kraist Jisös, yetkön mönö ak kömumba kalem möriam gihiyohotka luainönj malman.

Polnönj Timoti uruñi nañgöba keu jiyök.

³ Nöngö ambösakanan Anutu welenni qeba malgetka nöñön toroqeba nupñi membiga Anutunönj “Dop kölja,” jiiga urukezapnan mewö mörakzal. Uruni sarakñi aiga Anutu möpöseimakzal. Möpöseiba sun gem asak köuluköba gi qösösök mötmörim gihimakzal.

⁴ Gömosötpiga sahötnönga imbilgi eröhi, nöñön mi mötmöriba gekñamgö awöweñgöba kapañ kölakzal. Geka köisirik tatziga sösoñgainönj uruni kokolak qemapköra mötzal.

⁵ *Göñön geñmon qahö ölña Jisös möt nariba maljani, keu mi urukönömne ahöiga mötmörimakzal. Mutuk abugi Lois aka namgi Yunis yetkön uruñiri

* 1:2: Apo 16.1 * 1:5: Apo 16.1, 11; 1 Tim 2.7

melenohotka mötnaripñiran ahuyök. Yetkö andöñire göñön mewöyök aka maljani, mewö möt narim köhöizal.

⁶ Mianğöra ikmaok malbanbuköra keu kewö köl gulim gihizal: Nöñön mutuk böröni nöropke ala köuluköbiga Anutunöñ nup memegö mötmöt kalem ghiiga uruge ahözawi, mi mönö mem gulinöñga könöp bölam ewö köhöiba jeba qahö ilin alma.

⁷ Keu ki mötmörinöñ anök: Anutunöñ Uña Töröñi mi zirinziñ aka qarösömbu mötpingöra qahöpmö, nanñi kukösumgö Uñañi neñgiiga ölop uruninan jöpaköm aᅇguba ahakmemenini törörök galöm köl aᅇguba kinbin.

⁸ Mianğöra Kembuninaᅇgö keuñi naᅇgöba jim sehimamgö taᅇqaᅇ kude akñan. Mewö qahöpmö, mönö ni ewö aka malman. Nöñön Kembugö nupñi memba malbiga mianğöra kösö mire al niᅇgigetka tatzalmö, töndup nöᅇgöra aka gamu kude möta malman. Mönö köhöiba ni ewö awösamkakak kinda urugö nup memba malman. Ölöwak Buᅇaᅇgöra aka aᅇgösirip ak gihibeak ewö, mönö mianğö sihimbölöñi möta mökösoᅇda bisiba malman. Anutunöñ kukösum gihimakzawaᅇgö dop mi ölop nömbuk mohotᅇ kapaᅇ köla bisiba malbit.

⁹ Anutunöñ möpᅇaᅇgö möpᅇ Suep gölme qahö miwikñaim etkiba nalö mianğöreᅇ neᅇgöra mötmöriba areᅇ kewö alök: Anutunöñ Kraist Jisösgöra aka kalem möriam neᅇgima. Areᅇ mi ali ahöiga mala kota malgetka nini ahuin. Ahuinga Anutunöñ nini yaᅇgö buᅇaᅇñi aka sarakñi malbingöra neᅇgohola amöt qem neᅇgiyök. Naninak yuai ölopñi ahinaᅇgöra aka qahö möwölöhöm neᅇgiba neᅇgoholökmö, nanñi areᅇ walñi mi wuatanaᅇgöba kinda neᅇgoholök.

¹⁰ Areᅇ walñi mianğö ölni mi nalö kewöᅇne aukᅇne asuhuyök. Amötqee Toninan asuha Anutugö kalem möriamñi mokom neᅇgiyök. Kraist Jisösnöñ asuha kömupkö ösumñi qeba tulumgöi eriga Ölöwak Buᅇaᅇñi indeliga asariyök. Buᅇa keu mi möt nariba ölop malmal kömbönañi miwikñaiba teteköñi qahö köhöiba mala nalö kunöñ qahö kömum köhöibin.

¹¹ Anutunöñ ni Ölöwak Buᅇa jim asariba ambazip kusum eᅇgimamgöra kuᅇgum niᅇgiiga melaimelai azi aposol akzal.

¹² Aposol akzalaᅇgöra aka nupñi köhöiba membiga aᅇgösiripñi bisiba sihimbölö mörakzal. Suep Azi möt narim waᅇgimakzali, nöñön yaᅇgö könañi ölop möt yaközal. Mianğöra awösamkakak kinda gamuni qahö mörakzal. Qahö! Anutunöñ möt narim niᅇgiba Buᅇa nupñi al niᅇgiyöhaᅇgö dop ni galöm köl niᅇgimapkö köhöiba malma. Mewö maliga nupᅇan qahö sohoba eriga mal öᅇgöba nalö ketane aᅇgotpin. Mewö möt narim köhöizal.

¹³ Mötnaripkö keu urunini möhamgömapkö köhöizawi, nöñön keu ölni mi kusum gihiba silik ölopñi kondel gihiba malal. Mi mönö uru könöᅇge ala wuatanaᅇgöba malman. Nini Kraist Jisösbuk mohot kininga jöpaköm neᅇgimakzawi, göñön mönö urukalem mianğö uruᅇ malman.

¹⁴ Anutunöñ geke möt narim gihiba yuai ölopñi pakpak ghiiga buᅇaᅇ akzawi, mianᅇñ lolonqaloᅇñ aka sohobapuköra mönö mi galöm memba malman. Uña Töröñaᅇ urunine kinda maljawi, mönö yaᅇgö kukösum qakᅇne yuai ölni mi galöm kölnöñga kahaimök ahöma.

¹⁵ Eisia prowinsgö neᅇakurupni yeᅇñön körek nömosöta andö nuᅇguget, mi mötzan. Azi qetñiri Figelus aka Hermogenes yetköñ yeᅇgö sutñine maljahot.

¹⁶ Tosatᅇan nömosötketmö, Onesiforus yaᅇñön qahö. Mianğöra Kembu, gi mönö Onesiforusgö saiwaurupñi ak kömum eᅇginöñga malme. Azi mianᅇñ mönö nöᅇgö tapepnaᅇgöra (muᅇgamuᅇga) sisit gamu qahö ak niᅇgimakzapmö, nalö gwötpuk mianğöreᅇ köro-ölöwak qem niᅇgiiga imbini böñjöñ kölök.

¹⁷ Onesiforusnön Rom sitinön ki kangota nalö miangörenök nongöra kapan köla jaruba mala miwikñaim ningiyök.

¹⁸ Yanön mutuk Efesus sitinön denöwö baukbauk ketani ketani aka mem amqem ningiba malöhi, mi nangak ölop möt kömuzan. Miangöra nalö ketane Kembangö qöhöröne angoringa Onesiforusnön ak-kömukömugö töwanji miwikñaimapköra köuluközal. Mewö.

2

Kraist Jisösgöra mönö bim qeba malman.

¹ O mötnarip nahöni Timoti, gi mönö Kraist Jisösbuk qekötahöba kalem möriam uruñe böñ qeba köhöiba kinman.

² Nönön Buña keu kusum gihibiga gwötpukñan neka nanjöba jiget mötnöñi, mi ambazip möt narim engienjigö dop akzei, mönö yengö buñaya ahömapköra al engiman. Mewö al enginöñga ahöi ölop ambazip tosatñi toroqeba kusum engimeangö dop akñe.

³ O Timoti, gi mönö Kraist Jisösbuk kinda yarö aziñi aködamunñambuk aka kapan köla köhöikñanök bim qeba malman. Angösirip ak gihimei, miangö sihimbölöñi mönö möta mökösoñda bisiba malman.

⁴ Yarö azigö tandökñi kewö: Suahö galöm bohonñinan azi engömeiga yarö kambugö areñnön angota anda kaba nup töp memba maljei, yenön mönö körek galömñinan jim kutumakzawangö dop tem köla akingö jöjöröba kinje. Mewö kinda nanñini malmalgö nanjönanjögöra yuai kun qahö memba malje. Uru denqen qahö malje.

⁵ Miangö dopkeuñi kun kewö: Mönahot angolat azinön aongitnön angota jimkutukutu galömgö keuñi ongita ösumñan lan anjawi, yanön mönö aködamunñambuk qahö akña. Yangö nöropñe luhut alalgö ila kun qahö kölgetka gema. Miangöra gi mönö diñdñanök anman.

⁶ Mewöñanök kölkömöt azinön nup lömbötñi meiga ölni asuhuiga mutuk anda jeni qeba neiga dop kölma. Tosatñan löwörigeri, yenön yangö andöñe kame. Gi mönö miangö dop köhöiba nup memba malman.

⁷ Keu ohozali, mi oyoñnön lömböriiga Kembunön mönö mötkutukutu gihiiga mi pakpak ölop möt asariman. Miangöra mi mönö uru könömge ala mötmöriba malman.

⁸ Mönö Jisös Kraist mötmöriba malman. Nönön Ölöwak Buña jim asari-makzali, Jisösnön keu miangö dop kiñ Deiwidkö gwölönarökña ahuba Amötqeqe Tonji aiga Anutunön mem gulii kömupnöhök wahörök.

⁹ Nönön Ölöwak Buña keu kapan köla jim asariba angösiripkö sihimbölöñi mötpiga kegwek-kahasililiñ azi ewö kösö gwarö mem ningigetka tatzal. Mewö tatzalmö, Anutugö Buña keuñi mi mönö qahö jöhöba gwaröhöget.

¹⁰ Könañi miangöra aka nönön sihimbölö pakpak möta mökösoñda köhöiba kinjal. Anutunön ambazip nanñanjögöra möwölöhöm engiyöhi, nönön mönö yengöra aka kapan köla bim qeba maljal. Kraist Jisösnön amöt qem engii yenön mewöyök letota oyaenköyaen akñegöra mötzal. Uruñini melenja malme ewö, mönö Suepkö asakmararanön öngöba teteköñi qahö köhöiba mala mal öngöme.

¹¹ Keu ki mönö pöwöwöm köhöikñi akza,
“Nini urunini walñan yambuk mohotñe kömui maljin ewö, mönö mewöñanök yambuk köhöiba malbin.

¹² *Yambuk mohotñe sihimbölö möta mökösoñda maljin ewö, mönö mewöñanök yangö bemtohoñ uruñe yambuk galömkölköl akin.

* 2:12: Mat 10.33; Luk 12.9

Nini i qan köljin ewö, yanön mönö mewöñanök qan köl neñgiba neñgehörön kölma.

¹³ Nini andö qem wanğiinga likepñi melen neñgimapkö keu jöhöi ahözawi, yanön mi qeapkömamgö osima.

Mindiñqindiñ aka nanñi könani utekömamgö qötötangömakza.

Miangöra peksek aka keunini pöndañ qahö wuatangöbin ewö, yanön mönö töndup (misila) keunñi pöndañ wuatangöba miangö dop ak neñgima.” Mewö.

Anutugö Buña nup azi kewö aka malman:

¹⁴ O Timoti, keu ki ölüm engubapüköra mi mönö jim gulim engiba Anutugö jemesoholñe kewö jim kutum engiba malman: Mötnaripkö keu imbiñi imbiñi mi mönö melenqelenñda möndömkösök kude akñe. Jitnakölik mönö qahöpmahöp bauköm neñgimakzapmö, tosatñan goranora keu mewöñi möta enjololon aketka mötnaripñinan sohoi ayuhubepuk.

¹⁵ Göñön mönö Buña nupkö esapesap könani könani mi luhut alnönğa Anutunöñ geke “Dop köljan,” jimapköra kapañ köla kinman. Gi Kraistkö nupköra gamu kude möta malmanmö, Buña keu ölni mönö törörök mendenña uruñini kuñgum engiba malman.

¹⁶ Gölmegö keu oyoñdewedewet omani omani mi mönö yaköriba andö qeman. Tosatñan mi sehiba jiba mala mewö mianön gölmegö angjöörakñe qekötahöba Anutu toroqeba nöñöñgan aka kahapmahap ahakze.

¹⁷ Uzi köhöikñi (qetñi kensö) mianön busu siribuk qem qariba yöhöba anakzawi, yeñön miangö dop keu omani jiba mianön ambazip mem bölim engimakze. Yeñgö kambunöñ azi yahöt qetñiri Himeneus aka Filetus maljahot.

¹⁸ Yetköñ keu ölnangö könani mosöta janjuñ aka keu sinñi kewö jimakzahot, “Urumelen ambazip neñön lök guliba wahöta maljin. Miangöra könangep kömupnöhök kunbuk qahö guliba wahötpin.” Mewö jiba tosatñi enjololon mem engiyohotka mötnaripñinan bölimakza.

¹⁹ *Mewö bölimakzapmö, Anutunöñ tandö pöwöwöm köhöikñi kuñguyöhi, mianön mönö töndup qahö uruba kinja. Miangö muñgemñi mi kewö ohoget ahöza, “Kembunöñ nanñi buñani akzei, mi ölop möt kutum engiza.” Muñgemñi kun kewö, “Ambazip Kembugö qetñi memba qetzei, yeñön körek mönö ahakmeme bölöñi qem yaköriba malme.”

²⁰ Miri ketani miangöreñ jout, kimbut, alnene, umnene könani könani ahöza. Tosatñan ipnöñ aka gwaköm gölmenöñ memenñi, mi nalö dop memba nupnöñ alakzin. Tosatñan goul aka silwönöñ memenña. Aködamunñinambuk mewöñi mi sösoñgai nalöñeyök nupnöñ alakzin.

²¹ Miangö dop kunjan keu omani mosöta nanñi köl köñjorat mem anguzawi, yanön mönö kimbut goulnöñ memenñi kun ewö akña. Tonjan i memba nup aködamunñambuknöñ ali memakña. Mi meiga töhötmöriamñambuk aiga Ketanjanñan yangöra söñgaimakña. Anutunöñ mem sarahim wanğiiga titiñgitñi kinda nup ölopñi pakpak memamgö jöjöröba kinma.

²² Sepguli malmalgö sihim kömböñani bölöñan galöm ak ghibapüköra mönö galöm mem anguba malman. (Nupkahö ölnan etpapüköra mi jizal.) Esapesapnöñ öröm gihimakzei, mi mönö qizingöba andö qeba malmal kewöñi malmangöra kapañ köla malman: Ambazip uru sarakñangö qakñe Kembu bauköm engimapköra qerakzei, yembuk mönö ahakmeme diñdiñi wuatangöba Anutu törörök möt nariba ölna jöpaköm anguba luainöñ malme.

* 2:19: Jan 16.5

²³ Tosatñan kezapjupjup keu jiba oyondewedewet ala jitnakölik aketka gora-nora angururuk asuhumakza, mi ölña mötzan. Mianğöra mi mönö yaköriba andö qeba malman.

²⁴ Kembangö nup meme azi akzawañön mönö angururuk akñawañgö dop qahöpmö, ambazip körek gunbönjönjön qakñe ak engiba amqeba kusum engiba malma. Anğösirip ak wañgigetka mi köhöiba mökösönnda malma.

²⁵ Tosatñan tuarenjön ak wañgigetka i ölop uruluai qakñe mutulañgöba mindingöm engimakña. Mewö ak engiiga Anutunönj uru mölöwörim engiiga ölop Buña keu möt kutuba uruñini melenbeak.

²⁶ Tuarenjön ambazip yeñön Bölöñi Tonangö mötöp simbanönj tötekögetka gwaröhöm engii jitñi tem köla ahakze. Mewö aka imbiñini möta urumötmötñini ahuiga yañgö kösönöhök lolohoba etpeak. Mewö.

3

Nalö teteköñe malmal böliba anğöjörakñambuk akña.

¹ Keu kötni ki mönö möt kutuba malman: Jisös kaka nalöñan töriiga ambazip könañamñinan böliiga teteköñe malmal kanjamñambuk kewö asuhuma:

² Ambazipnönj nanñinañgörök mötmöriba monen yuai girinjabak membagun membingö nepaqepalok (gridi) köpösönğömakñe. Silenini möpöseiba korua ewö ginginñini töröreiba söngöröqök mala uruqeçe keu töhöreñ lañ jimakñe. Iwinamñini yeñgö jitñini qahö tem köla yuai ölopñangöra saiwap qahö jiba nemsep-pamsep (nem-hölölök) ahakñe. Anutugö nesampurek nönöñgan ahakñe.

³ “Nanñi lömböra,” jiba wösö mötmöt qahö ahakñe. Tosatñi yeñgö sinğisöndokñini qahö mosöta mianğö urubölöñi bisimakñe. Andöqeçe keu yöhösañ jiba nanñini qahö galöm köl anğuba ambazip lapköba öröm ureim ak engimakñe. Ahakmeme ölopñi tököba mianğö ölan engöhömakña.

⁴ Mamalolo aka nanñini imbi-imbi wuatangöba jaubatbat ahakñe. Söngöröqök mala jakbak-örañbörañnönj uruñini uwutapköiga urukönöp ahakñe. Silegö sihim sösongainñinañgöra gwötpuk ak engiiga Anutugöra mötket eretñi aiga göragöra ahakñe.

⁵ Anutugö Buña nup bahösapsap bisiba silebile memba Sonda areñ lañ wuatangöba möndömakzemö, ahakmemenñinan Anutugö kukösumñi mi je köndat qeba qañ kölakze. Ambazip mewöñi mi mönö jabö ala qizingöba andö enguba malman.

⁶ Yeñgöreñök tosatñan lañ liliköba ambazip miriñine öngöba kelök keunönj uruqeçe mem engiba kezapñini kumbaumakze. Kumbaugetka ambi tosatñan löwöriba yeñgöreñ qekötahömakze. Ambi sinğisöndokñinañgö gamugöra et engiiga sihim kömbönañini könañi könañi mienön yeyasenñen mem engigetka siksauk akzei, yeñön i bawian mönera aka köpeim engigetka keu mötöpñine et engumakza.

⁷ Ambi mewöñi mienön möt lömböriba sundan keu kusum engimegö möndöba mörakzemö, Buña keu ölñangö könañi mi nalö dop möt kutubingö osimakze.

⁸ *Ijpt kantrigö tirip qözölgözöl azi qetñiri Janes aka Jambres yetkön Moses tuarenjön ak wañgiyohot. Takapulaka ambazip yeñön mietkö dop Buña ölñangö tuarenjön ahakze. Ambazip mewöñi yeñgö mötmötñinan sohoiga kahapmahap akzei, mienön Anutunönj mötnariñini esapköi et engiiga Kembangö kinkinñinan sööreima.

* 3:8: Eks 7.11

⁹ Nalö töröpñi sileñini memba öngömömö, nupñinañgö ölni mi nalö qahö köriiga pömsöm qema. Ijpt azi yetkö kōnañamñiran aukñe asuhuyöhi, yeñgö uruqahöpñinañgö kōnañan mönō mianğö dop aukñe asuhui ambazip körekñan ek asarime. Mewö.

Polğoreñ jimkutukutu keu teteköñi

¹⁰ Yeñgöreñ mewö asuhumapmō, nöñōn malmalnañgö tohotñi murutñi kuñguba areñ alal. Ambazip Buña keu kusum eñgiba ahakmemeni aka memba malali, göñōn mi lök eka möt kömuzan. Malmalnañgö tohotñi wu-atañgōba mötnaripkö kölguliguli pōndañ memba sihimbölö mökösōñda malali, mianğö kösohotñi jiba jigetka möt sölöñgōzan. Urumelenñ alaurup urunan jōpakōm eñgiba malal. Tuarenjoñ añgōsirip ak niñgigetka mianğöreñ kapañ köla köhöiba kinda malal.

¹¹ *Sesewerowero kahasililiñ kōnañi kōnañi ak niñgiba malgeri, mi mötzan. Antiokia, Aikoniam aka Listra taon karōbut mianğöreñ sihimbölö nöñgō qakne öñgōiga wahōjaliñ mörali, mi yuai kanjamñambuk ahök. Iwinañgō jitñi! Añgōsirip mökösōñda bisiba malalmō, Kembunōñ mi pakpak mianğöreñjök meköm niñgiyök.

¹² Keu ki mötnōñ: Ambazip Kraist Jisōsbuk mohot kinda malmal köhöikñi mala mianğö kölguliguliñi akingō mötzei, yeñōn körek sesewerowero mi-wikñaime. Ni añgōsirip ak niñgiget ewō, tosatñi iñini mewöyök ak eñgime.

¹³ Tirip qözölqözöl ambazip bölōñi Buña nup silesile memba öñjōmbōbōp akzei, yeñōn toroqeba bölimqōlimakñe. Yeñōn ambazip tosatñi tilipköm eñgiba nanñini mewöyök tilipköm añguba malme.

¹⁴ Yeñōn mewö malmemō, Timoti gi Buña keu ölni möta uru könömge ala möt narim köhöizani, mönō mianğöreñ toroqeba böñ qeba kin köhöiba malman. Denike yeñōn kusum gihigeri, göñōn yeñgö kōnañamñini möt kutuzan. I möt narim eñgizanañgōra mönō Buña keu tōp memba kude sōrōrauba mosōtman.

¹⁵ Urumelenğö Buña Kimbi Törōñi mi morökötkeyök möt sölöñgōba mala kotzan. Göñōn mönō mi oyoñda mötmörinōñga mötkutukutugi asariiga mianğö qakñe kinda Amötqeqe Toñañgö kōnañi möt asariman. Mi möt asariba Kraist Jisōs möt narim wañginōñga amöt qem gihiiga toroqeba letota malman.

¹⁶ Anutunōñ Buña Kimbigö keuñi pakpak mi ambazip tosatñi sölölohōm eñgii ohogetka kewō mem ölöwak neñgimapkōra aka ahōza: Mi oyoñninga Anutunōñ urunine sölölohōba kōna ölni kusum neñgiba bölōñamñinañgōra tembula jim neñgiba mindiñgōm neñgimakza aka malmal solanñi malbingōra goro neñgiba köl gulim neñgimakza.

¹⁷ Anutugö ambazip neñōn mi oyoñda köl guliba Anutu jitñañgö dop köhöiba akōdamuninambuk aka nup ölöpñi pakpak membingö jōjörōba malbin. Mewö.

4

Polnōñ nupñi undumñi Timotigö qakñe alök.

¹ Kiñ Kembunini Kraist Jisōsnōñ asuhuba jebuk malbini me kömumba ahōbini, neñgö keunini kewōta jim tekōba tosatñi nini bemtohoñe ala galōm köl neñgima. Nöñōn Jisōs mi aka Anutu yetkö jemesoholñire kinda gi urugö nup memangōra jim kutum gihizal. Mi wuatāñgōmangö jiba keu mi jōjōpañ keunōñ jōhōnōñga mötppi dop kölma.

² Kewō jim kutum gihizal: Göñōn Buña keu jiba ambazip uru kuñgum eñgiba malman. Mötmegö nalōñini dop köl eñgiza me qahö dop köl

* 3:11: Apo 13.14-52; 14.1-20

engiza, mönö tøndup kapan köla wahöta keu jim asariba malman. Ambazip bölönamningöra jim engiba mindinçindin aka galöm meme keu jiba uruwahöt keu engiba malman. Keu mötme me qahö mötmea kun, mi tøndup mönö mököşönda kinda köna ölni nalö dop kusum engiba malman.

³ Neñön mötnaripkö keu nalö kewöñe ambazip ölöwakñegöra kusum engimakzinmö, nalö murutñi kun kam kuñguiga miangöreñ mötnaripkö keu kembangan kun mötpepuköra tököba kezapñini gwözöñ akñe. Keu murutñi murutñi mötpingö kezapñini köröpñi köröpñi aka aziña azi sesegilgil öröm engigetka kaba ambazip keu i me wai mötpingö sihimñi mötzei, miangö dop kusum engigetka malme.

⁴ Mewö mala Buña keu ölni mötpinbuköra nönöñgan aka kezapñini gwözöñda bem sambannñi sambannñi lañ jiji jimakzeangöreñ göröken melenña mi kezap ala möta malme.

⁵ Malmal mewö me mewö uteköba asuhumawi, Timoti gi mönö tøndup böñ qeba zeñ kinda ahakmemegi törörök galöm köl anguba malman. Angösirip ak gihimei, miangö sihimbölöñi mönö mököşönda bisiba malman. Urukunçukunçu (ewanjelis) azigö nup arenñ mi körek dop köla mem teköman.

⁶ Nalö köröpñi bauköm gihimangö osimamangöra mewö jizal. Tandö lopion möpöseibingöra sömbup qeba jakenöñ ala ohogetka köwaknön öngözapma. Miangö dop nöñön malmalni Anutugöra ala kölenña nupñi memba malalangöra gawman yeñön keuni jöhöba nuñgugetka nani sepni mokomangö dopdowizal. Gölmö ki mosötmami, miangö nalöñan lök kam kuñgumangö dopdowiiga mötzal.

⁷ Mönahot angolat azinöñ ösumtiti aongit nalöñe luhut almangöra ösumñi pakpak qezaköba tiba anjawí, nöñön miangö dop mötnarip köl guliba aongit aködamunñambuk ak teközal. Kraist möt narimangö keu jim jöhöyali, mi qahö köyatiba qañ kölalmö, miangö bimñi mönö pöndañ köhöiba qeba malal.

⁸ Kembunöñ jimtekötekö Tonji diñdini aka malmalni kewöta solannñi aka malali, miangö ñla soromñi mi jim teköm niñgiiga nöñgö mamböt ahöza. Kembunöñ lilingöba kamawi, nalö miangöreñ mi niñgiba imbine köli geiga qetbuñanambuk akñam. Mi nöñgörök qahö niñgimapmö, ambazip jöpaköm wangiba kunbuk asuhumapkö al mambörakzei, mi yeñgö imbiñine mewöyök köli gem engima. Mewö.

Neñakurupnan nömosöta qeñgalanña kölget.

⁹⁻¹⁰ *Nalö kewöñe gölmegö ahakmeme aka memakzei, neñakni Demas yañön uruñi miangöreñ jöhöba nömosöta Tesalonaika sitinöñ anök. Neñakni Kresens yañön Galesia prowinsnöñ anök. Taitusnöñ Dalmesia gölmenöñ anök. Miangöra gi mönö zilañ nöñgöreñ kamangö kapan kölman.

¹¹ *Luk yañön nanñök nömbuk maljit. Maknöñ welen gem niñgimapköra gwötpuk möta yangöra osizal. Miangöra Mak wangita mohotñe kamahot.

¹² *Neñakni Tikikus melaim wangibiga Efesus sitinöñ anök.

¹³ Troas taonöñ mala malukuni azi qetñi Karpus yangö mire mosörali, mönö mi memba kaman. Mewöyök kulem lama sileñe ohoba lipiñgeri, nöñgöreñ lama sile mi mönö kapan köla memañ aka miangö andöñe buk tosatñi mi mohotñe memba kaman.

¹⁴ *Aleksander, silwö kopö ohom qeköqekötahö azi mötzani, yañön bölöñi könañi könañi gwötpuk ak niñgiba malök. Kembunöñ ahakmemenñi kewöta

* **4:9-10:** Kol 4.14; Flm 24; 2 Kor 8.23; Gal 2.3; Tai 1.4 * **4:11:** Kol 4.14; Flm 24; Apo 12.12, 25; 13.13; 15.37-39; Kol 4.10 * **4:12:** Apo 20.4; Ef 6.21-22; Kol 4.7-8; Apo 20.6 * **4:14:** 1 Tim 1.20; Sum 62.12; Rom 2.6

miangö dop likepni melen wangiiga qakne öngöi sihimbölö mötmawi, mi mötzal.

¹⁵ Yanön keuninangöra gwötpuk tuarenjon ak nengiba malök. Miangöra gi mewöyök mönö yangöra galöm mem anguba malman.

¹⁶ Indim mutukni kutukutulan keu jake bohonne al ningigetka keuni likepni jibiga kunjan kun qahö kaba ni nangöm ningiba jiyökmö, alaurup pakpak yejon buratiba nömosötket. Anutunöy singisöndokni miangö likepni qaknine albpuköra köuluközal.

¹⁷ Yenön nömosötketmö, Kembunöy bauköm ningiyök. Nöyon Buja keu jiba ambazip uru kungum engiba nup mi körek mem tekömangöra aka mem köhöim ningiyök. Kantri pakpak yejon Buja mi mötmegöra möta bauköm ningiba laion sömbup kalni yengö numbuine gil ningibepukö angön köla jitneyök meköm ningiiga eral.

¹⁸ Kembunöy bölöni könañi könañi mem ningibepuköra meköm ningiiga ölop Suep bemtohojangö uruñe eu öngömam. Kembangö qetni mönö sundan möpöseininga nalö teteköñi qahö aködamunjangbuk aka ahöba öngöma. Keu mi ölna.

Yaizözkök keu teteköñi

¹⁹ *Gi mönö nöngö yaizözkökni Prisila aka apni Aqila yetköra aka Onesiforusgö saiwaurupni yengöra jinöy mötme.

²⁰ *Neñakni Erastus mosötpiga Korint sitinöy malja. Trofimusi Miletus sitinöy mosötpiga kawöl yöhöi ahöza.

²¹ Miangöra kömunjan kie uru nalö qahö kaiga mönö bapne kiangörey nöngörey kamangö kapan kölman. Azi qetnini Yubulus, Pudens, Linus, Klodia aka urumelen alaurup pakpak yejon yaizözkökni jiba algetka göhörey kaza.

²² O Timoti, Kembunöy unagi kötuetköba göbuk kinma.

Anutugö kalem möriamnan mönö embuk ahöma. Mewö.

* 4:19: Apo 18.2; 2 Tim 1.16-17 * 4:20: Apo 19.22; Rom 16.23; Apo 20.4; 21.29

Taitusgö Kimbi Polnön Taitusgöra Kimbi alök. Jim-asa-asari

Azi gwabö qetnji Taitus yanön urunji melenja Polbuk örörön jöhöba bauköba misin nup meyohot. Memba köwet sutnje gölme jölanji qetnji Krit (Arete) miangören malohotka Polnön kembangan kutuba alabaukni mosoriga zioz nup arengöba ek kewöta galöm kölok. Polnön mosöta anda yangöra köuluköba mala Buja Kimbi ki ohoyök.

Krit mi keu Grik miambuk mindiribanbuk. Krit mi köwet sutnje gölme jölanji kun aka Grik (Greece) mi kantri kun.

Polnön Taitusgöra waimanjat karöbut möta qamban keu kewö ohom wangiyök: Krit yengö könanjini mi gonjim teköi baunam jegömöl aka malget. Tosatjan urunji melengetka malmalninan diŋgiyöhi, yanön kunbuk bölibepuk. Miangöra yengö jitnememeninan silik ölop kötokni kondela köuluk aka Baiböl stadi nup qahö mosöta kambunini mindiŋgöba malmegöra jiza. Uru melenget yengö sutjine kambu morömorö mi denöwö mindiŋgöba kusum engiba malme? Azi namnji, ambi namnji, ambi seram, azi gwabö aka welengeqe yengö goro keunji mi nanjök nanjök kewö jim asariza, “Urunji melenja Buja keu wuatangöba luainön mala ketani yengö keu bapje anda jegep uruk nup ölopnanök memba kinda julbepuköra kazik anjururuk mosöta malme.”

Buk kianjö bahöni bohönji 5 mi kewö:

Polnön aposol nupnangö könanji jiza 1.1-4

Anutugö jitnememe yengö goro keunji 1.5-16

Ambazip kambu morömorö yengö goro keunji 2.1-15

Urukunjugungu aka galöm meme keu 3.1-11

Yaizökök aka keu teteköni tosatji 3.12-15

Polnön aposol nupnangö könanji jiza.

¹ Anutunön ambazip möwölöhöm engiyöhi, engö mötnaripninan asuhuba qarimapköra aka Jisös Kraistnön Pol ni melaim niŋgiiga yangö aposolni akzal.

Nönön Anutu welenji qeba keu ölni kusum engimakzal. Keu ölni mi möt kutuba kölgulime ewö, engö malmalninan mönö uteköba letoraknja. Miangöra kimbi ki ohozal.

² Anutunön keu munenji jimawangö dop qahö yanön möpnangö möpne malmal köhöikni nenjimangö jim jöhöba miangö andöne yuai pakpak miwiknaiyök. Enön keu ölni möt kutuba möt narigetka miangön mönö nam kölgenggiiga malmal köhöikne angotpiŋgöra al mamböta jörömqöröm ahakze.

³ Anutu, Amötqeqe Toninan oyaenkoyaengö keunji jim jöhöba miangö nalöni diŋdiŋi ali kam kunjuiga miangören Buja keunji indela mi jim sehibingö jimkutukutunji alök. Miangö dop mi jim asarigetka Anutunön nöjön mi jim sehimangö möt narim niŋgiba kunjum niŋgiyök.

⁴ *O mötnarip nahön sorokni Taitus! Nönön bauköm gihibi urugi melenja alabaukni aka mohotje Kambu möt nariba maljit.

Iwi Anutu aka nanini Amötqeqe Tonini Jisös Kraist yetkön mönö kalem möriam gihiyohotka luainön malman.

Galöm jitnememe yengören keu areŋ

* 1:4: 2 Kor 8.23; Gal 2.3; 2 Tim 4.10

⁵ Köwet jölanji Krit (Crete) miangörej mohotje misin nup memba kembangan gömosötmanjögö aka kewö jim kutum gihial, “Urujini melenget yejon ilingösöj lan maljei, i mönö arengöm engiba (pasta aka) jitje memenini miri taon dop kunguba kusum enginönga arejinambuk zioz nup memba malme.” Mewö jiba denit.

⁶ *Urujini melenjeri, yengö sutjineyök azi kewöji möwölöhöman: Kungö silene pinjtkö keuji qahö, anömji mohok-kun memba mali nahönböraturupjan urujini melenja Anutu möt nariba yangisen kezapjupjup silikö keu silenine qahö ala jim engimakze.

⁷ Urumelen könagesögö ketanjani pasto (bisop)* yanön Anutugö könagesö galöm köl engimakjawawi, miangöra mönö azi kewöji kunguman: Kungö silene pinjtkö keuji qahö, jakbak-öranjöranj qahö aka urupik qahö. O köhöikni qahö nemba bim lan qahö qeba möndömöndö qakje injarere mala monej yuaigöra qahö kapan kölakza.

⁸ Yangörej kamei, i ölop köl öröba köyan köl engiba keu ahakmeme ölopnanjögö sihimji möta uruji miangörej ala malma. Kilik-kaluk kekpurikni qahö, keu pakpak diññanök kewöta sarakni töröji qainji kun aka nanji ahakmemeji törörök galöm köl angumakja.

⁹ Buja keu kusum nenjigetka tandö söran ewö malmal töngumangöra ahözawi, pastonöj mi mönö töp memba miangörej qekötahöba kinma. Mewö kinda ölop Buja Kimbigö dop mötnaripkö keu kembang kembang ambazip kusum engiba miangön urujini kungumakja aka tosatjan Buja keu möwörangöba qetalakjei, yengö keujini gonjonji ölop qeapköba mindingömakja. Mewö.

Böhi takapulakanji mönö qetal engime.

¹⁰ Ambazip gwötpukjan keu qetala kezapjupjup aka sesekjai ewö keu sinji sinji jiba ambazip tilipköm engimakze. Anutugö aiwesökni silenine yandigeri, yengö kambunöhök ambazip jesöngöjan mewö ahakze.

¹¹ Ambazip mewö mienjögö keujini mönö qömbököme. Yejon Buja keu kusum engibingö möndöba monej yuainji öröbingö möta kösawöran keu lan jigetka gamujanbuk ahakza. Mewö aka saiwa tosatji lök körekjanök mem sohom engigetka enjololöj aket.

¹² Krit nanjine kezapqetok azi kunjan aiakanjanjögöra kewö jiba ohoyök, “Krit ambazipnön mönö nalö dop keu munen jiba injarere qölzöm mala ubibi kömböt ewö lilikqilik aka bau numbu nemakze.”

¹³ Yengöra keu mewö nanjögöba jiyöhi, miangön mönö ölnja. Miangöra kawöljanan qahöwahi mötnaripjanan asuhuba ölnambuk aknjapköra i mönö köhöikjanök terenjögöba jim engimakjan.

¹⁴ Mötnaripjanan ölnambuk aiga Juda nenjögö bem sambanini aka ambazip keu ölni singiba jimkutukutu alakzei, keu mewö miangö kezap kude alme.

¹⁵ Urunini melenninga Uja Töröjan köl könjörat ak nenjiiga sarakni akzini, nenjögöra nene kungö dönqizizinni qahö ahöza. Nenön nene pakpak ölop nembinanjögö dop akzapmö, qewölon ambazip keu ölnanjögö yangisen ahakzei, yejon i me wai aketka urujinan töndup tölohomakza. Urunjan kölköljinjanambuk aiga urujinanjögö kezapjan duhui mönö bau jegömöl tandök malje.

* **1:6:** 1 Tim 3.2-7 * **1:7:** ouwösiö, zioz paris lida, bisop, nup meme bohonji yanön qet ketanji öne qahö bisimapmö, paris kambu-urupji yengöra köuluköba kusum engiba urujini kunguba nupjananjögö arejni engiba goro qamban qakje galöm köla mindingöme engimakja.

¹⁶ Yeñön “Anutugö könañi möt yaközin,” jitñinan mewö jigetka aiakanñinan mi qañ köla qeapkömakze. Mewö aka Anutugö keuñi qetalgetka imbilonñon möt enjiiga ahakmeme ölopñi kun memeanğö dop qahö akze. Mewö.

2

Ambazip ketañi yeğö qambañ keu

¹ Göñön mewö qahö maljananğöra mönö mötnaripkö keu kambañi kambañi mi Buña Kimbigö dop kewö kusum enjimakñan:

² Azi namñi yeñön mönö kilik-kalukñini qahö malgetka göda qem enjibinanğö dop akñe. Nannini ahakmemeñini törörök galöm köl anğugetka mötnaripñinanğö kawölñinan qahöwahi ölni urukalem asuhumakña. Ölni asuhui ambazip törörök jöpaköm enjiba malme aka kapan köla böñ qeba kinme. Mewö malmegöra kusum enjimakñan.

³ Ambi namñi yeñön mewöyök Anutugöreñ ambi sarakñi yeğö dop ahakmemeñini aka memba malme. Andöqege keu yöhösañ kude ahakñe. Wain o gwötpuk nemegö mötöp simbañe kude anğota qaköme. Urumeleñ ahakmemeğö silikñi ölopñi kondela tosatñi kusum enjimakñe.

⁴ Mewö aka mala ambi nembö bapñine maljei, yeğöra ölop goro enjiba malgetka yeñön mewöyök apmoröurupñini urukönömñinan jöpaköm enjiba malme.

⁵ Jöpaköm enjiba nannini ahakmemeñini törörök galöm köl anğuba sarakñi aka mirigö nupñini nem qerak aka nöngöp törön qakñe memba apmoröurupñini köyan köl enjiba apurupñinanğö keu bapñe anda kötöngöm enjimakñe. Mewö kusum enjigetka aka memba malgetka tosatñan Anutugö Buña keu mi mepaiköba ilitnöñ albingö osime. Mewö.

Azi gwabö aka welenqege yeğö qambañ keuñini

⁶ Azi gwabö yeğö uruñini mewöyök kewö kuñgum enjimakñan: Yeñön mönö ölopñanğö oyankasak mala nannini ahakmemeñini törörök galöm köl anğumakñe.

⁷ Uruñini mewö kuñgum enjiba nangak ahakmeme pakpak mianğöreñ silik ölopñi kondel enjiba malman. Mönö geñmoñ qahö böñ qeba kinda tañörakñi qahö kusum enjimakñan.

⁸ Keu mötsihimñambuk jiba malnöñga ambazipnöñ mepaiköba memba et al ghibingö osime. Mewö jiba malnöñga tuarenjoñurupñinan keu bölöñi jim neñgibingö keu jaruba ölni qahö miwikñaiba gamuñini mötme. Mewö kusum enjimakñan.

⁹ Welenqegeurup mi kewö kusum enjimakñan: Yeñön ketanamñini yeğö keuñini pakpak tem köla keu bapñe anda malme. Sösöñgai ak enjibingö kapan köla kinme. Keu jimei, mi nesilam qakñan kude melen enjimakñe.

¹⁰ Ketanamñinanğö mireyök yuai mohot-hök yahöt-hök mi ölöñ kude memakñemö, ketanamñinan engeka möt narim enjimakñapköra mönö kapan köla kinme. Nupñini pakpak mönö geñmoñi qahö pöndañ memba malme. Mewö mala Anutu Amötqege Toninanğö Buña keu kusum enjimakzei, mi kötön kölgetka ölni ahui nahömñambuk ahakña. Mewö.

Malmal sarakñanğö nam köipitñi mi kalem möriam.

¹¹ Malmal sarakñanğö nam köipitñi kewö: Anutunöñ ambazip körek amöt qem neñgimapköra aka kalem möriamñi indeli gölme dop asuhuyök.

¹² Kalem möriam mianñön mönö kopa anğöjörak malmalgöra “Qahö,” jibingö köna kondela gölmegö sihim kömbönañi bölöñi qömbököbingöra köl kusuba mindiñgöm neñgimakza. Ahakmemeñini törörök galöm köl anğuba keu pakpak

diŋdiŋanök kewöta malbingöra köl gulim neŋgimakza. Mewö mianjôn Anutugö malmal köhöikŋi mi nalö kewöŋe köl guliba gölmenöŋ malbin.

¹³ Mewö malinga Jisös Kraistnöŋ kunbuk kamawi, nini nalö mianjöreŋ Anutu qetbuŋaŋambuk aka Amötqeŋe Tonini yetkö asakmararaŋiri asuhuiga ekin. Nini oyaenŋkoyaen nalöŋi mi kam kuŋgumapköra jörömqöröm al mamböt aka maljin.

¹⁴ *Jisös Kraistnöŋ mönö neŋgöra aka nanŋi malmalŋi köleŋda mosörök. Nini ahakmeme bölöŋi könaŋi könaŋi mianjöreŋök meköm neŋgiba sohop-nini memangö möta köl könjörat ak neŋgiba nanŋi buŋaŋi sarakŋi akingöra aka malmalŋi köleŋda mosörök. Mi mosöta qewöloŋnini saŋgoŋniga nanŋi könagesöŋi aka ölop nup ölopŋi ölopŋi memingö urukönöp aka jöjörömakin.

¹⁵ Mianjö keuŋi mönö kusum eŋgiba ambazip uruŋini naŋgöba köna siŋgimei, mi kukösum pakpakö qakŋe tembula jim eŋgimakŋan. Mewö aknöŋga kuŋŋan jijiwilit ak ghibapüköra galöm mem aŋguba malman. Mewö.

3

Urumeleŋ eŋjôn mönö silik kewö aka memba malme:

¹ Kusum eŋgiba keu ki mönö köl gulim eŋginöŋga ölop urukönömŋine ala mötmörime: Urumeleŋ könagesö yeŋjôn mönö kiap gawman aka ketaŋamŋini tosaŋi yeŋgö keu baŋŋine anda keuŋini tem köla malme. Mindimindiri nup ölopŋi memegöra jigetka mi pakpak mönö jöjöröba memakŋe.

² Uruqeŋe keu töhöreŋ mi kungöra kude jim waŋgime. Aŋgururuk kude akŋemö, ala ak aŋguba urumohot malmegöra kinme. Ambazip pakpak mi guŋböŋjöhöŋ pakpak ak eŋgiba uruluai qakŋe mutulaŋgöm aŋguba malme. Mewö.

³ Nini mewöyök mutuk uruqahö mala qeŋetal aka janjuŋ malin. Sihin kömbönaŋnini bölöŋi könaŋi könaŋi miengö mötöp simbaŋe qaköinga galöm köl neŋgigetka silegö sihim sösöŋgaiŋi laŋ jarubingöra malin. Körögisigisi qakŋe kegwek-kahasililiŋ aka mianjöreŋ malmalnini ayuhuba malin. Tosatŋan imbilonloŋ möta kazik ak neŋgigetka sutnine urukerök ak aŋguba malin.

⁴ Mewö malinmö, Anutu Amötqeŋe Toninan ahakmemeŋi ölopŋi köleŋda indeliga urukaleŋŋan asuhum tiŋgiriga kötala uruŋan jöpaköm neŋgiyök.

⁵ Jöpaköm neŋgiba bohoniŋi jöhöba amöt qem neŋgiyök. Naninak diŋdiŋi mala nup ölopŋi ölopŋi memba malbinahi, mianjöra aka qahö neŋgehoriyök. Mianjöra qahöpmö, nanŋi ak-kömukömuŋan mönö nam köl waŋgiiga siŋgisöndoknini saŋgoŋniga ahuahu dölöŋŋi ahuinga Uŋaŋi Töröŋi urunine aliga kölöŋaim neŋgiyök.

⁶ Anutunöŋ amöt qem neŋgiba Amötqeŋe Tonini Jisös Kraistköra jüiga Uŋa Töröŋi melaiba kelenmaleleŋ mokoiga urunine geiga maljin.

⁷ Anutugö kalem möriamŋan nam köl waŋgiiga keunini jim teköi solanib-ingöra aka Uŋa Töröŋan urunine geiga kölöŋainin. Kölöŋaiba kinda oyaenŋkoyaen malmal teteköŋi qahö malbingö jörömqöröm al mamböt akzini, mi ölop buŋa qem aŋgubin. Mewö.

⁸ Keu ohozali, mianjôn öl töhöŋŋa. Göŋjôn mönö keu kewö kapaŋ köla jim tuarim eŋgiba malman: Ambazip Anutu möt narizei, yeŋjôn mönö jeŋep aka kinda uruŋini pöndaŋ nup ölopŋi ölopŋi memegöra ala malme. Mewö akŋei, mianjôn mönö ambazip bauköm eŋgiiga nupŋinaŋgö ölni eka “Qetpuk!” jiba malme.

⁹ Tosatŋan uruqahö keu aka ambösakon yeŋgö qet areŋi areŋi eraum mötketka goranora aŋgururuk asuhumakzawi, göŋjôn mönö mi yaköriba andö

* 2:14: Sum 130.8; Eks 19.5; Dut 4.20; 7.6; 14.2; 1 Pitö 2.9

qeman. Mewöyök Mosesnöŋ Köna keu neŋgiyöhi, tosatŋan keu mohot mohot mianğöra möndömkösök aketka supapköiga sohomakza. Jitnakölik mewöŋi mi yuai omani töhön aka qahöpmahöp bauköm eŋgimakza. Mianğöra mi mönö andö qeba mosötman.

¹⁰ Kunŋan keu mewö jim öröba mianğön urujjul mem eŋgimakzawi, i mönö galöm meme keu jim waŋginöŋga qahö tem köliga kunbuk jim waŋginöŋga yahöt aiga töndup yangiseŋ akŋa ewö, i mönö közölnöŋga urumelen kambu mosöta yaigepŋe malma.

¹¹ Yaŋgö könaŋi kewö ahöi möt yaközan: Yaŋön köna siŋgiba öŋömböböp köla lolonqaloŋ aka siŋgisöndok ahakmeme ahakza. Siŋgisöndokŋi mianğön mönö könaŋi kondeli sohom teköi Anutunöŋ keuŋi jim teköi könöp siagö buŋaya akŋa. Mewö.

Yaizözkök keu teteköŋi

¹² *Ni kömunjaŋ kie uru nalö ki siti qetŋi Nikopolis Grik mianğoreŋ mösöhöba malmamgö mötzal. Mianğöra Artemas me Tikikus salupke malmapköra melaibi göhöreŋ kaŋgotmawi, nalö mianğoreŋ mönö nalö kude qem körimanmö, zilaŋ mosöta Nikopolis kaba miwikŋaim niŋgiman.

¹³ *Köna keugö mötmöt azi (loya) qetŋi Zenas aka Apolos yetkön yuai kungöra osiba mözöqözöröŋ aka Krit mianğoreŋ qaköba tatpahotpuk. Mianğöra mönö kapaŋ köla öröyuai tosatŋan dopŋire naŋgöm etkinöŋga ölop toroqeba anmahot.

¹⁴ Alaurupninan mönö nup ölopŋi ölopŋi memegö könaŋi möt soroköba pöndaŋ jegep aka zeŋ kinda uruŋini mianğoreŋ ala malme. Mewö aketka tosatŋan lömböt keta bölokŋi saŋgabaŋga miwikŋaimei, i ölop naŋgöm eŋgimakŋe. Mötnaripkö ölni mewö ahuiga malmal gilipitŋi (ambetakŋi) önewat qahö malme.

¹⁵ Nömbuk ki maljei, yeŋön körek yaizözkökŋini jigetka göhöreŋ kaza. Göŋön alaurupnini Krit mianğoreŋ Kembu möt nariba uruŋinan jöpaköm neŋgimakzei, yeŋgöra mönö nöŋgö yaizözkökni jinöŋga mötme.

Kalem möriamnöŋ mönö körek embuk ahöma.

* **3:12:** Apo 20.4; Ef 6.21-22; Kol 4.7-8; 2 Tim 4.12 * **3:13:** Apo 18.24; 1 Kor 16.12

Filemongö Kimbi Polnöη Filemongöra Kimbi alök. Jim-asa-asari

Azi öngöngöηi Filemon mi Kolosi sitinöη mala uruηi melenä zioz nup memba welenqeqeηi qetηi Onesimus galöm köliga töndup unjurata Rom sitinöη anök. Miangöreη anda Polbuk mutulangöba keuηi möta uruηi melenä Polbuk Buηa nup meyohot. Polnöη kösö mire tata Onesimus toηangöra Kimbi ki ohoba böröηe ala melaiiga Kolosi lilingöyök. Kimbi kiangöreη uruηi melenöhi, miangö buzupηi indela Filemon uruηi kewö kuηguyök: “Gi mönö welenqeqegahö pinjitηi mosöta yambuk urumohok aka köl öröm waηginöηga urumelen alagi ewö qöhöröηge kiniga yaηgöra söηgaiba malman.”

Buk kiangö bahöηi bohonηi 4 mi kewö:

Keu mutukηi 1-3

Polnöη Filemon möpöseiza 4-7

Onesimusgöra Filemongö uruηi kuηguyök 8-22

Kimbigö keu köηi bohonηi 23-25

¹ O wölböt alani aka neηakni Filemon!

Pol nöηön Jisös Kraistkö nupηi memakzalaηgöra aka gwaröhöm niηigetka kösö mire tatzal. Urumelen alani Timoti yaηön nömbuk tariga nöηön göbuk keu eraum mötpitköra kimbi ki ohozal.

² *Mewöyök ambi ketanηi urumelen nenini Apia aka Arkipus urumelengö bimqeqe azinini aka urumelen könagesö göhö mire tokomakzei, nöηön kimbi ki eηgöra ohozal.

³ Anutu Iwinini aka Kembu Jisös Kraist yetkön kalem möriam eηgiyohotka luainöη malme.

Filemongö urukalemηaηgöra möpöseiza.

⁴ Nöηön nalö dop köuluköba gi mötmörim gihimakzalaηgö dop kewögöra Anutuni saiwap jim waηgimakzal:

⁵ Gi Kembu Jisös möt nariba jöpaköm waηgiba Anutugö ambazip sarakηi pakpak jöpaköba urukalem ak eηgiba maljan.

⁶ Saiwap jiba kewö köulukömakzal: Mötnaripkan mönö köhöiba pöwöwöm aiga ölop qöhöröηnine kinda nembuk mötnaripkö keuηi jim sehiba malman. Mewö Kraistpuk qekötahöba kininga kalem ölopηi ölopηi neηgimakzawi, gi miangö könaηi köreηanök möt sölöηgöman.

⁷ O urumelen alani, gi ambazip sarakηi körö-ölöwak qem eηginöηga amgöba malje. Urukalemgi miangöra nöηön gwötpuk söηgaibiga mianön uruni naηgömakza.

Filemonöη Onesimus köl örömapköra qesiza.

⁸ Mewö malnöηga Kraistpuk qekötahöziga ölop awösamakak aka kukösum qakηe kinda yuai akηangö jim kutum gihibileηak.

⁹ Mi töndup Anutunöη uruηan jöpaköm netkizawaηgöra aka ölop jimkutuku-tuni mosöta ulet miyök ulet gihimam. Gi Pol nöηgö silikni mötzan. Nöηön azi namηi akzal aka Kraist Jisösgö nupköra aka nalö kewöηe kösö miri azia mewöyök akzal.

* 1:2: Kol 4.17

10 *Ni kösö miri kiangören alagi qetņi Onesimus aitonğöba bauköm waņgibiga uruņi melenđa mötnaripkō nahōni ahök. Mianğöra merak yaņğö numbu jit memba yaņğöra aka ulet gihizal.

11 Yaņön mutuk welen qeba laņ möndöba injarere mala qemasolokep ak gihiba malökmö, nalö kewöņe letota gi aka ni ölöņņanök bauköm netkiiga ölni asuhumakņawaņğö dop akza.

12 Yaņön nani wölböt nahōni akza aiga nani wölbötņi ewö melaim waņgibi lilingöba göhöreņ kaza.

13 Nöņön Ölöwak Buņagöra aka kösö mire tatzal. Mianğöra Onesimus jöhöbi nömbuk mala göhö salupke bauköm niņgimapkō mötzal.

14 Mewö mötzalmö, bauköm niņgimapkō qahö kuņgum gihizal. Sihimgan jiiga bauköm niņginöņga dop köljapmö, göņön welenqeqegi niņgiman me aņğön kölman, mianğöra Oņ! qahö jinöņga nanök jöhöm waņgimangö osizal.

15 Onesimusnöņ kewögöra aka gömosörök me? Yaņön nalö töröptökņi yaigep mala kunbuk lilingöba kaba göbuk nalö teteköņi qahö malma.

16 Mutuk welenqeqe omaņi aka malökmö, nalö kewöņe mi oņgita azi qainņi kun akza. Uruņi melenđa mönö wölböt alanina akza. Nöņön yaņğöra gwötpuk ak niņgiiga göņön azi mi eknöņga Kembugö buņani aiga yaņğöra mewö ni noņgita önöņi qahö ak gihimakņa.

17 Göņön nömbuk ala-ala aka maljit mötnöņga nöņön kabi köl öröm niņgibanak ewö, mönö Onesimusnöņ kaiga mewö köl öröm waņgiman.

18 Yuai kun ak bölim gihiyök me yaņğöreņ tosa kun göhöreņ ahöza ewö, mia mönö nöņğö tosaye jinöņ ahöma.

19 Ni Pol mönö nani börönan kewö ohozal, “Nöņön mi mekömam.” Nöņön bauköm gihibi urugi melenğö tosa gi ketani mi mekömangöra nangi mewöņanök nöņğö buņaya jim teköm aņgunöņga dop kölbawak. Mianğöra ölop kewö jibilenak: Onesimusgö tosaņi mi mönö jinöņga nange tosaye ahöma.

20 O urumelenğalani, Kembugö Buņa gihiyali, mi mönö melenđa bauköm niņgimangö ak niņgiza. Kraist qekötahözani, mianğö dop mönö Onesimus köl öronöņga nöņğö urunan amğöba ölöwakņa.

21 Keuni tem kölmani, mi möt nariba keuni ohoba könaņamgi kewö ahöi mötzal: Keu jizali, mi mönö oņgita qetpuk ak soroköman. Mewö.

22 Keu kun ki: Eņön köulukögetka Kembunöņ ni melenğ niņgi eņğöreņ kamangö al mamböta jörömqöröm akzal. Mianğöra mönö miri uruņi kun nöņğöra mem kelötman.

Yaizözkök aka kötuemötuet keu teteköņi

23 *Alani Epafra yaņön Jisös Kraistkö nupköra aka nömbuk kösö mire tata yaizözkökņi ali göhöreņ kaza.

24 *Neņakurupņi nup mohotņe memakzini Mak, Aristarkus, Demas aka Luk yeņön mewöyök yaizözkökņini algetka göhöreņ kaza.

25 Kambu Jisös Kraistkö kalem möriamnöņ mönö uņaņini kötuatköba embuk ahöma. Mewö.

* 1:10: Kol 4.9 * 1:23: Kol 1.7; 4.12 * 1:24: Apo 12.12, 25; 13.13; 15.37-39; 19.29; 27.2; Kol 4.10, 14; 2 Tim 4.10-11

Hibru Kimbi **Kunöŋ Hibru yeŋgöra Kimbi alök.** **Jim-asa-asari**

Jisösnöŋ Suepnöŋ öngöi miangö andöŋe yambu 35 miangö dop teköiga azi kun qetŋi qahö mötzini, yaŋön Kimbi ki ohoba Juda urumelen ambazip yeŋgöreŋ alök. Juda yeŋön Hibru (kian) keu jigeranğöra qetŋini Hibru qetket. Tosatŋan Juda urumelen ambazip mi sesewerowero gwötpuk ak enğigetka Jisösgö köna diŋdiŋi mosötpingö mötmöriba Juda yeŋgö köna walŋe dumŋe kunbuk anğotpingö mötket. Köna walŋi mi Köna keugö kapanğölköl.

Kimbi kianğö keu köŋŋi 3 mi kewö:

1. Jisös, Anutugö Nahönŋi yaŋön sihimbölö ketanŋi möta mewö mianğön Iwiŋi tem kölmangö könanŋi mörök. Mianğöra Suep garata, Moses aka keza-pqetok ambazip pakpak enğonğita öngöngöŋi akza.

2. Anutunöŋ Jisös kuŋguiga nalö teteköŋi qahö jike nup galömnini bohonŋi aka malma. Nanŋi sepŋi mokoyöhanğöra jöwöwöl ohohonöŋ teköiga jike nup galöm tosatŋi yeŋgöra qahö osibin.

3. Urumelen neŋön Jisös möt nariinga siŋgisöndoknini mosöta amöt qem neŋgiba kömupnöhök meköm neŋgiiga keŋğötnini qahö mötzin. Jike nup walŋi mi imutimut ewö aiga megetka Jisösnöŋ amötqeqegö könanŋi ölnŋi indela nanŋi jöwöwöl ohoho ewö akŋegöra al anğuyök.

Mötnarip ambazip ketanŋi yeŋgö silikŋinanğö kösohotŋi mi teteköŋe (Boŋ 11) ohoba mötnaripŋinan söröraubapuköra kewö kuŋgum enğiza, “Sesewerowero ak enğigetka mianğö sihimbölöŋi mi mönö kapanğö köla mökösoŋda möta Jisösbuk luhut alme.” Buk kianğö qambaŋi aka galöm meme keuŋi mi nahömnambuk.

Buk kianğö bahöŋi bohonŋi 10 mi kewö:

Keu mutukŋi: Kraistnöŋ Anutugö könanŋi indel teköyök 1.1-3

Kraistnöŋ garata pakpak enğonğitza 1.4-2.18

Kraistnöŋ Moses aka Josua etkonğitza 3.1-4.13

Kraistnöŋ jike nup galöm pakpak enğonğitza 4.14-7.28

Kraistkö jöhöjöhö arenŋi mi jöhöjöhö arenŋ walŋi onğitza 8.1-9.28

Kraistkö sep busuŋan jöwöwöl pakpak enğonğitza 10.1-39

Mötnarip mi yuai mutukŋi aka bohonŋi 11.1-12.29

Ahakmemeninan Anutu uru ölöwak mem waŋgime 13.1-19

Köuluk teteköŋi 13.20-21

Uruwahöt keu aka yaizözkök keu teteköŋi 13.22-25

Anutunöŋ Nahönŋi melaiiga keuŋi indelök.

¹ Anutunöŋ mönö möpŋanğö möpŋeyök könahiba köna murutŋi murutŋi wuatangöba keuŋi indelmangö mörök. Mewö möta keuŋi nalö gwötpuk kezapqetok ambazip yeŋgö uruŋine aliga aukŋe jigetka ambösakonurupninan möta mala kotket.

² Mewö mala kotketmö, nalö teteköŋe malinga kewöŋe mönö Nahönŋi melaiiga keuŋi indela aukŋe jiiga mörin. Nahönŋi yaŋön Iwiŋi bauköiga Suep gölme aka mietkö öroyuainŋiri pakpak miwikŋaiyo-hotka Nahönŋan nalö teteköŋe yuai pakpakö Toŋi akŋapakö jim teköi malja.

³ Anutugö kaisongolomŋan Nahönŋi ahöm waŋgiiga eta kondelök. Anutugö asakmararanan mönö i kuŋguiga biliksik aliga imutimut ewö ehin. Siŋgisöndoknini köl köŋjorat teköbagun mönö Suep mire öngöba dumŋi memba

Öngöngöñamninangö böröñi ölñe tatza. Mianğoreñ tata Suep gölmegö öröyui pakpak mi keuñi kukösumñambuknöñ bisiba galöm köla malja.

Anutugö Nahönñan Suep garata enğongitza.

⁴ Anutunöñ Nahönñi qet wañgiiga mianjön mönö Suep garata yeñgö qetñini onğita aködamunñambuk akzawi, mianğö dop Nahönñan Suep garata enğongita ketanñamñini aiga nembö bapñe malje.

⁵ *Anutunöñ nalö kunöñ Suep garataurupñi yeñgöreñök kungöra keu kewö qahö jiyök,

“Göñön nöñgö Nahöni aknöñga nöñön merak göhö Iwigi akzal.”

Mewöyök keu kun kewö jii ahöza, “Nöñön yañgö Iwiñi akiga yañön nöñgö Nahöni akña.”

⁶ *Keu mi dumñe kunbuk Nahönñi mutukñi jim teköiga gölmenöñ etmamgö ahöhi, nalö mianğoreñ mönö qeljiñe kewö jiyök, “O Suep garataurupni, inñi mönö körek pakpak yañgö waikñi memba möpöseiba malme.”

⁷ *Suep garata yeñgöra keu kewö jii ahöza, “Anutunöñ mönö garataurupñi mem letot enğiiga luhut ewö aka anda kame. Welenqeçeurupñan mönö letota könöp bölam ewö aka anda kame.”

⁸ *Yeñgöra mewö jiyökmö, Nahönñangöra keu kun kewö jii ahöza, “O Kambu, göñön mönö jakömbuak dum tatatke nalö teteköñi qahö tat öngöman. Öropki kukösum-ñambuk mianjön qindinaim neñginöñga ahakmeme diñdiñan mönö bemtohonğahö muñgemñi aka ahöm öngöma.

⁹ Göñön ahakmeme solanñangöra ak gihiiga ahakmeme gonğonangöra irimgi seholiiga kazik aka mala kotnöñ. Mianğöra göhö bemgi Anutu yañön mönö al gihiiga alaurupki enğongita sösongai kelöknöñ gömirii maljan.”

¹⁰ *Nahönñangö keuñi kun mi kewö, “O Kambu, göñön könakönahiñe gölmegö tandöñi kuñgunöñga Suepkö jakeni jakeni mienön mönö göhö börösöwögi akze.

¹¹ Suep gölme pakpak mienön opo maluku ewö walñi aka ayapkömemö, göñön mönö köhöiba kin öngöman.

¹² Möki köpeimakzini, göñön mönö mianğö dop suep ehekñi mi opo söro jöhözin ewö köpeim enğinöñga letotme. Yuai pakpak utekömapmö, göñön mönö tandök mohot miyök aka yambugi (yaragi) teteköñi qahö mal öngöman.”

¹³ *Anutunöñ nalö kunöñ Suep garataurupñi yeñgöreñök kungöra keu kewö qahö jiyök, “Göñön mönö kaba böröni ölñe tatnöñga nöñön mönö tuaren-joñurupki nalö sutñi kianğoreñ tim tötal enğibiga et enğuiga göhö könagahö döññi aketka köirañ albin.”

¹⁴ Nahönñangöra keuñi keuñi mewö jiyökmö, Suep garata i mönö niñia akze? Körek yeñön Anutugö welenqeçe uñaurupñi akze. Mewö aka ambazip oyaenköyaen buña qem anğumei, i bauköm enğimegöra melaim enğii malje. Mewö.

2

Urunini qahö melenbinbukö galöm meme keu

¹ Mianğöra Buña keu mörini, mi mönö törörök möt asaribingö kapan köla kezap alme. Gölmenöñ malmalgö inñi me waiñi kuññan neñguanğiri lañ anda kaba liklak malbin ewö, mönö Jisösgö amötqeçe nupñi onğita öne mala ayuhubinbuk.

* 1:5: Sum 2.7; 2 Sml 7.14; 1 Hist 17.13 * 1:6: Dut 32.43 * 1:7: Sum 104.4 * 1:8: Sum 45.6-7

* 1:10: Sum 102.25-27 * 1:13: Sum 110.1

² Keu mi kewö jim tuarimam: Mutuk Suep garata yeñön Buña keu jigetka ambazip jöhöm engii malget. Mewö mala denike yeñön Köna keu qahö tem köla selji walöñgeri, Anutunöñ mönö körek yeñgö keuñini diñdiñanök jim teköba likepñi melenj engii lömböt qakñine öñgöi mala kotket.

³ Yeñön lömböt miwikñaigetka neñön mewöñanök akzin ewö, lömbötköra mönö denöwö ölöñ kölbina? Amötqege nup ketanji mi nesampurek qakñe nönöñgan akin ewö, mönö lömbötnöhök ölöñ kölbingö osibin. Kembunöñ könahiba amötqegegö könanji indeliga tosatñan keu mi jitñeyök möta nañgöba jim köhöigetka sehiba dop köl neñgiyök.

⁴ Mi nañgöba jim köhöigetka Anutunöñ yembuk mohotñe kinda keuñini nañgöba jiiga añgöletot aiwesök könanji könanji mi kukösumñinambuk asuhugetka Uña Töröñi mokoba jitsihitñangö dop mendenjiga dop köl neñgiyök. Mewö.

Jisösnöñ datnini aka Suepnöñ neñguañgitmamgö mötza.

⁵ Suep gölme dölokñi asuhumegö keuñi jimakzini, Anutunöñ nini miangöreñ Suep garata nembö bapñine malbingö areñi qahö ala jim kutuyök.

⁶ *Mewö qahöpmö, keu mi kunñan nañgöba jiiga Buña Kimbigö kembanganji kunöñ kewö ahöza, “Gölme azinöñ mönö niñia aiga i mötmörim wañgimakan? Suep gölmegegö azi öññan mönö niñia aiga i köyan kölakzan?”

⁷ Göñön i memba et al wañginöñga nalö töröpñi Suep garata yeñgö nembö bapñine eta eretñi aka malök. Mali wañgitnöñga asakmararañnöñ öñgöiga kösatorom ila jalö wañginöñga aködamunñambuk aka qetbunañambuk malja. Mewö mala öroyuai pakpak galöm köla malja.

⁸ Börösöwögi pakpak mönö yañgö jimkutukutunöñgö bapñe malmegöra memba et al enjinöñga malme.”

Keu miangö dop yuai pakpak mi yañgö kukösum bapñe malmegöra memba et al enjiba miangöreñ yuai kun qahö mosöriga yañgö keuñangö bapñe qahö ahöbawak. Areñ mewö alökmö, nalö kewöñe börösöwöñi pakpak mi yañgö kukösum bapñe memba et al engii tem kölakzeañgö dop qahö engehakzin.

⁹ Mewö qahö engehakzinmö, Jisösnöñ mönö kewö letota mali ehakzin: Kömupkö sihimbölöñi möröhañgöra Anutunöñ wañgiri asakmararañnöñ öñgöiga kösatorom ila jalö wañgiiga ehinga aködamunñambuk aka qetbunañambuk malja. Anutunöñ kalem möriamñi kondel neñgimamgö möta körek neñgöra aka kömupkö sihimbölöñi mötmapkö jim teköyök. Miangöra memba et al wañgiiga nalö töröpñi Suep garata yeñgö nembö bapñine eta eretñi aka malök. Mewö malökmö, nalö kewöñe qetbuna öñgöñgöñi memba malja.

¹⁰ Anutunöñ mönö öroyuai pakpakö könanji akza. Yañön körek nini nanñi möpöseim wañgibingöra aka miwikñaim neñgiiga maljin. Yañön ambazip sehisehijñi neñguañgiri asak-mararañnöñ öñgöbingöra mötza. Mewö möta amötqeqeninangö Tonji mi qahö añgön köliga sihimbölö möta mewö miangön nupñi mi mem teköi asakmararañi pakpak miwikñaimapkö möri dop kölök.

¹¹ Kunöñ mem sarahim neñgimamazwi aka ambazip sarakñi ahakzini, körek neñgö kondotkondot Toninan mönö mohot akza. Miangöra Jisösnöñ qetnini “Alaurupni,” mewö qetmamgö gamunji qahö mötza.

¹² *Könaninañgöra Buña keu kun kewö jii ahöza, “Nöñön mönö göhö qetki mi nani alaurupni yeñgöra qet asarim enjiba urumelenj könagesö sutñine kinda möpöseim gihimakñam.”

* 2:6: Sum 8.4-6 * 2:12: Sum 22.22

13* Mewöyök miangö Buña keuñi kun kewö jii ahöza, “Nöñön mönö mötnaripni Anutugöreñ ala malmam.” Dumñe kunbuk miangö Buña keuñi kun mi kewö jii ahöza, “Mötnöñ, ni aka Anutunöñ nahönbörat niñgiyöhi, neñön mönö ki maljin.”

14 Kunöñ mem kömum neñgimangö kukñi memba maljawi, Jisösnöñ mönö i tulumgöi gemapköra aka kömumba mianön luhut alök. “Bölöñangö Tonji tulumgömam,” jiba ambazip sep busuni-nambuk maljini, miangöra yañön mönö mewöyök nembuk tandök mohot miyöhök gölme azia ahök.

15 Ambazip malmalñini gölmenöñ maljeangö dop kömumbingö keñgötñinan jöhöm engii mala kotkeri, mi mönö körek pösat engii solanimegöra aka gölme azia ahök.

16 Suet garata köyan köñ engimapköra gölme azia qahö ahökmö, Abrahamgö gwölönarökurupñi nini möt angön köla bauköm neñgimakñapköra mönö mewö ahök.

17 Könañi miangöra aka yañön öroyuai pakpak miangöreñ alaurupñi nembuk tandök mohot miyöhök ahök. Jike nup galömnini bohonñi aka nupñi nömtik memba ak kömum neñgiba malmapköra mönö nembuk tandök mohot ahök. Tandök mohot akagun mönö ölop jitñememenini aka jike galöm bohonñangö nupñi memakza. Mi memangöra siñgisöndokninañgö töwanji ala Anutugö jeñe mi köñ köñjörarök.

18 Göñme azia aiga esapköm wañgigetka nanñak sihimbölo möta malöhi, miangöra ambazip esapköm neñgimakzei, nini mönö ölop bauköm neñgimakña. Mewö.

3

Jisösnöñ Moses ongita öngöñgöñi akza.

1 Miangöra urumelen alaurupnini sarakñi, Suet Tonjan engoholi nembuk kambu mohot maljei, eñön mönö urumötmötñini pöndañ Jisösgöreñ ala malme. Anutunöñ i melaiiga aposol aka jike nup galömnini bohonñi akzawi, yañgöra mewö jim miwikñaimakzin.

2* Mosesnöñ Anutugö könagesöñi pakpak mi memburikñi qahöpmö, pöndañ galöm köñ engiba malök. Miangö dop Jisösnöñ mewöyök kun kuñgum wañgiyöhi, yañgö keuñi (misila) törörök wuatangöba memburikñi qahöpmö, pöndañ nömtik memba malök.

3 Miri aka azi miri meyöhi, mi kewöt etkiinga mitimqeqe azigö qetbuñajan mönö mirigö qetbuñaji gwötpuk ongitza. Miangö dop Moses aka Jisös kewöt etkiinga Jisösgö asakmararañi öngöñgöñan mönö Moses gwötpuk ongitza. Könañi mewö eka miwikñaimakzin.

4 Miri pakpak mi kungö börösöwöya akzemö, yuai pakpak mi mönö Anutugö börösöwöñi akza.

5 Mosesnöñ Anutugö könagesöñi pakpak mi memburikñi qahöpmö, pöndañ welen qem engiba malök. Mewö mala Anutunöñ könañgep azi kungöra jiyöhi, mönö keu miangö söpsöpñi mi qeljine indela dangununa kinök.

6 Mewö kinökmö, Kraistnöñ mönö Anutugö Nahönñi aka Iwiñangö keuñi (misila) nömtik memba könagesöñi pöndañ galöm köñ neñgiba malja. Anutugö könagesöñi mi neñön akzin. Oyaenköyaen akingö jörömqöröm aka miangöreñ qekötahöba silenini memba öngöba awösamkakak kin köhöim teköbin ewö, mönö Anutugö urumelen köñagesöñi aka malbin. Mewö.

Yañgiseñ aka malbinbukö galöm meme keu

* 2:13: Ais 8.17, 18 * 3:2: Jan 12.7

- 7 *Miangöra inini mönö Uña Töröñan keu kewö jimakzawangö dop akñe, “Dölkewöñe Anutunöñ engohola keuñi sañep ali mötze ewö,
- 8 uruñini mönö mötmöt hölöñan kude gwözöñme. Engö amböskonurupñinan gölme qararañkölkölñe kaba nalö kunöñ Anutu qetala esapköm wangiba karim akeri, inini mönö miangö dop Anutu qetala akepuk.
- 9 Yeñön gölme qararañkölkölñe kaba Anutu ni esapköm niñgiba malget. Angöletot aka memba malali, inini mi yambu (yara) 40 miangö dop eka mala mi töndup ni qahö möt narim niñgigetka urunan böliiga malal.
- 10 Miangöra ambazip kambu nalö miangöreñ gölmenöñ malgeri, yeñgöra aka irimni seholiiga kewö jial, ‘Yeñön mönö sundan uruñinan kahapmahap aka janjuñ anakze. Malmalgö köna kusum engiba malalmö, mi qahö möt kutuget. Qahö!’
- 11 Mewö jiba irimsesewöl qakñe keuni jim kutuba jöjöpañ keunan mi jöhöba kewö jial, ‘Luhut memba malmegö areñ al engialmö, yeñön mönö oyaenköyaen miangöreñ qahö angotme.’ ”
- 12 O urumelenj alaurupni, inini mönö kewögöra galöm mem anguba malme: Engöreñök kungö uruñan goñgiiga mötnaripñan sörauba eri Anutu malmal Tonji andö qeba malbapuk.
- 13 Mewö qahöpmö, siñgisöndökö isimkakalekñan tilipköm engii miangön engöreñök kungö uruñi gwözöñbapüköra mönö silim dop sutñine uru kuñgum anguba malme. “Merak” keu mi jimakzini, miangö dop mönö jölöñgöm anguba malme.
- 14 Nini Kraist möt angön köla yambuk kambu mohot aka maljin. Mutuk urunini melenja uruyahöt yaköriba awösamkakak miwikñaiba malini, mewö gölmenöñ malbinangö dop kapañ köla köhöiba kinbin ewö, mönö oyaenköyaen akin.
- 15 *Buña keu mi kunbuk jiba kewö ohozal, “Merak Anutunöñ engohola keuñi sañep ali mötze ewö, uruñini mönö kude gwözöñme. Engö amböskonurupñinan Anutu qetala karim akeri, inini mönö Anutu miangö dop qetala akepuk.”
- 16 *Ambazip denike yeñön Buña keu möta Anutu qetala karim aket? Mosesnöñ könagesö enguanñgiri Ijipt mosöta kageri, yeñön mönö körek mewö aket.
- 17 Ambazip denike yeñgöra aka yambu (yara) 40 miangö dop irimni seholiiga kazik ak engii malget? Ambazip siñgisöndök aketka mem kömum engii sileñinan gölme qararañkölkölñe eta kölgeri, yeñgöreñ mönö mewö asuhuyök.
- 18 Luainöñ luhut memba malmegö areñ ala nanñini gölmeñine kude angotmegö keuñi jim kutuba jöjöpañ keuñan jöhöyöhi, keu mi mönö dagöra jiyök? Ambazip keuñi qetala yangiseñ malgeri, mi mönö yeñgöra aka jiyök.
- 19 Keu miangö könañi mi kewö ek asarizin: Yeñön Anutu qahö möt nariba yangiseñ akerangöra aka nanñini gölmeñine angotpingö osiget. Mewö.

4

Anutunöñ könagesöñi sonda kendon neñgima.

1 Anutugöreñ angota luainöñ luhut memba malbingö keu jöhöyöhi, keu miangön mönö pöwöwöm köhöikñi ahöm neñgiza. Miangöra engöreñök kunñan löwöriba nanñi Suep köna ananñi mi kemañe kutui mewö miwikñaim wangibinbuk. Miangöra mönö sutnine galöm mem angubin.

2 Gölme qararañkölkölñe kagetka Ölöwak Buña jim asarim neñgiget ewö jiget mötketmö, keu mi mönö silesile mötketka uruñine qahö geyök. Miangöra

* 3:7: Sum 95.7-11 * 3:15: Sum 95.7-8 * 3:16: Jan 14.1-35

mötnaripñini qahö qiwikñaiiga tönpin öne malgetka qahö bauköm engiba pömsöm qeyök.

3 *Urunini melenja möt nariba maljini, neñön mönö Anutugörenj anggota luhut memba oyaenköyaen malbin, mi mötzin. Anutunöñ mianjö Buña keunji mi kewö jii ahöza, “Mewö jiba irimsesewöl qakne keuni jim kutuba jöjöpañ keunan mi jöhöba kewö jial, ‘Luhut memba malmegö areñ al engialmö, yeñön mönö oyaenkö-yaen mianjörenj qahö angotme.’ ”

Anutunöñ Suep gölme miwikñaim etkii nalö mianjörenjök könahiba oyaenköyaen mirinjan lök memteköteköñi ahözapmö, töndup keu mewö jiyök.

4 *Anutunöñ silim 7:ñanjö keunji jiiga Buña Kimbigö kempañi kunöñ kewö ahöza, “Sömañi 7 aiga Anutunöñ nupñi pakpak mem teköyöhanjö luhut memba kendon tarök.”

5 *Anutunöñ Buña keu mi toroqeba kewö jii ahöza, “Luhut memba malmegö areñ al engialmö, yeñön mönö oyaenköyaen mianjörenj qahö angotme.”

6 Ambazip tosatñan Anutugö oyaenköyaen miwikñaiba luhut memba malmei, keu mianjön mönö pöwöwöm köhöikñi ahöm neñgiza. Ölöwak Buña mutuk könagesö jim asarim engigeri, yeñön mönö qegetalñinanjöra aka oyaenköyaenñöñ qahö anggota luhut qahö meget.

7 *Luhut qahö megeranjöra aka Anutunöñ mönö kunbuk nalö kun ala qetñi Nalö dölkewöñi qerök. Nalö köröpñi teköiga nalö mianjö Buña keunji döлки jiba ohozali, mi mönö Deiwidkörenj indeli kewö jiyök, “Dölkewöne Anutunöñ engohola keunji sañep ali mötze ewö, uruñini mönö kude gwözöñme.”

8 *Mewö jiiga Josuanöñ enjuangiri oyaenköyaenñöñ anggota luhut membeak ewö, Anutunöñ mönö nalö kungö keunji mi könanjep qahö jibawak.

9 Mi qahö jibawakmö, Anutunöñ mönö ölna könagesö luhut meme neñgii oyaenköyaen miwikñaibin. Keu mianjön mönö pöwöwöm köhöikñi ahöm neñgiza.

10 *Mianjö könañi kewö: Anutunöñ nanñi nupñi meyöhanjö luhut memba kendon taröhi, mianjö dop kunöñ Anutugö oyaenköyaenñöñ anggota luhut memawi, yanön mönö nanñi nupñi meyöhanjö luhutñi mi mewöñanök memba oyaenköyaen malma.

11 Mianjöra nini mönö Anutugö oyaenköyaenñöñ anggota luhut memenji miwikñaibingö kapañ kölbin. Engörenjök kunöñ et qeba könagesö walñi yengö qegetal tandökñini miyöhök wuatangöbapuköra mönö kapañ kölbin.

12 Anutugö keunji mi memguliguligö könañi aka kukösum-ñambuk akza. Bimgö sou ketañi mi likep likep jitñirambuk akzapmö, Anutu keunanjö jitñan mönö sou ketañi pakpak engonjita jit kötök aiga jitñi bahöbahö mi mauñambuk akzahot. Keu mianjön mönö uru uñanini kutuba ömenöñ me Anutugö Uñañan inahöm neñgimakzawi, mi undenja kungum neñgimakza. Sile kitip toroqegenini aka sihitninanjö digonñi mi mewöyök kewöta (keunini asaambötñi miwikñaiba) ölöpñi aka bölöñi mendenj etkimakza. Urukönömnini aka mötkutukutu areñnini mi kewöta keunini jim tekömakza.

13 Anutunöñ yuai pakpak miwikñaii ahözawi, mianjörenjök yuai kun mi asaambötñe qahö ahöiga ölöpñanök ehakza. Yuai kun esuhuinga Anutunöñ esunini mi ölop luluñda ehi yanjö jemesoholñe aukneyök ahöza. Ahakmemeninanjö kösohot pakpak mi mönö yanjöra jim asaribinanjö dop akzin. Mewö.

Jisösnöñ jike nup galömnini öngöñgöñi akza.

* 4:3: Sum 95.11 * 4:4: Jen 2.2 * 4:5: Sum 95.11 * 4:7: Sum 95.7-8 * 4:8: Dut 31.7; Jos 22.4
* 4:10: Jen 2.2

¹⁴Jisösnöj jike nup galöm bohonji öngöngöj ak neŋgiza-waŋgöra aka neŋön “Möt narim waŋgizin,” jiba jim miwik-ŋaimakzini, miangören mönö köhöiba kinbin. Jisös Anutugö Nahönŋan mönö Suep jakenj jakenj enŋonŋita öngöba tatza.

¹⁵Urumötmötnini tosatŋan lölöwöröj aketka jike nup galöm tosatŋan miangöra wösömötmöt qahö ak neŋgimakzemö, nanine jike nup galömninan mönö qainŋi kun kewö akza: Yaŋön mönö nini ewö ahakmeme pakpak miangören nembuk tandök mohot esapköm waŋgiba malgetmö, mi töndup ŋiŋisöndok kun qahö ahök.

¹⁶Jike galömninan mönö eu kalem möriamgö dum tatatŋe tata ak kömum neŋgimamgö mörakza. Miangöra mönö awösamkakak qakŋe kinda yaŋgö kösutŋe anbin. Yaŋgö kösutŋe aninga kalem möriamgöra osizini, miangö nalö diŋdiŋe mönö bauköm neŋgiiga mi ölop miwikŋaibin. Mewö.

5

Galöm bohonini Jisösnöj mönö bauköm neŋgimakza.

¹Gölmegö jike nup galöm bohonji pakpak mi ambazip sutŋineyök möwölöhöm enŋiba nup kewö memegöra kuŋgum enŋimakzin: Yaŋön ambazip jitŋememenini aka Anutubuk urumohot aka malbingö nupŋi memba ŋiŋisöndok ahinaŋgö sömbup kalemŋi kalemŋi mi Anutugöra ala miangön jöwöwöl ohomakza.

²Nanŋi urumöt-mötŋi tosatŋan mewöyök lölö-wöröj akza. Miangöra ambazip gukmaulem qakŋe janjuŋ ahakzei, mi ölop wösömötmöt qakŋe ak neŋgimakza.

³*Lölöwöröj akza-waŋgöra mönö nanŋi ŋiŋisön-dokŋi aka könagesöurupŋi yeŋgö ŋiŋisöndokŋini mewöyök köl könjöratmapköra sömbupnön jöwöwöl ohomakza.

⁴*Kunŋan qetbuŋa mi nanŋangöra qahö buŋa qem aŋgumapmö, Anutu-nön Aron oholöhi, miangö dop mönö i mewöyök oholja.

⁵*Miangö dop Kraistnön mewöyök nanŋak jike nup galöm bohonji akŋapkö qetbuŋaŋi mi nanŋangöra qahö buŋa qem aŋguyökmö, Anutunön kewö jim kutum waŋgiyök, “Göŋön nönŋö Nahöni aknönŋa nönön mönö merak göhö Iwigi akzal.”

Keu miangö dop jike nup galöm bohonini ahök.

⁶*Keu miyöhök jii Buŋa Kimbigö kemaŋi kunön kewö ahöza, “Göŋön mönö Melkizedek ewö jike nup galöm aka nalö teteköj qahö mal öngöman.”

⁷*Jisösnöj silebuk gölmenön mala miangören mönö nalöj nalöj köuluköba köhöikŋanök qeriga imbilŋan eri Anutu kömupnöhök mekömapkö köhöiyöhi, i qesim waŋgiba malök. Qesim waŋgiba mala Anutu göda qeba keuŋgö bapŋe al aŋguba malöhaŋgöra Anutunön köulukŋi mörök.

⁸Nahönŋi ahökmö, Anutunön mi töndup sihimbölö qahö jöhöi qakŋe öngöi möta miangören temkölkölgö könaŋi miwikŋaiba möt soroköyök.

⁹Mi möta aködamunŋi pakpak miwikŋaibagun mönö oyaenköyaen teteköj qahö malbingö kondotkondot Tonj ahök. Miangöra ambazip yaŋgö jitŋi tem köla maljei, mi pakpak mönö ölop kondot enŋiiga oyaenköyaen akŋe.

¹⁰Tonj mi aiga Anutunön i Melkizedek ewö jike nup galöm bohonji akŋapkö jim teköba al waŋgiyök. Mewö.

Mötnaripkö öljä sohobapukö galöm meme keu

* **5:3:** Lew 9.7 * **5:4:** Eks 28.1 * **5:5:** Sum 2.7 * **5:6:** Sum 110.4 * **5:7:** Mat 26.36-46; Mak 14.32-42; Luk 22.39-46

11 Keu mi ölop toroqeba gwötpuk jim qaribinakmö, enön keu möta wu-
atañgöbingö tañqan aka gaunjeje akze. Mianğöra mi jim asarim enğibingö
osikosi akzin.

12* Injini nalö köröpni könagesö walni mala ölop nalö kewöne lök böhi qağazu
akñeanğö dop akeakmö, nanñinak Anutugö keu kötni mutukni mi kunñan
dumne kunbuk kusum enğimapköra osimakze. Injini mönö qaköba Buña keu
mi juzu ewö nemingö mötze. Nene köhöikni ewö mi nemingö osimakze.

13 Kunñan mi juzu ewö nemba maljawi, yañön mönö toroqeba morösepsep
ewö akza. Anutugö jene solanñi akingö keu kusum enğiinmö, yañön mianğö
könañi qahö möt kutuba tönpin malja.

14 Morösepsep ewö maljapmö, nene köhöikni mi ambazip mötmötñinan
qariyöhi, mönö yeñön nemegöra aka ahöza. Ambazip Buña keu sundan
kök guliba malgetka urumötmötñinan lök möñaiiga ölop amqeba silik pak-
pak kewöta ölopni aka bölöñi mendenj etkiba ölopni wuatangömakze. Nene
köhöikni mi yeñgöra aka ahöza.

6

1 Mianğöra Kraist könañanğö keu kötni mutukni lök möta mianğoreñ mönö
kude qaköbin. Mewö qahöpmö, mönö toroqeba qariba aködamuninambuk
akingö kapan köla malbin. Mötnaripkö tandöñi lök kuñguba mi mönö dumne
kunbuk könahiba kuñgubinbuk. Tandö mi uruñine kewö kuñguin: Ahak-
memenini köhömuñi mosöta urunini melenđa Anutu möt narim wañgiin.

2 Urunini melenñinga mötnaripkö keu kemañi kemañi kewö kusum
neñgigetka mörin: Sinğisöndoknini kök könjöratmegöra o melun aka amötqeçe
könañi könañi miengö könañini kusum neñgiget. Böröñini qaknine alalgö
könañi kusum neñgiget. Guliba kömupnöhök wahötpingö könañi kusum
neñgiget. Anutunöñ keunini jim teköi teteköñi qahö köhöikni ahömapkö
könañi kusum neñgiget.

3 Mötnaripkö tandöñi mewö kuñgubagun mönö toroqeba möt qaribingö
mötzin. Anutunöñ ösum-mumu neñgimakzawañgö dop mönö aködamunini pak-
pak miwikñaibingö kapan köla kinbin.

4 Mewö kinbingö möta mianğoreñ qaköba etpinbuköra aka kinjin. Ambazip
kewöñi mi uruñini melenmegöra enğuanğitpingö osimakzin: Tosatñan uruñini
nalö kunöñ asariiga Anutunöñ Suep kalemni enğii möta söñgaigetka Uña
Töröñan ösupköm enğii malget.

5 Anutu Buña keuñanğö nahömni mötketka oyaenköyaen nalö
könañgepñanğö kukösumñan mönö uruñine gei mötket.

6 Mi pakpak mötagun mönö mötnaripñini mosöta Anutu andö qeget. Am-
bazip mi uruñini kunbuk melenmegöra enğuanğitpingö osimakzin. Yeñön
Anutugö Nahönñi ilita dumne kunbuk maripomnöñ qeçe ewö memba et ala
aukne gamu qem wañgimakze. Mewö mianñön mönö nanñini geñmororoñ ak
añgumakze.

7 Mi söpsöp keu kianğö dop: Kienöñ nalö gwötpuk yöhöba gölme qakne
eta uruñe geba gölme mem keloriga nup toñanğö welenqeçeupñan nene
kömötketka Anutunöñ gölme kötuetköiga ölni asuhui kölkömöt toñi yeñön mi
memba köweñine alakze.

8* Mewö alakzemö, koururuk aka siriuret wahiñambuk mianñön gölmenöñ
asuhuba wahörakzawi, gölme mianñön mönö nesakni akza. Toñi yeñön mi
saitköbingö mötze aka kapan köla mambötketka ölni qahö asuhui eka teteköñe
mönö kuñgugetka jema.

* 5:12: 1 Kor 3.2 * 6:8: Jen 3.17-18

⁹ O wölböt alaurupni, neñon söpsöp keu mewö jizinmö, mi töndup inini urunini melenja malmeanjöra mönö uruyahöt qahö akzin. Engö urunine Buja keugö ölnan mönö asuhum qarimapköra möta awösamkakak kinjin. Anutunöñ ölni mi eka mönö meköm engii letota Suepnöñ öngöme.

¹⁰ Anutunöñ mönö ekbonep qakne gonjonji qahö akza. Inini Anutugö ambazip sarakni bauköm engiba mala kota toroqeba bauköm engiba nup memba malakze. Mewö urukalemñini Anutu kondel wangigetka qetbuñanjaran qarimakzawi, yañon nupñini aka urukalemñini miangöra mönö qahö ölum qeiga kitipni melenj engima.

¹¹ Nini oyaenköyaen akingö jörömqöröm aka miangöreñ awösamkakak uruyahöt qahö kinmegö sihimnini möta kewö awöwenjömakzin: Inini nanñök nanñök Anutugö urukönöp ahakzei, miyöhök mönö toroqeba kondela malme. Aködamun-ñinambuk akingö kapan köla gölmenöñ mal tekömeanjö dop miangöreñ mönö kude löwörime.

¹² Qölzöm akepuköra mönö awöwenjömakzin. Anutunöñ oyaenköyaen yuai nenjimangö keu jöhöyöhi, tosatñan Anutu möt nariba sihimbölöñini möta mökösoñda mewö miangön mi buja qem angumakze. Inini yengö silikñini wuatangömegöra mötzin. Mewö.

Anutugö jöhöjöhö keu mi uruyahötñi qahö.

¹³ Anutunöñ Abraham jöhöjöhö keu wangiba mi nanñi qetni qeta jöjöpañ keunan jim köhöiyök. Kunöñ Anutu ongita öngöngöñi malbawak, ölop yangö qetni qetpawakmö, mewöñi kun qahö maliga miangöra mönö nanñi qetni qeta jöjöpañ keunji jiiga köhöiyök.

¹⁴ *Jöhöjöhö keunji mi Abrahamgöra kewö jiba jiyök, “Nöñon mönö ölna kötuetköm gihimam. Mönö ölna gwölönarök gihibiga sehime.”

¹⁵ Mewö jiiga Abraham yuai wangimapkö keu jöhöi ahöyöhi, yañon mi ölnambuk akñapakö kapan köla mamböta mala ölni buja qem anguyök.

¹⁶ Ambazipnöñ ketanjanñinangö qetni qeta jöjöpañ keu jiget mörakze. Jöjöpañ keunjan keu jizei, mi mem köhöiiga qeapköbingö osigetka keu jijninan teköza.

¹⁷ Miangö dop Anutunöñ keunji Abrahamgö gwölönarökurupñi neñon mötpingöra jöhöba jiyök. Keu areñi mi kunöñ qeapköba utekömamgö osizawi, gwölönarökurupñi neñon jöhöjöhö keu miangö könañi mi törörök möt yaköbingö mörök. Miangöra jöhöjöhö keunji jiiga mutukñi aiga keu mi kunbuk jöjöpañ keunan jim köhöiiga indimñi yahöt ahök.

¹⁸ Anutunöñ keu mi jiba miangö munen jimangö osiyök. Yañon keu utekutekñi qahö mi jibagun jim köhöiyöhi, miangön mönö urunini nangömapköra mörök. Miangöra mi jibagun jim köhöiyök. Neñon gölmegö ahakmeme bölöneyök ölöñ köla Anutugöreñ angota oyaenköyaen nenjimapakö jörömqöröm nenjiyöhi, mi mönö töp memba mamböta maljin.

¹⁹ *Oyaenköyaen akingö al mamböta miangö uruyahötñi kun qahö ahakzin. Jörömqörömnini miangön uruninangö kösö mendannji tandök ewö aka nini Jisösbuk jöhöm nenjimakza. Jörömqörömninangö kösö mendannji köröpñi miangön mönö nenjöreñök könahiba Sup jikegö urune öngöba jike oleni yahötkö sutñire opo sel ahözawi, mi mewöyök kutuba toroqeba Jisös jakömbuak dum kömbukne tatzawangöreñ anja.

²⁰ *Jisösnöñ mönö jitnememenini aka mutuk euyangöreñ öngöba jakömbuak dumñi memba nalö teteköñi qahö tat öngöma. Mewö Melkizedek ewö jike nup galömnini bohonñi aka malja. Mewö.

* 6:14: Jen 22.16-17 * 6:19: Lew 16.2 * 6:20: Sum 110.4

7

Jike nup galöm Melkizedekö kösohot

¹ *Melkizedek azi mi miri qetnji Salem miangö kiñ kembuñi aka Anutu öngöngöñangö jike nup galömña malök. Mewö maliga Abrahamnönj kiñ kembuñi kembuñi bim qeba luhut al engiba lilingöba miriñe kayöhi, nalö miangörenj kaba Abraham miwikñaiba kötuetköm wangiyök.

² Kötuetköm wangiiiga sukinapñi pakpak mendenä ten miengörenök mohot mohot (1/10) memba nalukña al wangiyök. Melkizedek qet miangö könani mi “ahakmeme solanñangö kiñ kembuñi.” Qetñangö dop mutuk “ahakmeme solanñangö kiñ kembuñi” ahök aka toroqeba mewöyök “Salemgö kiñ kembuñi” malök. Salemgö kiñ kembu qet miangö könani mi “luaigö kiñ kembu”.

³ Melkizedeknönj iwinamñi aka saiwaurupñi qahö, ahياهو nalönj qahö aka kömukömuñi qahö.* Mewö jike nup galöm bohonñi aka nalö tetekönj qahö mal öngöma. Yanön Anutugö Nahönñangö tandök ewö akza.

⁴ Bömönjalönini Abrahamgö gödaqege silikñan Melkizedekö könani kondeli mi kewö ek asarime: Abraham nanñak sukinap yuai aködamunñambuk kalöpköba memba kayöhi, miengörenök börö yahöt (10) pakpak kewöta bahönj mohot memba Anutugö nalukña al wangii miangöra Melkizedeknönj mönö ölña öngöngönj ketanñi qainñi kun akza.

⁵ *Anutunönj Köna keuñan keu kewö jim kutum nenñii ahöza, “Liwaigö gwölönarökurup al engigetka jike nup meme azi (Liwait) aketka könagesö enjön mönö sukinapñini börö yahöt (10) pakpak kewöta miengörenök bahönj mohot memba Anutugö naluha al engimakñe.” Yenön inñini ewö Abrahamgö gwölönarökurupñi akzemö, mi tönñdup nanñini könagesöurupñini engö börönjineyök naluknini mi buña qem angumakñe.

⁶ Jimkutukutu keu mewö ahözapmö, Melkizedeknönj Liwaigö gwölönarökñi kun qahö akza. Mi tönñdup Abrahamnönj Anutugö jöhöjöhö keu möt angön köla mala sukinapñi kewöta tenöhök mohot memba Anutugö nalukña alöhi, mi mönö buña qem anguba kötuetköm wangiyök.

⁷ Ketanñaminangö nembö bapñine maljini, yenön mönö kötuetköm nenñigetka maljin. Keu mi qañ kölbängö osimakzin.

⁸ Könagesö nenjön tenöhök mohot memba Anutugö naluha alakzini, mi gölmegö jike nup meme (Liwait) ambazipnönj buña qem angumakze. Yenön gölmenönj mala kömumakzemö, Sup mire euyangörenj kungöra nanjöba jigetka köhöiba mal öngömawi, yanön mönö mi buña qem angumakza.

⁹ Abrahamnönj sukinapñi kewöta börö yahöt (10) pakpak miengörenök bahönj mohot memba Anutugö nalukña alöhi, yanön mi gwölönarökñi Liwaigöra mewöyök qelñine alök. Mewö jiinga ölop dop kölbawak. Nalö kewöñe tenöhök mohot memba Anutugö nalukña alakzini, mi bömönini Liwaigö gwölönarökurupñan buña qem angumakze.

¹⁰ Liwaigö salupñe mewöyök naluk alöhi, miangö könani kewö: Liwainönj ambönangö körö uruñe tariga Melkizedeknönj mönö nalö miangörenj kaba Abraham miwikñaiyök. Mewö.

Melkizedek mi Jisösgö söpsöpñi akza.

¹¹ Anutunönj Köna keuñan Israel ambazip jim kutum nenñiiga miangö dop Liwai kambunöhök azi kuñgum enñiinga jike nup galömnina aket. Nup mi megetka mewö miangön aködamunini pakpak miwikñaibinak ewö, nini mönö jike nup galöm qainñi kungöra qahö osibinak. Nup miangö ölñan qahö dop

* **7:1:** Jen 14.17-20 * **7:3:** Buña Keunönj Melkizedekö iwinamñi aka saiwaurupñi, ahياهو aka kömukömu nalönj mi qahö jim asariza. * **7:5:** Jan 18.21

kölöhanğöra aka Jisösnöñ mönö Melkizedek ewö asuhuyök. Ambazipnöñ i Arongö arenanğö dop qahö kuñgugetka asuhuyök.

¹² Jike nup galöm nupñanğö kónañan uteközawi, nalö mianğören kóna keuninan mönö mewöñanök uteköza.

¹³ Jike nup galöm qainñi kun keu mi Kembuninanğöra jizinmö, yañön Liwai kambunöhök qahöpmö, mönö kambu kunöhök asuhuyök. Kambu mianğö azi kunñan mönö jöwöwöl jikegö altanöñ kinda nup qahö memba malök.

¹⁴ Kembuninan Juda kambunöhök asuhuyöhi, keu mi aukñe ahöza. Mosesnöñ Juda kambu yeñön jike nup galöm kölmegö keu kun qahö jiyök.

Jike nup galöm Melkizedek ewö kun

¹⁵ Mianğöra jike nup galöm kun Melkizedekö tandök ewö asuhuzawi, mianñön mönö keu jizinanğö ölni mi aukñeyök kondeliga dopñe akza.

¹⁶ Yañön gölme ambazipnöñ Kóna keu wuatanağöba kambuñanğö dop jim kutugerağöra aka jike nup galöm qahö ahökmö, malmal köhöikñi qahö ayapkömawi, mianğö kukösumñan mönö nam köl wañgiiga jike nup galöm ahök.

¹⁷ *Kunöñ yañö kónañi nanğöba jiiga Buña Kimbinöñ kewö ahöza, “Göñön Melkizedek ewö jike nup galöm aka nalö teteköñi qahö mal öñgöman.”

¹⁸ Anutunöñ mewö jiba jimkutukutu mutukñi mi qeapköyök. Keu mianğö kukösumñan qahöwahiga bauköm neñgimapkö osimazawi, mianğöra mi qeapköyök.

¹⁹ Kóna keunöñ ambazip aködamunini miwikñaibingö qahö bauköm neñgiyök. Qahö. Mianğöra keu areñ mutukñi qeköba salupñe jörömqöröm qetpuk sorok neñgiza. Nini jörömqöröm mianğö qakñe kinda ölop Anutugö kösutñe anda köulukömakin.

²⁰ Anutunöñ jike nup galöm dölokñanğö keuñi jiba mi jöjöpañ keuñan jim köhöiyök. Mewö ahökmö, jike nup galöm tosatñi yeñö keuñini mi jöjöpañ keunöñ qahö jim köhöigetka töndup mewö aket.

²¹ *Tosatñan jike nup galöm öne aketmö, Anutunöñ Jisös kuñguba keuñi mi jöjöpañ keuñan jim köhöiba yañöra kewö jiyök, “ ‘Gi mönö jike nup galöm aka nalö teteköñi qahö mal öñgöman.’ Kembunöñ keuñi mi jöjöpañ keuñan jim köhöiba uruñan mi qahö uteköma.”

²² Jöjöpañ keu mianğöra aka Jisösnöñ mönö jöhöjöhö areñ dölokñanğö ölni asuhumapkö galömñi akza. Mewö Anutu aka ambazip sutnine nup memba malja. Jöhöjöhö areñ mianñön walñi oñgita qetpuk sorok akza.

²³ Jike nup galöm tosatñi mi mönöwök gwötpuk malget. Kömumba nupñini toroqeba membingö osigeri, mianğöra mi mönö gwötpuk malget.

²⁴ Yeñön gwötpuk malgetmö, Jisösnöñ nalö teteköñi qahö mal öñgömawi, mianğöra jikegö galöm nup mi mönö teteköñi qahö memba mal öñgöma.

²⁵ Nup mi memba maljawañöra Jisösnöñ ambazip yañören kagetka enğuanğiri Anutugö kösutñe anakzei, mi ölop köhöiba amöt qem enğii keuñinan kömumakza. Nalö dop yeñöra aka Anutu köulukömak-ñapköra maljawi, mianğöra mönö ölop amöt qem neñgim tekömakza.

²⁶ Jike nup galöm bohonñi mewöñan mönö ölop dop köl neñgiza. Yañön töröñi köpösihitkö keuñi qahö aka sarakñi akza. Anutunöñ Jisös siñgisöndok ambazip neñgörenök tirin kutuba wañgiri Suep jakeni pakpak kutuba eu-yañören öñgöba qainñi kun akza.

²⁷ *Jike nup galöm tosatñan sömañi sömañi mutuk nanñini siñgisöndokñinañğöra aka mianğö andöñe könagesö yeñö

* 7:17: Sum 110.4 * 7:21: Sum 110.4 * 7:27: Lew 9.7

siŋgisöndokŋinaŋgöra aka sömbupnön jöwöwöl ohoba maljema. Jisösnön nanŋi silenŋi köleŋniga jöwöwöl ohoho ewö ak waŋgigetka mewö mianŋön könagesö nenŋö siŋgisöndoknini mi indim mohot mianŋörenŋök lök köl könjörari dop köl teköza. Mianŋöra Jisösnön mi jike nup galöm tosatŋi ewö nalö dop ahakŋapkö qahö osiza.

²⁸ Anutunön Köna keuŋi Moses waŋgiiga mianŋö dop ambazipnön azi mi kuŋgum enŋigetka jike nup galöm bohonŋi ahakze. Gölme azi yeŋön kukösumŋini qahö maljemö, Anutunön oyaenŋoyaen akingö keuŋi mi könaŋgep nenŋiba mi jöjopaŋ keuŋan jim köhöiyöhi, mianŋö dop Nahönŋi kuŋguiga bohonini akza. Bohonini yaŋön mönö aködamunŋi körek pakpak lök miwikŋaiba nalö tetekönŋi qahö köhöikŋi mal öŋgöba malma. Mewö.

8

Jöhöjöhö areŋ dölökŋaŋgö jike nup galöm bohonŋi

¹ *Keu jizini, mianŋö keu kötŋi bohonŋi mi kewö: Nini mönö jike nup galöm bohoninambuk akzin. Bohonini yaŋön mönö Suep mire öŋgöba Öŋgöŋgöŋamnini yaŋgö jakömbuak dum tatat qöhöröŋe böröŋi ölŋe tatza.

² Opo seri jike ölŋi mi Suepnön ahöza. Mi gölme azinön memenŋi qahöpmö, Kembunön nanŋak mi meyök. Jike nup galöm bohonini yaŋön mönö opo seri jikegö olenŋi töröŋi kötökŋi mianŋören mala Anutu welenŋi qemamgö nupŋi memakza.

³ Gölmegö jike nup galöm bohonŋi pakpak mi naluk kalem Anutugöra ala sömbupnön jöwöwöl ohoba malmegöra kuŋgum enŋimakzin. Mianŋö dop jike nup galöm bohonini Jisösnön mewöŋanök nanŋi Anutugö nalukŋa al waŋgiyök.

⁴ Mosesgö Köna keugö dop naluk kalem Anutugöra alakingöra azi lök kuŋgum enŋigetka malje. Mianŋöra jike nup galöm bohonini mianŋön gölmenön malbawak ewö, yaŋön mönö gölmegö jike nup galömŋi akŋamgö osibawak.

⁵ *Gölmegö jike nup galöm yeŋön gölmegö jöwöwöl jikenön Anutu welenŋi qebingö nupŋi memakze. Jike mianŋön mönö Suep jike kömbukŋaŋgö söpsöpŋi aka imutŋi akza. Mosesnön jike kömbukŋi opo serinön memamgö ahöhi, nalö mianŋören Anutunön Suep jikenŋaŋgö arenŋi mi indelök. Indel teköba galöm meme keuŋi kewö jii mörök, “Mötnön, kundunŋe malnönŋa arenŋi kondel gihiali, yuai pakpak mönö mianŋö dop törörök wuatangöba memam.” Mianŋö dop opo serinön jöwöwöl jike meiga mianŋön mönö Suep jikegö korembinŋi ahök.

⁶ Anutunön oyaenŋoyaen akingö jöhöjöhö keu dölökŋi nenŋiiga mianŋön jöhöjöhö keu walŋi onŋita ölöp sorokŋi akza. Jöhöjöhö keu mianŋön areŋ dölökŋaŋgö tandönŋi akza. Jöhöjöhö areŋ dölökŋi mianŋön mönö areŋ walŋi onŋita qetbuŋaŋambuk akza. Qetbuŋa mianŋö dop Jisösnön jöhöjöhö areŋ dölökŋaŋgö nupŋi ölöp sorokŋi mi buŋa qem anŋuba Anutu aka ambazip sutnine kinda bauköm nenŋimakza. Nupŋi mianŋön mönö gölmegö jike nup memenŋi mi gwötpuk onŋita aködamunŋambuk akza.

⁷ Jöhöjöhö areŋ mutukŋan keuŋi qahö aka dop kölbawak ewö, jöhöjöhö areŋ könaŋgepŋan asuhumapköra öne qahö mamböt-pinak.

⁸ *Mewömö, ambazipnön töndup böligetka Anutunön könaŋini miwikŋaiba jim enŋiba kewö jiyök, “Kembu nönön kewö jizal: Mötket! Nalö kun kam kuŋgumawi, mianŋören Israel kambu aka Juda kambu embuk jöhöjöhö areŋ dölökŋi akŋam.

⁹ Nönön ambösakonurupŋini böröŋine memba Ijpt kantrinöhök enŋuanŋitpiga yaigep kagetka yembuk jöhöjöhö areŋ ahalmö, yeŋön nönŋö jöhöjöhö

* 8:1: Sum 110.1 * 8:5: Eks 25.40 * 8:8: Jer 31.31-34

areñ mi qahö qekötahöba tem kölget. Miangöra nöñön mewöñanök i andö enguyal. Kembu nöñön mewö jizal. Jöhöjöhö areñ dölökñi akñami, mi Buña keu walñangö dop qahö.

- ¹⁰ Mewö qahöpmö, nalö mianñon kam kuñguiga Kembu nöñön mönö Israel könagesö yembuk jöhöjöhö areñ dölökñi kewö aka jimam: Nöñön mönö nani Köna keuni pakpak mi yeñgö mötmötñine ala uruñine kimbi ewö ohobi ahöma. Mewö aka yeñgö Anutuñini akiga yeñon mönö nöñgö könagesöni aka malme.
- ¹¹ Nalö miangöreñ ketañi moröñi mi körekmakörek nöñgö könani möt yaköba malme. Miangöra böhi kunöñ Kembugö könañi mötmegöra sutñine qahö kusum engiba malma. Datñan munñangöra kewö qahö jima, ‘Gi mönö Kembu möt yaköman.’
- ¹² Kewögöra ni möt yaköm niñgiba malme: Nöñön ahakmemeñini bölöñi mi sanğonđa mosötmmam. Siñgisöndokñinangöra mönö ölum nuñgui mi qahö toroqeba mötmörimam.”
- ¹³ Anutuñon jöhöjöhögöra “Dölökñi” jiba mewö mianñon jöhöjöhö areñ mutukñangöra “Mönö walñi ahök,” jiiga könañi mewö asuhuyök. Keu areñ kunöñ nalö köröpñi ahöba walñi akzawi, mianñon mönö ayapkömangö dop akza. Mewö.

9

Gölmeğö opo seri jikenöñ Anutu kewö möpöseiget:

¹ Anutuñon jöhöjöhö areñ mutukñi aka miangöreñ mewöyök waikñi memba möpöseibingö areñi mi jim kutui wuatangöget. Mi wuatangöba gölmenöñ opo seri jike megetka ahöyök.

² *Anutugö opo seri jike kömbukñi mi kewö meget: Jike oleni mutukñi miangöreñ lambegö dum tatatñi aka beret kömbukñi mi Anutugö jemesoholñe tebolnöñ buñaña alget tarök. Jike uruñi miangö qetñi mi jike oleni kömbukñi.

³ *Miangö andöñe jike uru qetñi jike oleni töröñi kötökñi mi ahöyök. Jike oleni yahöt mietkö sutñire opo sel kinök.

⁴ *Jike oleni töröñi kötökñi miangöreñ jiniñ ohohogö altañi aka jöhöjöhö arengö bokisñi mi ahöyohot. Altañi mi goulñon memeni aiga bokis sileni mi körek goulñon turuturuñi ahök. Paura qetñi mana mi goul kumbutñon ala bokis miangö uruñe galöm kölget. Mewöyök Arongö öröpñi sötñi jujulñi aka Anutuñon jöhöjöhö areñi kötnöñ ohoi ilañi mi bokis miangö uruñe galöm kölget. Bokis uruñe yuai karöbut mi mewö ahöget.

⁵ *Bokis qakñe imut yahöt goulñon memeni mi Anutuñon dowe mali asakmararañangö söpsöpñi aka kinohot. Imut yahöt mi ginginñiri kötula bokis önunñi turuba kinohot. Bokis önunñi mi Anutugö köl köñjörat dumñi ahök. Keu mohot mohot mi nalö kewöñe nanñök nanñök törörök eraum mötpinañgö dop qahö.

⁶ *Anutugö opo seri jike kömbukñangö yuai pakpak mi mönö mewö arengögetka ahöiga jike nup galöm yeñon nalö dop jike oleni mutukñi miangöreñ öñgöba Anutu welenni qeba nupñini memba malget.

⁷ *Mewö malgetmö, jike nup galöm bohonñi yañönök (yara) yambu dop indimñi mohot miangöreñ jike oleni töröñi kötökñi miangöreñ öñgöba malök.

* 9:2: Eks 26.1-30; 25.23-40 * 9:3: Eks 26.31-33 * 9:4: Eks 30.1-6; 25.10-16; 16.33; Jañ 17.8-10; Eks 25.16; Dut 10.3-5 * 9:5: Eks 25.18-22 * 9:6: Jañ 18.2-6 * 9:7: Lew 16.2-34

Sep memba miangören öngöba nannangöra aka könagesö yenön gukmaulem qakne singisöndok akeri, mönö miangöra aka jöwöwöl ohoba sepni mokoi erök.

⁸ Mewö arengöba aketka Uña Törönan söpsöp mi kondela mianjön ambazip kewö kusum nengiba malök: Jike oleni mutuknan toroqeba kinjawi, nalö miangören Anutunöj jike oleni töröni kötöknanjögö könanji mi aukne qahö indeliga malget.

⁹ Keu mi nalö kewönanjögö söpsöpni akza. Könanji kewö: Ambazipnönj kalemni kalemni naluk ala jöwöwöl memba kagetka ohomakzemö, uruninan töndup luai miwiknaibingö osimakze. Uruninan singisön-dok akerangöra aka tölöhoi jöwöwöl memba kaba Anutugö jike kömbukne öngöba köulukömakzemö, mianjön mönö singisöndok-ñini köl könjöratpingö osimakze.

¹⁰ Nene kalem aka o kalem memba kaba an köl kam köl aketka o melun könanji könanji mem engimakzemö, mewö silegö jimkutukutuñi miyök wuatangömakze. Yuai mi mutuk dop köli aka malgetmö, Anutugö arenj dölöknanjögö nalönan kam kunjuiga miangörenjök könahiba qahö toroqeba dop kölma. Mewö.

Kraistkö sepnanjögö könanji

¹¹ Kraistnönj kaba oyaenjkoyaen nengimakzawangö jike nup galöm bohonji ahöhi, yanön gölmegö opo seri jike kömbukni azinönj memenji miangörenj qahö öngöyökmö, mönö Suepkö jike kömbukne öngöyök. Jike kömbukni mianjön öngöngöñi akza. Aködamunñan mönö asakmararajambuk.

¹² Miangörenj öngöba urunji mutukni kutuba meme (nonin) aka bulmakau moröñi miengö sepñini qahö memba anökmö, nanñi sepni mokoiga mianjön nam köl wanjiiga Suepkö jike oleni töröni kötökni miangörenj öngöyök. Miangörenj nalö mohotkö dop öngöiga dop köl teköza. Sohpnini mewö memba oyaenjkoyaen akingö kondoriga nalö teteköñi qahö dop köla ahöm öngöma.

¹³ *Mutuk meme (nonin) aka bulmakau aziñi enguba sepñini memba kaba bulmakau ambi seramni mianjön jöwöwöl ohoba miangö bupgahajöñi mewöyök memba kaba ambazip kölköl-jinjinambuk mianjön qewösahöba engömirigetka dop köl engiyök. Mewö amöt qem engigetka mianjön silenini sanjonja mem sarahim engii malget.

¹⁴ Mewö aket ewö, Kraistkö sepnan mönö amötqeqe tandök mi gwötpuk onjita kewö ak nengimakza: Sepnan mönö urunini tölöhoi sanjonja kömup köhöiknanjögö buña akingö ahakmemenini mi köl könjörarakza. Mewö ak nengiiiga malmal Tonji Anutu welenni qebingö nupni mi amqeba memba malbin. Uña Törönan mala kota teteköñi qahö mal öngömawi, yanön mönö Kraist bauköm wanjiiga köpösihitñi qahö malökmö, nengöra aka nanñi kölen anguba Anutugö jöwöwöl lamanji ahök.

¹⁵ Könanji kewögöra Kraistnönj jöhöjöhö arenj dölöknanjögö galöm bohonji akza: Anutunöj ambazip oyaenjkoyaen aka nalö teteköñi qahö mewö malbingö keu jöhöba engoholöhi, mienjön Anutugö Buñani mi buña qem angumegöra mötza. Miangöra Kraist aliga Anutu aka ambazip sutnine urumohot akingö nupni memba malja. Jöhöjöhö arenj mutuknanjögö nalöne ambazipnönj köna onjita singisöndok aketka mianjön jöhöm engii malgeri, Kraistnönj i miengörenjök pösat engimangöra aka kömumba sohpnini meyök.

¹⁶ Kunñan öroyuaiñi pakpak malmalñi tekömawi, miangörenj alanjögö buñani akñapkö jim kutui keu ahözawi, alanan buña mi zilan qahö mema. Zilan qahöpmö, keu tonjan kömui könanjan aukne asuhui eketka miangörenj mi ölop buña qema.

* 9:13: Lew 16.15-16; Jan 19.9, 17-19

17 Jebuk maliga nalö miangören keuñi mianön ölnambuk qahö akñapmö, keu tonjan kömuigun keujan mönö kukñambuk akña.

18 Keu miangö dop jöhöjöhö aren mutukñi mi mewöyök sep qahö öne ölnambuk qahö ahök.

19 *Ölnambuk kewö ahök: Mosesnöñ Köna keugö jöjöpañ keu pakpak mi könagesö körek yengöra oyondagun mönö bulmakau moröñi aka meme (nonin) enjuiga sepñinan erök. Eri mi memba obuk mindiriba lama jupñi pisikñi gugakgugak memba songorep suñe jöhöba sepnöñ kundumgöba qewösahöi Köna keu Kimbi lama silenje ohoba lipingögeri, mi miriyök. Mi miribagun könagesö pakpak sutñine liliköba sep onöñ kundumgöba giliga mianön qewösahöi engömiriyök.

20 Mewö engömiriba kewö jiyök, “Anutunöñ keuñi tem kölmegöra jim kutum engiba embuk jöhöjöhö akzawi, mönö miangö sepña ki.”

21 *Mewöñanök opo seri jike kömbukñi mi tok sepnöñ kundumgöba giliga mianön kundumgöba miriyök. Amötqege nup memegö aködamun yuaini pakpak mi mewöyök kundumgöba gili miriyök.

22 *Köna keunöñ jim kutuzawañgö dop i me wai pakpak mi mönö sepnöñ sañgonninga sarakñi ahakza. Kunöñ sep qahö mokoza ewö, Anutunöñ mönö siñgisöndoknini qahö mosötma. Mewö.

Kraistkö sepñan siñgisöndoknini köl köñjörarakza.

23 Suep jike kömbukñañgö söpsöp imutñi imutñi mi gölmenöñ jöwöwöl ohoho aka mewö mianön amöt enjugetka sarakñi aketka dop köljamö, Suepkö öröyuaigöra mi qahö dop kölja. Miangöra Kraistnöñ jöwöwöl ohoho qainñi kun aka mianön Suep jikegö öröyuaini pakpak mi mönö amöt enjuiga sarakñi aketka dop kölök. Jöwöwöl ohoho qainñi kun mianön mönö gölmegö jöwöwöl ohohonji ongita aködamunñambuk akza.

24 Miangö könañi kewö: Kraistnöñ jöwöwöl jike oleni töröñi kötökñi azinöñ memenji miangören qahö öngöyök. Mi Anutugö jike ölnañgö söpsöpñi miyök ahök. Kraistnöñ mönö Suep miri ölni miangören öngöba nalö kewöñe bauköm nenjimakñapköra jitñememenini aka Anutugö jemesoholñe asuhumakza.

25 Jike nup galöm bohonñan yambu (yara) dop sömbup sepñini memba jöwöwöl jike oleni töröñi kötökñi miangören öngöba malök. Kraistnöñ miangö dop qahö ahakza. Yañön Suep mire indimñi gwötpuk qahö öngöyök. Anutugö jöwöwöl lamanji aiga yambu (yara) dop qemakñegöra aka eu qahö öngöyök.

26 Indimñi mohotñan qahö dop kölbowak ewö, yañön mönö Anutunöñ Suep gölme miwikñaim etkiyöhi, nalö miangörenök könahiba sihimbölöñi bölöñi möri indimñi sehisehiji akawak. Mewö qahöpmö, gölmegö nalöñan tekömamgö aiga nalö kewöñe indim mohot miyök siñgisöndok köl köñjöratmapköra aka asuhuyök. Asuhuba nanñi jöwöwöl ohoho ewö ak wañgimegöra al angyök.

27 Gölme ambazip nenjö arenñini kewö ahöza: Nini nalö kunöñ kömumbin aka miangö andöñe Anutunöñ keunini kewöta jim teköm nenjima.

28 *Aren miangö dop Kraistnöñ mewöñanök ambazip sehisehiji nenjö siñgisöndoknini köl köñjöratmapköra indim mohotkö dop kaba nanñi jöwöwöl ohoho ewö ak wañgimegöra al angyök. Yañön nalö kunöñ lilingöba kama. Siñgisöndököra aka kunbuk qahö kamapmö, ambazip asuhumapkö mambörakzini, mönö nini oyaenköyaen nenjiba nenjuangitmapköra aka asuhuma. Mewö.

10

Indim mohot kömupnõj al angui dop köl teköza.

¹ Köna keu walji mianjõn oyaenköyaen akingö könañi ölni qahö akzapmõ, oyaenköyaen asuhumawañgõ imutimutñi miyök ahöza. Köna keugö könañi mewö ahözawañgõra aka ambazip Anutu möpöseibingõra jike kömbukñe nalö dop öngömakzei, yeñõn mönõ letota aködamunñinambuk akingö osimakze. Yeñõn nalö tetekõñi qahö naluk kalem wañgita ala jöwöwöl ohoho miyök yambu (yara) dop toroqeba aka malgetmõ, mianjõn qahö dop kölök.

² Mianjõn dop kölbawak ewö, jöwöwöl ohoho mi ölop mosõtpeak. Jike kömbukñe Anutu waikñi memba möpöseigeri, yeñõn indim mohot amõt engugetka sarakñi ak teköbeak, mewö mönõ siñgisõn-dokñinañgõ gamuñi mi qahö toroqeba mötpeakmõ, mi toroqeba mötket. Mianjõra sömbup kalem mi toroqeba nalukñina almalget.

³ Yambu (yara) dop jöwöwöl ohoba malgeri, mianjõn mönõ toroqeba siñgisõndokñinañgõ gamuñi mi jim gulim enñii malget.

⁴ Bulmakau azinji aka meme (nonin) yeñgõ sepñinan mönõ siñgisõndok köl könjöratmapkö osiza. Mi esapkögetmõ, qaköba mala kotket.

⁵ *Mianjõra Kraistnõj gölmenõj eta asuhuyöhi, nalö mianjõren kewö jiyök, “Anutu, göñõn naluk kalemgõra aka jöwöwöl ohome-gõra qahö köpösöngõba malnõjmõ, gölmenõj malmalgö silenji mi mözözömgõba niñginõj.

⁶ Jöwöwöl ohoba siñgisõndokñinañgõra aka naluk kalemñi kalemñi ala malgeri, mi eka mianjõra qahö söñgaiba malnõj.

⁷ Nalö mianjõren kewö jial, ‘Anutu, mötnõj, nõñõn ki kazal. Nõñgõ könanani mi papia lipinlipinji mianjõren ohogetka ahöza. Mianjõ dop mönõ göhö sihingahö dop aka memba malmam.’ ”

⁸ Mutuk kewö jiyök, “Naluk kalem ala jöwöwöl ohoba siñgisõndokñinan solanimapköra yuai könañi könañi aka malgeri, mianjõra mönõ sihingana qahö asuhui möta malnõj. Mi eka mianjõra qahö söñgaiba malnõj.” Yuai mi Köna keu walñangõ dop toroqeba ahakzemö, mi töndup mewö jiyök.

⁹ Mianjõ andõne keu kewö jiyök, “Anutu mötnõj, nõñõn mönõ ki kaba göhö jitsihitkahö dop aka memba malmam.” Mewö jiba Anutu waikñi memba möpöseibingö könañi mutukñi mi qeapköba köna dölokñi kunguyök.

¹⁰ Anutugö jitsihitñan nam köl wañgiiga silenjan jöwöwöl ohoho ewö aket teköi mianjõra mönõ tök kutum neñgii sarakñi ak teközin. Indim mohotkö dop silenji köleñniga mianjõn nalö dop mönõ söp köla ahöm öngõma.

¹¹ *Nalõñi nalõñi jike nup galöm pakpak mienjõn kinda jike nupñini memakze. Sundan dop jöwöwöl ohoho miyöhök dumñe kunbuk ahakzemö, mienjõn siñgisõndokñini köl könjöratpingö osimakze.

¹² *Mienjõn osimakzemö, Suepkö jike nup galöm bohonñan mönõ indim mohotkö dop siñgisõndokõra aka silenji köleñniga nalö tetekõñi qahö dop köla ahöm öngõma. Jöwöwöl ohoho ewö ak wañgigetka Suep jikenõj öngõba Anutugö börõñi ölnje tatza.

¹³ Mianjõren tata nalö sutñi kianjõren Anutunõj tuarenjonurupñi tötali et enñuiga Kraist könañangõ döpnji* aketka köiran kölbingö mamböta malja.

¹⁴ Indim mohotkö dop kömupnõj al angui jöwöwöl ohoho ewö ak wañgigetka mianjõn dop köl teköi ölop ambazip tök kutum neñgii sarakñi akingö dop akzin. Mewö ölop mem letot neñgiiga aködamunini pakpak miwikñaiba nalö tetekõñi qahö mewö mal öngöbin.

* **10:5:** Sum 40.6-8 * **10:11:** Eks 29.38 * **10:12:** Sum 110.1 * **10:13:** Kerökurupñi memba et al enñgiba luhut ala gamu qem enñgibingõra könañinan tuapköba qakñine döpn ewö tölanjiba malget. Juda yeñgõren köna mewö.

15 Unja Töröñan mewöyök keu mi nanğöba jiiga mötzin. Mutuk keu kewö jii ahöza:

16 **“Kembu nöñön kewö jizal: Nalö tosatñan tekögetka miangöreñ mönö jöhöjöhö areñ yembuk akñami, mi kewö: Nöñön Köna keuni pakpak mi mönö uru könömñine ala mötmötñine kimbi ewö ohomam.”*

17 **Mewö jiba kewö toroqeyök, “Nöñön mönö yengö singisöndok-ñini aka ahakmemenini iwilelebuk akeri, miangöra ölum nuñgui mi qahö toroqeba mötmöriba malmam.”*

18 Keu miangö dop Anutunöñ mi mosöri keuninan kömuyöhi, singisöndok miangöra jöwöwöl ohobinanğö dop qahö akzin. Mewö.

Anutubuk kapan köla malbingöra neñgoholök.

19 Miangöra urumelen alaurupnini, Jisösgö sepñan sanğon neñgiiga mönö ölop Anutugö jike oleni töröñi kötökñi miangöreñ öngöbin. Mewö möt narim köhöiba uruyahöt qahö ahakzin.

20 Jisösnöñ köna anangö köna dölökñi mesariga nanñak malmal köhöikñanğö könañi ak neñgiza. Köna mi nanñi sileni kölenđa mewö miangön mesari ahöza. Köna mi tiba Anutugö jikenanğö opo selni kutuba jike oleni töröñi kötökñi miangöreñ öngöbin. Jisösgö silenjan nam köl neñgiiga opo selni mi ölop kutubin.

21 Jisösnöñ jike nup galöm öngöngöñi ak neñgimakza. Yanön Anutugö könagesöñi pakpak galöm köl neñgiba malja.

22 **Mewö maljawanğöra neñön mönö geñmon mosöta uruyahöt körek yaköriba pöndañök mötnarip qakñe kinda Anutugö kösutñe anda köuluköba malbin. Sepñan qewösañi neñgömiriba uru tölöhopnini sanğonñiga sarakñi aka malbin. Uruninan qahö toroqeba jim neñgiiga mönö awösamkakak malbin. O sarakñi ariinga mem tuarim neñgiiga mewö mönö Anutubuk qekötahöba malbin.*

23 Anutunöñ oyaenköyaen akingö keu jöhöba neñgiyöhi, yanön mönö keunji pöndañ wuatangöba nembuk kinja. Mewö kinjawanğöra aka mewö akingö mamböta jörömqörömñi jim miwikñaimakzin. Miangöreñ mönö koñgwarak mosöta zeñ kin köhöiba malbin.

24 Urukalem aka ahakmeme ölopñi akingöra mönö uru kuñgum aka nanğöm anğuba malbin. Mewö malbingöra mönö pöndañ galöm mem anğuba malbin.

25 Tosatñan nanñini urumelen könagesögö totokoñini mosörakzei, neñön mönö silik miangö dop kude aka malbin. Mewö qahöpmö, Kembu kamawanğö aiwesökñi eka nalöñan dopdowimapkö mötzini, miangö dop mönö kapan köla köhöiba uru kuñgum anğuba malbin.

26 Buña keu ölni mötagun nanini imbi-imbi qakñe singisöndok lan akin ewö, singisöndoknini miangöra mönö naluk jöwöwöl kun albingö osibin. Jöwöwöl ohoho kun mi qahö bauköm neñgima.

27 **Mi qahö bauköm neñgimappmö, Anutunöñ keunini mi jim teköba likepñi meleni qaknine öngömapkö mamböringa jönömninan undui keñgötnini möta malbin. Anutugö könöpñan tuarenjoñ-urupñi enğohomawi, miangö kukñi miyök asuhumapköra mönö mamböta malbin.*

28 **Kunñan Mosesgö Köna keu andö qezawi, i mönö keu jakene algetka yahöt karöbutñan keunji nanğöba jigetka keuñambuk akña ewö, i mönö kude ak kömum wanğigetka kömupkö buñaya akña.*

29 **Mewö akñapmö, ambazip kun kewöñanğö keuñanğöra mönö denöwö mötmörize? Kunöñ Anutu Nahönñanğö keunji könañan tökötahöba gilakza.*

* 10:16: Jer 31.33 * 10:17: Jer 31.34 * 10:22: Lew 8.30; Eze 36.25 * 10:27: Ais 26.11 * 10:28: Dut 17.6; 19.15 * 10:29: Eks 24.8

Jöhöjöhö aren dölökñangö sepñan lök tök kutum wangii sarakñi ahökmö, sep mi yuai omani ewö memba et alakza aka kalem möriam Toñi Uña Töröñi mi ilita mepaqepaik ak wangimakza. Kunñan mewö aiga Anutunöñ keunji kewöta likepñi dawikö dop wangii dop kölbawak? Köna keu qetala kömupkö buñaya akingö dop akzinmö, Anutunöñ ambazip mewöñangö likepñi mi mönö könöpuk ak wangii qakñe öngöi sihimbölö önöñi qahö möta malma. Wani sihimbölönöñ mönö dop köl wangibawak? Yangö könañangöra mönö denöwö mötmörize?

³⁰ *Keu kun kewö ahöza, “Jinöñ jibi, nuñgunöñ guhubi, aknöñ aki mi nöngö nuwa. Nöñön mönö ambazip keunñangö likepñi melenmam.” Toroqeba keu kun kewö jii ahöza, “Kembunöñ könagesöurupñi engö keunñi kewöta jim teköma.” Kun danñon mewö jiyöhi, neñön i möt wangizin.

³¹ Anutu malmal Toñangö jeñe kinda et neñgui böröñan neñgumawi, mianñon mönö kanjamñambuk kötökñi akña. Mewö.

³² Löwöribepuköra kewö jizal: Anutugö asakñan kaiga buña qem anguba asarigeri, mönö nalö mutukñi mi mötmöriba malme. Nalö mianğoreñ mötnaripkö bim qeba sihimbölö gwötpuk miwikñaiba mi töndup aum-möriba aongit aka kin köhöiget. Mi mönö kude ölum enguma.

³³ Nalö tosatñe gamu qem engiget könjilij mötketka qenjaröknöñ engehiba malget. Nalö tosatñe alaurupñini tandök mewöyök ak engigetka yengö qöhöröñine kinget.

³⁴ Tosatñi kösö mire alget tatkeri, mönö i engeka sihimbölönjini mohotñe möta malget. Sukinapñini kiom qeba megeri, mi mönö sösöngai qakñe möt angön köla malget. Suepkö ainemaluku gainñi kun qahö ayapkömawi, mi ahöm engizawangö möta mianğöra urukölalep möta malget.

³⁵ Mianğöra awösamkakakñini mönö nalö kewöñe kude gila mosötme. Mi kude mosötetka Anutunöñ mönö mianğö töwañi ketañi engima.

³⁶ Anutunöñ yuai engimapkö keu jöhöi ahözawi, enñon mi buña qem angumegöra kinje. Mianğöra Anutugö jitsihitñi wuatangöba lömböt möta mökösoñda kapan köla malme ewö, Suepkö buñani mianñon mönö engö buña akña.

³⁷ *Kewögöra mönö kin köhöiba malme: Nalö töröptökñi miyök mönö toroqeba mamböringa “Kunbuk kamawañon mönö kam kuñguma. Nalöñi qahö qem körii öngömapmö, nalöñangö dop törörök kama.

³⁸ Törörök kamapmö, nöngö alanan ahakmeme diñdiñi wuatangömakzawi, yangö mötnaripñan mönö nam köl wangii mal köhöim öngöma. Kunbuk elenja mötnaripñi mosötma ewö, mi qahö dop köli urunan mönö yangöra qahö söngaima.”

³⁹ Keu mewö ahözapmö, neñon ambazip uruñini kunbuk elenja mötnaripñini mosöta könöp siagö buñaya akñei, mönö yengö kambunöñ qahö kinjin. Mewö qahöpmö, mötnaripñini mi mönö galöm kölinga Anutunöñ amöt qem neñgii mala Suep mire öngöbinangö dop akzin. Mewö.

11

Ambazip mötnaripköra aka yuai kewö asuhuyök:

¹ Mötnaripkö könañi kewö: Yuaigö jörömqöröm akzini, mi asuhumapköra mönö köhöiba uruyahötñi qahö möt narizin. Yuai qahö ehekñi mianğö dop aka memba ölni ekingö mamböta awösamkakak kinjin.

² Möpñangö möpñeyök könahiba ambazip mötnaripñinan nam köl enjiiga uruñini melengetka Anutunöñ engehi dop köliga jim ölöwak enjiiga malget.

* **10:30:** Dut 32.35, 36 * **10:37:** Hab 2.3-4

3 *Mötnaripninan nam köl nenjiiga yuai pakpakö kōnaŋi kewö möt asari-makzin: Anutunöŋ keuŋi jim kutuba mianjōn Suep gölmegö öröyuaini pak-pak miwikŋaiyök. Mianjōra nalö kewōne yuai ehakzini, mi yuai ehekŋi mianjōrenjök qahö letota asuhuyök.

Abel, Enok, Noa yengö mötnaripŋini

4 *Kein (Kain) Abel yetkōn Anutugōra jōwōwöl ohoyohotka Abelnöŋ uruŋi melenjiga mötnaripŋan nam köl waŋgi törörök tem kölga köwakŋan diŋdiŋi öŋgöyök. Mewö öŋgöiga Anutunöŋ jōwōwölŋi ehi dop köli jim ölöwahök. Jim ölöwaka Abelnöŋ solanŋi ahöhi, Anutunöŋ keuŋi mi nanjōba jüiga mötnaripŋan nam köl waŋgi mörök. Mewö möta mala kömuyökmö, mi tōndup nalö kewōne ahakmemeŋi möringa keu mianjōn mönō toroqeba urunini kuŋguba nanjōm nenjimakza.

5 *Azi qetŋi Enok yaŋōn mönōwök uruŋi melenjiga Anutunöŋ keuŋi nanjōba jim ölöwahiga möta yaŋgö jeŋe dop köla malök. Mewö mala mali mötnaripŋan Anutu nam köl waŋgiiga waŋgiri jebuk öŋgöyök. “Anutunöŋ waŋgiri öŋgöiga toroqeba miwik-ŋaibingö osiget.” Buŋa Kimbi mianjō dop Enok mötnaripŋan anjōn köl waŋgiiga qahö kömuyök.

6 Uruŋi Anutugōrenj melenjawaŋōn mönō keu kewö möt narima: Anutunöŋ malja aka Anutunöŋ ambazip yaŋgö jeŋe dop kölbingö jaruzei, mi töwa qem enjima. Keu yahöt mi möt nariba ölop Anutugö kösutŋe kamapmō, qahö möt narim waŋgiba öne yaŋgö jeŋe dop kölbingōra mönō osibin.

7 *Anutunöŋ Noagōra yuai asuhumapkö galōm meme keuŋi indelök. Indeli Noanöŋ möt asariba sömbuŋi qainŋi kun möta ölni qahö ehiga mötnaripŋan nam köl waŋgiiga tem köla waŋge meyök. Anutunöŋ nanŋi aka saiwauruŋi anjōn köl enjimapkōra möta waŋge mi meyök. Noa mötnaripŋan nam köl waŋgiiga waŋge meyöhi, ahakmeme mianjōn mönō gölme ambazip kōnaŋamŋini gonjōni indeli Anutunöŋ keuŋini jim tekōiga ayuhuget. Uruŋini qahö melenjda ayuhugetmō, Noagö mötnaripŋan nam köl waŋgiiga Anutugö jeŋe solanŋi akingö kalemŋi mi buŋa qem anjuyök. Ambazip Anutu möt narim waŋgiinga keunini jim tekōi solanimakzini, Noanöŋ mönō mianjō dop solanŋi ahök. Mewö.

Abraham Sara yetkö mötnaripŋiri

8 *Anutunöŋ Abraham gölme yaŋgö buŋa akŋapkö jiyöhi, mönō mianjōrenj anmapkö oholök. Oholi mötnaripŋan nam köl waŋgiiga keu mi tem kölök. Denikeanjōrenj anda anjotpawak mi qahö mörökmö, mi tōndup nanŋi gölmeŋi mošōta anök.

9 *Anda Anutunöŋ gölme yaŋgö buŋa akŋapkö jim jöhöhi ahöyöhi, mönō mianjōrenj anjōrök. Anjōta kian aka ambazip ahakmemeŋini qahö mörökmö, mötnaripŋan nam köl waŋgiyö-hanjōra mönō tōndup opo koumŋi kuŋguba ali mianjōrenj ahöba malget. Isimoröŋi Aisak Jeikob yetkōn mewöyök Anutunöŋ gölme enjimapkö jöhöjöhö keuŋi miyök buŋa qem anjōba gölme mianjōrenj toroqeba opo koumŋini kuŋguba ala ahöba malget.

10 Suep siti tandōŋan qahö gisahōmawi, Abrahamnöŋ mi ekŋamgö mamböta malök. Anutunöŋ siti mianjō areni ala imutŋi memba miri tandōŋini esiba meiga pōwōwöm köhöikŋi ahöm öŋgōmawi, mönō mianjōrenj anjōtmangö al mamböta opo koumnöŋ malök.

11 *Mewö mala lök azi namŋi aiga mötnaripŋan nam köl waŋgiiga köhöiba iwi ahök. Abrahamgö anömŋi Sara yaŋōn köpin malökmö, mi tōndup gölōm

* 11:3: Jen 1.1; Sum 33.6, 9; Jon 1.3 * 11:4: Jen 4.3-10 * 11:5: Jen 5.21-24 * 11:7: Jen 6.13-22
* 11:8: Jen 12.1-5 * 11:9: Jen 35.27 * 11:11: Jen 18.11-14; 21.2

ala morö meyök. Anutunöŋ Abrahamgö könagesöŋi ketanji akŋapkö keu jöhöm waŋgiyöhi, yaŋgöra aka keujan öljambuk akŋapkö möt nariba malök. Mötnariŋni mianjön mönö nam köl waŋgiiga nahönŋa asuhui ehök.

12 *Azi mohot mianjögö mötnariŋnan nam köl waŋgiiga lök kömukömugö dop ahökmö, mi töndup yaŋgöreŋök könagesö keta bölökŋi asuhuget. Sengelau suepnöŋ asarigetka jaŋgöŋini oyoŋbingö osizini, me sak köwet jitŋe ahözei, gwölönarökurupŋan mönö mianjögö dop sehiba asuhuget.

Ambazip kewöŋan Suep mirigöra awöweŋgöba malget:

13 *Ambazip kösohotŋini lök jizini, mi körek uruŋini melenŋa Anutu möt narim waŋgiba mala kömuget. Anutunöŋ gölme enjgimapkö keu jöhöm enjii malgetmö, gölme mianjögöreŋ qahö aŋgotket. Mewö qahöpmö, gölmeŋini mi köröwen kinda uba eka waikŋi memba söŋgaiget. Eka öne söŋgaiba kewö jim miwikŋaiba jiget, “Gölmeŋöŋ mönö kiana aka qandak maljin.”

14 Ambazip nanŋine miri gölmeŋine aŋgotpingö jaram timakzei, yeŋön mönö keu mewö jimakze.

15 Gölme mosötkeŋi, mianjögö mötmörriba keuŋi jibeak ewö, yeŋön mönö ölop lilingöba mianjögöreŋ angetka uruŋinan teköbawak.

16 Mönö ölop lilingöbeakmö, yeŋön mianjögöra qahö mötmörriba malget. Mianjögöra qahöpmö, kantri qainŋi kun Suepnöŋ ahözawi, mönö mianjögöreŋ aŋgotpingö awöweŋgöba malget. Anutunöŋ yeŋgöra siti kun meiga ahözawi, mianjögöra qetŋi “Nanine Anutu!” qetketka mi möta söŋgaiba yeŋgöra aka gamu kun qahö mörakza.

Abraham, Aisak, Jeikob, Josefyeŋgö mötnariŋni

17 *Anutunöŋ Abraham esapesapnöŋ al waŋgiiga mötnariŋnan nam köl waŋgiiga Aisak Anutu kalema waŋgiyök. Anutunöŋ Aisaköra gölme waŋgimamgö jiiga Abrahamnöŋ jöhöjöhö keu mi buŋa qem aŋguyökmö, töndup nahönŋi mohok-kun mi mosöta mianjön jöwöwöl ohomamgö ahök.

18 *Anutunöŋ Abrahamgöra keu kewö jii mörök, “Aisaknöŋ mönö gwölönarökurupki nam köl enjgiiga asuhuba göhö qetki bisiba malme.” Keu mi mörökmö, töndup nahönŋi altanöŋ ala mosörök.

19 Mosöta kewö kewöta mötmörriyök, “Kömumapmö, Anutunöŋ ölop köhöiba mem gulii kömupnöhök wahötma.” Söpsöp keu mewö jiyöhi, mianjögö dop nahönŋan dumŋe kunbuk kömupnöhök ewö wahöri waŋgirök.

20 *Mötnariŋnan Aisak nam köl waŋgiiga nahönyahötŋi Jeikob aka Iso (Esau) mi kötuetköm etkiyök. Anutugö kötumötuetŋi mianjön mönö nalö könaŋgeŋe mewöyök dop köl etkii qakŋire öŋgömakŋapköra köuluköyök.

21 *Jeikobnöŋ kömumamgö ahöhi, nalö mianjögöreŋ mötnariŋnan nam köl waŋgiiga nahönŋi Josefgö nahönyahötŋi yahöt mi kötuetköm etkiba öröŋaŋgö kitipŋe nariba Anutu waikŋi memba möpöseiyök.

22 *Josefgö kömupŋan dopdowiyöhi, nalö mianjögöreŋ möt-nariŋnan nam köl waŋgiiga Israel könagesö Ijpt mosöta kageri, mianjögö kösohotŋi mi jim guliba jiyök. Mewö jiba könaŋgeŋe qamötŋi denike löm kölmegö keuŋi mi jim kutum enjguyök. Mewö.

Mosesgö mötnariŋni

23 *Mötnariŋniran Mosesgö iwinamŋi nam köl etkiiga Mosesnöŋ asuhuyöhi, i nalö mianjögöreŋök könahiba köiŋ karöbutkö dop asambörohot. Morö mi

* 11:12: Jen 15.5; 22.17; 32.12 * 11:13: Jen 23.4; 1 Hist 29.15; Sum 39.12 * 11:17: Jen 22.1-14
 * 11:18: Jen 21.12 * 11:20: Jen 27.27-29, 39-40 * 11:21: Jen 47.31-48.20 * 11:22: Jen 50.24-25;
 Eks 13.19 * 11:23: Eks 2.2; 1.22

eksihimꞑambuk tandökꞑi kun ahöhi, mi eka kiꞑ kembugö jimkutukutunꞑi oꞑgitpitpuköra kenꞑötꞑiri qahö möta moröꞑiri asamböta galöm kölohot.

24 *Mosesnöꞑ qariiga qetꞑi farao kiꞑ böratꞑaꞑgö nahönꞑi qetketka mötnariꝼꝼꝼan nam köl waꝼgiiga qet mi bisimamgö tököba farao kiꝼgö miriꝼi mosöta angaiyök.

25 Ölop toroqeba Ijipt yembuk siꝼgisöndökö sösoꝼgaiꝼi miwikꝼaiba mi nalö töröpꝼi laꝼ söꝼgaibawakmö, malmalꝼi mi andö qeyök. Mi andö qeba Anutugö urumelenꝼ könagesö yembuk toroqei kahasililiꝼ ak enꝼigetka mi mohotꝼe möta aum-möribingö möri öꝼgöꝼgöꝼi ahök.

26 Anutunöꝼ töwa waꝼgimapköreꝼ göröken uba kin köhöiyök. Mianꝼgöra Ijipt yeꝼön guli dötnamꝼinambuk aka siyonsayonꝼi qahö malgeri, mianꝼgö möri yuai eretꝼi ahök. Mianꝼön yuai eretꝼi aiga andö qeba Amötqeqe Toꝼambuk toroqei ga yaꝼgöra aka mepaqepaik ak waꝼgiba malgetmö, mi möri töndup ölnꝼi aka öꝼgöꝼgöꝼi ahök.

27 Mötnariꝼꝼꝼan Moses nam köl waꝼgiiga Ijipt kiꝼ kembuꝼinangö irimꝼi seholibapuköra kenꝼötꝼi qahö möta kantriꝼi mosöta kayök. Anutu ehекꝼi qahö mi ehекö tandök mötmörim waꝼgiba malöhi, mianꝼgöra mönö kapanꝼ köla kin köhöiyök.

28 *Mötnariꝼꝼꝼan nam köl waꝼgiiga ak-kömukömu kendon* ala mianꝼgö arenꝼi jim kutum enꝼiiga söꝼgaiba tatket. Kömupkö garatanöꝼ Ijipt uruꝼe nahönꝼini mutukꝼi enꝼugetka Israel yeꝼgö nahönurupꝼinan kömumbepuköra mönö jim kutum enꝼiiga naꝼuꝼine sep miriget.

29 *Mötnariꝼꝼꝼan Israel ambazip nam köl enꝼiiga Köwet Pisikꝼi mi gölme örönꝼe anangö dop kutuba kaget. Ijipt yarö azi yeꝼön mi kutubingö esapkögetmö, mönö onöꝼ nemulahöba ayuhuget.

Rahab aka mötnariꝼkö ambazip ipꝼi tosatꝼi

30 *Mötnariꝼꝼꝼan Israel könagesö nam köl enꝼiiga Jeriko taonöꝼ kaba kiripo selꝼi silim 7:gö dop liliköba mohotꝼe anda kagetka kiripo selꝼi selꝼi köhöikꝼan mönö gororonꝼgöba etket.

31 *Mötnariꝼꝼꝼan köna ketanꝼi ambi Rahab nam köl waꝼgiiga kewö aiga Anutunöꝼ ehoriyök: Israel jitꝼememe yetkön gölme ek miwikꝼaibitköra ölnöꝼ kayohotka ala aka köl öröm etkiyök. Anutunöꝼ mi eka könaꝼgep yaꝼgiseꝼ ambazip enꝼui ayuhugetka Rahab ehorii yembuk mohotꝼe qahö kömuyök. Mewö.

32 *Wani keuya kunbuk toroqeba jibileꝼak? Gideon, Barak, Samson, Jefta, Deiwid, Samuel aka kezapqetok ambazip tosatꝼi yeꝼgö kösohotꝼini toroqeba jibileꝼak ewö, nöꝼgö nalönan mönö qahö dop kölbawak.

33 *Mötnariꝼꝼꝼan tosatꝼi nam köl enꝼiiga jakömbuak tohonꝼi tohonꝼi tulungöba memba ambazip mindiꝼgöm enꝼigetka ahakmeme diꝼdiꝼi wu-atangöba malget. Anutunöꝼ yuai neꝼgimapkö keu jöhöi ahözawi, gwötpukꝼan keu mianꝼgö dop köuluköba möt narigetka ölnꝼi asuhui meget. Tosatꝼan laion sömbup sutꝼine köuluköba möt narigetka Anutunöꝼ laion numbuꝼini jöhöyök.

34 *Tosatꝼan könöꝼ bölam uruꝼe köuluköba möt narigetka Anutunöꝼ könöꝼ ösumꝼi qömbököiga qahö enꝼgohoyök. Tosatꝼi bimgö sou ketanꝼi mianꝼön enꝼgubingö aketka Anutunöꝼ yeꝼgö souꝼini jitꝼi jöhöiga kök alget. Gwötpukꝼan

* 11:24: Eks 2.10-12 * 11:28: Eks 12.21-30 * 11:28: Anutugö garatanöꝼ Israel ambazip enꝼgehoriba enꝼgöꝼgiröhi, mianꝼgö kendonꝼi mi nanine keunöꝼ ak-kömukömu kendon jiinga Nei keunöꝼ Pasowa jize.

* 11:29: Eks 14.21-31 * 11:30: Jos 6.12-21 * 11:31: Jos 2.1-21; 6.22-25 * 11:32: Kemb 6.11-8.32; 4.6-5.31; 13.2-16.31; 11.1-12.7; 1 Sml 16.1; 1 Kiꝼ 2.11; 1 Sml 1.1-25.1 * 11:33: Dan 6.1-27 * 11:34: Dan 3.1-30

lölwöröñi aka köuluköba möt narigetka Anutunöñ ösum enjiiga köhöiget. Tosatñan bim qeba köuluköba möt narigetka Anutunöñ kuk enjiiga suahö köhöikñi aket. Kian yeñgö yarö kambuñinan kagetka tosatñan köuluköba möt nariba mewö mönö enguatanğögetka unjurata anget.

35 *Ambi tosatñan kitipñinan kömui köuluköba möt narigetka Anutunöñ mem gulim wañgii kömupnöhök wahöriga kunbuk toroqeba aitonğöget. Ambazip tosatñan kömup andöñe oyaenköyaen öngöñgöñi miwikñaibingöra möta kapan köla kinget. Mewö kingetka ihileknöñ enğuba kahasililiñ könañi könañi ak enğiba kewö jii mötket, “Anutu qañ kölnöñga zilañ pösat gihibin.” Mewö jii mötketmö, yeñön mi tökögetka toroqeba jañgauranga mem enğiba malget.

36 *Tosatñan Anutu möt narigetka mepaqepaik aka ihilek wahiñambuknöñ enğugetka sihimbölö könañi könañi miwikñaiba malget. Toroqeba tosatñi gwaröhöba kösö miriñi miriñi miangöreñ al enğiget malget.

37 *Tosatñi kötnöñ enğugetka kömuget. Tosatñi segenöñ mitim enğigetka yahöt aket. Tosatñi bimgö sou ketañi mianñön enğugetka kömuget. Tosatñan lama silenji aka meme (noniñ) silenji mianñön opo ewö löngöta lañ anda liliköget. Mewö wanapñi töhön aketka sesewerowero aka kahasililiñ lañ mem enğigetka malget.

38 Suepkö aködamunñinambuk aka gölmegö ahakmeme bölöñañ-göra mötketka qahö dop köñ enjiiga miangöreñ qahö toroqeget. Qahö toroqeba lañ liliköba gölme qararañkölkölñe anda kaba kundunji kundunji öngöba eta banjet me gölme titiñgit uruñe ahöba malget. Mewö.

39 Ambazip kösohotñini jizali, körek mi mötnariñinan nam köñ enjiiga uruñini melengetka Anutunöñ engehi dop köliga jim ölöwak enjiiga malget. Mewö malgetmö, mi töndup Anutunöñ oyaenköyaen qainñi kun neñgimapkö keu jöhöi ahözawi, miangöreñ yeñgöreñök kunöñ kun mönö qahö anğorök. Qahö!

40 Anutunöñ i nanñinök qahöpmö, mönö nembuk mohotñe aködamuninambuk ak teköbingöra mötza. Mewö möta miangöra oyaenköyaen qainñi kun neñgii miwikñaibingö keu areñi ali ahöza. Mewö.

12

Anutunöñ iwi aka mindiñgöm neñgimakza.

1 Ambazip kambu keta bölökñi mewöñañ mötnariñkö könañi nañgöba jiba kousu ewö liliköm neñgiba kinjei, mi mötzin. Miangöra neñön mewöñañök mönö lömbötnini pakpak aka siñgisöndok awamñanök köpeim neñgimakzawi, mi gilin anma. Anutunöñ nini mötnariñkö bimñi qeba Satan luhut al wañgibingö areñi ali ahöza. Miangöra malmal sutñi ki malagun kömumbini, sutñi mi mönö aonğit tandök kapan köla bim qeba ösumninan anbin.

2 Jisösnöñ mötnariñnini mem letori ahui mem qarui köhöiba aködamunñambuk ahakzawi, Toñi mi mönö jeninan uba törörök ehakin. Yañön ölop toroqeba Suep mire mala söñgaibawakmö, mi mosöta eta miangö salupñe sihimbölö mörök. Maripomnöñ kegwek-kahasililiñ ewö kömumamgö gamu möta qahö tököyökmö, mi qenjaröknöñ möta mökösoñda kömuyök. Kömumba Anutugö jakömbuak dum tatatnöñ öngöba böröñi ölñe tatza.

3 Siñgisöndok ambazip yeñön mewö tuarenjoñ ak wañgigetka sihimbölö möröhi, enñön mönö i mötmöriba malme. Sörauba löwöriba urueret aka kinda mötnariñnini aka jörömqrömqöñini mosötpepuköra mönö mewö ahakñe.

* 11:35: 1 Kiñ 17.17-24; 2 Kiñ 4.25-37 * 11:36: 1 Kiñ 22.26-27; 2 Hist 18.25-26; Jer 20.2; 37.15; 38.6

* 11:37: 2 Hist 24.21

4 Singisöndok akinbuköra aum-möriba bim qeba malgetka mianğören singisöndokö Tonjan mönö sepgwörörök (gulibambam) qahö enguyök.

5 *Iwinöñ nahönböraturupñi yengöra qambañ keu engizawi, Anutunöñ mianğö dop keu kun engöra kewö jiiga mönö mi ölum engui malje, “O nahöni, Kembunöñ mindiğöm gihimakzawi, mianğöra mönö mötnöñga silebile kude akña. Keu jim ghiiga mianğören mönö urueret kude aka malman.

6 Kembunöñ ambazip jöpaköm engimakzawi, ia mindiğöm engimakza. Ambazip morö ewö engömembra köyan köl engimakzawi, mi körek kömbinöñ engumakza.”

7 Morö kun iwiñan qahö mindiğöi lañ malbawak, mewö mönö yangö moröñi qahö akawak. Mianğöra Anutunöñ inini nahön-böratñi ewö tandök ak engimakza. Mianğöra lömböt engii mi mönö mindiğöm engimapkö tandök mötmöriba möta mököşöñda diñgiba malme.

8 Anutunöñ nahönböraturupñi pakpak mindiğöm engimakzawañgö dop inini qahö mindiğöm engibawak ewö, mönö yangö nahönböraturupñi ölni qahö akeak. Mewö mönö iwi qahö wilin morö (bastet) akeak.

9 Keu mi kunbuk kewö jimam: Gölmegö iwininan mindiğöm neñgigetka yengöra göda qem engiba malin. Silegö iwininan korembiñi akzemö, uruninañgö Iwininan mönö ölni aka öngöñgöñi akza. Mianğöra mönö yangö keu bapñe anda diñgiba mal köhöininga dop kölma.

10 Silegö iwininan mönö nannini mötmötñinañgö dop kapañ köla gölmenöñ nalö töröñi malbingöra aka mindiğöm neñgiba malakze. Yenön mewö malakzemö, Anutunöñ mönö tök kutum neñgii yangö dop sarakñi akingöra aka mindiğöm neñgimakza. Mewö aka ölna ölöwaka oyaenköyaen akingöra mötza.

11 Kunöñ mindiğöm neñgiiga nalö mianğörenök mönö sösöñgai tandök qahö ahakzinmö, wösöbirik sihimbölöñambuk mörakzin. Keu mi ölnapmö, mianğö ölnan mönö könañgep kewö asuhuma: Anutunöñ ambazip mewö mianön köl gulim engimakzawi, yengö ahakmemeñinan diñgiiga luai qem engii möta malme. Mewö.

Qambañ aka galöm meme keu tosati

12 *Mianğöra “awötñini teköi böröñini lömböriba söörauba kinjawi, mi mönö memba wahöta mindiğöme. Tambuñini jula siminñini suljawi, mi mönö mem köhöime.” Buña keu kun mewö ahöza.

13 *Kekporörökñambuknöñ (kerekporikñambuknöñ) töwölatiba eta qeiga könañan sula bölim teköbapuk. Keu mianğö dop alañini angösirip kude ak wañgimemö, mönö ölöwakñapköra kapañ köla malme. Buña keu kun kewö ahöza, “Köna tiba anangö könañini mönö mem qölöleigetka diñdini akñe.” Keu mianğö dop mönö uru ölöwak qem anguba malme.

14 Ambazip körek yembuk luainöñ urumohot malmegöra mönö köhöiba kapañ köla malme. Kunñan malmal sarakñi qahö miwikñaimawi, mönö öne Kembu qahö ekña. Mianğöra Anutunöñ mem sarahim engimapköra mönö kapañ köla kinme.

15 *Kunöñ Anutugö kalem möriamñi oñgita qahö buña qem angubapüköra mönö galöm mem anguba malme. Nene nupnöñ siriuret kömbukñambuk mi jalöñinambuk qözölmakzin. Mianğö dop uru mötökömbukö könañi pakpak mi qeapköme. Qahö qeapkögetka mianön qariba kota enjololöñ mem engii gwötpuk engö uruñinan tölöhobapuk.

* 12:5: Job 5.17; Qam 3.11-12 * 12:12: Ais 35.3 * 12:13: Qam 4.26 * 12:15: Dut 29.18

16 *Mewöyök kunöŋ kaisero akapuk me Iso (Esau) ewö aŋgöjörakŋambuk malbapüköra mönö galöm mem aŋguba malme. Isonöŋ morönahön mutukŋi ahöhaŋgö börösamot toni ahökmö, keu mi nene indim mohot nemapköra aka qeapköyök. Qeapköiga munŋi Jeikobnöŋ börösamotkö keunŋi mi nene mianŋön bohonŋi memba buŋa qem aŋguyök.

17 *Könaŋgep jöhöjöhö keunŋiraŋgö dop asuhui Iwiŋaŋgö kötümötuetŋan mönö Jeikob qakŋe öŋgöyök, mi mötze. Mewö öŋgöi Isonöŋ kötümötuet mi buŋa qem aŋgumamgö möta uleta sahöri imbilŋan erök. Mewö kapaŋ köla ulerökmö, töndup keu munŋambuk jöhöyohori, mi utekömamgö köna kun qahö miwikŋaiyök. Miangöra morö mutukŋaŋgö kötümötuetŋi mi buŋa qem aŋgumamgö mörökmö, miangöreŋ qaköba osiyök.

18 *Mönöwök Israel könaŋesö yeŋön Sainai (Sinai) kösutŋe kaba kingetka kundunŋi mianŋön könöp bölamnöŋ jeyök. Jeba köwak-köwak eta panaman meiga raidimbom qeiga Anutunöŋ miangöreŋ yembuk jöhöjöhö areŋ ahök. Sainai (Sinai) kundunŋi mianŋön börönöŋ oseibinaŋgö dop akzapmö, eŋön kundunŋi mewö miangö kösutŋe qahö kaba malje.

19 Anutunöŋ jöhöjöhö areŋi mi Sainai kundunŋe kewö ahök: Garataurupŋan tömun qainŋi kun ugetka aŋgötömualŋi azöŋda kaiga keu köhöikŋi jiyöhaŋgö kourukŋi mötket. Mi möta keu mewöŋi kunbuk kude jii mötmegöra uletket. Eŋön kundunŋi mewö miangö kösutŋe qahö kaba malje.

20 *Anutunöŋ keu köhöikŋi jiba kewö jim kutum eŋgiyök, “Kunŋan kun ambazip me bau sömbup kunöŋ kundunŋi mi oseima ewö, i mönö kötnöŋ qegetka kömuma.” Mewö jim kutum eŋgiiga keu mi wuatangöbingö möt lömböriba osiget. Miangöra keu kunbuk kude jimapköra uletket.

21 *Yuai kanjamŋambuk kötökŋi mi uba eketka Mosesnöŋ kewö jiyök, “Ni mönö keŋgötŋi möta jönömni undui kinjal.”

22 Eŋön mewö qahöpmö, mönö uruŋini melenŋa Zaion kundunŋi dopdowiba kaŋgota malje. Anutu malmal Tonŋaŋgö sitiŋi qetŋi Jerusalem Suepnöŋ ahözawi, miangöreŋ garataurupŋi ten tausenni ten tausenni yeŋön kambunŋi kambunŋi köla unduba sösoŋgai ahakzei, eŋön mönö siti mi dopdowiba malje.

23 Mutuk ahuahu dölokŋi ahuba urumelen könaŋesö aketka qetŋini malmalgö bukŋöŋ ohogetka Suepnöŋ ahözawi, eŋön mönö yeŋgö kambunŋini toroqeba malje. Anutunöŋ ambazip körek neŋgö keunini kewöta jim tekömakzawi, eŋön mönö bemnini yambuk toroqeba malje. Anutunöŋ ambazip solanŋi mem letot eŋgiiga aködamunŋinambuk aka kömugeri, eŋön mönö yeŋgö unanŋinambuk toroqeba malje.

24 *Eŋön jöhöjöhö areŋ dölokŋaŋgö galömŋi Jisös yaŋgöreŋ kaba yambuk qekötahöba kinje. Yaŋön sepŋan qewösahöi eŋgömirimakzawi, mönö malmal mewöŋe kaŋgota malje. Abelnöŋ sepŋi mokoyökmö, Jisösgö sepŋan Abelgö sepŋi oŋgita keu aködamunŋambukö munŋemŋi akza.

25 *Mutuk azi kunöŋ gölmenöŋ mala Anutugö keu jitsihitŋi ambazip indel eŋgiiga gwötpukŋan mi mötpingö tökögetka Anutunöŋ likepŋi melenŋi qakŋine öŋgöyök. Yeŋön miangöreŋök kök albingö osiget ewö, neŋön mönö denöwö kök albinak? Nalö kewöŋe alanini kunöŋ Anutugö keu jitsihitŋi Suepnöhök indela jimakzawi, nini i nöŋöŋgan aka mosötzin ewö, mönö lömbötnöhök kök qahöpmahöp albin. Qegetalninaŋgö likepŋi mönö ölna qakŋine öŋgömapkö mötzin. Miangöra kunŋan saŋep qei mötzei, eŋön keu mi mötpingö kezapölök kude akŋe. Kezapölök malbepüköra mönö galöm mem aŋguba malme.

* 12:16: Jen 25.29-34 * 12:17: Jen 27.30-40 * 12:18: Eks 19.16-22; 20.18-21; Dut 4.11-12; 5.22-27
* 12:20: Eks 19.12-13 * 12:21: Dut 9.19 * 12:24: Jen 4.10 * 12:25: Eks 20.22

26 *Mönöwök keuñi jiiga mötketka gölme utuköba memenjalyökmö, kezapqetok keuñi kun jiba jöhöiga nalö kewöñe kewö ahöza, “Nalö kungen dumñe kunbuk gölme utuköba memenjalinam. Gölmeyök qahöpmö, yuai akiga suepnöñ mewöyök utuköma.”

27 Keu mewö ahözapmö, “Nalö kungen mönö dumñe kunbuk” jizawi, keu mianğö könañi kewö: Anutunöñ öröyuai miwikñaiiga ahözawi, mianğönök mönö utuköba utekömapmö, Suep mirigö öröyuai qahö utukömawi, mianğön mönö kin köhöiba ahöm öñğöma.

28 Neñön bemtohoñ qahö utukömawi, mia buña qem anğuba kinjin. Mianğöra mönö “Anutu saiwap!” jiba mewö mianğön waikñi memba möpöseiba uru ölöwak mem wañgimakin. Mi jitñi onğitpinbuköra keñğötnini möta aka gödañi qeba malbin.

29 *Neñğö Anutuninan mönö könöp bölam ewö akza. Mianğöra neñğohoi sihimbölo mötpinbuköra mönö keñğöt mötmöt qakñe göda qem wañgimakin. Mewö.

13

Qambañ keu teteköñi

1 Urumelen alaurup nanñini mönö jöpaköm anğuba malme.

2 *Kian ambazip sutñine kamei, mi mönö köyan köl enğigetka köisirik miwikñaimakñe. Mewö akingö mönö kude ölum enğumakña. Tosatñan mewö akeri, mianğön Suep garata tosatñi qahö möt asariba mohot köl öröm enğigetka miriñine malget.

3 Tosatñan kösö mire maljei, mi mötmörim enğimakñe. Nanñinak yembuk gwaröhöm enğigetka malbeak tandök möta mönö i mötmörim enğimakñe. Tosatñi ak bölim enğigetka mianğö sihimböloñi mötzei, mi mönö nanñinak mewö malbeak ewö möta mötmörim enğimakñe.

4 Ambazip qesabulum aka serowilin akzei, Anutunöñ i jim teköm enğima. Mianğöra körek enğön mönö awanöm malmal göda qegetka sarakñi aiga awanöm sutñire tötekqötek töwötñi kun qahö ahöma.

5 *Anutunöñ nanñak keu kun kewö jii ahöza, “Nöñön mönö nalö kunöñ qahö gömosöta andö guhumam.” Keu mianğöra aka ahakmemenjanan membagun membingö nepaqepalok kude köpösöñğömakñemö, yuai ahöm enğizawi, mianğöra mönö mötket dop köl enğiiga sösoñgaibuk malme.

6 *Mewö möta ölop ewebibininambuk saitingit kinda kewö jiba malbin, “Kembunöñ baukbaukni aiga gölme ambazipnöñ ayuhum niñgimeanğö dop qahö akze. Mianğöra keñğötni kun qahö möta maljal.”

7 Galömurupñinan Anutugö keu jiget mötkeri, i mönö mötmörim enğiba malme. Ahakmemenjanini denöwö aka megetka malmalñinan teköyöhi, mönö mi mötmöriba mötnariñinañğö silikñini wuatangöba malme.

8 Jisös Kraist utekutekñi qahö. Mutuk malöhi, miyök merak malja aka nalö teteköñi qahö mal öñğöma.

9 Kalem möriam toroqeba buña qem anğuinga urunini mem köhöiiga ölöwahakñapmö, nene membingö silikñi mi me mi mianğön mönö urunini mem köhöimapkö osimakza. Tosatñan nenegö dönqizizin könañi könañi wuatangögetka ahakmeme mianğön mönö qahöpmahöp bauköm enğiiga pöröpköyök. Mianğöra tosatñan dönqizizin murutñi murutñi ambazip kusum enğimakzei, enğön mönö keu mi mosötme. (Silikö keunöñ mönö janjuñ kude ak enğima.)

* 12:26: Hag 2.6 * 12:29: Dut 4.24 * 13:2: Jen 18.1-8; 19.1-3 * 13:5: Dut 31.6, 8; Jos 1.5 * 13:6: Sum 118.6

¹⁰ Jöwöwöl ohoho alta qainni kun mi nengörej ahöza. Gölmenöj opo seri jikegö nup memakzei, yeñön jöwöwöl qainni kun miangö bahöni memba nembangö osimakze. Anutunöj yeñgöra keu mewö qahö jim teköi ahöza.

¹¹ *Gölmegö jike nup galöm bohonna kinda ambazip singisöndokjini köl könjöratmapköra aka sömbup qeba sepni memba jike oleni töröni kötökni miangörej öngömakzapmö, sömbup ölni mi memba miri qandak maljei, miangö sel yaigepne anda miangörej ohogetka jeba ayapkömakze.

¹² Miangö dop Jisös mewöyök könagesöurupni nanji sepnan mem sarahim engimapköra aka siti selgö nanju yaigepne qegetka sihimbölö möta kömuyök.

¹³ Miangöra miri qandak* maljini, neñön mönö miangö sel yaigepne anda Jisösgörej toroqebin. Yangöra aka mepaqepaik ak nengimakzei, mönö mi bisiba malbin.

¹⁴ Mi kewögöra: Siti teteköni qahö ahöm öngömawi, mi gölmenöj qahö ahöm nengizapmö, siti könanjep asuhum nengimawi, mi ekingö mönö jaram tiba maljin.

¹⁵ Miangöra mönö qösösök Jisösnöj nam köl nenggiiga Anutugöra möpömöpösei naluk ala malbin. Jisös qetni möpöseimakzei, yeñgö numbu jitrinañgö ölnan mönö Anutugö nalukni akza.

¹⁶ Yuai ahöm engizawi, mi menden anguba mem ölöwak angumakzei, miangön mönö Anutugö nalukni kun akza. Anutunöj naluk mi ehi urunan ölöwahiga dop kölakza. Miangöra mewö aknegöra mönö kude ölum engumakña.

¹⁷ Galömurupjini mönö tem köl engiba kukösumjini bapne anda malme. Nup megerangö kösohotjini Anutugö jeñe almei, yeñön mönö miangö tandök engeka urunini galöm kölakze. Yeñön nupjini mi urulömböt qakne membepuk. Miangön injini qahö bauköm engibawak. Miangöra mönö keuninañgö bapne anda malgetka sösongai qakne nupjini megetka dop kölma.

¹⁸ Mönö nengöra aka Anutu köulukömakne. Yuai pakpak miangörej ahak-meme qetbuñañambuk akingö sihimni ahöm nenggiiga Anutunöj nengeka “Dop kölja,” jiiga urukezapninan möringa ölöwahakza. Keu mi möt yaközin.

¹⁹ Nöngöra köulukömaknegöra mönö kapan köla kewögöra kuñgum engizal: Injini köulukögetka Anutunöj nalö qahö mem köriiga ölöwaka ölop kunbuk engörej kamam.

Kewö köulukömakzin:

²⁰ Jisösnöj kömuyöhangöra aka lama galöm qetbuñañambuk aka malja. Sepni mokoba miangö muñgem silimbanan Anutugö jöhöjöhö areni qekötahöba mem köhöiiga nalö teteköni qahö ahöm öngöma. Anutunöj Kembunini mi mem guliiga kömupnöhök wahöta köhöiba malja.

²¹ Anutu luai Tonan mönö inahöm engiba jitsihitnañgö dop aka memba malmegö aködamunni pakpak engimakña. Mewö ölop köhöiba nup ölopni könañi könañi memba malme. Yangön mönö möwölöhöba kuñgum engiiga Jisös Kraistkörej nangöba malmal Anutugörej dop köljawawi, mewö malme. Kraistkö qetbuñañi mönö nalö dop möpöseininga nalö teteköni qahö aködamunñambuk ahöm öngöma. Keu mi ölña.

Keu teteköni

²² O urumelen alaurupni, nöñön kewö qesim engizal: Buña Kimbi töröpni kiyök ohom engizal. Miangöra andö qambañ keuni ki mönö kapan köla buña qem angume.

²³ Buzup ki mötme: Urumelen alanini Timoti i kösö mireyök pösatketka erök. Ösumok ki kañgotma ewö, mönö yambuk kaba engekit.

* **13:11:** Lew 16.27 * **13:13:** Gölmenöj kusus maljini, miangö qetni qandak.

²⁴ Yaizözkök keuni albiga galömurupņini pakpak aka Anutugö ambazip sarakņi körek yeņgöra jigetka mötme. Itali alaurupninan yaizözkökņini algetka eņgöreņ kaza.

²⁵ Anutugö kalem möriamņan mönö körek embuk ahöm öņgöba ahöma.

Jeimgörej Kimbi Jeimsnöη Kimbiηi alök. Jim-asa-asari

Gölmeηi gölmeηi mianğoreη ambazip könaηi könaηi uruηini melenđa letorakzei, yenğö ahakmemeηinan siksauk lolonqalon aiga tönğanğöba et enğuiga Anutugö qetbuηaηan etpapuk. Mianğöra Jerusalem bisop Jeims yaηön goro keu murutηi murutηi qezaköba ki ohoza. Goro keuηi tosatηi kewö: Mötkutukutu ölni mi denöwö? Zioz nup ölni aka muneni. Esapesap uruηe malmal. Tosatηi kude engek qepureime. Numbu jit galömkölköl. Sileniηi möpöseime me uruηini memba et al anğume? Anğururuk me alabauk akne? Kapaηkapaη aka köuluk nup meme.

Waimanjatηi bohoni kewö: Kraistkö Buηaηan qariba aködamun-ηambuk akηapköra qetηi bisiba keuηi köl guliba meinga ölni asuhuma me qahö? Numbu jitninanök möt nariinga qahö dop kölja. Zioz ölni qahö mi köhömuηi qamöt tandök ewö akza.

Kimbi kianğö bahöηi bohoni 10 mi kewö:

Keu mutukηi 1.1

Mötnariη aka mötkutukutu 1.2-8

Ambazip wanapηi aka pomηi 1.9-11

Esapesap (manambatok) ölöηi aka bölöηi 1.12-18

Buηa kezapnöhök mötmöt aka temkölköl 1.19-27

Etqeceηi mi kude engek qepureime 2.1-13

Mötnariη nupηi qahö mi omani akza 2.14-26

Numbu nesilamninan ayuhum neηgibapuk 3.1-18

Luainöη malmal me gölmegö ahakmeme 4.1-5.6

Lömböt bisiba köuluköinga ölni asuhuma 5.7-20

¹ *Jeims nöηön Anutu aka Kembu Jisös Kraistkö nupηi memba maljal.

Israel kambu 12 neηğoreηök tosatηi iηini Israel mosöta gölmeηi gölmeηi denđa anda maljei, nöηön embuk keu eraum mötpingöra kimbi ki ohoba jölöηini jizal.

Möt nariba köuluköba mötmöt ölni miwikηaibin.

² O urumelen alaurupni! Esapesap könaηi könaηi qakηine öηğömakzawi, mianğöra uruηinan mönö kude eri simbawon miyök möta söηgaiba malme.

³ Esapesapnöη qakηine öηğöiga mötnariη-ηinan mianğoreη köhöimakηa ewö, mönö kapaη köla kin köhöimakηe. Mi mötzeanğöra mönö söηgaiba malme.

⁴ Kapaη köla kin köhöimakηe ewö, mianğön mönö toroqeba mem letot enğuiga ahakmemeηinanğö ölni pakpak mi aködamunηambuk ahumakηa. Mianğön ahuiga Anutunöη oyaenköyaenηan uruηini kokolak qeiga urugö yuai kungöra (meme amğöba) mözöqözöroη qahö aka malme.

⁵ Enğoreηök kunηan “Denöwö akηam,” jiba mötkutukutugöra osizawi, yaηön mönö Anutu köuluköiga mi waηgima. Anutunöη kalemηi sakalakηi amqeba körek neηğöra neηgiba sirongen qahö jim neηgimangö mörakza. Mianğöra mi ölop waηgiiga buηa qem anğuma.

⁶ Köulukömawi, mianğoreη mönö niηgimapkö möt nariba uruyahöt qahöpmahöp akηa. Uruyahöt akzawaηön mönö köwet sirigö dop öηğöba

* 1:1: Mat 13.55; Mak 6.3; Apo 15.13; Gal 1.19

eta ahakza. Luhutnönj köwet kunduriga lanlan anda kamakza. Miangö dop akapuköra köuluknangö uruyahöt kude akña.

⁷ Uruyahöt ambazip mewöñi kunönj mönö Kembunönj yuai wanğimapkö kude mötmörima.

⁸ Yangö urujan mönö julkuliga aiakanj pakpak miangörenj kökölolonj aka kongwarak qeba anqem-kamqem keu jimakza. Mewö.

Wanapñi malmal aka pomñi malmal

⁹ Urumelenj alaurupni, engö sutñine tosatñan etqegeñi malgetka Anu-tunönj engöra möri öngöngöñi akze. Miangöra mönö ölop nanñini möpöseim anğumakñe.

¹⁰ *Tosatñan öngöngöñi maljemö, monen inapñinangöra qahö mötket öngömakzawanğöra aka etqegeñi tandök mala mönö nanñini möpöseim anğumakñe. Yeñgö malmalñinan mönö buörö (roro) juranji ewö aka soholima. Etqegeñi aka öngöngöñi neñön kömumba miangörenj örörönj akin.

¹¹ Wehönönj kota roro ohotiriiga qararanj köla soholiba juranjan bolojanimakza. Juranjan eriga kembanganö kaisongolomñi eksihimnambuk mianön piahimakza. Pomñi yeñön sukinapñini mem sehibingö lilikqilik ahakzemö, mala buörögö (rorogö) dop gororonğöme. Mewö.

Esapesap (manambatok) ölopñi aka bölöñi.

¹² Anutunönj keunji kewö jöhöi ahöza, “Ambazip urujanin jöpaköm niñgimakzei, nöñön i malmal köhöikñi engiba nöropñine goul ila köl engimam.” Keu miangö dop bölönangö esapesapnönj kungö qakñe öngöiga miangörenj kapan köla köhöii teköiga mönö malmal köhöiknangö ila sorom buña qem anğuba oyaenköyaen akña. Yangöra “I-ia simbawon!” jizin.

¹³ Bölönangö Tonjan Anutu esapköm wanğimawanğö dop qahö aiga Anutunönj kun siñgisöndok akñapkö qahö esapköm wanğiza. Miangöra kunjan esapesap uruñe mala kewö kude jima, “Anutunönj esapköm niñgiiga siñgisöndok akñangö akzal.”

¹⁴ Anutunönj qahöpmö, nanini sihim kömbönañnini bölöñan mönö töpötin (nemban, pöran) ewö öröm neñgiiga mötöp bitimnönj qaköinga siñgisöndokö esapesapñi mewö mohot mohot neñgörenj asuhumakze.

¹⁵ Kunjan sihim kömbönañi bölöñi qahö jöhöba siñgisöndok kondotza. Kondoriga sihim kömbönañan gölömñi ala siñgisöndok mi morö ewö meiga ahumakze. Siñgisöndoknönj ahuba qarim teköba kömup köhöikñi ahum wanğimakza.

¹⁶ O wölböt alaurupni, sihim kömbönañini bölöñan mönö kude tilipköm enğima.

¹⁷ Kalem ölopñi aködamunñinambuk pakpak mi Anutunönj ali Suep eu-yangörenök asuhumakza. Köin wehön jeñiri kota kutuba geyohotka imu-timutñiran körim törim ahakzapmö, asakñi pakpakö Tonjan mönö nanñak qahö uteköma. Imutimut me söñaup kun mi yangörenj qahö ahöza.

¹⁸ Anutunönj yuai pakpak miwikñaiyöhi, nini miengö sutñine yambu dölökñi jeñiqeqa aka malbingöra mörök. Miangöra nanñi sihimnangö dop keu ölnangö kötnj urunine aliga mianön ahuahü dölökñi neñgi ahuin. Mewö.

Buña keu öne mötpin me tem köla membün?

¹⁹ O wölböt alaurupni, mönö keu ki mötmöriba kude ölum enğuma: Inini mönö körek keu mötpingö kezap köröpñi zilanj alme. Keu lanj mi ösumök kude jime. Irimñinan mönö zilanj kude seholima.

* 1:10: Ais 40.6-7

20 Anutunöŋ ahakmeme diŋdiŋi akingö sihimŋi mörakzapmö, irimsesewölnöŋ mia qahö kondorakza. Mianğöra mönö irimsesewöl mosöta keu ösöŋ jiba malme.

21 Qewöloŋ könaŋi könaŋi aka ahakmeme töwötŋambuknöŋ qekötahözei, mia mosötme. Mönö yaŋgiseŋini mosöta Anutugö keu bapŋe anda keu kötŋi uruŋine kömörakzawi, mi möt aŋğön köla malme. Mewö aketka keu mianğön ölop amöt qem enğiiga letota Suepnöŋ öŋğöme.

22 Buŋa keu mi öne töhön mötketka ölni qahö ahubapuk. Mewö silebile aka tilipköm aŋgubepukmö, keu mi mönö köl guliba malme.

23 Kunŋan keu öne töhöntöhön möta mianğö dop qahö ahakzawi, yaŋğön mönö azi kianğö dop akza: Kunŋan jemesoholŋi piliknöŋ uba aŋgehakza.

24 Uba aŋgeka mosöta kungen anda kaisoŋgolomŋi denöwö, mi ösumok ölum qemakza.

25 Mi ölopŋi qahöpmö, kunŋan köna keu aködamunŋambuköra kezap ala ehiba mianğöreŋ qekötahöba siŋgisöndokö kösönöhök lolohomakzawi, yaŋğö ahakmemegöra mönö “Esop simbawoŋ!” jibin. Yaŋğön keu möta mi qahö ölum qemakzapmö, mi ölna tem köla mianğö dop ahakza.

26 Kunŋan urumelenğö köl guliguli akŋamğö jiba numbu jitŋi qahö galöm köla nanŋi mewö tilipköm aŋgumakzawi, yaŋğö liŋet köulukŋan mönö yuai omani, ölni qahö akza.

27 Anutu Iwigahö jemesoholŋe Buŋa nup sarakŋi silebileni qahö memamğö jiba mönö kewö akŋan: Gwani morö aka malö köŋjilin qakŋe maljei, mönö i anda engeka köyan köl enğiba malman aka gölmeğö ahakmemenangö qewöloŋan urugi tölohobapuköra galöm mem aŋguba malman. Mewö.

2

Etqeqeŋi mi kude engek qepureime.

1 O urumelen alaurupni! Jisös Kraist Kembunini qetbuŋaŋam-buk möt naribingö jize ewö, mönö ambazip tosatŋi kude engek soriba tosatŋi kude qepureim enğimemö, dop mohotnöŋ ak enğiba malme.

2 Mianğö dopkeuŋi kewö: Azi pomŋi kun, kesötŋi goul binenŋambuk aka opo malukuŋi ekjeritŋambuk, yaŋğön kambu miriŋine öŋğöiga azi wanapŋi kun sileötanŋi jujuratŋi töwötŋambuk yaŋğön mewöyök öŋğöbawak.

3 Öŋğöyohotka iŋini azi ipŋi ekjeritŋambuk mi köl öröm waŋgiba kewö jibeak, “Ketaŋamnini, gi ölop qaikŋe eu anda dum tatat löwötŋi mianğöreŋ tatman.” Mewö jiba azi etqeqeŋi mi ehöröŋ köla jime, “Gi ölop göraŋe anda kinman me köna kutukutunine eta tatman.”

4 Silik mewöŋan asuhuiga iŋini könagesö sutŋine köŋjabö ala menden aŋguba qemasolokep aka keuŋinambuk akze. Mötmötŋini bölöŋi wuataŋ-göba jimtekötekö ambazip goŋgoŋi akze.

5 O wölböt alaurupni, mötket! Anutunöŋ bemtohoŋi ambazip jöpaköm waŋgimakzei, yeŋğö buŋa ahömapkö keuŋi jim köhöiba jöhöyök. Keu mianğö dop tosatŋan gölme ambazip jeŋine etqeqeŋi akzemö, Anutunöŋ mi nanŋaŋğöra jim möwölöhöm enğiiga mötnariŋinangöra aka öŋğöŋğöŋi akze. Yeŋğön bemtohoŋaŋğö uruŋe aŋgotketka galöm köl enğiiga sukinapŋinambuk akŋe.

6 Ölna öŋğöŋğöŋi akzemö, iŋini ambazip wanapŋi engehöröŋ köla engek siriba malje. Ambazip pomŋi yeŋğön mönö moneŋ inapŋini qahöpköra kewöta mem et al enğigetka etqeqeŋi akze. Yeŋğön mönö iŋini örörahöm enğigetka keu jakeni jakeni mianğöreŋ aŋgorakze.

⁷ Inini Kraistkö buñaŋi aketka qet ölöp sorokŋi mi enġiba mianġö dop enġoholakzemö, pomŋi yeŋön mönö qet mi luasönöŋ ala laŋ jimakze? Gölmegö öŋgöŋgöŋi yeŋön mönö mi pakpak ahakze.

⁸ *Mewö ahakzemö, enġön Anutu bemtohoŋaŋgö jöjöpäŋ keu bohonŋi tem köla wuatäŋgögetka dop köлма. Anutugöreŋ keuŋi mi Buña Kimbinöŋ kewö ahöza: “Nangi jöpaköm aŋgumakzani, mianġö dop mönö ambazip tosatŋi mewöŋanök urugan jöpaköm enġimakŋan.”

⁹ Mianġön dop kölmäpmö, inini ambazip tosatŋi enġek soriba tosatŋi qepureim enġiba dop mohotnöŋ qahö ak enġimakze ewö, mönö siŋgisöndok ahakze. Anutugöreŋ jöjöpäŋ keu walöŋgetka yaŋön mönö keuŋini mi mi-wikŋaiba jim teköm enġima.

¹⁰ Kunŋan jöjöpäŋ keu pakpak tem köla wuatäŋgöba mienġöreŋök mohotnöŋ eta qezawi, yaŋön mönö jöjöpäŋ keu körek pakpak walöŋda keuŋambuk akza.

¹¹ *Mianġö könaŋi kewö: Anutu “Sero yoŋgorö kude akŋan,” jiyöhaŋön mönö mewöŋanök jöjöpäŋ keu kewö jiyök, “Ambazip kun kude qenöŋ kömuma.” Gi sero yoŋgorö qahö akzanmö, töndup kun köhömuŋi qezani, mianġön mönö jöjöpäŋ keu körek walöŋ teköba maljan.

¹² Anutugöreŋ köna keu mi siŋgisöndokö kösönöhök lolohoba malbingöra ahöza. Anutunöŋ köna keu mianġön kewöt neŋgiba keunini jim teköi solanimegöra mötmöriiba keuŋini mianġö dop jimakŋe aka ahakmemeŋini urukalem qakŋe ahakŋe.

¹³ Kunŋan urukalem qakŋe ambazip qahö ak kömum enġiba maliga Anutunöŋ keuŋi kewöta jim teteköŋi ak kömukömu qakŋe qahö ak waŋgima. Kunŋan urukalem kondela malöhi, Anutunöŋ i kewöt waŋgiba ölöp ak kömum waŋgiiga simbawoŋ aka silenŋi memba öŋgöma. Mewö.

Mötnariŋ ölni qahö mi köhömuŋi akza.

¹⁴ O urumelen alaurupni, kunŋan “Jisös möt narizal,” jiba mianġö nupŋi qahö meiga mötnariŋi mianġön mönö denöwö bauköm waŋgibawak? Keuŋanök möt nariiga Anutunöŋ eka amöt qei letotma me qahö? Mi qahö!

¹⁵ Mianġö keuŋi kun kewö: Uruŋini melenġeri, enġö sutŋine ambazip kunŋan opo kereŋgöra osiba mözöröŋgöba nenenŋi wehön kungöra qahö malbawak.

¹⁶ Mewö maliga enġöreŋök kunŋan yambuk aitonġöba silegö naŋgönaŋgö qahö waŋgiba kewö jii mötpawak, “Gi ölöp anda nene memba könöŋ jömöta böŋjöŋ tatman.” Keu töhöŋ mi möriiga mianġön mönö denöwö bauköm waŋgibawak? Mi qahö!

¹⁷ Mewöŋanök mötnariŋ töhöŋök mi köhömuŋi akza. Mötnariŋkö nupŋi ölni qahö mezawaŋgö mötnariŋan mönö qamöt ewö akza.

¹⁸ Kunŋan kewö jibawak, “Göŋön mötnariŋuk aknöŋga nöŋön ahakmeme diŋdiŋi wuatäŋgömakzal.” Nöŋön mianġöra kewö jimam, “Göŋön ‘Anutu möt narizal,’ jiba mianġö nupŋi qahö memba öne mötnariŋkahö ölni mönö denöwö kondel niŋgibanak? Nöŋön ahakmeme aka membi eknöŋga mianġön mönö ölöp nani mötnariŋnaŋgö ölni kondel giŋhima.”

¹⁹ Gi “Anutu mohok akzawi, mi möt narizal,” jizani, mi ölöp! Ömewöröme yeŋön mewöyök mi möt narize. Mi möt narizemö, mianġön kundut enġiiga Anutugöra jönömŋini undumakza.

²⁰ O uruqahö azi, gi ömewöröme yeŋö tandök möt narizan me? Mötnariŋkö nupŋi qahö menöŋga ölni qahö aŋui keu mi öne töhöntöhön jinöŋga

* 2:8: Lew 19.18 * 2:11: Eks 20.13, 14; Dut 5.17, 18

mötnaripkan mönö yuai omanji, ölnji qahö akza. Miangö könanji söpsöp keuni mianjön kondel gihiza me qahö?

21 **“Qahö!” jibanbuköra söpsöp keu kun jimam. Mötnaripkö bömön jalönini Abraham yanön mönö denöwö diñdiñi ahök? Yanön Anutugö jitñi tem köla nahönñi Aisak wañgita altanöñ ala mianjön jöwöwöl ohomamgö ahök. Mewö aka mötnarip qakñe nup meiga Anutunöñ mi eka keunji jim teköi solaniyök.*

22 *Söpsöp keu miangö könanji ek asarizan me qahö? Abrahamnöñ möt nariba keuyök qahö jiyökmö, mötnarip qakñe kinda miangö silikñi mewöyök ahiga nam köliga dop kölök. Ahakmeme diñdiñi aka memba maliga mötnaripñan mewö qariba aködamunñambuk ahök.*

23 **Buñ Kimbinöñ keu kun kewö ahöza, “Abrahamnöñ Anutu möt narim wañgiiga qetñi Azi Diñdiñi jiyök.” Keu mi mönöwök öñambuk ahuyöhanğö dop mi ohoget aka tosatñan Abrahamgö qetñi “Anutugö alaña!” mewö qeta jimalget.*

24 *Solanñi akingöra mötnaripkö keu jitninanöhök jiinga qahö dop kölja. Silikninan mötnaripkö ahakmeme ölnji akin ewö, Anutunöñ mönö keunini jim teköiga solanibin. Kösohotnan mönö miangö könanji kondelja.*

25 **Söpsöp keu kun mewöyök jibiga mi kondelma: Israel yeñön gölme ek kutubingöra azi yahöt melaim etkiget anohotka köna ketanji ambi qetñi Reihab yanön etkuañgita köyan köl etkiba köna kunöñ etkumbuliga mosöta anohot. Yanön mötnaripkö ahakmeme mewö ahiga Anutunöñ mi eka keunji jim teköi solaniyök. Mewö.*

26 *Nöñön keuni ki kewö jim tekömam: Azi uñanji qahö mi qamötñi. Miangö dop mötnarip ahakmemeñi qahö mianjön mönö köhömuñi akza. Mewö.*

3

Numbu nesilamninan ayuhum neñgibapuk.

1 *O urumelenj alaurupni, engörenök gwötpukñan uruñini wahöriga (“Tosatñi yengörenj pinjit mindiñgöbin,” jiba) kusum engienji böhi akingö akepuk. Nini tosatñi kusum engiba nanini mötmötnini qahö mindiñgöbin ewö, Anutunöñ mi ehi qahö dop köliga keunini kewöta köhöikñanök jim teköba miangö dop likepñi oñgita ak neñgima.*

2 *Mi kewögöra jizal: Nini körekñan köna keu gwötpuk qiwitipkömakzin. Kunñan nesilamñi galöm köla keu qahö qiwitipkömakzawi, yanön mönö azi aködamunñambuk sorokñi akza. Yanön ölop köhöiba malmalñi pakpak mewöyök galöm köla malma.*

3 *Hosnöñ (beosi) sihimnini tem kölmegöra ain injup numbuñine ala kösönöñ öröba mianjön ölop ölnji ketanji jömuk mi mindiñqindiñ ak enjiinga anakze.*

4 *Mewöyök wañge ketanji mienğö silikñini mötmörime. Mienjön ketanji aketka luhut köhöik-ñan nanğöm engigetka köwet kutuba anakze. Keta bölökñi akzemö, mi töndup anangö galömñi pailöt yanön wañge giliñe tata sihimñi wu-atangöba stia lökuatñi moröñi miyök melenqelenj aiga wañge ketanjan miangö dop melenğda anakza.*

5 *Nesilamgö könanji mi mewöñanök. Mi sileninanğö kitipñi morörökña kun akzapmö, töndup ölop keu ketanji könanji könanji mianjön silenini memba öngöba jimakzin. Mönö ki mötmörinöñ anök:*

Könöp jit-tökñi moröñan terenğda geba ölop jölöm jitñe möndöba arökñi keta bölökñi jem kutuiga etpawak.

* 2:21: Jen 22.1-14 * 2:23: Jen 15.6; 2 Hist 20.7; Ais 41.8 * 2:25: Jos 2.1-21

⁶ Nesilamninan mewöyök könöp bölam ewö akza. Mi sileni-nangö kitipni kitipni miengö sutñine tata qewölöngö kondotkondot namni akza. Mewö aiga könöp siagö Tonjan jönbölanñan ohotiriba mianğöreñ uwulamğöiga awamñanök urukönöpnöñ möndöba jeiga uru pakpak kutumutuba tölöhoiga malmalñe ahakmemeni pakpak mi sanjöp ewö töwima.

⁷ Anutunöñ yuai pakpak miwikñaiyöhi, mi sömbup könañi könañi, nei me yuai bapñinan köla ölölöngömakzei me köwetnöñ maljei, mi ambazipnöñ mölöwörim engimeañgö dop akze. Mi lök köl tutuhuba mölöwörim engigetka mire (köhömgep) akze.

⁸ Mewö akzemö, nesilamninan mönö sömbup kalñi tandök akza. Mi möröm warabe (röbek) mianñon kokolak qeçeni aka anamumu ewö öñöngöba neñgöhöba mem kömum neñgimangö jöjörömakza. Ambazip köreñan mi mölöwöriba jöhöm wañgi-bingö osimakze.

⁹ *Nesilamninan Kembu Iwinini möpöseim etkimakzin aka likepñe ambazip nanñi kaisoñgolom ewö miwik-ñaim engiyöhi, mi sait keunöñ lañ qesuahöm engimakzin.

¹⁰ Numbu nesilam mohok mianñon Anutugö qetñi möpösei-makzin aka sait keunöñ tosatñi qesuahöm engiba jimakzin. O urumelen alaurupni, könañamñinan mewö ahöi qahö dop kölja.

¹¹ O sawölñi aka kömbukñambuk mi o jeñi mohok mianğöreñök uzumğöba korakzahot me qahö? Mewö qahö.

¹² O urumelen alaurupni, jogañ ipñeyök danam (sam) mi ölop asuhumakze me qahö? Mewöyök jaunöhök mandarina ölop asuhumakze me qahö? Mianğö dop o sawölñan köwuk kömbukñambukñöhök uzumğö-mangö osimakza. Mönö mi.

Mötkutukutu ölni aka muneni

¹³ Engö sutñine dañon mötkutukutubuk aka keu mindingö-mawañgö dop akza? Kunöñ “Mewö akza,” jime ewö, yañon mönö uruñi mötkutukutuñangö dop memba et ala silikñan gunböñjönjön ahakmemeni kondeli aukñe asuhui ehinga dop kölma.

¹⁴ Mianñon dop kölmapmö, uruñine mututqutut ahöiga irimsesewöl mötököm-bukñambuk möta körogisigisi aka nanñini yuainöñ qarimapköra köpösöngöba andöqeçe ahakze ewö, mötkutukutuñini mianğöra mönö silenini öne kude memba öngöme. “Keu ölni wuatangözin,” jiba mönö ölni köyatibepuk.

¹⁵ Yeñgöreñ mötkutukutu mewöni mi gölmegö mötkutukutuya akza. Mi Suepnöhök qahö erakzapmö, ömewörome yeñon ambazip sölölohöm engiget jigetka Uña Töröñan mianğöra wösöbirik ahakza.

¹⁶ Denike yeñgö uruñine mututqutut ahöiga irimsesewöl möta körogisigisi aka nanñini yuainöñ qarimapköra köpösöngömakzei, yeñgö malmalñine sik-sauk ilingösöñ ahöiga silik anğöjörakñambuk könañi könañi wuatangömakze.

¹⁷ Mi wuatangömakzemö, möt-kutukutu Suepnöhök erakzawi, mianğö könañi mutukñi mi ahakmeme sarakñi. Mötkutukutu sarakñangö silikñi tosatñi mi kewö: Luainöñ malbingö ak engiiga gunböñjönjön qakñe tosatñi ak engiba keu bapñe angetka Uña Töröñan uruñini kokolak qeiga tosatñi bauköm engibingö sihimñi gwötpuk mötketka urumöt-mötñinangö ölni ölopñi ölopñi mi gwötpuk asuhumakze. Geñmoñ mosöta ambazip keuñini bahösapsap qahö kewöta silesile silik qahö malje.

¹⁸ Luaiqeçe ambazipnöñ luainöñ malbingö möta mianğö kötni kömötketka ölni ahakmeme diñdiñi ahuiga oyaenköyaen malakze. Mewö.

* 3:9: Jen 1.26

4

Gölmegö mötkutukutu mosöta Anutugö ala aka malme.

¹ Wani yuainöŋ bim aka aŋgururuk sutŋine kondori ahumakze? Nanŋini sihim kömbönaŋinan mönö wahöta silenŋini dop köliga ölöŋŋi bölöŋan awöraŋgöyohotka bim aka aŋgururuk ahumakze.

² Inŋini yuai könaŋi könaŋi memingöra sihimŋi köhöikŋi bökbök mörakzemö, mi engö buŋaya qahö ahakza. Yuaigö eksihim möta eröm ota uruŋinan könöŋ jeiga ambazip enŋugetka kömumak-zemö, töndup mi qahö memakze. Mianŋöra yom jiba aŋgururuk aka bim qemakze. Inŋini Anutugöreŋ qahö köuluköba nanŋinak öne memingö mötzeanŋöra mi qahö buŋa qem aŋgumakze.

³ Anutugöreŋ köulukömakzemö, töndup mi kewögöra qahö memakze: Uruŋinan qahö diŋgiiga yuai enŋiiga mi mösöhöba nanŋini sihim kömbönaŋini bölöŋi meköba silenŋinaŋgö sösongai akingöra möta ulerakze. Mi qahö dop köliga Anutunöŋ mi aŋgön kölakza.

⁴ O inŋini qesabulum ambazip ewö akze. Awanöm köna diŋdiŋi mosöta serowilin ahakzei, inŋini mönö mianŋö dop Anutu mosöta urumelenŋö kopa ambazip yembuk ala-ala aka monenŋ inapnöŋ göröken uruŋini jöhöba malje. Tandök mewöŋi aka mianŋön mönö Anutubuk kerök-kerök ahakze. Mi möt kutuze me qahö? Mianŋöra kunŋan gölmegö sihim kömbönaŋi bölöŋi mekömamgöra uruŋi alakzawi, yaŋön mönö Anutugö kerökŋa ahakza.

⁵ Buŋa Kimbigö keu kun kewö ohoget ahöza, “Uŋaŋi Töröŋi uruŋine al nenŋii maljawi, Anutunöŋ i sihim kömbönaŋi mienŋön kokolak qem waŋgiiga malja.”* Keu mi omaŋa könaŋi qahö mötmöribepuk.

⁶ *Keu mi omaŋa qahöpmö, inŋini mianŋö dop sihimŋini törörök Anutugöreŋ alme ewö, yaŋön mönö kalem möriamŋi önöŋi qahö enŋimakŋa. Mianŋöra Buŋa Kimbi ki jiba ohoget ahöza: “Anutunöŋ söngöröqök ambazip tuarenŋon ak enŋimakzapmö, uruŋini memba et alakzei, ia kalem möriam enŋimakza.”

⁷ Mianŋö dop inŋini mönö uruŋini kewöta Anutugö keu bapŋe anda malmemö, Bölöŋaŋgö Tonŋi tuarenŋon ak waŋgigetka enŋömosöta sööreiba misinŋöba anma.

⁸ Mönö Anutubuk jöhöjöhö aka kösutŋe kagetka yaŋön embuk jöhöjöhö aka kösutŋine kinma. Sinŋisöndok megetka böröŋinan töwiiga Jisösgö sepŋan mi saŋŋonmapkö köuluköme. Uruŋinan julkuliga an qem kam qem laŋ aketka uruŋinan tölöhoiga köl könjörat enŋii sarakŋi akŋegöra köulukömakŋe.

⁹ Mönö dabökörökŋini möt kutuba jinŋen köla wösöbirik möta silata sahötme. Gön köisirikŋini mosöta melenŋda amburereŋ akŋe. Sösongainŋini mosöta wösöbirik möt aŋgume.

¹⁰ Mönö Kembugö jeŋe memba et al aŋgugetka yaŋön mem wahöt enŋima. Mewö.

Urumelen alaurup kewöta keuŋini kude jim teköme.

¹¹ Urumelen alaurup, andönöŋ qeŋe keu mönö kude jim aŋguba malme. Kunŋan keu mewö yöhösaŋ jiba urumelen alaŋaŋgö keuŋi jim teközawi, yaŋön mönö Anutugöreŋ köna keu jim teköba memba et alja. Gi Anutugöreŋ köna keu jim teköba göragöra ala mewö mianŋön mi qahö tem kölakzanmö, mi silebile memba timbiqimbilim azia aka maljan.

¹² Anutunöŋ köna keu jim kutum nenŋiba mianŋö dop mönö keunini kewöta jim teköiga ayuhubin me ak kömum nenŋiiga oyaenŋoyaen akin. Yaŋönök

* **4:5:** Buŋa Kimbigö keu mianŋö könaŋi kun kewö, “Uŋa Töröŋi uruŋine ali maljawi, yaŋön jöpaköm nenŋimangö sihim kömbönaŋi möta nenŋöra mututqutut mörakza.” * **4:6:** Qam 3.34

jimtekötekö Tonini akzapmö, gi mönö nangahöra “Ninja akzal?” jiba alagi kewöta keunji jim tekömakzan? Mewö.

Sile memegö galöm keu

¹³*Mönö kezap alget! Tosatji injini sile memba kewö jimakze, “Nini merak me uran ki mosöta taon mi me mi mianğoreñ anda kölköl-örörö aka moneñ ketanji öröba yambu (yara) mohok malin teköiga mianğoreñ lilingöba kabin.” Nöñön mianğöra kewö jibi mötme:

¹⁴ Malmalñini uran denöwö malmei, injini mi qahö möt kutuze. Engö malmalñinanğö könanji mi denöwö? Mi köwak kousugö dowahözawa, nalö töröptökñi asuhaba ayapköma.

¹⁵ Mianğöra enñön mönö kewö jigetka dop köлма, “Kembugö jit sihitñan neñğöra mewö ahöiga jebuk malbin ewö, mönö mewö mewö aka membin.”

¹⁶ Mewö qahö jimakzemö, öne töhön jakbak-orañbörañ aka nanñini silenini memba öngöba möpösei-makze. Ahakmeme pakpak mewöñi mianğön mönö bölöñi akza.

¹⁷ Keuni jim tekömamğöra kewö jizal: Kunñan silik ölopñi aka memawanğö dop aka mianğö könanji möt kutubagun mi qahö aka memawi, yanñön mönö siñgisöndok akza. Mewö.

5

Ambazip sukinapñinambuk yeñğö galöm meme keu

¹ O ambazip sukinapñinambuk, injini kezap ala keuni ki mötket: Kahasililin sihimbölo qakñine öngömawi, mianğöra mönö amburereñ aka silata sahötme.

²*Moneñ sukinapñinan mönö gisahöba gororongöza. Kezaplonlon jijilukut yeñön opo malukuñini yöhöqöhötiba nemakze.

³ Injini nalö teteköñi kewöñe goul, silwö aka yuai tosatji qaknöñ qaknöñ qezaköget ahözawi, mi kahawet muetmuetnöñ turum teköba törom (rust) memba ahöza. Törom kahawet mianğön dangunu ewö ahöba könanini nalö teteköñe kewö kondelma: Injini malmalñini moneñ inapnöñ jöhöba mösöhögetka pömsöm qeiga ayuhume. Törom kahawet mianğön mönö könöp bölam ewö sile busuñini mewöyök mem bölima.

⁴*Ki mötmöriget: Nup meme ambazip nupñine barö memba siri uret qözöla malgeri, injini yeñğö töwanini ekbonep möta anğön kölget. Injini yeñğoreñ sahöt irikurukñini mötze me qahö? Silatñini mianğön mönö Kembu Anutu, kukösum pakpakö Toñanğö kezapñe gem teköiga mötza.

⁵ Injini gölmenöñ ki yuai könanji könanji sesegilgil buña qem anğuba siyonşayon qahö mala silegö sösongai algetka nahömñini dop köl enğiiga malget. Gölmegö kelök möriamñan jöhöm enğiiga lañ mala nem qarip ketanji aka malje. Anutunöñ keunini jim teköiga enğuget kömumeanğö nalöñinan kam kuñgumawi, mönö nalö mianğöra jöjöröba kelökñinambuk aka malje.

⁶ Ambazip qewölonini qahö injini qahö tuarenjon ak enğigetka töndup keunini jim teköba lañ enğuget kömumba malget.* Mewö.

Lömböt mököşönda bisiba köuluköba malme.

⁷ O urumeleñ alaurupni, injini Kembunöñ kanğotmapköra mamböta nalö sutñe kianğoreñ mönö mököşönda lömböt bisiba kinme. Mewö kinda kölkömöt azigö tandökñi mötmörime: Yanñön nene gölmenöñ kömöta kinda ölni söngöröñi öngöñgöñi asuhumapköra kapan köla mambörakza. Kapan köla mamböta mali

* **4:13:** Qam 27.1 * **5:2:** Mat 6.19 * **5:4:** Dut 24.14-15 * **5:6:** Keu mianğö könanji kun kewö: Injini azi qewöloni qahö töndup keunji jim teköba qegetka kömuyöhi, yanñön injini kunbuk qahö qetal enğimakza.

maliga kie bedu nalöŋan kaiga kunbuk mamböriga kömunjan kie uru nalöŋan kam kunŋumakza.

⁸ Enjön mewöŋanök mönö mökösoŋda lömböt bisiba kinme. Kembunöŋ kunbuk kamawanŋö nalöŋan törizawanŋöra aka mönö uruŋini qezaköba böŋ qeba kinme.

⁹ O urumelen alaurupni, Anutunöŋ keuŋini jim teköi lömböt miwikŋaibepuköra mönö nanŋini sutŋine jimönŋot kude aka uruŋinan irikuruk kude jim anŋumakŋe. Mötket, jimtekötekö Tonjan mönö dopdowiba nanŋunöŋ kinja. Mewö.

¹⁰ Urumelen alaurupni, kezapqetok ambazip yeŋön mönöwök Kembugö qetŋe Buŋa keu jigetka kahasililin mem enŋigetka möta töndup mökösoŋda lömböt bisiba kapaŋ köla malget. Enjön mönö yeŋö tandökŋini mötmöriba köna lasupŋini wuatŋöba malme.

¹¹ *Tosatŋan kapaŋ köla lömböt bisiba mala luhut algeri, nini yeŋöra “I-ia simbawoŋ!” jizin. Azi qetŋi Job (Hiobe) yeŋön kahasililin möta töndup kapaŋ köla luhut alöhi, mi mötze. Luhut aliga teteköŋe mianŋöreŋ Kembunöŋ ak kömukömu Toŋi aka neŋgehorimakzawi, yeŋön mönö oyaenŋoyaenŋi wanŋiiga malök. Mönö mi mötmörime. Mewö.

¹² *O urumelen alaurupni! Keu kötŋi mutukŋi kun ki jimam. Inŋini keu mi me mi jimei, mi jöjopaŋ keunöŋ kewö kude jim köhöime, “Keuni ölni qahö akza ewö, Suep Tonjan ölop lömböt ali qakne öngöma me gölme tonjan mereŋ mumbaköiga gölmenöŋ turum niŋgima.” Keu mi me jöjopaŋ keu tosatŋi mewöŋi mianŋön mönö keuŋini kude jim köhöime. Mewö qahöpmö, oŋ-keugöra möta “Oŋ!” miyök jime aka qahöp-keugöra “Qahö!” jime. Pötagororoŋ keu jigetka Anutunöŋ keuŋini jim teköba likepŋi melenŋi qakŋine öngöma. Mewö.

Mötnariŋ qakŋe köulukögetka ölni asuhuma.

¹³ Mötnariŋ ambazip enŋöreŋök kunŋan qemjem-mamje-ŋambuk malja ewö, yeŋön mönö Anutu köuluköma. Kunŋan sösoŋgainöŋ malja ewö, yeŋön mönö liŋet köla Anutu möpöseima.

¹⁴ *Enŋöreŋök kunŋan kawöl yöhöi malja ewö, yeŋön mönö mötnariŋ könagesögö jitmeme öröm enŋiiga kaba Kembugö qetŋe kelöknöŋ sileŋe miriba yanŋöra köuluköme.

¹⁵ Mötnariŋ qakŋe köulukögetka Kembunöŋ kawöl ambazip mi amöt qem wanŋii ölöwaka kunbuk wahötma. Siŋgisöndok aka kawöl miwikŋaiyök ewö, Anutunöŋ mönö siŋgisöndokŋi mi sanŋonŋa mosötma.

¹⁶ Mewö aiga Anutunöŋ amöt qem enŋii ölöwakŋegöra mönö siŋgisöndokŋini jim miwikŋaim anŋuba bauköm anŋuba Anutugö köulukömakŋe. Ambazip solanŋi kunŋan uruŋi qezaköba Anutu köulukömawi, mianŋö ölnan mönö wewelipŋambuk asuhuma.

¹⁷ *Mianŋö söpsöpŋi kun mi kezapqetok azi qetŋi Elaija (Elia). Yeŋön gölme azi naninanŋö dowä malök. Yeŋön kie qahö kamapköra uruŋi qezaköba kapaŋ köla köuluköiga kienöŋ yambu (yara) karöbut aka köiŋ 6 mianŋö uruŋe gölmenöŋ qahö erök.

¹⁸ *Nalö mi teköiga kunbuk köuluköiga suep injan köla kie yöhöba bedu meiga nene kunbuk töngöniba asuhuyök. Mewö.

Kunöŋ janŋun aniga alaŋan bauköiga dop kölma.

¹⁹ Urumelen alaurupni, enŋöreŋök kunöŋ keu ölnanŋö könanŋi qiwitipköba janŋun aniga kunŋan i miwikŋaiba köna ölnje kunbuk wanŋita alma ewö,

* 5:11: Job 1.21-22; 2.10; Sum 103.8 * 5:12: Mat 5.34-37 * 5:14: Mak 6.13 * 5:17: 1 Kinj 17.1; 18.1 * 5:18: 1 Kinj 18.42-45

20 *mianğöra mönö kewö mötmörime: Siŋgisöndok ambazip kunŋan janjuŋ könaŋe aniga alaŋan i mianğöreŋök waŋgiriga uruŋi löwörii kunbuk melenmawi, yaŋön mönö qahö kömum köhöima. Alaŋan i könöp sianöŋ gebapuköra aŋgön köl waŋgiiga Anutunöŋ siŋgisöndokŋi sehisehiŋi mi saŋgoŋda köl turuma. Mewö.

* 5:20: Qam 10.12; 1 Pitö 4.8

Pitögöreᅇ Kimbi 1 **Pitönöᅇ Kimbiᅇi mutukᅇi alök.** **Jim-asa-asari**

Pitönöᅇ Buᅇa Kimbiᅇi ki ohoba Kraistkö alaurupᅇi Eisia prowinsgö Not likepᅇe deᅇda malgeri, yeᅇgöra ali anda liliköyök. Könaᅇiba qetᅇiᅇi kewö qeta ohoyök, “Anutunöᅇ ambazip nanᅇaᅇgöra möwölöhöm eᅇgiyöhi, mienön.” Mötnariᅇ ambazip sesewerowero miwikᅇaiba sihimbölö möta malgeri, yeᅇgö uruᅇiᅇi nanᅇömapköra aka Kimbi ki ohoyök. Kraistkö Ölöwak Buᅇagö könaᅇi ölum eᅇgubapüköra aka Jisösgö keuᅇi kunbuk kewö jim asariyök, “Jisösnöᅇ kömuyökmö, kunbuk kömupnöhök guliba wahöta kunbuk lilingöba kamangö jim jöhöba oyaeᅇkoyaeᅇ akingö jörömqörömᅇi neᅇgiiga al mambörakzin. Mianᅇgöra sihimbölö mörakzei, mi mönö möt aᅇgön köla kapaᅇ köla köhöiba kinda malme. SihimböLö mianön mötnariᅇiᅇi kewöriga öᅇᅇambuk akᅇa ewö, Anutunöᅇ mönö likepᅇi melenᅇ eᅇgima. Jisös Kraistnöᅇ asuhumawi, nalö mianᅇgöreᅇök mönö aködamunᅇinambuk akᅇe. Keu mi möta awösamkakak kinme.” Mewö qambaᅇ eᅇgiba ohoyök.

Wahöjalinᅇ nalöᅇe uruᅇiᅇi nanᅇöm eᅇgiba toroqeba köhöiba kewö uru kunᅇum eᅇgiyök, “Inᅇi Kraistkö buᅇaya akzeᅇgö dop mönö malmal sarakᅇi malme.”

Buk kianᅇö bahöᅇi bohönᅇi 6 mi kewö:

Keu mutukᅇi 1.1-2

Anutugö amötqeqe nupkö könaᅇi 1.3-12

Malmal sarakᅇi malbingö jimkutukutu 1.13-2.10

SihimböLö qakᅇe nup denöwö bisibin 2.11-4.19

Uruᅇiᅇi melenᅇda memba et ala nup meme 5.1-11

Buᅇa kimbi kianᅇö keu köᅇi bohönᅇi 5.12-14

¹ Anutunöᅇ ambazip nanᅇaᅇgöra möwölöhöm neᅇgiiga neᅇgöreᅇök inᅇi tosatᅇan Israel mosöta prowins qetᅇiᅇi Pontus, Galesia, Kapadosia, Eisia aka Bitinia mianᅇgöreᅇ deᅇda anda malje. Pitö nöᅇön Jisös Kraistkö melaimelai azi aposol aka embuk keu eraum mötpingöra kimbi ki ohozal.

² Iwi Anutunöᅇ qelᅇiᅇe möpᅇaᅇgö möpᅇe mötmöt areᅇ ali ahöiga mianᅇgö dop Uᅇa Töröᅇan inᅇiᅇi mem sarahim eᅇgiiga Anutugö buᅇaᅇi aket. Anutunöᅇ inᅇiᅇi Jisös Kraistkö jitiᅇi tem kölmegöra möwölöhöm eᅇgiiga Kraistkö seᅇᅇan qewösahöi eᅇgömiriba saᅇgöᅇ eᅇgimakza.

Anutugö kalem möriamᅇan mönö uruᅇiᅇi dop seᅇiiga luainöᅇ malme. Mewö.

Oyaeᅇkoyaeᅇgö jörömqörömninanᅇgöra Anutu möpöseibin.

³ Neᅇön Kembunini Jisös Kraistkö Iwiᅇi Anutu i kewögöra möpöseimakin: Anutunöᅇ ak kömukömu ketani neᅇgiba neᅇgömeiga ahuahu döLöᅇi ahuin. Ahuahu döLöᅇi ahuᅇa Jisös Kraistnöᅇ guliba kömupnöhök wahöröhi, neᅇön mianᅇgö dop guliba wahöta oyaeᅇkoyaeᅇ akingö jörömqöröm aka maljin.

⁴ Oyaeᅇ-koyaeᅇ buᅇa qem aᅇgubingöra jörömqöröm aka al mambörakzin. Anutunöᅇ oyaeᅇkoyaeᅇ mi urumelenᅇ alaurupᅇi neᅇgimapköra Sueᅇ mire ali ahöza. Mianᅇgöreᅇ ahöba qahö sahaha kahawet memba töwiba gisahöba ayapköma.

⁵ Mötnarip köl gulime ewö, Anutugö ösumņan sel jöhöba kölközizip enjiiga Suepkö buņaya malgetka Jisösnöy ölop enġuanġiriga Suepnöy öngöba oyaenköyaen akņe. Anutunöy Amötqeçe Toņangö könaņi nalö teteköņe mewö indel teköiga ambazip jim asarim enġibingöra aka ahöza.

⁶ Oyaenköyaen akingöra söņgaiba maljemö, gölmenöy malinga Anutunöy esapesap Toņi qahö jöhöiga lömböt anġösirip könaņi könaņi asuhugetka sihimbölo miwikņaiiba möta malje. Nalö töröpņi mewö malmemö, mi töndup sösongai aka malje.

⁷ Anutunöy esapesap qahö jöhöiga qakņine öngöba mötnaripņinangö tandökņi kewörakza. Köt ölni köhöikņi goul miangö söņgöronan mönö guli dötnam onġitzapmö, töndup nalö kunöy ayapköm teköma. Nalö töröpņangöra aka ambazipnöy goul mia kun könöpnöy delasi ohoba ölnan gizikörörök ahöbapüköra kewöta esapkömakze. Miangö dop inġini ölna törörök möt nariba kin köhöimakze me qahö, esapesapnöy mönö miangö könaņi kondelakze. Anutunöy uruņini ölni kewöriga goul kewögöra onġitmapköra mötza: Mötnaripņinan pöwöwöm köhöikņi aiga söņgöroni öngöngönan goul silwö gwötpuk onġita nalö teteköņi qahö bauköm enġii dop kölma. Mewö enġehi dop kölma ewö, Jisös Kraistnöy kunbuk asuhumawangö nalöne mönö möpöseim enjiiga Anutugö jeņe qetbuņa miwikņaiiba aködamunņinambuk akņe.

⁸ Inġini Kraist qahö eka töndup jöpaköm wangiba malje. Nalö kewöņe Kraist qahö eka töndup möt narim wangimakze. Mewö aka sösongai sorokņi aködamunņambuk söņgaimakze. Sösongaiņini miangön mönö jitnöy jijigö dop qahö akza.

⁹ Inġini Jisös möt narigetka amöt qem enjiiga letotket. Mötnaripņinangö tohotņi mi Suep mire eu ahöza. Anutunöy uņaņini enġömeiga enön euyangören öngöba tohot mi zilaņ misirimegö möta sösongai ahakze. Mewö.

Kezapqetok ambazipnöy jörömqöröm aka malget.

¹⁰ Kezapqetok ambazip yeņön amötqeçegö könaņi jaruba Anutu köuluköba qeçesi ala möt kewöta mala kotket. Mewö mala Anutunöy kalem möriam enġimapkö möt asariba miangö kezapqetok keuņi mi qeljine jiba mala kotket.

¹¹ Kraistkö Uņa Törönan kezapqetok ambazip sölölohöm enġiba asuhumapkö keuņi indela saņep ala kewö jii mötket, “Kraistnöy sihimbölo möta miangö andöņe asakmararaņ aködamunņambuk miwikņaiiba asariba malma.” Mewö jiiga möta Amötqeçe Toņan wani nalönöy aka dendenöwö asuhumawi, miangö könaņi jaruba qeçesi ala möt kewöta malget. Mewö mala söpsöp keuņi keuņi qeljine nangöba jiba mala kotket.

¹² Amötqeçe Toņangö könaņi jaruba qeçesi ala möt kewöta malgetka Uņa Törönan mötmöt kewö indel enġiba jiyök, “Inġini mönö nanņini welenņina kude qem anġumemö, ambazip könaņep ahuba keuņini oyoņmei, mönö i bauköm enġiba malme.” Mewö jiba kezapqetok keu enġiyöhi, nini tosatņan mi nalö kewöņe liliköba jim asarim enġiinga mötket. Kraistnöy Uņa Töröņi Suepnöhök melaiiga eta ambazip sölölohöba inahöm enġiiga Ölöwak Buņa jiba uru kuņgum enġiba malgeri, yeņön Buņa keu miyöhök jiba malget. Kezapqetok keu miangö ölni asuhuiga Suep garataurupņinan mewöyök mi uba eka könaņi möt asaribingö awöweņgöba malje. Mewö.

Anutunöy sarakņi malbingöra neņgoholakza.

¹³ Buņa keuņi mewö ahözawangöra enön mönö uruņini Anutugö nupköra ala oponi öroget yöhöiga mem kurukņini memba kinme. Mönö böņ qeba nanņini ahakmemenġini galöm köl anġuba malme. Jisös Kraistnöy kunbuk

asuhuba mianğö nalöŋe kalem möriam engimawi, mönö mianğöra al mamböta jöröm-qörömŋini pakpak mianğoreŋ ala malme.

¹⁴ Anutugö nahönbörat-urupŋan keuŋi tem kölakzei, eŋön mönö mianğö dop köna sarakŋi wuatangöba malme. Mutuk gukmaulem tönpin malgetka nanŋini sihim kömbönaŋini bölöŋan yeyasenŋeŋ mem engigetka lanlan malget. Mewö malgetmö, nalö kewöŋe ahakmemeŋini mönö sihim miengö dop kude toroqeba aka memba malme. Lan siksauk malbepuköra mönö galömnini mem anguba malme.

¹⁵ Lan siksauk qahöpmö, Anutu sarakŋan engoholiga eŋön mönö mewöyök yanğö dop ahakmemeŋini pakpak mianğoreŋ sarakŋi aka malme.

¹⁶ *Buŋa Kimbigö keu kun kewö ohoget ahöza, “Nöŋön töröŋi sarakŋi maljalangöra nöŋgö buŋani eŋön mönö sarakŋi aka malme.”

¹⁷ Anutugöra “Iwinini!” jiba ösumŋi köl örömakzini, yanğön iwi ölöpnangö dop ambazip tosatŋi qahö neŋgek soriba tosatŋi qahö qepureim engimakza. Körek neŋgö ahakmemeŋini mönö dop mohotnöŋ kewöta mohot mohot neŋgö keunini jim teköma. Mianğöra Anutu töröŋangö buŋaya akze ewö, mönö gölmenöŋ kusukŋi malmeangö dop sarakŋi aka malme. Jitŋinanök qahöpmö, ahakmemeŋinan mönö Anutugö jitŋi oŋgitpinpuköra sömbuŋini möta malme.

¹⁸ Mewöyök Anutunöŋ sohopŋini meyöhanğö könaŋi mötagun mönö sarakŋi aka malme. Ambösakonurupninan tandö lopion mötmöt lan wuatangöba ahakmeme omani kondel neŋgigeri, Anutunöŋ iŋini yeŋgö dop toroqeba lan malbepuköra bohonŋini öŋgöŋgöŋi gila sohopŋini meyök. Bohonŋi mi silwö goul oŋgita gilöhi, mi mötze. Gölmegö moneŋ inap ayapkömawangö dop akzawi, yuai mewöŋi mianğön bohonŋini qahö meyök.

¹⁹ Mianğön qahöpmö, Kraistkö sepŋi söŋgöŋöŋi öŋgöŋgöŋi mianğön mönö bohonŋini meyök. Kraistnöŋ lama moröŋi solanŋi uzi poreŋi qahö tandök aiga jöwöwöl ohohogö tandök qegetka sepŋi mokoyök. Mianğöra mönö sarakŋi aka malme.

²⁰ Anutunöŋ mutuhök Suep gölme qahö miwikŋaim etkiba nalö mianğoreŋök Kraist möwölöhöba sohopnini memapkö nup areŋ mi lök qeljiŋe ala areŋgöyök. Mi areŋgöiga ahöi mala kota malgetmö, nalö teteköŋe kianğoreŋ iŋini ölöwakŋegöra aka indeli aukŋe asuhuyök.

²¹ Kraistnöŋ nam köl enğiiga ölop Anutu möt narim wanğimakze. Anutunöŋ Kraist mem gulim wanğii kömupnöhök wahöriğa asakmararaŋ al wanğii malja. Mewö maljawangöra aka iŋini Anutu möt nariba kinda yuai pakpak jiyöhi, mianğö dop ahakŋapkö jörömqöröm ak wanğimakze.

²² Jörömqöröm ak wanğiba keu ölni tem kölgetka Kraistkö sepŋan köl könjörat mem enğiiga malme. Mewö mala ölop urumelen alaurupŋini geŋmoŋi qahö jöpaköm enğiba malme. Urukönömnini pakpak mianğön mönö kapan köla törörök urukalem ak anguba malme.

²³ Malmal köhöikŋangö keuŋi mianğön mönö nam köl enğiiga ahuahu dölökŋi ahuget. Gölmegö keu kusukŋi kunŋan qahö nam köl enğiiga Iwi ketanangö nahönböratuŋi aket. Anutugö keuŋan mönö qahö ayapkömappmö, teteköŋi qahö zeŋ ahöm öŋgöma.

²⁴ *Keu mianğö könaŋi mi Buŋa Kimbinöŋ kewö ohoget ahöza: “Ambazip pakpak iŋini mönö gwözözak luplup tandök akze. Aködamunŋini pakpak mi juraŋi asakasak-ŋinambuk tandök akza. Gwözözak luplupnöŋ mönö soholiba gororöŋgögetka juraŋinan buratiba teköqeköba etme.

²⁵ Mewö etmemö, Kembugö Buŋa keu malmal köhöikŋi neŋgimakzawi, mianğön mönö teteköŋi qahö ahöm köhöiba ahöm öŋgöma.”

* 1:16: Lew 11.44-45; 19.2 * 1:24: Ais 40.6-8

Buᅇa keu mianᅇön Ölöwak Buᅇaya aiga tosatᅇan mi jim asarim enᅇigetka mötze. Mewö.

2

Köt malmalᅇambuk yambuk kinda sarakᅇi akᅇe.

¹ Buᅇa keu mötzeanᅇöra mönö bölöᅇamᅇini pakpak köteköba gilme. Geᅇmoᅇ köᅇbiᅇ pakpak mosötme. Ahakmeme silesile mi sisitᅇi memba tököme. Körogisigisi aka andöqeᅇe keu yöhösaᅇ ahakzei, mi pakpak mönö qekögetka et teköma.

² Moröseᅇsep geᅇmoᅇini qahö yeᅇön juzu nemingörök möta awöweᅇgömakze. Eᅇön mönö mianᅇö dop Buᅇa keu qahö möwöramᅇögeri, mi urukönömᅇine albingö awöweᅇgöba malme. Mewö mala möt-naripᅇini kölguligetka qarim köhöiiga letota mala oyaenᅇkoyaenᅇ akᅇe.

³ *Buᅇa Kimbigö keu kun kewö ahöza, “Nene kun nepöleköba nahömᅇi mötkeri, mianᅇö dop Kembu ölöᅇᅇi yambuk qekötahöba nahömᅇi mötket.” Keu mianᅇö dop Kembangö nahömᅇi mötze ewö, mönö Buᅇa keunöᅇ qarim köhöiba malme.

⁴ Kraistkö söᅇsöp keuya jimam: Kraistnöᅇ wahöta Anutugö tandö kömbönaᅇi aka malmal köhöikᅇanᅇö wötᅇi akza. Inᅇini mönö yanᅇöreᅇ kaba kunbuk letotme. Ambazipnöᅇ tandö kungöra “Köt omaᅇi,” jiba andö qeba mosötketmö, Anutunöᅇ i Amötqeᅇe Tonᅇi akᅇᅇapaköra möwölöhöba yanᅇöra möri bohonᅇi öᅇᅇöᅇᅇöᅇi ketanᅇi akza.

⁵ Kraistköreᅇ kaba guliba nanᅇinak mewöyök köt jamönᅇiᅇ malmalᅇinambuk ewö akᅇe. Mewö aka mal köhöigetka Sueᅇkö mitimqeᅇe yanᅇön enᅇömemba uruᅇini möhamᅇöiga köhököhöi miwikᅇaiba urugö malmalgö jöwöwöl jike öᅇᅇi akᅇe. Uᅇa Töröᅇan uruᅇine mala sölölohöba mem letot enᅇiiga jöwöwöl jike mianᅇö jike nup galöm sarakᅇi aka kinme. Uᅇa Töröᅇan nam köla inahöm enᅇiiga tem köla Anutugö waikᅇi memba möᅇöseim wanᅇgiba malme. Mewö malgetka Anutunöᅇ enᅇeka Jisös Kraistköra aka ahakmemenᅇini mewöᅇanᅇö sihimᅇi möta malma.

⁶ *Buᅇa Kimbinöᅇ keu kun kewö ahöza: “Eket, Anutunöᅇ mönö köt tandö kun möwölöhöba Zaiön kundue Israel kambu uruᅇine kömötpiga tandö kömbönaᅇi guli damandaᅇ (milyön Kina) ewö akᅇa. Denike yeᅇön tandö pöwöwöm köhöikᅇi mi möt narim wanᅇgimakᅇei, yeᅇön mönö yanᅇöra aka gamu qahö möta malme.”

⁷ *Möt narim wanᅇgiba malᅇei, enᅇö jemesoholᅇine mi tandö kömbönaᅇi aködahunᅇambuk akzapmö, tosatᅇan uruᅇini qahö melenᅇa malᅇei, yeᅇö jeᅇine mi Buᅇa keu kianᅇö dop ahöza: “Miri meme yeᅇön ‘Köt omaᅇi,’ jiba tandö kun andö qeba mosötkeri, tandö mianᅇön mönö tandö kömbönaᅇi ahök. Könaᅇep tandökᅇi ain ewö miwikᅇaiget. Tandö pöwöwöm köhöikᅇi mewöᅇan tinᅇitpawak ewö, mirinöᅇ mönö gororonᅇöba eta kölbawak.”

⁸ *aka Buᅇa keu kun kewö ahöza, “Ambazipnöᅇ köt jamönᅇiᅇ mianᅇöreᅇ tötanᅇöba enᅇuiga mianᅇön mönö enᅇum mizit ak enᅇgima.”

Yeᅇön Buᅇa keu qahö tem köla nanᅇini imbi wuatᅇanᅇö-makzeanᅇöra aka tötanᅇöba erakze. Anutunöᅇ mewö areᅇᅇöm enᅇiyöhanᅇö dop erakze.

⁹ *Yeᅇön mewö erakzemö, enᅇön ambazip kambu qainᅇi kun kewö akze: Anutunöᅇ inᅇini nanᅇanᅇöra möwölöhöm enᅇiiga qainᅇi kun akze. Anutunöᅇ söᅇaupnöhök enᅇgoholiga asakᅇi wewelip-ᅇambuk mianᅇöreᅇ anᅇota jike nup galöm kambu sarakᅇi akze. Anᅇöletot aködahunᅇambuk memba malöhi,

* 2:3: Sum 34.8 * 2:6: Ais 28.16 * 2:7: Sum 118.22 * 2:8: Ais 8.14-15 * 2:9: Eks 19.5-6; Ais 43.20-21; Dut 4.20; 7.6; 14.2; Tai 2.1; Ais 9.2

mianğö Buña keuñi mi jim asaribingöra engoholök. Engoholiga Anutugö buña könagesöñi mala Kiñ Kembugö jembonurupñi aka nupñi liliköba memakze.

¹⁰*Mutuk Buña Kimbigö keu kungö dop “simbisembel lañ malgetmö,” nalö kewöñe uru jöhöm aŋguba kutulaŋgöba “Anutugö urumelen könagesö kambu” aka malje. Mutuk Anutugö ak kömukömugöra “gukmaulem malgetmö,” nalö kewöñe “engehoriiga kalem möriamñi ölop möt kutuba malje.” Mewö.

Anutugö welenqeçe ambazip kewö aka malbin:

¹¹ O wölböt alaurupni, Suepkö buñaya aka gölmenöñ ki kusuk kiana maljei, nöñön engö uruñini kewö kuŋgumam: Silegö sihim kömbönañini bölöñan galöm köl engibapuköra mönö nanñini aŋgön köl aŋgume. Sihim murutñi murutñi mienöñ mönö uruñini mem bölimegöra bim qemakze.

¹² Uruñini qahö melenğeri, yeŋgö sutñine ahakmemeñini ölopñanök aka memba malme. Tosatñan iñini bölöñi meme ambazip ewö keunöñ jim bölim engimakzei, yeñön ahakmemeñini ölopñi eka könañamñini törörök möt asarigetka mötmötñinan uteköma. Mötmötñinan uteköiga nanñini siŋgisöndokñini aka möt sohosohöñini ek kutuba uruñini melenğda Kraist asuhumawaŋgö nalöñe engöra aka Anutu möpöseim waŋgime.

¹³ Anutunöñ malmal areŋgöiga ambazip tosatñan galöm köl neŋgimakze. Kembugö qetñi bisize ewö, eñön mönö körek yeŋgö keu bapñe anda malme. Kiñ aka ministö yeñön bohonñini akzei, iñini mönö yeŋgö jitñini tem köla malme.

¹⁴ Kiap aka gawönö yeŋgö jitñini mewöyök tem köla malme. Yeñön ambazip bölöñi akzei, yeŋgö keuñini kewöta likepñi melenğ engimakzemö, ölopñi ahakzei, yeŋgö qetñini möpöseimakze. Anutunöñ mianğöra aka gawman ambazip al enğiiga malje.

¹⁵ Anutugö jit sihitñan mönö kewö ahöza: Kezapjupjup ambazip gukmaulem kinda engöra uruqahö keu omani omani jimakzei, iñini mönö ahakmeme ölopñi aka memba mianöñ yeŋgö numbuñini muhungögetka ölop malme.

¹⁶ Anutunöñ bölöñaŋgö kösö gwaröñeyök pösat enğiiga lolohogeri, iñini mönö mianğö dop ahakmeme solanñi aka memba malme. Mewö malmemö, bölöñañini turumegöra “Kösö gwarönini qahö solanñi (fri) maljin,” jiba mianğöreñ möndöba nanñini imbiñini kude wuatangöme. Mewö qahöpmö, Anutugö jitñi tem köla welenñi qemakzei, mönö mianğö dop gwarö qahö malme.

¹⁷ Ambazip körek mönö göda qem engiba malme. Urumelenğ alaurupñini mi urukönömñinan jöpaköm engiba malme. Anutugö keuñi oŋgitpinbuköra mönö sömbuñini möta malme. Kiñ aka ministöurupñini yeŋgöra mönö mötket öŋgöiga göda qem engiba malme. Mewö.

Kraistnöñ sihimbölögö silik ölopñi kondel neŋgiyök.

¹⁸ Welenqeçeurup iñini mönö ketañamñinaŋgö keu bapñe anda göda pakpak kondel engiba malme. Urubönjöhñöñ galöm ölopñi ak engimakzei, yeŋgörök qahöpmö, öröm ureim ak engimakzei, mi mewöyök törörök göda qem engiba malme.

¹⁹ Denike yeñön Anutugö jitñaŋgö dop ambazip göda qem engiba malgetka töndup könañi qahöpmö, öne kahasililiñ ak engigetka sihimbölö möta kapañ köla mökösoñmakzei, Anutunöñ mi eka likepñi melenğda kötuetköm enğiiga simbawoñ akze.

* 2:10: Hos 2.23

20 Bölöni aketka kömbinöŋ engugetka mi möta mökösoŋda kinme ewö, nanŋinanğöra mönö denöwö aka mötket öngöbawak? Dopŋine engugetka qet-buŋaŋi-nambuk qahö akŋe. Mewö qahöpmö, ahakmeme ölöpŋi akeranğöra aka sihimbölö miwikŋaiba mökösoŋda malme ewö, Anutunöŋ mönö mianğö likepŋi melenğda kötuetköm enğiiga simbawoŋ akze.

21 Kraistnöŋ mewöŋanök enğöra aka sihimbölö möta silik ölöpŋi kondel enğiyoök. Mianğöra iŋini mönö yaŋgö köna tamböŋi mötöteiba sihimbölö möta mökösoŋda malmegöra enğoholök. Mewö mala simbawoŋ akŋe.

22 *Buŋa Kimbigö keu kun kewö ahöza, “Yaŋön siŋgisöndok kun qahö ahök aka yaŋgö numbu jitŋeyök munen keu kun qahö erök.” Iŋini keu mianğö dop aketka dop kölma.

23 *Ambazipnöŋ uruqeŋe keu töhöreŋ Kraist gwötpuk jim waŋgigetka kitipŋi kun qahö melenğök. Sihimbölö ak waŋgigetka möta kitipŋi mekömamgö qahö töröpköm enğiyoök. Mewö qahöpmö, Anutunöŋ keu diŋdiŋanök jim tekömakzawi, mönö i möt nariba keuŋi yaŋgö böröŋe ala jim tekömapkö mambörök.

24 *Kraistnöŋ nenğöra kapaŋ köla siŋgisöndok andö qeba ahakmeme solanŋi wuatangöba malbingöra aka sihimbölö mörök. Mi möri Buŋa Kimbigö dop “sileni qegetka uzi asuhuyöhanğöra aka Anutunöŋ iŋini mem ölöwak enğiyoök.” Ölöwakŋegöra mönö “nanŋak siŋgisöndoknini memba silenŋe anğuba” maripomnöŋ öngöba kömuyök. Mianğöra iŋini mönö Kraistkö dop sihimbölö möta mökösoŋgögetka ölöwakŋa. Siŋgisöndokö esapesapnöŋ öröm nenğiiga mianğöreŋ mönö qamöt tandök aka köhömuŋi malbin.

25 *Mutuk iŋini “lama ewö janjuŋ anda kaba lanlan malget.” Mewö malgetmö, nalö kewöŋe uruŋinanğö galömŋanğöreŋ liliŋgöba kaba malje. Yaŋön iŋini lama ewö sel jöhöba köyan köl enğimakza. Mewö.

3

Awanöm yenğöreŋ qambaŋ keu

1 *Anutu welen qebingö keuŋi lök jizalmö, ambi iŋini mönö mewöŋanök apurupŋini yenğö keu bapŋe anda malme. Mewö malgetka apurup tosatŋan Buŋa keu qahö tem köla maljei, yeŋön mönö mewöŋanök anömurupŋini yenğö ahakmemenini eka uruŋini melenğbeak. Uruŋini melenğda malmalŋini Kraistkö böröŋe almegöra Buŋa keu jitŋinanök qahö jimemö, Kraistkö könaŋi mönö silikŋinan kondel enğigetka ek asaribeak.

2 Ahakmeme sarakŋi diŋdiŋi aka memba Anutugö jitŋi onğitpepuköra keŋgötŋini mötketka azinöŋ mewö engek yakögetka Kraistpuk qekötahöba malbingö sihimŋini ahubawak.

3 *Silegö aködamuraŋinanök mönö kude mem öngömakŋe. Nöröp sawaŋini qeba gawasu könaŋi könaŋi kude ala minjinda öngböŋ kude memba malme. Kösasorom goul yuainöŋ silenini kude meŋölöm anğume. Sileötaŋ qetpuk sorok aködamuraŋambuk mi kude mem anğume.

4 Mewö qahöpmö, aködamuraŋini ölni mi mönö töp megetka uruŋine ahöma. Uŋaŋinan luainöŋ bönjöŋ malgetka aködamuraŋini ölni mianğön tölapŋe ahöba mönö nalö kunöŋ qahö ayapköma. Urubönjöŋ malgetka Anutunöŋ engeka möri öngömakŋa.

5 Mönöwök ambi sarakŋi yeŋön Anutubuk kinda jörömqöröm ak waŋgiba yuai pakpaköra mamböta malgeri, yeŋön mewöyoök uruŋinanğö

* 2:22: Ais 53.9 * 2:23: Ais 53.7 * 2:24: Ais 53.5 * 2:25: Ais 53.6 * 3:1: Ef 5.22; Kol 3.18
* 3:3: 1 Tim 2.9

aködamunñinan menjölöm aŋguba apurupñini yengö keu bapñe anda malget. Mönö ambi mienjö dop aka malme.

6 *Saranöñ apñi Abraham tem köl wañgiba “Azi kembuni!” jiba ohola malök. Injini mewöyök zeñ kinda nup ölöpnji ölöpnji memba awösamkakak kinda yuai kungöra jönömñini qahö undui apurupñinambuk malme ewö, mönö Saragö dop ambi aköda-munñinambuk aka malme.

7 *Ambi yeñön ösumñini eretñi akzemö, töndup malmalgö kalem möriamñi mi azibuk öröröñ buña qem aŋguba malje. Ösumñini eretñi akzeañgöra azi mohot mohot injini mönö anömurupñini törörök köyan köla lolongöm enjiba malme. Anutunöñ azi enjö köulukñini qepureibapuköra mönö göda qem enjiba malme. Mewö.

Nup ölöpnji memakzemö, sihimbölö töndup mötze.

8 Keuni tekömawañgö qambañi kewö jizal: Injini mönö körek urumohot aka urumelenj alaurupñini urubönjöhñöhñöh jöpaköm aŋguba malme. Gunñöhñöhñöh mala nanñini memba et al aŋguba uruñinan jöhöm aŋguba mohotñe kinme.

9 Jinöñ jibi nunñunöñ guhubi aknöñ aki mi kude ahakñe. Uruqege keu töhöreñ jim enjigetka kitipñi kude meköme. Mewö qahöpmö, keu bölöñangö likepñi melenja mönö kötuetköba uruölöwak enjiba malme. Mewö aka malgetka Anutunöñ likepñi melenjiga kötumötuetñi buña qem aŋgumegöra enjoholök. Mewö aka mala Kembu asuhumawi, nalö mianjöreñ mönö oyaenköyaen akñe.

10 *Mewö akñegö keuñi mi Buña Kimbinöñ kewö ohoget ahöza: “Kunöñ malmal nahömñambuk malmangö ak wañgiiga wehön ölöpnji ölöpnji eka malmangö mötzawi, yañön mönö nesilamñi keu bölöñi jibapuköra jöhöba malma. Numbu suneyök geñmoñ keu asuhubapuköra mönö galöm mem aŋguba malma.

11 Ahakmeme bölöñi mönö andö qeba nup ölöpnji ölöpnji memba malma. Luainöñ malmalgö jaruba mi buña qem aŋgumangö kapan köla kinma.

12 Mi kewögöra: Kembugö jeñan ambazip solanñi engek galöm aka köulukñinañgöra kezap alakzampö, goñgoñi mi qahö mesohol köla engehakza.”

Keu mewö ahöza.

13 Injini nup ölöpnji membingö urukönöp aka malme ewö, ambazip sehisehijan mönö nupñini geñmororöñ memba mem bölim enjibingö qahö mötme.

14 *Mi qahö mötmemö, töndup ahakmeme solanñi akerañgöra aka sihimbölö mötpeak ewö, injini mönö töndup Anutunöñ kötuetköm enjiiga oyaenköyaen akñe. Kahasililin mem enjibepuköra mönö öne töwöratiba kenjöñini möta uruñini eri möt bölöbölöñinan enjubapuk.

15 Uruñinan kude etmapmö, uruñini mönö Kembu Kraistköreñ jöhöba könañi sarakñi pöndañ mötmörigetka öngöi malme. Nalö dop jöjöröba Kraistkö könañi ambazip jim asarim enjiba malme. Oyaenköyaen akingö jörömqöröm akzei, ambazipñöh mianjö könañangöra qesim enjigetka mönö körek yengöra keu melenj enjiba malme. Mönö gunñöhñöhñöh qakñe ambazip göda qem enjiba uru kungum enjiba malme.

16 Keuñini mewö galöm kölgetka Anutunöñ engeka “Dop kölja,” jiiga urukezapñinan mewö mötmegöra kinme. Kraistpuk qekötahöba kinda ahakmeme ölöpnji aketka uruqege keu töhöreñ lañ jim enjimakzei, yeñön mönö nanñini keu bölöñangöra aka gamu miwikñaim.

* 3:6: Jen 18.12 * 3:7: Ef 5.25; Kol 3.19 * 3:10: Sum 34.12-16 * 3:14: Mat 5.10; Ais 8.12-13

¹⁷ Nup ölopñi ölopñi memba malgetka ambazip tosatñan tøndup kahasililin ak engigetka Anutugöra sihimbölö mötketka dop kölja. Yuai bölöñi aka memba mianjön sihimbölö miwikñaigetka gamuñambuk akza.

¹⁸ Kraistnön mewöyök nalö kunön singisöndoköra aka kömuyök. Nini gonjonji ahinga Diñdiñi yanjön neñgungiriga Anutugören angotpingöra aka sihimbölö mörök. Gölme azia aiga silenji mem kömugetmö, Uña Töröñan mem gulim wanjiiga wahöta malja.

¹⁹ Uña Töröñan wanjiriga neñgömosöta kömupkö senjom mire geba uña kösö gwarönön malgeri, mönö yengöra Buña keunji jim asarim engiyök.

²⁰ *Mönöwök Noagö nalönön wanje ketanji megetka Anutunön uruñini melenmegöra kapan köla mökösonda mambörökmö, ambazipnön keu qahö tem köla ayuhuba kömupkö kösö gwarönön geget. Ambazip saiwa morörökñi 8 mewöñan Anutugö jitñi tem kölgetka o aliga gölme turuba wanje siriiga gölunöhök gouñini köla bohonñini jöhöyök.

²¹ Yuai mewö asuhuyöhi, mi o melungö söpsöpñi akza. Jisös Kraistnön kömupnöhök wahöta maljawangöra aka nalö kewöñe o neñgömirigetka Kraistkö ösumñan neñgualönnda bohonini jöhömakza. O mi silegö töwötñi sanjonmapköra aka qahö al neñgizemö, o melungö ölnji mi kewö: Nini Anutubuk malbingö jöhöjöhö aka jöjöpñan keunön jöhöba kewö köulukö-makzin, “Anutu, gi mönö qewölonji sanjonñonga uruñan sarakñi aiga göhö jege dop kölma.”

²² Jisös Kraistnön Suep mire eu öngöba Anutugö böröñi ölnje bunabunangambuk tatza. Anutunön kukösum wanjiiga tata Suep garata aka Suepkö bem suahö könanji könanji ösum-mumuñinan neñgek galöm aka kuñgum neñgimakzei, mi tok galöm köl engiiga keunji bapñe malje. Mewö.

4

Mönö letota malmal qainji kun malme.

¹ Kraistnön silenje sihimbölö mörök. Miangöra inñi mewöyök silenje sihimbölö mötpingö jöjöröba malme. Yambuk mötmöt mohot kewö memba mötmörime: Kunön singisöndok ahakzawi, yanjön mönö nanñi silenangö sihimñangöra ak wanjimakza. Kunön Kraistköra aka sihimbölö mörakzawi, yanjögö sihim kömbönanji bölöñan mönö söroräuba eri singisöndok tököba qahö akñangö kapan köla malma. Urumötmöt mianjön mönö wötñini mem engiiga miangören tondangöba aködamunñinambuk aka malme.

² Urumötmöt miangören tondangöba kinda uru silegö sihim kömbönanji bölöñi jöhöba galöm köla malme. Nalö kewöñeyök könahiba gölmenön toroqeba mal öngömei, miangören mönö Anutugö jit sihitñi tem köla wuatangöba malme.

³ Inñi nalö mala kotkeri, miangören angöjörak ambazip uruñini qahö melennda ahakmeme bölöñi lan akingö mötzei, mönö yengö dop kewö lan malget: Serowilin aka sihim kömbönanjini bölöñi lan wuatangöba malget. O jawat, gojak daun yuai mi otoñomboran memba kanjam köla negetka nöropñini sohoi enololon malget. Közölömbuan ala linet unduba ambi kenam mem bölim engiba kezapjupjup aket. Tandö lopion liliköba simin köl engiba yuai kanjamñambuk aket. Mewö aketmö, nalö kewöñe ahakmeme mewöñi mi qahö toroqeba ahakze.

⁴ Angöjörak ambazipnön söñaup malmalgö sömuk pilin-pilingöba ahözawi, miangören öröba luhuba gemakze. Inñi yembuk kude öröba gegetka eka auruba uruqeqe keu töhören jim engimakze.

* 3:20: Jen 6.1-7.24

⁵ Mewö ahakzemö, Anutugö jeje angotketka qesim enjiiga kónañamñini aukne indela jim asarigetka möndömöndöñini kesalma. Anutunöñ ambazip maljini aka kömükömuñi mönö körek neñgö keunini kewöta jim tekömamgö jöjöröza.

⁶ Sileninan kömumba keuninan miangören qahö teköma. Miangöra Ölöwak Buña mi kömupkö senjom mire maljei, mienön mewöyök mötmegöra Kem-bunöñ mutuk jim asariyök. Mi kewögöra: Anutunöñ ahakmemenñini kewöta ambazip tosatñi neñgö dowä jim teköm enjiiga silebuk malgerañgö likepñi miwikñaimemö, tosatñan urunñini melenña uñañinan guliba malmal köhöikñangö buñaya aket. Anutunöñ nanñak mal köhöimakzawi, miangö dop körekñan malmal köhöikñi mal öngömegöra möt köhöimakza. Tosatñan Buña keu mi urunñini kuñgum enjimegöra jiget. Mewö.

Nup memegö mötmöt kalemñi mönö galöm köla malme.

⁷ Yuai pakpakö nalöñan mönö tekömamgö dopdowiza. Miangöra inñini köuluköbingöra mönö ikmaok kude malmemö, nanñini ahakmemenñini galöm köl anguba zeñ kinda köuluk nup memba malme.

⁸* Buña Kimbigö keu kun kewö ahöza, “Ambazip uruninan jöpaköm enjiba siñgisöndokñini sehisehñi kölaleiba gamuñini turumakzin.” Miangöra alaurup sutñine mönö törörök jöpaköm anguba malme.

⁹ Inñini mönö alaurupñini köl öröba miriñine köisirik tata urunñinan jimongot ihururukñi qahö köyan köl anguba malme.

¹⁰ Anutunöñ kalem möriam kónañi kónañi miangö Tonji akza. Yanön nup memegö mötmöt kalem murutñi murutñi menden enjii malje. Inñini mohot mohot mönö mötmöt kalemñini ölöpñanök galöm köla miangön kónagesöurupñini welen qem enjiba malme. Mi buña qem angugerañgö dop nupnöñ ala kambu sutñine bauköm anguba malme.

¹¹ Nup memegö mötmöt kalem yahöt mi kewö: Denike yeñön Buña keu jim asarimakzei, yeñön mi mönö Anutunöñ sölölohöm enjimakzawañgö dop jiba malme. Denike yeñön alaurup welennñini qeba nanñöm enjimakzei, yeñön mönö Anutunöñ inahöba ösum enjimakzawañgö dop alabauk ak enjiba malme. Jisös Kraistkö buña akzeañgöra yuai pakpak miangören mönö Anutu möpöseigetka qetbuñañan aködamunñambuk aka ahöma. Yanön asakmararañ Tonji aka kukösum Tonji mi nalöñi nalöñi mala kota malja aka teteköñi qahö mal öngöma. Keu mi ölna.

Kraistpuk kinda sihimbölö möta malme.

¹² O wölböt alaurupni, sihimbölö qakñine öngöi mötketka könöpñan enghohotiriba esapköm enjimakzawi, miangöra mönö kude auruba malme. Yuai asuhum enjimakzawi, mi upnina, mewö mötmöribepuk. Mi gölmenöñ maljinañgö dop asuhumakza.

¹³ Kude aurumemö, Kraistnöñ ölöpñi aiga kahasililñ ak wañgigetka möröhi, inñini mönö sihimbölö miangö kitipñi mötzeañgö dop sösongai aka malme. Yambuk mewö malgetka lilingöba kaiga asakmararañan asuhuiga nalö miangören mewöyök söngaiba oyaenñkoyaen akne.

¹⁴ Ambazipnöñ engeka urunñini Kraistkören melengerañgöra aka uruqege keu töhören jim enji-makze ewö, enñön mönö simbawon akze. Mewö jim enjimakze-añgöra aka Anutugö Uña Töröñi asakmararañambuk yanön mönö qakñine köla ösumñan turum enjiba kötuetköm enjimakza.

¹⁵ Enjörenök kunñan yuai bölöñi ahöhañgöra sihimbölö miwikñaiba mötpapuk. Kunöñ kegwek-kahasililñ aka ambazip enjuba yuai yongorö

* 4:8: Qam 10.12

meyöhi me tosatji yengöreñ keu jim supapköba nup meme tandöktandök möndöba lañ lilikqilik aka lömböt miwikñaimakzawi, yañön mönö sihimbölöñi dopñe mötza.

¹⁶ Kunñan Kraistkö alañi akzawañgöra añgösirip miwikñaiba sihimbölö mötza ewö, yañön mönö miangö gamumamusumñi kun öne kude mötma. Gamu qahöpmö, Kraistkö qetñi bisizawañgöra mönö Anutu möpöseiba malma.

¹⁷ Anutunöñ ambazip keunini kewötmapkö nalöñan kam kuñguiga nanñi urumelen könagesöurupñi neñgö keunini mi mutuk jim teköma. Mutuk neñgö keunini jim teköma ewö, ambazip Anutugö Ölöwök Buña qahö tem kölgetka lömböt qakñine öñgöiga teteköñe mönö denöwö asuhum engebawakto?

¹⁸ *Buña Kimbinöñ keu kun kewö ahöza: “Solañi yañön Suep mire öñgöbingö kupuk-kapak akñe ewö, siñgisöndok ambazip añgöjörakñinambuk yengö keuñi mönö denöwö asuhubawakto?”

¹⁹ Miangöra alaurup Anutugö jitñi tem köla añgösirip miwikñaiba sihimbölö mörakzei, eñön mönö uñañini miwimiwikñai Tonangö böröñe alme. Tonñi yañön keu jiyöhañgö dop alaurupñi sel jöhöba kölközizip aka köyan köl enjimakza. Uñañini yañgö böröñe ala mönö jegep kinda nup ölöpñi ölöpñi pöndañ memba malme. Mewö.

5

Jitñememe eñgöreñ qambañ keu

¹ Nöñön urumelen könagesögö jitñememe kun aka Kraistnöñ sihimbölö möröhi, miangö keuñi nañgöba jimakzal. Könañgep lilingöba kaiga asakmararañan asuhuiga qetbuña ningii miwik-ñaimamgö mötzal. Eñgö sutñine nöngö jitñememe alaurupni akzei, nöñön eñgö uruñini kewö kuñgum eñgizal:

² *Anutunöñ möt narim engebiba lama kambuñi böröñine alöhi, eñön mönö i köyan köl engebiba malme. Nup mi ölan qakñe qahöpmö, Anutugö jitñangö dop urusihimñini nupnöñ ala mi amqeba urukönöp qakñe zen memba kinme. Möndömöndö qakñe injarere mala moneñ yuaigöra kude kapan kölma malme.

³ Lama kambu bapñine kaba kinjei, i mönö azi kembu tandök kude galöm köl eñgime. “Zioz galöm akzin,” jiba töptöpñine kude qeba miwidimgöm añgumemö, ahakmemegö silik ölöpñi mi lama kambu kondel engebiba malme.

⁴ Ahakmeme ölöpñi aka malgetka lama galöm bohonñan kunbuk asuhumawi, nalö miangöreñ mönö sorom jölñine uta ila jalö aködamunñambuk nöropñine köl eñgigetka buña qem añgume. Aködamun mianñön mönö nalö kunöñ qahö tahöliba piahima. Mewö.

Sepguli eñgöreñ qambañ keu

⁵ *Sepguli inñi mewöyök galömurup yengö keuñini bapñe anda malme. “Anutunöñ söñgöröqök ambazip tuarenjoñ ak eñgimak-zapmö, nanñini memba et al añgumakzei, yengöra mönö kalem möriamñi eñgimakza.” Miangöra inñi mönö körekmakörek sutñine nanñini memba et al añguba malme. Tandök mianñön mönö maluku ewö kölget gem enjiiga malme.

⁶ *Miangöra mönö nanñini memba et al añguba Anutu böröñi kukösumñambuk miangö bapñe angetka nalöñan kam kuñguiga ölöp memba öñgöba al eñgima.

⁷ Buña keu kun kewö ahöza, “Yañön inñi köyan köl eñgimakzawañgöra waimanjatñini pakpak mönö yañgö böröñe ala mosötme.”

* 4:18: Qam 11.31 * 5:2: Jon 21.15-17 * 5:5: Qam 3.34 * 5:6: Mat 23.12; Luk 14.11; 18.14

⁸ Ahakmemeñini galöm köl aᅅguba zeᅅ kinde pöndaᅅ uru guliguli malme. Bölöᅅaᅅgö Toᅅaᅅ laᅅ liliköba ambazip tuareᅅoᅅ aka jarum neᅅgimakza. Kunᅅaᅅ sipkömturuk aiga yaᅅöᅅ mönö laion sömbup ewö gwahöt neᅅgimamgö jöjöroza. (Laionöᅅ görörök qeriga silatᅅi mötketka böᅅᅅini wahörakza.)

⁹ Iᅅini sihimbölö mörakzei, eᅅgö urumeleᅅ alaurupᅅinan mönö mewöᅅaᅅöᅅ gölme dop kahasililiᅅ miyöhök möta mökösoᅅᅅda malje. Mi mötmöriba keᅅgötᅅini yaköriba mötnariᅅnöᅅ töᅅdangöba kinde laion mi köhöikᅅaᅅöᅅ tuareᅅoᅅ ak waᅅgiba malme.

¹⁰ Iᅅini nalö töroᅅᅅi sihimbölö möta malgetka mösoᅅhöba naᅅgöᅅ eᅅgiba töᅅgum eᅅgiiga ölop kin köhöiba malme. Mewö Kraistpuk kingetkun aködamunᅅi tököᅅ eᅅgiiga asakmararaᅅe öᅅgöba teteköᅅi qahö asariba malme. Anutu, kalem möriam pakpakö Toᅅi akzawaᅅöᅅ mönö iᅅini mewö aka malmegöra eᅅgoholök.

¹¹ Yaᅅöᅅ kukösum Toᅅi mala kota malja aka nalö teteköᅅi qahö mal öᅅgöba malma. Keu mi öᅅᅅa.

Pitöᅅöᅅ yaizökzök keu teteköᅅi jiyök.

¹² *Anutugö kalem möriamᅅaᅅ mönö ak kömukömu öᅅ töhöᅅᅅi akza. Nöᅅöᅅ keu mi köhöiba naᅅgöba jiba eᅅöᅅ kalem möriam miangöreᅅ töᅅguba kin köhöiba malmegöra jim kutum eᅅgizal. Miangöra kimbi töroᅅᅅi ki jibiga neᅅakni Sailasᅅöᅅ ohom eᅅgiyök. Yaᅅöᅅ nömbuk pöndaᅅ kinde urumeleᅅ neᅅakni akza. Yaᅅgöra mewö mötmörizal.

¹³ *Anutunöᅅ urumeleᅅ köᅅagesö iᅅini ewö nanᅅaᅅgöra möwölöhöm eᅅgiiga Babilon siti bölöᅅi miangöreᅅ* maljei, miᅅöᅅ mönö yaizökzökᅅini algetka eᅅgöreᅅ kaza. Mötnariᅅkö nahöᅅi Mak yaᅅöᅅ mewöyök yaizökzökᅅi alja.

¹⁴ Iᅅini sutᅅine urukalem-ᅅinaᅅgö waikᅅini memba aᅅgum aᅅguba nemböᅅini susuᅅuba malme.†

Alaurup Kraistpuk qekötahöba kinjei, luainöᅅ mönö körek embuk ahöma. Mewö.

* **5:12:** Apo 15.22, 40 * **5:13:** Apo 12.12, 25; 13.13; 15.37-39; Kol 4.10; Flm 24 * **5:13:** Babilon mi Rom sitigö qet tölapᅅa. Indelindel buknöᅅ mewöᅅaᅅöᅅ qet mi miangö dop ohoget ahöza. † **5:14:** Nalö miangöreᅅ jölöᅅini jiba waikᅅini memba numbuᅅini yöhötüm namba malgeri, mönö miangöra jiza.

Pitögöreñ Kimbi 2

Pitönöñ Kimbiñi aliga 2 ahök.

Jim-asa-asari

Pitönöñ Kimbi ki Kraistkö alaurup gölme dop tat angeri, yengöra ali anda liliköyök. Tosatñan keu sohoboho miwikñaiba ambazip kusum sohom engigerangöra malmal sarakñi mosöta sero namböñnamböñ yuai lañ aka malget. Böhi takapulakanji mi Anutugö keu bapñe qahö anda (2.10) iwilele (3.17) aka sileñini möpöseiba (2.18) jakbak-örañbörañ (2.10) aka nanñini imbi-imbi malget. Aiakaninan Jisös qañ köl wangiget. Yeñön ilit ambazip gödaqegeñini qahö mala anjanbanjan ambazip (2.3) lölöwöröñi (2.18)janjuñ mem engiget. (3.3-4)

Pitönöñ keu aka ahakmeme mianğöra waimanjat ketanji möta diñgimapköra bim qeba amötqegegö könani jim tuariza. Uruñini kunguba jimkutukutuñi kewö ohoyök, “Anutu aka Kembu Jisös Kraist öñña möt narim etkiba yetpuk qekötahöinga lömböt mi mem et ali amqema. Mötmöt mewöñi mi jimbureñ qahöpmö, ambazip nanñini jeñinan Jisös eka ambazip kusum engiba malöhi, mi möta jiget kaiga mörin. Mianğöra mönö malmal sarakñi mala kopa malmal aka uruyahöt mi andö qeme.”

Tosatñan kapan köla kewö lañ jiba ambazip kusum sohom engiba malget, “Kraistnöñ kunbuk qahö lilingöma.” Keu mi jimbureñ keuya. Pitönöñ keu mianğöra waimanjat ketanji möta likepñi kewö melenđa jiba ohoyök, “Kraistnöñ nalöñi könjörari öngöiga lilingömawangö tandök akzawi, mi kewögöra: Anutunöñ ambazip nengörejök kunñan ayuhumapkö qahö mötzapmö, körek neñön urunini melenđa siñgisöndok malmalnini mosötpingö möta kapan kölakza.”

Buk kianğö bahöñi bohonñi 4 mi kewö:

Keu mutukñi 1.1-2

Anutunöñ sarakñi malbingöra nengoholök 1.3-21

Böhi takapulakanji yengö könani 2.1-22

Teteköñe Kraistnöñ lilingöba kama 3.1-18

¹ Saimon Pitö nöñön embuk keu eraum mötpingöra kimbi ki ohozal.

Jisös Kraistnöñ melaim ningiiga aposol aka welenni qeba malakzal. Bem Anutuninan Amötqege Tonji Jisös Kraist melaiiga eri yangöra aka keunini jim teköi solaniinga mötnaripninan ahuyök. Inini mötnarip miyök buña qem angugetka bohonñi öngöñgöñi aiga nini ewö simbawon malje.

² Inini Anutu aka Kembunini Jisös möt kutum etkizei, yetkön mönö kalem möriamñi keleñmaleleñ engiyohotka luainöñ malme. Mewö.

Anutunöñ engoholöhi, mianğöreñ köhöiba kinme.

³ Anutunöñ asakmararañ Tonji aködamunñambuk akza. Mianğö dop nini sarakñi aka malbingöra nengoholök. Mewö könani möt yaköinga kalem nengimakzawangö könani asuhuyök. Nini malmal köhöikñi mala urugö köl guliguli pitirik akingöra yuai osimakini, yangö bem ösumñan mönö mi pakpak nengiiga buñanina ahakña.

⁴ Asakmararañ Tonji yanön urunine nupñi nupñi wewelip-ñambuk memba kalemñi pakpak nengimangö mörakza. Anutunöñ jöhöjöhö keuñi nengiyöhi, mianğö söñgöronan mönö öngöñgöñi akza. Inini mutuk gölmegö sihim kömbönanini bölöñi lañ wuatangöba angöjörak uruñe malgetmö, Anutunöñ

inini miangö-reñök meköba bohonñini jöhöyök. Mewö aiga kopa mal-mal söröreiba andö qemegöra amötqeçe areñi ali ahöza. Mötmöt ahak-meme aködamunñambuk Anutugöreñ ahözawi, yañön inini miangö dop letota kölönaimegöra kapan kölakza. Inini jöhöjöhö keuñi keta bölökñi miangöreñ qekötahöze ewö, yañön mönö inahöm engiiga kunbuk letota Suepkö aködamunñi miwikñaiba buña qem añguba malme. Aködamunñi mi-añön ölop tönjonjongöba dop köl engima.

⁵ Anutugöreñ jöhöjöhö keu mewö ahözawañgöra aka inini mönö mötnaripkö ölni ahum engiiga kondela malme. Mewö malmegöra mönö kapan köla zen kinda bim qeba malme. Ölni ahum engimawi, mewö ölop Anutugö könani toroqeba möt kutume.

⁶ Mötkutukutuñinan qariiga ölop ahakmemeñini toroqeba galöm köl añgumakñe. Galöm köl añañañuñinan qariiga ölop kin köhöiba lömböt mökösoñda bisiba malme. Kin köhököhöiñinan qariiga ölop kunbuk Anutugö jitañgö dop urugö köl guliguli aka malme.

⁷ Urugö köl guliguliñinan ahum qariiga ölop urukalemñinan sehiiga urumelen alaurup ala-ala aka köyan köl añaña malme. Urukalemñinan sehiiga ölop ambazip pakpak jöpaköm engiba malme.

⁸ Inini Anutugö aködamun mewöñi buña qem añaña mem sehiba malme ewö, mönö gilipitñi (ambetakñi) kude malme. Mewö qahöpmö, aködamunñi mi-añön mönö nam köl engiiga amqeba Kembunini Jisös Kraistkö könani möt kutuba ölop nupñi jegep kinda megetka ölni ahumakña.

⁹ Ölop ahumakña pmö, denike yengöreñ Anutugö aködamun mewöñi qahö ahöm engiza ewö, yengö mötkutukutuñinan mönö töröpñi aiga bau jegömöl ewö kiñkuñ kankuñ akze. Anutunöñ siñgisöndokñini walñi sañañoñi sarakñi akeri, mi ölum engui ikmaok malje.

¹⁰ O urumelen alaurupni, Anutunöñ möwölöhöm engiba engoholöhi, inini miangöreñ tim töndangöba kinme ewö, mönö nalö kunöñ qahö tala kaman kölme. Miangöra enön mönö miangöreñ köhöikñañök töndangöba kinbingö kapan köla malme.

¹¹ Mewö aka malgetka Anutunöñ engehi dop köli köl öröm engiiga Suep miri nañañañ lökñañök taliga ölopñañök uruñe öngöme. Kembunini Jisös Kraistnöñ Amötqeçe aka bemtohoñ Toñi akza. Yañgö bemtohoñ uruñe öngögetka nalö teteköñi qahö galöm köl engiiga oyaenköyaen aka malme.

¹² Buña keu ölnan köna mewö kondel engizawi, inini mi lök buña qem añaña miangöreñ böñ qeba kin köhöize. Miangöra keu areñ jizali, mi ölop möt asarizemö, nöñön töndup miangöra nalö dop jim gulim engimangö mötzal.

¹³ Mewö möta sile kiangö sepö koumñi malmamañgö dop keu areñ mi ölum engubapuköra mötmötñini jim guliba kuñgum engimangö mötpi dop kölja.

¹⁴ Nöñön sileni kusukñi ki sepö koumni ewö luluñda zilañ kömumba uñem mire öngömami, mewö möt yaközal. Kembunini Jisös Kraistnöñ mewöyök buzup keu mewöñañök jii möral.

¹⁵ Keu areñ kusum engiali, mi-añön urukönömñine ahöiga nöñön nöñ qeba kömup mire anbiga miangö andöñe mewöyök mi ölop nalö dop mötmöriba malme. Nöñön miangöra köhöiba kapan kölakzal. Mewö.

Kraistkö asakmararañi mi jeninan eka nañgöba jizin.

¹⁶ Kembunini Jisös Kraistnöñ qetbuñañi öngöñgöñi memba nup kukösumñambuk memba malöhi, neñön mi nanine jeninan uba eka malin. Mewö mala miangö dop kukösumñañgö könani aka lilingöba kamawañgö

keuñi mi jim asarim engiba malin. Mi bem samban kösohot* ewö qahö jimburen ahin. Girabu mötmöt ewö mi lañ qahö wuatangöba malin.

17 *Nöñön Jisösgö qetbuñañi öngöngöñi mi naninak kewö asuhuiga ehin: Asakmararañ Tonñi öngöngöñi yañön keu jiiga qet kewö asuhuiga mörök: “Azi ki nani wölböt nahöni aiga yañgöra urunan ölöwahiga eknahöm ak wañgizal.” Yañön mi möriga Iwi Anutunöñ asakmararañ wañgiiga aködamunñi buña qem añguba malök.

18 Neñön yambuk kundunñi töröñi mianğöreñ öngöba malinga qet mianğön Suepnöhök asuhuiga mörin.

19 Kezapqetok ambazip mutuhök Buña keu jiba ohogeri, mi nalö kewöñe möt sölöngöba añğön kölinga pöwöwöm köhöikñi ak neñgiza. Mianğöra Buña Kimbi walñañgö keuñi mi mönö törörök kezap ala buña qem añguba malme. Kiwanöñ miri söñsöñaunje asarimakzawi, kezapqetok keu mienğön mönö mianğö dop jim asarim engimakze. Inini mianğö asakñe qekötahöba kinme ewö, mönö ölop Anutugö köna ölni eka söñaupkö ahakmemeñi yaköriba mosöta malme. Mewö mal öngöba mambötketka miri wañgarañ suruiga söñangö undinñi asuhuiga uruninan asarima. Kembuninan lilingöba kamawañgö undinan mönö mem asarim engii eka Anutugö yuai pakpak ek asarim teköme.

20 Keu nöropñi mutukñi ki mönö möt asarigetka kude ölum enguma: Gölme ambazip kunñan Buña Kimbigö kezapqetok keuñi mi nanñi mötmöt qakñe jim asarimangö osimakña.

21 Mi kewögöra osimakña: Gölme ambazip kungö jit sihitñan nalö kunöñ qahö nam köliga kezapqetok keu asuhui jiget. Mewö qahöpmö, Uña Töröñan kezapqetok ambazip urunine sölölohöm engiiga Anutugö jitneyök keu memba mönö mia jiget. Mewö.

2

Böhi takapulakanan mönö mala ayuhume.

1 Kezapqetok ambazip takapulakanñi mi mewöyök Israel könagesö sutñine asuhuget. Mianğö dop engö sutñine böhi sohoboho mewöyök asuhume. Asuhuba kinda mötnaripñini ayuhumapkö enjololon keu kemañi kemañi mi tölapköba memba sutñine kame. Ketañamninan sohopñini meyöhi, Kembu mi mewöyök qañ köl wañgiba mewö mianğön nanñini könden añguba wölañ ayuhume.

2 Mewömö, mi töndup ambazip sehisehiñan mönö yengöreñ serowilin silikñini wuatangöba nanñini imbi-imbi malme. Mewö malmeañgöra ambazip mötmötñini qötömötötañ aketka urumelenğö köna ölnan mötmötñine gamuñambuk ahakña.

3 Böhi takapulakanñi mienğön mönö yuai membagan membingö köpösöngöba nepaqepalok aka kösohot könañi könañi jimburen (zöm mindiriwa) aka lañ jim sehiba malme. Mewö malgetka enğön mi möta amqeba monen yuai tokogetka lañ örömgöjup memgöjup aka malme. Anutunöñ ambazip mewöñi yengö keuñini lök möpñañgö möpñe jim teköiga likepñi melenñiga qakñine öngömapkö ahöza. Anutunöñ köndenmönden engimangö tañqañ ikmaok qahö akñapmö, öl töhönña sihimbölo möta malme.

4 Köndenmönden asuhumapkö galöm meme keu tosatñi kewö: Suep garata tosatñan Anutugö jitñi qetala siñgisöndok akeri, Anutunöñ i qahö

* **1:16:** Bem samban mienğö könañini kun mi kewö: Mötmöt ambazip yengö urunine jimburen mötmöt letoriga keu könañi könañi lañ mötmöriba numbu o algetka asuhumakze. * **1:17:** Mat 17.1-5; Mak 9.2-7; Luk 9.28-35

engehoriyökmö, aköm enjiiga könöp mire emuyangören geget. Yaköriba panaman miri dutje ala ain tapepnöŋ (muŋgamuŋga) gwaröhöm enjiyök. Gwaröhöba galöm köl enjiiga keuŋinaŋgö kitipŋi jim tekömapkö mamböt tatkerata tata kotze.

⁵ *Möpnaŋgö möpŋe ambazip aŋgöjörakŋinambuk gölmenöŋ malgeri, Anutunöŋ i mewöyök qahö engehoriyökmö, göulu ketanŋi jiiga wahöta enguba turum enjiyök. Turum enjiyökmö, töndup azi Noa mianön urumelenŋö keu jiba ahakmeme diŋdiŋi akŋegö uru kuŋgum engiba malöhi, i aka ambazip 7 mia malmalŋini aŋgön köla sel jöhöm enjiyök.

⁶ *Mewöyök Sodom Gomora taon yahöt mi ayuhumahotkö keuŋini jim teköba könöpnöŋ engohoiga gapŋiranök ahöyohot. Ambazip aŋgöjörakŋinambuk yeŋgöra yuai denöwö asuhumawi, mianŋö söpsöpŋi ekingöra mi al enjii akzahot.

⁷ *Könöpnöŋ körek engohomangö ahökmö, töndup azi solanŋi Lot mi mutuk sutŋineyök meköba aŋgön köl waŋgiyök. Iwilele ambazip sero namböŋnamböŋ aka nanŋini imbi-imbi ahakmeme tosatŋi laŋ aket eka yeŋgöra möt böliba uruŋan eri malök.

⁸ Azi solanŋi mianön yeŋgö sutŋine mala ahakmeme iwilele kanjamŋambuk eka möta malöhi, mianŋöra mönö wehön dop möt jinjingöba malök. Uruŋi sarakŋan mönö sundan böliiga malök.

⁹ Galöm meme keu jizali, mienön Anutugö könaŋi kewö kondelakze: Kembunöŋ ambazip Anutugö malmal köhöikŋi köl gulimakzini, nini ölop esape-sapnöhök meköba bohonini jöhömangö mörakza. Mi mörakzapmö, ambazip gongonŋi mi keuŋinaŋgö likepŋi melenŋi qakŋine öngöiga garatauruŋan galöm köl engigetka malme. Mewö mala öngögetka nalö ketanŋan kaiga keuŋini jim teköiga toroqeba sihimbölo möta malme.

¹⁰ Ambazip sileninaŋgö sihim kömbönaŋi bölöŋi wuatangöba aŋgöjörakŋinambuk aka iwilelenöŋ Anutugö kukösumŋi memba et alakzei, Anutunöŋ mi mönö mutuhök jim teköm enjiyöhawa sihimbölo ketanŋi möta malme. Böhi takapulakaŋi mienön mönö jakbak-oraŋböraŋ qakŋe nanŋini imbi-imbi mala Suepkö bem suahö asakmararaŋinambuk euyangören maljei, yeŋgöra sömbu-ŋini qahö mörakze. Mi qahöpmahöpmö, i mewöyök uruqeŋe keu töhöreŋ jim engimakze.

¹¹ Mewö ahakzemö, Suep garata kukö-sumŋinambuk böhi sohoboho mi engongita öngöngöŋi akzei, mi töndup Suepkö bem suahö ambazip mi Kembugö je mesoholŋe qetala uruqeŋe keunöŋ töhöreŋ qahö jim teköm engimakze.

¹² Garata yeŋön mewö qahö ahakzemö, ambazip mienön silenini memba öngöba Buŋa keu qahö möt kutuba mi töndup yeŋgöra uruqeŋe keu töhöreŋ laŋ jimakze. Sömbup soŋ ewö mötkutukutuŋini ölni qahö asuhuiga sömbup malmalgö sihim yuai korembiŋi miyök mörakze. Sömbup soŋ mi asuhugera ambazipnöŋ laŋ enguget kömumakzei, yeŋön mönö mianŋö dop laŋlaŋ tönpin mala ayuhume. Nanŋini sihim mötmötŋini gongonmaŋgonan mönö köndenŋi engigetka ayuhum teköme.

¹³ Tosatŋi öröm ureim ak engigetka kahasililŋi mötketmö, Anutunöŋ nanŋini keuŋinaŋgö likepŋi melenŋi enjiiga sihimbölo miyök qakŋine öngöma. Urumelenŋi enön urukalem kondel aŋgubingöra tokoba lömbuaŋ algetka takapulaka böhi mienön mönö mianŋöreŋ mewöyök kamakze. Kaba dogonŋini aukŋe kondela bau numbu nemakze. Mewö aka engö sile töwötŋini boromŋi boromŋi gamuŋinambuk ewö akze. Nanŋinak sileninaŋgö sihimŋi meköbingöra totoko yuai asakŋe ala sero aukŋe aka laŋlaŋ söngaimakze.

* 2:5: Jen 6.1-7.24 * 2:6: Jen 19.24 * 2:7: Jen 19.1-16

“Ziozgö lama galöm akzin,” jiba ala engöra qahö mötmöriba tilipköm engibingö sösöngai mörakze.*

¹⁴ Jenini kaisero jeje aka ambi engehakzei, mi serowilinök akingöra mörakze. Sero siŋgisöndok yuai akingö sihimni mi qahöpmahöp mosötpingö mörakze. Ambazip koŋgwarak kölakzei, mi öröm engigetka köna jitje gegetka örömböknöŋ jölŋini mesinmakza. Membagun membingö nepaqepalok köpösöngögetka urumötmötŋini köhöikni miangöreŋ ahöza. Mewö ahakzeangöra Anutunöŋ saitköm engiiga ayuhume.

¹⁵ *Yeŋön köna diŋdiŋi andö qeba kahalalom janjuŋ anda kezapqetok azi Balam Beorgö nahönŋi yangö urukönöp köna wuatangömakze. Kerök azi kembu kunöŋ Balam Israel ambazip tilipqilip ak engimapköra töwa wanŋiyöhi, urusihimŋan mönö moneŋ miangöra ak wanŋiyök.

¹⁶ Ak wanŋiyökmö, doŋki kunöŋ bölönamŋangöra jim bölim wanŋiyök. Doŋki sömbup keu qahö jijiŋi mianön mönö azi jölnöŋ keu jiba kezapqetok azi miangö urusohop ahakmeme mi jöhöm wanŋiiga osiyök.

¹⁷ Ambazip mienön mönö o jeŋi jöpjöpköŋi ewö tandök malje. Raidimbom luhutnöŋ kousu omaŋi töhöntöhön muwutapköm engimakzawi, mönö miangö dop öne laŋlaŋ anda kamakze. Anutunöŋ pandaman göjiwinaŋgö uruŋe yeŋgöra miri arengöm enŋiyöhi, mönö emuyanŋöreŋ dutje geba malme.

¹⁸ Yeŋön kezapjupjup keu omaŋi jiba silenini memba öngöba laŋ tiwok-mawok aka tereŋgömakze. Silegö sihim kömbönaŋini bölöŋi wuatangöba sero namböŋnamböŋnöŋ ambazip laŋ öröm engimakze. Janjuŋ maljei, tosatŋan yeŋgö sutŋineyök ölöŋ kölakzei, mönö mi kelök keunöŋ kuŋgum engigetka köna jitje gegetka örömböknöŋ jölŋini mesinmakza.

¹⁹ Yuai kunöŋ ambazip kun jöhöba galöm köl wanŋimakzawi, miangö kösöŋan mönö i jöhöiga mi töwa qahö öne welen qeba malja. Miangö dop böhi takapulakaŋi mienön kelök keu kewö laŋ jimakze, “Inini mönö nini toroqem neŋgigetka ölop kösöŋini qahö solanŋi aka nanŋini imbi-imbinöŋ malme.” Keu mewö jimakzemö, mi töndup nanŋinak aŋgöjörakŋinaŋgö welenqeqeŋi aka miangö kösönöŋ malje.

²⁰ Yeŋgö könaŋamŋinan kewö goŋgiiga malje: Kembunini Jisös Kraist Amötqeqe Tonini i möt kutuba mewö mianön gölmegö ahakmeme aŋgöjörakŋambuk misinŋöba andö qebagun mönö kunbuk miangö kösönöŋ köpeim aŋguba qaköba tatze. Miangöra könakönahiŋe ölopölöp malgetmö, teteköŋe böliqölim teköba malje.

²¹ Anutunöŋ keunini jim teköi solanibingö könaŋi mutuk qahö möt kutuba tönpin malbeak, mianön mönö eretŋi ak engibawak. Mewö akawakmö, Buŋa mi ölna jigetka möta könaŋi möt kutugetka buŋaŋina ahök. Uruŋini melenŋa miangö andöŋe jöjöpäŋ keu töröŋi andö qegeri, mianön mönö yuai kanjamŋambuk aka gamu qem engimakza.

²² *Andö qeba köpeim aŋguba etkeri, mi uruqesiŋ keu ölbölŋi yahöt mietkö dop akza. Keu jitŋi kun kewö, “Kiamnöŋ loŋnöhaŋgöreŋ lilingöba kamakza.” Keu jitŋi kun kewö, “Bau saŋgoŋninga dumge elenŋa sömuk pilinŋpilinöŋ luhuba geba lömu aumakza.” Mewö.

3

Kembu kamawanŋö jöhöjöhö keuŋi

* **2:13:** Böhi mienön törom ewö asamböta tatzemö, wanŋenŋan yeŋgöreŋ qaköba jömgöbapuk. * **2:15:** Jan 22.4-35 * **2:22:** Qam 26.11

1 O wölböt alaurupni, nöñon kimbi yahötñi ki albi engörej kaza. Keu jizali, inini mi lök mötzemö, nöñon keugö ölni ahumapköra uruñini sarakñi kuñguba jim gulim engiba kimbi yahöt ki kewögöra ohozal:

2 Kezapqetok ambazip sarakñi yeñon mönöwök Buña keu jiba malgeri, miangöra mönö ölum engubapuk. Mewöyök Kembu Amötqeqe Tonjan jimkututu neñgiiga nanñini melaimelai azi aposolurupñinan kusum engigeri, mönö mi mötmöriba köl guliba malme. Miangöra nöñon keu miyöhök ohobiga yahöt akña.

3 *Keu mutukñi kun kewö möt asarime: Kraistnöñ lilingömangö aiga nalö teteköñe miangörej mepaqepaik ambazip asuhuba ahakmemenñinan nanñini sihim kömbönanñini bölöñi wuatangöba ilit keu jiba malme.

4 Tosatñan lilingöba kamawangö keuñi kewö jiba qeapköba malme: “Kamawangö jöhöjöhö keuñi mi mönö denikeangörej ahöza? Amböskoninan mala kota kömugeri, nalö miangörejök yuai kuññan kun qahö meleni geyök. Anutunöñ Suep gölme miwikñaim etkiiga öroyuai pakpak könahiba ahöyöhi, mi mönö mewöñanök ahöba kori maljin.”

5 *Mewö jiba keu kötni ki ölan qemakze: Anutunöñ möpñangö möpñeyök jim kutuba keuñangö ösumñan suep jakeni jakeni miwikñaim engiyök. Mewöyök o jim kutum engiiga denja angetka mianön gölme miwikñaiiga onöhök asuhum tiñgirök. Yeñon keu kötni mi mötzemö, mi qahö mötzin tandök möndöba lan jiba nöñöñgan ahakze.

6 *Köñangep jim kutuiga o gölunöñ wahöta gölme turuiga ambazip nalö miangörej gölmenöñ malgeri, mi o nempa kömumjaiget.

7 Yeñon onöñ kömumjaigetmö, suep gölme nalö kewöñe etkehakzini, mi köñöpnöñ ayuhumawangö dop akza. Anutunöñ miangö keuñi lök böñtöñ jim kutuiga ahöza. Miangö ölni asuhumawangö nalöñan kam kuñguiga Anutunöñ ambazip angöjörakñinambuk maljei, yeñgö keuñini jim teköba köñdenj engiiga ayuhume.

8 *Mewö asuhumapmö, wölböt alaurupni, naninak ehinga yambu 1000 mi nalö köröpnj akzapmö, Buña keu mohot ki mönö kude ölum enguma, “Wehön mohot mi Kembugö je mesoholje yambu 1000:gö dop akza aiga yambu 1000 ehiga wehön mohotkö dop akza.”

9 Kembugö jöhöjöhö keu mianön ölnambuk akñapmö, miangö nalöñi mi törörök qahö mötzin. Tosatñan nalö mi köñjörari öngömapköra mötmöriba lan jimakze. Nanñak nalöñi qahö köñjörari öngömapmö, mökösoñda ambazip körekñan urunini melenbingöra mambörakza. Kunñan köñöp sianöñ gebapuköra kapañ kölakza.

10 *Keuñangö ölni asuhumapmö, Kembugö kaka nalöñan mönö yongorö meme azigö tandök kam kuñguma. Mi ouk-tuknine tiiga osibin. Nalö miangörej suep gölmegö yuai ehekñi pakpak mi mönö köñöwiba jeba gapñanök ahöma. Wehön köñ senjelau aka suepkö yuaiñi pakpak mi julkula ötöñ bölöbölöñambuk ayapköba qahöwakñe. Gölme aka ambazipnöñ yuai pakpak miangörej memba alget ahözawi, Anutunöñ mi körek köñdenmöñdenja meleni gema. Geba jem teköiga yuai kun qahöpmahöp ahöma. Saumbañ!

11 Öroyuai pakpak mi tandök mewö julkula qahöwakñeangöra eñon mönö ambazip denöwöñi aka malgetka dop kölbawak? Miangöra mönö ahakmeme sarakñi wuatangöba Kraist ewö aka malbingö köl guliba malme.

12 Inini Anutugö nalö ketañi mi kam kuñgumapköra mamböta zilañ kamapkö nupñi kapañ köla memba malje. Nalö miangörej gölmegö öroyuaiñi

* 3:3: Jud 18 * 3:5: Jen 1.6-9 * 3:6: Jen 7.11 * 3:8: Sum 90.4 * 3:10: Mat 24.43; Luk 12.39; 1 Tes 5.2; Ind 16.15

aka wehön köinj senjelau aka mewöni mi könöwiba jeba bolbolgöma. Anutunöj suepkö öröyuaiñi mi körek köndermönder aliga julkula jem teköma.

¹³ *Mewö jem tekömapmö, Anutunöj yuai asuhumapkö keu jöhöi ahözawi, nejön miangö dop Suep gölme dölökñi miwikñaim etkimapkö mambörakzin. Mi miwikñaim etkiiga miangörej angota ahakmeme diñdiji wuatangöba malbin.

¹⁴ O wölböt alaurupni, enjön nalö ketani mi kam kuñgumapkö mamböta malje. Miangöra mönö kewö akingö kapan köla kinme: Uruñini sarakñi aiga Anutunöj töwöt boromñinangö keuñi kun qahö miwikñaiiga yambuk ösupközeangöra luainöj malme.

¹⁵ Mamböta Kembuninangö uru tandökñangöra kewö mötmöriba malme: Yanön inini uruñini melenja kunbuk letotmegö nalöni mem körim al engiba ösöj mamböt engiba malja. Wölböt alanini Pol yanön mewöyök keu miyök ohom engiyökmö, Anutunöj mötkutukutu öngöngöñi wangiiga miangö dop keuñi ohom engiyök.

¹⁶ Miangö keuñi mi kimbiñi pakpak miangörej jiba ohomakzapmö, Buja Kimbiñangö uruñe keuñi tosatñi mi lömbötñambuk. Miangöra tosatñan mi möt asaribingö jaram tiba lömbörimakze. Gukmaulem ambazip kuñgwarak qeba tötöpinpin lañ malakzei, yenön kimbiñi kimbiñi mi lañ möwöramgömakze. Miangö dop Polgö keuñi mewöyök melenqelen aketka supapköba sohomakza. Mewö möwöramgöba kinda nanñini mem bölim anguba könöp sianöj geme.

¹⁷ Yenön gememö, wölböt alaurupni, enjön mewö asuhumapkö keuñi lök qeljine möta malje. Miangöra mönö nanñini galöm mem anguba malme. Iwilele ambazip köna siñgiba qiwitipkömakzei, enjön mönö yengö kelök keuñinan öröm engii enkuatangöba jinjauñ anbepek. Malmalgö tandö pöwöwöm köhöikñi miangörejök mewö tala kaman kölbepuk.

¹⁸ Kembunini Jisösgö kalem möriamñe kinjei, miangörej mönö kunbuk suariba köhöiba malme. Amötqeqe Tonini Kraistkö könañi möt kutuzei, mi mönö toroqeba möt yaköm soroköba malme. I möpöseininga qetñi nalö kewöñe aködamun-ñambuk aka könañep teteköñi qahö mewö ahöm öngöma. Keu mi ölna.

* **3:13:** Ais 65.17; 66.22; Ind 21.1

Jongöreñ Kimbi 1 Jonöñ Kimbiñi mutukñi alök. Jim-asa-asari

Jonöñ jöpaköm anġuanġugö keuñi köhöiba jiba malök. Urumeleñ ambazip neñön Anutu aka Jisös Kraist yetpuk qekötahöba kinda uru jöhöm anġuba mohok aka maljin.

Tosatñan keu muneñi ambazip kewö kusum sohom enġiba malget: “Jisösnöñ Suep aziyök akza. Gölmenöñ yuai pakpak mi bölöñi akza. Mianġöra Jisösnöñ gölme azi ölni qahö aka malök.” Keu mianġöra aka tosatñan “Anutu möt narizin,” jiba ahakmeme ölöñi mosöta siksauk silekmalek mala ambazip tosatñi yom kazik ak enġiget aka qölmöm injarere malget. Keu sinñi sinñi mewöñan zioz mem bölibapuköra Jonöñ goro keuñi kimbinöñ kewö ohoba ali kayök, “Jisösnöñ Suep aka gölme azia mohok akza. Gölmenöñ nup meme aka mötmöt meme mi yuai bölöñi qahö. Mianġöra ‘Anutu möt narizin,’ jiba Nahönñi Jisös kude mosötpin aka alaurupnini uruninan jöpaköm anġubin. Urukalem mi mönö kapan köla ak anġumakin.”

Kimbi kianġö bahöñi bohonñi 6 mi kewö:

Malmalgö könañi mi Jisös 1.1-4

Asak aka söñaup uruñe malmal 1.5-2.29

Anutugöreñ aka Satangöreñ nahönbörat 3.1-24

Uña ölöñi aka öme mi mönö kewötme 4.1-6

Urukalemġö könañi aka jimkutukutuñi 4.7-21

Mötnarip neñön bölöñi luhut alakin 5.1-21

Malmal köhöikñanġö keuñi mi Jisös Kraist

¹ *Nöñön malmal köhöikñanġö keuñi jimamġöra kimbi ki ohozal. Mutuhök malmalgö keu Tonjan maliga mianġö könañe öröyuai pakpak asuhuyök. Yanñön mala kota gölmenöñ eriga i jeninan eka böröñinan silenji misiriinga keuñi jii möta malin.

² *Oyaenköyaen malmalgö Tonjan asuhuiga neñön i eka könañi nanġöba jiba dangunu ewö kinjin. Malmal teteköñi qahö mianġö Tonjan Iwibuk mala kota eta asuhum neñiyöhi, neñön mianġö Buñañi jim asariba uruñini kuñguzin.

³ Neñön Iwi aka yanġö Nahönñi Jisös Kraist yetpuk urunini jöhöba mohot maljin. Inñini mewöyök uruñini nembuk jöhöba mohot malbingöra yuai eka mörini, mi jim tuarim enġizin.

⁴ Sösöñgainöñ urunini kokolak qei malbingöra keu ki jim tuariba ohozin. Mewö.

Kembugö asakñe malmal

⁵ Buña keu yanġö Nahönñanġöreñök möta jim tuarim enġizini, mi kewö: Anutunöñ asakñanġö Tonji akza aka yanġöreñ söñaup kun qahö ahöza.

⁶ “Neñön yambuk urunini jöhöba mohot maljin,” mewö jitnöñ jiba töndup aiakaninan jipjap aka söñaupnöñ maljin ewö, mönö keu muneñ jiba ahakmemeninan keu ölni qahö wuatangömakzin.

⁷ Anutunöñ asakñanġö uruñe maliga neñön mianġö dop aiakanini asakñanġö uruñe ahakzin ewö, mönö sutnine urunini jöhöm anġuba mohok malinga Nahönñi Jisös Kraistkö sepñan mönö sinġisöndoknini pakpak sanġonmakza.

* 1:1: Jon 1.1 * 1:2: Jon 1.14

⁸Urunine siŋgisöndok qahö ahöza, mewö jibinak ewö, mönö nanini tilipköm anġuinga keu ölnan urunine qahö kinma. Qahö!

⁹Siŋgisöndoknini jim miwikŋaizin ewö, yaŋön mönö uruŋi diŋdiŋaŋgö dop jöhöjöhö keuŋi pöndaŋ wuatanaŋgöba siŋgisön-doknini mosöta ahakmemenini gonġonċi pakpak saŋgonmakza.

¹⁰“Siŋgisöndok qahö ahin,” mewö jibin ewö, mönö keu Tonċi onġiringa Anutunöŋ munenċi jiji azi tandök aiga keuŋan urunine qahö kinma. Mewö.

2

Jisösnöŋ awörök köiput Tonini akza.

¹O (koko) gömukurupni, inċini siŋgisöndok akepuköra keu ki ohozal. Mi ohozalmö, kunöŋ töndup siŋgisöndok akawak ewö, awörök köiput Toninan mönö ahöm neŋgiza. Jisös Kraist yaŋön Iwigö kösutŋe mala keu pakpak diŋdiŋanök kewöta ak neŋgimakza.

²Awörök köiput Tonini yaŋön siŋgisöndokninanġö töwaŋi ala köl könjörat neŋgiyök. Mi neŋgö siŋgisöndokörök qahöpmö, mönö gölmeŋi gölmeŋi neŋgöreŋ siŋgisöndok mi mohotŋe köl könjöratmamgöra kömuyök. Mewö.

Temkölköl mi aiaka diŋdiŋi.

³Anutugö jöjöpaŋ keuŋi tem kölakin ewö, mewö mianġön i möt waŋgizini, mi ölöp uruyahötŋi qahö möt yaközin.

⁴Kunŋan “Anutu möt waŋgizal,” jiba jöjöpaŋ keuŋi qahö tem köla wuatanaŋgömakzawi, yaŋön mönö munenċi jiji ambaziwa aiga keu ölnan yaŋgö uruŋe qahö kinja.

⁵Qahöpmö, kunöŋ Anutugö keuŋi tem köla wuatanaŋgömakzawi, Anutugö urukalemŋan mönö ölna yaŋgö uruŋi kokolak qei aködamunŋambuk malja. Mewö mianġön Anutubuk qekötahöba mohok maljini, mi möt yaközin.

⁶Kunŋan “Anutubuk qekötahöba maljal,” jizawi, yaŋön mönö Jisösnöŋ ahakmemenċi ahök, mönö mianġö dop aka memba malma. Mewö qahö aka maliga qahö dop kölja. Mewö.

Urukalem akingö jöjöpaŋ keu döläkŋi

⁷*O wölböt alaurupni, nöŋön jöjöpaŋ keu döläk-kunċi qahöpmö, jöjöpaŋ keu walŋi könakönahineyök ahöm enġizawi, mönö mia ohom enġizal. Jöjöpaŋ keu walŋi mianġö Buŋa keuŋi mi lök möta mala kotket.

⁸Töndup mianġö jimkutukutuŋi döläkŋi mi enġöra ohozal. Söŋaupnöŋ ayapkömamgö aiga asakŋi ölnan lök asarim qarimakzawi, mianġöra jöjöpaŋ keu mianġö ölnan mönö Anutugöreŋ aka enġöreŋ ahuba ahöza.

⁹Kunŋan jitŋan “Asakŋe maljal,” jizapmö, alaŋi kazik ak waŋgizawi, yaŋön mönö toroqeba söŋaup uruŋe malja.

¹⁰Kunŋan alaŋi jöpaköm waŋgimakzawi, yaŋön mönö asakŋanġö uruŋe pöndaŋ maliga silikŋan tosatŋi siŋgisöndok akŋegöra qahö kondorakza.

¹¹Mewömö, kunŋan alaŋi kazik ak waŋgizawi, yaŋön mönö ömuŋe jipjap mala ahakmemenċi söŋaup uruŋe ahakza. Söŋaupnöŋ jeŋi mem sohoiga janjuŋ aka maljawanġöra aka denike anmawi, mi nannak qahö möt kutumakza. Qahö.

Anutunöŋ siŋgisöndoknini kösöloŋanimakza.

¹²O nahönböraturupni, Jisösnöŋ kömumba qet ketanċi memba maljawanġöra aka Anutunöŋ enġö siŋgisöndokŋini mosöta kösöloŋanim teköyök. Mianġöra keu ki enġöra ohozal.

* 2:7: Jon 13.34

13 O iwiurupni, kunöŋ könakönahineyök mala kotzawi, injini i möt waŋgiba mala kotze. Miangöra keu ki engöra ohozal. O gwaböurupni, injini bölöŋaŋgö Tonji luhut al waŋgiba maljei, miangöra keu ki engöra ohozal. Nahönböraturupni, injini Iwigö könani möt kutuba maljei, miangöra keu ki engöra ohozal.

14 Iwiurup, kunöŋ könakönahineyök mala kotzawi, injini i möt waŋgiba mala kotze. Miangöra keu ki ohobiga engören kaza. Azi gwaböurup, injini Anutugören Buŋa keu uruŋine algetka köhöiba kiniga ösum-mumuŋinambuk aka bölöŋaŋgö Tonji luhut al waŋgiba malje. Miangöra keu ki ohobiga engören kaza. Mewö.

Gölmegö ahakmeme bölöŋi mi yakörime.

15 Injini gölmegö ahakmeme bölöŋi aka yuai pakpak miangören ahözawi, miangöra kude ak engima. Kunŋan uruŋan gölmegö ahakmemegöra ak waŋgiza ewö, Iwigö urukalemŋan mönö yaŋgö uruŋe qahö kinja.

16 Gölmegö ahakmeme mi kewö: Ambazipnöŋ sileninaŋgö sihim kömbönaŋini bölöŋi mörakze. Yuai jeŋinan eka eksihim aka köpösöŋgömakze aka gölmegö malmalŋinaŋgöra piririköba töröraiba silenini memba öŋgömakze. Mi aka urukönöp tosatŋi mi Iwigörenök qahö kaza. Qahö! Mi mönö gölmegö ahakmeme bölöŋi akza.

17 Gölmegö ahakmemenöŋ göröŋ qema aka miangö sihimŋi bölöŋi bölöŋi mi mewöyök göröŋ qememö, kunŋan Anutugö jit sihitŋi tem köla wu-ataŋgömakzawi, yaŋön mönö böŋ qeba nalö teteköŋi qahö mal köhöima. Mewö.

Kraistkö tuarenjoŋurupŋi lök asuhuze.

18 O (koko) gömokurupni, Kraistkö salupŋe* kinda tuarenjoŋ ak waŋgimawaŋön nalö teteköŋe asuhumawi, mi lök jigetka mötze. Keu miangö dop nalö kewöŋe Kraistkö tuarenjoŋurupŋi gwötpuklök asuhaba kinje. Keugö öŋi mewö asuhuyöhaŋgöra aka nalö teteköŋaŋgö uruŋe lök kaŋgota maljin, mi mötzin. Miangö aiwesökŋi mewö.

19 Tuarenjoŋ ambazip mienön nanine kambunöhök mala nengömosöta anget. Uruŋini nembuk munen-munen jöhöba mötnarip könagesö sutnine laŋ mala buratiget. Nengören könagesö öŋi akeak ewö, mönö nembuk pöndaŋ qekötahöba mohokŋe malbinak. Nengömosöta tikep kinjei, silik mianön mönö könani kewö kondeliga eka mötzin: Yeŋgörenök kunöŋ nembuk öŋa mohot qahö aka malök.

20 Yeŋön tikep kinjemö, Kraistnöŋ Uŋaŋi Töröŋi engö uruŋine mokoiga bedu memba inahöm engiiga körek enön keu öŋi möt kutuba malje.

21 Injini keu öŋi qahö möt kutubepuköra aka keu ki qahö ohom engizal. Mewögöra qahöpmö, injini keu öŋi möt kutuze aka keu öŋan keu munenŋi kun kondotmamgö osimakza. Miangöra keu ki ohom engizal.

22 Jisösnöŋ Amötqeŋe Tonji Kraist akzapmö, kun daŋön keu mi qaŋ köljawi, yaŋön mönö isimkakalek ambaziwa akza. Yaŋön Kraistkö salupŋe kinda tuarenjoŋ ak waŋgiba Iwi aka yaŋgö Nahönŋi mi mohokŋe qaŋ köl etkimakza.

23 Kunŋan Iwigö Nahönŋi qaŋ kölakzawi, yaŋön Iwiŋi qahö öne malja. Kunŋan Nahönŋi jim miwikŋaimakzawi, yaŋön mönö Iwi mewöyök miwikŋaiba yambuk malja.

24 Injini Buŋa keu könakönahineyök möta kotkeri, mi uruŋine köhöiba kinmapköra galömŋini meme. Buŋa keu möta kotkeri, mianön uruŋine

* **2:18:** Kraistkö tuarenjoŋi mi Antikraist. Grik keu anti, miangö könani yahöt. Yaŋön Kraistkö salupŋe kinja aka Kraist öŋi tuarenjoŋ ak waŋgimakza.

kinma ewö, inini mewöyök mönö böñ qeba Iwi aka yangö Nahönñi yetpuk qekötahöba kinme.

²⁵ Kraistnöñ jöhöjöhö keu kewö nenñii ahöza, “Nömbuk kinme ewö, mönö oyaenköyaen malmal engibiga teteköñi qahö mal köhöime.”

²⁶ Tosatñan esapköba janjuñ mem engimakzei, nöñön yeñgöra aka keu mi ohom engizal.

²⁷ Tosatñan janjuñ ahakzemö, Kraistnöñ Uña Töröñi engö uruñine mokoiga bedu memba inahöm engimakza. Uña yanñön uruñine böñ kini qahö löwörime ewö, enñön mönö böhi kungöra qahö osime. Mi kewögöra: Yangö Uñan mönö ahakmemegö keu pakpak kusum engimakña. Bedu memba inahöm engimakzawi, mianñön yuai muneñi kun qahöpmö, mötmöt ösumñi öl töhöññanök akza. Mianñöra keu ölñi kusum engiyöhanñö dop mönö keunji pakpak tem köla Kraistpuk töp qekötahöba kinme.

²⁸ O (koko) gömökurupni! Inini mönö Kraistpuk töp qekötahöba kinme. Yam-buk kinda malinga kunbuk asuhumawi, nalö mianñöreñ qahö közöl nenñiiga gamu qakñe qahö mömölaköba anbinmö, ölöp yangö jeñe awösamkakak qakñe tamehök kinbin.

²⁹ Kraistnöñ solanñi akzawi, inini keu mi möt kutuze ewö, mönö keu ki mewöyök ölöp möt asarime: Ambazip köreñan ahakmeme solanñi ahakzei, yeñön mönö mewöyök Anutugöreñök ahuba nahönböraturupñi akze. Mewö.

3

Neñön Anutugöreñök ahuba nahönböratñi akzin.

¹ *Mötket! Suep Iwininan nenñöra “Nani nahönböraturupni,” mewö nenñohola mianñön urukalemñi ketanji kondel nenñimakza. Nini ölña Anutugö nahönböraturupñi akzin. Mi akzinanñöra gölme ambazipnöñ könanamnini qahö möt kutuba malje. Anutugö könanji qahö möt kutuzeanñöra nanine könanamninañöra mewöyök tötöpinpin malje.

² O wölböt alaurupni, nalö kewöñe nini Anutugö nahönböraturupñi aka maljin. Mewö mala könanjep denöwö aka malbini, mi aukñe qahö asuhuyök. Mohok kun mötzini, mi kewö: Yanñön kunbuk aukñe asuhuiga kaisoñgolomñi ölñi jeninan ekini, nalö mianñöreñ mönö letota i ewö akin.

³ Denike yeñön Kraistköra jörömqöröm mewöñi ak wanñizei, yanñön mönö i köl köñjorat mem enñiiga yangö tandök ewö sarakñi aka malme.

⁴ Denike yeñön siñgisöndok akzei, yeñön mönö köna keu qeba walöñmakze. Siñgisöndok mi iwilele ahakmemeya.

⁵ *Kraist nanñak siñgisöndokñi kun qahö yanñön nanine siñgisöndoknini köl köñjoratmamgöra eta asuhuyöhi, mi ölöp mötze.

⁶ Denike yeñön Kraistpuk böñ qeba kinjei, yeñön siñgisöndok qahö aka malje. Kunñan siñgisöndok toroqeba ahakzawi, yanñön Jisös qahö eka könanji qahö möt kutuba malja. Mewö.

⁷ O (kokourupni) gömökurupni! Kunñan janjuñ mem engibapuköra mönö galömnini mem anñguba malme. Kraistnöñ solanñi akzawi, yangö dop ahakmeme solanñi törörök wuatañ-gömakzawanñön mönö solanñi akza.

⁸ Bölönangö Toñan köna-könahineyök siñgisöndok aka kota malja. Mianñö dop denike yeñön siñgisöndok ahakzei, yeñön mönö Bölöñi Toñangö buñaya akze. Anutugö Nahönñan mönö yangö nupñi yain memamgöra eta asuhuyök.

⁹ Denike yeñön Anutugöreñök asuhugeri, yeñgöreñök kunñan malmal gainñi kun uruñe ahözawanñöra mönö siñgisöndok qahö toroqeba ahakza.

* 3:1: Jon 1.12 * 3:5: Jon 1.29

Ahuahu dölökñi ahuba maljawangöra aka singisöndok toroqeba akñamgö osimakza.

¹⁰ Denike yeñön Anutugö nahönböratñi aka denike yeñön Bölöñi Tonangö nahönböratñi akzei, mi kewö kewöta möt asaribin: Kunñan ahakmeme solanji qahö wuatangömakzawi, yañön mönö Anutugö buñaji qahö akza. Mewöñanök kunñan alaurupñi qahö jöpaköm engimakzawi, yañön Anutugö buñaya qahö akza. Miangö aiwesökñi mewö.

Injini mönö jöpaköm anguba malme.

¹¹ *Buña keugö kötnji könakönahineyök möta kota maljini, miangö jöjöpañ keuñi kewö: Nini mönö urunöñ jöpaköm anguba malbin.

¹² *Kein (Kain) yañön Bölöñi Tonangö buñaya mala munñi qei kömuyök. Nini mönö i ewö aka malbinbuk. Yañön kewögöra munñi qeyök: Nanñi ahakmemeñan bölöñi ahökmö, munñañ-göreñan solanji ahök. Mönö miangöra qeyök.

¹³ O urumelen alaurupni, gölme ambazipnöñ kazik ak engime ewö, miangöra mönö kude welipköme.

¹⁴ *Nini urumelen alaurupnini jöpaköm engimakzinangöra aka keu ki möt asarizin: Nini kömup köhöikñangö jaböñi walöñda malmal köhöikñe angota maljin. Kunñan urukalem qahö ahakzawi, yañön mönö toroqeba kömup köhöikñangö uruñe kinma.

¹⁵ Ambazip alaurupñini kazik ak engimakzei, körek yeñön mönö köhömuñi enguenğu ambaziwa akze. Malmal köhöikñi mi enguenğu ambazip mewöñi kungö uruñe qahö ahöza, mi ölop möt yaköze.

¹⁶ Jisös Kraistnöñ malmalñi neñgöra aka kölennda mosöta jöpaköm anguanğugö könañi mewö kondel neñgiiga eka möt kutuzin. Neñön mönö mewöñanök malmalnini urumelen alaurup yeñgöra aka kölennda mosöringa dop kölma.

¹⁷ Kunñan gölmegö öröyuainji dopñe memba maliga alañan yuaigöra osiba mözöqözöröñ aiga ekzapmö, töndup ekbonep aka uruñi jöhöza ewö, Anutugö urukalemñan mönö yañgö uruñe denöwö kinbawak?

¹⁸ O (koko) gömokurupni, jöpaköm anguanğu mi numbu jitninan keu töhöñök timbiliba jimakinbukmö, mi mönö ahakmemeninan keu ölnji wuatangöba aka malbin.

Mönö Anutugö jemesoholñe tamehök kinbin.

¹⁹ Nini keu ölnangö buñaya akzin me qahö? Akzin ewö, mönö ölop urunini böñjöñ köliga Anutugö jemesoholñe awösamkakak kinbin. Keu mi nanini kewöt anguba kewö möt kutubin:

²⁰ Uruninan yuai bölöñangöra aka jim neñgiza ewö, nini keu ki ölop möt yaközin: Anutunöñ kewötkewöt Tonini aka keunini diñdiñanök kewötma. Anutugö mötmötñan mönö nanine mötmötnini onğita öngöñgöñi aiga keu pakpak ölop möt teköza. Miangöra ölop urunini böñjöñ köliga malbin.

²¹ O wölböt alaurupni, uruninan qahö jim neñgiza ewö, nini mönö Anutugö jemesoholñe awösamkakak aka tamehök kinbin.

²² Nini Anutugö jöjöpañ keuñi tem köla ahakmemenini dop köl wangimakzawangö dop aka memba malakzin. Miangöra yuai kungöra köuluköba qesim wangibini, mönö mia neñgii buña qem angubin.

²³ *Anutugöreñ jöjöpañ keu yahöt mi kewö: Nini mönö Nahöññi Jisös Kraistkö qetñi memba möt nariba urunini melenbin aka jöjöpañ keu jim

kutum nenngiyöhangö dop jöpaköm anguba malbin. Mewö qahö aka malbinak, mi Anutugö jeje qahö dop kölbawak.

²⁴Denike yeñon Anutugö jöjöpañ keunji tem kölakzei, yeñon mönö Anutubuk gekötahöba malgetka Anutunöñ yembuk lapingöba kinja. Yañon nembuk lapingöba kinjawi, mi Uñañi Töröñi nenngiiga urunine sañep ala maljawangöra möt kutuzin. Mewö.

4

Uñaya me ömeya mi mönö könañini kewöta mötme.

¹O wölböt alaurupni, kezapqetok ambazip takapulakanji gwötpuk mi gölme dop liliköba maljei, miangöra keu pakpak mi zilañ kude memba möt narime. Anutugö Uñañan me öme kunñan sölölohöiga asuhuzawi, mi mönö mutuk esapesapnöñ ala kewötme.

²Anutugö Uñañangö könañi mi mönö kewö kewöta möt miwikñaima, “Jisös Kraistnöñ eta silebuk aka malök,” denike yeñon keu mi jim miwikñaimakzei, yeñon mönö körek Anutugö buñaya akze.

³Kunñan Jisösgö könañi mewö qahö jim miwikñaimakzawi, yañon Anutugö buñaya qahö akza. Kraist tuarenjonangö ömeñan mönö yangö uruñi sölölohöiga keu jimakza. Kunöñ asuhuba Kraistkö salupñe kinda tuarenjon ak wangimawi,* keu mewö jiget mötketka yañon lök nalö kewöñe gölmenöñ asuhuza.

⁴O (koko) gömokurupni, injini Anutugö buñaya aketka Uña Töröñan uruñine kinda gölmegö ömewörömeñi mi engongita luhut al engimakza. Miangöra kezapqetok ambazip takapulakanji mi ölop luhut al engiba malje.

⁵Yeñon gölmegö buñaya aketka gölmegö ömeñan sölölohöm engimakze. Miangöra gölmegö ahakmemeni wuatangöba keu jigetka urumelengö kopa ambazip yeñon keuninangöra kezap ala mörakze.

⁶Nini Anutugö buñaya ahinga Uña Töröñan sölölohöm nenngimakza. Anutu möt wangizeañon mönö nenngö keuninangöra kezap ala mörakze. Anutugö buñaya qahö akzei, yeñon nenngö keuninangöra kezap qahö ala mörakze. Keu ölnangö Uñañi aka isimkakalekö ömeñi yetkö könañiri mi mönö mewö kewöta möt kutumakzin. Mewö.

Anutunöñ urujöpakö könañi akza.

⁷O wölböt alaurupni! Anutunöñ jöpaköm anguangugö jalöñi akza. (Miangöra urukalem mi o jeñangö tandök ewö ahöba korakza.) Miangöra nini mönö jöpaköm anguba malbin. Mewö aka maljini, körek nenñon mönö Anutu möt wangiba yangörenök ahuahu dölökñi ahuaba maljin.

⁸Anutunöñ urujöpakö Toñi akza. Mewö akzawangöra kunñan ambazip qahö jöpaköm engimakzawi, yañon mönö Anutu qahö möt wangiba tönpin malja.

⁹Anutunöñ urukalemñi kewö kondeli sutnine asuhuyök: Yañon Nahönñi mohok-kunñan nam köl nenngii mal köhöibingöra aka melaiiga gölmenöñ erök.

¹⁰Nini Anutu jöpaköm wangiinmö, miangöñ urukalemngö könañi qahö. Urujöpakö könañi mi kewö: Anutunöñ jöpaköm nenngiba singisöndoknini köl köñjöratmangöra Nahönñi melaiiga nenngören erök.

¹¹O (koko) gömokurupni, Anutunöñ mewö önöñi qahö jöpaköm nenngiyöhangöra nenñon mönö mewöñanök uruninan jöpaköm angumakin. Urukalem qahö ak anguinga qahö dop kölja.

* **4:3:** Kraistkö tuarenjonji mi Antikraist. Grik keu anti, miangö könañi yahöt. Yañon Kraistkö salupñe kinja aka Kraist ölni tuarenjon ak wangimakza.

12 *Kunjan kun Anutu nalö kunöŋ qahö ehökmö, jöpaköm aŋguba maljin ewö, Anutunöŋ mönö urunine lapingöba kiniga urukalemŋan urunini kokolak qeiga aködamuninambuk maljin.

13 Nini Anutubuk qekötahöba malinga yaŋön urunine lapingöba kinjawi, mi Uŋaŋi Töröŋi neŋgiyöhaŋgöra aka möt kutuba uruyahöt qahö ahakzin.

14 Iwinöŋ Nahönŋi gölmeŋi gölmeŋi neŋgö Amötqeŋe Tonini akŋapköra melaiiga erök. Neŋön mi eka möta naŋgöba jimakzin.

15 Kunjan “Jisös Anutugö Nahönŋi akza,” jiba jim miwikŋaimakzawi, Anutunöŋ mönö yaŋgö uruŋe lapingöba kiniga yaŋön Anutubuk qekötahöba malja.

16 Anutunöŋ uruŋan jöpaköm neŋgimakzawi, nini miangö könaŋi möta miangöreŋ möt narimakzin. Anutunöŋ urujöpakö Tonji akza. Mewö akzawaŋgöra kunjan ambazip jöpaköm eŋgiba maljawi, yaŋön mönö Anutubuk qekötahöba kiniga Anutunöŋ yaŋgö uruŋe lapingöba malja.

17 Mewö malinga köŋgörököm neŋgiiga Anutugö urukalemŋan urunini kokolak qeiga aködamu-ninambuk maljin. Nini Kraistkö tandök ewö gölme kusukŋi kiangöreŋ maljin. Mewö maljinangöra aka Anutugö jimtekötekö nalö ketane Kraistkö jeŋe aŋgota miangöreŋ awösamkakak aka tamehök kinbin.

18 Anutunöŋ jöpaköm neŋgiiga kinda öne töhön keŋgötnini mötpinbuk. Singisöndok ambazip yeŋön Anutunöŋ singisöndok-ŋinaŋgö likepŋi melen eŋgibapüköra keŋgötŋini mörakzemö, Anutugö urujöpakŋan urunini kokolak qeza ewö, miangön mönö keŋgöt mötmöt pakpak yakörim tekömakza. Miangöra kunjan keŋgötŋi mörakzawi, yaŋön jöpaköm neŋgimakzawaŋgö könaŋi mi törörök qahö möt teköza.

19 Yaŋön mutuk jöpaköm neŋgiyöhaŋgöra aka nini urukalem ahakzin.

20 Kunjan “Anutu jöpaközal,” jizapmö, alaŋi kazik ak waŋgimakzawi, yaŋön mönö muneŋ jiji ambaziwa akza. Miangö könaŋi kewö: Alaŋi eka töndup qahö jöpaköm waŋgiza ewö, yaŋön Anutu qahö eka i mönö denöwö jöpaköm waŋgibawakto?

21 Kunjan Anutu jöpaköm waŋgimakzawi, yaŋön mönö alaurupŋi mewöyök jöpaköm eŋgiba malma. Anutunöŋ jöjopaŋ keuŋi mewö al neŋgiyök. Mewö.

5

Mötnariŋ ambazip neŋön luhut alakin.

1 Denike yeŋön Jisös möt nariba “Amötqeŋe Tonina akza,” jimakzei, körek yeŋön mönö Anutugöreŋök ahuahu dölokŋi ahuaba malje. Denike yeŋön Iwi jöpakömakzei, körek yeŋön mönö yaŋgö Nahönŋi mewöyök jöpaköm waŋgimakze.

2 “Anutugö nahönbörat-urupŋi jöpaköm eŋgizin,” jiinga keu miangö ölni mi nanini kewögöra kewöt aŋguba mötzin: Anutu jöpaköm waŋgiba jöjopaŋ keuŋi tem köla wuatangömakzin ewö, mönö Anutugö nahönbörat-urupŋi mewöyök jöpaköm eŋgimakin. Miangö aiwesökŋi mewö.

3 *Anutu jöpaköm waŋgibingö ölni mi temkölköl. Anutugö jöjopaŋ keuŋi wuatangöinga dop kölja. Jöjopaŋ keuŋi tem kölinga lömbötŋambuk qahö akŋa.

4 Anutugöreŋök ahuahu dölokŋi ahuini, körek neŋön ölop yaŋgö jitŋi tem köla gölmegö ahakmeme bölöŋi luhut alakin. Anutunöŋ mötnariŋ neŋgiiga miangö qakŋe köuluköinga lök gölmegö ahakmeme bölöŋi memba et alök. Luhut albingö köna murutŋi kun qahö ahöza.

* 4:12: Jon 1.18 * 5:3: Jon 14.15

⁵ Neñön luhut qahö albinak ewö, denike yeñön mönö mi akeak? Jisösnöñ Anutugö Nahönña akzawi, mi möt narizawañön mönö gölmegö ahakmeme bölöñi luhut alakza. Mewö.

Anutunöñ Nahönñañgö keu kewö nañgöba jiyök:

⁶ Jisös Kraistnöñ Anutugö Nahönña akzawi, mi denöwö mötzin? Jisösnöñ oe geiga Jonöñ o melun mem wañgiiga Anutunöñ nalö mianğöreñ keu mi jiiga mötket aka könañgep sepñi mokomangö aiga mianğöreñ qet kun Suepnöhök asuhuiga mötket. Keu onöñ indim mohok asuhuyöhi, miyök qahö. Suep Toñan keu nañgöba jiyöhi, mianğö aiwesökñi mi o aka sep, yahöt mi. Toroqeba Uña Töröñan keu mi jimakza. Yañön keu ölnağö Toñi akzawañgöra aka muney jimangö osimakza.

⁷ Nañgönağö keu karöbut mi mewö mörin ahöza.

⁸ Keu karöbut mienğö aiwesökñini mi Uña, o aka sep. Keuñini mi öröröñ aukne möringa dop köl teköza.

⁹ Keu jakeñe kañgota nañgönağö ahakzei, mi ölop möt añgön kölakzinmö, Anutugö nañgönağö keuñan mönö ambazip keunini onğita pöwöwöm köhöikñi akza. Anutunöñ Nahönñañgöra “Nani Nahöna!” qeta könañi mewö aukne nañgöba jiyök. Mianğöra keu mi andö qebinbuk.

¹⁰ Kunñan Anutugö Nahönñi möt narimakzawi, nañgönağö keu Toñan mönö nanñak yağö uruñe maliga yağö könañi ölop möt yaköza. Kunñan Anutu qahö möt narimakzawi, yañön mönö nañgönağö keu Toñi nanñi memba et aliga muney jiji azia ahakza. Anutunöñ keu köñi Nahönñañgöra nañgöba jiyöhi, yañön keu mi qahö möt narizawañgöra mönö Anutu nanñi andö qeba qetalakza.

¹¹ *Anutunöñ keuñi kewö nañgöba jiyök, “Nöñön malmal köhöikñi engimangö jiali, nani Nahönan mönö malmal kömbönañi mianğö kondotkondot Toñi akza.”

¹² Yağö Nahönñambuk maljawañön mönö malmal köhöikñi buña qem añguba malja. Anutugö Nahönñambuk qahö maljawañön mönö malmal köhöikñi mi qahö buña qem añguba malja. Mewö.

Malmal köhöikñağö könañi

¹³ Uruñini melenđa Anutu Nahönñañgö qetñi memba möt narimakzei, nöñön kimbi ki engöra ohozal. Malmal köhöikñağö buñaya akzei, inñi mianğö könañi törörök möt kutumegöra ki ohozal.

¹⁴ Nini ölop awösamkakak aka Anutugö kösutñe anda köuluköba kinda kewö möt yaközin: Wani yuaigöra yağö jiti sihitñağö dop köuluköm wañgibini, yañön mönö köuluknini mi mötma.

¹⁵ Mi me mi mianğöra köuluköinga köuluknini mötmapkö mötzin ewö, mönö keu ki mewöyök möt kutuzin: Wani yuaigöra köuluköm wañgizini, mi pakpak mönö neñgö buñanina akña.

¹⁶ Kunñan alañi ehi siñgisöndok ahiga mianñön kömup köhöikñağö buñaya qahö akñawi, yañön mönö alañi mianğöra Anutu köuluköiga amöt qem wañgiiga malmal köhöikñe añgotma. Siñgisöndok Anutunöñ mosötmawañgö dop akeri, keu ki mönö yeñgöra jizal. Tosatñan siñgisöndok aketka mianñön kömup köhöikñağö buñaya akñei, yeñgöra köulukömegöra mi qahö jizal. Qahö.

¹⁷ Ahakmeme bölöñi pakpak mi siñgisöndok akza. Köpösihit tosatñi ahinga mianñön kömup köhöikñağö buñaya qahö akin. Mewö.

Mötnariñ ambazip neñön Anutubuk qekötahöba kinjin.

* 5:11: Jon 3.36

¹⁸ Denike yeñön Anutugörenök ahuahü dölökñi ahugeri, yengörenök kunñan siñgisöndok qahö toroqeba ahakzawi, mi mötzin. Anutugörenök ahuahü dölökñi ahuba maljawañön mönö nanñi galöm mem anğuiga Bölönanğö Toñan i qahö qeraköba mema.

¹⁹ Nini keu ki mötzin: Nini Anutugö buñaya akzinmö, gölme dop yeñön uruñini qahö melenđa Bölönji Toñanğö kukösum bapñe malgetka galöm köl enğimakza.

²⁰ Keu ki mewöyök mötzin: Kunön öl töhönñi akzawi, nini i möt wanğibingöra Anutunön Nahönñi melaiiga eta möt-asa-asari neñgiyök. Kunön öl töhönñi akzawi, nini yambuk qekötahöba mohok aka maljin. Öl töhönñi yanñön mönö Anutugö Nahönñi Jisös Kraist. Yanñön Anutu ölbölñi aka malmal köhöikñanğö kondotkondot Toñi akza.

²¹ O (koko) gömokurupni, tandö lopionğ aka bem munenji tosatñan köpeiba qeraköm enğibepuköra mönö nanñini galöm mem anğuba malme. Mewö.

Jongöreŋ Kimbi 2 Jonöŋ Kimbiŋi aliga 2 ahök. Jim-asa-asari

Buŋa Kimbi kianğö tonji yaŋön nanŋi qetŋi “Jitŋememe kun,” qerök. Yaŋön kimbi mi “Wölböt ambi aka yaŋğö nahönböraturupŋi,” yengöra alök. Keu tölapŋi mi urumelenŋ könagesö kungö söpsöp keuya. Nahönbörat mi könagesö aiga wölböt ambi mi yengö galömŋina. Buŋa Kimbigö keu töröpŋi kianğön jöpaköm aŋgubingöra uru kuŋgum neŋgimakza aka böhi takapulakanŋi yengön ambazip kusum eŋgigetka keuŋinan sehibapukö galöm meme keuya akza.

Buk kianğö bahöŋi bohonŋi 4 mi kewö:

Keu mutukŋi 1-3

Urukalem mi yuai bohonŋi 4-6

Keu goŋgoŋan sehibapukö galöm meme keu 7-11

Kimbigö keu kötŋi bohonŋi 12-13

¹ O ambi sorok!

Anutunöŋ möwölöhöm ghiiga urumelenŋ könagesöurupki galöm köl eŋgiba kinjan. Nöŋön inini keu ölnaŋğö dop uru könömnan jöpaköm eŋgimakzal. Nanök qahöpmö, ambazip keu ölni möt kutuzei, körek yengön mönö mewöyök inini jöpaköm eŋgiba malje. Nöŋön jitŋememeya akzal aka göbuk keu eraum mötpitköra kaba kimbi ohozal.

² Keu ölnan urunine kinja aka nembuk teteköŋi qahö ahöm öŋgöma. Nöŋön Buŋa keu mianğöra aka jöpaköm eŋgizal.

³ Nini keu ölni wuatangöba urunöŋ jöpaköm aŋguba maljin ewö, Iwi Anutu aka Iwigö Nahönŋi Jisös Kraist yetkön mönö ak kömumba kalem möriam neŋgiyohotka luainöŋ malbin.

Urukalem aka keu ölni mi mohotŋe wuatangöme.

⁴ Iwinöŋ urukalemğö jöjöpaŋ keuŋi neŋgiyöhi, mianğö dowök göhö könagesöurup tosatŋan keu ölnaŋğö dop ahakmemenini aka memba malje. Nöŋön silikŋini mewöŋi ekiga sösongai ketanŋi ak niŋgimakza. Mewö.

⁵ *O wölböt alani ambi ketanŋi, nalö kewöŋe jöjöpaŋ keu ohom gihizali, mi keu dölökŋi qahö. Keu könakönahineyök könahiba mörini, nöŋön mönö keu mi kunbuk ohoba kewö qesim gihizal: Nini mönö uruninan jöpaköm aŋguba malbin.

⁶ Jöpaköm aŋguba malbingö keuŋi jizali, mianğö ölni kewö: Nini mönö Anutugö jöjöpaŋ keuŋi pakpak tem köla ahakmemenini ak memba malbin. Körek eŋön jöjöpaŋ keu könakönahineyök möta malgeri, mi kewö: Inini mönö uruŋinan jöpaköm aŋguba malme.

⁷ Isimkakalek ambazipnöŋ Jisös Kraistköra kewö jim miwik-ŋaimakze: “Amötqeqe Toŋan gölme azi silebuk asuhumangö osiyök.” Mewö jim miwikŋaiba tilipqilip aketka eŋololonŋ asuhumakza. Ambazip isimkakalek mewöŋi mi Kraistkö salupŋe kinda tuarenjoŋ ak waŋgimakze. Ambazip mewöŋi gwötpukŋan lök gölmenŋi gölmenŋi liliköba laŋ anda kaba malje.

⁸ Neŋön urugö nup meinga ölni uruŋine asuhuyöhi, mianğön sohoba pömsöm qebapuköra mötzal. Mianğöra isimkakalek ambazipnöŋ eŋololonŋ ak eŋgibepuköra mönö galömŋini mem aŋguba malme. Mewö malgetka uruŋinaŋğö ölnan qahö sohoiga Kembunöŋ töwaŋini körek eŋgim teköma.

* 1:5: Jon 13.34; 15.12, 17

⁹ Kraistnöŋ keu kusum nenŋiyöhi, kunŋan mi qahö qekötahözapmö, mi onŋgita keu toroqeiga lolonqalonŋ jimakzawi, yaŋön Anutuŋi qahö. Denike yeŋön Kraistkö Buŋa keuŋe qekötahözei, yeŋön mönö Iwi aka Nahön yetpuk köhöiba malje.

¹⁰ Kunöŋ Buŋa keu jömukŋi mi qahö memba enŋörenŋ kazawi, inŋini mönö yaŋgö jölöŋi kude jiba miriŋine kude örögetka öŋgöma.

¹¹ Kunŋan yaŋgö jölöŋi jimawi, yaŋön mönö bölönŋamŋaŋgö lömbötŋi öröi qakŋe öŋgöiga öröröŋ bisimahot. Mewö.

Keu teteköŋi

¹² Nönön enŋöra keu sehisehiŋi ohomamgö sihimŋi mötzalmö, mi papia sinŋe inŋknöŋ ohomamgö qahö möta mosötzal. Enŋörenŋ kusuk kaba mesohol köla keu eraum mötpingö mamböta jörömqöröm akzal. Aitonŋöbini, nalö miangörenŋ köisirik tata eraum möta sösongainini körek ahum teköba urunini kokolak qeiga malbingö mötzal.

¹³ Anutunöŋ ambi alagi galöm nupköra möwölöhöyöhi, ambi sorok yaŋgö könagesöurupŋan yaizökzökŋini algetka göhörenŋ kaza.

Jongöreŋ Kimbi 3 Jonöŋ Kimbiŋi aliga 3 ahök. Jim-asa-asari

Buŋa Kimbi kiangö toni yaŋön nanŋi qetŋi “Jitŋememe kun,” qerök. Yaŋön Kimbi mi urumelen könagesö kungö jitŋememe kun qetŋi Gaius yaŋgöra alök. Gaiusnöŋ urumelen ambazip tosatŋi miri aka nene yuai bauköm engiba malök. Miangöra i möpöseim waŋgiyök aka tuaköpek azi kun qetŋi Diotrefes yaŋgöra galöm meme keu jiyök.

Buk kiangö bahöŋi bohonŋi 5 mi kewö:

Keu mutukŋi 1-4

Jonöŋ Gaius möpöseiza 5-8

Diotrefesgö galöm meme keu 9-10

Demitriusgö sösöŋgai keu 11-12

Buk kiangö keu köŋi bohonŋi 13-15

¹ *O wölböt alani Gaius!

Nöŋön jitŋememe kun aka göbuk keu eraum mötpitköra kaba kimbi ohozal. Nöŋön keu ölŋaŋgö dop urunan jöpaköm gihiba maljal.

² O wölböt alani, göhö uŋagan Anutubuk qekötahöba ölöwahi maljani, mi mötzal. Mewöŋanök sile unditundit mala yuai pakpak miangöreŋ töhötmöriam miwikŋaiba malmangöra Anutu köuluközal.

³ Urumelen alaurup tosatŋan göhöreŋök kaba göhö kösohotki kewö naŋgöba jigetka möral, “Göŋön Anutugö keu ölŋi pöndaŋ wuatangöba aka memba maljan.” Mewö jiget mötpiga sösöŋgai ketanŋi ak niŋgiyök.

⁴ Nöŋgö (koko) gömukurupnan Anutugöreŋ keu ölŋi wuatangöba aka memba maljei, nöŋön keu buzup mewöŋi möta önöŋi qahö söŋgaimakzal. Buzup murutŋi kunöŋ sösöŋgai öŋgöŋgöŋi mi qahö oŋgiri mötzal. Mewö.

Jonöŋ galöm azi qetŋi Gaius möpöseiza.

⁵ O wölböt alani, gi urumelen alaurup welen qem engiba miangöreŋ pöndaŋ kinda malakzan. Yeŋgöreŋök tosatŋan miri liliköba engöreŋ kamakzei, mi köyan köl engimakzan. Möt engizani me qahö, mi töndup ölöpŋanök bauköm engimakzan.

⁶ Gi urugan jöpaköm engiba malnöŋi, yeŋgöreŋök tosatŋan ki kaba mötnariŋ kambugö jeŋine könaŋangi mewö naŋgöba jiget mörin. Miangöra alaurup mewöŋan engöreŋ kamei, mi mönö bauköm engiba malnöŋga ölöp amqeba nup memba könaŋini toroqeba anme. Nup mewöŋi mi Anutugö jeŋe dop köl waŋgimawaŋgö dop toroqeba memba malman.

⁷ Yeŋön Kraistkö buŋaya akzeangöra aka nanŋini miriŋini mosöta liliköba qetbuŋaŋi jim sehimakze. Nup mewö memba urumelengö kopa ambazip yeŋgöreŋök nene yuai kun qahö memakze.

⁸ Miangöra Jisösgö alaurup neŋön naninök alaurup mewöŋi köl öröba naŋgöm engiinga dop köлма. Nini nup bahöŋi mi memba mianön keu ölŋaŋgö Toni mohotŋe welen qem waŋgiinga keuŋi ölŋan sehimakŋa. Mewö.

Diotrefes ewö akanbukö galöm meme keu

⁹ Nöŋön mötnariŋ kambu engöra kimbi kun ohoyal. Mi ohoyalmö, Diotrefes jitŋememe azi yaŋön sutŋine galöm bohonŋi malmangö sihimŋi mötzawi,

* 1:1: Apo 19.29; Rom 16.23; 1 Kor 1.14

yañön mönö memsepqemsep aka keunangö kezap qahö ala nesampurek ak neñgimakza.

¹⁰ Mianğ-göra nöñön engöreñ kabilenjak ewö, mönö yañgö ahakmemeñi bölöñi mi aukne jibiga kewö mötme: Yañön neñgöra luasö keu muneñi andönöñ qeçe jimakza aiga keu jijiyök qahö ahakza. Qahö! Urumeleñ alaurupnini miri lilik nup memakzei, yañön mi qahö köl öröm engimakza aka alaurup tosatñan köl öröm engibingö mötzei, yañön i angön köl engiba mötnariñ kambuñineyök utal engiiga yaigep erakze.

¹¹ O wölböt alani! Gi ahakmeme bölöñi qahöpmö, ahakmeme ölöpnji mia mönö wuatangöba malman. Denike yeñön ahakmeme ölöpnji aka memba maljei, yeñön Anutugö nahön böraturupñi akze. Denike yeñön ahakmeme bölöñi aka memba maljei, yeñön Anutugö könañi qahö möt kutuba sel yaigepñe malje.

¹² Demitrius azi mianğö könañi mi ölöpnji. Alaurup körekñan mewö jimakze. Keu ölnangö Toñan nanñak mi mewöñanök nanğöba jimakza aka neñön toroqeba yañgöra keu öröröñ jimakzin. Neñön keu jimakzini, mi keu öl töhönñi akza, mi mötzan. Mewö.

Yaizözkök keu teteköñi

¹³ Nöñön göhöra keu sehisehiñi ohomamgö sihimñi mötzalmö, mi kirifi aka inknöñ ohom gihimamgö dopñi qahö möta mosötzal.

¹⁴ Nöñön ösumok göhöreñ kaba gekñamgö mamböta jörömqöröm akzal. Aitonğöbini, nalö mianğöreñ ölop mesohol köl anguba keukeu eraum mötpin.

¹⁵ Anutunöñ luai qem gihiga malman!

Mötnariñ alaurup ki maljei, yeñön yaizözkökñini algetka göhöreñ kaza. Göñön mewöñanök urumeleñ alaurup göbuk kinjei, mi nanñik nanñik yaizözkökñini jinöñga mötme!

Judagöreŋ Kimbi Judanöŋ Kimbiŋi alök. Jim-asa-asari

Juda mi Jisös aka Jeimsgö munŋi. Tosatŋan “Kraist möt narizin,” jiba keu gongonŋi ambazip kusum sohom engiba malgeri, Judanöŋ yeŋgöra aka galöm meme keu ohoyök. Buŋa Kimbi ki töröptökŋi. Keuŋi mi 2 Pitö 2 keu miangö dop. Judanöŋ Kraistkö alaurupŋi neŋgö urunini kewö kuŋguyök, “Anutunöŋ nini nalö dop möt naribingöra mötnariŋ neŋgiiga könagesöurupŋi akzini, eŋön mönö mötnariŋŋinan sehiba köhöimapköra toroqeba bim qeba malme.”

Buk kiangö bahöŋi bohonŋi 4 mi kewö:

Keu mutukŋi 1-2

Böhi sohoboho yeŋgö könaŋini aka jimteköteköŋini 3-16

Toroqeba pöndaŋ möt naribingö jimkutukutuŋi 17-23

Kötumötuet keu 24-25

¹ *Juda bisop Jeimsgö munŋi nöŋön Jisös Kraistkö welenni qeba urumelen alaurup embuk keu eraum mötpingöra kaba kimbi ohozal.

Anutu Iwinöŋ engohola uru könömnŋan jöpaköm engii Jisös Kraistnöŋ sel jöhöm enŋiiga malje.

² Anutunöŋ mönö ak kömumba urukalemŋi kelenmalelen enŋiiga luainöŋ malme. Mewö.

Buŋa keu möwököwöramgö galöm meme keu.

³ O wölböt alaurupni! Anutunöŋ amöt qem neŋgiiga letota mohotŋe Suepkö buŋaya akzini, nöŋön miangö keuŋi jim tuariba ohom engimamgö sihimni ketanŋi möta malal. Mala malbi lömböriiga toroqeba mambötmamgö osizal. Miangöra ohoba uruŋini kewö kuŋgum engizal: Anutunöŋ mötnariŋkö keu kemaŋi pakpak mi ambazip sarakŋi neŋön memba galöm kölinga qahö utekömapköra ali buŋanina akza. Miangöra böhi takapulakanŋi tosataŋ Buŋa keu lolonqaloŋ akepuköra mönö böŋ kinda bim qeba malme.

⁴ Ambazip tosataŋan möndöba urumelen kambu sutŋine ölöŋ ölölöŋgöba kaŋgotketka könaŋamŋini gongonŋi mi aukŋe qahö asuhui malje. Anutunöŋ ambazip mewöŋi yeŋgö keuŋini lök mönöwök jim teköiga ohogetka sihibölöŋinan qakŋine öŋgö-mamgö akza. Anutuninan keuŋi ala kalem möriamŋaŋgö könaŋi ölna indelakzapmö, ambazip aŋgöjörakŋinambuk mienöŋ mönö nanŋini sero namböŋnamböŋini turumegöra aka kalem möriamgö keuŋi mi möwököwöramgöba möŋaqöŋaigetka bölimakza. Mewö aka nanine Ketanaŋnini mohot Jisös Kraist Kambu ak neŋgi-makzawi, i qaŋ köla andö qe-makze.

⁵ *Inini keu pakpak mi lök nalö köröpŋi möt teköba maljemö, töndup galöm meme keu ki ölum engubapuköra kunbuk kewö jim gulim engimamgö mötzal: Kembunöŋ könagesöurupŋi Ijip kantrinöhök meköm enŋiiga kagetmö, könaŋep tosataŋan nalö kunöŋ qahö möt narim waŋgigetka mi köndenmönden ak enŋii ayuhuget. Galöm meme keu mi engöra aka kunbuk jizal.

⁶ Mewöyök Anutunöŋ Suep garataurupŋi jakömbuak tohoŋini al enŋiiga malgetmö, yeŋgöreŋök tosataŋan urukönöp aka keu bapŋe qahö anda nanŋini jakömbuak tohoŋini galöm köl engibingö urumohot qahö aka selŋini kösököget. Qequetal akerangöra aka Anutunöŋ i aköm enŋiiga jakömbuak

* 1:1: Mat 13.55; Mak 6.3 * 1:5: Eks 12.51; Jaŋ 14.29-30

mirinjini mosöta etket. Etketka “Nalö ketanje keunjini jim tekömam,” jiba tapepnöŋ (munŋamunŋa) gwaröhöba pandaman uruŋe al enŋiiga tata kotkera nalö teteköŋi qahö tat öngöme. Galöm meme keu mi enŋöra aka kunbuk jizal.

⁷*Tandök mohot mianjön Sodom, Gomora aka miri tosatŋi liliköba tatkeri, yengöreŋ asuhuyök. Ambazip mienjön mewöŋanök serowilin aka silegö sihim kömbönanjini möwöramgöba tandökŋi kun kewö aket: Azi nanŋirök ambi nanŋirök amimba malget. Mewö malgetka Anutunöŋ likepŋini melen enŋiiga könöp jitŋi teteköŋi qahö enŋohoi sihimbölö möta mala kota malme. Mewö mala böhi takapulakanj yengö galöm mem anŋubingö kaisöpsöpnina ahakze.

⁸ Ambazip takapulakanj mienjön mönö nalö kewöŋe tandök mohot mewöŋanöhök ahakze. Jenjini melenjini imutimutŋini laŋ eka mianŋöreŋ möndöba wuatangöba nanŋini silenjanŋö malmalŋini mem böliba kölköljŋiŋ miwikŋaimakze. Mewö mianjön Anutu jijiwilit aka jimongot jim wanŋiba kukösumŋi memba et alakze. Mewö aka Suepkö bem suahö ambazip asakmararanjambuk euyangöreŋ maljei, yengöra uruqeŋe keu töhöreŋ jim enŋimakze.

⁹*Mewö ahakzemö, Suep garata bohonŋi qetŋi Maikel yanjön mewöyök mewö akŋamgö lömböriba osiyök. Maikelnöŋ Mosesgö qamötŋangöra Bölöŋangö Toŋambuk anŋururuk aka möndöm-kösök ahök. Mi aka öngöba erökmö, töndup uruqeŋe keu töhöreŋ mi jim teköm wanŋimangöra awösamkakak qahö miwikŋaiba osiyök. Osiba kewöyök jim wanŋiyök, “Kembunöŋ mönö mindiŋ-göm gihima.”

¹⁰ Maikelnöŋ mewöyök mi osiyökmö, ambazip sohoboho mienjön mönö silenjini memba öngöba Buŋa keu qahö möt kutumakzemö, töndup mianŋöra uruqeŋe keu töhöreŋ laŋ jimakze. Tönpin mala sömbup soŋ ewö laŋlaŋ malje. Mötkutukutuŋini ölni qahö asuhuiga sömbup malmalgö sihimŋini korembiŋi miyök mörakze. Nanŋini sihim mötmötŋini gonŋonŋmanŋonjini mienjön mönö könden enŋigetka ayuhume.

¹¹*Anutunöŋ böhi takapulakanj miengö likepŋi melen enŋiiga sihimbölö ketanŋi mötmeangöra wölziköba Yei! jizal. Ambazip sohoboho mienjön azi Kein (Kain) yanŋö könanŋi mötöteiba anakze. Könanŋep kerök azi kembu kunöŋ azi qetŋi Balam töwa wanŋiiga Israel ambazip tilipköm enŋiiga janjuŋ anget. Böhi takapulakanj mienjön Balamgö silikŋi wuatangöba moneŋ miwikŋaibingöra urukönöp möta yuai ilinölaŋ ak bibihiba laŋ sohomakze. Azi qetŋi Kora yanjön Moses aka Aron tuarenjön ak etkiba köndenmönden miwikŋaiiga ayuhuyöhi, böhi mienjön mönö Kora ewö kezapjupjup aka mala ayuhume.

¹² Urumelen enjön urukalem kondel anŋubingöra tokoba lömbuan algetka takapulaka böhi mienjön mönö mianŋöreŋ mewöyök kamakze. Kaba dogonjini aukŋe kondela nanŋinanöhök gumohom anŋuba bau numbu nemakze. Mewö aka enŋö sile töwötŋini boromŋi boromŋi gamuŋinambuk ewö akze. “Ziozgö lama galöm akzin,” jiba ala enŋöra qahö mötmöriba kelök keu laŋ jimakze.* Kousu omanjini töhöntöhön kienjini qahö mewö malgetka luhutnöŋ muwutapköm enŋiiga laŋlaŋ anda kamakze. Ölni ahumapkö nalöŋe ipŋi ipŋi araronjini ölnjini qahö ewö kinje. Guluŋ sinŋinanök ewö aka mutuk köhömuŋi aka jalöŋini malmal köhöikŋanŋö könanŋeyök qözöla tala kunbuk kömum köhöigetka yahöt aiga köhömuŋi kötökŋi aka malje.

¹³ Yenjön köwet siri kukŋinambuk ewö laŋ kundutketka ahakmemenjan gamuŋambuk mi qölqölsöt gödöwörötŋambuk ewö aukŋe asuhumakza.

* **1:7:** Jen 19.1-24 * **1:9:** Dan 10.13, 21; 12.1; Ind 12.7; Dut 34.6; Zek 3.2 * **1:11:** Jen 4.3-8; Jan 22.1-35; 16.1-35 * **1:12:** Böhi mienjön törom ewö asamböta tatzemö, wanŋenjan yengöreŋ qaköba jömgöbapuk.

Sejgelau tosatjan könanjini sijgiba lan erakzei, yeñon mönö miangö dop janjun gemakze. Sejgelau miengö dop eta Anutunöñ yeñgöra pandaman göjiwinangö uruñe miri arengöm engiyöhi, mönö emuyangören dutje geba nalö teteköñi qahö tat öngöme.

¹⁴* Adamgö sakonñangö isinj qetñi Enok yanñon mewöyök ambazip takapulakanj miengö kezapqetok keunijni qeljine kewö jii ahöza: “Mötket, Kembunöñ Suep suahö ambazip töröñi tausenni tausenni jangö öngöngöñi ketanj mi engömembra eta asuhume.

¹⁵ Asuhugetka körek pakpak nengö keunijni jim teköma. Ambazip angöjörakñinambuk yeñon ahakmeme angöjörakñambuk wuatañ-göba sijgisöndokñini angöjörakñinambuk aka kotkeri, mi pakpak kewöta miangö likepñi melenj engiiga körek yeñgö qakñine öngöma. Pinjit ambazip angöjörakñinambuk miengöñ keu jenöñ gege gamuñambuk miangöñ Anutu jim qetal wangiba kotkeri, miangö likepñi pakpak melenj engiiga sihimbölöñini möta malme.” Enoknöñ galöm meme keu mewö jiyök.

¹⁶ Böhi sohoboho miengöñ jimongot aka sesekñai ewö ihururuk lan jim angumakze. Nanñini sihim kömbönanjini bölöñi wuatañ-göba tereñqereñda silenijni memba öngöba jakbak-öranböran ahakze. Ambazip tosatñi göda qeba kelök enguze ewö, mi yuai melenjda nanñine engimegö sihimñi möta kelewele ahakze. Mewö malje.

Galöm meme aka qambañ keu tosatñi

¹⁷ Mewö maljemö, wölböt alaurupni, Kembunijni Jisös Kraistkö aposolurupñan böhi takapulakanj yeñgö keunijni lök qeljine jigat ahöza. Inijni yeñgö keunijni mi ölum engubapuköra galömñini mem anguba malme.

¹⁸* Aposol yeñon engöra keu kewö jigat, “Jisösgö kaka nalöñan törriiga nalö teteköñe miangören mepaqepaik ambazip asuhume. Yeñon nanñini sihim kömbönanjini bölöñi wuatañgöba malmal angöjörakñambuk malme.” Mewö jigat.

¹⁹ Ambazip takapulakanj miengöñ mönö sutñine urujujul ak engigetka simbisembel akepuk. Uña Töröñan qahö sölölohöm engiiga gölmegö sihim kömbönanjini bölöñan galöm köl engiiga mi wuatañgömakze.

²⁰ O wölböt alaurupni, Anutunöñ mötnarip qainñi kun engiyöhi, miangöñ mönö tandöñini bohonñi öngöngöñi ewö akza. Eñon mönö mötnarip miangö qakñe kindanangöm anguba köhököhöi miwikñaimakñe. Uña Töröñan inahöm engimakzawangö dop mönö yangö ösumnöñ kindan köuluköba malme.

²¹ Anutunöñ jöpaköm engimakzawi, injini mönö yangö urukalemñe böñ qeba kinme. Kembunijni Jisös Kraistnöñ ak-kömökömu engiba kunbuk asuhuba malmal köhöikñe angota oyaenkoyañ malme. Inijni mönö nalö mi kam kunjumapköra kapan köla mamböta malme.

²² Ambazip uruñini melenjbingö uruyahöt akzei, mi mönö ak kömumba urukalem ak engiba malme.

²³ Tosatñan köñöp bölamnöñ an taköbingö tandök akzei, i gebepuköra mönö wölanj öröba bohonñini jöhöm engigetka letotpeak. Tosatñan sihim kömbönanjini bölöñan galöm köl engiiga qemasolokep maljei, i mönö ak kömumba jöpaköm engiba malme. Mewö malmemö, nanñini malmalñinan bölibapuköra mönö kenjöñini möta malme. Qemasolokep yeñon sijgisöndokñi sijgisöndokñi aketka miangöñ uruñini silenijni kokolak qeiga aukñe töwiba maljei, yeñgöra mönö galömñini mem anguba malme.

* **1:14:** Jen 5.18, 21-24 * **1:18:** 2 Pitö 3.3

Kölköljinjin akepuköra mönö opo söröjini töwötjinambuk mi tok sisitjini memba kude misirime. Mewö.

Möpömöpösei keu

²⁴ Mönö Anutu möpöseimakin. Yanön injini tala et enguba-puköra sel jöhöm engimangö köhöiza. Yanön ölop enguangita nanji je mesoholje al engii angota solanji keunji qahö kinda asakmararaji eka söngaiba köiranj köla malme.

²⁵ Anutu mohotjan Amötqeqe Tonini akza. Kembunini Jisös Kraistnöj nam köl nenjiiga Anutu möpöseim wangiinga qetji aködamunjambuk aka ahöma. Yanön möpnanjö möpneyök könahiba kota Öngöngö-namnini kukösumjambuk akza aiga nalö kewöje toroqeba yuai pakpak ösum-mumuñan galöm köla nalö teteköji qahö Kambu ak nenjiba malma. Keu mi ölna.

Indelindel keu Kraistnöŋ keu tölapŋi Jongöreŋ indelök. Jim-asa-asari

Jisösnöŋ gölme mosöta Suep mire öngöiga yambu 65 miangö dop teköiga aposol Jonöŋ Kimbi ki ohoyök. Nalö miangöreŋ urumelen könagesö Jisös möt narigeri, i sesewerowero ketani ak engiget. Jon mi gölme jölanni qetŋi Patmos miangöreŋ al wangigetka kösö mire ewö tarök. Patmos maliga Anutunöŋ jeni meleniga yuai könangep asuhumapkö imutŋi ehök.

Keu bohonŋi kewö: Jisösnöŋ Satan aka kerökurupŋi pakpak luhut ala memba et al engim teköma. Mewö aka mötnarip ambazip kötuetköm neŋgiiga Suep dölökŋi aka gölme dölökŋi miangöreŋ angota teteköŋi qahö oyaenkoyaeŋ malbin. Sesewerowero uruŋe malgeri, yeŋön lömböt möta mökösoŋda Jisös möt nariba pöndaŋ böŋ qeba kinmegöra kuŋgum engimakza. Jisösnöŋ keuŋi keuŋi mewöŋi jim kutuba indeliga Jonöŋ möta Kimbi ki ohoyök. Mi urumelen ambazip urunini nanğömamğöra aka ohoyök. Söpsöp keu aka keu tölapŋi mi gwötpuk. Keu tosatŋi möt kutubingö möt bibihizin.

Buk kianğö bahöŋi bohonŋi 11 mi kewö:

Keu mutukŋi 1.1-8

Zioz kambu 7 yeŋgö kimbiŋini 1.9-3.22

Kimbi köpöp supap 7:ŋan jöjöhöŋi 4.1-8.1

Tömun qainŋi kun 7 uget 8.2-11.19

Sekak namŋi aka jemnemba yahöt 12.1-13.18

Jemelen imutimut könaŋi könaŋi 14.1-15.8

Anutugöreŋ irimsesewöl qambi 7 mokoget 16.1-21

Babilon siti, jemnemba, kezapqetok takapulakaŋi aka Satan yeŋgö ayuayuhu 17.1-20.10

Jimtekötekögö nalö ketani 20.11-15

Suep gölme dölökŋi aka Jerusalem dölökŋi 21.1-22.5

Keu kötŋi teteköŋi 22.6-21

¹ Anutunöŋ yuai könangep zilaŋ asuhumawi, miangö könaŋi nup memeurupŋi neŋgöra kondel neŋgimapkö möta Jisös Kraistköra kondela kezapqetok keu jiba indelök. Indeliga Suep garata kun melaiiga welenqeqeŋi Jon nöŋgöreŋ kaba jüiga möral.

² Jisös Kraistnöŋ Anutugöreŋ Buŋa keu nanğöba jim asariba kondel niŋgiiga Jon nöŋön yuai mi jeni meleniga uba ehali, mi pakpak miangö dop toroqeba nanğöba jim asariba ohozal.

³ Kunŋan kezapqetok keu ki oyoŋmawi, yaŋön mönö simbawoŋ akza. Jisösgö kaka nalöŋan töriza. Miangöra kimbi kianğöreŋ keu ohoi ahözawi, ambazip mi kezap ala mötmei aka mi möt sölöngöba anğön kölmei, yeŋön mewöyök simbawoŋ akze. Mewö.

Jonöŋ Eisia prowinsgö zioz kambu 7 yeŋgö jölöŋini alök.

⁴*Jon nöŋön Eisia prowinsgö zioz kambu 7 eŋgöra kewö ohozal:

Kunöŋ mal köhöizawi, möpŋangö möpŋeyök mala koröhi, aka kunbuk lilingömawi, yaŋön mönö kalem möriam eŋgiiga luainöŋ malme. Mewöŋanök Anutugö uŋa bohonŋi 7 yaŋgö jakömbuak dum wösörje kinjei, yeŋön mönö kalem möriam engigetka luainöŋ malme.

* 1:4: Eks 3.14; Ind 4.5

⁵ *Jisös Kraistnöŋ Anutugö könaŋi pöndaŋ naŋgöba jim asariba mala mutukŋa kömupnöhök wahörök. Yaŋön gölmegö kiŋ kembu yeŋgö Kembuŋini akza. Yaŋön mönö seŋŋan saŋgoŋda siŋgisöndoknineyök pösat neŋgiba jöpaköm neŋgimakza.

⁶ *Yaŋön nini nanŋi bemtohoŋe ala mem letot neŋgiiga kiŋ ewö akzin. Buŋa nup galömurupŋi (prist) aka nanŋi Iwi Anutuŋaŋgö welenŋi qemakzin. Neŋön yaŋgö qetbuŋaŋi aka kukösumŋi möpöseininga nalö teteköŋi qahö aködamunŋambuk ahöm öŋgöma. Keu mi ölna.

⁷ *Eket, Kraistnöŋ mönö kousu uruŋe eta kama! Kamawi, nalö miangöreŋ nini körekmakörek i jeninan uba ekin. Börö marömŋi qetohogeri, yeŋön mönö mewöyök i ekŋe. Ambazip kambuŋi kambuŋi gölme dop tat anjini, neŋön mönö i eka körekmakörek yaŋgöra aka jiŋgeŋ köla amburereŋ akin. Keu mi ölbölna, uruyahötŋi kun qahö.

⁸ *Kembu Anutu mal köhöizawaŋön kewö jiza, “Nöŋön mutuhök mala (yuai pakpak miwikŋaiba könaŋgep jiba qahöwahiga) qöndökŋa mal öŋgömam. Miangö dop nöŋön kulem namŋi mutukŋi A aka kulem namŋi qöndökŋi Z akzal.” Nöŋön kukösum pakpakö Tonŋi möpŋaŋgö möpŋeyök mala kota maljal aka kunbuk lilingömam. Mewö.

Suep gölmegö azi ölnaŋgö tandökŋi kewö ehal:

⁹ Jon nöŋön engö urumelen neŋakŋini akzal. Kraistpuk qekötahöbiga nanŋi bemtohoŋe al niŋgiiga ambazipnöŋ sihimbölö ak niŋgigetka wahöjalinŋ mörakzal. Mi embuk möta mökösoŋda kapaŋ köla köhöiba kinjal. Anutugöreŋ Buŋa keu jim sehiba Jisösgö könaŋi naŋgöba jim asariba malalaŋgöra nömemba köwet jölanŋi qetŋi Patmos* miangöreŋ al niŋgiget malal.

¹⁰ Kembugö sonda kendon tatat nalö kunöŋ Uŋa Töröŋan nömeiga alburup umumŋan qakne öŋgöiga andöneyök qet ketanŋi kun möral. Qet kourukŋi mi tömun qainŋi kun (biugel) qetzawi, miangö tandöktandök ahöyök.

¹¹ Qet mianöŋ kewö jiyök, “Öroyuai uba ekŋani, miangö keuŋi mönö kimbi köpepnöŋ ohoman. Ohoba alnöŋga zioz kambu 7 yeŋgöreŋ anma. Siti 7 miengö qetŋini kewö: Efesus, Smörna, Pergamum, Taiataira, Sardis, Filadelfia aka Laodisia.”

¹² Keu mewö jiiga ötoŋi mörali, “Mi daŋön?” jiba eka mötmamgöra lilingöyal. Lilingöba kinda lambegö dum tatat goulnöŋ memeni 7 kingetka ehal.

¹³ *Lambegö dum tatat miengö sutŋine azi kun ekiga kaisoŋgolomŋan gölme azigö tandök ahök. Malukuŋi köröpŋi köla öroiga köna susuŋe eta turuyök. Opo jöhan maŋgihilakŋi goulŋambuk mi örigit ewö töptöpŋe embahöm aŋguba kinök.

¹⁴ Nöröp juŋŋan tuat lalamŋi kousu köpköp (snow) ewö ahök. Lama juŋŋi saŋgoŋgetka tuarizawi, mönö miangö dop ehal. Jekötŋan könöp bölam ewö jem asariiga kinök.

¹⁵ Köna susuŋan sösoŋihiba gohotŋi ahök. Ain bras könöpnöŋ ala delasi ohogetka jeiga gögöriŋ tohomakzawi, mönö miangö dop kölköl-bilikbilikŋambuk ahöyök. Keu jii mörali, mi o ketanŋan sianöŋ giliga ötoŋi ketanŋi mörakzini, mönö miangö dop ahöyök.

* **1:5:** Ais 55.4; Sum 89.27 * **1:6:** Eks 19.6; Ind 5.10 * **1:7:** Dan 7.13; Mat 24.30; Mak 13.26; Luk 21.27; 1 Tes 4.17; Zek 12.10; Jon 19.34, 37 * **1:8:** Ind 22.13; Eks 3.14 * **1:9:** Patmos mi köwet jölanŋi moröŋi (Yurop aka Afrika) Sutŋire Köwet miangöreŋ ahöza. Efesus mosöta Saut göröken 80 kilomita anman. Rom gawman yeŋön kegwek-kahasililiŋ ambazip keuŋini jim teköba közöla enguangitketka miangö kösö mirinöŋ malget. Ölöŋ kölböŋgö osiget. Gölme mi qararaŋkölkölna, köŋi sehisehiŋi. Jonöŋ yeŋgö sutŋine maliga sisa-kiŋ Nerwagö nalöŋe (yara 96-98) pösatketka erök. * **1:13:** Dan 7.13; 10.5, 14-15; Dan 7.9; 10.6, 15; Eze 1.24; 43.2, 17; Ais 44.6; 48.12; Ind 2.8; 22.13

¹⁶ Böröni ölñan senğelau 7 memba kinök. Numbuneyök bimgö sou ketani (bainat) jityahötñi likelike zuluk alalñan erök. Jemesoholñan wehön jeni körek asarim tekömakzawanğö dop asariiga ehal.

¹⁷ Nöñön i eka uruni duhui yanğö könaje tala eta kömup tandök ahöyal. Mewö ahöbiga böröni ölñan nöngö nöropne ala kewö jiyök, “Mönö kenğötki kude mötnöñ! Nöñön mutuhök mala (yuai pakpak miwikñaiba könajep jiba qahöwahiga) qöndökña mala öngömam.

¹⁸ “Nöñön malmal Toñi akzal. Kömumba malalmö, mötnöñ, nöñön mönö guliba wahöta malmal köhöikñi teteköñi qahö mal öngömam. Nöñön kömupkö kondotkondot Toñi galöm köla kömupkö uñem miri Toñi onğita kinji moröñi memba maljal.

¹⁹ Mianğöra yuai nalö kewöñe asuhuzawi aka könajepñe asuhumawi, nöñön mianğö könani kondelbi ekñan. Yuai ekñani, mi mönö papianöñ ohonöñga ahöma.

²⁰ Senğelau 7 böröni ölñe ahözei aka lambegö dum tatat goulñöñ memenji 7 ekzani, miengö könaniñi tölapñi kewö: Senğelau 7 mi zioz kambu 7 miengö garata galömñinanğö söpsöp akze. Lambegö dum tatat goulñöñ memenji 7 miengön mönö zioz kambu 7 miengö söpsöp akze.” Mewö.

2

Efesus urumelenj könagesö yengö qambanj keu

¹ Jisösnöñ toroqeba jiyök, “Jon göñön mönö Efesus sitigö zioz kambu yengö pom garatanjanğöra kimbi kewö ohoman,

“Kunöñ böröni ölñan senğelau 7 memba lambegö dum tatat goulñöñ memenji 7 miengö sutñine anda kaba kinakzawi, yanön keu kewö jiza:

² Nöñön göhö ahakmemegahö könani möt kutubi kewö ahöza: Göñön nöngöp ariba nupni köhöikñanök memba malakzan. Anğösirip kapan köla möta mököşöñda malakzan. Ambazip gonğonji yembuk ala qahöpmañöp aka ölña qepureiba közöl enğimakzan, mi mötzal. Tosatñan melaimelai azi aposol qahö aka töndup qetñini mewö qerakzei, göñön i esapesapnöñ ala kewöt enğinöñga munen jijiñinanğö könaniñan aukñe asuhuyök.

³ “Tosatñan nöngö qetnanğöra aka kahasililij ak gihigetka sihimbölä kapan köla möta mököşöñda malnöñ. Ösumeret olan qahö aka malnöñmö, yuai pakpak möt köşöñda kinda malnöñ, mi mötzal.

⁴ Mewö malnöñmö, urugahö keu kun kewö mötñi qahö dop kölja: Mutuhök urugi melenğda önöñi qahö jöpaköm niñgiba malnöñmö, urugan mönö sörauiga nalö kewöñe amöriba maljan.

⁵ “Mutuhök urusösöñgai ketani möta malnöñmö, mianğöreñök löwöriba eta eta amöriba et qeba maljan. Gi mönö nangi könagi mi mötmöriba möt kutuman. Mianğöra mönö urugi melenğman. Mutuhök urumelenğö yuaini akñöñi, mönö mianğö dop kunbuk suariba akñan. Urugi siñgisöndok mianğöreñök qahö melenğman ewö, nöñön mönö göhöreñ kaba lambegö dum tatatki qeköbiga urumelenj könagesö Efesus mianğöreñ kunbuk qahö ahöma.

⁶ Et guhuyökmö, göhöra kewö mötñi ölöwakza: Göñön Nikolait yengöreñ ahakmemenini tököba uru önön ahakzan. Nöñön mewöñanök mi tököba mianğöra uru önön ahakzal.

⁷ * “Enğöreñök kunñan kezapñambukñöñ malja ewö, Uña Töröñan zioz kambunji kambunji neñğöra keu jimakzawi, yanön mönö mi kezap ala möt kuma.

* 2:7; Jen 2.9; Ind 22.2; Eze 28.13; 31.8

“Kunḡan esapesap bölöḡi pakpak oḡgita luhut almawi, nõḡõn mõnõ i waḡgitpiga Anutugõ oyaenḡoyaen nupnõḡ (paradais) euyangõrenḡ õḡgõba mal-mal kõhöikḡaḡõ ip aumḡe tata kötḡi namba malma.” Mewõ.

Smõrna urumelen kõnagesõ yengõrenḡ qambaḡ keu

⁸*“Smõrna sitigõ zioz kambu yengõ pom garataḡinaḡõra mõnõ kimbi kewõ ohoman,

“Kõmumba guliba mal kõhöizawaḡõn mutuhõk mala (yuai pakpak mi-wikḡaiba kõnaḡep jii qahõwahiga) qõndõkḡa mal õḡgõmawi, yaḡõn keu kewõ jiza:

⁹ Gõḡõn wahõjaliḡ mõta etqeḡeḡi akzani, mi mõtzalmõ, Anutugõ jeḡe qet-buḡagan õḡgõḡõḡi aiga simbawõḡ akzan. Tosatḡan Juda ambazip qahõ aka tõndup qetḡini mewõ qerakzei, yengõn mepaqeḡpaik aka andõ qem gihigetka aḡḡõsirip mõrakzani, mi mõtzal. Yengõn ‘Kõuluk miri õlḡi akzin,’ jiba aiakaḡinan Satan mõpõseimakze.

¹⁰ “Sihimbõlõ mõta malmanmõ, miangõra keḡḡõtki kude mõtman. Mõtnõḡ, Bölöḡaḡõ Toḡan esapesapnõḡ al engimangõra ambazip kuḡgum engiiga engõrenḡõk tosatḡi engõmembra kõsõ mire al engime. Aḡḡõsirip ak engime, inḡini mi silim 10 mõta malme. Malbeak me kõmumbeak, mõnõ nõmbuk põndaḡ kingetka nõḡõn malmal kõhöikḡaḡõ ila jalõḡi engimam.

¹¹ * “Engõrenḡõk kunḡan kezapḡambuknõḡ malja ewõ, Uḡa Tõrõḡan zioz kambuḡi kambuḡi neḡḡõra keu jimakzawi, yaḡõn mõnõ mi kezap ala mõt kutuma.

“Kunḡan esapesap bölöḡi pakpak oḡgita luhut almawi, yaḡõ sileḡan kõmuiga mohot akḡapmõ, kõmup yahõḡḡi qahõ kõmumba geḡmororonḡ qahõ miwikḡaima.” Mewõ.

Pergamum urumelen kõnagesõ yengõ qambaḡ keu

¹² “Pergamum sitigõ zioz kambu yengõ pom garataḡinaḡõra mõnõ kimbi kewõ ohoman,

“Kunõḡ bimḡõ sou ketḡi (bainat) jityahõḡḡi likelike zuluk alalḡi memba maljawi, yaḡõn keu kewõ jiza:

¹³ Gõḡõn malmal tatatki denike ala maljani, mi mõtzal. Satanõḡ nanḡak jakõmbuak dum tatatḡi ali ahõzawi, gi mõnõ miangõ kõsutḡe malakzan. Tõndup nõḡḡõ qetḡi memba nõmbuk toroḡeba qekõtahõba kinakzan. Satangõ malmal tatatḡi Pergamum siti miangõrenḡ ahõiga Antipas yaḡõn nõḡḡõ kõnaḡamni naḡḡõba jiba jembon õḡi nene (qariwe ilikḡi nene) ewõ kinõkmõ, i engõ sutḡine miangõrenḡ qeḡet kõmuyõk. Gõḡõn ni mõt narim niḡḡimakzani, keu mi nalõ miangõrenḡ mewõyõk qahõ kõyatiba qaḡ kõlnõḡ.

¹⁴ * “Mewõmõ, urugahõ keu morõḡi kun kewõ mõḡpi qahõ dop kõlḡa: Gõhö kõnagesõ sutḡine tosatḡan kezapqetok azi takapulakaḡi qetḡi Balam yaḡõ jaḡḡuḡbuk mala wuatangõmakze. Kantri tosatḡi yengõn nene memba tandõ lop-ionḡ yengõ naluk kötḡin buḡa qeba kõnaḡine algetka õsumḡinan walõḡnõhi, Israel ambazipnõḡ mi qahõ nezema. Mutuk qahõ neḡetmõ, Balamnõḡ azi qetḡi Balak kewõ kusum waḡḡiyõk, ‘Gi mõnõ Israel ambazip mi nemegõra tutuhum engiman.’ Mewõ kusuba kuḡgum engiba simba ewõ utuba alõhi, yengõn mõnõ miangõrenḡ qakõba amḡeba neḡet aka serowilin laḡ aket. Engõrenḡõk tosatḡan Balamḡõ mõtmõḡ mi wuatangõmakze.

¹⁵ “Mewõḡanõk gõhö kõnagesõ sutḡine tosatḡan Nikolait yengõrenḡ mõtmõḡ munenḡi memba wuatangõmakze.

* **2:8:** Ais 44.6; 48.12; Ind 1.17; 22.13 * **2:11:** Ind 20.14; 21.8 * **2:14:** Jaḡ 22.5, 7; 31.16; Dut 23.4; Jaḡ 25.1-3

¹⁶ Mianğöra gi mönö urugi melenman. Mewö qahö akñan ewö, nöñön mönö zilañ göhöreñ kaba könagesöurupki mewöñi mi qetal engimam. Numbune bingö sou ketañi (bainat) ahözawi, mianñön mönö yarö gil engimam.

¹⁷ *“Engöreñök kunñan kezapñambukñöñ malja ewö, Uña Töröñan zioz kambuñi kambuñi neñğöra keu jimakzawi, yañön mönö mi kezap ala möt kutuma.

“Kunñan esapesap bölöñi pakpak oñgita luhut almawi, nöñön mönö nene tölapñi qetñi mana aka köt tuatñi wañgimam. Yahöt mi wañgibiga köt tuatñi mianğöreñ qetñi dölökñi ohogetka ahömawi, mi nanñök oyonñda mötma. Tosatñan mi qahö mötme.” Mewö.

Taiataira urumeleñ könagesö yeñgö qambañ keu

¹⁸ “Taiataira sitigö zioz kambu yeñgö pom garatanñanğöra mönö kimbi kewö ohoman:

“Anutugö Nahönñanğö jekötñan könöp bölam ewö jem asariiga köna susuñan sösöñihiba ain bras ewö kölköl-bilikbilikñambuk akzawi, yañön keu kewö jiza:

¹⁹ Nöñön göhö ahakmemegahö könañi möt kutubi kewö ahöza: Göñön Anutu jöpaköba möt narim wañgiba nupñi memakzan aka anğösirip kapañ köla möta mökösoñda malakzan. Könakönahine yuai aka menöñi, mi mönö nalö kewöñe mem sehiba aka memakzan.

²⁰ *“Mewö memakzanmö, urugahö keu kun kewö mötpi qahö dop kölja: Göñön ambi qetñi Jezebel yambuk urumohot aka i qahöpmahöp qepureim wañgimakzan. Yañön kezapqetok ambia qahö akzapmö, tøndup nanñi qetñi mewö qerakza. Yañön ambazip tutuhuba kewö kusum engimakza: Tandö lo-pionğö naluk kötin neneya buña qeba könañine algetka ösumñinan walöññöhi, mi mönö ölop nemba malme. Mewö kusum engiba nup meme alaurupni kungum enğiiga löwöriba janjuñ anda mi nemakze aka serowilin lañ ahakze.

²¹ Nöñön Jezebel uruñi melenmapköra nalö wañgialmö, serowilinñi mosöta uruñi melenmapkö qahö möta tøndup malja.

²² “Mianğöra nöñön ambi mi qeiga kawöl yöhöiga salöknöñ ahöba sihimbölo mötma. Mewöyök yambuk sero yonğorö ahakzei, yeñön ahakmemenini bölöñi mi qahö mosöta uruñini melenme ewö, nöñön mönö i mohot engubiga sihimbölo kanjamñambuk mötme.

²³ *Yañgö nahönböraturupñi i mönö engum könjöratpi kömume. Mewö akiga zioz könagesö körek eñön engeka nöñgö könani kewö möt yaköme: Nöñön ambazip urumötmötñini kewöta jit aka urusihimñini körek möt kömumba ahakmemeninañgö dop likepñi melenñda körek mohot mohot engö qakñine öñğöma. Nöñönök mönö mianğö Tonji akzal.

²⁴ “Yeñğöra mewö asuhumapmö, Taiataira engöreñök tosatanñan Jezebelgö mötmöt areñi mi qahö wuatangömakze. Mewö qahö aketka engöra mepaqepaik kewö aka jim engimakze, ‘Inini mötmöt öñgöñgöñanğö könañi qahö möt kutuba yaigep malje.’ Mepaqepaik mewö jiba ak engimakzemö, Satangö buña mötmötköra qet mewö qerakze. Nöñön zioz kambu körek engöra kewö jibi mötme: Nöñön lömböt kun qahö suariba albi engö qakñine öñğöma.

²⁵ Inini Buña keu memba maljei, mönö mianğöreñ qekötahöba malme. Nöñön kunbuk lilingömamañgö dop mönö mia wuatangöba malme.

²⁶ *“Kunñan esapesap bölöñi pakpak oñgita luhut ala kömumawañgö dop mönö tøndup jitni tem köla ahakñawi, nöñön i kukösum wañgibiga kian kantriñi kantriñi galöm köle engiba malma.

* 2:17: Eks 16.14-15; 16.33-34; Jon 6.48-50; Ais 62.2; 65.15 * 2:20: 1 Kin 16.31; 2 Kin 9.22, 30 * 2:23: Sum 7.9; Jer 17.10; Sum 62.12 * 2:26: Sum 2.8-9

²⁷ Iwinan kukösum ningiiga mi buña qem anguba Kembu maljal. Mewöñanök engörenök kunñan luhut almawi, nöñön i jakömbuak nupkö ilanji aka ain öröpñi wañgimam. Mi wañgibiga mianñön gölmeñi gölmeñi ambazip galöm köl engiba köhöikñanök mindingöm engiba malma. Gwaköm kimbut öröpnöñ qeba qesinjei, yañön mönö mianğö dop qegetal ambazip öröp pöwöwöm köhöikñi mianñön enguba köndenđa mendenj engiiga qeqelanlan malme.

²⁸ Mewöyök söñangö undi senğelau wañgimam.

²⁹ “Engörenök kunñan kezapñambuknöñ malja ewö, Uña Töröñan zioz kambuñi kambuñi neñğöra keu jimakzawi, yañön mönö mi kezap ala möt kutuma.” Mewö.

3

Sardis urumelenj könagesö yeñğö qambañ keu

¹ Jisösnöñ toroqeba kewö jiyök, “Sardis sitigö zioz kambu yeñğö pom garatanjanğöra mönö kimbi kewö ohoman,

“Kunöñ Anutugö uña bohonñi 7 aka senğelau 7 mi böröñe ahöi memba maljawi, yañön keu kewö jiza: Nöñön göhö ahakmemegahö könani möt kutubi kewö ahöza: Göñön ambazip jeñine guliba maljanangö qetñi bisimakzanmö, Anutugö jeñe köhömuñi akzan.

² Mianğöra mönö imbigi möta wahötman. Göhö ahakmemegan nöngö Anutunangö jeñe aködamunñambuk qahö akza. Göhö könanamgi kewöta mewö miwikñaijal. Göhö könagesö uruñe urumelenj ambazip tosatñi kunbuk maljemö, yeñön mewöyök kömum taköbingö akze. Mianğöra göñön mönö mem köhöim engiba malman.

³ *³ “Anutugö yuai gihigetka buña qem anguba mötnöñi, mi mönö urukönömge jöhöba mötmöriman. Buña mi mönö tem köla urugi meleşman. Guliguli qahö malman ewö, nöñön mönö yonğorö meme ewö ölöñ kaba asuhumam. Kamamanğö aua nalöñi qahö mötnöñga keunan mönö zilan qake öngöiga lömböt miwikñaiman.

⁴ Mewömö, Sardis zioz kambu engö sutñine ambazip awamdökñi eñön opo söröñini ölöñanök galöm kölgetka töwötñambuk qahö akze. Mianğöra yeñön ölöp maluku tuatñan silenine löngöta nömbuk anda kaba malme. Yeñön mönö mewö aka malmeangö dop akze.

⁵ “Kunñan esapesap bölöñi pakpak onğita luhut almawi, yañğöra mönö maluku tuat lalamñi wañgigetka köla malma. Yañğö qetñi malmal köhöikñangö buk papianöñ ohoget ahözawi, nöñön mi qahö kutumam. Iwinangö jemesoholje anğoriga Suep garataurupñan eketka qetñi ölöp aukñe jim miwikñaim engimam.

⁶ “Engörenök kunñan kezapñambuknöñ malja ewö, Uña Töröñan zioz kambuñi kambuñi neñğöra keu jimakzawi, yañön mönö mi kezap ala möt kutuma.” Mewö.

Filadelfia urumelenj könagesö yeñğö qambañ keu

⁷ *⁷ “Filadelfia sitigö zioz kambu yeñğö pom garatanjanğöra mönö kimbi kewö ohoman,

“Kunöñ Azi Töröñi aka Ölbölñi aka kiñ Deiwidkö ki moröñi memba galöm köla maljawi, yañön keu kewö jiza: Yañön nanğu metaliga kunñan mi köla kiñi memamğö osima. Yañön mi köla jöhöiga kunñan mi musulmamğö osima.

⁸ Nöñön göhö ahakmemegahö könani ölöp möt kutuzal. Alani mötnöñ, göhö ösumgan eretñi akzawi, mi mötzal. Eretñi akzapmö, göñön mönö nöngö Buña

* **3:3:** Mat 24.43-44; Luk 12.39-40; Ind 16.15; Eks 32.32-33; Sum 69.28; Ind 20.12; Mat 10.32; Luk 12.8

* **3:7:** Ais 22.22; Job 12.14

keuni tem köla könani wuatangöba qetni qahö qaṅ köla malnöṅ. Mianṅöra nöṅön naṅgu kun wösöge metalbiga kunṅan mi kölmamgö osima.

9 **“Mötnöṅ, kambu kun yeṅön ‘Köuluk mirininambuk akzin,’ jiba aiakaninan Satan möpöseimakze. Juda ambazip qahö aka tündup qetṅini mewö qeta munen jimakze. Nöṅön ambazip mi kuṅgum engibiga göhö könaṅangi möt asarime. Mi möt asariba kaba göhö könage sipköba eta jöpaköm gihimakzali, mi aukṅe jim miwikṅaime.*

10 Nöṅön kapan köla lömböt möta mököstöṅda kin köhöimangö jiali, göṅön nöṅgö jimkutukutuni mi aṅgön köla wuatangöba malnöṅ. Mianṅöra nöṅön mewöyök gi kewö aṅgön köl gihimam: Wahöjaliṅ nalö tandökṅi kun kaba kantriṅi kantriṅi dop köla gölmenöṅ mal anjei, mi esapesapnöṅ al engima. Nalö mianṅön kam kuṅguiga nöṅön gi wahöjaliṅ mianṅöreṅök meköba bohongi jöhömam.

11 *“Nöṅön mönö zilaṅ liliṅgöba kamam. Kunṅan utum gihiba ila jalö memene luhut al ghibapuköra mönö urugö inap ahöm gihizawi, mi mönö töp memba malnöṅga qahö sohoba kahaimök ahöma.*

12 **Kunṅan esapesap bölöṅi pakpak oṅgita luhut almawi, nöṅön mönö i waṅgita nöṅgö Anutunangö möpömpösei jike (tempöl) uruṅe kuṅgubiga tandöṅi akṅa aka nalö kunöṅ mi kunbuk qahö mosötma. Mianṅöreṅ maliga sileṅe nani Anutunangö qetṅi, Anutugö sitiṅangö qetṅi aka nani qetṅi dölökṅi qet karöbut mi ohomam. Anutunan Jerusalem sitiṅi dölökṅi mi nanṅi mire euyangöreṅ ali ahözawi, mianṅön Suepnöhök eta gölmenöṅ asuhuma.*

13 *“Engöreṅök kunṅan kezapṅambuknöṅ malja ewö, Uṅa Töröṅan zioz kambuṅi kambuṅi neṅgöra keu jimakzawi, yaṅön mönö mi kezap ala möt kutama.” Mewö.*

Laodisia urumeleṅ könagesö yeṅgö qambaṅ keu

14 **“Laodisia sitigö zioz kambu yeṅgö pom garatanṅangöra mönö kimbi kewö ohoman,*

“Kun qetṅi Amen. Yaṅön Anutugö keuṅi pöndaṅ naṅgöba Dangunu ölbölṅi akza. Anutu bauköiga yuai pakpak miwikṅaiyohotka galöm kölakzawi, yaṅön keu kewö jiza:

15 Nöṅön göhö ahakmemegahö könaṅi möt kutubi kewö akza: Urugi qahö amöriza aka nöṅgö könöp bölamnan uruge qahö jemakza. O urugan amöribawak me könöwibawak, mianṅön mötṅi dop kölbawakmö, jöṅaṅe malnöṅga qahö dop kölja.

16 *“Kun me kun dop kölbawakmö, urugan borom kun könöpkönöp aiga könöpan qahö jezawi me uruamöt qahö akzani, mi qahö dop kölja. Könöp aka amöt sutṅire uruyahötnöṅ laṅ maljanangöra mönö numbuneyök söwötköm gihibi geman.*

17 Nangi silegi mem öṅgöba kewö jimakzan: Nöṅön azi kindiṅbirik qetbuṅanambuk akzal. Sukinap mem sehiba dopne miwikṅaizal. Siyoṅsayoṅi qahö mala yuai kungöra qahö osizal. Mewö jimakzanmö, könaṅangi öṅi qahö möt kutuzani, mi kewö: Göṅön mönö kumkanjam aka tapötkokorok (dabökokorok) malnöṅga tosatṅan wösömötmöt ak gihimakze. Wanapṅi mala jegi gömöliiga tiktauk sile aukṅe malakzan.

18 *“Mianṅöra qambaṅ keu kewö gihizal: Göṅön nöṅgöreṅök yuai karöbut ki söṅgöroṅi meman: Azi kindiṅbirik qetbuṅagabuk akṅangöra mönö goul könöpnöṅ delasi ohoba gödöwöroṅi mendenget sösoṅihiba eta qahöwahöhi, mi mönö bohönṅi meman. Sile aukṅe malakzani, mianṅö gamuṅi*

* 3:9: Ais 49.23; 60.14; 43.4 * 3:12: Ind 21.2; Ais 62.2; 65.15 * 3:14: Qam 8.22

közambötmangöra mönö maluku tuatni bohonni memba löngötman. Jegi gömölizawi, miangöra mönö jepisik kelök mi bohonni memba jegi törörök umangöra miriman.

¹⁹ *Nöñön wölböt alaurupni jöpaköm engimakzali, mi körek bölönamñinanangöra tembula jim engiba mindinqindiñ ak engimakzal. Ölöwaknegöra mewö ahakzal. Miangöra gi mönö jaulalañ mosöta urugi melenña singisöndoki andö qeba malman.

²⁰ “Mötnöñ, nöñön nañgunöñ qeba kinjal. Kunñan nöñgö keu imbini möta uru nañguni musulmawi, nöñön mönö yañgö miri uruñe öñgöba yambuk tatpi yañön nömbuk köisirik tata mohotñe nene nemit.

²¹ “Nöñön esapesap bölöñi pakpak oñgita luhut ala Iwinan noañgiri yañgö jakömbuak dumñe eta qöhöröñe tatzal. Miangö dop kunñan esapesap bölöñi pakpak oñgita luhut almawi, nöñön mönö i wañgitpiga nöñgö jakömbuak dumne eta qöhöröñe tatma.

²² “Engöreñök kunñan kezapñambuknöñ malja ewö, Uña Töröñan zioz kambuñi kambuñi neñgöra keu jimakzawi, yañön mönö mi kezap ala möt kutuma.” Mewö.

4

Jeni melenña kunöñ Suep jakenöñ tariga ehal.

¹ Miangö andöñe jemelen kunbuk asuhuiga Suep miri nañguni kun añañiiga ehal. Ekiga imbi mutuk tömun qainni kun (biugel) ewö keu jiiga mörali, yañön mönö suariba kewö jiyök, “Gi mönö kewö kotnöñga andöñe yuai asuhumawi, mi kondel gihimam.”

² *Mewö jiiga miangöreñök Uña Töröñan nömeiga alburupñan qakne öñgöiga yuai kewö ehal: Suep miri uruñe jakömbuak dum ahöiga kunñan miangöreñ tarök.

³ Taröhi, yañgö jemesoholñañgö asakñan mönö eröknam me jamönjin qetñi jaspö aka wale bönbönñi me köt qetñi karnilian miangö dop gilikbilikñambuk asariba ahöyök. Kiam nesilam kun kulem mundañi mumunene kamböñi me jamönjin qetñi emerald ewö mianön jakömbuak dum mi lökñanök liliköba töñgönñi göröhiba ahöyök.

Dum bohonni liliköba dum 24:ñan tatze.

⁴ Jakömbuak dum tosatni 24 mienön dum bohonni mi liliköba tatketka miengö qakñine Anutugö jitñememeurup 24 tatket. Yeñön malukuñini tuat lalamñanök öluñ geiga nöropñine goul ila jalö kunduta tatket.

⁵ *Dum bohonni miangöreñök wöl bilikbilik jesöngö asariiga giñgururuñ asuhuiga imbi wölpöndañgö ötoñ kourukñi ewö möral. Dum bohonñañgö wösöñe tos kiwa asakñi 7 jeba asariba kinget. Kiwa 7 mi Anutugöreñ uña bohonni 7 akze.

⁶ *Mewöñanök jakömbuak jake wösöñe yuai gilikbilikñambuk köwet ewö ehal. Mi kirin jöhanñi jöhanñi kölköl-bilikbilikñinambuk melenña asarimakzei, mönö miangö dop asariyök. Jake bibiñe dum liliköba bem jembon 4 kinget. Andöñini aka wösöñini mi jeñinanök dop köliga kinget.

⁷ Bem jembon mutukñan laion sömbup ewö ahök. Alañan bulmakau aziñi ewö ahök. Alañiri kungö kaisongolomni mi azi jesöngöröñañgö tandök ahök. Alañini 4:ñan tukapkap bölbölgömakzawañgö tandökña ahök.

* **3:19:** Qam 3.12; Hib 12.6 * **4:2:** Eze 1.26-28; 10.1 * **4:5:** Eks 19.16; Ind 8.5; 11.19; 16.18; Eze 1.13; Ind 1.4; Zek 4.2 * **4:6:** Eze 1.5-10, 22; 10.14; Eze 1.18; 10.12; Ais 6.2-3

⁸ Bem jembon 4 mohot mohot yengö ginginñini 6 pakpak ahöm engyök. Silenini lökñanök aka ginginñini bapñe mewöyök jekötñinanök dop köl engiiga kinget. Kinda sungem silim liñet kewö qörörök kölakze, “Kembu Anutu kukösum pakpakö Tonji göñön mönö töröñi aka töröñi aka töröñanök akzan.

Malmal Tonji göñön mönö möpñangö möpñeyök mala kota maljan aka kunbuk lilingöba asuhuba mal öngöman.”

⁹ Bem jembon 4 mienñön mönö mewö möpömöpöse liñet kölakze. Kunöñ jakömbuak dumnöñ kinda nalö teteköñi qahö mal öngöba malmawi, i aködamun qetbuña al wañgiba saiwap jimakze.

¹⁰ Mewö ahakzeangö dop Anutugö jitñememe 24 mienñön eta kun jakömbuak dumnöñ tatzawi, yangö jeñe simin köla sipkömakze. Kunöñ nalö teteköñi qahö mal öngöba malmawi, yangö waikñi memba möpöseim wañgimakze. Möpöseim wañgiba ila jalöñini qeköba jakömbuak dum wösöñe ala kewö jimakze,

¹¹ “O Kembu Anutunini, göñön öröyuai pakpak miwikñaim enginöñ. Göhö jitsihitkan nam köl engiiga letota malmal miwikñaiba malje. Miangöra aködamun qetbuña mi al gihiba saiwap jim gihimakzin. Göñön motñan mönö möpöqöpöse pakpak añgön kölmanangö dop akzan.” Mewö.

5

Lamanöñ Anutugö böröñeyök kimbi köpöp meyök.

¹ *Miangö andöñe kimbi köpöp kun ekiga jakömbuak dumnöñ tatzawangö böröñi ölñe ahöyök. Kimbi miangö sinñi mi likeplikep lökñanök kulemöhök ohoba köpeiba sapönöñ ala muñgem supap (sil)* 7:nöñ köla mekötahögetka ahöyök.

² Mewöyök Suep garata ösum-mumuñambuk kun ekiga köhöikñanök qeta buzup keu kewö qesiba jiyök, “Dañön sarak sorokñi aka ölöp kimbi köpöp kiangö muñgem supapñi (sil) munjurata kötulmawangö dop akza?”

³ Mewö jiyökmö, Suepnöñ, gölmenöñ aka kömupkö uñem miri miangören körekmakörek engegetka kunñan kun mi mutula kulemñi ekñawangö dop qahö ahök.

⁴ Kunñan kun sarak sorokñi aka kimbi mi mutula kulemñi ekñawangö dop qahö miwikñaigeri, miangöra nöñön gwötpuk sahöt böliäl.

⁵ *Sahöt bölibiga Anutugö jitñememe yengörenök kunñan nöngöra keu kewö jiyök, “Mönö kude sahötnöñ. Mötnöñ, Juda kambunöhök Deiwidkö gwölönarökñi kun ahuba laion sömbup ewö aka Bölöñangö Tonji luhut ala malja. Yañön mönö ölöp köhöiba kimbi köpöp kiangö muñgem supapñi (sil) 7 mi munjurata kötulma.”

⁶ *Mewö jiiga Lama moröñi ekiga jakömbuak dum bibiñe bem jembon 4 miengö sutñine kiniga Anutugö jitñememe yengön liliköm wañgiget. Lama moröñi mianñön mönö qeget kömuyöhangö tandökña kinök. Ilikñi 7 aka jekötñi 7. Anutunöñ uñaurupñi bohonñi 7 melaim engiiga gölmegö ambazip pakpak yengören anda maljei, jekötñi 7 mi mönö yengö söpsöpñina akze.

⁷ Lama moröñi mi ekiga kaba kimbi köpöp supapñambuk mi jakömbuak dumnöñ tatzawangö böröñi ölñeyök meyök.

* 5:1: Eze 2.9-10; Ais 29.11 * 5:1: Kantri tosatñe kimbi ohoba esunöñ ala sapö memba kunñan mi kötulbapüköra aka muñgem supapñöñ kölakze. Kunñan muñgem supap (sil) mi lañ munjurata kulemñi yongorö oyongbawak, mi mönö miwikñaigetka keubuk akña. Kimbi tonjanök mi galöm kölakza. Miri mi ki namñi ala misiin gemakzapmö, kimbi mi muñgem supapñöñ jöhömakze. * 5:5: Jen 49.9; Ais 11.1, 10

* 5:6: Ais 53.7; Zek 4.10

8 *Mi meiga bem jembon 4 aka Anutugö jitnememe 24 mienön mönö miangörenök Lama moröñangö wösöñe sipköba eta simin kölget. Yeñön mohot mohot kulele aka goul qambi memba kinget. Ambazip sarakñan köulukögetka Anutugören öngömakzawi, mianön mönö jiniñ ohohogö dop aiga wörönñi umköhōwakñambukñöñ öngöba pukpukömakza. Wörön mewöñan mönö goul qambiñini kokolak qeiga kinget.

9 *Simin köla liñet dölökñi kewö köla jiget, “Göñön qainñi kun akzan. Gi guhugetka kömumba sepki mokoba mianön ambazip bohonñi memba engömenöñ. Ambazip mi bem isikñinañgö dop, keu jöl jijininañgö dop, kambuñinañgö dop aka kantrininañgö dop. Göñön mönö miangörenök tosatñi engömenöñga Anutugö buñaya akze.

Miangöra göñön mönö sarak sorokñi aka kimbi köpöp supapñambuk memba munğem supapñi (sil) mutulmanañgö dop akzan.

10 *Yeñön Anutugö buñaya aketka kusum engiba kungum enginöñga bem-tohōñgahö kiñ kembu kambu aka jike nup galömurupñi akze. Yeñön Anutuninañgö nupñi memba mala gölme dop ambazip galöm köl engiba mal öngöme.”

11 *Liñet mewö köla jigetka möta toroqeba uba Suep garata jañgöñini tausenni tausenni aka milyönñi milyönñi mi enğeka liñet kourukñini möral. Yeñön jakömbuak dum kösutñe kinda bem jembon 4 aka Anutugö jitnememe 24 mi liliköm engiba liñet kölget.

12 Liñet köhöikñanök qeta kewö kölget, “O Lama moröñi qeget kömuyöhi, yañön mönö sarak sorokñi aiga Anutunöñ ösum-mumu aka töhötmöriam wañgiiga dopñe akza. Mötkutukutu öngöñgöñi aka kukösum pakpak buña qeiga dopñe akza. Sarak sorokñi aiga ölop qetbuña pakpak wañgiinga asakmararañ buña qeiga möpöseim wañgizin.”

13 Mewö köla möpöseigetka liñet kambu kun kewö möral: Anutunöñ mal-malbuk miwikñaim engiyöhi, mienön mönö körekmakörek liñet kölgetka möral. Suepnöñ maljei, gölmenöñ maljei, kömupkö uñem mire aka köwet qakñe maljei, mienön mönö körek numbuñini mindiriba liñet kewö kölget, “Jakömbuak dumñe tatzawi aka Lama moröñi neñön inñiri möpöseim etkizin. Kötuət Tonji etkö qetbuñañiri jim qarimakzin. Nalö dop asakmararañ etkiinga kukösum Tonji mi teteköñi qahö mal öngömahot.”

14 Mewö kölgetka bem jembon 4 mienön “Keu mi ölna,” jiget. Jigetka Anutugö jitnememe yeñön eta dapköba simin köla Anutu waikñi memba möpöseim wañgiget. Mewö.

6

Lama moröñan munğem supap mohot mohot munjuratza.

1 Mewö möta yuai kewö asuhui ehal: Lama moröñan kimbi köpöp supapñambukö munğem supapñi (sil) 7 miangörenök mutukñi munjurata kötulök. Kötuliga bem jembon 4 yeñgörenök kunñan keu kewö jiyök, “Mönö asuhuba kanöñ!” Keuñi mi wölpöndañ tandök ewö köhöikñanök qeri möral.

2 *Mewö jiiga möta miangörenök hos tuatñi kun asuhuiga ehal. Hos miangö qakñe azi kun timbiñambuk tari tosatñan ila jalö wañgigetka nöropñe kölök. Mi köla yarönöñ luhut ala malöhañön mönö kunbuk hos qakñe yarönöñ luhut almangöra anök. Mewö.

* 5:8: Sum 141.2 * 5:9: Sum 33.3; 98.1; Ais 42.10 * 5:10: Eks 19.6; Ind 1.6 * 5:11: Dan 7.10
* 6:2: Zek 1.8; 6.3, 6

³ Lama moröñan muñgem supap (sil) yahötñi munjurata kötuliga bem jembon yeñgöreñök yahötñi yañön keu kewö jii möral, “Mönö asuhuba kanöñ!”

⁴*Mewö jiiga miangöreñök hos kun silenji pisikñi somabö lambuk asuhuiga ehal. Azi kun hos miangö qakñe taröhi, Anutunöñ mönö i yom karim gili luai qahöwakñapkö kukösumñi wañgiyök. Mi wañgiiga gölmenöñ aum añaöhöba kömumegöra kuñguiga ambazip uru mem wahöt engimawañgö kukösumñi miwikñaiyök. Mi miwikñaiiga bingö sou keta bölökñi wañgigetka memba anök. Mewö.

⁵*Lama moröñan muñgem supap (sil) karöbutñi munjurata kötuliga bem jembon yeñgöreñök karöbutñi yañön keu kewö jii möral, “Mönö asuhuba kanöñ!” Mewö jiiga miangöreñök hos injañi kun asuhuiga ehal. Azi kun hos miangö qakñe taröhi, yañön inapkö lömbötñi kewötpingö dop ipñi (skeil) mi böröñan memba tarök.

⁶ Mewö tariga bem jembon 4 yeñgö sutñineyök kunöñ keu jiiga kourukñi tandök ewö kewö möral, “Silim mohotkö töwañi (Kina 5) miangön ölop 1 kilogram wit flaua me 3 kilogram bali flaua mi bohonñi meman. Töndup nenegö oil ip aka wain kösö nup mi mönö kude mem bölime.” Mewö.

⁷ Lama moröñan muñgem supap (sil) 4:ñi munjurata kötuliga bem jembon 4:ñan keu jiiga kourukñi kewö möral, “Mönö asuhuba kanöñ.”

⁸*Mewö jiiga miangöreñök hos kun silenji gohotgohot aka kaukaunambuha asuhuiga ehal. Hos miangö qakñe taröhangö qetñi mi kömupkö kondotkondot Tonji. Yañgö kösutñe kömupkö uñem miri Tonjan mewöñanök i wuatangöba kayök. Gölme mendengetka bahöñi 4 ahöiga miangöreñök kungö ambazipñi mi galöm köl engibitkö kukösumñi mi Anutunöñ etkiyök. Kukösum mi etkiiga ösumñiran gölmegö ambazip bahöñi mi kewö mem kömum engiyohot: Tosatñan sou ketañan (bainat) auba kömuget. Tosatñan bödinöñ kömuget. Kawöl kanjamñambukñöñ tosatñi engömeiga kömuget aka tosatñi mi gölmegö sömbup kalñi mienöñ engöhögetka kömuget. Mewö.

⁹ Lama moröñan muñgem supap (sil) 5:ñi munjurata kötuliga miangöreñök Anutugö ambazip tosatñi engugetka kömugeri, yeñgö uñañini engehal. Yeñön Anutugö Buña keuñi añañgö köla nañgöba jim sehiba malgerañgöra engugetka kömumba alta bapñe ahöget.

¹⁰ Euyangöreñ ahöba köhöikñanök kewö qetket, “O Kembu kukösum Tonji, göñön diñdiñi aka ölbölñi akzan. Miangöra mönö nalö dawik mambörin teköiga miangöreñ gölmegö ambazipñi kewöt engiba keuñini jim teköman? Neñön gi welen qem gihiinga neñgugetka sepninañgö kitipñi mi mönö wani nalönöñ melenñöñga qakñine öñgöma?”

¹¹ Mewö jigetmö, maluku tuatñi köröpñi mi mohot mohot yeñgöra köl engiget geiga Anutugö jimkutukutu kewö engigetka mötket, “Inini mönö toroqeba nalö töröptökñi mamböta malme. Mötnarip alaurupñinan toroqeba urugö nup memba malgetka inini ewö mewöñanök engugetka kömume. Yeñön kömugetka jañgö alali, miangön dopñe aiga nalö miangöreñök mönö engugeri, yeñgö keuñini jim tekömam.” Mewö.

¹²*Lama moröñan muñgem supap (sil) 6:ñi munjurata kötölöhi, mi uba ehal. Mi munjurata kötölöhi, nalö miangöreñ kenöñ tandökñi sohosoñi gilök. Wehön jeñan böuktutuk ala injañ köla wösöbirikö malukuñi sanjöp ewö (meme jupñan memenañgö tandök) aiga söñauyök. Köiñ jeñan melenña lökñanök pisihiba sep ewö ahök.

¹³*Mewö aiga senjelau suepnöñ ahözei, mienöñ mönö gölmenöñ etket.

* **6:4:** Zek 1.8; 6.2 * **6:5:** Zek 6.2, 6 * **6:8:** Eze 14.21 * **6:12:** Ind 11.13; 16.18; Ais 13.10; Joel 2.10, 31; 3.15; Mat 24.29; Mak 13.24-25; Luk 21.25 * **6:13:** Ais 34.4

Newaŋ kötji gohoriba tatketka luhut köhöikŋan qeba utuköba mumburatiiga erakzei, mönö mianğö dop buratiba gölmenöŋ tata pilpil etket.

¹⁴ *Mewö etketka suep ehakzini, mianğön mönö ayapköyök. Kimbi köpep köpeigetka öröba anakzawaŋğö dop mönö wölakzak öröba anda ayapköyök. Mi ayapköiga kunduŋi pakpak aka köwetkö gölme jölanŋi jölanŋi mi mönö körek ahöahöŋineyök zilaŋ kök ala sömuniget.

¹⁵ *Mewö asuhuiga gölmegö kiŋ kembuŋi kembuŋi, azi jembonŋi jembonŋi aka suahö galömŋi galömŋi mienğön mönö ölöŋ köla asambötket. Ambazip kindiŋbirik qetbuŋaŋinambuk, ambazip kukösumŋinambuk mi mönö körek kök ala asambötket. Nanŋini nupŋini memakzei aka toŋinaŋğö welenŋini öne qemakzei, mi mönö körek pakpak baŋet, köt kinimŋi aka kunduŋaŋğö sem siaŋi jaruba mianğöreŋ asambötketka engehal.

¹⁶ *Mianğöreŋ asamböta kunduŋi Toŋi aka sem sia Toŋi engehola kewö uletket, “Inini mönö kunduŋi jim tekögetka buaköba kaba turum nenğiget. Jakömbuak dumŋe tatzawaŋğön jemesohol köl nenğibapuköra aka Lama moröŋaŋğö irimsesewölŋan nenğubapuköra mönö jim tekögetka közamböt nenğiget.” Mewö uletket.

¹⁷ *Yetkön irimsesewölŋiri aukŋe kondeljahori, mianğö nalöŋi ketanŋan mönö kam kuŋguba ahöza. Mi kuŋŋan kun mesohol köla kinmawaŋğö dop qahö. Mewö.

7

Israel ambazip 144.000 mi Anutunöŋ asö köl enğima.

¹ *Mianğö andöŋe Suep garata 4 engekiga gölmegö waŋğömŋi 4 mianğöreŋ kinget. Yeŋön gölmegö luhut Toŋi bohonŋi 4 mi jöhöm enğiba aŋğön kölget. Luhutnöŋ gölme qakŋe me köwet qakŋe laŋ gilbapuköra me ip kuŋŋan qebapuköra mönö Toŋi 4 mi böröŋinan memba jöhöba kinget.

² Anutunöŋ Suep garata 4 mi gölme aka köwet könden enğibingö kukösumŋi enğiiga gölme waŋğömŋine kinget. Mewö kingetka engehiga Suep garata kuŋöŋ wehön kotkotŋeyök asuhaba wahöri ehal. Yaŋön malmalgö Toŋi Anutugö muŋgem asö öröpŋi galöm köla kaba Suep garata 4 yeŋğöra köhöikŋanök qerök.

³ Qeta keu kewö jiyök, “Inini mönö gölme me köwet mi zilaŋzilaŋ kude könden etkime aka ip mi kude ayuhum enğime. Mi qahöpmö, mönö mambötketka mutuk zilaŋğök Anutuninaŋğö muŋgem asöŋi mi nupŋi memakzei, yeŋğö mesoholŋine mekötahöm enğibin. Mi mutuk kösöba mekötahöm enğingun andöŋe mi ölop könden da ayuhume.”

⁴ Mewö jiiga Anutugö muŋgem asöŋi mi Israel ambazip tosatŋi yeŋğö mesoholŋine kösöm enğiget. Kuŋöŋ yeŋğö jaŋğöŋini jiiga kewö möral: Israel ambazip kambu 12 pakpak mi enğöreŋök mindiriba ambazip 144.000 mi kösöm enğiget.

⁵ Israel kambu mohot mohot mi enğöreŋök 12.000 mewö mewö kösöm enğiget. Juda kambugö 12.000, Ruben kambugö 12.000, Gad kambugö 12.000,

⁶ Aser kambugö 12.000, Naftali kambugö 12.000, Manase kambugö 12.000,

⁷ Simeon kambugö 12.000, Liwai kambugö 12.000, Isakar kambugö 12.000,

⁸ Zebulun kambugö 12.000, Josef kambugö 12.000 aka Benjamin kambugö 12.000. Mewö mewö asö köla mekötahöm enğigetka mindiriba 144.000 ahök. Mewö.

* **6:14:** Ind 16.20 * **6:15:** Ais 2.19, 21 * **6:16:** Hos 10.8; Luk 23.30 * **6:17:** Joel 2.11; Mal 3.2

* **7:1:** Jer 49.36; Dan 7.2; Zek 6.5; Eze 9.4, 6

Oyaenƙoyaen malmeanƙö kambu ketanƙi ehal.

⁹ Mianƙö andöŋe kambu jitƙi buburatinƙi janƙöŋini kude oyoŋoyoŋö dop mi ehal. Ambazip mi kambuƙinanƙö dop, bem isikƙinanƙö dop, kantrinƙinanƙö dop aka keu jöl jijiƙinanƙö dop tokoba jakömbuak dum aka Lama moröŋi yetkö wösöŋire kinget. Mianƙöreŋ kinda maluku köröpƙi tuatƙi köteköm anƙuget geiga böröŋinan nip sinƙanƙö böröŋi memba kinget.

¹⁰ Mi memba kinda köhöikƙanök qeta kewö jiget, “Anutuninan jakömbuak dumŋe tatzawi aka Lama moröŋi yetköŋ mönö mem letot neŋgiyohotka oyaenƙoyaen akzin.”

¹¹ Mewö qeta jigetka Suep garata pakpak yeŋön jakömbuak dum kösutŋe areŋnöŋ kinda Anutugö jitŋememe aka bem jembon 4 mi liliköm enƙiget. Mewö kinda jakömbuak dum wösöŋe bamgöba eta simin köla Anutu waikƙi memba möpöseim waŋgiget.

¹² Anutu möpöseim waŋgiba kewö jiget, “Keu mi ölna! Anutu gi mönö kötuŋe, asakmararaŋ aka mötkutukutu öŋgöŋöŋanƙö Tonƙi akzan. Neŋön gi möpöseim gihiba qetbuŋagi jim qarimakzin. Anutunini, göŋön ösum-mumu aka kukösum Tonƙi akzan. Neŋön nalö dop mewö jim köhöininga Tonƙi mi teteköŋi qahö mal öŋgöba malman. Keu mi ölna!”

¹³ Mewö möpöseiba jigetka Anutugö jitŋememe yeŋgöreŋök kunƙan kewö jiba qesim niŋgiyök, “Ambazip maluku köröpƙi tuatƙi löŋgöta kinƙei, mi daŋön? Mi mönö denikeyök kaba mewö tokoba kinƙe?”

¹⁴ *Qesim niŋgiiga kewö meleŋ waŋgial, “O ketanƙamni, mi nöŋön qahö mötpiga nangok mötzan.” Mewö meleŋ waŋgibiga jitŋememe yaŋön kewö jii möral, “Kahasiliŋ keta bölökƙanƙö sutŋeyök kotkeri, yeŋön mönö mia akze. Lama moröŋanƙö sepƙan mönö opo malukuŋini saŋgoŋni tuariiga malget.

¹⁵ Mewö malgeranƙöra aka Anutugö jakömbuak dumŋi mesohol köla suŋgem silim möpömöpösei jikeŋe (tempöl) mala Anutugö nupƙi memba malme. Mewö malgetka jakömbuak dumŋe tatzawaŋön mönö opo koumƙi möröreŋgöba köl turum enƙiiga malme.

¹⁶ * “Mewö malgetka nalö kunöŋ nenegö me ogö qahö kömume. Wehöŋöŋ me yuai könöpƙambuk kunöŋ mönö qahö enƙohotirima.

¹⁷ *Kewögöra oyaenƙoyaen malme: Lama moröŋan jakömbuak jake bibiŋe tata galöm köl enƙiba enƙuanƙiriga malmal köhöikƙanƙö o töwatƙanƙö jeŋe anakƙe. Anutu nannak jeŋineyök imbilƙini pakpak kutuiga teköma.” Mewö.

8

Lama moröŋan muŋgem supap 7:ŋi munƙurata.

¹ Lama moröŋan muŋgem supap (sil) 7:ŋi munƙurata mutuliga Suep miri mianƙöreŋ kouruk pakpak göröŋ ala 30 minitkö dop nöŋ qeba ahöyök.

² Mewö asuhuiga Suep garata 7 Anutugö wösöŋe kinƙei, mi enƙekiga kunöŋ tömun qainƙi kun (biugel) 7 mi böröŋine ala enƙiyök.

³ *Mi enƙekiga Suep garata kun asuhaba jiniŋ ohohogö goul qambiŋi memba kaba alta kösutŋe kinök. Ambazip sarakƙi pakpak Anutugö köulukögetka yaŋön jiniŋ altanöŋ ohoiga wörönƙi umköhöwakƙambuk mi köulukƙinambuk toroqeba pukpuköba mohotŋe öŋgöba Anutugöreŋ anakza. Goul alta mi jakömbuak dum wösöŋe kinƙawi, yaŋön mönö mianƙö kösutŋe kiniga tosatƙan jiniŋ mi gwötpuk ohomapköra waŋgiget.

* **7:14:** Dan 12.1; Mat 24.21; Mak 13.19 * **7:16:** Ais 49.10 * **7:17:** Sum 23.1; Eze 34.23; Sum 23.2; Ais 49.10; 25.8 * **8:3:** Amos 9.1; Eks 30.1, 3

⁴ Yañon jiniñ mi ohoiga miangö köwakñan mönö Anutugö ambazip sarakñi yeñgö köulukñinambuk toroqeba Suep garata yañgö böröñeyök wahöta Anutugö jemesoholñe öñgöget.

⁵ *Suep garata mianñon jiniñ qambi mi memba altanöhök könöp jitñi mei jeiga qambi miangören uiga kokolak qeiga gölmenöñ gili geyök. Gili geiga miangörenök wölpöndañgö göjuñi göjuñi asuhaba giñgururuñ qerök. Wölbilik ösumñinambuk asuhugetka kenöñi kenöñi nalöñi nalöñi meyök. Mewö.

Garata yeñon tömun qainñi kun uget.

⁶ Suep garata ⁷ tömunñini qainñi kun (biugel) megeri, yeñon mi ubingö jöjöröget.

⁷ *Garata mutukñan wahöta tömunñi qainñi kun uyök. Mi uiga ais köñi aka könöp bölamñi mi kie ewö asuhaba sepuk toroqetka kunöñ mi mokoiga mohotñe gölmenöñ erök. Mianñon könöpñambuk eta gölme qeiga gölmegö bahöñi karöbutñan jem teköyök. Arökñangö ipñi miengö bahöñi karöbutñan jem teköget aka gwözözak sinñi görökñi mi körek jeba jem teköyök.

⁸ Garata yahötñi yañon wahöta tömunñi qainñi kun uyök. Mi uiga kunöñ kunduñi ketañi könöp jejeñi tandök ewö (wolkeno) yuai mi giliga köwetnöñ geyök. Geba köwet meiga köwetkö bahöñi karöbut miengörenök kunñan melenña sep ahök.

⁹ Mewöñanök Anutunöñ köwetkö yuainñi pakpak miwikñaiiga maljei, miangö bahöñi karöbut miengörenök kun mi kömuget aka wañge pakpak miengö bahöñi karöbut miengö likepñini kun mi jömgöba ayuhuget.

¹⁰ *Garata karöbutñan wahöta tömunñi qainñi kun (biugel) uyök. Mi uiga senjelau ketañi kiwa bölamñi ewö tandök jeba suepnöhök teköba erök. Eta köla gölmegö o töwatñi enñuba miengö bahöñi karöbut miengörenök kun aka o jeñi pakpak mi dop köñ enñiyök.

¹¹ *Senjelau miangö qetñi mi röbek kömbukñambuk. Röbek mianñon eriga onñi onñi miengö bahöñi karöbutñi mi melenña kömbukñinambuk aket. Kömbukñinambuk akerangöra aka ambazip gwötpukñan mi nempa kömuget.

¹² *Garata 4:ñi yañon wahöta tömunñi qainñi kun uyök. Mi uiga kunöñ wehön jeñi aka köñ jeñi mietkö asakñirañgö bahöñiri karöbutñi mi etkuiga bahösapsap ömuñ köla söñauyohot. Mewöñanök senjelau bahöñini karöbutñi enñuiga melenña söñauget. Mianñora silim nalöñangö bahöñi karöbutñan söñauha pandaman ahök. Mewöñanök sunñgemgö asakñan töriiga bahöñi karöbutñan söñauyök.

¹³ Mewö aiga eu uba tukapkap kun eka mötpiga könakembañe eu bölbölgöba suep bibiñe kutuba kaba köhöikñanök qeta kewö jiyök, “O ambazip gölmenöñ maljei, Suep garata karöbut yeñon mönö toroqeba tömunñini qainñi kun ubingö dop akze. Tömun karöbut miengö kourukñini mötketka lömböt kanjamñambuk karöbut asuhumei, miangöra mönö wöziköba yei! yei! yei! jiba sahötzal.” Mewö.

9

Suep garata 5:ñan tömunñi qainñi kun uyök.

¹ Suep garata 5:ñi yañon tömunñi qainñi kun (biugel) uiga ekiga suepnöhök senjelau kun teköba gölmenöñ erök. Eriga kunöñ ömewöröme yeñgö löm dutñi qahö miangö ki moröñi mi senjelau Tonñi mi wañgiyök.

* **8:5:** Lew 16.12; Eze 10.2; Eks 19.16; Ind 11.19; 16.18 * **8:7:** Eks 9.23-25; Eze 38.22 * **8:10:** Ais 14.12 * **8:11:** Jer 9.15 * **8:12:** Ais 13.10; Eze 32.7; Joel 2.10, 31; 3.15

2 *Mi wanjiiga öme löm dutni qahö mianjö önunji musuliga mianjörenök köwak ketani söngok imarurubuk jeba köwak wahörakzawi, mönö mianjö dop kundungöba wahöta wehön jeni esuhuba luhut köwaknöhök dop köl teköyök.

3 *Köwak mianjö uruneyök gawötji gawötji mosöta gölmenöj kangotketka Anutunöj kukösum enjiyök. Kukösum mi skorpion (omeqaqa) yenjören kukösum tandök ewö ahök.

4 *Mi enjiiga Anutunöj kewö jim kutum enjiyök, “Inini mönö gölmegö yuai görökni gwözözak me ip mewöni mi kude ayuhum enjimemö, ambazip mesoholjine Anutugö munjem asöjini qahö miyök mönö mem bölim enjime.” Mewö jim kutum enjiyök.

5 Anutunöj gawöt mi kukösum enjiiga ambazip enjöhögetka köinj 5:gö dop sihimbölo önöj qahö mötket. Sihimbölo mi skorpion (omeqaqa) azi yöhöiga sihimni mötzawi, mönö mianjö dop. Sihimbölo mewö mötketmö, Anutunöj anjön köl enjiiga mem kömum enjimeanjö kukösumni mi gawöt yenön qahö memba öne enjöhöget.

6 *Ambazip enjöhögeri, yenön nalö mianjören kömumbingö jarumemö, kömup mi qahö miwikñaiba kömumbingö osime. Kömumbingö möta qemjen qememö, kömupkö kondotkondot Tonjan mönö kungen anma.

7 *Gawöt enjekiga mienön hos yarögöra aködamunjinambuk jöjörömakzei, mönö mienjö dop aket. Nöröpjine yuai mundañi goul ewö kölgeri, mi ila jalö tandöktandök ahök. Jemesoholjinan ambazip jemesohol tandök ewö aket.

8 *Gawöt mienjö nöröp jupñini mi gwala ambi yenjö nöröp jup ewö aket. Gawöt jitñinan laion sömbupkö jitni ewö aket.

9 *Göwanjöwanjini (töptöp maluku) mi ain suman ewö tandök aket. Ginginini qegetka ötöj asuhui mörali, mi kewö: Hos sehisehñi yenön yarögö karenj karenj öröba luhuba binnöj angetka ginjururuñ asuhumakzawi, mönö mianjö dop.

10 Dajinini mi skorpion (omeqaqa, anamumu) ewö jitñinambuk aket. Mienön ambazip köinj 5:gö dop sihimbölo mötmegöra enjöhögeri, mianjö kukösumjan mönö gawöt dajinjine ahöm enjiyök.

11 Gawöt mienjö kin kembunini mi ömewöröme yenjö löm dutni qahö mianjö garatañi qetñi Ayuayuhu Tonji. Mi Hibru keunöj Abadon aka Grik keunöj Apolion.

12 Yei wölzik mutukñi kanjamñambuk mi mewö teköyök. Mötket, mianjö andöje yei wölzik yahöt kanjamñirambuk mi mönö toroqeba könanjep asuhumahot. Mewö.

Suep garata 6:ñan tömunñi qainñi kun uyök.

13 *Suep garata 6:ñi yanön tömunñi qainñi kun (biugel) uyök. Mi uiga Anutugö wösöje goul alta ahözawi, mianjö ilikñi 4 mienjörenök kouruk kun kaiga möral.

14 Kouruk mianön Suep garata 6:ñi tömunñambuk yanögöra kewö jiyök, “Anutunöj garata 4 jöhöba gwaröhöm enjiba o töwatñi ketani qetñi Yufreitis mianjö qöhöröje al enjiyöhi, mi mönö pösat enjiman.”

15 Anutunöj garata 4 mi jöhöm enjiba gwarönöj talmegö (yara) yambunini, köinjini, silimñini aka auanjini mi törörök arengöm enjiiga tatket. Yenön nalöjini mi kam kunjuiga mianjörenök ambazip kantrinñi kantrinñi mienjö bahöñi karöbutñi mi enjubingö jöjöröba tata nalöjinanjöra mambötket.

* 9:2: Jen 19.28 * 9:3: Eks 10.12-15 * 9:4: Eze 9.4 * 9:6: Job 3.21; Jer 8.3 * 9:7: Joel 2.4
* 9:8: Joel 1.6 * 9:9: Joel 2.5 * 9:13: Eks 30.1-3

Miangöra Suep garata 6:ɲan altanöhök kouruk möta miangöreñök anda garata 4 mi pösat enġiyök.

¹⁶ Pösat enġiiga yarö kambu keta bölökñi mi hosñinambuk asuhuba kaget. Nöñön jañgöñini mötpiga 200 milyön ahök.

¹⁷ Jemelen miangöreñ azi hos qakñe tata kageri, miengö kaisongolomñini ekiga kewö tandök aket: Göwanğöwanini (töptöpkö ain sumannini) mi könöp jit pisikñi, asoñi injañkölköñambuk aka gohotñi salfa könöp köt ewö. Hos miengö kaisongolomñini enġekiga nöropñini laion sömbupkö nörop ewö aketka numbuñneyök könöp, köwak aka köt könöpñambuk qetñi salfa mi eta kayök.

¹⁸⁻¹⁹ Hos yeñgö numbuñneyök könöp, köwak aka könöp köt qetñi salfa eröhi, mianñön mönö ambazipñi ambazipñi enġuyök. Hos miengö kukösumñini mi numbuñine aka dagañine ahöyök. Dagañini mi mokoleñ ewö aketka dagañinañgö kitipñi mi jitñinambuk. Kitipñi jitñinambuk mienñön mönö ambazip ihilek ewö enġohotirimakze. Lömböt kanjamñinambuk karöbut mi mönö gölmegö ambazip pakpak yeñgö bahöñini karöbutñi mi enġuiga kömuget.

²⁰ *Lömböt kanjamñinambuk mienñön ambazip tosatñi qahö enġuget kömumba toroqeba malgeri, yeñön mönö töndup uruñini qahö melenget. Nannini böröñinan yuai memba waikñini memba möpöseigeri, miangöra qahö möt bölim añguget. Ömewöröme aka tandö lopioñ waikñini memba möpöseim enġienġi mi qahö mosötket. Tandö lopioñ tosatñi mi goul, silwö me brons ainöñ memeña. Tosatñi mi köt urasiba me ip söhöba memeña. Miangöra tandö lopioñ mienñön yuai eka mötpingö me anda kabingö osimakze. Töndup ambazipnöñ mi qahö mosötket.

²¹ Mewöyök ambazip enġuget kömukömu me sait qarösoñgo amötqeqe mi qahö mosötket. Mi toroqeba aka memba serowilin aket aka yuai lañ yonğorö memba malget. Miangöra uruñini qahö melenget. Mewö.

10

Suep garata aka kimbi köpöp moröñi

¹ Miangö andöñe Suep garata kukösumñi ongotongotñi kun ekiga Suepnöhök kousunöñ esuhum wañgiiga erök. Nöropñi kiam nesilamñan kutuba liliköba ahöyök. Jemesoholñi wehön jeñi ewö aiga könañi yahöt mi tandö könöp bölamñirambuk yahöt ewö jeba kinök.

² Böröñan kimbi köpöp moröñi meiga kötükötulñi ahök. Könañi ölni köwetnöñ ala qaniñi mi gölmenöñ ala kinök.

³ Mewö kinda laion sömbupnöñ görörökömakzawi, qetñi mönö miangö dop köhöikñanök qerök. Qeriga wölpöndañgö ġinğururuñ 7 mienñön mönö melenđa görörököba keuñini qetketka möral.

⁴ Wölpöndañgö ġinğururuñ 7 mienñön qeta keuñini jigetka mörali, nöñön mi mönö miangöreñök papianöñ ohomamgö ahal. Kimbi ohomamgö ahalmö, kouruk kun Suepnöhök mötpiga keu kewö jiyök, “Wölpöndañgö ġinğururuñ 7 keu jizei, mi mönö nangohok ölöñ mötnöñ ahöma. Mi kude ohoman.”

⁵ *Suep garata könañi köwet aka gölme qakñire tiba kini ehali, yañön böröñi ölni memba wahöta Suepnöñ göröken alök.

⁶ Jöjöpañ keu jimamgöra böröñi mewö ala mi jim köhöiba alök. Kunöñ Suep, gölme, köwet aka yuai pakpak miengöreñ ahözawi, mi miwikñaiba kinda nalö dop teteköñi qahö köhöiba mal öñgömawi, mönö yañgö qetñe jöjöpañ keu kewö jiyök, “Anutunöñ mönö nalö kunbuk qahö qekörri öñgöma.

* **9:20:** Sum 115.4-7; 135.15-17; Dan 5.23 * **10:5:** Eks 20.11; Dut 32.40; Dan 12.7; Amos 3.7-10; Eze 2.8-3.3

⁷ Mewö qahöpmö, Suep garata 7:ñan tömunñi qainñi kun (biugel) uiga kou-rukñi mötmei, nalö mianğörenök Anutugö keu arenj asa-asambötñan mönö ölnambuk akña. Kezapqetok ambazip Anutugö nupñi memba mala kotketka yengöra Buña keuñi ölopñi jim indel enğiiga möta kota malgeri, Buña keu mianğö dop mi mönö zilañ ölnambuk akña.”

⁸ Mianğö andöñe kouruk kun mutuk Suepnöhök mötpiga keu jiyöhi, mianñon mönö dumñe kunbuk keu jiiga kewö möral, “Suep garatanöñ köwet aka gölme qakñire tiba kinda kimbi köpep meiga böröñe kötükötulñi ahözawi, mi mönö anda meman.”

⁹ Mewö möta Suep garatagören anda kimbi köpep moröñi mi niñgimapkö qesial. Qesibiga nöñğöra kewö jiyök, “Mi mönö memba nenöñ! Nenöñga gölömge geba melenñiga kömbuk usukömapmö, numbuge mi mönö moron onğö nahömñi ewö asuhuma.”

¹⁰ Mewö jiiga kimbi köpep moröñi mi yanğö böröñeyök memba neal. Nem- biga numbune moron onğö nahömñi ewö ahökmö, gwahötpi gölömne geiga melenñiga kömbuk usuköyök.

¹¹ Mewö aiga nöñon keu kewö möral, “Gi mönö dumñe kunbuk Anutugö kezapqetok keuñi keuñi jim sehiba malman. Kantriñi kantriñi aka bem isikñi isikñi keu tandök jijiñinangö dop maljei, mönö yengö aka yengö kin kembunñini mienğö kezapqetok keuñini mi qeljiñe jiba malman.” Mewö.

11

Anutugö jitñememe yahötñan keuñi nanğöba jiyohot.

¹ *Mewö jii möta kinbiga Suep garata mianñon dop alalgö öröpñi jehot ewö mi niñgiba kewö jim kutum niñgiyök, “Gi mönö wahöta anda Anutugö jöwöwöl jike aka mianğö jöwöwöl altañi mi dop öröp (rula mesa) mianñon dopñi ala oyonman. Mewöyök mianğören onğöba Anutu möpöseiba köulukñini alakzei, mönö mi kewöta janğonñini oyonman.

² Jöwöwöl jike dopñi ala mianğören sombem yaigepñi mi mönö onğita mosötman. Mi kian kantri yengöra al enğigetka ahöiga yeñon siti töröñi mi köin 42 mianğö dop tiba anda kamakñe. Mianğöra sombem yaigepñangö dopñi mi kude oyonman.

³ Nöñon jitñememe yahötñi melaim etkiba keuni nanğöba jimahotkö kukösumñi al etkibiga asuhumahot. Asuhuba wösöbirikö maluku sanjöp ewö mem anguba liliköba (gölme gwakötak ariba) silim 1260 nalö mianğö dop kezapqetok keu nup memba malmahot.”

⁴ Oil ip yahöt aka lambe dum tatatñi yahöt gölmegö Kembugö wösöñe kinjahori, mi mönö melennda eta asuhuba dangunu ewö kinda nöñğö könani nanğöba jiba malmahot.

⁵ Kunöñ me kunñan etkum mizit ak etkimangö mötza ewö, könöp bölamnön mönö numbuñireyök eta kerökurupñiri enğohoiga ayuhumakñe. Kunöñ me kunñan etkumangö mötza ewö, i mönö köna mewöñanök mianñon qeyohot kömuma.

⁶ Suepkö kousuñi jöhöbitkö kukösumñi mi yetkören ahöiga kezapqetok keu jim sehimahori, nalö mianğö dop kie qahö yöhöma. Kukösumñiran o jeñi pakpak mewöñanök dop köliga mianñon ölop o pakpak melen enğigetka sep akñe. Mewöñanök kukösumñiran onğönğöñi ahözawañğöra aka sihimñiran jimawañğö dop ölop jigetka lömböt kanjamñinambuk könañi könañi asuhuba gölme mem böliba ambazip enğumakñe.

* **11:1:** Eze 40.3; Zek 2.1-2; Luk 21.24; Zek 4.3, 11-14; 1 Kin 17.1; Eks 7.17-19; 1 Sml 4.8; Dan 7.7, 21; Ind 13.5-7; 17.8; Ais 1.9-10; Eze 37.10; 2 Kin 2.11; Ind 6.12; 16.18

⁷ Anutugö keuñi nanğöba jim teköyohotka ömewöröme yengö löm dutñi qahö miangörenök jemnemba kunöñ wahöta bim qem etkiba luhut ala etkuiga kömumahot.

⁸ Kömuyohotka qamötñiri siti qetbuñañambukö köna namñe etkömosötketka lañ ahömahot. Siti miangö qetñi tölapñi mi Sodom aka Ijpt qerakze. Kembuñiri Jisös i mönö mewöyök miangören maripomnöñ qegetka kömuyök.

⁹ Qamötñiran lañ ahöyohotka ambazip pakpak mi etkehakñe. Gölmenöñ löm köl etkibingö jiba jöhöme. Mewö öne lañ ahöyohotka ambazip kantriñi kantriñi, kambuñi kambuñi, bem isikñi isikñi keu tandökñini nanñik nanñik jimakzei, yeñön mönö qamötñiri mi silim karöbut aka bahöñi kun miangö dop uba etkehiyet.

¹⁰ Kezapqetok azi yahöt yetkön ambazip gölme qakñe maljei, mi uru kuñgum engiyohotka miangöra sihimbölä önöñi qahö miwikñaiba malget. Miangöra kömuyohotka qamötñiri etkekñei, miangören mönö köiran ala saurenj unduba nem söngaip pati ala nanñini kalem könañi könañi anğubingö alget anda kama.

¹¹ Silimñi karöbut aka bahöñi kun mi teköiga Anutunöñ söngörö ösum söngörönjire ui geiga guliba wahöta köngep kinohot. Wahöta kinohotka ambazipnöñ etkeka töwöratiba jönömñini unduiga sömbuñini mötket.

¹² Köngep kinohotka Suepnöhök qet köhöikñi kun kewö qeta jii mörohot, “Inñiri mönö kewö korohot.” Mewö jii möta kousu uruñe wahöta Suepnöñ öngöyohotka kerökurupñiran öne etkeka nemböñini teköiga kinget.

¹³ Könañiran gölme mosöta öngöyohotka nalö miangörenök kenöñ tandökñi sohosoñi gila siti bahöñi 10% (bahöñi tenöhök mohot) miangö dop kusuba köndenmöndenök. Köndenmöndenja ambazip 7.000 miangö dop engui kömuget. Ambazip qahö kömugeri, mienön mi eka töwöratiba sömbuñini möta Suepkö bemñi Anutu i ösumñangö möpöseim wañgigetka qetbuñañambuk ahök.

¹⁴ Wözik yei qet kanjamñambuk yahötñan mewö teköyökmö, mötket, wözik yei qet karöbutñangö öñan mönö zilañ asuhaba qakñine öngöma. Mewö.

Suep garata 7:ñan tömunñi qainñi kun uyök.

¹⁵ *Suep garata 7:ñi yañön tömunñi qainñi kun (biugel) uyök. Mi uiga Suepnöñ keu köhöikñanök eraum mötketka kourukñini mötpi kewö jiget, “Ayop, nanine Kembunini aka yañgö Amötqeqe Tonji Kraist yetkön mönö gölme pakpak galöm köl engibitkö kukösumñi mi lökñanök buña qem anğum teközahot. Yañön mönö nalöñi nalöñi galöm köl engiba malma, ee-aa-ee. Galömkölkölñan mönö nalö kunöñ qahö teköma, ee-aa-ee.”

¹⁶ Mewö jiget mötpiga Anutugö jitñememe 24 Anutugö jemesoholñe jakömbuak dumñine tatzei, yeñön mönö eta bamgöba sipköba Anutugö waikñi memba möpöseim wañgiget.

¹⁷ Möpöseim wañgiba kewö jiget, “O Kambu Anutu kukösum pakpakö Tonji, göñön mönö mala kotnöñ aka mal köhöizan.

Göñön kukösumgi öngöñgöñi memba könahiba gölme pakpak galöm köl engiba kiñ kembuñina aka malman.

Miangöra neñön mönö möpöseiba saiwap jim gihizin.

¹⁸ Kian kantriñi kantriñi yeñön irimñini seholiiga kazik ak gihiba malgetmö, göhö kazik nalögan mönö dölkewöñe kam kuñguba ahöza.

Göñön nalö kewöñe kömukömuñi yengö keuñini kewöta jim teköm engiman aka nangi ambazipurupki töwañini engiman.

* 11:15: Eks 15.18; Dan 2.44; 7.14, 27; Sum 2.5; 110.5; 115.13; Ind 8.5; 16.18, 21

Kezapqetok ambazip aka ambazip sarakñi tosatñi göhö nupki memba malgeri aka öngöngöñi eretñi göhö qetki ayuhubapukö kengötñini möta malgeri, i mönö töwanini engiman.

Mewöyök tosatñan ambazip enguba kantri köndennda malgeri, mi mönö könden engiman.” Mewö möpöseiba jiget.

¹⁹ Miangö andöñe Suepnöñ añañiiga Anutugö möpömöpösei jikegö (tempöl) nanğunan tali ekiga jike uruñe Anutugöreñ jöhöjöhö areñ bokis aködamunñambuk mianjön ehekñi ahöyök.* Suepnöñ añañiiga nalö miangöreñök wölbilik aliga wölpöndañ aka giñgururuñ qeriga möral. Kourukñi kourukñi mi mötpiga kenöñ memba kie römbum giliga ais kötni ketañi ketañi etket. Mewö.

12

Ambi aka sekak namñi ilikñambuk

¹ Suepnöñ aiwesök ketañi wewelipñambuk kun kewö asuhuiga ehal: Ambi kun wehön jeñan malukuñi aiga köiñnöñ köna tamböñi bapñe asariiga sengetau 12 mi ila jalö ewö nöropñe kölgetka gömgöm-bilikbilikñinambuk tatket.

² Köronambuk (gölömñambuk) mala morö memenangö nalöñan dopdowiiga lömböriiga masö qeiga sihimbölö möta qet gigilahöyök.

³* Miangö andöñe aiwesök kun Suepnöñ kewö asuhuiga ehal: Sekak namñi ilikñambuk (dragon), mundañi pisikñi pötpöt, nöropñi 7 aka ilikñi 10. Nöropñi 7 miangöreñ ila jalö 7 kölgetka tarök.

⁴* Sekak namñi mianjön dagañan suep qeapköba sengetau miengöreñök bahöñi karöbutñi öröba gili gölmenöñ etket. Etketka ambi nanñi morö memangö ahöhi, yangö wösöñe kinök. Mewö kinda moröñi memawi, mi mönö miangöreñök gwahötmangöra mörök.

⁵* Ambi mianjön morö nahön azia meyök. Yangön kantriñi kantriñi pakpak ain öröpnöñ galöm köl engiba malma. Ambinöñ morö meyöhi, garatanöñ mi mönö miangöreñök zilañ memba anda Anutugö jakömbuak dum qöhöröñe alök.

⁶ Miangöreñ aliga ambinöñ nanñök mosöta kök ala anök. Anutunöñ ambi mi silim 1260 miangö dop gölme qararañkölkölñe köyan köl wanget malmapköra miri gölme kun möhamgöiga miangöreñ kök ala anök.

⁷* Suep uruñe yarö juliga kewö auget: Suep garata bohonñi Maikel aka yangö garataurupñi yeñön sekak namñi tuarenjoñ aka i aka yangö garataurupñi yembuk auget.

⁸ Auba sekak namñi aka yangö garataurupñi yeñgö ösumñini qahö dop köliga luhut qahö al engiba miriñini mosöta Suep uruñe toroqeba malbingö osiget.

⁹* Osigetka sekak namñi ilikñambuk mi mönö közöla Suepnöhök wu-atañgöget. Sekak namñi mianjön möpñangö möpñeyök mokoleñ aka Iw (Ewa) isim wangetyök. Qetñi alañi Bölöñangö Tonji aka Satan. Yangön kantriñi kantriñi pakpak kun gum engiiga janjun anda malgeri, mi aka yangö garataurupñi mi mönö yambuk Suepnöhök közöla aköm engigetka gölmenöñ etket.

¹⁰* Etketka Suepnöñ qet ketañi kunöñ kewö jii möral, “Keu silenöñ alal Tonjan sun gem asak Anutuninangö wösöñe kinda urumelen alaurupnini jim engiba malöhi, mi mönö yaköriba aköm wangetka yaigep eriga köirañ köljin.

* **11:19:** Anutugöreñ jöjöpaj keu 10 aka jimkutukutu tosatñi mi köt ilañan ohoba bokis miangö uruñe alget tari galöm kölakze. * **12:3:** Dan 7.7 * **12:4:** Dan 8.10 * **12:5:** Ais 66.7; Sum 2.9 * **12:7:** Dan 10.13, 21; 12.1; Jud 9 * **12:9:** Jen 3.1; Luk 10.18 * **12:10:** Job 1.9-11; Zek 3.1

Nanine Anutuninan mönö nalö kewöñe ambazip amöt qem engiba kukösumñi qakñe galöm köl enjiiga bemtohoñangö ölñan lök asuhuza. Amötqeqe Toñangö ösum-mumuñan lök asuhum teköza.

¹¹ Yañön mötnarip alaurupnini keunöñ al engiba malökmö, Toñi mi mönö kewö luhut al wañgiget: Lama moröñangö sepñan i amöt qem enjiiga köhöiba Buña keu ölbölñi nañgöba jim sehiba malget. Mewö mala jöjöröba silenini tököba böñ kinda bim qeba luhut alget.

¹² “Miangöra Suep mire maljei, enñön mönö körek pakpak söñgaiba köiran ala malme. Mewö malmemö, gölmenöñ aka köwetnöñ maljei, inini mönö lömböt kanjamñambuk bisimei, miangöra mönö Yei! jiba sahötzal. Bölöñangö Toñan luhuba eta tiba engöreñ kaba nup meme nalöñi töröptökñi ahöi mötzawañgöra mönö kazik ketañi ahakza.”

¹³ Sekak namñi ilikñambuk yaköriba aköm wañgigetka gölmenöñ eröhi, mi ek asariba ambi morö nahön meyöhi, mi kazik ak wañgiba wuatangöyök.

¹⁴ *Wuatangöyökmö, ambinöñ kök aliga Anutunöñ tukapkap ketañangö ginginñi yahöt wañgiiga mianñön bölbölgöba ösumñan anök. Anutunöñ gölme qararañkölkölñe yañgöra miri gölme kun möhamgöyöhi, mönö mianñöreñ anök. Miangöreñ anda asamböta maliga (yara) yambu 3 aka bahöñi kun mi köyan köl wañgigetka mokoleñnöñ i qahö miwikñaiba qelanjima.

¹⁵ Ambinöñ bölbölgöba aniga mokoleñgö irimñi teköiga numbuñeyök ambigö andöñe o gwaulu suaiiga o töwatñi ahök. O mianñön ambi mi yöhösañda memba jöhöm wañgimapköra möta mewö söwötköba loñnök.

¹⁶ Mewö loñnökmö, gölmenöñ ambi mi bauköm wañgiba tingiriga löm ahök. Sekak namñan numbuñeyök o suaiiga o töwatñi ahöhi, mianñön mönö löm miangöreñ geba jöpköba qahöwahök.

¹⁷ Mewö asuhuiga sekak namñangö irimñi mönö ambi miangöra aka seholiiga mosöta ambi mianñö gwölöñarökurupñi tosatñi qetala yarö gil enjimangöra anök. Gwölöñarökurupñi mienñön Anutugö jöjöpañ keu tem köla Jisösgö Buña keu töp nañgöba jim sehimakzei, mönö yembuk karim aubingö anök.

¹⁸ Aubingö anda köwet sakñe añgota kinök. Mewö.

13

Jemnemba köwetnöhhök korök.

¹ *Miangö andöñe jemnemba kun ilikñi 10 aka nöropñi 7 mi köwetnöhhök koriga ehal. Ilikñi 10 miangöreñ ila jalö 10 kölgetka tatket aiga nöropñi mohot mohot miangöreñ qet mepaqepaikñinambuk ohogetka ahöyök.

² Jemnemba mi ekiga kewö ahök: Kaisoñgolomñi mi lepad taigögö tandök ewö ahök. Köna böröñangö sölopñi mi beö sömbupkö sölop ewö ahök. Numbuñi mi laion sömbupkö numbuñi ewö tandök. Sekak namñan mönö ösumñi, jakömbuak dumñi aka ambazip galöm köl enjimapkö kukösumñi öñgöñgöñi mi jemnemba wañgiyök.

³ Wañgiiga nöropñi kun mi uzi köhöikñi kunöñ mei kömumawañgö dop ahökmö, uziñan misiriiga löpötñanök tarök. Gölmegö ambazip körek pakpak yeñön auruba jemnemba mi andöñe wuatangöba anget.

⁴ Wuatangöba anda sekak namñangö waikñi memba möpöseiba malget. Kukösum mewöñi mi jemnemba wañgiyöhañgöra i aka jemnembagö waikñi mewöñanök memba möpöseiba kewö jiget, “Dañön jemnembagö dop akawak? Dañön i tuarenjoñ ak wañgiba yambuk aumangö köhöibawak?”

* **12:14:** Dan 7.25; 12.7 * **13:1:** Dan 7.3; Ind 17.3, 7-12; Dan 7.4-6

5 *Mewö jigetka Satanöŋ jemnembagö numbuŋi sölölöhöiga köhöiba jakbak-öraŋböraŋ qakŋe mepaqepaik keuŋi lanlan jiba malök. Anutunöŋ Satan qahö aŋgön köliga ilitmamgö kukösumŋi mi köiŋ 42 miangö dop ahöm waŋgimapköra jim teköyök.

6 Mi jim teköiga numbuŋan aŋaŋiiga Anutu ilita malök. Anutugö qetŋi, Suep miriŋi aka Suep uruŋe maljei, mi pakpak mönö mepaqepaik ak enŋiba malök.

7 *Mewö maliga Satanöŋ ambazip sarakŋi tuarenjoŋ ak enŋimamgö kukösumŋi waŋgiiga yembuk bim auba luhut al enŋiyök. Luhut al enŋiiga Satanöŋ ambazip isikŋini pakpak kambuŋinaŋgö dop, keu tandökŋinaŋgö dop aka kantriŋinaŋgö dop mi mönö jemnembagö böröŋe al enŋiyök.

8 *Ambazip körekmakörek gölmenöŋ maljei, yeŋön mönö jemnembagö waikŋi memba möpöseiba malme. Anutugö ambazip solanŋi qetŋini Suep mire papianöŋ ohoget ahözawi, yeŋönök mönö jemnemba mi qahö möpöseime. Möpŋaŋgö möpŋe Anutunöŋ Suep gölme miwikŋaim etkiyöhi, nalö miangöreŋök könahiba qetŋini mi malmal köhöikŋaŋgö papia miangöreŋ ohoba mala kotket. Malmal papia mi Lama moröŋi qeget kömuyöhi, mönö yaŋgö buŋaŋi ahöiga galöm kölakza.

9 “Kunŋan kezapŋambuknöŋ malja ewö, yaŋön mönö keu ki kezap ala möt kutuma!

10 *Kun kösö mire anmawaŋgö dop akzawi, yaŋön mönö miangöreŋ anma. Kun bimgö sou ketanŋan ugetka kömumawaŋgö dop akzawi, yaŋön mönö mewö kömuma. * Miangöra ambazip sarakŋi, enŋön mönö kapaŋ köla lömböt memba mökösoŋda pöndaŋ möt nariba malme.” Mewö.

Jemnemba kun gölme uruŋeyök korök.

11 Kunbuk ekiga jemnemba kun gölme uruŋeyök korök. Mi ilikŋi yahöt Lama moröŋaŋgö ilikŋi ewöya aka keuŋi mi sekak nanŋi ilikŋambuknöŋ jiyöhi, mönö mewöŋanök jiba malök.

12 Yaŋön kota alaŋi mutukŋaŋgö jitŋememeŋi aka kukösumŋi pakpak memba mianŋön yuai pakpak alaŋaŋgö jeŋe ahök. Mewö aka gölme ambazip kuŋguba sölölöhöm enŋiiga auruba alaŋi mutukŋaŋgö waikŋi memba möpöseiget. Jemnemba mutukŋi mi uzi köhöikŋan mei kömumamgö ahökmö, misiriŋa löpötŋanök tarök.

13 Jemnemba yahötŋi yaŋön aŋgöletot ketanŋi tandökŋi könaŋi könaŋi meyök. Kun meyöhi, mi könöp bölamnöŋ suepnöhök eta gölmenöŋ kaba jeiga ambazipnöŋ mi jeŋinan eket.

14 Anutunöŋ Satan qahö aŋgön köliga kukösum waŋgiiga jemnemba mutukŋaŋgö jitŋememeŋi aka yaŋgö jeŋe aŋgöletot könaŋi könaŋi memba malök. Mianŋön mönö gölmegö ambazip tilipköm enŋiiga janjuŋ aka sohoget. Sohogetka kewö kuŋguba jim kutum enŋiyök, “Inini mönö jemnemba mutukŋaŋgö imutŋi söhöba kuŋguget kiniga göda qem waŋgiba malme. Jemnemba mutukŋi mi bimgö sou ketanŋan (bainat) qegetka uzi mei kömumamgö dop ahökmö, töndup guliba maljawi, mönö yaŋgö imutŋi kuŋgume.”

15 Mewö aketka Satanöŋ kukösum jemnemba könaŋepŋi waŋgiiga tandö lopioŋ mi mem gulim waŋgiiga könahiba söŋgöörö-ösum alök. Mewöyök jemnemba mutukŋaŋgö imutŋi mem letoriga azi keu jiba ambazip kuŋgum enŋiiga kewö asuhuyök: Denike yeŋön tandö lopioŋ miangö waikŋi qahö memba möpöseigeri, i mönö körek enŋugetka kömuget.

* 13:5: Dan 7.8, 25; 11.36 * 13:7: Dan 7.21 * 13:8: Sum 69.28 * 13:10: Jer 15.2; 43.11 * 13:10: Tosatŋan keu mi kewö melenje: Kunöŋ bimgö sou ketanŋi (bainat) mianŋön tosatŋi enŋuiga kömumei, tosatŋan mönö nanŋi mi sou mewöŋan ugetka kömuma.

¹⁶ Jemnemba könangepñan ambazip körek pakpak kewö kuñgum engiba jiyök, “Inini mönö jemnemba mutukñangö muñgem supapñi mi jemesoholñine me böröñini ölñe mekötahöme.” Mewö jiiga nanñini nupñini memakzei aka toñinañgö welenñini öne qemakzei, ambazip pomñi aka wanapñi, ketañi aka moröñi yeñön mönö körekmakörek muñgem supapñi mi memba silenine mekötahöba kösoget.

¹⁷ Denike yeñön jemnembagö qetñi me qetñangö jañgöñi silenine qahö memba malgeri, yeñön mönö nene yuai stuanöñ me maketnöñ söñgöroñi memingö aka albingö osiget.

¹⁸ Keu ki möt asaribingö mötkutukutuñi kewö: Kunñan mötkutukutuñambuk maljawi, yañön mönö jemnembagö jañgöñi oyoñma. Jañgöñi mi gölme azigö jañgöñi akza. Supap jañgöñi mi 666. Mewö.

14

Lama moröñi aka könagesöurupñi 144.000.

¹ *Miangö andöñe uba Lama moröñan Zaion kundunje kini ehal. Yambuk könagesöurupñi jañgöñini 144.000 mi mohotñe kingetka Lama moröñangö qetñi aka yañgö iwiñangö qetñi mi körek yeñgö mesoholñine ohohoña ahöi engehal.

² Miangöreñök mötpiga Suepnöhök kouruk kun o ketañangö sia qetñi ewö asuhuyök. Mi wölpöndañ giñgururuñ ketañanök qetzawañgö kourukñi miangö tandök ewö ahök. Kourukñi mi gita kulele gwötpuk qegetka kourukñi asuhumakzawañgö dop möral.

³ Anutunöñ ambazip 144.000 mi gölmenöhök söñgöroñini memba engömeyöhi, yeñön mönö Anutugö jakömbuak dum wösöñe kañgota bem jembon 4 aka jitñe meme bohonñi 24 mienjö jemesoholñine kinda liñet dölokñi kölget. Körek yeñön nanñini liñetñini mi kölgetka yaigep yeñön mi kusum añguba mötpingö osiget.

⁴ Yeñön ambazip qainñi kun aka mala kotket. Qahö tölohoba sarakñi malbingöra nanñini galöm köl añguba ambi yembuk töwöt qahö miwikñaiba malget. Lama moröñan denike denike anakzawi, yeñön mönö i wuatangöba miangöreñ anakze. Anutunöñ i ambazip sutñineyök bohonñini memba meköba engömeiga Anutu aka Lama moröñi yetkö yambuñiri dölokñi akze.

⁵ *Yeñgö jitñineyök muney keu kun qahö miwikñaigetka keuñini qahö sarakñi mala kotket. Mewö.

Suep garata karöbut yeñön keuñini jiba bölbölgöget.

⁶ Miangö andöñe Suep garata kun ekiga suep kutuba könakemba bölbölgöyök. Yañön Ölöwak Buña koñkoñ* memba kaba gölme ambazip yeñgöra jim asarimangöra kayök. Ambazip mi kambuñinañgö dop, bem isikñinañgö dop, keu tandökñi jijiñinañgö dop aka kantriñinañgö dop gölme dop köla tat anjei, mönö körek yeñgöra jim sehimangöra kayök.

⁷ Kaba köhöikñanök silata kewö qerök, “Anutunöñ ambazip kewöta jim teköm engimawañgö nalöñan mönö töriba dopdowiza. Miangöra inini mönö Anutugö jitñi oñgitpinbuköra keñgötni möta möpöseiba qetbuñañi mem sehime! Kunöñ suep, gölme, köwet aka o jeñi miwikñaim engiyöhi, mönö yañgö waikñi memba möpöseiba malme.”

* **14:1:** Eze 9.4; Ind 7.3 * **14:5:** Sef 3.13 * **14:6:** Kembu bem koñkoñ Toñangöreñ Buña keu tömbuñi mi koñkoñ. Mi möpñangö möpñeyök könahiba teteköñi qahö ahöm öñgöma.

8 *Mewö qeriga yangö könaje Suep garata alañi kun mutukñi wuatangöba kaba kewö qerök, “Babilon siti ketañi mi meleni geiga ahöza. Babilon ambi qetbuñambuk mianön mönö serowilin aka mianön kantri pakpak mem tölohöm enjiiga dop köl enjiyök. Yanön wain o ewö nemegöra enjiiga urunini sohoiga kahalalom aka malget. Mewö aka malöhangöra Anutugö irimñi sehologiiga kazik aka jiiga siti qetbuñambuk mi mönö köndengetka meleni gei ahöza.” Mewö.

9 Mewö qeriga yangö könaje Suep garata karöbutñi kun etkuatangöba bölbölgöba kaba köhöikñanök silata kewö qerök, “Kunñan jemnemba aka yangö imutñangö waikñi memba möpöseiba muñgem supañi anğön köla mesoholñe me böröñe mekötahöba kösöza ewö,

10 *yanön mönö mewöñanök Anutugö irimsesewölñi mi wain o köhöikñi ewö nemba mötma. Anutunöñ wain o mi o töhöñambuk qahö mindiriba wain köhöikñi töhöñök irimsesewölñangö qambinöñ mokoi tatzawi, yanön mönö mi nema. Mi nemba Suep garata töröñi aka Lama moröñi yengö wösöñine kiniga salfa kötkö könöp bölamñan koasikpuk ohoiga sihimbölö önöñi qahö möta malma.

11 *Mianön engehoga sihimbölö önöñi qahö möta malmei, mianğö köwakñan mönö nalö dop teteköñi qahö wahöta öngömakña. Ambazip jemnemba aka yangö imutñangö waikñi memba möpöseimakzei, yanön mönö sunğem asak senjom möta malme. Kunñan muñgem supañi anğön köla silene kösözawi, yanön mönö silenñan unduiga qemjen qeba luhut memangö osiba malma.”

12 Mianğöra ambazip sarakñi Anutugö jöjöpañ keuñi tem köla wuatangömakzei, enñon mönö kapañ köla lömböt memba mököşöñda Jisös pöndañ möt nariba malme.

13 Mianğö andöñe Suepnöhök keu kun mötpiga kewö jiyök, “Gi mönö kimbi kewö ohoman: Ambazip Kembubuk qekötahöba kinda nalö kewöñeyök könahiba kömumei, yanön mönö oyaenköyaen akñe. Uña Töröñan keu kitipñi mi meköba ‘Keu mi ölña,’ jiza. Yanön nup köhöikñi memba qemjem-mamjen möta kaba malget teköiga nupñinanğö ölni asuhuiga Suep Tonñan kösohotñini möri dop köli mianğöra söşöñgai enji tata luhut memba öñşöñ malme.” Mewö.

Gölmegö nene möriam ölni memegö nalöñi

14 *Mewö jiiga uba kousu tuatñi ekiga mianğö qakñe kun kaisongolomñi gölme azigö tandök ewö mianön tarök. Ila jalö goulñon memenñi mi nöropñe tariga böröñan sou kapenkapenğöñi jitñambuk mi memba tarök.

15 *Mi ekiga Suep garata kunñan möpömöpösei jikenöhök (tempöl) aukñe kanğota kousu qakñe tatzawi, yangöra keu kewö jiba köhöikñanök qerök, “Gölmenöñ möriam ölni lök öliiga ölni memegö nalöñan mönö akza. Mianğöra göñon mönö sougi kapenkapenğöñi memba nupñon anda mianön gölmegö möriam ölni mi kutum tokoman.”

16 Kousu qakñe tatzawi, yangöra mewö qeriga souñi kapenkapenğöñan gölmenöñ gila nupkö möriam ölni kutum tokoyök.

17 Mi tokoiga Suep garata kunñan Suepkö möpömöpösei jikenöhök (tempöl) aukñe kanğorök. Yanön mewöyök sou kapenkapenğöñi jitñambuk kun memba kanğorök.

18 Kanğoriga Suep garata karöbutñi kun Suepkö altagö könöp galömñi aka alta mi mosöta kanğorök. Kanğota köhöikñanök qeta Suep garata sou kapenkapenğöñi jitñambuk memba kinöhi, yangöra kewö jiyök, “Göñon sougi

* 14:8: Ais 21.9; Jer 51.8; Ind 18.2 * 14:10: Ais 51.17; Jen 19.24; Eze 38.22 * 14:11: Ais 34.10

* 14:14: Dan 7.13 * 14:15: Joel 3.13

kapenkapengöni jitrambuk mi mönö memba nupnöḡ anda mianön gölmegö wain kanḡeni kanḡeni mi yandiman. Kanḡen miengö kötḡi lök ölim yaköba tatze!”

¹⁹ Mewö jiiga souḡi kapenkapengöni gölmenöḡ gila gölmegö wain kösö ölnḡi mi köteköm tokoba Anutugö wain jout ketanḡi mianḡoreḡ tözöhölmegöra gilök. Wain jout mi Anutugö irimsesewölḡanḡö kaisöpsöpḡi akza.†

²⁰ *Wain bagem ölnḡi mi siti yaigepḡe könanöḡ tiba tözöhölgetka sepḡan wain jout ketanḡanḡö numbuḡe kota qöl tandök ewö lanḡan wahöta kota o töwatḡi ahök. Sep mianḡö diginḡi mi wan mita aka bahöḡi kun ahök. Hosnöḡ mianḡoreḡ tiba aniga numbuḡe koriga hos injutḡanḡö kösöḡan samuruyök. Diginḡi mewö aiga köröpḡi 300 kilomita mianḡö dop ahök. Mewö.

15

Suep garata 7 aka lömböt kanjamḡinambuk 7.

¹ Mianḡö andöḡe suep uruḡe uba anḡöletot ketanḡi kun asuhuiga eka kewö welipköyal: Suep garata 7 mi lömböt kanjamḡinambuk (plague) 7 memba kinget. Ambazip siḡisöndokḡinanḡöra Anutugö irimḡi seholiiga jim teköba likeḡi melenḡi lömböt kanjamḡinambuk qakḡine öḡḡöi mötketka uruḡan amöriiga keuḡinan kömuma. Mianḡöra qetḡini lömböt kanjamḡinambuk qöndökḡi 7 qetket.

² Mi eka yuai gilikbilikḡambuk köwet ewö ekiga könöḡ bölamḡambuk lolonqalon ahöyök. Mianḡö qöhöröḡe Anutugö ambazip kingetka enḡeḡal. Yeḡön luhut ala jemnembagö keuḡi qahö tem köla imutḡanḡö waikḡi qahö memba qetḡanḡö janḡöḡi silenḡine qahö anḡön köla malḡet. Anutunöḡ i mohot mohot kulele enḡiiga memba kinget.

³ *Mianḡoreḡ kinda Anutugö nup meme azi Mosesḡö liḡetḡi aka Lama moröḡanḡö saurenḡ liḡetḡi mi kewö kölḡet,

“O Kambu Anutu kukösum pakpakö Tonḡi, ḡöḡön anḡöletot ketanḡi ketanḡi welipḡinambuk ahakzan.

ḡöḡön kantriḡi kantriḡi mi kiḡ kambu ak enḡinöḡga ahakmemegahö könanḡi mi diḡdiḡi aka öḡ töhönnḡi akza. Mianḡöra Anutu qainḡi kun aka maljan.

⁴ O Kambu, ḡöhöreḡ ahakmemegi diḡdiḡi mi mönö aukḡe asuhuiga mötzin.

Mianḡöra kantri pakpak yeḡön kaba ḡöhö waiki memba möpöseim gihi-makze.

ḡöḡön nangok töröḡi akzan. Mianḡöra aka daḡön mönö ḡöhöra keḡḡötḡi qahö mötpawak? Körek neḡön ḡöhö qetbuḡagi mem sehiba möpöseimakzin.”

⁵ *Mianḡö andöḡe uba yuai kewö ehal: Suepkö möpömöpösei jikeḡö (tempöl) nanḡuḡan taliga mianḡö uruḡe Anutu dangunuḡanḡö opo seri jikenḡan kini ehal.

⁶ Möpömöpösei jike mianḡoreḡök Suep garata 7 lömböt kanjamḡinambuk 7 memba kingeri, yeḡön mönö eta aukḡe kaget. Malukuḡini tuat lalamḡi bilikbilikḡinambuk löḡḡötketka opo jöhan maḡihilakḡi goulḡambuk mi örigit ewö töptöpḡe embahöm anḡuba kinget.

⁷ Yeḡön kagetka bem jembon 4 miengöreḡök kunḡan goul qambi 7 enḡiiga Anutugö irimsesewölḡan qambi mi numbuḡe kotket. Anutu irimḡi seholizawi, yanḡön mala kota malja aka teteköḡi qahö mal öḡḡöma.

† 14:19: Anutugö irimsesewölḡi mi wain jout ketanḡe tözöhölgetka uruḡan amöriba teköma. Indelindel 19.15 mi ekḡan. * 14:20: Ais 63.3; Seru 1.15; Ind 19.15 * 15:3: Eks 15.1; Jer 10.7; Sum 86.9 * 15:5: Eks 38.21

⁸ *Qambi mi enjiiga Anutunöŋ asakmararaŋi aka kukösumŋi kondeliga miangöra köwak pukpuköba möpömpöse jike (tempöl) kokolak qeiga kunŋan kun Suep jike mi öngö-öngögö dop qahö ahök. Suep garata 7 yeŋön mutuk qambini mokogetka lömböt kanjamŋinambuk 7 asuhaba ölninambuk akŋei, miangö andöŋe ölop kunbuk öngöme. Mewö.

16

Qambi 7 mokogetka Anutugö irimsesewölŋan asuhuyök.

¹ Möpömpöse jike (tempöl) uruŋeyök qet ketani kun asuhuiga Suep garata 7 miengöra keu kewö jim kutuiga möral, “Inini anda Anutugö irimsesewölŋan qambi 7 numbuŋe kota ahözawi, miengö ölni mönö gölmenöŋ mokome.”

² *Suep garata mutukŋan mosöta anda qambiŋgö ölni mi gölmenöŋ mokoyök. Mokoiga uzi imbilonŋambuk sihimbölöŋini tandökŋi sohosoŋi mi qegetal ambazip yeŋgö silenine asuhuget. Ambazip jemnembagö muŋgem supapŋi silenine memba imutŋangö waikŋi memba möpöseigeri, mönö yeŋgö silenine asuhuget.

³ Yahötŋi yaŋön mosöta anda qambiŋgö ölni mi köwetnöŋ mokoyök. Mokoiga köwetnöŋ melenŋa sep ahök. Mönö azi qeŋeŋgö sepŋi ewö ahök. Mewö aiga köwet uruŋe yuai pakpak malmalŋinambuk maljei, mi mönö lökŋanök kömum teköget.

⁴ *Suep garata karöbutŋan qambiŋgö ölni mi o töwatŋi aka o jeŋi miangöreŋ mokoiga melenŋa sep aka dop kölok.

⁵ Mewö aiga Suep garata o galöm kölakzawaŋön keu kewö jiiga möral, “O Anutu töröŋi, göŋön keu kewöta kewö jim tekönöŋga lömböt ki asuhuza-waŋgöra diŋdiŋi akzan. Mönö solanŋi mala kota maljan.

⁶ Yeŋön göhöreŋ ambazip sarakŋi aka kezapqetok ambazip enŋuba malgetka sepŋinan mokoyök. Göŋön i enŋugerangö likepŋi melenŋa sep enŋinöŋga negeri, mi mönö dopŋe alnöŋga qakŋine öngöyök. Miangöra Anutu göŋön mönö diŋdiŋanök akzan.”

⁷ O galöm kölakzawaŋön mewö jiiga keu kun altanöhök kewö kaiga möral, “Keu mi ölna! O Kembu Anutu kukösum pakpakö Tonŋi, göŋön mönö ambazip keuŋini kewöta diŋdiŋanök jim teköm enŋimakzan.”

⁸ Suep garata 4:ŋan qambiŋgö ölni mi wehöŋ jeŋe mokoiga miangön wehöŋ ösum waŋgiiga könöŋŋi kötökŋi aka ambazip könöŋ ewö enŋohoyök.

⁹ Wehöŋ jeŋi könöŋambuk miangön enŋohoiga silenini dölatiyök. Anutunöŋ lömböt kanjamŋinambuk miengö Tonŋi aka ali qakŋine öngöyöhi, ambazipnöŋ mi möta miangöra Anutugö qetŋi jim qesuahöm waŋgiba malget. Mewö malgetmö, Anutu möpöseiba qetbuŋaŋi mem sehimegöra mönö uruŋini qahö melengetmö, toroqeba yangiseŋ aka malget.

¹⁰ Suep garata 5:ŋan qambiŋgö ölni mi jemnembagö jakömbuak dumnöŋ mokoyök. Miangöreŋ mokoiga söŋaup ketanŋan jemnembagö ömetohöŋi (kingdom) mi dop köla pandaman meyök. Pandaman meiga ambazip irimŋini seholiiga nesilamŋini jitŋinan yöhötiŋgetka tiŋgirök.

¹¹ Ambazipnöŋ sihimbölö aka uzi nömböŋinangö sihimbölöŋi ketani möta miangöra Suepkö Anutuŋi mi jim qesuahöm waŋgiba malget. Mewö malgetmö, ahakmemenŋi bölöŋi aka memba malgeri, mi qahö kewöta mosöta uruŋini qahö melenget.

¹² *Suep garata 6:ŋan qambiŋgö ölni mi o töwatŋi ketani qetŋi Yufreitis miangöreŋ mokoiga jöpköyök. Wehöŋ kotkotŋeyök kiŋ kembuŋi

* 15:8: Eks 40.34; 1 Kiŋ 8.10-11; 2 Hist 5.13-14; Ais 6.4
78.44; Eks 10.21

* 16:12: Ais 11.15

* 16:2: Eks 9.10

* 16:4: Eks 7.17-21; Sum

kembuñi kabingö möta jöjöröba malgeri, yeñön o jöpköiga kunbuk qahö pañpañgögetmö, kutuba kamegö könañi mönö asuhuyök.

¹³ Mianğöreñök uba öme bölöñi karöbut tandökñini kañ ewö mi engekiga sekak namñi ilikñambuk, jemnemba aka kezapqetok azi takapulakañi yeñgö numbuñineyök kota etket.

¹⁴ Ömewöröme mienñön eta anda aņgöletotñi könañi könañi ahakze. Mewö aka gölmeñi gölmeñi pakpak liliköba kiñ kembuñini engekiga Anutu tuarenjon akñegöra uruñini kuñguba kewö jiget, “Mönö mindirim aņguba Anutu kukösum pakpakö Toñañgö nalö ketañe mohotñe bim aubin.”

¹⁵ *Jisösnöñ jiza, “Kezap alget! Nöñön mönö yonğorö meme ewö ölöñ kamañ! Kunñan uruguliguli malmawı, yañön mönö simbawon akza. Sile aukñe lañ anda kaiga gamuñi ekepuköra sile esuñi galöm kölakzawañön mönö oyaenköyaen akña.”

¹⁶ *Öme welenqeçe yeñön kiñ kembuñi kembuñi mi kuñguba enğuañgita gölme köröñi qetñi Hibru keunöñ Armagedon jizei, mianğöreñ qezaköba al enğigetka enğehal. Mewö.

¹⁷ Suep garata 7:ñan qambuñañgö ölni mi könakemba mokoyök. Mokoiga möpömpösei jike (tempöl) uruñañgö jakömbuak dumñeyök qet ketañi kun asuhuba keu kewö kaiga jiyök, “Mi lök mokogetka asuhum teköza.”

¹⁸ *Mewö jiiga mianğöreñök wölbilik aiga wölpöndañ giliga giñgururuñ qeta ahöiga kenöñ jitiñi buburatiñi kun meyök. Iw (Ewa) Adam yetkö nalönöhök könahiba gölmeñöñ mala korini, nalö mianğöreñ kenöñ mewöñi kun qahö gilgilña. Mianğö dop tandökñi sohosohöñi giliga bölöñi kötökñi ahök.

¹⁹ *Mewö asuhuiga siti ketañi Babilon mianñön jula bahöñi karöbut aket aiga kantriñi kantriñi pakpak mienğö sitiñini mi mewöñanök ayuhuba melenñi geget. Anutunöñ siti qetbuñañambuk Babilon mienğö bölöñamñini qahö ölüm qeiga likepñamñini melenñ enğiyök. Anutunöñ urukönöp aka irimsesewölñan qambi kokolak qeba taröhi, mi mönö mokom enğiiga qakñine öñgöiga wain o ewö neget.

²⁰ Köwetnöñ gölme jölanñi pakpak ahögeri, mi mönö kök ala sömuniget aiga kunduñi kunduñi kingeri, mi mönö mewöñanök ayapköba qahöwaket.

²¹ *Mewö asuhuiga ais kötñi ketañi lömbötñini 45 kilogram mienñön suepnöhök ambazip qakñine erök. Lömböt kanjamñambuk mi tandökñi sohosohöñi ahök. Kie kötñi tandökñi mewö mianñön eta enğiiga ambazipnöñ mianğöra Anutu jim qesuahöm wañgiget. Mewö.

17

Ambi kunöñ jemnembagö qakñe tari ehal.

¹ *Suep garata 7 qambi 7 mi memba kingeri, yeñgöreñök kunñan kaba nöñgöra keu kewö jiyök, “Gi mönö kanöñga köna ketañañgö ambi qetbuñañambuk o gwötpuk mienğö qakñine tatzawi, mi kondel gihimam. Anutunöñ keuñi kewöta likepñi melenñi qakñe öñgöi malja.

² *Gölmegö kiñ kembuñi kembuñi yeñön yambuk serowilin aka malget. Könagesöñinan gölmeñöñ maljei, yeñön mönö mewöyök ambi mianğö serowilinñañgöra aka uruñini wahöta sohoiga kahalalom aket. Wain o nempa enjololon ahakzei, mönö mianğö dop könahiba sero yonğorö aka mala kahapmahap aket.”

* 16:15: Mat 24.43-44; Luk 12.39-40; Ind 3.3 * 16:16: 2 Kiñ 23.29; Zek 12.11 * 16:18: Ind 8.5; 11.13, 19 * 16:19: Ais 51.17; Ind 6.14 * 16:21: Eks 9.23; Ind 11.19 * 17:1: Jer 51.13 * 17:2: Ais 23.17; Jer 51.7; Ind 13.1

³ Mewö jiiga Uña Töröñan nömeiga alburupñan qakne öngöiga Suep garata mianñon noañgiriga gölme qararanñkölñe añgoral. Mianñoreñ añgota ambi kun jemnemba pisikñi pötpöt yanğö qakñe tariga ehal. Jemnembagö sileñe mepaqepaik qetñi qetñi ohogetka kokolak qeiga nöropñi 7 aka ilikñi 10 mewö kinök.

⁴* Amba mianñon opo söro pisikñi gugakgugak aka pisikñi pötpöt mi löngöta tarök. Aködamunñi goul, jamönñin ölninambuk aka kösatorom tosatñi mianñon menjölöm añguiga tandökñan kölköl-bilikbilikñambuk ahök. Böröñe goul qambi memba taröhi, mi serowilin aka malöhanğö añğöjörakñi imbilonñonambukñon kokolak qeqeña.

⁵ Amba mianğö mesoholñe qetñi tölapñi mi kewö ohogetka ahöyök, “Babilon qetbuñanambuk, gölmegö köna ketañi ambazip aka añğöjörak imbilonñonambukö namñini.”

⁶ Qetñi mewö ahöiga Anutugö ambazip sarakñan Jisösgö könañi nañğöba böñ qeba kinda jiba malgeri, mi enğuba sepñini nembra mianğöra kahalalom ahöi ehal. Mi eka aurum tililingöyal.

⁷ Aurum tililingöbiga Suep garatanöñ nöngöra keu kewö jii möral, “Gi mönö denöwögöra aurum tililingözan? Nöñon ölop ambi kianğö könañi tölapñi indel gihimam aka jemnemba nöropñi 7 aka ilikñi 10 ambi mi bisimakzawi, yanğö könañi tölapñi mi mewöyök indela jim miwikñaim gihimam.

⁸* Jegi melenñiga jemnemba ekzani, yanñon mutuk malökmö, nalö kewöñe jebuk qahö malja. Yanñon ömewöröme yengö löm dutñi qahö mianğoreñök guliba wahötmampö, Kraistnöñ kaköm wañgiiga könöp sianöñ gema. Anutunöñ Suep gölme miwikñaim etkiyöhi, nalö mianğoreñök könahiba gölmenöñ mala kotketka qetñini malmal köhöikñanğö papianöñ qahö ohoget ahözawi, ambazip mienñon mönö jemnemba eka aurume. Jebuk malökmö, nalö kewöñe jebuk qahö malja aka könañgep kunbuk guliba asuhumawi, mianğöra mönö aurume.

⁹ “Nini keu ki möt asaribingöra möringa mötkutukutuñan kewö ahöza: Nöropñi 7 mi ambinöñ kundunñi 7:gö qakñine tatzawi, mönö kundunñi mienğö söpsöpñi akze.

¹⁰ Nöropñi 7 mi mewöyök kiñ kembu 7 mienğö kaisöpsöpñi akze. Yengöreñök 5 lök kömumba etketka 6:ñi yanñon mala ambazip galöm köl enğimakza. Qöndökñan bian asuhumawangö dop akza. Yanñon asuhumawi, mianğoreñ mönö nalö töröpñi kukösum qakñe kinmawangö dop akña.

¹¹ Jemnemba malökmö, nalö kewöñe qahö toroqeba maljawi, yanñon 7 yengöreñök kun akza. Yanñon kunbuk guliba nannak kiñ kembu jangöñi 8 akña. Mewö akñapmö, Kraistnöñ könden wañgiiga ayuhuba könöp sianöñ gema.

¹²* “Ilikñi 10 enğekzani, mi mönö kiñ kembu 10 mienğö kaisöpsöpñini akze. Yenñon qahö könahiba ambazip galöm köl enğimakzemö, Anutunöñ könañgep kukösum enğiiga kiñ kembu ewö akñe. Mewö aka jemnembabuk aua mohotkö dop ambazip galöm köl enğiba malme.

¹³ Kiñ kembu 10 mienñon mötmöt areñ mohot miyök wuatangöba jemnemba nañğöba kukösumñini i wañgigetka malma.

¹⁴ Ösumñini mewö mindiriba Lama moröñi tuarenjon aka bim aumemö, Lama moröñan mönö luhut al enğiiga etme. Yanñon kiñ yengö Kiñini aka azi kembu yengö Kembuñini akza. Yanñon neñgohola möwölöhöm neñgiiga yambuk pöndañ kinda malbini, neñon mönö mohotñe luhut al enğiba köirañ kölbin.”

* 17:4: Jer 51.7 * 17:8: Dan 7.7; Ind 11.7; Sum 69.28 * 17:12: Dan 7.24

¹⁵ Suep garatanöŋ keuŋi mewö jiba toroqeba kewö jii möral, “Köna ketanangö ambi ketanang o gwötpuk mienögö qakŋine tariga engek teközani, o mi ambazip kantriŋi kantriŋi mienögö kaisöpsöpŋini akze. Yeŋön kambuŋini aka bem isikŋinanangö dop likeplikep tat angetka sileŋini könaŋi könaŋi aiga keuŋini tandökŋi murutŋi murutŋi jimakze.

¹⁶ Jegi melenŋiga ilikŋi 10 engekzani, yeŋön mönö ösumŋini jemnembabuk mindiriba köna ketanangö ambi mi kazik ak wanŋigetka kewö asuhuma: Yeŋön öröyuaiŋi pakpak kiom qegetka piromŋi aiga opo söröŋi köteköm tekögetka sile aukŋeyök aiga busuŋi nemba sihitŋi könöpŋi ohogetka jem teköma.

¹⁷ “Mewö asuhumawi, mi Anutunöŋ kiŋ kembu mienögö uruŋini kuŋguba sölölohöm enŋiiga urumohot aka mindiriba akŋe. Anutugö mötmöt areŋi mönö mewö wuatangöme. Mianögö dop kukösumŋini jemnemba wanŋigetka ambazip galöm köl enŋiba malma. Mewö maliga Anutugö keuŋan ölnambuk akŋawi, nalö mianögöreŋ teköma.

¹⁸ Ambi tari ekzani, mi siti qetbuŋanambuk toŋan gölmegö kiŋ kembuŋi kembuŋi galöm köl enŋimakzawi, mönö kiŋ mianögö söpsöpŋi akza.” Mewö.

18

Babilon siti köndengetka gororongöma.

¹ Mianögö andöŋe Suep garata kun kukösumŋi öngöngöŋi ekiga Suepnöhök asuhuba eriga asakmararaŋan gölme mem asariyök.

² *Eta köhöikŋanök silata kewö qerök, “Babilon siti ketanŋi mi köndenget. Mi ölna köndengetka gororongoyök. Ambazip qahöwaketka öme wöröme könaŋi könaŋi yeŋönök mönö tokoba miriŋini mianögöreŋ megetka yeŋö gölmeŋini bohonŋi ahök. Neiŋi neiŋi dönqizinŋinambuk aka imbilonŋinambuk mienönök mönö mianögöreŋ tokoba aipŋini laŋ ala öŋsöŋ malje.

³ * “Anutunöŋ mi kewögöra jiiga köndenget: Kantri pakpak yeŋön ambi mianögö serowilinŋangöra aka uruŋini wahöriga enjololonŋi aketka Anutugö irimŋi seholyök. Irimsewölŋi mi qakŋine öngöiga wain o nemakzeangö tandök mötket. Gölmegö kiŋ kembuŋi kembuŋi yeŋön ambi miambuk sero namböŋnamböŋ aka malget. Kölköl-örörö ambazipnöŋ gölme dop mianögöreŋök kaba sukinap aködamunŋinambuk bohonŋi memapköra algetka önöŋi qahö öröba siyoŋsayoŋi qahö malök. Yanögö örömgöjup memgöjupŋangöra aka yeŋön pomŋi kindiŋbirik aka öngöngöŋi aket.”

⁴ *Mianögö andöŋe Suepnöhök kunöŋ keu jiiga kewö möral, “Nöŋgö könagesöurupni, iŋini mönö siti mi mosöta yaigep etket. Ambi mianön siŋgisöndok ahakzawi, mianön mönö enŋualöŋni yambuk kinda uruŋini tölohobepuk.

Anutunöŋ likepŋi melenŋ enŋiiga lömböt kanjamŋinambuk qakŋine öngömei, lömböt mewöŋi kunöŋ mönö nanŋini qakŋine öngöiga mewöyök sihimbölö mötpepuk. Mianögöra yembuk mönö kude mindiriba malme.

⁵ *Ambi mianön siŋgisöndokŋi aka qaknöŋ qaknöŋ aliga öngöba lök suep misirim teköza. Kegwek-kahasililiŋ aka malgeri, Anutunöŋ mi mönö nanŋi mötmötnöŋ ala mianögöra qahö ölum qema.

⁶ *Ahakmeme goŋgoŋi tosatŋi ak enŋiba malgeri, iŋini mönö mianögö dop melenŋda ak enŋime. Bölöŋi aka memba malgeri, iŋini mönö mianögö likepŋi sömaŋi yahötkö dop melenŋ enŋigetka qakŋine öngöma.

* **18:2:** Ais 13.21; 21.9; Jer 50.39; 51.8; Ind 14.8 * **18:3:** Ais 23.17; Jer 51.7 * **18:4:** Ais 48.20; Jer 50.8; 51.6, 45 * **18:5:** Jen 18.20-21; Jer 51.9 * **18:6:** Sum 137.8; Jer 50.29

Singisöndokö qambiñi nemegöra mokoba malgeri, nannini qambi mianğoreñök mönö sömañ yahötkö dop uba melenđa wain o kömbukñi kötökñi mi enğöra mokoget neme.

⁷ *Ambi mianğön sukinap aködamunñinambuk önöñi qahö öröba qetbuña öngöñgöñi miwikñaiba siyonşayonñi qahö malök. Mianğö likepñi mönö nannı ihileknöñ ohotiriba ip özöpaññöñ sihimbölö önöñi qahö ak wañgigetka jinğen köla wösöbirik malma. Nannı uruñe kewö mötmöriba lañ jimakza,

‘Nöñön qin ambi kembugö jakömbuak dum tatatñe tatzal. Malö qahö akzal aka nalö kunöñ jinğen qahö kölmam.’

⁸ Mewö lañ jimakzawañğöra aka Anutunöñ likepñi melen wañgiiga nalö mohotkö uruñe yañgö qakñe öngöma.

Kembu Anutunöñ keuñi kewöta jim teköm wañgiyöhi, yañgö kukñan mönö öngöñgöñi akza.

Mianğöra lömböt kanjamñinambuk könañi könañi mienğön mönö zilañ kewö asuhum wañgime:

Tinitosolomñan kömugetka jinğen köla bödi tariga nannı könöpnöñ ohogetka jema.”

⁹ *Könöpnöñ ohogetka jeiga köwak wahötmawi, kantriñi kantriñi pakpak miengö kiñ kembuñinan mi eka mönö amburereñ aka sahötme. Kiñ kembu mienğön yambuk serowilin aka malget. Sukinapñi aködamunñinambuk önöñi qahö mianğö nem söñgairñi yambuk ala söñgaiba malgeri, yeñön mönö yañğöra aka jinğen kölme.

¹⁰ Jinğen köla ihileknöñ ohotirigetka ip özöpaññöñ sihimbölö önöñi qahö mötzawi, mianğöra mönö töwöratiba tikep kinda kewö sahöta jime, “O Babilon siti qetbuñañambuk, lömböt qakñine öngöyöhañğöra mönö Yei! Yei! jiba sahötzin. O siti kukösumñini ketañi, Suep Toñan likepñi melen enğiiga ösumok aua mohotkö uruñe qakñine öngöiga sihimbölö ketañi mötze. Yei Yei! jiba sahötzin!”

¹¹ *Kantriñi kantriñi miengö kölköl-örörö ambazip yeñön mewöyök amburereñ akñe. Kunñan toroqeba yeñgö inapñini bohonñi qahö memakñawañğöra mönö jinğen köla sahötme.

¹² *Aködamunñini goul, silwö, jamönñin ölñinambuk aka sorom kötni mi Babilon yeñön me tosatñan qahö bohonñi meme. Oponñini tuat lalamñi, pisikñi gugakgugak, pisikñi pötpöt aka opo qetñi silk mi qahö bohonñi meme. Ip qetpuk könañi könañi miengö kemañini aka börösöwöñini könañi könañi mi qahö toroqeba bohonñi meme. Aködamunñini elefant sihitñan memenji, mi öne ahöme. Dum tebol yuainñini ip söñgöröñini ketañi in, qönqön, mihinik, nañim aka yuari mianğön memenji, mi öne ahöme. Börösöwö ain gohotñi brons aka ain injañan memenji aka köt qetñi mabol mianğön memenji mi mönö öne ahöme.

¹³ Babilon yeñön kömusönönik (sinamon) aka gipñi tosatñi mi qahö bohonñi meme. Silegö sanda qetñi mör, jiniñ samburup aka sile ömön tosatñi mi qahö bohonñi meme. Wanafu, berat, wölömjikjik aka wörönñi asuhumapkö yuai tosatñi mi qahö bohonñi meme. Mewöyök wain o, oil ipkö oilñi, wit kötni aka flaua nenenji mi qahö bohonñi meme. Bulmakau, lama, hos aka hos kare mi qahö bohonñi meme. Mutuk welenqeçe ambazip bohonñini memba nupñöñ al enğigetka sile me urumötmötninan böliba ayuhuyök. Mewö qahö toroqeba ahakñe.

* 18:7: Ais 47.7-9 * 18:9: Eze 26.16-17 * 18:11: Eze 27.31, 36 * 18:12: Eze 27.12, 13, 22

14 Kölköl-örörö ambazip yeñon Babilon ambi miangöra kewö jime, “Ip ölni nemamgö sihimni möta eröm ota malnöni, mi mönö qahöwaketka öne maljan. Töhötmöriamgi aka sukinapki aködamunjinambuk mi mönö körek pakpak gömosöta ayapkögetka tömtömimba maljan. Mi mönö nalö kungen kunbuk miwikñaimanangö dop qahö.”

15 *Kölköl-örörö ambazip sukinapni mewö mewö bohonni memegöra ala siti miangörenök moneñ goul (guli dötnam) öröba qetbunajinambuk aket. Yeñon tikep kingetka tosatñan ihileknöñ ohotirigetka ip özöpaññöñ sihimbölö önöni qahö möröhi, miangöra mönö auruba sahöta jinñen kölme.

16 Jinñen köla kewö jime, “O siti ketani, lömböt qakñine öngöyöhangöra mönö yei! yei! qeta jinñen köljini. Yeñon oponiñi tuat lalamni, pisikni gugakgugak aka pisikni pötpöt mi löngötket. Aködamunniñi goul, jamönjinñi ölninambuk aka kösatorom tosatñan meñölöm anjugetka tandökñinan kölköbilikñinambuk aket.

17 *Mewö aketmö, sukinapniñi mewöni önöni qahö mi mönö ösumok aua mohotkö uruñe ayuhuba ayapköba qahöwaket.” Mewö jiget.

Wañge pailot pakpak aka ambazip wañgenöñ anda kamakzei, yeñon mewöñanök körek Babilon siti ohoget jeiga köwakni mi tikep kinda ekñe. Mewöyök wañge ambazip opo seri mörörengögetka luhutnöñ nanñöi anakzei aka köwetnöñ nup tosatni memba malmalñini nanñömakzei, mienñon mönö körek pakpak mi tikep kinda ekñe.

18 *Ambi ketani qetbunajinambuk ohoget jeiga könöp bölamñangö köwakni wahötmawi, mi tikep kinda eka amburereñ aka kewö jime, “Siti qetbunajinambuk kianñö alañi mönö nalö kunöñ qahö ahöyök.”

19 *Mewö jiba sömsöm urata kau ariba qeta jinñen köla unduba sahöta kewö jiget, “O siti ketani, aua mohotkö uruñe yuaini pakpak mönö ayuhuba ayapköba qahöwahök. Ambazip wañgeninambuk pakpak köwetnöñ anda kaba sukinapniñi bohonni memegöra ala miangörenök moneñ goul (guli dötnam) sehisehiñi örogetka siti mianñon qetbunajinambuk ahök. Lömböt qakñine öngözawañgöra mönö yei! yei! jiba sahötzin.” Mewö jiget.

20 *Yeñon ahakmeme gonñoni tosatni ak engiba malgeri, Anutunöñ mönö miangö keunji jim teköba likepni melenñiga qakñine öngöiga sihimbölö ketani mörakze. Miangöra Suep mire maljei, inñini mönö yanñöra aka köirañ kölme. Anutugö ambazip sarakni, aposolurupni aka kezapqetok ambazip inñini mönö söñgaiba saureñ qeba malme.

21 *Miangö andöñe Suep garata ösumni öngöñgöni kunöñ kaba köt keta bölöknji memba wahöta köwetnöñ gili geiga kewö jiyök, “Anutunöñ siti ketani qetbunajinambuk mi mönö kianñö dop könöpuk köndenñda melenñi geba qahöwak teköma. Qahöwak teköiga könañgep nalö kunöñ qahö miwikñaimañgö dop akña.

22 **Inñini siti miangöreñ kömam köla gita kulele qeba awölop tömun uba linjet köla undumalgeri, miangö kourukni mönö nalö kunöñ kunbuk qahö mötme. Babilon engöreñ ambazip mötmöt nupñini könañi könañi memba malgeri, mi mönö teköyök. Dokta didiman, qaqazu klak aka mewöni mi miangöreñ kunbuk qahöpmahöp miwikñaim engime. Wit padi kötni jamönjinñi yahötkö sutñire möjöhögetka (mill) kourukni asuhuyöhi, miangö isikusukñan mönö qahöwahiga sitinöñ mönö göröñ qeba ahöma.

23 “Mutuk sitinñanñgö mirinñi pakpak mi kiwanñinambuk asarigetmö, asakñi mianñon mönö bököiga pandaman ahöma. Azigö andöurupñinan ambigö mam

* 18:15: Eze 27.31, 36 * 18:17: Ais 23.14; Eze 27.26-30 * 18:18: Eze 27.32 * 18:19: Eze 27.30-34
* 18:20: Dut 32.43; Jer 51.48 * 18:21: Jer 51.63-64; Eze 26.21 * 18:22: Eze 26.13; Ais 24.8 * 18:22: Jer 7.34; 25.10

bohonji bau anguba borum megetka ambigö sepkitipurupnan köiranj ala nem jöwösök aka sösöngai almalgeri, oköiranj mewönanjgö kourukni mi mönö kunbuk mötmeanjgö dop qahö. Babilon engö kölköl-örörö ambazip mi kantrinji kantrinji mianjgörenj möt engigetka qetbunaninambuk aka malget. Yengörenj qarösongo amötqeqe ambazip mi gölme dop ambazip urunini mem sohogetka janjunj aka malget.” Suep garatanöj mewö jiyök.

²⁴ *Babilon mi kewögöra ayuhuyök: Kezapqetok ambazip aka Anutugö ambazip sarakni mi mönö yengö sutnjine töndup taköwölanj aka enguget kömugetka sepñinan erök. Yengörenj sep aka gölmenöj ambazip tosatni engugetka kömumalgeri, körek yengö sepñinanjgö kitipnan mönö yengö qaknjine öngöi malget. Könanamñini mewö miwikñagetka ahöyök. Mewö

19

Suep yenön Babilon geyöhanjgöra Anutu möpöseiget.

¹ Mianjgö andöje Suepnöhök keu kun mötpiga kambu ketanj yenön köhöikñanök saurenj linet köla qetzei, mönö mianjgö tandöktandök asuhui kewö jiget, “Anutu möpöseizin aleluya! Anutunöj amöt nenjguba nenjgömeiga yanjgö bunanj akzin. Anutuninan kukösum Tonji aiga möpöseim wanjiinga qetbunanambuk akza.

² *Anutunöj mönö keu ölnanjgö dop ambazip keunini kewöta dinñinanök jim teköm nenjimakza. Köna ketanj ambi serowilin aka mewö mianjgö ambazip gölme dop mem bölim engiba malöhi, Anutunöj mönö yanjgö keunij kewöta jim teköyök. Ambi mianjgö Anutugö nup meme ambazip enjiuga sepñinan eröhi, mianjgö likepni mönö melenj wanjiiga qakne öngöiga sihimbölö möta malja. Mianjgöra Anutu möpöseim wanjgin.”

³ *Mewö jiba kunbuk qeta kewö jiget, “Ambi mi ohoget jeiga köwakñan mönö nalö dop teteköni qahö wahöta öngömakña. Mianjgöra Anutu möpöseim wanjimakzin, aleluya!”

⁴ Mewö qeta jigetka Anutugö jitnememe bohonji 24 aka bem jembon 4 mienön mönö bamgöba simin köla Anutu, jakömbuak dumje tatzawanjgö waikni memba möpöseiba kewö qetket, “Keu mi ölna, aleluya!”

Lama morönanjgö maren lömbuanj

⁵ *Mewö qetketka jakömbuak dumnöhök keu kun kewö asuhuyök, “Anutugö nup meme ambazip ketanj moröni jitni ongitpinbuköra kenjgötñini mörakzei, injini mönö körek pakpak Anutunini möpöseiba malme.”

⁶ *Keu mi asuhui keu kun mörali, mi kianjgö tandöktandök: Kambu ketanj yenön linet köla qet qerakzei aka o sianöj tonjala kiniga ötöni asuhumakzawi aka wölpöndandanj ketanjan qeiga ginjururunj asuhumakzawi, keu mi mönö mianjgö tandöktandök ewö asuhui kewö jiget, “Kembu Anutunini, kukösum pakpakö Tonjan mönö könahiba gölme dop galöm köl engiba kinj Kembunina aka malma. Mianjgöra Anutu möpöseizin, aleluya!”

⁷ Lama morönanjgö ambi bunanan mönö marengö möta nanji mözözömgöba jöjöröm anjiuga amjeiga ambi memegö nalönan mönö kam kunjiuga maljin. Mianjgöra nenön mönö köiranj köla söngaiba Anutu möpöseim wanjiinga qetbunanjan sehimakña.

⁸ Anutunöj maluku tuat lalamni asakmararanambuk mi enjiuga löngötket.” (Maluku tuat lalamni mi ambazip sarakni yengö ahakmeme solanjanjgö kaisöpsöpni, mönö mianjgörenj löngöt anjuget.)

* 18:24: Jer 51.49 * 19:2: Dut 32.43; 2 Kinj 9.7 * 19:3: Ais 34.10 * 19:5: Sum 115.13 * 19:6: Eze 1.24; Sum 93.1; 97.1; 99.1

9 *Kambu ketanangö tandöktandök mewö qeta jigetka Suet garata qam-biñambuk mianjon mönö toroqeba kewö jii möral, “Keu ki mönö ohoman: Anutunöñ ambazip engoholiga Lama moröñangö maren (ambi memegö) lömbuanñöñ kanjotmei, yeñon mönö simbawon akze.” Mewö jiba dumne kunbuk nöngöra kewö jiyök, “Keu mi mönö Anutugö keu öl töhöññi akza.”

10 Suet garatanöñ mewö jiiga nöñon mianjörenök yangö waikñi memba möpöseim wanjimangö möta yangö könañe simin köla sipköyalmö, nöngöra kewö jiyök, “Aek! Mewö kude akñan. Gi aka göhö urumelen alaurupkan Jisösgö könañi nanjöba jiba malgetka welen qem engimakzini, nöñon mönö yengörenök kun akzal. Jisösnöñ Buña keu öññi indelöhi, mianjö ösumñan mönö kezapqetok ambazip inahöm engiiga Uña Töröñangö keunji möta jim sehiget. Mianjöra mönö Anutugöra sipköba waikñi memba möpöseiba mal-man.” Mewö.

Kraistnöñ yarö kambunji yembuk bim aubingö anget.

11 *Nöñon Suet añañiiga hos tuatñi kun ekiga kayök. Qakñe tariga kayöhangö qetñi mi Pöndañ Kinkin (Jembon onji nene) aka Azi Ölbölñi. Qetñi mewö qerakzei, yanön keu diññi wuatangöba keu kewöta jim teköba mianjö dop bim qemakza.

12 *Jeñan köñöp bölam tandök jeiga nöropñe ila jalö gwötpuk kölgetka qetñi aukñe ohohonja kayök. Qetñi nanñök mötzapmö, kunöñ kun mi qahö mötza.

13 Malukunji sepnöñ kusakusaholñi mi löngöta kayök. Qetñi qerakzei, mi Anutugören keu.

14 I wuatangöba kageri, mi Suet mirigö yarö azi kambunji kambunji. Yeñon hosñini tuatñi engömembra qakñine tata malukunji tuat lalamñi sarakñi löngöta kaget.

15 *Suahöñinangö numbuñeyök bingö sou ketani (bainat) jitñi zuluk alalñambuk kunöñ kayök. Mi kantrinji kantrinji enguba luhut al engimapköra aka kayök. Yanön galömkölkölgö ain öröññan kantri dop qindiñaiba galöm köñ engiba malma. Yanön Anutu kukösum pakpakö Tonangö wain joutñi ketani tözöhölma. Wain jout mi Anutugö irimsesewölñi urupikñambukö kaisöpsöpñi akza.*

16 Malukunje qetñi kun ohogetka marömñe kewö kinök, “Kin yengö Kinini aka azi kembu yengö Kembunji.” Mewö.

17 *Mianjö andöñe Suet garata kun ekiga wehön jeñe kinök. Euyangören kinda köhöikñanök qeta neiñi neiñi suet bibiñi kutuba könakemba bölbölgöba anakzei, mönö körek mi engohola kewö jiyök, “Inini mönö kame-e! Anutunöñ közölömbuan ketani mözözömgöyöhi, mönö mianjören tokome.

18 Kaba tokoba kin kembu, suahö galöm aka yarö azi yengö busunini neme. Hos aka hos qakñine tarakzei, mönö yengö busunini neme. Ambazip körek yengö busunini mönö kaba neme. Ambazip öngöñgöñi eretñi, nanñini nupñini memakzei aka tonjanangö welennini öne qemakzei, mönö körek mienjö busunini neme.”

* 19:9: Mat 22.2-3 * 19:11: Eze 1.1; Sum 96.13; Ais 11.4 * 19:12: Dan 10.6 * 19:15: Sum 2.9; Ais 63.3; Joel 3.13; Ind 14.20 * 19:15: Jisösnöñ Anutugö irimsesewölñi aka urupikñi tözöhölmawi, keu mianjö könañi kewö: Nini siñgisöndok ahinga Anutugö irimñi sehöliiga irimsesewölñan qakñine öngöba ahöma. Toroqeba siñgisöndok aka urunini qahö meñninga Anutugö irimñan toroqeba sehöliiga urupikñambuk akña. Wain kösögö öññi pisikñi (greip) mianjö kanñi mi jout ketane ala tözöhölgetka qösököiga onjan dutñangö kinimñe lalanöñ geiga baket algetka mianjö urunje gemakza. Anutugö irimsesewölñi aka urupikñi mianjö söpsöpñi mi wain kösögö öññi. Jisösnöñ mianjö sihimbölöñi möta tözöhöli geiga Anutugö urunjan amöriba teköiga luai asuhuma. * 19:17: Eze 39.17-20

¹⁹ Miangö andöñe jemnemba aka gölmeñi gölmeñi yeñgö kiñ kembuñini mienön mönö yarö kambuñini enġuanġita kaba tokogetka enġeħal. Kunöñ hos qakñe tata yarö kambuñi yembuk kinöhi, mönö i tuarenjon ak enġiba bim aubingöra tokogetka enġeħal.

²⁰ *Augetka jemnemba memba jöhöget. Kezapqetok azi takapulakanı jemnembagö jıtñememba anġöletot aka malöhi, i mewöyök jemnembabuk memba jöhöget. Kezapqetok azi takapulakanın anġöletot aka mianön ambazip tosatñi kewöñi mi tilipköm enġiiga janjuñ aka malget: Ambazip jemnembagö supapñi memba anġön kölgeri aka tosatñan imutñanġö waikñi memba möpöseiba malgeri, mi mönö tilipköm enġiba malök. Etkömemba jöhöba gwölögwölö aköm etkigetka löm salfa kötkö könöp bölamñan koasikpuk jemakzawi, mönö miangö sianön geyohot.

²¹ Geyohotka hos qakñe taröhanġö numbuñeyök bimgö sou ketanı (bainat) kayöhi, mianön mönö kiñ kembu aka yarö azi pakpak mi enġuiga kömuget. Kömugetka nei pakpak yeñön kanġota busuñini uba memba nem timbireñ aket. Mewö.

20

Satan jöhögetka yara 1.000:gö dop kösö mire tarök.

¹ Miangö andöñe Suep garata kun ekiga Suepnöhök erök. Yanön ömewöröme yeñgö löm dutñi qahö miangö ki moröñi aka tapep (muñgamuñga) ketanı kun mi böröñan memba erök.

² *Garata mianön eta sekak namñi ilikñambuk (dragon) mi memba (yara) yambu 1.000 tatmawanġöra jöhöyök. Sekak namñi mi möpñanġö möpñeyök mokoleñ aka mala korök. Qetñi alañi mi Bölöñanġö Toñi aka Satan.

³ Yambu 1.000:gö uruñe toroqeba ambazip kantri dop kuñguba gölme dop janjuñ akñegöra tilipköm enġibapuköra jöhöyök. Jöhöba ġili ömewöröme yeñgö löm dutñi qahö miangöreñ ġeiga önunñi köla sapö ala muñgem supapnöñ (sil) ġekötahöba ki namñi misii ġeiga uruñe tarök. Mewö tari Suep garatanön kewö jiyök, “Yambu 1.000 teköiga miangö andöñe Anutunön jii kunbuk pösatketka nalö töröpñi nupñi memba malma.” Mewö jiyök.

⁴ *Miangö andöñe jakömbuak dumñi dumñi eħal. Anutunön tosatñi kukösum enġiiga ambazip keuñini jim tekömei, yeñön mönö dumñi dumñi miangöreñ eta tatket. Mewöyök ambazip Jisösgö könañi nanġöba jigeranġöra aka Anutugö Buña keugöra aka jölñini yandigetka kömugeri, mönö yeñgö uñañini enġeħal. Mewöyök ambazip jemnemba aka yanġö imutñanġö waikñi qahö memba möpöseigeri aka yanġö supapñi mi mesoholñine me böröñine qahö memba anġön kölgeri, mönö yeñgö uñañini enġeħal. Uñañini mi enġekiga mönö ġuliba wahötket. Wahöta Kraistpuk (yara) yambu 1.000:gö dop yuai pakpak ġalöm köla malget.

⁵ Kömugeri, yeñgöreñök tosatñan kömupnöñök wahötwahöt mutukñi miangö nalöñe qahö ġuliget. Qahöpmö, (yara) yambu 1.000 mi mambötket teköiga miangö andöñe mönö ġuliba wahötmö.

⁶ Denike yeñön kömupnöñök wahötwahöt mutukñanġö nalöñe ġulimei, yeñön mönö oyaenġkoyaen aka töröñi sarakñi akze. Nalö miangöreñ ġulibagun mönö indimñi yahöt qahö kömume. Kömup yahötñanġö kukösumñan mönö yeñgö qakñine qahö öñġöi kömumbingö osime. Yeñön mönö Anutu aka Kraist yetkö jike nup ġalömurupñiri akñe. Mi aka Kraistpuk (yara) yambu 1.000 mi yuai pakpak ġalöm köla mal öñġöme. Mewö.

* 19:20: Ind 13.1-18 * 20:2: Jen 3.1 * 20:4: Dan 7.9, 22

Anutunöŋ Satangö keuŋi jim teköiga etma.

⁷ (Yara) yambu 1.000 mi teköiga Satan kösö mireyök (kopurumŋeyök) pösatketka etma.

⁸ *Eta anda ambazip kantri dop tilipköm enġimamgöra gölme dop liliköma. Gölme göräŋi likeplikep eu emu anda kaba (uruŋini moŋgosohowa) siksauk ak enġiba kantri qetŋiri Gog aka Magog mi tok dop köla anma. Anutu tuarenjon aka bim qemegöra kuŋgum enġiiga tokogetka jaŋgöŋinan köwetkö sak kösakö dop akŋa.

⁹ Tokoba kaba kutuba Israel gölme dop köl teköba anda Anutugö könagesö yengö selŋini aka Anutugö wölböt sitiŋi (Jerusalem) mi liliköba tatme. Mewö tatmemö, Anutunöŋ könöp bölam aliga suepnöhök eta jem kutum enġim teköma.

¹⁰ Jem kutum enġim teköiga Bölöŋaŋgö Toŋi tilipköm enġiiga jaŋjuŋ akeri, garata yeŋön i aköm waŋgigetka löm salfa kötkö könöp bölamŋan koasikpuk jemakzawi, mönö mianġö sianöŋ geyök. Mutuk jemnemba aka kezapqetok azi takapulakaŋi mewöyök aköm etkiġetka mianġöreŋ geba maljahot. Mianġöreŋ suŋgem asak ihileknöŋ ohotirim enġigetka teteköŋi qahö sihimbölö önöŋi qahö möta mal öŋgöme. Mewö.

Anutunöŋ ambazip kömugeri, yengö keuŋini jim teköma.

¹¹ *Mianġö andöŋe jakömbuak dum ketanŋi tuatŋi aka mianġöreŋ tatzawi, i ehal. Ekiga suep gölme mi yaŋgö jemesoholŋeyök qahöwaka angaiyohot. Angaiba kunbuk etkekinanġö dop qahö ahot.

¹² Angaiyohotka ambazip kömukömuŋi öŋgöŋöŋi eretŋi enġekiga jakömbuak dum wösöŋe kingetka Anutunöŋ buk papianŋi papianŋi kötulök. Papia alaŋi kun qetŋi malmal köhöikŋaŋgö qet areŋ papia mi mewöyök kötulök. Kötula ambazip kömukömuŋi yengö keuŋini kewöriġa ahakmemenjanġö kösohotŋi buk papianöŋ ohogetka ahöyöhi, yaŋön mönö mianġö dop oyoŋda ambazip jim teköm enġiyök.

¹³ Köwetnöŋ kömumba geba malgeri, mi köwet Toŋan melenġ enġiiga Anutugö jeŋe kaŋgotket. Kömupkö kondotkondot Toŋaŋgö böröŋe malgeri, mi Toŋi mianön kölenġa al enġiyök. Kömumba kömupkö uŋem mire geba malgeri, mi mianġö Toŋan melenġ enġiiga Anutugö jeŋe kaŋgotket. Mewö kaŋgota asuhugetka Anutunöŋ keuŋini mohot mohot kewöta ahakmemenjanġö dop jim teköm enġiyök.

¹⁴ Jim teköm enġiiga kömupkö kondotkondot Toŋi aka kömupkö uŋem miri Toŋi mi aköm etkiġetka löm könöp koasikpuk jemakzawi, mönö mianġö sianöŋ geyohot. Könöp sia mianġöreŋ geġeri, mianön mönö kömup indimŋi yahöt akza.

¹⁵ Anutunöŋ kungö qetŋi malmal köhöikŋaŋgö qet papianöŋ qahö ohogetka ahöi miwikŋaiyöhi, i mönö aköm waŋgii löm könöp koasikpuk jemakzawi, mianġö sianöŋ geyök. Mewö.

21

Suep dölökŋi aka gölme dölökŋi etkehal.

¹ *Suep gölme mutukŋi yetköŋ mewö qahöwaka ayapköyohotka köwetnöŋ mewöyök qahö toroqeba ahöyök. Mianġö andöŋe Suep gölme dölökŋi etkehal.

² *Jerusalem dölökŋi, siti töröŋi mi Suepnöhök Anutugö mireyök eriga ehal. Siti mi möhamgöm tekögetka eksihimŋambuk kewö ahök: Ambi maren

* **20:8:** Eze 7.2; 38.2, 9, 15 * **20:11:** Dan 7.9-10 * **21:1:** Ais 65.17; 66.22; 2 Pitö 3.13 * **21:2:** Ais 52.1; 61.10; Ind 3.12

wan̄gigetka maluku eksihim̄nambuk löngöta azi buñan̄ambuk aitonḡömapkörä menjölöm an̄guba jöjöröba aködamun̄nambuk kinjawi, siti mian̄ön mönö mian̄gö dop aiga ehal.

³*Mi eka kindä jakömbuak dumnöhök keu kun asuhui mötpiga köhöik̄nanök qeta kewö jiyök, “Eknöñ, Anutugö mirinöñ mönö ambazip sutñine eta ahöza. Anutunöñ sutñine maliga yambuk malgetka nan̄jak bem Anutun̄ini aka yembuk mal öngöma.

⁴*Yembuk mala je imbil̄ñini mi lök̄nanök kutum teköma. Yuai pakpak mutuk ahöyöhi, mian̄ön mönö qahöwak teköyök. Mian̄göra kunbuk qahö kömugetka jin̄gen̄kölköl qahö ak̄ne aka toroqeba sihimbölö kun qahö mötme. Yuai kungöra qahö osiba sahötme.”

⁵Jakömbuak dum̄ne tatzawan̄ön kewö jiyök, “Mötnöñ, nöñön jibiga öröyuai pakpak mönö kölöñaība dölok̄ñi ak̄ña.” Mewö jiba jiyök, “Keu mi ö! töhöññi uruyahöññi qahö, mian̄göra mi mönö papianöñ ohoman.”

⁶*Toroqeba kewö jii möral, “Mi mönö jibiga asuhum teköza. Nöñön mutuhök mala (yuai pakpak miwik̄ñaība könan̄gep jibi qahöwahiga) qöndök̄ña mal öngöba malmam. Mian̄gö dop nöñön kulem nam̄ñi mutuk̄ñi A aka kulem nam̄ñi teteköñi Z akzal. Kun̄ñan ogöra mötzawi, nöñön mönö malmal köhöik̄nan̄gö o jeñeyök o mi kalema wan̄gibiga mian̄göreñök söñgöröñi qahö um namba malma.

⁷*Kun̄ñan lömböt pakpak on̄gita luhut almawi, nöñön mönö yan̄gö Anutun̄i aka yuai pakpak mi wan̄gibiga buñani aiga nöngö nahönböratni aka qetni bisiba malma.

⁸“Mewö malmapmö, tosatñan ambazip jeñine zirin̄zirin̄ aka böñ qahö kindä mötnarip̄ñini mosötkeka urun̄inan tölohozawi, yeñgö mirin̄inan mönö löm salfa kötkö könöp* bölam̄ñan koasik̄puk jemakzawi, mian̄göreñ ahöma. Yeñgöreñ toroqeba ambazip kewöñi yeñön mewöyök mian̄göreñ geba malme: Ambazip en̄guget kömugetka kaisero qaröson̄go amötqeqe aka tandö lopion̄ waik̄ñini memba möpöseiba mun̄eñ keu jimakzei, nöñön mönö i aköm en̄gibiga sia mian̄göreñ geba malme. Mi kömup indim̄ñi yahöt ak̄ña.” Jakömbuak dum̄ñeyök keu mewö kaiga möral. Mewö.

Jerusalem siti dölok̄ñi mi qain̄ñi kun.

⁹Lömböt kan̄jam̄ñinambuk qöndök̄ñi 7 mian̄ön qambi 7 kokolak qegetka Suep garata 7 mien̄ön mi memba kingeri, yeñgöreñök kun̄ñan kaba nöngöra kewö jiyök, “Mönö kan̄öñga Lama moröñan̄gö ambi buñani anöm̄ñi ak̄ñam̄gö akzawi, mi kondel gihimam.”

¹⁰*Mewö jiiga Un̄a Töröñan nömeiga alburup̄ñan qakne öngöiga Suep garata mian̄ön noan̄giriga kundun̄i köröp̄ñi qetbuñan̄ambuk kunöñ öngöit. Mian̄göreñ öngöba siti töröñi Jerusalem Suepnöhök Anutugö mireyök eröhi, mi kondel nin̄giiga kewö ehal:

¹¹Anutugö asakmararan̄an mian̄göreñ asariiga kölköl-bilikbilik̄ñan goul aka jamön̄ñin̄ öln̄inambuk söñgöröñini öngöñgöñi mien̄gö tandök ahök. Jamön̄ñin̄ öln̄ambuk qetñi jaspö mi kirin̄ jöhan̄ñi jöhan̄ñi kölköl-bilikbilik̄ñinambuk melen̄da asarimakzei, mönö mian̄gö dop tuatñi ahöyök.

¹²*Kiripon̄i öngöñgöñi mi aködamun̄nambuk. Kiripon̄an̄gö nan̄gun̄i 12 kingetka kösutñine Suep garata 12 dop köla kinget. Israel könagesögö kambun̄i 12 mien̄gö qetñini mi nan̄gu mien̄gö silen̄ine ohogetka kinök.

* **21:3:** Eze 37.27; Lew 26.11, 12 * **21:4:** Ais 25.8; 35.10; 65.19 * **21:6:** Ais 55.1 * **21:7:** 2 Sml 7.14; Sum 89.26-27 * **21:8:** Salfa kötkö könöp̄ñi mi közupkö kötnan̄ jeba gögöriñ qeba jemakzawan̄gö dop akza. * **21:10:** Eze 40.2 * **21:12:** Eze 48.30-35

13 Nanju 12 mi likeplikep eu emu kewö kinget: Wehön kotkotne karöbut, gegeje karöbut, Not likepne karöbut aka Saut likepne karöbut.

14 Siti kiripo mi jamönjin tandö welipninambuk 12 miengö qaknine megetka kinök. Lama morönanjö aposolurupni 12 yengö qetjini 12 mi tandö 12 miangörej ohogetka kinök.

15 *Suep garata nömbuk keu jiyöhi, yanön siti, miangö kiriponi aka nanju 12 miengö dopni dop ala mötmangöra jöjöröba dop alalgö goul öröpni (rula mesa) memba kinök.

16 Siti mi arengöba megetka wangömni 4 ahök. Likeplikep eu emu köröpni mi öröröj. Köröpni mohot mohot mi goul öröpni miangön dop ala 2400 kilo-mita miangö dop ahöi miwiknaiyök.† Andipni mi mewöyök öröröj ahöyök.

17 Suep garatanöj mewöyök siti kiriponi mi gölme azigö dopnöj dop ala 60 mita ahöi miwiknaiyök.

18 *Siti kiriponi mi jamönjin öljambuk qetji jaspö miangön memenja. Siti nanjak mi goul töhönöhök megetka asakmararanan mönö kirin tuatjangö dop asakasakjambuk asariyök.

19 Siti kiriponjangö tandöni mi jamönjin söngöröjini öngöngöni könanji könanji miangön meñölöm engigetka aködamunjinambuk kewö aketka engehal: Tandö mutukni mi jamönjin öljambuk qetji jaspö mundañi injanji tandöktandök. Tandö yahötñi mi jamönjin asonji qetji safaiö, karöbutni mi jamönjin töngöntöngön qetji ageit. Tandö 4:ni mi jamönjin görökni qetji emerald.

20 Tandö 5:ni mi jamönjin pisikpisik qetji sardoniks. Tandö 6:ni mi jamönjin pisikni qetji karnilian, 7:ni mi jamönjin qetji krisolait (qortz), mundañi goul kirin ewö. Tandö 8:ni mi jamönjin asonjon qetji beril, 9:ni mi jamönjin gohotni qetji topaz. Tandö 10:ni mi jamönjin qetji kalsedoni (krisopreis) mundañi kaukau, 11:ni mi jamönjin gohotgohot qetji jeisint (turqois). Tandö 12:ni mi jamönjin pisikni gugakgugak qetji ametist.

21 Siti kiripo nanju 12 mi sorom kötni welipninambuk 12 miangön memenja. Nanju mohot mohot mi sorom kötni mohot mohot miangön urasiba memenja. Sitanöj köna ahözawi, mi goul töhönöhök megetka kirin tuatni ewö asariyök.

22 Siti pakpak yenön Kambu Anutu kukösum pakpakö Tonji aka Lama moröni törörök etkeka urunini lök melenja waikñiri memba möpöseimakze. Miangöra jöwöwöl jike (tempöl) kungöra qahö osimakze. Mi qahö ehal.

23 *Anutugö asakmararanan siti mem asarim engiiga Lama morönan kiwanjini akza. Miangöra wehön köinj asarimahotköra qahö osimakze.

24 *Yanön kiwanjini aiga kantriji kantriji yenön mönö yanjö asakne anda kaba malme. Gölmegö kiñ kembunji kembunji yenön bunjanini aködamunjinambuk mi enjuangita siti miangörej alme.

25 *Siti sönaupni qahö, miangöra kiripo nanju mi nalö kunöj qahö kölmemö, sundan dop tala kinme.

26 Kantriji kantriji yenön urunini melenja aködamunjinangö bunjaninangöra aiweliköba qetbunjaninambuk aka malgeri, mi mönö enjuangita siti miangörej alme.

27 *Ambazip qetjini malmal köhöikjangö qet aren papianöj ohogetka ahözawi, yenönök mönö siti miangörej öngöme. Lama morönan qet aren papia mi galöm kölakza. Kunjan urunji tölohozawi me angöjörak imbilonjonambuk aka munen keu jimakzawi, yanön mönö miangörej öngömangö osima. Mewö.

* 21:15: Eze 40.3 † 21:16: Kambu 12 mohot mohot miengöra 200 kilomita. * 21:18: Ais 54.11-12

* 21:23: Ais 60.19-20 * 21:24: Ais 60.3 * 21:25: Ais 60.11 * 21:27: Ais 52.1; Eze 44.9

22

Malmal köhöikņangö o töwatņi ehal.

¹ *Miangö andöņe Suep garata mianjön malmal köhöikņangö o jeņi kondel niņgiiga Anutu aka Lama moröņi yetkö jakömbuak dumnöhök uzumgöba kaba o töwatņi ahök. Miangö onņi mi kirin jöhanņi jöhanņi kölköl-bilikbilikņinambuk melenđa asarimakzei, mönö miangö dop tuat lalamņi ahök.

² *O töwatņi mianjön sitigö köna namņi bohonņe eta bibiņi mötöteiba kutuba kayök. O töwatņangö göraņe likelike miangöreņ malmal köhöikņangö ipņi mi kinök. Ip miangö ölnan mönö (yara) yambu dop sömaņi 12, mi köiņ mohot mohotkö dop söhöba asuhumakze. Ip miangö sinņan mönö ambazip kantri dop ölöwakņegöra aka kinje.

³ *Kunņan kun qahö toroqeba alaņi saiköba qesuahöma. Anutu aka Lama moröņi yetkö jakömbuak dumniran mönö siti miangöreņ ahöiga Lama moröņangö nup meme ambazipurupņan welen qem waņgimakze.

⁴ Welen qem waņgiba jemesoholņi eka Anutugö qetņi mesoholņine kösöba mekötahögetka ahöma.

⁵ *Miri qahö toroqeba söņauma. Kembu Anutunöņ mem asarim enjimakzawaņgöra kiwa asakņangöra me wehön asakņangöra qahö osime. Mewö oyaenkoyaen mala nalö dop teteköņi qahö kiņ kembu ewö galömkölköl nup memba mal öņgöme.

⁶ Mi ekiga Suep garatanöņ nöņgöra kewö jiyök, “Buņa keu mötzani, mianjön mönö öł töhönņi uruyahötņi qahö akza. Kembu Anutunöņ kezapqetok ambazip sölölohöm enjimakzawi, yaņön mönö Suep garataņi ni melaim niņgiiga asuhum gihiba malal. Yuai pakpak zilaņ asuhumeangö dop akzawi, mötnariņ ambazipurupņan mi mötmegöra mi asuhuba kondel gihial.” Mewö.

Jisösnöņ kunbuk lilingöba kama.

⁷ Jisösnöņ jiza, “Mötket, nöņön mönö zilaņ lilingöba kamam. Tosatņan buk kiangö kezapqetok keuņi buņa qeba qekötahömakzei, yeņön mönö simbawoņ akze.”

⁸ Jon nöņön Buņa keu ki möta jeni meleņniga imutņi ehal. Mi möta ek teköba Suep garatanöņ imut ki kondel niņgiyöhi, nöņön yaņgö waikņi memba möpöseimangö möta gölmenöņ eta könaņe simin kölal.

⁹ Simin kölalmö, nöņgöra kewö jiyök, “Aek! Mewö kude aknöņ. Nöņön gi aka kezapqetok alaurupki aka ambazip buk kiangö Buņa keuņi buņa qeba qekötahömakzei, mönö körek enģö qöhöröņine kinda mohotņe Anutu welen qem waņgimakzin. Nia qahöpmö, mönö Anutu waikņi memba möpöseimakņan.”

¹⁰ Mewö jiba nöņgöra kewö jiyök, “Nalö töriza. Miangöra buk kiangö kezapqetok keuņan tölapņe ahöbapuköra mi papianöņ ohomanmö, mi mönö muņgem supapnöņ (sil) kude qekötahöman.

¹¹ *Bölöņi memakzawaņön mönö toroqeba mewö memba böliqölima. Tölohoba maljawaņön mönö toroqeba tölohoba anģöjörakņambuk aka malma. Ahakmeme diņdiņi ahakzawaņön mönö toroqeba diņdiņanök aka memba malma. Sarakņi ahakzawaņön mönö toroqeba sarakņi kötökņi aka malma.” Suep garatanöņ mewö jiyök.

¹² *Jisösnöņ jiza, “Mötket, nöņön mönö zilaņ lilingöba kamam. Kamami, miangöreņ mönö töwaņini memba kamam. Ahakmemeniņi aka memba malgeri, mönö mi kewöta miangö dop töwaņini mohot mohot al enģimam.

* 22:1: Eze 47.1; Zek 14.8 * 22:2: Jen 2.9; Eze 47.12 * 22:3: Zek 14.11 * 22:5: Ais 60.19; Dan 7.18 * 22:11: Dan 12.10 * 22:12: Ais 40.10; 62.11; Sum 28.4; Jer 17.10

13 **“Nöñön könakönahije mutukñi mala (yuai pakpak miwikñaiba könanjep jibi qahöwahiga) teteköñe qöndökña mal öngöba malmam. Miangö dop nöñön A aka Z, kulem namñi mutukñi aka teteköñi akzal.*

14 **“Nöñön ambazip malukuñini galöm kölakzei, yengöra kiripo nanñuñi öröbiga ölöp siti uruñe öngögetka qahö anñön köñ engibiga malmal köhöikñangö ip öñi neme. Miangöra opo malukuñini galöm köla sanñonmakzei, ambazip mienñön mönö simbawon aka oyaenñkoyaen akze.*

15 **“Yenñön oyaenñkoyaen akñemö, tosatñi yengöra nanñu köñ jöhöbiga yaigep malmei, mi ambazip kewöñi: Kiam ewö kaisero aka qarösongo amötqege ahakze. Serowilin aka ambazip enñuget kömumakze. Tandö lopionñ waikñini memba möpöseimakze aka isimkakalekö sihimñi möta mi ahakze. Ambazip mewöñi pakpak mi mönö kiripo yaigepñe (luhutñe) malme.*

16 **“Jisös nöñön garatani melaibiga liliköba urumelenñ könagesö enñgöra kezapqetok keu ki nanñöba jiiga mötme. Nöñön kiñ Deiwidkö bömönjalöñi aka undumñi akzal. Nöñön söñangö undiñi asakmararanñambuk aka asari-makzal.” Jisösnöñ mewö jiyök.*

17 **“Uña Töröñi aka ambi buña yetköñ kewö jimakzahot, “Jisös, gi mönö kanöñ.” Mewö jiyohotka mötmei, inñini mönö mewöñanök kewö jime, “Jisös, gi mönö kanöñ.”*

Kunñan ogöra mötzawi, yanñön mönö kama. Kunñan malmal köhöikñangö ogöra sihimñi mötzawi, yanñön mönö kaba mi kalema möt anñön köñma. Mewö.

Galöm meme aka jöjöpañ keu teteköñi

18 **“Nöñön buk kiangö kezapqetok keuñi mötmei, körek enñgöra galöm meme keu kewö jizal: Kunñan kezapqetok keu kiambuk keu kun toroqeba jimawi, lömböt kanñamñinambuk asuhumapkö keuñi buk kiangöreñ ohoyali, Anutunöñ mi mönö yanñgö qakñe ali öngöme.*

19 Kunñan buk kiangö kezapqetok keuñi mianñgöreñök keu kun qekömawi, Anutunöñ mönö i anñön köñiga malmal köhöikñangö ip öñi qahö nembra siti töröñe qahö öngöma. Mianñgö keuñi Anutunöñ jöhöbiga buk kianñgöreñ ohoyalmö, keu mianñön mönö yanñgöreñ öññambuk qahö akña.

20 Buña keu ki nanñöba jizawanñön kewö jiza, “Keu mi öñña. Nöñön mönö zilañ lilingöba kamam.”

Mewö jiiga nöñön kewö jizal, “Keu mi öñña. O Kembu Jisös, gi mönö kanöñ.”

21 Kembu Jisösgö kalem möriamñan mönö körek embuk ahöma. Keu mi öñña.

* 22:13: Ind 1.8, 17; 2.8; Ais 44.6; 48.12 * 22:14: Jen 2.9; 3.22 * 22:16: Ais 11.1, 10 * 22:17: Ais 55.1 * 22:18: Dut 4.2; 12.32